

# Tuhun tsa<sub>a</sub> tsa naco<sub>o</sub> jutu mañi yo Jesu- cristo tsi yo

San Juan Colorado Mixtec New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

San Mateo .....	4
Marcos.....	42
Lucas .....	67
Juan.....	107
Los Hechos .....	136
Romanos.....	173
I Corintios .....	188
II Corintios .....	202
Gálatas .....	212
Efesios .....	218
Filipenses .....	223
Colosenses.....	227
I Tesalonicenses .....	231
II Tesalonicenses.....	235
I Timoteo.....	237
II Timoteo .....	242
Tito.....	245
Filemón .....	247
Hebreos.....	248
Santiago .....	259
I San Pedro .....	263
II San Pedro .....	268
I San Juan .....	271
II San Juan.....	275
III San Juan.....	276
San Judas.....	277
El Apocalipsis.....	279

# San Mateo

**Nyivi ra Jesucristo tsa tsicoo tsa ndi cumañi ca cacu ra**  
(Lc. 3.23-38)

**1** Ihya nyecú tandiñi sivi nyivi ra Jesucristo tsa tsicoo tsa ndi cumañi ca cacu ra. Nyivi ra David tan nyivi ra Abraham cuvı tsi ra.

<sup>2</sup> Sehe ra Abraham cuvı tsi ra Isaac, tan sehe ra Isaac cuvı tsi ra Jacob. Tan sehe ra Jacob cuvı tsi ra Judá tsihin tandiñi ra yañi ra. <sup>3</sup> Tan ra Fares tsihin ra Zara sehe ra Judá tsihin ña Tamar cuvı tsi ra naha. Tan sehe ra Fares cuvı tsi ra Esrom, ra cuvı jutu ra Aram. <sup>4</sup> Tan sehe ra Aram cuvı tsi ra Aminadab, jutu ra Naasón. Tan sehe ra Naasón cuvı tsi ra Salmón. <sup>5</sup> Tan ra Booz, sehe ra Salmón tsihin ña Rahab cuvı tsi ra. Tan sehe ra Booz tsihin ña Rut cuvı tsi ra Obed, jutu ra Isaí. <sup>6</sup> Tan ra David, ra cuvı rey, sehe ra Isaí cuvı tsi ra. Tan sehe ra rey David tsihin ñaha tsa cuvı ñasiñi ra Urías cuvı tsi ra Salomón.

<sup>7</sup> Tan sehe ra Salomón cuvı tsi ra Roboam, ra cuvı jutu ra Abías. Tan sehe ra Abías cuvı tsi ra Aza. <sup>8</sup> Tan sehe ra Aza cuvı tsi ra Josafat, ra cuvı jutu ra Joram. Tan sehe ra Joram cuvı tsi ra Uzías. <sup>9</sup> Tan sehe ra Uzías cuvı tsi ra Jotam, ra cuvı jutu ra Acáz. Tan sehe ra Acáz cuvı tsi ra Ezequías. <sup>10</sup> Tan sehe ra Ezequías cuvı tsi ra Manasés, ra cuvı jutu ra Amón. Tan sehe ra Amón cuvı tsi ra Josías. <sup>11</sup> Tan sehe ra Josías cuvı tsi ra Jeconías tsihin tandiñi ra yañi ra. Tsicoo ra naha quivi tñi ra ñuu Babilonia naha ra tsi nyivi Israel, tsa cua cuhun ñi cuvi ñi musu ra ñuu Babilonia can naha ra.

<sup>12</sup> Tsa yahá can, tan tsicoo sehe ra Jeconías, tan ra ican cuvı ra Salatiel, jutu ra Zorobabel. <sup>13</sup> Tan sehe ra Zorobabel cuvı tsi ra Abiud, ra cuvı jutu ra Eliaquim. Tan sehe ra Eliaquim cuvı tsi ra Azor. <sup>14</sup> Tan sehe ra Azor cuvı tsi ra Sadoc, ra cuvı jutu ra Aquim. Tan sehe ra Aquim cuvı tsi ra Eliud. <sup>15</sup> Tan sehe ra Eliud cuvı tsi ra Eleazar, ra cuvı jutu ra Matán. Tan sehe ra Matán cuvı tsi ra Jacob. <sup>16</sup> Tan ra Jacob cuvı jutu ra José, yñi ña María. Juvín ña cuvı siñi ra Jesús ra cuvı Cristo, o cuñi tsi catyí, ra tsa jaquitsı Nyoo tyin quihı ndaha tsi yo.

<sup>17</sup> Tacan tsicoo utsi cumi taahan tata ra Abraham nda cuanda cacu ra David. Tan ra David, tsicoo utsi cumi tata ra nda cuanda quivi tñi ra ñuu Babilonia naha ra tsi nyivi Israel. Tan nda cuanda quivi can tsicoo utsi cumi ca tata ñi nda cuanda quivi cacu ra Cristo.

**Nu cacu ra Jesucristo**  
(Lc. 2.1-7)

<sup>18</sup> Tyehen cuvı tan cacu ra Jesucristo: tsa yahá cundaq tyiñu tsa cua tindaha ña María tsihin ra José. Tan tsa

ndi cumañi ca naquihin ra tsi ña, ñihı sehe ña tsa cuenda Tatyı Iı Nyoo. <sup>19</sup> Tan ra José, ra cua cuvi yñi ña, vaha xaan iñi ra. Ña cuñi ra cuhva ra ticanuu tsi ña. Yacan cuenda tsicá iñi ra tsa nacoo xeehe ra tsi ña tan ña cua tindaha ca ra tsihin ña. <sup>20</sup> Tan tsitsi tsa tsicá iñi ra yacan, quituvı iin ángel Jutu Mañi yo nuu ra nu quixı ra. Tan nyehę ra ñumaahna, tan catyı ángel can tsihin ra: —José, tata ra David, ña çaca iñi un quihin un tsi ña María cuvi ña ñasiñi un, tyin sehe ña tsa cua cacu, sehe Tatyı Iı Nyoo cuvı tsi. <sup>21</sup> Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyı ñuu ñayivi —catyı ángel can tsihin ra José.

<sup>22</sup> Tacan cuvı tyin tacan tan cundaa tsa cahán ra cuvı ndusu yuhu Jutu Mañi yo tahán tsanaha.

<sup>23</sup> Tan catyı ra tyehen:

Ñaha yoco tsa ñaha ca coo yñi, cua cuhun sehe ña. Tan cua coo iin sehe ña. Tan cua cunañi ra: Emanuel. Tan sivi can cuñi tsi catyı: “Nyoo iyó ra tsihin yo.”

<sup>24</sup> Tan tsa ndoto ra José, javahá ra tumaa catyı ángel can tsihin ra. Quihın ra tsi ña María tyin cuvi ña ñasiñi ra. <sup>25</sup> Maa tyin ña quixı ra tsihin ña nda cuanda tsa yahá cacu sehe ña. Tan jacunañi ra tsi lee can: Jesús.

**Nu cuahán ra tsitó xaan, ra cuvı rey, cua nyehę ra naha nu cacu ra Jesús**

**2** Cacu ra Jesús ñuu Belén tsa canyii nu cuvı Judea. Tan quivi can ra cuvı rey Judea nañi ra Herodes. Tacan tan tsaq juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuvı ra naha. <sup>2</sup> Tsicá tuhun ra naha tsi nyivi tan catyı ra naha: —¿Nu maa nyii ra cuvı rey cuenda nyivi Israel? Tyin ityi nu caná ñicanyii nyehę ndi tiñuu tsa tsahá cuenda tyin cacu ra ityi ihya. Tan vatsı ndi vatsı jacahnu ndi tsi ra —catyı ra naha.

<sup>3</sup> Quivi tsa tsito ra rey Herodes tsa cahán ra can naha ra, tuñu xaan cuñi ra cuvı. Tacan tucu tandiñi nyivi ñuu Jerusalén can. <sup>4</sup> Tacan tan caná ra Herodes tsi tandiñi ra jutu tsa cuvı ityi nuu tsihin ra cuvı jutu tan tsihin tandiñi ra cuvı maestro cuenda ley vehe ñuhu naha ra. Tan tsicá tuhun ra tsi ra naha numaa nda taahán tsi cacu ra Cristo. <sup>5</sup> Tan nacahán ra can naha ra tan catyı ra naha:

—Ñuu Belén tsa canyii Judea, ndacan taahán tsi cacu ra tyin tyehen tyaa ra cuvı ndusu yuhu Nyoo nu tutu tahán tsanaha:

<sup>6</sup> Tan yooho Belén ñavin iin ñuu luhlu ñi cuvı un tsa nuu tandiñi maa ñuu tsa cayucú Judá

tyin nuu yooho cua quita ra cua quihí ndaha tsi nyivi ñuu yu Israel. Maa ra cua jaha cuenda ra tsi ñi. Tacan catyí nu tutu Nyoo, —catyí ra can naha ra tsihin ra Herodes.

<sup>7</sup> Tacan tan canā xeehe ra Herodes tsi ra tsitó xaan can naha ra, tan tsicā tuhun ra tsi ra naha náa quivi tan náa hora quituví tiñuu can. <sup>8</sup> Tacan tan jacuhun ra tsi ra naha nda ñuu Belén, tan catyí ra tsihin ra naha:

—Cyaahan ndo, tan ndāca tuhun vaha ndo tsa cuenda ra lee can. Tatun nañihi ndo tsi ra, quitsi catyi tuhun ndo tsihin yu, tyin cuhun ndihi yu cujacahnu yu tsi ra —catyí ra Herodes tsihin ra naha.

<sup>9</sup> Tsa tsiñi ra tsa tsitó xaan can naha ra tsa cahān ra Herodes, tan quihin ra naha ityi cuahān ra naha. Tan tiñuu tsa nyehe ra naha ityi nu canā ñicanyii can, cuahān tsi ityi nuu ra naha. Tan tsicuiñi tsi maa maa siqui nu canyí ra lee can. <sup>10</sup> Tan tsa nyehe ra tsitó xaan can naha ra tyin tsicuiñi tiñuu can, si xaan cuñi ra naha. <sup>11</sup> Tan quihvi ra naha tsitsi vehe nu canyí lee can. Tan nyehe ra naha tsi ra tsihin ña María, sihi ra. Tan tsicuiñi tsiti ra naha tyin jacahnu ra naha tsi lee can. Tacan tan nuñā ra naha yuhu caja tsa ndahá ra naha. Tan tavā ra naha regalo tsa cuví xuhun cuaan, tan cutu vixi, tan ndutya tamí tsa nañi mirra. Tan tsahā ra naha tsi lee can. <sup>12</sup> Tsa yahā tsa nyehe ra naha tsi ra Jesús tan cuanuhu ra naha. Tan tsa cuanuhu ra naha nyehe ra naha ñumaahna tan catyí tsi tyin ña taahān tsi cuhun ra naha cucatyí tuhun ra naha tsihin ra Herodes. Yacan cuenda siin ityi cuanuhu ra naha.

#### Nu tsinu xeehe ra José tan ña María tsihin lee sehe ñi nda Egipto

<sup>13</sup> Tsa yahā cuahān ra tsa tsitó xaan can naha ra, tacan tan iin ángel Jutu Mañi yo quituví nuu ra José tsitsi ñumaahna. Tan catyí ángel can tsihin ra:

—Nduvita, quihin tsi lee ihya, tsihin sihi ra, tan cyhun ndo nda ñuhu Egipto. Ndo ndo ndacan nda cuanda cahan nyico yu tsihin un. Tyin ra Herodes cua nanducu ra tsi ra lee ihya tyin cuñi ra cahñi ra tsi ra —catyí ángel can tsihin ra José.

<sup>14</sup> Tacan tan nduvitā ra José tsacuaa can. Tan quihin ra tsi lee can tsihin sihi tsi. Tan cuahān ñi nda Egipto.

<sup>15</sup> Ndacan tsicoo ñi nda cuanda tsa tsihi ra Herodes. Tacan cuví tyin cundaā tsa cahān ra cuví ndusu yuhu Jutu Mañi yo tahān tsanaha jahā Nyoo. Tyehen catyí ra: “Nda Egipto canā yu tsi Sehe yu”, catyí ra.

#### Nu tavā tyiñu ra Herodes na cahñi ra naha tsi ra nyihi

<sup>16</sup> [Tsa ndi cumañi ca cúu ra Herodes tan ndi ndatú ra tsa quitsi nyico ra tsitó xaan can naha ra] tan tsa tuví iñi ra Herodes tyin ra tsitó xaan can naha ra jandaví ñaha ra naha tsi ra, tan nduxaān xaan ra. Tan tavā tyiñu ra na cahñi andaru tsi tandihí ra nyihi tsa iyó ñuu Belén can tan inga ñuu tsa cayucú yatyin ñi, ra nyihi tsa ndi cacú nda cuanda ra nyihi tsa uvi cuiya. Tacan javahā ra tyin tsicá iñi ra tyin tacan cuiya ra Jesús tumaa catyí ra tsitó xaan can naha ra tsihin ra. <sup>17</sup> Tacan

cuví tyin cundaā tsa cahān Nyoo tan tyaa ra Jeremías, ra cuví ndusu yuhu ra tahān tsanaha. Tyaa ra tyehen:

<sup>18</sup> Tsiñi yo iin ndusu ñuu Ramá, tsacú tsa nyivi, tan iyo taahān ñi.

Juvin ñi nyivi cuví tata ña Raquel, nyivi Israel, tsacú tsa ñi tsa cuenda sehe ñi.

Maa tyin ña cuñi ñi tsa naquihin ndaahvi nyivi tsi ñi tyin tsa yahā tsihi sehe ñi, catyí tsi nu tutu Nyoo.

<sup>19</sup> Maa tyin tsa yahā tsa tsihi ra Herodes, tacan tan quituví nyico iin ángel Jutu Mañi yo nuu ra José nu quixí ra nda Egipto. Tan catyí ra tsihin ra:

<sup>20</sup> —Nduvita, quihin tsi lee ihya tsihin sihi ra. Tan cyunhu nyico ndo nda Israel, tyin tsa tsihi nyivi nducu cahñi tsi ra lee ihya.

<sup>21</sup> Tacan tan nduvitā ra José, tan quihin ra tsi lee can tan tsihin sihi ra. Tan cuanuhu ñi nda Israel. <sup>22</sup> Maa tyin quivi tsitō ra José tyin ra Arquelao, sehe ra Herodes, cuví ra rey nda Judea, nayuhvi ra tan ña cuñi ra cuhun ra ndacan. Tan cuanuhu ñi nda Galilea tyin tacan jacoto Nyoo tsi ra tsitsi ñumaahna. <sup>23</sup> Tsa tsaā ñi ican, tan cuahān ñi nda ñuu Nazaret, cua coo ñi. Tan ican tsicoo ñi. Tacan cuví tyin cundaā tsa cahān ra cuví ndusu yuhu Nyoo tahān tsanaha. Tyin catyí ra naha tyin ra Jesús ra ñuu Nazaret cua cuví ra.

#### Nu cahān ra Juan tuhun Nyoo tsihin nyivi

(Mt. 1.1-8; Lc. 3.1-9, 15-17; Jn. 1.19-28)

**3** Quivi tsa ndi iyó ñi ñuu Nazaret, ra Juan, ra jacoondutyá tsi nyivi, cuahān ra nu tsiqui tsa iyó Judea. Tan quitsahā caahān ra tuhun Nyoo tsihin nyivi tsa tsaá nu nyii ra. <sup>2</sup> Tan catyí ra:

—Ndu uvi iñi ndo cuatyí ndo tyin tsa cuñi tsa quivi cundaca ñaha Nyoo tsi yo.

<sup>3</sup> Juvin ra Juan cuví ra tsa cahān ra Isaías ra cuví ndusu yuhu Nyoo tahān tsanaha. Tan tyaa ra tsa tsahā Nyoo tsi ra tyehen:

Cua tyaa soho yo ndusu ra nu canā tsa ra nu tsiqui tan catyí ra:

“Nuñā ndo iin ityi cuiti.

Tan natyiso vaha ndo tsi ndo tyin tsa vatsi Jutu Mañi yo,” catyí tuhun tsa tyaa ra Isaías.

<sup>4</sup> Tan ra Juan nditsí ra jahma tsinu tsihin ixi camellu. Tan cinturón ra, ñi cuví tsi. Tan tica xama tsatsí ra tan tsihi ra ndutya ñuñu. <sup>5</sup> Quitsi nyivi ñuu Jerusalén tan tandihí ñuu tsa cayucú Judea, tan nyivi tsa iyó yatyin ñi ityi yutya cahnú Jordán can; quitsi tyaa soho ñi tuhun caahān ra. <sup>6</sup> Tan tsa yahā nahmā ñi cuatyí ñi, ra Juan jacoondutyā ra tsi ñi yutya cahnú Jordán ican.

<sup>7</sup> Maa tyin nyehe ra Juan tyin cuaha xaan ra fariseo, ra tsa tyaa yahvi xaan ley vehe ñuhu, tan cuaha xaan ra saduceo, quitsi ra naha tyin coondutyā ra naha. Tan catyí ra tsihin ra naha:

—iNyooho, tumaa tata coo xaan cuví ndo! ¿A cuñi maa ndo tyin tsihin tsa coondutyā ñi ndo tan ña cua tatsi tuñi ca Nyoo tsi ndo? Ña cuví. <sup>8</sup> Nāsama ndo cuhva iyó ndo, na nyehe yo tyin tsa ndu uvi iñi ndo cuatyí ndo nuu Nyoo. <sup>9</sup> Maa tyin ña nduyaa ndo tan catyí ndo tyin nyivi tata ra Abraham cuví ndo. Tyin vasu tsihin

yuu ihya, Nyoo cuví jananduvi ra nyivi ra Abraham.  
<sup>10</sup> Tsa ndatú yatsa Nyoo tsi tandihí ndo tsa cuví ndo tumaa yutun tsa ña tsahá tsiti vaha. Cua tyahnya tun tan cua cayu tun, tacan cua javaha Nyoo tsihin ndo —catyí ra Juan—. <sup>11</sup> Tsa nditsa tyin yuhu jacoondutyá yu tsi nyivi tsihin ndutya, tan cuví tsi iin seña tyin tsa ndu uvi iñi ñi cuatyí ñi. Maa tyin tsa yaha jacoondutya yu tsi ñi tsihin ndutya, vatsí inga ra cua jacoondutya tsi ñi tsihin Tatyí Ii Nyoo tan tsihin ñuhú ihñi. Iyó ca tunyee iñi Nyoo tsi maa ra tan ñavin ca yuhu. Tan ndi tsa cuiso yu nditsan ra tan nduve yahvi nyaá yu, tyin maa ra cahnu ca cuví ra. <sup>12</sup> Tan ra ican ndahá ra pala tyin cua jandava ra trigu. Cua tava sñin ra trigu vaha, tan cua natyihi vaha ra itsi. Tan cua cahmi ra tsahan tsa quita tsihin trigu can tsihin ñuhú tsa ña cua ndahva maa —catyí ra Juan.

### Nu tsicoondutya ra Jesús

(Mr. 1.9-11; Lc. 3.21-22)

<sup>13</sup> Tacan tan quitá ra Jesús Galilea tan tsaá ra yutya cahnu Jordán nu nyí ra Juan, tyin cuñí ra tsa jacoondutya ra Juan tsi ra. <sup>14</sup> Tsa jihna ñi ña cuñí ra Juan jacoondutya ra tsi ra, tan quitsahá catyí ra tsihin ra: —Cuñí un tsa jacoondutya yu tsi un, maa tyin ña taahán tsi tsa jacoondutya yu tsi un. Maa un taahán tsi jacoondutya tsi yu —catyí ra.

<sup>15</sup> Maa tyin ra Jesús catyí ra tsihin ra: —Tsa vityin, na cuvi tsi cuhva catyí yu tsihin un. Tyin cuñí tsi tsa javaha yo tandihí tsa vaha tsa cuñí Nyoo —catyí ra tsihin ra Juan.

Tacan tan ndoq ra Juan vaha.

<sup>16</sup> Tsa yahá tsicoondutya ra Jesús tan quitá ra tsitsi ndutya. Tan nuñá andivi, tan ra Jesús nyehé ra vatsí nuú Tatyí Ii Nyoo, tumaa iin paloma. Tan tsaá tsi síqui ra. <sup>17</sup> Tacan tan cahán iin ndusu ityi andivi, tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan sñi xaan cuñí yu tsihin ra —catyí ndusu can.

### Nu nducy cuhva nu ña vaha tsi ra Jesús

(Mr. 1.12-13; Lc. 4.1-13)

**4** Tacan tan tsindacá Tatyí Ii Nyoo tsi ra Jesús iin nu tsiquí, tyin cua nducu cuhva nu ña vaha tsi ra.

<sup>2</sup> Tsicoq nyitya ra uvi xico nduvi tan uvi xico tsacuaa. Tsa yahá can tan quitsí socó tsi ra. <sup>3</sup> Tacan tan natuhvá nu ña vaha nu nyaá ra, tyin cuñí nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahán tsihin yuu ihya, na nanduvi tsi paan —catyí nu ña vaha tsihin ra Jesús.

<sup>4</sup> Maa tyin ra Jesús nacahán ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyivi tan coonyito ñi, tyin coonyito ñi tsihin tandihí tuhun caahán Nyoo” —catyí ra Jesús tsihin nu ña vaha.

<sup>5</sup> Tacan tan quihín nu ña vaha tsi ra. Tan cuahán ra tsihin nu nda ñuu ii Jerusalén. Tan jandaq nu tsi ra jiñi vehe ñuhu cahnu. <sup>6</sup> Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda cuanda nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un.

Cua janahndi ra naha tsi un, tan ña cua nañi tsaha un nuu yuu.

<sup>7</sup> Tan nacahán ra Jesús tan catyí ra:

—Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

<sup>8</sup> Tacan tan quihín nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janahá nu tandihí tsa cahnu cuví nu ndacá ñaha rey tan ra cumí tyiñu naha ra tsi nyivi iyó nu ñuhu ñayivi. <sup>9</sup> Tan catyí nu tsihin ra:

—Yuhu cuhva yu tandihí maa tsa janahá yu tsi un, tatun yooqo tan cuiñi tsiti un nuu yu tan jacahnu un tsi yu.

<sup>10</sup> Tacan tan nacahán ra Jesús tan catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jacahnu tsi intuhun ñi maa Jutu Nyoo, tan jaha tyiñu tyiñu ra.”

<sup>11</sup> Tacan tan cuahán nu ña vaha, tan ndoq ra Jesús. Tan tsaá ángel tan jatyinyee ra naha tsi ra.

### Nu quitsahá caahán ra Jesús tuhun Nyoo tsihin nyivi tsa iyó ñuu tsa cayucú Galilea

(Mr. 1.14-15; Lc. 4.14-15)

<sup>12</sup> Quivi tsa tsito ra Jesús tyin ra Juan nyí ra vehe caa, cuahán ra nda Galilea. <sup>13</sup> Maa tyin ña ndoq ra ñuu Nazaret, nu tsahnú ra. Cuahán ra cua coo ra nda ñuu Capernaum, iin ñuu tsa canyí yatyin ñi yuhu miñi, nu ñuhu ra Neftalí yatyin ñuhu ra Zabulón. <sup>14</sup> Tacan tan cundaq tsa cahán ra Isaías, ra cuví ndusu yuhu Nyoo, tahán tsanaha. Tan catyí ra:

<sup>15</sup> Ñuhu ra Zabulón tan ñuhu ra Neftalí tsa cayucú yuhu miñi inga tsiyo yutya cahnu Jordán, tsa cuví Galilea nu iyó nyivi tsa ñavin nyivi Israel cuví. <sup>16</sup> Nyivi iyó nu naa, ñi iyó nu iyó tixahñu tuhun tsihi, nyehé ñi iin ñuhú nditsin tsa jandunditsin nu yucú ñi, catyí ra Isaías.

<sup>17</sup> Nda cuanda quivi can, tan quitsahá caahán ra Jesús tuhun Nyoo tsihin nyivi, tan catyí ra tsihin ñi: —Ndu uvi iñi ndo cuatyí ndo tyin tsa cuñí tsa quivi cundaca ñaha Nyoo tsi ndo —catyí ra Jesús tsihin nyivi.

### Nu caná ra Jesús tsi cumi taahan ra tsa tíñ tyaca

(Mr. 1.16-20; Lc. 5.1-11)

<sup>18</sup> Ra Jesús tsicá ra yuhu miñi tsa nañi Nduya Ñuhu Galilea. Tan nyehé ra tsi uvi taahan ra tsihin yañi ra, ra Simón tsa nañi tucu Pedro, tan ra Andrés. Ra tíñ tyaca cuví ra naha. Tan cañi ra naha traya ra naha nu ndutya. <sup>19</sup> Tacan tan catyí ra Jesús tsihin nduvi taahan ra naha:

—Naha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tíñ ndo tyaca, tacan cua ñihi ndo nyivi cua cuví nyivi Nyoo —catyí ra Jesús tsihin ra naha.

<sup>20</sup> Juvín ñi cuhva can nacoꝝ ra naha traya can, tan cuahán ra naha tsihin ra Jesús.

<sup>21</sup> Luxu ñi tsicá ra naha ityi nuu, tan nyehe ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan caná ra Jesús tsi ra naha. <sup>22</sup> Juvín ñi cuhva can tan nacoꝝ ra naha tsi jutu ra naha tan yutun ndoo can, tan cuahán ra naha tsihin ra.

#### Nu cuaha xaan nyívi jacuahá ra Jesús

(Lc. 6.17-19)

<sup>23</sup> Cuahán ra Jesús tsicá ra tandihí ñuu cuenda Galilea jacuahá ra tsi nyívi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvahá ra tsi nyívi cuuhví tsihin tandihí ñi nuu cuehe tsa yihí tsi ñi. <sup>24</sup> Tacan tan tsitꝝ tandihí nyívi ñuu cuenda Siria tuhun ra Jesús. Tan tsindacá ñi tandihí nyívi cuuhví tsi ra: juhva ñi yihí tatyí ña vaha. Tan yihí ñi tsihií naaha ñi. Tan yihí ñi ndohó ñi cuehe xii. Tan janduvahá ra Jesús tsi tandihí ñi. <sup>25</sup> Cuaha xaan nyívi nyicún tsi ra Jesús: nyívi iyó ñuu tsa cayucú Galilea, nyívi tsa queꝝ nu utsi taahan ñuu tsa nañí Decápolis, nyívi iyó ñuu Jerusalén tan tandihí ca ñuu tsa cayucú Judea, tan nyívi iyó inga tsiyo yutya cahnu Jordán.

#### Nu cahan ra Jesús tsihin nyívi nu tsiquí

(Lc. 6.20-23)

**5** Nyehe ra Jesús tyin cuaha xaan nyívi, tan ndaa ra iin nuu yucu. Tan tsicunyaꝝ ra ican. Tacan tan nyívi tsicá tsihin ra, tsinunduví ñi tsi ra. <sup>2</sup> Tacan tan quitsaha jacuahá ra tsi ñi tan catyí ra:

<sup>3</sup> Nasocó Nyoo tsi tandihí nyívi tsa tsitꝝ tyin tsiñí ñuhu ra tsi ñi, tan tsa cuenda ñi cuví nu ndacá ñaha ra.

<sup>4</sup> Tan tandihí nyívi tsa cuiihya cuñí tsa cuenda cuatyí ñi, nasocó Nyoo tsi ñi tan ña cua coo ca ñi tucuiihya iñi.

<sup>5</sup> Tan tandihí nyívi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayívi tsa catyí Nyoo tyin cuhva ra tsi ñi.

<sup>6</sup> Tan tandihí nyívi tsa cuñí xaan javaha cuhva catyí Nyoo, nasocó Nyoo tsi ñi, tan cua jatyinyee ra tsi ñi tan cua cuví javaha ñi cuhva cuñí maa ra.

<sup>7</sup> Tan tandihí nyívi tsa cundaahví iñi tsi inga nyívi, nasocó Nyoo tsi ñi, tan cua cundaahvi iñi ra tsi ñi.

<sup>8</sup> Tan tandihí nyívi tsa janduvahá Nyoo añima, nasocó ra tsi ñi, tan cua nyehe ñi tsi ra.

<sup>9</sup> Tan nyívi tsa nducú cuhva tsa coo vaha nyívi tsihin Nyoo tan tsihin inga nyívi, nasocó ra tsi ñi tan cua catyí ra tyin sehe ra cuví tsi ñi.

<sup>10</sup> Tan tandihí nyívi tsa javahá cuhva cuñí Nyoo tan ndasi cuñí nyívi nyehe ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra. <sup>11</sup> Nasocó Nyoo tsi nyooho tsa caahán nyívi ndavaha ñi tsata, tan javahá ñi tsa uhvi tsi ndo, tan caahán ñi cuendu tsa ña nditsa siquí ndo tsa cuenda tsa tsinú iñi ndo tsi yu.

<sup>12</sup> Cusí iñi ndo tun tacan javahá nyívi tsihin ndo; sñi cuñí ndo, tyin cahnu xaan tan sñi xaan caá tsa cua ñihi

ndo nda gloria. Tyin juvín ñi tacan javahá nyívi tsa ña vaha tsihin tandihí ra cuví ndusu yuhu Nyoo tahán tsanaha.

#### Tatun jandihí yo tsa tsinú iñi yo tsi Nyoo cuví yo tumaa ñii tsa ndihí tsa uhva

(Mr. 9.50; Lc. 14.34-35)

<sup>13</sup> Nyooho tsa tsinú iñi tsi yu, tumaa ñii vaha cuví ndo. Maa tyin tatun ñii, tan ndihí tsa uhva tsi, ña cua jandu uhva ca tsi tsa catsi yo. Ña vaha ca ñii can. Tacan tan javita yo can, tan cuañi nyívi tsata can.

#### Tatun tyaá yahvi vaha yo tuhun caahán Nyoo, cuví yo tumaa ñuhú tsa jandunditsín nu tsicá nyívi nu naa

<sup>14</sup> Nyooho cuví ndo tumaa ñuhú tsa jandunditsín nu tsicá nyívi. Iin ñuu tsa canyíi jiñi iin yucu, ña cua cuví quihí xeehe tsi. <sup>15</sup> Ña tuhvá yo tyaá ñuhú tyuma, tan tyihí xeehe yo itsi tsitsi iin caja. Tyin tuhvá yo tyaá ñuhú tan tinyíi yo itsi iin nu sucun tyin tacan tan jandunditsín tsi nu yucú yo tsitsi vehe yo. <sup>16</sup> Tan tacan taahán tsi jandunditsín tucu nyooho tsihin ñuhú Nyoo tsa iyó añima ndo nu tsicá nyívi. Tacan tan nyehe ñi tsa vaha tsa javahá ndo, tan jacahnu ñi tsi Jutu yo Nyoo, ra nyaá gloria.

#### Nu jacuahá ra Jesús tyin ñiñi xaan javaha yo tandihí tuhun tsa tsahá Nyoo tsi yo tan jacuahá yo itsi tsi nyívi

<sup>17</sup> Ña cuñi ndo tyin yuhu vatsí janaa yu ley tsa tsahá Nyoo tsi ra Moisés tyin tyaa ra. Tan ndi ña vatsí janaa yu tuhun tsa tyaꝝ tandihí ra cuví ndusu yuhu Nyoo tahán tsanaha. Ñavin tyiñu can vatsí yu. Yuhu vatsí yu vatsí tyaa yahvi yu tsa caahán ley can, tan catyí tuhun yu tsihin ndo náa cuñí tsi catyí ley can. <sup>18</sup> Tsa nditsa catyí yu tsihin ndo tyin tsitsi tsa ndi iyó ñuhu ñayívi tan andívi, ña cua naa ndi luxu ley tsa tyaꝝ ra Moisés tyin tandihí maa tsa tyaꝝ ra naha tan cua cundaa tsi. <sup>19</sup> Yacan cuenda, ra tsa ña tyaá yahvi cuhva catyí Nyoo, vasu iin tsa luhlu ñi; tan janahá ra tsi nyívi na javaha ñi tacan, luxu cuii ñi cua cuví ra nu ndacá ñaha Nyoo. Maa tyin ra tsa tyaá yahvi tandihí, tan janahá ra tsi inga nyívi, cahnu xaan cua cuví ra nu ndacá ñaha Nyoo. <sup>20</sup> Catyí yu tsihin ndo tyin tun ña tyaá yahvi vaha ca ndo tsi Nyoo tan ñavin ca tumaa javahá ra cuví maestro cuenda ley vehe ñuhu naha ra, tan ra cuví fariseo naha ra, ña cuví quihvi ndo nu ndacá ñaha Nyoo.

#### Nu caahán ra Jesús tsihin yo tyin ña taahán tsi cahan yo tsi nyívi

<sup>21</sup> Nyooho tsa cuaha tsaha tsiñi ndo tsa catyí Nyoo tsihin nyívi tsicoꝝ tahán tsanaha. Catyí ra: "Ña cahñi ndo tsi nyívi, tyin tatun cahñi ndo nyívi, taahán tsi tsa cutuñi ndo." <sup>22</sup> Maa tyin yuhu, catyí yu tsihin ndo, tyin vasu tsa cuxaán ñi ndo tsi iin nyívi, vasu tsa caahán nyaá ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyí ndo tyin soho xaan caá ñi, taahán tsi cahun ndo anyaya tsa cuenda cuatyí can.

<sup>23</sup> Tan yacan cuenda quivi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javahá un tsi yañi un, <sup>24</sup> nācoo tsa cuahán tsihin un ityi nu altar vehe ñuhu. Tan cūhun ji-hna un ndacan un tucahnu iñi tsi yañi un. Tacan tan cūhun un nda vehe ñuhu inga tsaha, tan cūhva cuenda un tsa cua jamañi un tsi Nyoo.

<sup>25</sup> Tatun iin ra tsicán cuatyí tsaha un, tan cuahán un tsihin ra nda nu nyaá ra cumí tyiñu, ndūcu cūhva cahan un tsihin ra tyin tacan tan ña cundaca ra tsi un nu nyaá ra cumí tyiñu, tyin ra cumí tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihi ra naha tsi un vehe caa. <sup>26</sup> Tan tsa nditsa catyí yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandihí xuhun tsa cua ndacan ra naha.

### Nu caahán ra Jesús tyin ndi tsa tsicá iñi yo tsa coo inga ñaha, o inga rayi tsi yo, tan ña vaha

<sup>27</sup> Nyooho tsa tsiñi ndo tyin catyí Nyoo tahān tsanaha tyin nyooho tsa iyó ñasiñi, ña cua coo inga ñaha tsi ndo, tan ndi ñaha tsa iyó yñ tan ña taahán tsi coo inga rayi tsi ña. <sup>28</sup> Maa tyin yuhu catyí yu tsihin ndo, nyooho tsa nyehé iin ñaha tan cuñi ndo coo ndo tsihin ña, tsa tsicoo cuatyí ndo.

<sup>29</sup> Tatun tinuu cuaha un janacavá tsi un tsitsi cuatyí, vaha taxin ca tava un tinuu un tan javita un can. Tyin vaha ca quihvi un nu ndacá ñaha Nyoo tsihin intuhun ñi tinuu un, tan ñavin ca tsa cūhun un anyaya tsihin nduvi taahan tsi. <sup>30</sup> O tatun iin ndaha un janacavá tsi un tsitsi cuatyí, vaha taxin ca cāhnya un ndaha un tan javita un can. Tyin vaha ca tsa quihvi un nu ndacá ñaha Nyoo tsihin tsa lundu ndaha un, tan ñavin ca tsa nanñi un tan cūhun un anyaya.

### Nu caahán ra Jesús tyin ña vaha tsa nacoo ihñi rayi tsi ñasiñi ra

(Mt. 19.9; Mr. 10.11-12; Lc. 16.18)

<sup>31</sup> Tan juven ñi catyí Nyoo tsihin nyivi tsicoo tahān tsanaha tyin yoo ra nacoo ihñi ñasiñi ra, cuñi tsi tsa caní ra tutu tsa tindahā ra tsihin ña. <sup>32</sup> Maa tyin catyí yu tsihin ndo tyin nduve ndatu iyó tsi rayi tsa nacoo ra ñasiñi ra tatun ña quituví ña tsihin inga rayi. Tyin tatun nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatun quihin ña inga rayi cua coo ndihí cuatyí ña. Tan tacan ra tsa cua quihin tsi ña cua coo ndihí cuatyí ra.

### Ña cahan yo “naha Nyoo maa”

<sup>33</sup> Tan tsiñi ndihí ndo, tyin catyí tucu Nyoo tsihin nyivi tsicoo tahān tsanaha: “Tatun catyí ndo ‘naha Nyoo maa’ tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo.” <sup>34</sup> Maa tyin yuhu catyí yu tsihin ndo tyin ña cahan ndo “naha Nyoo maa”. Tan ña cāhan ndo tuhun andivi, tyin yacan cuví nu nyaá Nyoo. <sup>35</sup> Tan ndi tuhun ñuhu

ñayivi ihya ña cāhan ndo, tyin ihya cuví nu tsañi Nyoo. Tan ndi ña cāhan ndo tuhun ñuu Jerusalén, tyin ican cuví ñuu maa Nyoo tsa cuví ra Rey cahnu ca. <sup>36</sup> Tan ndi ña cāhan ndo tuhun jiñi ndo, tyin ña cuvi janducuitsin ndo tan ndi tsa jandutuun ndo ndi intuhun ixi jiñi ndo. <sup>37</sup> Vaha ca cāhan ndo iin ndaha ñi tun nditsa o tun ña nditsa tsa caahán ndo. Tyin tsa catyí ndo “naha Nyoo maa” nu ña vaha jacahán tsi ndo tsa cahan ndo tacan.

### Nu caahán ra Jesús tyin tatun javahá nyivi tsa ña vaha tsihin yo, na javaha yo tsa vaha tsihin ñi

(Lc. 6.29-30)

<sup>38</sup> Tan tsiñi tucu ndo tsa catyí Nyoo tahān tsanaha: “Tatun cañi nyivi tsi ndo, tan tavá ñi iin nuhu ndo, o iin tinuu ndo, taahán tsi tyin javaha ndihí ra cumi tyiñu tacan tsihin ñi, tumaa tsa javahā ñi tsihin ndo.” <sup>39</sup> Maa tyin yuhu catyí yu tsihin ndo, tyin ña javaha ndo tsa ña vaha tsa javahá nyivi xaan cuñi nyehe tsi ndo. Tyin tun yoo cañi iin tsiyo nuu ndo, taahán tsi tsa cūhva ndihí ndo inga tsiyo na cañi ndihí ñi, tan ña cūxan ndo tsi ñi. <sup>40</sup> O tatun tsicán ñi cuatyí tsaha ndo, tan cuñi ñi quihin nya ñi iin camisa ndo. Taahán tsi cūhva ndihí ndo chamarra ndo tsi ñi tan ña cua cūxan ndo tsi ñi. <sup>41</sup> O tatun yoo cuñi cundaca ndo ndaha tyiñu ñi iin kilómetro, taahán tsi cundaca ndo can uvi kilómetro. <sup>42</sup> Tatun yoo nyivi tsicán tumañi iñi tsi ndo, cūhva ndo tsa nducu ñi. Ña catyí ndo tyin ña javaha ndo tumañi iñi can tsi ñi.

### Na cuñi yo tsi nyivi xaan iñi tsi yo

(Lc. 6.27-28, 32-36)

<sup>43</sup> Tan tsiñi tucu ndo tyin catyí Nyoo tahān tsanaha: “cuñi ndo tsi ra vaha iñi tsi ndo. Tan xaan cuñi ndo nyehe ndo tsi ra xaan iñi tsi ndo.” <sup>44</sup> Maa tyin yuhu catyí yu tsihin ndo, cuñi ndo tsi nyivi xaan iñi tsi ndo. Tan javaha ndo tsa vaha tsihin nyivi caahán tsi ndo, tan tsi nyivi ña cuñi nyehe tsi ndo. Tan ndacan tahvi ndo tsi Nyoo tsa cuenda nyivi tsa caahán nya tsi ndo tan tsa cuenda ñi tsa jacuví tsa uhvi tsi ndo. <sup>45</sup> Tatun javahá ndo tacan, cuví ndo sehe Jutu yo ra nyaá gloria. Tyin maa ra jacaná ra ñicanyii, tan jacuún ra savi nuu tyiñu jahá nyivi vaha tan nyivi ña vaha. <sup>46</sup> Tatun nyooho tan cuñi ndo tsi nyivi vaha iñi tsi ndo tan ndasi cuñi ndo nyehe ndo tsi nyivi xaan iñi tsi ndo, nduve tsa vaha cua ñihí ndo. Tyin juven ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñi maa ndo tyin quihí xaan iyó ra can naha ra. <sup>47</sup> Tatun tsahá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyivi, nduve tsa vaha xaan javahá ndo. Tyin juven ñi tacan javahá nyivi tsa ña tsitó tuhun Nyoo. <sup>48</sup> Tumaa Jutu yo tsa nyaá gloria cuñi xaan iyó ra, tacan taahán tsi coo tucu nyooho.

### Nu caahán ra Jesús nácaa javaha yo tumañi iñi

**6** Jaha ndo cuenda tan ña nduyaa ndo náa tumañi iñi javaha ndo tsi nyivi. Tyin tatun javaha ndo tumañi iñi tyin nyehe nyivi, Jutu yo, ra nyaá gloria, nduve



náa cua cuhva ra tsi ndo. <sup>2</sup>Tun cua javaha ndo tumañi iñi, ña cua jacoto ndo tsi inga nyivi tyin javahá ndo tumañi iñi. Ña javaha ndo tumaa icá ra tsa jahá tyin vaha xaan ra tan tsicá nuu ra naha nuyahvi tan tsitsi vehe ñuhu. Javahá ra naha tumañi iñi tyin na catyi nyivi tyin vaha xaan iñi ra naha. Yacan ñi ñihí ra can naha ra, tan nduve náa cua cuhva Nyoo tsi ra naha. <sup>3</sup>Yacan cuenda quivi javahá ndo tumañi iñi tsi nyivi ndaahvi, ña jacoto ndo ndi tsi ra tsa vaha xaan ca iñi tsi ndo. <sup>4</sup>Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

**Nu caahán ra Jesús nácaa ndacan tahvi yo tsi Jutu yo Nyoo**  
(Lc. 11.2-4)

<sup>5</sup>Tatun cua ndacan tahvi ndo tsi Nyoo, ña javaha ndo tumaa javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tuvi nyivi, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyivi tyin vaha xaan ra naha. Tsa nditsa catyí yu tsihin ndo tyin yacan ñi ñihí ra naha. <sup>6</sup>Maa tyin nyooho quivi tsa ndacan tahvi ndo tsi Nyoo, ña ndacan tahvi ndo tsi ra nu nyehe nyivi tsi ndo. Quiví ndo tsitsi vehe ndo tan nacasi ndo yuvehe ndo tan ndacan tahvi ndo tsihin tsa ñi iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavin nuu nyivi. Tan cua cuhva ra tsa vaha tsi ndo.

<sup>7</sup>Tatun cua cahan ndo tsihin Nyoo, ñavin juvin ñi tuhun tsa nduve yahvi nyaa cahan ndo. Tacan javahá nyivi tsa ña tsitó tsi Nyoo. Cuñí maa ñi tyin tacan tan cua tyaa soho Nyoo tsa caahán ñi, tyin cuaha xaan tsa ha caahán ñi juvin ñi tuhun tsa tsa yahá cahan ñi. <sup>8</sup>Ña javaha ndo tacan. Tyin Nyoo tsa tsitó ra náa tsiñí ñuhu tsi ndo tsa ndi cumañi ca ndacan ndo tsi ra. <sup>9</sup>Yacan cuenda nyooho, tatun cua ndacan tahvi ndo tsi Nyoo, tyehen catyi ndo:

Jutu Mañi ndi, tsa nyaá un gloria.  
Jacahnú xaan ndi tsi un.

<sup>10</sup>Na quitsi tsa ndaca ñaha un nu ñuhu ñayivi ihya, tan na javaha tandihí nyivi tandihí cuhva cuñí maa un, tumaa cuví nda gloria.

<sup>11</sup>Cuhva tsa catsi ndi tahan tahan quivi.

<sup>12</sup>Jaha tucahnu iñi tsi ndi náa tsa ña vaha javahá ndi, tumaa tsa jahá maa ndi tucahnu iñi tsi nyivi tsa javahá tsa ña vaha tsi ndi.

<sup>13</sup>Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuví ra jacacú tsi ndi ndaha nu ña vaha.

Tan maa un cuví ra ndacá ñaha tsi ndi. Tan iyó tandihí tunyee iñi tsi un. Tan taahán tsi tyin jacahnu tandihí nyivi tsi maa ñi un tandihí maa quivi tan na ña cundihí tsi. Na cuvi tsi tacan ñi.

Tyehen taahán tsi ndacan tahvi ndo tsi Nyoo.

<sup>14</sup>Tyin tatun nyooho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo

ra nyaá gloria, cua jaha ra tucahnu iñi tsi maa ndo.

<sup>15</sup>Maa tyin tatun ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyí ra Jesús.

**Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi**

<sup>16</sup>Tan catyí tucu ra Jesús tsihin nyivi:

—Quivi tsa iyó nyitya ndo tyin nanducú ndo tsi Nyoo, ña cuihya nyehe ndo, tumaa javahá nyivi jahá tyin vaha xaan ñi. Tyin cahyí ñi nyaa nuu ñi tyin cuñí ñi tsa nyehe nyivi tyin iyó nyitya ñi tan nanducú ñi tsi Nyoo. Catyí yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi. <sup>17</sup>Maa tyin nyooho quivi tsa iyó nyitya ndo tyin nanducú ndo tsi Nyoo, nacatyá ndo nuu ndo. Tan tyihí ndo cuca jiñi ndo. <sup>18</sup>Tacan tan ña cua tuvi iñi nyivi tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa javahá ndo tsa xeehe ñi. Tan cuaha tsa vaha cua cuhva ra tsi ndo.

**Tsa vaha tsa iyó nda gloria**  
(Lc. 12.33-34)

<sup>19</sup>Ña jacaya ndo tsa cuca tsa iyó nu ñuhu ñayivi ihya. Tyin coto tiví tsi jaha tiquixin o jaha cuxi. O cuví quihví ñasuhu, tan suhu nu tandihí tsa jacaya ndo. <sup>20</sup>Vaha ca jacaya ndo tsa cuca tsa iyó nda gloria. Tyin ña cua cundihí tsi ndacan. Tyin ña cuvi tiví tsi ndacan, tan nduve quití jatívi itsi, ndi nduve ñasuhu. <sup>21</sup>Tyin nu natyihí vaha ndo tsa cuca, ican cua cunyaa ndihí añima ndo.

**Nu caahán ra Jesús tyin na jaha yo cuenda ñuhu nditsin tsa tyihí ra añima yo**  
(Lc. 11.34-36)

<sup>22</sup>Tinuu ndo cuví ñuhu nditsin tsi ndo. Tatun vaha tinuu ndo, tanñi cuñu ñuhu ndo tan iyó ñuhu nditsin. [Tan tuhun ihya cuñí tsi catyí tyin tatun iyó ñuhu nditsin Nyoo añima ndo cuví ndo nyivi vaha.] <sup>23</sup>Maa tyin tatun ña vaha tinuu ndo, tandihí cuñu ñuhu ndo tan nyí tsi nu naa. Tan tacan tucu tatun nduve ñuhu Nyoo iyó añima ndo, [cuví ndo tumaa iin ra cuaa. Nu naa cuahán ndo tan ña cuví nyehe ndo ityi vaha tsa cuahán nu nyaá Nyoo].

**Nu caahán ra Jesús tyin ña cuvi tyaa yahvi yo tsi Nyoo tatun cuñí xaan ca yo xuhun**  
(Lc. 16.13)

<sup>24</sup>Tin musu ña cuvi coo uvi tsitoho ra. Tyin musu can cuñí ca ra tsi iin ra tan ñavin ca tsi inga ra. Tan tyaá yahvi ra tsi iin ra, tan ñavin ca tsi inga ra. Tan tacan tucu nyooho, ña cuví cuñi ndo tsi Nyoo, tan cuñi tucu ndo xuhun.

**Nu caahán ra Jesús tyin ña caca xaan iñi yo náa ndihi tsa tsiñí ñuhu tsi yo**  
(Lc. 12.22-31)

<sup>25</sup> Yacan cuenda catyí yu tsihin ndo, tyin ña caca xaan iñi ndo nácaa ñihi ndo tsa catsi ndo tan tsa coho ndo. Ndi ña caca iñi ndo nácaa cua ñihi ndo jahma ndo. Tyin nu Nyoo nyaá yahvi ca ñayivi tsa iyó yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca jahma yo. [Tyin maa ra tsahá ra ñayivi iyó yo. Tan ña yii cuhva ra inga tsa tsiñí ñuhu tsi yo].

<sup>26</sup> Nyehe ndo cuhva iyó saa. Ña tatsi ti itu. Tan ña jahá tyiñu ti. Tan ndi ña tyihí vaha ti tsa catsi ti. Maa tyin tsatsi ti tyin Jutu yo Nyoo ra nyaá gloria tsahá ra tsa catsi ti naha ti. Tan nuu Nyoo cahnu ca cuví nyooho tan ñavin ca saa can naha ti. <sup>27</sup> Tan vasu ndi maa tsicá xaan iñi ndo maa tyin ña cua cuví jandusucun ca ndo ndi luxu ca tsi ndo.

<sup>28</sup> Tan tatun ndi luxu can ña cuví tsi ndo, ¿nácaa tsa tsicá xaan iñi ndo tsa cuenda jahma ndo? Nyehe ndo nácaa iyó yutun ita tsitsi huhu, tyin ña jahá tyiñu tun tan ndi ña taví tun yuhva. <sup>29</sup> Maa tyin catyí yu tsihin ndo tyin ndi ra cuví rey Salomón tsihin tandihi tsa cuca ra, tan ña tsinditsi ra jahma sñi ca caá tan ñavin ca tsa jacunditsi Nyoo tsi yutun ita can. <sup>30</sup> Tatun tacan ñi jacunditsi Nyoo tsi yutun ita tsa iyó tsitsi huhu vityin, tan tyaan cua cuví tun nducu tan cayu tun. ¿A ña cua jatyinyee cuaha ca ra tsi ndo? Tyin nyooho cahnu ca cuví ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra. <sup>31</sup> Yacan cuenda ña cua caca xaan iñi yo tan catyí yo: “¿Náa cua catsi yo, o náa cua coho yo, o nácaa cua ñihi yo jahma cunditsi yo?” <sup>32</sup> Tyin nyivi tsa ña tsitó tsi Nyoo tsicá xaan iñi ñi yacan. Maa tyin nyooho ña caca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndihi tsa tsiñí ñuhu tsi ndo. <sup>33</sup> Yacan cuenda, caca iñi ndo maa ñi maa tuhun Nyoo. Tan ñanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandihi tsa tsiñí ñuhu tsi ndo. <sup>34</sup> Jahá cuenda Nyoo tsi ndo vityin tan ityaan. Yacan ña caca iñi ndo tsa tsiñí ñuhu tsi ndo ityaan. Caca iñi ndo tan nyehe ndo nácaa yahá ndo quivi vityin jahá Nyoo.

**Ña cahan yo tsa caá inga nyivi**  
(Lc. 6.37-38, 41-42)

**7** Ña cahan ndo tsa caá inga nyivi, tacan tan Nyoo ña cua cahan ra tsa caá ndo. <sup>2</sup> Tyin tumaa caahán ndo tsa caá inga nyivi, tacan cua javaha Nyoo tsihin ndo. Tan tumaa tsa javahá ndo tsihin inga nyivi, juven ñi tacan cua javaha Nyoo tsihin ndo. <sup>3</sup> ¿Nacaa tyin nyehe un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un? <sup>4</sup> Tatun tinuu maa un nyii iin yutun cahnu, ¿nácaa cuví catyí un tsihin ra yañi un: “Ñaha, na tava yu tsahan luhlu tsa nyii tinuu un?” <sup>5</sup> ¿Yooho tsa jahá tyin vaha xaan un! Tava jihna yutun cahnu tsa nyii tinuu un. Tyin tacan tan

cuví nyehe vaha un tsahan luhlu tsa cua tava un tinuu yañi un.

<sup>6</sup> Ña jañihi ndo cahan ndo tuhun Nyoo tsihin nyivi ña cuñí coto tyin coto cañi ñi tsi ndo. Tyin cuví ñi tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

**Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo**  
(Lc. 11.9-13; 6.31)

<sup>7</sup> Ndacan ndo tsa tsiñí ñuhu tsi ndo tsi Nyoo. Tan cua cuhva ra tsi ndo. Ñanducu ndo, tan cua nañihi ndo. Cañi ndaha ndo yuvehe, tan cua nuña. <sup>8</sup> Tyin tandihi nyivi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

<sup>9</sup> Tacan tucu nyooho tsihin sehe ndo. Tsahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi? <sup>10</sup> O tatun tsicán tsi tyaca, ¿a cua cuhva ndo iin coo itsi? <sup>11</sup> Nyooho vasu ndi maa quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatun ndacan ndo tsi ra.

<sup>12</sup> Tumaa cuñí ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsahá Nyoo tsi ra Moisés tan tacan tucu nyaá nu tandihi libru tsa tyaá ra cuví ndusu yuhu Nyoo tahān tsanaha.

**Yuvehe tihin tan ityi cuiñi tsa cuahán nu nyaá Nyoo**  
(Lc. 13.24)

<sup>13</sup> Ndūcu ndo cuhva quihvi ndo yuvehe tihin. Tyin quihin yuvehe, tan quihin ityi tsa cuahán nda nu cunaan nyivi anyaya. Tan cuaha xaan nyivi cuahán ityi can. <sup>14</sup> Maa tyin tihin yuvehe tan cuiñi ityi tsa cuahán nu cuahán nyivi tsa ñihí ñayivi nyito coo ñi. Maa tyin ña cuaha nyivi nañihí ityi can.

**Tsihin tsa javahá nyivi, tan nacotó yo tatun nyivi vaha, a nyivi ña vaha cuví ñi**  
(Lc. 6.43-44)

<sup>15</sup> Jaha ndo cuenda tsi ndo tsihin ra vatya naha ra. Tyin catyí ra naha tyin ndusu yuhu Nyoo cuví ra naha, maa tyin ña nditsa. Tyin vatsi ra naha tumaa mbee nu yucú ndo, jahá ra naha tyin ra vaha cuví ra naha. Maa tyin tumaa quití xaan cuví ra naha. <sup>16</sup> Nyooho cuví nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuví ra naha. Tyin iin tinyata ña cua cuhva tun mangu, tan ndi iñu nduhva ña cuví cuhva tsi yucu vixi. <sup>17</sup> Tan tacan tucu tandihi yutun vaha. Tsahá tun tsiti vaha. Tan tandihi yutun ña vaha, tsahá tun tsiti ña vaha. <sup>18</sup> Tyin yutun vaha, ña cuví cuhva tun tsiti ña vaha. Tan ndi yutun ña vaha ña cuví cuhva tun tsiti vaha. <sup>19</sup> Tan tandihi yutun tsa ña tsahá tsiti vaha, cahnya yo tsi tun. Tan cayu tun. <sup>20</sup> Tan tacan tsihin tsa javahá nyivi, cuví nacoto ndo tsi ñi tatun nyivi vaha o nyivi ña vaha cuví ñi.

**Nu catyí ra Jesús tyin ña tandihí nyivi tan cua quihvi ñi nu ndacá ñaha Nyoo**

(Lc. 13.25-27)

<sup>21</sup> Ña tandihí nyivi tsa catyí tsihin yu: “Jutu Mañi yu, Jutu Mañi yu”, cua quihvi ñi nu ndacá ñaha Nyoo nda glória. Maa tyin nyivi tsa javahá tsa catyí maa Nyoo Jutu yu, juvin ñi can cua quihvi nu ndacá ñaha ra. <sup>22</sup> Quivi tatsi tuñi Nyoo tsi nyivi, cuaha xaan ñi cua catyí ñi tsihin yu tyehen: “Jutu Mañi yu, nyuhu cahān ndi tuhun cun tsihin nyivi. Tan tsihin sivi un tava ndi tatyí ña vaha tsa yihí tsi ñi. Tan cuaha xaan tsa iyo javahā ndi tsihin sivi un”, cua catyí ñi tsihin yu. <sup>23</sup> Tacan tan yuhu cua catyí yu tsihin ñi: “Ña nacotó yu tsi nyooho. Cātsiyo nyaha ndo nu nyaá yu tandihí nyooho tsa javahá maa maa ñi tsa ña vaha”, cua catyí yu tsihin ñi.

**Nu caahán ra Jesús nácaa cua cacu nyivi tsa tyaá yahvi tuhun caahán ra, tan nyivi tsa ña tyaá yahvi tsa caahán ra, ña cua cacu ñi**

(Lc. 6.47-49; Mr. 1.22)

<sup>24</sup> Tacan catyí yu tsihin ndo, tyin nyivi tsa tsiñi tsa caahán yu tan javahá ñi cuhva cuñi yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava. <sup>25</sup> Tan quitsahā cuún ñihi savi. Tan cuaha xaan ndutya ñuhu yahā tsata vehe can. Tan ñihi xaan quitsahā yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava. <sup>26</sup> Maa tyin nyivi tsa tsiñi tuhun caahán yu, tan ña javahá ñi cuhva cuñi yu; cuví ñi tumaa iin ra soho, ra tsa javahā vehe nu nyiti. <sup>27</sup> Tan quitsahā cuún ñihi savi. Tan cuaha xaan ndutya ñuhu yahā nu nyaá vehe ra. Tan ñihi xaan yihí tatyí. Tan vehe can iin yaha cuii ñi nduvā tsi tan cunaq tsi —catyí ra Jesús tsihin ñi tsa nyicún tsi ra.

<sup>28</sup> Cuhva tsa ndihí cahān ra Jesús tsihin ñi, iyo xaan cuñi ñi tsihin tsa caahán ra, <sup>29</sup> tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

**Nu janduvahā ra Jesús tsi iin ra ndohó cuehe tyaahyú**

(Mr. 1.40-45; Lc. 5.12-16)

**8** Cuhva tsa nuu ra Jesús yucu can, cuaha xaan nyivi nyicún tsi ra. <sup>2</sup> Tan tsaq iin ra ndohó cuehe tyaahyú, tan tsicuiñi tsiñi ra nuu ra Jesús, tan catyí ra tsihin ra:

—Jutu Mañi yu, tatun yooho tan cuñi un, cuví janduvaha un tsi yu —catyí ra tsihin ra.

<sup>3</sup> Tacan tan tyiso ndaha ra Jesús jiñi ra cuuhví can, tan catyí ra tsihin ra:

—Cuñi yu janduvaha yu tsi un. Cua nduvaha un vi-tyin —catyí ra.

Tan iin yaha ñi nduvahā ra. <sup>4</sup> Tacan tan catyí ra Jesús tsihin ra:

—Jihna, coto ñahñi catyí tuhun un tsihin nyivi. Maa tyin cyaahan nu nyaá ra cuví jutu, tan janaha un tsi un tsi ra. Tan cuhva un tsa taahán tsi jamañi un nuu Nyoo tumaa catyí ley Nyoo tsa tyaq ra Moisés. Tan cua cuví

tsi iin tsa ndaa tsi ra jutu can tan tsi nyivi tyin tsa nduvahā un.

**Nu janduvahá ra Jesús tsi musu iin ra cuví capitán**

(Lc. 7.1-10)

<sup>5</sup> Quivi tsa tsaq ra Jesús ñuu Capernaum, iin ra cuví capitán, ra ñuu Roma, tsaq ra nu nyii ra Jesús tan caahán ndaahvi ra tsihin ra, <sup>6</sup> tan catyí ra:

—Jutu Mañi yu, musu yu ñihi xaan cuuhví ra, canyí ra nu cama. Ña cuví nduvita ra tyin nduxii ra, tan yaha xaan cuhva cuñi ra.

<sup>7</sup> Tan catyí ra Jesús tsihin ra:

—Cuhun maa yu tan kujanduvaha yu tsi ra —catyí ra tsihin ra.

<sup>8</sup> Nacahān ra capitán can tan catyí ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun cahān ñi un tan musu yu cua nduvaha ra. <sup>9</sup> Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

<sup>10</sup> Tan tsa tsiñi ra Jesús tsa cahān ra can, tan iyo xaan cuñi ra. Tan catyí ra tsihin nyivi tsa nyicún tsi ra:

—Tsa nditsa catyí yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya. <sup>11</sup> Tan catyí yu tsihin ndo tyin cuaha nyivi inga ñuu cua quitsi ityi nu caná ñicanyii, tan ityi nu tyisó ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo. <sup>12</sup> Tan nyivi tsa taahán tsi cuhun glória, ña cua cuhun ñi, tyin cua cuhun ñi nu naa. Tan cua vacu tsa ñi tan catsan ña cua cuví nuhu ñi tsa cuenda tsa xaan cuñi ñi tyin nyehe ñi tundoho —catyí ra Jesús tsihin nyivi nyicún tsi ra.

<sup>13</sup> Tacan tan catyí ra tsihin ra capitán can:

—Cyaahan, tan na nduvaha musu un tsa cuenda tyin tsinú iñi un tsi yu —catyí ra Jesús tsihin ra capitán.

Tan juvin ñi cuhva can nduvahā musu ra.

**Nu janduvahā ra Jesús tsi tyiso ra Pedro**

(Mr. 1.29-31; Lc. 4.38-39)

<sup>14</sup> Tsa yahā can, tan cuahán ra Jesús yuvehe ra Pedro. Tan nyehē ra tsi ña tyiso ra, canyí ña nu tsito tyin yihí cahñi tsi ña. <sup>15</sup> Tan tñin ra ndaha ña, tan iin yaha ñi quitā cahñi tsi ña. Tan nduvitā ña, tan quitsahā nan-ducú ña tsa catsi ra naha.

**Nu cuaha xaan nyivi cuuhví janduvahā ra Jesús**

(Mr. 1.32-34; Lc. 4.40-41)

<sup>16</sup> Tan tsa cunaaha, cuaha xaan nyivi yihí tatyí ña vaha tsindacā nyivi tsi ra Jesús. Tan tsihin intuhun ñi tuhun cahān ra Jesús tan quitā tatyí ña vaha tsi ñi. Tan tandihí ñi cuuhví iin yaha ñi nduvahā ñi. <sup>17</sup> Tacan cuví tyin tacan tan cundaq tsa cahān Jutu Mañi yo tsihin yuhu ra Isaías, ra cuví ndusu yuhu ra tahān tsanaha. Tan catyí ra tyehen: “Maa ra quihñi ra cuehe tsa yihí tsi yo, tan quihñi nyaa ra tsa uhvi tsi yo.”

### Nyivi tsa cuñí quihvi cuenda ra Jesús

(Lc. 9.57-62)

<sup>18</sup> Tan tsa nyehe ra Jesús tyin cuaha xaan nyivi tsinu nduvi nu nyii ra, catyí ra tsihin ra tsicá tsihin ra tyin cua yaha ra naha inga tsiyo miñi. <sup>19</sup> Tacan tan tsaá iin ra maestro cuenda ley vehe ñuhu tan catyí ra tsihin ra:

—Maestro, cuñí yu cunyicun yu tsi un tandihí ñi ityi nu cuahán un —catyí ra.

<sup>20</sup> Tan ra Jesús catyí ra tsihin ra:

—Ñacuii iyó vehe ti. Tan saa iyó taca ti. Maa tyin yuhu Rayii tsa quee nda gloria, nduve nu maa cunyanaa luxu jiñi yu iyó —catyí ra.

<sup>21</sup> Inga ra tsa tsicá tsihin ra nacahan ra tsihin ra:

—Taa, cūhva na cūhun jihna yu cucutsi yu tsi jutu yu, —catyí ra.

<sup>22</sup> Tan catyí ra Jesús tsihin ra:

—Naha yooho quitsi nyicun un tsi yu. Tan nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi —catyí ra.

### Nu jacutaxín ra Jesús tatyí xaan nu miñi

(Mr. 4.35-41; Lc. 8.22-25)

<sup>23</sup> Tacan tan quihvi ra tsitsi yutun ndoo tan ra tsicá tsihin ra cuahán ra naha tsihin ra. <sup>24</sup> Tan ñihi xaan quitsahá yihí tatyí nu miñi can, tan cuaha xaan ndutya quihvi tsitsi yutun ndoo ra naha. Maa tyin ra Jesús quixí ra. <sup>25</sup> Tan ra tsicá tsihin ra jandoto ra naha tsi ra, tan catyí ra naha:

—¡Jutu Mañi yu, jácacu tsi yo, tyin cuñí cunaa yo!

<sup>26</sup> Tan catyí ra Jesús tsihin ra naha:

—¿Nacuenda yuuhvi xaan ndo? ¡Nyooho tsa luxu xaan tsinú iñi tsi yu! —catyí ra Jesús.

Tacan tan nduvitá ra tan cahán ra tsihin tatyí tan tsihin ndutya, tan cutaxín tsi. <sup>27</sup> Tan iyo xaan cuñí ra naha tan catyí ra naha:

—¿Yóo ra cuví ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

### Nu nduvahá uvi ra ñuu Gadara ra yihí tatyí ña vaha naha ra

(Mr. 5.1-20; Lc. 8.26-39)

<sup>28</sup> Tacan tan tsaá ra naha inga tsiyo miñi nda nu ñuhu Gadara. Tan tsaá uvi taahan ra yihí tatyí ña vaha. Tan quitá ra naha nu ñaña cumí sandu. Xaan xaan ra naha, tan yoñi maa cuví yaha ityi can. <sup>29</sup> Tan caná tsaá ra naha, tan catyí ra naha:

—¿Náa cuñí un tsihin ndi, yooho Jesús Sehe Nyoo? ¿A vatsí un vatsí janyehe un tundoho tsi ndi tsa ndi cumañi ca tsaá quivi? —catyí ra naha jahá tatyí ña vaha can.

<sup>30</sup> Tan yatyin ñi can yucú cuaha quini tsatsí ti naha ti.

<sup>31</sup> Tan catyí nu tatyí ña vaha can tsihin ra Jesús:

—Tatun cua tava un tsi ndi, cūhva tsa quihvi ndi tsitsi quini can naha ti —catyí nu tatyí ña vaha can nahnu.

<sup>32</sup> —Vaha. Quihvi ndo —catyí ra Jesús.

Tan quitá nu tatyí ña vaha can nahnu, tan quihvi nahnu tsitsi tandihí quini tsa nyecú can. Tan tandihí quini

can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

<sup>33</sup> Tan ra jahá cuenda tsi quini can, tsinú xaan ra naha cuahán ra naha tsitsi ñuu, tan nacatyí tuhun ra naha tandihí tsa cuví tsi ra tsa yihí tatyí ña vaha can naha ra. <sup>34</sup> Tacan tan tandihí nyivi ñuu can, tsahan ñi tsinyehé ñi tsi ra Jesús, tan cahán ndaahvi ñi tsihin ra na quita ra ñuu can.

### Nu janduvahá ra Jesús tsi iin ra xii

(Mr. 2.1-12; Lc. 5.17-26)

<sup>9</sup> Tacan tan quihvi ra Jesús tsitsi iin yutun ndoo tan yahá ra miñi, tan tsaá ra nda ñuu nu iyó ra. <sup>2</sup> Nu nyii ra ican, tsindacá nyivi tsi iin ra cuuhvi tsa ña cuví nacanda tyin nduxii ra, tan canyí ra nu tsito. Tan tsa nyehe ra Jesús tyin tsinú xaan iñi ñi tsi ra, quitsaha caahán ra tsihin ra cuuhvi can:

—Jandu iin iñi un, sehe yu, tyin tsa tsicoq tucahnu iñi cuatyí un —catyí ra Jesús tsihin ra.

<sup>3</sup> Tacan tan quitsahá tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsicoq cuatyí ra nu Nyoo tsihin tuhun caahán ra”, cuñí ra naha tsicá iñi ra naha.

<sup>4</sup> Maa tyin ra Jesús tsitó ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha? <sup>5</sup> Tyin ¿ndáa tsa yii ca catyí yo: a yii ca catyí yo: “Cuatyí un tsa yaha ndatsi”, o yii ca catyí yo: “Nduvita tan caca un”? <sup>6</sup> Vityin cua janaha yu tsi ndo tyin yuhu Rayii tsa quee nda gloria, iyó ndatu tsi yu nu ñuhu ñayivi ihya tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhvi can:

—Nduvita, ñaquihin tsito un tan cūanuhu nda yuvehe un —catyí ra.

<sup>7</sup> Tacan tan nduvitá ra tan cuanuhu ra nda yuvehe ra.

<sup>8</sup> Tan nyivi tsa nyehe tsa cuví, nayuhvi xaan ñi. Tan quitsahá jacahnú ñi tsi Nyoo tyin tsaá ra tunyee iñi tsi nyivi.

### Nu caná ra Jesús tsi ra Mateo

(Mr. 2.13-17; Lc. 5.27-32)

<sup>9</sup> Yaha can tan quitá ra Jesús ican. Tan nyehe ra tsi iin ra tsa nañi Mateo, nyaá ra naquihín ra xuhun tsa tyahvi nyivi Israel tsi ra ndacá ñaha. Tan catyí ra tsihin ra:

—Cohon tsihin yu.

Tacan tan nduvitá ra Mateo tan cuahán ra tsihin ra Jesús.

<sup>10</sup> Tacan tan cuví tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tavá xuhun cuenda ra ndaca ñaha tsaá, tan tsihin inga ca ra iyó cuatyí naha ra. Tan tsinyecu ra naha iin ñi nu mesa tsihin ra Jesús tan tsihin ra tsicá tsihin ra. <sup>11</sup> Tan tsa nyehe ra fariseo naha ra tyin nyaá ra Jesús tsihin ra iyó cuatyí naha ra, tan tsicá tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsí ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

<sup>12</sup> Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi ñuhu doctor tsi ñi.

<sup>13</sup> Cyaahan ndo tan cūtuhva ndo cuhva catyí nu tutu Nyoo, nu catyí tsi tyehen: “Yuhu cuñi yu tsa cundaahvi iñi ndo tsi nyivi, tyin yacan cuví tsa ñiñi xaan ca tan ñavin ca tsa cahñi ndo quití tan cuhva cuenda ndo tsi yu.” Yuhu ña vatsí yu jatynyee yu tsi nyivi tsa tsicá iñi tyin vaha ñi, vatsí yu jatynyee yu tsi nyivi tsitó tyin iyó cuatyí ñi, na ndu uvi iñi ñi cuatyí ñi.

**Nu tsicá tuhun nyivi tsi ra Jesús tatun taahán tsi tsa coo nyitya ñi**

(Mr. 2.18-20; Lc. 5.33-35)

<sup>14</sup> Tacan tan ra nyicún tsi ra Juan, ra jacoondutya tsi nyivi, natuhvá ra naha nu nyaá ra Jesús tan tsicá tuhun ra naha tsi ra tan catyí ra naha:

—¿Nacuví tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yooho ña tuhvá ra naha coo nyitya?

<sup>15</sup> Tan nacahán ra Jesús tan catyí ra:

—¿A cuví cunyecu cuiihya nyivi yucú vico tindaha tun nyíi ra cua tindaha tsihin ñi? Maa tyin coo quivi cua quita ra tindaha ican nu yucú ñi. Tacan tan cua coo ñi tucuiihya iñi tan cua coo nyitya ñi.

**Nu caahán ra Jesús tyin ña nacatsí tahan tuhun tsahnu tsa iyó nyivi tsihin tuhun tsa tsa jacuahá ra tsi ñi**

(Mr. 2.21-22; Lc. 5.36-39)

<sup>16</sup> Ña tuhvá nyivi naquicú iin jahma tuuhu tsihin iin jahma tsa, tyin cua nandiyi nu naquicy ñi tsihin tsa tsa can, tan cua tyahnya tsi inga tsaha. <sup>17</sup> Tan tacan tucu, ña cuví tyihí nyivi vinu tsa tsitsi ñi tsaahnu tyin tatun tacan javaha ñi, cua tyahnya ñi can, tan cua tiví vinu can tan cua tiví ndihi tucu ñi can. Yacan cuenda taahán tsi tyihí yo vinu tsa tsitsi ñi tsa. Tyin tacan tan ña tyahnya ñi can tan ndi vinu can ña tiví tsi.

**Nu nduvahá ñaha sehe ra Jairo tan ñaha tsa tñin jahma ra Jesús**

(Mr. 5.21-43; Lc. 8.40-56)

<sup>18</sup> Tsitsi tsa caahán ra Jesús tuhun ihya, tsa iin ra cumí tyiñu cuenda vehe ñuhu nyivi Judea tan tsicuiñi tsiti ra nuu ra Jesús, tan catyí ra:

—Ndi tsihi cuíi ñi sehe yu, maa tyin tatun yooho tan cahun un tan tyiso ndaha un jiiñi ña, cua nandoto ña —catyí ra tsihin ra Jesús.

<sup>19</sup> Nduvitá ra Jesús tsihin ra tsicá tsihin ra tan cuahán ra naha tsihin ra.

<sup>20</sup> Tacan tan iin ñaha cuuhví natuhvá ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún niñi ña. Tan tyanaa ña ndaha ña jahma ra, <sup>21</sup> tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

<sup>22</sup> Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Jandunñi iñi un, xihi, tsa nduvahá un tyin tsinú iñi un —catyí ra.

Tan juvin ñi cuhva can tan tsicuiñi tsa cuún ñiñi ña.

<sup>23</sup> Yahá can tan tsaá ra Jesús vehe ra cumí tyiñu can, tan nyehe ra tyin ra música ndatú ra naha tsa cucutsi ra naha tsi ndiyi can. Tan nyivi tsa yucú can iyo xaan tsacú ñi. <sup>24</sup> Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixí ña —catyí ra.

Tan tsa cahán ra tacan quitsahá tsacú naaha ñi.

<sup>25</sup> Tan ra Jesús tavá ra tsi ñi ityi tsata vehe. Tacan tan quihví ra tsitsi vehe nu canyíi ñaha can, tan tñin ra ndaha ñaha luhlu can, tan nduvitá ña. <sup>26</sup> Tan tandihi nyivi iyó ityi ñuu can tsitó ñi tsa nandoto ñaha luhlu can.

**Nu janduvahá ra Jesús tsi uvi taahan ra cuaa**

<sup>27</sup> Tsa quitá ra Jesús ican, tan uvi taahan ra cuaa nyicún tsi ra, caná tsa ra naha tan catyí ra naha:

—¿Cūndahvi iñi tsi ndi, yooho ra cuví tata ra David! —catyí ra naha.

<sup>28</sup> Tan tsa yahá quihví ra Jesús tsitsi vehe, ra cuaa can, natuhvá ra naha nu nyaá ra, tan maa ra Jesús quitsahá tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi ndo?

Tan nacahán ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

<sup>29</sup> Tacan tan tyanaa ra Jesús ndaha ra tinuu ra naha tan catyí ra tsihin ra naha:

—Na cuví maa tumaa cuhva tsinú iñi ndo —catyí ra.

<sup>30</sup> Tan nduvahá tinuu ra naha. Tan catyí ra Jesús tsihin ra naha:

—Coto ñahñi catyí tuhun ndo tsihin ndi intuhun nyivi.

<sup>31</sup> Maa tyin cuahán ra naha tan quitsahá catyí tuhun ra naha tsa javahá ra Jesús tsihin ra naha tsihin tandihi nyivi iyó ityi ñuu can.

**Nu janduvahá ra Jesús tsi iin ra ñiñi**

<sup>32</sup> Tsa cuahán ra naha, juhva nyivi tsindaca ñi tsi iin ra ñiñi tsa yihí tatyí ña vaha nu nyíi ra Jesús. <sup>33</sup> Tan tsa tavá ra Jesús tatyí ña vaha can, tacan tan nacahán ra can. Tan iyo xaan cuñi nyivi, tan catyí ñi:

—Ñaha ca maa nyehe yo ñuu Israel ihya ndi intuhun ra tavá tatyí ña vaha tsi nyivi —catyí ñi.

<sup>34</sup> Maa tyin ra cuví fariseo naha ra, catyí ra naha:

—Ra ihya tavá ra tatyí ña vaha tsihin tunyee iñi nu ña vaha tsa cuví ityi nuu tsihin nahnu —catyí ra naha.

**Nu caahán ra Jesús tyin ña cuaha maa nyivi jahá tyiñu cuenda Nyoo iyó**

<sup>35</sup> Ra Jesús tsahán ra tandihi ñuu jacuahá ra tsi nyivi tsitsi vehe ñuhu intuhun intuhun ñuu. Caahán ra tuhun Nyoo nácaa ndacá ñaha ra tsi nyivi. Tan janduvahá ra tandihi nuu cuehe tsa ndohó ñi. <sup>36</sup> Tan tsa nyehe ra tsi nyivi, cundaahví xaan iñi ra nyehe ra tsi ñi,

tyin nyehé ñi tundoho tan iyó ñi tucuihya iñi, tumaa mbee ticatyí tsa nduve tsitoho iyó. <sup>37</sup> Tacan tan catyí ra tsihin ra tsicá tsihin ra:

—Tsa nditsa, cuaha xaan tyiñu iyó, maa tyin ra jahá tyiñu, ña cuaha ra naha. <sup>38</sup> Yacan cuenda, ndacan ndo tsi Ra Jatsii tyiñu ihya, na jaquitsi ca ra musu naquihin vaha cosecha ra.

**Nu nacatsi ra Jesús tsa utsi uvi ra cua caca tyiñu ra**  
(Mr. 3.13-19; Lc. 6.12-16)

**10** Tacan tan cana ra Jesús tsi tsa utsi uvi ra tsicá tsihin ra tan tsaha ra ndatu tsi ra naha na tava ra naha tatyí ña vaha tsa yihí añima nyivi, tan na janduvaha ra naha tsi nyivi cuuhví náa ndihi ca nu cuehe tan tsa uhvi.

<sup>2</sup> Ihya nyaá sivi tsa utsi uvi ra tsicá tyiñu ra: jihna ca, ra Simón, tsa nañi tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha; <sup>3</sup> tan ra Felipe; ra Bartolomé; ra Tomás; tan ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañi tucu Tadeo; <sup>4</sup> tan ra Simón ra nyii cuenda partido tsa cuñi cahun cuatyí siqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

**Nu tava tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo**  
(Mr. 6.7-13; Lc. 9.1-6)

<sup>5</sup> Tan tava tyiñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cūhun ndo nu iyó nyivi tsa ñavin nyivi Israel cuví, tan ndi ña quihvi ndo ñuu tsa cayucú Samaria.

<sup>6</sup> Cūaahan ndo nu yucú mbee tsa tsinaa tsa cuví nyivi Israel. <sup>7</sup> Cūaahan ndo cua cahan ndo tyin tsa tsa quivi tsa cua cundaca ñaha Nyoo tsi nyivi. <sup>8</sup> Janduvaha ndo tsi nyivi cuuhví, nyivi ndohó cuehe tyaahyú, tan nyivi yihí inga cuehe tsi. Janandoto ndo ndiyi. Tava ndo tatyí ña vaha yihí tsi nyivi. Tyin nyooho naquihin ndo tunyee iñi ihya tsa cuatu ñi, janduvaha ndo nyivi tsihin tsi, tan ña ndacan ndo xuhun tsi ñi.

<sup>9</sup> Ña cūiso ndo xuhun; ndi xuhun cūaan, ndi xuhun cuitsin, ndi xuhun cūaaha. <sup>10</sup> Tan ña cūiso ndo ndi yunu tsa cuenda tsa caca ityi ndo. Intuhun ñi camisa tsa nditsin ndo cūhun tsihin ndo. Tan ña cūiso ndo inga pari nditsan. Tan ndi ña cūndaha ndo yutun. Tyin ra jahá tyiñu, iyó ndatu tsi ra tsa coo yahvi ra.

<sup>11</sup> Tatun tsa ndo iin ñuu cahnu o iin ñuu luhlu, nducu ndo iin nyivi vaha iñi, tan ndo ndo yuvehe ñi nda cuanda quita ndo ñuu can. <sup>12</sup> Tatun cua quihvi ndo iin vehe, cūhva ndo nacumi tsi nyivi iyó yuvehe can. Tan catyí ndo tsihin ñi: “Na coo tsa vaha Nyoo añima ndo”. <sup>13</sup> Tan tatun nyivi iyó yuvehe can tan nacotó ñi tyin tsiñi ñuhu tsa vaha can tsi ñi, cua ndoo can tsihin ñi. Maa tyin tatun ña tsitó ñi tyin tsiñi ñuhu tsa vaha can tsi ñi, naquihin nyico ndo can. <sup>14</sup> Tan tatun ña cuñi nyivi quihin cuenda ñi tsi ndo, tan ndi ña cuñi ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin

ndoo maa cuatyí ñi siqui ñi. <sup>15</sup> Tsa nditsa catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

**Nu catyí tuhun tsi náa ndihi tundoho cua nyehe nyivi tsicá tyiñu Nyoo**

<sup>16</sup> ¡Nyehe ndo! Tumaa mbee ticatyí cuví ndo, tan jacuhún yu tsi ndo nu yucú quití xaan. Nyityi jaha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan ti. <sup>17</sup> Jaha ndo cuenda tsi ndo tsihin nyivi tyin cua cūhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu. <sup>18</sup> Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví. <sup>19</sup> Maa tyin tatun nacuhva cuenda ñi tsi ndo tsi ra cumí tyiñu naha ra, ña caca iñi ndo nácaa cua cahan ndo, tyin tatun tsa cūhva tsa cua cahan ndo, Nyoo cua cūhva ra tuhun cahan ndo. <sup>20</sup> Tyin ñavin maa ndo cua cahan, tyin maa Tatyí Ii Jutu yo Nyoo tsa iyó añima ndo cua cūhva ra tsa cahan ndo.

<sup>21</sup> Yihí rayi cua xico ra naha juven ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyivi cua cūxan ñi tsi jutu ñi tan sihi ñi, tan cua cūhva cuenda ñi jutu ñi tan sihi ñi tsi nyivi na cahñi nyivi can tsi ñi. <sup>22</sup> Tandihí nyivi, ndasi cua cuñi ñi nyehe ñi tsi ndo tsa cuenda yuhu. Maa tyin tatun ña jandihí ndo tsa tsinú iñi ndo tsi yu, tacan tan cua cacu ndo.

<sup>23</sup> Tatun nya ndaha ñi tsi ndo iin ñuu, cūhun ndo inga ñuu. Tyin tsa nditsa catyí yu tsihin ndo tyin tsa ndi cumañi ca cūhun ndo tandihí ñuu nu iyó nyivi Israel tan cua quitsi nyico yuhu, Rayi tsa quee nda gloria.

<sup>24</sup> Tin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra. <sup>25</sup> Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho ra. Yacan cuenda tatun maa yu, ra jatsii vehe, tan catyí nyivi tyin cuví yu Beelzebú, nu cuví ityi nuu tsihin nu ña vaha, tacan tucu cua catyí ñi tsihin nyivi cuenda yu.

**¿Yóo tsii taahán tsi nayuhvi yo, a tsii nyivi o tsii Nyoo?**  
(Lc. 12.2-7)

<sup>26</sup> Yacan cuenda ña nayuhvi ndo tsi nyivi, tyin nduve tsa nyii xeehe tsa ña cua quituvi. Tan nduve tsa xeehe tsa ña cua coto nyivi. <sup>27</sup> Tandihí tsa caahán yu tsihin ndo tsacuaa, cahan ndo can tsinu cahñi. Tan tandihí tsa caahán xeehe yu tsihin ndo, nda ndo jiñi vehe cana tsa ndo can, na coto tandihí nyivi. <sup>28</sup> Ña nayuhvi ndo tsi nyivi tsahñi cuñu ñuhu yo, tyin ña cuví cahñi ñi añima yo. Vaha ca nayuhvi ndo tsi maa Nyoo, ra cuví janaa cuñu ñuhu ndo tan añima ndo tsitsi anyaya.

<sup>29</sup> Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cūhva maa Nyoo Jutu yo. <sup>30</sup> Tyin nda cuanda ixi jiñi ndo tan tsitó Nyoo najava

taahan tsi iyó, tyin tsa nacahví ra intuhun intuhun tsi.  
<sup>31</sup> Yacan cuenda ña nayuhvi ndo. Nyooho, nyaá yahvi ca ndo nu Nyoo tan ñavin ca tsa cuaha saa.

**Ña cua nayuhvi yo cahan yo tuhun ra Jesucristo tsihin nyivi**  
 (Lc. 12.8-9)

<sup>32</sup> Tandihí nyivi tsa caahán catsi tsihin nyivi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi. <sup>33</sup> Maa tyin nyivi cua tyihí xeehe tsi yu nuu inga nyivi, tacan tucu yuhu cua tyihí xeehe yu tsi ñi nuu Jutu yu ra nyaá gloria.

**Nu caahán ra Jesús tyin tsa cuenda ra tan cua cañi tahan nyivi tsihin tahan ñi**  
 (Lc. 12.51-53; 14.26-27)

<sup>34</sup> Ña cūñi ndo tyin yuhu vatsí cuhva yu tsa coo taxin nyivi nu ñuhu ñayivi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan. <sup>35</sup> Tyin yihí ñi cua tsinu iñi ñi tsi yu, maa tyin inga ñi ña cua tsinu iñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña. <sup>36</sup> Tan yacan cuenda juven ñi maa nyivi vehe ndo cua cuxaan iñi tsi ndo.

<sup>37</sup> Nyivi tsa cuñi ca tsi jutu ñi a tsi sihi ñi tan ñavin ca tsi yuhu, ña cuví cuví ñi nyivi cuenda yu. Tan nyivi cuñi ca tsi sehe yí ñi a sehe sihi ñi, tan ñavin ca tsi yuhu, ña cuví cuví ñi nyivi cuenda yu. <sup>38</sup> Tan nyivi tsa ña cuñi nyehe tundoho tan ndi ña cuñi ñi cuhva ñi ñayivi iyó ñi tsa cuenda yu, ña taahán tsi cuví ñi nyivi cuenda yu. <sup>39</sup> Tyin nyivi cuñi xaan ca ñayivi iyó ñi, cua cunaa ñi. Maa tyin nyivi cua cuhva ñayivi iyó ñi tsa cuenda yu, cua ñihi ñi ñayivi nyito coo ñi.

**Nu caahán ra Jesús nácaa cua ñihi yo tsa vaha Nyoo**  
 (Mr. 9.41)

<sup>40</sup> Nyivi tsa naquihín cuenda tsi nyooho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquitsí tsi yu. <sup>41</sup> Nyivi naquihín cuenda tsi iin ra cuví ndusu yuhu Nyoo tyin Nyoo jaquitsí tsi ra, cua ñihi ndihí ñi tsa vaha tsa cua ñihi ra cuví ndusu yuhu Nyoo can. Tan nyivi naquihín cuenda tsi iin ra vaha tsa cuenda tyin ra vaha cuví ra, juven ñi tsa vaha tsa cua ñihi ra vaha can cua ñihi ñi. <sup>42</sup> Tan yóo nyivi tsa cuhva intuhun vasu ndutya vitsin coho nyivi tsa nyicún tsi yu, cua ñihi ndihí ñi tsa cua cuhva Nyoo tsi ñi tsa nyicún tsi yu —catyí ra Jesús.

**Nu jacuhun ra Juan tsi ra tsicá tsihin ra nu nyí ra Jesús**  
 (Lc. 7.18-35)

**11** Tsa ndihí cahān ra Jesús tsihin tsa utsi uvi ra tsicá tsihin ra, tacan tan quitā ra ican, tyin cua cahan ra tuhun Nyoo tsihin nyivi tsa iyó ñuu tsa cayucú ityi can.

<sup>2</sup> Tan ra Juan nyí ra vehe caa quivi can, tan ñihí tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi

ra Jesús. Tan cuahan ra naha nu nyí ra. <sup>3</sup> Tan catyí ra naha tsihin ra:

—¿A juven yooho cuví ra Cristo tsa nya tsa cua quitsi jacacu tsi ndi? O tatun ñavin un cuví, cuatu ndi tsi inga ra —catyí ra naha tsihin ra Jesús.

<sup>4</sup> Nacahān ra Jesús tan catyí ra:

—Cūaahan ndo tan catyí tuhun ndo tsihin ra Juan tandihí tsa nyehé ndo, tan tsa tsiñi ndo. <sup>5</sup> Tan catyí ndo tsihin ra: nyivi cuaa nanyehé ñi, nyivi coxo nacacá ñi, nyivi ndohó cuehe tyaahyú nduvahá ñi, nyivi soho nacuñi ñi, tan nandotó nyivi tsa tsa tsihi, tan nyivi ndaahvi tsiñi ñi tuhun Nyoo nácaa cua cacu ñi.

<sup>6</sup> Tan catyí ndo tsihin ra tyin si xaan cua cuví tsi nyivi tsa nyicún tsi yu tun ña ndu uvi iñi ñi —catyí ra Jesús tsihin ra naha.

<sup>7</sup> Tsa cuahān ra naha, tan quitsahā caahán ra Jesús tuhun ra Juan tsihin nyivi, tan catyí ra:

—Quivi tsa tsahān ndo tsinyehé ndo nu tsiqui, ¿náa cua nyehe ndo cuñi maa ndo? ¿A nyehe ndo iin ndoo tsa janduvā tatyí? <sup>8</sup> ¿O náa cuví tsa tsinyehé ndo? ¿A iin ra nditsí jahma vaha cua nyehe ndo? Ñavin. Tyin tsitó ndo tyin ra nditsí jahma vaha, iyó ra vehe ra cuví rey. <sup>9</sup> ¿A ña tsahān ndo tsinyehé ndo tsi iin ra cuví ndusu yuhu Nyoo? Juvén. Tyin ra ican cahnu ca cuví ra tan ñavin ca tandihí ra cuví ndusu yuhu Nyoo. <sup>10</sup> Juvén ñi tuhun ra Juan cuví tsa nyaá nuu tutu Nyoo. Tan catyí tsi tyehen:

Yuhu cua jacuhun yu iin ra cahan tuhun yu tsa ndi cumañi ca cuhun yu.

Tyin natyiso vaha ra ityi nu cua cuhun un.

<sup>11</sup> Tsa nditsa catyí yu tsihin ndo, tyin tsitsi tsa tandihí nyivi tsa tsicoo tan nyivi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyivi. Maa tyin ra tsa ndaca ñaha Nyoo añima, vasu ra lihli ñi cuví ra, cahnu ca ra cuví ra tan ñavin ca ra Juan.

<sup>12</sup> Nda cuanda quivi tsa tsaā ra Juan tan nda vityin, nyivi ñihi iñi, nducú xaan ñi cuhva ñihi ñi tsa cundaca ñaha Nyoo tsi ñi. <sup>13</sup> Ra Moisés cahān ra tuhun nácaa cua cundaca ñaha Nyoo tsi nyivi, tan tacan tucu tandihí ra cuví ndusu yuhu Nyoo. Tacan tan quitsí ra Juan jacotō ra tsi nyivi tyin tsa tsaā quivi tsa cua cundaca ñaha Nyoo. <sup>14</sup> Tan ra Juan cuví ra Elías ra tsa nyaá tsa cua quitsi, tun nyooho tan cuñi ndo tsinu iñi ndo tsa caahán yu. <sup>15</sup> Nyooho tsa iyó soho, tyāa soho ndo tsa caahán yu.

<sup>16</sup> ¿Náa tsihin jandu inducu yu tsi nyooho, nyivi tsa iyó quivi ihya? Tumaa ra nyihi cuví nyooho. Tyin ra nyihi jasiqui nuyahvi. Caná tsa tahan ra naha tan catyí ra naha: <sup>17</sup> “Tiví ndi tiyoo tan ña tsañi ndo yaa. Tan tsitā ndi yaa cuihya, tan ña tsacū ndo”, catyí ra nyihi. [Tan tacan cuví nyooho tyin ndi intuhun cuhva ña taahán iñi ndo.] <sup>18</sup> Tyin ra Juan, ra jacoondutyá, quitsí ra tan ña tsatsí vaha ra, tan ña tsihi ra vinu. Tan nyooho catyí ndo tyin tatyí ña vaha yihí tsi ra. <sup>19</sup> Yahā can tan tsaā tucu yuhu Rayí tsa quee nda gloria. Tan tsatsí yu tan tsihi yu. Tan catyí ndo tyin tsatsí xaan yu tan tsihi xaan yu vinu, catyí ndo. Tan ña taahán iñi ndo tsa cutahán yu tsihin ra iyó cuatyí naha ra tan tsihin ra tavá xuhun

cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuñi ra tsi nyivi naquihín tuhun caahán yu tan tuhun cahān ra Juan, tan ñi ican cua janaha ñi tsi ndo tyin vaha tsa tsiñi tuñi Nyoo —catyí ra Jesús.

**Nyivi ña cuñi naquihin cuenda tuhun caahán ra Jesús  
cua nyehe ñi tundoho**  
(Lc. 10.13-15)

<sup>20</sup> Tacan tan quitsahā caahán ra Jesús tsihin nyivi tandihí ñuu nu javahā ra cuaha tsa iyo, tyin ña nasama ñi kuhva iyó ñi, tan catyí ra:

<sup>21</sup> —¡Ndahvi nyoooho, nyivi ñuu Corazin! ¡Ndahvi nyoooho nyivi ñuu Betsaida! Tyin nyehé ndo tsa iyo tsa javahá yu tan ña nasama ndo kuhva iyó ndo. Tan ñuu Tiro tan ñuu Sidón nduve tsa nyehē ñi. Maa tyin tun tsatyin nyehē ñi tsa nyehé nyoooho vityin, numi xaan cua cunditsi ñi jahma tucuihya iñi tan cua coso ñi nyaa nuu ñi: tyin ndu uvi iñi ñi cuatyí ñi. <sup>22</sup> Maa tyin catyí yu tsihin ndo tyin ñihi ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón. <sup>23</sup> Tan nyoooho nyivi ñuu Capernaum, cuñi maa ndo tyin cundaa ndo nda gloria, maa tyin cua nuu ndo nda cuanda nu yucú nyivi tsihi anyaya. Tun tsatyin tsicoo tsa iyo nyehē ñi ñuu Sodoma tumaa tsa nyehé ndo ihya, ñuu can ña tsinaa tsi tan iyó tsi nda cuanda vityin. <sup>24</sup> Maa tyin catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi nyoooho tan ñavin ca nyivi ñuu Sodoma.

**“Cuhva ndo tsi ndo tsi yu, tan kuhva yu tsa quitatu  
ndo”, catyí ra Jesucristo**  
(Lc. 10.21-22)

<sup>25</sup> Quivi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuhu ñayivi. Tyin tyihí xeehe un tuhun ihya nuu ra tsitó xaan tan ra nyityi xaan naha ra. Tan jandunditsí un tuhun ihya nuu ra nyihi. <sup>26</sup> Tacan Tyaa, tyin tacan cuñi maa un —catyí ra Jesús.

<sup>27</sup> Tacan tan catyí tucu ra tsihin nyivi:

—Jutu yu nacuhvā cuenda ra tandihí tsa iyó tsi ra tsi yu. Yoñi maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yoñi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyivi tsa cuñi yu tsa nacoto tsi Jutu yu, cua janaha yu tsi ra tsi ñi. <sup>28</sup> Tandihí nyoooho tsa tatú tyin jahá tyiñu ndo, tan tsihin tundoho tsa iyó ndo, ñaha ndo nu nyaá yu, tan yuhu cua kuhva yu tsa quitatu ndo. <sup>29</sup> Cuhva ndo tsa cundaca ñaha yu tsi ndo tan cutuhva ndo kuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu añima ndo. <sup>30</sup> Ña yí tsa kuhva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

**Quivi quitatú nyivi cuví tsi tan ra tsicá tsihin ra Jesús  
tuhún ra naha yoco itya trigu**  
(Mr. 2.23-28; Lc. 6.1-5)

**12** Iin quivi quitatú nyivi, yahā ra Jesús mahñu nu iyó tsa tatsi nyivi. Tan tsaq soco tsi ra tsicá tsihin ra. Tan quitsahā tuhún ra naha yoco trigu can tan tsatsí ra naha. <sup>2</sup> Tan tsa nyehē ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quivi quitatú yo —catyí ra naha tsihin ra.

<sup>3</sup> Tan ra Jesús catyí ra tsihin ra naha:

—¿A ñaha ca cahvi ndo tsa javahā ra David tsihin ra cutahan tsihin ra quivi tsa tsaq soco tsi ra naha?

<sup>4</sup> Quihví ra tsitsi vehe Nyoo, quihín ra paan ii, tan tsatsi ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can. <sup>5</sup> ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiñu ra naha tsitsi vehe ñuhu quivi quitatú yo? Tan ñavin cuatyí cuví can. <sup>6</sup> Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu. <sup>7</sup> Nyoooho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñi ca yu javaha ndo cuví tsa cundahvi iñi ndo nyehē ndo tsi nyivi tahan ndo, tan ñavin ca tsa cahñi ndo quitá tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata nyivi tsa nduve cuatyí. <sup>8</sup> Yuhu, Rayí tsa quee nda gloria, iyó ndatu tsi yu tsa cahān yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

**Nu janduvahā ra Jesús tsi iin ra na ityi ndaha**  
(Mr. 3.1-6; Lc. 6.6-11)

<sup>9</sup> Tacan tan quitā ra Jesús ican, tan cuahán ra vehe ñuhu. <sup>10</sup> Tan ican nyíi iin ra tsa na ityi ndaha. Tan yucú tucu juhva ra nducú kuhva nácaa tan tyaa ra naha cuatyí tsi ra Jesús. Yacan cuenda tsicā tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyivi cuuhví quivi quitatú yo? —catyí ra naha tsihin ra Jesús.

<sup>11</sup> Tan nacahān ra Jesús tan catyí ra:

—¿Ndáa nyoooho, tatun canacava iin mbee jana ndo tsitsi iin yavi quivi quitatú yo, a ña cua cahun ndo tan tava ndo tsi tí? <sup>12</sup> Tan ¿a ña nyaá yahvi ca iin nyivi tan ñavin ca mbee? Yacan cuenda taahán tsi javaha yo tsa vaha quivi quitatú yo —catyí ra.

<sup>13</sup> Tacan tan catyí ra Jesús tsihin ra tsa na ityi ndaha can:

—Janacaa ndaha un —catyí ra.

Tan kuhva tsa janacaa ra ndaha ra, iin yaha ñi nduvahā tsi tumaa inga tsiyo. <sup>14</sup> Tacan tan quitā ra fariseo naha ra cua natuhun tahan ra naha nácaa cua cahñi ra naha tsi ra Jesús.



**Tsa cahān ra Isaías, ra cuvī ndusu yuhu Nyoo, tsa cuenda ra Jesús tahān tsanaha**

<sup>15</sup> Tsa tsitō ra Jesús tyin nducú ra naha tsi ra, quitā ra ican. Tan cuaha nyivi tsinyicun tsi ra. Tan maa ra janduvahā ra tsi tandihī ñi cuuhví. <sup>16</sup> Tan catyí ra tsihin ñi tyin na ña catyi tuhun ñi yóo ra cuví ra. <sup>17</sup> Tacan cuvī tyin tacan cahān ra Isaías, ra cuvī ndusu yuhu Nyoo tahān tsanaha. Tan tyehen tyaa ra tuhun Nyoo:

<sup>18</sup> Ra ihya cuví musu yu, ra tsa nacatsī vaha yu.

Cuñí xaan yu tsi ra, tan sī xaan cuñí yu tsihin ra.

Cua kuhva yu Tatyí Ii yu tsi ra.

Tan cua jacoto ra tsi nyivi tsa ñavin nyivi Israel cuví, nácaa cua janduvaha yu tsi ñi nuu yu.

<sup>19</sup> Tan ña cua cahan yuhu ra tan ndi ña cua cana tsaa ra, tan ña cua cahan ñihi ra ityi cahnu.

<sup>20</sup> Tan ndi intuhun ndoo yacua, tan ña cua cahnu ndihī ra.

Tan ndi ña cua ndahva ndihī ra tiñuhu lihli nu caná luxu yuhma.

Nda cuanda coto tandihī nyivi tyin maa ra cuví ra ndacá ñaha tsi ñi.

<sup>21</sup> Tan tandihī nyivi, tan cua cuita iñi ñi tsi ra.

**Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo**

(Mr. 3.20-30; Lc. 11.14-23; 12.10)

<sup>22</sup> Tacan tan tsindacā nyivi tsi iin ra yihí tatyí ña vaha nu nyí ra Jesús, cuaa ra tan ñihī ra. Tan ra Jesús janduvahā ra tsi ra. Tacan tan nacahān ra, tan nanyehē ra.

<sup>23</sup> Iyo xaan cuñí tandihī nyivi, tan catyí ñi:

—¿A ñavin ra ihya cuví tata ra rey David? —catyí ñi.

<sup>24</sup> Tan kuhva tsa tsiñī ra fariseo naha ra tsa caahán ñi, catyí ra naha:

—Tsihin tunyee iñi nu Beelzebú, nu cuví ityi nuu tsihin nu ña vaha nahnu, tavá ra ihya tatyí ña vaha —catyí ra naha.

<sup>25</sup> Maa tyin ra Jesús tsitó ra tsa tsicá iñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihi tyiñu tsa ndacá ñaha ra naha. Tan tatun iin ñuu o tandihī nyivi iin vehe tan cusihñ ñi, tacan tan cua tiví nu yucú ñi. <sup>26</sup> Tan tacan tucu tatun nu ña vaha tan tava nu juvin ñi tahan maa nu, cuñí tsi catyi tyin ña iin ñi cuví nahnu, tan cundihi tunyee iñi tsa iyó tsi nahnu. <sup>27</sup> Tan nyooho catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. Tun tsatyin tavá yu tsi nahnu tumaa kuhva catyí ndo, yóo tsahá tunyee iñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá iñi ndo. <sup>28</sup> Yacan cuenda catyí yu tsihin ndo, tyin yuhu tavá yu tatyí ña vaha tsihin tunyee iñi Tatyí Ii Nyoo. Tan cuñí tsi catyi yacan tyin nditsa tyin tsa tsaa kuhva ndacá ñaha Nyoo nu yucú ndo.

<sup>29</sup> Tan ¿yóo cuví quihví tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun kuhñi

jihna ra tsi ra can, tacan tan cuví quihin nyaa ra tandihī tsa iyó tsi ra.

<sup>30</sup> Nyivi tsa ña nyaá tumañi iñi tsihin yu, ñi xaan iñi tsi yu cuví ñi. Ñi tsa ña jatinyeé tsi yu tsa caahán yu tuhun Nyoo tsihin nyivi, cuñí tsi catyi tyin ña tsahá ñi tsa coto nyivi tuhun caahán yu.

<sup>31</sup> Yacan cuenda catyí yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatun cua cahan ñi ndavaha ñi siqui Tatyí Ii Nyoo, yacan nditsa, ña cua jaha Nyoo tucahnu iñi tsi ñi. <sup>32</sup> Tan yóo nyivi tsa caahán tsa ndavaha ñi siqui yuhu Rayñ tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyivi tsa caahán tsa ndavaha ñi siqui Tatyí Ii Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayivi ihya, tan ndi inga ñuu ñayivi tsa cua coo.

**Tsihin tsa javahá nyivi tan nacoto yo tsi ñi tatun vaha ñi a ña vaha ñi**

(Lc. 6.43-45)

<sup>33</sup> Tin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo tatun yutun vaha cuví tun tsa cuenda tsiti tun. <sup>34</sup> Nyooho, nyivi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyivi caquiñi cuví ndo? Tyin tsa quitá tsitsi añima yo, yacan caahán yo. <sup>35</sup> Nyivi vaha, vaha caahán ñi tyin yihí tsa vaha añima ñi. Tan nyivi caquiñi, tsa caquiñi caahán ñi, tyin tsa caquiñi yihí tsitsi añima ñi. <sup>36</sup> Tan yuhu catyí yu tsihin ndo tyin quivi cua tatsi tuñi Nyoo tsi tandihī nyivi, cua kuhva cuenda ñi tandihī tuhun tsa ña vaha cahān ñi. <sup>37</sup> Tyin tsa cuenda tsa caahán ndo, tan cua catyi Nyoo tun vaha ndo o ña vaha ndo.

**Nyivi ña vaha, tsa iyo ñi cuñí ñi nyehe ñi**

(Mr. 8.12; Lc. 11.29-32)

<sup>38</sup> Tacan tan juhva ra fariseo tan ra maestro cuenda ley vehe ñuhu catyí ra naha tsihin ra Jesús:

—Maestro, cuñí ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

<sup>39</sup> Tan nacahān ra Jesús tan catyí ra:

—Nyivi ña vaha tan nyivi tsa nyicún inga nyoo cuñí ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javahā Nyoo tsihin ra Jonás ra cuví ndusu yuhu ra tahān tsanaha.

<sup>40</sup> Tyin tumaa tsinyijī ra Jonás tsitsi tyaca cahnu uñi quivi tan uñi tsacuaa, tacan cua cunyii yuhu Rayñ tsa quee nda gloria tsitsi ñuhu uñi quivi tan uñi tsacuaa.

<sup>41</sup> Tan quivi cua tatsi tuñi Nyoo tsi tandihī nyivi, cua nduvita nyivi tsicoo ñuu Nínive tahān tsanaha tan cua catyí ñi na tatsi tuñi Nyoo tsi nyooho nyivi tsa iyó vi-tyin. Tan cua catyi ñi tyin cua cunaa ndo, tyin maa ñi tsa cuví ñi ñuu Nínive, nasamā ñi kuhva iyó ñi quivi cahān ra Jonás tuhun Nyoo tsihin ñi. Tan ihya nyí ra cahnu ca cuví tan ñavin ca ra Jonás. [Tan ña cuñí ndo tyaa soho ndo tsa caahán yu.] <sup>42</sup> Tan tacan tucu ñaha tsa tsindacā ñaha ityi Sur, cua nduvita ña quivi cua cutuñi nyivi tan cua catyi ña tyin cua cunaa nyooho nyivi iyó

vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa cahān ra Salomón. Tan vityin cahnu ca ra caahán tsihin ndo tan ñavin ca ra Salomón.

**Nu caahán ra Jesús tsihin yo nácaa quihvi nu tatyí ña vaha añima yo inga tsaha tatun naa iñi yo tsi Nyoo**  
(Lc. 11.24-26)

<sup>43</sup> Tatun iin nu tatyí ña vaha quitā nu tsitsi añima iin nyivi, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu: <sup>44</sup> “Cunuhu yu nda vehe yu nu quee yu.” Tacan tan cuahán nyico nu añima nu quee nu. Tan nyehē nu tyin ndi xaan, tan yoñi iyó, tan si xaan caá. <sup>45</sup> Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihi tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuvi tsi nyivi quiñi iyó —catyí ra Jesús.

**Nu tsaha cuenda ra Jesús tyin tumaa cuví yañi ra, tan tumaa cuví sihi ra, cuví tsi nyivi tsa javahá cuhva cuñi Nyoo**  
(Mr. 3.31-35; Lc. 8.19-21)

<sup>46</sup> Ndi caahán ca ra Jesús tsihin nyivi, tan tsaá sihi ra tan yañi ra, tan nyecú ñi ityi tsata vehe, tan cuñi ñi cahan ñi tsihin ra. <sup>47</sup> Tacan tan jacotō iin ra tsi ra Jesús, tan catyí ra:

—Sihi un tsihin ra yañi un naha ra nyecú ñi tsata vehe. Tan cuñi ñi cahan ñi tsihin un.

<sup>48</sup> Tan nacahān ra Jesús tan catyí ra tsihin ra can:

—¿Yóo cuví sihi yu tan yóo cuví yañi yu? —catyí ra.

<sup>49</sup> Tacan tan janahā ndaha ra nu nyecú ra tsicá tsihin ra, tan catyí ra:

—Ra ihya naha ra cuví sihi yu tan yañi yu. <sup>50</sup> Tyin tandihi nyivi tsa javahá cuhva cuñi Jutu yu, ra nyaá glória, juvin ñi can cuví yañi yu, tan cuhva yu, tan sihi yu —catyí ra Jesús.

**Nu caahán ra Jesús tyin tumaa iin ra tatsí, tacan cuví ra caahán tuhun Nyoo**  
(Mr. 4.1-9; Lc. 8.4-8)

**13** Quivi can quitā ra Jesús vehe nu nyii ra tan cuahán ra, tsicunyaā ra yuhu miñi. <sup>2</sup> Tan cuaha xaan nyivi ndu iin nu nyaá ra, yacan cuenda quihvi ra tsitsi iin yutun ndoo tan tsinyaā ra. Tan tandihi nyivi ndoo ñi yuhu ndutya. <sup>3</sup> Tacan tan quitsahā jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quitā iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra. <sup>4</sup> Tan cuhva tsa quitā ra tsiti can, cucoyo juhva tsi yuhu ityi. Tan quitsi saa tan tsatsi ti tsiti can. <sup>5</sup> Tan juhva ca tsiti can cucoyo tyañu yuu nu ña cuaha nyahyu yihí. Tan ican canā tsiti can tsa numi ñi tyin ña cuaha nyahyu yihí tyañu yuu can. <sup>6</sup> Maa tyin cuhva tsa canā ñicanyii, numi ñi na ityi tsi, tyin ña cunu yihí yoho tsaha tsi. <sup>7</sup> Juhva ca tsiti can cucoyo tyañu

iñu. Tan quivi canā trigu can tsahny tsi iin caa ñi tsihin iñu can, tan iñu can numi xaan ca tsahny tsi tan tsahñi tsi trigu can. <sup>8</sup> Maa tyin juhva ca tsiti can cucoyo nu ñuhu vaha. Tan quivi tsahny tsi, vaha xaan tsahā tsi tsiti. Tyin tsa iin tsiti can, cientu tsiti quitā tsihin tsi. Tan inga tsiti can, uñi xico, tan inga tsi oco utsi tsiti tsahā tsi. <sup>9</sup> ¡Tatun nyaá soho ndo, tyaa soho ndo tuhun caahán yu! —catyí ra Jesús.

**Nu catyí tuhun ra Jesús nacuenda jacuahá ra tsi nyivi tan ña catyí tuhun catsi ra tsihin ñi**  
(Mr. 4.10-12; Lc. 8.9-10)

<sup>10</sup> Tacan tan natuhvā ra tsicá tsihin ra Jesús, tan tsicā tuhun ra naha tsi ra, tan catyí ra naha:

—¿Nacuenda tyin tsihin cuhva ñi jacuahá un tsi nyivi, tan ña catyí tuhun catsi un tsihin ñi? —catyí ra naha.

<sup>11</sup> Tan nacahān ra Jesús tan catyí ra:

—Tsi nyooho jacotó Nyoo tuhun xeehe, cuhva ndacá ñaha ra, maa tyin nyivi ihya ña cuví coto ñi tsa tsahā Nyoo tsi nyooho. <sup>12</sup> Tyin tandihi nyivi tsa cutuñi iñi tsa caahán yu tan javahá ñi, cuaha ca cua cutuñi iñi ñi. Tan nyivi tsa ña cutuñi iñi, tan ña cuñi ñi javaha ñi, cua quihin nya ndihi yu tsa luxu ñi tsa tsitó ñi. <sup>13</sup> Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñi ñi maa tyin ña cutuñi iñi ñi, tumaa tsa ña tsiñi ñi cuví can. <sup>14</sup> Tyin tacan tan cundaa tsa cahān ra Isaías ra cuví ndusu yuhu Nyoo tahān tsanaha, tan catyí ra:

Tsa nditsa tyin nyooho tsiñi ndo tuhun yu, maa tyin ña cutuñi iñi ndo.

Cua nyehē ndo tsa javahá yu, tan ña cua cutuñi iñi ndo.

<sup>15</sup> Tyin tsa ndundavā xaan añima nyivi ihya, tan ña catsi vaha tsiñi ñi.

tan ndasí tinuu ñi,

na ña cua nyehē ñi tsihin tinuu ñi,

tan ña cua cuñi ñi tsihin soho ñi.

Tan ndi ña cua cutuñi iñi ñi tsihin añima ñi.

Tan ndi ña cua nanducu ñi tsi yu, na janduvaha yu tsi ñi.

<sup>16</sup> Maa tyin si xaan cuví tsi nyooho, tyin nyehé ndo tsihin tinuu ndo, tan tsiñi ndo tsihin soho ndo. <sup>17</sup> Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyivi vaha, cuñi ñi nyehē ñi tsa nyehé nyooho tsa javahá yu, maa tyin ña nyehē ñi. Tan cuñi ñi tyaa soho ñi tandihi tsa tsiñi nyooho vityin, maa tyin ña tsiñi ñi.

**Nu catyí tuhun ra Jesús tsa cuñi tsi catyí cuhva tsa cahān ra tsihin nyivi tsa cuenda ra tatsi can**  
(Mr. 4.13-20; Lc. 8.11-15)

<sup>18</sup> Tyaa soho ndo tsa cuñi tsi catyí cuhva tsa cahān yu tsa cuenda ra tsa tatsi tsiti trigu can: <sup>19</sup> Nyivi tsa tsiñi tuhun nácaa cuñi Nyoo cundaca ñaha ra añima ñi, tan ña cutuñi iñi ñi, cuví ñi tumaa nu cucoyo tsiti trigu yuhu ityi. Tan quitsi nu ña vaha tan quihin nya nu tuhun Nyoo tsa iyó añima ñi. <sup>20</sup> Tan tumaa nu cucoyo tsiti can tyañu yuu, juvin ñi nyivi tsa tsiñi tuhun Nyoo

cuví can. Tan sii xaan naquihjin vaha ñi itsi juhva ñi quivi. <sup>21</sup> Tyin nduve ñuhu cunu ican, yacan cuenda cana tsiti can, maa tyin ña cuví cahun yoho tsi. Tan tacan cuví nyivi can. Juhva ñi quivi tsinú iñi ñi. Maa tyin quivi tsa quitsahá nyehe ñi tundoho, tan caahán ndasi nyivi tsata ñi tsa cuenda tuhun Nyoo, tacan tan jandihí ñi tsa tsinú iñi ñi. <sup>22</sup> Tan tumaa nu cucoyo tsiti can tsitsi iñu, juvin ñi nyivi tsa tsiñi tuhun Nyoo cuví can. Tsiñi ñi, maa tyin ña cuñi ñi javaha ñi tumaa tsiñi ñi. Tyin tyaá xaan ca iñi ñi tundoho ñayivi tan ñavin ca tuhun Nyoo. Tan nyiyo ca iñi ñi tsa cuca. Tan tandihí tuhun can jatyañú tsi tsi ñi, tan cuví ñi tumaa yutun tsa ña tsahá tsiti. <sup>23</sup> Tan ñuhu vaha nu cucoyo tsiti can, yacan cuví inga nyivi tsa tsiñi tuhun Nyoo, tan cutuñi iñi ñi, tan javahá ñi tandihí tuhun caahán ra. Yihí ñi cuví ñi tumaa tsiti tsa cana tan tsahá tsi iin cientu tsiti, tan inga ñi cuví ñi tumaa tsiti tsa tsahá uñi xico, o tumaa tsiti tsa tsahá oco utsi tsiti intuhun intuhun.

### Nu caahán ra Jesús nácaa cuahán tuhun trigu tan cuhu ña vaha

<sup>24</sup> Tan cahán tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyivi cuví tsi tumaa iin ra tsa tatsi tsiti trigu nu ñuhu ra. <sup>25</sup> Tan cuhva tsa quixí tandihí ra jahá tyiñu naha ra, quihvi iin ra xaan iñi tsi ra jatsii can, tan quití ra tsiti cuhu ña vaha, tan cuahán ra. <sup>26</sup> Tan quivi cana tsiti trigu can, tan cana yoco tsi, cana ndihí tucu cuhu ña vaha can. <sup>27</sup> Tacan tan ra cuví musu can naha ra, tsahan ra naha tsicatyí tuhun ra naha tsihin tsitoho ra naha: “Tata, maa ñi tsiti trigu tatsi ndi, ¿tan nacuenda tyin cana cuhu ña vaha can?” catyí ra naha. <sup>28</sup> Tan nacañan ra can tan catyí ra: “Iyó iin ra xaan iñi tsi yu javaha tsehe, tun cuvi.” Tacan tan musu can, catyí ra naha tsihin tsitoho ra: “¿A cuñi un tyin cahun ndi tan tuhun ndi cuhu ña vaha can?” <sup>29</sup> Tan tsitoho ra naha catyí ra: “Ña tuhun ndo, tyin coto tuhun ndihí ndo trigu can. <sup>30</sup> Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñi ra naha cuenda jucun, tan cahmi ra naha. Tan yaha can tan natyihi vaha ra naha tsa vaha can tsitsi yaca yu.”

### Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo

(Mr. 4.30-32; Lc. 13.18-19)

<sup>31</sup> Tacan tan cahán ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuví tsi tumaa iin tsiti mostaza tsa tatsi iin ra nu ñuhu ra. <sup>32</sup> Tyin tsiti can lihli ñi tsi tan ñavin ca tandihí ca tsiti. Maa tyin quivi tsahnu tsi cuví tsi iin yutun. Tan quitsi saa, tan javahá ti taca ti soco tun —catyí ra Jesús.

### Nu caahán ra Jesús tyin tumaa yutsan iya tacan cuví tsa ndacá ñaha Nyoo tsi yo

(Lc. 13.20-21)

<sup>33</sup> Tan cahán ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuví tsi tumaa yutsan iya tsa nasaca nuu iin ñaha tsihin uñi jahma yutyi paan. Tyin tumaa ndaá tandihí yutsan paan can jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyí ra.

### Nu catyi tuhun ra Jesús nacuenda jacuahá ra tsi nyivi tsihin cuhva

(Mr. 4.33-34)

<sup>34</sup> Tandihí tuhun can cahán ra Jesús tsihin nyivi tsihin cuhva. Tan tandihí tsa cahán ra tsihin ñi ña cahán catsi maa ra, maa ñi maa tsihin cuhva cahán ra. <sup>35</sup> Tacan cuvi tyin tacan tan cundaa tsa cahán Jutu Mañi yo tsihin yuhu ra cuvi ndusu yuhu ra tahanan tsanaha tan tyaá ra tyehen:

Tsihin cuhva cua cahan yu tsihin nyivi.

Cua cahan yu tsihin ñi tuhun tsa yihí xeehe nda cuanda tsa javaha Nyoo ñuhu ñayivi.

### Nu caahán ra Jesús náa cuñi tsi catyí cuhu ña vaha tsa caná tsihin tsiti trigu can

<sup>36</sup> Tacan tan jacunuhu ra Jesús tsi nyivi, tan quihvi ra tsitsi vehe nu nyii ra. Tan natuhva ra tsicá tsihin ra nu nyaá ra, tan catyí ra naha tsihin ra:

—Cati tuhun tsihin ndi náa cuñi tsi catyí tsa cahán un tsihin nyivi tsa cuenda cuhu ña vaha tan trigu can.

<sup>37</sup> Tacan tan quitsaha catyí ra Jesús tsihin ra naha:

—Ra tsa tatsi tsiti trigu can cuví yuhu Rayii tsa quee nda gloria. <sup>38</sup> Tan ñuhu can cuví nyivi iyó nu ñuhu ñayivi. Tan tsiti trigu can cuví nyivi tsa ndacá ñaha Nyoo. Tan cuhu ña vaha can cuví nyivi tsa nyicún tsi nu ña vaha. <sup>39</sup> Tan nu tsa tatsi cuhu ña vaha can, nu ican cuví nu ña vaha juvin ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñi tsi catyí quivi cua cundihi ñuhu ñayivi. Tan ra tsa cua naquihin tsiti can, cuví ra ángel naha ra. <sup>40</sup> Tumaa jataca ra naha cuhu ña vaha can tyin cayu tsi, tacan cua cuví quivi cua cundihi ñayivi. <sup>41</sup> Yuhu Rayii tsa quee nda gloria cua jaquitsi yu ángel tan jataca ra naha tsi nyivi natyuhu tsi inga nyivi na javaha ñi tsa ña vaha tan inga nyivi tsa iyó cuatyí. <sup>42</sup> Tan cua tyihi ra naha tsi ñi tsitsi ono nu cayú ñuhu. Tan ican cua vacu tsa ñi tan cahyu ña cua cuví nuhu ñi. <sup>43</sup> Nyooho tan nyivi javahá cuhva cuñi Nyoo cua quituvi ndo nuu Jutu yo. Tan cua cuví ndo tumaa tsa nditsin ñuhu ñicanyii, nu ndacá ñaha Jutu yo. Tatun iyó soho ndo, tyaá soho ndo tsa caahán yu.

### Xuhun cuaan tsa yihí xeehe

<sup>44</sup> Tsa ndacá ñaha Nyoo tsi nyivi cuví tsi tumaa xuhun cuaan tsa yihí xeehe tsitsi ñuhu. Tan iin ra nañihí ra xuhun cuaan can, tan tyihí xeehe nyico ra inga

tsaha, tan sii xaan cuñí ra cuanuhu ra tan xico ra tandihí tsa iyó tsi ra. Tacan tan jatá ra ñuhu nu yihí xeehe xuhun cuaan can.

### Iin cuhva tsa cahán ra Jesús cuenda iin yuu xiñu tsa yahvi xaan nyaá

<sup>45</sup> Tan tsa ndacá ñaha Nyoo tsi nyivi, cuví tucu tsi tumaa iin ra najatá yuu xiñu tan naxicó nyico ra, <sup>46</sup> tan tsa ñihí ra iin tsa yahví xaan nyaá, xico ra tandihí maa tsa cumí ra, tan jatá ra yuu xiñu vaha can.

### Nu caahán ra Jesús iin cuhva cuenda traya

<sup>47</sup> Tan juven ñi cuví tucu tsa ndacá ñaha Nyoo tsi nyivi tumaa iin traya tsa cañí ra naha nu ndutya ñuhu, tan ñihí ra naha tandihí nuu tyaca. <sup>48</sup> Tan tsa tsity traya can tsihin tyaca, tavá ra naha traya can nu ityi. Tan ican nacatsí ra naha tsi tí, naquihín vaha ra naha quiti vaha tsitsi iin tyica, tan javitá ra naha quiti ña vaha can.

<sup>49</sup> Tan tacan cua cuvi quivi naa ñayivi, cua quitsi ángel, quitsi tava siin ra naha tsi nyivi vaha tan nyivi ña vaha.

<sup>50</sup> Tan cua tyihi ra naha tsi nyivi ña vaha can anyaya nu cayú ñuhu, nu cua vacu tsa ñi tan cahyu ña cua cuvi nuhu ñi.

### Nu caahán ra Jesús tyin vaha tuhun tsahnu Nyoo tan tuhun tsa Nyoo

<sup>51</sup> Tacan tan ra Jesús tsicá tuhun ra tsi ra tsicá tsihin ra, tan catyí ra tsihin ra naha:

—¿A cutuñi iñi ndo tandihí tsa cahán yu?

Tan nacahán ra naha tan catyí ra naha:

—Cutuñi iñi ndi, Jutu Mañi yu.

<sup>52</sup> Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndihí ra nácaa ndacá ñaha Nyoo tsihin tandihí tuhun tsa tsa caahán yu, cua cuví ra tumaa iin ra jatsii vehe tan cua jacuaha ra nduvi taahan tuhun vaha can tsi nyivi —catyí ra Jesús.

### Nu tsinuhú ra Jesús ñuu Nazaret nu tsahnu ra

(Mr. 6.1-6; Lc. 4.16-30)

<sup>53</sup> Tsa ndihí cahán ra Jesús cuhva ihya tan quitá ra cuahán ra. <sup>54</sup> Tan tsaá nyico ra ñuu ra. Tan quitsaha jacuaha ra tsitsi vehe ñuhu ñuu can. Tan iyo cuñí nyivi tan catyí ñi:

—¿Nu maa tahan cutuhvá ra ihya tsa tsitó xaan ra?

¿Tan nácaa cuví javaha ra tsa iyo? <sup>55</sup> Tyin sehe ra tahví yutun can cuví tsi ra. Tan ña María cuví síhi ra. Tan yañi ra cuví tsi ra Jacobo, ra José, ra Simón tan ra Judas.

<sup>56</sup> Tan cuhva ra iyó tucu ñi ityi nu iyó yo. Tun tacan, ¿nu maa tahan cutuhvá ra tandihí tsa tsitó ra? —catyí ñi.

<sup>57</sup> Tan yacan cuenda ña cuñí ñi tyaa yahvi ñi tsi ra.

Maa tyin ra Jesús catyí ra tsihin ñi:

—Tandihí nyivi tandihí ñi ityi jahá ñi tsa ñayivi tsi ra ndusu yuhu Nyoo, maa tyin nyivi ñuu ra ña tyaá yahvi ñi tsi ra tan ndi nyivi vehe ra —catyí ra Jesús.

<sup>58</sup> Tan ña cuaha tsa iyo javahá ra ñuu ra tsa cuenda tyin ña tsinú iñi ñi tsi ra.

### Nu catyí tsi nácaa tsihi ra Juan, ra jacoondutya tsi nyivi

(Mr. 6.14-29; Lc. 9.7-9)

**14** Quivi can ra Herodes, ra ndacá ñaha ñicahnu nu cuví Galilea, ñihí tuhun ra tsa javahá ra Jesús.

<sup>2</sup> Tan catyí ra tsihin ra yucú tsihin ra:

—Ra ican cuví ra Juan, ra jacoondutya tsi nyivi, ra tsa tsihi tan vityin nandotó nyico ra. Yacan cuenda iyó tunyee iñi tsi ra tsa javahá ra tsa iyo.

<sup>3</sup> Tacan catyí ra tyin juven ñi maa ra tavá tyiñu tyin tiin ra naha tsi ra Juan. Tan cuhñi ra naha tsi ra tsihin cade-na, tan tyihi ra naha tsi ra vehe caa. Tacan javahá ra Herodes tyin xaan cuñí ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasihi ra Felipe, yañi ra.

<sup>5</sup> Yacan cuenda ra Herodes cuñi ra cahñi ra tsi ra Juan, maa tyin yuuhví ra tsi nyivi, tyin tandihí ñi tsinú iñi ñi tyin ra Juan, ndusu yuhu Nyoo cuví ra. <sup>6</sup> Tan iin quivi iyó vico ra Herodes, tan sehe ña Herodías quitsahá tsañi ña yaa nu yucú ñi vico can. Tan tahán xaan iñi ra Herodes. <sup>7</sup> Tan catyí ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyí ra Herodes.

<sup>8</sup> Tacan tan natyuhu síhi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra jacoondutya tsi nyivi, tsi yu nu iin coho —catyí ña.

<sup>9</sup> Tsa tsiñi ra rey Herodes tsa cahán ña, nducuihya cuñi ra. Maa tyin tsa cuenda tsa cahán ra tyin tandihí tsa cua ndacan ña tan cua cuhva ra, yacan cuenda ña cuvi jandaví ñaha ra tyin tandihí nyivi yucú vico can tan tsiñi ñi tsa cahán ra. Yacan cuenda tavá tyiñu ra na cuhva ra naha jiñi ra Juan tsi ña nu iin coho. <sup>10</sup> Tan tavá tyiñu ra na cucahnya ra naha jucun ra Juan nu nyii ra vehe caa. <sup>11</sup> Tacan tan tsindacá ra naha jiñi ra Juan tsi ña, nyii tsi nu iin coho. Tan tsahá ra naha tsi ñaha tyuvaa can. Tan maa ña nacuhvá cuenda ña tsi síhi ña.

<sup>12</sup> Tacan tan tsaá ra nyicun tsi ra Juan naha ra tan naquihín ra naha cuñu ñuhu ra, tan tyihí ra naha tsitsi ñuhu. Yahá can tan tsahán ra naha tsijacotó ra naha tsi ra Jesús.

### Nu jacatsi ra Jesús tsi uhun mil rayii

(Mr. 6.30-44; Lc. 9.10-17; Jn. 6.1-14)

<sup>13</sup> Tsa tsitó ra Jesús tsa tahán ra Juan, quihín ra iin yutun ndoo, tan cuahán intuhun ñi maa ra nu taxin caa. Tan tsa tsitó nyivi, quitá ñi ñuu ñi, tan cuahán tsihin tsaha ñi nu nyii ra. <sup>14</sup> Tsa quitá ra Jesús tsitsi yutun ndoo can, tan nyehé ra tyin cuaha xaan nyivi nyicun tsi ra. Tan cundaahví iñi ra nyehé ra tsi ñi. Tan janduvahá ra tsi nyivi cuuhví tsa tsaá tsihin ñi. <sup>15</sup> Tan tsa cuñí cuaá, tacan tan natuhvá ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñi xaan, tan yoñi nyivi iyó yatyin ñi ihya. Yacan cuenda vaha ca cahán un tsihin nyivi ihya na cunuhu ñi nda ñuu kujata ñi tsa catsi ñi —catyí ra naha tsihin ra Jesús.

<sup>16</sup> Tan ra Jesús catyí ra:

—Nduve náa nducu ñi cuhun ñi. Cuhva nyooho tsa catsi ñi.

<sup>17</sup> Tan nacahan ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

<sup>18</sup> Tan catyí ra Jesús:

—Nḁaca ndo can tsi yu.

<sup>19</sup> Tacan tan catyí ra tsihin nyivi tyin na cunyecu ñi nu cuhu can. Yahá tsa tsinyecu ñi tan quihjín ra uhun taahan paan can, tan nduvi tyaca can. Tan nanyehé ndaa ra ityi síqui, tan nacuhva ra tyahvi nyoo tsi Nyoo tan tsahnú cuatyí ra paan can. Tan tsahá ra tsi ra tsicá tsihin ra, na tsatsa ra naha tsi nyivi can. <sup>20</sup> Tan tandihí nyivi tsatsí ñi tan ndaha vaha iñi ñi. Yahá can tan ndo ca tsa ñahñu, tan jacutyí ra naha utsi uvi tyica tsihin tsa ñahñu ican. <sup>21</sup> Tan tsa tandihí ñi tsa tsatsí can, quitá maa tumaa uhun mil tsa maa ñi maa rayi. Tan siin maa ñiñaha tan tsa nyihi.

### Nu tsicá ra Jesús nu ndutya

(Mr. 6.45-52; Jn. 6.16-21)

<sup>22</sup> Tsa yaha can tan catyí ra Jesús tsihin ra tsicá tsihin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi. <sup>23</sup> Tsa yahá tsa jacunuhu ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyii ra can tan cuaa. <sup>24</sup> Tan tsitsi tsa tsicán tahvi ra tsi Nyoo, yutun ndoo can tsa cuahán cuii tsi nda mahñu miñi. Tan ndutya miñi can cañí tsi tsi yutun ndoo can tsa cuenda tyin ñihi xaan yihí tatyí nu cuahán ra naha. <sup>25</sup> Tan tsa cua tuvi cuahán ndihí ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya. <sup>26</sup> Tan cuhva tsa nyehe ra naha tsi ra, tsicá ra nu ndutya can, nayuhvi xaan ra naha. Tan caná tsaa ra naha, tan catyí ra naha:

—jIhna ndo xin. Tatyí vatsí can!

<sup>27</sup> Maa tyin nacahan ra Jesús tsihin ra naha, tan catyí ra:

—ñNa nayuhvi ndo tyin maa yu cuví! —catyí ra.

<sup>28</sup> Tacan tan nacahan ra Pedro tan catyí ra:

—Jutu Mañi yu, tatun maa un vatsí juven, cuhva tsa quitsi ndihí yu nu vatsí un.

<sup>29</sup> Tan ra Jesús catyí ra tsihin ra:

—Naha jiin.

Tacan tan quitá ra Pedro tsitsi yutun ndoo can, tan quitsahá tsicá ra nu ndutya tan cuahán ra nda nu vatsí ra Jesús. <sup>30</sup> Maa tyin cuhva tsa tuvi iñi ra tyin ñihi xaan quitsahá yihí tatyí, nayuhvi xaan ra, tacan tan quitsahá cuñí nyee ra, tan quitsahá caná tsaa ra tan catyí ra:

—jJācacu tsi yu, Jutu Mañi yu!

<sup>31</sup> Tan iin yaha ñi tñin ra Jesús ndaha ra, tan catyí ra tsihin ra:

—¿Nacuenda tsa nayuhvi un, yooho tsa luxu xaan tsinú iñi tsi yu? —catyí ra Jesús tsihin ra.

<sup>32</sup> Tan cuhva tsa quihvi ra naha tsitsi yutun ndoo can, cutaxin tatyí can. <sup>33</sup> Tacan tan ra yucú tsitsi yutun ndoo

can tsicuiñi tsiti ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yooho —catyí ra naha.

### Nu janduvahá ra Jesús tsi nyivi cuuhví tsa iyó Genesaret

(Mr. 6.53-56)

<sup>34</sup> Tsa yahá sava ra naha miñi can, tsaá ra naha ñuhu Genesaret. <sup>35</sup> Tan cuhva tsa nacoto nyivi iyó ican tsi ra Jesús tyin juven ra cuví, jacoto ñi tsi tandihí nyivi iyó taniñ cahnu can. Tan tsindaca ñi tandihí nyivi cuuhví nu nyii ra. <sup>36</sup> Tan caahán ndaahvi ñi tsihin ra, na cuhva ra tsa tñin ñi vasu luxu jahma ra. Tan tandihí ñi tsa tñin jahma ra, nduvahá ñi.

### Tsa jativí tsi nyivi nuu Nyoo

(Mr. 7.1-23)

**15** Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahan ra naha nu nyii ra Jesús tan tsicá tuhun ra naha tsi ra, tan catyí ra naha:

<sup>2</sup> —¿Nacuenda ña javahá ra tsicá tsihin un naha ra cuhva nacoq tsii tsaahnu yo?, tyin catyí ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicá tsihin un ña tyaá yahvi ra naha tuhun tsahnu can —catyí ra naha.

<sup>3</sup> Tan tsicá tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnu tsa iyó ndo tan ña cuñí ndo tyaá yahvi ndo tsa caahán Nyoo? <sup>4</sup> Tyin Nyoo catyí ra: “Tyaa yahvi ndo tsi jutu ndo tan tsi sihi ndo, tyin tandihí nyivi tsa caahán ndavaha ñi síqui jutu ñi o sihi ñi, cua cúu ñi”, catyí Nyoo. <sup>5</sup> Maa tyin nyooho catyí ndo tyin cuví catyí ndo tsihin jutu ndo o tsihin sihi ndo tyehen: “Ña cuví jatyinyee yu tsi un tyin tsa tsahá yu tandihí tsa iyó tsi yu tsi Nyoo.” <sup>6</sup> Tatun tsa catyí ndo yacan, ña cuñí tsi tsa jatyinyee ndo tsi jutu ndo o tsi sihi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo. <sup>7</sup> jNyooho cuñí ndo tyin vaha xaan ndo, maa tyin ña nditsa ndo! Nditsa tsa cahan ra Isaías, ra cuví ndusu yuhu Nyoo, síqui ndo jahá Nyoo. Tan catyí ra tyehen:

<sup>8</sup> Nyivi ihya, jacahnú ñi tsi yu tsihin yuhu ñi.

Maa tyin ñavin tsihin tsa ñi iñi ñi.

<sup>9</sup> Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaías tuhun ndo jahá Nyoo, catyí ra Jesús tsihin ra ican naha ra.

<sup>10</sup> Tacan tan caná ra Jesús tsi nyivi tan catyí ra tsihin ñi:

—Tyaa soho ndo tsa caahán yu, tan nducu ndo cuhva cutuñi iñi ndo. <sup>11</sup> Tyin nyivi tsa tiví nuu Nyoo, ñavin tsa quihvi yuhu ñi jativí tsi ñi. Tyin tiví ñi jahá tsa quitá yuhu ñi.

<sup>12</sup> Tacan tan natuhvā ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñí ra naha tsa tsiñi ra naha tsa cahān un.

<sup>13</sup> Tan maa ra Jesús nacahān ra tan catyí ra:

—Tandihí yutun tsa ña tatsi Jutu yu, ra nyaá gloria, cua tuhun ra nda cuanda yoho tun. <sup>14</sup> Jāña ndo tsi ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatun iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

<sup>15</sup> Tacan tan quitsahā catyí ra Pedro tsihin ra Jesús:

—Çatyí tuhun tsihin ndi náa cuñí tsi catyí tsa cahān un nañi.

<sup>16</sup> Tacan tan ra Jesús catyí ra tsihin ra naha:

—Ndi nyooho tan ña cutuñí ndihí iñi ndo. <sup>17</sup> ¿A ña cutuñí iñi ndo tyin tsa tsatsí yo, tsitsi yo cuahán tsi? Yahā can tan cua quita nyico tsi. <sup>18</sup> Maa tyin tuhun tsa quitá yuhu yo, tsitsi añima yo queé can tan nyivi tiví ñi nuu Nyoo jahá tsa caahán ñi. <sup>19</sup> Tyin tsa caquiñi tsicá iñi ñi tsitsi añima ñi quitá can, tan cuñí ñi cahñi ñi nyivi. Cuñi ñi suhu ñi. Yihí nyivi caahán ñi cuendu, o jacuñí nyaa ñi tsi inga ca nyivi. Yihí ra cuñí ra coo inga ñaha ra, o ñiñaha iyó yñ tsicá nuu ñi tsihin inga rayñ. Yihí ra tsi-coó ra tsihin ñaha tan ña tindaha ra tsihin ña. Tan yihí rayñ quixí ra tsihin juven ñi maa rayñ. Tan ñiñaha yihí ñi quixí ñi tsihin juven ñi maa ñaha. Tan tandihí ca maa tsa caquiñi tsa javahá ñi tsihin cuñu ñuhu ñi. <sup>20</sup> Yacan cuví tsa jatíví tsi nyivi nuu Nyoo. Tyin tsa ña nacatyá ñi ndaha ñi tsa ndi cumañi ca catsi ñi, ña jatíví can tsi ñi —catyí ra Jesús.

### Nu tsinu iñi iin ñaha inga ñuu tsi ra Jesús

(Mr. 7.24-30)

<sup>21</sup> Quitá ra Jesús ñuu can tan cuahán ra ityi ñuu Tiro tan Sidón. <sup>22</sup> Tan ityi can iyó iin ñaha Canaán. Tan tsa nyehē ña tsi ra Jesús natuhvā ña nu nyaá ra tan caná tsaa ña tan catyí ña:

—Jutu Mañi yu, tata ra David, cundaahvi iñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tsihin ra Jesús.

<sup>23</sup> Maa tyin tumaa tsa ña tsiñi ñi ra Jesús jahá ra tsi ra tan ña nacahān ra tsa iin yaha ñi. Tacan tan natuhvā ra tsicá tsihin ra tan catyí ra naha tsihin ra:

—Çahan tsihin ña na cunuho ña tyin utsan xaan yo tsa caná tsaa ña tsata yo.

<sup>24</sup> Tacan tan catyí ra Jesús tsihin ra naha:

—Vatsí yu jahā Nyoo ñuu Israel tyin naquihin ndaahvi yu nyivi ñuu can tsa cuví ñi tumaa mbee tsa cuanaá. Tan tsa cuenda nyivi can vatsí yu.

<sup>25</sup> Tan ñaha can natuhvā ña nu nyaá ra tan tsicuiñi tsiti ña nuu ra, tan catyí ña tsihin ra:

—Jutu Mañi yu, ¡jatyinyee tsi yu!

<sup>26</sup> Tan ra Jesús catyí ra tsihin ra:

—Ña vaha tsa quihin nyaa yo paan yuhu sehe yo, tan cuhva yo catsi ina —catyí ra tsihin ña.

<sup>27</sup> Maa tyin ña ndasi cuñí ña tsa cahān ra, tan catyí ña tsihin ra:

—Nditsa, Jutu Mañi yu. Maa tyin nda cuanda ina tan tsatsí ti titsehe tsa cucoyo xuu mesa tsitoho ti —catyí ña.

<sup>28</sup> Tacan tan catyí ra Jesús tsihin ña:

—Yooho ñaha, tsinú xaan iñi un tsi yu. Na cuvi maa cuhva tsicá iñi un.

Tan juven ñi cuhva can tan nduvahā sehe ña.

### Nu cuaha xaan nyivi cuuhví janduvahā ra Jesús

<sup>29</sup> Tsa yahā yacan tan ra Jesús cuahán ra ityi yuhu miñi Galilea, tan ndaā ra iin jiñi yucu tan ican tsinyaa ra. <sup>30</sup> Tan cuaha xaan nyivi cuahán ñi nu nyaá ra cuandacá ñi nyivi cuuhví tyin janduvaha ra tsi ñi. Yihí ñi coxo ñi, cuaa ñi, ñihí ñi, lundu ñi. Tan yihí ñi yihí inga ca nu cuehe tsi ñi. Tan tsaqujn nyecu ñi tsi tandihí ñi cuuhví can nu nyaá ra Jesús. Tan janduvahā ra tsi ñi.

<sup>31</sup> Tan iyo xaan cuñí nyivi can nyehé ñi tyin nacahān ñi ñihí tan nduvahā ñi lundu, tan nacacá ñi coxo, tan nanyehé ñi cuaa. Tan quitsahā jacahnu xaan ñi tsi Nyoo ñi, tsa cuví ñi nyivi Israel.

### Nu tsahá ra Jesús tsa catsi cumi mil rayñ

(Mr. 8.1-10)

<sup>32</sup> Tacan tan canā ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñí yu nyehé yu tsi nyivi ihya, tyin tsa uñi quivi yucú ñi ihya tsihin yo, tan nduve náa catsi ñi. Tan ña cuñí yu jacunuhu yu tsi ñi yuvehe ñi tyin ñaha ca catsi ñi, tan coto cúu naaha ñi ityi cuanuhú ñi —catyí ra Jesús.

<sup>33</sup> Tacan tan ra tsicá tsihin ra catyí ra naha tsihin ra:

—¿Tan numaa cua ñihi yo tsa catsi nyivi cuaha ihya, tyin ihya nduve nyivi iyó?

<sup>34</sup> Tacan tan ra Jesús tsicā tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

<sup>35</sup> Tan catyí ra tsihin nyivi na cunyecu ñi nu ñuhu.

<sup>36</sup> Tacan tan quihjn ra tsa utsa paan can tan tyaca can, tan nacuhvā ra tyahvi nyoo tsi Nyoo. Tan quitsahā tsahnú cuatyí ra paan tsihin tyaca, tan tsahā ra tsi ra tsicá tsihin ra tyin na tsatsa ra naha tsi nyivi. <sup>37</sup> Tandihí ñi tsatsi ñi, tan ndahā vaha iñi ñi. Tan tsa ndihí tsatsi ñi tan naquihjn ra naha tsa ñahñu tsa ndoo can tan quitā utsa tyica cuví tsi. <sup>38</sup> Tan ra tsa tsatsi can naha ra quitā maa cumi mil ra naha tan siñ maa ñiñaha tan tsa nyihi. <sup>39</sup> Yahā can tan jacunuhu ra tsi ñi, tan quihvi ra tsitsi yutun ndoo, tan cuahán ra ityi Magdala.

### Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo

(Mr. 8.11-13; Lc. 12.54-56)

**16** Tacan tan ra fariseo naha ra tan ra saduceo naha ra tsahān ra naha nu nyí ra Jesús, tyin cuñí ra naha nducu cuhva ra naha tsi ra. Tan catyí ra naha na

javaha ra iin tsa iyo tsihin tunyee iñi Nyoo. <sup>2</sup> Maa tyin nacahan ra Jesús tan catyí ra tsihin ra naha:

—Tsa cueñi, tuhvá ndo catyí: “Sii xaan caa ityaan cua cuví tyin cuaaha xaan nu vico”. <sup>3</sup> Tan tsa tuví catyí tucu ndo tyin ña sii maa caa cua cuví, tyin iñi naaha xaan tan cuaaha xaan vico, catyí ndo. ¿Nacuenda tyin tsitó tucu ndo yacan tan tsa cuví vityin ña cuví nacoto ndo, nyooho ra jandaví ñaha? <sup>4</sup> Nyivi tsa iyó vityin, quiñi xaan iyó ñi tan ña tsinú iñi ñi tsi Nyoo. Maa ñi tsa iyo cuñi ñi nyehe ñi. Maa tyin yuhu ña cua javaha yu tsa iyo nyehe ñi, tyin tumaa tsa cuví tsi ra Jonás, yacan ña cua nyehe ñi —catyí ra Jesús tsihin ra naha; tsahan cuahán ra.

### Tuhun caahán ra fariseo naha ra cuví tsi tumaa yutsan iya

(Mr. 8.14-21)

<sup>5</sup> Cuhva tsa yahá ra tsicá tsihin ra Jesús inga tsiyo miñi can, nducuhun iñi ra naha tyin nduve paan tsa catsi ra naha ndahá ra naha. <sup>6</sup> Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

<sup>7</sup> Tacan tan quitsahá natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

<sup>8</sup> Tan tsa tuví iñi ra Jesús tsa tsicá iñi ra naha, catyí ra tsihin ra naha:

—Nyooho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo?

<sup>9</sup> ¿A ñaha ca cutuñi iñi ndo? ¿A ña nducuhún iñi ndo quivi tsa jacatsí yu tsi uhun mil rayii tsihin uhun taahan ñi paan, tan najava taahan tyica jacutú ndo tsihin tsa ñahñu tsa ndoo can? <sup>10</sup> ¿A tsa naá ndihí tucu iñi ndo quivi tsa jacatsí yu cumi mil rayii, tan najava taahan tyica jacutú ndo tsihin tsa ndoo tsa utsa taahan ñi paan?

<sup>11</sup> ¿Nacuenda ña tuví iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

<sup>12</sup> Tacan tan cutuñi iñi ra naha tyin ñavin tsa cuenda yutsan iya paan can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

### Nu catyí ra Pedro tyin ra Jesús cuví ra Cristo, ra jacacú tsi yo

(Mr. 8.27-30; Lc. 9.18-21)

<sup>13</sup> Cuhva tsa tsaá ra Jesús ityi ñuu Cesarea Filipino, tsicá tuhun ra tsi ra tsicá tsihin ra tan catyí ra:

—¿Náa catyí nyivi? ¿Yóo ra cuví yu, Rayii tsa quee nda gloria? —catyí ra.

<sup>14</sup> Tan nacahan ra naha tan catyí ra naha:

—Yihí nyivi catyí ñi tyin ra Juan ra jacoondutyá tsi nyivi cuví un. Tan inga nyivi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahanan tsanaha cuví un.

<sup>15</sup> Tacan tan catyí ra tsihin ra naha:

—Tan nyooho, ¿yóo ra cuví yu, catyí ndo?

<sup>16</sup> Tacan tan nacahan ra Simón Pedro tan catyí ra: —Yooho cuví ra Cristo, Sehe Nyoo nyitó —catyí ra.

<sup>17</sup> Tan nacahan ra Jesús tan catyí ra:

—Sii xaan cuví tsi yooho, Simón, sehe ra Jonás, tyin ñavin nyivi janahá tuhun ihya tsi un, tyin maa Jutu yu, ra nyaá gloria janahá tsi un. <sup>18</sup> Tan yuhu catyí yu tsihin un tyin yooho cuví ra Pedro. Tan siqui cava ihya, cua javaha yu vehe ñuhu yu. Tan ña cua tani tsi jaha tuhun tsihi. <sup>19</sup> Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihí tsa cuhñi un ihya nu ñuhu ñayivi, tsa nuuhñi jahá Nyoo nda gloria. Tan tandihí tsa ndatsi un ihya nu ñuhu ñayivi, tsa ndatsi maa Nyoo nda gloria.

<sup>20</sup> Tacan tan catyí ra Jesús tsihin ra tsicá tsihin ra tyin ña cahan ra naha tsihin nyivi tun juvin ra cuví ra Cristo ra tsa quee nu nyaá Nyoo.

### Nu caahán ra Jesús tyin cua cahñi nyivi tsi ra

(Mr. 8.31—9.1; Lc. 9.22-27)

<sup>21</sup> Nda quivi can quitsahá catyí ra Jesús tsihin ra tsicá tsihin ra, tyin cuñi tsi tsa cuhun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi ra naha tsi ra, maa tyin tsa tsinu uñi quivi cua nandoto ra inga tsaha. <sup>22</sup> Tacan tan quihñ ra Pedro tsi ra tan quitá siin ra tsihin ra tan quitsahá caahán ra tsihin ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

<sup>23</sup> Tan nanyico coo ra Jesús, tan quitsahá caahán ra tsihin ra Pedro:

—jatsiyo nyaha tsi un, cuihna! Tyin cuñi un casi un tsi yu. Tyin yooho ña tsicá iñi un cuhva cuñi Nyoo, tyin cuhva cuñi nyivi tsicá iñi un —catyí ra.

<sup>24</sup> Tacan tan ra Jesús catyí ra tsihin ra tsicá tsihin ra:

—Tatun ndáa nyooho cuñi cunyicun tsi yu, cahnya iñi ndo tsa cuñi maa ndo javaha ndo, tacan tan cuví javaha ndo tsa cuñi Nyoo. Tan ña cua ndu uvi iñi ndo tsa yihí ndo cuenda yu, vasu tandihí quivi nyehé ndo tundoho. Tyin yacan cuví cruu tsa taahán tsi cuiso ndo tatun cua cunyicun ndo tsi yu. <sup>25</sup> Tan nyooho tsa ña cuñi nyehe tundoho, tan ña cuñi ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi ndo tsa cuenda yu, cua cacu ndo. <sup>26</sup> Tyin nduve yahvi nyaá tsa cua ñihi ndo tandihí tsa iyó nu ñuhu ñayivi tun añima ndo tan ña cua cacu tsi. Tyin nduve maa náa tsihin tan cuví tyahvi ndo tan ña cua cunaa añima ndo. <sup>27</sup> Tyin yuhu, Rayii tsa quee nda gloria, cua quitsi nyico yu inga tsaha, maa tyin tsihin tsa cahnu cuví Jutu yu, tan cua quitsi ángel tsihin yu. Tacan tan cua tyahvi yu tsi intuhun intuhun ndo tsa cuenda tsa javahá ndo. <sup>28</sup> Tan tsa nditsa catyí yu tsihin ndo, tyin yihí nyooho tsa yucú

ihya vityin, cua nyehe ndo nu vatsí yu tsa cua cundaca ñaha yu, tsa ndi cumañi ca cúu ndo —catyí ra Jesús.

**Nu nyehe uñi taahán ra tsicá tsihin ra Jesús nácaa tsa sñ caá xiñu ra Jesús nu ndacá ñaha ra nda gloria**  
(Mr. 9.2-13; Lc. 9.28-36)

**17** Tan tsa yahá iñu quivi, tan quihín ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha. <sup>2</sup> Tan ican nasamā cuhva caá ra Jesús nuu ra yucú tsihin ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhú. <sup>3</sup> Tacan tan nyehe ra naha tsi ra Moisés tan ra Elías, natuhún ra naha tsihin ra Jesús. <sup>4</sup> Tan quitsahá caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñí un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

<sup>5</sup> Tsitsi tsa caahán ra Pedro, quitsí iin vico tsa xiñu xaan siquí ra naha. Tan tyasí tsi tsi ra naha. Tan tsiñí ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan sñ xaan cuñí yu tsihin ra. Tyaa yahvi ndo tsa caahán ra —catyí ndusu can.

<sup>6</sup> Tsa tsiñí ra tsicá tsihin ra Jesús tuhun ihya, tsicava tsihin nuu ra naha nda nu ñuhu, tyin nayuhví xaan ra naha. <sup>7</sup> Tacan tan natuhvá ra Jesús nu cayucú ra naha, tan tñin ra tsi ra naha, tan catyí ra:

—Nduvita ndo, tan ña nayuhví ndo.

<sup>8</sup> Tan cuhva tsa nanyehe ra naha, intuhun ña ra Jesús nyaá, tan nduve inga uvi ca ra naha.

<sup>9</sup> Tan cuhva tsa vatsí nuu ra naha yucu can, catyí ra Jesús tsihin ra naha:

—Ña cañan ndo tsa nyehe ndo ihya tsihin nyivi. Tsa yaha tsa cúu Rayí tsa quee nda gloria tan nandoto ra, tacan tan cua cañan ndo can —catyí ra.

<sup>10</sup> Tacan tan tsicá tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

<sup>11</sup> Tan nacahán ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandíhi. <sup>12</sup> Maa tyin yuhu catyí yu tsihin ndo tyin tsa yahá quitsí ra Elías, tan ña nacoto nyivi tsi ra, tan javahá ñi tsihin ra tandíhi cuhva cuñí maa ñi. Tan tacan tucu yuhu, Rayí tsa quee nda gloria, cua janyehe ñi tundoho tsi yu —catyí ra tsihin ra naha.

<sup>13</sup> Tacan tan cutuñí iñi ra naha tyin tuhun ra Juan, ra jacoondutya, caahán ra Jesús.

**Nu janduvahá ra Jesús tsi iin ra luhlu tsa tsiihí naaha jahá tatyí ña vaha**  
(Mr. 9.14-29; Lc. 9.37-43)

<sup>14</sup> Cuhva tsa tsaá ra naha nu yucú nyivi, natuhvá iin ra tan tsicuiñí tsiti ra nuu ra Jesús, tan catyí ra tsihin ra:

<sup>15</sup> —Tata, cundaahvi iñi tsi sehe yu, tyin yihí cuehe tsi-ihí naaha tsi ra, tan tuhvá ra nduva ndasava, tan cuaha xaan tundoho nyehé ra jahá cuehe can. Tan yihí tsaha nduvá ra nu ñuhú tan cayú ra, tan nduvá tucu ra nu yihí ndutya. <sup>16</sup> Tan tsindacá yu tsi ra tsi ra tsicá tsihin un, maa tyin ña cuví janduvahá ra naha tsi ra —catyí ra.

<sup>17</sup> Tan nacahán ra Jesús tan catyí ra:

—¿Nyooho, nyivi tsa ña tsinú iñi cuví ndo! ¿Tan caquiñi ndo! ¿Ndáa nda quivi cua cunyii yu tsihin ndo? ¿Tan ndáa nda quivi cua cunyeet iñi yu tsihin ndo, tyin nyooho ña tsinú vaha maa iñi ndo tsi yu? Tíndaca ndo tsi ra luhlu tsi yu —catyí ra.

<sup>18</sup> Tacan tan tavá ra Jesús tsi nu tatyí ña vaha can, tan quitá nu tsi ra luhlu can. Tan juvin ñi cuhva can nduvahá ra.

<sup>19</sup> Tsa yahá can tan tsicá tuhun sñin ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ña cuví tava ndi tatyí ña vaha can?

<sup>20</sup> Tan ra Jesús nacahán ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsiti mostaza, cuví catyí ndo tsihin yucu ihya na catsiyo tsi tan cuhun tsi inga ityi, tan yucu ihya cuhun tsi inga ityi. Tan nduve tsa ña cua cuví javaha ndo tatun nditsa tsa tsinú iñi ndo tsi yu. <sup>21</sup> Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

**Inga tsaha cañan ra Jesús tsa cua cahñi nyivi tsi ra**  
(Mr. 9.30-32; Lc. 9.43-45)

<sup>22</sup> Yucú ra naha Galilea can, tan ra Jesús catyí ra tsihin ra naha:

—Yuhu, Rayí tsa quee nda gloria, iin ra cua nacuhva cuenda ra tsi yu tsi ra xaan iñi tsi yu naha ra. <sup>23</sup> Tan cua cahñi ra naha tsi yu. Maa tyin tsa tsinu uñi quivi tan cua nandoto yu —catyí ra.

Tsa tsiñí ra naha tuhun ihya, cuihya xaan cuñí ra naha cuví.

**Nu tyahví ra naha cuenda tsa nduvaha vehe ñuhu cahnu**

<sup>24</sup> Cuhva tsa tsaá ra Jesús tan ra tsicá tsihin ra ñuu Capernaum, ra tavá xuhun cuenda vehe ñuhu naha ra, tsahán ra naha tsinyehé ra naha nu nyí ra Pedro tan tsicá tuhun ra naha tsi ra tan catyí ra naha:

—¿A ña tuhvá ra jacuahá tsi ndo tyahví xuhun tsa cuenda vehe ñuhu cahnu? —catyí ra naha tsihin ra Pedro.

<sup>25</sup> Tan nacahán ra Pedro tan catyí ra:

—Tuhvá ra.

Tan tsa quihví ra Pedro tsitsi vehe nu iyó ra naha, jihna ca ra Jesús nacahán tan catyí ra:

—¿Nacaa cuñi yooho, Simón? ¿Yóo tsi quihín ra cuví rey tsa iyó nu ñuhu ñayivi ihya yahvi? ¿A tsi nyivi ñuu maa ra o tsi inga nyivi?

<sup>26</sup> Nacahán ra Pedro tan catyí ra:



—Tsi inga nyivi.

Tan catyí ra Jesús tsihin ra:

—Tun tacan, nyivi ñuu maa ra ña taahán tsi tyahvi ñi.  
<sup>27</sup> Maa tyin ña cuñí yo tsa cahan ra naha siquí yo, yacan cuenda vaha ca tsa cuhun un yuhu miñi can, tan jacuhun un yiquí tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu ti cua ñihi un xuhun. Tan tsihin yacan ñi cua tyahvi un tsa cuenda yo —catyí ra Jesús tsihin ra Pedro.

**Nu janahā ra Jesús yóo ra cahnu ca cuví nuu tandihí nyivi tsa ndacá ñaha Nyoo**  
 (Mr. 9.33-37; Lc. 9.46-48)

**18** Quivi can natuhvā ra tsicá tsihin ra Jesús nu nyaá ra, tan tsicā tuhun ra naha tsi ra tan catyí ra naha:

—¿Yóo ra cahnu ca cuví nu ndacá ñaha Nyoo?

<sup>2</sup> Tacan tan ra Jesús canā ra tsi iin ra luhlu, tan tyaā ra tsi ra mahñu ra naha. <sup>3</sup> Tan catyí ra:

—Tsa nditsa catyí yu tsihin ndo, tyin tatun nyooho tan ña cua nasama ndo cuhva iyó ndo tan ña janduluhlú ndo tsi ndo tumaa ra nyihi, ña cua cuví quihvi ndo nu ndacá ñaha Nyoo. <sup>4</sup> Tyin ra tsa cahnu ca cuví nuu Nyoo, juvin ra cuví ra tsa janduluhlú tsi, tumaa ra luhlu ihya. <sup>5</sup> Nyivi tsa naquihín tsi iin nyivi tumaa ra luhlu ihya, tyin tsinú iñi ñi tsi yu, yuhu naquihín cuenda ñi.

**Nu caahán ra Jesús tsihin yo nácaa jaha cuenda yo tsi yo coto javaha yo tsa ña vaha**  
 (Mt. 5.29-30; Mr. 9.42-48; Lc. 17.1-2)

<sup>6</sup> Tatun yóo nyivi natyuhú tsi iin nyivi tsa ñaha ca tsinú vaha iñi tsi yu, na javaha ñi tsa caquiñi, vaha ca na cunuhñi iin yuu yoso vee jucun ñi natyuhú can, tan kujanehñi nyivi tsi ñi nu cunu ndutya ñuhu. <sup>7</sup> ¡Ndahvi nyivi ñuu ñayivi, tyin tacan iyó tsa jatívi tsi ñi! ¡Tan ndahvi tucu ra ndaahvi tsa jatívi tsi ñi!

<sup>8</sup> Yacan cuenda tatun ndaha un o tsaha un javahá tsa ña vaha, çahnya can tan javita un. Tyin vaha ca quihvi un nu coo un tsihin Nyoo tsihin tsa lundu ndaha un o lundu tsaha un, tan ñavin ca tsa nanii un tan jacuhun Nyoo tsi un nu cayú ñuhú tsa ña cua ndahva maa. <sup>9</sup> Tun javahá un tsa ña vaha jahá tinuu un, tava can tan javita un. Tyin vaha ca quihvi un nu coo un tsihin Nyoo tsihin intuhun tinuu un, tan ñavin ca tsa jacuhun Nyoo tsi un tsihin nduvi tinuu un nu cayú ñuhú tsitsi anyaya.

**Nu cahān ra Jesús tyin tumaa mbee tsa cunaā, tacan cuví yo**  
 (Lc. 15.3-7)

<sup>10</sup> Ña caca iñi ndo tyin ra nyihi cuenda yu ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria. <sup>11</sup> Tyin yuhu, Rayii tsa quee nda gloria, vatsí jacacu yu tsi nyivi tsa cuanaa.

<sup>12</sup> ¿Nacaa cuñí nyooho? Tatun iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cuhun ra cunanducu ra tsi quití tsa cuanaa can? <sup>13</sup> Tan tatun nañihi ra tsi ti, tsa nditsa tyin sii ca cua cuñi ra tsihin quití can, tan ñavin ca tsihin tsa cumi xico tsahun cumi quití tsa ña tsinaā. <sup>14</sup> Tan tacan tucu, Jutu yo ra nyaá gloria, ña cuñí ra tsa cunaa ndi intuhun nyivi tsa cuví tumaa ra nyihi ihya.

**Nacaa taahán tsi jahá tahan yo tucahnu iñi tsi yo**  
 (Lc. 17.3)

<sup>15</sup> Tatun ra yañi un tan javahā ra tsa ña vaha tsi un, çahan tsihin intuhun ñi maa ra tan çatyí un tsihin ra tyin ña vaha cuhva javahā ra. Tan tatun tyaa yahvi ra tuhun caahán un, tsa jahā canaa un tsi ra inga tsaha cuenda Nyoo cuví can. <sup>16</sup> Maa tyin tatun ña tyaa yahvi ra tsi un, tacan tan çana un tsi iin o uvi ra tyin cuví ra naha tsa ndaa tsa cuenda tsa cua cahan un tsihin ra can. <sup>17</sup> Tatun ña tyaa yahvi ra ndi maa tsi ra tsa tsahan tsihin un naha ra, tacan tan çahan tsihin tandihí nyivi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jahā ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tavá xuhun cuenda ra ndacá ñaha nda ñuu Roma.

<sup>18</sup> Tsa nditsa catyí yu tsihin ndo, tyin tandihí tsa cuhñi ndo ihya nu ñuhu ñayivi, tsa nuuhñi tsi jahā maa Nyoo nda gloria. Tan tandihí tsa ndatsi ndo ihya nu ñuhu ñayivi, tsa ndatsi maa Nyoo nda gloria.

<sup>19</sup> Tan juvin ñi catyí tucu yu tsihin ndo, tatun uvi ndo ihya nu ñuhu ñayivi, tan tsa natuhun tahan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo. <sup>20</sup> Tyin nu yucú uvi o uñi nyivi tan jacahnú ñi tsi yu, ican nyaá yu mahñu ñi —catyí ra Jesús.

<sup>21</sup> Tacan tan tsahan ra Pedro tsindacā tuhun ra tsi ra Jesús tan catyí ra:

—Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahán tsi jaha yu tucahnu iñi tsi ra? ¿A utsa taahan tsaha?

<sup>22</sup> Tan nacahan ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahán tsi jaha un tucahnu iñi.

**Nu cahān ra Jesús iin cuhva cuenda iin ra tsa ña cuñi jaha tucahnu iñi**

<sup>23</sup> Yacan cuenda tsa ndacá ñaha Nyoo tsi nyivi cuví tsi tumaa iin rey tsa nacana tsi tandihí musu ra tyin cua nyehe ra nácaa nyaá cuenda ra naha tsi ra. <sup>24</sup> Tan cuhva tsa quitsahā natavá ra cuenda, tan tsindacā ra tsi iin musu tsa cuaha millón pesu nyaá cuenda tsi ra. <sup>25</sup> Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasiñi ra, tan tsihin sehe ra tan tandihí tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.” <sup>26</sup> Tacan tan musu can tsicuiñi tsiti ra nuu tsitoho ra, tan cahān ndaahvi ra tsihin ra, tan catyí ra: “Tata, jahā tumañi iñi, çyatu un

luxu, tan tyahvi yu tandihí tsa nyaá cuenda yu tsi un nda ñihí yu xuhun”, catyí ra. <sup>27</sup> Tan cundahví iñi tsitoho ra tsi ra, tan jahá ra tucahnu iñi tsi ra, tan janaá ra tandihí tsa nyaá cuenda ra, tan jandoq nuña ra tsi ra. <sup>28</sup> Maa tyin cuhva tsa quitá musu can, nañihí ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tñin ra tsi ra can, tan quitsahá tñin ra jucun ra, tan catyí ra tsihin ra: “Tyahvi tsa nyaá cuenda un tsi yu.” <sup>29</sup> Tacan tan tsicuiñí tsiti ra can nuu ra, tan cahán ndaahvi ra tsihin ra tan catyí ra: “Cuatu luxu tan nda ñihí yu xuhun tan cua tyahvi yu tandihí tsa nyaá cuenda yu tsi un”, catyí ra. <sup>30</sup> Maa tyin maa ra ña cuñí ra cuatu ra, tan tsahán ra tsiyihí ra tsi ra can vehe caa nda cuenda tsa tyahví ra tsa nyaá cuenda ra tsi ra. <sup>31</sup> Tsa nyehé inga ca musu tsa javahá ra, cuihaya xaan cuñí ra naha, tan tsahán ra naha tsinacatyí tuhun ra naha tsihin tsitoho ra naha tsa ña vaha tsa javahá ra can. <sup>32</sup> Tacan tan tsitoho ra can tavá tyiñu ra na quitsi ra can. Tan tsa tsaá ra, tan catyí ra tsihin ra: “Musu ña vaha cuví un. Yuhu jahá yu tucahnu iñi tandihí tsa nyaá cuenda un tsi yu, tyin cahán ndaahvi un tsihin yu. <sup>33</sup> Tacan cuñí tsi tsa cundahví iñi un tsi ra vaha iñi tsi un tumaa tsa cundahví iñi maa yu nyehé yu tsi un”, catyí ra tsihin ra. <sup>34</sup> Tan cuxaán xaan tsitoho ra, tan tavá tyiñu ra na tatsi tuñi ra naha tsi ra nda cuenda tsa tyahvi ra tandihí tsa nyaá cuenda ra.

<sup>35</sup> Tan nu ndihí cahán ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyoocho tatun ña jaha ndo tucahnu iñi tsi nyiví ndo tsihin tsa ñi iñi añima ndo.

#### Nu caahán ra Jesús tyin ña vaha tsa nacoo ihñi rayí tsi ñasiñi ra

(Mr. 10.1-12; Lc. 16.18)

**19** Tsa yahá tsa cahán ra Jesús tuhun ihya, tan quitá ra cuenda Galilea can, tan cuahán ra cuenda Judea inga tsiyo yutya cahnu Jordán, ityi nu caná ñi-canyii. <sup>2</sup> Cuaaha xaan nyiví tsinyicun tsi ra, tan janduvahá ra tsi nyiví cuuhví.

<sup>3</sup> Tacan tan juhva ra fariseo naha ra natuhvá ra naha nu nyaá ra Jesús, tyin cuñí ra naha nducu cuhva ra naha tsi ra tyin tacan tan cuví tyaa ra naha cuatyí siquí ra. Tan tsicá tuhun ra naha tsi ra tan catyí ra naha:

—¿A vaha tsa nacoo rayí tsi ñasiñi ra tsa cuenda náa ñi tsihi tsahá ña tsi ra?

<sup>4</sup> Tan nacahán ra tan catyí ra:

—¿A ña tuhvá ndo cahví nu tutu Nyoo nu catyí tsi tyin ra tsa javahá tsi ndo nda quiví jihna ñi, javahá ra rayí tan ñaha? <sup>5</sup> Tan catyí tsi tyehen: “Taahán tsi nacoo rayí tsi jutu ra tan sihi ra, tan ndu iin ra tsihin ñasiñi ra. Tan tsa nduvi taahan ñi cua cuví ñi tumaa tsa intuhun ña nyiví.” <sup>6</sup> Yacan cuenda, ñavin ca uvi taahan ñi, maa tyin nduvi ñi intuhun ña nyiví cuví ñi. Yacan cuenda, ña taahán tsi tsa nacoo tahan ñi tsi ñi tyin maa Nyoo tsa jandu iin tsi ñi —catyí ra.

<sup>7</sup> Tacan tan tsicá tuhun ra naha tsi ra Jesús tan catyí ra naha:

—¿Nacuenda tsa tyaa ra Moisés tyin cuví caní iin rayí tutu cuenda ley ra tan nacoo ra ñasiñi ra?

<sup>8</sup> Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsahá ra Moisés ndatu tsa nacoo ndo ñasiñi ndo. Maa tyin quiví jihna ñi ñavin tacan tsicoo nyiví. <sup>9</sup> Yuhu catyí yu tsihin ndo tyehen: Ra tsa nacoo ñasiñi, tan ñavin tsa cuenda tsa quituví ña tsihin inga rayí, tan tindahá ra tsihin inga ñaha, tsicoó cuatyí ra nuu Nyoo. Tan ra tsa tindahá tsihin ñaha tsa nacoo rayí can, juvin ñi tsicoó tucu cuatyí ra can —catyí ra.

<sup>10</sup> Tacan tan ra tsicá tsihin ra, catyí ra naha tsihin ra:

—Tatun tacan taahán tsi coo rayí tsihin ñasiñi ra, vaha ca ña tindaha yo.

<sup>11</sup> Tan ra Jesús catyí ra tsihin ra naha:

—Ña tandihí nyiví cuví naquihin cuenda tuhun ihya. Maa tyin nyiví tsa tsahá Nyoo cuví naquihin cuenda ñi can. <sup>12</sup> Tsa ña tindaha nyiví, cuaha ñi cuenda cuví tsi. Yihí ñi ña cuñí ñi tindaha ñi tyin iin cuhva caa maa ñi nda cacú ñi. Tan inga ñi ña cuñí ñi tindaha ñi tyin tsa nducapun ñi jahá nyiví. Tan yihí ñi ña tindahá ñi tsa cuenda tsa cuñí ñi javaha ñi maa ñi maa tyiñu Nyoo, na nducuaha ca añima tsa ndacá ñaha Nyoo. Tandihí nyiví tsa cuví javaha yacan na javaha ñi —catyí ra Jesús.

#### Nu nasocó ra Jesús tsi tsa nyihi

(Mr. 10.13-16; Lc. 18.15-17)

<sup>13</sup> Tacan tan quitsí ndaca nyiví juhva tsa nyihi tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra tsicá tsihin ra quitsahá caahán ra naha tsi nyiví tsa cuahán tsihin tsa nyihi can. <sup>14</sup> Maa tyin ra Jesús catyí ra:

—Jaña ndo tsi tsa nyihi na quitsí maa tsi naha tsi nu nyaá yu. Tan ña casí ndo. Tyin nyiví ndacá ñaha Nyoo cuví ñi tumaa tsa nyihi ihya —catyí ra.

<sup>15</sup> Tacan tan tyiso ndaha ra jiñi tsi naha tsi. Yahá can tan cuahán ra.

#### Nu tsahá ra Jesús cuhva tyin yí xaan nacuhva cuenda iin ra cuca tsi ra tsi Nyoo

(Mr. 10.17-31; Lc. 18.18-30)

<sup>16</sup> Iin ra tyuvaa tsahán ra tsindacá tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuví coo yu ñayiví nyito tsa ña cua naa maa?

<sup>17</sup> Tan ra Jesús catyí ra tsihin ra:

—¿Nacuenda catyí un tyin ra vaha cuví yu? Intuhun ñi maa Nyoo cuví ra vaha. [Tan tsa catyí un tyin vaha yu, nacotó un tyin Nyoo cuví yu.] Maa tyin tatun cuñí un coo un ñayiví tsa ña cua naa maa, javaha tandihí tuhun tsa tsahá Nyoo tyin javaha yo —catyí ra tsihin ra.

<sup>18</sup> Tan ra tyuvaa can catyí ra:

—¿Ndáa tsa cuví can?

Tan ra Jesús catyí ra tsihin ra:

—Ña cahñi un nyiví. Ña coo inga ñaha tsi un. Ña suhu un tsa tsii nyiví. Ña cahán un cuendu siquí nyiví.

<sup>19</sup> Tyaa yahvi tsi jutu un tan tsi sihi un. Tan cuñi tsi nyivi, tumaa tsa cuñi un tsi maa un.

<sup>20</sup> Tan ra tyuvaa can, catyí ra tsihin ra:

—Tandihi maa yacan tan tyaá yahvi yu nda tahan luhlu yu tan nda cuanda vityin. ¿Náa ca cumañi tsi yu?

<sup>21</sup> Tan ra Jesús catyí ra tsihin ra:

—Tatun cuñi un tsa iin ndaha ñi cuvi un iin ra cuiti nuu Nyoo, cyaahan tan xico un tsa iyó tsi un, tan cuhva un tsi nyivi ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

<sup>22</sup> Maa tyin cuhva tsa tsiñi ra tyuvaa can tsa cahān ra Jesús tsihin ra, cuiihya xaan cuñi ra cuvi tan cuanuhu ra tyin cuca xaan ra.

<sup>23</sup> Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yí xaan tan cuvi nacuhva cuenda nyivi cuca tsi ñi na cundaca ñaha Nyoo tsi ñi. <sup>24</sup> Catyí yu tsihin ndo inga tsaha, tyin vasu yí xaan yaha iin camellu xuu iin yiqui tucu, maa tyin yí xaan ca tsa quihvi iin nyivi cuca nu ndacá ñaha Nyoo —catyí ra Jesús.

<sup>25</sup> Tsa tsiñi ra tsicá tsihin ra Jesús tsa cahān ra, iyo xaan cuñi ra naha, tan quitsahā tsicá tuhun tahan ra naha, tan catyí ra naha:

—Tun tacan, yoñi cua cuvi cacu

<sup>26</sup> Tacan tan nanyehē ra Jesús nu nyecú ra naha tan catyí ra:

—Nyivi ña cuvi javaha ñi yacan, maa tyin Nyoo cuvi javaha ra tandihi.

<sup>27</sup> Tacan tan quitsahā caahān ra Pedro tsihin ra:

—Jutu Mañi yu, nyuhu tandihi maa tsa iyó tsi ndi nacoq ndi tan nyicún ndi tsi un. ¿Náa cua ñihi ndi? —catyí ra tsihin ra.

<sup>28</sup> Tan nacahān ra Jesús tan catyí ra:

—Tsa nditsa catyí yu tsihin ndo, tyin quivi tsa cua ndutsaa tandihi tsa iyó, yacan cuvi quivi cua cunyaa yuhu Rayi tsa quee nda gloria nu tyayu si xaan caá tan cua cundaca ñaha yu. Tan nyooho tsa nyicún tsi yu, cua cunyecu ndihi ndo nu utsi uvi taahan tyayu si caá. Tan cua cundaca ñaha ndo tsi tandihi nyivi cuvi tata tsa utsi uvi taahan sehe ra Israel. <sup>29</sup> Tan tandihi nyooho tan tandihi inga nyivi tsa nacoq vehe, o yañi ñi, o cuhva ñi, o jutu ñi, o sihi ñi, o ñasihi ñi, o sehe ñi, o ñuhu ñi, tsa cuenda yuhu, cua ñihi ñi iin cientu ca tsa-ha siqui can, tan cua ñihi tucu ñi ñayivi nyito tsa ña cua naa maa coo ñi. <sup>30</sup> Cuaha xaan nyivi cuahān ityi nuu vityin, ñi ican cua cuhun nu ndihi ña. Tan cuaha xaan nyivi cuahān nu ndihi vityin, ñi ican cua cuhun ityi nuu.

### Nu jacuahā ra Jesús iin cuhva cuenda ra jahá tyiñu

**20** Tsa ndacá ñaha Nyoo tsi nyivi, cuvi tsi tumaa iin ra iyó cora uvas. Tan tuvi ñi quitā ra cuahān ra cuanducú ra musu jaha tyiñu nu tyiñu jahá ra. <sup>2</sup> Tan ndoo ra tuhun tsihin musu can tyin cua tyahvi ra yahvi tsa iin quivi. Tan jacuhun ra tsi ra naha cua jaha tyiñu ra naha nu iyó tyiñu jahá ra. <sup>3</sup> Yahā can tan cuahān ra inga tsaha cuhva caa ñn tsa tuvi. Tan nyehe ra tsi juhva ca ra yucú taxin nuyahvi can. <sup>4</sup> Tan catyí ra tsihin ra naha: “Cyaahan ndihi tucu nyooho jahā tyiñu ndo nu ty-

iñu jahá yu, tan cua tyahvi maa yu tsi ndo nácaa taahān tsi tsi ndo.” Tacan tan cuahān ndihi tucu ra can naha ra. <sup>5</sup> Tan tsitoho cora can quitā ra inga tsaha tsa ora. Tan juvin ñi musu nducú ra. Tan caa uñi tsa tseñi, quitā ra inga tsaha nducú ra musu. <sup>6</sup> Yahā can tan quitā nyico ra caa uhun tsa tseñi tan nyehe ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.” <sup>7</sup> Tan nacahān ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí ra tsihin ra naha: “Cyaahan ndihi ndo jahā tyiñu ndo nu tyiñu jahá yu. Tan tyahvi maa yu tsi ndo nácaa taahān tsi tsi ndo”, catyí ra. <sup>8</sup> Tan cuhva tsa cua cuaa, tsitoho tyiñu can catyí ra tsihin ra yihí ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvi nu ndihi naha ra, tan nu cua ndihi tan tyahvi un tsi ra tsa quihvi tsa jihna ñi naha ra”, catyí ra. <sup>9</sup> Tacan tan tsaā ra tsa quihvi caa uhun tsa tseñi can naha ra. Tan intuhun intuhun ra naha quihin ra naha yahvi nani iin quivi. <sup>10</sup> Yahā can, tan cuhva tsa tahān tsi tsi ra tsa quihvi tsa jihna ñi can naha ra, cuñi maa ra naha tyin cuaha ca cua tyahvi ra tsi ra naha. Maa tyin inducu ñi yahvi iin quivi quihin ra naha. <sup>11</sup> Tan cuhva tsa quihin ra naha, quitsahā caahān ra naha tsi tsitoho tyiñu can. <sup>12</sup> Tan catyí ra naha: “Ra tsa tsaā nu ndihi ihya naha ra, intuhun ñi hora jahā tyiñu ra naha. Tan iin ñi yahvi tyahvi un tsi ra naha tsihin tucu nyuhu tan nduvi nduvi jahā tyiñu ndi nu ihñi”, catyí ra naha. <sup>13</sup> Maa tyin nacahān tsitoho tyiñu can, tan catyí ra tsihin iin ra can: “¿Tsaá!, nduve tsa ña vaha javahā yu tsihin un. ¿A ñavin yahvi tsa iin quivi ndoo yo tuhun tyin cua tyahvi yu tsi un? <sup>14</sup> Quihin yahvi un, tan cyanuhu. ¿A nduve ndatu iyó tsi yu tsa tyahvi yu tsi ra tsa quihvi nu ndihi iin ñi cuhva tsa tyahvi yu tsi yooho? <sup>15</sup> ¿A nduve ndatu iyó tsi yu tsa javaha yu náa cuñi maa yu tsihin xuhun yu? ¿A ndasi cuñi un tyin vaha iñi yu tsihin inga ra can naha ra?” catyí ra. <sup>16</sup> Tacan nyivi quihvi nu ndihi, cuhun ñi ityi nuu. Tan nyivi cuahān ityi nuu, nda nu ndihi ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsí ra.

### Inga tsaha jacotó ra Jesús cuhva cua cahñi nyivi tsi ra

(Mr. 10.32-34; Lc. 18.31-34)

<sup>17</sup> Cuhva tsa cuñi cuhun ra Jesús nda ñuu Jerusalén, canā siñ ra tsi tsa utsi uvi ra tsicá tsihin ra tan catyí ra tsihin ra naha:

<sup>18</sup> —Nyehe ndo tyin cuahān yo Jerusalén vityin. Tan ndacan cua nacuhva cuenda nyivi tsi yuhu, Rayi tsa quee nda gloria, tsi ra jutu tsa cuvi ityi nuu naha ra, tan tsi ra maestro cuenda ley vehe ñuhu naha ra, tan cua catyi ra naha tyin taahān tsi cúu yu. <sup>19</sup> Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quivi cua nandoto yu —catyí ra Jesús tsihin ra naha.

**Nu tsicán sihi ra Jacobo tan ra Juan iin tumañi iñi tsi ra Jesús**  
(Mr. 10.35-45)

<sup>20</sup> Tacan tan ñasihi ra Zebedeo natuhva ña nu nyii ra Jesús tsihin nduvi sehe ña, ra Jacobo tan ra Juan. Tan tsicuiñi tsiti ña nuu ra tyin cua ndacan ña iin tumañi iñi tsi ra. <sup>21</sup> Tan tsicā tuhun ra Jesús tsi ña tan catyí ra:

—¿Náa cuñi un?

Tan catyí ña:

—Quiyi tsa cunyaa un nu ndacá ñaha un nda gloria, cūhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

<sup>22</sup> Maa tyin nacahan ra Jesús tan catyí ra:

—Nyooho ña tsitó ndo tsa tsicán ndo. ¿A cuví nyehe nyooho tundoho tsa cua nyehe yuhu? ¿A cuví cūhun ndo tuhun tsihi tumaa cua cūhun yuhu? —catyí ra.

Tan nacahan ra naha tan catyí ra naha:

—Cuví maa.

<sup>23</sup> Tan catyí ra Jesús tsihin ra naha:

—Tsa nditsa tyin cua nyehe ndo tundoho, tan cua cūhun ndo tuhun tsihi tumaa cūhun yuhu tuhun tsihi. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahan tsi cūhva yacan tsi ndo, tyin tsa tsitó maa Jutu yu yóo cua cūhva ra can —catyí ra Jesús tsihin ra naha.

<sup>24</sup> Tan tsa tsiñi tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra. <sup>25</sup> Maa tyin canā ra Jesús tsi ra naha tan catyí ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha. <sup>26</sup> Maa tyin ñavin tacan taahan tsi javaha nyooho. Tyin ra tsa cuñi nducahnu ca cuví nu Nyoo, cuñi tsi cuví ra musu tandihí nyooho. <sup>27</sup> Tan ndáa nyooho tsa cuñi ndo cuví ndo ityi nuu, cuñi tsi cuví ndo musu tandihí ca ra naha. <sup>28</sup> Tumaa yuhu, Rayi tsa quee nda gloria, ña vatsí yu tyin jatinyee nyivi tsi yu. Maa tyin yuhu vatsí yu vatsí jatinyee yu tsi maa ñi, tan cua cūhva yu ñayivi yu tsa cuenda ñi. Tyin tsihin yacan cua tyahvi yu cuatyí tandihí ñi.

**Nu janduvahā ra Jesús tsi uvi taahan ra cuaa**

(Mr. 10.46-52; Lc. 18.35-43)

<sup>29</sup> Cūhva tsa cua quita ra Jesús ñuu Jericó tsihin ra tsicá tsihin ra, cuaha xaan nyivi cuahán cua nyicun tsi ra naha. <sup>30</sup> Tan yuhu ityi can nyecú uvi taahan ra cuaa. Tan cūhva tsa tsiñi ra naha tyin cua yaha ra Jesús, quitsahā canā tsa ra naha. Tan catyí ra naha:

—¡Jutu Mañi yu, tata ra David, cūndaahvi iñi tsi ndi! —catyí ra naha.

<sup>31</sup> Tan nyivi quitsahā caahán ñi tsihin ra naha na casi ra naha yuhu ra naha. Maa tyin ñihi ca canā tsa ra naha:

—¡Jutu Mañi yu, tata ra David, cūndaahvi iñi tsi ndi!

<sup>32</sup> Tacan tan tsicuiñi ra Jesús tan canā ra tsi nduvi taahan ra cuaa can, tan tsicā tuhun ra tsi ra naha tan catyí ra:

—¿Náa cuñi ndo javaha yu tsi ndo?

<sup>33</sup> Tan nacahan ra naha tan catyí ra naha:

—Jutu Mañi yu, ñanyehe tsi ndi.

<sup>34</sup> Tacan tan cūndaahvi iñi ra Jesús tsi ra naha, tan tñin ra tinuu ra naha. Tan iin yaha ñi nanyehe ra naha, tan cuiti cuanyicún ndihí ra naha tsi ra Jesús.

**Nu cuahán ra Jesús ñuu Jerusalén**

(Mr. 11.1-11; Lc. 19.28-40; Jn. 12.12-19)

**21** Tsa cua tsa ra naha ñuu Jerusalén, tan tsaā ra naha ñuu Betfagé, yatyin ñi yucú Olivo nu iyó yutun olivo. Tacan tan tavā tyiñu ra Jesús tsi uvi ra tsicá tsihin ra. <sup>2</sup> Tan catyí ra tsihin ra naha:

—Cūaahan ndo ñuu tsa canyí ityi nuu ihya. Tan ican cua ñihi ndo iin urru sihi, nuuhñi ti. Tan ndacá ti iin urru luhlu. Ndatsi ndo tsi ti, tan quitsi ndaca ndo tsi ti naha ti tsi yu. <sup>3</sup> Tan tatun yóo tsicá tuhun tsi ndo: “¿Náa cuú ndo tsi ti naha ti?”, tan catyí ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa tyin numi ñi cua quitsi ndaca nyico ndi tsi ti naha ti”, catyí ndo tsihin ñi —catyí ra.

<sup>4</sup> Tacan cuví tyin cūdaa tsa cahan ra cuví ndusu yuhu Jutu Mañi yo tahañ tsanaha nu catyí ra tyehen:

<sup>5</sup> Cahan ndo tsihin nyivi ñuu Sión:

“Nyehe ndo, vatsí rey ndo nu iyó ndo.

Ndaahvi ñi vatsí ra yosó ra iin urru luhlu, sehe iin quiti tsa tuhvā nyisó carga”, catyí ra cuví ndusu yuhu Nyoo can.

<sup>6</sup> Tacan tan cuahán ra tsicá tsihin ra Jesús, tan javahā ra naha tumaa tsa cahan ra tsihin ra naha. <sup>7</sup> Quitsi ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaā ra Jesús tsi ti. <sup>8</sup> Tan cuaha xaan nyivi tsaquín ñi jahma ñi nu ñuhu ityi nu cuahán ra, tan inga ñi tsahnyā ñi ndaha yutun tsaquín ñi tsitsi ityi. <sup>9</sup> Tan nyivi tsa cuahán ityi nuu tan ityi tsata, quitsahā canā tsa ñi tan catyí ñi:

—¡Cahnu xaan cuví ra cuví tata ra rey David! ¡Cahnu xaan cuví ra tsa jaquitsi Jutu Mañi yo Nyoo! ¡Tan na jacahnu yo tsi Nyoo ra nyaá gloria! —catyí ñi.

<sup>10</sup> Cūhva tsa tsaā ra Jesús ñuu Jerusalén can, tandihí maa nyivi ñuu quitsahā cuvaá jahá ñi, tan cuaha xaan ñi tsicá tuhun tahan ñi tsi ñi, tan catyí ñi:

—¿Yóo ra cuví ra ihya?

<sup>11</sup> Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyí Galilea cuví ra —catyí ñi.

**Nu tavā ra Jesús tsi nyivi xicó tsitsi vehe ñuhu cahnu**

(Mr. 11.15-19; Lc. 19.45-48; Jn. 2.13-22)

<sup>12</sup> Yahā can tan quihvi ra Jesús tsitsi vehe ñuhu cahnu Nyoo. Tan tavā ra tsi tandihí nyivi jatá tan xicó ican. Tan janduvā ra mesa nu nasamá ñi xuhun. Tan janduvā ra tyayu nu xicó ñi paloma. <sup>13</sup> Tan catyí ra tsihin nyivi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyooho jananduví ndo vehe ihya, vehe ñasuhu —catyí ra tsihin ñi.

<sup>14</sup> Tan tsa tsito juhva ra cuaa tan ra coxo naha ra tyin nyíí ra Jesús tsitsi vehe ñuhu cahnu, quihví ra naha tan janduvahá ra Jesús tsi ra naha. <sup>15</sup> Tan nyehé ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javahá ra Jesús tsa iyo. Tan tsiñi ra naha tyin caná tsa tsa nyihi tsitsi vehe ñuhu, tan catyí tsa nyihi can:

—¡Cahnu xaan cuví ra cuví tata ra rey David! —catyí tsi naha tsi.

Tacan tan cuxaan ra naha tsa tsiñi ra naha tsa caahán tsa nyihi can. <sup>16</sup> Tan catyí ra naha tsihin ra Jesús:

—¿A tsiñi un tsa caahán tsa nyihi can?

Tan nacahan ra Jesús tan catyí ra:

—Tsiñi yu. Maa tyin za ñaha ca cahvi nyooho nu tutu Nyoo nu catyí tsi tyehen?

Jutu Mañi yu, tsa nyihi tan lee tsa ndi tyaxín si xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

<sup>17</sup> Tacan tan nacoq ra tsi ra naha, tan quitá ra ñuu can cuahán ra ñuu Betania. Tan ican ndoq ra tsacuaa can.

#### Nu cahán ra Jesús tsi yutun higo tsa ña tsahá tsiti

(Mr. 11.12-14, 20-26)

<sup>18</sup> Tan tsa tsvi cuii ñi inga quivi can, vatsí nyico ra Jesús nda ñuu Jerusalén, tan tsaq soco tsi ra. <sup>19</sup> Tan nyehé ra nyaá iin yutun higo yatyin ñi yuhu ityi can. Tan natuhvá ra nu nyaá tun, maa tyin nduve maa náa nañihí ra nuu tun. Maa ñi ndaha tun iñi. Tacan tan catyí ra tsihin tun:

—Ndi inga tsaha ña cua cuhva ca un tsiti!

Tan juvin ñi cuhva can na ityi tun. <sup>20</sup> Tan tsa nyehé ra tsicá tsihin ra tsa javahá ra tsi tun, iyo xaan cuñi ra naha, tan tsicá tuhun ra naha tsi ra tan catyí ra naha:

—¿Nacuenda tsa numi xaan na ityi yutun higo can?

<sup>21</sup> Tan nacahan ra Jesús tan catyí ra:

—Tsa nditsa catyí yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javahá yu tsihin yutun higo ihya ñi cuví javaha tucu nyooho, tyin cuví ndihí tucu catyí ndo tsihin yucu ihya: “Cúatsiyo ihya tan cahun un nda tsitsi ndutyá ñuhu.” Tan cua cahun tsi. <sup>22</sup> Tan tandihí tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñihi ndo —catyí ra Jesús.

#### Nu tsicá tuhun ra cumí tyiñu vehe ñuhu naha ra tsi ra Jesús yóo tavá tyiñu tsi ra tyin cahan ra tsihin nyivi

(Mr. 11.27-33; Lc. 20.1-8)

<sup>23</sup> Yahá can tan quihví ra Jesús tsitsi vehe ñuhu cahnu, tan tsitsi tsa jacuahá ra ican, natuhvá ra jutu tsa cuví ityi nuu naha ra nu nyaá ra, tan ra cuví mandoñi

ñuu Israel naha ra. Tan tsicá tuhun ra naha tsi ra tan catyí ra naha:

—¿Yóo tavá tyiñu tsi un tsa javahá un tyehen? —catyí ra naha.

<sup>24</sup> Tan nacahan ra Jesús tan catyí ra:

—Yuhu tucu cuñi yu ndaca tuhun yu tsi nyooho. ¿Yóo jaquitsi tsi ra Juan tyin jacoondutyá ra tsi nyivi? ¿A Nyoo jaquitsi tsi ra, o nyivi? Tatun catyí tuhun ndo tsihin yu, cua catyí tuhun tucu yuhu tsihin ndo yóo tavá tyiñu tsi yu tsa javahá yu tyehen —catyí ra Jesús tsihin ra naha.

Tacan tan ra ican naha ra quitsahá caahán yuhu tahan ra naha, tan catyí ra naha:

—Tatun catyí yo tyin Nyoo jaquitsi tsi ra Juan, cua catyí ra tsihin yo: “Tun tacan, ¿nacuenda ña tsinu iñi ndo tsi ra?” <sup>26</sup> Tan tatun catyí yo tyin nyivi jaquitsi tsi ra, yuuhví yo coto cuxaan nyivi tsi yo, tyin tandihí ñi tsinú iñi ñi tyin ra Juan, cuenda Nyoo cahan ra —catyí ra naha.

<sup>27</sup> Tacan tan catyí ra naha tsihin ra Jesús:

—Ña tsitó ndi.

Tacan tan ra Jesús catyí ra tsihin ra naha:

—Tan ndi yuhu, tan ña catyí tuhun yu tsihin ndo yóo tavá tyiñu tsi yu.

#### Nu caahán ra Jesús iin cuhva cuenda uvi taahan sehe iin rayii

<sup>28</sup> Ra Jesús catyí ra tsihin ra cumi tyiñu vehe ñuhu naha ra:

—¿Nacaa catyí ndo cuenda tsa cua cahan yu ihya? Iin rayii, iyó uvi taahan sehe ra. Tan catyí ra tsihin iin sehe ra: “Cuaahan cua jaha tyiñu nu iyó tyiñu jahá yu.” <sup>29</sup> Tan nacahan sehe ra tan catyí ra: “¡Ña cahun yu!” Maa tyin yahá can tan nasamá cuhva tsicá iñi ra tan tsahan ra tsijahá tyiñu ra. <sup>30</sup> Yahá can tan jutu ra cahan ra tsihin inga sehe ra. Tan catyí tucu ra tsihin ra na cahun ra cujaha tyiñu ra. Tan ra ican numi ñi quihín ra tyiñu tan catyí ra: “Vaha, tyaa, cahun maa yu.” Maa tyin ña tsahan ra. <sup>31</sup> Tsitsi tsa nduvi taahan ra can naha ra, ¿ndáa ra javahá tsa cahan jutu ra? —catyí ra Jesús.

Tan nacahan ra naha tan catyí ra naha:

—Ra tsa cahan ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyivi caquiñi tumaa ra tsa tavá xuhun cuenda ra ndacá ñaha tan ñi siñi iñi caca nuu, jihna ca ñi cua quihví nu ndacá ñaha Nyoo tan ñavin ca nyooho. <sup>32</sup> Tyin ra Juan, ra jacoondutyá tsi nyivi, quitsi ra jacuahá ra tsi ndo nácaa taahán tsi coo cuiti ndo, tan nyooho ña tsinu iñi ndo tsi ra. Maa tyin ra tavá xuhun naha ra tan ñi siñi iñi caca nuu tsinu iñi ñi tsi ra. Tan nyooho vasu ndi maa nyehé ndo yacan, maa tyin ña nasamá ndo cuhva iyó ndo, tan ña tsinu iñi ndo tsi ra.

**Nu caahán ra Jesús tyin tumaa cuví juhva nu caquiñi nahnu, tacan cuví ra tsa cua cahñi tsi ra**

(Mr. 12.1-12; Lc. 20.9-19)

<sup>33</sup> Tyaa soho ndo inga cuhva ihya: Tsiocoq iin rayii, tan iyó ñuhu ra. Tan tatsi ra yoho yucu vixi tsa nañi uvas, tan tyihj ra cora. Tan javahā ra iin nu cua tava ra ndutya uvas can. Tan javahā tucu ra iin vehe sucun tyin cuvi jaha cuenda ra tandihi.

Yahā can tan tsahā nuu ra ñuhu can tsi juhva ra cua jaha tyiñu naha ra, tan cuahán ra inga ñuu. <sup>34</sup> Tan tsa tsaā quivi tsa iyó uvas can, jacuhun ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahán tsi tsi ra. <sup>35</sup> Maa tyin ra jahá tyiñu can tiin ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra. <sup>36</sup> Tacan tan tsa inga tsaha, cuaha ca musu jacuhun tsitoho cora can tan ñavin ca tsa jihna ñi. Maa tyin tumaa tsa javahā ra naha tsihin ra tsa tsahān jihna naha ra, tacan ñi javahā nyico ra naha tsihin ra ihya naha ra.

<sup>37</sup> Nu ndihi jacuhun ra tsi maa maa sehe ra, tyin cuñi maa ra tyin cua tyaa yahvi ra naha tsi sehe ra. <sup>38</sup> Maa tyin cuhva tsa nyehē ra jahá tyiñu can naha ra tsi sehe ra, natuhun tahan ra naha tan catyí ra naha: “Ra ihya cua ndoo tsihin tandihi tsa iyó ihya. Na cahñi yo tsi ra tan ndoo maa yo tsihin cora ihya”, catyí ra naha.

<sup>39</sup> Tacan tan tiin ra naha tsi ra, tan tavā ra naha tsi ra ityi tsata cora can, tan tsahñi ra naha tsi ra —catyí ra Jesús.

<sup>40</sup> Tacan tan tsicā tuhun ra Jesús tsi ra naha tan catyí ra:

—Quivi cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

<sup>41</sup> Tan nacahān ra naha tan catyí ra naha:

—Ña cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jahā tyiñu naha ra, tan quivi coo uvas, cua nacuhva cuenda ra naha juhva tsa taahán tsi tsi ra cuví tsitoho cora can.

<sup>42</sup> Tacan tan catyí ra Jesús tsihin ra naha:

—¿A ñaha ca cahvi nyooho nu tutu Nyoo nu catyí tsi tyehen?

Yuu tsa javitā ihñi ra javahā vehe, Yacan cuví yuu tsa ñiñi ca.

Jutu yo Nyoo cuví ra tsa javahā tandihi can.

Tan iyo xaan cuñi yo nyehé yo, catyí tsi.

<sup>43</sup> Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyivi tsa javahā cuhva cuñi ra tyin nditsa tsahá ñi tsi ñi cundaca ñaha ra. <sup>44</sup> Tan tsa cuenda yuu can, yoo nyivi tsa nduva siqui tsi, cua tahnu cuatyí ñi. Tan tatun yuu can tan canacava tsi siqui yoo nyivi, cua taxin nyihi ñi —catyí ra Jesús.

<sup>45</sup> Cuhva tsa tuvī iñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cahān ra Jesús cuhva ihya, <sup>46</sup> cuñi ra naha tiin ra naha tsi

ra, maa tyin yuuhvi ra naha tsi nyivi tyin tsinú iñi ñi tyin ra Jesús caahán ra cuenda Nyoo.

**Nu cahān ra Jesús iin cuhva cuenda vico tindaha**

(Lc. 14.15-24)

**22** Quitsahā caahán ra Jesús tsihin nyivi inga tsaha tsihin cuhva, tan catyí ra:

<sup>2</sup> —Tsa ndacá ñaha Nyoo tsi nyivi cuví tsi tumaa iin rey tsa javahā iin vico tsa cuenda tsa cua tindaha sehe ra. <sup>3</sup> Tan jacuhun ra tsi musu ra na cucana ra naha tsi nyivi tsa jacoto ra tyin cuhun ñi, maa tyin ñi ican, ña cuñi ñi cuhun ñi. <sup>4</sup> Tan jacuhun nyico ra inga ca musu ra, tan catyí ra tsihin ra naha: “Cāhan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quiti xaahan. Tan tsa iyó vaha tandihi. Yacan na quitsi ñi”, catyí ra. <sup>5</sup> Maa tyin ñi ican ña tyaa yahvi ñi tsa cahān ra. Iin ra tsahān ra nu iyó cora ra, inga ra tsahān ra nu jahá tyiñu ra. <sup>6</sup> Tan inga ra naha tiin ra naha tsi musu rey can naha ra tan cañi xaan ra naha tsi ra naha nda cuenda tsahñi ra naha tsi ra naha. <sup>7</sup> Tacan tan ra rey can cuxaān xaan ra, tan jacuhun ra tsi andarū ra na cucahñi ra naha tsi ra tsa tsahñi tsi musu can naha ra, tan cahmi ra naha ñuu ra naha. <sup>8</sup> Tacan tan catyí ra rey can tsihin musu ra: “Tandihī tan tsa iyó vaha tsa cuenda vico tindaha, maa tyin ñi canā yu, ña taahán tsi tsa quitsi ñi. <sup>9</sup> Cūaa-han ndo ityi cahnu tan canā ndo tsi tandihī nyivi tsa nañihi ndo na quitsi ñi vico tindaha”, catyí ra rey can. <sup>10</sup> Musu can cuahán ra naha tandihī ñi ityi, tan jandu iin ra naha tsi tandihī nyivi nañihj ra naha: ñi caquiñi tan ñi vaha iñi. Tacan tan tsitu tsitsi vehe ra tsihin nyivi.

<sup>11</sup> Tacan tan quihvi ra rey can cua nyehē ra tsi tandihī nyivi tsa yucú vico yuvehe ra. Tan nyehē ra tyin nyaá iin ra tsa nduve jahma vico tindaha nditsi. <sup>12</sup> Tan catyí ra rey tsihin ra: “Tsaa, ¿nacuenta nyi un ihya tan nduve jahma vico tindaha nditsi un?” Tan ña nacahān maa ra can. <sup>13</sup> Tacan tan catyí ra rey can tsihin ra tyihí mesa can naha ra: “Cūhñi ndo tsaha ra tan ndaha ra, tan tavā ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra”, catyí ra. <sup>14</sup> Tyin cuaha xaan nyivi nacana Nyoo, maa tyin juhva ñi ñi nacat-sj ra —catyí ra Jesús.

**Nu caahán ra Jesús tsa cuenda tsa tyahvi nyivi xuhun tsi ra ndacá ñaha nda ñuu Roma**

(Mr. 12.13-17; Lc. 20.20-26)

<sup>15</sup> Tacan tan cuahán ra fariseo naha ra tan ndoo ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuví tyaa ra naha cuatyí siqui ra. <sup>16</sup> Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñi un nyehē un tsi nyivi cuca tan nyivi ndaahvi.

<sup>17</sup> ¿Nacaa tsicá tucu iñi yooho: A vaha tyahvi yo tsa tsicán ra ndacá ñaha nda ñuu Roma, o ña vaha?

<sup>18</sup> Tan ra Jesús tuvĭ iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsi yu? <sup>19</sup> Janaha jihna ndo iin xuhun tsa tuhvá yo tyahví tsi ra ndacá ñaha tsi yu —catyí ra.

Tan tsindacá ra naha iin xuhun tsa nañí denario tsi ra. <sup>20</sup> Tan tsa nyehę ra Jesús xuhun can, tsicá tuhun ra tsi ra naha tan catyí ra:

—¿Yóo nuu tan yóo sivi nyaá ihya?

<sup>21</sup> Tan nacahān ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

<sup>22</sup> Tsa tsiñĭ ra naha tsa cahān ra Jesús, iyo xaan cuñĭ ra naha. Tan cuahān ra naha.

### Nu cuñĭ ra cuvĭ saduceo naha ra jandavi ñaha ra naha tsi ra Jesús

(Mr. 12.18-27; Lc. 20.27-40)

<sup>23</sup> Juvĭn ñi quivĭ can juhva ra cuvĭ saduceo naha ra tsahān ra naha nu nyíí ra Jesús. Tan ra cuvĭ saduceo can ña tsinú iñi ra naha tsa cua nandoto ndiyĭ quivĭ tsa cua naa ñuu ñayivĭ. Yacan cuenda tsicá tuhun ra naha tsi ra Jesús, tan catyí ra naha:

<sup>24</sup> —Maestro, ra Moisés catyĭ ra tyin tatun iin ra tindaha tan tsihĭ ra tan ña tsicoo sehe ra, taahán tsi tsa tindaha yañi ra tsihin ñasihi ra. Tacan tan cua coo sehe ra tsihin ña tsa cuenda ra yañi ra tsa tsihĭ. <sup>25</sup> Vaha. Tun iin ra tan iyó utsa sehe yĭ ra, tan ra tsa jihna ñi tindaha ra. Tan nduve sehe ra tsicoo tsihin ñasihi ra tan tsihĭ ra. Ndoq ñasihi ra tsi yañi ra tsa tsinu uvi. <sup>26</sup> Tan juvĭn ñi tsihĭ ndihi ra can. Tan ndoq ñaha can tsihin ra tsa tsinu uñi, maa tyin juvĭn ñi tacan tahān ndihi ra. Tan inducu ñi tahān tandihi tsa utsa ra naha. <sup>27</sup> Tan nu ndihi ña tsihĭ ndihi maa ñaha can. <sup>28</sup> Tatun nditsa tsa cua nandoto nyivĭ tsihĭ, ¿ndáa tsa utsa taahan ra can naha ra cua cuvĭ yĭ ña? Tyin tandihi maa ra naha tindaha tsihin ña —catyí ra naha.

<sup>29</sup> Tan nacahān ra Jesús tsihin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuvĭ tunyee iñi tsa iyó tsi Nyoo.

<sup>30</sup> Tyin quivĭ cua nandoto nyivĭ tsihĭ, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuvĭ ñi tumaa cuvĭ ángel tsa iyó gloria. <sup>31</sup> Tyin tuhun Nyoo tsahá cuenda tsi nácaa cuvĭ tuhun tsa cua nandoto nyivĭ tsa tsihĭ. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

<sup>32</sup> “Yuhu cuvĭ Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito añima ra can naha ra, vasu tsanaha tsihĭ ra naha. Tyin Nyoo ñavin Nyoo cuenda nyivĭ tsihĭ cuvĭ ra, tyin Nyoo cuvĭ ra Nyoo cuenda nyivĭ nyito —catyí ra.

<sup>33</sup> Tan tsa tsiñĭ nyivĭ tsa caahán ra Jesús, iyo xaan cuñĭ ñi.

### Ley tsa ñiñi ca tsa tsahā Nyoo

(Mr. 12.28-34)

<sup>34</sup> Tsa tsito ra fariseo naha ra tyin ra Jesús tyasi ra yuhu ra saduceo naha ra, ndu iĭn ra naha. <sup>35</sup> Tan iin ra tsa nyíí tsihin ra naha cuvĭ ra maestro cuenda ley vehe ñuhu tan cuñĭ ra nducu cuhva ra tsi ra Jesús. Tan tsicá tuhun ra tsi ra, tan catyí ra:

<sup>36</sup> —Maestro, ¿ndáa ley cuvĭ tsa ñiñi ca?

<sup>37</sup> Tan catyí ra Jesús tsihin ra:

—“Cuñĭ tsi Jutu Mañi yo Nyoo tsihin tsa ñi iñi un tan tsihin tsa ñi iñi añima un, tan tsihin tandihi tsa tsiñi tuñi jiñi un.” <sup>38</sup> Ley ihya cuvĭ tsa ñiñi ca, tan tsa jihna ñi taahán tsi javaha yo. <sup>39</sup> Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyí tsi tyehen: “Cuñĭ tsi nyivĭ tahan un tumaa cuñĭ un tsi maa un.” <sup>40</sup> Tatun tyaá yahvi ndo nduvi taahan ley ihya, tsa tyaá yahvi ndihi ndo tandihi ca ley tsa tyaq ra Moisés jahā Nyoo, tan tandihi tuhun tsa jacuahā ra cuvĭ ndusu yuhu Nyoo tahān tsanaha.

### Ra Cristo cuvĭ ra Sehe Nyoo tan juvĭn ñi cuvĭ ra tata ra David

(Mr. 12.35-37; Lc. 20.41-44)

<sup>41</sup> Tsitsi tsa ndi yucú ra fariseo naha ra nu ndu iĭn ra naha, <sup>42</sup> ra Jesús tsicá tuhun ra tsi ra naha, tan catyí ra: —¿Nacaa tsicá iñi nyooho cuenda ra cuvĭ Cristo? ¿Yóo tata cuvĭ ra, cuñĭ maa ndo?

Tan nacahān ra naha tan catyí ra naha:

—Tata ra David cuvĭ ra.

<sup>43</sup> Tacan tan ra Jesús catyí ra tsihin ra naha:

—Tun tacan, ¿nacuenta jacahān Tatyĭ Ii Nyoo tsi ra David tyin ra ndacá ñaha tsi ra cuvĭ ra Cristo tan catyí ra tyehen?:

<sup>44</sup> Nyoo cahān tsihin Jutu Mañi yu, ra Cristo, tan catyí ra tsihin ra:

“Cunya xiin cuaha yu nda cuanda caquin yu tsi ra xaan iñi tsi un naha ra tsaha un”, catyí ra David.

<sup>45</sup> ¿Nacaa cuvĭ cuú tucu ra Cristo tata ra David, tan juvĭn ñi maa ra David catyĭ ra tyin ra Cristo Jutu Mañi ra cuvĭ tsi ra? —catyí ra Jesús.

<sup>46</sup> Tan yoñi maa cuvĭ nacahān nu cahān ra ndi in-tuhun maa tuhun. Tan nda quivĭ can, yoñi ca maa cuñĭ nducu tuhun tsi ra.

### Nu caahán ra Jesús tyin cuaha xaan cuatyĭ ra maestro cuenda ley vehe ñuhu naha ra tan ra fariseo naha ra

(Mr. 12.38-40; Lc. 11.37-54; 20.45-47)

**23** Tacan tan ra Jesús catyí ra tsihin tandihi nyivĭ, tan tsihin ra tsicá tsihin ra:

<sup>2</sup> —Ra cuvĭ maestro cuenda ley naha ra tan ra cuvĭ fariseo naha ra taahán tsi tsa jacuahá ra naha cuhva catyí ley tsa tyaq ra Moisés. <sup>3</sup> Yacan cuenda tyaq yahvi ndo tsa caahán ra naha tan javaha ndo tandihi cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, siin tsa jacuahá ra, tan siin tsa javahá ra naha. <sup>4</sup> Janducuahá ca ra naha ley tsa tsahā Nyoo tahān tsanaha. Tan cuñĭ ra

naha tsa javaha nyivi tandihí can. Maa tyin ña cunyeé ñi javahá ñi tandihí can, tan ndi maa ra naha tan ña cuñí ra naha javaha ra naha can. <sup>5</sup> Tyin maa ra naha tyaá ra naha caja ñi nu yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyivi. Tan tsinditsí ra naha jahma nañi ca tan ñavin ca tsa iyó tsi inga ca nyivi. Javahá ra naha tandihí can tyin na nyehe nyivi tyin vaha xaan ca ra naha. <sup>6</sup> Tan nu vaha ca, cuñí ra naha cunyece ra naha nu iyó vico tan catsi ra naha. Tan nu vaha ca cuñí ra naha cunyece ra naha tsitsi vehe ñuhu. <sup>7</sup> Tan nu tsicá nuu ra naha cuñí ra naha tyin cuhva nyivi nacumí tsi ra naha tyin jahá ñi tsa ñayivi tsi ra naha. Tan cuñí tucu ra naha tsa catyi ñi “maestro” tsihin ra naha.

<sup>8</sup> Maa tyin nyoocho, ña cuhva ndo tsa cahan nyivi “maestro” tsihin ndo. Tyin intuhun ñi maa ra Cristo cuví maestro tsa nyí tsihin ndo, tan tandihí ca maa ra naha yañi ndo cuví tsi ra naha. <sup>9</sup> Tan ña cahan ndo Jutu ndo tsihin ndi intuhun rayi ñuu ñayivi ihya, tyin intuhun ñi ra nyaá gloria cuví Jutu ndo. <sup>10</sup> Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo. <sup>11</sup> Ra tsa jahá tyiñu tyiñu tandihí ca ra naha, ra ican cuví ra cahnu ca nu yucú ndo. <sup>12</sup> Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi ra cua nducahnu ra jaha Nyoo.

<sup>13</sup> ¡Ndahvi nyoocho ra cuví maestro cuenda ley vehe ñuhu tan nyoocho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuví quihvi nyivi. Tan ndi maa ndo ña quihvi ndo, tan ndi ña tsahá ndo tsa quihvi nyivi tsa cuñí quihvi.

<sup>14</sup> ¡Ndahvi nyoocho ra cuví maestro cuenda ley tan nyoocho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo cua ndacan tahvi ndo tsi Nyoo nu tuvi nyivi tyin jahá ndo tyin vaha xaan ndo. Maa tyin nduve náa catyi tyin quihín nyaa ndo vehe ñi ndaahvi tsa tsihí yí tyin ña cuví tyahvi ñi xuhun tsa tsicán ndo tsi ñi. Yacan cuenda cahnu ca tundoho cua nyehe ndo jaha Nyoo.

<sup>15</sup> ¡Ndahvi nyoocho ra maestro cuenda ley vehe ñuhu tan nyoocho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo ñi cahnu nu ñuhu ñayivi tyin cuñí ndo nañihi ndo vasu intuhun nyivi cunyicun tsi ndo. Tatun tsa quihvi ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cahun ñi anyaya tsihin ndo.

<sup>16</sup> ¡Ndahvi nyoocho ra ndaahvi! Tyin cuñí ndo jaquihin ityi ndo tsi nyivi, ¡maa tyin cuaa ndo! Caahán ndo tyin yóo nyivi cua cahan “Naha Nyoo” tsa cuenda vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyi ndo. <sup>17</sup> ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu íi tsi xuhun cuaan can? <sup>18</sup> Tan juvin ñi catyi tucu ndo tyin yóo nyivi

cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañi ñi nu altar, tacan tan taahán tsi javaha ñi tsa cahan ñi, catyi ndo. <sup>19</sup> ¡Soho xaan ndo tan cuaa ndo! ¿Ndáa tsa cahnu ca cuví? ¿A tsa jamañi ndo nu altar can, o maa altar tsa jandu íi tsa jamañi ndo?

<sup>20</sup> Tyin nyivi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndihí ñi tsa cuenda tandihí tsa yosó nu altar can. <sup>21</sup> Tan nyivi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican. <sup>22</sup> Tan tacan tucu nyivi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

<sup>23</sup> ¡Ndahvi nyoocho ra cuví maestro cuenda ley vehe ñuhu tan nyoocho ra cuví fariseo! Jahá ndo tyin vaha xaan ndo tyin cahvi ndo ndaha menta tan tsiti anis tsihin tsiti comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyaá yahvi ndo ley nahnu ca tsa taahán tsi javaha yo: tsa javahá yo tsa vaha tsihin tandihí nyivi, tsa cundaahvi iñi yo tsi ñi, tsa tsinú iñi yo tsi Nyoo tan ña nacoo yo tsi ra. Cuñí tsi javaha ndo tandihí can, tan ña cua jandihí ndo tsa cuhva ndo diezmo can. <sup>24</sup> Nyoocho ra cuaa, cuñí ndo jaquihin ityi ndo tsi nyivi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyihi ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu.

<sup>25</sup> ¡Ndahvi nyoocho ra cuví maestro cuenda ley vehe ñuhu tan nyoocho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá iñi ndo tsa coo cuaha ndaha tyiñu ndo. <sup>26</sup> ¡Nyoocho ra fariseo cuaa! Nacatyá jihna ndo ityi tsitsi vasu tan coho, tacan tan cua ndoo ndihí ityi tsata.

<sup>27</sup> ¡Ndahvi nyoocho ra cuví maestro cuenda ley vehe ñuhu tan nyoocho ra cuví fariseo! ¡Jahá ndo tyin vaha xaan ndo, tan ña nditsa! Tyin cuví ndo tumaa iin ñaña ndiyi tsa nacahyi, tyin ityi tsata tsi si xaan caá, maa tyin ityi tsitsi tsitu yiqui ndiyi, tan tandihí nuu tsa caquiñi.

<sup>28</sup> Tacan cuví nyoocho, tyin cuñí nyivi tyin vaha xaan iñi ndo, maa tyin añima ndo ican quitá tsa jandaví ñaha ndo tan tandihí tsa caquiñi ndo.

<sup>29</sup> ¡Ndahvi nyoocho ra cuví maestro cuenda ley vehe ñuhu, tan nyoocho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyacuñi ndo ñaña ra cuví ndusu yuhu Nyoo, tan nacahyi ndo ñaña nyivi vaha tsicoq tañan tsanaha. <sup>30</sup> Tacan tan catyi ndo: “Tun tsatyin tsicoq yo quivi tsicoq tsii tsaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo”, catyi ndo. <sup>31</sup> ¡Tsihin yacan ñi tan nacotó ndo tyin cuví



ndo tata nyivi tsaññi tsi ra cuvı ndusu yuhu Nyoo!  
<sup>32</sup> ¡Yacan vityin nyehe maa ndo na jaha ndo, javaha ndihı ndo tsa javahā tsii tsaahnu ndo, tun cuñı ndo!  
<sup>33</sup> ¡Nyooho nyivi caquiñi cuvı ndo, tan nyivi cuvı tata cool! ¿Nacaa cua cacu ndo tan ña cua cuhun ndo anyaya? Ña cua cuvı. <sup>34</sup> Yacan cuenda cua jaquitsı yu tsi ra cuvı ndusu yuhu Nyoo nu yucú ndo, cua jaquitsı tu-cu yu tsi ra tsıtó xaan naha ra nu yucú ndo, tan ra maestro naha ra cua tsa ra naha nu yucú ndo. Maa tyin nyooho cua cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu. <sup>35</sup> Yacan cuenda, tsata nyooho cua cunyaa cuatyı tsa cuenda tandihı ra vaha tsa tsaññi tsii tsaahnu ndo nda cuanda tsihi ra Abel tan nda cuanda quivi tsihi ra Zacarías, sehe ra Berequías, tsa tsaññi ra naha tsitsi vehe ñuhu yatyin nu nyaá altar tsa yosó tsa jamañı yo tsi Nyoo. <sup>36</sup> Tsa nditsa catyı yu tsihin ndo, tyin tandihı cuatyı can cua coso siqui nyooho, nyivi tsa iyó vityin —catyı ra Jesús tsihin ra naha.

**Nu nducuihya cuñı ra Jesús nyehé ra tsi nyivi ñuu  
 Jerusalén**  
 (Lc. 13.34-35)

<sup>37</sup> ¡Ñuu Jerusalén! ¡Ndahvi nyooho nyivi ñuu Jerusalén! Tyin tsaññi ndo tsi ra cuvı ndusu yuhu Nyoo. Tan cañi ndo yuu tsi tandihı ra tsa jaquitsı Nyoo nu yucú ndo. Tan yuhu cuaha xaan tsaha cuñı yu jaha cuenda yu tsi ndo, tumaa iin ndivi sıihı tsa jahá cuenda tsi sehe ti, tan naquihın vaha ti sehe ti tsitsi nditsin ti, maa tyin ña cuñi ndo. <sup>38</sup> Nyehe ndo vityin, tyin tsa nacoo ihñi Nyoo tsi ndo. <sup>39</sup> Tan catyı yu tsihin ndo, tyin ña cua nyehe ca ndo tsi yu nda cuanda quita quivi tsa cua catyı ndo tyin cahnu xaan cuvı ra vatsı tsihin sıvi Nyoo Jutu yo —catyı ra Jesús.

**Nu caahán ra Jesús tyin cua tani vehe ñuhu cahnu**  
 (Mr. 13.1-2; Lc. 21.5-6)

**24** Quitā ra Jesús tsitsi vehe ñuhu cahnu can, tan tsa cuñı cuhun ra, tan natuhvā ra tsicá tsihin ra nu nyaá ra, tan quitsahā caahán ra naha cuhva caá vehe ñuhu can tsihin ra. <sup>2</sup> Maa tyin nacahān ra Jesús tan catyı ra:

—¿A nyehé ndo tandihı tsa iyó ihya? Tsa nditsa catyı yu tsihin ndo, tyin ihya ndi intuhun ca yuu tan ña cua coso tsata inga tsi. Tandihı maa can tan cua tani —catyı ra.

**Nu caahán ra Jesús náa cua cuvı tsa ndi cumañi ca naa  
 ñuhu ñayivi**  
 (Mr. 13.3-23; Lc. 21.7-24; 17.22-24)

<sup>3</sup> Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsaññi ra naha nu nyaá ra tan nducú tuhun xeehe ra naha tsi ra tan catyı ra naha:

—Cuñı ndi tsa catyı tuhun un tsihin ndi, ama cua cuvı tandihı tsa cahān un. ¿Nacaa tan coto ndi tatun tsa

cuyatyin tsa cua quitsı un inga tsaha tan tsa cua naa ñuhu ñayivi?

<sup>4</sup> Tacan tan nacahān ra Jesús:

—Jaha vaha ndo cuenda coto jandavi ñaha nyivi tsi ndo. <sup>5</sup> Tyin cuaha xaan ra cua quitsı, tan cua cutyiñu ra naha sıvi yu, tan cua catyı ra naha: “Yuhu cuvı ra Cristo, ra tsa jaquitsı Nyoo.” Tan cuaha nyivi cua jandavi ñaha ra naha. <sup>6</sup> Tan cua ñihi tuhun ndo tyin iyó cuatyı tan cañi tahan nyivi ityi can tan ityi ihya. Maa tyin ña nayuhvi ndo, tyin tacan taahán maa tsi cua cuvı tsa ndi cumañi ca naa ñuhu ñayivi. <sup>7</sup> Tyin nyivi iin ñuu cua cañi tahan ñi tsihin nyivi inga ñuu. Tan cua coo cuatyı iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi. <sup>8</sup> Tandihı yacan cua cuvı nu ndi cua quitsaha nyehe nyivi tundoho.

<sup>9</sup> Tacan tan cua cuhva cuenda nyivi tsi ndo tsi ra cumi tyiñu naha ra na tatsı tuñi ra naha tsi ndo. Tan cua cahñi ra naha tsi ndo. Tan tandihı nyivi iyó nu ñuhu ñayivi ndası cua cuñi ñi nyehe ñi tsi ndo tsa cuenda yuhu. <sup>10</sup> Quivi can cuaha xaan nyivi cua jañā ñi tsa tsinú iñi ñi tsi yu, tan ndası cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi. <sup>11</sup> Tan cuaha xaan ra caahán cuendu cua coo, tan cua catyı ra naha tyin cuenda Nyoo caahán ra naha. Tan cuaha xaan nyivi cua jandavi ñaha ra naha. <sup>12</sup> Tan cuaha xaan tsa caquiñi cua coo. Yacan cuenda cua jandihı ñi tsa cuñi tahan ñi tsi ñi. <sup>13</sup> Maa tyin nyivi tsa tsinú iñi tsi yu nda cuanda nu ndihı, tan ña cua ndu uvi iñi ñi, cua cacu ñi. <sup>14</sup> Tan tani cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quivi cua coto nyivi tandihı ñuu tuhun vaha ihya, tacan tan cua naa ñayivi.

<sup>15</sup> Ra Daniel, ra cuvı ndusu yuhu Nyoo, tyaa ra nu tutu Nyoo tyin coo tsa cua janducaquiñi, tsa cua jatıvi. Quivi tsa cua nyehe ndo can tsitsi vehe ñuhu Nu Ii, (nyooho tsa cahví, na cutuñi iñi ndo). <sup>16</sup> Tyin quivi can, nyivi tsa iyó Judea taahán tsi tsa quita ñi ican tan cuhun ñi ityi yucu. <sup>17</sup> Tan nyivi yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi. <sup>18</sup> Tan nyivi yucú tsitsi cuhu ña cua cunuhu jihna ñi cunaquihin ñi jahma ñi. <sup>19</sup> ¡Ndahvi ñiñaha tsa ñuhú sehe quivi can! O tatun iyó sehe ñi tsa tyaxın, ¡ndahvi ñi can! <sup>20</sup> Ndacan ndo tsi Nyoo na ña tahan tsi cunu ndo quivi vitsin, tan ndi quivi quitatú yo. <sup>21</sup> Tyin tundoho tsa cua nyehe nyivi quivi can, ñaha ca maa coo can nda quivi tsa tsinú ñuhu ñayivi. Tan ndi ityi nuu ca ña cua nyehe nyivi tundoho tacan inga tsa-ha. <sup>22</sup> Tyin tatun ña cua janducuitı Nyoo quivi can, yoñi maa cua cacu. Maa tyin cua janducuitı ra tsa cuenda tsa cuñi ra tsi nyivi nacatsı maa ra.

<sup>23</sup> Tatun yóo cua cahan tsihin ndo: “Jihna ndo, ihya nyaá ra Cristo” o “Nyehe ndo, ndacan nyaá ra Cristo”, ña tsınu iñi ndo. <sup>24</sup> Tyin cua quitsı ra jandavi ñaha naha ra tan cua catyı ra naha tyin ra Cristo cuvı ra naha. Cua catyı ra naha tyin ndusu yuhu Nyoo cuvı ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyivi tsa nacatsı maa Nyoo tun tsatyin cuvı jaha ra naha. <sup>25</sup> Vaha tyin tsa

tsitó ndo vityin ihya, jaha ndo cuenda tsi ndo quivi can. <sup>26</sup> Yacan cuenda tatun catyí nyivi tsihin ndo: "Nyehe ndo, va ra Cristo nyí nu tsiquí can", Ña cūhun ndo. O tatun catyí ñi tsihin ndo: "Nyehe ndo, nyí ra tsitsi cuartu ihya", ña tsīnu iñi ndo. <sup>27</sup> Tyin tumaa tsa cañí tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayii tsa quee nda gloria. <sup>28</sup> Tumaa natacá nditsii nu cayucú tsa iñi, tacan cua nataca nyivi yihí cuenda yu quivi quitsi yu inga tsaha.

**Nacaa cua quitsi Rayii tsa quee nda gloria inga tsaha**  
(Mr. 13.24-37; Lc. 21.25-33; 17.26-30, 34-36)

<sup>29</sup> Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihí tsa iyó andiví cua nacanda. <sup>30</sup> Tacan tan cua quituvi seña ityi andiví tyin vatsí yuhu Rayii tsa quee nda gloria. Cua quitsi yu nu vico ityi andiví tsihin tunyee iñi cahnu tan tsihin tsa cahnu cuví Nyoo. Tan tandihí nyivi iyó nu ñuhu ñayiví, cua vacu tsa xaan ñi tsa cua nyehe ñi tsi yu. <sup>31</sup> Tan cuaha ángel cuenda yu cua jaquitsi yu tyin ñihi cua tiví ra naha cutu tan cua jandu iin ra naha tsi nyivi nacatsi maa Nyoo. Cua quita ñi tanii cahnu nu ñuhu ñayiví, nda cuanda nu ndihí ñuhu ñayiví tan nda cuanda nu ndihí andiví.

<sup>32</sup> Cūtuñi iñi ndo iin cuhva yutun tsa nañí higo: Tatun tsa yutya soco tun, tan tsa cana ndaha yutya tun, nyooho tsitó ndo tyin tsa cua coo tsiti tun. <sup>33</sup> Tan juvin ñi tacan, tatun tsa cuví tandihí yacan nyehé ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi. <sup>34</sup> Tsa nditsa catyí yu tsihin ndo tyin tandihí yacan cua cuvi jihna, tsa ndi cumañi ca cúu nyivi iyó nu ñuhu ñayiví. <sup>35</sup> Tan coo quivi cua cunaa andiví tan tsihin ñuhu ñayiví, maa tyin tuhun caahán yuhu, ña cua cundihí tsi tyin cua cundaa tandihí tsi.

<sup>36</sup> Maa tyin quivi tan hora tsa cua cuvi yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

<sup>37</sup> Tumaa cuví quivi tsa tsicoo ra Noé, tacan cua cuvi quivi tsa cua quitsi nyico yuhu Rayii tsa quee nda gloria. <sup>38</sup> Quivi tsa ndi cumañi ca cuun savi xaan, nyivi can, tsatsí ñi, tsihí ñi, tindahá ñi, tan tsahá ñi tsi sehe siñhi ñi tindaha nda cuanda quivi quihví ra Noé tsitsi yutun ndoo. <sup>39</sup> Tan sana iñi ñi tan tsa savi tan tañi tandihí ñi. Tan tacan sana iñi ñi tan cua tahan tsi quivi quitsi nyico yuhu Rayii tsa quee nda gloria. <sup>40</sup> Tan tatun yucú uvi taahan rayii tsitsi cuhu quivi can, intuhun ñi ra cua quihin yu, tan cua naco yu tsi inga ra. <sup>41</sup> Tan quivi can uvi taahan ñaha cua nyico ñi. Intuhun ña cua naquihin yu, tan inga ña cua ndoo ña. <sup>42</sup> Cūyatu vaha ndo tyin ña tsitó ndo náa hora cua quitsi ra ndacá ñaha tsi ndo. <sup>43</sup> Tan coto ndo tuhun ihya tyin tatun iin tsitoho vehe tan tsitó ra náa cuhva cua quihví ñasuhu tsitsi vehe ra, cua cuatu vaha ra tan ña cua cuhva ra tsa quihví ñasuhu can. <sup>44</sup> Yacan cuenda nyoooho, cūyatu vaha ndo. Tyin sana iñi ndo, tan cua quitsi nyico yuhu Rayii tsa quee nda gloria.

**Musu vaha tan musu ña vaha**

(Lc. 12.41-48)

<sup>45</sup> Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandihí ca musu. <sup>46</sup> Tan siñ xaan cuñí ra cuví musu vaha can, tatun cuhva tsa jahá tyiñu ra tan tsa tsitoho ra. Tyin tyaá yahvi ra tandihí tsa taahán tsi ica ra. <sup>47</sup> Tan tsa nditsa catyí yu tsihin ndo, tyin tsitoho ra cua nacuhva ra tandihí cuii tsa cumí ra, cua quihí ndaha ra, tyin vaha tyaá yahvi ra tsihin tyiñu jahá ra. <sup>48</sup> Maa tyin iin musu ña vaha tsicá iñi ra tyin cua cucuee tsitoho ra. <sup>49</sup> Tacan tan quitsaha cañí ra tsi inga musu, tan tsatsí ra tan tsihí ra nyixi tsihin ra tsiñi naha ra. <sup>50</sup> Tacan tan sana iñi ra tan cua tsa tsitoho ra quivi tsa ña ndatú ra tsi ra, tan hora tsa ña tsitó ra. <sup>51</sup> Tacan tan tsitoho ra ñihi xaan cua tatsi tuñi ra tsi ra tumaa tuhvá maa ra icá tsihin nyivi tsa jahá tyin vaha xaan ñi tan ña icá ñi tsa vaha. Tacan tan cua vacu ra cuví musu ña vaha can tan cahyu ña cua cuví nuhu ra tsa nyehé ra tundoho.

**Nu cahān ra Jesús iin cuhva cuenda utsi taahan ñaha yoco**

**25** Tsa ndacá ñaha Nyoo tsi nyivi cuví tsi tumaa utsi taahan ñaha yoco tsa quihín lámpara tsa yihí aceteye tan cuahán ñi iin vico tindaha tyin cua jatahan ñi tsi ra tsa cua tindaha. <sup>2</sup> Uhun taahan ñi, soho xaan ñuhú iñi ñi, tan inga uhun taahan ñi can catsi xaan tsicá iñi ñi. <sup>3</sup> Ñi tsa soho ñuhú iñi can, nyisó ñi lámpara ñi maa tyin ña quihín ñi juhva ca aceteye tsa natyihí ñi tsitsi lámpara ñi tatun ndihí tsi. <sup>4</sup> Tan ñi tsa catsi tsicá iñi can, nyisó siñ ñi inga yutyi aceteye tsa cua natyihí ñi tsitsi lámpara can tatun ndihí aceteye tsa yihí tsitsi lámpara can. <sup>5</sup> Tan ra tsa cua tindaha can cucuee xaan ra, tacan tan tññ ñumaahna tsi tandihí ñi, tan quixi ñi. <sup>6</sup> Tacan tan maa ñuu tsiñi ñi iin ndusu tsa catyí tyehen: "Tsa vatsí ra tsa cua tindaha! ¡Quita ndo, jatahan ndo tsi ra!" <sup>7</sup> Tandihí ñi can nduvitā ñi tan quitsahā janduvahá ñi lámpara ñi. <sup>8</sup> Tacan tan quitsahā caahán tsa uhun ñi soho ñuhú iñi can tsihin inga uhun ñi can tan catyí ñi: "Cūhva ndo juhva aceteye ndahá ndo tsi ndi, tyin cuñí ndahva lámpara ndi", catyí ñi. <sup>9</sup> Maa tyin ñi yoco tsa catsi tsicá iñi can nacahān ñi tyehen: "Ña cua cuhva ndi tyin coto ña cua cutahan tsi tsa cuenda ndi tan ndi tsa cuenda nyoooho. Vaha ca cuhun maa ndo cujata ndo nu cuyahví tsi." <sup>10</sup> Maa tyin tsitsi tsa cuahán tsa uhun ñi soho ñuhú iñi can cuajata ñi aceteye, tan tsaā ra tsa cua tindaha can. Tan ñi yoco tsa ndatú vaha can, quihví ñi tsihin ra tsitsi vehe nu cua coo vico tindaha. Tan tsicundasí yuvehe can. <sup>11</sup> Yahā can tan tsaā nyico ñi soho ñuhú iñi can, tan catyí ñi: "¡Yooho tata! ¡Ñuñā yuvehe na quihví ndi!", catyí ñi. <sup>12</sup> Maa tyin maa ra nacahān ra, tan catyí ra: "Tsa nditsa catyí yu tsihin ndo tyin ña nacotó yu tsi ndo."

<sup>13</sup> Tacan tan quitsahā caahán ra Jesús:

—Cuatu vaha ndo, tyin ña tsitó ndo ndáa quivi tan náa hora cua quitsi nyico yuhu Rayi tsa quee nda gloria.

**Nu caahán ra Jesús tsihin yo na jaha tyiñu yo tsihin tsa tsahá Nyoo tsi yo**  
(Lc. 19.11-27)

<sup>14</sup>Tsa ndacá ñaha Nyoo tsi nyivi cuví tsi tumaa iin rayi tsa nyaá cua quita cuhun inga ñuu nu cañi. Tan caná ra tsi musu ra, tan tsahá cuenda ra xuhun ra tsi ra naha tyin jaha cuenda ra naha.

<sup>15</sup>Iin ra tsahá ra uhun mil xuhun, tan inga ra tsahá ra uvi mil xuhun, tan inga ra tsahá ra iin mil. Tsahá ra tsi intuhun intuhun ra nácaa cuhva tsitó ra jaha tyiñu ra naha tan cua nandaa siqui xuhun can. Tacan tan cuahán ra. <sup>16</sup>Musu tsa quihín uhun mil xuhun can, ñihi jahá tyiñu ra tsihin xuhun can, tan jahá canaa ra inga uhun mil ca siqui tsi. <sup>17</sup>Tan juvin ñi tacan tucu ra tsa quihín uvi mil can, jahá canaa ra uvi mil ca tsihin xuhun can. <sup>18</sup>Maa tyin ra tsa quihín intuhun ñi mil can, tsahán ra tan tsatyá ra iin yavi tsitsi ñuhu tan tyihí xeehe ra xuhun tsitoho ra.

<sup>19</sup>Cuaha quivi yahá tan tsaá nyico tsitoho musu can. Tan quitsahá natavá cuenda ra tsihin intuhun intuhun ra naha. <sup>20</sup>Jihna ca ra tsa quihín uhun mil xuhun can tsaá, tan nacuhvá cuenda ra uhun mil ca siqui can, tan catyí ra: “Taa, uhun mil tsahá un tsi yu, juhun inga uhun mil ihya tsa jahá canaa yu siqui tsi.” <sup>21</sup>Tan tsitoho ra catyí ra tsihin ra: “Vaha. Iin musu vaha xaan cuví un. Tan javahá un tandihí tsa cahán yu tsihin un. Luxu ñi xuhun tsahá yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan si cuñi un tsihin yu.” <sup>22</sup>Yahá can tan tsaá musu tsa quihín uvi mil xuhun can, tan catyí ra: “Taa, uvi mil ñi tsahá un tsi yu, juhun uvi mil ca ihya tsa jahá canaa yu siqui tsi.” <sup>23</sup>Tan catyí tsitoho ra tsihin ra: “Vaha. Iin musu vaha xaan cuví un, tan javahá un tandihí tsa cahán yu tsihin un. Luxu ñi xuhun tsahá yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan si cuñi un tsihin yu”, catyí ra. <sup>24</sup>Tan cuhva tsa tsaá musu tsa quihín intuhun ñi mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuñi un naquihín un xuhun nu ña jahá tyiñu un, tan cuñi un naquihin un cosecha nu ña tatsí un. <sup>25</sup>Yacan cuenda nayuhvi yu tan tsahán yu tan tyihí xeehe yu xuhun un tsitsi ñuhu. Juhun xuhun ihya tsa tsahá un tsi yu”, catyí ra. <sup>26</sup>Tacan tan nacahán tsitoho ra, tan catyí ra tsihin ra: “Musu ña vaha cuví un, tan musu jut-san cuví yooho. Tatun tsitó un tyin naquihín yu nu ña jahá tyiñu yu, tan quihín yu cosecha nu ña tatsí yu, <sup>27</sup>¿nácaa tyin ña tsityihí un xuhun yu nu banco? Tun tsatyin tacan javahá un, tsa cua quitsi nyico yu cuvi naquihin yu xuhun can tsihin xuhun siqui tsa jahá canaa tsi”, catyí ra. <sup>28</sup>Tacan tan quitsahá caahán ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cuhva ndo tsi ra tsa ndahá utsi mil. <sup>29</sup>Tyin nyivi jahá tyiñu vaha tsihin tsa iyó tsi ñi, cua

cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyivi tsa ña cuñi jaha tyiñu tsihin tsa tsahá yu, nda cuanda tsa luxu tsa cumí ñi, cua quihin nyaa ndihi yu. <sup>30</sup>Tan musu tsa ña tsíñi ñuhu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsa ra, tan cahyu ña cua cuvi nuhu ra tsihin tsa nyehé ra tundoho.”

**Nu cahán ra Jesús tyin cua cutuñi tandihí nyivi**

<sup>31</sup>‘Quivi cua quitsi nyico yuhu Rayi tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu si caá tan cua cundaca ñaha yu.

<sup>32</sup>Tandihí cuvi nyivi iyó nanhi cahnu nu ñuhu ñayivi cua nataca ñi nuu yu. Tan cua natava siin yu tsi intuhun intuhun ñi, tumaa ra jahá cuenda mbee tavá siin ra tsi mbee ticatyí tan tavá siin tucu ra tsi mbee chivo. <sup>33</sup>Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyin yu. <sup>34</sup>Tacan tan yuhu tsa cuví yu Rey cua catyi yu tsihin nyivi nyecú tsiyo cuaha yu: “Ñaha nyooho nyivi tsa nasoco Jutu yu. Na quihin cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javahá ra ihya quivi javahá ra ñuhu ñayivi. <sup>35</sup>Tyin quivi tsisoco yu, nyooho tsahá ndo tsa tsatsí yu. Quivi na ityi iñi yu, tsahá ndo ndutya tsihi yu. Tan quivi tsicá nuu yu cuví yu ra inga ñuu, tsahá ndo nu quixí yu. <sup>36</sup>Quivi cumañi jahma yu, tsahá ndo jahma tsinditsí yu. Quivi cuhvi yu, tsinyehé ndo nu canyí yu. Tan quivi tsinyi yu vehe caa, tsinyehé ndo nu nyí yu”. Tacan cua cahán yu tsihin ñi. <sup>37</sup>Tan ñi tsa vaha iñi can cua ndaca tuhun ñi tsi yu, tan catyi ñi: “Jutu Mañi yu, ¿ama nyehé ndi tsisoco un, tan tsahá ndi tsa tsatsí un? ¿Ama nyehé ndi na ityi iñi un tan tsahá ndi tsa tsihi un? <sup>38</sup>¿Ama nyehé ndi tsi un tsicá nuu un cuví un ra inga ñuu tan tsahá ndi vehe nu quixí un? ¿Ama cumañi jahma un, tan tsahá ndi jahma tsinditsí un? <sup>39</sup>¿Ama nyehé ndi cuhvi un, o tsinyi un vehe caa, tan tsahán ndi tsinyehé ndi tsi un?” cua catyi ñi. <sup>40</sup>Tan yuhu tsa cuví Rey cua catyi yu tsihin ñi: “Tsa nditsa catyí yu tsihin ndo, tyin tandihí tumañi iñi tsa javahá ndo tsi ra ndaahvi, ra yañi yu, tsi yuhu javahá ndo tumañi iñi”, cua catyi yu tsihin ñi.

<sup>41</sup>‘Tacan tan yuhu tsa cuví Rey cua cahán yu tsihin nyivi tsa yucú tsiyo satyin yu tyehen: “Çatsiyo ndo nuu yu, nyooho, nyivi taahán tsi cuhun anyaya. Cuaahan ndo nu ñuhu tsa ña cua ndahva maa. Tsiny anyaya can tyin ican cua coo nu ña vaha tan tatyí ña vaha cuenda nu. <sup>42</sup>Tyin tsisoco yu tan nyooho ña tsahá ndo tsa catsi yu. Na ityi iñi yu tan ña tsahá ndo ndutya coho yu.

<sup>43</sup>Tsicá nuu yu cuví yu iin ra inga ñuu, tan ña tsahá ndo nu cusu yu. Cumañi jahma yu tan ña tsahá ndo jahma cunditsi yu. Nacuhvi yu tan tsinyi yu vehe caa, maa tyin ña tsahán ndo tsinyehé ndo tsi yu nu tsinyi yu”, cua catyi yu tsihin ñi. <sup>44</sup>Tacan tan cua catyi ñi tsihin yu: “Jutu Mañi yu, ¿ama nyehé ndi tsisoco un, o na ityi iñi un, o tsicá nuu un cuví un ra inga ñuu, o nduve jahma un, o nacuhvi un, o tsinyi un vehe caa, tan ña jatynyee ndi tsi un?” cua catyi ñi. <sup>45</sup>Tan yuhu tsa cuví yu Rey cua catyi yu tsihin ñi: “Tsa nditsa caahán yu tsi-

hin ndo tyin tandihí maa tsa ña javahá ndo tsihin nyivi ndaahvi ihya, ña javahá ndihí ndo tsihin yu, cuví can”, cua catyí yu tsihin ñi. <sup>46</sup> Tacan tan ñi can cua cuhun ñi nu cayú ñuhú tsa ña cua ndahva maa. Tan nyivi vaha can cua cuhun ñi coo ñi ñayivi nyito tsa ña cua naa maa.

### Nu nducú ra mandoñi naha ra cuhva nácaa tan tiin ra naha tsi ra Jesús

(Mr. 14.1-2; Lc. 22.1-2; Jn. 11.45-53)

**26** Cuhva tsa ndihí cahān ra Jesús tandihí tuhun can, tan quitsahā catyí ra tsihin ra tsicá tsihin ra:

<sup>2</sup>—Nyooho tsitó ndo tyin ndi cumañi uvi ca quivi tan tahan tsi vico pascua. Tan yuhu, Rayii tsa quee nda gloria, cua cuhva cuenda nyivi tsi yu na tyaa ra cumi tyiñu tsi yu nu cruu —catyí ra.

<sup>3</sup> Quivi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iin ra naha nuquehe vehe tyiñu ra Caifás, ra jutu tsaahnu tsa cuví ityi nuu. <sup>4</sup> Tan jandaā ra naha tyiñu nácaa cua jandavi ñaha ra naha tsi ra Jesús tan tiin ra naha tsi ra tan cahñi ra naha tsi ra. <sup>5</sup> Tan catyí ra naha:

—Ña cua cahñi yo tsi ra quivi maa vico, coto nduvaa xaan nyivi —catyí ra naha.

### Nu tyosó iin ñaha ndutya tami jiñi ra Jesús

(Mr. 14.3-9; Jn. 12.1-8)

<sup>6</sup> Ra Jesús nyii ra ñuu Betania, vehe ra Simón, ra tsa yihí cuehe tyaahty. <sup>7</sup> Tan natuhvā iin ñaha nu nyaá ra Jesús, ndahá ña iin yutyi yuu vaha tsitú can yihí ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyosó ña ndutya can jiñi ra. <sup>8</sup> Tsa nyehe ra tsicá tsihin ra, nduxaan ra naha tan catyí ra naha:

—¿Nacuenda jativi ña ndutya tami can? <sup>9</sup> Vaha ca tun tsatyin xico ña can, tan ñihi cuaha ña xuhun tsihin can. Tan cuvi jatyinyee ña tsi nyivi ndaahvi tsihin xuhun can —catyí ra naha.

<sup>10</sup> Tan tsa tsiñi ra Jesús tsa caahán ra naha, tacan tan catyí ra tsihin ra naha:

—¿Nacuenda cuñi ndo jandu uvi iñi ndo tsi ñaha ihya? Tan tsa javahá ña tsihin yu, tsa vaha cuví tsi.

<sup>11</sup> Tyin nyivi ndaahvi tandihí ñi quivi cua coo ñi tsihin ndo, maa tyin yuhu, ña naha ca cua cunyii yu tsihin ndo. <sup>12</sup> Tyosó ña ndutya tami siqui cuñu ñuhu yu, tyin janduvahā ña itsi tyin cua cuhun tsi tsitsi ñuhu. <sup>13</sup> Tsa nditsa catyí yu tsihin ndo, tyin tandihí ñi nu cua cahan nyivi tuhun Nyoo taniñi cahnú ñuhu ñayivi, cua nacatyí tuhun tucu ñi tsa javahā ñaha ihya, na nducuhun iñi nyivi tsi ña —catyí ra Jesús.

### Nu xico ra Judas Iscariote tsi ra Jesús

(Mr. 14.10-11; Lc. 22.3-6)

<sup>14</sup> Tacan tan iin ra tsicá tsihin ra Jesús, ra tsa nañi Judas Iscariote, tsahān ra tsicahān ra tsihin ra jutu tsa cuví ityi nuu naha ra. <sup>15</sup> Tan catyí ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ndo?

Tacan tan ra jutu can naha ra tsahā ra naha oco utsi xuhun cuitsin tsi ra. <sup>16</sup> Tan nda quivi can tan quitsahā nducú ra Judas cuhva cua nacuhva cuenda ra tsi ra Jesús tsi ra jutu can naha ra.

### Nu cuxiñi ra Jesús tsihin ra tsicá tsihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Quivi jihna ñi tsa quitsahā vico nu tsatsí nyivi paan tsa nduve yutsan iya yihí, ra tsicá tsihin ra Jesús natuhvā ra naha nu nyaá ra tan quitsahā tsicá tuhun ra naha tsi ra tan catyí ra naha:

—¿Numaa cuñi un tsa cujanduvaha ndi tsa cuxiñi un cuenda vico pascua ihya?

<sup>18</sup> Tan catyí ra Jesús tsihin ra naha:

—Cyaahan ndo tsitsi ñuu nda vehe rayii ihya. Tan catyí ndo tsihin ra: “Ra Maestro catyí ra tyin tsa yatyin cua cúu ra, tan vehe maa un cua jacahnu ndi vico pascua”, catyí ndo tsihin ra —catyí ra Jesús.

<sup>19</sup> Tacan tan javahā ra naha cuhva cahān ra Jesús tsihin ra naha. Tan janduvahā ra naha tsa cuxiñi ra naha vico pascua can.

<sup>20</sup> Tsa cunaaha tan tsicunyaā ra Jesús nu mesa tsihin tandihí utsi uvi ra tsicá tsihin ra. <sup>21</sup> Tan tsitsi tsa tsatsí ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyooho cua xico ndo tsi yu tsi ra xaan iñi tsi yu.

<sup>22</sup> Tan nducuihyā xaan cuñi ra naha, tan quitsahā tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

<sup>23</sup> Tan nacahān ra Jesús tan catyí ra:

—Ra tsa tsatsí iin ñi coho tsihin yu, ra ican cua xico tsi yu. <sup>24</sup> Yuhu, Rayii tsa quee nda gloria, cua tahan yu tumaā tsa caahán nu tutu Nyoo. Maa tyin ndahvi ra ndaahvi tsa cua xico tsi yu. Vaha vihi ca tun tsatyin ña cacú ra —catyí ra Jesús.

<sup>25</sup> Tacan tan nacahān ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahān ra Jesús, tan catyí ra:

—Juvín un.

<sup>26</sup> Tsitsi tsa tsatsí ra naha, ra Jesús quihñi ra paan tan nacuhvā ra tyahvi nyoo tsi Nyoo, tan tsahnú sava ra, tan tsahā ra tsi ra tsicá tsihin ra, tan catyí ra tsihin ra naha:

—Catsi ndo. Paan ihya cuví tumaa cuñu ñuhu yu.

<sup>27</sup> Yahā can tan quihñi tucu ra vasu vinu, tan nacuhvā ra tyahvi nyoo tsi Nyoo, tan jayahā ra tsi tandihí ra naha tan catyí ra:

—Coho tandihí ndo vinu ihya. <sup>28</sup> Tyin cuví tsi tumaa niñi yu. Tan tsihin niñi yu cua cundaa tyiñu tsa ndoo Nyoo tsihin ndo, tyin cua cati niñi yu tsa cuenda tsa vaha tsi nyivi cuaha, tyin tsihin niñi yu cua coo tucahnú iñi cuatyí ñi. <sup>29</sup> Tan catyí yu tsihin ndo, tyin ña cua coho ca yu tahan vinu tsa cuví ndutya uvas ihya, nda cuanda

tša coho yu vinu tša tsihin ndo nda nu ndacá ñaha Jutu yu gloria —catyí ra.

**Nu cahan ra Jesús tyin cua cahan ra Pedro tyin ña nacotó ra tsi ra**

(Mr. 14.26-31; Lc. 22.31-34; Jn. 13.36-38)

<sup>30</sup> Tša yahá tša tsitá ra naha iin yaa Nyoo, tan cuahán ra naha yucu Olivo. <sup>31</sup> Tacan tan quitsahá caahán ra Jesús tsihin ra naha:

—Tandihí nyooho tan cua nacoo ihñi ndo tsi yu vityin tsacuaa ihya. Tyin nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi. <sup>32</sup> Maa tyin tša yahá nandoto yu, jihna ca yu cua cahun Galilea, tša ndi cumañi ca cahun nyooho.

<sup>33</sup> Tacan tan nacahan ra Pedro tan catyí ra:

—Vasu ndi maa tandihí ra tan ndu uvi iñi ra naha tša nyicún ra naha tsi un, maa tyin yuhu ña cua ndu uvi iñi yu.

<sup>34</sup> Tacan tan catyí ra Jesús tsihin ra:

—Tša nditsa catyí yu tsihin un tyin juvin ñi maa tsacuaa vityin, tša ndi cumañi ca vacu tsitooho, uñi tša ha cua cahan un tyin ña nacotó un tsi yu —catyí ra Jesús.

<sup>35</sup> Tan ra Pedro catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra.

Tan juvin ñi tacan catyí tandihí ca ra tsicá tsihin ra.

**Nu tsican tahvi ra Jesús tsi Nyoo nda Getsemaní**

(Mr. 14.32-42; Lc. 22.39-46)

<sup>36</sup> Tacan tan tsaá ra Jesús tsihin ra tsicá tsihin ra iin nu iyó cuaha yutun nu nañi Getsemaní, tan catyí ra tsihin ra naha:

—Cunyecu ndo ihya tsitsi tša cuahán yu ndacan cua ndacan tahvi yu.

<sup>37</sup> Tan quihñi ra tsi ra Pedro tan nduvi sehe ra Zebedeo cuahán tsihin ra. Tan quitsi tucuiihya iñi cahnu tsi ra, tan tša tuñu cuñi ra. <sup>38</sup> Tacan tan catyí ra tsihin ra naha:

—Cahnu xaan tucuiihya iñi nyaá añima yu, nda cuanda cuñi cahñi ña can tsi yu. Ndo ndo ihya tan ço nyito ndo tsihin yu —catyí ra.

<sup>39</sup> Tacan tan cuahán ra Jesús luxu ca ityi nuu tan tsicuiñi tsiti ra tan tsaquñi ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatyin cuvi jatsiyo nyaha un tundoho ihya siqui yu, vaha xaan. Maa tyin na ña cuvi cuhva cuñi maa yu, tan na cuvi cuhva cuñi maa un —catyí ra.

<sup>40</sup> Tacan tan tsaá ra nu yucú ra tsicá tsihin ra, tan nyehe ra tyin quixí ra naha. Tan catyí ra tsihin ra Pedro:

—¿A ña cuvi coo nyito ndo tsihin yu vasu tan intuhun hora? <sup>41</sup> Ço nyito ndo, tan ndacan tahvi ndo tsi Nyoo; tacan tan ña cua javaha ndo cuhva cuñi nu ña vaha. Tša nditsa tyin añima ndo, cuñi xaan tsi nanducu tsi tsi Nyoo, maa tyin cuñu ñuhu ndo cuvi tša vita cuñi —catyí ra Jesús.

<sup>42</sup> Tan tša tsahan ra tša tsinu uvi tsaha, tsican tahvi ra tyehen:

—Tyaa, tatun ña cuvi tša jatsiyo nyaha un tundoho ihya siqui yu, na cuvi cuhva cuñi maa un —catyí ra.

<sup>43</sup> Tacan tan tsaá ra inga tsaha tan nyehe ra tyin quixí nyico ra tsicá tsihin ra, tyin tsicundasí maa tinuu ra naha tsihin tša cuñi xaan ra naha cusu ra naha. <sup>44</sup> Tacan tan nacoq ra tsi ra naha, tan cuahán ra tša tsinu uñi tsaha cua ndacan tahvi ra. Tan tsican tahvi ra tsi Nyoo juvin ñi maa tsihin tuhun tša tša yahá cahan ra.

<sup>45</sup> Tacan tan tsaá nyico ra nu yucú ra tsicá tsihin ra, tan catyí ra tsihin ra naha:

—Vityin cusu ndo tan quitatu ndo. Tyin tša tsaá cuhva tša cua nacuhva cuenda ra can tsi Rayi tša quee nda gloria tsi ra iyó cuatyí naha ra. <sup>46</sup> Nduvita ndo, çohon ndo. Tyin tša vatsí ra tša xico tsi yu —catyí ra Jesús.

**Nu tsahá cuenda ra Judas tsi ra Jesús tsi nu xaan iñi tsi ra nahnu**

(Mr. 14.43-50; Lc. 22.47-53; Jn. 18.2-11)

<sup>47</sup> Ndi caahán ca ra Jesús yacan, tan tsaá ra Judas, ra tša cuvi iin ra tsicá tsihin ra Jesús. Tan tsihin ra Judas tsaá tucu cuaha xaan nyivi ndahá mityi tan yutun jacuhun ra cuvi jutu tša cuvi ityi nuu naha ra tan ra cuvi mandoñi nyivi Israel naha ra. <sup>48</sup> Tan ra Judas, ra tša tsahá cuenda tsi ra Jesús, tša yahá tsahá ra iin seña tsi ra can naha ra, tyin coto ra naha yóo cua tiin ra naha. Tyin tša yahá cahan ra tsihin ra naha:

—Ra tša cua tyayuhu yu, ra ican cuvi ra tša cua tiin ndo.

<sup>49</sup> Tacan tan natuhvá ra Judas nu nyaá ra Jesús tan catyí ra:

—Nacumi tsi un, Maestro.

Tan tyayuhu ra tsi ra.

<sup>50</sup> Tacan tan nacahan ra Jesús tan catyí ra tsihin ra:

—¿Náa tyiñu vatsí un ñih?

Tacan tan natuhvá ra can naha ra tan tiin ra naha tsi ra Jesús.

<sup>51</sup> Tacan tan iin ra cutahán tsihin ra Jesús, tava ra mityi tan tsahnyá ra soho musu jutu tsaahnu tša cuvi ityi nuu. <sup>52</sup> Tan catyí ra Jesús tsihin ra:

—Natyihí mityi un tsitsi vena un. Tyin tandihí nyivi tša cañi tahan tsihin mityi, juvin ñi tsihin mityi cua cúu ñi. <sup>53</sup> ¿A ña tsitó un tyin tatun yuhu tan cuñi yu, cuvi ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu? <sup>54</sup> Maa tyin tatun tacan javaha yu, ¿náca cua cundaa tša nyaá nu tutu Nyoo nu catyí tsi tyin taahán maa tsi tša tahan yu tyehen? —catyí ra.

<sup>55</sup> Tacan tan catyí ra Jesús tsihin tandihí nyivi:

—¿A vatsí tiñ ndo tsi yu tumaa cua tiin ndo iin ña-suhu? tyin ndahá ndo mityi tan yutun. Tandihí quivi tsinyi yu jacuahá yu tsi ndo tsitsi vehe ñuhu cahnu, tan ña tiin ndo tsi yu. <sup>56</sup> Tandihí yacan cuvi tyin tacan tan cundaa cuhva catyí tuhun Nyoo, tša tyaa ra cuvi ndusu yuhu Nyoo tahan tsanaha.

Tacan tan tandihí ra tsicá tsihin ra, tsinyu ra naha. Tan ndoo intuhun ña maa ra.

**Nu tsicá tuhun ra mandoñi naha ra tsi ra Jesús taton Sehe Nyoo cuví tsi ra**

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Tan ra tsa tññ tsi ra Jesús, tsindacá ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra. <sup>58</sup> Tan ra Pedro cuahán ra tsata ra naha, tan tsaá ra nda nuquehe vehe ra Caifás can. Tan quihví ra tan ndoo ra nyíi ra tsihin vitya can naha ra, tyin cua nyehe ra nácaa cua quita tuhun can.

<sup>59</sup> Ra jutu tsa cuví ityi nuu naha ra, tan ra mandoñi naha ra, tan tandihí ra cumí tyiñu naha ra, nducy ra naha tsi ra cahan cuendu siqui ra Jesús. Tyin tacan tan cuví cahñi ra naha tsi ra. <sup>60</sup> Maa tyin ña ñihí maa ra naha cuatyí tyaa ra naha siqui ra, vasu ndi maa cuaha nyivi tsahán ñi tsicahán ñi cuendu siqui ra. Tan nu ndihí tuhun, tsaá uvi ca tsa ndaa tsa caahán cuendu.

<sup>61</sup> Tan catyí ra naha:

—Ra ihya, catyí ra tyin cuví caní ra vehe ñuhu cahnu Nyoo, tan tsitsi tsa uñi quivi cua janduvita ra tsi inga tsaha —catyí ra naha.

<sup>62</sup> Tacan tan ra jutu tsa cuví ityi nuu can, nduvitá ra, tan catyí ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

<sup>63</sup> Maa tyin ra Jesús ña nacahan ra. Tacan tan catyí ra jutu tsaahnu tsa cuví ityi nuu tsihin ra:

—Tsihin sivi Nyoo nyitó, catyí yu tsihin un tyin catyí un tsa nditsa vaha. ¿A ra Cristo Sehe Nyoo cuví tsi un? —catyí ra.

<sup>64</sup> Tan catyí ra Jesús tsihin ra:

—Juvín yu cuví. Tan catyí tucu yu tsihin ndo, tyin cua nyehe ndo tsi yuhu, Rayí tsa quee nda gloria, cunyaa yu xiin cuaha Nyoo ra iyó tandihí tunyee iñi, tan cua nyehe ndo nu cua quitsi yu nu vico ityi andivi inga tsaha —catyí ra.

<sup>65</sup> Tacan tan ra jutu tsaahnu tsa cuví ityi nuu can tsahnyá ra jahma ra tumaa iin seña tyin cuñí maa ra tyin ña vaha tsa caahán ra Jesús, tan catyí ra tsihin tandihí ca ra naha:

—Ra ihya tsicoq cuatyí ra nuu Nyoo tsihin tsa caahán ra. ¡Nyehe ndo vityin! Ña cuñí ca tsi tsa nducu yo inga tsa ndaa tyin tsa tsiñi maa ndo tsa ña vaha tsa cahan ra. <sup>66</sup> ¿Náa catyí ndo vityin?

Tan nacahan ra naha tan catyí ra naha:

—Iyó cuatyí ra, yacan taahán tsi tsa cúu ra.

<sup>67</sup> Tacan tan tiví sñ ra naha nuu ra tan cañi ra naha tsi ra. Inga ra cañi ra naha nuu ra tsihin tsiquí. <sup>68</sup> Tan catyí ra naha tsihin ra:

—Tatun nditsa tyin ra Cristo cuví un, ¡nacoto yóo cañi tsi un!

**Nu cahan ra Pedro tyin ña nacotó ra tsi ra Jesús**

(Mr. 14.66-72; Lc. 22.56-62; Jn. 18.15-18, 25-27)

<sup>69</sup> Tsitsi tsa ndi nyíi ra Pedro nuquehe ityi tsata vehe can, tan iin ñaha tsa cuví musu jutu can, natuhvá ña nu nyaá ra tan catyí ña tsihin ra:

—Yooho tucu tsicá un tsihin ra Jesús, ra Galilea can.

<sup>70</sup> Tan ra Pedro catyí ra nuu tandihí nyivi yucú can:

—Ña tsicá yu tsihin ra can. Ña tsitó yu náa caahán un.

<sup>71</sup> Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsicá ndihí tucu ra ihya tsihin ra Jesús, ra ñuu Nazaret —catyí ña.

<sup>72</sup> Tan inga tsaha tyihí xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

<sup>73</sup> Tañi cuii ca, tan ra yucú can natuhvá ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

<sup>74</sup> Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvín ñi cuhva can navacy tsitooho. <sup>75</sup> Tacan tan nducuhún iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho, yooho tsa yahá cahan un uñi tsaha tyin ña nacotó un tsi yu”, catyí ra Jesús, nducuhún iñi ra. Tacan tan quitá ra ican, tan tsacy xaan ra tsa cuiihya cuñí ra tsa javahá ra tacan.

**Nu nacuhvá cuenda ra naha tsi ra Jesús tsi ra Pilato**

(Mr. 15.1; Lc. 23.1-2; Jn. 18.28-32)

**27** Tan tsa tuví inga quivi, tandihí ra jutu tsa cuví ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús. <sup>2</sup> Tan nuuhñí ra jahá ra naha. Tan tsahán ra naha tsinacuhvá cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

**Nu tsihi ra Judas**

<sup>3</sup> Tsa nyehe ra Judas, ra tsa xicoq tsi ra Jesús, tyin cua cúu ra, tan ndu uví iñi ra tsa javahá ra, tan nacuhvá ra tsa oco utsi xuhun cuitsin can tsi ra jutu tsa cuví ityi nuu naha ra, tan tsi ra mandoñi ñuu naha ra. <sup>4</sup> Tan catyí ra:

—Tsicoq cuatyí yu, tyin tsahá cuenda yu tsi iin ra nduve cuatyí na cúu ra.

Tan nacahan ra naha tan catyí ra naha:

—¿Nacuenda nyuhu? ¡Nyehe maa yooho!

<sup>5</sup> Tacan tan tyoso ihñi ra Judas xuhun can tsitsi vehe ñuhu cahnu, tan quitá ra cuahán ra tsityihí ra yoho jucun ra tan ticaq ra tsi ra iin nu yutun, tan tsihi ra.

<sup>6</sup> Ra cuví ityi nuu tsihin jutu can naha ra naquihín ra naha xuhun can tan catyí ra naha:

—Ña cuví tyihi yo xuhun ihya tsitsi caja nu yihí xuhun tsa tsahá nyívi tsi Nyoo tyin xuhun tsa cuyahví ra tsa cua catí niñi cuví can.

<sup>7</sup> Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahá Quisi” tsihin xuhun can. Tyin coo nu cucutsi ra naha tsi nyívi inga ñuu tun tsiihi ñi ñuu can. <sup>8</sup> Yacan cuenda nañi ñuhu can nda cuanda vityin “Ñuhu Cuenda Tsa Tsati Niñi Nyivi”.

<sup>9</sup> Tacan cuví tyin cunda tsa tyaa ra Jeremías, ra cuví ndusu yuhu Nyoo tahān tsanaha nu catyí tsi tyehen: “Juvín ñi maa ra naha quihín nyico tsa oco utsi xuhun cuitsin, tsa jata ra naha tsi ra Cristo. <sup>10</sup> Tan tsihin can, jata ra naha ñuhu tsa nañi “Ñuhu Ra Javahá Quisi”, tacan catyí Jutu Mañi yo tsihin yu”, catyí tsi.

### Nu nyehe ra Pilato tyin nduve cuatyí ra Jesús

(Mr. 15.2-5; Lc. 23.3-5; Jn. 18.33-38)

<sup>11</sup> Tsindacā ra mandoñi can naha ra tsi ra Jesús nuu ra ndacá ñaha, tan ra can tsicā tuhun ra tsi ra, tan catyí ra:

—¿A yoocho cuví rey cuenda nyívi Israel?

Tan ra Jesús catyí ra tsihin ra:

—Juvín yu, tumaa cuhva catyí maa un.

<sup>12</sup> Tan cuhva tsa tyaa ra jutu can naha ra tan ra mandoñi naha ra cuatyí siquí ra, ña nacahān maa ra.

<sup>13</sup> Tacan tan catyí ra Pilato tsihin ra:

—¿A ña tsíñi un tandihí tsa caahán ra naha siquí un?

<sup>14</sup> Maa tyin ra Jesús ña nacahān maa ra. Tan iyo xaan cuñi ra ndacá ñaha can tyin ña nacahān ra.

### Nu cahān ra cumí tyiñu tyin taahán tsi cúu ra Jesús

(Mr. 15.6-20; Lc. 23.13-25; Jn. 18.38—19.16)

<sup>15</sup> Tan vico pascua tuhvā ra ndacá ñaha jañá intuhun ra yucú vehe caa. Ndáa ra tsa nacatsi maa nyívi, juvín ra cua quita nuña. <sup>16</sup> Tan quívi can nyíi iin ra tsa nañi Barrabás vehe caa. Tan tandihí nyívi tsitó tuhun ra.

<sup>17</sup> Tan cuhva tsa ndu iin nyívi, ra Pilato tsicā tuhun ra tsi ñi, tan catyí ra:

—¿Ndáa ra cuñi ndo tsa tava nuña yu? ¿A ra Barrabás, o ra Jesús, ra tsa nañi Cristo? —catyí ra.

<sup>18</sup> Tyin tsitó ra tyin tsa cuenda tsa ndasi cuñi ra jutu can naha ra nyehe ra naha tsi ra Jesús, yacan cuenda tsahā cuenda ra naha tsi ra tsi ra Pilato.

<sup>19</sup> Tsitsi tsa nyaá ra Pilato nu tyayu ra, nu jahá tyiñu ra, jacuhūn ñasihí ra tyiñu tsi ra tan catyí ña: “Ña tyihi un tsi un tsihin ra vaha can. Tyin cuñi nyehe yu ñu-maahna tsa cuenda ra. Tan jayuhví xaan tsi tsi yu”, catyí ña.

<sup>20</sup> Maa tyin ra jutu can naha ra tan ra mandoñi naha ra, cuñihí ra naha natyuhú ra naha tsi nyívi na ndacan ñi tsa jaña ra Pilato tsi ra Barrabás, tan na cúu ra Jesús.

<sup>21</sup> Tacan tan ra ndacá ñaha catyí ra tsihin ñi inga tsaha: —Tsitsi tsa nduvi ra naha, ¿ndáa ra cuñi ndo tsa jaña yu?

Tan nacahān ñi, tan catyí ñi:

—Jaña tsi ra Barrabás.

<sup>22</sup> Tan ra Pilato tsicā tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañi Cristo ihya?

Tandihí ñi nacahān ñi tan catyí ñi:

—¿Tyaa tsi ra nu cruu na cúu ra!

<sup>23</sup> Tacan tan catyí ra Pilato tsihin ñi:

—Tan ¿náa tsa ña vaha javahā ra?

Maa tyin maa ñi canā tsaa ñi inga tsaha tan catyí ñi:

—¿Tyaa tsi ra nu cruu na cúu ra!

<sup>24</sup> Tsa nyehe ra Pilato tyin ña cuví jaha ra tsi nyívi, tyin ñihi xaan cuvá jahá ñi. Tacan tan tsicān ra ndutyā, tan nacatyā ra ndaha ra nuu nyívi can, tan catyí ra:

—Ña cua ndoo cuatyí tsa cua cúu ra vaha ihya siquí yuhu, tyin siquí nyoocho cua ndoo cuatyí can.

<sup>25</sup> Tan tandihí nyívi nacahān ñi, tan catyí ñi:

—Na ndoo maa tsi siquí ndi tan siquí sehe ndi.

<sup>26</sup> Tacan tan ra Pilato jañā ra tsi ra Barrabás, tan tava tyiñu ra na ndoho ra Jesús, tan nacuhvā cuenda ra tsi ra tsi ra andaru naha ra na cúu ra nu cruu.

<sup>27</sup> Tacan tan ra andaru cuenda ra Pilato, ra ndacá ñaha can tsindacā ra naha tsi ra Jesús nda vehe tyiñu ra Pilato, tan jandu iin ra naha tsi tandihí ca andaru nu nyaá ra. <sup>28</sup> Tacan tan tava ra naha jahma ra tan jacunditsí ra naha iin jahma cuaaha tsi ra. <sup>29</sup> Tan tyihí ra naha iin corona tsa tsinū tsihin iñu jiñi ra. Tan tsahā ra naha iin yutun tatun na cundaha ra tsihin ndaha cuaha ra. Tacan tan tsicuiñi tsiti ra naha nuu ra, tan tsacy nducu ra naha tsi ra tan catyí ra naha:

—¿Nacumi tsi un, yoocho Rey cuenda nyívi Israel!

<sup>30</sup> Tan tiví siñ ra naha tsi ra. Tan quihín ra naha yutun tatun can tan cañi ra naha jiñi ra. <sup>31</sup> Tsa yahā tsa tsacy nducu ra naha tsi ra tan tava ra naha jahma cuaaha tsa nditsí ra, tan jacunditsí nyico ra naha jahma maa ra tsi ra. Tacan tan cuahán ra naha tsihin ra cua cahñi ra naha tsi ra nu cruu.

### Nu tyaa ra naha tsi ra Jesús nu cruu

(Mr. 15.21-32; Lc. 23.26-43; Jn. 19.17-27)

<sup>32</sup> Tsa quitā ra naha ican, tahān ra naha tsi iin ra ñuu Cirene, tsa nañi Simón. Tan jañiñi ra naha tsi ra na cuiso ra cruu ra Jesús.

<sup>33</sup> Tan tsaā ra naha iin nu nañi Gólgota, tan cuñi tsi catyí “Yiquí Jiñi Ndiyí”. <sup>34</sup> Tan ican tsahā ra naha vinu nasacā tsihin ndutyā uva xaan coho ra Jesús. Tan tsa yahā tsa tsihi ra luxu can, ña cuñi ca ra coho ra. <sup>35</sup> Tan tsa yahā tsa tyaa ra naha tsi ra nu cruu, tacan tan ra andaru can quihín ra naha jahma ra tan tava cuenda ra naha tyin cua nyehe ra naha ndáa ra jaha canaa intuhun intuhun jahma ra. Tacan cuví tyin cunda tuhun tsa tyaa iin ra cuví ndusu yuhu Nyoo tahān tsanaha nu catyí tsi tyehen: “Tava cuenda ra naha tan tsatsā ra naha jahma yu”, catyí tsi. <sup>36</sup> Tacan tan tsinyecū ra naha ican tyin jaha cuenda ra naha tsi ra. <sup>37</sup> Tan ityi jiñi ra tyaa ra naha letra tsa catyí nacuenda cua cúu ra. Tan catyí tsi tyehen: “Ra ihya cuví ra Jesús, rey cuenda nyívi ñuu Israel.”

<sup>38</sup> Tan tyaa tucu ra naha uvi taahan ra suhu tsihin ra nu uvi taahan ca cruu. Iin ra tyaa ra naha xiin cuaha ra, tan inga ra xiin satyin ra. <sup>39</sup> Tan nyívi tsa yahá ican,

caahán ñi tsi ra, tan javicó ñi jiñi ñi tsa tsacú nducu ñi tsi ra. <sup>40</sup> Tan catyí ñi tsihin ra:

—Yooho tsa cahān un tyin cua canī un vehe ñuhu cahnu, tan tsitsi tsa uñi quivī tan cua janduvaha nyico un itsi, jacacu tsi maa un vityin nu cruu juvin, tatun nditsa tyin Sehe Nyoo cuvī tsi un! —catyí ñi tsihin ra.

<sup>41</sup> Tan juvin ñi tacan tsacú nducu ra jutu tsa cuvī ityi nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún tahan ra naha tan catyí ra naha:

<sup>42</sup> —Jacacu ra tsi inga nyivi, maa tyin ña cuvī jacacu ra tsi maa ra. Tun nditsa tyin Rey cuenda nyivi Israel cuvī ra, na nuu ra nu cruu can, tan cua tsinu iñi yo tsi ra.

<sup>43</sup> Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñi ra tsi ra. Tyin catyí ra tsihin yo tyin Sehe Nyoo cuvī tsi ra.

<sup>44</sup> Tan nda cuanda nu ñasuhu nahnu tsa nyaá nu cruu xiin ra tan tsacú nducu ndihī nahnu tsi ra.

### Nu tsihi ra Jesús

(Mr. 15.33-41; Lc. 23.44-49; Jn. 19.28-30)

<sup>45</sup> Tacan tan ndunaq tanñi cahnu ñuhu ñayivi tsa ora tan nda cuanda caa uñi tsa tseñi. <sup>46</sup> Tan juvin ñi cuhva can, ñihi xaan canā tsaa ra Jesús. Tan catyí ra:

—Elí, Elí, ¿lama sabactani? —tan cuñi tsi catyí: Nyoo Jutu yu, Nyoo Jutu yu, ¿nacuenta nacoq ihñi un tsi yu?

<sup>47</sup> Juhva ra yucú can naha ra, tsiñi ra naha tsa cahān ra, tan catyí ra naha:

—Ra Elías, ra cuvī ndusu yuhu Nyoo tsanaha, caná tsaa ra.

<sup>48</sup> Tan juvin ñi cuhva can, cuahán iin ra cua quihin ra iin yahma cuhva caá catyí, tan jatyi ra tsihin vinu iya, tan tyaq ra nu yutun, tan jatuhva ra yuhu ra Jesús tyin na coho ra. <sup>49</sup> Maa tyin inga ra naha catyí ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

<sup>50</sup> Inga tsaha canā tsaa ñihi ra Jesús, tacan tan tsihi ra. <sup>51</sup> Tan juvin ñi cuhva can ndatā sava jahma tsa ticaá tsitsi vehe ñuhu cahnu tyasi Nu Ii Xaan, nda cuanda ityi siqui tan nda cuanda ityi tsaha. Tan ñihi xaan taq. Tan tahvī cuatyí cava nahnu. <sup>52</sup> Tan nuñā yuhu ñaña.

Tan cuaha nyivi tsa tsinú iñi tsi Nyoo tan tsihi ñi, nandotoq ñi. <sup>53</sup> Tan tsa yahā nandotoq ra Jesús quitā ñi nu ñaña tan quihvī ñi tsitsi ñuu Jerusalén, tan cuaha nyivi nyehe tsi ñi. <sup>54</sup> Tacan tan ra capitán tan ra andaru tsa jahá cuenda tsi ra Jesús, nayuhvī xaan ra naha tsa taq, tan tsa nyehe ra naha inga ca tsa cuvī. Tan catyí ra naha:

—Nditsa nditsa cuui, tyin Sehe Nyoo cuvī tsi ra ihya.

<sup>55</sup> Cuaha ñiñaha tsa tsinyicun tsi ra Jesús nda Galilea tan jatyinyee ñi tsi ra, yucú ñi nyehe ñi ndasava. <sup>56</sup> Tan juhva ñi ican cuvī ñi ihya: ña María tsa quee Magdala, tan ña María sihi ra Jacobo tan ra José, tan ñasihi ra Zebedeo.

### Nu tsicutsi ra naha tsi ra Jesús

(Mr. 15.42-47; Lc. 23.50-56; Jn. 19.38-42)

<sup>57</sup> Cuhva tsa cuñi cuaa, quitsi iin ra cuca tsa nañi José, ra ñuu Arimatea. Tan tsinú iñi ra tsi ra Jesús. <sup>58</sup> Tan tsa-hān ra tsicahān ra tsihin ra Pilato, tan tsicān ra cuñu ñuhu ra Jesús. Tacan tan tava tyiñu ra Pilato na cuhva ra andaru naha ra cuñu ñuhu ra Jesús tsi ra. <sup>59</sup> Tacan tan quihñi ra José cuñu ñuhu ra, tan cava nuu ra iin jahma cuitsin vaha tsi ra. <sup>60</sup> Tan tyihñi ra cuñu ñuhu ra Jesús tsitsi iin ñaña tsaa tsa cuvī iin yavi yuu tsa tava tyiñu ra tsatyā ra naha. Tan tsa yahā tsa nacasi ra yuhu ñaña can tsihin iin yuu cahnu, tan cuahán ra. <sup>61</sup> Tan ña María tsa quee Magdala, tan inga ña María, ndoq ñi yucú ñi yuhu ñaña can.

### Nu jahá cuenda ra andaru ñaña ra Jesús

<sup>62</sup> Tan tsa inga quivi, quivi quitatú nyivi cuvī can, tan ra jutu tsa cuvī ityi nuu naha ra, tan ra fariseo naha ra tsahān ra naha tsicahān ra naha tsihin ra Pilato. <sup>63</sup> Tan catyí ra naha tsihin ra:

—Yooho taa, nducuhun iñi ndi tyin ra vatya can, catyí ra tahān nyito ra tyin tsa yahā tsa uñi quivi tsa cua cúu ra tan cua nandoto ra. <sup>64</sup> Yacan cuenda tava tyiñu na jaha cuenda vaha ra andaru naha ra ñaña can, nda yaha tsa uñi quivi, coto cahun ra tsicā tsihin ra tsa tsacuaa, tan suhu ra naha cuñu ñuhu ra. Yaha can tan cua catyi ra naha tsihin nyivi tyin tsa nandotoq ra. Tatun tacan cua cuvi, yaha ca cuhva cua cuvi tan ñavin ca tsa jihna ñi —catyí ra naha.

<sup>65</sup> Tan ra Pilato catyí ra:

—Quihin ndo andaru ihya. Cuaahan ndo, tan jaha cuenda vaha ndo ñaña can, nácaa cunye maa ndo jaha cuenda ndo —catyí ra.

<sup>66</sup> Tacan tan cuahán ra naha, tan jahā cuenda vaha ra naha ñaña can, tan tyaq ra naha iin tsa tyaq ra naha tsata yuu tsa ndasí can tyin tatun nacanda yuu can coto ra naha. Tan nacoq ra naha tsi ra andaru jahá cuenda ra naha ican.

### Nu nandotoq ra Jesús

(Mr. 16.1-8; Lc. 24.1-12; Jn. 20.1-10)

**28** Tsa yahā quivi tsa quitatú nyivi, cuhva tsa cuñi cunditsin, nu quitsahā tsaha vitya, tan ña María tsa quee Magdala can, tan inga ña María tsahān ñi nu ñaña. <sup>2</sup> Tan ñihi xaan taq tyin quitsi iin ángel Jutu Mañi yo quee ra andivī, tan tsaq ra nu ñaña can. Tan jatsiyō ra yuu tsa ndasí yuhu can, tan tsicunyaq ra tsata can. <sup>3</sup> Tan xiñu xaan ra, tumaa tsa cañi tatsa. Tan cuitsin xaan jahma ra. <sup>4</sup> Cuhva tsa nyehe ra andaru can naha ra tsi ra, nayuhvī xaan ra naha tan quitsahā nihé ra naha, tan nda cuanda tsihi naaha ra naha tsihin tsa yuuhvī ra naha. <sup>5</sup> Tacan tan catyí ángel can tsihin ñiñaha can:

—Ña nayuhvi ndo. Yuhu tsitō yu tyin ra Jesús tsa tsihi nu cruu nanducú ndo. <sup>6</sup> Yoñi ca ra nyí ihya, tyin tsa nandotoq ra, tumaa catyí ra. Naha ndo tan nyehe ndo



nu tinyij ra naha tsi ra. <sup>7</sup> Janumi xaan ndo cuhun ndo cucatyí tuhun ndo tsihin ra tsicá tsihin ra tyin tsa nandotó ra, tan tsa cuahán ra nda Galilea, cua cuatu ra tsi ra naha ndacan. Yacan cuví tsa catyí tuhun yu tsihin ndo —catyí ángel can tsihin ñi.

<sup>8</sup> Tacan tan numí ñi quitá ñi nu ñaña can. Yuuhví ñi, tan sñi xaan cuñí tucu ñi. Tan tsinú xaan ñi cuahán ñi cua catyí tuhun ñi tsihin ra tsicá tsihin ra Jesús. <sup>9</sup> Tan cuhva can quituví ra Jesús nuu ñi tan tsahá ra nacumi tsi ñi. Tacan tan natuhvá ñi nu nyaá ra tan tsicuiñi tsiti ñi nuu ra tan jacahnú ñi tsi ra, tan tsicunumi nyaa ñi tsaha ra. <sup>10</sup> Tan catyí ra tsihin ñi:

—Ña nayuhvi ndo. Cuaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyí ra tsihin ñi.

#### Tuhun tsa nacatyí tuhun ra andaru naha ra

<sup>11</sup> Tsitsi tsa cuahán ñi can, juhva andaru tsa jahá cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra. <sup>12</sup> Tacan tan ra jutu can naha ra tsahán ra naha tsicahán ra naha tsihin ra mandoñi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsahá ra naha tsi ra andaru can naha ra. <sup>13</sup> Tan catyí ra naha tsihin ra naha:

—Nyooho cua cahan ndo tyin tsa tsacuaa tsitsi tsa quixí ndo, tsahán ra tsicá tsihin ra Jesús tan quihín ra naha cuñu ñuhu ra. <sup>14</sup> Tan tatun cua coto ra ndacá ña-

ha tuhun ihya, cua nyehe maa ndi nácaa cua cahan ndi tsihin ra, tan nyooho ña caca iñi ndo. Nduve náa cua tahan ndo. <sup>15</sup> Tacan tan quihín ra andaru can xuhun can, tan cuahán ra naha cuajavahá ra naha cuhva catyí ra naha tsihin ra naha. Tan nda quivi vityin tan tacan caahán nyivi ñuu Israel.

#### Nu tavá tyiñu ra Jesús tsi ra tsicá tyiñu ra

(Mr. 16.14-18; Lc. 24.36-49; Jn. 20.19-23)

<sup>16</sup> Tan tacan, tandihí tsa utsi iin ra tsicá tsihin ra, cuahán ra naha nda Galilea nda yucu nu catyí maa ra Jesús tsihin ra naha tyin cuhun ra naha. <sup>17</sup> Tan cuhva tsa nyehe ra naha tsi ra Jesús, jacahnú ra naha tsi ra, maa tyin juhva ra naha uvi ñi tsicá iñi ra naha. <sup>18</sup> Tacan tan natuhvá ra Jesús nu nyecú ra naha tan catyí ra tsihin ra naha:

—Nyoo tsahá ra tsa cundaca ñaha yuhu tandihí andivi tan nu ñuhu ñayivi ihya. <sup>19</sup> Yacan cuenda, cuaahan ndo tandihí nu iyó nyivi, tandihí ñi ñuu, tan catyí ndo tsihin ñi na cunyicun ñi tsi yu. Tan jacoondutya ndo tsi ñi tsihin sivi Jutu yo Nyoo tan tsihin sivi yuhu Sehe ra, tan tsihin sivi Tatyí Ii ra. <sup>20</sup> Tan jacuaha ndo tsi ñi na tyaa yahvi ñi tandihí tsa catyí yu tyin javaha ndo. Tan coto ndo tyin yuhu cunyaa yu tsihin ndo tandihí quivi nda cuanda naa ñayivi —catyí ra Jesucristo tsihin ra tavá tyiñu ra.

Tan na cuvi tsi tacan ñi.

# Marcos

## Nu caahán ra Juan, ra jacoondutyá tsi nyívi, tuhun Nyoo

(Mt. 3.1-12; Lc. 3.1-9, 15-17; Jn. 1.19-28)

**1** Tyehen quitsahá tuhun ra Jesucristo, Sehe Nyoo. <sup>2</sup>Tsanaha ra Isaías, ra cuví ndusu yuhu Nyoo, tyaá ra nácaa cua quitsi ra Jesucristo, Sehe Nyoo. Tan catyí tyehen:

Cua jacuhun yu iin ra cua jacoto tsi nyívi na janduvaha ñi tsi ñi tsa ndi cumañi ca cuhun un nu yucú ñi, catyí Nyoo tsihin ra Cristo.

<sup>3</sup>Cua tyaá soho yo ndusu ra nu cana tsaá ra nu tsiquí, tan catyí ra:

“Nuña ndo iin ityi cuiti tan natyiso vaha ndo tsi ndo tyin tsa vatsí Jutu Mañi yo”, catyí tuhun tsa tyaá ra Isaías.

<sup>4</sup>Tacan cuví; quitsi ra Juan nu tsiquí, tan javahá ra cuhva tyaá ra Isaías. Catyí ra tsihin nyívi tyehen: “Ndu uvi iñi ndo cuatyí ndo tan cõndutyá ndo tyin tacan tan jaha Nyoo tucahnu iñi tsi ndo tsa cuenda cuatyí ndo.” <sup>5</sup>Tan tandihí nyívi iyó ñuu tsa cayucú Judea tumaa ñuu Jerusalén tan inga ca ñuu tsañan ñi tsityaa soho ñi tuhun caahán ra Juan. Tsa tsiñi ñi tsa caahán ra, ndu uví iñi ñi cuhva iyó ñi tan nahmá ñi cuatyí ñi nu Nyoo. Tacan tan tsicoondutyá ñi yutya Jordán.

<sup>6</sup>Tan jahma ra Juan tsiny tsi tsihin ixi camellu. Tan cinturón ra cuví ñi. Tan maa ñi tica xama tsatsí ra, tan tsihí ra ndutyá ñuñu tsa iyó tsitsi cuhu. <sup>7</sup>Caahán ra tuhun Nyoo tsihin nyívi tan catyí ra:

—Tsa yatyin cuii quitsi ra tsa cahnu ca cuví tan ñavin ca yuhu. Tan ndi ña taahán tsi tsi yu tsa ndatsi yu ñi nditsan ra, tyin cahnu ca cuví maa ra tan ñavin ca yuhu. <sup>8</sup>Yuhu jacoondutyá yu tsi ndo tsihin ndutyá ñi. Maa tyin maa ra cua jacoondutyá ra tsi ndo tsihin Tatyí Ii Nyoo —catyí ra Juan.

## Nu tsicoondutyá ra Jesús

(Mt. 3.13-17; Lc. 3.21-22)

<sup>9</sup>Quívi can quitá ra Jesús ñuu Nazaret, tsa canyí Galilea, tan cuahán ra nu nyíi ra Juan yutya Jordán tyin jacoondutyá ra tsi ra. <sup>10</sup>Tsa quitá ra Jesús tsitsi ndutyá tsa yahá tsicoondutyá ra, nuña andívi tan nyehé ra vatsí nuú Tatyí Ii Nyoo síquí ra tan caá tsi tumaa caá iin paloma. <sup>11</sup>Tan nacahan iin ndusu ityi andívi tan catyí tsi tsihin ra tyehen:

—Yooho cuví Sehe yu tan cuñi xaan yu tsi un. Tan siñ xaan cuñi yu nyehé yu tsi un —catyí ndusu can.

## Nu nducy cuhva nu ña vaha tsi ra Jesús

(Mt. 4.1-11; Lc. 4.1-13)

<sup>12</sup>Tsa yahá tsa tsicoondutyá ra Jesús tan tsindaca Tatyí Ii Nyoo tsi ra nu tsiquí. <sup>13</sup>Tan tsinyí ra ican uvi xico quívi nu nduve nyívi iyó, maa ñi quiti xaan iyó. Tan nducy cuhva nu ña vaha tsi ra. Yahá can tan tsaá ángel Nyoo tan jatyinyeé ra naha tsi ra.

## Nu quitsahá caahán ra Jesús tuhun Nyoo tsihin nyívi iyó Galilea

(Mt. 4.12-17; Lc. 4.14-15)

<sup>14</sup>Tsa yahá tsa tyihí nyívi tsi ra Juan vehe caa, tan tsinuhú ra Jesús Galilea tan caahán ra tsihin nyívi nácaa ndacá ñaha Nyoo. <sup>15</sup>Tan catyí ra:

—Tsa tsaá quívi tsa cua cundaca ñaha Nyoo tsi nyívi iyó nu ñuhu ñayívi ihya. Yacan cuenda ndu uvi iñi ndo cuatyí ndo, tan tsinu iñi ndo tuhun tsa jacacú Nyoo tsi nyívi —catyí ra Jesús.

## Nu caná ra Jesús cumi taahan ra tññ tyaca

(Mt. 4.18-22; Lc. 5.1-11)

<sup>16</sup>Iin quívi cuahán ra Jesús tsicá ra yuhu miñi tsa nañi Nduya Ñuhu Galilea. Tan nyehé ra tsi ra Simón tan ra Andrés, yañi ra Simón, cañi ra naha traya ra naha nu ndutyá, tyin ra tññ tyaca cuví ra naha. <sup>17</sup>Tan catyí ra Jesús tsihin ra naha:

—Naha ndo, quitsi nyicun ndo tsi yu, tan yuhu cua jatyinyeé yu tsi ndo tyin tumaa tsa tññ ndo tyaca ihya, tacan cua ñihi ndo nyívi cua cuví nyívi Nyoo —catyí ra Jesús tsihin ra Simón tan tsihin ra Andrés.

<sup>18</sup>Juvin ñi cuhva can tan nacoó ra naha traya can, tan cuahán ra naha cuanyicún ra naha tsi ra.

<sup>19</sup>Ña cuaha ñi tsicá ra naha, tan nyehé ra Jesús tsi uvi taahan sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya.

<sup>20</sup>Caná ra tsi nduvi taahan ra naha. Tan nacoó ra naha tsi ra Zebedeo, jutu ra naha, tsitsi yutun ndoo can tsihin ra cuví musu ra naha. Tan cuahán ra naha tsihin ra Jesús.

## Nu quitá tatyí ña vaha tsi iin rayíi

(Lc. 4.31-37)

<sup>21</sup>Tsa tsaá ra Jesús ñuu Capernaum tsihin ra tsicá tsihin ra, quihví ra Jesús tsitsi vehe ñuhu quívi quitatú nyívi. Tacan tan quitsahá jacuahá ra tuhun Nyoo tsi nyívi. <sup>22</sup>Tan iyo xaan cuñi ñi tsa tsiñi ñi tsa caahán ra, tyin jacuahá ra tumaa iin ra iyó vaha ndatu. Ña caahán

ra cuhva caahán ra maestro cuenda ley vehe ñuhu naha ra. <sup>23</sup> Tan tsitsi vehe ñuhu can nyíi iin ra yihí tatyí ña vaha. Tan canā tsaa ra tan catyí ra:

<sup>24</sup> —¿Nacuvi tyihí un tsi un tsihin nyuhu, yooho Jesús, ra ñuu Nazaret? ¿A vatsí un vatsí janaa un tsi ndi? Yuhu nacotó vaha yu tsi un, tan tsitó yu tyin Sehe Ii Nyoo cuví un —catyí ra can tsihin ra Jesús jahā nu tatyí ña vaha can.

<sup>25</sup> Tacan tan nduxaān ra Jesús tsi nu tan catyí ra tsihin nu:

—¡Ña cāhan ca un! ¡Quita tsi ra ihya! —catyí ra tsihin nu.

<sup>26</sup> Tacan tan quitsahā nihí rayñi can jahā nu. Tan ñihi xaan canā tsaa ra jahā nu, tan quitā nu tsi ra. <sup>27</sup> Tandihí nyiví iyo xaan cuñí ñi tan tsicá tuhun tahan ñi tsi ñi, tan catyí ñi:

—¿Náa cuví tsa nyehé yo ihya? ¿Náa tuhun tsaa jacuahá ra ihya? ¡Tyin iyó vaha tunyee iñi tsi ra, nda cuanda tatyí ña vaha tan tyaá yahvi tsi ra! —catyí ñi.

<sup>28</sup> Tan numi ñi tsitó nyiví iyó tandihí ñuu tsa cayucú Galilea tuhun ra Jesús.

### Nu nduvahā tyiso ra Simón Pedro

(Mt. 8.14-15; Lc. 4.38-39)

<sup>29</sup> Tsa ndihí jacuahā ra Jesús tsi nyiví tsitsi vehe ñuhu, quitā ra cuahán ra vehe ra Simón tan ra Andrés. Tan cuahán ndihí ra Jacobo tan ra Juan tsihin ra. <sup>30</sup> Tan ña tyiso ra Simón cuuhví ña tsihin cahñi canyíi ña nu tsito. Tan catyí tuhun nyiví ña tsihin ra Jesús tyin cuuhví ña. <sup>31</sup> Tacan tan natuhvā ra Jesús yuhu tsito nu canyíi ña, tñin ra ndaha ña, tan cañihí ra tsi ña. Juvín ñi cuhva can, quitā cahñi tsi ña, tan quitsahā nanducú ña tsa catsi ra naha.

### Nu cuaha xaan nyiví cuuhví janduvahā ra Jesús

(Mt. 8.16-17; Lc. 4.40-41)

<sup>32</sup> Tsa tsa cuñí cuaa tsa tsa yahā tyiso ñicanyii, tandihí nyiví cuuhví tan nyiví yihí tatyí ña vaha tsindacā nyiví tsi ñi nu nyíi ra Jesús. <sup>33</sup> Tan ndu iin tandihí nyiví ñuu can nu yucú ra naha. <sup>34</sup> Tan janduvahā ra tsi tandihí ñi tsa yihí siñ siñ cuehe, tan cuaha tatyí ña vaha tavā ra. Maa tyin ña tsahā ra tsa cahan tatyí ña vaha can, tyin tsitó nahnu yóo ra cuví ra.

### Nu tsicá ra Jesús caahán ra tuhun Nyoo tandihí ñuu tsa cayucú Galilea

(Lc. 4.42-44)

<sup>35</sup> Ra Jesús nduvitā ra tsa ndi naa ca inga quiví, quitā ra ñuu can tan cuahán ra iin nu taxin caā cuandacán tahvi ra tsi Nyoo. <sup>36</sup> Tsa nyehē ra Simón tyin nduve ra, tacan tan cuahán ra tsihin tandihí ca ra naha cuananducú ra naha tsi ra. <sup>37</sup> Tan tsa nañihí ra naha tsi ra, catyí ra naha tsihin ra:

—Tandihí nyiví tan nanducú ñi tsi un —catyí ra naha.

<sup>38</sup> Maa tyin catyí ra tsihin ra naha:

—Cohon ndo ñuu tsa cayucú yatyin ñi ihya, tyin cuñí tsi cahan ndihí yu tuhun Nyoo ican, tyin yacan tyiñu vatsí yu —catyí ra Jesús tsihin ra naha.

<sup>39</sup> Tan tacan tsicā ra Jesús caahán ra tuhun Nyoo tsihin nyiví tsitsi vehe ñuhu tan iin tan iin ñuu tsa cayucú Galilea. Tan tavā ra tatyí ña vaha tsi nyiví.

### Nu janduvahā ra Jesús tsi ra ndohó cuehe tyaahyú

(Mt. 8.1-4; Lc. 5.12-16)

<sup>40</sup> Tsa ndi cuahán ra Jesús tsicá ra tan quitā iin ra ndohó cuehe tyaahyú tsicuiñi tsiti ra nuu ra, tan catyí ra tsihin ra:

—Tun yooho tan cuñí un, cuví janduvaha un tsi yu —catyí ra.

<sup>41</sup> Tan cundaahvi iñi ra Jesús nyehē ra tsi ra, tan tyiso ndaha ra jiñi ra, tan catyí ra tsihin ra:

—Cuñí yu janduvaha yu tsi un. Tan vityin tsa nduvahā un —catyí ra tsihin ra.

<sup>42</sup> Tsa cahan ra Jesús tacan tsihin ra, juvín ñi cuhva can tan nduvahā ra. <sup>43</sup> Tacan tan catyí ra Jesús tyin tsa cuví cunuhu ra, maa tyin cahan vaha xaan ra tsihin ra na javaha ra tyehen:

<sup>44</sup> —Coto catyí tuhun un tsihin nyiví yóo janduvahā tsi un. Maa tyin cyaahan nu nyaá ra cuví jutu, tan jana-ha un tsi un tsi ra. Tan cuhva tsa catyí ra Moisés tyin cuhva ndo tsa cuenda tsa nduvahā ndo tun cuhvi ndo. Yacan cua cuví tsa ndaa tsi ra jutu tan tsi nyiví tyin tsa nduvahā un —catyí ra Jesús tsihin ra.

<sup>45</sup> Maa tyin ra ican cuahán ra, tan quitsahā catyí tuhun ra tsihin tandihí nyiví nácaa nduvahā ra. Yacan cuenda ña cuví ca quihvi nditsin ra Jesús tsitsi ndi intuhun maa ñuu. Tan tsicá ra ityi tsata ñuu ñi nu nduve nyiví iyó, maa tyin tandihí ñi ityi tan quitā nyiví, tan tsinyehē ñi tsi ra.

### Nu janduvahā ra Jesús tsi iin ra xii

(Mt. 9.1-8; Lc. 5.17-26)

**2** Tsa yahā juhva quiví tan cuahán ra Jesús ñuu Capernaum inga tsaha. Tan tsa tsitó nyiví tyin tsaā nuhu ra yuvehe ra, <sup>2</sup> iin yaha ñi ndu cuaha ñi yuvehe ra tan ña tsitahan maa ñi tsitsi vehe tan ndi yuvehe. Tan caahán ra tuhun Nyoo tsihin ñi. <sup>3</sup> Tacan tan tsaā cumi taahan rayñi nyisó ra naha iin ra xii. Cuñí ra naha cuhun ra naha tsihin ra nda nu nyaá ra Jesús. <sup>4</sup> Maa tyin ña cuví yaha ra naha yuvehe tan cuhun ra naha nu nyaá ra Jesús tyin cuaha xaan nyiví nyecú yuvehe can. Yacan cuenda ndaā ra naha jiñi vehe, tan jatsiyó ra naha juhva tyiyo ndihí cuhva nu nyaá ñi ra Jesús. Tacan tan januu ra naha tsi ra cuuhví can nu nyaá ra Jesús tsihin iin tsito. <sup>5</sup> Tsa nyehē ra Jesús tyin tsinú xaan iñi ra can naha ra, catyí ra tsihin ra cuuhví can:

—Vityin, tsa jahā yu tucahnu iñi tsi un tsa cuenda tandihí cuatyí un —catyí ra Jesús tsihin ra.

<sup>6</sup> Tan nyecú juhva ra cuví maestro cuenda ley vehe ñuhu naha ra ican, tacan tan quitsahā tsicá iñi ra naha tuhun ihya: <sup>7</sup> “¿Nacuenda tyin caná iñi ra ihya caahán ra tyehen? Tan intuhun ñi maa Nyoo cuví ra jahá tucahnu iñi tsi yo. Tsicoo cuatyí ra nuu Nyoo tsa cuenda tsa caahán ra tacan”, cuñí ra naha, tsicá iñi ra naha.

<sup>8</sup> Maa tyin ra Jesús iin yaha ñi tuví iñi ra cuhva tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan? <sup>9</sup> ¿Náa yí ca cahan yo; “Cuatyí un tsa yahá ndatsí”, o catyí yo: “Nduvita, naquihin tsito un tan caca”? <sup>10</sup> Vaha. Cua janaha yu tsi ndo tyin yuhu, tsa cuví yu Rayíí quee nda gloria, iyó ndatu tsi yu nu ñuhu ñayivi ihya tsa jaha yu tucahnu iñi tsi nyivi tsa cuenda cuatyí ñi —catyí ra Jesús tsihin ra naha.

Tacan tan nacahan ra tsihin ra cuuhví can:

<sup>11</sup> —Catyí yu tsihin un; nduvita, naquihin tsito un, tan cyanuhu yuvehe un —catyí ra Jesús tsihin ra.

<sup>12</sup> Tan iin yaha ñi nduvita ra cuuhví can, naquihin ra tsito ra, tan cuanuhu ra. Tan iyo xaan cuñí tandihí maa nyivi tsa nyehé can, tan quitsahá jacahnú ñi tsi Nyoo, tan catyí ñi:

—Ndi iin tsaha maa tan ñaha ca nyehé yo tsehe —catyí ñi.

### Nu caná ra Jesús tsi ra Leví

(Mt. 9.9-13; Lc. 5.27-32)

<sup>13</sup> Tsa yahá yacan tan cuahán ra Jesús yuhu miñi inga tsaha. Tacan tan tsaá cuaha nyivi nu nyíí ra, tan quitsahá jacuahá ra tsi ñi. <sup>14</sup> Tsa ndihí jacuahá ra tsi ñi, tan cuanuhú ra. Tan tsa cuahán ra yahá ra nu nyaá vehe nu tyahví nyivi xuhun cuenda ra ndacá ñaha ñuu Roma, tan ican nyaá ra Leví, sehe ra Alfeo, naquihín cuenda ra xuhun can. Nyehé ra Jesús tsi ra, tan catyí ra tsihin ra:

—Cohon tsihin yu.

Tacan tan nduvita ra Leví, tan cuahán ra tsihin ra.

<sup>15</sup> Yahá can tan cuahán ra Jesús cuacatsí ra yuvehe ra Leví tsihin ra tsicá tsihin ra. Tsinyaa ra nu mesa tan tsinyecu ndihí tucu ra tavá xuhun cuenda ra ndacá ñaha tan inga ca nyivi iyó cuatyí. Tyin cuaha xaan nyivi nyicún tsi ra. <sup>16</sup> Maa tyin tsa nyehé ra cuví maestro cuenda ley vehe ñuhu tan ra cuví fariseo naha ra tyin tsatsí ra Jesús tsihin ra tavá xuhun tan ra iyó cuatyí, catyí ra naha tsihin ra tsicá tsihin ra:

—¿Nacuenda tyin tsatsí tan tsihí ra maestro ndo tsihin ra tavá xuhun tan ra iyó cuatyí?

<sup>17</sup> Tsa tsiñí ra Jesús tsa cahan ra naha tan catyí ra:

—Yuhu ña vatsí yu vatsí jatyinyee yu tsi nyivi cuñí tyin vaha iyó ñi; vatsí yu vatsí jatyinyee yu tsi nyivi tsitó tyin iyó cuatyí ñi tumaa nyivi cuuhví, tyin nyivi cuuhví tsiñí ñuhu doctor tsi ñi. Maa tyin nyivi vaha cuñí, ña tsiñí ñuhu doctor tsi ñi —catyí ra Jesús tsihin ra naha.

### Nu tsicá tuhun nyivi tsi ra Jesús tun taahán tsi coo nyitya ñi

(Mt. 9.14-15; Lc. 5.33-35)

<sup>18</sup> Iin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahan juhva nyivi nu nyíí ra Jesús, tan tsicá tuhun ñi tsi ra, tan catyí ñi:

—¿Nacuenda tyin tsicoó nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yooho ña tsicoó nyitya ra naha? —catyí ñi.

<sup>19</sup> Nacahan ra Jesús tan catyí ra:

—¿A cuví coo nyitya nyivi yucú nu iyó vico tindaha tun ndi nyíí ra cua tindaha tsihin ñi? Ña cuví coo nyitya

ñi tun ndi nyíí ra tsihin ñi. <sup>20</sup> Maa tyin coo quivi ña cua cunyí ca ra tsihin ñi. Tacan tan cua coo nyitya ñi —catyí ra Jesús tsihin ñi.

### Nu caahán ra Jesús tyin ña nacatsi tahan tuhun tsahnu tsa iyó nyivi tsihin tuhun tsa tsa jacuahá ra tsi ñi

(Mt. 9.16-17; Lc. 5.36-39)

<sup>21</sup> Tan catyí ra Jesús:

—Ña tuhvá nyivi natyaá jahma tsaá iin jahma tuuhu, tyin jahma tsaá can cua nandiyí can tan cua nducahnu ca nu ndatá jahma tuuhu can jaha can. <sup>22</sup> Tacan tucu ñi ñi yihí vinu tun tyihí yo vinu tsaá tsitsi ñi tsaahnu cua ndata ñi can, tan cua catí vinu can tan cua tiví can. Yacan cuenda cuñí tsi tsa tyihí yo vinu tsaá tsitsi ñi tsaá —catyí ra Jesús.

### Nu jocón ra tsicá tsihin ra Jesús yoco trigu quivi quitatú nyivi

(Mt. 12.1-8; Lc. 6.1-5)

<sup>23</sup> Iin tsaha yahá ra Jesús tsitsi tsa tatsí nyivi tan cuví tsi quivi quitatú ñi. Tan tsa yahá ra tsicá tsihin ra quitsahá tuhún ra naha yoco trigu. <sup>24</sup> Tacan tan tsa nyehé ra fariseo naha ra can quitsahá caahán ra naha tsihin ra Jesús:

—¡Nyehé tsa javahá ra tsicá tsihin un naha ra! Jahá tyiñu ra naha tan ña taahán tsi jahá tyiñu yo quivi ihya —catyí ra naha.

<sup>25</sup> Tan nacahan ra Jesús tsihin ra naha:

—¿A ñaha ca cahvi ndo nu tutu nu tsahá cuenda tsi tsa javahá ra David tan ra cutahán tsihin ra quivi tso-có ra naha? <sup>26</sup> Ra David quihví ra tsitsi vehe Nyoo quivi cuví ra Abiatar jutu tsaahnu cuví ityí nuu. Tan quihin ra paan ii, tsa taahán tsi catsi maa ñi maa ra jutu naha ra. Maa ra tan tandihí ra cutahán tsihin ra tsatsí ra naha paan can —catyí ra Jesús.

<sup>27</sup> Tacan tan catyí ra Jesús tsihin ra naha:

—Nyoo javahá ra quivi quitatú yo tyin tacan tan cuví quitatu cuñu ñuhu yo; tan ñavin maa yo tsinu tsa cuenda quivi quitatú yo. <sup>28</sup> Yacan cuenda yuhu tsa cuví yu Rayíí quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

### Nu nduvahá ra na ityi iin ndaha

(Mt. 12.9-14; Lc. 6.6-11)

**3** Tsa quihví ra Jesús inga tsaha tsitsi vehe ñuhu, nyíí iin ra na ityi iin ndaha ican. <sup>2</sup> Tan ra cuví fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityi ndaha can tyin cuví tsi quivi quitatú nyivi. Tyin tun cua janduvaha ra tsi ra can, tacan tan cua cuví tyaa ra naha cuatyí siquí ra. <sup>3</sup> Tacan tan catyí ra Jesús tsihin ra na ityi ndaha can:

—Nduvita nyityi tan cunyaa un mahñu ihya.

<sup>4</sup> Tacan tan tsicá tuhun ra tsi ra tsa yucú ican naha ra, tan catyí ra tsihin ra naha:

—¿Náa taahán tsi javaha yo quivi quitatú yo? ¿A taahán tsi javaha yo tsa vaha o tsa ña vaha? ¿A taahán

tsi janduvaha yo nyivi, o cahñi yo tsi ñi? —catyí ra Jesús.

Maa tyin ña nacahan ra naha. <sup>5</sup> Tacan tan nanyehe xaan ra Jesús nuu ra naha, tan nducuihya cuñi ra tyin ña cuñi ra naha cutuñi iñi ra naha. Tan catyí ra tsihin ra cuuhví can:

—Jandundoo ndaha un.

Tacan tan jandundoo ra can ndaha ra, tan iin yaha ñi nduvaha ndaha ra. <sup>6</sup> Tacan tan quitā ra fariseo naha ra, tan quitsahā natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

### Nu cuaha xaan nyivi cuahán cuanyehé nu nyii ra Jesús yuhu miñi

<sup>7</sup> Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyivi iyó Galilea cuahán cuanyicún tsi ra naha. <sup>8</sup> Tsa tsitō nyivi tyin nahnu xaan tsa iyo javahá ra, cuaha ñi tsahan nu nyii ra tyin cuñi ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsiyo yutya Jordán. Tan quee tucu juhva ñi ñuu Tiro tan ñuu Sidón tan tandihí ca ñuu tsa cayucú yatyin nu cayucú nduvi ñuu can. <sup>9</sup> Tsa nyehe ra Jesús tsaá nyivi, catyí ra tsihin ra tsicá tsihin ra na caquin nyaa vaha ra naha iin yutun ndoo tyin tun cua ndutuvi ca nyivi, cuvi quihví ra tsitsi yutun ndoo can tyin tacan tan ña cua tindahñi ñi tsi ra.

<sup>10</sup> Tsa cuaha xaan nyivi janduvaha ra, yacan cuenda tsahan cuaha ca nyivi cuuhví nu nyii ra. Tsicá iñi maa ñi tyin tun nañi luxu ndaha ñi tsi ra tan cua nduvaha ñi.

<sup>11</sup> Yihí ñi cuuhví can yihí tatyí ña vaha tsi ñi. Tan tsa natuhvá ñi tsa yihí tatyí ña vaha nu nyaá ra Jesús tsicuiñi tsiti ñi, tan nu tatyí ña vaha tsa yihí tsi ñi canā tsa nu tan catyí nu tsihin ra:

—¡Yooho cuví Sehe Nyoo!

<sup>12</sup> Tan tandihí ñi cuhva tsa caahán tatyí ña vaha yóo ra cuví ra, tyasí ra nu cahan nu.

### Nu nacatsi ra Jesús tsi utsi uvi ra caca tyiñu ra

(Mt. 10.1-4; Lc. 6.12-16)

<sup>13</sup> Tsa yahā yacan tan ndaā ra Jesús iin yucu tan canā ra tsi ra tsa cuñi maa ra cana ra. Tacan tan cuahán ra naha nu nyii ra. <sup>14</sup> Tan tsitsi tsa tandihí ra tsa canā ra, nacatsi ra utsi uvi ra naha tyin caca ra naha tsihin ra, tan caca ra naha cahan ra naha tuhun Nyoo. <sup>15</sup> Tan tsahā ra ndatu tsi ra naha tsa janduvaha ra naha tsi nyivi cuuhví, tan tava ra naha tatyí ña vaha yihí tsi nyivi.

<sup>16</sup> Ihya nyecú sivi ra naha: ra Simón, tsa jacunañi tucu ra Jesús Pedro; <sup>17</sup> tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihya cuñi tsi catyí: “ra caahán tumaa ñihi caahán savi”. <sup>18</sup> Tan tandihí ca ra naha nañi ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañi tucu Simón, iin ra tsa cuñi cuhun cuatyí siqui ñuu Roma tsa ndacá ñaha tsi ñi; <sup>19</sup> tan ra Judas Iscariote, tsa xico tsi ra Jesús.

Tsa yahā yacan tan cuahán ra Jesús tsitsi iin vehe tsihin ra tsicá tsihin ra.

### Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo

(Mt. 12.22-32; Lc. 11.14-23; 12.10)

<sup>20</sup> Tan nducuahā nyivi nu yucú ra naha inga tsaha, tan nda cuando ña cuyatyí ca ra naha catsi ra naha.

<sup>21</sup> Tsa tsitō nyivi ra Jesús tyin nyii ra ican, tsahan ñi tsiquihñi ñi tsi ra tyin cunuhu ra tsihin ñi, tyin catyí nyivi tsihin ñi tyin ndusaná iñi ra.

<sup>22</sup> Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaā ra naha nu nyii ra Jesús tan catyí ra naha:

—Ra ihya tavá ra tatyí ña vaha tsi nyivi tsihin tunyee iñi nu Beelzebú, tsa cuví ityi nuu tsihin tandihí tatyí ña vaha —catyí ra naha.

<sup>23</sup> Tsa tuví iñi ra Jesús tyin tacan caahán ra naha, canā ra tsi ra naha tan tsahā ra iin cuhva tsi ra naha, tan catyí ra tsihin ra naha:

—¿A cuví tavá nu ña vaha juvín ñi maa tahan nu? Ña cuví. <sup>24</sup> Tyin tun ra ndacá ñaha naha ra tan cua natahvi sava ra naha, tan cua quitsaha cañi tahan ra naha, cua cundiñi tsa ndacá ñaha ra naha. <sup>25</sup> Tacan tucu ñi tun nyivi iyó iin caa ñi iin vehe tan cañi tahan ñi, cua cusñi ñi tan ña cua cuvi coo vaha ñi. <sup>26</sup> Tan tun nu ña vaha tan ndusñi nu tan nduvita iin nu siqui inga nu, ¿náa cua tahan nahnu? Cua ndusñi nahnu tan cua cundiñi nahnu.

<sup>27</sup> Yoñi cuví quihví tsitsi vehe iin ra xaan tan suhu ra tsa iyó tsi ra, tun ña cuhñi jihna ra tsi ra. Maa ñi cuñi tsi cuhñi jihna ra tsi ra jatsii vehe can tan cuvi quihví ra suhu ra tsa tsii ra.

<sup>28</sup> Tsa nditsa catyí yu tsihin ndo tyin cuví coo tucahnu iñi tsi nyivi tsa cuenda tandihí nuu cuatyí javahá ñi, tan tsa cuenda tucu tsa caahán ñi tsa ña vaha. <sup>29</sup> Maa tyin tun cahan ñi ndavaha ñi siqui Tatyí Ii Nyoo, ña cua jaha maa Nyoo tucahnu iñi tsi ñi; cua coo cuatyí ñi yoso cuahan quivi —catyí ra Jesús.

<sup>30</sup> Tacan cahan ra Jesús tsihin ra maestro cuenda ley vehe ñuhu naha ra, tyin catyí ra naha tyin tatyí ña vaha yihí tsi ra.

### Nu catyí ra Jesús tyin nyivi tyaá yahvi tuhun Nyoo, juvin ñi cuví yañi ra, tan sihi ra

(Mt. 12.46-50; Lc. 8.19-21)

<sup>31</sup> Tacan tan tsaā sihi ra Jesús tan yañi ra nu nyii ra, maa tyin ndoo ñi ityi tsata vehe, tan catyí ñi tsihin ra nyecú ican naha ra tyin cana ra naha tsi ra Jesús. <sup>32</sup> Tan catyí nyivi nyecú nanñi canduvi xiin ra Jesús tsihin ra:

—Sihi un, yañi un tan cuhva un nanducú ñi tsi un nyecú ñi tsata vehe can —catyí ñi tsihin ra.

<sup>33</sup> Maa tyin catyí ra:

—¿Yóo cuví sihi yu tan yañi yu?

<sup>34</sup> Tacan tan nanyehe ra nanñi canduvi nu nyaá ra, tan catyí ra:

—Nyivi nyecú ihya cuví sihi yu, yañi yu tan cuhva yu.  
<sup>35</sup> Tyin tandihí nyivi javahá cuhva cuñí Nyoo, juven ñi cuví yañi yu, cuhva yu tan sihi yu —catyí ra Jesús.

**Nu caahán ra Jesús tyin ra caahán tuhun Nyoo cuví ra tumaa iin ra tatsí**  
 (Mt. 13.1-9; Lc. 8.4-8)

**4** Quitsaha jacuahá ra Jesús inga tsaha yuhu miñi. Tan cuaha xaan nyivi ndu ijin nu nyií ra. Tan tsa cuenda tsa cuaha xaan ñi cuví, quihví ra tsitsi yutun ndoo tsa canyíi nu ndutya yuhu miñi can, tan tsinyaq ra tsitsi can. Tan ndoo tandihí maa nyivi nu nyiti.  
<sup>2</sup> Tacan tan cuaha xaan tsa jacuahá ra tsi ñi tsihin cuhva. Tan tsitsi tsa jacuahá ra tsi ñi, catyí ra tsihin ñi:  
<sup>3</sup> —Tyaa soho ndo tsa cua cahan yu. Iin ra quitá ra yuvehe ra. Tan cuahán ra cua tatsi ra trigu nu ñuhu ra.  
<sup>4</sup> Tan cuhva tsa quitá ra tsiti trigu can, cucoyo juhva tsi yuhu ityi. Maa tyin quitsá saa tan tsatsí ti naha ti itsi.  
<sup>5</sup> Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi caná tsiti can tyin ña cuaha nyahyu yihí tyañu yuu can. <sup>6</sup> Maa tyin tsa caná ñicanyii, iin yaha ñi na ityi tsi tyin ña cunu cuahán yoho tsi.  
<sup>7</sup> Tan juhva ca tsiti can cucoyo tsi tyañu iñu. Quivi caná tsiti can, tsahnú tsi iin caa ñi tsihin iñu can. Maa tyin iñu can numi ca tsahnú can tan tsahñi can trigu can. Yacan cuenda ña tsahá trigu can tsiti. <sup>8</sup> Maa tyin juhva ca tsiti can cucoyo tsi nu ñuhu vaha. Caná tsi tan tsahnú tsi, tan cuaha tsiti tsahá tsi. Tyin tsa intuhun tsiti can, tsahá tsi oco utsi tsiti tsitsi yoco tsi. Tan inga tsiti can tsahá tsi uñi xico, tan inga tsi tsahá tsi iin cientu —catyí ra Jesús tsihin ñi.

<sup>9</sup> Tan catyí nyico ra tsihin ñi:

—Nyooho tsa iyó soho, tyaa soho ndo tsa caahán yu.

**Nu tsahá cuenda ra Jesús nacuenda jacuahá ra tsi nyivi tsihin cuhva**  
 (Mt. 13.10-17; Lc. 8.9-10)

<sup>10</sup> Tsa yahá yacan tan ndoo maa ña ra Jesús tsihin ra tsicá tsihin ra tan nyivi nyicún tsi ra. Tan tsicá tuhun ñi:  
 —¿Náa cuñí tsi catyí tsa cahán un nañi?

<sup>11</sup> Tan catyí ra tsihin ñi:

—Maa Nyoo catyí tyin jacotó yu tsi ndo tuhun xeehe nácaa ndacá ñaha ra. Maa tyin inga ca nyivi jacotó yu can tsi ñi tsihin cuhva ñi tyin ña cuñí ñi cunyicun vaha ñi tsi yu. <sup>12</sup> Tyin vasu ndi maa nyehé ñi tsa javahá yu, cua cuví tsi tumaa tsa ña nditsin nyehé ñi; vasu ndi maa tsiñí ñi, ña cua cutuñí iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tuahnu iñi tsi ñi tsa cuenda cuatyí ñi —catyí ra Jesús tsihin ñi.

**Nu tsahá cuenda ra Jesús tsa cuñí tsi catyí tuhun ra tatsí**  
 (Mt. 13.18-23; Lc. 8.11-15)

<sup>13</sup> Tan catyí ndihí ra tsihin ñi:

—Tun ña cutuñí iñi ndo tuhun cahán yu nañi, ndi ña cua cutuñí iñi ndo tandihí ca tsa cua jacuahá yu tsi ndo tsihin cuhva ñi. <sup>14</sup> Ra tatsí trigu can cuví ra caahán

tuhun Nyoo. <sup>15</sup> Yihí nyivi cuví ñi tumaa nu cucoyo tsiti trigu yuhu ityi tyin tsiñí ñi tuhun Nyoo, maa tyin yahá can, tan iin yaha ñi naá nyico iñi ñi tsa caahán Nyoo tsihin ñi tyin quihín nyaa nu ña vaha tuhun Nyoo tsa tatsí ra añima ñi. <sup>16</sup> Tan juhva nyivi cuví ñi tumaa nu cucoyo tsiti trigu tsata yuu tyin sii xaan cuñí ñi tsiñí ñi tuhun Nyoo juhva ñi quivi. <sup>17</sup> Maa tyin ña ndoo tsi añima ñi tan ña cuví cuahnu ñi tan juhva ñi quivi tsinú iñi ñi, yacan cuenda cuví ñi tumaa nu cucoyo tsiti tsata yuu tyin tsata yuu can luxu cuii ñi nyahyu yihí. Yacan cuenda ña tsahnú tsi tyin ña ñihí tsi nu cuhun yoho tsi. Tacan cuví nyivi can, tyin quivi vatsí tundoho siqui ñi, tan caahán nyivi tsi ñi tsa cuenda tuhun Nyoo, ndu uví iñi ñi tan jandihí ñi tsa tsinú iñi ñi tsi Nyoo. <sup>18</sup> Tan juhva nyivi cuví ñi tumaa nu cucoyo tsiti tyañu iñu tyin tsiñí ñi tuhun Nyoo, <sup>19</sup> maa tyin tsicá xaan iñi ñi tundoho ñayivi ihya tan ña tsicá iñi ñi tuhun Nyoo. Nyiyo iñi ñi tsa cuca, tan cuñí ñi coo tandihí tsa iyó nu ñuhu ñayivi ihya tsi ñi. Tan tandihí yacan jatyañú can tsi ñi, tan cuví ñi tumaa cuví yutun tsa ña tsahá tsiti. <sup>20</sup> Maa tyin nyivi tsa tsiñí tuhun Nyoo tan naquihín vaha ñi itsi, tan javahá ñi tandihí tsa caahán tsi, juven ñi cuví tumaa ñuhu vaha nu cucoyo tsiti can tyin tsiti tsa cucoyo can caná vaha tsi, tsahnú tsi, tan yihí tsi tsahá tsi oco utsi tsiti. Inga tsi tsahá tsi uñi xico tsiti, tan inga tsi tsahá tsi cientu tsiti.

**Nu cahán ra Jesús tyin ña taahán tsi tyihi xeehe yo ñuhu Nyoo tsa jandunditsín añima yo coto quihin nyaa ra itsi**  
 (Lc. 8.16-18)

<sup>21</sup> Tan catyí tucu ra tyehen tsihin ñi:

—¿A tsicán yo ñuhu tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyíi yo can iin nu sucun tyin tacan tan janditsin can nanií tsitsi vehe. <sup>22</sup> Tyin nduve tsa yihí xeehe tan ña cua quituvi, tan ndi tsa xeehe tan ña cua coto nyivi. Tyin tandihí maa tan cua quita nu nditsin tan coto yo can. <sup>23</sup> Nyooho tsa iyó soho, tyaa soho ndo tsa caahán yu —catyí ra Jesús tsihin ñi.

<sup>24</sup> Tan catyí tucu ra:

—Tyaa soho vaha ndo tsa caahán yu tyin tun tyaá yahvi ndo tuhun tsiñí ndo, cuaha ca tsa cua cuhva Nyoo tsi ndo. <sup>25</sup> Tyin nyivi tyaá soho tsa caahán yu, cuaha ca cua cuhva Nyoo tsi ñi. Maa tyin nyivi tsa ña tyaá soho, cua quihin nyaa ra nda cuanda tsa luxu tsa iyó tsi ñi tsa tsa yahá ñihí ñi.

**Nu tsahá ra Jesús iin cuhva nácaa tsahnú iin tsiti**

<sup>26</sup> Tan catyí tucu ra Jesús:

—Tsa ndacá ñaha Nyoo tsi nyivi cuví tsi tumaa tsiti tsa tatsí nyivi. <sup>27</sup> Tyin nyivi tatsí ñi maa ñi tsiti can tan cuanuhú ñi yuvehe ñi. Tan tatun tsa yaha cuaha quivi tsa tatsí ñi, tacan tan cuahán ñi cuanyehé ñi inga tsaha. Tsa tsaá ñi tsa caná tsi, tsa tsahnú tsi. Maa tyin ña tsitó ñi nácaa caná tsi tan tsahnú tsi, <sup>28</sup> tyin juven ñi maa ñuhu jacuahnu itsi. Tsa jihna ñi caná nuu tsi, yaha can tan quitá yoco tsi. Tsa yaha quita yoco tsi, tacan

tan tsahá tsi tsiti. <sup>29</sup> Tan tatun tsa tsitsa tsiti tsi, tacan tan jocón ñi itsi tyin tsa tahañ maa tsi quivi coyo tsi —catyí ra Jesús.

**Nu caahán ra Jesús tyin tumaa cuví tsiti mostaza, tacan cuví tsa ndacá ñaha Nyoo tsi yo**  
(Mt. 13.31-32; Lc. 13.18-19)

<sup>30</sup> Tan catyí tucu ra Jesús:

—¿Nacaa cuví tsa ndacá ñaha Nyoo tsi nyivi? ¿A cuví jandu inducu yo itsi tsihin náa tsihin? Cuví. <sup>31</sup> Tyin cuví tsi tumaa iin tsiti mostaza tsa tatsí nyivi. Tsiti can cuví tsa nyihi ca tan ñavin ca tandihí ca tsiti tsa iyó nu ñuhu ñayivi. <sup>32</sup> Maa tyin tsa yaha tatsi tsi, caná tsi tan ndunahnú tsi, tan cuví tsi yutun tumaa nducuaya. Ndunahnú soco tun, tan cuahán saa cua quitatu ti naha ti nuu tun.

**Nu tsahá cuenda ra Jesús nacuenda jacuahá ra tsi nyivi tsihin cuhva ñi**  
(Mt. 13.34-35)

<sup>33</sup> Tacan jacuahá ra Jesús tsi nyivi, tsihin cuaha cuhva, ndihí cuhva cuví cutuñí iñi ñi. <sup>34</sup> Tan tandihí tsaha tsa cahán ra tsihin ñi maa ñi maa tsihin cuhva cahán ra. Maa tyin cahán catsi ra tsihin ra tsicá tsihin ra.

**Nu jacutaxín ra Jesús tatyí xaan nu miñi**  
(Mt. 8.23-27; Lc. 8.22-25)

<sup>35</sup> Tsa tseñi juvin ñi maa quivi can, catyí ra Jesús tsihin ra tsicá tsihin ra:

—Cohon ndo inga tsiyo miñi.

<sup>36</sup> Tacan tan ra Jesús tan ra tsicá tsihin ra nacoq ra naha tsi nyivi tan quihvi ra naha tsitsi yutun ndoo nu nyaá maa ra Jesús, tan cuahán ra naha. Tan cuanyicún tucu inga ca yutun ndoo nu yihí juhva nyivi tsi ra naha. <sup>37</sup> Tan quitsahá yihí tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsahá cuñi cutu yutun ndoo can. <sup>38</sup> Tan ra Jesús canyí ra quixí ra tsa yatyin xuu yutun ndoo can, tan nyanaá iin jahma jiñi ra. Jandotq ra naha tsi ra, tan catyí ra naha tsihin ra:

—¡Maestro! ¿a ña jahá un cuenda tyin cuñi nyee yo?

<sup>39</sup> Tacan tan nduvitá ra Jesús tan jacutaxín ra tatyí xaan can. Tan catyí ra tsihin ndutya:

—¡Taxin ñi!

Tan cutaxín tatyí can tan ndutya can. Tacan tan taxin cuii ñi cuví. <sup>40</sup> Tacan tan catyí ra Jesús tsihin ra tsicá tsihin ra:

—¿Nacuenda yuuhví xaan ndo? ¿A ña tsinu iñi ndo? —catyí ra tsihin ra naha.

<sup>41</sup> Maa tyin iyo xaan cuñi ra naha tsa nyehe ra naha tsa cuví. Tan tsicá tuhun tahan ra naha tan catyí ra naha:

—¿Yóo ra cuví ra ihya? Tyin nda cuenda tatyí tan ndutya tyaá yahvi tsi naha tsi tsi ra —catyí ra naha.

**Nu caahán ra Jesús tyin ra caahán tuhun Nyoo cuví ra tumaa iin ra tatsí Nu nduvahá iin ra Gadara tsa yihí tatyí ña vaha**  
(Mt. 8.28-34; Lc. 8.26-39)

**5** Tsaq ra naha inga tsiyo miñi nda nu ñuhu cuenda Gadara. <sup>2</sup> Tsa quitá ra Jesús tsitsi yutun ndoo, tan quitá iin ra yihí tatyí ña vaha nu ndaa cumi santu, tan tsaq ra nu nyaá ra. <sup>3</sup> Tan nu ndaa can iyó maa ra can. Tsaahñí ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñí ra. <sup>4</sup> Cuaha xaan tsaha tsahñí nyivi tsaha ra tan ndaha ra tsihin cadena, maa tyin tsaahnyá cuatyí ra can. Tan yoñi maa cuví cunye tsi ra. <sup>5</sup> Tan tsicá nuu maa ra caná tsa ra jiñi yucu tan nu ndaa cumi santu tsa tsa cuaa tan tsa tsinu cahñi. Tan jañicueehé ra tsi ra tsihin yuu. <sup>6</sup> Maa tyin ndi cañi ca quitá ra Jesús, tan nyehe ra can tsi ra, tan tsinú xaan ra tsahán ra, tsicuiñí tsiti ra nuu ra. <sup>7</sup> Tan caná tsa ra tan catyí ra:

—¿Nacuenda tyihí un tsi un tsihin yuhu, yooho Jesús, Sehe Nyoo, nyaá gloria? Tsihin sivi Nyoo caahán ndaahvi yu tsihin un, ña janyehe un tundoho tsi yu.

<sup>8</sup> Tacan catyí nu tatyí ña vaha can tsihin ra Jesús tyin tsa yahá cahán ra tsihin nu tyehen:

—¡Yooho tatyí ña vaha, jaña tsi ra ihya! —catyí ra.

<sup>9</sup> Tan ra Jesús tsicá tuhun ra tsi nu, tan catyí ra:

—¿Náa nañi un?

Tan catyí nu tatyí ña vaha can tsihin ra:

—Yuhu nañi yu Legión, tyin cuaha xaan ndi.

<sup>10</sup> Tan caahán ndaahvi nu tsihin ra Jesús na ña jacuhun cañi ra tsi nahnu. <sup>11</sup> Yatyin ñi yucu can yucú cuaha quini tsatsí ti naha ti. <sup>12</sup> Tacan tan catyí tandihí nahnu tsihin ra Jesús:

—Jacuhun tsi ndi tsitsi quini nyecú ican, tan cuhva ndatu tsa quihvi ndi tsitsi ti naha ti —catyí nahnu.

<sup>13</sup> Tacan tan tsahá ra Jesús ndatu tsi nahnu, tan quihvi nahnu tsitsi quini can. Quitá nahnu tsi ra can tan quitá tumaa uvi mil quini yucú can. Tsa quihvi nahnu tsitsi ti naha ti, quitsahá tsinú ti naha ti, tan yahá ti naha ti yuhu xahva tan cucoyo ti naha ti tsitsi miñi, tan tsihi ti naha ti tsitsi ndutya.

<sup>14</sup> Tacan tan ra jahá cuenda quini can naha ra, nayuhvi xaan ra naha tan tsinú xaan ra naha cuahán ra naha cuanuhú ra naha cuacatyí tuhun ra naha tsa cuví can tsihin nyivi ñuu can tan inga ca nyivi tsa taahán ra naha ityi cuhu. Tan tandihí nyivi tsa cahán ra naha tsihin, tsahán ñi tsinyehe ñi tsa cuví can. <sup>15</sup> Cuhva tsa tsaq ñi nu nyíi ra Jesús, nayuhvi xaan ñi tsa nyehe ñi tsi ra tsa yihí tatyí ña vaha can. Nyaá taxin ra, nditsí ra jahma, tan vaha cuñi ra. <sup>16</sup> Tan tandihí maa nyivi tsa nyehe tsa tahañ ra can tan tsa tahañ quini can, catyí tuhun ñi can tsihin inga ca nyivi. <sup>17</sup> Tacan tan quitsahá caahán ndaahvi ñi tsihin ra Jesús, na ña ndoo ra nu ñuhu ñi.

<sup>18</sup> Tsa tsa cua quihvi nyico ra Jesús tsitsi yutun ndoo can, ra tsa yihí tatyí ña vaha can caahán ndaahvi ra tsihin ra Jesús na cuhva ra cuhun ra tsihin ra. <sup>19</sup> Maa tyin

ña tsahā ra Jesús cuhun ra tsihin ra, tan catyí ra tsihin ra:

—Cuanuhu yuvehe un nu iyó nyivi un, tan catyi tuhun tsihin ñi tandihí tsa javahā Jutu Mañi yo Nyoo tsihin un, tan nácaa cundaahví iñi ra tsi un.

<sup>20</sup> Tacan tan cuanuhú ra tan quitsahā catyí tuhun ra tsihin nyivi iyó tandihí ñuu tsa cayucú Decápolis tandihí tsa javahā ra Jesús tsihin ra. Tan iyo xaan cuñí ñi.

### Nu nduvahā sehe ra Jairo tan ñaha tsa tñin jahma ra Jesús

(Mt. 9.18-26; Lc. 8.40-56)

<sup>21</sup> Tsa tsaā ra Jesús tsihin yutun ndoo nda inga tsiyo miñi can, tsaā cuaha nyivi nu tsaā ra. Tan ndoo ra yuhu miñi ican. <sup>22</sup> Tacan tan tsaā iin ra nyisó tyiñu vehe ñuhu, nañí ra Jairo. Cuhva tsa nyehe ra tsi ra Jesús, tsicuiñí tsiti ra nuu ra. <sup>23</sup> Tan caahán ndaahvi ra tsihin ra tan catyí ra:

—Cohon tsihin yu yuvehe yu tan tyiso ndaha un jiñi ñaha sehe yu, na nduvaha ña tyin tsa cuñí cúu cuii ña ña.

<sup>24</sup> Tacan tan cuahán ra Jesús tsihin ra, tan cuaha xaan nyivi cuahán cuanyicún tsi ra, nda cuando catyihí tahan ña maa ñi. <sup>25</sup> Tsihin nyivi can cuahán ndihí iin ñaha cuuhví. Ñaha ihya tsa quitá maa utsi uvi cuiya ndohó ña cuehe tsa cuún niñi ña. <sup>26</sup> Tan cuaha xaan tundo ho nyehe ña tsihin tsa cuaha doctor. Tandihí xuhun ña janaā ña tsihin ra naha, maa tyin nduve maa náa catyí janaā ña xuhun ña tyin vihi ca nduñihí cuuhví ña. <sup>27</sup> Tsa tsiñi ña caahán nyivi tyin tsaā ra Jesús, natuhvā ña ityi tsata ra tan tñin ña jahma ra. <sup>28</sup> Tyin tsicá iñi maa ña: “Tatun tñin yu vasu tan jahma ra, cua nduvaha yu”.

<sup>29</sup> Tsa tñin ña jahma ra iin yaha ñi cutaxin tsa cuún niñi ña. Tan tuví iñi cuñu ñuhu ña tyin tsa janduvahā ra tsi ña. <sup>30</sup> Tsa tuví iñi ra Jesús tyin nduvahā iin nyivi tsihin tunyee iñi tsa iyó tsi ra. Tacan tan nanyico coo ra ityi tsata ra tan tsicá tuhun ra tan catyí ra:

—¿Yóo tñin jahma yu?

<sup>31</sup> Tacan tan catyí ra tsicá tsihin ra:

—¿Nacuenda tsicá tuhun ca un: yóo tñin jahma un? tan nyehé vaha un tyin cuaha xaan nyivi nyicún tsi un tan tyañu xaan jahá ñi —catyí ra naha tsihin ra.

<sup>32</sup> Maa tyin ra Jesús nanyehé ra nanñi ñi tyin cuñí ra coto ra yóo tñin jahma ra. <sup>33</sup> Tacan tan ñaha can tsahā ña tsicuiñí tsiti ña nuu ra Jesús tyin tsitó vaha ña tyin tsa nduvahā ña. Yuuhví ña tan niñé ña tsahā ña tsi-catyí tuhun ña tandihí tsa nditsa tsihin ra. <sup>34</sup> Tan catyí ra Jesús tsihin ña:

—Nduvahā un tyin tsinú iñi un. Na cuhun vaha un, tan na ña cuhvi ca un —catyí ra Jesús tsihin ña.

<sup>35</sup> Ndi caahán ca ra Jesús tan tsaā nyivi quee yuvehe nu cuahán ra, tan catyí ñi tsihin ra jatsii vehe can, ra nyisó tyiñu vehe ñuhu:

—Tsa tsihi ñaha luhlu sehe un. Ña çahan yuhu ca un tan ña jatyañu ca un tsi ra Maestro ihya —catyí ñi tsihin ra.

<sup>36</sup> Maa tyin ra Jesús ña tyaā yahvi ra tsa caahán ñi, tan catyí ra tsihin ra nyisó tyiñu vehe ñuhu:

—Ña nayuhvi un; tsinu iñi yooho —catyí ra tsihin ra.

<sup>37</sup> Tan ña tsahā ra cuhun cuaha nyivi tsihin ra. Tan quihñ ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra. <sup>38</sup> Tsa tsaā ra naha yuvehe ra nyisó tyiñu vehe ñuhu, nyehe ra Jesús tyin tsacú xaan nyivi tan caná tsaā ñi. <sup>39</sup> Quihví ra tsitsi vehe tan tsicá tuhun ra tsi ñi:

—¿Nacuvi tyin iyo xaan jacuvaá ndo, tan tsacú xaan ndo? Ñaha luhlu ihya quixí ña; ñavin tsihi ña —catyí ra tsihin ñi.

<sup>40</sup> Maa tyin ña tsinu iñi ñi tan tsacu naaha ñi nyehé ñi tsi ra. Tacan tan tavā ra tsi tandihí ñi nuquehe, tan quihñ ra tsi jutu ñaha luhlu tsa tsihi can tan sihi ña tan ra tsa tsaā tsihin ra, tan quihví tandihí ñi nu canyí ña.

<sup>41</sup> Tan tñin ra ndaha ña, tan catyí ra tsihin ña:

—Talita cumi —tan cuñí tsi catyí tsi tyehen: Catyí yu tsihin yooho ñaha luhlu, ;nduvita!

<sup>42</sup> Juvín ñi cuhva can tan nduvitā ña, tan nacacā ña. Utsi uvi cuiya ña. Tan tsa nyehe nyivi tsa iyo tsa javahā ra Jesús, iyo xaan cuñí ñi cuví. <sup>43</sup> Maa tyin ra Jesús ñihi tsahā cuenda ra tsi ñi tyin na ña cahan ñi tsa nyehe ñi tsihin ndi intuhun maa nyivi. Tan tavā tyiñu ra tsi sihi ña na cuhva ña tsa catsi ña.

### Nu tsinuhū ra Jesús ñuu Nazaret nu tsahnū ra

(Mt. 13.53-58; Lc. 4.16-30)

**6** Tacan tan quitā ra Jesús ican, tan cuanuhū ra nda ñuu ra. Tan ra tsicá tsihin ra cuahán ndihí ra naha tsihin ra. <sup>2</sup> Tan tsa tahn tsi quivi quitatú nyivi, tacan tan cuahán ra naha vehe ñuhu tan quitsahā jacuahá ra Jesús tsi nyivi. Tan cuaha ñi yucú tyaá soho ñi tsa caahán ra. Iyo cuñí ñi tsa tsiñí ñi tsa caahán ra, tan catyí ñi:

—¿Numaa tahan cutuhvā ra ihya tandihí tsa tsitó ra? ¿Yóo tsahā tsa tsiñi tuñi iñi ra? ¿Tan nácaa cutuhvā ra javahá ra tsa iyo? <sup>3</sup> Tan ra tahví yutun cuví ra. Tan sehe ña María cuví ra. Tan yañi ra cuví ra Jacobo, ra José, ra Judas, tan ra Simón, tan ñiñaha cuhva ra iyó ñi nu iyó yo ihya —catyí ñi.

Tan ña cuñí ñi tyaā yahvi ñi tsi ra. <sup>4</sup> Maa tyin catyí ra tsihin ñi:

—Tandihí ñi ityi tan jahá tandihí nyivi tsa ñayivi tsi ra cuví ndusu yuhu Nyoo, maa tyin nyivi ñuu ra, tan nyivi ra, tan nyivi vehe ra ña tyaá yahvi ñi tsi ra —catyí ra Jesús.

<sup>5</sup> Tan tyiso ndaha ra jiñi juhva nyivi cuuhví, tan janduvahā ra tsi ñi, maa tyin ña cuví javahā ra inga ca tsa iyo. <sup>6</sup> Tan iyo cuñí ra tyin ña tsinú iñi ñi tsi ra. Tacan tan cuahán ra cuajacuahá ra tsi nyivi iyó tandihí ñi ñuu nyihi tsa cayucú yatyin ñi ñuu can.

### Nu jacuhun ra Jesús tsi ra tsicá tsihin ra cucahan ra naha tuhun Nyoo

(Mt. 10.5-15; Lc. 9.1-6)

<sup>7</sup> Tsa yahā yacan tan canā ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha



tuhun Nyoo. Tacan tan quitsahā jacuhún ra uvi uvi ra naha. Tan tsahā ra ndatu tsi ra naha tsa tava ra naha tatyí ña vaha tsi nyívi. <sup>8</sup> Tan catyí ra tsihin ra naha tyin ña cundaha ra naha tsa cundaha ra naha; ndi marali, ndi tsa catsi ra naha, tan ndi xuhun. Nduve náa cundaha ra naha; maa tyin cuví cundaha ra naha yutun ñi.

<sup>9</sup> Tan cunyaa nditsan tsaha ra naha. Tan ña cundaha ra naha inga nditsi jahma, na cahun ra naha tsihin cuhva nditsi ñi maa ra naha. <sup>10</sup> Tan catyí ra tsihin ra naha:

—Cuhva tsa tsaa ndo iin ñuu, quihví ndo iin vehe, tan ndo ndo ican nda cuanda quita ndo ñuu can.

<sup>11</sup> Tan tatun tsaa ndo iin ñuu tan ña naquihin cuenda nyívi iyó ñuu can tsi ndo, tan ña cuñí ñi tyaa soho ñi tsa cua cahan ndo, quita ndo ican tan naquisí ndo nya-ca tsaha ndo tan yacan janaha tyin ndoo cuatyí ñi siqui ñi. Tsa nditsa catyí yu tsihin ndo, tyin quívi cua tatsi tuñi Nyoo tsi nyívi, ñihi ca cua tatsi tuñi ra tsi ñi can tan ñavin ca nyívi ñuu Sodoma tan ñuu Gomorra —catyí ra Jesús tsihin ra naha.

<sup>12</sup> Tacan tan cuahán ra naha cuacahán ra naha tuhun Nyoo tsihin nyívi. Tan catyí ra naha tyin na ndu uvi iñi ñi cuatyí ñi, tan na nanducu ñi tsi Nyoo. <sup>13</sup> Tan cuaha ñi nyívi tava ra naha tatyí ña vaha. Tan tyihí ra naha acetye tsi nyívi cuuhví tan nduvahā ñi.

### Nu tsahá cuenda tsi nácaa tsihí ra Juan, ra jacoondutyá tsi nyívi

(Mt. 14.1-12; Lc. 9.7-9)

<sup>14</sup> Ra rey Herodes tsitó ra tsa javahá ra Jesús tyin tandihí nyívi tan caahán ñi tsa javahá ra, tan tsicá iñi ra tyehen:

—Ra ihya cuví ra Juan, ra jacoondutyá tsi nyívi, ra tsa tsihí. Vityin nandotó ra. Juvín ra cuví can, yacan cuenda iyó tunyee iñi tsi ra —cuñí ra Herodes, tsicá iñi ra.

<sup>15</sup> Yihí nyívi catyí ñi:

—Ra Elías, ra cuví ndusu yuhu Nyoo tahān tsanaha, cuví ra.

Tan catyí tucu inga ñi:

—Ndusu yuhu Nyoo cuví ra, tumaa ra tsicoo tahān tsanaha naha ra —catyí ñi.

<sup>16</sup> Tsa tsiñí ra Herodes tandihí tsa caahán nyívi, tan catyí ra:

—Ra ihya cuví ra Juan tsa tava tyiñu yu tyahnya jucun. Vityin nandotó ra —catyí ra Herodes.

<sup>17</sup> Tacan catyí ra tyin juvín ñi maa ra tava tyiñu na tyihi ra naha tsi ra Juan vehe caa tan cuhñi ra naha tsi ra tsihin carena. Tacan javahā ra Herodes tsihin ra Juan tsacatyí ña Herodías tsa cuví ñasihi ra Felipe yañi ra. Ra Herodes quihín ra tsi ña Herodías tyin cuví ña ñasihi ra <sup>18</sup> Tan tsa tacan javahā ra, catyí ra Juan tsihin ra tyin ña vaha tsa quihín ra tsi ña Herodías tyin ñasihi yañi ra cuví ña.

<sup>19</sup> Yacan cuenda ndasi cuñí ña Herodías nyehé ña tsi ra Juan. Cuñí ña cahñi ña tsi ra, maa tyin ña cuví, <sup>20</sup> tyin ña tsahá ra Herodes tyin tsitó ra tyin ra vaha cuví ra Juan tan cuiti iyó ra nuu Nyoo, tan yuuhví ra Herodes tsi ra. Yacan cuenda jahá cuenda vaha ra tsi ra. Vasu ndi maa ña cutuñí iñi ra Herodes tandihí tsa caahán ra

Juan, maa tyin vaha cuñí ra tyaa soho ra tsa caahán ra.

<sup>21</sup> Maa tyin tsa tahān tsi quívi cacú ra Herodes javahā ra iin vico. Tan canā ra tsi ra cumí tyiñu naha ra, tan ra yihí ndaha andaru naha ra, tan nyívi cuca tsa iyó ityi Galilea. Quívi ihya tsicān ña Herodías tsa cuñí ña tsi ra Herodes. <sup>22</sup> Tyin ñaha sehe ña tsahān ña tsicuañí ña yaa nu iyó vico ra Herodes. Tan tahān xaan iñi ra Herodes tan ra nyecú cuxiñí tsihin ra cuhva tsañí ña.

Tacan tan catyí ra Herodes tsihin ña:

—Ndācan tsi yu náa cuñí maa un. Náa tahan ñi maa tsi cua ndacan un tsi yu cua cuhva maa yu can tsi un.

<sup>23</sup> Tsitó maa Nyoo tyin cua cuhva yu tsa cua ndacan un. Tun ndacan un sava ñuhu tsa ndacá ñaha yu, cua cuhva yu can tsi un —catyí ra tsihin ña.

<sup>24</sup> Tacan tan quitā ña, cuahán ña cuandacá tuhun ña tsi sihi ña tan catyí ña:

—¿Náa ndacan yu tsi ra?

Tan catyí sihi ña:

—Ndācan jiñi ra Juan, ra jacoondutyá tsi nyívi tsi ra —catyí ña.

<sup>25</sup> Tacan tan numi ñi quihví nyico ñaha tyuvaa can nu nyíi ra rey Herodes, tan catyí ña tsihin ra:

—Cuñí yu jiñi ra Juan, ra jacoondutyá tsi nyívi. Cahnya jucun ra tan tinyii un jiñi ra nuu iin coho, cuhva un tsi yu vityin vityin ñi —catyí ña tsihin ra.

<sup>26</sup> Tacan tan cuihya xaan cuñí ra rey can cuví. Maa tyin tsa cuenda tsa cahān ra tyin cua cuhva maa ra tsa cua ndacan ña, ña cuñí ra jandaví ñaha ra tsi ña tyin tandihí maa nyívi yucú vico can tan tsiñí ñi tsa cahān ra, yacan cuenda tsahā ra tsa tsicān ña. <sup>27</sup> Numi ñi tava tyiñu ra rey can tsi iin andaru na cuquihin ra jiñi ra Juan. <sup>28</sup> Tsahān andaru can tsitsi vehe caa, tan tsahnya ra jucun ra Juan. Tan tsindacā ra jiñi ra Juan tsi ñaha tyuvaa can, nyíi tsi nu iin coho. Tan nacuhvā cuenda ña can tsi sihi ña.

<sup>29</sup> Tsa tsitó ra nyicún tsi ra Juan tsa cuví, tsahān ra naha tsiquihín ra naha cuñu ñuhu ra, tan tsicutsí ra naha can.

### Nu jacatsí ra Jesús uhun mil rayí

(Mt. 14.13-21; Lc. 9.10-17; Jn. 6.1-14)

<sup>30</sup> Tsa yahā yacan tan ndu iin ra tsicá tyiñu ra Jesús tsihin ra, tan catyí tuhun ra naha tsihin ra tandihí tsa javahā ra naha, tan tsa jacuahā ra naha nu tsahān ra naha tsicahān ra naha tuhun Nyoo tsihin nyívi. <sup>31</sup> Tan catyí ra Jesús tsihin ra naha:

—Cohon ndo iin nu taxin caa, quitatu yo luxu.

Tacan catyí ra tsihin ra naha tyin cuaha xaan nyívi cuahán tan vatsí, tan ndi ña cuyatyí ra naha catsi ra naha jahá ñi. <sup>32</sup> Tacan tan quihví ra Jesús tsihin ra naha tsitsi iin yutun ndoo tan cuahán ra naha iin nu taxin caa. <sup>33</sup> Maa tyin cuaha xaan nyívi nyehé ñi cuahán ra naha. Tan nacotó ñi tsi ra Jesús. Tacan tan cuahán ñi tsihin tsaha ñi, quitā ñi tandihí ñi ñuu tan jihna ca ñi tsaā nu cua tsaa ra Jesús. <sup>34</sup> Cuhva tsa tsaā ra naha, quitā ra Jesús tsitsi yutun ndoo tan nyehé ra tyin cuaha xaan nyívi yucú ican. Tan cundaahví iñi ra nyehé ra tsi ñi, tyin yucú ñi tumaa tsiyucú mbee tun nduve ra

jahá cuenda tsi ti naha ti. Tacan tan quitsahá jacuahá ra cuaha xaan tuhun vaha tsi ñi. <sup>35</sup> Tsa tsa cua cuiso ñi-canyii, tan natuhvā ra tsicá tsihin ra Jesús xiin ra tan catyí ra naha tsihin ra:

—Tsa cueñi xaan, tan nduve nyivi iyó yatyin ñi ihya. <sup>36</sup> Vaha ca jacunuhu un tsi nyivi tyin ihya nduve tsa catsi ñi. Tan na kujata ñi paan catsi ñi vehe tsa iyó tsitsi cuhu ihya tan ñuu tsa cayucú yatyin ñi —catyí ra naha tsihin ra.

<sup>37</sup> Maa tyin nacahan ra Jesús, tan catyí ra:

—Cuhva nyooho tsa catsi ñi.

Tacan tan nacahan ra naha tan catyí ra naha:

—Vasu ndi maa jaha tyiñu ndi iñu yoo, ña cua ñihi ndi xuhun jata ndi paan catsi tandihí nyivi ihya.

<sup>38</sup> Tan catyí ra Jesús tsihin ra naha:

—Nyehé jihna ndo najava paan ndahá ndo —catyí ra. Cuhva tsa tsitō ra naha najava paan ndahá ra naha, tacan tan tsicahān ra naha tsihin ra tan catyí ra naha: —Ndahá ndi uhun taahan ñi paan tan uvi taahan ñi tyaca.

<sup>39</sup> Tacan tan catyí ra tsihin nyivi na cunyecu ñi nu cuhu can. <sup>40</sup> Tan tsinyecu cuenda cientu tan cuenda uvi xico utsi ñi tsa iin cuhva tsinyecu ñi. <sup>41</sup> Tacan tan quihñi ra Jesús tsa uhun paan can tan nduvi tyaca can. Tan nanyehé ndaa ra ityi siqui, tan nacuhvā ra tyahvi nyoo tsi Nyoo, tsa yahā tan tsahnū cuatyí ra paan can, tan tsahā ra can tsi ra tsicá tsihin ra tyin tsatsa ra naha can tsi nyivi. Tsa ndihí tsatsā ra naha paan can, tan tsatsā ndihí ra naha tyaca. <sup>42</sup> Tsatsi tandihí ñi tan ndahā iñi ñi. <sup>43</sup> Tan jacutu ra naha utsi uvi tyica tsihin paan tan tyaca tsa ndoq. <sup>44</sup> Tan uhun mil rayii tsatsi paan can.

### Nu tsicá ra Jesús nu ndutya

(Mt. 14.22-27; Jn. 6.16-21)

<sup>45</sup> Tacan tan catyí ra Jesús tsihin ra tsicá tsihin ra na yaha sava ñi ra naha nu miñi can tan cuhun cuee ñi ra naha nda ñuu Betsaida tsitsi tsa ndi jacunuhu ra tsi nyivi yuehe ñi. <sup>46</sup> Tsa yahā cuanuhū nyivi, tacan tan cuahán ra Jesús cuandacán tahvi ra tsi Nyoo iin jiñi yu-cu. <sup>47</sup> Tsa tsa cuñi cuaa, yutun ndoo nu cuahán ra tsicá tsihin ra Jesús tsa cuahán can nda mahñu miñi, tan maa ra ndi nyii ra yuhu miñi can. <sup>48</sup> Tan tsa nyehé ra tyin ña cuví jacacá vaha ra naha yutun ndoo jahá tatyí, tacan tan cuahán tsihin tsaha ra nu ndutya nu cuahán ra naha tsa tsa cuñi tui, nyicún tsicá nyicún tsicá ñi ra tsi ra naha. Tan tsa cua yaha tsiyo ra nu cuahán ra naha. <sup>49</sup> Maa tyin tsa nyehé ra naha tsicá ra nu ndutya, tsicā iñi ra naha tyin tatyí cuví ra, tacan tan quitsahā caná tsa ra naha <sup>50</sup> tyin tandihí ra naha nyehé ra naha tsi ra tan nayuhvi ra naha. Maa tyin nacahan ra tan catyí ra tsihin ra naha:

—Ña nayuhvi ndo tyin maa yu cuví!

<sup>51</sup> Tacan tan quihvi ra tsitsi yutun ndoo nu yucú ra naha, tan tsa yahā quihvi ra, iin yaha ñi cutaxin tatyí can. Tan iyo xaan cuñi ra naha cuví <sup>52</sup> tyin ñaha ca cutuñi iñi ra naha tsa iyo tsa javahā ra tsihin paan, tyin ndi ndava añima ra naha.

### Nu janduvahā ra Jesús nyivi cuuhví tsa iyó nduhva tsa nañi Genesaret

(Mt. 14.34-36)

<sup>53</sup> Yahā sava ra naha nu miñi can tan tsaq ra naha Genesaret inga tsiyo yuhu miñi can, tan tsahñi ra naha yutun ndoo can yatyin ñi yuhu ndutya. <sup>54</sup> Cuhva tsa quitā ñi ra naha tsitsi yutun ndoo can, tan nacotō nyivi tsi ra Jesús. <sup>55</sup> Tacan tan tsinú xaan ñi cuahán ñi cuajacotó ñi tsi nyivi iyó naniñ cahnu ityi can tyin tsaq ra Jesús. Tan tsaq cuaha nyivi quee tandihí ñi ñuu nu nyii ra, tan yucú nyivi cuuhví nu tsitō tsaq tsihin ñi. <sup>56</sup> Tan tandihí ñi ityi nu cuahán ra tsitsi ñuu nyihi o tsitsi ñuu nahnu, o tsitsi cuhu, tsaquín nyivi nyivi cuuhví yuhu ityi. Tan caahán ndaahvi ñi tsihin ra na cuhva ra tiin ñi cuuhví can vasu tan yuhu jahma ra tan nduvaha ñi. Tan tandihí maa nyivi tsa tiin jahma ra nduvahā ñi.

### Tsa jativí tsi nyivi nu Nyoo

(Mt. 15.1-20)

**7** Tacan tan tsaq juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyii ra Jesús. <sup>2</sup> Ra ihya naha ra nyehé ra naha tyin juhva ra tsicá tsihin ra Jesús ña nacatyā ra naha ndaha ra naha tan tsatsí ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahā ra can naha ra. <sup>3</sup> Tyin ra fariseo naha ra javahá ra naha tumaa catyí costumbre tsii tsaahnu ra naha tacan tucu ñi tandihí ca nyivi Israel ña cuví catsi ñi tun ña nacatyā ñi ndaha ñi cuaha tsaha tumaa iyó maa ñi. <sup>4</sup> Tan tatun ña nacatya ñi ndaha ñi tsa tsaá ñi quee ñi nuyahvi, ña cuvi catsi ñi. Iyó cuaha ca costumbre tsa tuhvá ñi javahá tumaa tsa nacatyā ñi vasu, jara, tan tandihí ndaha tyiñu tsa tsinú tsihin caa tsa iyó tsi ñi tan nda cuanda cama ñi. <sup>5</sup> Tacan tan tsicā tuhun ra fariseo tan ra maestro cuenda ley naha ra tsi ra Jesús, tan catyí ra naha:

—¿Nacuenda tyin ña javahá ra tsicá tsihin un naha ra cuhva nacoq tsii tsaahnu yo naha ra? Tyin ña nacatyā jihna ra naha ndaha ra naha tumaa iyó maa yo tan tsatsí ra naha —catyí ra naha tsihin ra.

<sup>6</sup> Tan nacahan ra Jesús, tan catyí ra:

—Nditsa tsa cahān ra Isaías, ra cuví ndusu yuhu Nyoo tuhun nyooho tsa jahá ndo tyin vaha xaan ndo tan ña nditsa ndo. Tyin catyí ra tyehen:

Nyivi ihya jacahnú ñi tsi yu tsihin yuhu ñi.

Maa tyin ñavin tsihin tsa ñi iñi añima ñi.

<sup>7</sup> Yacan cuenda nduve yahvi nyaá jacahnú ñi tsi yu, tyin maa ñi maa tuhun caahán nyivi jacuahá ñi tan ñavin tuhun yu jacuahá ñi, catyí ra Isaías tuhun ndo jahā Nyoo, catyí ra Jesús tsihin ra naha.

<sup>8</sup> Tyin nyooho nacoq ndo cuhva caahán Nyoo, tan nyicún ndo cuhva caahán nyivi ñi, tumaa tuhvá ndo nacatya ndaha tyiñu ndo, tan inga ca tsa tuhvá ndo javahá. <sup>9</sup> Nyooho tyaq tsiyo ndo tuhun caahán Nyoo, tacan tan javahá ndo tuhun tsahnu tsa nacoq tsii tsaahnu ndo. <sup>10</sup> Tyin catyí ley Nyoo tsa tyaq ra Moisés: “Tyaq yahvi ndo tsi jutu ndo tan tsi sihi ndo, tyin

tandihî nyivi tsa cua cahan ndavaha ñi tsi jutu o tsi sihi, cua cúu ñi” catyí ley Nyoo tsa tyaá ra Moisés. <sup>11</sup> Maa tyin nyooho catyí ndo tyin cuvî catyí iin nyivi tsihin jutu ñi o sihi ñi tyehen: “Ña cuvî jatyinyee yu tsi un tyin tandihî tsa iyó tsi yu cuvî tsi Corbán.” (Tuhun ihya cuñí tsi catyí: “Tsa ndihî can tsahá cuenda yu tsi Nyoo.”)

<sup>12</sup> Tan tatun catyí nyivi tacan, ña cuñí ca tsi jatyinyee ñi tsi jutu ñi o tsi sihi ñi, catyí ndo. <sup>13</sup> Yacan cuvî tsa javahá ndo vityin, tyaá tsiyo ndo tuhun caahán Nyoo, tsahan tyaá yahví ca ndo tuhun tsahnu cuhva iyó maa ndo. Tan cuaha ca tsa tacan caá javahá ndo —catyí ra Jesús.

<sup>14</sup> Tacan tan caná nyico ra Jesús tsi nyivi tan catyí ra tsihin ñi:

—Tyaá soho vaha tandihî ndo tsa cua cahan yu, tan nducu ndo cuhva cutuñi iñi ndo. <sup>15</sup> Tsa quihví yuhu nyivi, ña cuvî jatívi tsi tsi ñi. Tsa jatívi tsi ñi cuvî tsa quitá añima ñi. <sup>16</sup> Nyooho tsa iyó soho, tyaá soho ndo tsa caahán yu —catyí ra Jesús tsihin ñi.

<sup>17</sup> Tsa yahá nacoq ra Jesús tsi nyivi, tan quihví ra tsitsi vehe, tacan tan tsicá tuhun ra tsicá tsihin ra náa cuñí tsi catyí tsa cahan ra. <sup>18</sup> Tan catyí ra tsihin ra naha:

—¿A ndi nyooho tan ña cutuñi iñi ndo? ¿A ña tsitó ndo tyin tsa quihví tsitsi yo ña cuvî jatívi tsi tsi yo?

<sup>19</sup> Tyin tsitsi yo quihví tsi tan ñavin añima yo. Yaha can tan quitá tsi tsitsi cuñu ñuhu yo —catyí ra Jesús.

Tsihin tsehe janahá ra tyin tandihî nyayu tan vaha catsi yo itsi. <sup>20</sup> Tan catyí tucu ra:

—Tsa quitá añima nyivi, yacan jatívi tsi ñi. <sup>21</sup> Tyin tsa caquiñi tsa tsicá iñi ñi tsitsi añima ñi quitá can, tacan tan rayi cuñí ra coo inga ñaha tsi ra, o ñiñaha cuñí ñi coo inga rayi tsi ñi. Yihí ra tsicoó ra tsihin inga ñaha tan ña tindahá ra tsihin ña. Yihî rayi tsicoó ra tsihin ra ndusihi. Tan yihî ñiñaha tsicoó ñi tsihin ñi nduyi. Tan yihí ñi cuñi ñi cahñi ñi nyivi, <sup>22</sup> o cuñí ñi suhu ñi. Yihí ñi cuñí ñi coo tsa tsii inga nyivi tsi ñi; yihí ñi javahá ñi tsa caquiñi; yihí ñi jandaví ñaha ñi; yihí ñi iyó inga viciu tsi ñi; yihí ñi nyiyo iñi ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi. <sup>23</sup> Tandihî tsa ña vaha ihya, quitá can tsitsi añima nyivi, tan jatívi can tsi ñi —catyí ra Jesús tsihin ra naha.

### Nu tsinu iñi iin ñaha inga ñuu tsi ra Jesús

(Mt. 15.21-28)

<sup>24</sup> Tsa yahá yacan tan quitá ra Jesús ñuu can, tan cuahán ra ñuhu nu canyí ñuu Tiro tan ñuu Sidón. Tsa tsaá ra ican, quihví xeehe ra tsitsi iin vehe tyin ña cuñí ra coto nyivi numaa nyí ra. Maa tyin ña cuvî cunyii xeehe ra <sup>25</sup> tyin yatyi xaan tsitó sihi iin ñaha tyuvaa tsa yihí tatyí ña vaha nu nyí ra. Tacan tan cuahán ña nu nyí ra. Tsa tsaá ña tan tsicuiñi tsiti ña nuu ra. <sup>26</sup> Ñaha can, ñavin ñaha Israel cuvî ña, tyin ñaha ñuu Sirofenicia cuvî ña. Tsaá ña nu nyí ra Jesús tan caahán ndaahvi ña tsihin ra tyin na tava ra tatyí ña vaha yihí tsi sehe ña. <sup>27</sup> Maa tyin catyí ra Jesús tsihin ña:

—Ña cahan yuhu ca un; na catsi jihna nyivi Israel, ñi cuvî sehe Nyoo, tyin ña vaha quihin nyaa yo paan yuhu sehe yo tan cuhva yo itsi catsi ina —catyí ra Jesús tsihin ña.

<sup>28</sup> Tan nacahan ña tan catyí ña:

—Nditsa, Jutu Mañi yu, maa tyin nda cuanda ina cuvî ndatú ti tan tsatsí ti titsehe tsa cucoyó xuu mesa jahá sehe tsitoho ti —catyí ña tsihin ra.

<sup>29</sup> Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yahá quitá tatyí ña vaha tsi sehe un. Cyanuhu vityin —catyí ra tsihin ña.

<sup>30</sup> Tan cuhva tsa tsaá ña yuvehe ña, canyí taxin sehe ña nu cama, tyin tsa yahá quitá tatyí ña vaha tsi ña.

### Nu janduvahá ra Jesús tsi ra soho tan ñihî

<sup>31</sup> Quitá nyico ra Jesús ñuhu nu canyí ñuu Tiro, tan yahá ra ñuu Sidón, tan cuahán ra inga ca ñuu tsa cayucú Decápolis. Yahá ra ican tan tsaá ra miñi Galilea.

<sup>32</sup> Tsa tsaá ra Jesús ican, tsahan nyivi tsindaca ñi iin ra soho tsa ña cuvî cahan nu nyí ra. Cahán ndaahvi ñi tsihin ra na tyiso ra ndaha ra jiñi ra can. <sup>33</sup> Tacan tan quihî ra tsi ra can cuahán tsiyo tsihin ra nu nduve nyivi. Tan tyaxin ra nundaha ra tsitsi soho ra can, tan tivî siñ ra, tan tñin ra nu yaa ra can. <sup>34</sup> Tacan tan nanyehé ndaa ra ityi andivi. Tan ixtá tatyí ra, tan catyí ra:

—¡Efata! —tan tuhun ihya cuñí tsi catyí: ¡Nyña!

<sup>35</sup> Tan tsihin can nuñá soho ra can, tan nduvahá yaa ra, tan cuvî nacahan ra. <sup>36</sup> Tan catyí ra Jesús tsihin ñi tyin ña cahan ñi can tsihin nyivi, maa tyin vasu ndi maa caahán ra tacan tsihin ñi, cuñihî ca ñi caahán ñi tsa javahá ra. <sup>37</sup> Iyo cuñí ñi tan catyí ñi:

—Tandihî tsa javahá ra tan vaha javahá ra itsi. Nyivi soho nacuñí ñi jahá ra tan nyivi ñihî nacahan ñi.

### Nu tsahá ra Jesús tsa catsi cumi mil nyivi

(Mt. 15.32-39)

**8** Quivi can nataca cuaha nyico nyivi nu nyí ra Jesús. Tan nduve maa tsa catsi ñi iyó. Tacan tan caná ra Jesús tsi ra tsicá tsihin ra, tan catyí ra tsihin ra naha:

<sup>2</sup> —Ndaahvi xaan cuñí yu nyehé yu nyivi ihya, tyin tsa uñi quivi yucú ñi tsihin yo, tan nduve ca tsa catsi ñi.

<sup>3</sup> Tyin tun jacuhun yu tsi ñi yuvehe ñi tsa ndi cumañi ca catsi ñi, cua cúu naaha ñi ityi cuhun ñi, tyin yihí ñi cañi xaan quee ñi —catyí ra Jesús tsihin ra naha.

<sup>4</sup> Tan nacahan ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyivi ihya, tan nduve nyivi iyó ihya tan xico ñi tsa catsi yo?

<sup>5</sup> Tan tsicá tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Utsa taahan ñi.

<sup>6</sup> Tacan tan catyí ra tsihin nyivi na cunyecú ñi nu ñuhu. Tsa yahá cahan ra yacan, tacan tan quihî ra tsa utsa paan can, tan nacuhvá ra tyahvi nyoo tsi Nyoo tsa cuenda can. Tsahan tsahny cuatyí ra can tan tsahá ra can tsi ra tsicá tsihin ra, tyin tsatsa ra naha can tsi nyivi. <sup>7</sup> Tan ndahá tucu ra naha juhva tyaca nyihi. Tsahá ndihî ra Jesús tyahvi nyoo tsi Nyoo tsa cuenda can, tacan tan tsahá ra can tsi ra naha tyin tsatsa ra naha tsi nyivi. <sup>8</sup> Tandihî ñi tsatsí ñi, tan ndahá vaha iñi ñi. Tsa

ndihĩ tsatsĩ ñi tan jacutũ ra naha utsa tyica tsihin tsa ndoo. <sup>9</sup> Tan quitã maa cumi mil nyivĩ jacatsĩ ra. Yahã can tan jacunuhũ ra tsi ñi. <sup>10</sup> Tsa yahã cuanuhu ñi, tacan tan quihvĩ ra tsihin ra tsicã tsihin ra tsitsi iin yu-tun ndoo. Tan cuahán ra naha ityi Dalmanuta.

**Nu tsicán ra fariseo naha ra tsi ra Jesús tyin javaha ra iin tsa iyo**

(Mt. 16.1-4; Lc. 12.54-56)

<sup>11</sup> Tsaã ra fariseo naha ra nu nyí ra Jesús, tan quitsahã caahán yuhu tahan ra naha tsihin ra. Nducú cuhva ra naha tsi ra tun nditsa tyin Nyoo jaquitsĩ tsi ra, yacan cuenda catyí ra naha tsihin ra tyin javaha ra iin tsa iyo nyehe ra naha. <sup>12</sup> Tacan tan ra Jesús ñihi xaan ixtã tatyí ra, tan catyí ra:

—¿Nacuenda tyin tsicán nyivĩ iyó vityin tsa iyo? Tsa nditsa catyí yu tsihin ndo tyin ña cua nyehe ndo ndi intuhun tsa iyo —catyí ra tsihin ra naha.

<sup>13</sup> Tacan tan nacoõ ra tsi ra naha, tan quihvĩ nyico ra tsitsi yutun ndoo tan cuahán ra inga tsiyo miñi.

**Nu catyí ra Jesús tyin tsa jacuahá ra fariseo naha ra cuví can tumaa yutsan iya**

(Mt. 16.5-12)

<sup>14</sup> Ra tsicã tsihin ra Jesús naã iñi ra naha cundaha ra naha tsa catsi ra naha. Tan intuhun ñi paan ndahá ra naha yucú ra naha tsitsi yutun ndoo can. <sup>15</sup> Tacan tan catyí ra Jesús tsihin ra naha:

—Jãha ndo cuenda tsi ndo tsihin yutsan iya ra fariseo naha ra tan ra Herodes —catyí ra tsihin ra naha.

<sup>16</sup> Tan ra tsicã tsihin ra quitsahã natuhún tahan ra naha tan catyí ra naha:

—Caahán ra tyehen tsihin yo tyin nduve paan ndahá yo catsi yo —catyí ra naha.

<sup>17</sup> Tsa tuvĩ iñi ra Jesús tsa tsicã iñi ra naha, tan catyí ra tsihin ra naha:

—¿Nacuenda tsicã xaan iñi ndo tyin nduve tsa catsi ndo ndahá ndo? ¿A ñaha ca cutuñi iñi ndo? ¿A ñaha ca coto ndo? ¿Nacuenda ndi ndava xaan añima ndo?

<sup>18</sup> Nyecú tinuu ndo, tan ña nyehé ndo. Nyecú soho ndo, tan ña tsiñi ndo. ¿A ña nducuhún iñi ndo tsa javahã yu <sup>19</sup> quivĩ tsa jacatsĩ yu uhun mil rayĩ tsihin uhun taahan ñi paan? ¿A ña ñuhú iñi ndo najava tyica jacutũ ndo tsihin tsa ndoo? —catyí ra Jesús, tsicã tuhun ra tsi ra tsicã tsihin ra.

Nacahã ra naha tan catyí ra naha:

—Utsi uvi tyica.

<sup>20</sup> Tan catyí nyico ra Jesús tsihin ra naha:

—Tan quivĩ jacatsĩ yu cumi mil nyivĩ tsihin utsa taahan ñi paan, ¿najava tyica jacutũ ndo tsihin tsa ndoo?

Nacahã ra naha tan catyí ra naha:

—Utsa taahan tyica.

<sup>21</sup> Tacan tan catyí ra Jesús tsihin ra naha:

—¿A ñaha ca cutuñi iñi ndo? —catyí ra tsihin ra naha.

**Nu janduvahã ra Jesús iin ra cuaa nda ñuu Betsaida**

<sup>22</sup> Tsa yahã yacan tan cuahán ra Jesús tsihin ra tsicã tsihin ra nda ñuu Betsaida. Tsa tsaã ra naha ican, tsindacã nyivĩ ñuu can iin ra cuaa nu yucú ra naha. Tan cahã ndaahvĩ ñi tsihin ra Jesús tyin tñin ra tsi ra cuaa can tan janduvaha ra tsi ra. <sup>23</sup> Tacan tan tñin ra ndaha ra cuaa can, tan quihĩn ra tsi ra cuahán tsihin ra ityi tsata ñuu. Tyaã sñi ra nu ndaha ra tan tñin ra tinuu ra can, tan tyisõ ra ndaha ra soco ra can, tan tsicã tuhun ra tsi ra tun nditsin nyehé ra luxu. <sup>24</sup> Ra cuaa can nanyehẽ ra tan catyí ra:

—Nyehé yu juhva nyivĩ, tan caá ñi tumaa caá yutun, maa tyin tsicã ñi —catyí ra.

<sup>25</sup> Tacan tan tñin nyico ra Jesús tinuu ra inga tsaha, tan nanyehẽ vaha ra tan nduvahã ra. Nanyehẽ catsi vaha ra tandĩhi tsa iyó. <sup>26</sup> Tacan tan jacunuhũ ra Jesús tsi ra yuvehe ra, tan catyí ra tsihin ra:

—Ña quihvĩ un tsitsi ñuu ihya tan ña nacatyí tuhun tsehe tsihin nyivĩ —catyí ra Jesús tsihin ra.

**Nu cahã ra Pedro tyin ra Jesús cuví Cristo, ra jacacú tsi yo**

(Mt. 16.13-20; Lc. 9.18-21)

<sup>27</sup> Yahã can tan cuahán ra Jesús tsihin ra tsicã tsihin ra ñuu tsa cayucú yatyin ñi ñuu Cesarea tsa javahã ra Felipe. Tsitsi tsa cuahán ra naha, tan tsicã tuhun ra Jesús tsi ra naha, tan catyí ra:

—¿Náa caahán nyivĩ tuhun yu? ¿Yóo ra cuví yu catyí ñi? —catyí ra tsihin ra naha.

<sup>28</sup> Nacahã ra naha tan catyí ra naha:

—Yihé nyivĩ catyí ñi tyin ra Juan, ra jacoondutyã tsi nyivĩ, cuví un. Inga ñi catyí ñi tyin ra Elías. Yihé ñi catyí tucu ñi tyin inga ra cuvĩ ndusu yuhu Nyoo cuví un —catyí ra naha tsihin ra.

<sup>29</sup> Tacan tan tsicã tuhun ra tsi maa ra naha, tan catyí ra:

—Tan nyooho, ¿yóo ra cuví yu, cuñi ndo?

Tan nacahã ra Pedro tsihin ra:

—Yooho cuví ra Cristo, ra jacacú tsi nyivĩ.

<sup>30</sup> Maa tyin cahã ra Jesús tsihin tandĩhi ra naha tyin ña cahã ra naha can tsihin ndi intuhun maa nyivĩ.

**Nu cahã ra Jesús tyin cua cúu ra**

(Mt. 16.21-28; Lc. 9.22-27)

<sup>31</sup> Tacan tan quitsahã jacuahá ra tyin Rayĩ tsa queẽ nda gloria cua nyehe xaan ra tundoho. Tan ña cua tsinu iñi ra mandoñi naha ra tan ra jutu cuví ityi nuu tsihin ra jutu naha ra tsi ra tan ndi ra maestro cuenda ley vehe ñuhu naha ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cahĩ nyivĩ tsi ra maa tyin cua nandoto ra tsa tsinu uñi quivĩ.

<sup>32</sup> Tacan cahã catsi ra tsihin ra naha. Tacan tan quihĩn ra Pedro tsi ra cuahán tsihin ra tsata vehe tan quitsahã caahán ra tsihin ra Jesús tyin ña vaha tsa cahã ra.

<sup>33</sup> Maa tyin ra Jesús nanyicõ coo ra, tan nanyehẽ ra nu

nyecú inga ra tsicá tsihin ra. Tan quitsahá caahán ra tsihin ra Pedro, tan catyí ra:

—¡Cuatsiyo nuu yu ihya, cuihna! Tyin yooho ña tsicá iñi un tumaa tsicá iñi Nyoo, tyin tsicá iñi un tumaa tsicá iñi nyivi —catyí ra Jesús tsihin ra Pedro.

<sup>34</sup> Tacan tan caná ra Jesús tsi nyivi tan tsi ra tsicá tsihin ra tan catyí ra:

—Tatun ndáa nyoooho cuñí cunyicun tsi yu, cahnya iñi ndo nacoo ndo tsa cuñí maa ndo javaha ndo, tyin tacan tan cuvi javaha ndo kuhva cuñí Nyoo. Tan ña cua ndu uvi iñi ndo tsa yihí ndo cuenda yu, vasu ndi maa tandihí quivi nyehé ndo tundoho tsa cuenda yu. Tyin yacan cuví cruu tsa taahán tsi cuiso ndo tun cunyicun ndo tsi yu. <sup>35</sup> Tyin nyoooho tsa ña cuñí nyehe tundoho tan kuhva ndo ñayivi ndo tsa cuenda yu, cua nyehe ndo tundoho anyaya. Maa tyin nyoooho tsa cua kuhva ñayivi tsa cuenda yu tan tsa cuenda tuhun Nyoo, cua cacu ndo. <sup>36</sup> Tyin nduve yahvi nyaá cua ñihi ndo tandihí tsa iyó nu ñuhu ñayivi ihya tun ña cua cacu añima ndo. <sup>37</sup> Tyin nduve maa náa tsihin tyahvi ndo tan cuvi cacu añima ndo tan ña cunaa tsi. <sup>38</sup> Tyin nyivi cua nducahan nuu tsa cuenda yu tan tsa cuenda tuhun caahán yu quivi cahan ñi tsihin nyivi caquiñi tsa ña tyaá yahvi tuhun Nyoo, yuhu Rayii tsa quee nda gloria cua nducahan nuu yu nyehe yu tsi ñi quivi quitsi yu tsihin ángel cuenda Nyoo Jutu yu tan tsihin tsa sii caá ra.

**9** <sup>1</sup> Tan tsa nditsa catyí yu tsihin ndo, tyin yihí nyoooho tsa yucú ihya vityin, cua nyehe ndo nácaa ndacá ñaha Nyoo tsihin tunyee iñi ra tsa ndi cumañi ca cúu ndo.

**Nu nyehe uñi ra tsicá tsihin ra Jesús nu nasamá kuhva caá ra**

(Mt. 17.1-13; Lc. 9.28-36)

<sup>2</sup> Tsa yahá iñu quivi, tacan tan quihñ ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasamá kuhva caá ra tan nyehe ra yucú tsihin ra can. <sup>3</sup> Xiñu xaan tan cuitsin xaan jahma ra cuví tumaa cuitsin vico. Ndi intuhun maa nyivi iyó nu ñuhu ñayivi ihya tan ña cuví janducuitsin ñi jahma tumaa cuitsin jahma ra. <sup>4</sup> Tan nyehe ra naha tyin nyaá ra Elías tan ra Moisés tsihin ra, natuhún ra naha tsihin ra.

<sup>5</sup> Tacan tan catyí ra Pedro tsihin ra Jesús:

—Maestro, ¡vaha xaan tyin yucú ndi ihya! Cua javaha ndi uñi taahan tyahva; iin tsa cuenda un, iin tsa cuenda ra Moisés, tan iin tsa cuenda ra Elías —catyí ra Pedro. <sup>6</sup> Cahán ra tacan tyin ña tsitó ra náa cahan ra tyin maa ra tan ra yucú tsihin ra nayuhvi xaan ra naha.

<sup>7</sup> Tacan tan nuu iin vico siqui ra naha tan tyasi tsi tsi ra naha. Tan tsitsi vico can nacahán iin ndusu tan catyí tsi:

—Ra ihya cuví Sehe yu, tan cuñí xaan yu tsi ra. Tyaa yahvi ndo tsa caahán ra —catyí ndusu can.

<sup>8</sup> Tan kuhva tsa nanyehe ra naha, nduve ca ra Elías tan ra Moisés nyaá, intuhun ña maa ra Jesús nyaá.

<sup>9</sup> Tan kuhva tsa vatsí nuu ra naha yucu can, catyí ra Jesús tsihin ra naha tyin ña cahan naha ra naha tsa nyehe ra naha. Cuví cahan maa ra naha can nda yaha

nandoto Rayii quee nda gloria, tan rayii can cuví maa ra. <sup>10</sup> Yacan cuenda ña cahán maa ra naha tuhun can, tan natuhún tahan ra naha náa cuñí tsi catyí tuhun tsa cua nandoto ra. <sup>11</sup> Tacan tan tsicá tuhun ra naha tsi ra Jesús tan catyí ra naha:

—¿Nacuenda tyin catyí ra cuví maestro cuenda ley vehe ñuhu naha ra tyin jihna ca ra Elías taahán tsi quitsi nu ñuhu ñayivi ihya inga tsaha?

<sup>12</sup> Tan nacahán ra, tan catyí ra:

—Nditsa tyin jihna ca ra Elías taahán tsi quitsi tsa ndi cumañi ca quitsi yuhu tyin janduvaha ra tandihí. ¿Tan náa catyí tuhun Nyoo cuenda yuhu Rayii quee nda gloria? Catyí tsi tyin cua nyehe yu tundoho, tan ña cua cuñi nyivi nyehe ñi tsi yu. <sup>13</sup> Maa tyin yuhu catyí yu tsihin ndo tyin tsa yahá quitsi ra Elías. Tan nyivi javahá ñi tsihin ra kuhva cuñi maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

**Nu janduvahá ra Jesús iin ra tyuvaa tsa yihí tatyí ña vaha**

(Mt. 17.14-21; Lc. 9.37-43)

<sup>14</sup> Tsa yahá yacan tan cuahán ra naha nu yucú tandihí ca ra tsicá tsihin ra naha. Tsa tsaá ra naha ican, nyehe ra naha tyin yucú cuaha nyivi nanñ canduvi. Tan yucú tucu ra maestro cuenda ley vehe ñuhu naha ra, tan caahán yuhu tahan ra naha tsihin ra tsicá tsihin ra Jesús. <sup>15</sup> Tsa nyehe nyivi can tsi ra Jesús, iyo xaan cuñí tandihí ñi cuví. Tacan tan tsahán ñi nu nyaá ra tsicuhva ñi nacumi tsi ra. <sup>16</sup> Tacan tan tsicá tuhun ra tsi ñi tan catyí ra:

—¿Nacuenda caahán yuhu tahan ndo? —catyí ra.

<sup>17</sup> Tacan tan nacahán iin ra tsa nyaá tyañu tandihí nyivi can, tan catyí ra:

—Maestro, vatsí yu vatsí ndacá yu sehe yu tsi un tyin yihí tatyí ña vaha tsi ra tan nduñihí ra jahá nu. <sup>18</sup> Tyin tandihí ñi nu tñn tatyí can tsi ra, janduvá nu tsi ra, tan quita tiñuu yuhu ra, tan jacahyú ra nuhu ra, tan janduyutún nu tsi ra. Tsa yahá cahán yu tsihin ra tsicá tsihin un naha ra tyin tava ra naha tatyí ña vaha can, maa tyin ña cuví tava ra naha tsi nu —catyí ra can tsihin ra Jesús.

<sup>19</sup> Nacahán ra Jesús tan catyí ra:

—¡Nyoooho nyivi ña tsinú iñi tan caquiñi! ¿Ndáa nda quivi cua cunyii yu tsihin ndo? ¿Tan najava ca quivi cua cunyee iñi yu nyehe yu tsi ndo tyin ña tsinú vaha iñi ndo tsi yu? Ndaca ndo tsi ra luhlu can tsi yu ihya —catyí ra.

<sup>20</sup> Tacan tan tsindacá jutu ra luhlu can tsi ra tsi ra Jesús. Tan kuhva tsa nyehe nu tatyí ña vaha can tsi ra Jesús, janduvá nu tsi ra luhlu can tan quitsahá tsicó tsvi ra nu ñuhu jahá nu. Tan quita tiñuu yuhu ra. <sup>21</sup> Tacan tan tsicá tuhun ra Jesús tsi jutu ra luhlu can tan catyí ra:

—¿Ama quitsahá taahán ra tyehen?

Tan nacahán jutu ra luhlu can, tan catyí ra:

—Nda ndi luhlu xaan ra. <sup>22</sup> Tan cuaha tsaha tyihí tatyí ña vaha can tsi ra nu cayú ñuhu, tan nu ndutya. Cuñi nu cahñi nu tsi ra. Maa tyin tun cuví javaha un náa

javaha un tsihin ra, cundaahvi iñi tsi ndi, tan jatyinyee tsi ndi —catyí jutu ra luhlu can tsihin ra Jesús.

<sup>23</sup> Tan catyí ra Jesús tsihin ra:

—Tun tsinú iñi un, tandihí tan cua cuvi tyin tsa cuenda ra tsa tsinú iñi tandihí tan cuvi —catyí ra Jesús.

<sup>24</sup> Tacan tan cana tsa jutu ra tan catyí ra tsihin ra Jesús:

—¡Tsinú iñi yu! ¡jatyinyee tsi yu na tsinu ca iñi yu! —catyí ra tsihin ra.

<sup>25</sup> Cuhva tsa nyehé ra Jesús tyin cuaha nyivi ndu iin nu nyaá ra, tacan tan tava ra tatyí ña vaha can, tan catyí ra tsihin nu:

—Yooho tatyí ña vaha tsa janduñihí tan jasohó tsi ra ihya, quita tsi ra catyí yu tsihin un. Jaña tsi ra, tan ña quihví ca un tsi ra —catyí ra Jesús tsihin nu tatyí ña vaha can.

<sup>26</sup> Tacan tan quiñi xaan cana tsa nu tatyí can tan janduvá nu tsi ra inga tsaha, tan quitá nu tsi ra. Tan jacúu naaha nu tsi ra. Tan cuñí maa nyivi tyin tsa tsihi ra.

<sup>27</sup> Maa tyin ra Jesús tñin ra ndaha ra luhlu can, tan cañihí ra tsi ra, tan tsinyaá nyityí ra.

<sup>28</sup> Tacan tan quihví ra Jesús tsitsi iin vehe, tan tsicá tuhun ra tsicá tsihin ra tsi ra tan catyí ra naha:

—¿Nacuenda tyin ña cuvi tava nyuhu tatyí ña vaha can?

<sup>29</sup> Tacan tan catyí ra Jesús:

—Tsa cuenda tyin tahan tatyí ña vaha ihya ña cuvi quita nu jaha yo tun ña coonyitya yo tan ña ndacan tahvi yo tsi Nyoo —catyí ra tsihin ra naha.

**Nu cahān ra Jesús inga tsaha tyin cua cahñi nyivi tsi ra**  
(Mt. 17.22-23; Lc. 9.43-45)

<sup>30</sup> Quiñi tsa quitá ra Jesús ican, tan ra tsicá tsihin ra yahā ra naha ñuhú Galilea. Tan ña cuñí ra Jesús tsa coto nyivi iyó ican tyin nyií ra nu iyó ñi. <sup>31</sup> Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayii tsa quee nda gloria cua nacuhva cuenda nyivi tsi yu tsi ra xaan iñi tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quiñi.

<sup>32</sup> Maa tyin ra ican naha ra ña cutuñi iñi ra naha tsa caahán ra tsihin ra naha. Tan ña cuñí ra naha ndaca tuhun ra naha tsi ra tyin yuuhví ra naha.

**Nu janahá ra Jesús yóo ra cahnu ca cuvi tsitsi tsa tandihí nyivi tsa ndacá ñaha Nyoo**  
(Mt. 18.1-5; Lc. 9.46-48)

<sup>33</sup> Tan tsa tsaā ra Jesús ñuu Capernaum tan ra tsicá tsihin ra, tsa tsa yucú ra naha tsitsi vehe, tan tsicá tuhun ra Jesús tsi ra naha tan catyí ra:

—¿Náa natuhún xaan ndo ityi vatsi yo? —catyí ra tsicá tuhun ra.

<sup>34</sup> Tsa cahān ra Jesús tacan, taxin ña cuvi ra naha, tyin ityi vatsí ra naha natuhun ra naha yóo ra cahnu ca cuvi tsa nuu tandihí ra naha. <sup>35</sup> Tacan tan tsinyaā ra Jesús tan cana ra tsi tandihí tsa utsi uvi ra tsicá tsihin ra, tan catyí ra tsihin ra naha:

—Nyooho tsa cuñí cuvi ityi nuu, cuñí tsi cuvi ndo nda nu ndihí ña tsa nuu tandihí ndo, tan jatyinyee ndo tsi tandihí nyivi —catyí ra Jesús tsihin ra naha.

<sup>36</sup> Tacan tan quihñin ra iin ra luhlu tyaā ra mahñu ra naha. Tan tyihí jucun ndaha ra tsi ra luhlu can, tan catyí ra:

<sup>37</sup> —Nyivi naquihin iin nyivi tumaa ra luhlu ihya, yuhu naquihin cuenda ñi. Tyin naquihin cuenda ñi tsi ñi tsa cuenda tsa cuñí ñi tsi yu. Tan nyivi naquihin cuenda tsi yuhu, naquihin cuenda tucu ñi tsi ra tsa jaquitsi tsi yu tan ñavin maa ñi maa yu naquihin cuenda ñi.

**Nyivi tsa ña cuxaán tsi yo, juvin ñi ican jatyinyeé tsi yo**  
(Mt. 10.42; Lc. 9.49-50)

<sup>38</sup> Tacan tan catyí ra Juan tsihin ra Jesús:

—Maestro, nyehé ndi iin ra tava tatyí ña vaha tsi nyivi tsihin sivi un. Maa tyin tyasí ndi nu javaha ra tacan tyin ñavin tsihin yo tsicá ra —catyí ra Juan tsihin ra Jesús.

<sup>39</sup> Maa tyin catyí ra Jesús tsihin ra:

—Ña çasi ndo nu javaha nyivi tacan. Tyin ndi intuhun ñi tsa javaha tsa iyo tsihin sivi yu tan ña cua cana iñi ñi cahan ñi ndavaha ñi tsi yu. <sup>40</sup> Tyin nyivi tsa ña xaan iñi tsi yo, tsihin yo cutahán ñi. <sup>41</sup> Tan nyivi tsa cua cuhva vasu tan iin yatsin ndutya coho ndo tyin tsinú iñi ndo tsi yu, cua cuhva Nyoo tsa cua cuhva ra tsi ñi.

**Nu tsahá cuenda ra Jesús tsi yo nácaa jaha cuenda yo tsi yo tan ña javaha yo tsa ña vaha**  
(Mt. 18.6-9; Lc. 17.1-2)

<sup>42</sup> 'Nyivi cua natyuhu tsi iin nyivi tsa ñaha ca tsinú vaha iñi tsi yu tyin javaha ñi tsa caquiñi, vaha ca cuhñi nyivi yuu yoso vee jucun ñi tan cujaneñi ñi tsi ñi tsitsi nu cunu ndutya ñuhu. <sup>43</sup> Tatun ndaha un javahá tsa ña vaha, çasi nu javahá can tacan. Tatun ña cuvi, çahnya can tan javita un, tyin vaha ca quihví un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un. <sup>44</sup> Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. <sup>45</sup> Tatun tsaha un tan javahá tsa ña vaha, çasi nu javahá can tacan. Tatun ña cuvi, çahnya can tan javita un, tyin vaha ca cuhun un coo un tsihin Nyoo tsihin tsa intuhun ñi tsaha un tan ñavin ca tsa cuhun un tsihin nduvi tsaha un anyaya nu ña cua ndahva maa ñuhu. <sup>46</sup> Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. <sup>47</sup> Tun tinuu un javahá tsa ña vaha, çasi nu javahá can tacan. Tatun ña cuvi, tava can tan javita un tyin vaha ca quihví un nu ndacá ñaha Nyoo tsihin iin tinuu un tan ñavin ca tsa jacuhun Nyoo tsi un anyaya tsihin nduvi tinuu un. <sup>48</sup> Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

<sup>49</sup> 'Maa tyin tandihí nyivi nyicún tsi yuhu, ñi tsa nyehé tundoho tsa cuenda yu cuvi tsi tumaa tsa cayú ñi tsihin ñuhu, tyin tsihin yacan cua nduvaha ñi jahá Nyoo, tumaa tuhvá nyayu nduvahá tsihin ñi. <sup>50</sup> Vaha xaan ñi. Maa tyin tun ndihí tsa uhva tsi, ña jandu uhva ca tsi

tan ña cuvi ca cuatyíñu nyivi itsi. Yacan cuenda nyooho, ña jandíhi ndo tsa coo tuhun Nyoo añima ndo tyin cuví tsi tumaa ñi. Tyin tacan tan cuvi coo taxin ndo tsihin tahan ndo.

**Nu caahán ra Jesús tyin ña vaha nacoo rayíi ñasiíhi ra**  
(Mt. 19.1-12; Lc. 16.18)

**10** Quita ra Jesús ñuu Capernaum tan cuahán ra cuenda Judea inga tsiyo yutya Jordán. Tan ndu iin cuaha nyico nyivi nu nyíi ra, tacan tan quitsaha jacuahá ra tsi ñi tumaa tuhvá maa ra javahá. <sup>2</sup> Tacan tan natuhva juhva ra fariseo naha ra nu nyaá ra Jesús, tan nducú ra naha cuhva tyaa ra naha cuatyí tsi ra. Tan tsicá tuhun ra naha tsi ra tatun vaha nacoo rayíi ñasiíhi ra. <sup>3</sup> Tacan tan nacahan ra Jesús tan catyí ra:

—¿Náa catyí ra Moisés tyin javahá ndo?

<sup>4</sup> Tan nacahan ra naha tan catyí ra naha:

—Ra Moisés catyí ra tyin cuví caní ndi tutu cuenda ley ndi, tacan tan cuvi nacoo ndi ñasiíhi ndi —catyí ra naha tsihin ra.

<sup>5</sup> Tacan tan catyí ra Jesús tsihin ra naha:

—Catyí ra Moisés tyin cuví javaha ndo tacan tsa cuenda tsa ndava añima ndo. <sup>6</sup> Maa tyin quivi jihna ñi, quivi javaha Nyoo tandíhi maa tsa iyó, catyí nu tutu ra tyin javaha ra rayíi tan ñaha. <sup>7</sup> “Yacan cuenda taahán tsi nacoo rayíi jutu ra tan síhi ra tan ndu iin ra tsihin ñasiíhi ra. <sup>8</sup> Tan nduvi ñi cua cuví ñi tumaa intuhun ña nyivi.” Yacan cuenda ñavin ca uvi taahan ñi, tyin intuhun ña nyivi cua cuví ñi. <sup>9</sup> Yacan cuenda, ña cuví jasiin nyivi tsa jandu iin Nyoo —catyí ra Jesús tsihin ra naha.

<sup>10</sup> Yahá can tan cuanuhu ra nda yuvehe, tan quitsaha nducú tuhun nyico ra tsicá tsihin ra siqui tuhun can.

<sup>11</sup> Tan catyí ra Jesús tsihin ra naha:

—Ra tsa cua nacoo ñasiíhi tan quihin ra inga ñaha, cua coo cuatyí ra nu Nyoo. <sup>12</sup> Tacan tucu ñi ñaha: Tun nacoo ña tsi yí ña tan tindaha ña tsihin inga rayíi, juvin ñi cua coo tucu cuatyí ña —catyí ra Jesús.

**Nu nasoco ra Jesús tsi tsa nyihi**  
(Mt. 19.13-15; Lc. 18.15-17)

<sup>13</sup> Tacan tan tsindaca nyivi juhva tsa nyihi tsi ra Jesús tyin tyiso ra ndaha ra jiñi tsi naha tsi tan nasoco ra tsi naha tsi. Maa tyin ra tsicá tsihin ra quitsaha cuxaán ra naha tsi nyivi cuahán cuandaca tsa nyihi. <sup>14</sup> Maa tyin tsa nyehé ra Jesús tsa javahá ra naha tacan, cuxaán ra tsi ra naha, tan catyí ra:

—Cuhva ndo tsa quitsi tsa nyihi nu nyaá yu. Ña çasi ndo itsi naha tsi tyin nyivi ndacá ñaha Nyoo cuví ñi tumaa cuví tsa nyihi tyin tsinú iñi ñi tsi Nyoo. <sup>15</sup> Tan tsa nditsa catyí yu tsihin ndo tun ña cuita iñi nyivi tsi Nyoo tumaa nyitá iñi iin ra luhlu tsi jutu ra, ña cua cuví quihvi ñi nu ndacá ñaha Nyoo —catyí ra Jesús tsihin ra naha.

<sup>16</sup> Tacan tan quihin ra intuhun intuhun tsa nyihi can tan tyiso ndaha ra jiñi tsi naha tsi, tan tsican tahvi ra tsi Nyoo na nasoco ra itsi naha tsi.

**Nu tsaha cuenda ra Jesús tyin yíi xaan nacuhva cuenda iin ra cuca tsi ra tsi Nyoo**  
(Mt. 19.16-30; Lc. 18.18-30)

<sup>17</sup> Yahá yacan tan cuahán ra Jesús. Tan tsinú xaan iin rayíi cuahán ra cuanyicún ra tsi ra. Tsa tahan ra tsi ra, tsicuiñi tsiti ra nuu ra, tan tsicá tuhun ra tsi ra, tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayivi nyito tsa ña cua naa maa?

—catyí ra tsihin ra Jesús.

<sup>18</sup> Tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi ra vaha iyó tan ra ican cuví Nyoo. Tan tsa catyí un tyin vaha yu, nacotó un tyin Nyoo cuví yu. <sup>19</sup> Yooho tsitó un tsa catyí Nyoo tyin javaha yo: “Ña coo inga ñaha tsi un. Ña cahñi un nyivi. Ña suhu un. Ña cahan un cuendu. Ña jandavi ñaha un tsi nyivi. Tyaa yahvi tsi jutu un tan tsi síhi un” —catyí ra Jesús tsihin ra.

<sup>20</sup> Nacahan ra tan catyí ra:

—Maestro, tandíhi tuhun ihya tan tyaá yahvi yu itsi nda ndi luhlu yu tan nda cuanda vityin —catyí ra.

<sup>21</sup> Tacan tan síi cuñi ra Jesús nyehé ra tsi ra. Tan catyí ra tsihin ra:

—Intuhun ña tsa cumañi javaha un. Cuaahan yuvehe un tan xico un tandíhi tsa iyó tsi un, tan cuhva un xuhun can tsi nyivi ndaahvi. Tacan tan coo tsa cuca tsi un nda gloria. Yaha can tan quitsi un quitsi nyicun un tsi yu vasu ndi maa nyehe un tundoho tan cahñi nyivi tsi un —catyí ra Jesús tsihin ra.

<sup>22</sup> Tsa tsíñi ra tyuvaa can tsa cahan ra Jesús tacan, cuihaya xaan cuñi ra cuví, tan tsihin tucuihaya iñi cuanuhu ra yuvehe ra tyin cuca xaan ra.

<sup>23</sup> Tacan tan nanyehé ra Jesús naníi canduvi nu nyaá ra, tan catyí ra tsihin ra tsicá tsihin ra:

—¡Yíi xaan tan cuvi nacuhva cuenda nyivi cuca tsi ñi tsi Nyoo na cundaca ñaha ra tsi ñi! —catyí ra tsihin ra naha.

<sup>24</sup> Tsa tsíñi ra tsicá tsihin ra tsa caahán ra, iyo xaan cuñi ra naha cuví. Maa tyin catyí tucu ra tsihin ra naha inga tsaha:

—¡Sehe yu, nyivi tyaá xaan jiñi tandíhi tsa cuca, yíi xaan tan quihvi ñi nu ndacá ñaha Nyoo! <sup>25</sup> Yatyí ca cuví yaha iin camellu xuu iin yiquí tucu, tan ñavin ca tsa quihvi iin nyivi cuca nu ndacá ñaha Nyoo —catyí ra Jesús.

<sup>26</sup> Tsa tsíñi ra naha tuhun ihya, iyo xaan cuñi ra naha cuví, tan quitsaha tsicá tuhun tahan ra naha, tan catyí ra naha:

—Tun tacan, ¿yóo cua cacu? —catyí ra naha.

<sup>27</sup> Tacan tan nanyehé ra Jesús tsi ra naha tan catyí ra tsihin ra naha:

—Nyivi ña cuví javaha ñi tsehe, maa tyin Nyoo cuví javaha ra tyin tsa cuenda Nyoo nduve maa tsa yíi.

<sup>28</sup> Tacan tan catyí ra Pedro tsihin ra:

—Jutu Mañi yu, tandíhi maa tsa iyó tsi ndi nacoó ndi can tan nyicún ndi tsi un.

<sup>29</sup> Nacahan ra Jesús tan catyí ra:

—Tsa nditsa catyí yu tsihin ndo tyin tandihí nyooho tan tandihí inga ca nyívi tsa cua nacoó vehe, o yañi, o cuhva, o jutu, o sihi, o ñasihi, o sehe, o ñuhu, tsa cuenda yuhu tan tsa cuenda tsa jacoto ñi tsi nyívi tyin cuñí Nyoo jacacu ra tsi ñi, <sup>30</sup> cua ñihi ñi cientu ca tsaha síqui tsa nacoó ñi nu ñuhu ñayivi ihya. Cua ñihi ñi vehe, cua ñihi ñi nyívi cua cuvi yañi ñi, cuhva ñi, sihi ñi, sehe ñi, tan cua ñihi tucu ñi ñuhu ñi, vasu ndi maa cua janyehe nyívi tundoho tsi ñi. Tan nu inga ñuhu ñayivi tsa tsa vatsí, cua ñihi ñi ñayivi nyito tsa ña cua naa maa coo ñi. <sup>31</sup> Cuaha ñi nyívi cuahán ityi nuu vityin, cua cuhun ñi nda nu ndihí ña. Tan nyívi cuahán nu ndihí ña vityin, cuaha ñi cua cuhun ityi nuu —catyí ra Jesús.

**Nu jacotó nyico ra Jesús nácaa cua cahñi nyívi tsi ra**  
(Mt. 20.17-19; Lc. 18.31-34)

<sup>32</sup> Tsa tsa cuñí cuhun ra Jesús tan ra tsicá tsihin ra ñuu Jerusalén, cuahán ra Jesús ityi nuu tandihí nyívi tsa cuahán cuanyicún tsi ra. Iyo xaan cuñí ñi tan tsihin tsa yuuhví ñi cuahán ñi. Tacan tan tavá siin ra tsi tsa utsi uvi ra tsicá maa tsihin ra. Tan quitsahá catyí tuhun ra tsihin ra naha tsa cua tahan ra. <sup>33</sup> Tan catyí ra:

—Vityin tsa cua cuyatyin yo ñuu Jerusalén nu cua nacuhva cuenda nyívi tsi yuhu, Rayi quee nda gloria. Cua cuhva cuenda ñi tsi yu tsi ra jutu cuví ityi nuu naha ra, tan tsi ra maestro cuenda ley vehe ñuhu naha ra. Ra ihya naha ra cua catyí ra naha tyin taahán tsi cúu yu tan cua nacuhva cuenda ra naha tsi yu tsi ra ñuu Roma naha ra. <sup>34</sup> Cua vacu nducu ra naha tsi yu, cua cañi ra naha tsi yu, cua tiví si ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi —catyí ra Jesús.

**Nu tsicán ra Jacobo tan ra Juan iin tumañi iñi tsi ra Jesús**  
(Mt. 20.20-28)

<sup>35</sup> Tacan tan ra Jacobo tan ra Juan, sehe ra Zebedeo, natuhvá ra naha nu nyaá ra Jesús, tan catyí ra naha tsihin ra:

—Maestro, jaha tumañi iñi tan javaha un tsa cua ndacan ndi tsi un —catyí ra naha.

<sup>36</sup> Tacan tan tsicá tuhun ra Jesús tsi ra naha tan catyí ra:

—¿Náa cuñí ndo javaha yu?

<sup>37</sup> Tan nacahan ra naha tan catyí ra naha:

—Cuñí ndi tsa cuhva un cunyecu ndi tsihin un nu ndacá ñaha un, iin ndi xiin cuaha un, tan inga ndi xiin satyin un —catyí ra naha tsihin ra Jesús.

<sup>38</sup> Tacan tan catyí ra Jesús tsihin ra naha:

—Nyooho ña tsitó ndo náa tsicán ndo. ¿A cuví nyehe ndo tundoho tsa cua nyehe yuhu? ¿A cuví cúu ndo tumaa cua cúu yu? —catyí ra tsihin ra naha.

<sup>39</sup> Tan nacahan ra naha:

—Cuví maa.

Tan catyí ra Jesús

—Nditsa tyin cua nyehe ndo tundoho tan cua cúu ndo tumaa cua tahan yuhu. <sup>40</sup> Maa tyin tsa cunyaa iin ndo xiin cuaha yu tan iin ndo xiin satyin yu, ñavin yuhu

taahán tsi cuhva yacan, tyin maa Nyoo cua catyí yoo cua ñihi can —catyí ra Jesús tsihin ra naha.

<sup>41</sup> Tsa tsíñi tsa utsi ca ra tsicá tsihin ra Jesús yacan, cuxaan ra naha tsi ra Jacobo tan ra Juan. <sup>42</sup> Maa tyin caná ra Jesús tsi ra naha tan catyí ra tsihin ra naha:

—Tsa tsitó ndo tyin ra ndacá ñaha tsi nyívi iyó nu ñuhu ñayivi ihya, ñihi xaan ndacá ñaha ra naha tsi ñi.

<sup>43</sup> Maa tyin ñavin tacan taahán tsi javaha nyooho tyin ra tsa cuñí cuvi ra cahnu ityi nuu Nyoo, cuñí tsi cuvi ra musu tandihí ndo. <sup>44</sup> Tan nyooho tsa cuñí cuví ityi nuu, cuñí tsi cuví ndo musu tandihí ca ndo. <sup>45</sup> Tyin yuhu, Rayi tsa quee nda gloria, ña vatsí yu tyin cuñí yu jatyinyee nyívi tsi yu. Yuhu vatsí yu vatsí jatyinyee yu tsi maa ñi tan cuhva yu ñayivi yu tsa cuenda ñi tumaa iin tsa tyahvi yu tan jacacu yu cuaha ñi —catyí ra Jesús.

**Nu jananyehé ra Jesús tsi ra Bartimeo**  
(Mt. 20.29-34; Lc. 18.35-43)

<sup>46</sup> Tacan tan tsaá ra naha ñuu Jericó. Tan yaha ñi ra naha ñuu can. Tan cuhva tsa cua quita ra Jesús ñuu can tsihin ra tsicá tsihin ra, cuaha nyívi cuahán cua nyicun tsi ra naha. Tan ityi yahá ra naha nyaá iin ra cuaa nañi Bartimeo, sehe ra Timeo, tsicán ra caridaa. <sup>47</sup> Tan cuhva tsa tsitó ra cuaa can tyin tsa cua cuyatyin yaha ra Jesús, ra ñuu Nazaret, nu nyaá ra, quitsahá caná tsa ra, tan catyí ra:

—¡Jesús, tata ra David, cundaahvi iñi tsi yu! —catyí ra caná tsa ra.

<sup>48</sup> Tacan tan quitsahá cuxaan nyívi tsi ra tan catyí ñi tsihin ra na cutaxin ra, maa tyin cuñihí ca ra caná tsa ra tan catyí ra:

—¡Tata ra David, cundaahvi iñi tsi yu! —catyí ra.

<sup>49</sup> Tacan tan tsicuiñi ra Jesús tan catyí ra:

—Cuaquihin ndo tsi ra.

Tan tsiquihin ra naha tsi ra cuaa can tan catyí ra naha tsihin ra:

—Jandu iin iñi un. Nduvita, çohon tyin caná ra tsi un —catyí ra naha tsihin ra.

<sup>50</sup> Tacan tan janeñi ra jahma ndasi ra nda sava. Tan cuahan ra iin yaha ñi nda nu nyaá ra Jesús. <sup>51</sup> Tacan tan tsicá tuhun ra Jesús tsi ra:

—¿Náa cuñí un javaha yu?

Tan nacahan ra cuaa can tan catyí ra:

—Maestro, cuñí yu janduvaha un tinuu yu na nanyehé nyico yu —catyí ra.

<sup>52</sup> Tan catyí ra Jesús tsihin ra:

—Cuanuhu. Tsa nduvahá un tyin tsinú iñi un tsi yu.

Juvin ñi cuhva can tan nanyehé ra can. Tan cueta cuahán ra cuanyicún ra tsi ra Jesús.

**Nu quihví ra Jesús ñuu Jerusalén**  
(Mt. 21.1-11; Lc. 19.28-40; Jn. 12.12-19)

**11** Tsa tsa cuñi tsa ra Jesús tan nyívi nyicún tsi ra nda ñuu Jerusalén, yatyin nu canyíi ñuu Betfagé tan ñuu Betania, tan yatyin ñi yucu nu iyó yutun Olivo, tan catyí ra Jesús tsihin uvi ra tsicá tsihin ra:

<sup>2</sup> —Cuaahan ndo ñuu tsa canyíi ityi nuu ihya. Tsa tsa ndo ican cua nañihi ndo iin urru. Quiti yoco cuví ti,



nyaá ti nuuhñi ti, tan ñaha ca quihi tyayu ti. Ndatsi ndo tsi ti, tan quihin ndo tsi ti quitsi ndaca ndo tsi yu.

<sup>3</sup> Tatan cusana ndaca tuhun nyivi tsi ndo: “¿Nacuu ndo urru ihya?” Tacan tan catyi ndo tsihin ñi: “Tsiñi ñuhu ti tsi Jutu Mañi yo, maa tyin cua jaquitsi nyico ñi maa ra tsi ti”, catyi ndo tsihin ñi —catyi ra Jesús tsihin ra naha.

<sup>4</sup> Tacan tan cuahán ra naha, tan tsa tsaá ra naha, nañihí ra naha urru can nuuhñi ti tsitsi ityi tsata yuhu iin cora. Tan ndatsi ra naha tsi ti. <sup>5</sup> Tan catyi juhva ra yucú ican naha ra tsihin ra naha:

—¿Náa javahá ndo? ¿Nacuenda ndatsi ndo urru can? —catyi ra naha tsihin ra naha.

<sup>6</sup> Tacan tan nacahan ra naha tumaa cahán ra Jesús tsihin ra naha. Tan tsaá ra can naha ra quihin ra naha urru can. <sup>7</sup> Tacan tan tsindacá ra naha urru can tsi ra Jesús. Tyiso ra naha jahma ra naha tsata ti, tan tsicoso ra Jesús tsi ti. <sup>8</sup> Tan tsaquin cuaha nyivi jahma ñi tsitsi ityi nu yahá ra, tan inga ñi tsahnyá ñi ndaha yutun tan tsaquin ñi tsitsi ityi.

<sup>9</sup> Tacan tan nyivi tsa cuahán ityi nuu ra tan ityi tsata ra, quitsahá caná tsaá ñi tan catyi ñi:

—¡Cahnu xaan cuví Nyoo! ¡Na jacahnu yo tsi Jutu Mañi yo, ra tsa jaquitsi Nyoo! <sup>10</sup> ¡Na jacahnu yo tsi ra vatsi cundaca ñaha tumaa tsindacá ñaha ra David, tsii tsaahnu yo! ¡Cahnu xaan cuví ra nyaá gloria! —catyi ñi.

<sup>11</sup> Tacan tan quihví ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yahá nyehe ra tandihí tsa iyó nuquehe vehe ñuhu can, cuahán ra ñuu Betania tsihin tsa utsi uvi ra tsicá tsihin ra tyin tsa cueñi xaan.

#### Nu cahán ra Jesús tsi yutun higo tsa ña tsahá tsiti

(Mt. 21.18-19)

<sup>12</sup> Tsa tuvi inga quivi tsa quitá ra Jesús tan ra tsicá tsihin ra ñuu Betania, tsaá soco tsi ra Jesús. <sup>13</sup> Tsa quitá ra naha ndasava nyehe ra Jesús nu nyaá iin yutun higo tsa iyó numa. Tsaá ra tsinyehe ra tun ñi tsiti tun, maa tyin nduve tsiti tun, maa ñi maa ndaha tun iñi, tyin ñaha ca tahan tsi quivi cuhva tun tsiti. <sup>14</sup> Tacan tan cahán ra Jesús tsi tun, tan catyi ra:

—Ndi iin sava ca quivi ña cua quee ca tsiti catsi nyivi nuu un —catyi ra tsihin tun.

Tan tsiñi ra tsicá tsihin ra tsa caahán ra.

#### Nu jacunú ra Jesús nyivi xicó nuquehe vehe ñuhu cahnu

(Mt. 21.12-17; Lc. 19.45-48; Jn. 2.13-22)

<sup>15</sup> Tsa tsaá ra naha ñuu Jerusalén, cuahán nyico ra Jesús vehe ñuhu cahnu tan quitsahá jacunú ra nyivi xicó tan jatá tsa yucú nuquehe yuvehe ñuhu can. Janduvá ra mesa nu nyecú nyivi samá xuhun nyivi. Tan janduvá tucu ra tyayu nu nyecú nyivi xicó paloma. <sup>16</sup> Tan ña tsahá ca ra yaha sava ñi nuquehe vehe ñuhu can tsihin ndaha tyiñu. <sup>17</sup> Tan quitsahá jacuahá ra tsi nyivi, tan catyi ra:

—¿A ña tsitó ndo tyin nu tutu Nyoo catyi tsi tyin vehe Nyoo cua cunañi tsi tyehen: “vehe nu cua ndacan tahvi

nyivi quee nani nu ñuhu ñayivi tsi Nyoo”? Tan nyooho jananduví ndo itsi vehe ñasuhu —catyi ra tsihin ñi.

<sup>18</sup> Tsa tsiñi ra jutu cuví ityi nuu naha ra tan ra maestro cuenda ley vehe ñuhu naha ra tsa caahán ra, tan quitsahá nducú ra naha cuhva cahñi ra naha tsi ra tyin yuuhví ra naha nyehe ra naha tsi ra tsa cuenda tsa janahá ra tsi nyivi tan yuuhví tucu ra naha tyin tsa cuaha xaan nyivi nyicún tsi ra. <sup>19</sup> Maa tyin tsa tsa cuñi cuaa, quitá ra Jesús ñuu can tsihin ra tsicá tsihin ra.

#### Nu na ityi yutun higo

(Mt. 21.20-22)

<sup>20</sup> Tsa tuvi inga quivi, yahá nyico ra naha nu nyaá yutun higo tsa cahán ra Jesús. Tan nyehe ra naha tyin na ityi tun tan nda cuanda yoho tun na ityi. <sup>21</sup> Tacan tan tsa nyehe ra Pedro yutun higo can, nducuhun iñi ra tsa javahá ra Jesús tan catyi ra tsihin ra Jesús:

—¡Maestro, jihna! Tsa na ityi yutun tsa cahán un —catyi ra.

<sup>22</sup> Nacahan ra Jesús, tan catyi ra:

—Tsiñu iñi ndo tsi Nyoo. <sup>23</sup> Tyin tsa nditsa catyi yu tsihin ndo tyin nyivi cua cahan tsihin yucu ihya tyehen: “Cuatsiyo ihya tan cuaahan tsitsi ndutya ñuhu”, tan tatan tsinú iñi ñi tyin cua cundaa tsa cahán ñi tan ña uvi tsicá iñi ñi, cua cundaa tsi. <sup>24</sup> Yacan cuenda catyi yu tsihin ndo tyin tandihí tsa cua ndacan ndo tsi Nyoo tsa cua ndacan tahvi ndo tsi ra, tun tsinú iñi ndo tyin tsa naquihín cuenda ndo can, cua naquihin ndo can. <sup>25</sup> Tan tsa cua ndacan tahvi ndo tsi Nyoo, tun nducuhún iñi ndo tyin xaan cuñi ndo tsihin nyivi, jahá ndo tucahnu iñi tsi ñi, tyin tacan tan jaha Jutu ndo, ra nyaá gloria, tucahnu iñi tsi maa ndo tsa cuenda cuatyí ndo. <sup>26</sup> Maa tyin tun ña jaha ndo tucahnu iñi tsi nyivi, ndi Jutu ndo, ra nyaá gloria, tan ña cua jaha ra tucahnu iñi tsi maa ndo.

#### Nu tsicá tuhun ra cumí tyiñu vehe ñuhu naha ra tsi ra Jesús yóo tavá tyiñu tsi ra tsa cahan ra tsihin nyivi

(Mt. 21.23-27; Lc. 20.1-8)

<sup>27</sup> Tacan tan tsaá nyico ra naha ñuu Jerusalén. Tsa nyií ra Jesús tsicá nuu ra nuquehe vehe ñuhu cahnu, natuhvá ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra nu nyaá ra. <sup>28</sup> Tan tsicá tuhun ra naha tsi ra tan catyi ra naha:

—¿Yóo tavá tyiñu tsi un tsa javahá un tyehen? —catyi ra naha.

<sup>29</sup> Tan nacahan ra Jesús, tan catyi ra:

—Cuñi tucu yuhu ndaca tuhun yu tsa ndaca tuhun yu tsi nyooho. ¿Yóo jaquitsi tsi ra Juan tyin jacoondutya ra tsi nyivi? ¿A Nyoo o nyivi? Tatan catyi tuhun ndo tsihin yu yóo jaquitsi tsi ra, cua catyi tuhun tucu yuhu tsihin nyooho yóo tavá tyiñu tsi yu javahá yu tyehen —catyi ra Jesús tsihin ra naha.

<sup>31</sup> Tacan tan quitsahá cuahán yuhu tahan ra naha, tan catyi ra naha:

—Tun catyi yo tyin Nyoo jaquitsi tsi ra Juan, cua catyi ra tsihin yo tyehen: “Tun Nyoo jaquitsi tsi ra, ¿nacuen-

da ña tsinü iñi ndo tsa cahān ra?"<sup>32</sup> ¿A vaha tun catyí yu tyin nyivi jaquitsi tsi ra? Ña cuvi —catyí ra naha, tyin yuuhví ra naha tsi nyivi, tyin tandihí ñi tan tsinú iñi ñi tyin ndusu yuhu Nyoo cuví ra.

<sup>33</sup> Tacan tan catyí ra naha tsihin ra Jesús:

—Ña tsitó ndi.

Tacan tan catyí ra Jesús tsihin ra naha:

—Tun ña tsitó ndo, ndi yuhu tucu, tan ña cua catyí tuhun yu tsihin ndo yóo tava tyiñu tsi yu tsa javahá yu tyehen —catyí ra Jesús tsihin ra naha.

### Nu caahán ra Jesús tuhun ra ña vaha jaha tyiñu

(Mt. 21.33-46; Lc. 20.9-19)

**12** Tacan tan quitsahā caahán ra Jesús tsihin ra naha tsihin cuhva ihya, tan catyí ra:

—Tsicoq iin rayi tsa tatsi yoho yucu vixi tsa nañi uva, ra ican tyasi ra iin cora nani canduvi nu tatsi ra yucu vixi can. Tan javahā ra iin nu cua tava ra ndutya uvas can. Tan javahā tucu ra iin vehe sucun tyin tacan tan cuvi jaha cuenda ra nani cahnu nu ndaha tyiñu ra.

Tsa yahā yacan tan tsahā nuu ra ñuhu can tsi juhva rayi tyin jaha tyiñu ra naha tsihin tsi. Tacan tan cuahán ra inga ñuu.<sup>2</sup> Tsa tahān tsi quivi iyó uvas can, jacuhun ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra.<sup>3</sup> Maa tyin ra ican naha ra tñin ra naha tsi ra. Tan cañi ra naha tsi ra. Tan jacunuhu ra naha tsi ra tsihin ndaha ndi ra.<sup>4</sup> Tacan tan tsitoho ñuhu can jacuhun nyico ra inga musu, maa tyin cañi ra naha tsi ra can tsihin yuu, tan tahvi ra naha jiñi ra, tan cahān nyaa ra naha tsi ra.<sup>5</sup> Tsitoho ñuhu can jacuhun nyico ra inga musu. Tan tsahñi ra naha tsi ra. Yahā yacan tan cuaha ca ra naha jacuhun ra. Maa tyin cañi ra naha tsi juhva ra naha tan tsahñi ra naha juhva ca ra naha.

<sup>6</sup> Tan cumañi intuhun ña ra tsa cuví jacuhun ra. Tan ra ican cuví sehe ra tsa cuñi xaan ra. Nu ndihí tuhun jacuhun ra sehe ra tyin cuñi maa ra tsicá iñi ra: "Tun jacuhun yo sehe yo, cua tyaa yahvi ra naha tsi ra tyin sehe yo cuví ra", cuñi ra.<sup>7</sup> Maa tyin tsa nyehē ra jahá tyiñu can naha ra tsi ra sehe ra, natuhun tahan ra naha tan catyí ra naha: "Ra ihya cua naquihin cora ihya. Yacan vaha ca cahñi yo tsi ra, tan ndoo maa yo tsihin can", catyí ra naha.<sup>8</sup> Tacan tan tñin ra naha tsi ra tan tsahñi ra naha tsi ra. Tan tava ra naha cuñu ñuhu ra ityi tsata cora can —catyí ra Jesús.

<sup>9</sup> Tacan tan tsicā tuhun ra Jesús tsi ra naha tan catyí ra:

—¿Náa cua javaha tsitoho ñuhu can? Cua cuhun ra tan cua cahñi ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tsihin can.<sup>10</sup> ¿A ñaha ca cahví ndo nu tutu Nyoo nu catyí tsi tyehen?

Yuu tsa javitā ra javahá vehe naha ra, yacan cuví yuu tsa tsifí ñuhu ca.

<sup>11</sup> Maa Nyoo Jutu yo jahā tsa cahnu ca cuví yuu ihya. Tan iyo xaan cuñi yo nyehé yo can, catyí tsi —catyí ra Jesús tsihin ra naha.

<sup>12</sup> Tacan tan ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducū ra naha cuhva tyihi ra naha tsi ra Jesús vehe caa tyin tsitó ra naha tyin tuhun maa ra naha caahán ra tsa tsatyñu ra cuhva can. Maa tyin ña tñin ra naha tsi ra tyin yuuhví ra naha nyehe ra naha tsi nyivi. Nacoq ra naha tsi ra, tan cuahán ra naha.

### Nu caahán ra Jesús siqui tuhun tsa tyahví nyivi xuhun tsi ra ñuu Roma tsa ndacá ñaha tsi nyivi Israel

(Mt. 22.15-22; Lc. 20.20-26)

<sup>13</sup> Tacan tan jacuhun ra naha juhva ra yihi cuenda ra Herodes tan juhva ra fariseo naha ra nu nyii ra Jesús tyin nducu ra naha cuhva cahān ra Jesús iin tsa ña vaha tyin tacan tan cuvi tyaa ra naha cuatyí tsi ra.<sup>14</sup> Tsa tsaq ra can naha ra tan quitsahā caahán ra naha tsihin ra Jesús tan catyí ra naha:

—Maestro, tsitó ndi tyin tsa nditsa caahán un. Tan inducu ñi cuñi un nyehe un nyivi cuca tan nyivi ndaahvi. Tan nditsa tyin ityi Nyoo janahá un. Yacan cuenda cuñi ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi yo, ra tsa nyaá nda ñuu Roma, o ña vaha? ¿A taahán tsi tyahvi yo can, o ña taahán tsi? —catyí ra naha tsihin ra Jesús.

<sup>15</sup> Tan tsitó ra Jesús tyin ñavin tsa vaha tsicá iñi ra naha, yacan cuenda catyí ra tsihin ra naha:

—¿Nacuvi tyin nducú cuhva ndo tsi yu? Ndaca ndo iin xuhun tsi yu ihya, na nyehe yu —catyí ra.

<sup>16</sup> Tsindacā ra naha xuhun can tsi ra. Tsa nyehē ra can tan tsicā tuhun ra tsi ra naha, tan catyí ra:

—¿Yóo nuu tan yóo sivi nyaá tsata xuhun ihya? —catyí ra tsihin ra naha.

Nacahān ra naha tan catyí ra naha:

—Nuu ra ndacá ñaha tan sivi ra.

<sup>17</sup> Tacan tan catyí ra Jesús tsihin ra naha:

—Tun tacan, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi Nyoo —catyí ra Jesús tsihin ra naha.

Tan iyo xaan cuñi ra naha tsihin tsa nacahān ra.

### Nu cuñi ra saduceo naha ra jandavi ñaha ra naha tsi ra Jesús

(Mt. 22.23-33; Lc. 20.27-40)

<sup>18</sup> Tacan tan cuahán juhva ra saduceo naha ra nu nyii ra Jesús. Tan ra saduceo can naha ra catyí ra naha tyin ña cua nandoto nyivi. Yacan cuenda cahān ra naha tyehen tan catyí ra naha tsihin ra Jesús:

<sup>19</sup> —Maestro, ra Moisés tyaa ra nácaa taahán tsi javaha yo tatun iin rayi tsihi tan ndoo ñasiñi ra tan nduve sehe ña tsicoq tsihin ra. Catyí ra tyin taahán tsi tindaha yañi ra tsihin ñaha can. Tyin tacan tan cua coo sehe ra tsihin ña tsa cuenda ra yañi ra tsa tsihi.<sup>20</sup> Iin tsaha iin rayi tsicoq utsa sehe yii ra. Ra tsa jihna ñi tindaha ra tsihin iin ñaha, maa tyin nduve sehe ra tsicoq tsihin ña, tan tsihi ra.<sup>21</sup> Tacan tan tindaha ra yañi ra tsa tsinu uvi tsihin ñaha tsa ndoo can. Maa tyin juvin ñi ña tsicoq sehe ra tsihin ña tan tsihi ra. Juvin ñi tacan tahān tucu ra tsa tsinu uñi.<sup>22</sup> Tandihí tsa utsa ra naha tindaha ra

naha tsihin ñaha can. Tan ndi intuhun ra naha tan ña tsicoḡ sehe ra naha tsihin ña. Tan nu ndihî tuhun, tsihi ndihî maa ña. <sup>23</sup> Tan vityin, tun nditsa tsa cua nandoto nyivi, ¿ndáa tsa utsa taahan ra can naha ra cua cuvi yî ña quivi cua nandoto ñi? Tyin tandihî maa ra naha tan tindahaḡ ra naha tsihin ña —catyí ra naha tsihin ra Jesús.

<sup>24</sup> Tacan tan nacahan ra Jesús tan catyí ra tsihin ra naha:

—Caahán soho ñi maa nyooḡo, tyin ña tsitó ndo tsa catyí tuhun Nyoo, tan ndi ña tsitó ndo nácaa tsa cahnu cuví tunyee iñi tsa iyó tsi Nyoo. <sup>25</sup> Quivi cua nandoto nyivi, ndi ña cua tindaha ñi tan ndi ña cua tindaha sehe ñi, tyin cua cuvi ñi tumaa ángel iyó gloria. <sup>26</sup> Tan tuhun tsa cua nandoto nyivi, ¿a ñaha ca cahvî ndo nu libro tsa tyaḡ ra Moisés nu catyí tsi nácaa cahan Nyoo tsihin ra nu cayú yutun iñu? Tyin catyí ra tsihin ra tyehen: “Yuhu cuví Nyoo ra Abraham, ra Isaac, tan ra Jacob”, catyí Nyoo tsihin ra Moisés. <sup>27</sup> Ihya nyehé yo tyin nyito añima ra can naha ra vasu ndi maa tsanaha tsihi ra naha tyin Nyoo ñavin Nyoo nyivi tsihi cuví ra, tyin Nyoo cuví ra Nyoo nyivi nyito. Yacan cuenda catyí yu tyin nyooḡo caahán soho ñi maa ndo —catyí ra Jesús tsihin ra naha.

#### Ley tsa ñiñi ca tsa tsahaḡ Nyoo

(Mt. 22.34-40)

<sup>28</sup> Ña naha ñi tan tsaḡ iin ra maestro cuenda ley vehe ñuhu, tan tsiñî ra tsa caahán ra Jesús tsihin ra saduceo can naha ra. Tan cuhva tsa tsitḡ ra tyin ra Jesús vaha nacahan ra tsihin ra naha, tsicḡ tuhun ra tsi ra tan catyí ra:

—Tsitsi tsa tandihî ley, ¿ndáa tsa ñiñi ca cuñí tsi javaha yo? —catyí ra.

<sup>29</sup> Tan nacahan ra Jesús tan catyí ra:

—Ley tsa jihna ñi tan ñiñi ca cuñí tsi javaha yo tsa nuu tandihî ley, cuví ley ihya: “Nyooḡo nyivi Israel, tyaḡ soho ndo: intuhun ñi maa Nyoo Jutu yo iyó. <sup>30</sup> Cuñi ndo tsi Jutu Mañi yo Nyoo tsihin tsa ñi iñi ndo, tan tsihin tsa ñi iñi añima ndo, tan tsihin tandihî tsa tsiñi tuñi jiñi ndo, tan tsihin tandihî tunyee iñi tsa iyó tsi ndo.” Ley ihya cuví tsa ñiñi ca tan tsa jihna ñi taahán tsi javaha yo. <sup>31</sup> Tan tsa tsinu uvi tsa yatyin inducu ñi caahán tsi tsihin tsa jihna ñi tan catyí tsi tyehen: “Cuñi tahan ndo tsi ndo tumaa cuñí ndo tsi maa ndo.” Nduve ca ley tsa ñiñi ca javaha yo tsa nuu nduvi tsehe —catyí ra Jesús.

<sup>32</sup> Tacan tan ra maestro cuenda ley can catyí ra tsihin ra:

—Vaha xaan nacahan un, Maestro. Nditsa tsa caahán un. Intuhun ñi Nyoo iyó, tan nduve inga ca Nyoo iyó. <sup>33</sup> Tan tsa cuñí yo tsi Nyoo tsihin tsa ñi iñi yo, tan tsihin tandihî tsa tsiñi tuñi jiñi yo, tan tsihin tsa ñi iñi añima yo, tan tsihin tandihî tunyee iñi iyó tsi yo, tan tsa cuñí tahan yo tsi yo tumaa cuñí yo tsi maa yo, tandihî yacan tan cahnu ca cuví can tan ñavin ca tsa jamañí yo tsi Nyoo, tsa tsahñi yo quitî tan tsahmí yo can nu altar —catyí ra maestro cuenda ley can tsihin ra Jesús.

<sup>34</sup> Tsa nyehé ra Jesús tyin vaha nacahan ra tsihin tsa catsi jiñi ra, tan catyí ra tsihin ra:

—Luxu cuii ña tan ñihi un cuhva nácaa nacuhva cuenda un añima un tsi Nyoo na cundaca ñaha ra tsi un —catyí ra Jesús tsihin ra.

Ndi intuhun ca maa nyivi tan ña canḡ ca iñi ñi ndaca tuhun ñi náa ndaca tuhun ñi tsi ra Jesús.

#### Ra Cristo Sehe Nyoo tsi ra tan juvin ñi cuví tucu ra tata ra David

(Mt. 22.41-46; Lc. 20.41-44)

<sup>35</sup> Jacuahá ra Jesús tsitsi vehe ñuhu cahnu, tan catyí ra:

—¿Nacuenda tyin catyí ra maestro cuenda ley vehe ñuhu naha ra tyin tata ra David cuví ra Cristo? <sup>36</sup> Tan juvin ñi maa ra David catyí tuhun ra Cristo tyehen:

Nyoo cahan ra tsihin Jutu Mañi yu, tan catyí ra: “Cunyaa xiin cuaha yu ihya nda cuanda caquin yu tsi ra xaan iñi tsi un naha ra tsaha un”, catyí ra David tahañ tsanaha jahḡ Tatyí Ii Nyoo.

<sup>37</sup> ¿Nacaa cuví cuú tucu ra Cristo tata ra David, tan juvin ñi maa ra David catyí tyin ra Cristo cuví Jutu Mañi ra? —catyí ra Jesús.

Tan cuaha nyivi yucú tyaá soho tsa caahán ra tan sii xaan cuñí ñi.

#### Nu caahán ra Jesús tyin iyó cuaha cuatyí ra maestro cuenda ley vehe ñuhu naha ra

(Mt. 23.1-36; Lc. 11.37-54; 20.45-47)

<sup>38</sup> Quitsahḡ jacuahá ra Jesús tan catyí ra tyehen:

—Jaha ndo cuenda tsi ndo tsihin ra maestro cuenda ley vehe ñuhu naha ra, tyin taahán xaan iñi ra naha cunditsí ra naha jahma nañi tan caca nuu ra naha nuyahvi na jaha ndo tsa ñayivi tsi ra naha, tan cuhva ndo nacumi tsi ra naha. <sup>39</sup> Tan nanducú ra naha tyayu vaha ca cunyecu ra naha tsitsi vehe ñuhu. Tan tsa cua catsi ra naha nu iyó vico, nanducú ra naha nu vaha ca cunyecu ra naha. <sup>40</sup> Tan quihín nyaá ra naha vehe ñi ndaahvi tsa tsihi yî tyin ña cuví tyahvi ñi xuhun tsa tsicán ra naha tsi ñi. Tan cuñí ra naha tsa vaha cahan nyivi tuhun ra naha. Yacan cuenda naha tsicán tahvi ra naha tsi Nyoo nu tuvi nyivi. Maa tyin nduve náa catyí javahá ra naha tacan tyin ñihi ca cua tatsi tuñi Nyoo tsi ra naha —catyí ra Jesús.

#### Tsa tsahḡ ñaha ndaahvi tsihi yî

(Lc. 21.1-4)

<sup>41</sup> Iin tsaha nyii ra Jesús tsitsi vehe ñuhu cahnu tan nyaá ra yatyin ñi nu nyii tsatun nu tyihí nyivi xuhun tsa tsahá ñi tsi Nyoo. Tan nyehé ra nu tyihí nyivi xuhun tsitsi tsatun can. Tan cuaha nyivi cuca tyihí ñi cuaha xaan xuhun. <sup>42</sup> Tsitsi tsa nyaá ra ican tsaḡ iin ñaha ndaahvi tsihi yî, tan tyihî ña uvi taahan ñi xuhun nyihi tsa caaha xaan nyaá. <sup>43</sup> Tacan tan canḡ ra Jesús tsi ra tsicá tsihin ra, tan catyí ra tsihin ra naha:

—Tsa nditsa catyí yu tsihin ndo tyin nuu Nyoo cuaha ca xuhun tsahḡ ñaha ndaahvi ihya tan ñavin ca inga nyivi. <sup>44</sup> Tyin tsahá ñi tsa ndoḡ siqui xuhun ñi. Maa tyin

ñaha ihya tyihí ña tandihí tsa iyó tsi ña —catyí ra Jesús.

**Nu caahán ra Jesús tyin cua tani vehe ñuhu cahnu**

(Mt. 24.1-2; Lc. 21.5-6)

**13** Cuhva tsa cua quita ra Jesús tsitsi vehe ñuhu cahnu can, iin ra tsicá tsihin ra catyí ra tsihin ra: —¡Maestro, nyehe jihna tsa sii caá yuu yihí vehe ihya! ¡Nyehe tsa nahnu vehe ihya! —catyí ra tsihin ra Jesús.

<sup>2</sup> Maa tyin nacahan ra Jesús, tan catyí ra tsihin ra: —Nditsa nahnu vehe ihya tan sii caá tsi nyehé yo vityin. Maa tyin catyí yu tsihin un tyin coo quivi nduve ca maa náa cua ndoo ihya. Ndi intuhun yuu tan ña cua coso tahan tsi tsihin inga tsi, tyin tandihí maa tsi tan cua tani tsi —catyí ra Jesús.

**Nu tsahá cuenda ra Jesús náa cua cuvi tsa ndi cumañi ca naa ñuhu ñayivi**

(Mt. 24.3-28; Lc. 21.7-24; 17.22-24)

<sup>3</sup> Tacan tan cuahán ra Jesús tsihin ra tsicá tsihin ra yucu yutun Olivo tsa canyí inga tsiyo nu nditsin nyehé tsi vehe ñuhu cahnu. Tsa tsinyaá ra Jesús ican, ra Pedro, ra Jacobo, ra Juan, tan ra Andrés tsicá tuhun xeehe ra naha tsi ra tan catyí ra naha:

<sup>4</sup> —Cuñí ndi tsa catyí tuhun un tsihin ndi ama cua cuvi tandihí tsa cahán un. ¿Nacaa tan coto ndi tatun tsa cuyatyn cundaa tandihí can? —catyí ra naha.

<sup>5</sup> Nacahan ra Jesús tan catyí ra:

—Jaha ndo cuenda tsi ndo coto jandavi ñaha nyivi tsi ndo. <sup>6</sup> Tyin cuaha xaan nyivi cua quitsi, tan cua cuaty-iñu ñi sivi yu, tan cua catyí ñi: “Yuhu cuví ra Cristo, ra tsa jaquitsi Nyoo.” Tan cuaha xaan nyivi cua jandavi ñaha ñi.

<sup>7</sup> Maa tyin tun ñihi tuhun ndo tyin iyó cuatyí tan cañí tahan nyivi ityi can tan ityi ihya, ña nayuhvi ndo tyin tacan taahán maa tsi cuvi tsa ndi cumañi ca naa ñuhu ñayivi. <sup>8</sup> Tyin nyivi iin ñuu cua cañi tahan ñi tsihin nyivi inga ñuu, tan cua coo cuatyí iin ñuu tsihin inga ñuu. Tan cuaha ñi ityi cua taan ñihi, tan cua coo tama, tan cua nduvaa nyivi. Vasu ndi maa nyehe nyivi tundoho ihya, ña cua naa naha ñuhu ñayivi tyin ndi nyaa ca cua nyehe ñi tundoho.

<sup>9</sup> Maa tyin jaha ndo cuenda tsi ndo tyin cua cuhva cuenda nyivi tsi ndo tsi ra cumi tyiñu naha ra. Tan cua cañi ñi tsi ndo tsitsi vehe ñuhu. Cua cuhva cuenda ñi tsi ndo tsi ra cumi tyiñu tan tsi ra cuví rey tsacatyí yuhu. Tyin tacan tan cuvi cahan ndo tuhun yu nuu ra naha. <sup>10</sup> Tyin tsa ndi cumañi ca naa ñuhu ñayivi, cuñí tsi coto tandihí nyivi inga ñuu tyin Nyoo jacacú ra tsi nyivi. <sup>11</sup> Tan cuhva tsa cua cundaca ñi tsi ndo nuu ra cumi tyiñu naha ra, ña çaca iñi ndo náa cua cahan ndo. Tyin juvin ñi maa hora can tan cua cuhva Nyoo tsa cahan ndo. Tyin ñavin maa ndo cua cahan; tyin maa Tatyí Ii Nyoo cua cahan. <sup>12</sup> Yihí ra naha cua nacuhva cuenda ra naha juvin ñi maa yañi ra naha tan cua ndacan ra naha tsa cúu ra can naha ra. Yihí nyivi cua nacuhva cuenda ñi juvin ñi maa sehe ñi. Tan yihí ñi cua nacuhva cuenda ñi nda cuanda jutu ñi tan síhi ñi tyin cúu ñi.

<sup>13</sup> Tandihí nyivi iyó nu ñuhu ñayivi ndasi cua cuñi ñi

nyehe ñi tsi ndo tsacatyí yuhu. Maa tyin nyooho tsa cua cunyeé iñi tsinú iñi tsi yu nda nu ndihí, cua cacu ndo.

<sup>14</sup> Tandihí nyooho tsa cahví nu tutu Nyoo nu tyaa ra Daniel, ra cuví ndusu yuhu Nyoo tsa tsicoo tahan tsanaha, cütuñi iñi ndo tyin iyó tsa janducaquiñi tan tsa jativi. Quivi tsa nyehe ndo tyin tsa nyií yacan nu ña taahán tsi cunyí can, nyooho nyivi iyó Judea, quita ndo ñuu ndo tan cuhun ndo ityi yucu. <sup>15</sup> Nyooho tsa cua cuyucu jiñi vehe quivi can, cua nuu ndo, maa tyin ña cua nuu ndo tsa quihvi ndo tsitsi vehe ndo tan tava ndo tsa iyó tsi ndo. <sup>16</sup> Nyooho tsa cua cuyucu tsitsi cuhu, ña cua cunuhu jihna ndo cuquihin ndo jahma ndo. <sup>17</sup> ¡Ndahvi ñiñaha tsa ñuhú sehe quivi can! ¡Tan ndahvi ñi iyó sehe lee tsa ndi tyaxín! ¡Ndahvi ñi! <sup>18</sup> Nda-can tahvi ndo tsi Nyoo na ña tahan tsi cunu ndo quivi vitsin. <sup>19</sup> Tyin tundoho tsa cua nyehe nyivi quivi can, ñaha ca maa coo can ndaha tsinú maa ñuhu ñayivi nda cuanda vityin. Tan ndi ityi nuu ca tan ña cua nyehe nyivi tahan tundoho can inga tsaha. <sup>20</sup> Tun tsatyn Jutu Mañi yo tan ña jandihí ra tsa cua nyehe yo tundoho quivi can, yoñi maa cua cacu. Maa tyin cua jandihí ra can tsa cuenda tsa cuñí ra tsi nyivi yihí cuenda ra, nyivi nacatsi vaha maa ra.

<sup>21</sup> Tatun catyí nyivi tsihin ndo: “Jihna ndo, ihya nyaá ra Cristo” o “Nyehe ndo, ican nyaá ra Cristo”, ña tsinu iñi ndo. <sup>22</sup> Tyin cua quitsi nyivi jandavi ñaha tan cua catyí ñi tyin ra Cristo cuví ñi. Cua catyí ñi tyin ndusu yuhu Nyoo cuví ñi. Maa tyin ña nditsa ñi. Cua javaha ñi tsa nyityi, tan tsa iyo nahnu tyin cua jandavi ñaha ñi nda cuanda nyivi nacatsi maa Nyoo, tatun cunyeé ñi javaha ñi tacan. <sup>23</sup> Maa tyin nyooho jaha cuenda vaha ndo tsi ndo vityin tsa tsa tsitó ndo tandihí yacan tsa ndi cumañi ca tahan tsi quivi can —catyí ra Jesús.

**Nu jacoto ra Jesús nácaa cua quitsi nyico ra inga tsaha**

(Mt. 24.29-35, 42-44; Lc. 21.25-36)

<sup>24</sup> Tan catyí nyico ra Jesús tyehen:

—Maa tyin tsa cua yaha nyehe nyivi tundoho quivi can, cua ndunaa ñicanyii, yoo ña cua jandunditsin ca tsi, <sup>25</sup> tan cua cucoyo tiñuu. Tan tandihí tsa iyó andivi tan cua nacanda tsi naha tsi. <sup>26</sup> Tacan tan cua nyehe ndo tsi yuhu, Rayi tsa quee nda gloria, vatsí yu nu vico tsihin tunyee iñi cahnu tan tsihin tsa cahnu cuví Nyoo. <sup>27</sup> Tan cuaha ángel cuenda yu cua jaquitsi yu tyin jandu iin ra naha nyivi nacatsi maa Nyoo. Cua quita ñi nanñi cahnu nu ñuhu ñayivi, nda nu ndihí ñuhu ñayivi tan nda nu ndihí andivi.

<sup>28</sup> Cütuñi iñi ndo cuhva iyó yutun tsa nañí higo: Tun tsa nduyutyá soco tun tan cana ndaha yutya tun, tsitó ndo tyin tsa cua quee tsiti tun. <sup>29</sup> Tan juvin ñi tacan, tatun tsa cuví tandihí tsa iyo tsa caahán yu tuhun tsihin ndo, cua coto ndo tyin tsa cuyatyn quitsi yu; tan tsa nyanaá yu yuvehe cuví tsi. <sup>30</sup> Tsa nditsa catyí yu tsihin ndo tyin tsa ndi cumañi ca cúu nyivi iyó nu ñuhu ñayivi ihya tan cua cuvi tandihí tsa caahán yu tuhun tsihin ndo. <sup>31</sup> Tan coo quivi cua cundihí andivi tan cua cundihí ñuhu ñayivi, maa tyin tuhun caahán yuhu, ña

cua cundihi maa tsi tyin tandihi tsi tan cua cundaa tsi.  
<sup>32</sup> Maa tyin quivi tan hora tsa cua cuvi tandihi yacan, yofi maa tsitó can, ndi maa ca ángel tan ña tsitó ra naha, ndi yuhu tsa cuvi yu Sehe Nyoo tan ña tsitó yu. Intuhun ñi maa Nyoo Jutu yo tsitó ama cua javaha ra tandihi.

<sup>33</sup> Yacan cuenda ço nyito vaha ndo, tan jaha cuenda ndo tsi ndo, tan ndacan tahvi ndo tsi Nyoo, tyin ña tsitó ndo náa quivi tan náa cuhva cua quitsi nyico yu.  
<sup>34</sup> Tumaa iin rayii tsa cua cuhun nu cañi. Ra ican tsa ndi cumañi ca cuhun ra, tsahá cuenda ra vehe ra tsi musu ra. Tan tsahá ra tyiñu tsi intuhun intuhun ra naha. Tan tava tyiñu ra tsi ra jahá cuenda yuvehe na jaha cuenda vaha ra.  
<sup>35</sup> Yacan cuenda nyoocho ço nyito ndo tyin ña tsitó ndo náa cuhva cua quitsi yu tsa cuvi yu tumaa tsi-toho vehe can, tyin cuvi quitsi yu tsa cua cunaaha, maa ñuu, o cuhva tsacú tsitoocho, o tsa cua cana ñi-canyii.  
<sup>36</sup> Yacan cuenda çoonyito vaha ndo tan ña cusu ndo tyin sana iñi ndo tan cua quitsi yu.  
<sup>37</sup> Tsa caahán yu tsihin nyoocho, caahán tucu yu tsihin tandihi ca nyivi: Ço nyito ndo.

**Nu nducy ra jutu cuvi ityi nuu naha ra cuhva tiin ra naha tsi ra Jesús**

(Mt. 26.1-5; Lc. 22.1-2; Jn. 11.45-53)

**14** Tsa ndi cumañi uvi quivi ca tan tahan tsi vico pascua tan vico nu tuhvá nyivi tsatsí paan tsa nduve yutsan iya yihí. Ra jutu tsa cuvi ityi nuu naha ra tan ra maestro cuenda ley vehe ñuhu naha ra nducú ra naha cuhva tiin xeehe ra naha tsi ra Jesús tan cahñi ra naha tsi ra.  
<sup>2</sup> Maa tyin natuhun tahan ra naha tan catyí ra naha:

—Ña cua tiin naha yo tsi ra quivi maa vico tyin coto nduvaa xaan nyivi —catyí ra naha.

**Nu tyihí iin ñaha ndutya tami jiñi ra Jesús**

(Mt. 26.6-13; Jn. 12.1-8)

<sup>3</sup> Tsa ndi cumañi ca tahan tsi vico can, nyii ra Jesús ñuu Betania, vehe ra Simón, ra tsa tsindoho cuehe tyaahyu. Tsitsi tsa nyaá ra Jesús tsatsí ra, tsaq iin ñaha ndahá ña iin yutyi tsa tsinu tsihin yuu tsa nañi alabastro. Tsitu can yihí ndutya tami tsa nañi nardo. Tan yahvi xaan nyaá ndutya tami can. Nuñá ña yuhu yutyi can tan tava ña ndutya tami can tan tyihí ña can jiñi ra Jesús.  
<sup>4</sup> Maa tyin juhva ra tsa yucú ican naha ra nduxaan ra naha tan catyí ra naha:

—¿Nacuenda tyin jativi ñaha ihya ndutya tami can?  
<sup>5</sup> Tun tsatyin xico ña can, cuaha xaan xuhun cua ñihi ña tsihin can, tan cuvi jatinyee ña tsi nyivi ndaahvi tsihin xuhun can —catyí ra naha.

Tan cuxaan ra naha tsi ña.

<sup>6</sup> Maa tyin ra Jesús catyí ra:

—¡Jaña ndo tsi ña! ¿Nacuenda cuñi ndo jandu uvi iñi ndo tsi ña? Tan tsa vaha javahá ña tsihin yu.  
<sup>7</sup> Tyin nyivi ndaahvi tandihi ñi quivi cua cuyucu ñi tsihin ndo, maa tyin yuhu, ña naha ca cunyii yu tsihin ndo.  
<sup>8</sup> Ñaha ihya javahá ña ndihi cuhva cuvi ñi javahá ña. Tyihí ña ndutya tami cuñu ñuhu yu, tumaa tuhvá maa yo

javahá tsihin cuñu ñuhu nyivi tsa ndi cumañi ca quihvi ñuhu ñi.  
<sup>9</sup> Tsa nditsa catyí yu tsihin ndo, tyin tandihi ityi nu cua cahan nyivi tuhun Nyoo nani cahnu nu ñuhu ñayivi, cua cahan ñi tuhun ñaha ihya tan tsa javahá ña, tyin tacan tan ña naa iñi nyivi tsi ña —catyí ra Jesús.

**Nu xico ra Judas tsi ra Jesús**

(Mt. 26.14-16; Lc. 22.3-6)

<sup>10</sup> Tsa yahá yacan tan quitá iin ra tsitsi tsa utsi uvi ra tsicá tsihin ra Jesús. Ra ihya cuvi ra Judas Iscariote. Tsa-han ra tsicahan ra tsihin ra jutu cuvi ityi nuu naha ra, tan jandaq ra tyiñu tsihin ra naha tyin cua cuhva cuenda ra tsi ra Jesús tsi ra naha.  
<sup>11</sup> Cuhva tsa tsiñi ra naha tsa caahán ra, sii xaan cuñi ra naha cuvi, tan catyí ra naha tsihin ra tyin cuhva ra naha xuhun tsi ra. Tacan tan quitsahá nducú ra Judas cuhva cuhva cuenda ra tsi ra Jesús tsi ra naha.

**Nu cuxiñi ra Jesús tsihin ra tsicá tsihin ra**

(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Quivi jihna ñi tsa quitsahá vico nu tsatsí nyivi paan tsa nduve yutsan iya yihí tan quivi tuhvá ñi tsahñi mbee lee tan jamañi ñi tsi Nyoo, ra tsicá tsihin ra Jesús tsicá tuhun ra naha tsi ra, tan catyí ra naha:

—¿Numaa cuñi un cuhun ndi janduvaha ndi tsa cuxiñi un cuenda vico pascua ihya?

<sup>13</sup> Tacan tan tava tyiñu ra tsi uvi taahan ra naha tan catyí ra tsihin ra naha:

—Cyaahan ndo tsitsi ñuu, tan ican cua nañihi ndo iin rayii yosó soco iin quiyi ndutya. Tsa nyehe ndo tsi ra, cyanyicun ndo tsi ra.  
<sup>14</sup> Tsa tsaa ndo yuvehe nu cua quihvi ra, catyí ndo tyehen tsihin tsitoho vehe can: “Ra Maestro cuñi ra coto ra numaa nyaá cuarto nu cua jacahnu ra vico tsihin ra tsicá tsihin ra”, catyí ndo.  
<sup>15</sup> Tan cua janaha ra iin cuarto cahnu nu tsinu uvi pisu tsi ndo. Tsa nduvahá maa tsitsi tsi jahá ra, javaha ndo tsa cuxiñi yo tsitsi vehe can—catyí ra Jesús tsihin ra naha.

<sup>16</sup> Tacan tan cuahán ra naha. Tsa tsaq ra naha tsitsi ñuu can, nañihi ra naha tandihi maa cuhva catyí ra Jesús tsihin ra naha. Tan javahá ra naha tsa cua cuxiñi ra naha cuenda vico pascua.  
<sup>17</sup> Tsa ndihi javahá ra naha tsa cua cuxiñi ra naha, tacan tan cuahán nyico ra naha nu nyii ra Jesús. Tan tsa cunaaha, cuahán ra Jesús, cuacuxiñi ra tsihin tsa utsi uvi ra tsicá tsihin ra.  
<sup>18</sup> Tan cuhva tsa nyecú ra naha tsatsí ra naha nu mesa, tan catyí ra Jesús:

—Tsa nditsa catyí yu tsihin ndo tyin iin nyoocho tsa tsatsí tsihin yu cua xico tsi yu tsi ra xaan iñi tsi yu.

<sup>19</sup> Tacan tan nducuihyá xaan cuñi ra naha, tan quitsahá tsicá tuhun tan iin tan iin ra naha tsi ra, tan catyí ra naha:

—¿A yuhu?

Tacan tan tsicá tuhun tucu inga ra tan catyí ra:

—¿A yuhu?

<sup>20</sup> Tan nacahan ra Jesús tan catyí ra:

—Ña tandihi ndo. Intuhun ñi ra tsitsi tsa utsi uvi ndo. Tan ra ican cuvi ra tsa jatyi paan iin ñi tsitsi coho tsihin yu.  
<sup>21</sup> Tyin yuhu, Rayii tsa quee nda gloria, cua tahan

yu tumaa caahán maa nu tutu Nyoo tyin cua tahan yu. Maa tyin ¡ndahvi ra ndaahvi tsa cua xico tsi yu! Vaha ca tun tsatyin ña cacu ra —catyí ra Jesús.

<sup>22</sup> Tan tsitsi tsa tsatsí ra naha, tacan tan quihín ra Jesús iin paan tan nacuhva ra tyahvi nyoo tsi Nyoo tsa cuenda can, tan tsahnú sava ra can, tan tsaha ra can tsi ra tsicá tsihin ra, tan catyí ra:

—Catsi ndo paan ihya tyin tsehe cuví tumaa cuñu ñuhu yu —catyí ra tsihin ra naha.

<sup>23</sup> Tsa yahá yacan quihín ndihí ra vasu nu yihí vinu. Tsa yahá tsahá ra tyahvi nyoo tsi Nyoo, tacan tan tsahá ra can tsi ra naha. Tandihí ra naha tan tsihí ra naha vinu tsa yihí tsitsi vasu can. <sup>24</sup> Tan catyí ra tsihin ra naha:

—Vinu ihya cuví tumaa niñi yu tyin tsihin niñi yu cua ndoo Nyoo tuhun tsa tsihin ndo tyin cua catí niñi yu tsa cuenda tsa vaha tsi nyooho tan tsa vaha tsi cuaha nyivi. <sup>25</sup> Tsa nditsa catyí yu tsihin ndo tyin ña cua coho ca yu vinu tsa cuví ndutya yucu vixi uva, nda cuando coho yu vinu tsa nda nu ndacá ñaha Nyoo quivi tsa yu ndacan —catyí ra Jesús tsihin ra naha.

### Nu jacotó ra Jesús tyin cua cahan ra Pedro tyin ña nacotó ra tsi ra

(Mt. 26.30-35; Lc. 22.31-34; Jn. 13.36-38)

<sup>26</sup> Tsa ndihí tsitá ra naha yaa Nyoo, tan cuahán ra naha yucu yutun Olivo. <sup>27</sup> Tacan tan catyí ra Jesús tsihin tandihí ra naha:

—Tandihí maa ndo tan cua nacoó ihñi ndo tsi yu tsa cuaa vityin tyin catyí nu tutu Nyoo tyehen: “Tandihí mbee ticatyí jana yu cua cuhun tsiyo ti naha ti siin siin ityi tyin cua cahñi yu tsi ra jahá cuenda tsi ti naha ti”, catyí tsi. <sup>28</sup> Maa tyin tsa yaha nandoto yu, jihna ca yu cua cuhun Galilea tsa ndi cumañi ca cuhun nyooho —catyí ra Jesús tsihin ra naha.

<sup>29</sup> Tacan tan catyí ra Pedro tsihin ra:

—Vasu ndi maa nacoó ihñi tandihí ra naha tsi un, maa tyin yuhu ña cua nacoó ihñi maa yu tsi un —catyí ra tsihin ra Jesús.

<sup>30</sup> Maa tyin ra Jesús catyí ra tsihin ra:

—Tsa nditsa catyí yu tsihin un, tyin tsa cuaa vityin, tsa ndi cumañi ca vacu tsitooho tsa tsinu uvi tsaha, uñi tsaha cua cahan un tyin ña nacotó un tsi yu —catyí ra Jesús tsihin ra Pedro.

<sup>31</sup> Maa tyin jañiñi ra Pedro tan catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra Pedro. Tan juvin ñi tacan catyí tandihí ca ra naha.

### Nu nyíí ra Jesús Getsemaní tsicán tahvi ra tsi Nyoo

(Mt. 26.36-46; Lc. 22.39-46)

<sup>32</sup> Tacan tan tsaá ra Jesús tan ra tsicá tsihin ra iin nu nañí Getsemaní. Tan catyí ra Jesús tsihin ra naha:

—Ndo ndo ihya tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

<sup>33</sup> Tan quihín ra tsi ra Pedro, ra Jacobo tan ra Juan cuahán tsihin ra. Tan tsaá tucuihya iñi cahnu tsi ra tan tuñu cuñí ra. <sup>34</sup> Tan catyí ra tsihin ra naha:

—Cuihya xaan cuñí yu; cahñi ña maa tucuihya iñi ihya tsi yu, cuñí yu. Ndo ndo ihya, tan ña cusu ndo —catyí ra.

<sup>35</sup> Tacan tan cuahán ra luxu ca ityi nuu. Tan tsicuiñi tsiti ra nu ñuhu tan tsaquin ra nuu ra nda nu ñuhu. Tan tsicán tahvi ra tsi Nyoo tan catyí ra:

—Tun tsatyin cuvi ña cuhva un nyehe yu tundoho tsa cua nyehe yu —catyí ra tsicán tahvi ra.

<sup>36</sup> Tan tsa tsicán tahvi ra, catyí ra:

—Jutu Mañi yu, tsa cuenda yooho nduve tsa ña cuví javaha un. Tun yooho tan cuñí un cuví jatsiyo un tundoho ihya siqui yu. Maa tyin na cuví maa cuhva cuñí maa un, tan ñavin cuhva cuñí maa yu —catyí ra Jesús tsicán tahvi ra.

<sup>37</sup> Tacan tan cuahán ra nu nacoó ra tsi uñi ra tsicá tsihin ra. Tsa tsaá ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cunyeé iñi un coo nyito un tsihin yu ndi intuhun hora? <sup>38</sup> Ña cusu ndo; ndacan tahvi ndo tsi Nyoo, tyin tacan tan ña cua javaha ndo cuhva cuñí nu ña vaha. Tsa nditsa tyin añi-ma ndo cuñí xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñí —catyí ra Jesús tsihin ra naha.

<sup>39</sup> Tacan tan cuahán nyico ra inga tsaha. Tan tsicán tahvi ra tsi Nyoo juvin ñi tsihin tuhun tsa cahan ra tsa jihna ñi. <sup>40</sup> Tacan tan tsaá nyico ra inga tsaha, nu yucú ra naha tan nyehe ra tyin quixí nyico ra naha, tyin tsindasí maa tinuu ra naha jahá ñumaahna. Tan ña tsitó ra naha náa nacahan ra naha tsihin ra. Ndi maa ra tan ña cahan ca ra. <sup>41</sup> Tan cuahán nyico ra. Tsa tsaá ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan quitatu ndo tyin tsa cundaq tyiñu. Ra tsa cua cuhva cuenda tsi yu tsi ra xaan iñi tsi yu naha ra tsa vatsí ra tyin tsa tahanan tsi hora tsa cua cuhva cuenda ra tsi yuhu, Rayi tsa quee nda gloria.

<sup>42</sup> Nduvita ndo, çohon ndo tyin tsa vatsí ra tsa xico tsi yu —catyí ra Jesús tsihin ra naha.

### Nu tsahá cuenda ra Judas tsi ra Jesús tsi nu xaan iñi tsi ra nahnu

(Mt. 26.47-56; Lc. 22.47-53; Jn. 18.2-11)

<sup>43</sup> Ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra; cuaha xaan nyivi jacuhun ra naha tsihin ra Judas, iin ra tsicá tsihin ra Jesús, tyin tiin ñi tsi ra Jesús. Juhva ñi ndahá mityi tan juhva ñi ndahá yutun. Ndi caahán ca ra Jesús nyaá ra tan tsaá ra Judas tsihin nyivi cuaha can. <sup>44</sup> Tsa ndi cumañi ca cuhun ra Judas, ra tsa xico tsi ra Jesús, tsa catyí maa ra tsihin nyivi náa cua javaha ra tan coto ñi ndáa ra cuvi ra Jesús. Tan cahan ra tyehen:

—Ra tsa cua tyaa yuhu yu, ra ican cuví ra Jesús tsa cua quihin ndo. Quihin ndo tsi ra tan jahá cuenda vaha ndo coto cunu ra —catyí ra nu quitsí tsi.

<sup>45</sup> Tsa tsaá ra Judas nu nyíí ra Jesús natuhva ra nu nyaá ra tan catyí ra tsihin ra:

—Maestro.

Tan tyaa yuhu ra tsi ra. <sup>46</sup> Tacan tan quihjin ra naha tsi ra Jesús cuahán tsihin ra naha.

<sup>47</sup> Maa tyin iin ra nyii tsihin ra Jesús, tava ra mityi ra tan tsahnyā ra soho musu ra jutu tsaahnu cuví ityi nuu.

<sup>48</sup> Tacan tan catyí ra Jesús tsihin ra quihjin tsi ra: —¿A ñasuhu cuví yuhu? tyin vatsí ndo vatsí quihin ndo tsi yu tsihin mityi tan yutun. <sup>49</sup> Ndihi quivi tsinyii yu jacuahā yu tsi ndo tsitsi vehe ñuhu cahnu, tan ña quihjin ndo tsi yu. Tandihí tsehe cuví tyin tacan tan cundaa tsa catyí nu tutu Nyoo —catyí ra Jesús tsihin ra naha.

<sup>50</sup> Tacan tan tsinū tandihí ra tsicá tsihin ra, tan ndoo intuhun ña maa ra jahā ra naha. <sup>51</sup> Maa tyin ndoo intuhun ca ra tyuvaa tan cuahán ra cuanyicún ra tsi ra, ndasi ra tsihin iin ticatyí tan tññ ndihí ra naha tsi ra.

<sup>52</sup> Maa tyin nacoō ihñi ra ticatyí can tan tsinū tandihí ra.

### Nu tsicā tuhun ra mandoñi naha ra tsi ra Jesús tun juvin Sehe Nyoo tsi ra

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Tacan tan tsindacā ra naha tsi ra Jesús tsi ra jutu tsaahnu cuví ityi nuu tan ndu iin tucu tandihí ra jutu cuví ityi nuu naha ra tan ra cuví mandoñi nyivi Israel naha ra, tan ra maestro cuenda ley vehe ñuhu naha ra.

<sup>54</sup> Ra Pedro nyicún tsica nyicún tsica ñi ra tsi ra naha cuahán ra. Tan tsaā ra nda nuquehe yuvehe ra jutu tsaahnu cuví ityi nuu can. Tan ndoo ra tuñū ra ñuhu tsihin ra vitya naha ra.

<sup>55</sup> Ra cuví jutu ityi nuu naha ra, tan tandihí ca ra cumí tyiñu naha ra nducú ra naha cuatyí tyaa ra naha siqui ra Jesús, tyin tacan tan cuví cahñi ra naha tsi ra. Maa tyin ña ñihí maa ra naha cuatyí tyaa ra naha tsi ra.

<sup>56</sup> Cuaha xaan nyivi cahān cuendu siqui ra, maa tyin ña nacatsí tahan maa tuhun caahán ndi intuhun ñi. <sup>57</sup> Yihí ñi nduvitā ñi tan cahān ñi maa ñi maa cuendu siqui ra, tan catyí ñi:

<sup>58</sup> —Nyuhu tsiñi ndi tsa cahān ra tan catyí ra tyehen: “Yuhu cua caní yu vehe ñuhu cahnu tsa javahā nyivi. Tan cua janduvita yu inga vehe ñuhu tsitsi tsa uñi quivi ñi. Maa tyin ñavin tahan vehe ñuhu tsa javahā nyivi” catyí ra —catyí ñi.

<sup>59</sup> Vasu ndi maa tacan caahán ñi, maa tyin ña nacatsí tahan maa tsa cahān ñi.

<sup>60</sup> Tacan tan nduvitā ra jutu tsaahnu cuví ityi nuu mahñu tandihí ra yucú ican naha ra, tan tsicā tuhun ra tsi ra Jesús, tan catyí ra:

—¿A ña cua nacahan un nu caahán nyivi ihya? ¿A nditsa tsa caahán ñi, o ña nditsa? —catyí ra

<sup>61</sup> Maa tyin ña nacahan maa ra Jesús tan nduve maa náa cahān ra. Tacan tan ra jutu tsaahnu cuví ityi nuu tsicā tuhun ra tsi ra inga tsaha, tan catyí ra:

—¿A yooho cuví ra Cristo, Sehe Nyoo ii tsa tsahá tsa vaha?

<sup>62</sup> Tan ra Jesús catyí ra tsihin ra:

—Juvín. Nyooho cua nyehe ndo tsi yuhu, Rayi tsa quee nda gloria, nyaá yu xiin cuaha Nyoo, ra iyó tandihí tunyee iñi, tan cua nyehe tucu ndo nu quitsi yu nu vico ityi andivi —catyí ra tsihin ra.

<sup>63</sup> Tacan tan tsahnyā ra jutu tsaahnu cuví ityi nuu jahma ra tumaa iin seña tyin ña taahán iñi ra tsa caahán ra Jesús tyin cuñi maa ra tyin ña vaha tsa caahán ra, tan catyí ra:

—Ña tsiñi ñuhu ca tsa nducu yo tsi ra cuví tsa ndaa.

<sup>64</sup> Tyin tsa tsiñi maa ndo tsa cahān ra. Tsicoō cuatyí ra nuu Nyoo tsihin tuhun cahān ra. ¿Náa catyí ndo vityin? —catyí ra.

Tacan tan nacahan tandihí ra naha tan catyí ra naha tyin taahán tsi cúu ra.

<sup>65</sup> Tacan tan quitsahā tiví sii juhva ra naha tsi ra. Tyasi ra naha nuu ra, tan cañi ra naha tsi ra tsihin tsiqui tan catyí ra naha tsihin ra:

—¡Cahan tsihin ndi yóo cañi tsi un! —catyí ra naha tsihin ra.

Tan cañi tucu ra vitya naha ra nuu ra.

### Nu cahān ra Pedro tyin ña nacotó ra tsi ra Jesús

(Mt. 26.69-75; Lc. 22.56-62; Jn. 18.15-18, 25-27)

<sup>66</sup> Tsitsi tsa ndi nyii ra Pedro nuquehe tsata vehe ra jutu tsaahnu cuví ityi nuu, tsaā iin ñaha cuví musu ra jutu can. <sup>67</sup> Cuhva tsa nyehe ñaha can tsi ra Pedro nyaá ra tuñū ra ñuhu, quitsahā nyehé xaan ña tsi ra, tan catyí ña tsihin ra:

—Tsicā tucu yooho tsihin ra Jesús, ra ñuu Nazaret can —catyí ña tsihin ra.

<sup>68</sup> Maa tyin ra Pedro tyihí xeehe ra, tan catyí ra:

—Yuhu ña nacotó yu tsi ra can, tan ndi ña tsitó yu náa caahán un —catyí ra tsihin ña.

Tacan tan quitā ra ityi yuhu cora. Tan tsacū ñi tsi-tooho. <sup>69</sup> Tacan tan ñaha can nanyehé nyico ña nu nyaá ra inga tsaha tan catyí ña tsihin ra nyecú ican naha ra:

—Ra vaha iñi tsi ra can cuví ra ihya —catyí ña.

<sup>70</sup> Maa tyin tyihí xeehe nyico ra inga tsaha. Tacan tan ña naha ñi tan catyí ra yucú ican naha ra tsihin ra Pedro:

—Nditsa tyin ra vaha iñi tsi ra can cuví yooho, tyin ra Galilea cuví un, tan caahán un tumaa caahán nyivi Galilea —catyí ra naha tsihin ra.

<sup>71</sup> Tacan tan iyo xaan caahán ra Pedro, tan catyí ra:

—¡Tsitó vaha maa Nyoo tyin ña nacotó yu tsi ra tsa caahán ndo tuhun! ¡Na cahñi maa Nyoo tsi yu tun ña nditsa yu tsa caahán yu! —catyí ra.

<sup>72</sup> Juvín ñi cuhva can navacū tsitooho tsa tsinu uvi tsaha. Tacan tan nducuhun iñi ra Pedro tsa cahān ra Jesús tsihin ra: “Tsa ndi cumañi ca vacu tsitooho uvi tsaha, yooho tsa yahā cahān un uñi tsaha tyin ña nacotó un tsi yu.” Tsa nducuhun iñi ra Pedro tsehe, quitsahā ra tsacú ra.

### Nu jaqueé yuhu ra Pilato tsi ra Jesús

(Mt. 27.1-2, 11-14; Lc. 23.1-5; Jn. 18.28-38)

**15** Tan tsa tuví inga quivi ndu iin ra jutu cuví ityi nuu naha ra tsihin ra mandoñi naha ra tsihin ra maestro cuenda ley vehe ñuhu naha ra, tan tandihí ca ra cumí tyiñu tsa yihí ndaha tsi nyivi Israel. Nuuhñi ñi

maa ra Jesús tan tsindacá ra naha tsi ra nuu ra Pilato.

<sup>2</sup> Tan tsicá tuhun ra Pilato tsi ra, tan catyí ra:

—¿A juvin un cuví rey nyivi Israel?

Nacahan ra Jesús tan catyí ra:

—Juvín yu, tumaa caahan maa un.

<sup>3</sup> Tan cuaha xaan cuendu cahan ra cuví jutu ityi nuu naha ra siqui ra Jesús. <sup>4</sup> Tacan tan tsicá tuhun nyico ra Pilato tsi ra inga tsaha, tan catyí ra:

—¿A ña cua nacahan maa un? Nyehe, cuaha xaan cuatyí tyaá ra naha siqui un —catyí ra.

<sup>5</sup> Maa tyin ra Jesús ña nacahan maa ra. Yacan cuenda ña ñihí ra Pilato náa cahan ra.

### Nu tsahá ra Pilato ndatu tsa cúu ra Jesús

(Mt. 27.15-31; Lc. 23.13-25; Jn. 18.38—19.16)

<sup>6</sup> Vico pascua tuhvá ra Pilato nacoó nuña iin ra yucú vehe caa. Tan tavá ra ndáa ra cuñí maa nyivi tyin tava ra. <sup>7</sup> Quivi can nyíi iin ra nañí Barrabás vehe caa, tsihin inga ca ra tsahñí nyivi nu cuvaá nyivi siqui ra ndacá ñaha. <sup>8</sup> Tan tsahan nyivi tsicahan ñi tsihin ra Pilato na jaña ra iin ra yucú vehe can tumaa tuhvá maa ra javahá. <sup>9</sup> Tan nacahan ra Pilato, tan catyí ra:

—¿A cuñí ndo tsa jaña yu tsi ra cuví Rey ndo?

<sup>10</sup> Tacan cahan ra tyin tuví iñi ra tyin tsahá cuenda ra jutu cuví ityi nuu naha ra tsi ra Jesús tsi ra tsa cuenda tsa ndasi cuñí ra naha nyehe ra naha tsi ra tyin cuaha nyivi nyicún tsi ra. <sup>11</sup> Maa tyin ra jutu cuví ityi nuu can naha ra natyuhú ra naha tsi nyivi tsa cahan ñi na tava ra Pilato tsi ra Barrabás vehe caa. <sup>12</sup> Tacan tan tsicá tuhun ra Pilato tsi ñi, tan catyí ra:

—¿Tun tacan, náa cuñí ndo javaha yu tsihin ra tsa javanañi ndo Rey cuenda ndo? —catyí ra tsihin ñi.

<sup>13</sup> Tacan tan caná tsaa ñi, tan catyí ñi:

—¡Tyaa tsi ra nu cruu na cúu ra! —catyí ñi.

<sup>14</sup> Tan catyí ra Pilato tsihin ñi:

—Maa tyin, ¿náa tsa ña vaha javahá ra? —catyí ra.

Ñi ican quitsahá caná tsaa nyico ñi tan catyí ñi:

—¡Tyaa tsi ra nu cruu na cúu ra! —catyí ñi.

<sup>15</sup> Tacan tan tsa cuñí ra Pilato ndoo vaha ra nuu nyivi, tavá ra tsi ra Barrabás vehe caa. Tsa yahá tavá ra tsi ra can, tavá tyiñu ra na ndoho ra Jesús. Tsa yahá ndohó ra Jesús, tan tsahá cuenda ra tsi ra tsi andaru na ticaa ra naha tsi ra nu cruu.

<sup>16</sup> Tacan tan tsindacá ra andaru can naha ra tsi ra nuquehe vehe tyiñu. Tan jandu iin ra naha tandihí ca andaru. <sup>17</sup> Tan jacunditsí ra naha iin jahma cuaaha tu-un tsi ra. Tan javahá ra naha iin corona iñu. Tan tyihí ra naha can jiñi ra. <sup>18</sup> Tsa yahá yacan tan quitsahá caná tsaa ra naha tsata ra tan tsacú nducu ra naha tsi ra, tan catyí ra naha:

—¡Nacumi tsi un, yoocho Rey nyivi Israel! —catyí ra naha.

<sup>19</sup> Tan cañi ra naha jiñi ra tsihin yutun, tan tiví sñi ra naha tsi ra. Tan tsicuiñí tsití ra naha nuu ra jahá ra naha tyin jacahnú ra naha tsi ra. <sup>20</sup> Tsa yahá tsacú nducu ra naha tsi ra, tavá ra naha jahma cuaaha tuun tsa jacunditsí ra naha tsi ra. Tacan tan jacunditsí nyico ra na-

ha jahma maa ra tsi ra. Tan cuahán ra naha tsihin ra cuaticaa ra naha tsi ra nu cruu.

### Nu tyaa ra naha tsi ra Jesús nu cruu

(Mt. 27.32-44; Lc. 23.26-43; Jn. 19.17-27)

<sup>21</sup> Ityi cuahán ra naha tsihin ra naha iin ra ñuu Cirene tsa nañí Simón. Tan cuví ra jutu ra Alejandro tan ra Rufo. Ndi vatsí nuhu ra quee ra cuhu. Cuhva tsa cua yaha ra, jañiñi ra andaru naha ra tsi ra na cuisó ra cruu ra Jesús.

<sup>22</sup> Tan tsindacá ra naha tsi ra Jesús iin nu nañí Gólgota, tan cuñí tsi catyi Yiquí Jiñi Ndiyí. <sup>23</sup> Tan ican jacohó ra naha vinu sacá nuu tsihin numeri tsa nañí mirra tsi ra. Maa tyin ra Jesús ña cuñí ra coho ra can. <sup>24</sup> Tsa yahá tyaa ra andaru naha ra tsi ra nu cruu, quihín ra naha jahma ra tan tavá cuenda ra naha tyin cuñí ra naha co-to ra naha yoo cua jaha canaa intuhun intuhun jahma can.

<sup>25</sup> Tyaa ra naha tsi ra nu cruu caa iin tsa tuvi. <sup>26</sup> Tan letra tsa tyaa ra naha jiñi cruu ra, catyí tsi nacuenta cua cúu ra. Tan catyí tsi tyehen: “Ra ihya cuví Rey nyivi Israel.” <sup>27</sup> Tan tyaa ndihí ra naha uvi taahan ñasuhu tsihin ra. Iin iin ra naha tsi iin nu cruu. Iin ra xiin cuaha ra, tan inga ra xiin satyin ra. <sup>28</sup> Tacan cuví tan cundaá cuhva catyí nu tutu Nyoo tyehen: “Javahá nyivi tsihin ra tumaa javahá ñi tsihin ra caquiñi.” <sup>29</sup> Tan nyivi yahá ican jacuñí nyaa ñi tsi ra, tan javicó ñi jiñi ñi tsa tsacú nducu ñi tsi ra, tan catyí ñi:

—¡Jaan! ¡Yoocho tsa cahan tyin cua caní un vehe ñuhu cahnu, tan tsitsi tsa uñi quivi cua janduvaha nyico un itsi, <sup>30</sup> jácacu tsi un vityin tan nyu nu cruu juvin! —catyí ñi.

<sup>31</sup> Tan juvin ñi tacan tsacú nducu tucu ra jutu cuví ityi nuu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyí ra naha:

—¡Jacacu ra tsi inga ca nyivi, maa tyin ña cuví jacacu ra tsi maa ra! <sup>32</sup> Tun nuu ra nu cruu vityin nyehe yo, tacan tan cua tsinu iñi yo tyin juvin ra cuví ra Cristo, Rey cuenda yo tsa cuví yo nyivi Israel —catyí ra naha.

Tan nda cuanda nu ñasuhu tsa ticaá nu cruu nduvi tsiyo xiin ra tan tsacú nducu ndihí nahnu tsi ra.

### Nu tsihi ra Jesús

(Mt. 27.45-56; Lc. 23.44-49; Jn. 19.28-30)

<sup>33</sup> Cuhva tsa cua tahan hora, ndunaá naniñi cahnu nda cuanda caa uñi tsa tseñi. <sup>34</sup> Tan juvin ñi cuhva can caná tsaa ra Jesús tsihin tandihí tunyee iñi ra, tan catyí ra:

—Eloi, Eloi, ¿lama sabactani? —tan cuñí tsi catyí: Nyoo Jutu yu, Nyoo Jutu yu, ¿nacuenta nacoó ihñi un tsi yu? —catyí ra.

<sup>35</sup> Juhva ra yucú ican naha ra tsiñi ra naha tsa cahan ra tan catyí ra naha:

—¡jihna ndo! Caná tsaa ra tsi ra Elías, ra cuví ndusu yuhu Nyoo tsihin tsanaha —catyí ra naha.

<sup>36</sup> Tacan tan tsinú xaan iin ra tsihihin ra iin yahma tsa caá tumaa caá catyí, tan jatyiñi ra can tsihin vinu iya.



Tan tyaq̄ ra can iin nu yutun tan jatuhv̄a ra yuhu ra Jesús tyin coho ra vinu can, tan catyí ra:

—Na cuatu nuu yo. Nyehe yo tun quitsi ra Elías januu ra tsi ra nu cruu can —catyí ra.

<sup>37</sup> Tacan tan ñihi xaan canq̄ tsa ra Jesús, tan tsihi ra.

<sup>38</sup> Tan jahma tsa ticaá tsitsi vehe ñuhu cahnu ndatq̄ sa-va tsi, nda siquí tan nda cuando ityi tsaha. <sup>39</sup> Tan ra capitán tsa yihí ndaha andaru tsa nyaá yatyin ñi nu ticaá ra Jesús nyehe ra nácaa canq̄ tsa ra, tan nácaa tsihi ra, tacan tan catyí ra:

—Nditsa nditsa cuii tyin Sehe Nyoo tsi ra ihya —catyí ra.

<sup>40</sup> Tan ndasava ñi nyecú tucu juhva ñiñaha nyehé ñi. Tan mahñu ñi can nyí ña María tsa quee ñuu Magdala, tan ña María sihi ra José tan ra Jacobo ra tyuvaa ca. Tan nyí tucu ña Salomé. <sup>41</sup> Ñiñaha ihya tsinyicun ñi tsi ra Jesús, tan jatyinyee ñi tsi ra quivi tsicq̄ nuu ra ityi Galilea. Tan yucú cuaha tucu ñiñaha inga ñuu tsa tsaq̄ tsihin ra ñuu Jerusalén ican.

**Nu tsicutsi ra naha tsi ra Jesús**  
(Mt. 27.57-61; Lc. 23.50-56; Jn. 19.38-42)

<sup>42</sup> Quivi tsa tuhvá nyivi janduvaha tsa catsi ñi cuenda inga quivi tuhvá ñi quitatu, juvin ñi tseñi can <sup>43</sup> tsaq̄ ra José ra ñuu Arimatea nu nyí ra Pilato. Ra José can cuví ra iin ra nyisó tyiñu cahnu vehe tyiñu, tan ndatú tucu maa ra tsi ra tsa cua jaquitsi Nyoo tyin cundaca ñaha nu ñuhu ñayivi. Ña nayuhvi ra tan tsahan ra tsindacq̄n ra cuñu ñuhu ra Jesús tsi ra Pilato. <sup>44</sup> Tsa tsitq̄ ra Pilato tyin tsa yahq̄ tsihi ra Jesús, iyo xaan cuñí ra. Tacan tan canq̄ ra tsi iin capitán tan tsicq̄ tuhun ra tsi ra tun ndit-sa tyin tsa tsihi ra Jesús. <sup>45</sup> Tan tsa tsitq̄ vaha ra Pilato tyin tsa yahq̄ tsihi ra Jesús, tavq̄ tyiñu ra na cuhva ra andaru naha ra cuñu ñuhu ra tsi ra José. <sup>46</sup> Tacan tan tsijatq̄ ra José iin jahma cuitsin tsa tsinu tsihin jahma vaha tsa nañí linu, tan januu ra cuñu ñuhu ra Jesús nu cruu. Yaha can tan cavq̄ nuu ra jahma can cuñu ñuhu ra. Tacan tan tyihí ra cuñu ñuhu ra tsitsi iin ñaña tsa nyaá nduvahq̄ tsitsi iin cava. Tan tyasí ra yuhu ñaña can tsihin iin yuu cahnu. <sup>47</sup> Tan ña María, tsa quee ñuu Magdala, tan ña María, sihi ra José, tsahan ñi, tsinyehe ñi nu tinyi ra José can cuñu ñuhu ra Jesús.

**Nu nandotq̄ ra Jesús**  
(Mt. 28.1-10; Lc. 24.1-12; Jn. 20.1-10)

**16** Tsa yahq̄ quivi quitatú nyivi, ña María ñuu Magdala, tan ña María sihi ra Jacobo, tan ña Salomé jatq̄ ñi ndutya tami tyin cuñí ñi cahun ñi cutyihí ñi can cuñu ñuhu ra Jesús. <sup>2</sup> Tacan tan cuahán ñi nu nyaá ñaña ra tsa cunditsin cuii ñi quivi quitsahq̄ vitya. Tan tsaq̄ ñi ican cuhva tsa cua canq̄ cuii ñi ñicanyii. <sup>3</sup> Tan ityi cuahán ñi natuhun tahan ñi tan catyí ñi:

—¿Yóo cua jatsiyo yuu yuhu ñaña can? —catyí ñi.

<sup>4</sup> Maa tyin cuhva tsa tsaq̄ ñi nyehe ñi tyin tsa catsiyo yuu cahnu tsa ndasí yuhu ñaña can. <sup>5</sup> Tan cuhva tsa quihvi ñi tsitsi cava nu nyaá ñaña can, nyehe ñi nyaá iin ángel tsiyo cuaha. Tan caá ra tumaa caá iin ra tyu-

vaa. Nditsí ra jahma cuitsin cañi. Tan nayuhvi xaan ñi.

<sup>6</sup> Maa tyin catyí ra tsihin ñi:

—Ña nayuhvi ndo. Tsitó yu tyin nanducú ndo tsi ra Jesús, ra ñuu Nazaret, ra tsa tsihi nu cruu. Maa tyin nduve ca ra nyí ihya vityin tyin tsa nandotq̄ ra. Nyehe ndo nu tinyi ra naha tsi ra. <sup>7</sup> Cuaahan ndo tan jacoto ndo tsi ra Pedro tan tsi inga ca ra tsicq̄ tsihin ra Jesús. Tan catyí ndo tsihin ra naha tyin tsa cuahán ra Galilea tan cua cuatu ra tsi ra naha ndacan, tumaa catyí maa ra tsihin ra naha tsa ndi cumañi ca cúu ra —catyí ángel can tsihin ñi.

<sup>8</sup> Tacan tan tsinú xaan ñi cuahán ñi, tyin nihí ñi jahá tsa yuuhvi ñi. Tan ña cahq̄n maa ñi tsa cahán ñi tsihin ndi intuhun maa nyivi tyin yuuhvi xaan ñi.

**Nu quituví ra Jesús nuu ña María quee ñuu Magdala**  
(Jn. 20.11-18)

<sup>9</sup> Ra Jesús nandotq̄ ra quivi quitsahá vitya. Tan quituví ra jihna cuii ca nuu ña María ñuu Magdala. Juvin ña cuví ña tsa tavq̄ ra utsa tatyí ña vaha. <sup>10</sup> Tsañan ña tsi-jacotq̄ ña tsi ra tsicq̄ tsihin ra, tyin yucú ra naha tsihin tucuihya iñi tan tsacú ra naha. <sup>11</sup> Maa tyin cuhva tsa tsiñi ra naha tyin nyito ra Jesús tan nyehe ña tsi ra, ña tsinu iñi ra naha.

**Nu quituví ra Jesús nuu uvi ra tsicq̄ tsihin ra**  
(Lc. 24.13-35)

<sup>12</sup> Tsa yahq̄ yacan, tan quituví ra Jesús nuu uvi ra tsa cuahán ityi cuhu naha ra. Maa tyin siñ cuhva caá ra nyehe ra naha. <sup>13</sup> Tan tsinuhv̄ ra naha tsijacotq̄ ra naha tsi tandihí ca ra naha. Maa tyin juvin ñi ña tsinu iñi ra naha tsa cahq̄n ra can naha ra.

**Nu tsahq̄ ra Jesús tyiñu tsi ra tsa tsicq̄ tsihin ra**  
(Mt. 28.16-20; Lc. 24.36-49; Jn. 20.19-23)

<sup>14</sup> Yaha yacan tan quituví ra Jesús nuu tandihí tsa utsi iin ra tsa tsicq̄ tsihin ra, tsitsi tsa nyecú ra naha nu mesa. Tan cuxaq̄n ra tsi ra naha tsa cuenda tsa ña tsinú iñi ra naha, tan tsa cuenda tucu tsa ndava añima ra naha tan ña tsinu iñi ra naha tsa cahq̄n nyivi tsa nyehe tsi ra tsa yahq̄ nandotq̄ ra. <sup>15</sup> Tan catyí ra tsihin ra naha:

—Cuaahan ndo naniñ cahnu nu ñuhu ñayivi, tan cahq̄n ndo tuhun Nyoo tsihin tandihí nyivi, tan catyí ndo tsihin ñi nácaa jacacú Nyoo tsi ñi. <sup>16</sup> Tan nyivi tsa cua tsinu iñi tan coodutya ñi, cua cacu ñi. Maa tyin ñi tsa ña cua tsinu iñi cua ndoo cuatyí ñi siquí ñi tan cua cunaa ñi. <sup>17</sup> Tan tandihí tsa iyo ihya cua javaha nyivi tsa cua tsinu iñi tsi yu: Tsihin siñi yu cua tava ñi tatyí ña vaha, tan cua cahán ñi inga yuhu tsa ña tuhvá ñi cahán. <sup>18</sup> Cua tñin ñi coo, tan tatun coho ñi o catsi ñi tsa yihí venenu, ña cua jacuehe can tsi ñi. Cua tyiso ndaha ñi jifñi nyivi cuuhvi, tan cua nduvaha nyivi.

**Nu ndaq̄ ra Jesús andivi**  
(Lc. 24.50-53)

<sup>19</sup> Tsa ndihí cahq̄n Jutu Mañi yo Jesús tsihin ra naha, tacan tan ndaq̄ ra andivi, tan tsinyaq̄ ra xiin cuaha Ny-

oo. <sup>20</sup>Tacan tan ra tsicā tsihin ra quitā ra naha tan tsa-  
han ra naha tandihī ñi ityi tsicahan ra naha tuhun Ny-  
oo nácaa jacacú ra tsi yo. Juvín ñi maa Jutu Mañi yo  
jatyinyeē tsi ra naha tyin tsahā ra tsa javaha ra naha

cuaha tsa iyo. Tan tsihin yacan nyehe nyivi tyin nditsa  
tsa caahán ra naha.  
Tan na cuvi tsi tacan ñi.

# Lucas

## Nu quitsahā jacotó ra Lucas tuhun ra Cristo tsi ra Teófilo

**1** Cuaha ñi nyivi nducy ñi cuhva tyaa ñi nuu tutu tandihí tsa cuví nu yucú ndi ihya. Tyaā ñi cuhva <sup>2</sup> nacatyí tuhun nyivi tsihin yo, ñi tsa nyehe tan cahān tuhun ra Jesús nda quivi jihna ñi. <sup>3</sup> Tan yuhu tucu tsa yahā cahví yu tan nducy tuhun vaha yu tandihí tsa cuví nda nu quitsahā. Yacan cuenda cuñí yu tyaa yu tuhun ihya tsa cuenda un, yooho Teófilo, nda nu quitsahā tan nda nu ndihí. <sup>4</sup> Tyin tacan tan coto un tyin nditsa tsa jacuahā nyivi tsi un.

## Nu jacotó iin ángel tsi ra Zacarías ama cua cacu ra Juan, ra cua jacoondutya tsi nyivi

<sup>5</sup> Quivi tsa cuví ra Herodes rey tanií cahnu cuenda Judea, tsicoq iin ra cuví jutu, nañí ra Zacarías. Tan yihí ra cuenda ra cuví jutu naha ra tsa nañí Abías. Tan ñasihi ra nañí ña Elisabet. Tata ra Aarón, ra cuví jutu tahān tsanaha, cuví ña. <sup>6</sup> Tan nduve maa cuatyí ñi nuu Nyoo. Tyin vaha xaan tyaa yahvi ñi tuhun caahān Nyoo Jutu yo. Tan yoñi maa cuví tyaa cuatyí tsi ñi. <sup>7</sup> Tan nduve maa sehe ñi tsicoq. Tyin ña Elisabet, ña cuví coo sehe ña. Tan tsa tsahnu xaan nduvi taahan ñi.

<sup>8</sup> Iin quivi taahān tsi tandihí ra jutu tsa cutahan tsihin ra Zacarías, tsa jaha tyiñu ra naha tyiñu Nyoo. <sup>9</sup> Tan cuhva iyó maa ra cuví jutu naha ra, tavā ra naha suerte, ndáa ra cua tahan tsi quihví tsitsi vehe ñuhu Jutu Nyoo, tyin cahmi ra cutu. Quivi can tahān tsi tsi ra Zacarías. <sup>10</sup> Tan cuaha nyivi yucú ityi tsata vehe ñuhu tsicán tahvi ñi tsi Nyoo, tsitsi tsa tsahmí ra cutu can.

<sup>11</sup> Tan tsitsi tsa ndi nyíí ra ican tan quituví iin ángel Jutu Nyoo nu nyíí ra. Tan nyaá nyityi ángel can ityi xiin cuaha nu nyaá altar nu tsahmí ra cutu. <sup>12</sup> Tan tsa nyehe ra Zacarías tsi ángel ican, iyo xaan cuñí ra. Tan nayuhví xaan ra. <sup>13</sup> Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñí ra tsa cahān un tsihin ra. Tan cua coo iin sehe ña Elisabet ñasihi un. Tan cua cunañi ra Juan. <sup>14</sup> Sií xaan cua cuñí un. Tan cuaha xaan nyivi cua cusii ndihí iñi quivi cua cacu ra. <sup>15</sup> Tyin sehe un, cahnu xaan cua cuví ra nuu Nyoo Jutu yo. Ña cua coho ra vinu tan ndi nyixi. Tan ñi hi xaan cua quihí Tatyí Ii Nyoo tsi ra tsa ndi cumañi ca cacu ra tan tandihí tyembu tsa cua coo ra. <sup>16</sup> Tan cuaha xaan nyivi Israel cua cunyicun ñi tsi Jutu yo Nyoo jaha ra. <sup>17</sup> Juvín ra cua cuhun ityi nuu Jutu Mañi yo. Tan cua coo tunyee iñi Nyoo tsi ra. Tan cua quihí xaan Tatyí Ii Nyoo tsi ra. Tyin cua cuví ra tumaa ra Elías, ra cuví

ndusu yuhu Nyoo tahān tsanaha. Tan cua cuhva cuenda ra nácaa coo vaha nyivi iyó sehe tsihin sehe ñi. Tan cua janaha ra tsi nyivi caquiñi, na tyaa yahvi ñi tuhun caahān Nyoo. Tacan cua janduvaha ra tsi nyivi tan cua cuatu vaha ñi tsi Nyoo —catyí ángel tsihin ra Zacarías.

<sup>18</sup> Tan tsicā tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe ñasihi yu? Tyin yuhu tsa tsahnu xaan yu. Tan tacan tucu ñasihi yu —catyí ra.

<sup>19</sup> Tan ángel can nacahān ra tan catyí ra:

—Yuhu Gabriel nañí yu. Tan tsicá yu tyiñu Nyoo. Maa ra tavā tyiñu tsi yu tyin jacoto yu tyiñu ihya tsi un tan jacoto yu tuhun vaha ihya tsi un. <sup>20</sup> Tan vityin cua nduñihí un. Tyin ña tsinú iñi un tsa caahān yu tsihin un. Tan ña cua cuví cahan un nda cuanda tsa yaha cacu sehe ñasihi un. Tan nda quivi cundaa tandihí tsa cahān yu tsihin un —catyí ángel ican tsihin ra.

<sup>21</sup> Tan nyivi tsa ndatú tsi ra Zacarías ityi tsata vehe ñuhu, iyo xaan cuñí ñi tyin cucuee xaan ra tsitsi vehe ñuhu can. <sup>22</sup> Tan cuhva tsa quitā ra Zacarías, ña cuví maa cahan ra tsihin ñi. Tan tuví iñi ñi tyin iyó tsa nyehe ra tsitsi vehe ñuhu can. Tacan tan quitsahā caahān ra tsihin ñi tsihin ndaha ra. Tyin ña cuví cahan ra.

<sup>23</sup> Tan quivi ndihí tyiñu jahá ra Zacarías vehe ñuhu can, tan cuanuhú ra yuvehe ra. <sup>24</sup> Tsa yahā quivi can tan tsicuhun sehe ñasihi ra, ña Elisabet. Tan ña quitā maa ña tsata vehe tsa tandihí tsa uhun yoo. Tan tsicá iñi ña: <sup>25</sup> “Tyehen javahā Jutu Mañi yu tsihin yu, tyin tacan tan ña cahan nyaa ca nyivi tsi yu”, cuñí ña tsicá iñi ña.

## Nu jacotó iin ángel tsi ña María tyin cua cacu ra Jesús

<sup>26</sup> Tsa quitā iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyíí Galilea. <sup>27</sup> Tyin cahan ra tsihin iin ñaha yoco tsa nañí María. Tan tsa nyaā maa tsa cua tindaha ña tsihin ra nañí José, ra cuví tata ra rey David. <sup>28</sup> Tan quihví ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandihí ca ñaha —catyí ángel ican tsihin ña.

<sup>29</sup> Tan tsa tsifí ña tsa cahān ra, iyo xaan cuñí ña tsa cahān ra. Tan tsicā iñi ña: “¿Nacuenda tacan caahān ra ihya nacumi tsi yo?” tsicá iñi ña.

<sup>30</sup> Tan catyí ángel ican:

—Ña nayuhvi un, María, tyin ñihí un tumañi iñi Nyoo. <sup>31</sup> Vityin cua cuhun sehe un. Tan cua cunañi ra Jesús.

<sup>32</sup> Cahnu xaan ra cua cuvi ra. Tan Sehe Nyoo cahnu cua cuvi ra. Tan cua cuvi ra rey jaha Nyoo Jutu yo, tumaa cuvī ra David, tsii tsaahnu ra. <sup>33</sup> Tyin cua cundaca ñaha ra tsi nyivi Israel tandihi maa tyembu. Tan ña cua ndihi maa tsa cundaca ñaha ra —catyí ángel can tsihin ña.

<sup>34</sup> Tacan tan tsicā tuhun ña María tsi ángel, tan catyí ña:

—¿Nacaa cua cuvi can? Tyin yuhu, ñaha ca coo yī yu.

<sup>35</sup> Tan nacahān ángel tan catyí ra:

—Maa Tatyí Ii Nyoo cua quitsi síqui un. Tan tunyee iñi Nyoo, ra nyaá gloria, cua quitsi tan cua casi tsi síqui un tumaa iin vico. Yacan cuenda Ra Ii tsa cua cacu cua cunañi ra Sehe Nyoo. <sup>36</sup> Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyivi tyin ñaha can ña cuvī coo sehe ña. Maa tyin vityin tsa ñuhú sehe ña. Tsa iñu yoo tsa ñuhú sehe ña. <sup>37</sup> Tyin Nyoo nduve tsa ña cuvī jaha ra —catyí ángel tsihin ña.

<sup>38</sup> Tan catyí ña María:

—Yuhu cuvī yu musu Jutu Mañi yo. Na javaha maa ra cuhva catyí un —catyí ña.

Tacan tan cuahān ángel can.

### Nu cuahān ña María cuanyehé ña nu nyíi ña Elisabet

<sup>39</sup> Tan iin quivi can, numi ñi cuahān ña María iin ñuu tsa canyíi Judea nu maa ñi maa yucu iyó. <sup>40</sup> Tan quihvi ña tsitsi vehe ra Zacarías. Tan nacuhva ña nacumi tsi ña Elisabet. <sup>41</sup> Tan tsa tsiñi ña Elisabet tsa cahān ña María, tan natuñu sehe ña tsitsi ña. Tan ñihi nyaá Tatyí Ii Nyoo tsihin ña. <sup>42</sup> Tan ñihi xaan nacahān ña, tan catyí ña:

—Nyoo nasocó xaan ra tsi un, María, tan ñavin ca tandihi ca ñiñaha. Tan nasocó ra tsi sehe un. <sup>43</sup> ¿Tan yóo cuvī yuhu? Tyin quitsi síhi Jutu Mañi yu quitsi nyehe ña nu nyaá yu. <sup>44</sup> Cuhva tsa tsiñi yu tsa cahān un, tan natuñu sehe yu tsitsi yu. Tyin sī xaan cuñi ra.

<sup>45</sup> Tan sī xaan cuñi tucu maa añima un tyin tsinú iñi un. Tyin cua cuvi cuhva tsa cahān Nyoo tsihin un —catyí ña Elisabet.

<sup>46</sup> Tan catyí ña María:

—Jacahnú yu tsi Nyoo tsihin tandihi añima yu.

<sup>47</sup> Tan sī xaan cuñi añima yu tsihin Nyoo ra jacacú tsi yu.

<sup>48</sup> Tyin cuvī yuhu iin ñaha ndaahvi tan Nyoo nyehe ndaahvi ra tsi yu.

Tan vityin tandihi quivi cua cahān nyivi tyin cahnu xaan tumañi iñi ñihj yu.

<sup>49</sup> Tyin Nyoo, cahnu xaan cuvī ra. Tan cahnu tsa javahá ra tsihin yu.

Tan ii xaan sívi ra.

<sup>50</sup> Tan ndaahvi cuñi ra tsihin tandihi nyivi tsa cua coo tan tyaa yahvi ñi tsi ra.

<sup>51</sup> Cahnu xaan tsa javahá ra tsihin tunyee iñi tsa iyó tsi ra.

Jatsiyó ra tsi nyivi tsa cahnu xaan tsicá iñi ñi.

<sup>52</sup> Quinyaā ra tunyee iñi iyó tsi nu cuvī rey.

Tan cua janducahnu ra tsi nyivi ndaahvi.

<sup>53</sup> Tsahá Nyoo tsa vaha tsi nyivi cuñi coto tsa vaha.

Tan nyivi cuca tsa cuñi tyin nduve tsa tsiñi ñuhu tsi ñi, tsihin ndaha ndiñ ñi, jacuhún ra tsi ñi.

<sup>54</sup> Jatyinyeé ra tsi nyivi Israel tsa cuvī ñi musu ra.

Tan ña naá iñi ra tsi ñi. Nyehé ndaahvi ra tsi ñi.

<sup>55</sup> Tumaa cuhva catyí Nyoo tsihin ra Abraham, tsii tsaahnu yo, tan tsihin sehe ra, tacan ñi javahá maa Nyoo —catyí ña María.

<sup>56</sup> Tan ña María ndog ña tsihin ña Elisabet uñi yoo.

Tan tsa yahā uñi yoo can tan cuanuhū ña nda yuvehe ña.

### Quivi cacu ra Juan, ra tsa jacoondutyā tsi nyivi

<sup>57</sup> Tsa tsaā quivi tsa cacu sehe ña Elisabet, jacacu ña iin rayi. <sup>58</sup> Tan nyivi vehe ña tsihin nyivi tsa iyó yatyin ñi yuvehe ña, sī xaan cuñi ñi. Tacan tucu maa ña. Tyin vaha xaan tsa javahā Nyoo tsihin ña. <sup>59</sup> Tan tsa quitā una quivi tsa cacu ra, tan tyaa ra naha tuñi Nyoo tsi ra tumaa cuhva iyó maa ñi. Tan cuñi ra naha tsa cunañi ra Zacarías tumaa nañi maa jutu ra. <sup>60</sup> Maa tyin sihi ra catyí ña:

—Ña cuvī. Tyin Juan cua cunañi ra.

<sup>61</sup> Tan catyí ra naha:

—¿Nacuenda jacunañi un Juan tsi ra? Tan yoñi nyivi ndo nañi tacan —catyí ra naha.

<sup>62</sup> Tan quitsahā tsicá tuhun ra naha tsihin ndaha ra naha tsi jutu ra. Tyin coto ra naha náa sívi cuñi ra tsa cunañi ra. <sup>63</sup> Tan tsicān jutu ra iin vitu, tan nuu vitu ican tyaa ra: “Juan cua cunañi ra”, tyaa ra.

Tan tandihi maa ra ican naha ra iyo xaan cuñi ra naha tsa tacan. <sup>64</sup> Juvín ñi maa hora can nacahān ra Zacarías. Tan quitsahā jacahnú ra tsi Nyoo. <sup>65</sup> Tan tandihi maa nyivi iyó yatyin yuvehe ñi, iyo xaan cuñi ñi cuvī. Tan tandihi maa nyivi tsa iyó yucu iyó Judea ican nacatyí tuhun tahan ñi tsa cuvī can. <sup>66</sup> Tan tandihi maa nyivi tsa tsito can, tsicá iñi ñi, tan tsicá tuhun tahan ñi tsi ñi:

—¿Yóo ra cua cuvi ra lee ihya? —catyí ñi.

Tyin nditsa, Nyoo nasocó xaan ra tsi ra.

### Nu jacahnū ra Zacarías tsi Nyoo

<sup>67</sup> Ra Zacarías jutu ra Juan, ñihi nyaá Tatyí Ii Nyoo tsihin ra. Tan tsahā cuenda ra tsa caahān Nyoo tsihin ra, tan catyí ra:

<sup>68</sup> —Cahnu xaan ra cuvī Jutu yo Nyoo cuenda yo nyivi Israel.

Tyin quitsi ra nu yucú yo, tsa cuvī yo nyivi maa ra. Tan jacacú ra tsi yo.

<sup>69</sup> Tan tsahā ra iin ra tsa cahnu xaan cuvī tsi yo, ra cua jacacu tsi yo.

Tata ra David, ra tsa cuvī musu Nyoo cuvī ra.

<sup>70</sup> Tacan cua javaha ra, catyí Nyoo tahān tsanaha, quivi cahān ra cuvī ndusu yuhu ra, tan catyí ra naha tyehen:

<sup>71</sup> Cua jacacu Nyoo tsi yo ndaha nu xaan iñi tsi yo, tan nuu tandihi nu tsa ndasi cuñi nyehe tsi yo.

<sup>72</sup> Tan cua cundaahvi iñi ra nyehe ra tsi nyivi yo tsa tsi-coo tahān tsanaha.

Tan cua nducuhun iñi ra tsa cahān ra tsihin ñi tahañ tsanaha.

<sup>73</sup> Cahān maa Nyoo tsihin ra Abraham, tsii tsaahnu yo,

<sup>74</sup> tan catyí ra tyin cua jacacu ra tsi yo ndaha nu xaan iñi tsi yo.

Tyin ña cua nayuhvi ca yo jacahnu yo tsi ra.

<sup>75</sup> Tan maa ra cua janaha ra cuhva coo yo.

Tan vaha cua coo yo nuu ra tan coo yo maa ñi tsa cuenda maa ra tandihí quivi tsa cua coo yo ñayivi —catyí ra Zacarías.

<sup>76</sup> Tan catyí ra Zacarías tsihin lee can:

—Sehe luhlu yu, yooho cua cuvi un ndusu yuhu Nyoo, ra nyaá gloria.

Tyin cuhun un ityi nuu Jutu Mañi yo. Tan cua cahān un tuhun ra tsihin nyivi tyin tsa cuñí quiti ra.

<sup>77</sup> Tan cua jacoto un tsi nyivi tyin cua jaha Nyoo tucahnu iñi tsi ñi.

Tacan tan cacu añima ñi.

<sup>78</sup> Tyin Jutu yo Nyoo cuñí ra tsi yo. Tan cundaahví xaan iñi ra tsi yo.

Tan cua jaquitsi ra iin ra jatyinyee tsi yo. Tan cuvi ra tumaa ñuhu ñicanyii.

<sup>79</sup> Tyin cua janaha ra ñuhu nditsin nu iyó nyivi nu naa, nu ndatú tuhun tsihi tsi ñi.

Cua janaha ra ityi ra tsi yo, ityi vaha —catyí ra Zacarías.

<sup>80</sup> Tan ra luhlu can cua cuahnu ca ra. Ñihi xaan tsicoo tunyee iñi tsi ra tsihin Tatyí Ii Nyoo. Tan tsicoo ra iin tsiqui ndi nda cuanda quivi tsa nacoto nyivi Israel tsi ra.

### Quivi cacu ra Jesús

(Mt. 1.18-25)

**2** Quivi ican tsicoo iin ra ndacá ñaha, ra cuví rey cahnu, nañí ra Augusto. Tava tyiñu ra tsi ra nyisó tyiñu naha ra na tyaa ra naha sivi tandihí nyivi taniñ cahnu ñuu ñayivi. <sup>2</sup> Ihya cuví tsa jihna ñi tsinyaá sivi nyivi. Tan ra Cirenio cuví ra ra ndacá ñaha tandihí ñuu nu cuví Siria. <sup>3</sup> Tan tandihí nyivi cuanuhu ñi ñuu ñi, tyin cua ndaca ñi sivi ñi. <sup>4</sup> Yacan quee ra José ñuu Nazaret tsa canyí Galilea. Tan cuahán ra ñuu Belén tsa canyí Judea, nu cacu ra rey David, tyin tata ra David cuví ra. <sup>5</sup> Cuahán ra cuandacá ra sivi ra tsihin ña María, tan tsa nyaá maa tsa cua tindaha ñi. Tan ñuhú sehe ña. <sup>6</sup> Tan tsa ndi yucú ca ñi ñuu Belén ican tan quitsaha cuhvi tsitsi ña tyin tsa cua cacu sehe ña. <sup>7</sup> Tan ican cacu sehe nuu ña. Tan cavá nuu ña jahma tsi ra. Tan nacaquín ña tsi ra tsitsi iin canuva nu tsatsí quiti itya. Tyin ña ñihí iin vehe coo ñi.

### Cuhva cahān ángel tsihin ra jahá cuenda mbee

<sup>8</sup> Yatyin ñi ñuu Belén can yucú ra jahá cuenda mbee tsa tsacuaa. <sup>9</sup> Tan sana iñi ra naha quituvi iin ángel Nyoo. Tan jandunditsin Jutu yo Nyoo taniñ cahnu nu yucú ra naha. Tan nayuhvi xaan ra naha.

<sup>10</sup> —Ña nayuhvi ndo —catyí ángel can—. Tyin vatsí cahān yu iin tsa vaha xaan tsihin ndo. Sii xaan cua cuñí

tandihí cuvi maa nyivi tsa cuenda tsi. <sup>11</sup> Vityin nda ñuu ra David cacu iin ra cua jacacu tsi nyivi. Cuví ra Cristo, ra cuví Jutu Mañi yo. <sup>12</sup> Tan tsihin cuhva ihya cua nacoto ndo tsi ra: cua nañihi ndo tsi ra lee ican, cavá nuu ra jahma tan canyí ra tsitsi iin canuva nu tsatsí quiti —catyí ángel can tsihin ra jahá cuenda mbee can.

<sup>13</sup> Tan juvin ñi cuhva ican quituvi cuaha xaan ángel tsihin ángel can, tan jacahnú xaan ra naha tsi Nyoo, tan catyí ra naha:

<sup>14</sup> Cahnu xaan cuví Nyoo, ra nyaá gloria.

Tan nu ñuhu ñayivi, na coo tsa vaha añima nyivi tsa ñihí tumañi iñi Nyoo, catyí ra ángel naha ra.

<sup>15</sup> Tacan tan tsa cuanuhu ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunyehe yo náa cuví. Tyin maa Jutu yo Nyoo jacoto tsi yo —catyí ra naha.

<sup>16</sup> Tacan tan numi xaan cuahán ra naha, tan nañihí ra naha tsi ra lee can tsihin ña María tan tsihin ra José.

Tan canyí ra lee can tsitsi iin canuva nu tsatsí quiti itya.

<sup>17</sup> Tan cuhva tsa nyehe ra naha tsi ra, quitsaha natuhún ra naha tandihí tuhun cahān ángel tsihin ra naha tsa cuenda lee ican tsihin ñi.

<sup>18</sup> Tan tandihí nyivi tsa tsiñi tuhun caahán ra naha, iyo xaan cuñí ñi. <sup>19</sup> Maa tyin ña María naquihin cuenda ña tuhun ican tsitsi añima ña, tan tandihí tuhun ican tsicá iñi ña.

<sup>20</sup> Tan cuanuhu ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihí tsa nyehe ra naha tan tsa tsiñi ra naha. Tyin cunda cuhva tsa catyí ángel ican tsihin ra naha.

### Nu tyaa cuenda ñi tsi ra Jesús ndaha Nyoo tsitsi vehe ñuhu cahnu

<sup>21</sup> Tsa ndu unā quivi ra Jesús, tan tyaa ñi tuñi Nyoo tsi ra tyin tacan catyí tuhun tsahnu maa ñi. Tan jacunañi ñi Jesús tsi ra. Juvin ñi maa sivi tsa catyí ángel tsihin ña María quivi tsa ndi cumañi ca cuhun ra Jesús tsitsi ña.

<sup>22</sup> Tan tsa yahā quivi cuhva catyí ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacu sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo.

<sup>23</sup> Tacan ñi javahā ñi tyin catyí ley Nyoo tyin: “Tandihí sehe nuu ñi tsa cuví rayi, cua tyaa cuenda ñi tsi ra ndaha Jutu yo Nyoo”, catyí ley ican. <sup>24</sup> Tan tsahan ñi tsi-jamañi ñi uvi taahan quiti, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curru a uvi taahan paloma”, catyí ley can.

<sup>25</sup> Tan quivi can iyó iin ra ñuu Jerusalén nañí ra Simeón. Iin ra cuiti xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihí ca nyivi ñuu Israel ican. Tan nyaá Tatyí Ii Nyoo tsihin ra Simeón. <sup>26</sup> Tan jacoto Tatyí Ii tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsi Jutu yo Nyoo. <sup>27</sup> Tan Tatyí Ii jacuhun ra tsi ra Simeón can nda vehe ñuhu. Tan juvin ñi cuhva can tsaá jutu ra tan sihi ra Jesús tsihin maa ra nu cuví vehe ñuhu cahnu can, tyin javaha ñi cuhva catyí maa ley. <sup>28</sup> Tan cuhva tsa tsaá ñi nu nyaá ra Simeón tan quihin ra Simeón tsi

ra Jesús. Tan tyihj jucun ndaha ra tsi ra. Tacan tan quit-sahā jacahnú ra tsi Nyoo, tan catyí ra:

<sup>29</sup> —Jutu Mañi yu, vityin tsa cundaḡ cuhva tsa catyi maa un tsihin yu, tsa cuví yu musu un, cuví jaña ndaha un tsi yu vityin, tan na cúu yu tsihin tsa vaha.

<sup>30</sup> Tyin tsa nyehe tsihin nuu yu tsi ra cua jacacu tsi ndi.

<sup>31</sup> Tsa iyó ra ihya ityi nuu tandihí nyivi.

<sup>32</sup> Tan cua cuví ra ñuhu tsa cua jandunditsin añima nyivi tsa ñavin nyivi Israel cuví.

Tan cahnu ca cua jaha ra tsi nyivi Israel, tsa cuví ndi nyivi cuenda maa un —catyí ra Simeón.

<sup>33</sup> Tan ra José tsihin sihi ra Jesús, iyo xaan cuñí ñi tsa tsiñi ñi tsa caḡan ra Simeón tsa cuenda lee ican.

<sup>34</sup> Tacan tan tsicān tahvi ra Simeón tsa cuenda ñi. Tan catyí ra tsihin ña María sihi ra Jesús:

—Nyehe tsi lee ihya. Cuaha xaan nyivi Israel ñuu Nyoo cua tsinu iñi tsi ra quivi coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsaḡa ra tsi ra tan cuví ra tumaa seña tsa cuenda yo. <sup>35</sup> Tacan tan coto tandihí yo náa tsicá iñi nyivi tun tsinú iñi ñi o ña tsinú iñi ñi tsi ra. Maa tyin tsa cuenda yooho, María, tsehe cuví tumaa iin mityi xaan tsa cua yaha añima un —catyí ra Simeón tsihin ña.

<sup>36</sup> Tan ican, tsitsi vehe ñuhu cahnu can, nyí tucu iin ñaha tsa cuví ndusu yuhu Nyoo. Nañí ña Ana, tan sehe ra Fanuel, iin ra cuví tata ra Aser, cuví tsi ña. Tan tsa tsahnu xaan ña. Tan nda luhlu ña tan tindahā ña, maa tyin utsa cuiya ñi tsicoḡ ña tsihin yí ña tan tsihi ra.

<sup>37</sup> Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñihu jacahnú ña tsi Nyoo, tan tsicān tahvi ña tan iyó nyitya ña. <sup>38</sup> Tan juvin ñi tsa ndi nyí ca ra José tan ña María tsihin lee ican, tan tsaḡ ña Ana nu yucú ñi. Tan quitsahā nacuhvá ña tyahvi nyoo tsi Nyoo. Tan caḡan ña tuhun ra Jesús tsihin tandihí nyivi tsa yucú ican, nyivi tsa ndatú tsa cacu ñuu Jerusalén.

### Nu cuanuhū ñi nda ñuu Nazaret

<sup>39</sup> Tacan tan tsa yahā tsa javahā ñi tandihí maa tsa taahán tsi javaha ñi cuhva catyí ley Jutu yo Nyoo, tan cuanuhū ñi nda ñuu Nazaret tsa canyí Galilea nu cuví ñuu maa ñi. <sup>40</sup> Tan ra luhlu Jesús vatsí cuahnu ca ra. Tan cua ndunye ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

### Nu caḡan ra luhlu Jesús tsihin ra maestro cuenda ley vehe ñuhu naha ra

<sup>41</sup> Ra José tsihin sihi ra Jesús tuhvá ñi tsicá vico pas-cua nda ñuu Jerusalén ndihí ñi cuiya. <sup>42</sup> Tan tsa quitá tsa utsi uvi cuiya ra Jesús, tan tsahān tandihí ñi nda ñuu Jerusalén, cuhva tuhun tsa iyó maa ñi. <sup>43</sup> Tan quivi ndihí vico, tan vatsí nuhu ñi, maa tyin ra luhlu Jesús ndoḡ ra ñuu Jerusalén can. Tan ña jahā jutu ra tan sihi ra cuenda. <sup>44</sup> Tsicá iñi maa ñi tyin vatsí maa ra tyañu tandihí nyivi ican. Tan ndihí iin quivi tsicá ityi ñi. Tacan tan quitsahā nanducú ñi tsi ra tyañu nyivi nacotó tsi ñi.

<sup>45</sup> Maa tyin ña nañihí ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

<sup>46</sup> Tan tsa yahā uñi quivi tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley vehe ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha. <sup>47</sup> Tan tandihí nyivi tsiñi tsa caahán ra, iyo xaan cuñí ñi tsihin tsa tsiñi tuñi tsa iyó tsi ra, tan tsihin tsa nacatyí tuhun ra.

<sup>48</sup> Cuhva tsa nyehe jutu ra tan sihi ra tsi ra, iyo xaan cuñi ñi, tan sihi ra catyí ña tsihin ra:

—Sehe luhlu yu. ¿Nacuvi tyin javahā un tyehen? Jutu un tan yuhu tuñu xaan cuñi ndi tan nanducú xaan ndi tsi un —catyí ña.

<sup>49</sup> Tacan tan catyí ra Jesús:

—¿Nacuenda nanducú ndo tsi yu? ¿A ña tsitó ndo tyin ñiñi ca cuñi tsi nyehé yu tyiñu Jutu yu? —catyí ra.

<sup>50</sup> Maa tyin ña cutuñi iñi ñi tsa caahán ra tsihin ñi.

<sup>51</sup> Tacan tan cuanuhū ra tsihin ñi nda ñuu Nazaret. Tan vaha javahá ra tyin tyaá yahvi ra tsi ñi. Tan sihi ra naquihūn vaha ña tandihí tuhun ihya tsitsi añima ña.

<sup>52</sup> Tan ra Jesús cua cuahnu ca ra tan tsaá ca tsa tsiñi tuñi jiñi ra. Tan si xaan cuñi Nyoo tsihin ra, tacan tucu nyivi, si xaan cuñi ñi tsihin ra.

### Nu caḡan ra Juan, ra jacoondutya tsi nyivi, tuhun Nyoo nuu tsiqui

(Mt. 3.1-12; Mr. 1.1-8; Jn. 1.19-28)

**3** Tsa quitá tsahun cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea tsihin Traconite. Tan ra Lisania ndacá ñaha ra Abilinia quivi can. <sup>2</sup> Tan ra Anás tsihin ra Caifás cuví ra naha jutu tsaahnu tsa cuví ityi nuu. Quivi can caḡan Nyoo tsihin ra Juan sehe ra Zacarías iin nuu tsiqui. <sup>3</sup> Tan ra Juan tsicá nuu ra tandihí ñuu tsa cayucu yatyin ñi yutya cahnu Jordán, caahán ra tuhun Nyoo tsihin nyivi. Tan catyí ra tsihin ñi tyin na ndu uvi iñi ñi cuatyí ñi tan coondutya ñi. Tacan tan Nyoo cua jaha ra tucahnu iñi cuatyí ñi, catyí ra. <sup>4</sup> Tumaa caahán tuhun tsa nyaá nu libru tsa tyaḡ ra Isaías, ra cuví ndusu yuhu Nyoo taḡan tsanaha. Tan catyí ra:

Cua tyaá soho yo ndusu ra nu caná tsa ra nu tsiqui tan catyí ra:

“Nuña ndo iin ityi cuiti tan nḡtyiso vaha ndo tsi ndo tyin tsa vatsi Jutu Mañi yo.

<sup>5</sup> Tumaa tsa tahví ndo yucu tan jandutú ndo xahva cunu,

jandoó ndo ityi yacua, tan janduvahá ndo nu quiñi.

<sup>6</sup> Tacan tan tandihí nyivi cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan caḡan ra Juan tsihin nyivi.

<sup>7</sup> Tan tsa cuahán nyivi tsa cuñi ñi jacoondutya ra tsi ñi, tan catyí ra tsihin ñi:

—¡Nyoooho cuví ndo tumaa tata coo! ¿A cuñi ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuvi. <sup>8</sup> Yacan nḡsama ndo cuhva iyó ndo, na nyehe yo tyin tsa ndu uvj iñi ndo cuatyí ndo nuu Nyoo. Tan ña nduyaa ndo cahan ndo tyin nyivi

tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyivi ra Abraham. <sup>9</sup>Tsa ndatú yatsa Nyoo tsi tandihí ndo tyin cuví ndo tumaa yutun tsa ña tsahá tsiti vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

<sup>10</sup>Tacan tan nducú tuhun ñi tsi ra tan catyí ñi:

—¿Tan nácaa javaha ndi? —catyí ñi.

<sup>11</sup>Tacan tan nacahan ra Juan:

—Ra tsa iyó uvi taahan jahma, taahán tsi cuhva ra in-tuhun tsi tsi ra tsa nduve jahma. Tan ra tsa iyó tsa catsí, taahán tsi cuhva ra luxu catsi ra tsa nduve tsa catsi —catyí ra.

<sup>12</sup>Tan tsaq tucu ra tsa tavá xuhun cuenda ra ndacá ñaha nda ñuu Roma, tsa cuñí ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

<sup>13</sup>Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

<sup>14</sup>Tacan tan tsicá tuhun tucu andaru naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahan ra Juan tan catyí ra:

—Ña quinyaa ca ndo tsa tsii nyivi. Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndoqo ndo vaha tsihin yahvi ndo —catyí ra Juan.

<sup>15</sup>Tan quivi can tandihí nyivi ndatú ñi tsi ra Cristo. Tan tsicá iñi ñi tun juven ra Juan cuví Cristo. <sup>16</sup>Maa tyin ra Juan catyí ra tsihin tandihí ñi:

—Tsa nditsa tyin jacoondutyá yu tsi ndo tsihin ndutya. Maa tyin vatsí inga ra tsa cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuvi yu musu ra tan ndatsi yu ñi nditsan ra. Tan ra ican cua jacoondutya ra tsi ndo tsihin Tatyí Ii Nyoo, tan tsihin ñuhú ihñi. <sup>17</sup>Tan ra ican ndahá ra pala tyin cua jandava ra trigu. Cua natava sñin ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tsihin trigu can tsihin ñuhú tsa ña cua ndahva maa —catyí ra Juan tsihin ñi.

<sup>18</sup>Tan tacan cahñan ra Juan tsihin nyivi can. Tan náa ndihí ca maa cuhva cahñan ra tan jacotó ra tsi ñi nácaa tsa cua quitsi Sehe Nyoo. <sup>19</sup>Tacan tucu ñi nduxañan ra Juan tsi ra Herodes, ra ndacá ñaha Galilea, tsa cuenda tsa naquihñin ra tsi ña Herodías, ñasiñi ra Felipe, yañi ra, tsihin tsa cuenda náa ndihí tsa ña vaha javahá ra. <sup>20</sup>Maa tyin ña tyaa yahvi maa ra Herodes tuhun cahñan ra Juan. Nu ndihí tuhun tinyij ra tsi ra Juan tsitsi vehe caa.

### Nu jacoondutya ra Juan tsi ra Jesucristo

(Mt. 3.13-17; Mr. 1.9-11)

<sup>21</sup>Tsa ndi cumañi ca cuhun ra Juan vehe caa tan jacoondutya ra tsi tandihí nyivi. Tan jacoondutya ndihí ra tsi ra Jesús. Tsa yahá tsicoondutya ra, tsicañ tahvi ra tsi Nyoo, tacan tan nuña andivi. <sup>22</sup>Tan nuu Tatyí Ii Nyoo

siqúi ra tumaa iin paloma. Tan cahñan iin ndusu ityí siqúi andivi, tan catyí tsi tyehen:

—Yooho cuví Sehe yu, tan cuñí xaan yu tsi un. Tan sñi xaan cuñí yu nyehé yu tsi un —catyí ndusu ican tsihin ra.

### Cuhva quitsi tata ra Jesucristo

(Mt. 1.1-17)

<sup>23</sup>Tan tsa iyó maa tan oco utsi cuiya ra Jesús tan quit-sahá jahá tyiñu ra tyiñu Nyoo. Tan tandihí nyivi cuñí maa ñi tyin sehe ra José cuví tsi ra. Tan ra José, sehe ra Elí cuví tsi ra. <sup>24</sup>Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra. <sup>25</sup>Tan ra José, sehe ra Matatías cuví tsi ra. Tan ra Matatías, sehe ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Esli cuví tsi ra. Tan ra Esli, sehe ra Nagai cuví tsi ra. <sup>26</sup>Tan ra Nagai, sehe ra Maat cuví tsi ra. Tan ra Maat, sehe ra Matatías cuví tsi ra. Tan ra Matatías, sehe ra Semei cuví tsi ra. Tan ra Semei, sehe ra José cuví tsi ra. Tan ra José, sehe ra Judá cuví tsi ra. <sup>27</sup>Tan ra Judá, sehe ra Joana cuví tsi ra. Tan ra Joana, sehe ra Resa cuví tsi ra. Tan ra Resa, sehe ra Zorobabel cuví tsi ra. Tan ra Zorobabel, sehe ra Salatiel cuví tsi ra. Tan ra Salatiel, sehe ra Neri cuví tsi ra. <sup>28</sup>Tan ra Neri, sehe ra Melqui cuví tsi ra. Tan ra Melqui, sehe ra Adi cuví tsi ra. Tan ra Adi, sehe ra Cosam cuví tsi ra. Tan ra Cosam, sehe ra Elmodam cuví tsi ra. Tan ra Elmodam, sehe ra Er cuví tsi ra. <sup>29</sup>Tan ra Er, sehe ra Josué cuví tsi ra. Tan ra Josué, sehe ra Eliezer cuví tsi ra. Tan ra Eliezer, sehe ra Jorim cuví tsi ra. Tan ra Jorim, sehe ra Matat cuví tsi ra. <sup>30</sup>Tan ra Matat, sehe ra Leví cuví tsi ra. Tan ra Leví, sehe ra Simeón cuví tsi ra. Tan ra Simeón, sehe ra Judá cuví tsi ra. Tan ra Judá, sehe ra José cuví tsi ra. Tan ra José, sehe ra Jonán cuví tsi ra. Tan ra Jonán, sehe ra Eliaquim cuví tsi ra. <sup>31</sup>Tan ra Eliaquim, sehe ra Melea cuví tsi ra. Tan ra Melea, sehe ra Mainán cuví tsi ra. Tan ra Mainán, sehe ra Matata cuví tsi ra. Tan ra Matata, sehe ra Natán cuví tsi ra. <sup>32</sup>Tan ra Natán, sehe ra David cuví tsi ra. Tan ra David, sehe ra Isaí cuví tsi ra. Tan ra Isaí, sehe ra Obed cuví tsi ra. Tan ra Obed, sehe ra Booz cuví tsi ra. Tan ra Booz, sehe ra Salmón cuví tsi ra. Tan ra Salmón, sehe ra Naasón cuví tsi ra. <sup>33</sup>Tan ra Naasón, sehe ra Aminadab cuví tsi ra. Tan ra Aminadab, sehe ra Aram cuví tsi ra. Tan ra Aram, sehe ra Esrom cuví tsi ra. Tan ra Esrom, sehe ra Fares cuví tsi ra. Tan ra Fares, sehe ra Judá cuví tsi ra. <sup>34</sup>Tan ra Judá, sehe ra Jacob cuví tsi ra. Tan ra Jacob, sehe ra Isaac cuví tsi ra. Tan ra Isaac, sehe ra Abraham cuví tsi ra. Tan ra Abraham, sehe ra Taré cuví tsi ra. Tan ra Taré, sehe ra Nacor cuví tsi ra. <sup>35</sup>Tan ra Nacor, sehe ra Serug cuví tsi ra. Tan ra Serug, sehe ra Ragau cuví tsi ra. Tan ra Ragau, sehe ra Peleg cuví tsi ra. Tan ra Peleg, sehe ra Heber cuví tsi ra. Tan ra Heber, sehe ra Sala cuví tsi ra. <sup>36</sup>Tan ra Sala, sehe ra Cainán cuví tsi ra. Tan ra Cainán, sehe ra Arfaxad cuví tsi ra. Tan ra Arfaxad, sehe ra Sem cuví tsi ra. Tan ra Sem, sehe ra Noé cu-

vj tsi ra. Tan ra Noé, sehe ra Lamec cuvj tsi ra. <sup>37</sup> Tan ra Lamec, sehe ra Matusalén cuvj tsi ra. Tan ra Matusalén, sehe ra Enoc cuvj tsi ra. Tan ra Enoc, sehe ra Jared cuvj tsi ra. Tan ra Jared, sehe ra Mahalaleel cuvj tsi ra. Tan ra Mahalaleel, sehe ra Cainán cuvj tsi ra. <sup>38</sup> Tan ra Cainán, sehe ra Enós cuvj tsi ra. Tan ra Enós, sehe ra Set cuvj tsi ra. Tan ra Set, sehe ra Adán cuvj tsi ra. Tan ra Adán, sehe Nyoo cuvj tsi ra.

#### Nu nducy cuhva nu ña vaha tsi ra Jesús

(Mt. 4.1-11; Mr. 1.12-13)

**4** Tan ñihi nyaá Tatyí Ii Nyoo tsihin ra Jesús tsa yaha tsicoondutyā ra, quitā ra yutya Jordán tan cuanuhū ra. Tan quihjīn Tatyí Ii Nyoo tsi ra, tan tsahān ra iin nu cuví nu tsiqui <sup>2</sup> nu tsinyijī ra uvi xico nduvi. Tan ña tsatsjī maa ra tandihī quivī ican. Yaha can tan quitsjī tsa tsisocó ra. Tan nducú cuhva nu ña vaha tsi ra. <sup>3</sup> Tan catyí nu tsihin ra:

—Tatun juvin Sehe Nyoo cuví tsi un, cahan tsihin yuu ihya, na nanduví tsi paan catsi un.

<sup>4</sup> Tan ra Jesús nacahān ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyiví coonyito ñi, tyin coonyito ñi tsihin tandihī tuhun caahán Nyoo —catyí ra Jesús tsihin nu ña vaha.

<sup>5</sup> Tacan tan quihjīn nu ña vaha tsi ra Jesús, cuahán ra iin jijiñi yucu sucun. Tan iin yaha ñi janahā nu tandihī tsa cuca nu ndacá ñaha nu ñuu ñayiví ihya tsi ra Jesús. <sup>6</sup> Tan catyí nu tsihin ra:

—Cuhva yu tandihī tsa nyehé un tun cuñí un tyin maa Nyoo tsahā tsa cundaca ñaha yu tandihī can, tan ndáa ra cuñí yu cuhva yu can, cuví tsi ra. <sup>7</sup> Tatun yooho tan cuiñí tsiti un nuu yu ihya tan jacahnu un tsi yu, tandihī can cua cuhva yu tsi un —catyí nu ña vaha tsihin ra.

<sup>8</sup> Tan nacahān ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jacahnu tsi intuhun ñi maa Jutu Nyoo. Tan tyiñu intuhun ñi maa ra taahán tsi javaha un.”

<sup>9</sup> Tacan tan quihjīn nu ña vaha tsi ra Jesús inga tsaha. Tan cuahán nu tsihin ra nda ñuu Jerusalén. Tan jandaq nu tsi ra iin nu sucun xaan nda jijiñi vehe ñuhu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuanda nu ñuhu. <sup>10</sup> Tyin catyí tsi nu tutu Nyoo tyin:

Nyoo cua tava tyiñu ra tsi ángel ra tan jaha cuenda ra naha tsi un.

<sup>11</sup> Cua janahndi ra naha tsi un. Tan ña cua nañi tsaha un nu yuu.

<sup>12</sup> Tacan tan nacahān ra Jesús tan catyí ra:

—Tan juvin ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

<sup>13</sup> Tan tsa ndihjī nducu cuhva nu ña vaha tsi ra Jesús, tacan tan nacoq nuu nu tsi ra.

#### Nu quitsahā caahán ra Jesús tuhun Nyoo tsihin nyiví

(Mt. 4.12-17; Mr. 1.14-15)

<sup>14</sup> Tan tsa yaha tsa nducy cuhva nu ña vaha tsi ra Jesús tan cuanuhū ra nda Galilea tsihin tsa tsitú tunyee iñi Tatyí Ii Nyoo tsi ra. Tan tsitó nyiví tuhun ra ñi cahnu Galilea can. <sup>15</sup> Tan jacuahā ra tsi nyiví nu cuví vehe ñuhu tandihī ñi ñuu. Tan tandihī ñi jacahnu ñi tsi ra.

#### Tsa tsaq nyico ra Jesús ñuu Nazaret nu tsahnū ra

(Mt. 13.53-58; Mr. 6.1-6)

<sup>16</sup> Tacan tan tsaq nyico ra Jesús ñuu Nazaret nu tsahnū ra. Tan iin quiví quitatú nyiví, quihvī ra tsitsi vehe ñuhu, tumaa tsa tuhvā maa ra tsicá. Tan nduvitā ra cua cahvi ra tuhun Nyoo. <sup>17</sup> Tan tsahā ra naha iin libru tsa tyaā ra Isaiás ra cuví ndusu yuhu Nyoo. Tan cuhva tsa nuñā ra, nañihjī ra iin nu catyí tsi:

<sup>18</sup> Iyó Tatyí Ii Nyoo tsihin yu, tyin maa Nyoo tavā tyiñu tsi yu

cahan yu tuhun ra tsihin nyiví ndaahvi.

Tan janduvaha yu tsi nyiví tsa uhvi añima.

Tan maa ra tavā tyiñu tsi yu tyin jacoto yu tsi nyiví yihí ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua jananyehe yu tsi nyiví cuaa.

Tan cua nacoq nuña yu tsi nyiví tsa iyó tundoho.

<sup>19</sup> Tan jacoto yu tsi nyiví tyin tsa quitā quiví tsa nyaá Nyoo tumañi iñi tsihin ñi.

<sup>20</sup> Tacan tan ndihjī cahvī ra tan nacasjī ra nuu libru can. Tan nacuhvā ra tsi iin ra tsa jatyinyee tsihin tyiñu vehe ñuhu can. Tan tsinyaā ra Jesús. Tacan tan tandihī nyiví tsa nyecú ican, ndoq ñi tsa nyehé ñi tsi ra.

<sup>21</sup> Tacan tan catyí ra tsihin ñi:

—Vityin quiví ihya tsa cundaq cuhva catyí tuhun Nyoo tsa cahvī yu tsiñiñi ndo —catyí ra Jesús tsihin ñi.

<sup>22</sup> Tan tandihī nyiví tsa nyecú can, vaha xaan cahan ñi tuhun ra. Tan iyo xaan cuñí ñi tsihin tandihī tsa vaha tsa cahan ra. Tacan tan quitsahā tsicá tuhun tahan ñi:

—¿A ñavin ra ihya cuví sehe ra José?

<sup>23</sup> Tan nacahān ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyiví, janduvaha jihna tsi maa un.” Tan cuñí tucu ndo catyí ndo: “Tandihī tsa javahā un ñuu Capernaum tsitó ndi, javaha ndihī tucu can ñuu maa un ihya.”

<sup>24</sup> Tan cahan ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyiví ñuu ra naha tsi ra naha. <sup>25</sup> Tan tsa nditsa tyin cuaha xaan ñi ndaahvi tsa tsihī yī tsicoq Israel ihya quiví tsa tavā Nyoo tyiñu tsi ra Elías, ra cuví ndusu yuhu ra, tan ra ican cuví iin ra Israel ihya tsicā ra cahan ra tuhun Nyoo. Tan quiví can ña cuyn maa savi añi cuiya sasava. Tan tsicoq tama cahnu xaan. <sup>26</sup> Tan ñavin tsa cuenda ndi intuhun maa ñi Israel ihya tavā Nyoo tyiñu tsi ra Elías cuahán ra. Maa tyin tsahān ra jatyinyee ra tsi iin ñaha ndaahvi tsihī yī tsa tsicoq ñuu Sarepta tsa canyí Sidón.



<sup>27</sup> Tacan tucu quiví tsicá inga ra cuví ndusu yuhu Nyoo cuenda nyiví Israel, ra Eliseo. Cuaha xaan ra cuuhví tsihin cuehe tyaahyú tsicoo Israel ihya, tan ndi intuhun ra naha tan ña nduvahá ra naha. Nduvahá intuhun ñi ra Naamán ra quee ñuu Siria —catyí ra Jesús.

<sup>28</sup> Tsa yahá tsiñi ñi tandihí tuhun can, tandihí nyiví tsa yucú tsitsi vehe ñuhu can xaan xaan cuñí ñi cuví. <sup>29</sup> Tan nduvitá ñi. Tan tavá ñi tsi ra Jesús nda jiñi yucu sucun nda yuhu ñuu, tsa cuñí ñi janacava ñi tsi ra ican. <sup>30</sup> Maa tyin ra Jesús yahá ra tyañu ñi tan cuahán ra.

**Nu quitá tatyí ña vaha tsa yihí tsi iin rayíi**  
(Mr. 1.21-28)

<sup>31</sup> Tan cuahán ra Jesús ñuu Capernaum tsa canyíi Galilea. Tan jacuahá ra tsi nyiví tsitsi vehe ñuhu tandihí sauru, quiví tuhvá nyiví quitatú. <sup>32</sup> Tan iyo xaan cuñí ñi tsihin tsa cahán ra. Tyin ñihi xaan cahán ra tumaa tuhvá ra cumí tyiñu caahán. <sup>33</sup> Tan iin quiví nyíi ra Jesús vehe ñuhu tan iin ra yihí tatyí ña vaha catyí ra caná tsa ra jahá tatyí ña vaha can:

<sup>34</sup> —Yooho Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu nacotó vaha yu tsi un. Yooho cuví Sehe Íi Nyoo.

<sup>35</sup> Tacan tan nduxaḡn ra Jesús tsi tatyí ña vaha tsa yihí tsi ra can tan catyí ra:

—Taxin ñi coo yooho. Quita tsi ra ihya —catyí ra Jesús tsihin nu.

Tacan tan nyehé ñi nyiví nduvá ra can nu ñuhu jahá tatyí ña vaha can, tan nduve ca náa javahá nu tsi ra can. Tan quitá nu cuahán nu. <sup>36</sup> Tandihí nyiví tsa nyehe can, iyo xaan cuñí ñi tan yuuhví ñi cuví. Tan quitsahá tsicá tuhun tahan ñi:

—¿Náa tuhun cuví tsa caahán ra ihya? Tyin nda cuanda tsihin tatyí ña vaha tan ñihi caahán ra, tan quitá tatyí ña vaha ican —catyí ñi.

<sup>37</sup> Tacan tan tandihí ñi ityí quitá natuhun nyiví tuhun ra Jesús.

**Nu janduvahá ra Jesús tsi ña tyiso ra Simón Pedro**  
(Mt. 8.14-15; Mr. 1.29-31)

<sup>38</sup> Tacan tan quitá ra Jesús tsitsi vehe ñuhu can. Tan cuahán ra vehe ra Simón. Tan nu tsaḡ ra can, canyíi ña tyiso ra Simón cuuhví ña tan ñihi xaan yihí cahñi tsi ña. Tacan tan caahán ndaahví ñi tsihin ra na janduvaha ra tsi ña. <sup>39</sup> Tacan tan natuhvá ra nu canyíi ña tan nacañi nuu ra jiñi ra tan cahán ra tsihin cahñi can na quita tsi. Tacan tan quitá cahñi can iin yaha ñi, tan nduvitá ña can, quitsahá nducú ña tsa catsi ra Jesús.

**Nu cuaha xaan nyiví cuuhví janduvahá ra Jesús**  
(Mt. 8.16-17; Mr. 1.32-34)

<sup>40</sup> Tan tsa tyiso ñicanyii, tandihí nyiví tsa iyó ñi cuuhví vehe ñi tsihin sñn sñn nuu cuehe, quitsj ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhví can tan janduvahá ra tsi ñi. <sup>41</sup> Tan cuaha xaan nyiví quitá tatyí ña vaha tan caná tsa nahnu, tan catyí nahnu:

—Yooho cuví Sehe Nyoo.

Maa tyin ra Jesús nduxaḡn ra tsi nahnu tan ña tsaḡ ra tsa cahan nahnu, tyin tsitó nahnu tyin juvin ra cuví Cristo.

**Nu tsicá ra Jesús cahán ra tuhun Nyoo tandihí ñuu cayucú Galilea**  
(Mr. 1.35-39)

<sup>42</sup> Tsa tuvi inga quiví, tan quee ra Jesús ñuu can. Tan cuahán ra iin nu taxin caá. Tan nyiví nanducú ñi tsi ra. Tan tsaḡ ñi nda nu nyíi ra ican. Tan cuñí ñi tsa ña cuhun ca ra. <sup>43</sup> Tacan tan catyí ra Jesús tsihin ñi:

—Ndi cuñí ca tsi jacoto yu tsi nyiví tandihí ca ñuu náca tan quihví Nyoo aña ñi tan cundaca ñaha ra tsi ñi. Tyin yacan cuenda vatsí yu nu ñuhu ñayiví ihya.

<sup>44</sup> Tan tacan ñi tsicá ra Jesús caahán ra tuhun Nyoo vehe ñuhu tandihí ñi ñuu tsa cayucú Galilea.

**Nu tsaḡ ra Jesús ndatu tsa cuaha xaan tyaca ñihí ra naha**  
(Mt 4.18-22; Mr. 1.16-20)

**5** Iin quiví nyaá ra Jesús yuhu miñi nu cuví Gensaret. Tan tsaḡ cuaha xaan nyiví, tyin cuñí ñi tyaa soho ñi tuhun Nyoo. Tan tihin xaan nyíi ra Jesús tyañu ñi. <sup>2</sup> Tan nyehe ra uvi taahan yutun ndoo yatyin ñi yuhu miñi ican. Yoñi yucú tsitsi yutun ndoo can tyin tsa quitá ra tñn tyaca. Tan nacatyá ra naha traya. <sup>3</sup> Tacan tan quihví ra Jesús tsitsi iin yutun ndoo tsa cuví tsi ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaḡ ra Jesús tsitsi yutun ndoo can. Tan quitsahá caahán ra tsihin nyiví. <sup>4</sup> Cuhva tsa ndihí cahán ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tñn ndo tyaca.

<sup>5</sup> Tan nacahán ra Simón tan catyí ra:

—Maestro, tsa jahá tyiñu xaan ndi ñiñu maa tan ndi intuhun maa tyaca ña ñihí ndi. Maa tyin tatun maa un catyí, cua jacuhun nyico ndi traya.

<sup>6</sup> Cuhva tsa jacuhun nyico ra naha traya ra, tan cuaha xaan tyaca ñihí ra naha. Ndihi maa traya can quitsahá tyaahnyá tsihin tsa vee tyaca can. <sup>7</sup> Tacan tan jandahá ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaḡ ra can naha ra. Tan jacutyí ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca. <sup>8</sup> Tsa nyehe ra Simón Pedro tsa cuví tacan, tan tsicuiñi tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

<sup>9</sup> Tyin ra Simón tsihin tandihí ra yucú tsihin ra, nayuhví xaan ra naha tsa cuenda tsa cuaha xaan tyaca ñihí ra naha. <sup>10</sup> Tacan tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhví xaan ra naha. Tan ra Jesús catyí ra tsihin ra Simón:

—Ña nayuhví un, tyin vityin tan nda nu cuahán ca tsi ityí nuu, tumaa tsa tñn ndo tyaca ihya, tacan cua ñihi

un nyívi cua cuvi nyívi Nyoo, tan cua tava un tsi ñi nu caquiñi, na quihvi ñi cuenda Nyoo —catyí ra Jesús tsihin ra Simón.

<sup>11</sup> Tacan tan tava ra naha yutun ndoo can nda nu ñuhu ityi. Tan nacoq ra naha tandihí tsa iyó tsi ra naha. Tan cuahán ra naha tsihin ra Jesús.

### Nu janduvahá ra Jesús tsi iin ra ndohó cuehe tyaahyú

(Mt 8.1-4; Mr. 1.40-45)

<sup>12</sup> Iin quívi nyíi ra Jesús iin ñuu nu iyó iin ra ndohó cuehe tyaahyú. Tan tsa nyehe ra tsi ra Jesús, tan tsi cuñi tsi tsi ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tsihin ra Jesús, tan catyí ra:

—Jutu Mañi yu, tun yooho tan cuñi un, cuví janduvaha un tsi yu —catyí ra.

<sup>13</sup> Tacan tan tyisq ndaha ra Jesús jiñi ra cuuhví can, tan catyí ra:

—Cuñi yu janduvaha yu tsi un. Cua nduvaha un vityin —catyí ra Jesús tsihin ra cuuhví can.

Tan iin yaha ñi nduvahá ra. <sup>14</sup> Tacan tan catyí ra Jesús tsihin ra:

—Coto catyí tuhun un tsihin nyívi. Intuhun ñi tsa cua cahan yu tsihin un, cyaahan nu nyaá ra cuví jutu. Tan janaha tsi un tsi ra. Tan cuhva tsa taahán tsi jamañi un tumaa tsa caahán ley tsa tyaq ra Moisés, tan cua cuvi tsi iin tsandaa tsi ra jutu can tan tsi nyívi tyin tsa nduvahá un —catyí ra Jesús tsihin ra.

<sup>15</sup> Vasu ndi maa tsa ña cuñi ra Jesús tsa coto nyívi, ñi hi ca quitá tuhun ra. Tan cuaha xaan nyívi ndu iin tyin cuñi ñi tyaa soho ñi tsa caahán ra tan janduvaha ra tsi ñi. <sup>16</sup> Maa tyin ra Jesús, jatsiyó, jatsiyó ñi ra tsi ra nu iyó nyívi. Tan cuahán ra nu taxin caá, cua ndacan tahvi ra tsi Nyoo jutu ra.

### Nu janduvahá ra Jesús tsi iin ra xii

(Mt. 9.1-8; Mr. 2.1-12)

<sup>17</sup> Iin quívi jacuahá ra Jesús tsi nyívi. Tan yucú juhva ra fariseo, ra tyaá yahvi xaan ley Nyoo tsa tyaq ra Moisés tsanaha. Tan yucú tucu juhva ra maestro cuenda ley vehe ñuhu ican. Quitá ra naha ñuu Jerusalén, tan inga ñuu nyihi tani cahnú Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyívi cuuhví. <sup>18</sup> Tacan tan tsaq ra naha tan nyisó ra naha iin ra cuuhví tsihin cuehe xii nu tsito. Tan cuñi ra naha quihvi ra naha tsitsi vehe tan caquin ra naha tsi ra cuuhví can nu nyíi ra Jesús. <sup>19</sup> Maa tyin ña ñihí ra naha nu quihvi ra naha tyin tui xaan nyívi. Tacan tan ndaq ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nuu nyíi ra Jesús tyañu nu tui nyívi can. <sup>20</sup> Tan nyehe ra Jesús tyin tsinú xaan iñi ra naha tsi ra. Tan catyí ra tsihin ra cuuhví can:

—Tsa tsicoq tucahnu iñi tsi un, tsa cuenda cuatyí un —catyí ra Jesús tsihin ra can.

<sup>21</sup> Tacan tan ra maestro cuenda ley vehe ñuhu tsihin ra cuví fariseo, quitsahá tsicá iñi ra naha: “¿Yóo ra cuví ra ihya? Tsicoq cuatyí ra nuu Nyoo tsa cuenda tsa

caahán ra. Tyin catyí ra tyin tsa tsicoq tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñi ra naha tsicá iñi ra naha.

<sup>22</sup> Maa tyin ra Jesús tsitó ra tsa tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan? <sup>23</sup> ¿Náa tsa yí ca catyí yo? ¿A yí catyí yo: “Cuatyí un tsa yahá ndatsí”, a yí ca catyí yo tsihin iin nyívi xii: “Nduvita tan caca un”? <sup>24</sup> Maa tyin vityin cua janaha yu tsi ndo tyin yuhu Rayí tsa quee nda gloria iyó ndatu tsi yu tsa jahá yu tucahnu iñi tsi ndo —catyí ra Jesús.

Tsa yahá cahan ra tacan, tan catyí ra tsihin ra cuuhví can:

—Nduvita. Naquihin tsito un tan cyanuhu yuvehe un.

<sup>25</sup> Tan nduvitá ra can, tan naquihin ra tsito ra. Tan cuanuhu ra yuvehe ra, juvin ñi jacahnú ra tsi Nyoo.

<sup>26</sup> Tandihí nyívi iyo xaan cuñi ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

### Nu caná ra Jesús tsi ra Leví

(Mt. 9.9-13; Mr. 2.13-17)

<sup>27</sup> Yahá can tan quitá ra Jesús vehe can. Tan nanyehe ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañi ra Leví. Tan nyaá ra nu tyahví nyívi. Tan catyí ra Jesús tsihin ra:

—Cohon tsihin yu —catyí ra.

<sup>28</sup> Tacan tan nduvitá ra Leví. Tan nacoq ra tandihí tsa iyó tsi ra. Tan cuahán ra tsihin ra Jesús.

<sup>29</sup> Tacan tan javahá ra Leví iin vico cahnú vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyívi. <sup>30</sup> Tan ra fariseo naha ra tsihin ra cuví maestro cuenda ley vehe ñuhu naha ra, quitsahá caahán nyaa ra naha tsi ra tsicá tsihin ra Jesús:

—¿Nacuvi tsatsí ndo tan tsihí ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

<sup>31</sup> Tan ra Jesús nacahan ra, tan catyí ra:

—Ña tsiñi ñuhu doctor tsi ra tsa vaha maa. Ra cuuhví, cuví ra tsiñi ñuhu doctor. <sup>32</sup> Yuhu ña vatsí yu jatyinyee yu tsi nyívi tsa tsicá iñi tyin vaha ñi, vatsí yu jatyinyee yu tsi nyívi tsitó tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

### Nu janahá ra Jesús tyin tatun tsa cuahán ra cua coo nyitya nyívi nyicún tsi ra

(Mt. 9.14-15; Mr. 2.18-20)

<sup>33</sup> Tacan tan tsicá tuhun ra naha tsi ra Jesús, tan catyí ra naha:

—Ra tsicá tsihin ra Juan tsicoó nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yooho, ndihí quívi tsatsí ra naha tan tsihí ra naha. ¿Nacuvi? —catyí ra naha.

<sup>34</sup> Tan nacahan ra Jesús, tan catyí ra:

—¿A cuví coonyitya nyívi yucú vico tindaha jaha ndo tatun nyíi ra tsa cua tindaha tsihin ñi? Ña cuví. [Tyin sií cuñí ñi, tan cuñí ñi catsí ñi.] <sup>35</sup> Maa tyin cua quita quívi tsa cua jatsiyo ra tindaha ican tsi ra nu yucú ñi. Tacan tan cua coonyitya ñi.

**Nu jacuahá ra Jesús tyin ña nacatsí tahan tuhun tsahnu tsa iyó nyívi tsihin tuhun tsaa tsa jacuahá ra**  
(Mt. 9.16-17; Mr. 2.21-22)

<sup>36</sup> Tacan tan cahān tucu ra Jesús iin cuhva tsihin nyívi, tan catyí ra:

—Yoñi tsaahnyá iin jahma tsaa, tan naquicú ñi tsihin jahma tuuhu. Tyin tatun javaha ñi tacan, nandiyi jahma tsaa can. Tan ña ndoo vaha tsi tsihin jahma tuuhu can.

<sup>37</sup> Tan tacan tucu, ña cuví tyihi nyívi vinu tsaa tsitsi ñi tsaahnu. Tyin cua tyahnya ñi can tsihin vinu tsaa can. Tan cua tiví vinu can tan tiví ndihí tucu ñi tsaahnu can. <sup>38</sup> Yacan cuenda taahán tsi tyihi yo vinu tsaa tsitsi ñi tsaa. Tyin tacan tan nduvi taahan tsi tan cua jaha cuenda tahan tsi itsi. <sup>39</sup> Tan yoñi tsihí vinu tsahnu, tan cuñí ñi coho ñi vinu tsaa. Tyin catyí ñi, vaha ca vinu tsahnu. [Vinu tsahnu can cuñí tsi catyí tyin cuví tsi cuhva iyó maa ñi.]

**Nu tuhun ra tsicá tsihin ra Jesús yoco itya trigu quívi quitatú nyívi**  
(Mt. 12.1-8; Mr. 2.23-28)

**6** Iin quívi quitatú nyívi, yahā ra Jesús mahñu tsa tatsí nyívi. Tan ra tsicá tsihin ra tuhún ra naha yoco trigu. Tan jocoñ ra naha can tsihin ndaha ra naha. Tan tsatsí ra naha tsiti can. <sup>2</sup> Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quívi quitatú yo? <sup>3</sup> Tan nacahān ra Jesús, tan catyí ra:

—¿A ñaha ca cahvi ndo nu tsahá cuenda tsi tsa javahā ra David tan ra cutahán tsihin ra quívi tsa tsisoco ra naha? <sup>4</sup> Quihví ra tsitsi vehe Nyoo. Tan quihñ ra paan tsa tyiso nyívi nuu altar Nyoo. Tan tsatsí ra. Tan tsahā ndihí ra tsi ra tsa cutahán tsihin ra. Tan maa ñi maa ra cuví jutu naha ra taahán tsi catsi paan can —catyí ra Jesús.

<sup>5</sup> Tacan tan catyí ra Jesús:

—Rayi tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quívi quitatú yo —catyí ra.

**Nu janduvahā ra Jesús tsi iin ra na ityí ndaha**  
(Mt. 12.9-14; Mr. 3.1-6)

<sup>6</sup> Inga quívi quitatú nyívi quihví ra Jesús tsitsi vehe ñuhu. Tan quitsahā jacuahá ra tsi nyívi. Tan nyehē ra tsi iin ra tsa na ityí ndaha cuaha. <sup>7</sup> Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican quívi quitatú nyívi, tyin tacan tan cuví tyaa ra naha cuatyí tsi ra Jesús. <sup>8</sup> Maa tyin ra

Jesús tsitó ra tsa tsicá iñi ra naha. Tan catyí ra tsihin ra na ityí ndaha can:

—Nduvita. Cūnyaa nyityi mahñu ra naha ihya.

Tacan tan ra na ityí ndaha can nduvitā ra. Tan tsinyaa nyityi ra mahñu ra naha. <sup>9</sup> Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Náa taahán tsi javaha yo quívi quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyívi, o cahñi ndihí yo tsi ñi?

<sup>10</sup> Tacan tan ra Jesús nyehé ra intuhun intuhun ra naha. Yahā can tan catyí ra tsihin ra tsa na ityí ndaha can:

—Cāñihi ndaha un.

Tacan tan ra na ityí ndaha ican cañihí ra ndaha ra. Tan nduvahā ndaha ra. <sup>11</sup> Maa tyin ra yucú ican naha ra, cuxaān ra naha. Tan quitsahā tsicá tuhun tahan ra naha tsi ra naha:

—¿Nacaa javaha yo tan cuví casi yo nu caahán ra Jesús ihya? —catyí ra naha.

**Nu nacatsí ra Jesús tsa utsi uvi taahan ra cua caca tyiñu ra**  
(Mt. 10.1-4; Mr. 3.13-19)

<sup>12</sup> Quívi ican ndaā ra Jesús iin yucu. Tan ñiñu maa tsi-cān tahvi ra tsi Nyoo. <sup>13</sup> Tan tsa tuvi, canā ra tsi tandihí ra nyicún tsi ra. Tan nacatsí ra utsi uvi taahan ra naha. Tan jacunañi ra tsi ra naha apóstol, tan cuñí tsi catyí tsi “ra tsa tava tyiñu Nyoo”. <sup>14</sup> Tan ihya nyaá sivi tandihí tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé; <sup>15</sup> ra Mateo; ra Tomás; ra Jacobo, sehe ra Alfeo; tan ra Simón ra nyanaá cuví ra cuenda partido tsa cuñí cahun cuatyí siquí ñuu Roma tsa ndacá ñaha tsi ñi; <sup>16</sup> tan ra Judas, yañi ra Jacobo; tan ra Judas Iscariote, ra tsa xico tsi ra Jesús.

**Nu jacuahā ra Jesús tsi nyívi cuaha**  
(Mt. 4.23-25)

<sup>17</sup> Tacan tan nuu ra Jesús yucu ican tsihin tsa utsi uvi ra naha. Tan ndu iin nyívi tsa nyicún tsi ra tsaha yucu can. Tan tsaā cuaha tucu nyívi quee ñuu Jerusalén tsihin tandihí ca ñuu cayucú Judea, tsihin tucu nyívi quee ityi yuhu ndutya ñuhu tsa cayucú yatyin ñi ñuu Tiro tsihin ñuu Sidón. Tan tsaā ñi tyin tyaa soho ñi tuhun caahán ra Jesús. Tan tandihí nyívi cuuhví cuñí ñi tsa janduvaha ra tsi ñi. <sup>18</sup> Tan tandihí nyívi tsa yihí tatyí ña vaha janduvahā ra tsi ñi. <sup>19</sup> Tan tandihí ñi cuñí ñi tññ ñi tsi ra, tyin janduvaha ra tsi ñi tsihin tunyee iñi tsa iyó tsi ra.

**Tsehe cahān ra Jesús tsihin nyívi tsa naquihñ ndaahvi ra**  
(Mt. 5.1-12)

<sup>20</sup> Tacan tan nanyehē ra Jesús tsi ra tsicá tsihin ra. Tan catyí ra tsihin ra naha:

—Tandihí nyoocho tsa ndaahvi, sií xaan cua cuñi ndo, tyin taahán tsi cundaca ñaha Nyoo tsi ndo.

<sup>21</sup> Tandihí nyooho tsa tsisocó vityin, sîi xaan cua cuñi ndo. Tyin coo quivi ña cua cusoco ca maa ndo. Tan tandihí nyooho tsa tsacú tsa cuiihya cuñi ndo, sîi xaan cua cuñi ndo tyin ña cua coo ca ndo tucuiihya iñi. Tan cua vacu naaha xaan ndo tsihin tsa sîi cuñi ndo.

<sup>22</sup> Cusiñi iñi ndo, quivi ndasi cuñi nyivi nyehe ñi tsi ndo, quivi tava ñi tsi ndo nu iyó ñi, quivi nduxaan ñi tsi ndo, quivi catyi ñi tyin nyivi ña vaha cuví ndo tyin tsinú iñi ndo tsi maa yu tsa cuví yu Rayiñi quee nda gloria.

<sup>23</sup> Sîi cuñi ndo quivi can tyin tacan tucu javahá nyivi ñi tahán tsanaha. Cuxaán ñi tsi ra cuví ndusu yuhu Nyoo. Ndava ndo tsihin tsa sîi cuñi ndo. Tyin cahnu xaan ndatu cua ñihi ndo nda gloria.

#### Tsehe cahán ra Jesús tsihin nyivi ña tsinú iñi tsi ra

<sup>24</sup> Maa tyin ndahvi nyooho, ñi cuca. Tyin vityin sîi xaan cuñi ndo tsihin tandihí tsa cuca ndo. Maa tyin cua coo quivi maa ñi maa tundoho cua nyehe ndo. Tyin nduve tsa cua ñihi ndo nu nyaá Nyoo.

<sup>25</sup> Tan ndahvi nyooho tsa cuñi maa ndo tyin nduve tsa cumañi tsi ndo tsa vityin, tyin coo quivi cua cusoco ndo. Nyooho tsa sîi cuñi vityin, ndahvi nyooho, tyin coo quivi cua coo ndo tucuiihya iñi. Tan cua vacu xaan ndo. <sup>26</sup> Tan ndahvi nyooho tsa vaha caahán nyivi tuhun ndo. Tyin tacan caa tucu nyivi tsicoq tsanaha, vaha xaan cahán ñi tuhun ra tsa cahán tsa ña nditsa tsihin ñi.

#### Cuñi ndo tsi nyivi xaan iñi tsi ndo

(Mt. 5.38-48; 7.12)

<sup>27</sup> Tandihí nyooho tsa tsiñi tsa caahán yu, catyi yu tsihin ndo tyin: Cuñi ndo tsi nyivi xaan iñi tsi ndo. Javaha ndo tsa vaha tsihin nyivi tsa ndasi cuñi nyehe tsi ndo.

<sup>28</sup> Cahán ndo tsa vaha tsihin nyivi tsa caahán ndavaha ñi tsi ndo. Tan ndacan tahvi ndo tsi Nyoo tsa cuenda nyivi caahán nyaá tsi ndo. <sup>29</sup> Tatun iin ra cañi iin tsiyo nuu ndo, cuvha ndihí ndo inga tsiyo, nacañi ndihí maa ra. Tatun iin ra quinyaá tsaqueta nditsí ndo, cuvha ndihí ndo camiseta ndo. <sup>30</sup> Cuvha ndo náa ndihí tsicán nyivi tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi. <sup>31</sup> Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi.

<sup>32</sup> Tatun cuñi ndo tsi maa ñi maa nyivi tsa cuñi tsi ndo, nduve tsa vaha javahá ndo. Tyin tacan icá tucu nyivi quiñi iyó. <sup>33</sup> Tan tatun tsihin nyivi tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyivi, nduve tsa vaha icá ndo cuví can, tyin nyivi caquiñi, tacan icá tucu ñi can. <sup>34</sup> Tatun javahá ndo tumañi iñi tsi iin nyivi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyivi caquiñi, tacan icá ñi. Tatun náa tumañi iñi javahá ñi tsi nyivi vaha iñi tsi ñi, ndatú ñi tsa nacuhva tucu ñi can tumañi iñi tsi ñi. <sup>35</sup> Maa tyin nyooho, cuñi ndo tsi nyivi xaan iñi tsi ndo. Tan javaha ndo tsa vaha tsihin ñi. Tan cuvha nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan

cua cuví ndo sehe maa Nyoo, ra nyaá gloria. Tyin Nyoo vaha iñi ra nda cuanda tsihin nyivi tsa ña nacuhvá tyahvi nyoo tsi ra, tan tsihin nyivi caquiñi. <sup>36</sup> Cú uhvi iñi ndo tsi nyivi, tumaa uhvi cuñi Nyoo Jutu yo nyehé ra tsi yo.

#### Ña cahán nyaá yo tsi inga nyivi

(Mr. 7.1-5)

<sup>37</sup> Ña cahán nyaá ndo tsi nyivi, tacan tan Nyoo ña cua cahán nyaá ra tsi maa ndo. Ña catyi ndo tsa cuhun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyivi. Tan Nyoo cua jaha ra tucahnu iñi tsi maa ndo. <sup>38</sup> Cuvha ndo tsa tsiñi ñuhu tsi nyivi. Tacan tan cua cuvha tucu maa Nyoo tsa tsiñi ñuhu tsi maa ndo. Cuaha cua cuvha ra tsi ndo. Tyin tumaa cuvha cua cuvha ndo tsi nyivi, tacan cuvha cua cuvha Nyoo tsi ndo —catyi ra Jesús.

<sup>39</sup> Tan tsahá ra Jesús cuvha ihya tsi ñi, tan catyi ra: —Iin ra cuaa ña cuví janaha ra ityi tsi inga ra cuaa.

Tyin nduvi taahan ra naha ña nyehé ra naha ityi cuahán ra naha. Tan cuví canacava ra naha tsitsi iin xahva. <sup>40</sup> Ndi intuhun ra cutuhvá ña cua cuví coto ra tsa tsitó ra jacuahá tsi ra. Tyin ndi quitsahá cahví ra. Cua coto ra nda ndihí cahví ra.

<sup>41</sup> ¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un? <sup>42</sup> Tatun tinuu maa un nyii iin yutun cahnu, ¿nácaa cua cuví catyi un tsihin ra yañi un? “Ñaha, na tava yu tsahan luhlu tsa nyii tinuu un.”? ¿Yooho tsa jahá tyin vaha xaan un! Tava jihna yutun cahnu tsa nyii tinuu maa un. Tyin tacan tan cuví nyehe vaha un tsahan luhlu tsa cua tava un tinuu yañi un.

#### Tsihin tsa javahá nyivi tan nacoto yo tsi ñi tatun ñi vaha, a ñi ña vaha cuví ñi

(Mt. 7.17-20; 12.34-35)

<sup>43</sup> Tin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha. <sup>44</sup> Tandihí yutun nacotó yo tsi tun tsihin tsiti tun. Tyin tiñata, ña cua cuvha tun mangu. Tan ndi intuhun iñu nduuhva ña cua cuvha tun uvas [tsa cuví yucu vixi]. <sup>45</sup> Tan tacan tandihí nyivi vaha, vaha caahán ñi, tyin yihí tsa vaha añañi ñi. Maa tyin nyivi ña vaha, maa ñi maa tsa ña vaha caahán ñi tyin yihí tsa caquiñi añañi ñi. Tyin tsihin yuhu yo caahán yo tandihí tsa quitá tsitsi añañi yo.

#### Cua cacu nyivi tsa tyaá yahvi tuhun caahán ra Jesús, tan nyivi ña tyaá yahvi tsa caahán ra, ña cua cacu ñi

(Mt. 7.24-27)

<sup>46</sup> ¿Nacuenda catyi ndo tsihin yu, “Jutu Mañi yu, Jutu Mañi yu”, tan ña javahá ndo tsa caahán yu? <sup>47</sup> Vityin cua catyi yu tsihin ndo yóo ndacú nyooho tsa vatsí ndo tsi maa yu, tan tyaá soho ndo tsa caahán yu, tan javahá ndo cuvha catyi yu. <sup>48</sup> Cuví ndo tumaa cuví iin ra tsitó janduvita vehe. Tyin jihna ca tahvi cunu xaan ra tan tahán ra yuu. Tan tyaá ra tyihyo tsaha vehe can tsata yuu can. Tan quivi nduñihí cuñi savi, ndutya can

tsatya xaan tsi tsaha vehe, maa tyin vehe can ña tani maa tsi tyin vaha xaan quitã tyihyo tsaha tsi. <sup>49</sup> Maa tyin nyivi tsa tsiñi tsa caahán yu tan ña javahá ñi tsa caahán yu, cuví ñi tumaa iin ra javahã vehe tan ña vaha javahã ra itsi. Tyin nduve tyihyo tsaha tsi javahã ra. Tan quivi tsaã savi, tan cuñihí cuún savi, tan yahã ndutya cuaha tsaha vehe can. Tan vehe can, iin yaha ñi tani tsi —tacan catyí ra Jesús.

**Nu janduvahã ra Jesús musu iin ra capitán andaru**  
(Mt. 8.5-13)

**7** Ndiñi cahã ra Jesús tsihin nyivi, tacan tan cuanuhũ ra inga tsaha nda ñuu Capernaum. <sup>2</sup> Tan ñuu can iyó iin ra capitán. Tan iyó iin musu ra tsa cuñi xaan ra. Tan cuuhví ra can. Tan tsa cuñi cúu ra. <sup>3</sup> Tan tsa tsitó ra capitán can tuhun ra Jesús, tacan tan tavã tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra. <sup>4</sup> Tacan tan tsaã ra tsahnu ican naha ra nu nyii ra Jesús. Tan quitsahã caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyivi cuví ra tsihin yo tsa cuví yo nyivi Israel. Nda cuanda javahã ña ra iin vehe ñuhu yo. Tan taahán tsi tyin jatyinyee un tsi ra. Tyin cuuhví xaan musu ra. Tan cuñi ra tyin janduvaha un tsi ra.

<sup>6</sup> Tacan tan cuahán ra Jesús tsihin ra naha. Maa tyin tsa ndi cumañi ca tsaã ra nda vehe ra capitán can, tan ra capitán can tavã tyiñu ra tsi ra vaha iñi tsi ra. Tacan tan tsaã ra naha nu nyii ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehẽ ra. Tyin ña cahnu cuví ra tan cuhun un vehe ra, catyí ra. <sup>7</sup> Yacan ña cana iñi ra quitsi ra nu nyii un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu ra, catyí ra? <sup>8</sup> Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tavã tyiñu ra tsi iin ra cuatyí ican, na cuhun ra, cuahán ra. Tatun catyí ra tsihin inga ra, na quitsi ra, vatsí ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

<sup>9</sup> Tsa tsiñi ra Jesús tsa cahã ra can naha ra, tan iyo xaan cuñi ra. Tan nanyehẽ ra tsi nyivi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihi yu tsi ndi intuhun ra Israel tsa tsinú xaan iñi tumaa ra ican —catyí ra Jesús.

<sup>10</sup> Tacan tan cuanuhũ ra vaha iñi tsi ra capitán can naha ra. Tan tsa tsaã ra naha nda yuvehẽ, tan nyehẽ ra naha tyin tsa nduvahã musu ra.

**Nu janandotó ra Jesús tsi sehe iin ñaha ndaahvi tsihi yii**

<sup>11</sup> Tsa yahã yacan tan cuahán ra Jesús iin ñuu tsa nañi Naín. Tan cuahán tucu ra tsicá tsihin ra. Tan cuahán ndihi tucu cuaha xaan nyivi. <sup>12</sup> Tacan tan cuhva tsa cua tsaã ra yatyin ñuu ican, nyehẽ ra tyin cuaha xaan nyivi quitã ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsihi yii. Tan intuhun ñi maa ra cuví sehe ña, tan tsihi ra. <sup>13</sup> Tan tsa nyehẽ ra Jesús tsi ña, tan cundaahvi iñi ra nyehẽ ra tsi ña. Tan catyí ra tsihin ña:

—Ña vacu un.

<sup>14</sup> Tsahan natuhvã ra tan tñin ra tsatun tsa nyii ndiyi can. Tacan tan ra nyisó tsi ndiyi can naha ra tsicuiñi ra naha. Tan catyí ra Jesús tsihin ndiyi can:

—Ndúvita, yooho ra tyuvaa —catyí ra.

<sup>15</sup> Tacan tan nduvitã ndiyi can. Tan nacunyaã ra. Tacan tan quitsahã caahán ra. Tan ra Jesús nacuhvã cuenda ra tsi ra tsi sihi ra. <sup>16</sup> Tsa nyehẽ ñi tsa tacan nandotó ra jahã ra Jesús tan yuuhví xaan ñi, tan quitsahã jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaã nu yucú yo ihya.

Tan catyí tucu ñi:

—Maa Nyoo cuví ra vatsí nu iyó yo, vatsí jatyinyee ra tsi yo —catyí ñi.

<sup>17</sup> Tan tandihí maa nyivi taniñi cahnu Judea, tsitó ñi tsa javahã ra Jesús.

**Nu jacuhun ra Juan uvi taahan ra tsa tsicá tsihin ra nu nyii ra Jesús**  
(Mt. 11.2-19)

<sup>18</sup> Tan ra tsicá tsihin ra Juan naha ra nacatyí tuhun ra naha tsa javahã ra Jesús. Tacan tan canã ra Juan tsi uvi taahan ra naha. <sup>19</sup> Tan tavã tyiñu ra tsi ra naha na cuhun ra naha nu nyii ra Jesús, tan ndaca tuhun ra naha tsi ra tatun juvin ra cuví Cristo, ra tsa cua jaquitsi Nyoo. Tyin tatun ñavin ra Cristo cuví ra, cuatu ra naha tsi inga ra. <sup>20</sup> Tacan tan ra tsa jacuhun ra Juan, cuahán ra naha. Tan tsaã ra naha nu nyii ra Jesús. Tan catyí ra naha:

—Ra Juan, ra jacoondutyá, tavã tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

<sup>21</sup> Tan tsa ndi yucú ra tsa jacuhun ra Juan naha ra tan cuaha xaan nyivi cuuhví janduvahã ra Jesús. Tan tacan tucu nyivi yihé tatyí ña vaha. Tan cuaha tucu nyivi cuaa nanyehẽ ñi jahã ra. <sup>22</sup> Tacan tan catyí ra Jesús tsihin ra tsa jacuhun ra Juan naha ra:

—Cyaahan ndo. Tan nacatyí tuhun ndo tsihin ra Juan tandihí tsa nyehẽ ndo, tan tandihí tsa tsiñi ndo. Tan cãtyi ndo tsihin ra: ra cuaa nanyehẽ ra, ra coxo nacacã ra, ra ndohó cuehe tyaahyú nduvahã ra, ra soho nacuiñi ra, ndiyi nandotó, tan caahán yu tuhun Nyoo tsihin ñi ndaahvi nácaa cacu ñi. Tan cãtyi ndo tsihin ra

tyin <sup>23</sup> sɨ̄ xaan cuñí ñi nyicún tsi yu tun ña ndu uví iñi —catyí ra Jesús tsihin ra naha.

<sup>24</sup> Cuahán ra tsa jacuhun ra Juan naha ra, tan quitsahā caahán ra Jesús tuhun ra Juan tsihin nyivi. Tan catyí ra:

—¿Náa nyehē ndo quivi tsahan ndo nuu tsiqui ndī ican? ¿A nyehē ndo iin ndoo tsa janduvā tatyí? <sup>25</sup> ¿A iin ra tsa nditsí jahma vaha nyehē ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey. <sup>26</sup> ¿A ña nyehē ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo. <sup>27</sup> Juvín ñi tuhun ra Juan cuví tsa nyaá nuu tutu tsa tyaā ra Isaías tahañ tsanaha. Tan caahán Nyoo tuhun ra tyehen:

Yuhu cua jacuhun yu iin ra cua cahan tuhun yu tsa ndi cumañi ca cuhun un.

Na natyiso vaha ra ityi nu cua cuhun un.

<sup>28</sup> Tan catyí yu tsihin ndo tyin tsitsi tsa tandihí ra tsa cacu jahā ñiñaha, yofī ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo añima vasu iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

<sup>29</sup> Tandihí nyivi tan ra tavá xuhun naha ra, tsa tsi-coondutyā jahā ra Juan, nacotō ñi tyin cuhva javahá Nyoo, cuīti xaan tsi. <sup>30</sup> Maa tyin tandihí ra fariseo tsihin ra maestro cuenda ley vehe ñuhu, ña cuñí ra naha tsa jacoondutyā ra Juan tsi ra naha, tyin ña cuñí ra naha quihin ra naha tsa tsahá Nyoo tsi ra naha —catyí ra Jesús. <sup>31</sup> Tan catyí tucu ra:

—¿Náa cua jandu inducu yu tsihin nyooho, nyivi iyó quivi ihya? ¿Yóo caá tumaa caá ndo? <sup>32</sup> Tumaa ra nyihi cuví nyooho. Tyin ra nyihi jasiquí nuyahvi. Tan caná tsa tahan ra naha, tan catyí ra naha: “Tivī ndi tiyoo tan ña tsañī ndo yaa. Tan tsitā ndi yaa cuihaya, tan ña tsacū ndo”. catyí ra nyihi. [Tan tacan ñi cuví nyooho tyin ndi intuhun cuhva ña taahán iñi ndo.] <sup>33</sup> Tyin ra Juan, ra jacoondutyá, quitsī ra tan ña tsatsí vaha ra. Tan ña tsihī ra vinu. Tan nyooho catyí ndo tyin tatyí ña vaha yihí tsi ra. <sup>34</sup> Tan quitsī tucu yuhu tan cuví yu Rayñī tsa queē nda gloria. [Tan tsatsí yu tan tsihī yu.] Tan nyooho catyí ndo tyin tsatsí xaan yu tan tsihī xaan yu vinu. Tan ña taahán iñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra. <sup>35</sup> Maa tyin catyí yu tsihin ndo tyin tsa tsiñi tuñi Nyoo tsahá ra tsi nyivi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.

### Nu nyií ra Jesús vehe ra Simón ra cuví fariseo

<sup>36</sup> Iin ra fariseo tsa nañi Simón jacotō ra tsi ra Jesús tyin cuhun ra cucatsi ra nda yuvehe ra. Tan tsaā ra Jesús vehe ra, tan tsicunyaā ra nu mesa. <sup>37</sup> Tacan tan iin ñaha sɨ̄ iñi ñuu ican tsitō ña tyin nyií ra Jesús ican. Tan tsaā ña tsihin iin yutyi yuu xiñu tsitú tsi ndutya tami. <sup>38</sup> Tan tsinyaā ña yatyin ñi tsaha ra. Tan quitsahā tsacū ña tyin ndu uví iñi ña cuatyí ña. Tan cuún ndutya nuu ña. Tan tsihin ndutya nuu ña nacatyá ña tsaha ra

Jesús. Yahā can tan jana ityī ña tsaha ra tsihin ixi jiñi ña. Tan tyayuhū ña tsaha ra. Tacan tan tyosō ña ndutya tami ican tsata tsaha ra. <sup>39</sup> Tsa nyehē ra fariseo can tsa tacan icā ña, tan tsicá iñi ra: “Tatun nditsa tsa Nyoo jaquitsī tsi ra ihya, cua nacoto ra yóo ñaha tiñ tsaha ra, tyin ñaha ican, ñaha iyó cuatyí cuví ña.”

<sup>40</sup> Tacan tan ra Jesús catyí ra tsihin ra fariseo ican: —Yooho Simón, iyó iin tsa cua cahan yu tsihin un —catyí ra tsihin ra.

Tacan tan nacahan ra Simón, tan catyí ra:

—Vaha, cahan tsihin yu, Maestro —catyí ra.

<sup>41</sup> Tan catyí ra Jesús tyehen tsihin ra:

—Uvi taahan rayñī nyaá cuenda ra xuhun tsi iin ra tsa tuhvá tsahá nuu xuhun. Tan iin ra ican nyaá cuenda ra uhun cientu denario. Tan inga ra nyaá cuenda ra uvi xico utsi ñi denario. <sup>42</sup> Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ican, jahā ra tucahnu iñi tsi nduvi taahan ra naha. Tan vityin catyí tsihin yu, yooho Simón, ¿ndáa ra cua cuñi ca tsi ra tsa tsahá nuu xuhun ican? —catyí ra Jesús.

<sup>43</sup> Tacan tan nacahan ra Simón, tan catyí ra:

—Ra tsa cuaha ca jahá ra tucahnu iñi tsi —catyí ra.

Tacan tan catyí ra Jesús:

—Nditsa tsa caahán un —catyí ra.

<sup>44</sup> Tacan tan nanyehē ra Jesús tsi ñaha ican, tan catyí ra tsihin ra Simón:

—¿A nyehé un tsi ñaha ihya? Yuhu quihvī yu tsitsi vehe un, tan ña tsahā un ndutya tsa ndoo tsaha yu tumaa cuhva tsa iyó yo. Tan ñaha ihya nacatyā ña tsaha yu tsihin ndutya nuu ña. Tan jana ityī ña tsihin ixi jiñi ña. <sup>45</sup> Yooho ña tyayuhū un ndaha yu, tumaa cuhva tsa iyó yo, maa tyin maa ña nda cuenda tsa quihvī yu ihya tan ña jandihí ña tsa tyayuhú ña tsaha yu. <sup>46</sup> Tan yooho ña tyihí un acetye jiñi yu, maa tyin ñaha ihya tyihí ña ndutya tami tsaha yu. <sup>47</sup> Tan catyí yu tsihin un, yooho Simón, vasu cahnu xaan cuatyí ña, maa tyin jahá yu tucahnu iñi tsi ña. Yacan cuenda cuñi xaan ña tsi yu. Tan nyivi tsa jahá yu tucahnu iñi luxu ñi cuatyí ñi, luxu ñi cuñi ñi tsi yu —catyí ra Jesús.

<sup>48</sup> Tacan tan catyí ra Jesús tsihin ña can:

—Cuatyí un tsa yahā catsiyo, tyin tsa jahā Nyoo tucahnu iñi tsi un —catyí ra Jesús tsihin ña.

<sup>49</sup> Tacan tan ra yucú tsihin ra quitsahā tsicá iñi ra naha: “¿Yóo ra cuví ra ihya? tyin jahá ra tucahnu iñi cuatyí nyivi.”

<sup>50</sup> Tacan tan catyí ra Jesús tsihin ñaha ican:

—Cyaahan vityin, tsa cacū un tyin tsinū iñi un tsi yu. Cyaahan tsihin tsa vaha —catyí ra tsihin ña.

### Ñiñaha tsa jatinyeē tsi ra Jesús

**8** Tsa yahā can, tan cuahán ra Jesús tsicá ra iin iin ñuu nahnu tan iin iin ñuu nyihi. Tan caahán ra tsihin nyivi. Tan jacotō ra tsi ñi tuhun vaha náca cuñi Nyoo cundaca ñaha ra tsi ñi. Tan tsa utsi uvi taahan ra tsa tavā tyiñu ra, cuahán ra naha tsihin ra. <sup>2</sup> Tan cuahán tucu juhva ñiñaha tsa janduvahā ra: ñi cuhvī tan ñi yihí tatyí ña vaha. Tan tsihin ñi cuahán ña María tsa queē ñuu Magdala, tan juvín ña cuví ña yihí utsa tatyí ña va-

ha tan nduvahā ña. <sup>3</sup>Tan cuahán tucu ña Juana, ñasiñi ra Chuza, ra cumí tyiñu cuenda ra Herodes, tan ña Susana tsihin tandihí ca ñiñaha tsa jatyinyeé tsi ra Jesús tsihin tsa iyó tsi ñi.

**Nu caahán ra Jesús tyin tumaa iin ra tatsí tacan cuví ra caahán tuhun Nyoo**  
(Mt. 13.1-9; Mr. 4.1-9)

<sup>4</sup>Tan cuaha xaan nyivi quee ñi iin iin ñuu, tyin cua nyehe ñi nu caahán ra Jesús tuhun Nyoo. Tan tuvi xaan ñi nyecú, tan quitsahā caahán ra tsihin ñi tsihin iin cuhva tsahā cuenda ra, tan catyí ra:

<sup>5</sup>—Quitā iin ra vehe ra. Cuahán ra nu iyó tyiñu jahá ra, tyin cua tatsí ra tsiti trigu nu ñuhu ra. Tan cuhva tsa tatsí ra quitā ra tsiti can, tan cucoyo juhva yuhu ityi. Tan tsañi nyivi tsata can. Tan quitsi saa tan tsatsi ti. <sup>6</sup>Tan juhva ca tsiti can cucoyo tyañu yuu. Canā tsiti ican. Maa tyin na ityi tsi tyin luxu cuii ñi ñuhu yihí tsaha tsi. Tan nduve catsin. <sup>7</sup>Tan juhva ca tsiti cucoyo tyañu iñu. Maa tyin quivi canā trigu iin caa ñi tsihin iñu can, iñu can tsahñi tsi trigu can. <sup>8</sup>Maa tyin juhva ca tsiti cucoyo nu ñuhu vaha. Tan quivi tsahny tsi, vaha xaan tsahā tsi tsiti. Tyin tsa iin ñi tsiti ican, cientu tsiti quitā tsihin tsi —catyí ra Jesús.

Tan tsa yahā tsahā ra cuhva can, tan quitsahā caná tsaa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

**Nu jacoto ra Jesús nacuenda jacuahá ra tsi nyivi tsihin cuhva caahán ra tsihin ñi**  
(Mt. 13.10-17; Mr. 4.10-12)

<sup>9</sup>Yahā can tan ra tsicá tsihin ra, nducy tuhun ra naha tsi ra náa cuñí tsi catyi cuhva tsa cahān ra tsihin nyivi.

<sup>10</sup>Tacan tan catyí ra tsihin ra naha:

—Tsi nyooho jacotó Nyoo tuhun xeehe, nácaa ndacá ñaha ra. Maa tyin tandihí ca ñi ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñí ñi maa tyin ña cua cutuñi iñi ñi náa tuhun cuví can.

**Nu tsahā cuenda ra Jesús cuenda ra tsa tatsí**  
(Mt. 13.18-23; Mr. 4.13-20)

<sup>11</sup>Cuhva tsa tsahā yu tsi ñi, cuñí tsi catyi tsi tyehen: tsiti can, tuhun Nyoo cuví tsi. <sup>12</sup>Tan nu cucoyo tsiti trigu ican yuhu ityi, nyivi tsa tsiñi tuhun Nyoo cuví can. Maa tyin quitsi nu ña vaha tan quinyaa nu tuhun Nyoo tsi ñi tan coto tsinu iñi ñi tan cacu ñi. <sup>13</sup>Tan nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Si xaan naquihñ vaha ñi itsi juhva ñi quivi. Maa tyin ña yihí vaha yoho ñi, juhva ñi quivi tsinu iñi ñi, tan quivi tsa quitsahā nyehé ñi tundoho, tan jandihí ñi tsa tsinú iñi ñi. <sup>14</sup>Tan nu cucoyo tsiti tyañu iñu, juvin ñi nyivi tsiñi tuhun Nyoo cuví can. Tsiñi ñi tuhun Nyoo maa tyin ña nasamā ñi cuhva iyó ñi. Tyin yihí ñi, tyaa ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi si ca cuñí ñi tsihin tsa si caá tsa iyó nu ñuhu ñayivi. Tan cuví

ñi tumaa cuví yutun tsa ña tsahā tsiti. <sup>15</sup>Maa tyin nu cucoyo tsiti nu ñuhu vaha, yacan cuví nyivi tsa tsiñi tuhun Nyoo, tan vaha añima ñi tyin tsinú iñi ñi tsihin tanñi añima ñi. Tan vaha tyaa soho ñi tuhun Nyoo, tan ña naá maa iñi ñi tuhun ra. Tan javahá ñi tandihí tuhun caahán ra.

**Nu cahān ra Jesús tyin ña cua tyihi xeehe yo ñuhū tsa jandunditsín Nyoo añima yo coto quinyaa ra itsi**  
(Mr. 4.21-25)

<sup>16</sup>’Ndi intuhun yo ña tyaa yo ñuhū tyuma tan tyihí xeehe yo xuu tsito a inga nu xeehe. Tyaa yo ñuhū tyuma maa tyin tsaquin nyaa yo can iin nu sucun, tacan tan quihví nyivi tsitsi vehe maa tyin nditsin. <sup>17</sup>Tyin nduve iin tsa nyii xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo. <sup>18</sup>Yacan cuenda tyaa soho ndo tuhun caahán yu. Tyin tatun tyaa yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua tyaa soho ndo, tacan tan cua quinyaa Nyoo nda cuanda tsa luxu ñi tsa cuñí maa ndo tyin cumí ndo.

**Nu tsahā cuenda ra Jesús tyin tumaa yañi ra, tan tumaa sihi ra, tacan cuví nyivi tyaa yahvi tuhun Nyoo**  
(Mt. 12.46-50; Mr. 3.31-35)

<sup>19</sup>Tacan tan tsaā sihi ra Jesús tsihin yañi ra nu nyii ra. Maa tyin ña cuví tsaa ñi tyin tuvi xaan nyivi. <sup>20</sup>Tacan tan jacoto nyivi nyecú ican tsi ra Jesús, tan catyí ñi: —Sihi un tsihin ra yañi un naha ra nyecú ñi tsata vehe. Tan cuñí ñi cahān ñi tsihin un.

<sup>21</sup>Tacan tan nacahān ra Jesús, tan catyí ra:

—Tandihí maa nyivi tsa tyaa soho tuhun Nyoo tsa caahán yu tan tyaa yahvi ñi itsi, juvin ñi cuví sihi yu, tan juvin ñi cuví yañi yu —catyí ra Jesús.

**Nu jacutaxin ra Jesús tatyí ñihi nu miñi**  
(Mt. 8.23-27; Mr. 4.35-41)

<sup>22</sup>Cuví tsi iin quivi quihví ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsiyo miñi ihya.

Tacan tan cuahán ra naha tsihin yutun ndoo ican.

<sup>23</sup>Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaā tatyí ñihi xaan. Tan quitsahā tyihí tsi ndutya tsitsi yutun ndoo ican. Tan cuñí nyee yutun ndoo can tyin cuaha xaan ndutya quihví. <sup>24</sup>Tacan tan jandoto ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñí nyee yo tsitsi ndutya —catyí ra naha.

Tacan tan nduvitā ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi. <sup>25</sup>Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñí ra naha. Tan quitsahā tsicá tuhun tahan ra naha:

—¿Yóo ra cuví ra ihya? Tyin nda cuanda tatyí tan ndutya tan tyaá yahvi tsi tsa caahán ra.

**Nu nduvahá iin ra yihí tatyí ña vaha nda Gadara**  
(Mt. 8.28-34; Mr. 5.1-20)

<sup>26</sup> Tacan tan tsaá ra naha nda Gadara tsa canyíi yuhu miñi ityi nuu Galilea tsa canyíi inga tsiyo miñi can.

<sup>27</sup> Tan quitá ra Jesús tsitsi yutun ndoo ican. Tan ican tsaá iin ra ñuu tsa canyíi Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsí ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu. <sup>28</sup> Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsaahñi ndaha ra tan tsaha ra tsihin cadena. Maa tyin tatyí ña vaha ican tsahá tunyee iñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyivi iyó. Ra ican tsaá ra nu nyíi ra Jesús. Tan cuhva tsa nyehé ra can tsi ra Jesús, tsicuiñi tsiti ra nuu ra. Tan caná tsaá ra tan catyí ra:

—¿Nacuvi tyihí un tsi un tsihin yuhu, yooho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí ña vaha ican tsihin ra Jesús, tyin ra Jesús tavá tyiñu ra tsi nu tsa quita nu tsi ra ndaahvi ican.

<sup>30</sup> Tan nducú tuhun ra Jesús tsi tatyí ña vaha ican, tan catyí ra:

—¿Náa nañi un?

Tan tatyí ña vaha ican jacahan nu tsi ra can, tan catyí ra:

—Nyuhu nañi ndi, Legión.

Tacan catyí ra tyin cuaha xaan tatyí ña vaha yihí tsi ra. [Cuenda mil nahnu yihí tsi ra.] <sup>31</sup> Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehé nahnu tundoho tan ña cuví maa quita nahnu. <sup>32</sup> Tan tsicán nahnu tsi ra Jesús na cuhva ra quihvi nahnu tsitsi quini tsa yucú yuhu miñi ican tsatsí ti naha ti. Tacan tan tsahá ra Jesús ndatu tsa quihvi nahnu tsitsi quini ican naha ti. <sup>33</sup> Tan quitá nahnu tsi ra ndaahvi can. Tan quihvi nahnu tsitsi quini ican naha ti. Tacan tan tsinú quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tsihi ti naha ti tsitsi ndutya.

<sup>34</sup> Tacan tan ra jahá cuenda tsi quini ican naha ra, nayuhvi xaan ra naha. Tan tsinú ra naha cuahán ra naha cua nacatyí tuhun ra naha tsa cuví can tsihin nyivi nda ñuu. Tan tandihí ñi nyivi tsa nyehé ra naha, tan nacatyí tuhun ra naha tsa cuví ican. <sup>35</sup> Tacan tan tsahan nyivi tsinyehé ñi náa tsa cuví, tan tsaá ñi nu nyíi ra Jesús. Tan nañihí ñi tsi ra tsa tsa yahá quitá tatyí ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñi jiñi ra. Tan nayuhvi xaan ñi cuví.

<sup>36</sup> Tacan tan tandihí ñi tsa nyehé tsa cuví ican, nacatyí tuhun ñi tsihin tandihí ca nyivi nácaa quitá tatyí ña vaha tsi ra ndaahvi can, tan nduvahá ra. <sup>37</sup> Tacan tan tandihí nyivi iyó Gadara can quitsahá caahán ñi tsihin ra Jesús na cunuhu ra ityi nu quee ra. Tyin nayuhvi xaan ñi tsa javahá ra tsihin nu tatyí ña vaha ican. Tacan tan ra tsa quitá nu tatyí ña vaha can nahnu, cahan

ndaahvi ra tsihin ra Jesús, na cuhva ra cuhun ndihí ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyivi vehe un náa ndihí tsa javahá Nyoo tsihin un —catyí ra.

Tacan tan ra Jesús quihvi ra tsitsi yutun ndoo ican.

Tan cuanuhu ra tsihin ra tsicá tsihin ra. Tacan tan ra ndaahvi tsa nduvahá ican, cuanuhu ra nda ñuu ra. Tan ityi cuahán ra nacatyí tuhun ra tsihin tandihí nyivi ñuu ican nácaa janduvahá ra Jesús tsi ra.

**Nu nduvahá ña sehe ra Jairo tan ñaha tsa tñin jahma ra Jesús**

(Mt. 9.18-26; Mr. 5.21-43)

<sup>40</sup> Quivi tsa tsaá ra Jesús inga tsaha tsa tsahan ra inga tsiyo miñi can, cuaha xaan nyivi ndatú tsi ra. Tan siñ xaan cuñi ñi tyin tsaá nyico ra. <sup>41</sup> Tacan tan tsaá iin ra tsa nañi Jairo, ra cuví ityi nuu vehe ñuhu, tan tsicuiñi tsiti ra nuu ra Jesús. Tan quitsahá caahán ndaahvi ra tsihin ra na cuhun ra vehe ra. <sup>42</sup> Tyin iyó iin ñaha sehe ra, tan iyó utsi uvi cuiya ña. Tan tsa cuñi cúu ña jahá cuehe. Tacan tan cuahán ra Jesús vehe ra. Tan cuaha xaan nyivi cuahán tsihin ra, tan tyañu xaan nu cuahán ra tyañu ñi. <sup>43</sup> Tan tsihin nyivi ican cuahán iin ñaha cuuhví. Tsa iyó utsi uvi cuiya ndohó ña cuehe tsa cuún niñi ña. Tan tsa ndihí maa xuhun ña janaa ña tsihin doctor tan ña nduvahá ña. <sup>44</sup> Maa tyin tsaá ña nu cuahán ra Jesús, ityi tsata ra. Tan tñin ña jahma ra. Tan iin yaha ñi, tan tsicuiñi tsa cuún niñi ña.

<sup>45</sup> Tacan tan catyí ra Jesús:

—¿Yóo tñin jahma yu?

Tan tandihí ñi cuahán tsihin ra catyí ñi:

—Yoñi.

Tan ra Pedro tsihin ra cutahan tsihin ra, catyí ra naha tsihin ra Jesús:

—Maestro, cuaha xaan nyivi cuahán tsihin un, tan tyañu xaan nu cuahán un. Tan juvin ñi maa ñi tyan-dahñi tsi un. Tan nducú tuhun ca un “¿Yóo tñin jahma yu?” —catyí ra naha.

<sup>46</sup> Maa tyin ra Jesús catyí ra:

—Tsitó maa yu tyin iyó iin nyivi tñin jahma yu, tyin tuví iñi yu cuahán juhva tunyee iñi tsa iyó tsi yu —catyí ra.

<sup>47</sup> Tacan tan ñaha can nyehé ña tyin tsa tsitó ra. Tan quitsahá niñi ña tsihin tsa yuuhví ña. Tan tsicuiñi tsiti ña nuu ra. Tan nacatyí tuhun ña tsihin ra nacuenta tñin ña jahma ra, tan nácaa nduvahá ña iin yaha ñi ican. Tan tsiñi tandihí nyivi tsa nacatyí tuhun ña. <sup>48</sup> Tacan tan catyí ra Jesús tsihin ña:

—Tsa nduvahá un tyin tsinú iñi un tsi yu. Cuaahan tsihin tsa vaha —catyí ra.

<sup>49</sup> Ndi caahán ca ra Jesús, tan tsaá ñi iin ra quee vehe ra Jairo, ra cuví ityi nuu vehe ñuhu. Tan catyí ra tsihin ra Jairo:

—Sehe un tsa yahá tsihi ña. Ña cuhva ca un tsihi tsi ra Maestro ihya —catyí ra.

<sup>50</sup> Maa tyin tsa tsiñi ra Jesús tsa cahan ra ican, tan catyí ra tsihin ra Jairo:



—Ña nayuhvi un. Tsĩnu iñi. Tan ña sehe un cua ndu-vaha ña —catyí ra.

<sup>51</sup> Tan cuhva tsa tsaq̄ ra Jesús vehe ra Jairo, ña tsaḡa ra quihvi nyivi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihvi ñi tsitsi vehe nu canyí ñaha luhlu tsa tsihi can. <sup>52</sup> Tan tandihi ñi tsacú xaan ñi tsa cuenda tyin tsihi ña. Maa tyin ra Jesús catyí ra tsihin ñi:

—Ña v̄acu ca ndo. Tyin ña tsihi ña. Quixí ña —catyí ra.

<sup>53</sup> Maa tyin tsacú naaha ñi tsa caahán ra tacan. Tan ña tsínú iñi ñi, tyin tsitó ñi tyin tsa tsihi ña. <sup>54</sup> Tacan tan t̄ijn ra Jesús ndaha ña. Tan tsa nacahān ra tan catyí ra tsihin ña:

—Nduvita, ñaha luhlu —catyí ra.

<sup>55</sup> Tacan tan nandotō ña. Tan iin yaha ñi nduvit̄a ña. Tan catyí ra Jesús:

—Cuhva ndo tsa catsi ña.

<sup>56</sup> Tan jutu ña tsihin sihi ña, iyo xaan cuñí ñi. Maa tyin catyí ra Jesús tsihin ñi tyin yoñi maa tsihin cua cahan ñi tsa cuv̄i ícan.

**Nu tav̄a ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo**

(Mt. 10.5-15; Mr. 6.7-13)

**9** Can̄a ra Jesús tsa utsi uvi taahan ra tsicá tsihin ra.

Tan tsah̄a ra tunyee iñi cahnu tsi ra naha tyin cuv̄i tava ra naha tatyí ña vaha tsi nyivi, tan cuv̄i janduvaha ra naha tsi nyivi cuuhví.

<sup>2</sup> Tan tav̄a tyiñu ra tsi ra naha na cahan ra naha ná-caa ndacá ñaha Nyoo tsi nyivi. Tan tav̄a tucu ra tyiñu tsi ra naha na janduvaha ra naha tsi nyivi cuuhví. <sup>3</sup> Tan catyí ra tsihin ra naha:

—Nduve tsa cuiso ndo ityi cahun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cahun tsihin ndo. <sup>4</sup> Tan ndáa cuv̄i ñi vehe tsa ndo, ndo ndo ícan nda cuenda quita quivi tsa cahun ndo inga ñuu. <sup>5</sup> Tan nu ña cuñí nyivi tyaa soho ñi tsa caahán ndo, quita ndo ñuu ícan. Tan naquisi ndo nyaca ñuhu tsaha ndo. Tan yacan janahá tyin ndoó cuatyí ñi siqui ñi —catyí ra Jesús tsihin ra naha.

<sup>6</sup> Tacan tan cuahán ra naha tandihi maa ñuu. Tan caahán ra naha tuhun Nyoo tan náca cuñí tsi tan cacu ñi. Tan janduvah̄a ra naha tsi nyivi cuuhví.

**Nu cuñí ra Herodes coto ra yóo ra cuv̄i ra tsicá nuu caahán tuhun Nyoo tan janduvahá ra nyivi**

(Mt. 14.1-12; Mr. 6. 14-29)

<sup>7</sup> Ra Herodes, ra cuv̄i ra ndacá ñaha [taniñ cahnu Galilea], ñih̄i tuhun ra tsa javahá ra Jesús. Tan ña ñihí vaha ra cuhva yóo ra cuv̄i ra. Tyin yih̄í nyivi catyí ñi tyin ra Juan nandotō. <sup>8</sup> Tan yih̄í ñi catyí ñi tyin ra Elías quituv̄i nyico. Tan yih̄í ñi catyí ñi tyin inga ra cuv̄i ndusu yuhu Nyoo tsanaha nandotō. <sup>9</sup> Maa tyin catyí ra Herodes:

—Maa maa yu tyih̄i tyiñu tsa tyahnya jucun ra Juan. Tun tacan, yóo ra cuv̄i ra tsa caahán xaan nyivi tuhun catyí ñi tsiñi yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehe ra tsi ra.

**Nu tsah̄a ra Jesús tsa catsi uhun mil rayii**

(Mt. 14.13-21; Mr. 6.30-44; Jn 6.1-14)

<sup>10</sup> Tan cuhva tsa tsaq̄ nyico ra tav̄a tyiñu ra Jesús, tan nacatyí tuhun ra naha tsihin ra Jesús tandihi maa tsa cuv̄i nu tsahān ra naha. Tacan tan tav̄a siñ ra Jesús tsi ra naha tan cuahán ra naha yatyin ñi iin ñuu tsa nañi Betsaida. <sup>11</sup> Maa tyin cuhva tsa ñih̄i tuhun nyivi tyin cuahán ra Jesús ndacan, tan cuahán ñi nda nu nyií ra. Tan naquih̄in cuenda ra tsi ñi. Tacan tan quitsah̄a caahán ra tsihin ñi náca ndacá ñaha Nyoo tsi ñi. Tan janduvah̄a ra tsi nyivi cuuhví.

<sup>12</sup> Tan tsa tseñi cuii ña, tsa utsi uvi taahan ra tsicá tsihin ra Jesús catyí ra naha tsihin ra:

—Cahan tsihin nyivi ihya, na cunuhu ñi na quitatu ñi, na nanducu ñi tsa catsi ñi ñuu tsa canyí yatyin ñi ihya, tyin ihya nduve maa tsa catsi yo iyó —catyí ra naha.

<sup>13</sup> Tacan tan catyí ra Jesús tsihin ra naha:

—Cuhva nyooho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa tyin ña ñih̄i tsa catsi tandihi nyivi ihya. Ndi maa cahun ndi kujata ndi, maa tyin ña cua ñih̄i tsa catsi ñi tyin cuaha xaan ñi —catyí ra naha.

<sup>14</sup> Tyin vasiqui quitá maa uhun mil rayii yucú ícan.

Tan siñ maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyivi tsa uvi xico utsi taahan ñi iin iin nu cunyecu ñi.

<sup>15</sup> Tacan tan tsicunyecu tandihi ñi jah̄a ra naha. <sup>16</sup> Tan quih̄in ra Jesús uhun taahan paan ícan tsihin uvi taahan tyaca ícan. Tan nanyeh̄e ndaa ra ityi andivi, tan nacuhv̄a ra tyahvi nyoo tsi Nyoo tsa cuenda can. Tan tsahnyā sava ra paan tan tyaca ícan. Tan tsah̄a ra tsi ra tsicá tsihin ra, na tsatsa ra naha can tsi nyivi. <sup>17</sup> Tacan tan tandihi ñi tsatsi ñi, tan ndaha vaha iñi ñi. Yah̄a can tan ndoó ca tsa ñah̄ñu, tan jacutū ra naha utsi uvi taahan tyaca tsihin tsa ñah̄ñu ícan.

**Nu catyí ra Pedro tyin ra Jesús cuv̄i ra Cristo, ra jacacú tsi yo**

(Mt. 16.13-19; Mr. 8.27-29)

<sup>18</sup> Iin quivi quitá siñ ra Jesús tsihin ra tsicá tsihin ra. Tan tsican tahvi ra tsi Nyoo. Tan nu ndih̄i tsican tahvi ra, tan tsicá tuhun ra tsi ra tsicá tsihin ra tan catyí ra tsihin ra naha:

—¿Náa catyí nyivi tuhun yu, yóo ra cuv̄i yu, catyí ñi?

<sup>19</sup> Tan nacahān ra tsicá tsihin ra, tan catyí ra naha:

—Yih̄í ñi catyí ñi tyin ra Juan, ra jacoondutyá tsi nyivi, cuv̄i un. Tan yih̄í ñi catyí ñi tyin ra Elías cuv̄i un. Tan yih̄í

ñi catyí ñi tyin inga ra cuví ndusu yuhu Nyoo taħan tsanaha cuví un —catyí ra naha.

<sup>20</sup> Tacan tan nducy tuhun ra Jesús tsi ra naha, tan catyí ra:

—Tan nyooħo, ȳyóo ra cuví yuhu, cuñí maa ndo?

Tan nacahan ra Pedro, tan catyí ra:

—Yooho cuví ra Cristo, ra tsa quee nu nyaá Nyoo.

<sup>21</sup> Tan catyí ra Jesús tsihin ra naha tyin ña cahan ra naha can tsihin nyivi.

#### Nu jacoto ra Jesús nácaa cua cahñi nyivi tsi ra

(Mt. 16.20-28; Mr. 8.30—9.1)

<sup>22</sup> Tacan tan catyí ra tsihin ra naha inga tsaha:

—Yuhu Rayi tsa quee nda gloria cuví yu. Tan taahan tsi tyin cuaha xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quivi cua nandoto yu —catyí ra Jesús.

<sup>23</sup> Tacan tan catyí ra tsihin ra naha:

—Nyooħo tsa cuñi cunyicun tsi yu, cahnya iñi ndo tsa cuñi maa ndo javaha ndo, tacan tan cuví javaha ndo tsa cuñi Nyoo. Ña ndu uvi iñi ndo tsa yihí ndo cuenda yu vasu tandihí quivi nyehé ndo tundoho. Tyin yacan cuví tumaa cruu tsa taahan tsi cuiso ndo tatun cua cunyicun ndo tsi yu. <sup>24</sup> Tan nyooħo tsa ña cuñi nyehe tundoho tan ña cuñi ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooħo tsa cua cuhva ñayivi iyó ndo tsa cuenda yu, cua cacu ndo. <sup>25</sup> Nduve yahvi nyaá cua ñihi ndo tandihí tsa iyó nu ñuhu ñayivi ihya, tun ña cua cacu añima ndo. <sup>26</sup> Tyin tatun cahan nuu ndo tsa xaan cuñi nyivi nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsa quivi quiti yu inga tsaha. Tyin cua quiti nyico yuhu Rayi tsa quee nda gloria tsihin tsa cahnu cuví yu, tan tsa cahnu cuví Nyoo Jutu yo, tan ángel tsa cuenda ra. <sup>27</sup> Tan tsa nditsa catyí yu tsihin ndo tyin yihí ndo tsa nyecú ndo ihya vityin, ña cua cúu ndo nda cuanda yaha nyehe ndo nácaa cuví nu ndacá ñaha Nyoo.

#### Nu uñi taahan ra tsicá tsihin ra Jesús nyehé ra naha nácaa cuví nu ndacá ñaha Nyoo

(Mt. 17.1-8; Mr. 9.2-8)

<sup>28</sup> Una quivi yahā tsa cahan ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tsihin ra. <sup>29</sup> Tan tsa ndi tsicán tahvi ca ra Jesús, tan nasama cuhva caá nuu ra tan jahma ra. Si xaan cuitsin tsi tan xiñu tsi.

<sup>30</sup> Tacan tan quituví uvi taahan ra natuhún tsihin ra, ra Moisés tan ra Elías. <sup>31</sup> Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra. <sup>32</sup> Tan vasu cuñi xaan ra Pedro naha ra cusu ra naha, maa tyin ña quixi maa ra naha tyin nyehé ra naha tsa nditsin cuví nu

nyaá ra Jesús tsihin ra nyecú tsihin ra. <sup>33</sup> Cuhva tsa cuahán ra tsinyecú tsihin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

<sup>34</sup> Tan tsa ndi caahán ca ra tan quiti iin vico siqui ra naha. Tan nayuhvi xaan ra naha tsa quihvi ra naha tsitsi vico ican. <sup>35</sup> Tacan tan tsitsi vico ican tsifñi ra naha iin ndusu tsa catyí:

—Juvín ra ihya cuví Sehe yu, tan cuñi xaan yu tsi ra. Tyā soho ndo tsa caahán ra —catyí ndusu ican.

<sup>36</sup> Tan tsa yahā cahan ndusu ican, tan nanyehē ra naha tyin intuhun ña maa ra Jesús nyaá ican. Tan yoñi maa tsihin cahan ra naha tsa nyehe ra naha.

#### Nu janduvahā ra Jesús tsi iin ra luhlu tsa yihí tatyí ña vaha

(Mt. 17.14-21; Mr. 9.14-29)

<sup>37</sup> Tan tsa inga quivi tsa nuu ra Jesús yucu ican, cuaha xaan nyivi tsijataħan tsi ra. <sup>38</sup> Tacan tan canā tsa iin ra cuahán tsihin nyivi cuaha tsa tsijataħan tsi ra Jesús, tan catyí ra:

—Maestro, jahā tumañi iñi. Cundaahvi iñi tsi sehe yu. Tyin intuhun ñi maa ra cuví sehe yu. <sup>39</sup> Tan tuhvā tatyí ña vaha quihví tsi ra. Tan tuhvā ra canā tsa jahā nu. Tan janduvā nu tsi ra ndasava. Tan quitá tiñuu yuhu ra. Quiñi xaan taahan ra jahā nu. Tan ña cuñi maa nu tatyí ña vaha ican jaña nu tsi ra. <sup>40</sup> Tsa cahan yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuví tavā ra naha tsi nu —catyí ra.

<sup>41</sup> Tacan tan nacahan ra Jesús tan catyí ra:

—Nyooħo, nyivi ña tsinú vaha iñi. Tan caquiñi ndo.

¿Najava taahan ca quivi cunyaa yu tsihin ndo tan cunyeē iñi yu nyehe yu tsi ndo nda cuanda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndāca sehe un tsi yu.

<sup>42</sup> Tan cuhva tsa natuhvā ra luhlu can nu nyaá ra Jesús, tan janduvā nu tatyí ña vaha ican tsi ra ndasava. Maa tyin ra Jesús tavā ra tsi nu tatyí ña vaha ican. Tan janduvahā ra tsi ra. Tacan tan nacuhvā cuenda ra tsi ra tsi jutu ra. <sup>43</sup> Tan tandihí nyivi, iyo xaan cuñi ñi tsa cahnu tsa javahā Nyoo nu yucú ñi.

Tsitsi tsa iyo cuñi nyivi tsa javahā ra Jesús, tan catyí ra tsihin ra tsicá tsihin ra:

#### Nu cahan ra Jesús inga tsaha tyin cua cahñi nyivi tsi ra

(Mt. 17.22-23; Mr. 9.30-32)

<sup>44</sup> —Tyā soho vaha ndo tuhun caahán yu. Tan ña naa iñi ndo. Tyin Rayi tsa quee nda gloria, cua cuhva cuenda nyivi tsi ra tsi ra xaan iñi tsi ra —catyí ra Jesús.

<sup>45</sup> Maa tyin ra tsicá tsihin ra ña cutuñi iñi ra naha nacuenda cahan ra tacan. Tyin Nyoo ña tsahā ra tsa cutuñi iñi ra naha. Tan yuuhvi ra naha nducu tuhun ra naha tsi ra Jesús náa cuví tsa caahán ra.

**Nu janahā ra Jesús yóo ra tsa cahnu ca cuví nu ndacá ñaha Nyoo**

(Mt. 18.1-5; Mr. 9.33-37)

<sup>46</sup> Tacan tan ra tsicá tsihin ra quitsahā caahán yuhu tahan ra naha, ndáa ra cahnu ca cuví tsitsi tsa utsi uvi taahan ra naha. <sup>47</sup> Tan tsitó ra Jesús tsa tsicá iñi ra naha, tan quihín ra iin ra luhlu. <sup>48</sup> Tan catyí ra tsihin ra naha:

—Tatun tsihin sivi yu naquihín cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquitsi tsi yu, naquihín cuenda ndo. Tyin nu yucú ndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

**Nyivi tsa ña cuxaán tsi yo, juvin ñi ican jatinyeé tsi yo**

(Mr. 9.38-40)

<sup>49</sup> Tacan tan ra Juan catyí ra tsihin ra Jesús:  
—Maestro, nyehē ndi tsi iin ra tavá tatyí ña vaha. Caahán ra sivi un tan tavá ra tatyí ña vaha. Maa tyin ña tsahā ca ndi javaha ra tacan. Tyin ñavin tsihin yo tsicá ra —catyí ra.

<sup>50</sup> Tacan tan catyí ra Jesús tsihin ra:  
—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

**Nu cahān ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha**

<sup>51</sup> Tuví iñi ra Jesús tyin tsa nyaa naa yatyin quivi tsa cunuhu ra gloria. Tan jandu iin ra iñi ra, tan quihín ra ityi tan cuahán ra ñuu Jerusalén. <sup>52</sup> Tan tavā tyiñu ra na cuhun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús. <sup>53</sup> Maa tyin nyivi Samaria ican, ña cuñí ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñí ñi nyehe ñi tsi nyivi ñuu Jerusalén. <sup>54</sup> Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñí un tsa ica yo tumaa icā ra Elías? Cua ndacan yo tsi Nyoo na jaquitsi ra ñuhu andivi tyin cayu ñi Samaria ican tyin ña cuñí ñi tsa ndoo yo ñuu ñi —catyí ra naha.

<sup>55</sup> Tacan tan nyehē ra Jesús nuu ra naha. Tan cuxaān ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñí iñi ndo náa tyiñu vatsí yuhu. <sup>56</sup> Tyin Rayii tsa queē nda gloria, ña vatsí ra tyin janaa ra tsi nyivi, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

**Nyivi tsa cuñí quihvi cuenda ra Jesús**

(Mt. 8.19-22)

<sup>57</sup> Tan tsitsi tsa tsicá ityi ra naha, quitā iin ra, tan catyí ra tsihin ra Jesús:

—Jutu Mañi yu, cuñí yu cunyicun yu tsi un. Tan cuhun yu tsihin un tandihí ñi ityi cuhun un —catyí ra.

<sup>58</sup> Tacan tan catyí ra Jesús tsihin ra:

—¿A nditsa un? Tyin ñicuii iyó vehe tí. Tan saa iyó taca tí. Maa tyin Rayii tsa queē nda gloria ndi nu cava jiñi ra tan nduve iyó —catyí ra tsihin ra ican.

<sup>59</sup> Tacan tan catyí ra Jesús tsihin inga ra:

—Cohon tsihin yu.

Tacan tan nacahān ra ican, tan catyí ra:

—Taa, cūatu nuu tsi yu, na cuhun jihna yu cucutsi yu tsi jutu yu —catyí ra.

<sup>60</sup> Tacan tan ra Jesús nacahān ra tan catyí ra tsihin ra:

—Ñacoo tsi nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi. Maa tyin yoocho cūaahan cahan un tuhun Nyoo tsihin nyivi na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

<sup>61</sup> Tacan tan catyí inga ra tsihin ra Jesús:

—Cuñí yu cunyicun yu tsi un, tata. Maa tyin cūhva na cuhun jihna yu cucahan yu tsihin nyivi vehe yu —catyí ra.

<sup>62</sup> Tan ra Jesús catyí ra tsihin ra:

—Tumaa iin ra tahví ñuhu tsihin indiqui, tatun nanyehe tsata ra, ña quita vaha yucun nu jahá tyiñu ra. Tan tacan cuví iin ra nyicún tsi yu, tatun cuñí nyico ra tsa tsa nacoō ra, ña cuví cuhva ra tsi ra cundaca ñaha Nyoo —catyí ra Jesús tsihin ra.

**Nu tavā ra Jesús tyiñu tsi uñi xico utsi taahan ra cua cahan tuhun Nyoo tsihin nyivi**

**10** Tsa yahā can tan nacatsi Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandihí ñi ñuu, uvi uvi ra cuahan tsa iin nu cuahán ra nu cua cuhun ra Jesús. <sup>2</sup> Tan catyí ra tsihin ra naha:

—Tumaa iin itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndācan ndo tsi Nyoo na jaquitsi ca ra musu, tyin jatinyeē ra naha tsi ndo cahan ndo tuhun Nyoo tsihin nyivi. <sup>3</sup> Tan cūaahan ndo tan nyehē ndo tyin cua jacuhun yu tsi ndo tumaa mbee mahñu lobo tsa cuví quití xaan. Tyin lobo tuhvá tí tsahñí tsi mbee. Tan tacan tucu cua cuñi nyivi cahñi ñi tsi ndo. <sup>4</sup> Tan ña cua cuiso ndo ndi marali tan ndi nu yihí xuhun ndo, tan ndi inga pari nditsan ndo ña cuiso ndo. Jānumi ndo. Tun taahán ndo nyivi ityi cuahán ndo cūhva ndo nacumi tsi ñi tan ña cucuiñi ndo natuhun ndo tsihin ñi. <sup>5</sup> Cuhva tsa quihvi ndo tsitsi vehe iin nyivi, cāhan ndo tsihin ñi. Tan catyi ndo, na coo tsa vaha añima ñi. <sup>6</sup> Tan tacan tucu tatun iyó nyivi vaha iñi vehe ican, cua ndoo tsa vaha can tsihin ñi. Maa tyin tatun yoñi ñi vaha añima, ña cua ndoo tsa vaha tsihin ñi. <sup>7</sup> Tan ndoō ndo juvin ñi maa vehe ican. Tatun tsahá ñi tsa catsi ndo, cātsi ndo. Tatun tsahá ñi tsa coho ndo, cōho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsaa quivi tsa cuhun ndo inga ñuu. <sup>8</sup> Tan nu tsaa ndo iin ñuu tan vaha cahan ñi tsihin ndo, cātsi ndo tandihí tsa cuhva ñi

catsi ndo. <sup>9</sup> Tan janduvaha ndo tsi ñi cuuhví ñuu ican. Tan catyí ndo tsihin ñi: “Tsa nyanaá yatyin Nyoo, ra cuñí quihvi añima ndo cundaca ñaha ra tsi ndo.”

<sup>10</sup> Maa tyin tatun tsa ndo iin ñuu tan ña cuñí nyivi tyaa soho ñi tsa caahán ndo, quita ndo ityi cahnu. Tan catyí ndo tsihin ñi: <sup>11</sup> “Nda cuanda nyaca ñuhu ñuu ndo tsa iñí tsaha ndi, tan cua naquisi ndi. Tyin cuñí tsi catyí tyin cuatyí ndo ndoó can siqui ndo. Tyin Nyoo nyanaá yatyin ra tsihin ndo tan ña tyaá soho ndo tsa caahán ra nácaa cuñí tsi tsa cundaca ñaha ra tsi ndo.” Tacan catyí ndo tsihin ñi —catyí ra Jesús tsihin ra tsa uñi xico utsi can naha ra.

<sup>12</sup> Tan catyí tucu ra tsihin ra naha:

—Quivi cua tatsi tuñi Nyoo tsi nyivi, yaha ca cuhva cua nyehe nyivi ñuu ican tundoho tan ñavin ca nyivi tsicoq tahān tsanaha ñuu Sodoma, —catyí ra Jesús.

### Nyivi ña tyaá soho tuhun caahán ra Jesús cua nyehe ñi tundoho (Mt. 11.20-24)

<sup>13</sup> Tan catyí ra Jesús:

—¡Ndahvi nyooho, nyivi ñuu Corazin! Tan jndahvi nyooho nyivi ñuu Betsaida! Tyin nyehé ndo tsa iyo javahá yu, tan ña cuñí ndo nasamá ndo cuhva iyó ndo. Maa tyin nyivi ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehe nyooho vityin, numi xaan cua cunditsi ñi jahma tucuihya iñi tan cunyeu ñi nu nyaa: tsa ndu uvi iñi ñi cuatyí ñi cuví can.

<sup>14</sup> Yacan cuenda, nyooho nyivi ñuu Corazin tsihin ñuu Betsaida, ñihi ca cua tatsi tuñi Nyoo tsi ndo tan ñavin ca nyivi ñuu Tiro tan nyivi ñuu Sidón can. <sup>15</sup> Tan nyooho nyivi ñuu Capernaum, cuñí maa ndo tyin cundaa ndo nda cuanda andivi. Maa tyin cua nuu ndo nda cuanda nu yucú ndiyi anyaya, tyin ña tyaá yahvi ndo tuhun Nyoo —catyí ra Jesús.

<sup>16</sup> Tan catyí ra tsihin tsa uñi xico utsi taahan ra can naha ra:

—Nyivi tsa tyaá soho tsa caahán nyooho, tsa caahán yuhu tyaá soho ñi. Tan nyivi ña tyaá soho tsa caahán nyooho, tsa caahán yuhu ña tyaá yahvi ñi. Tan ñi ña tyaá yahvi tsa caahán yuhu, tsa caahán ra tsa jaquitsi tsi yu, ña tyaá yahvi ñi —catyí ra Jesús tsihin ra naha.

### Nu tsaq nyico tsa uñi xico utsi ra tsa tsaḥān tsicahān tuhun Nyoo

<sup>17</sup> Ihya cuví nu tsaq nyico tsa uñi xico utsi ra tsa tsaḥān tsicahān tuhun Nyoo tsihin nyivi. Tan siḥ xaan cuñí ra naha. Tan catyí ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyaá yahvi nahnu tsa caḥān ndi tsihin sivi un —catyí ra naha.

<sup>18</sup> Tacan tan catyí ra Jesús tsihin ra naha:

—Tacan tyin yuhu nyehe yu andivi nu canacavā nu ña vaha, nu nañi Satanás. Tumaa cañi iin tatsa savi, tacan canacavā nu. <sup>19</sup> Tan maa yuhu, tsaḥā tunyee iñi tsi ndo tyin cuví cañi tahan ndo tsihin nu ña vaha. Tan cuví cuañi ndo tsata coo tan tujuhma, tan nduve tsa cua jaha ti naha ti tsi ndo. <sup>20</sup> Maa tyin ña cusii xaan iñi

ndo tyin cuví tava ndo tatyí ña vaha ican. Cusii ca iñi ndo tyin nyaá sivi ndo nu libru Nyoo nda gloria —catyí ra Jesús tsihin ra naha.

### Nu jacahnú ra Jesús tsi Nyoo tsa siḥ cuñí ra tyin janahá Nyoo tsa vaha tsi nyivi ndaahvi (Mt. 11.25-27; 13.16-17)

<sup>21</sup> Tacan tan siḥ xaan cuñí ra Jesús jahá Tatyí Ii Nyoo, tan catyí ra:

—Jacahnú yu tsi un, Jutu yu, tyin yooho cuví ra ndacá ñaha andivi tan nu ñuhu ñayivi ihya. Tyin maa un janahá un tuhun maa un tsi nyivi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñí maa un —catyí ra Jesús.

<sup>22</sup> Tan catyí ra Jesús tsihin tandihí ra naha:

—Tandihí maa tsaḥā Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yóo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yóo ra cuví Nyoo Jutu, intuhun ñi Sehe ra tsitó tsi ra. Tan coto tucu nyivi tsa cuñí Sehe Nyoo jaco-to ra tsi ñi —catyí ra Jesús.

<sup>23</sup> Tacan tan nanyehē ra nu nyecú ra tsicá tsihin ra. Tan caahán xeehe ra tsihin ra naha:

—Siḥ xaan cuñí nyooho tan nyivi tsa iyó vityin tyin nyehé ndo tsa javahá yu. <sup>24</sup> Tyin cuaha xaan rey tan ra cuví ndusu yuhu Nyoo tahān tsanaha, cuñi ra naha nyehe ra naha tsa nyehe nyooho vityin. Maa tyin ña nyehe ra naha. Tan cuñi ra naha tyaa soho ra naha tsa tsiñi nyooho vityin. Maa tyin ña tsiñi ra naha —catyí ra Jesús tsihin ra tsa tsicá tsihin ra.

### Nu jacuahā ra Jesús tsi yo tyin taahán tsi jatinyee yo tsi tandihí ñi maa nyivi

<sup>25</sup> Tacan tan tsaq iin ra maestro cuenda ley vehe ñuhu. Tan quitsahā tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cuhun yu coo yu ñayivi nyito tsa ña cua naa maa?

<sup>26</sup> Tacan tan nacahān ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

<sup>27</sup> Tacan tan nacahān ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin taniñ añima yo tan tsihin tandihí cuhva tsicá iñi yo, tan tsihin tandihí tunyee iñi tsa iyó tsi yo, tan tsihin tandihí tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

<sup>28</sup> Tacan tan catyí ra Jesús tsihin ra:

—Nditsa tsa caahán un. Tacan javaha un tan coo un ñayivi nyito tsa ña cua naa maa —catyí ra Jesús.

<sup>29</sup> Maa tyin ra maestro cuenda ley can cuñi ra cuví ra ra vaha nuu ra Jesús, tan catyí ra tsihin ra:

—¿Tan yóo nyivi cuñi yu? —catyí ra.

<sup>30</sup> Tacan tan nacahān ra Jesús, tan catyí ra:

—Iin ra quee ñuu Jerusalén cuahán ra nda ñuu Jericó. Tan tahān ra tsi nu ñasuhu nahnu. Tan suhy nahnu tandihí maa tsa nyisó ra, nda cuanda jahma ra. Tan cañi nahnu tsi ra nda cuanda tsaqujn taxin ña nahnu

tsi ra. Tan nacoꝝ ihñi nahnu tsi ra ican. <sup>31</sup> Tacan tan yahā iin ra cuví jutu ityi can. Maa tyin tsa nyeheꝝ ra tsi ra canyií ican, ndasava ñi yahā tsiyo ra. <sup>32</sup> Tacan tan yahā tucu iin ra yihí cuenda vehe ñuhu, ra cuví tata ra Leví. Maa tyin tsa nyeheꝝ ra tsi ra canyií ican, juvin ñi ndasava yahā ra. <sup>33</sup> Tacan tucu iin ra Samaria yahā ra juvin ñi ityi can. Tan nyeheꝝ ra tsi ra canyií ican, tan quitsí tsa ndaahvi cuñí ra nyehé ra tsi ra. <sup>34</sup> Tan natuhvā ra nu canyií ra, tan quitsahā tyaá ra numeri tsi ra, tyihí ra acetye tsihin vinu nu uhvi can. Tan tyaa ra iin jahma vi-ta nu uhvi can. Yahā can tan jandaa ra tsi ra tsata burru jana ra, tan quihín ra tsi ra, cuahán tsihin ra nu nyaá iin vehe. Tan jahā cuenda ra tsi ra. <sup>35</sup> Tan tsa inga quiví tsa cuñí cuhun ra Samaria. Tan tavā ra uvi taahan xuhun. Tan tsahā ra tsi ra jatsii vehe can. Tan catyí ra tsihin ra: “Jāha cuenda vaha tsi ra ihya. Tan cūhva tsa catsi ra. Tan jāta un numeri tsi ra na nduvaha ñi ra. Taton cuñí ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

<sup>36</sup> Nu ndihí nacatyí tuhun ra Jesús, tan nducú tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndáa ra cuví ra vaha iñi tsi ra ndaahvi tsa tsinyaꝝ ndaha nu ñasuhu nahnu? —catyí ra Jesús.

<sup>37</sup> Tacan tan catyí ra maestro ican:

—Ra tsa cundaahvi iñi tsi ra —catyí ra.

Tacan tan catyí ra Jesús:

—Cūaahan tan ica tucu yooho tacan tsihin nyivi tsa nyehé tundoho —catyí ra.

### Nu tsinyaꝝ ra Jesús vehe ña Marta tsihin ña María

<sup>38</sup> Tan quihín ra Jesús ityi cuahán ra. Tan tsaꝝ ra iin ñuu. Tan ican iyó iin ñaha tsa nañí Marta. Tan tsaꝝ ra vehe ña. Tan tsahā ña quihvi ra tsitsi vehe ña. <sup>39</sup> Tan ña Marta, iyó iin tahan ña nañí María. Tan ña María tsi-cunyaꝝ ña yatyin ñi tsaha ra Jesús, tyin tyaa soho ña tsa caahán ra. <sup>40</sup> Tan ña Marta cuaha xaan tyiñu javahá ña. Tan tsaꝝ ña nu nyaá ra Jesús, tan catyí ña tsihin ra:

—Yooho tata. ¿A ña tsicá iñi yooho tyin ña tahan yu nacoꝝ ña tsi intuhun ñi maa yu tsihin tyiñu ihya? Cāhan tsihin ña na jatyinyee ña tsi yu —catyí ña tsihin ra.

<sup>41</sup> Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñí un tsihin tyiñu can. <sup>42</sup> Maa tyin iyó intuhun tsa ñiñi ca taahán tsi caca iñi yo. Tan ña María ihya nacatsí ña tyiñu vaha ca javahá ña. Tan yoñi cuví quinyaa can tsi ña —catyí ra Jesús tsihin ña Marta.

### Nu jacuahā ra Jesús tsi ra tsicá tsihin ra nácaa ndacan tahvi ra naha tsi Nyoo

(Mt. 6.9-15; 7.7-11)

**11** Cuví iin tsaha tsa tsicán tahvi ra Jesús. Tsa ndihí tsicān tahvi ra, tan catyí iin ra tsicá tsihin ra:

—Jānaha nácaa ndacan tahvi ndi tsi Nyoo, tumaa janahā ra Juan tsi ra tsicā tsihin ra —catyí ra.

<sup>2</sup> Tacan tan catyí ra Jesús tsihin ra:

—Cua cuhva yu cuhva tsi ndo nácaa. Tyehen ndācan tahvi ndo, catyí ndo:

Jutu Mañi ndi, yooho tsa nyaá un gloria. Jacahnú xaan ndi tsi un.

Na quitsi quiví tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihí cuhva cuñí maa un, tumaa cuhva cuví nda gloria.

<sup>3</sup> Cūhva tsa catsi ndi tan yaha ndi iin quivi.

<sup>4</sup> Jāha tucahnu iñi tsi ndi tsa cuenda cuatyí ndi. Tyin nyuhu jahā tucu maa ndi tucahnu iñi tsi nyivi xaan iñi tsi ndi.

Ña cua cuhva un tsa nducu cuhva nu ña vaha tsi ndi. Tan jācacu tsi ndi tan ña cua cunyeen nu ña vaha tsihin ndi.

Tacan ndācan tahvi ndo —catyí ra Jesús.

<sup>5</sup> Tan catyí tucu ra:

—Na catyí yo tyin iin nyooho iyó iin ra vaha iñi tsi ndo, tan tsaꝝ ra vehe ndo tsa tsa cuaa tan catyí ra tsihin ndo: “Jāha tumañi iñi tsi, xin. Cūhva nuu uñi taahán paan tsi yu. <sup>6</sup> Tyin iin ra vaha iñi tsi yu ndi tsaꝝ ra yuvehe yu. Tan cañi xaan queꝝ ra. Tan nduve tsa cuhva yu catsi ra.” <sup>7</sup> Tan nyooho cua nacahan ndo tan catyí ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan ña cuví nduvita yu tan cuhva yu tsa cuhva yu tsi un tsa vityin.” Tacan cua catyí ndo tsihin ra. <sup>8</sup> Tan catyí yu tsihin ndo. Vasu ra vaha iñi ndo cuví tsi ra can, ña cua nduvita ndo tan cuhva ndo tsa nducú ra tsa numi ñi. Maa tyin tatun caahán yuhu ra tsihin ndo, jandatsan ra yuvehe ndo tan caná tsa ra tsi ndo tsa ña cua cuvi cusu ndo, tacan tan cua nduvita ndo tan cuhva ndo tsa nducú ra. Tacan tan ña cua jatyañu ca ra tsi ndo. <sup>9</sup> Tan tacan tucu nyooho tsihin Nyoo, ndācan ndo tsi ra. Tan cua cuhva ra tsi ndo. Nānducu ndo tan cua ñihi ndo. Jāndatsan ndo yuvehe tan cua nuña. <sup>10</sup> Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

<sup>11</sup> Tacan tucu nyooho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi tun tsicán tsi paan. Tan ña tuhvá ndo cuhva iin coo itsi tun tsicán tsi tyaca. <sup>12</sup> Tan ña tuhvá ndo cuhva tujuhma tsi sehe ndo tatun tsicán tsi ndivi catsi tsi. <sup>13</sup> Nyooho quihí iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyí Ii ra cunyaꝝ añima ndo tun ndacan ndo tsi ra.

### Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo

(Mt. 12.22-30; Mr. 3.20-27)

<sup>14</sup> Ra Jesús tavā ra tatyí ña vaha tsa janduññi tsi iin rayii. Tsa quitā nu tatyí can tsi ra can, cuví nacahan ra. Tacan tan iyo xaan cuñí nyivi tsa nyeheꝝ ñi tsa cuví.

<sup>15</sup> Tan yihí ñi catyí ñi:

—Ra ihya, tavā ra tatyí ña vaha tsihin tunyee iñi nu Beelzebú nu cuví ityi nu tsihin tandihí tatyí ña vaha —catyí ñi.

<sup>16</sup> Tan yihí ñi cuñí ñi nducu cuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andivi. <sup>17</sup> Maa tyin ra Jesús tsitó ra tsa tsicá iñi ñi. Tan catyí ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihi tyiñu tsa ndacá ñaha ra naha. Tan tatun iin vehe tan natahvi nyivi tsihin tahan ñi, tacan tan cua tiví nu yucú ñi. <sup>18</sup> Tan tacan tucu nu ña vaha, tatun natahvi nahnu, cua cundihi tunyee iñi tsa iyó tsi nahnu. Caahán yu tyeheh tsihin ndo, tyin catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. <sup>19</sup> Maa tyin tun tsatyin tavá yu tsi nahnu tumaa cuhva catyí ndo, ndaca tuhun ndo tsi ra nyecú tsihin ndo yóo tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin nyooho soho xaan tsicá iñi ndo. <sup>20</sup> Maa tyin catyí yu tsihin ndo tyin yuhu tavá yu tatyí ña vaha tsihin tunyee iñi Nyoo. Tan cuñí tsi catyí yacan tyin nditsa tyin Nyoo, ra taahán tsi cundaca ñaha tsi nyivi, tsa tsaq ra nu yucú ndo.

**Nu jacuahá ra Jesús tyin ñihi ca tunyee iñi Nyoo tan ñavin ca tunyee iñi nu ña vaha**

<sup>21</sup> Tatun iin ra tan iyó xaan tunyee iñi tsi ra tan nyisó ra mityi ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuvi quinyaa ñasuhu. <sup>22</sup> Maa tyin tatun quitsi iin ra tsa cuaha ca tunyee iñi iyó, tan cañi tahan ra tsihin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

<sup>23</sup> Nyivi ña jahá tyiñu tsihin yu, jativí ñi tyiñu jahá yu. Tan tatun ña caahán ñi tuhun Nyoo tsihin nyivi, tyin cunyicun ñi tsi yu; cuñí tsi catyí tsi tyin ña tsahá ñi tsa cunyicun nyivi tsi yu.

**Nu jacuahá ra Jesús tsi yo nácaa quihvi tatyí ña vaha tsi yo inga tsaha tatun naa iñi yo**

<sup>24</sup> Tatun iin nu tatyí ña vaha quitá nu tsi iin nyivi, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá iñi nu: “Cunuhu nyico yu nda vehe yu nu quee yu.” <sup>25</sup> Tacan tan tsaq nyico nu añaima nu quee nu. Tan nyehé nu tyin ndii xaan tan sii xaan caá. <sup>26</sup> Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi tandihi nahnu añaima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

**Nyivi tsa nditsa iyó vaha ñi nu ñuhu ñayivi**

<sup>27</sup> Tsitsi tsa ndi caahán ca ra Jesús yacan, tan cana tsa iin ñaha tsa nyii mahñu nyivi ican. Tan catyí ña: —Náa tsa sii cuñí ñaha tsa jacacy tsi un, ñaha tsa jacaxin tsi un! —catyí ña.

<sup>28</sup> Maa tyin ra Jesús catyí ra:

—Sii xaan ca cuñi nyivi tsa tsiñi tuhun caahán Nyoo tan tyaá yahvi ñi itsi —catyí ra.

**Nyivi ña vaha, maa ñi maa tsa iyo cuñí ñi nyehe ñi**  
(Mt. 12.38-42; Mr. 8.12)

<sup>29</sup> Tacan tan tsaq ca nyivi nu nyii ra Jesús. Tan catyí ra tsihin ñi:

—Nyivi tsa iyó vityin quiñi xaan iyó ñi. Tan nyiyo xaan iñi ñi. Cuñí ñi nyehe jihna ñi tsa iyo. Maa tyin intuhun ñi tsa iyo cua nyehe ñi, yacan cuví tsa javahá Nyoo tsihin ra Jonás, ra cuví ndusu yuhu Nyoo tsanaha. Nduve inga ca tsa iyo cua nyehe ñi. <sup>30</sup> Tumaa tsa janahá ra Jonás tsi nyivi ñuu Nínive tahán tsanaha tyin ii Nyoo, tacan tucu yuhu, Rayii tsa quee nda gloria, janahá yu tsi nyivi tsa iyó vityin tyin ii Nyoo. <sup>31</sup> Quivi cua tatsi tuñi Nyoo tsi nyivi, cua nandoto ñaha cuví reina ityi sur tahán tsanaha, tan cua catyí ña tyin cuhun ndo anyaya tyin maa ña vasu cañi ñuu ña, maa tyin quitsi ña, quitsi tyaá soho ña tsa tsiñi tuñi tsa cahan ra Salomón. Tan vityin cahnu ca cuví ra nyaá tsihin ndo tan ñavin ca ra Salomón. <sup>32</sup> Tan quivi cua cutuñi tandihi nyivi, cua nandoto nyivi tsicoo ñuu Nínive tahán tsanaha, tan cua catyí ñi tyin nyooho nyivi tsa iyó vityin cuhun ndo anyaya, tyin nyivi Nínive ican, nasama ñi cuhva iyó ñi quivi cahan ra Jonás tuhun Nyoo tsihin ñi. Tan vityin cahnu ca cuví ra nyaá tsihin ndo tan ñavin ca ra Jonás.

**Nu janahá ra Jesús tyin na jaha yo cuenda añaima yo na coo tsa nditsin jahá Nyoo**

(Mt. 5.15; 6.22-23)

<sup>33</sup> Ndi intuhun ndo tan ña tuhvá ndo tyaá ñuhu tyuma tan tyihí xeehe ndo can, a tinyii ndo can tsitsi iin caja. Tyin ñuhu can taahán tsi cunyii can nu sucun. Tyin tatun quihvi nyivi tsitsi vehe ndo, nditsin. <sup>34</sup> Tinuu yo, iin ñuhu nditsin cuví tsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda añaima yo. Tatun iyó tsa nditsin jahá Nyoo añaima yo, vaha nyivi cuví yo. Tatun nduve tsa nditsin jahá Nyoo añaima yo, tumaa iin ra cuaa cuví yo, ña cuví nyehe yo ityi vaha tsa cuahán nu nyaá Nyoo. <sup>35</sup> Yacan cuenda jahá ndo cuenda tsi ndo, na coo tsa nditsin jahá Nyoo añaima ndo, tan ña coo tsa naa. <sup>36</sup> Tatun tsitú añaima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsín tsi taniñ cahnu ndo. Tumaa tsa nyaá iin ñuhu tyuma jandunditsín tsi taniñ cahnu ndo cuví can —catyí ra Jesús.

**Nu cuxaḡn ra Jesús tsihin ra maestro cuenda ley vehe ñuhu naha ra tan tsihin ra fariseo naha ra**

(Mt. 23.1-36; Mr. 12.38-40; Lc. 20.45-47)

<sup>37</sup> Tsa ndiñi cahan ra Jesús tsihin nyivi, iin ra fariseo, catyí ra tsihin ra, na cuhun ra cucatsi ra yuvehe ra. Tan tsaq ra Jesús vehe ra. Tan quihvi ra tsicunyaq ra nu mesa.

<sup>38</sup> Tacan tan ra fariseo ican iyo cuñí ra tyin ña nacatya ra Jesús ndaha ra tsa ndi cumañi ca catsi ra, tumaa cuhva iyó maa ra naha. <sup>39</sup> Maa tyin Jutu Mañi yo Jesús catyí ra tsihin ra:

—Nyooho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñi xaan caá can tyin ña nacatyá ndo can. Tacan cuví nyooho. Tyin cuñí nyivi tyin vaha ndo. Maa tyin xeehe ñi suhú ndo tan javahá ndo tsa ña vaha. <sup>40</sup> Ndava xaan iñi ndo. ¿A ña tsitó ndo tyin ra tsa javahá ityi tsata ndo, juvin ñi maa ra javahá ityi tsitsi ndo? <sup>41</sup> Taahán tsi javaha ndo tumañi iñi tsi nyivi ndaahvi, tan jatyinyee ndo tsi ñi tsihin taniñi añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

<sup>42</sup> ¡Ndahvi nyooho ra fariseo! tyin nyooho, cahví ndo ndaha menta tan ndaha lura tan náa ndihí ca yucu tsa tsatsí ndo, tan tavá ndo intuhun tsi tsa iin iin utsi tan tsahá ndo tsi Nyoo, maa tyin ña tyaá yahvi ndo tsa vaha tsa cuñí Nyoo javaha yo tan tsa cuñí yo tsi ra. Taahán tsi tsa cuñi vaha ca ndo tsi Nyoo tan javaha ndo cuhva cuñí ra, tan ña jandihí ndo tsa cuhva ndo diezmo can. <sup>43</sup> ¡Ndahvi nyooho tsa cuví ndo fariseo! tyin cuñí ndo cunyaa ndo nu tyayu vaha tsitsi vehe ñuhu. Tan cuñí ndo tsa tyaá yahvi nyivi tsi ndo nuyahvi. <sup>44</sup> ¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña nditsa ndo. Cuví ndo tumaa iin ñaña ndiyi tsa ña nditsin ca canyí. Tyin tsañi nyivi tsata can tan ña tsitó ñi tyin nyí ndiyi tsitsi ñaña ican. Tyin nduve ca cuhva canyí nu nyí ndiyi ican. Cuñí maa nyivi tyin vaha ndo, tan ña tsitó ñi tyin ña vaha añima ndo —catyí ra Jesús.

<sup>45</sup> Tacan tan nacahan iin ra maestro cuenda ley vehe ñuhu, tan catyí ra:

—Maestro, tsa catyí un tacan, caahán nyaa ndihí un tsi ndi —catyí ra.

<sup>46</sup> Tacan tan catyí ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsahá Nyoo tahanan tsanaha. Tan ña taahán tsi. Tan yoñi ndoyó carga can, tan jañiñi ca ndo na javaha nyivi can, tan maa ndo ndi luxu ña jatyinyeé ndo tsi ñi. <sup>47</sup> ¡Ndahvi nyooho! tyin janduvahá vaha ndo ñaña nu ñuhú yiquí ra cuví ndusu yuhu Nyoo tsa tsahñi ra cuví tsii tsaahnu ndo tahanan tsanaha. <sup>48</sup> Yacan cuñí tsi catyí tyin ndoó ndo vaha tsa javahá tsii tsaahnu ndo naha ra. Tyin tsii tsaahnu ndo tsahñi ra naha tsi ra cuví ndusu yuhu Nyoo. Tan nyooho janduvahá ca ndo ñaña ra naha. <sup>49</sup> Yacan cuenda catyí Nyoo tahanan tsanaha tsihin tsa tsíñi tuñi ra tyin cua jaquitsi ra tsi ra cua cuví ndusu yuhu ra tan ra caca tyiñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha. <sup>50</sup> Tan nditsa tyin tacan javahá ndo. Nyoo cua tatsi tuñi ra tsi ndo tan tsi nyivi iyó vityin tsa cuenda tandihí ra cuví ndusu yuhu ra tsa tsahñi tsii tsaahnu ndo naha ra nda cuanda tsinu ñuhu ñayivi tan nda cuanda vityin. <sup>51</sup> Nda cuanda niñi ra Abel tsa tsatí tsa tsahñi ra Caín yañi ra tsi ra, tan nda cuanda niñi ra Zacarías tsa tsahñi nyivi tsitsi vehe ñuhu yatyin nu nyaá altar. Yacan cuenda catyí Nyoo tyin cua tatsi tuñi ra tsi nyivi tsa iyó vityin tsa catyí cuatyí nyivi tsa tsicoo tahanan tsanaha.

<sup>52</sup> ¡Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu

quihví nyivi ityi nu nyaá Nyoo. Tan ndi maa ndo ña quihví ndo nu nyaá Nyoo. Tan ndi ña tsahá ndo tsa quihvi inga nyivi tsa cuñí quihvi —catyí ra Jesús.

<sup>53</sup> Ndiñi cahan ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaagn xaan ra naha tan quitsahá nducú tuhun xaan ra naha tsi ra Jesús. <sup>54</sup> Tyin cuñí ra naha tsa cahan ra Jesús iin tsa ña vaha, tyin tacan tan cuví tyaá ra naha cuatyí tsi ra.

**Nu jacuahá ra Jesús tyin ña cuví tyihi xeehe yo cuatyí yo**

**12** Cuenda mil nyivi ndu iin nda cuanda catyihí tahanan ña ñi, tyin cuaha xaan ñi. Tacan tan ra Jesús cahan jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyí ra tsa cuví tumaa yutsan iya. Tyin ndaá paan jahá yutsan iya, tan tacan cuví cuatyí ra can naha ra. Tyin jahá ra naha tyin vaha ra. Maa tyin ña cuví tyihi xeehe ra naha cuatyí ra naha. <sup>2</sup> Tyin nduve iin tsa yihí xeehe tan cuñí yo, tyin ña cua quituvi. Tan nduve tsa xeehe tan cuñí yo, tyin ña cua coto nyivi. <sup>3</sup> Yacan cuenda, náa ndihí tsa caahán ndo nu xeehe, cua quita tsi nu nditsin. Tan náa ndihí tsa caahán ndo tsitsi vehe ndo, cua cana tsa nyivi jiñi vehe.

**¿Yóo taahán tsi nayuhvi yo, a tsi nyivi a tsi Nyoo?**  
(Mt. 10.28-31)

<sup>4</sup> Tan catyí yu tsihin ndo tsa cuví ndo ra vaha iñi tsi yu, tyin ña nayuhvi ndo tsi nu tsahñi cuñu ñuhu yo. Tyin yaha can tan nduve ca tsa cuví javaha nu tsi yo.

<sup>5</sup> Maa tyin cua catyí yu tsihin ndo yóo taahán tsi nayuhvi ndo. Nayuhvi ndo tan tyaá yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

<sup>6</sup> Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihi ñi ti, Nyoo ña naá iñi ra tsi ndi intuhun ti. <sup>7</sup> Tan nyooho, nyaá yahvi ca ndo nu Nyoo tan ñavin ca tsa cuaha saa can, tan nda cuanda ixi jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuenda ña nayuhvi ndo.

**Na ña nayuhvi yo cahan yo tuhun ra Jesucristo tsihin nyivi**

(Mt. 10.32-33; 12.32; 10.19-20)

<sup>8</sup> Catyí yu tsihin ndo tyin tandihí nyooho tsa janahá ndo tsi nyivi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayñi nda gloria quee yu. <sup>9</sup> Maa tyin nyooho tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyivi cuenda yu cuví ndo. <sup>10</sup> Tan vasu cuxaan nyivi tsi yuhu, Rayñi tsa quee nda gloria, Nyoo cua jaha ra tucahnu iñi tsi ñi. Maa tyin nyivi caahán tsa ndavaha ñi siqui Tatyí Ii Nyoo ña cua coo tucahnu iñi tsi ñi cuenda yacan.

<sup>11</sup> Quivi tsa cua cundaca nyivi tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo. <sup>12</sup> Tyin cuhva tsa cua nacahan ndo, cua cuhva maa Tatyí Ii Nyoo náa tuhun taahán tsi cahan ndo —catyí ra Jesús.

### Nu tsahá cuenda ra Jesús tyin ña taahán tsi nyiyo iñi yo tsa cuca

<sup>13</sup> Iin ra tsa nyí tsihin nyivi cuaha tsa ndu iin nu nyí ra Jesús, catyí ra tsihin ra Jesús:

—Maestro, çahan tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

<sup>14</sup> Tacan tan catyí ra Jesús tsihin ra:

—¿Tsa, yóo tsahá tsi yu tsa cuví yu juez tan natahvi yu ndaha tyiñu ndo? —catyí ra.

<sup>15</sup> Tan yahá can tan catyí ra nuu nyivi cuaha can:

—Jaha xaan ndo cuenda tan ña nyiyo xaan iñi ndo tyin ña tsiñí ñuhu tsa coo cuaha ndaha tyiñu yo tan coonyito yo.

<sup>16</sup> Tacan tan tsahá cuenda ra Jesús iin cuhva tsi tandihí nyivi, tan catyí ra:

—Tsiçoo iin ra cuca. Tan cuaha xaan ndaha tyiñu ñihí ra nu jahá tyiñu ra. <sup>17</sup> Tacan tan tsicá iñi ra: “¿Nacaa javaha yu? Nduve nu quihí tandihí ndaha tyiñu ihya.”

<sup>18</sup> Tan catyí ra: “Tsa tsitó yu nácaa cua javaha yu. Cua caní yu tandihí yaca nyihi yu, tan cua javaha yu tsa nahnu ca, tan natyihí yu tandihí ndaha tyiñu can tsihin tandihí ca tsa iyó tsi yu tsitsi can. <sup>19</sup> Tacan tan cua catyí yu tsihin yu: Cuaha xaan ndaha tyiñu naquihín vaha un, tan vityin cuahán maa cuiya, quitatu, çatsi vaha, çoho vaha, tan çysii iñi.” <sup>20</sup> Tan Nyoo catyí ra tsihin ra can: “Ra soho, tsacuaa vityin cua cúu un, tan tsa naquihín vaha un ¿Yóo tsii cua cuví yacan?” catyí Nyoo tsihin ra can. <sup>21</sup> Tacan cuví iin ra tsa jatacá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

### Ña caca xaan iñi yo náa ndihí tsa tsiñí ñuhu tsi yo

(Mt. 6.25-34)

<sup>22</sup> Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihí ndo tsa catsi ndo, tan ndi jahma tsa cunditsi ndo. <sup>23</sup> Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsí yo. <sup>24</sup> Jaha ndo cuenda saa tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti, tyin Nyoo tsahá ra tsa catsi ti. Tan nuu Nyoo nyaá yahvi ca nyooho tan ñavin ca saa. <sup>25</sup> Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo. <sup>26</sup> Tatun ndi luxu can tan ña cuví jahá ndo, çnacuenda tsa tsicá xaan iñi ndo tandihí ca tsa tsiñí ñuhu tsi ndo?

<sup>27</sup> Jaha ndo cuenda nácaa iyó yutun ita tyin ña jahá tyiñu tun tan ndi ña tavi tun yuhva. Maa tyin catyí yu tsihin ndo tyin ndi ra rey Salomón tsihin tandihí tsa cuca ra tan ña sii caá tsa tsinditsí ra tumaa tsa jacunditsí Nyoo tsi yutun ita ican. <sup>28</sup> Tatun tacan ñi jacunditsí Nyoo tsi yutun ita tsa iyó nu tsiçui vityin, tan ityaan cua

cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra. <sup>29</sup> Ña caca xaan iñi ndo tuhun tsa catsi ndo tan tsa coho ndo. <sup>30</sup> Tyin nyivi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñí ñuhu tsi ndo. <sup>31</sup> Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihí tsa tsiñí ñuhu tsi ndo.

### Tsa vaha tsa iyó gloria

(Mt. 6.19-21)

<sup>32</sup> Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñí ra tsi ndo. Yacan cuenda cua cuhva ra quihvi ndo nu ndacá ñaha ra. <sup>33</sup> Xico ndo tsa iyó tsi ndo. Tan jatyinyee ndo tsi nyivi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihí tsa vaha. Tyin yoñi yóo javiví can ndacan, ndi nu ñasuhu, tan ndi quití. <sup>34</sup> Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndihí añima ndo —catyí ra.

### Nu jacuahá ra Jesús tsi yo nácaa cuatu yo tsi ra quivi quitsi ra inga tsaha

<sup>35</sup> Cuatu vaha ndo tsi yu tsihin ñuhu nditsin Nyoo quivi quitsi yu inga tsaha. <sup>36</sup> Tan cuví ndo tumaa musu tsa ndatú tsi tsitoho ra naha náa cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsaa ra. <sup>37</sup> Tan sii xaan cua cuñi ra naha nyehe ra naha tsi ra cuví tsitoho ra naha. Tyin ndatú ra naha tsi ra nda cuanda tsa tsaa ra, vasu ñuu taxin, vasu tsa naha ca. Tan cua tyaa ra tsi ra musu ican naha ra yuhu mesa tan cuhva ra tsa catsi ra naha. Tacan tan sii xaan cua cuñi musu can naha ra. <sup>39</sup> Tan çoto ndo tyin tatun tsitoho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ican tsitsi vehe ra. <sup>40</sup> Tan tacan cuví tucu nyooho, çuatu ndo. Tyin yuhu, Rayii tsa quee nda gloria, sana iñi ndo tan cua quitsi yu —catyí ra Jesús.

### Musu vaha tan musu ña vaha

(Mt. 24.45-51)

<sup>41</sup> Tacan tan quitsahá nducú tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihí nyivi?

<sup>42</sup> Tacan tan nacahan ra Jesús, tan catyí ra tsihin ra:

—Musu tsa tyaa soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha cuhva tsahá ra tsa catsi tandihí ca musu ican. <sup>43</sup> Tan sii xaan cuñí musu ican tatun cuhva tsa jahá tyiñu ra, tan cua tsaa tsitoho ra. Tyin tyaa yahvi ra tandihí tsa taahán tsi ica ra. <sup>44</sup> Tan catyí yu tsihin ndo tyin tsa nditsa. Tyin tsitoho ra cua nacuhva ra tandihí tsa cumí ra, cua quihí ndaha ra. Tyin vaha tyaa yahvi ra



tsihin tyiñu jahá ra. <sup>45</sup> Maa tyin tatun tsicá iñi musu ican tyin naha xaan cuahán tsitoho ra, tan quitsahá cañi ra tsi inga musu tsa cutahán tsihin ra tan ñiñaha jahá tyiñu ican, tan ña cuñi ra jaha tyiñu ra. Tyiñu tsatsi ñi tan tyiñu tsiñi nyixi ñi iyó ra. <sup>46</sup> Tacan tan sana iñi ra cua tsa tsitoho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsiñú iñi tsa caahán ra.

<sup>47</sup> Tan iin musu tsa tsitó nácaa iyó tsitoho ra tan ña javahá ra cuhva cuñi tsitoho ra, cuaha xaan tundoho cua nyehe ra. <sup>48</sup> Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitó ra can, tan javahá ra. Tatun iin musu tan cuaha tsa tsahá tsitoho ra tsi ra, cuaha tyiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsitoho ra.

**Nu cahán ra Jesús tyin tsacatyí ra cua cañi tahan nyivi tsihin nyivi ñi**  
(Mt. 10.34-36)

<sup>49</sup> Tumaa tsa jatahán yu ñuhu nu ñuhu ñayivi, tacan cuví tyiñu vatsí yu. ¡Tan cuñi xaan yu tsa nacayu catyín ña ñuhu ihya! <sup>50</sup> Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndihí tyiñu jahá yu. <sup>51</sup> Cuñi maa ndo tyin tsa vatsí cuhva yu tsa taxin coo ndo nu ñuhu ñayivi ihya. Maa tyin yuhu vatsí yu tyin jasiin yu tsi ndo. <sup>52</sup> Tyin tsa vityin tan ityi nuu ca, uhun taahan nyivi iin vehe ñi cua cusiiñ ñi. Uñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin uñi taahan ñi. <sup>53</sup> Tan ra iyó sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe siñhi cua cañi tahan ña tsihin sehe siñhi ña. Tan ña cuví sehe siñhi can cua cañi tahan ña tsihin siñhi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

**Nu cahán ra Jesús tsihin nyivi tyin ña nacotó ñi tyin tsa tsa Sehe Nyoo nu yucú ñi**  
(Mt. 16.1-4; Mr. 8.11-13)

<sup>54</sup> Catyí tucu ra Jesús tsihin nyivi cuaha tsa yucú ican: —Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuii cuví. <sup>55</sup> Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuii nu caahán ndo. <sup>56</sup> Nyooho jahá ndo tsa tsitó xaan ndo, tan nacotó ndo tandihí tsa cuví andivi, tan tandihí tsa cuví nu ñuhu ñayivi ihya. Tan ¿nacuenda tsa ña nacotó ndo náa tyembu iyó ndo vityin?

**Nducu yo cuhva nácaa coo vaha yo tsihin ra tsicán cuatyí tsaha yo coto cuhun yo anyaya**  
(Mt. 5.25-26)

<sup>57</sup> ¿Nacuenda ña jahá ndo cuenda, ndáa tsa vaha tan ndáa tsa ña vaha? <sup>58</sup> Tatun iin ra tsicán cuatyí tsaha

ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo cuhva coo vaha ndo tsihin ra tsa ndi cumañi ca tsa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa. <sup>59</sup> Tatun tacan cua cuvi, catyí yu tsihin ndo tyin ña cua quita ndo nda cuanda tyahvi ndo tandihí tsa taahán tsi tyahvi ndo —catyí ra Jesús.

**Cuñi tsi tsa nasama yo cuhva iyó yo, tun ña cuñi yo cuhun yo anyaya**

**13** Tacan tan juvin ñi quivi can nyecu juhva ra naha. Tan quitsahá nacatyí tuhun ra naha tsihin ra Jesús tsa javahá ra Pilato tsihin juhva ra Galilea naha ra. Tyin tavá ra tyiñu na cahñi andarú naha ra tsi ra Galilea tsa tsijamañi quiti jana ra naha tsi Nyoo. Tan tacan sacá nuu niñi ra ican naha ra tsihin niñi quiti tsa tsijamañi ra ican naha ra. <sup>2</sup> Tan nacahán ra Jesús tan catyí ra tsihin ra naha:

—¿A tsicá iñi nyooho tyin cahnu xaan ca cuatyí ra Galilea ican naha ra tan ñavin ca tandihí ca ra ñuu ra naha, tan yacan tsihí ra naha? <sup>3</sup> Ñavin. Tyin tatun nyooho tan ña nasama ndo cuhva iyó ndo, tacan cua cunaa ndo. <sup>4</sup> Tan tsa tsahun uñi taahan ra tsihí can naha ra tsa canacavá torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoq ñuu Jerusalén, cuñi maa ndo? <sup>5</sup> Ñavin. Tyin tatun nyooho tan ña nasama ndo cuhva iyó ndo, cua cunaa ndo.

**Nu tsahá cuenda ra Jesús iin cuhva nácaa ndatú Nyoo tsa nasama yo cuhva iyó yo**

<sup>6</sup> Tacan tan tsahá cuenda ra Jesús iin cuhva ihya. Tan catyí ra:

—Iin ra iyó yutun tsa nañi higuera tsi ra. Tan nyaa tun nu ñuhu ra. Tan tsahán ra tsinyehé ra tatun iñi tsiti tun. Tan nyehé ra tyin nduve. <sup>7</sup> Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehé yu tatun iyó tsiti tun. Tan nduve maa tsiti tun iñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsahá tun”, catyí ra. <sup>8</sup> Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihi yu ñuhu tyaahyú. <sup>9</sup> Vasiqui tacan tan cua cuhva tun tsiti. Maa tyin tatun ña cuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

**Quivi quitatú nyivi janduvahá ra Jesús tsi iin ñaha tihí tsata**

<sup>10</sup> Iin quivi tsa quitatú nyivi, jacuahá ra Jesús tsi nyivi tsitsi vehe ñuhu. <sup>11</sup> Tan ican nyaá iin ñaha tsa yihí tatyí ña vaha. Tan tsa tsahun uñi cuiya cuuhví ña tsa tihí tsata ña. Tan ña cuví ndundoo ña. <sup>12</sup> Tacan tan nyehé ra Jesús tsi ña. Tan caná ra tsi ña. Tan quitsahá caahán ra tsihin ña, tan catyí ra:

—Tsa nduvahā un. Nduve ca cuehe ndohó un —catyí ra tsihin ña.

<sup>13</sup> Tacan tan tyisó ra ndaha ra jiñi ña. Tan iin yaha ñi tan ndundoo ña. Tacan tan quitsahā jacahnú ña tsi Nyoo. <sup>14</sup> Maa tyin ra cuví ityi nuu vehe ñuhu, cuxaān xaan ra tsi ra. Tyin quiví quitatú janduvahā ra tsi ña. Tan catyí ra tsihin nyiví nyecú ican:

—Iyó iñu taahan quiví taahán tsi jaha tyiñu yo. Tacan quiví quitsi ndo cuvi ndo numerí. Tan ña quitsi ndo quiví quitatú yo —catyí ra.

<sup>15</sup> Tacan tan Jutu Mañi yo Jesús catyí ra tsihin ra:

—Nyooho tsa jahá ndo tyin vaha ndo. ¿A ña ndatsí tucu nyooho quití jana ndo tan jacohó ndo ndutya tsi tí quiví quitatú yo? <sup>16</sup> Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñí ña tsihin cuehe ihya jahá nu ña vaha. Tan yoñi ndatsi tsi ña. ¿A ña taahán tsi ndatsi yo tsi ña vasu ndi maa quiví quitatú yo cuví vityin? —catyí ra Jesús.

<sup>17</sup> Tacan tan cuhva tsa cahān ra Jesús yacan, tandihí maa nu xaan iñi tsi ra nducahan nuu nahnu. Maa tyin tandihí ca maa nyiví sñi xaan cuñí ñi tsihin tsa cahnu tsa iyo javahā ra Jesús.

#### Nu cahān ra Jesús tyin tumaa iin tsiti mostaza cuví tsa ndacá ñaha Nyoo tsi yo

<sup>18</sup> Tacan tan catyí ra Jesús:

—¿Náa cuví tsa ndacá ñaha Nyoo tsi yo? ¿Tan náa tsihin jandu inducu yo itsi? <sup>19</sup> Tumaa iin tsiti mostaza, tacan cuví tsi. Tyin iin ra tatsi ra iin tsiti ican nu ñuhu ra, tan canā iin yutun luhlu, tan tsahny tun. Tan cuví tun iin yutun cahnu xaan. Tacan tan tsaā saa naha tí nuu yutun ican. Tan javahā tí taca tí nuu tun.

#### Nu cahān ra Jesús tyin tumaa yutsan iya, tacan cuví tsa ndacá ñaha Nyoo tsi yo

(Mt. 13.33)

<sup>20</sup> Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo? <sup>21</sup> Cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaá tani yutsan paan ican jahá yutsan iya ican, tacan cuví tsa ndacá ñaha Nyoo tsi yo —catyí ra.

#### Yuvehe tihin tan ityi cuiñi tsa cuahán nu nyaá Nyoo

(Mt. 7.13-14, 21-23)

<sup>22</sup> Ityi cuahán ra Jesús ñuu Jerusalén caahán ra tuhun Nyoo tsihin nyiví tandihí ñi ñuu nu yahá ra. <sup>23</sup> Tan iin ra tsicá tuhun ra tsi ra:

—Jutu Mañi yu, ¿a cuaha maa nyiví cua cacu? —catyí ra.

Tacan tan nacahan ra Jesús, tan catyí ra:

<sup>24</sup> —Nanducu ndo cuhva quihví ndo yuvehe tihin. Tyin tacan cuví quihví ndo nu ndacá ñaha Nyoo. Tyin cuaha xaan ndo cuñí ndo quihví ndo ndacan, tan ña cuvi. <sup>25</sup> Tyin tumaa tsitoho iin vehe, tacan cuví Nyoo. Tan tsitoho vehe ican cua nacasi ra yuvehe. Tacan tan nyooho tsa nyecú ndo ityi tsata cua jandatsan ndo yu-

vehe, tan cua catyi ndo: “Nuña yuvehe.” Tan ra ican cua catyi ra tsihin ndo: “Ña tsitó yu ndáa ityi quee nyooho.” <sup>26</sup> Tacan tan nyooho cua catyi ndo: “Nyuhu tsat-si ndi tan tsihi ndi tsihin un. Maa un jacuahā un tuhun Nyoo tsi ndi ityi nu nyecú vehe ndi”, cua catyi ndo tsihin ra. <sup>27</sup> Maa tyin ra ican cua nacahan ra tsihin ndo tan cua catyi ra: “Tsa catyi yu tsihin ndo tyin ña tsitó yu ndáa ityi quee ndo. Çatsiyo nyaha ndo nu nyaá yu tandihí nyooho nyiví javahá tsa ña vaha” <sup>28</sup> Tacan tan cua vacu ndo tan catsan ña cua cuvi nuhu ndo tsa cua nyehe ndo tsi ra Abraham tsihin ra Isaac tan ra Jacob, tan tsihin tandihí ra cuvi ndusu yuhu Nyoo tsa tsicoo tahān tsanaha. Tyin nyecú ra naha nu ndacá ñaha Nyoo. Tan nyooho ndoo ndo ityi tsata. <sup>29</sup> Tan cua quitsi nyiví ityi ndutya ñuhu, tan ityi norte, tan ityi nu caná ñicanyii, tan ityi nu tyisó ñicanyii. Tan cua cunyecu ñi catsi ñi tsihin Nyoo nu ndacá ñaha ra. <sup>30</sup> Tan juhva nyiví tsa cuahán ityi nuu vityin, ñi can cuhun nu ndihí. Tan juhva nyiví tsa cuahán nu ndihí ña, ñi can cua cuhun ityi nuu —catyí ra.

#### Nu cuihva xaan cuñi ra Jesús nyehé ra tsi nyiví ñuu Jerusalén

(Mt. 23.37-39)

<sup>31</sup> Juvín ñi maa quiví can tsaā juhva ra fariseo. Tan catyí ra naha tsihin ra Jesús:

—Quita ihya tyin ra Herodes cuñi ra cahñi ra tsi un —catyí ra naha.

<sup>32</sup> Tan catyí ra Jesús tsihin ra naha:

—Cuaahan ndo tan cahan ndo tsihin ra tsa cuví tumaa ñicuii, tyin nda cuanda quita quiví tsa ndihí tyiñu jahá yu tsa tavá yu tatyí ña vaha tsi nyiví tan tsa janduvahá yu tsi nyiví cuuhví tsihin cuehe, tacan tan cundihi tyiñu jahá yu. <sup>33</sup> Maa tyin nda cuanda tahan tsi tsa ndihí maa tyiñu jahá yu, tacan tan cuhun maa yu cua cúu yu nda ñuu Jerusalén. Tyin ña cuví cúu iin ra cuví ndusu yuhu Nyoo ityi tsata ñuu Jerusalén.

<sup>34</sup> ¡Ndahvi nyooho nyiví Jerusalén! tyin tsañi ndo tsi ra cuví ndusu yuhu Nyoo. Tan cañi ndo yuu tsi tandihí ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa jahá cuenda iin ndiví sihi sehe tí, tan naquihín vaha tí tsi tí naha tí tsitsi nditsin tí. Maa tyin maa ndo ña cuñi ndo. <sup>35</sup> Nyehé ndo vityin tyin tsa nacoó yu tsi ndo. Tan catyí yu tsihin ndo tyin ña cua nyehe ca ndo tsi yu nda cuanda quita quiví tsa cua catyi ndo tyin cahnu xaan ra vatsí tsihin sivi Nyoo Jutu yo —catyí ra Jesús.

#### Nu janduvahā ra Jesús tsi iin ra cuuhví tsa iyó cuiñu quiví quitatú nyiví

**14** Cuví tsi iin quiví quitatú nyiví. Tan ra Jesús cuahán ra cua catsi ra vehe iin ra cuví ityi nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuví tyaa ra naha tsi ra Jesús. <sup>2</sup> Tacan tan yatyin ñi nuu ra Jesús nyaá iin ra cuuhví tsa iyó cuiñu. <sup>3</sup> Tan catyí ra Jesús tsihin ra maestro cuenda ley vehe ñuhu naha ra tan tsihin ra fariseo naha ra:

—¿A vaha janduvaha yo nyivi cuuhví quivi quitatú yo? ¿Náa catyí ley Nyoo? —catyí ra.

<sup>4</sup>Tacan tan tandihí ra naha, taxin ña tsinyecu ra naha. Tacan tan tyiso ndaha ra Jesús jiñi ra cuuhví can. Tan janduvahā ra tsi ra. Tan catyí ra tsihin ra na cunuhu ra. <sup>5</sup>Tacan tan catyí ra Jesús tsihin ra fariseo naha ra:

—Tatun nyooho tan canacava iin burru jana ndo, a inga quití jana ndo, tsitsi xahva, ¿a ña cua tava ndo tsi ti tsa numi ñi, vasu ndi maa quivi quitatú yo cuví? —catyí ra.

<sup>6</sup>Tacan tan taxin ña tsinyecú ra fariseo naha ra. Tyin ña ñihí ca ra naha náa nacahan ra naha.

### Nu jacuahā ra Jesús tsi yo tyin ña vaha tsa cahnu jaha yo tsi yo

<sup>7</sup>Nyehē ra Jesús tyin tandihí ra nyecú vico ican nacat-sí ra naha tyayu vaha ca cunyecu ra naha. Tacan tan tsahā cuenda ra tyehen tsi ra naha:

<sup>8</sup>—Ndáa quivi cahun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnu ca cuví tan ñavin ca maa ndo, <sup>9</sup>tan coto quitsi ra tsa canā tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyooho tsihin tsa cahan nuu ndo, tan cua cuhva ndo tyayu can. Tacan tan cua cunyecu ndo nu ndihí ña. <sup>10</sup>Maa tyin catyí yu tsihin ndo, tyin ndáa quivi cana ra tsi ndo, cyaahan ndo, tan ñavin nu vaha cunyecu ndo. Tyin tacan tan cua quitsi maa ra tsa canā tsi ndo tan cua cahan ra tsihin ndo: “Amigos, ñaha ndo, cunyecu ndo nu tyayu vaha ihya.” Tan tacan cua jacahnu ca ra tsi ndo nu nyivi nyecú yuhu mesa tsihin ndo. <sup>11</sup>Tyin ra tsa cahnu jahá tsi maa ra, cua tahan ra ticanuu. Tan ra tsa ndaahvi jahá tsi ra, cahnu ca cua cuví ra —catyí ra Jesús.

<sup>12</sup>Tacan tan catyí tucu ra tsihin ra canā tsi ra nu iyó vico can:

—Ndáa quivi coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuví nyivi un, ndi tsi nyivi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsahan ñi vico vehe un. <sup>13</sup>Maa tyin catyí yu tsihin un tyin ndáa quivi coo vico vehe un, cana tsi nyivi ndaahvi, nyivi cuuhví, nyivi coxo, tan tsihin nyivi cuaa. <sup>14</sup>Tacan tan siñi cua cuñi un, tyin ñi ican ña cua cuví natyahvi ñi tsi un. Maa tyin cua natyahvi Nyoo tsi un quivi cua nandoto un tsihin nyivi vaha.

### Nu tsahā cuenda ra Jesús iin cuhva nácaa caná ra tsi yo na quihvi yo nu ndacá ñaha Nyoo

(Mt. 22.1-10)

<sup>15</sup>Tan tsiñi iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Siñi xaan cua cuñi nyivi tsa cua catsi nu ndacá ñaha Nyoo —catyí ra.

<sup>16</sup>Tacan tan catyí ra Jesús tsihin ra:

—Iin ra ican jacoo ra iin vico cahnu xaan vehe ra. Tan canā ra cuaha xaan nyivi. <sup>17</sup>Tacan tan tsaā cuhva tsa cua cuxiñi ñi, tan jacuhún ra tsi musu ra na cuquihin ra tsi ñi, tyin tsa tahañ tsi cuhva cuxiñi ñi. <sup>18</sup>Maa tyin tandihí ñi ican quitsahā caahán ñi tyin ña cua cahun ñi. Tan iin ra ican catyí ra: “Ndi jatā yu iin ñuhu. Tan cuñi tsi cahun yu cunyehe yu itsi. Yacan tsicán yu na jaha ra tucahnu iñi tsi yu tyin ña cua cahun yu.” <sup>19</sup>Tacan tan inga ra ican catyí ra: “Ndi jatā ñi yu uhun taahan yunta. Tan cahun yu cunyehe yu tatun vaha ti naha ti. Yacan tsicán yu tumañi iñi tsi ra na jaha ra tucahnu iñi tsi yu, tyin ña cua cuví cahun yu.” <sup>20</sup>Tacan tan inga tucu ra ican catyí ra: “Ndi tindahā cuiñi ñi yu, tan ña cua cuví cahun yu”, catyí ra. <sup>21</sup>Tacan tan musu ra ican cuanuhū ra. Tan catyí tuhun ra tandihí tsa cuví ican tsihin ra tsitoho ra. Tsa tsiñi tsitoho ra tsa tacan, tan cuxaahñ xaan ra. Tan catyí ra tsihin musu ra: “Cyaahan vi-tyin tandihí maa ityi. Tan quitsi ndaca un tsi nyivi ndaahvi, nyivi cuuhví, nyivi coxo, tan tsihin nyivi cuaa”, catyí ra. <sup>22</sup>Tan tsa yahā tsaā nyico musu ican tan catyí ra tsihin ra tsitoho ra: “Tsa javahā yu tandihí maa tsa cahan un tsihin yu. Tan nuña ca tsitsi vehe”, catyí ra. <sup>23</sup>Tacan tan tsitoho ra catyí ra tsihin ra: “Cyaahan cua nducu ca nyivi tandihí maa ityi. Tan jañiñi un tsi ñi na quitsi ñi, tyin na cutu tsitsi vehe yu. <sup>24</sup>Tyin catyí yu tsihin un tyin ndi intuhun ñi tsa canā yu tsa jihna, ña cua catsi ñi tsihin yu”, catyí ra —catyí ra Jesús.

### Cuaha xaan tundoho nyehé yo tatun cuenda ra Jesús yihí yo

(Mt. 10.37-38)

<sup>25</sup>Cuaha xaan nyivi nyicún tsi ra Jesús. Tacan tan nanyehē ra tsi ñi, tan catyí ra tsihin ñi:

<sup>26</sup>—Tandihí nyooho tsa nyicún tsi yu, tatun cuñi ca ndo tsi nyivi ndo tan ñavin ca tsi yuhu, ñavin cuenda yu yihí ndo. Tan tatun cuñi ca ndo tsi maa ndo tsa nuu yuhu, ñavin cuenda yu yihí ndo. <sup>27</sup>Tyin nyooho tsa ña cuñi nyehe tundoho tsa cunyicun ndo tsi yu, ña taahán tsi cuví ndo nyivi cuenda yu, tyin tsa nyehé ndo tundoho, yacan cuví cruu tsa taahán tsi cuiso ndo. <sup>28</sup>Tyin tun cua javaha ndo iin vehe, nacañi nuu jihna ndo jiñi ndo tan tyihi tuñi iñi ndo tun quita vehe cahnu can tsihin xuhun tsa nyí tsi ndo. <sup>29</sup>Tyin tatun quitsahā jandaá ndo vehe ican, tan ña cuví jandihí ndo tyin nduve ca xuhun ndo, cua vacu nducu nyivi tsi ndo. <sup>30</sup>Tan cua catyí ñi: “Ra ican quitsahā javahá ra vehe ra, tan ndi ña cuví jandihí ra can”, cua catyí ñi. <sup>31</sup>A tatun iin rey tan cuñi ra cañi tahan ra tsihin inga rey ¿a ña cunyaa jihna ra tan nyehe ra tatun ñihi tsa utsi mil ñi andaru tsa cuahán tsihin ra cua cañi tahan ra naha tsihin inga rey tsa vatsí tsihin oco mil andaru ican? <sup>32</sup>Tan tatun tsitó ra tyin ña cua cuví jaha canaa ra tsi inga rey ican, tacan tan cañi ca vatsí inga rey ican, tan cua jacuhun ra tsi musu ra tyin na catyí tuhun ra naha tsihin inga rey ican na jandihí taxin ra itsi. <sup>33</sup>Tan tacan cuví nyooho. Tatun ña cahnya iñi ndo tandihí maa tsa cuñi ndo tan tandihí tsa cumí ndo, ña cua cuví cunyicun ndo tsi yu.

**Nu jacuahā ra Jesús tyin tumaa ñi tsa ndihi tsa uhva, tacan cuví yo tatun ndu uvi iñi yo tsa tsinú iñi yo tsi ra**  
(Mt. 5.13; Mr. 9.50)

<sup>34</sup> Vaha ñi tyin jacu uhvā tsi tsa catsi yo. Maa tyin tatun ndihi tsa uhva tsi, ña vaha ca tsi. <sup>35</sup> Nduve ca tyiñu cuví javaha tsi. Ndi ña cuví jatyinyee tsi tsi ñuhu. Tan javitá yo itsi tyin ña vaha ca tsi. Nyooho tsa iyó soho, tyāa soho ndo tuhun caahán yu —catyí ra Jesús.

**Nu jacuahā ra Jesús tyin tumaa mbee tsa cuanaá tacan cuví yo**  
(Mt. 18.10-14)

**15** Tandihí ra tavá xuhun cuenda ra ndacá ñaha nda ñu Roma, tan ra iyó cuatyí naha ra, natuhva ra naha nu nyií ra Jesús, tan tyāá soho ra naha tsa caahán ra. <sup>2</sup> Tacan tan ra fariseo naha ra tsihin ra maestro cuenda ley vehe ñuhu naha ra quitsahā caahán nyaa ra naha tsi ra Jesús, tan catyí ra naha:

—Ra ihya, caahán ra tsihin ra iyó cuatyí naha ra. Tan tsatsí ra tsihin ra naha —catyí ra naha.

<sup>3</sup> Tacan tan ra Jesús tsahā cuenda ra cuhva ihya, tan catyí ra:

<sup>4</sup> —Nyooho tsa iyó iin cientu mbee jana, tun cunaa intuhun tí, ¿a ña cua nacoo ndo tsi tandihí ca tí, tan cunanducu ndo tsi mbee tsa cunaa can nda cuanda tsa nañihi ndo tsi tí? <sup>5</sup> Tan tsa yaha nañihi ndo tsi tí, tyiso soco ndo tsi tí. Tan sñi xaan cua cuñi ndo. <sup>6</sup> Tan tsa tsaa nyico ndo vehe ndo, tan ndu iin ndo tsihin ra vaha iñi tsi ndo tan tsihin nyivi iyó yatyin yuvehe ndo, tacan tan catyí ndo tsihin ñi tyin na cusñi ndihi iñi ñi tsihin ndo tyin nañihí ndo mbee jana ndo tsa tsinaā. <sup>7</sup> Tan catyí yu tsihin ndo, tyin tacan tucu sñi xaan ca cuñi ángel Nyoo tsa iyó gloria tsacatyí intuhun ra tsa iyó cuatyí tan nasamá ra cuhva iyó ra, tan ñavin ca tsa cumi xico tsahun cumi taahan nyivi tsa nduve cuatyí tan ña cuñi ca tsi tsa nasama ñi cuhva iyó ñi.

**Ñaha tsa tsinaā xuhun tan nañihí ña**

<sup>8</sup> Tan catyí yu tsihin ndo, tyin tatun iin ñaha tan iyó utsi taahan xuhun ña, tan cuanaá iin xuhun ña, cua tyāa ña iin candili. Tan cua tihvi ña tanñi tsitsi vehe ña. Tan cua nanducu ña xuhun can nda cuanda tsa nañihi ña can. <sup>9</sup> Tan tsa yaha nañihi ña, cua cuhun ña cunanducu ña tsi ñi vaha iñi tsi ña, tsihin nyivi tsa iyó yatyin yuvehe ña, tan cua cahan ña tsihin ñi: “Cusñi ndihi iñi ndo tsihin yu tyin tsa nañihí yu xuhun yu tsa tsinaā”, cua catyí ña. <sup>10</sup> Tan catyí yu tsihin ndo tyin tacan tucu sñi cuñi ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyí ra Jesús.

**Nu jacuahā ra Jesús nácaa cuñi Nyoo tsi iin ra ndu uvi iñi cuatyí**

<sup>11</sup> Tacan tan tsahá cuenda ra Jesús inga cuhva ihya tan catyí ra:

—Iin ra, iyó uvi taahan sehe ra. <sup>12</sup> Tan ra tsa luhlu ca caahán ra tsihin jutu ra tyin na nacuhva ra tsa taahán

tsi tsi ra. Tacan tan jutu ra natahví sava ra tsa tsii ra tan tsahā ra tsi nduvi taahan sehe ra. <sup>13</sup> Tan ña cuaha ñi quivi tan ra luhlu ican xico ra tandihí maa tsa tsahā jutu ra tsi ra. Tan jandu iin ra xuhun ra, tan quihín ra ityi, cuahán ra iin ñuu cañi xaan. Tan ndacan tsicoo ra tan janaā ra tandihí maa xuhun ra tsihin tusñi iñi. Tan quiñi xaan icá ra tsicá nuu ra. <sup>14</sup> Tacan tan tsaa tama ityi nu iyó ra. Tan quitsahā tsisocó ra tyin tandihí xuhun ra janaā ra. <sup>15</sup> Tacan tan tsahā ra tsinducy ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quini jana ra, tyin jaha cuenda ra tsi tí naha tí. <sup>16</sup> Tan cuví tsi iin tsaha tsisocó xaan ra can. Tan nduve maa tsa catsi ra iyó, ndacua cuñi ra catsi ra tsa tsatsí quini ican naha tí. Tan yoñi maa tsahā tsa catsi ra.

<sup>17</sup> Tacan tan nducuhun iñi ra tsi jutu ra. Tan nacañi jiñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñi cúu yo jahá soco. <sup>18</sup> Vityin cua cunuhu yo nu nyaá jutu yo. Tan cua catyí yo tsihin ra tyin tsicoo cuatyí yo nuu Nyoo tan tacan tucu nuu maa ra. <sup>19</sup> Tan ña taahán ca tsi tsi yo tsa cuví yo sehe ra, tan na jaha ra tyin iin musu ña ra cuví tsi yo” cuñi ra tsicá iñi ra.

<sup>20</sup> Tacan tan quihín ra ityi cuanuhú ra nda vehe jutu ra. Tan cañi ca vatsí ra tan nyehé jutu ra tsi ra, tan cundaahvi iñi ra nyehé ra tsi sehe ra. Tan tsinú xaan ra tsijatahān ra tsi ra. Tan tsinumí nyaa ra tsi ra. <sup>21</sup> Tacan tan catyí ra tsihin jutu ra: “Tyatya, tsicoo cuatyí yu nuu Nyoo tan tsicoo cuatyí yu nuu tucu maa un. Tan yacan ña taahán ca tsi tsi yu tsa cuví yu sehe un”, catyí ra tsihin jutu ra. <sup>22</sup> Maa tyin jutu ra tavā tyiñu ra, tan catyí ra tsihin musu ra: “Tava ndo jahma vaha tan jacunditsi ndo tsi ra ihya. Tan tyihi ndo iin xehe nundaha ra. Tan tyihi ndihi ndo zapatu tsaha ra. <sup>23</sup> Tan cahñi ndo iin becerra tsa xaahan vaha ca, tyin catsi yo tsi tí. Tyin vityin cua coo yo vico. <sup>24</sup> Tyin ra sehe yu ihya tsa tsihi ra cuñi maa yu, tsicā iñi yu. Cuñi maa yu tyin ña cua nyehé ca yu tsi ra, tan tsaa nyico ra”, catyí jutu ra can. Tacan tan quitsahā tsicoo ñi vico. Tan sñi xaan cuñi ñi tyin tsaa nuhu nyico ra.

<sup>25</sup> Tacan tan inga sehe ra, ra tsa tsitsa, nyií ra tsicuhu. Tan tsa cua tsaa nuhu ra nda yuvehe ra, tan tsiñi ra tyin iyó yaa. Tan tuví iñi ra tyin tsañi ñi yaa. <sup>26</sup> Tacan tan tsa cuyatyin ra nda yuvehe ra tan canā ra tsi iin musu ra. Tan tsicā tuhun ra tsi ra can náa cuví xaan can.

<sup>27</sup> Tacan tan musu can catyí ra: “Ra yañi un tsaa nuhu ra. Tan yacan tavā jutu un tyiñu tyin na cahñi ra naha iin becerra xaahan. Tyin vaha tsaa ra yañi un, tan nduve náa tahān ra”, catyí musu can tsihin ra. <sup>28</sup> Tacan tan nduxaān xaan cuñi ra can. Tan ña cuñi ra quihvi ra tsitsi vehe. Tan jutu ra tsahān ra tsicahān ndaahvi ra tsihin ra, tyin na quihvi ra tsitsi vehe. <sup>29</sup> Tacan tan nacañān ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyāá yahvi xaan yu tsa caahán un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu. <sup>30</sup> Maa tyin vityin tsaa nuhu nu sehe un ihya, nu tsa janaā xuhun tsihin ñaha sñi iñi. Tan tsahā un iin becerra quiti xaahan tsi nu”, catyí ra tsihin jutu ra.

<sup>31</sup> Tacan tan nacahan jutu ra tan catyí ra tsihin ra: “Sehe yu, yooho tsihin maa yu nyaá un tandihí quivi. Tan tandihí tsa cumí yu, tsii un cuví can. <sup>32</sup> Tan vityin taahan tsi tyin javaha yo vico ihya, tan cusí iñi yo. Tyin tsaá nuhu ra yañi un, ra tsa tsihi, cuñi maa yu. Tumaa tsa nandoto nyico ra cuví can, tyin tsinaa ra, tan nañihí yo tsi ra inga tsaha”, catyí ra tsihin sehe ra —catyí ra Jesús.

### Nu jacuahá ra Jesús tsi yo nácaa javaha yo tumañi iñi tsihin tsa iyó tsi yo

**16** Tacan tan catyí ra Jesús tsihin ra tsicá tsihin ra: —Iyó iin ra, cuca xaan ra. Tan iyó iin ra yihí ndaha tandihí tyiñu jahá ra cuca can. Tan tsahan iin musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaá ra tandihí tsa iyó tsi ra. <sup>2</sup> Tacan tan cana ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsi nu nyaá yu. Vaha ca nacuhva cuenda un tandihí tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra. <sup>3</sup> Tacan tan ra yihí ndaha tyiñu can tsicá iñi ra: “¿Nacaa cua javaha yu vityin? Tsiotoho yu ña cuñi ca ra tsa jaha tyiñu yu tsihin ra. Tan nduve tunyee iñi iyó tsi yu tsa jaha tyiñu yu tsihin ñuhu. Tan cahán xaan nuu yu caya yu tsitsi ñuu. <sup>4</sup> Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu quivi tsa nduve ca tyiñu cua jaha yu, tan vaha cua tsa yu vehe ñi”, tsicá iñi ra can. <sup>5</sup> Tacan tan cana ra tsi intuhun intuhun ra tsa nyaá cuenda tsi tsiotoho ra. Tan catyí ra tsihin iin ra ican: “¿Náa nyaá cuenda un tsi tsiotoho yu?” catyí ra. <sup>6</sup> Tacan tan nacahan ra ican tan catyí ra: “Yuhu nyaá cuenda yu cumi mil litru acetye.” Tacan tan ra yihí ndaha tyiñu ican catyí ra tsihin ra: “Quihin un inga tutu ihya. Tan tyaa un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahan ra. <sup>7</sup> Tacan tan tsaá inga ra. Tan tsicá tuhun tucu ra tsi ra ican: “¿Náa nyaá cuenda un tsi tsiotoho yu?” Tan nacahan ra ican: “Nyaá cuenda yu iin mil arroba trigo”, catyí ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra. <sup>8</sup> Tacan tan tsitó tsiotoho ra tsa ña vaha tsa javaha ra. Tan iyo xaan cuñi ra cuca can, tyin yatyi xaan ñihí ra cuhva ica ra —catyí ra Jesús.

Tan catyí ra tsihin ra tsicá tsihin ra:

—Nyivi nu ñuhu ñayivi ihya tsa ña tyaá yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo añima.

<sup>9</sup> Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatinyee ndo tsi nyivi. Tan quivi tsa cua ndihí tsa cuca, cua ñihi ndo coo ndo nu ña cua naa maa.

<sup>10</sup> Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyíñu vaha ndo itsi. Tyin tatun ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatun cuaha coo tsi ndo. <sup>11</sup> Tan catyí yu tsihin ndo, tatun ña javahá ndo tsa vaha tsihin tsa

iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo. <sup>12</sup> Tyin tandihí tsa iyó tsi ndo, maa Nyoo tsaha nuu itsi tsi ndo. Tan tatun ña javahá ndo tumañi iñi tsihin tsi, ña cua cuhva ra tsa cuvi tsi ndo.

<sup>13</sup> Tin musu ña cuví coo uvi taahan tsiotoho ra. Tyin musu ican cua cuñi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuví cuñi ndo tsi Nyoo tatun cuñi tucu ndo tsa cuca —catyí ra Jesús. <sup>14</sup> Tan tsa tsiñi ra fariseo naha ra tandihí tsa cahan ra Jesús, tacan tan quitsaha tsacú nducu ra naha tsi ra. Tyin maa ra fariseo naha ra cuñi xaan ra naha xuhun. <sup>15</sup> Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha añima ndo. Tandihí tsa cahnu cuñi maa nyivi, Nyoo ña cuñi ra nyehe ra yacan.

### Ley Nyoo tsa tyaa ra Moisés, tan tsihin tsa ndacá ñaha Nyoo tsi yo

<sup>16</sup> Ley tsa tsaha Nyoo tsi ra Moisés tyin tyaa ra, tan tsihin tuhun tsa tyaa ra cuví ndusu yuhu Nyoo tahañ tsanaha, yacan cuví tsa janaha ityi tsi nyivi nda cuenda quivi tsa quitsi ra Juan. Tan ra Juan quitsaha caahan ra tuhun vaha tyin tsa cuñi quitsi Nyoo tyin cua cundaca ñaha ra. Tan tandihí nyivi nducú xaan ñi cuhva tsa quihvi ñi nu ndacá ñaha ra.

<sup>17</sup> Tan catyí yu tsihin ndo, tyin vasu cunaa andivi tan nu ñuhu ñayivi ihya, maa tyin tsa cuví ley Nyoo tsa tyaa ra Moisés, ña cua cunaa tsi tyin cua cundaa tandihí tsi.

### Nu jacuahá ra Jesús tyin ña vaha tsa nacoo ihñi rayiñi ñasihi ra

(Mt. 19.1-12; Mr. 10.1-12)

<sup>18</sup> Tatun iin rayiñi tan iyó ñasihi ra, tan nacoo ihñi ra tsi ña, tan tindaha ra tsihin inga ñaha, coo cuatyí ra nuu Nyoo. Tan tatun tindaha inga rayiñi tsihin ñaha tsa nacoo yñi, coo tucu cuatyí ra can nuu Nyoo.

### Nu jacuahá ra Jesús tsi nyivi cuenda ra cuca tsihin ra Lázaró

<sup>19</sup> Tsicoo iin ra cuca. Tan vaha xaan jahma tsinditsi ra. Tan tandihí quivi iyó vico jahá ra tan tsatsí vaha ra. <sup>20</sup> Tan tsicoo tucu iin ra ndaahvi tsa tsinañi Lázaró. Tan ra ihya cuaha xaan ndihyi iñi tsi ra. Tan nyaá ra yuvehe ra cuca ican. <sup>21</sup> Ra ndaahvi can, cuñi ra catsi ra, vasu tsa cucoyó xuu mesa ra cuca can. Tan nda cuenda ina tan tsaá ti naha ti nu nyaá ra, tan tsacayaá ti nu uhvi ra. <sup>22</sup> Tan iin quivi tsihi ra ndaahvi can. Tan ángel maa Nyoo na quihñi tsi ra tan tsindaca ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutsi ñi tsi ra. <sup>23</sup> Tacan tan ra cuca ican nyehe xaan ra tundoho nu nyií ra anyaya. Tan nanyehé ra nu cañi xaan nu nyaá ra Abraham tsihin ra Lázaró.

<sup>24</sup> Tacan tan cana tsa ra cuca can tan catyí ra: “Tyatya

Abraham, cūndaahvi iñi tsi yu. Jāquitsi tsi ra Lázaro tan na jatyii ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhu ihya”, catyí ra. <sup>25</sup> Tan ra Abraham catyí ra tsihin ra: “Nducuhun iñi tyin vaha xaan tsicoo un nu ñuhu ñayivi. Tan ra Lázaro, tuhun ndaahvi tsicoo ra. Tan vi-tyin vaha iyó ra ihya, tan yooho nyehé un tundoho. <sup>26</sup> Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehe ña cuví cuhun ra naha nu nyii un. Tan ndi ra yucú nu nyii un, ña cuví quitsi ra naha nyehe”, catyí ra Abraham tsihin ra cuca can. <sup>27</sup> Tacan tan catyí ra cuca ican: “Tyatya Abraham, jāha tumañi iñi tsi yu. Jācuhun tsi ra Lázaro nda vehe jutu yu. <sup>28</sup> Tyin iyó uhun taahan ca ra yañi yu naha ra. Tan cuñi yu tyin catyí tuhun ra Lázaro tsihin ra naha nácaa nyii yu nyehé yu tundoho ihya, coto quitsi ndihi ra naha ihya”, catyí ra. <sup>29</sup> Tacan tan catyí ra Abraham: “Iyó ley tsa tyaā ra Moisés. Tan iyó tuhun tsa tyaā ra cuví ndusu yuhu Nyoo tañan tsanaha. Na tyaā yahvi ra yañi un naha ra, tun cuñi ra naha”, catyí ra Abraham. <sup>30</sup> Tacan tan catyí ra cuca ican: “Tyatya Abraham. Ña cua tyaā yahvi ra naha. Maa tyin tatun yoo tsa nando-to, tan cuhun cucahan tsihin ra naha, tacan tan cua tyaā soho ra naha tan cua nasama ra naha cuhva iyó ra naha”, catyí ra cuca ican. <sup>31</sup> Tan ra Abraham catyí ra: “Tatun ña cuñi ra naha tyaā yahvi ra naha tuhun tsa tyaā ra Moisés tan tuhun tsa tyaā ra cuví ndusu yuhu Nyoo tañan tsanaha, vasu ndi maa nandoto iin nyivi tan cahan ñi tsihin ra naha ña cua tsinu iñi ra naha.”

**Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha**  
(Mt. 18.6-7, 21-22; Mr. 9.42)

**17** Tyehen catyí ra Jesús tsihin ra tsicá tsihin ra: —Tacan ñi iyó tsa quifñi caá tsa jativí tsi nyivi. Maa tyin ndahvi ra ndaahvi tsa jativí tsi nyivi. <sup>2</sup> Vaha taxin ca na cunuhñi iin yuu jucun ra, tan jacuhun nyivi tsi ra nu ndutya ñuhu. Coto jativí ca ra tsi nyivi ndi nasama cuhva iyó.

<sup>3</sup> Jāha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javahā ra. Tun nasama ra cuhva iyó ra, jāha ndo tucahnu iñi tsi ra. <sup>4</sup> Tan ndi maa javaha ra tsa ña vaha tsihin ndo utsa tsaha tsa iin quivi, tatun tandihñi tsa utsa tsaha tan catyí ra tsihin ndo tyin ndu uvi iñi ra tsa javahā ra; tandihñi tsa utsa taahan tsaha can, jāha ndo tucahnu iñi tsi ra.

**Nu jacuahá ra Jesús tsi yo tyin tatun tsinú iñi yo tsi ra, cuví javaha yo cuaha tsa vaha**

<sup>5</sup> Tacan tan catyí ra tavā tyiñu ra Jesús tsihin ra: —Cuhva tsa tsinu ca iñi ndi tsi un —catyí ra naha.

<sup>6</sup> Tan catyí ra Jesús tsihin ra naha: —Tatun tsinú iñi ndo tsi yu vasu tumaa cuhva iin tsiti mostaza tsa luhlu cuii ñi tsi, cua cahan ndo tsihin yu-tun cahnu tsa nañi sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaā yahvi tun tsa cua cahan ndo —catyí ra Jesús.

**Nacaa taahán tsi tyaā yahvi yo tsi Nyoo**

<sup>7</sup> Tan catyí ra Jesús:

—Tatun iin nyooho tan iyó iin musu ndo, tan tsaā ra tsa tsahān ra tsicuhu tsijahā tyiñu ra, a tsijahā cuenda ra quiti jana ndo, ¿a catyí ndo tsihin ra: “Cūnyaa tan catsi un”? Ña tuhvá ndo cahan tacan tsihin ra. <sup>8</sup> Maa tyin tyehen tuhvá ndo caahán tsihin ra: “Jāvaha tsa cuxiñi yu. Tan tyiñi un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra. <sup>9</sup> Ndi ña tuhvá ndo nacuhvá tyahvi nyoo tsi ra tyin javahā ra náa tyiñu tavā ndo tsi ra. <sup>10</sup> Tacan tucu maa ndo tsihin Nyoo. Quivi ndihñi javaha ndo tandihñi tsa cahan ra tsihin ndo, taahán tsi catyí ndo tsihin ra: “Nyuhu nduve náa ca tyiñu cuaha xaan javahā ndi. Tyiñu tsa tavā ñi un tsi ndi, yacan ñi javahā ndi. Tan ña yaha ca javahā ndi.”

**Nu janduvahā ra Jesús tsi utsi taahan ra ndohó cuehe tyaahyú**

<sup>11</sup> Cuahán ra Jesús ityi ñuu Jerusalén tan yahā ra nu cuví xahñu Samaria tsihin Galilea. <sup>12</sup> Tan nu tsaā ra iin ñuu, quita utsi taahan ra cuuhví tsihin cuehe tyaahyú. Tan tsicuiñi ra naha ndasava. <sup>13</sup> Tan canā tsaā ra naha tan catyí ra naha:

—Yooho, Maestro Jesús, cūndaahvi iñi tsi ndi —catyí ra naha.

<sup>14</sup> Tan tsa nyehē ra Jesús tsi ra naha tan catyí ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahā ndo.

Tacan tan cuahán ra naha. Tan ityi cuahán ra naha tan nduvahā ra naha. <sup>15</sup> Tacan tan tsa nyehē iin ra ican tyin tsa nduvahā ra, vatsí tsihin tsata nyico ra nu nyii ra Jesús. Tan quitsahā caná tsaā ra, jacahnú ra tsi Nyoo. <sup>16</sup> Tan tsa tsaā ra nu nyii ra Jesús, tsicuiñi tsiti ra, tan nacañi nuu ra jiñi ra nda nu ñuhu nuu ra Jesús. Tan nacuhvá ra tyahvi nyoo tsi ra. Ra tsa nduvahā ihya, ra Samaria cuví ra.

<sup>17</sup> Tacan tan catyí ra Jesús:

—¿A ñavin utsi taahan ndo nduvahā? ¿Náa inga iin taahan ca ra naha? <sup>18</sup> ¿A intuhun ñi maa ra inga ñuu ihya vatsí, vatsí jacahnú tsi Nyoo? —catyí ra Jesús.

<sup>19</sup> Tacan tan catyí ra tsihin ra tsa nduvahā ican:

—Nduvita, cuaahan. Nduvahā un tyin tsinú iñi un tsi Nyoo —catyí ra Jesús tsihin ra.

**Cuhva cua quitsi Nyoo cua cundaca ñaha ra nu iyó yo ihya**

(Mt. 24.23-28, 36-41)

<sup>20</sup> Tsicā tuhun ra fariseo naha ra tsi ra Jesús, tan catyí ra naha:

—¿Ama cua quitsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuví tsa ndacá ñaha Nyoo ihya nu ñuhu ñayivi. <sup>21</sup> Ña cua cuvi catyi nyivi: “Juvín ra nyii ihya, juvín ra nyii ityi ican.” Tyin Nyoo tsa tsaā ra

mahñu ndo, tan ndacá ñaha ra tsi nyivi yihí cuenda ra —catyí ra tsihin ra naha.

<sup>22</sup> Yahá yacan tan catyí ra tsihin ra tsicá tsihin ra:

—Cua tsa quivi tsa cua cuñi ndo nyehe ndo tsi yuhu Rayii quee nda gloria. Maa tyin ña cua nyehe ndo tsi yu. <sup>23</sup> Yihí ñi cua catyí ñi tsihin ndo: “Ihya nyí ra.” Inga ñi cua catyí ñi: “Ndacan nyí ra.” Maa tyin coto cuhun ndo cunyehe ndo. Tan ña cunyicun ndo tsi ra can tyin ñavin yu cuvi can. <sup>24</sup> Tyin tandihí nyivi cua nyehe tsi yuhu, Rayii tsa quee nda gloria, quivi cua quitsi nyico yu inga tsaha. Tumaa tsa nyehé tandihí nyivi nu cañi tatsa savi tan quituvi ñuhu tatsa can ñi canduvi andivi, tacan cua cuvi quivi cua quitsi yu inga tsaha. <sup>25</sup> Maa tyin cua nyehe jihna yu tundoho cahnu xaan. Tyin nyivi tsa iyó vityin, ndasi cua cuñi ñi nyehe ñi tsi yu. <sup>26</sup> Tumaa quivi tsa tsicoo ra Noé, tacan cua cuvi quivi cua quitsi nyico yuhu Rayii quee nda gloria.

<sup>27</sup> Quivi tsicoo ra Noé, tsatsí nyivi. Tsihi ñi. Tindahá ñi. Tan tsahá ñi sehe sihi ñi tindaha, nda cuanda quivi quihvi ra Noé tsitsi yutun ndoo tan cuun savi xaan. Tan tandihí ñi can tsihi ñi jahá ndutyá. <sup>28</sup> Tacan tucu cuvi quivi tsicoo ra Lot. Tsatsí ñi. Tsihi ñi. Jatá ñi. Xicó ñi. Tati ñi itu. Tan javahá ñi vehe ñi. <sup>29</sup> Tan quivi tsa quitá ra Lot ñuu Sodoma ican, cuun ñuhu tsihin azufre tsa quee nda andivi. Tan tsahá ñi ñuhu can tandihí nyivi Sodoma. <sup>30</sup> Tacan cua cuvi quivi quitsi nyico yu tsa cuvi yu Rayii quee nda gloria.

<sup>31</sup> Tatun nycú ndo nuquehe quivi quitsi yu, ña quihvi ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuha ca ndo yu-vehe ndo. <sup>32</sup> Ndūcuhun iñi ndo tsa tahañ ñasihi ra Lot. <sup>33</sup> Tandihí nyooho tsa cuñi tsa iyó nu ñuhu ñayivi ihya, cua cunaa ndo. Tan tandihí nyooho tsa ña tyaá yahvi tsa iyó nu ñuhu ñayivi ihya, cua cacu ndo.

<sup>34</sup> Tan catyí yu tsihin ndo tyin tsacuaa can, uvi taahan nyivi cua cava iin nu tsito. Iin ñi cua naquihin yu. Tan inga ñi cua ndoo ñi. <sup>35</sup> Tan uvi taahan ñiñaha, iin caa ñi cua nyico ñi quivi can. Intuhun ña cua naquihin yu. Tan inga ña cua ndoo ña. <sup>36</sup> Tan catyí yu tsihin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyí ra Jesús.

<sup>37</sup> Tsa tsiñi ra naha tsa cahān ra Jesús tacan, tsica tuhun ra naha tsi ra:

—¿Numaa tahan cua cuvi yacan, Jutu Mañi yu?  
—catyí ra naha.

Tacan tan nacahān ra Jesús, tan catyí ra:

—Nu canyí ndiyi, ican cua nataca nditsii.

**Nu jacuahā ra Jesús tyin tumaa tsa cahān yuhu iin ñaha tsihi yii tsihin juez, tacan taahān tsi ndacan yo tsi Nyoo**

**18** Tshá cuenda ra Jesús iin cuhva ihya. Tyin iin nyita ñi cuñi tsi tsa ndacan tahvi ra naha tan ña cundihí iñi ra naha. <sup>2</sup> Tan catyí ra:

—Iyó iin ñuu tsa nyaá iin ra cuví juez. Tan juez ican ña tyaá yahvi maa ra tsi Nyoo. Tan ndi nyivi tan ña tyaá yahvi ra. <sup>3</sup> Tan juvin ñuu ican iyó iin ñaha ndaahvi tsa tsihi yii. Tan tsaahān ña tsicahān ña tsihin ra can, tyin

tsicān ña cuatyí tsaha iin nu xaan iñi tsi ña. <sup>4</sup> Tan juez ican ña tyaá yahvi nu tsa caahān ña. Ña jandaā maa nu tyiñu tsicān ña. Tan tsanaha xaan tsicān ña. Tacan tan quitsahā tsicá iñi nu juez can: “Vasu ndi maa ña tsinú iñi yu tsi Nyoo, tan nduve náa cuenda yu tsi nyivi, <sup>5</sup> maa tyin ñaha ihya tsahá xaan ña tsihi tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsihi tsi yu”, cuñi ra tsicá iñi ra.

<sup>6</sup> Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatyinyee ra tsi ñaha ndaahvi ican. <sup>7</sup> Tan vihi ca cuví Nyoo tsihin yo, ¿a ña cua jatyinyee ra tsi nyivi tsa nacatsi ra tsa tsicān ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi? <sup>8</sup> Catyí yu tsihin ndo, tyin numi ca cua jatyinyee ra tsi ñi. Maa tyin quivi tsa cua quitsi nyico yu tsa cuví yu Rayii tsa quee nda gloria, tsitó Nyoo tun nañihi ca yu tsi nyivi tsa tsinú tsa cuii iñi tsi yu —catyí ra Jesús.

**Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra**

<sup>9</sup> Tacan tan tsahā cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñi ra naha nyehé ra tsi inga nyivi. Tan catyí ra:

<sup>10</sup> —Iyó uvi taahan ra cuahān vehe ñuhu cua ndacan tahvi ra naha tsi Nyoo. Iin ra ican ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra. <sup>11</sup> Tan ra fariseo ican nduvitā nyityi ra, tan quitsahā caahān ra tsihin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu ñavin tumaa inga nyivi cuví yu. Tyin iyó ñi suhú ñi. Quiñi icá ñi. Tan yihí ra naha iyó ñasihi ra tan iyó inga ñaha ra naha. Tan ña cuví yu tumaa ra tavá xuhun ihya. <sup>12</sup> Tyin yuhu uvi tsaha tsicoó nyitya yu tsa iin vitya. Tan tsahá yu utsi taahan xuhun tsa iin iin cientu tsa jahá canaa yu tsi un”, catyí ra can. <sup>13</sup> Tan ra tsa tavá xuhun can tsa cañi luxu nyaá ra. Tan ña canā iñi ra nanyehe ndaa ra. Tan cañi ndaha ra yiqui nyica ra tyin ndu uvi iñi ra cuatyí ra. Tan catyí ra: “Jutu Mañi yu, cūndaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

<sup>14</sup> Tan catyí nyico ra Jesús tyehen:

—Catyí yu tsihin ndo tyin Nyoo jahā ra tucahnu iñi tsi ra tavá xuhun ican. Janaā Nyoo cuatyí ra tan cuanuhu ra nda yuvehe ra. Maa tyin ra fariseo ican, nduve tucahnu iñi tsicoo tsi ra, tyin nyivi tsa cahnu xaan jahá ñi tsi ñi, ña cahnu cuví ñi jahá Nyoo, tan nyivi tsa ndaahvi jahá tsi, cua jacahnu Nyoo tsi ñi —catyí ra Jesús.

**Nu nasocó ra Jesús tsi tsa nyihi**

(Mt. 19.13-15; Mr. 10.13-16)

<sup>15</sup> Tacan tan quitsi ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehe ra tsicá tsihin ra tyin cuaha tsa nyihi tsaá nu nyaá ra, cuxaan ra naha tan ña tsahā ra naha cuhun tsa nyihi can. <sup>16</sup> Tacan tan canā ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya. <sup>17</sup> Tan catyí yu tsihin ndo tyin tatun ña nyitá iñi ndo tsi Nyoo, tumaa nyitá iñi iin tsa luhlu ihya tsi jutu tsi, ña cua cuví quihvi ndo nu ndacá ñaha Nyoo.

### Nu tsahá ra Jesús cuhva tyin yíi xaan nacuhva cuenda iin ra cuca tsi ra tsi Nyoo

(Mt. 19.16-30; Mr. 10.17-31)

<sup>18</sup> Tacan tan iin ra tsa cuví ityi nuu cuenda vehe ñuhu tsicá tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

<sup>19</sup> Tacan tan catyí ra Jesús tsihin ra:

—¿Nacuenda catyí un tyin ra vaha cuví yu? Tan in-tuhun ñi maa Nyoo cuví ra vaha. <sup>20</sup> Yooho tsitó un tandihi tuhun tsa tsahá Nyoo tyin javaha yo: “Tsa ña coo inga ñaha tsi un. Ña cahñi un nyivi. Ña suhu un. Ña cahan un cuendu siqui nyivi. Tan tyaa yahvi un tsi jutu un tan sihi un” —catyí ra Jesús.

<sup>21</sup> Tacan tan ra ican catyí ra:

—Tandihí maa yacan tan tyaa yahvi yu nda tahān luhlu yu tan nda cuanda vityin —catyí ra.

<sup>22</sup> Tsa tsiñi ra Jesús tsa cahan ra can, tacan tan catyí ra tsihin ra:

—Maa tyin cumañi javaha un inga tsa taahán tsi javaha yo. Xico tandihí tsa iyó tsi un. Tan cuhva un xuhun can tsi nyivi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

<sup>23</sup> Maa tyin tsa tsiñi ra tsa cahan ra Jesús, nducuihya xaan cuñi ra, tyin cuca xaan ra. <sup>24</sup> Tan tsa nyehē ra Jesús tyin nducuihya cuñi ra, tan catyí ra:

—Yíi xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi. <sup>25</sup> Yatyí xaan ca cuví yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

<sup>26</sup> Tan nyivi tsa tsiñi tsa cahan ra catyí ñi:

—Tatun tacan, ¿yóo cua cuví cacu? —catyí ñi.

<sup>27</sup> Tacan tan ra Jesús catyí ra:

—Tandihí tsa ña cuví javahá nyivi, Nyoo cuví javahá ra tandihí —catyí ra.

<sup>28</sup> Tacan tan ra Pedro catyí ra:

—Jutu Mañi yu, nyuhu tandihí maa tsa iyó tsi ndi nacoq ndi, tan nyicún ndi tsi un —catyí ra.

<sup>29</sup> Tacan tan catyí ra Jesús tsihin ra:

—Tsa nditsa catyí yu tsihin ndo, tyin tandihí nyoocho tsa nacoq vehe, a ñasihi ndo, a yañi ndo, a jutu ndo, a sehe ndo tsacatyí tsa tsahá ndo tsa cundaca ñaha Nyoo tsi ndo, <sup>30</sup> cuaha xaan tsa vaha cua ñihi ndo ñuu ñayivi ihya tan inga ñayivi tsa cua coo, cua ñihi ndo ñayivi tsa ña cua naa maa —catyí ra Jesús.

### Inga tsaha jacoto ra Jesús cuhva cua cahñi nyivi tsi ra

(Mt. 20.17-19; Mr. 10.32-34)

<sup>31</sup> Tan canā siin ra Jesús tsi tsa utsi uvi taahan ra tsicá tsihin ra, tan catyí ra tsihin ra naha:

—Vityin cuhun yo nda ñuu Jerusalén. Tyin ndacan cua cundaa tyiñu Rayii tsa quee nda gloria: tandihí tyiñu tsa tyaa ra cuví ndusu yuhu Nyoo tahān tsanaha.

<sup>32</sup> Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuví. Tan cua vacu nducu ra naha tsi yu. Tan cua cahan nyaa ra naha tsi yu. Tan cua tiví siñi ra naha nuu yu.

<sup>33</sup> Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quivi tan cua nandoto yu inga tsaha —catyí ra Jesús.

<sup>34</sup> Maa tyin ña cutuñi iñi ra tsicá tsihin ra tsa cahan ra, tan ndi ña tsitó ra naha náa tuhun cahan ra tsihin ra naha. Tyin ña cuví cutuñi iñi ra naha.

### Nu janduvahá ra Jesús iin ra cuaa ñuu Jericó

(Mt. 20.29-34; Mr. 10.46-52)

<sup>35</sup> Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra. <sup>36</sup> Tacan tan tsiñi ra cuvaa tsa yahá cuaha nyivi. Tan tsicá tuhun ra náa cuenda ñihi xaan cuvaa. <sup>37</sup> Tan catyí tuhun nyivi tsihin ra tyin ra Jesús, ra ñuu Nazaret, vatsí. <sup>38</sup> Tacan tan quitsahá canā tsaa ra tan catyí ra:

—¡Yooho Jesús, tata ra rey David! ¡Cundaahvi iñi tsi yu! —catyí ra.

<sup>39</sup> Tan ra tsa cuahán ityi nuu ican naha ra, catyí ra naha tsihin ra, nacasi ra yuhu ra. Maa tyin tsaa ca canā tsaa ra, tan catyí ra:

—¡Yooho, tata ra rey David! ¡Cundaahvi iñi tsi yu! —catyí ra.

<sup>40</sup> Tacan tan tsicuiñi ra Jesús. Tan tavā tyiñu ra na cuhun ra naha cuquihin ra naha tsi ra. Tan cuhva tsa tsaa ra nu nyaá ra Jesús, tan nducú tuhun ra Jesús tsi ra:

<sup>41</sup> —¿Náa cuñi un javaha yu tsihin un?

Tacan tan ra cuaa ican nacahan ra, tan catyí ra:

—Jutu Mañi yu, cuñi yu nanyehe yu —catyí ra.

<sup>42</sup> Tacan tan catyí ra Jesús tsihin ra:

—Nanyehe. Tsa nduvahá tinuu un tyin tsinú iñi un tsi yu —catyí ra.

<sup>43</sup> Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jacahnú ra tsi Nyoo. Tan tandihí nyivi tsa nyehē tsa cuví can, jacahnú ndihí tucu maa ñi tsi Nyoo.

### Nu cuahán ra Jesús vehe ra Zaqueo

**19** Tacan tan quihvi ra Jesús ñuu Jericó. Tan cua yaha ra tsitsi ñuu. <sup>2</sup> Tan ñuu can iyó iin ra cuca xaan, nañi ra Zaqueo. Tan cuví ra ityi nuu tsihin ra tavá xuhun cuenda ra ndacá ñaha nda ñuu Roma. <sup>3</sup> Ra ihya cuñi xaan ra nacoto ra tsi ra Jesús. Tan ña cuví nyehē ra tsi ra tyin cuaha xaan nyivi cuahan tsihin ra. Tan maa ra ndiqui xaan ra. <sup>4</sup> Tacan tan tsinú xaan ra cuahán ra ityi nuu, tan ndaā ra iin nu yutun cahnu tsa nañi sicómoro tsa nyaá yuhu ityi nu cua yaha ra Jesús, tan cuví nyehē ra tsi ra Jesús. <sup>5</sup> Tan cuhva tsa quitā ra Jesús nu nyaá yutun can, nanyehe ndaa ra ityi siqui tan nyehē ra tsi ra Zaqueo. Tan catyí ra tsihin ra:



—Zaqueo, jañumi n̄u un nu yutun juvin. Tyin vityin cuñí tsi tsa cuhun yu yuvehe un —catyí ra tsihin ra.

<sup>6</sup> Tacan tan numi xaan nūy ra Zaqueo. Tan sī xaan cuñí ra. Tan quih̄in ra tsi ra Jesús cuahán tsihin ra yuvehe ra. <sup>7</sup> Tan tsa nyeh̄e nyivi tsa tacan cuv̄i, tandih̄i ñi quitsah̄a caahán nyaa ñi tsi ra Jesús. Tan catyí ñi tyin ndoó ra vehe iin ra iyó cuatyí. <sup>8</sup> Tan nu nyecú ra naha tsitsi vehe, ra Zaqueo tsinyāa nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandav̄i ñaha yu tsi nyivi tan suh̄y yu tsa tsii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

<sup>9</sup> Tacan tan catyí ra Jesús:

—Vityin cac̄u un, tan nyivi ra Abraham cuv̄i tsi un. [Tyin nacuhv̄a cuenda un tsi un tsi Nyoo tumaa nacuhv̄a cuenda ra Abraham tsi ra tsi Nyoo.] <sup>10</sup> Tyin yuhu, Rayī tsa queē nda gloria, vatsí yu vatsí nanducu yu tan vatsí jacacu yu tsi nyivi tsa cuanāa maa —catyí ra Jesús.

### Nu jacuah̄a ra Jesús tsi yo na jaha tyiñu yo tsihin tsa tsah̄a Nyoo tsi yo (Mt. 25.14-30)

<sup>11</sup> Tan tsitsi tsa tsiñí nyivi tsa caahán ra Jesús, tan quitsah̄a tsahá cuenda ra inga cuhva ihya tsi ñi. Tyin tsa cuñí tsa ra ñuu Jerusalén. Tan nyivi cuñí maa ñi tyin tsa cua quitsaha cundaca ñaha ra ndacan. <sup>12</sup> Tacan tan catyí ra:

—Tsicōo iin ra cuca tan tsa cuñí cuhun ra iin ñuu cañi. Tyin ndacan cua quihin cuenda ra tyiñu tsa cuv̄i ra rey, tyin tacan tan cua quitsi nuhu nyico ra ñuu ra. <sup>13</sup> Tsa ndi cumañi ca cuhun ra, can̄a ra utsi taahan musu ra. Tan tsah̄a cuenda ra iin xuhun tsi iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuanda quitsi nyico yu”, catyí ra.

<sup>14</sup> Maa tyin nyivi ñuu ra, ndasi cuñí ñi nyeh̄e ñi tsi ra tan ña cuñí ñi tsa cundaca ñaha ra tsi ñi. Tan jacuhun ñi tsi ra cuhun cunycun tsi ra, tyin cahan ra naha tyin ña cuñí ñi tsa cundaca ñaha ra tsi ñi. <sup>15</sup> Maa tyin ra ican cuv̄i maa ra rey. Tacan tan tsāa nyico ra nda ñuu ra. Tan quivi tsa tsāa ra, can̄a ra tsi musu ra, ra tsa nacōo ra xuhun tsihin. Tyin cuñí ra coto ra nácaa xuhun jah̄a canaa xuhun ra tsa nacōo ra. <sup>16</sup> Tan tsāa iin ra ican. Tan catyí ra: “Yooho taa, jah̄a canaa yu utsi taahan ca siqui xuhun tsa nacōo un tsi yu”, catyí ra. <sup>17</sup> Tacan tan catyí ra rey can tsihin ra: “Vaha xaan. Yooho cuv̄i musu vaha. Tyin javah̄a un ndih̄i tyiñu tsa tavā yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra. <sup>18</sup> Tacan tan tsāa tucu inga ra tsa tsah̄a ra xuhun. Tan catyí ra: “Juhun xuhun ihya. Jah̄a canaa yu uhun taahan ca siqui xuhun tsa nacōo un tsi yu”, catyí ra. <sup>19</sup> Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra. <sup>20</sup> Tacan tan tsāa tucu inga ra can. Tan catyí ra: “Juhun xuhun tsa tsah̄a un tsi yu. Yuhu naquihin vaha yu itsi tsitsi pañi-tu. <sup>21</sup> Tyin yuuhv̄i xaan yu tsi un, tyin yooho xaan xaan un. Tyin tuhv̄a un naquihin tsa ñavin tsa tatsi un. Tan

naquih̄in un ndaha tyiñu quit̄a nu jah̄a tyiñu inga nyivi”, catyí ra can. <sup>22</sup> Tacan tan ra rey ican catyí ra tsihin ra: “Yooho musu ña vaha cuv̄i un. Vityin juvin ñi tsihin tsa cah̄an un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquih̄in yu tsa ña tatsi yu, tan naquih̄in yu ndaha tyiñu inga nyivi, <sup>23</sup> ¿nacuvi tyin ña tsityih̄i un xuhun yu banco tyin tsa yu maa tyin tsa nandaa xuhun yu?” catyí ra rey can.

<sup>24</sup> Tan catyí ra tsihin ra nyecú ican: “Quinyaa ndo xuhun tsa tsah̄a yu tsi ra ihya, tan cuhva ndo tsi ra tsa jah̄a canaa utsi taahan ca siqui tsa tsah̄a yu tsi ra”, catyí ra.

<sup>25</sup> Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha. <sup>26</sup> Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jah̄a tyiñu tsihin tsa tsah̄a yu tsi ra, cuaha ca cua cuhva yu tsi ra. Tan ra tsa tsah̄a yu luxu ñi, tan ña cuñí ra jah̄a tyiñu ra tsihin tsi, cua quinyaa yu tandih̄i can tsi ra. <sup>27</sup> Tan tandih̄i nyivi xaan iñi tsi yu, ñi tsa ña cuñí tsa cundaca ñaha yu tsi ñi, ndaca ndo tsi ñi nyeh̄e, tan cah̄i ndo tsi ñi nuu yu ihya”, catyí ra rey can —catyí ra Jesús.

### Nu tsāa ra Jesús ñuu Jerusalén (Mt. 21.1-11; Mr. 11.1-11; Jn. 12.12-19)

<sup>28</sup> Tsa yah̄a cah̄an ra Jesús yacan, tan jañih̄i ra cuahán ra ñuu Jerusalén. <sup>29</sup> Tacan tan tsa cuñí tsa ra ñuu Betfaḡe tsihin ñuu Betania, yatyin ñi iin yucu tsa nañí Olivo, [tyin maa ñi maa yutun olivo iyó ican]. Tavā tyiñu ra tsi uvi taahan ra tsicá tsihin ra. <sup>30</sup> Tan catyí ra tsihin ra naha:

—Cyaahan ndo ñuu tsa canyí yatyin ñi ihya. Ican cua nañihi ndo iin burru luhlu, quit̄i tsa ñaha ca quih̄i tyayu. Nuuhñī ti. Ndatsi ndo tsi ti. Tan quitsi ndaca ndo tsi ti tsi yu. <sup>31</sup> Tatun yóo tsicá tuhun tsi ndo: “¿Nacuenta ndatsi ndo tsi ti?” catyí ndo tsihin ñi: “Ndatsi ndi tsi ti tyin tsiñí ñuhu ti tsi ra ndacá ñaha.”

<sup>32</sup> Tacan tan ra tsicá tsihin ra, cuahán ra naha. Tan nañih̄i ra naha tsi ti tumaa tsa cah̄an maa ra tsihin ra naha. <sup>33</sup> Tan cuhva tsa ndatsi ra naha tsi ti, tsāa tsitoho ti. Tan nduc̄y tuhun ra can naha ra tsi ra naha tan catyí ra:

—¿Nacuenta ndatsi ndo burru ihya? —catyí ra naha.

<sup>34</sup> Tacan tan nacah̄an ra can naha ra:

—Ndatsi ndi tsi ti tyin tsiñí ñuhu ti tsi ra ndacá ñaha —catyí ra naha.

<sup>35</sup> Tacan tan quih̄in ra naha tsi ti. Tan tsindac̄a ra naha tsi ti nu nyií ra Jesús. Tan tyisō ra naha jahma ra naha tsata ti. Tacan tan jandāa ra naha tsi ra Jesús tsata ti. <sup>36</sup> Tacan tan cuahán ra Jesús. Tan cuaha xaan nyivi cuahán tsihin ra tsaquin̄ ñi jahma ñi nu ñuhu ityi nu cua yaha ra, yosó ra burru ican. <sup>37</sup> Tsa tsa cua cuyatyin tandih̄i nyivi tan ra Jesús nu iñi nuu yucu Olivo, quitsah̄a caná tsa tandih̄i ñi tsinú iñi tsi ra tsihin tsa sī cuñí ñi. Tan jacahnú ñi tsi Nyoo tyin cuaha xaan tsa iyo javah̄a ra nyeh̄e ñi. <sup>38</sup> Tan catyí ñi:

—¡Na jacahnu yo tsi ra Rey ihya tyin vatsí ra tsihin sivi Nyoo Jutu yo! ¡Tan na coo tsa taxin andiv̄i! ¡Tan na jacahnu yo tsi Nyoo! —catyí ñi.

<sup>39</sup> Tacan tan juhva ra fariseo tsa cuahán tsihin ñi, catyí ra naha:

—Maestro, jacutaxin tsi nyivi ihya —catyí ra naha.

<sup>40</sup> Tan nacahān ra Jesús tan catyí ra:

—Tatun nyivi ihya tan cutaxin ñi, yuu cua cana tsa, tan cua jacahnu tsi tsi yu —catyí ra Jesús.

<sup>41</sup> Tacan tan tsa tsaā ra Jesús yatyin ñi yuhu ñuu Jerusalén, nanyehē ra ñuu can tan quitsahā tsacú ra tsa cuihiya cuñí ra. <sup>42</sup> Tan catyí ra:

—Vaha xaan tun tsatyin cuvi coto ndo tan cutuñí iñi ndo nácaa ñihi ndo tsa taxin coo añima ndo vityin ihya. Maa tyin xeehe xaan yihí tsa vaha can, tan ña cuví nañihi ndo can. <sup>43</sup> Coó quivi cua nyehe ndo tundoho jaha nu xaan iñi tsi ndo cua tyihi cutu nahnu tsi ndo. Tandihí ityi cua quitsi nahnu. Tan cañi tahan nahnu tsihin ndo. <sup>44</sup> Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi intuhun ca yuu tsa yosó toto tan ña cua nacoo ca nahnu. Tacan cua cuvi tyin maa ndo ña cuñí ndo nacoto ndo tyin tsa vatsí Nyoo, vatsí jacacu ra tsi ndo.

#### Nu tavā ra Jesús tsi nu xicó tsitsi vehe ñuhu cahnu nahnu

(Mt. 21.12-17; Mr. 11.15-19; Jn. 2.13-22)

<sup>45</sup> Tacan tan quihví ra Jesús tsitsi cora vehe ñuhu cahnu. Tan quitsahā tavā ra tandihí nyivi xicó tan nyivi jatá tsa yucú nu quehe. <sup>46</sup> Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi. Tan nyoocho jananduví ndo itsi vehe ñasuhu —catyí ra Jesús.

<sup>47</sup> Tan tandihí quivi tsaahán ra Jesús tsijacuahā ra tsi nyivi tsitsi vehe ñuhu cahnu can. Maa tyin ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra cuví mandoñi ñuu Jerusalén can, nducú ra naha cuhva cahñi ra naha tsi ra. <sup>48</sup> Maa tyin ña ñihí maa ra naha nácaa javaha ra naha tyin tandihí nyivi tan vaha tyaá soho ñi tsa caahán ra Jesús.

#### Nu tsicā tuhun ra cumi tyiñu vehe ñuhu naha ra tsi ra Jesús yóo tavā tyiñu tsi ra tsa cahan ra tsihin nyivi

(Mt. 21.23-27; Mr. 11.27-33)

**20** Iin quivi jacuahá ra Jesús tsi nyivi tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaā ra jutu tsa cuví ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuví mandoñi naha ra. <sup>2</sup> Tan catyí ra naha tsihin ra Jesús:

—Catyí tuhun tsihin ndi ¿yóo tavā tyiñu tsi un javaha un tyiñu ihya? —catyí ra naha.

<sup>3</sup> Tacan tan ra Jesús catyí ra tsihin ra naha:

—Yuhu cuñí tucu yu nducu tuhun yu tsi ndo. <sup>4</sup> ¿Yóo jaquitsí tsi ra Juan tyin jacoonduya ra tsi nyivi? ¿A Nyoo jaquitsí tsi ra, a nyivi?

<sup>5</sup> Tacan tan ra ican naha ra quitsahā caahán yuhu tahan ra naha tan catyí ra naha:

—Tun catyí yo tyin Nyoo jaquitsí tsi ra Juan, cua catyí ra tsihin yo nacuenta ña tsinu iñi yo tsa cahan ra Juan.

<sup>6</sup> Tun catyí tucu yo tyin nyivi jaquitsí tsi ra, tandihí nyivi

cua cahñi ñi tsi yo tsihin yuu. Tyin tandihí ñi, tan cuñí ñi tyin ndusu yuhu Nyoo cuví ra Juan —catyí ra naha.

<sup>7</sup> Tacan tan nacahān ra naha tsihin ra Jesús tyin ña tsitó ra naha yóo tavā tyiñu tsi ra Juan jacoonduya ra tsi nyivi. <sup>8</sup> Tacan tan ra Jesús catyí ra tsihin ra naha:

—Ndi yuhu, tan ña cua catyí tuhun yu tsihin ndo yóo tavā tyiñu tsi yu tsa javaha yu tyiñu ihya.

#### Nu jacuahā ra Jesús tyin tumaa cuví juhva ra caquiñi naha ra, tacan cuví ra tsa cua cahñi tsi ra

(Mt. 21.33-44; Mr. 12.1-11)

<sup>9</sup> Tacan tan tsahā cuenda ra Jesús iin cuhva ihya tsi nyivi:

—Iin ra, tatsí cuaha ra nu ñuhu ra yoho tsiti yucu tsa cua cuvi vinu. Yahā can tan tsahā nuu ra ñuhu can tsi juhva ra jahá tyiñu. Tacan tan naha cuahán ra inga ñuu. <sup>10</sup> Tan quivi tsa iñi tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundí ra jacunuhū ra naha tsi ra. <sup>11</sup> Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahan nyaa ra naha tsi ra. Tan jacunuhū ra naha tsi ra. Tan juvín ñi nduve tsa tsahā ra naha cuiso ra cunuhu ra. <sup>12</sup> Tacan tan ra cuví tsitoho yoho can jacuhun nyico ra inga ra. Maa tyin juvín ñi tacan javahā nyico ra naha tsihin ra can. Tan jañicuehē ra naha tsi ra. Tan tavā ra naha tsi ra.

<sup>13</sup> Yahā can tan catyí tsitoho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñí xaan yu. Vasiquí cua tyaa yahvi ra naha tsi ra, tyin sehe yu cuví tsi ra”, catyí ra. <sup>14</sup> Maa tyin tsa nyehe ra jahá tyiñu can naha ra tsi ra sehe ra, natuhún tahan ra naha: “Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyí ra naha. <sup>15</sup> Tacan tan tavā ra naha tsi sehe tsitoho ñuhu ican ityi tsata cora, tan tsahñi ra naha tsi ra —catyí ra Jesús.

Tacan tan catyí ra Jesús tsihin nyivi nyecú ican:

—¿Náa cua javaha tsitoho ñuhu ican tsihin ra can naha ra tyin tsahñi ra naha sehe ra? <sup>16</sup> Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyivi tsa caahán ra, nayuhví xaan ñi cuví. Tan catyí ñi:

—¿Ña cuñi Nyoo tahan yo tacan! —catyí ñi.

<sup>17</sup> Maa tyin ra Jesús nanyehē ra nuu ñi tan catyí ra:

—Tun tacan tsicá iñi ndo ¿náa cuñí tsi catyí tsa nyaá nu tutu Nyoo? Tyin catyí tsi tyehen:

Yuu tsa ña cuñí ra javahā vehe cuatyíñu ra, yacan cuví yuu tsa tsiñi ñuhu ca.

<sup>18</sup> Yóo nyivi cua canacava tsata yuu can, cua tahnu cuatyí ñi. Tan tatun maa yuu can canacava tsata ñi cua taxin nyihi ñi —catyí ra Jesús.

<sup>19</sup> Tan ra jutu tsa cuví ityi nuu naha ra tan ra maestro cuenda ley vehe ñuhu naha ra, tuví iñi ra naha tyin tsa cahan ra Jesús tacan, tsi maa ra naha nañi can. Tan

cuñí ra naha tiin ra naha tsi ra tyin cahñi ra naha tsi ra. Maa tyin ña tsitó maa ra naha nácaa javaha ra naha, tyin nayuhvi ra naha tsi nyivi.

**Nu jacuahā ra Jesús tsa cuenda tsa tyahvi nyivi xuhun tsi ra ndacá ñaha ñuu Roma**

(Mt. 22.15-22; Mr. 12.13-17)

<sup>20</sup> Tacan tan jacuhun ra naha tsi juhva ra nducu cuhva tsi ra Jesús. Tan jahā ra naha tyin ra vaha cuví ra naha. Tyin tacan tan coto ra naha náa tsa ña vaha cua cahan ra Jesús tan cuví tiin ra naha tsi ra. Tan cuhva cuenda ra naha tsi ra tsi ra ndacá ñaha. <sup>21</sup> Yacan tsicā tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahá un tsa vaha tsi nyivi. Tan ñavin cuhva iyó ñi nyehé un maa tyin nyehé un cuhva iyó añima ñi. Tan maa ñi maa tsa nditsa tyin ityi Nyoo janahá un. <sup>22</sup> Catyi tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyí ra naha.

<sup>23</sup> Tan ra Jesús tuví iñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñí ndo nducu cuhva ndo tsi yu? <sup>24</sup> Jānaha jihna ndo iin xuhun tsi yu, na nyehe yu. ¿Yóo nuu nyaá xuhun can tan yóo sivi nyaá can? —catyí ra.

Tacan tan nacahān ra naha:

—Nuu ra ndacá ñaha, ra cuví rey cahnu, nyaá can tan juvin ñi sivi ra nyaá can —catyí ra naha.

<sup>25</sup> Tacan tan catyí ra Jesús:

—Tun tacan, cuhva ndo xuhun can tsi ra ndacá ñaha tyin tsii maa ra cuví tsi. Tan cuhva ndo tsi Nyoo tsa taahán tsi tsi ra —catyí ra Jesús tsihin ra naha.

<sup>26</sup> Tan ña cuví maa jandavi ñaha ra naha tsi ra Jesús tsihin tsa caahán ra tacan tsihin nyivi. Tan iyo xaan cuñí ra naha tsa nacahān ra. Tan taxin ña cuví ra naha.

**Nu cuñí ra cuví saduceo naha ra jandavi ñaha ra naha tsi ra Jesús**

(Mt. 22.23-33; Mr. 12.18-27)

<sup>27</sup> Tsa yahā can tan tsaā juhva ra cuví saduceo nu nyíi ra Jesús. Maa ra naha cuví ra tsa catyí tyin ña nandoto nyivi tun tsa tsihi ñi.

<sup>28</sup> Tacan tan catyí ra naha tsihin ra Jesús:

—Maestro, jandoō ra Moisés tyiñu ihya tyin tatun iin ra tsihi tan nandoō ñasihi ra, tatun nduve sehe ra tsi-coō tsihin ña, taahán tsi tsa tindaha ra cuví yañi ra tsihin ña, tan coo sehe ra tsihin ña tsa cuenda ra yañi ra.

<sup>29</sup> Maa tyin cuñí ndi coto ndi nácaa, tyin tsicoō iin ra tan tsicoō utsa sehe ra. Tan ra tsa ñihi ca tsicoō ñasihi ra, maa tyin nduve sehe ñi tsicoō, tan tsihi ra. <sup>30</sup> Tacan tan naquihin ra tsa tsinu uvi tsi ña can. Tan nduve tucu sehe ñi tsicoō. Tan tsihi tucu ra can. <sup>31</sup> Tan juvin ñi tacan javahā ra tsinu uñi. Tandihí tsa utsa ra naha javahā tacan. Ndi intuhun ra tan ña tsicoō sehe ra tsihin ña. <sup>32</sup> Tan nu ndihí tuhun tsihi ndihí maa ña. <sup>33</sup> Tan cuñí ndi coto ndi yóo ra cua cuvi yñi ña tsitsi tsa tandihí tsa utsa taahan ra naha quivi cua nandoto nyivi —catyí ra saduceo naha ra.

<sup>34</sup> Tacan tan nacahān ra Jesús, tan catyí ra:

—Ihya nu ñuhu ñayivi, rayñi tan ñaha tindahá ñi.

<sup>35</sup> Maa tyin nyivi tsa nacatsi Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha. <sup>36</sup> Tan nduve tuhun tsi-ihí iyó ndacan tyin cua cuvi ñi tumaa ángel. Tan cua cuvi ñi sehe Nyoo tyin nandoto ñi. <sup>37</sup> Tan tsa cuenda tuhun tsa nandoto ndiyi. Tsa nditsa cuví tsi tyin yacan jacoto ra Moisés nu nacatyí tuhun ra nácaa cayú taca iñu can. Tsihin can jacoto ra tsi yo tyin nyivi tsihi cua nandoto ñi. Tyin catyí ra: “Jutu yo Nyoo cuenda ra Abraham, tan cuenda ra Isaac, tan cuenda ra Jacob”, catyí ra Moisés. <sup>38</sup> Tacan catyí ra tyin Nyoo, ñavin Nyoo cuenda nyivi tsihi cuví ra. Nyoo cuenda nyivi nyito cuví ra. Tyin tsa cuenda Nyoo tandihí yo tan nyito añima yo vasu tsa tsihi cuñu ñuhu yo —catyí ra Jesús.

<sup>39</sup> Tacan tan juhva ra maestro cuenda ley vehe ñuhu naha ra catyí ra naha:

—Vaha xaan nacahān un, Maestro —catyí ra naha.

<sup>40</sup> Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

**Ra Cristo cuví ra tata ra David, tan juvin ñi cuví tucu ra Sehe Nyoo**

(Mt. 22.41-46; Mr. 12.35-37)

<sup>41</sup> Tacan tan tsicā tuhun ra Jesús tsi ra naha:

—¿Nacuenda catyí yo tyin ra Cristo tata ra David cuví tsi ra? <sup>42</sup> Tyin juvin ñi maa ra David catyí ra nu libru Salmo:

Caahán Nyoo Jutu yu tsihin Jutu Mañi yu, ra Cristo, tan catyí ra tsihin ra:

“Cunya xiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahnu”, catyí Nyoo tsa tsatyíñu ra yuhu ra David tahān tsanaha.

<sup>44</sup> ¿Nacaa tsa tata ra David cuví tucu ra Cristo, tan juvin ñi maa ra David catyí tyin Jutu Mañi ra cuví tsi ra Cristo? —catyí ra Jesús.

**Nu cahān ra Jesús tyin cuaha xaan cuatyí ra maestro cuenda ley vehe ñuhu iyó**

(Mt. 23.1-36; Mr. 12.38-40, Lc. 11.37-54)

<sup>45</sup> Tandihí nyivi tsiñi ñi tsa cahān ra Jesús tsihin ra tsicá tsihin ra nu cahān ra tyehen:

<sup>46</sup> —Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahán xaan iñi ra naha cunditsi ra naha jahma nañi. Tan cuahan ra naha nuyahvi, cuñí ra naha tsa cuhva nyivi yucú nuyahvi nacumi tsi ra naha tsihin tsa jaha ñi tsa ñayivi tsi ra naha. Tan nanducú ra naha tyayu vaha cunyecú ra naha tsitsi vehe ñuhu, tan nu cuahán ra naha vico. <sup>47</sup> Tan naha tsicán tahvi ra naha tsi Nyoo nu tuví, tsa cuñí ra naha tsa nyehe nyivi tan catyí ñi tyin vaha xaan nyivi cuví ra naha. Maa tyin juvin ñi maa ra naha cuví ra quinyaá vehe ñi ndaahvi tsa tsihi yñi tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

### Tsa jamañi iin ñaha ndaahvi tsa tsihi yñi

(Mr. 12.41-44)

**21** Tan nyehe ra Jesús tyin cuaha xaan nyivi cuca tyihí ñi xuhun tsitsi caja tsa nyíi tsitsi vehe ñuhu cahnu. <sup>2</sup>Tan nyehe tucu ra tsi iin ñaha ndaahvi tsa tsihi yñi. Tan tyihí ña uvi taahan ñi xuhun nyihi. <sup>3</sup>Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihí ñi cuca can. <sup>4</sup>Tyin tsa ndoo ña tyihí ñi. Tan ñaha ihya tyihí ña tandihí tsa iyó tsi ña —catyí ra.

### Nu cahñ ra Jesús tyin cua tani vehe ñuhu cahnu

(Mt. 24.1-2; Mr. 13.1-2)

<sup>5</sup>Tacan tan juhva nyivi natuhún ñi tuhun cuenda vehe ñuhu cahnu ican. Tan catyí ñi tyin si xaan caá yuu. Tan si xaan caá tsa jamañi nyivi. Tacan tan catyí ra Jesús:

<sup>6</sup>—Coo quivi tan cua tani tandihí tsa nyehé ndo ihya. Tan ndi intuhun ca yuu tan ña cua coso ca siqui inga tsi. Ndihi tsi cua cani nu xaan iñi tsi ndo.

### Tsa cua cuvi tsa ndi cumañi ca naa ñuhu ñayivi

(Mt. 24.3-28; Mr. 13.3-23)

<sup>7</sup>Tacan tan nducú tuhun nyivi tsi ra Jesús, tan catyí ñi:

—Maestro, ¿ama cua cuvi tandihí tsa caahán un ihya? ¿Naca tan coto ndi tatun tsa cuyatyin tsa naa ñuhu ñayivi? —catyí ñi.

<sup>8</sup>Tacan tan catyí ra Jesús:

—Jaha vaha ndo cuenda, coto jandavi ñaha nyivi tsi ndo. Tyin cuaha xaan ra cua quitsi, tan cua cuatyíñu ra naha sivi yu, tan cua catyí ra naha: “Yuhu cuví Cristo, ra tsa jaquitsi Nyoo. Tyin tsa cuñi naa ñuu ñayivi”, cua catyí ra. Maa tyin ña cunyicun ndo tsi ra naha. <sup>9</sup>Tan quivi cua ñihi tuhun ndo tyin tsa iyó cuatyí tan ñihi cañi tahan nyivi, ña nayuhvi ndo. Tyin tandihí can taahán tsi cuvi tsa jihna ñi. Maa tyin cumañi ca tsa quivi tsa cua naa ñuhu ñayivi.

<sup>10</sup>Tan catyí tucu ra:

—Nyivi iyó iin ñuu cua cañi tahan ñi tsihin nyivi inga ñuu. Tan cua coo cuatyí. <sup>11</sup>Tan ñihi xaan cua taan. Tan cua coo tama. Tan cua coo cuehe tandihí ñi ityi. Tan cua nyehe nyivi tsa yuuhví ityi andivi. Tan cuaha xaan tsa iyo nahnu tsa ña tuhva nyivi nyehe tan cua nyehe ñi. <sup>12</sup>Maa tyin tsa ndi cumañi ca cuvi yacan, cua cuxaan iñi nyivi tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihi ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí sivi yuhu. <sup>13</sup>Tacan tan cuví cahan ndo tuhun yu tsihin ñi. <sup>14</sup>Maa tyin jaha ndo cuenda tan ña cua caca iñi ndo náa tuhun cua nacahan ndo tsihin ra ndacá ñaha ican. <sup>15</sup>Tyin yuhu cua cuhva yu tuhun cua cahan ndo. Tan cua cuhva yu tsa nyityi jiñi ndo nu cua cahan ndo. Ndi intuhun nu xaan iñi tsi ndo tan ña cuvi jaha nahnu tsi ndo. <sup>16</sup>Maa tyin nyivi cua cuhva cuenda

ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuví yañi ndo, nyivi ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi tsi ndo. Tan yihí nyoocho cua cahñi nyivi tsi ndo.

<sup>17</sup>Tandihí nyivi tan ndasi cua cuñi ñi nyehe ñi tsi ndo tsacatyí yuhu. <sup>18</sup>Maa tyin ndi intuhun ixi jiñi ndo tan ña cua cunaa. <sup>19</sup>Tatun ña ndu uvi iñi ndo tsa nyicun ndo tsi yu, cua cacu ndo.

<sup>20</sup>Quivi cua nyehe ndo tyin ñi canduvi yuhu ñuu Jerusalén ihya nyecú andaru, coto ndo tyin tsa cuñi naa ñuu ihya. <sup>21</sup>Tan nyivi iyó ñuu tsa cayucú Judea, cua cunu ñi tan cuhun xeehe ñi ityi yucu. Tan nyivi iyó ñuu Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya. <sup>22</sup>Tyin yacan cuví quivi tsa cua tatsi tuñi Nyoo tsi nyivi ñuu ihya. Tyin tsa cua cuvi tandihí cuhva catyí nu tutu Nyoo. <sup>23</sup>Tan ndahvi ñiñaha tsa ñuhú sehe quivi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihí nyivi. Tyin cahnu xaan tsa uhvi cua nyehe nyivi ñuu Jerusalén ihya cua jaha Nyoo. <sup>24</sup>Andaru cua cahñi ra naha tsi juhva nyivi tsihin mityi. Tan cua tiñ ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuví, cua cuyucu ñi ñuu Jerusalén ihya nda cuanda quivi tsa catyí maa Nyoo.

### Naca cua quitsi Rayñi tsa quee nda gloria inga tsaha

(Mt. 24.29-35, 42-44; Mr. 13.24-37)

<sup>25</sup>Tacan tan cuaha tsa iyo cua nyehe nyivi nu ñi-canyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu. <sup>26</sup>Tan cua cúu naaha ñi tsihin tsa yuuhví ñi tsa tsicá iñi ñi náa ndihí tsa cua cuvi ihya nu ñuhu ñayivi. Tyin nda cuanda tsa iyó andivi cua nacanda tan taan. <sup>27</sup>Tacan tan cua nyehe ñi tsi yuhu, Rayñi tsa quee nda gloria, vatsí nuu yu tsitsi vico tsihin tunyee iñi Nyoo, tan tsihin tsa cahnu cuví ra. <sup>28</sup>Tan cuhva tsa cua quitsaha yacan tan jandu iin ndo iñi ndo tan cusñi iñi ndo tyin numi xaan cua cacu ndo —catyí ra.

<sup>29</sup>Tacan tan tsahá cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihí ca yutun. <sup>30</sup>Tatun tsa nduyutyá numa tun tsa cuyatyin cun savi. <sup>31</sup>Tan tacan tucu nyoocho, tatun tsa nyehe ndo tyin tsa quitsaha cuví tandihí tsa cahñ yu tsihin ndo, coto ndo tyin tsa nyanaá quivi tsa cundaca ñaha Nyoo nu ñuhu ñayivi ihya.

<sup>32</sup>Maa tyin tsa nditsa catyí yu tsihin ndo tyin yacan cua cuvi jihna tsa ndi cumañi ca cúu nyivi tsa iyó nu ñuhu ñayivi. <sup>33</sup>Coo quivi cua naa andivi tan ñuhu ñayivi, maa tyin tuhun caahán yu, ña cua cundihí tsi.

<sup>34</sup>Tan jaha ndo cuenda tsi ndo coto ndundava iñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan iñi ndo tundoho ñayivi ihya. Jaha ndo cuenda coto ndundava iñi ndo tsihin yacan. Tan coto sana iñi ndo tan quita quivi cua quitsi yu tan cua quitsi tundoho cua nyehe ndo. <sup>35</sup>Tyin tacan cua cuvi, tandihí nyivi iyó nu ñuhu ñayivi, sana iñi ñi tan tu-maa iin tsa cua nacasi Nyoo nu yucú ñi tan ña cua cuvi

quita ñi. <sup>36</sup> Maa tyin nyooho c̄yatu ndo. Ndācan tahvi ndo tsi Nyoo tandih̄i quiv̄i, na jacacu ra tsi ndo. Tan ña nyehe ndo tandih̄i tundoho tsa cua coo. Ndācan tahvi ndo, tacan tan cua cuvi tsa ndo nu nyaá yuhu, Raȳi tsa queē nda gloria —catyí ra Jesús.

<sup>37</sup> Tan tandih̄i quiv̄i jacuahá ra Jesús tsi tandih̄i nyiv̄i tsitsi vehe ñuhu cahnu. Tan tsa tsacuaa tsicá ra yucu Olivo. <sup>38</sup> Tan tandih̄i nyiv̄i tsaá ñi tsitsi vehe ñuhu cahnu ndih̄i tsa tuvi, tyin tyaa soho ñi tsa caahán ra.

### Nu cua xico ra Judas Iscariote tsi ra Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

**22** Tan tsa nyanaá yatyin quiv̄i tsa cua coo vico pas-cua, vico nu tuhvá nyiv̄i tsatsí paan tsa nduve yutsan iya yih̄í. <sup>2</sup> Tan ra jutu tsa cuv̄i ityi nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cah̄ñi ra naha tsi ra Jesús. Maa tyin yuuhv̄i ra naha tsi nyiv̄i.

<sup>3</sup> Tacan tan quih̄v̄i nu ña vaha tsi nu Judas Iscariote. Tan nu ihya cuv̄i iin tsa utsi uvi taahan ra tsa nacats̄i ra Jesús. <sup>4</sup> Tan nu ihya, tsah̄an nu tsicah̄an nu tsihin jutu tsa cuv̄i ityi nuu tan tsihin ra yih̄í ndaha tsi ra jahá cuenda vehe ñuhu cahnu naha ra. Tan natuh̄yn tahan ra naha nácaa cua cuhva cuenda nu Judas tsi ra Jesús tsi ra naha. <sup>5</sup> Tan ra ican naha ra s̄i xaan cuñí ra naha. Tan tyih̄j ra naha cuhva tyin cuhva ra naha xuhun tsi ra Judas. <sup>6</sup> Tan ra Judas ndoo ra vaha. Tan quitsah̄a nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyiv̄i yucú tsihin ra Jesús.

### Nu cuxiñi ra Jesús tsihin ra tsicá tsihin ra

(Mt. 26.17-29; Mr. 14.12-25; Jn. 13.21-30; I Co. 11.23-26)

<sup>7</sup> Tan tsā quiv̄i tsa cuvi vico tsa tsatsí nyiv̄i paan tsa nduve yutsan iya yih̄í. Tan juvin ñi quiv̄i ican tuhvá ñi tsah̄ñi iin mbee luhlu tsa vico pascua can. Tyin catsi ñi tsi tí. <sup>8</sup> Tan ra Jesús jacuh̄yn ra tsi ra Pedro tsihin ra Juan, tan catyí ra tsihin ra naha:

—C̄yaahan ndo c̄janduvaha ndo mbee tsa cua cuxiñi yo cuenda vico pascua —catyí ra.

<sup>9</sup> Tacan tan nducú tuhun ra naha tsi ra:

—¿Numaa cuñí un javaha ndi tsa cuxiñi yo? —catyí ra naha.

<sup>10</sup> Tacan tan catyí ra Jesús tsihin ra naha:

—C̄yaahan ndo tsitsi ñuu. Ican cua nañihi ndo tsi iin ra nyisó iin quiyi ndutya. C̄yaahan ndo tsata ra tan quih̄v̄i ndo vehe nu quih̄v̄i ra. <sup>11</sup> Tan c̄tyi ndo tsihin tsi-toho vehe can: “Ra cuv̄i Maestro, cuñí ra coto ra numaa nyaá cuarto nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan c̄tyi ndo tsihin ra. <sup>12</sup> Tacan tan cua janaha ra iin cuarto cahnu ityi siqui, nu tsinu uvi pisu tsi ndo. Tan tsa nduvah̄a maa tsi. Tan ndacan cua javaha ndo tsa cuxiñi yo —catyí ra tsihin ra naha. <sup>13</sup> Tacan tan cuahán ra naha. Tan nañih̄j ra naha tandih̄i tumaa tsa cah̄an ra Jesús. Tacan tan na ic̄a vaha ra naha tsa cuxiñi ra naha cuenda vico pas-cua.

<sup>14</sup> Tacan tan tsa tah̄an tsi cuhva tsa cuxiñi ra Jesús tsihin tandih̄i ra tav̄a tyiñu ra, tsinyec̄y ra naha yuhu mesa. <sup>15</sup> Tacan tan catyí ra Jesús:

—Cuñí xaan yu cuxiñi yu tsihin ndo cuenda vico pas-cua ihya tsa ndi cumañi ca nyehe yu tundoho tan cúu yu. <sup>16</sup> Tan catyí yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyí ra.

<sup>17</sup> Tacan tan quih̄j ra iin vasu vinu. Nacuhv̄a ra tyahvi nyoo tsi Nyoo. Yah̄a can tan catyí ra tsihin ra nyecú tsihin ra:

—Quihin ndo tsehe. Tan c̄oho ndo luxu luxu. <sup>18</sup> Tyin catyí yu tsihin ndo tyin ña cua coho ca yu vinu nda cuenda quitsi Nyoo tan quitsaha cundaca ñaha ra nu ñuhu ñayiv̄i ihya —catyí ra.

<sup>19</sup> Yah̄a can tan quih̄j ra paan, tan tsah̄a ra tyahvi nyoo tsi Nyoo, tan tsah̄nȳa sava ra can. Tsahan tsah̄a ra can tsi ra naha. Tan catyí ra tsihin ra naha:

—Paan ihya cuv̄i tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñí tsi nducuhun iñi ndo tsi yu tan cuxiñi ndo tyehen —catyí ra.

<sup>20</sup> Tan tsa yah̄a cuxiñi ra naha, tacan tan quih̄j ra vasu vinu, tan catyí ra:

—Tsihin vinu ihya ndoo Nyoo tyiñu tsihin ndo vityin. Tyin vinu tsa yih̄í tsitsi vasu ihya, tumaa niñi yu cuv̄i tsi. Tan tsa vaha tsi nyooho tan cua cati niñi yu. Tan cua cúu yu.

<sup>21</sup> ‘Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya. <sup>22</sup> Tyin yuhu, Raȳi tsa queē nda gloria, cua tahan yu tumaa tsa nyaá maa tsa cua tahan yu. Maa tyin j̄ndahvi ra tsa cua nacuhva cuenda tsi yu! —catyí ra Jesús.

<sup>23</sup> Tacan tan ra tsicá tsihin ra Jesús quitsah̄a nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

### Nu cah̄an yuhu tahan ra tsicá tsihin ra Jesús, yoo ra cahnu ca cuv̄i

<sup>24</sup> Yah̄a can tan quitsah̄a caahán yuhu tahan ra tsicá tsihin ra Jesús, ndáa ra cahnu ca cuv̄i. <sup>25</sup> Tan ra Jesús catyí ra:

—Tsitó nyooho tyin ra ndacá ñaha tsi nyiv̄i iyó nu ñuhu ñayiv̄i, ñihi xaan ndacá ñaha ra naha tsi ñi. Tan cuñí ra naha tyin catyi nyiv̄i tyin jatyinyeé ra naha tsi ñi. <sup>26</sup> Maa tyin nyooho ña taahán tsi javaha ndo tumaa javahá ra ican naha ra. Tyin tatun cuñí ndo cuv̄i ndo ra cuv̄i ityi nuu, taahán tsi janduluhlu ndo tsi ndo. Tan tatun cuñí ndo cundaca ñaha ndo, cuñí tsi tsa cuvi ndo musu tandih̄i ndo. <sup>27</sup> Tyin nu ñuhu ñayiv̄i ihya, ra cuv̄i ityi nuu cuv̄i ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuv̄i ityi nuu cuv̄i yu, tan cuv̄i yu musu ndo.

<sup>28</sup> ‘Tan nyooho cuv̄i ndo tsa nyecú tsihin yu tandih̄i nu nyehe yu tundoho. <sup>29</sup> Yacan cuenda, yuhu tsah̄a yu iin nu cua cundaca ñaha ndo tumaa tsa tsah̄a Jutu yu tsa cundaca ñaha yu. <sup>30</sup> Tyin cua catsi ndo tan cua coho

ndo nu mesa tsihin yu nda nu ndacá ñaha yu. Tan ndacan cua cunyecu ndo cundaca ñaha ndo nyivi cuví tata tsa utsi uvi sehe ra Israel.

**Nu caahán ra Jesús tyin cua catyí ra Pedro tyin ña nacoto ra tsi ra**

(Mt. 26.31-35; Mr. 14.27-31; Jn. 13.36-38)

<sup>31</sup> Tacan tan catyí ra Jesús tsihin ra Pedro:

—Nyehe vaha un, yooho Simón. Tyin nu ña vaha tsa tsicān ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo. <sup>32</sup> Maa tyin tsicān tahvi xaan yu tsi ra tsa cuenda un, na ña jandihí un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatyinyee un tsi ra yañi un naha ra tsa ña cua jandihí ra naha tsa tsinú iñi ra naha tsi yu —catyí ra Jesús tsihin ra Simón.

<sup>33</sup> Tan ra Simón catyí ra tsihin ra:

—Jutu Mañi yu, tsa ndu iin vaha iñi yu tsa cuhun yu tsihin un vasu vehe caa, vasu cúu yu tsihin un —catyí ra.

<sup>34</sup> Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitooho, yooho cua catyí un uñi tsaha tyin ña nacoto un tsi yu —catyí ra Jesús tsihin ra.

**Nu tsa cuñí tsa cuhva tsa cua nacuhva cuenda ra Judas tsi ra Jesús**

<sup>35</sup> Tacan tan tsicā tuhun ra Jesús tsi ra tsicá tsihin ra tan catyí ra tsihin ra naha:

—Nducuhun iñi ndo quivi tsa jacuhun yu tsi ndo tsa cahān ndo tsihin nyivi, tan nduve tsa tsindahā ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quivi can? —catyí ra Jesús.

—Nduve —catyí ra naha.

<sup>36</sup> Tacan tan catyí ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo. <sup>37</sup> Tyin catyí yu tsihin ndo, tyin tandihí tuhun yu tsa nyaá nu tutu Nyoo cua cundaa tsi, tyehen catyí tsi: “Cua tatsi tuñi nyivi tsi ra tumaa tsa cuví ra iin ra caquiñi.” Tacan catyí tuhun yu nu tutu Nyoo. Tan tandihí tsa catyí tsi tsa cuenda yu cua cundaa tsi —catyí ra.

<sup>38</sup> Tacan tan catyí ra tsicá tsihin ra:

—Ihya nyecú uvi taahan mityi —catyí ra naha.

—Tsa iyó vaha ñi —catyí ra Jesús.

**Nu tsicān tahvi ra Jesús tsi Nyoo nda Getsemaní**

(Mt. 26.36-46; Mr. 14.32-42)

<sup>39</sup> Tacan tan quitā ra Jesús vehe nu nyíí ra. Tan cuahán ra yucu Olivo, cuhva tuhvá maa ra tsicá. Tan ra tsicá tsihin ra cuahán ra naha nyicún ra naha tsi ra.

<sup>40</sup> Tan tsa tsaā ra naha ndacan, catyí ra tsihin ra naha:

—Ndācan tahvi ndo tsi Nyoo tyin tacan tan ña cuví jaha canaa nu ña vaha tsi ndo.

<sup>41</sup> Tacan tan cuahán ra Jesús tsa cañi luxu ca, tumaa tsa cañi tsaá iin yuu tun cañi yo can. Tacan tan tsicuiñi tsiñi ra. Tan quitsahā caahán ra tsihin Nyoo, <sup>42</sup> tan catyí ra:

—Tyatya Jutu yu, tun yooho tan cuñí un, jatsiyo tundoho tsa cua nyehe yu ihya. Maa tyin na ña cuví cuhva cuñí maa yu. Na cuví cuhva cuñí maa un —catyí ra Jesús.

<sup>43</sup> Tacan tan quituví iin ángel Nyoo, tyin cuhva ra tunyee iñi tsi ra Jesús. <sup>44</sup> Tan tsitsi tsa nyehé xaan ra Jesús tundoho tsa cuihya xaan cuñí ra, tan ñiñi ca tsicān tahvi ra tsi Nyoo. Tan cuaha xaan tyen ra quitá tan tsatí tsi nu ñuhu, tan caá tsi tumaa caá ñiñi.

<sup>45</sup> Tacan tan nduvitā ra tsa ndihí cahān ra tsihin Nyoo. Tan cuahán nyico ra nu yucú ra tsicá tsihin ra. Tan nyehé ra tyin quixí ra naha, tsa cuenda tsa cuihya xaan cuñí ra naha, ña cunyeē iñi ra naha ñumaahna tan quixí ra naha.

<sup>46</sup> Tacan tan catyí ra Jesús tsihin ra naha:

—¿Nacuenda quixí ndo? Nduvita ndo. Tan ndācan tahvi ndo tsi Nyoo, tyin tacan tan ña cuví jaha canaa nu ña vaha tsi ndo.

**Nu tsahā cuenda ra Judas tsi ra Jesús tsi nu xaan iñi tsi ra**

(Mt. 26.47-56; Mr. 14.43-50; Jn. 18.2-11)

<sup>47</sup> Ndi caahán ca ra Jesús yacan, tan tsaā cuaha ra catsaā. Tan ityi nuu, vatsí nu Judas, iin ra tsicá tsihin ra Jesús. Tan natuhvā nu nu nyaá ra Jesús tyin tyayuhu nu tsi ra. <sup>48</sup> Tacan tan cahān ra Jesús tsihin nu:

—Yooho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayiñ tsa queē nda gloria tsi nu xaan iñi tsi yu nahnu? —catyí ra Jesús.

<sup>49</sup> Tan ra nyecú tsihin ra Jesús quitsahā nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mityi? —catyí ra naha.

<sup>50</sup> Tacan tan iin ra can, tsahnyā ra soho tsiyo cuaha iin ra tsa cuví musu ra jutu tsaahnu tsa cuví ityi nuu.

<sup>51</sup> Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tñin ra Jesús soho ra ican tan janduvahā ra itsi. <sup>52</sup> Tan ra jutu tsa cuví ityi nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juvin ra naha cuví ra tsahān tsitñin tsi ra Jesús. Tan catyí ra Jesús tsihin ra naha:

—¿A vatsí tñin ndo tsi yu tumaa tñin ndo iin ñasuhu? tyin ndaha ndo mityi tan yutun. <sup>53</sup> Ndiñi quivi tsinyi yu tsitsi vehe ñuhu cahnu, tan ña tñin ndo tsi yu ndacan. Maa tyin vityin tsaā cuhva tsa ndunaā tyin nu ña vaha ndacá ñaha. Yacan cuenda vatsí tñin ndo tsi yu.

**Nu cahān ra Pedro tyin ña nacotó ra tsi ra Jesús**

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Tacan tan tñin ra naha tsi ra Jesús. Tan tsindacā ra naha tsi ra nda vehe ra jutu tsaahnu tsa cuví ityi nuu. Tan ra Pedro ndasava ñi cuahán ra nyicún ra. <sup>55</sup> Tan tsa tsaā ra naha vehe ra jutu tsaahnu tsa cuví ityi nuu,

jatahan ra tsa cuví musu naha ra ñuhü nuquehe. Tan tsinyecü ra naha tanñ canduvi nu cayú ñuhü can. Tan tsinyaã ndihî ra Pedro tyañu ra naha. <sup>56</sup> Tan tsa ndunditsin tsa cayú ñuhü ican, tacan tan iin ñaha tsa cuví musu jutu can, nyehë ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

<sup>57</sup> Maa tyin ra Pedro catyí ra:

—Yuhu ña nacotó yu tsi ra can.

<sup>58</sup> Tañi ñi tan nyehë tucu inga nyivi tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

<sup>59</sup> Tan tsa yahã iin hora, tan nyehë tucu inga ra tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa tsicá tsihin ra can. Tyin juvin ra Galilea cuví ra —catyí ra.

<sup>60</sup> Tacan tan catyí ra Pedro:

—Ña tsitó yu ná caahán un —catyí ra.

Tan juvin ñi cuhva can, tsitsi tsa ndi caahán ca ra Pedro tan navacü ñi iin tsitooho.

<sup>61</sup> Tacan tan ra Jesús nanyehë ra nuu ra Pedro. Tan ra Pedro nducuhün iñi ra tsa cahan ra Jesús tsihin ra: “Tsa ndi cumañi ca navacu tsitooho, yooho tsa cahan un uñi tsaha tyin ña nacotó un tsi yu.”

<sup>62</sup> Tacan tan quitã ra Pedro ityi tsata vehe. Tan tsacü xaan ra tsa cuihya cuñi ra.

#### Nu tsacü nducu nyaa ra naha tsi ra Jesús tan cañi ra naha tsi ra

(Mt. 26.67-68; Mr. 14.65)

<sup>63</sup> Tacan tan ra jahá cuenda tsi ra Jesús, quitsahã tsacü nducu ra naha tsi ra. Tan cañi ra naha tsi ra.

<sup>64</sup> Tsahñi ra naha jahma nuu ra, tan quitsahã cañi ra naha nuu ra. Tan catyí ra naha tsihin ra:

—Ñacoto yóo ra cañi tsi un —catyí ra naha tsihin ra.

<sup>65</sup> Tan cuaha xaan ca maa tsa cahan nyaa ra naha tsi ra.

#### Nu tsicã tuhun mandoñi naha ra tsi ra Jesús tatun Sehe Nyoo cuví tsi ra

(Mt. 26.59-66; Mr. 14.55-64; Jn. 18.19-24)

<sup>66</sup> Tan tsa cunditsin inga quivi, tan ndu iin ra cuví mandoñi tsahnu ñuu can tsihin ra jutu tsa cuví ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi ra Jesús, cuahán tsihin ra nda nu cua coo Junta Cahnu. Tan nducü tuhun ra naha tsi ra Jesús:

<sup>67</sup> —Catyí tuhun tsihin ndi tun juvin ra Cristo cuví un —catyí ra naha tsihin ra.

Tan ra Jesús nacahan ra tan catyí ra:

—Tatun catyí yu tsihin ndo tyin juvin yu cuví, ña cua tsinu iñi ndo tsa cahan yu. <sup>68</sup> Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu. <sup>69</sup> Maa tyin vityin tan ityi nuu ca, Rayiñ tsa queë nda gloria cua cunyaa ra xiin cuaha Nyoo, ra tsa iyó tandihî tunyee iñi —catyí ra Jesús.

<sup>70</sup> Tacan tan tandihî ra naha tsicã tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyí ra:

—Juvín, sehe Nyoo tsi yu tumaa catyí maa ndo.

<sup>71</sup> Tacan tan natuhün tahan ra naha:

—Tsiñi ndo tsa caahán ra. Ña cuñi ca tsi tsandaa.

Tyin tsa tsiñi maa yo tsa cahan ra —catyí ra naha.

#### Nu nyehë ra Pilato tyin nduve cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

**23** Tacan tan nduvitã tandihî ra naha. Tan tsindacã ra naha tsi ra Jesús nda nu nyaá ra Pilato, [ra ndacá ñaha queë nda ñuu Roma]. <sup>2</sup> Tacan tan quitsahã tyaá ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyin cuví ra Cristo, ra tsa jaquitsi Nyoo tyin cuví ra rey —catyí ra naha tsihin ra Pilato.

<sup>3</sup> Tacan tan ra Pilato tsicã tuhun ra tsi ra Jesús:

—¿A yooho cuví Rey cuenda nyivi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

<sup>4</sup> Tacan tan catyí ra Pilato tsihin ra jutu tsa cuví ityi nuu naha ra, tan tsihin nyivi:

—Nduve cuatyí ra ihya —catyí ra tsihin ñi.

<sup>5</sup> Maa tyin jañihî ca ñi caahán ñi. Tan catyí nyico ñi:

—Cahnu xaan cuatyí ra. Tyin cuaha xaan tsihiñ tsahã ra, tyin jacuahá ra tsi nyivi. Tsa jihna ñi quitsahã caahán ra tsihin nyivi iyó ñuu tsa cayucú Galilea. Tan nanñi ityi vatsí ra, jacuahá ra tsi nyivi. Tan vityin tsa tsaa ra Judea ihya tan juvin ñi yacan javahá ra —catyí ñi.

#### Nu jacuhün ra Pilato tsi ra Jesús nu nyaá ra Herodes, ra cuví rey nyivi iyó Galilea

<sup>6</sup> Cuhva tsa tsiñi ra Pilato yacan, tan nducü tuhun ra tatun ra Galilea cuví ra Jesús. <sup>7</sup> Tan catyí nyivi tsihin ra tyin juvin. Tacan tan jacuhün ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quivi can nyi ra ñuu Jerusalén. <sup>8</sup> Tan cuhva tsa nyehë ra Herodes tsi ra Jesús, siñ xaan cuñi ra. Tyin tsanaha xaan cuñi ra nyehe ra tsi ra. Tyin ñihî tuhun ra tyin cuaha xaan tsa iyo javahá ra. Tan cuñi xaan ra nyehe ra iin tsa iyo tsa cua javaha ra Jesús.

<sup>9</sup> Tan cuaha xaan tsa nducü tuhun ra Herodes tsi ra Jesús. Maa tyin ra Jesús ña nacahan maa ra. <sup>10</sup> Ican nyecü ndihî tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaã xaan ra naha cuatyí tsi ra Jesús. <sup>11</sup> Tacan tan ra Herodes tsihin andaru cuenda ra, tsacü nducu ra naha tsi ra. Tan jacunditsi nuu ra naha iin jahma yahvi tan siñ caá tsi ra Jesús, tumaa caá tsa tuhvá rey tsinditsí.

Tacan tan jacuhün nyico ra Herodes tsi ra nda nu nyaá ra Pilato. <sup>12</sup> Tan quivi can ra Pilato tsihin ra Herodes nduvahã iyó ra naha. Tyin nu quitsi quivi, ña cuví nyehé tahan ra naha tsi ra naha.

### Nu cutuñi ra Jesús tyin cua cúu ra

(Mt. 27.15-26; Mr. 15.6-15; Jn. 18.39-19.16)

<sup>13</sup> Tacan tan ra Pilato jandu ijin ra tsi ra jutu tsa cuví ityi nuu naha ra, tan ra cumí tyiñu vehe ñuhu naha ra, tan tsihin tandihí nyívi. <sup>14</sup> Tan catyí ra tsihin ñi:

—Nyooho quitsi ndaca ndo tsi ra ihya nu nyaá yu. Tan catyí ndo tyin javí ra tsi nyívi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahān ndo can nañihí yu. <sup>15</sup> Tan ndi ra Herodes tan ña nañihí ra ndi intuhun cuatyí ra. Yacan jaquitsi nyico ra tsi ra inga tsaha nu nyaá yu. Nyehe ndo tyin nduve cuatyí ra. Tan yacan ña taahán tsi tsa cúu ra.

<sup>16</sup> Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

<sup>17</sup> Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá. <sup>18</sup> Maa tyin tandihí nyívi iin caa ñi canā tsaa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

<sup>19</sup> Tan ra Barrabás can nyíi ra vehe caa tsa cuenda tsa cañi tahan ra tsihin ra cumí tyiñu ñuu can. Tan inga tuhun tyin tsahñi ra nyívi. <sup>20</sup> Tan ra Pilato cuñi ra jaña ra tsi ra Jesús. Tan quitsahā caahán ra tsihin nyívi can inga tsaha tyin cua jaña ra tsi ra. <sup>21</sup> Maa tyin nyívi tsaa ca canā tsaa ñi:

—¡Tyaa tsi ra nu cruu. Na cúu ra nu cruu!

<sup>22</sup> —¿Náa tsa ña vaha javahā ra ihya? Tan nyehé yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

<sup>23</sup> Maa tyin nyívi canā tsaa ca ñi, tan catyí ñi tyin nacahñi ra tsi ra Jesús nu cruu. Tan maa ñi tan tsihin ra jutu tsa cuví ityi nuu naha ra, ñihí ñi tsa cuñi ñi tyin canā tsaa xaan ñi. <sup>24</sup> Tacan tan javahā ra Pilato cuhva cahān ñi. <sup>25</sup> Tan jaña ra tsi ra Barrabás, ra tsa nyíi vehe caa tsa cuenda tsa cañi tahan ra tsihin ra cumí tyiñu tan tsa cuenda tsa tsahñi ra nyívi. Tan nacuhva cuenda ra Pilato tsi ra Jesús tsi ñi cuhva cuñi maa ñi.

### Nu tyaa ra naha tsi ra Jesús nu cruu

(Mt. 27.32-44; Mr. 15.21-32; Jn. 19.17-27)

<sup>26</sup> Tacan tan quihin andaru tsi ra Jesús. Tan cuahán ra tsihin ra naha. Tan tñin tucu ra naha tsi iin ra ñuu Cirene nañi Simón. Ra ican ndi vatsí nuhu ra quee ra cuhu. Tan jañiñi ra naha tsi ra tsa cuiso ra cruu ra Jesús. Tan cuhun ra ityi tsata ra.

<sup>27</sup> Tan cuaha xaan nyívi cuahán ityi tsata ra Jesús. Tan cuaha xaan ñiñaha tsacú xaan ñi tsa cuiihya cuñi ñi tsacatyí tundoho tahan ra. <sup>28</sup> Maa tyin ra Jesús nanyehé ra nuu ñi. Tan catyí ra tsihin ñi:

—Tandihí nyooho, ñiñaha ñuu Jerusalén ihya, ña vacu ndo tsacatyí yuhu. Vacu ndo, tsacatyí maa ndo tan tsacatyí sehe ndo. <sup>29</sup> Tyin cua quitsi quívi cua nyehé xaan ndo tundoho. Tan cua cahan nyívi tsi tandihí ndo tsa cuví ndo ñaha tsa ña cuví coo sehe. Tan cua cahan ñi tsihin ndo: “Vaha xaan tyin nduve sehe ndo tsicoo tyin cuaha xaan tundoho nyehé yo vityin”, cua catyí ñi

tsihin ndo. <sup>30</sup> Tyin quívi can cua cuñi ñi nduva yucu tsa-ta ñi tan quíhvi xeehe ñi. <sup>31</sup> Tyin tatun tyehen icá nyívi tsihin iin yutun vaha, yaha ca cuhva cua ica ñi tsihin yutun ityi —catyí ra Jesús tsihin ñiñaha ñuu Jerusalén can.

<sup>32</sup> Tan quihin tucu andaru can naha ra tsi uvi taahan ra iyó cuatyí, tyin cahñi ndihí ra naha tsi ra naha iin caa ñi tsihin ra Jesús. <sup>33</sup> Tacan tan tsaa ra naha iin nu nañi Yiqui Jiñi Ndiyí. Tan ican tyaa ra naha tsi ra Jesús nu cruu. Tan tacan tyaa ndihí tucu ra naha tsi nduvi taahan ra iyó cuatyí can naha ra. Iin ra tyaa ra naha nuu cruu xiin cuaha ra Jesús. Tan inga ra can tyaa ra naha nuu cruu xiin satyín ra. <sup>34</sup> Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tavā ra naha suerte tsihin jahma ra Jesús, tyin nyehé ra naha ndáa ra cua jaha canaa jahma can. <sup>35</sup> Tan nyívi nyecú ñi nyehé ñi.

Tan ra cumí tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacu ra tsi inga nyívi. Na jacacu ndihí tucu maa ra tsi ra vityin, tun nditsa tsa ra Cristo, ra tsa jaquitsi Nyoo, cuví ra —catyí ra naha.

<sup>36</sup> Tan juvin ñi cahān nyaá ra andaru can naha ra tsi ra. Tan natuhvā ra naha nu ticaá ra. Tan tsahā ra naha vinu iya tsihi ra. <sup>37</sup> Tan catyí ra naha tsihin ra:

—Tatun rey cuenda nyívi Israel cuví un, jacacu tsi un —catyí ra naha.

<sup>38</sup> Tan jiñi cruu nu nyaá ra Jesús nyaá iin tsa tyaa ra Pilato tsihin sahan griego, sahan latín, tan sahan hebreo. Tyehen caahán letra can: “Juvín ra ihya cuví Rey cuenda nyívi ñuu Israel” —catyí letra can.

<sup>39</sup> Tan iin ra tsa iyó cuatyí tsa nyaá nu cruu xiin ra Jesús, quitsahā caahán nyaá ra tsi ra:

—Tatun nditsa tyin ra Cristo cuví un, jacacu tsi un. Tan jacacu ndihí tsi nyuhu —catyí ra can.

<sup>40</sup> Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juvin ñi tundoho tsa taahán ra ihya, tan taahán un vityin. <sup>41</sup> Maa yo nyehé yo tundoho maa tyin iyó cuatyí yo. Tan ra ihya nduve cuatyí ra iyó —catyí ra can.

<sup>42</sup> Tacan tan catyí ra can tsihin ra Jesús:

—Yooho Jesús, nducuhun iñi tsi yu quívi cundaca ñaha un —catyí ra.

<sup>43</sup> Tacan tan ra Jesús nacahān ra tsihin ra tan catyí ra:

—Tsa nditsa caahán yu tsihin un tyin juvin ñi vityin tan cua cunyaa un tsihin yu nda paraíso [nu yucú añi-ma nyívi tsinú iñi tsi Nyoo] —catyí ra Jesús tsihin ra.

### Nu tsihi ra Jesús

(Mt. 27.45-56; Mr. 15.33-41; Jn. 19.28-30)

<sup>44</sup> Tacan tan cuhva ora quitsahā ndunaá nu ñuhu ñayívi, nda cuanda caa uñi tsa tseñi. <sup>45</sup> Tyin ndunaā ñi-canyii. Tan jahma tsa ticaá tsitsi vehe ñuhu cahnu, ndatā sava tsi. <sup>46</sup> Tacan tan canā tsaa ra Jesús tan catyí ra:



—Tyatya, Jutu yu, tyaa cuenda yu añima yu ndaha un —catyí ra.

Tan cuhva tsa cahān ra tacan, tan tsihī ra.

<sup>47</sup> Tan ra cuví capitán cuenda andaru can naha ra, nyehē ra tandihī tsa cuvī. Tan jacahnū ra tsi Nyoo, tan catyí ra:

—Nduve tsa cuii cuatyí ra ihya tsicoo —catyí ra.

<sup>48</sup> Tan tandihī nyivi tsa nyecú ican, nyehē ñi tsa cuvī. Tan cuahán ñi tan quitsahā cañi ndaha ñi yiqui nyica ñi. Tyin tsitó ñi tyin ña vaha tsa javahā ñi tsihin ra Jesús. <sup>49</sup> Tan tandihī nyivi tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehē ñi tandihī tsa cuvī can.

#### Nu cua cutsi ra naha tsi ra Jesús

(Mt. 27.57-61; Mr. 15.42-47; Jn. 19.38-42)

<sup>50</sup> Tan iyó iin ra vaha, nañi ra José. ra ñuu Arimatea tsa canyíi Judea. Tan cuví ra iin ra cuví ityi nuu cuenda Junta Cahnu nyivi Israel. <sup>51</sup> Tan ra José can ndatú ra quivi tsa cua cundaca ñaha Nyoo. Tan ña ndoo ra vaha tsihin tsa javahā ra cutahán tsihin ra, ra cuví jutu tsa cuví ityi nuu naha ra. <sup>52</sup> Tacan tan tsahān ra José can tsindacān ra cuñu ñuhu ra Jesús tsi ra Pilato. <sup>53</sup> Tan yahā tsa januyū ra José can cuñu ñuhu ra Jesús nu cruu, cavā nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsaa tsa cuví yavi yuu tsa javahā nyivi tan ñaha ca quihvi ndiyi tsitsi can. <sup>54</sup> Tan viernes cuví can, quivi tsa janduvahá nyivi tsa catsi ñi tsa sabaru, quivi quitatú ñi. Tan tsa cua tahan tsi quivi can.

<sup>55</sup> Tan tandihī ñiñaha tsa quee tsihin ra Jesús Galilea, cuahán ñi cua nyehē ñi tsitsi yavi yuu can. Tan nyehē ñi cuhva canyíi cuñu ñuhu ra. <sup>56</sup> Tan cuanuhū ñi nda yuvehe ñi. Tan janduvahā ñi ndutya tami tyin cua tyihi ñi cuñu ñuhu ra Jesús. Tacan tan quitatū ñi inga quivi can tumaa catyí maa tuhun tsa tsahā cuenda Nyoo tsi yo.

#### Nu nandoto ra Jesús

(Mt. 28.1-10; Mr. 16.1-8; Jn. 20.1-10)

**24** Tsa tuvī tumingu quivi nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvahā ñi. <sup>2</sup> Tan cuhva tsa tsaā ñi, nyehē ñi tyin tsa cuatsiyō yuu tsa ndasí yuhu ñaña can. <sup>3</sup> Tan quihvi ñi tsitsi ñaña can, maa tyin ña nañihī ñi cuñu ñuhu Jutu Mañi yo Jesús. <sup>4</sup> Tan yucú ñi tsihin tsa yuuhví ñi. Tan ña tsitó ñi náa cua javaha ñi. Tan sana iñi ñi quituvī uvi taahan rayi nuu ñi. Tan xiñu xaan jahma nditsí ra naha. <sup>5</sup> Tan tsihin tsa yuuhví ñi, tan tsaquin ñi jiñi ñi nda nu ñuhu. Tacan tan catyí ra can naha ra tsihin ñi:

—¿Nacuenda nanducú ndo tsi ra nyito nu yucú ndiyi?

<sup>6</sup> Nduve ca ra nyii ihya, tyin tsa nandoto ra. Nducuhun iñi ndo tsa cahān ra tsihin ndo quivi tsicā ra Galilea.

<sup>7</sup> Catyí ra tyin taahán tsi nacuhva cuenda nyivi tsi ra ndaha ra iyó cuatyí naha ra. Tyin cuví ra Rayi tsa quee nda gloria. Tan taahán tsi tyin cahñi ra can naha ra tsi ra nu cruu. Maa tyin tsa tsinu uñi quivi cua nandoto ra.

Tacan catyí ra tsihin ndo —catyí ángel can naha ra tsihin ñi.

<sup>8</sup> Tacan tan nducuhun iñi ñi tsa cahān ra Jesús quivi can. <sup>9</sup> Tan cuanuhū ñi. Tan nacatyí tuhun ñi tsihin tsa utsi iin ra tsa tavā tyiñu ra Jesús tan tsihin tandihī ca nyivi tsa tsinyicun tsi ra. <sup>10</sup> Tan ñiñaha tsa tsicatyí tuhun tsihin ra naha cuví ñi: ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha. <sup>11</sup> Maa tyin ra tavā tyiñu ra Jesús cuñi maa ra naha tyin caahán ñi maa ñi. Tan ña tsinú iñi ra naha tsa caahán ñi.

<sup>12</sup> Maa tyin ra Pedro nduvitā ra tan tsinú xaan ra cuahán ra cua nyehē ra tsitsi ñaña nu tinyi ra naha ra Jesús tatun nditsa. Tan nyehē ra tsitsi yavi yuu can tyin jahma tsa tsindasí ña ra canyíi nda sava. Tacan tan cuanuhū ra yuvehe nu yucú tandihī ca ra naha. Tan iyo xaan cuñi ra tsa cuvī.

#### Tsa cuvī ityi cuahán ñuu Emaús

(Mr. 16.12-13)

<sup>13</sup> Juvín ñi maa quivi can, uvi taahan ra tsinyicun tsi ra Jesús cuahán ra naha ñuu Emaús, tumaa utsi iin kilómetro tsa quee yo ñuu Jerusalén. <sup>14</sup> Tan cuahán ra naha tan natuhún tahan ra naha náa ndihī tsa cuvī.

<sup>15</sup> Tan tsitsi tsa natuhún ra naha, tan ra Jesús tahān ra tsi ra naha ityi cuahán ra naha. <sup>16</sup> Maa tyin vasu nyehé ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cuví nacoto ra naha tsi ra Jesús. <sup>17</sup> Tacan tan nducū tuhun ra Jesús tsi ra naha:

—¿Náa natuhún xaan ndo? ¿Nacuenda cuihya xaan cuñi ndo? —catyí ra tsihin ra naha.

<sup>18</sup> Tan iin ra tsa nañi Cleofas nacahān ra tan catyí ra:

—Tandihī nyivi tsitó tsa cuvī ñuu Jerusalén. ¿A ra inga ñuu cuví yooho tyin ña tsito un tsa cuvī? —catyí ra.

<sup>19</sup> Tacan tan catyí ra Jesús tsihin ra naha:

—¿Náa cuvī?

Tan nacatyí tuhun ra naha tsihin ra:

—Tuhun ra Jesús ra ñuu Nazaret. Tyin cuvī ra iin ra cuvī ndusu yuhu Nyoo. Tan tsihin tunyee iñi cahnu Nyoo javahā ra tsa cahnu tan cahān ra tsa vaha nuu Nyoo tan nuu tandihī nyivi. <sup>20</sup> Maa tyin ra jutu tsa cuví ityi nuu naha ra tan ra cumí tyiñu cuenda vehe ñuhu, tsahā cuenda ra naha tsi ra tsi ra ndacá ñaha cuenda ñuu Roma. Tan tsahñi ra naha tsi ra. Tan tsihī ra nu cruu.

<sup>21</sup> Tan vityin tsa quitā uñi quivi tsa cuvī yacan. Tan nyuhu cuñi maa ndi tyin juvín ra cua jacacu tsi yo tsa cuví yo nyivi Israel. <sup>22</sup> Maa tyin vityin iyo xaan cuñi ndi tsa nacatyí juhva ñiñaha tsihin ndi. Tyin maa ñi tsahān ñi nu ñaña ra tsa tuvī. <sup>23</sup> Tan nduve ca cuñu ñuhu ra canyí. Tan nacatyí tuhun ndihī ñi tyin nyehē ñi uvi taahan ángel. Tan catyí ángel can naha ra tsihin ñi tyin ra Jesús nyito ra. <sup>24</sup> Yahā yacan tan tsahān tucu juhva ra cutahán tsihin ndi tsinyehē ra naha nu ñaña. Tan nyehē ra naha tyin tsa nditsa cuví tsa cahān ñiñaha can. Maa tyin ña nyehē ra naha tsi ra Jesús —catyí ra naha tsihin ra Jesús.

<sup>25</sup> Tacan tan catyí ra Jesús tsihin ra naha:

—Luxu xaan cutuñí iñi ndo. Tan cuee xaan tan tsinu iñi ndo tuhun tsa cahān ra cuvī ndusu yuhu Nyoo tahān tsanaha. <sup>26</sup> ¿A ña tsitó ndo tyin taahán tsi tsa nyehe jihna ra Cristo tundoho? Yaha can tan tahan tsi cua ñihi ra tyiñu tsa cua cundaca ñaha ra —catyí ra Jesús tsihin ra naha.

<sup>27</sup> Tacan tan quitsahā tsahá cuenda ra nácaa cuahán tuhun maa ra nu tutu Nyoo. Tan quitsahā caahán ra tuhun tsa tyaā ra Moisés tahān tsanaha. Tan yahā can tan cahān ra tuhun tandihī libru tsa tyaā ra cuvī ndusu yuhu Nyoo.

<sup>28</sup> Tan cuhva tsa tsaā ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra. <sup>29</sup> Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndoo tsihin ndi tyin tsa cua cuiso ñicanyii —catyí ra naha.

Tacan tan cuahán ra Jesús tsihin ra naha. <sup>30</sup> Tan cuhva tsa tsinyaā ra yuhu mesa tsihin ra naha, quihīn ra paan. Tan tsahā ra tyahvi nyoo tsi Nyoo. Tan tsahnū sava ra, tan tsahā ra tsi ra naha. <sup>31</sup> Tan iin yaha ñi nuñā nuu ra naha tan nacoto ra naha tsi ra Jesús. Maa tyin ra Jesús naā ihñi ñi ra. <sup>32</sup> Tacan tan quitsahā natuhún tahan ra naha tan catyí ra naha:

—Yacan cuenda vaha xaan cuñí añima yo tsa vatsí ra tsihin yo, tan tsahá cuenda ra tuhun Nyoo tsa nyaá nu tutu Nyoo tsi yo —catyí ra naha.

<sup>33</sup> Ña ndatu ca ra naha, tan cuanuhu ra naha nda ñuu Jerusalén. Tan ñihī tahan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha. <sup>34</sup> Tacan tan tsa utsi iin ra can naha ra nacatyí tuhun ra naha tsihin ra tsa ndi tsaā can naha ra:

—Nditsa tyin Jutu Mañi yo nandoto ra. Tyin ra Simón nyehe ra tsi ra —catyí ra naha.

<sup>35</sup> Tacan tan ra tsa ndi tsaā can nacatyí tuhun ndihī ra naha nácaa natuhūn ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnū sava ra paan.

### Nu quituvī ra Jesús nu yucú ra tsicā tsihin ra

(Mt. 28.16-20; Mr. 16.14-18; Jn. 20. 19-23)

<sup>36</sup> Ndi natuhún ca ra naha yacan tan quituvī ra Jesús tyañu ra naha. Tan tsahā ra nacumi tsi ra naha, tan catyí ra:

—Na coo tsa vaha añima ndo.

<sup>37</sup> Tacan tan nayuhvī xaan ra naha. Tan cuñí ra naha tyin tatyí ndiyi cuvī can. <sup>38</sup> Tacan tan catyí ra Jesús tsihin ra naha:

—¿Nacuenda yuuhvī xaan ndo? ¿Tan nacuenta tsicá xaan iñi ndo? <sup>39</sup> Nyehe ndo ndaha yu. Tan nyehe ndo tsaha yu. Tyin juvin ñi maa yu cuvī. Tñn ndo tsi yu tan coto ndo. Tyin tatyí ndiyi nduve cuñu ñuhu can iyó. Tan nduve yiqui can tumaa tsa nyehé ndo tsi yuhu —catyí ra Jesús.

<sup>40</sup> Tan cuhva tsa cahān ra yacan, tan janahā ra ndaha ra tsihin tsaha ra tsi ra naha. <sup>41</sup> Maa tyin maa ra naha, tsa cuenda tsa iyo cuñí ra naha tan sii cuñí ra naha, nda cuenda ña cuvī ca tsinú vaha iñi ra naha. Yacan nacahān ra Jesús tsihin ra naha:

—¿A iyó tsa catsi yo? —catyí ra.

<sup>42</sup> Tacan tan tsahā ra naha luxu tyaca tyihyo tsihin ndutya ñuñu tsi ra. <sup>43</sup> Tan quihīn ra. Tan quitsahā tsatsí ra nu nyecú ra naha. <sup>44</sup> Tan catyí ra tsihin ra naha:

—Tandihī tsa tahān yu, yacan cuvī tsa catyí yu tsihin ndo quivi can. Tan catyí yu tsihin ndo tyin tacan cua cuvi, tumaa cuhva nyaá tuhun tsa tyaā ra Moisés tan ra cuvī ndusu yuhu Nyoo tan tsihin tsa nyaá nu libru salmo —catyí ra tsihin ra naha.

<sup>45</sup> Tacan tan tsahā cuenda ra Jesús cuhva catyí nu tutu Nyoo. Tan cutuñí iñi tandihī ra naha jahā ra. <sup>46</sup> Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cúu ra Cristo. Tan tsa tsinu uñi quivi cua nandoto ra. <sup>47</sup> Tan taahán tsi coto nyivi tuhun ra Cristo, tyin tatun ndu uvi iñi ñi cuatyí ñi, cua coo tucahnū iñi tsi ñi. Tan jihna ñi cua cahan ra naha tsihin sivi ra Cristo ñuu Jerusalén, yaha can tan tandihī ca ñuu taniñ cahnu nu ñuhu ñayivi.

<sup>48</sup> Tan catyí tucu ra Jesús tsihin ra naha:

—Tan nyoocho cuvī tsandaa tsa cuenda tandihī tsehe.

<sup>49</sup> Tan cua jaquitsi maa yu Tatyí Ii Nyoo siquī ndo tumaa tsa catyí Jutu yu tyin cuhva ra tsi ndo. Maa tyin ndoo ndo Jerusalén ihya. Tan ña quita ndo nda cuenda tsa ñihi ndo tunyee iñi Nyoo tsa cua quitsi tsi ndo —catyí ra Jesús.

### Nu cuanuhu ra Jesús gloria

(Mr. 16.19-20)

<sup>50</sup> Tacan tan ra Jesús cuahán ra tsihin tandihī ra tsicā tsihin ra nda ñuu Betania. Tan cañihī ra ndaha ra. Tan nasoco ra tsi ra naha. <sup>51</sup> Tan tsitsi tsa nasoco ra tsi ra naha, nandaā ra andivi. <sup>52</sup> Tacan tan tandihī ra naha quitsahā jacahnú ra naha tsi ra. Tan sii xaan cuñí ra naha, cuanuhu ra naha nda ñuu Jerusalén. <sup>53</sup> Tan tandihī quivi tsiyucū ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuvi tsi tacan ñi.

# Juan

**Tuhun tsa Caahán Nyoo nanduví tsi iin rayíi, tan rayíi can cuví ra Cristo**

**1** Nda quívi jihna ñi, nda ndi cumañi ca coo tandihí tsa iyó, tan tsa iyó maa ra cuví Tuhun tsa Caahán Nyoo. Nyíi ra tsihin Nyoo. Tan Nyoo cuví ra. <sup>2</sup> Tan iyó ra tsihin Nyoo nda quívi jihna ñi. <sup>3</sup> Tan tsihin ra, javahá Nyoo tandihí cuii maa tsa iyó. Tan nduve tsa javahá Nyoo tsa intuhun ñi maa ra. <sup>4</sup> Ra tsa cuví Tuhun tsa Caahán Nyoo iyó ñayivi nyito tsa ña cua naa maa tsi ra. Tan juvin ñayivi can, cuví ñuhú tsa jandunditsín añima nyivi. <sup>5</sup> Tan ñuhú can, jandunditsín tsi nu naa. Tan tsa naa can ña cuví jandahva can ñuhú nditsin can.

<sup>6</sup> Tsiocoq iin ra tsa jaquitsi Nyoo, nañí ra Juan. <sup>7</sup> Quitsi ra cuví ra tsa ndaa. Tyin cahān ra tumañi iñi cuenda ra cuví ñuhú can, tyin tacan tan tsinu iñi tandihí nyivi tsi ra. <sup>8</sup> Ra Juan, ñavin ñuhú can cuví ra. Iin tsa ndaa cuenda ra cuví ñuhú can cuví ra. <sup>9</sup> Tyin ñuhú nditsa can, ndi cua quitsi tsi nu ñuhu ñayivi, tan cua jandunditsín tsi añima tandihí nyivi tsa iyó nu ñuhu ñayivi ihya.

<sup>10</sup> Ra cuví Tuhun tsa Caahán Nyoo quitsi ra nu ñuhu ñayivi. Tan juvin ñi maa ra tsihin Jutu ra javahá ra naha ñuhu ñayivi. Maa tyin nyivi iyó nu ñuhu ñayivi ihya, ña nacotoq ñi tsi ra tsa ra Cristo cuví ra. <sup>11</sup> Quitsi ra nu iyó nyivi ñuu ra, nyivi Israel, tan ña naquihín vaha ñi tsi ra. <sup>12</sup> Maa tyin tandihí nyivi tsa naquihín vaha tsi ra, tan tsinú iñi ñi tyin ra Cristo cuví ra, tsahá ra ndatu tsi ñi tsa cuví ñi sehe Nyoo. <sup>13</sup> Juvin ñi nacacu tsaa. Maa tyin ñavin tumaa tsa cacu ñi tsa culeq ñi cuenda cuñu ñuhu ñi. Tan ndi ñavin tsa cuenda tsa cuñi iin rayíi coo ra tsihin iin ñaha. Ñavin tsa cuenda tsa cuñi nyivi coo sehe ñi. Maa tyin nacacu tsaa ñi jahá maa Nyoo.

<sup>14</sup> Tan ra cuví Tuhun tsa Caahán Nyoo nanduví ra iin rayíi. Tan tsiocoq ra tsihin yo. Tan nyehé ndi tsa cahnu cuví ra. Tan cahnu cuví ra tyin Sehe mañi Jutu Nyoo cuví tsi ra. Tsiu ra tsihin tsa nditsa tan tsa vaha. <sup>15</sup> Tan ra Juan can cahān ra tumañi iñi tsa cuenda ra, tan catyí ra:

—Juvín ra ihya cuví ra tsa cahān yu tuhun quívi can, tyin ra tsa vatsí ityi tsata yu, cahnu ca cuví ra tan ñavin ca maa yu. Tyin nda quívi cacu yu tan tsa iyó maa ra —catyí ra Juan.

<sup>16</sup> Tandihí yo naquihín yo tumañi iñi cahnu tsa tsahá ra tsi yo, tyin nasocó xaan ra tsi yo. <sup>17</sup> Ra Moisés tsahá cuenda ra ley Nyoo tsi yo. Maa tyin ra Jesucristo tsahá ra tsa naquihín yo tsa vaha Nyoo. Tan caahán ra tsa nditsa tsihin yo. <sup>18</sup> Tan nduve maa yóo nyehé tsi Nyoo. Intuhun ñi maa Sehe mañi maa ra tsa iyó iin caa ñi tsi-

hin ra nyehé tsi ra. Juvín ra cuví ra tsa tsahá tsa coto yo tsi Jutu ra.

**Nu caahán ra Juan, ra jacoondutyá, tumañi iñi cuenda ra Jesucristo**

(Mt. 3.11-12; Mr. 1.7-8; Lc. 3.15-17)

<sup>19</sup> Ra cuví ityi nuu tsihin nyivi Israel tsa iyó ñuu Jerusalén, tavá tyiñu ra naha tsi ra jutu naha ra tsihin inga ca ra cuenda vehe ñuhu naha ra, ra cuví tata ra Leví, na cahun ra naha nu nyíi ra Juan tan ndaca tuhun ra naha tsi ra yóo ra cuví ra. <sup>20</sup> Tan tsicā tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua jaquitsi Nyoo cuví yu —catyí ra tan ña tyihí xeehe ra.

<sup>21</sup> Tacan tan tsicā tuhun nyico ra naha tsi ra Juan: —¿Yóo ra cuví un? ¿A ra Elías, ra cuví ndusu yuhu Nyoo tahān tsanaha cuví un? —catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihí ca ra naha tsicā tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quitsi cuví un?

Tan nacahān nyico ra Juan tan catyí ra:

—Ñavin.

<sup>22</sup> Tan tsicā tuhun nyico ra naha tsi ra Juan inga tsaha:

—¿Yóo ra cuví un? Tyin cuñi tsi catyi tuhun ndi tsihin ra tsa tavá tyiñu tsi ndi yóo ra cuví un —catyí ra naha tsihin ra.

<sup>23</sup> Tan nacahān ra Juan:

—Yuhu cuví ndusu iin ra tsa cana tsaá nu tsiquí, tsa catyí: “Nyña ndo tsitsi añima ndo tyin tsa vatsí Jutu Mañi yo.” Tumaa cahān ra Isaías ra cuví ndusu yuhu Nyoo tuhun yu tahān tsanaha —catyí ra Juan tsihin ra naha.

<sup>24</sup> Ra fariseo naha ra cuví ra tavá tyiñu tsi ra can naha ra, na ndaca tuhun ra naha tsi ra Juan. <sup>25</sup> Tan tsicā tuhun nyico ra naha tsi ra:

—Tatun ñavin ra Cristo, ra tsa cua jaquitsi Nyoo cuví un, ¿nacuvi tyin jacoondutyá un tsi nyivi? tan ndi ñavin ra Elías cuví un, tan ndi ñavin ra cuví ndusu yuhu Nyoo cuví un —catyí ra naha tsihin ra Juan.

<sup>26</sup> Tan nacahān ra Juan tan catyí ra:

—Yuhu jacoondutyá yu tsi nyivi tsihin ndutya. Maa tyin mahñu ndo nyíi iin ra tsa ña nacotó ndo. <sup>27</sup> Tan cahnu ca cuví ra can tan ñavin ca yuhu. Ña cahnu cuví yuhu ndi tsa cuví yu musu ra tan cuvi ndatsi yu ñi nditsan ra —catyí ra Juan.

<sup>28</sup> Tandihí yacan cuví nu nañi Betábara tsa canyí inga tsiyo yutya cahnu Jordán nu tsinyí ra Juan jacoondutyá ra.

### Ra Jesucristo, Mbee Ticatyi Luhlu jana Nyoo

<sup>29</sup> Tsa inga quívi nyehé ra Juan tsi ra Jesús cuahán ra nu nyí ra, tacan tan catyí ra Juan:

—Nyehé jihna ndo, ra ihya cuví Mbee Ticatyi Luhlu jana Nyoo ra tsa quihín nyaa cuatyí nyívi iyó nu ñuhu ñayivi ihya. <sup>30</sup> Tuhun ra cahán yu quívi catyí yu tsihin ndo tyin ityi tsata yu vatsí inga ra tsa cahnu ca cuví tan ñavin ca maa yu, tyin tsa iyó maa ra tan tsicoo yu.

<sup>31</sup> Ndi yuhu tan ña nacoto yu tsi ra quívi can. Maa tyin vityin vatsí yu jacoondutyá yu tsihin ndutyá tyin tacan tan nacoto nyívi Israel ñuu yu tsi ra —catyí ra Juan.

<sup>32</sup> Tan catyí nyico ra Juan:

—Yuhu nyehé yu Tatyí Ii Nyoo tsa quítsi ityi andívi tan quítsi tsi tumaa iin paloma, tan ndog tsi tsihin ra.

<sup>33</sup> Yuhu ñaha ca nacoto yu yóo ra cuví ra quívi can. Maa tyin Nyoo, ra tsa tavá tyíñu tsi yu jacoondutyá yu tsi nyívi tsihin ndutyá, catyí ra tsihin yu: “Quívi nyehé un Tatyí Ii, vatsí nuú tsi síqui iin rayí, tan ndoo tsi tsihin ra, juvin ra can cuví ra tsa cua jacoondutyá tsi nyívi tsihin Tatyí Ii yu”, catyí Nyoo tsihin yu. <sup>34</sup> Yuhu tsa yaha nyehé yu tsi ra. Tan cuví yu tsa ndaa tyin juvin ra cuví Sehe Nyoo —catyí ra Juan.

### Ra tsa quítsahá nyicún jihna tsi ra Jesús

<sup>35</sup> Tsa inga quívi nyí nyico ra Juan nu nyí ra tan yucú ndihí uvi taahan ra tsicá tsihin ra. <sup>36</sup> Tan nyehé ra naha, yahá ra Jesús, tan catyí ra Juan:

—Nyehé jihna ndo, ra ican cuví Mbee Ticatyi Luhlu jana Nyoo —catyí ra.

<sup>37</sup> Tsa tsiñi nduvi taahan ra nyicún tsi ra Juan tsa cahán ra, tacan tan cuahan ra naha cuanyicun ra naha tsi ra Jesús. <sup>38</sup> Tacan tan nanyehé ra Jesús ityi tsata ra, tan nyehé ra tyin nyicún ra naha tsi ra, tan catyí ra:

—¿Náa nanducú ndo?

Tacan tan nacahán ra naha tan catyí ra naha:

—Maestro, ¿numaa iyó un?

<sup>39</sup> Tan catyí ra Jesús tsihin ra naha:

—Cohon ndo tsihin yu, tan nyehé ndo —catyí ra tsihin ra naha.

Tacan tan cuahán ra naha tsihin ra. Tan nyehé ra naha nu iyó ra. Tan ican yucu ra naha tan cuaa, tyin tsaá ra naha ndacan tumaa caa cumi tsa tseñi.

<sup>40</sup> Iin ra tsa tsiñi tsa cahán ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro.

<sup>41</sup> Tan ra Andrés numi xaan tsinanducú ra tsi yañi ra, ra Simón Pedro, tan catyí ra tsihin ra:

—Nañihí ndi tsi ra tsa cuví Mesías —catyí ra.

Tan tuhun Mesías can cuñi tsi catyí, ra Cristo, o cuñi tucu tsi catyí, ra tsa nacatsi vaha Nyoo tyin quítsi ra cuví ra rey tsa cuenda yo.

<sup>42</sup> Tacan tan quihín ra Andrés tsi ra Simón yañi ra cuahán tsihin ra nu nyí ra Jesús. Tsa nyehé ra Jesús tsi ra Simón, tan catyí ra tsihin ra:

—Yooho Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñi tsi catyí tsi “Pedro”, tan tsa nduvi sívi can, cuñi tsi catyí tsi “cava”, [tumaa iin yuu cahnu].

### Nu caná ra Jesús tsi ra Felipe tan ra Natanael

<sup>43</sup> Tsa inga quívi tyaá ra Jesús cuhva tsa cuhun ra Galilea. Tacan tan nañihí ra tsi ra Felipe. Tan catyí ra tsihin ra:

—Naha quítsi nyicun un tsi yu —catyí ra.

<sup>44</sup> Ra Felipe ihya, ra ñuu Betsaida cuví ra. Tan ican iyó tucu ra Andrés tan ra Pedro. <sup>45</sup> Tacan tan tsahán ra Felipe tsinanducú ra tsi ra Natanael. Tan catyí ra tsihin ra:

—Nyehé ndi tsi ra tsa tyaá ra Moisés tuhun nu libru ley Nyoo, ra tsa cahán tucu ra cuví ndusu yuhu Nyoo tuhun tahán tsanaha. Tan nañi ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

<sup>46</sup> Tan catyí ra Natanael:

—¿A cuví quita tsa vaha ñuu Nazaret can? —catyí ra tsihin ra Felipe.

Tan nacahán ra Felipe tan catyí ra:

—Naha tan nyehé un —catyí ra.

<sup>47</sup> Tacan tan tsa cua cuyatyin ra Natanael nu nyí ra Jesús. Tan nanyehé ra Jesús tyin vatsí ra, tan quítsahá catyí ra:

—¡Jihna ndo! Ihya vatsí iin ra tsa nditsa nditsa tyin ra ñuu Israel cuví ra, tyin ña tuhvá ra jandaví ñaha —catyí ra Jesús.

<sup>48</sup> Tacan tan tsicá tuhun ra Natanael tsi ra:

—¿Nacaa tsa tsitó un tsi yuhu?

Tan nacahán ra Jesús tan catyí ra:

—Yuhu tsa nyehé maa yu tsi un tsa ndi cumañi ca cana ra Felipe tsi un, tsa ndi nyí un tsaha yutun higo can —catyí ra Jesús tsihin ra.

<sup>49</sup> Tacan tan quítsahá catyí ra Natanael:

—Jutu Mañi yu, yooho cuví Sehe Nyoo. Tan juvin un cuví rey cuenda nyuhu tsa cuví yo nyívi Israel.

<sup>50</sup> Tan catyí ra Jesús tsihin ra Natanael:

—¿A tsinú iñi un tsi yu tsa cuenda tyin catyí yu tyin nyehé yu tsi un tsaha yutun higo? Maa tyin nahnu ca tsa cua nyehé un tan ñavin ca yacan —catyí ra tsihin ra.

<sup>51</sup> Tan catyí ra Jesús tsihin ra naha:

—Tsa nditsa catyí yu tsihin ndo tyin nyooho cua nyehé ndo cua nuña andívi tan cuaha xaan ángel Nyoo cua ndaa, tan cua nuu ra naha síqui yuhu Rayí tsa quee nda gloria —catyí ra Jesús tsihin ra naha.

### Nu iyó vico tindaha ñuu Caná iin ñuu tsa canyí Galilea

**2** Tsa yaha uñi quívi tan tsicoo iin vico tindaha ñuu Caná tsa canyí Galilea. Tan ican nyí síhi ra Jesús.

<sup>2</sup> Tan nyívi javahá vico can caná ndihí ñi tsi ra Jesús tan tsihin tandihí ra tsicá tsihin ra tyin cuhun ra naha.

<sup>3</sup> Tacan tan cuahán ra naha. Tan tsitsi tsa yucú ra naha

nu iyó vico can, tan ndihí vinu ñi javahá vico can. Tacan tan catyí sihi ra Jesús tsihin ra:

—Nduve ca vinu ñi —catyí ña.

<sup>4</sup>Tan catyí ra Jesús tsihin ña:

—¿Náa tsa ndihí iñi yo yacan, Miyan? Tyin ñaha ca tsaa hora yu —catyí ra tsihin ña.

<sup>5</sup>Maa tyin sihi ra cahán ña tsihin ra tsa tyihí mesa nu iyó vico can naha ra:

—Javaha nyooho tandihí tsa cua cahán ra tsihin ndo —catyí ña tsihin ra naha.

<sup>6</sup>Tan nyecú iñu quisi yuu nahnu tsa yihí ndutya tsa tuhvá ra Israel naha ra tsatyíñú nu nacatyá xaan ra naha ndaha ra naha cuhva tsa iyó maa ra naha. Tan intuhun intuhun quisi can tsitahan uvi xico utsi, a uñi xico utsi, litru ndutya tsitsi can. <sup>7</sup>Tacan tan catyí ra Jesús tsihin ra tsa tyihí mesa can naha ra:

—Jacutu ndo quisi ihya tsihin ndutya —catyí ra tsihin ra naha.

Tacan tan tsity cuii quisi can jahá ra naha. <sup>8</sup>Tacan tan catyí ra Jesús tsihin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihya —catyí ra Jesús tsihin ra naha.

Tan tacan icá ra naha. <sup>9</sup>Ra cuví ityi nuu cuenda vico can tsihi ra naha ndutya tsa nanduví vinu. Maa tyin ña tsitó ra naha nu maa quee can. Maa ñi maa ra tsa tyihí mesa can naha ra tsitó, tyin maa ra naha tava ndutya can. Tacan tan ra cuví ityi nuu cuenda vico can caná ra tsi ra tsa tandaha can. <sup>10</sup>Tan catyí ra tsihin ra:

—Tandihí nyivi, jihna ca vinu vaha tuhvá ñi tava. Yaha can tan tatun tsa tsihi xaan nyivi, tacan tan tava ñi vinu ndaahvi. Maa tyin yooho tsicumí vaha un vinu vaha. Tan nda vityin tava un can —catyí ra tsihin ra.

<sup>11</sup>Tsa javahá ra Jesús ñuu Caná tsa canyii Galilea, yacan cuví tsa iyo tsa jihna ñi javahá ra tan janahá ra tsa cahnu cuví ra tsi nyivi. Tan ra tsicá tsihin ra tsinú iñi ra naha tsi ra tyin ra ican cuví ra tsa jaquitsi Nyoo.

<sup>12</sup>Tsa yahá yacan tan cuahán ra ñuu Capernaum tsihin sihi ra tan tsihin yañi ra. Tan cuahan ndihí ra tsicá tsihin ra. Tan ican tsiyucú ñi juhva quivi.

### Nu jacunu ra Jesús tsi nyivi xicó nuquehe yuvehe ñuhu cahnu

(Mt. 21.12-13; Mr. 11.15-18; Lc. 19.45-46)

<sup>13</sup>Tsa cua tahan tsi quivi vico pascua tsa jacahnú nyivi Israel. Yacan cuenda cuahán ra Jesús ñuu Jerusalén. <sup>14</sup>Tsa tsaa ra ñuu can, quihví ra nuquehe vehe ñuhu cahnu, tan nyehe ra yucú cuaha nyivi xicó ñi nuquehe can. Yihí ñi xicó ñi indiqui, mbee ticatyí, tan paloma. Tan yucú ndihí tucu nyivi nasamá xuhun.

<sup>15</sup>Tsa nyehe ra Jesús tandihí yacan, tacan tan javahá ra iin yoho. Tan tsihin yoho can jacunú ra tsi tandihí nyivi nuquehe vehe ñuhu iin cahnu ñi tsihin mbee tan tsihin indiqui jana ñi. Tan ñi nasamá xuhun can, jatucuatyí ra xuhun ñi nu ñuhu tan janduvá ra mesa ñi. <sup>16</sup>Tan catyí ra tsihin ñi xicó paloma:

—¡Tava ndo paloma can ihya! ¡Ña javaha ndo vehe Jutu yu tumaa iin nuyahvi! —catyí ra tsihin ñi.

<sup>17</sup>Tacan tan ra tsicá tsihin ra, nducuhun iñi ra naha tsa catyí nu tutu Nyoo tyehen: “Cuiñu xaan yu vehe un”, catyí tsi, nducuhun iñi ra naha.

<sup>18</sup>Tacan tan ra cuví ityi nuu tsihin nyivi Israel quitsahá tsicá tuhun ra naha tsi ra Jesús:

—¿Náa seña javaha un nyehe ndi tan janaha un tyin nditsa tsa tsahá Nyoo ndatu tsi un tsa javaha un yacan? —catyí ra naha tsihin ra.

<sup>19</sup>Tan nacahán ra Jesús tan catyí ra:

—Cani ndo vehe ñuhu ihya, tan tsitsi tsa uñi quivi ñi tan cua janduvita nyico yu itsi inga tsaha —catyí ra tsihin ra naha.

<sup>20</sup>Tacan tan quitsahá catyí ra nyecú ican naha ra tsihin ra:

—Uvi xico iñu cuiya jahá tyiñu ra naha tan tsinú vehe ñuhu ihya. ¡Tan yooho catyí un tyin tsitsi tsa uñi quivi ñi tan cua janduvita un itsi inga tsaha! —catyí ra naha tsihin ra.

<sup>21</sup>Maa tyin ñavin tuhun vehe ñuhu can cahán ra Jesús, tyin cahán ra tuhun cuñu ñuhu ra. <sup>22</sup>Yacan cuenda tandihí ra tsicá tsihin ra nducuhun iñi ra naha yacan quivi nandoto ra. Tan cutuñi iñi ra naha tyin tuhun tsa nyaá nuu tutu Nyoo caahán tsi cuenda ra Jesús. Tan tsinú iñi ra naha tsa cahán ra Jesús tan tsa nyaá nu tutu Nyoo.

### Ra Jesús tsitó ra tsa iyó aña nyivi

<sup>23</sup>Tsitsi tsa ndi nyii ra Jesús ñuu Jerusalén, quivi iyó vico pascua, cuaha xaan nyivi quitsahá tsinú iñi tsa caahán ra tsa cuenda tsa cuaha tsa iyo javahá ra.

<sup>24</sup>Maa tyin ra Jesús ña ñi cuñi ra nyehé ra tsi tandihí ñi tyin tsitó ra cuhva tsicá iñi ñi. <sup>25</sup>Ña tsiñiñuhú tsa nacatyí tuhun yo tsihin ra nácaa iyó nyivi, tyin tsa tsitó maa ra náa iyó tsitsi aña nyivi.

### Nu jacuahá ra Jesús tsi ra Nicodemo

**3** Tsicoo iin ra cuví fariseo tsa nañi Nicodemo. Tan cuví ra iin ra cuví ityi nuu tsihin ra Israel naha ra.

<sup>2</sup>Ra Nicodemo ihya, tsahán ra nu nyii ra Jesús iin tsacuaa. Tan catyí ra tsihin ra:

—Maestro, tsitó ndi tyin Nyoo tava tyiñu tsi un tsa quitsi un jacuaha un tsi ndi. Tyin yoñi nyivi tan cuví javaha ñi tsa iyo tsa javahá un, tatun nduve Nyoo iyó tsihin ñi —catyí ra tsihin ra Jesús.

<sup>3</sup>Tacan tan catyí ra Jesús tsihin ra:

—Tsa nditsa catyí yu tsihin un tyin tatun ña cua nacacu tsaa nyivi inga tsaha, ña cua cuví nyehe ñi nu ndacá ñaha Nyoo —catyí ra.

<sup>4</sup>Tacan tan tsicá tuhun ra Nicodemo tsi ra Jesús tan catyí ra tsihin ra:

—¿Nacaa cuví cacu iin rayi inga tsaha tatun tsa tsahnu ra? ¿A cuví quihví nyico ra tsitsi sihi ra tan nacacu tsaa ra inga tsaha? —catyí ra.

<sup>5</sup>Nacahán ra Jesús tan catyí ra:

—Tsa nditsa catyí yu tsihin un tyin ñavin tsihin tsa cacu nyivi tsihin cuñu ñuhu ñi tan cuví quihví ñi nu ndacá ñaha Nyoo. Maa tyin ñiñi xaan cuñi tsi nacacu

tsaa ñi tsihin Tatyí Ii Nyoo. <sup>6</sup> Tyin nyívi cacú tsihin cuñu ñuhu, cuñu ñuhu ñi cuví ñi. Tan nyívi nacacú tsaa tsihin Tatyí Ii Nyoo, Tatyí Ii Nyoo iyó aña ñi. <sup>7</sup> Ña cu iyo iñi un tsa caahán yu tsehe tsihin un tyin tandihí nyívi cuñí tsi nacacú tsaa ñi. <sup>8</sup> Tumaa tsa yihí tatyí tandihí ñi ityi tan tsiñí un cucayú vatsí tsi, maa tyin ña tsitó un numaa ityi quee tsi, tan ndáa ityi cuahán tsi; tacan cuví tandihí nyívi nacacú tsaa tsihin Tatyí Ii Nyoo —catyí ra Jesús tsihin ra.

<sup>9</sup> Tacan tan nducú tuhun nyico ra Nicodemo tsi ra inga tsaha tan catyí ra:

—¿Nacuenta caahán un tacan? —catyí ra tsihin ra.

<sup>10</sup> Nacahan ra Jesús tan catyí ra:

—Yooho tsa cuví un maestro cuenda nyívi Israel, taahán tsi coto un tsehe. <sup>11</sup> Tsa nditsa catyí yu tsihin un tyin caahán ndi tsa tsitó ndi tan cuví ndi tsa ndaa tsa cuenda tsa nyehé ndi. Maa tyin nyooho ña tsinú iñi ndo tsa caahán ndi tsihin ndo. <sup>12</sup> Tatun ña tsinú iñi ndo tsa caahán yu tuhun nu ñuhu ñayívi ihya tsihin ndo, ¿nácaa cua tsinu iñi ndo tatun cua cahan yu tuhun gloria tsihin ndo?

<sup>13</sup> Yoñi tsahan gloria tsinyehé nácaa iyó. Intuhun ñi maa yuhu Rayí tsa quee nda gloria nyehé yu nácaa iyó gloria, tyin ndacan quee yu. <sup>14</sup> Tumaa tsa ticaa ra Moisés iin coo tsa tsinú tsihin caa nu yutun iin nu tsiquí, tacan cua ticaa nyívi tsi yuhu Rayí tsa quee nda gloria nuu cruu. <sup>15</sup> Tacan tan tandihí nyívi tsa tsinú iñi tsi yu, ña cua cunaa ñi. Tan cua coo ñi ñayívi nyito tsa ña cua naa maa.

#### Nyoo cuñí xaan ra tsi tandihí nyívi

<sup>16</sup> Nyoo cuñí xaan ra tsi tandihí nyívi iyó nu ñuhu ñayívi. Yacan cuenda tsahá ra tsa cúu Sehe mañi ra nu cruu tsa cuenda ñi. Tyin tacan tan tandihí ñi tsa tsinú iñi tsi Sehe ra, ña cunaa ñi, tan coo ñi ñayívi nyito tsa ña cua naa maa. <sup>17</sup> Tyin Nyoo jaquitsi ra tsi Sehe ra nu ñuhu ñayívi tyin jacacu ra tsi nyívi, tan ña jaquitsi ra tsi ra tsa jacunaa ra tsi ñi.

<sup>18</sup> Yacan cuenda nyívi tsa tsinú iñi tsi yu tsa cuví yu Sehe Nyoo ña cua cunaa ñi, maa tyin nyívi tsa ña tsinú iñi tsi yu, tsa cunaá ñi tyin ña tsinú iñi ñi tsi yu tsa cuví yu Sehe mañi Nyoo. <sup>19</sup> Nyívi ña tsinú iñi, tsa cunaá ñi. Tyin quívi quítsi yu jandunditsin yu nu ñuhu ñayívi, ña naquihín cuenda ñi tsi yu tyin taahán xaan ca maa iñi maa ñi iyó ñi nu naa tyin maa ñi tsa ña vaha javahá ñi. <sup>20</sup> Tandihí nyívi javahá tsa ña vaha, ña taahán iñi ñi coo ñi nu nditsin, tyin ña cuñí ñi tsa quituvi tsa ña vaha javahá ñi. <sup>21</sup> Maa tyin nyívi taahán iñi tsa nditsa, naquitá ñi nu nditsin tyin tacan tan nyehe nyívi tyin javahá ñi cuhva cuñí Nyoo tyin nyaá ra tsihin ñi —catyí ra Jesús.

#### Nu caahán ra Juan, ra jacoondutyá tsi nyívi, tuhun ra Jesús inga tsaha

<sup>22</sup> Tsa yahá yacan, ra Jesús tan ra tsicá tsihin ra cuahán ra naha nu cuví Judea. Tan ndoq ra naha ican juhva quívi, tyin jacoondutyá ra naha tsi nyívi. <sup>23</sup> Tacan

tucu ra Juan nyívi ra jacoondutyá ra tsi nyívi nu cuví Enón yatyin ñi nu cuví Salim, tyin ican ñuhú cuaha ndutyá. Tan tsaá nyívi tan tsicoondutyá ñi. <sup>24</sup> Yacan javahá ra Juan tsa ndi cumañi ca quihvi ra vehe caa.

<sup>25</sup> Tacan tan quítsahá caahán yuhu tahan juhva ra tsicá tsihin ra Juan tsihin inga ca ra naha tsa cuenda tsa janduvaha nyívi tsi ñi nuu Nyoo. <sup>26</sup> Tacan tan cuahán ra naha nu nyívi ra Juan. Tan catyí ra naha tsihin ra:

—Maestro, ra tsa tsinyí tsihin un inga tsiyo yutya cahnu Jordán, ra tsa cahan un tuhun tsihin ndi, vityin jacoondutyá ndihí ra tsi nyívi tan tandihí nyívi nyicún tsi ra —catyí ra naha tsihin ra.

<sup>27</sup> Tacan tan catyí ra Juan tsihin ra naha:

—Ndi intuhun yo tan nduve náa cuví javaha yo, tun tsatyin ña tsahá Nyoo tunyee iñi ra tsi yo. <sup>28</sup> Nyooho tsa tsitó maa ndo tyin ñavin yuhu cuví ra Cristo tyin tsiñí maa ndo tsa cahan yu quívi catyí catsi yu tyin ra jaquitsi Nyoo ityi nuu ra Cristo cuví yu. <sup>29</sup> Tyin nu iyó víco tandaha, ra tsa nyaá xiin ñaha yoco can, juven ra cuví ra cua tindaha tsihin ña. Tan ra vaha iñi tsi ra nyívi ra ican. Tan cusí iñi ra tsiñí ra tsa caahán ra tsa cua tindaha. Tan tacan tucu yuhu, sií cuñí yu tyin naquihín nyívi tuhun caahán ra Jesús tan nyicún ñi tsi ra. <sup>30</sup> Maa ra cuví ra cahnu ca cuví. Tan yuhu cua nduluhlu yu nuu ra tyin tacan taahán maa tsi.

#### Ra quee nda gloria tan quítsi ra nu ñuhu ñayívi

<sup>31</sup> Ra tsa quee nda gloria, cahnu ca cuví ra tan ñavin ca tandihí nyívi. Tyin nyívi iyó nu ñuhu ñayívi ihya, cuenda nu ñuhu ñayívi cuví ñi. Tan caahán ñi tuhun tsa iyó nu ñuhu ñayívi. Maa tyin ra tsa quee nda gloria, cahnu cuví ra. <sup>32</sup> Tan caahán ra tsa nyehé ra tan tsa tsiñí ra, maa tyin yoñi tsinú iñi tsa caahán ra. <sup>33</sup> Tatun yoo tan tsinú iñi yo tsa caahán ra, cua cuví yo tsa ndaa tyin Nyoo ña vatya ra. <sup>34</sup> Tyin ra tsa jaquitsi Nyoo, tuhun Nyoo caahán ra tyin Nyoo ña tyihí cuhva ra Tatyí Ii ra tan tsahá ra itsi tsi ra. Tsahá ra nanií Tatyí Ii ra tsi ra. <sup>35</sup> Nyoo Jutu yo cuñí ra tsi Sehe ra. Tan nacuhvá cuenda ra tandihí maa tsi ra. <sup>36</sup> Nyívi tsa tsinú iñi tsa caahán Sehe Nyoo, iyó ñi ñayívi nyito tsa ña cua naa maa. Maa tyin nyívi tsa ña cuñí tsinu iñi tsi ra, ña cua coo ñi ñayívi nyito. Tan cua tatsi tuñi Nyoo tsi ñi.

#### Nu natuhun ra Jesús tsihin iin ñaha Samaria

**4** Tsa tsitó ra cuví fariseo naha ra tyin cuaha xaan ca nyívi nyicún tsi ra Jesús tan ñavin ca ra Juan. Tan cuaha xaan ñi tsicoondutyá. <sup>2</sup> Maa tyin ñavin maa ra Jesús jacoondutyá tsi ñi, tyin ra tsicá tsihin ra jacoondutyá tsi ñi. <sup>3</sup> Tan quívi tsa tsitó ra Jesús tyin tsitó ra naha yacan, quee ra Judea can tan cuanuhú ra nda nu cuví Galilea.

<sup>4</sup> Tsa cuahán ra, yaha ra nu cuví Samaria tyin cuñí tsi yaha ra ican. <sup>5</sup> Tacan tan tsaá ra iin ñuu tsa canyíi Samaria tsa nañí Sicar yatyin ñi nu cuví ñuhu ra Jacob nu tsahá ra tsi ra José sehe ra. <sup>6</sup> Ican nyaá iin soco pila tsa catyí nyívi tyin tsii ra Jacob cuví. Tsa quitá ra Jesús

nu nyaá soco can tan tsinyaꝯ ra yuhu soco can tyin tatu xaan ra tyin cañi xaan ityi tsicá ra tan maa hora cuví. <sup>7</sup> Ra tsicá tsihin ra, yoñi ra naha nyecú tsihin ra tyin cuahán ra naha tsitsi ñuu, cua jata ra naha tsa catsi ra naha. Juvín ñi cuhva can tan tsaꝯ iin ñaha Samaria tyin cua tava ña ndutya tsitsi soco can. Tacan tan catyí ra Jesús tsihin ña:

—Cuhva luxu ndutya coho yu —catyí ra tsihin ña.

<sup>9</sup> Tacan tan ñaha Samaria can catyí ña tsihin ra:

—Yooho tsa cuví un iin ra ñuu Israel, ¿nacuvi tyin tsicán un ndutya coho un tsi yuhu tsa cuví yu ñaha Samaria? —catyí ña.

(Tacan catyí ña tyin nyivi Israel ña vaha iyó ñi tsihin nyivi Samaria.) <sup>10</sup> Tacan tan nacahan ra Jesús tan catyí ra:

—Tun tsatyin tsitó un tsa tsahá Nyoo, tan tsitó un yóo ra cuví ra tsicán ndutya tsi un, maa un cua ndacan ndutya tsi yu. Tan cua cuhva yu ndutya nyito tsi un —catyí ra tsihin ña.

<sup>11</sup> Tacan tan catyí ña tsihin ra:

—Tatta, cunu xaan soco ihya. ¿Nacaa tava tucu un ndutya cuhva un tsi yu? tan ndi nduve náa ndaha un ¿Nu maa cua quihin un ndutya nyito can cuhva un coho yu? <sup>12</sup> Ra Jacob tsii tsahnu yo, nacoꝯ ra soco ihya tsi ndi. Juvín ihya tsihi maa ra ndutya tan tsihin tandihi se he ra. Tan juvín ñi ihya tsihi tucu quití jana ra naha. ¿A cahnú ca ra cuví yooho tan ñavin ca ra can? —catyí ña tsihin ra.

<sup>13</sup> Tacan tan nacahan ra Jesús tan catyí ra tsihin ña:

—Tandihí nyivi tsihi ndutya ihya, cua na ityi nyico iñi ñi. <sup>14</sup> Maa tyin nyivi tsihi ndutya tsa tsahá yuhu, ña cua na ityi ca iñi ñi. Tyin ndutya tsa tsahá yuhu cua cana tsi tsitsi añima ñi tumaa caná ndutya iin ndohyo, tyin iin ndohyo ña tuhvá tsi ndoco. Tan tacan cua coo ñi ñayivi nyito —catyí ra tsihin ña.

<sup>15</sup> Tacan tan quitsahꝯ caahán ña tsihin ra:

—Yooho tatta, cuhva ndutya can coho yu na ña na ityi ca iñi yu, tan ndi ña quitsi ca yu quitsi tava yu ndutya tsitsi soco ihya —catyí ña tsihin ra.

<sup>16</sup> Tacan tan catyí ra Jesús tsihin ña:

—Cuaahan cua quihin yii un tan quitsi ndo —catyí ra tsihin ña.

<sup>17</sup> Tan nacahan ña tan catyí ña:

—Nduve yii yu iyó.

Tacan tan catyí ra Jesús tsihin ña:

—Nditsa tsa caahán un, tyin nduve yii un iyó. <sup>18</sup> Tyin tsa uhun yii un tsicoꝯ, tan ra cumí tsi un vityin ñavin yii un tsi ra. —catyí ra tsihin ña.

<sup>19</sup> Tsa tsiñi ña tsa cahan ra tacan, quitsahꝯ catyí ña tsihin ra:

—Yooho tatta, tuví iñi yu tyin ra cuví ndusu yuhu Nyoo cuví un. <sup>20</sup> Tsii tsahnu ndi, ra ñuu ihya naha ra, jacahnú ra naha tsi Nyoo yucu ihya. Maa tyin nyooho tsa cuví nyivi Israel catyí ndo tyin nda Jerusalén taahán tsi jacahnú yo tsi Nyoo —catyí ña tsihin ra.

<sup>21</sup> Tacan tan nacahan ra Jesús tan catyí ra tsihin ña:

—Tsiñu iñi tsa caahán yu tsihin un. Tyin vatsí hora tsa cua jacahnú ndo tsi Jutu yo Nyoo. Maa tyin ña

tsiñiñuhú ca tsa quitsi ndo yucu ihya, a cuhun ndo nda Jerusalén. <sup>22</sup> Nyooho nyivi Samaria, ña tsitó ndo yóo jacahnú ndo. Maa tyin nyuhu tsitó ndi yóo jacahnú ndi. Tan tsitó ndi tyin cua jacacu iin ra Israel tsi nyivi jaha Nyoo. <sup>23</sup> Maa tyin cua tsa hora, tan hora can iyó yo vi-tyin tyin nyivi tsa nditsa jacahnú tsi Nyoo Jutu yo, cua jacahnú ñi tsi ra tsihin añima ñi tan tsihin tsa nditsa. Tumaa jaquihín ityi maa Tatyí Ii Nyoo tsi ñi. Tyin Nyoo Jutu yo tacan cuñi ra javaha ñi tsa jacahnú tsi ra. <sup>24</sup> Tyin Nyoo Tatyí Ii cuví ra. Tan nyivi jacahnú tsi ra cuñi tsi jacahnú ñi tsi ra tsihin tsa nditsa tumaa jaquihín ityi maa Tatyí Ii tsi ñi —catyí ra tsihin ña.

<sup>25</sup> Tan nacahan ña tan catyí ña tsihin ra:

—Yuhu tsitó yu tyin cua quitsi ra cuví Mesías, ra Cristo, ra cuví rey tsi yo. Tan quivi quitsi ra, maa ra cua nacatyí tuhun tandihí tsihin yo —catyí ña tsihin ra.

<sup>26</sup> Tacan tan nacahan ra Jesús tan catyí ra tsihin ña:

—Ra tsa caahán un tuhun can, juvín ra caahán tsihin un —catyí ra tsihin ña.

<sup>27</sup> Tacan tan tsaꝯ nyico ra tsicá tsihin ra, tan iyo xaan cuñi ra naha tyin natuhún ra Jesús tsihin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñi ra, o ndaca tuhun ra naha tsi ra nacuenta natuhún ra tsihin ñaha can. <sup>28</sup> Tacan tan nacoꝯ ña quiyi ña tan cuanuhu ña nda ñuu. Tan catyí ña tsihin nyivi:

<sup>29</sup> —Cohon ndo cunyehe ndo tsi iin ra tsa cahan tandihí cuhva iyó yu. ¿A ñavin ra Cristo tsa cua jaquitsi Nyoo cuví ra? —catyí ña tsihin ñi.

<sup>30</sup> Tacan tan quitꝯ nyivi ñuu can tan cuahán ñi cua nyehe ñi nu nyii ra Jesús. <sup>31</sup> Tan tsa ndi cumañi ca tsa ñi nu nyii ra, ra tsicá tsihin ra, jañiñi ra naha tsi ra na catsi ra luxu. Tan catyí ra naha tsihin ra:

—Maestro, catsi luxu —catyí ra naha.

<sup>32</sup> Maa tyin catyí ra Jesús tsihin ra naha:

—Yuhu iyó iin tsa tsatsí yu tan nyooho ña tsitó ndo náa cuví can —catyí ra tsihin ra naha.

<sup>33</sup> Tacan tan ra tsicá tsihin ra, quitsahꝯ natuhún tahan ra naha, tan catyí ra naha:

—¿A iyó yóo quitsi quitsi ndaca tsa catsi ra? —catyí ra naha.

<sup>34</sup> Maa tyin ra Jesús catyí ra tsihin ra naha:

—Tsa tsatsí yuhu juvín tsi cuví tsa javahá yu cuhva cuñi ra tsa jaquitsi tsi yu, tan javahá yu tyiñu tsahꝯ ra tsi yu. <sup>35</sup> Nyooho catyí ndo: “Ndi cumañi cumi yoo ca tan tahan tsi naquihin vaha yo tsa tatsi yo.” Maa tyin yuhu catyí yu tsihin ndo: Nyehhe ndo tyin tsa ndihí tsa tatsi ndo cuaan tan tsa nyecú vaha tsi tsa cua naquihin vaha yo itsi. <sup>36</sup> Ra tsa naquihín vaha can ñihí ra yahvi ra. Tan tsa naquihín vaha ra, cuví tsi nyivi tsa cua coo ñayivi nyito tsa ña cua naa maa. Tacan tan ra tsa tatsi tan ra tsa naquihín cusii iñi ra naha. <sup>37</sup> Tan iyó iin cuhva tuhvá nyivi caahán tan catyí ñi tyin siin nyivi tatsi tan siin nyivi naquihín vaha. Tan nditsa yacan. <sup>38</sup> Yuhu jacahnú yu tsi ndo tyin cua cahnú ndo niñi tsa iyó nu ña jahꝯ tyiñu ndo, nu jahꝯ tyiñu inga ra. Tan nyooho cucahnú ndo tan cua naquihin vaha ndo niñi can —catyí ra Jesús tsihin ra naha.

<sup>39</sup> Tan cuaha xaan nyivi ñuu Samaria can quitsahā tsinú iñi ñi tsi ra Jesús tsa cuenda tsa cahān ñaha can, tyin catyí ña: “Cahān ra tsihin yu tandihí cuhva iyó yu”, catyí ña. <sup>40</sup> Cuhva tsa tsaā ñi nu nyí ra Jesús, tan cahān ndaahvi ñi tsihin ra na ndoo ra tsihin ñi. Tan ndoo ra tsihin ñi uvi quivi. <sup>41</sup> Tan cuaha ca nyivi quitsahā tsinú iñi ñi tsa tsiñi ñi tsa caahán ra. <sup>42</sup> Tacan tan quitsahā catyí ñi tsihin ñaha can:

—Vityin tsinú iñi ndi, maa tyin ñavin tsa cuenda tsa cahān un tsihin ndi, tyin tsiñi maa ndi tsihin soho ndi tsa caahán ra, tan tsitó vaha ndi tyin juven ra cuví ra Cristo ra jacacú tsi nyivi iyó nu ñuhu ñayivi ihya —catyí ñi.

### Nu janduvahā ra Jesús sehe iin ra cumí tyiñu

<sup>43</sup> Tsa yahā uvi quivi tan quee ra Jesús nu cuví Samaria tan cuahán ra ityi nu cuví Galilea, nu cacú ra. <sup>44</sup> Vasu ndi maa juven ñi maa ra cahān tyin iin ra cuví ndusu yuhu Nyoo, nyivi ñuu ra ña jahá ñi tsa ñayivi tsi ra. <sup>45</sup> Tacan tan tsa tsaā ra Galilea, nyivi iyó ican, vaha caahán ñi tsihin ra, tyin tsahān ñi vico Jerusalén, tan nyehe ñi tsa vaha tsa javahā ra.

<sup>46</sup> Tacan tan cuanuhu nyico ra Jesús nda ñuu Caná tsa canyí Galilea nu nanduví ndutya vinu jahā ra. Tan iyó iin ra nyisó tyiñu cahnu nuu rey. Ra ican iyó iin sehe ra tsa cuuhví nda ñuu Capernaum. <sup>47</sup> Quivi tsa tsitó ra can tyin tsa tsaā nyico ra Jesús nda Galilea tsa tsahān ra nda Judea, tsahān ra tsinyehe ra tsi ra Jesús. Tan tsičan ra tumañi iñi tsi ra na cahun ra vehe ra tan janduvaha ra tsi sehe ra, tyin tsa cuñí cúu cuii ña sehe ra.

<sup>48</sup> Tacan tan catyí ra Jesús tsihin ra:

—Nyooho ña cua tsinu iñi ndo tatun ña nyehe jihna ndo tsa iyo —catyí ra tsihin ra.

<sup>49</sup> Maa tyin ra can catyí ra tsihin ra Jesús:

—Yooho taa, çohon ñi tsihin yu tsa ndi cumañi ca cúu sehe yu —catyí ra tsihin ra Jesús.

<sup>50</sup> Tacan tan catyí ra Jesús tsihin ra:

—Cuanuhu yuvehe un. Sehe un nyito ra, tsa nduvahā ra —catyí ra tsihin ra.

Tacan tan ra can tsinu iñi ra tsa cahān ra Jesús tan cuanuhu ra. <sup>51</sup> Tsa tsa cuyatyin ra yuvehe ra, quitā musu ra tan caahán ra naha tsihin ra:

—¡Taa, sehe un nyito ra; tsa nduvahā ra!

<sup>52</sup> Tacan tan quitsahā tsicā tuhun ra tsi ra naha náa hora quitsahā vaha cuñí ra. Tan catyí ra naha tsihin ra:

—Ícu cuhva caa iin tsa yahā hora quitā cahñi tsi ra —catyí ra naha.

<sup>53</sup> Tacan tan tsitó ra can, tyin hora can cahān ra Jesús tsihin ra, “Cuanuhu tyin sehe un nyito ra, tsa nduvahā ra.” Tan maa ra can tsihin tandihí nyivi ra quitsahā tsinú iñi ñi tsi ra Jesús.

<sup>54</sup> Yacan cuví tsa iyo tsa tsinu uvi javahā ra Jesús tsa tsaā nyico ra Galilea tsa yaha tsahān ra Judea.

### Nu janduvahā ra Jesús iin ra cuuhví

**5** Tsa yahā can tan cuahán ra Jesús ñuu Jerusalén inga tsaha tyin nyivi ñuu Israel jacahnú ñi iin vico.

<sup>2</sup> Tan yuhu cora cahnu ñuu can iyó iin yuvehe tsa nañi Yuvehe Cuenda Mbee Ticatyi. Tan yatyin ñi nyaá iin vehe cahnu. Tan tsitsi vehe can ñuhú ndutya. Tan tsa tsihin yuhu hebreo nañi vehe can Betesda. Tan iyó uhun corredor. <sup>3</sup> Tan ican yucú cuaha nyivi cuuhví: ñi cuaa, ñi coxo, tan ñi ndohó cuehe xii. Ndatú ñi náa hora nacanda ndutya can. <sup>4</sup> Tyin nda naha nda naha ñi tan nuú iin ángel tan jacandá ra ndutya can. Tan nyivi tsa quihví jihna tsa yahā ñi nacandá ndutya can, nduvahá ñi vasu ndi maa cuehe cahnu ndohó ñi. <sup>5</sup> Tan ican canyí iin ra cuuhví tan tsa iyó oco tsahun uñi cuiya cuuhví ra. <sup>6</sup> Tsa nyehe ra Jesús tsi ra ican canyí ra, tuví iñi ra tyin tsa cuaha xaan cuiya cuuhví ra. Tan tsicā tuhun ra tsi ra ndaahvi can, tan catyí ra:

—¿A cuñí un nduvaha un?

<sup>7</sup> Tan ra cuuhví can nacahān ra tan catyí ra:

—Tata, yoñi maa tyihí tsi yu tsitsi ndutya ihya tatun tsa nacandá tsi. Tyin tahán ñi tsaha tsa cuñí yu quihví yu, inga nyivi quihví jihna —catyí ra cuuhví can tsihin ra Jesús.

<sup>8</sup> Tacan tan catyí ra Jesús tsihin ra:

—Nduvita, naquihin yuvi un tan çaca un —catyí ra tsihin ra.

<sup>9</sup> Juvin ñi hora can tan nduvahā ra, naquihin ra yuvi ra, tan nacacā ra. Maa tyin quivi quitatú nyivi cuví quivi can. <sup>10</sup> Yacan ra cuví ityi nuu tsihin nyivi Israel catyí ra naha tsihin ra tsa nduvahā can:

—Quivi quitatú yo cuví vityin, yacan cuenda ña taahán tsi cuiso un yuvi un —catyí ra naha tsihin ra.

<sup>11</sup> Tan ra tsa nduvahā can nacahān ra tan catyí ra:

—Ra tsa janduvahā tsi yu, catyí ra tsihin yu: “Naquihin yuvi un tan çaca un”, catyí ra tsihin yu.

<sup>12</sup> Tacan tan quitsahā tsicá tuhun ra naha tsi ra, tan catyí ra naha:

—¿Yoo ra cahān tsihin un tyin naquihin un yuvi un tan caca un? —catyí ra naha.

<sup>13</sup> Maa tyin ra tsa nduvahā can ña tsitó ra yoo janduvahā tsi ra. Tyin cuaha xaan nyivi nyecú ican, tan ra Jesús nduve ca ra nyaá tyin tsa cuahán ra. <sup>14</sup> Yahā can tan nañihí ra Jesús tsi ra tsa nduvahā can tsitsi vehe ñuhu cahnu, tan catyí ra tsihin ra:

—Jihna, vityin tsa nduvahā un, ña javaha ca un tsa ña vaha, tyin coto quitsi inga tundoho cahnu ca siqui un —catyí ra tsihin ra.

<sup>15</sup> Tacan tan tsahān ra tsicahān ra tsihin ra Israel naha ra tyin ra Jesús cuví ra janduvahā tsi ra. <sup>16</sup> Tsa cuenda tsa janduvahā ra Jesús tsi ra can quivi quitatú nyivi, xaan xaan cuñí ra Israel naha ra nyehe ra naha tsi ra. Tan cuñí ra naha cahñi ra naha tsi ra. <sup>17</sup> Maa tyin ra Jesús catyí ra tsihin ra naha:

—Maa Jutu yu, nda vityin tan jahá tyiñu ra. Tan jahá tyiñu tucu yuhu —catyí ra.

<sup>18</sup> Tan tsa cuenda tsa cahān ra yacan, xaan ca cuñí ra Israel can naha ra. Tan ñihi ca cuñí ra naha cahñi ra naha tsi ra tyin cuñí maa ra naha tyin ña jahá ra Jesús tsa cahnu cuví quivi quitatú nyivi, tan inga tucu tuhun, iin ñi cuví ra tsihin Nyoo jahá ra tsi ra tyin catyí ra tyin jutu ra cuví tsi Nyoo.



### Sehe Nyoo iyó xaan ndatu tsi ra cundaca ñaha ra

<sup>19</sup> Tacan tan catyí ra Jesús tsihin ra naha:

—Tsa nditsa caahán yu tsihin ndo tyin yuhu, Sehe Nyoo cuví tsi yu, tan nduve tsa javahá yu tsa maa ñi maa yu. Tyin javahá yu tsa nyehé yu javahá Jutu yu. Tandihí tsa javahá Jutu yu tan javahá tucu maa yu. <sup>20</sup> Tyin cuñí xaan ra tsi yu, tyin Sehe ra cuví tsi yu, tsa cuenda yacan janahá ra tandihí tsa javahá ra tsi yu. Tan nahnu ca tsa cua janaha ra tsi yu, tan nyooho iyo cua cuñi ndo nyehe ndo can. <sup>21</sup> Tumaa janandotó Nyoo Jutu yu ndiyí, tan tsahá ra ñayivi coo ñi, tacan tucu yuhu tsa cuví yu Sehe ra, tsahá yu ñayivi coo nyivi cuñí maa yu cuhva yu. <sup>22</sup> Tacan Nyoo Jutu yu, ña jandaa ca ra cuatyí ndi intuhun nyivi tyin tsa tsahá ra ndatu tsi yuhu tsa cuví yu Sehe ra tyin jandaa yu cuatyí nyivi. <sup>23</sup> Tacan icá Nyoo Jutu yu tsa cuñí ra jacahnu nyivi tsi Sehe ra tumaa tsa jacahnú maa ñi tsi maa ra. Nyivi tsa ña jacahnú tsi yuhu tsa cuví yu Sehe Nyoo, ndi Jutu yu tan ña jacahnú ñi. Tyin maa ra jaquitsí tsi yu.

<sup>24</sup> Tan tsa nditsa caahán yu tyin nyivi tyaá soho tsa caahán yu tan tsinú iñi ñi tsi ra tsa jaquitsí tsi yu, iyó ñi ñayivi nyito tsa ña cua naa maa. Tan ña cua cuhun ca ñi anyaya tsa catyí cuatyí ñi tyin tsa jacacy Nyoo tsi ñi tan ña yihí ndaha ca tuhun tsihí tsi ñi, tan tsahá ra ñayivi nyito iyó ñi. <sup>25</sup> Nyivi; tumaa ndiyí cuví ñi. Tan tsa nditsa caahán yu tsihin ndo tyin vatsí quivi cua cuñi ñi ndusu Sehe Nyoo. Tan nyivi tsa cua tyaá yahvi tsa caahán ra, cua coo ñi ñayivi nyito tsa ña cua naa maa. Tan vityin cuví quivi tsa caahán yu tuhun. <sup>26</sup> Tyin Nyoo Jutu yu iyó ra ñayivi nyito tsa ña cua naa maa. Tan tsahá ra ndatu can tsi yuhu tsa cuví yu Sehe ra tyin cuhva yu ñayivi can coo nyivi. <sup>27</sup> Tan tsahá tucu Nyoo ndatu tsi yu tsa jandaa yu cuatyí nyivi, tyin Rayíí quee nda gloria cuví yu. <sup>28</sup> Ña iyo cuñi ndo tsa caahán yu tyehen, tyin cua tsaá quivi tsa cuñi ndiyí yucú tsitsi ñaña ndusu Sehe Nyoo. <sup>29</sup> Tan cua quita ñi tsitsi ñaña ñi. Tacan tan nyivi tsa javahá tsa vaha cua nandoto ñi tyin coo ñi ñayivi nyitó. Maa tyin nyivi tsa javahá tsa ña vaha cua nandoto ñi tyin cuhun ñi anyaya nu cua tatsi tuñi Nyoo tsi ñi.

### Nu janahá tsi tyin ra Jesús iyó ndatu tsi ra tsa cuhva ra ñayivi nyito coo nyivi

<sup>30</sup> Yuhu ña cuví javaha yu tsa javahá yu tsa intuhun ñi maa yu. Yuhu jandaá yu cuatyí nyivi tumaa cuhva tavá tyiñu maa Jutu yu tsi yu. Tan cuhva jandaa yu cuatyí, vaha tsi, tyin ña javahá yu cuhva cuñí maa yu, tyin javahá yu cuhva caahán maa Jutu yu, ra tsa jaquitsí tsi yu. <sup>31</sup> Tan tatun juvin ñi maa yu cuví tsa ndaa tsa cuenda yu, nduve yahvi nyaá tsa ndaa can. <sup>32</sup> Maa tyin iyó inga ra cuví tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuví tsa ndaa tan tsa nditsa. <sup>33</sup> Nyooho tavá tyiñu ndo na ndaca tuhun ra naha tsi ra Juan. Tan tuhun tsa cahán ra, tsa nditsa cuví tsi. <sup>34</sup> Maa tyin yuhu ña tsiñiñuhú tsa cuví rayíí tsa ndaa tsa cuenda yu. Maa tyin caahán yu tuhun tsa cahán ra

Juan tsihin ndo tsa cuenda tsa vaha tsi maa ndo, tyin tacan tan tsinu iñi ndo tsi yu tan cacu ndo. <sup>35</sup> Ra Juan cuví ra tumaa iin lámpara tsa cayú tan jandunditsín tsi. Tan nyooho juhva ñi quivi cusí iñi ndo tsihin ñuhu nditsin can. <sup>36</sup> Maa tyin yuhu iyó iin tsa ndaa vaha ca tsi yu tan ñavin ca tsa caahán ra Juan. Tyin tandihí tsa javahá yuhu, maa Jutu yu catyí tsihin yu na javaha yu can. Tan yacan cuví tsa ndaa tsa nyehé ndo tyin nditsa tyin maa Jutu yu jaquitsí tsi yu. <sup>37</sup> Tacan tucu Jutu yu, ra tsa jaquitsí tsi yu, cuví ra tsa ndaa tsa cuenda yu. Nyooho ñaha ca cuñi ndo ndusu ra, tan ndi ñaha ca nyehe ndo tsi ra. <sup>38</sup> Tan ña ndoó tuhun ra tsa caahán yu tsihin ndo tsitsi añima ndo tyin ña tsinú iñi ndo tyin Nyoo jaquitsí tsi yu. <sup>39</sup> Nyooho tsihin cuenda xaan cahví ndo nu tutu Nyoo, tyin cuñí maa ndo tyin nuu tsi cua ñihi ndo ñayivi nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi. <sup>40</sup> Tan nyooho ña cuñi ndo quitsi ndo nu nyaá yu tan cuhva yu ñayivi nyito coo ndo.

<sup>41</sup> Yuhu ña nducú yu tsa jacahnu nyivi tsi yu. <sup>42</sup> Tyin yuhu tsitó yu tsi ndo tan tsitó yu tyin ña cuñí ndo tsi Nyoo. <sup>43</sup> Yuhu vatsí yu cuenda Jutu yu tan nyooho ña naquihín ndo tsa caahán yu. Maa tyin tatun inga ra cua quitsí tsa cuenda maa ra, ra ican cua tsinu iñi ndo. <sup>44</sup> Nyooho ña cuví tsinu iñi ndo tsi yu tyin cuñí ndo nduvaha ndo nuu nyivi tahan ndo. Tan ña nducú ndo nduvaha ndo nuu Nyoo, tan intuhun ñi maa ra cuví Nyoo tsa iyó. <sup>45</sup> Ña caca iñi ndo tyin cua ndacan yu cuatyí tsaha ndo nuu Jutu yu. Nyooho cuñí maa ndo tyin ley tsa tyaá ra Moisés cua cundaca tsi ndo gloria. Maa tyin ra Moisés cuví ra tsicán cuatyí tsaha ndo tyin ña jacuví ndo ley tsa tyaá ra. <sup>46</sup> Tyin tun tsatyin nditsa tsa tsinú iñi ndo tsa cahán ra Moisés, tacan cua tsinu ndihí iñi ndo tsa caahán yuhu. Tyin tuhun yuhu cuví tsa tyaá ra. <sup>47</sup> Maa tyin tatun ña tsinú iñi ndo tuhun tsa tyaá ra, ¿nácaa cua tsinu iñi ndo tsa caahán yuhu? —catyí ra Jesús tsihin ra cuví ityí nuu tsihin ra Israel naha ra.

### Nu jacatsí ra Jesús uhun mil rayíí

(Mt. 14.13-21; Mr. 6.30-44; Lc. 9.10-17)

**6** Tsa yaha yacan, tan cuahán ra Jesús inga tsiyo miñi cahnu tsa nañi Nduya Ñuhu Galilea. Tan juvin ñi nañi tucu tsi Miñi Tiberias. <sup>2</sup> Cuaha xaan nyivi cuahán nyicun tsi ra tyin nyehé ñi tsa iyo tsa javahá ra tyin janduvahá ra tsi nyivi cuuhví. <sup>3</sup> Tacan tan ra Jesús ndaa ra iin yucu tan tsinyaá ra ican tsihin ra tsicá tsihin ra. <sup>4</sup> Tan tsa cuyatyin cuii tahan tsi quivi vico pascua tsa jacahnú nyivi Israel. <sup>5</sup> Tan nyehé ra Jesús tyin cuaha xaan nyivi nyicún tsi ra, tacan tan quitsahá caahán ra tsihin ra Felipe:

—¿Numaa cua jata yo tsa catsi nyivi cuaha ihya? —catyí ra tsihin ra.

<sup>6</sup> Caahán ñi maa ra tsihin ra Felipe tyin nducú cuhva ra tsi ra náa cua cahan ra, tyin tsa tsitó maa ra Jesús náa cua javaha ra. <sup>7</sup> Tacan tan nacahán ra Felipe tan catyí ra:

—Xuhun tsa quihin yo tsa jahā tyiñu yo tsa uvi cientu quivi, ndi ña cua cutahan can jata yo luxu tsa catsi nyivi ihya —catyí ra Felipe.

<sup>8</sup> Tan inga ra tsa nyicún tsi ra Jesús, ra Andrés, yañi ra Simón Pedro, catyí ra tsihin ra Jesús:

<sup>9</sup> —Ihya nyii iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyivi ihya —catyí ra Andrés.

<sup>10</sup> Tacan tan catyí ra Jesús tsihin ra naha:

—Cahan ndo tsihin tandihí nyivi na cunyecu ñi —catyí ra.

Tan cuaha xaan itya ican tan tsinyecu ñi, uhun mil rayi, [tan siin maa ñi ñaha tsihin tsa nyihi]. <sup>11</sup> Tacan tan quihin ra Jesús paan can tan tsa yahā tsahā ra tyahvi nyoo tsi Nyoo, tan tsahā ra can tsi ra tsicá tsihin ra. Tan ra can naha ra, tsahā ra naha can tsi tandihí nyivi tsa nyecú can. Juvín ñi tacan icā nyico ra tsihin tyaca can. Tan tsatsí ndaha iñi ñi. <sup>12</sup> Tan cuhva tsa ndaha iñi ñi, ra Jesús catyí ra tsihin ra tsicá tsihin ra:

—Naquihin vaha ndo tsa ñahñu tsa ndoo tyin tacan tan ña tiví tsi —catyí ra tsihin ra naha.

<sup>13</sup> Naquihin vaha ra naha can, tan jacuty ra naha utsi uvi tyica tsihin tsa ñahñu tsa ndoo tsa uhun taahan paan can. <sup>14</sup> Tacan tan tsa yahā nyehé nyivi can tsa iyo tsa javahā ra Jesús, tan catyí ñi:

—Nditsa tsa cuii tyin ndusu yuhu Nyoo cuví ra ihya, juvín ra nyaá tsa quitsi maa nu ñuhu ñayivi ihya —catyí ñi.

<sup>15</sup> Maa tyin tsa tuví iñi ra Jesús tyin cuñí ñi tsa quihin ñi tsi ra tsihin tsa ñiñi tyin cuví ra rey cuenda ñi, tacan tan cuahán nyico ra jiñi yucu nu sucun ca tyin cunyi in-tuhun ñi maa ra.

#### Nu tsicá ra Jesús nu ndutya

(Mt. 14.22-27; Mr. 6.45-52)

<sup>16</sup> Tsa cunaaha, nuu ra tsicá tsihin ra Jesús yuhu miñi can. <sup>17</sup> Tan quihví ra naha tsitsi yutun ndoo tyin cua yaha sava ra naha mahñu miñi can tan cua tsa ra naha ñuu Capernaum. Tsa cunaaha tan ra Jesús ñaha ca maa tsa ra. <sup>18</sup> Tacan tan tsaā tatyí ñihi. Tan iyo nduvitá ndutya miñi can. <sup>19</sup> Tsa tsa yahā ra naha uhun a iñu kilómetro tsihin yutun ndoo can tan nyehé ra naha vatsí ra Jesús tsicá ra nu ndutya. Tsa nyehé ra naha tyin tsa cua cuyatín ra nu cuahán yutun ndoo can, nayuhví xaan ra naha. <sup>20</sup> Maa tyin catyí ra Jesús tsihin ra naha:

—¡Maa yu cuví, ña nayuhvi ndo!

<sup>21</sup> Tacan tan tsahā ra naha quihví ra Jesús tsitsi yutun ndoo can. Tan iin yaha ñi tsaā ra naha yuhu miñi nu cuahán ra naha.

#### Nu nanducú nyivi tsi ra Jesús

<sup>22</sup> Tsa tuvi inga quivi tan tsitō nyivi tsa ndoo inga tsiyo miñi can tyin ra tsicá tsihin ra Jesús tsa cuahán ra naha tsihin iin yutun ndoo tsa iyó ican. Intuhun ñi maa can iyó. Tan tsitō ñi tyin ña cuahán ra Jesús tsihin ra naha. <sup>23</sup> Maa tyin tsaā taahan ca yutun ndoo tsa quee ñuu Tiberias yatyin ñi nu nacuhvā Jutu Mañi yo tyahvi

nyoo tsi Nyoo tan tsatsí nyivi paan. <sup>24</sup> Tacan tan tsa nyehé nyivi tyin nduve ra Jesús tan ndi ra tsicá tsihin ra, quihví ñi tsitsi yutun ndoo tsa tsaā tan cuahán ñi nda ñuu Capernaum cua nanducu ñi tsi ra.

#### Ra Jesús cuví paan tsa tsahá ñayivi nyito coo yo

<sup>25</sup> Tsa tsaā ñi inga tsiyo miñi can, nañihí ñi tsi ra Jesús. Tan tsicā tuhun ñi tsi ra:

—Maestro, ¿náa cuhva tsaā un ihya? —catyí ñi tsihin ra.

<sup>26</sup> Maa tyin catyí ra Jesús tsihin ñi:

—Tsa nditsa catyí yu tsihin ndo tyin nyoocho nanducú ndo tsi yu maa tyin ñavin cuenda tsa nyehé ndo tsa iyo tsa javahā yu. Nanducú ndo tsi yu tyin tsatsí ndo tan ndaha iñi ndo. <sup>27</sup> Ña jahā tyiñu ndo cuenda tunyee iñi tsa tsatsí ndo tsa cua ndihí ñi maa, jahā tyiñu ndo cuenda tunyee iñi tsa catsi ndo tsa ña cua ndihí tan tsahá tsi ñayivi nyito tsa ña cua naa maa coo ndo. Yacan cuví tsa catsi ndo tsa cua cuhva yuhu tsi ndo tyin Nyoo Jutu yu tavā tyiñu ra tsi yu tyin yuhu cuví Rayi tsa quee nda gloria —catyí ra Jesús.

<sup>28</sup> Tacan tan quitsahā tsicá tuhun ñi tsi ra tan catyí ñi: —¿Náa taahán tsi javaha ndi tan cuví javaha ndi cuhva cuñí Nyoo? —catyí ñi.

<sup>29</sup> Tacan tan catyí ra Jesús tsihin ñi:

—Tsa cuñí Nyoo javaha ndo, cuví tsa tsjnu iñi ndo tsa caahán yuhu, ra tsa jaquitsí ra —catyí ra Jesús tsihin ñi.

<sup>30</sup> Tan tsicā tuhun nyico ñi tsi ra, tan catyí ñi:

—¿Náa tsa iyo javaha un nyehé ndi tan tsinu iñi ndi tsa caahán un? <sup>31</sup> Tsii tsahnu ndi tsatsí ñi maná nu tsiquí, tumaa tsa caahán tuhun Nyoo tyehen: “Andivi quee paan tsatsí nyivi jahā Nyoo” —catyí ñi tsihin ra Jesús.

<sup>32</sup> Tan nacahan ra Jesús tan catyí ra:

—Tsa nditsa caahán yu tsihin ndo. Ñavin ra Moisés tsahā paan tsa quee andivi tsatsí ñi, tyin maa Nyoo Jutu yu cuví ra tsahá paan nditsa tsa quee andivi. <sup>33</sup> Tyin paan tsa tsahá Nyoo, yacan cuví ra tsa quee andivi. Tan juvín ra cuví ra tsahá ñayivi nyito coo nyivi iyó nu ñuhu ñayivi —catyí ra Jesús.

<sup>34</sup> Tacan tan quitsahā catyí ñi tsihin ra:

—Taa, cuhva paan can catsi ndi tandihí ñi quivi —catyí ñi.

<sup>35</sup> Tan nacahan ra Jesús tan catyí ra tsihin ñi:

—Yuhu cuví paan tsa tsahá tsa coo nyito añima ndo. Nyivi nyicún tsi yu ña cua cusoco ca ñi, tan ñi tsinú iñi tsa caahán yu ña cua na ityi iñi ñi. <sup>36</sup> Maa tyin tumaa tsa caahán yu tsihin ndo, nyehé vaha ndo tsi yu, maa tyin ña cuñí ndo tsinu iñi ndo tyin juvín yu cuví ra tsa cuví jatyinyee tsi ndo <sup>37</sup> Tandihí nyivi tsa tsahā Nyoo Jutu yu tsi yu, nyicún ñi tsi yu, tan ñi tsa nyicún tsi yu, naquihín vaha yu tsi ñi. <sup>38</sup> Tyin yuhu tsa quee andivi; vatsí yu vatsí javahá yu cuhva cuñí ra tsa jaquitsí tsi yu. Ña vatsí yu vatsí javaha yu cuhva cuñí ñi maa yu. <sup>39</sup> Tan cuhva cuñí ra tsa jaquitsí tsi yu, yacan cuví tsehe: tsa ña cunaa ndi intuhun nyivi tsa tsahá ra tsi yu, tan janandoto yu tsi ñi nu cua cundihí quivi. <sup>40</sup> Jutu yu, ra tsa jaquitsí tsi yu, cuñí ra tyin tandihí nyivi tsa cutuñi

iñi tyin Sehe Nyoo cuví tsi yu, tan tsinu iñi ñi tsa caahán yu, cua coo ñi ñayivi nyito tsa ña cua naa maa. Tan juvin ñi yu cua janandoto tsi ñi nu cua cundihi quivi —catyí ra Jesús tsihin ñi.

<sup>41</sup> Tsa cuenda tsa cahān ra Jesús yacan, tan quitsahā caahán nyaa nyivi Israel tsi ra tyin catyí ra: “Yuhu cuví paan tsa quee andivi”, catyí ra. <sup>42</sup> Tacan tan quitsahā catyí ñi:

—¿A ñavin ra Jesús sehe ra José cuví ra ihya? Yoo tsitó vaha yo tsi jutu ra tan tsi sihi ra. ¿Nacaa tsa catyí ra tyin andivi quee ra? —catyí ñi.

<sup>43</sup> Tacan tan catyí ra Jesús tsihin ñi:

—Jandihí ndo tsa caahán nyaa ndo. <sup>44</sup> Yoñi maa nyivi cuví quitsi quitsi nyicún tsi yu tatan ñavin Jutu yu, ra tsa jaquitsi tsi yu, caná tsi ñi. Tan cua janandoto yu tsi ñi nu cua cundihi quivi. <sup>45</sup> Nu libru tsa tyaā ra cuví ndusu yuhu Nyoo caahán tsi tyehen: “Nyoo cua jacua-ha ra tsi tandihí nyivi” catyí tsi. Yacan cuenda nyivi tsa tyaā soho tuhun tsa caahán Nyoo Jutu yu tan cutuhvá ñi tsa caahán ra, juvin ñi nyicún tsi yu.

<sup>46</sup> Ñavin tsa tyin nyehē ñi tsi Nyoo Jutu yu, tyin yoñi nyehē tsi ra. Intuhun ñi maa yu nyehé tsi ra. Tan juvin yu cuví ra tsa quee nu nyaá ra. <sup>47</sup> Tsa nditsa catyí yu tsihin ndo tyin nyivi tsa tsinú iñi tsa caahán yu tsa iyó ñi ñayivi nyito tsa ña cua naa maa. <sup>48</sup> Yuhu cuví paan tsa tsahá tsa coo nyito añima ñi. <sup>49</sup> Tsii tsaahnu ndo tsatsi ñi maná nu tsiquí, maa tyin juvin ñi tsihi ñi. <sup>50</sup> Maa tyin yuhu, tuhun paan tsa quee andivi caahán yu tsihin ndo, tyin nyivi tsa cua catsi paan can, ña cua cúu ñi. <sup>51</sup> Juvin ñi maa yu cuví paan nyito tsa quee andivi. Nyivi tsa cua catsi paan ihya ña cua cundihi tsa coo ñi, tyin paan tsa cua cuhva yu, yacan cuví cuñu ñuhu yu. Tan cua cuhva yu ñayivi tsa iyó yu tsa cuenda tandihí nyivi iyó nu ñuhu ñayivi —catyí ra Jesús tsihin ñi.

<sup>52</sup> Tacan tan nyivi Israel can quitsahā natuhún tahan ñi tan catyí ñi:

—¿Nacaa cua cuhva ra tsa catsi yo cuñu ñuhu ra?

<sup>53</sup> Tan catyí ra Jesús:

—Tsa nditsa catyí yu tsihin ndo, tyin yuhu cuví Rayi tsa quee nda gloria, tan tatan nyooho tan ña cua catsi ndo cuñu ñuhu yu, tan ña coho ndo niñi yu, ña cuvi coo ndo ñayivi nyitó. <sup>54</sup> Nyivi tsatsí cuñu ñuhu yu tan tsihi ñi niñi yu, iyó ñi ñayivi nyito tsa ña cua naa maa. Tan yuhu cua janandoto yu tsi ñi nu cua cundihi quivi. <sup>55</sup> Tyin cuñu ñuhu yu yacan cuví paan tsa nditsa tsa taahán tsi catsi ñi, tan niñi yu cuví vinu tsa nditsa tsa taahán tsi coho ñi. <sup>56</sup> Nyivi tsatsí cuñu ñuhu yu tan tsihi ñi niñi yu, iin ñi cuví ñi tsihin yu. Tan iin ñi cuví yu tsihin ñi. <sup>57</sup> Jutu yu, ra tsa jaquitsi tsi yu, Nyoo nyito cuví ra. Tan yuhu iyó yu tsihin tunyee iñi ra. Tan juvin ñi tacan tucu nyivi tsatsí cuñu ñuhu yu, cua coo ñi tsihin tunyee iñi tsa iyó tsi yu. <sup>58</sup> Tuhun paan tsa quee andivi caahán yu. Paan ihya ñavin tumaa maná tsa tsatsi tsii tsaahnu yo cuví tsi, tyin juvin ñi tsihi ñi. Nyivi tsatsí paan tsa cuví cuñu ñuhu yu, ña cua cundihi maa tsa coo ñi —catyí ra Jesús.

<sup>59</sup> Juvin yacan jacuahā ra Jesús nu ndu iin nyivi tsitsi vehe ñuhu ñuu Capernaum.

<sup>60</sup> Cuaha xaan nyivi nyicún tsi ra Jesús. Tan cuhva tsa tsihi ñi yacan catyí ñi:

—Tuhun tsa caahán ra ihya, yñ xaan naquihin vaha yo itsi. Yoñi maa cua tsinu iñi tsa caahán ra —catyí ñi.

<sup>61</sup> Tacan tan tuví iñi ra Jesús tyin ña cuñi ñi naquihin ñi tsa caahán ra. Tan tsicā tuhun ra tsi ñi:

—¿A ndasi cuñi ndo tsa caahán yu ihya? <sup>62</sup> Tan ¿náa cua javaha ndo tatan nyehe ndo tsi yuhu Rayi tsa quee nda gloria nandaa nyico yu inga tsaha ityi nu quee yu? <sup>63</sup> Tatyí Ii Nyoo tsahá ñayivi nyito. Tan cuñu ñuhu, ña jatyinyeé tsi tsa coo yo ñayivi can. Tan tsa caahán yuhu tsihin ndo, Tatyí Ii Nyoo cuví tsi tan tsahá tsi tsa coo nyitó añima ndo. <sup>64</sup> Maa tyin yihí ndo ña tsinú iñi ndo tsi yu —catyí ra Jesús.

Tyin nda quivi jihna tan tsa tsitó maa ra yóo ña cua tsinú iñi tsi ra tan yóo cua xico tsi ra. <sup>65</sup> Tan catyí ra:

—Yacan cuenda catyí yu tsihin ndo tyin yoñi nyivi cuví quitsi nyicun tsi yu tatan ñavin maa Nyoo Jutu yu caná tsi ñi —catyí ra Jesús.

<sup>66</sup> Nda quivi can, tan cuaha xaan nyivi nyicún tsi ra Jesús nacoñ ñi tsi ra. Tan ña tsicá ca ñi tsihin ra.

<sup>67</sup> Tacan tan tsicā tuhun ra Jesús tsi tsa utsi uvi ra tsicá tsihin ra, tan catyí ra:

—¿A cuñi ndihí tucu nyooho cuhun ndo? —catyí ra tsihin ra naha.

<sup>68</sup> Maa tyin nacahān ra Simón Pedro tan catyí ra:

—Jutu Mañi yu, ¿yóo cunyicun ndi? Tan intuhun ñi maa un caahán tuhun ñayivi nyito tsa ña cua naa maa.

<sup>69</sup> Nyuhu tsinú iñi ndi, tan tsitó ndi tyin yoooho cuví ra Cristo Sehe Nyoo nyito.

<sup>70</sup> Tan nacahān ra Jesús tan catyí ra:

—¿A ñavin yuhu nacatsi tsi tandihí tsa utsi uvi ndo? Tan intuhun ndo yihí nu ña vaha —catyí ra.

<sup>71</sup> Tuhun tsa caahán ra Jesús ihya, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan iñi tsi ra, va-su iin ra tsa utsi uvi can cuví ra.

### Nu ña tsinú iñi yañi ra Jesús tsi ra

**7** Tsa yahā yacan, tan nyií ra Jesús tsicá nuu ra nu cuví Galilea. Ña cuñi ra cuhun ra nu cuví Judea tyin ra cuví ityi nuu tsihin nyivi Israel can naha ra cuñi ra naha cahñi ra naha tsi ra. <sup>2</sup> Tan tsa cuyatyin quivi vico tsa jacahnú nyivi Israel ndihí ñi cuiya. Tan nañi tsi Vico Tyahva. <sup>3</sup> Yacan cuenda catyí ra yañi ra Jesús tsihin ra:

—Ña ndoo un ihya. Cuaahan Judea tyin nyivi nyicún tsi un tsa iyó ndacan nyehe ñi tyiñu javahá un. <sup>4</sup> Tyin tatan cuñi yo tsa coto nyivi tsi yo, ña javahá xeehe yo tsa javahá yo. Tan yoooho tatan nditsa tsa javahá un, javaha can nuu tandihí nyivi —catyí tandihí yañi ra.

<sup>5</sup> Tacan catyí ra naha tyin ndi tsa cuví ra naha yañi ra tan ña tsinú iñi ra naha tsi ra. <sup>6</sup> Tacan tan catyí ra Jesús tsihin ra naha:

—Ñaha ca tsa hora tsa cuhun yuhu. Maa tyin nyooho ndáa quivi ñi cuví cuhun ndo. <sup>7</sup> Tyin vaha cuñi nyivi nyehé ñi tsi ndo, maa tyin yuhu ndasi cuñi ñi nyehé ñi tsi yu tsa cuenda tyin caahán catsi yu tsihin ñi

tyin ña vaha tsa javahá ñi. <sup>8</sup> Cyaahan nyooho vico can. Yuhu ña cuhun yu tyin ñaha ca tsa hora tsa taahán tsi cuhun yu —catyí ra.

<sup>9</sup> Yahá can tan ndoq ra nu cuví Galilea.

### Nu nyíí ra Jesús nu iyó vico Tyahva

<sup>10</sup> Tsa yahá cuahán yañi ra Jesús vico can, tsahan cuahán ndihí ra, maa tyin cuahán xeehe ñi ra. <sup>11</sup> Tan ra cuví ityi nuu tsihin nyívi Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyíí ra can? —catyí ra naha.

<sup>12</sup> Tan caahán nyívi yucú vico can tuhun ra. Yihí ñi catyí ñi: “Iin ra vaha cuví ra.” Tan inga ñi catyí ñi: “Ña vaha ra, jandaví ñaha ra tsi nyívi”, catyí ñi.

<sup>13</sup> Maa tyin yoñi caahán nditsin tuhun ra tsa cuenda tsa yuuhví ñi tsi ra cuví ityi nuu can naha ra.

<sup>14</sup> Tsa cusava iyó vico tan tsaq ra Jesús tsitsi vehe ñuhu cahnu tan quitsahá jacuaha ra tsi nyívi. <sup>15</sup> Tan ra cuví ityi nuu can iyó cuñí ra naha tan quitsahá natuhun tahan ra naha:

—¿Nacaa tyin tsitó ra ihya tan ña cahví ra? —catyí ra naha.

<sup>16</sup> Tan nacahan ra Jesús tan catyí ra:

—Tuhun tsa jacuahá yu, ñavin tsa cuenda maa yu cuví tsi, maa tyin cuenda ra tsa jaquitsí tsi yu cuví tsi.

<sup>17</sup> Tatun yihí nyooho tsa cuñí javaha cuhva cuñí Nyoo, cua coto ndo tyin cuenda Nyoo jacuahá yu tan ñavin tsa cuenda maa yu. <sup>18</sup> Nyívi tsa caahán cuenda maa ñi, caahán ñi tyin cuñí ñi tsa jacahnu nyívi tsi ñi. Maa tyin ra nducú tsa jacahnu nyívi tsi Nyoo, ra tsa jaquitsí tsi ra, ra ican caahán tsa nditsa. Tan ña jandaví ñaha ra.

<sup>19</sup> ¿A ña nditsa tyin ra Moisés tsahá ra ley tsi ndo? Maa tyin ndi intuhun nyooho tan ña tyaá yahvi ndo ley can. ¿Nacuenda cuñí ndo cahñi ndo tsi yu? —catyí ra.

<sup>20</sup> Tan nacahan nyívi tan catyí ñi tsihin ra:

—Tatyí ña vaha yihí tsi yooho. Yoñi cuñí cahñi tsi un —catyí ñi tsihin ra.

<sup>21</sup> Tan catyí ra Jesús:

—Tsacatyí tsa javahá yu tsa iyo quívi quitatu yo, yacan ndasi cuñí ndo nyehé ndo tsi yu. <sup>22</sup> Maa tyin ra Moisés catyí ra tsihin ndo tyin coo ndo tsihin tsa cunyaa tuñi Nyoo tsi sehe yíi ndo. Vasu ñavin ra quitsahá tsihin tuhun can, maa tyin nyívi cuví nyívi ra ityi tsata, jihna ca ñi javahá tacan. Yacan cuenda javahá ndo can vasu taahán tsi quívi quitatu yo. <sup>23</sup> Tan vityin, vaha tatun tsa cuenda tsa ña cuñí ndo cumañi ndo ley ra Moisés tan javahá ndo tuhun can vasu quívi quitatú yo cuví. Maa tyin tatun tacan javahá ndo, ¿nacuenta tyin cuxaan ndo tsi yu tsa janduvahá yu tsi ra can quívi quitatú yo? <sup>24</sup> Ña tyaa ndo cuatyí síqui nyívi tatun ña tsitó vaha ndo náa javahá ñi. Cúatu ndo nda nyehe vaha ndo, tacan tan coto ndo nácaa tatsi tuñi ndo tsi ñi tsihin tsa ndaa tan tsihin tsa nditsa.

### Nu cahán ra Jesús tuhun maa ra

<sup>25</sup> Tacan tan juhva nyívi iyó Jerusalén, quitsahá tsicá tuhun ñi:

—¿A ñavin ra ihya nanducú xaan ra naha tyin cua cahñi ra naha tsi ra? <sup>26</sup> Caahán nditsin ra tsihin nyívi. Tan yoñi caahán náa caahán tsihin ra. Vasiquí tsinú ndihí maa iñi ra cuví ityi nuu naha ra tyin juvin ra ihya cuví ra Cristo ra cuví rey tsa jaquitsí Nyoo. <sup>27</sup> Yoo tsitó vaha yo nu quee ra ihya, tan quívi quitsi ra Cristo yoñi maa cua coto numaa ityi cua quee ra —catyí ñi.

<sup>28</sup> Ra Jesús nyíí ra tsitsi vehe ñuhu jacuahá ra, tan tsitó ra tsa natuhún nyívi, yacan cuenda ñihi cahán ra tan catyí ra:

—¿Nyooho cuñí maa ndo tyin nacotó ndo tsi yu tan tsitó ndo numaa quee yu! Maa tyin yuhu ña vatsí yu cuenda maa yu. Yuhu vatsí yu cuenda ra tsa jaquitsí tsi yu, ra tsa cuví tsa nditsa. Nyooho ña nacotó ndo tsi ra. <sup>29</sup> Yuhu nacotó yu tsi ra tyin cuenda ra vatsí yu, tan maa ra jaquitsí tsi yu —catyí ra Jesús.

<sup>30</sup> Tacan tan cuñí ra naha tyihi ra naha tsi ra tsitsi vehe caa. Maa tyin ndi intuhun ra naha tan ña caná iñi ra naha tñin ra naha tsi ra tsa cuenda tyin ñaha ca tahan tsi quívi tsa taahán maa tsi tñin ra naha tsi ra. <sup>31</sup> Maa tyin cuaha xaan nyívi tsinú iñi tsi ra. Tan catyí ñi:

—Ra ihya cuví ra Cristo. ¿A cuaha ca tsa iyo cua javaha inga ra tatun quitsi ra tan ñavin ca ra ihya? —catyí ñi.

### Nu jacuhun ra cuví fariseo naha ra tsi ra vitya tyin tñin ra naha tsi ra Jesús

<sup>32</sup> Tsa tsiñi ra fariseo naha ra tsa caahán nyívi tuhun ra Jesús, maa ra naha tan ra cuví ityi nuu tsihin ra jutu naha ra, jacuhun ra naha vitya cuenda vehe ñuhu, na tñin ra naha tsi ra Jesús. <sup>33</sup> Tacan tan catyí ra Jesús:

—Juhva cuii ña quívi cua cunyaa yu tsihin ndo. Yahá can tan cuacunuhu yu nu nyaá ra tsa jaquitsí tsi yu.

<sup>34</sup> Nyooho cua nanducu ndo tsi yu. Maa tyin ña cua nañihi ndo tsi yu. Tyin ña cua cuví cuhun ndo nu cua cunyaa yu —catyí ra Jesús.

<sup>35</sup> Tacan tan quitsahá natuhún tahan ra cuví ityi nuu tsihin nyívi Israel naha ra:

—¿Numaa cua cuhun ra ihya tsa ña cua nañihi yo tsi ra? ¿A cuhun ra nu iyó ra Israel ñuu Grecia naha ra tyin jacuaha ra tsi nyívi iyó Grecia can? <sup>36</sup> ¿Náa cuñí tsi catyí tsa caahán ra tsihin yo? Tyin catyí ra: “Cua nanducu ndo tsi yu maa tyin ña cua nañihi ca ndo tsi yu tyin ña cua cuví cuhun ndo nu cua cunyaa yu” —tacan caahán yuhu tahan ra naha tuhun ra Jesús.

### Nyívi tsinú iñi tsi Nyoo cua coo Tatyí Ii ra añima ñi

<sup>37</sup> Quívi ndihí tsicoq vico, yacan cuví quívi tsa ñiñi ca. Tan quívi can nduvitá ra Jesús tan ñihi caahán ra tan catyí ra:

—Tatun ndaa nyooho na ityi iñi ndo, ñaha ndo tan tsinu iñi ndo tsa caahán yu. <sup>38</sup> Tyin nyívi tsa tsinú iñi tsa caahán yu, cua cunu ndutya nyito tsitsi añima ñi tu-

maa tsinú ndutya iin yutya, tumaa catyí maa nu tutu Nyoo —catyí ra Jesús.

<sup>39</sup> Maa tyin tsihin yacan cuñí ra catyi ra tyin ñi tsinú iñi tsi ra cua ñihi ñi Tatyí Ii Nyoo, tyin quiví can ñaha ca quitsi Tatyí Ii Nyoo tyin ra Jesús, ñaha ca cunuhu ra nda gloria nu cua jacahnu Jutu ra tsi ra.

#### Nu natahví sava nyivi tsa cuenda ra Jesús

<sup>40</sup> Juhva nyivi tsa tsiñi yacan, catyí ñi:

—Nditsa tsa cuii tyin ra ihya cuví ndusu yuhu Nyoo tsa nyaá tsa cua quitsi —catyí ñi.

<sup>41</sup> Tan inga ñi catyí ñi:

—Ra ican cuví ra Cristo ra tsa jaquitsi Nyoo —catyí ñi.

Maa tyin inga nyivi catyí ñi:

—¿Nacaa tyin ra Galilea cua cuví ra Cristo? <sup>42</sup> Tyin nu tutu Nyoo catyí tsi tyin ra Cristo cua cuví ra nyivi tata ra rey David, tan ra ñuu Belén tsa canyí nu cuví Galilea cua cuví ra, tumaa ra David —catyí ñi.

<sup>43</sup> Tacan tan nyivi can natahví sava ñi tsa cuenda ra Jesús. <sup>44</sup> Yihí ñi cuñí ñi quihin ñi tsi ra tan tyihi ñi tsi ra tsitsi vehe caa. Maa tyin yoñi tñin tsi ra.

#### Ra cuví ityi nuu vehe ñuhu naha ra ña tsinú iñi ra naha tsi ra Jesús

<sup>45</sup> Tacan tan ra vitya tsa iyó vehe ñuhu cahnu can, cuanuhu ra naha nu yucú ra fariseo naha ra tsihin ra cuví ityi nuu tsihin ra jutu naha ra. Tan tsicā tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

<sup>46</sup> Tan catyí ra vitya can naha ra:

—¿Ndi intuhun tsaha tan yoñi tuhva caahán tumaa caahán ra can! —catyí ra naha.

<sup>47</sup> Tacan tan catyí ra fariseo naha ra tsihin ra vitya can naha ra:

—¿A jandaví ñaha ndihi ra can tsi nyoocho? <sup>48</sup> Nyehé ndo tyin ndi intuhun ra cuví ityi nuu tsihin ndi, tan ra cuví fariseo naha ra, tan ña tsinú iñi ra naha tsi ra can.

<sup>49</sup> Maa ñi maa nyivi ña tsitó ley nyicún tsi ra. Tan ña vaha ñi nuu Nyoo —catyí ra naha.

<sup>50</sup> Tacan tan ra Nicodemo, ra tsa tsahan nu nyíí ra Jesús tsa tsacuaa, cuví ndihi tucu ra fariseo, tan catyí ra tsihin ra naha:

<sup>51</sup> —Catyí ley tyin ña cuví tatsi tuñi yo tsi iin nyivi tatun ñaha ca cuñi jihna yo tsa caahán ra, tan coto yo náa javahā ra —catyí ra tsihin ra naha.

<sup>52</sup> Tacan tan nacahan ra naha tan catyí ra naha tsihin ra:

—¿A juvin ñi ra Galilea cuví ndihi tucu yooho? Cahvi nu tutu Nyoo tan nyehé un, tyin ndi intuhun ra cuví ndusu yuhu Nyoo tan ña nyaá tsi tsa quitsi ra nda Galilea —catyí ra naha.

#### Ñaha tsa quituví tsihin rayí tsa ñavin yí ña cuví

<sup>53</sup> Tacan tan cuanuhu intuhun intuhun ra naha nda yuvehe ra naha.

**8** Maa tyin ra Jesús cuahán ra yucu Olivo. <sup>2</sup> Tsa cunditsin inga quiví, cuahán nyico ra Jesús inga tsaha

vehe ñuhu cahnu. Tan tandihi nyivi natuhvā ñi nu nyíí ra. Tan tsinyaā ra tan quitsahā caahán ra tsihin ñi.

<sup>3</sup> Tacan tan ra jacuahá ley vehe ñuhu tan ra cuví fariseo naha ra tsaā ra naha tsihin iin ñaha iyó yí tyin tñin ra naha tsi ña nu tsicoo cuatyí ña tsihin inga rayí. Tan tyaā ra naha tsi ña mahñu nyivi tsa nyecú can. <sup>4</sup> Tan quitsahā catyí ra naha tsihin ra Jesús:

—Maestro, tñin ndi tsi ñaha ihya nu tsicoo cuatyí ña tsihin inga rayí. <sup>5</sup> Tyin ley tsa tyaā ra Moisés catyí tsi tyin ñiñaha tsa javahā tacan taahán tsi cahñi yo tsi ñi tsihin yuu. Tan yooho, ¿nácaa catyi un? —catyí ra naha tsihin ra.

<sup>6</sup> Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaā ra naha cuatyí siquí ra. Tacan tan tsinyaā tyayí ra Jesús nu ñuhu tan quitsahā tyaá ra letra nu ñuhú tsihin nundaha ra.

<sup>7</sup> Maa tyin nducú tuhun ca ra naha tsi ra, tacan tan nduvitā nyityi ra tan catyí ra tsihin ra naha:

—Nyoocho tsa nduve cuatyí jihna ca ndo quihin yuu tan cañi ndo tsi ña —catyí ra tsihin ra naha.

<sup>8</sup> Tan tsinyaā tyayí nyico ra tan quitsahā jañihí ca ra tyaá ra letra nu ñuhu. <sup>9</sup> Tsa tsiñi ra naha tsa caahán ra tacan, tuví iñi ra naha tyin iyó tucu cuatyí maa ra naha. Tan quitsahā quitá intuhun intuhun ra naha, jihna ca ra tsahnu naha ra quitā. Cuhva tsa ndihí ra naha quitā cuahán tan ndoō intuhun ña maa ra Jesús tsihin ñaha can mahñu nu nyecú nyivi can. <sup>10</sup> Tacan tan nduvitā nyityi ra Jesús tan nyehé ra tyin tsa cuahán ra naha tan ndoō intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaā cuatyí siquí un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

<sup>11</sup> Tan nacahan ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un.

Cuaahan vityin. Tan ña javaha ca un cuatyí —catyí ra tsihin ña.

#### Ra Jesús cuví tsa nditsin tsa jandunditsin añima nyivi

<sup>12</sup> Tacan tan cahān nyico ra Jesús tsihin nyivi inga tsaha, tan catyí ra tsihin ñi:

—Yuhu cuví ra tsa jandunditsin añima nyivi iyó nu ñuhu ñayivi. Yóo nyivi tsa nyicún tsi yu, cua coo ñi iin ñayivi nyito nu nditsin. Tan ña cua caca nuu ñi nu naa —catyí ra Jesús tsihin ñi.

<sup>13</sup> Tacan tan ra cuví fariseo naha ra catyí ra naha tsihin ra:

—Yooho, caahán un tumañi iñi tsa cuenda maa un. Yacan cuenda nduve yahvi nyaá can —catyí ra naha tsihin ra.

<sup>14</sup> Nacahan ra Jesús tan catyí ra:

—Vasu juvin ñi maa yu caahán tumañi iñi tsa cuenda yu, maa tyin tsa caahán yu iyó yahvi tsi tyin yuhu tsitó yu numaa ityi quee yu tan numaa ityi cua cuhun yu. Maa tyin nyoocho ña tsitó ndo numaa ityi quee yu tan numaa ityi cua cuhun yu. <sup>15</sup> Nyoocho yatyi xaan caahán ndo tsa caa nyivi. Maa tyin yuhu, ña caahán yu tsa caa

ñi. <sup>16</sup> Tyin tatun cahan yu tsa caa nyivi, tsa nditsa cua cahan yu. Tyin ñavin intuhun ñi maa yu nyehé tsa iyó añima ñi, tyin Jutu yu ra tsa jaquitsi tsi yu, ra ican nyehé iin caa ñi tsihin yu. <sup>17</sup> Nu ley nyooho nyaá tyin tatun uvi ra tsahá tsa ndaa, cuñi tsi tsinú iñi yo tsa caahán ra naha. <sup>18</sup> Tan vityin vaha tyin juvin ñi maa yu cuví tsa ndaa tsa cuenda maa yu. Tan Jutu yu, ra tsa jaquitsi tsi yu, cuví inga tsa ndaa —catyí ra Jesús tsihin ra naha.

<sup>19</sup> Tacan tan tsicá tuhun ra naha tsi ra:

—¿Numaa nyii jutu un?

Tan catyí ra Jesús:

—Nyooho ña tsitó ndo tsi yuhu. Tan ndi Jutu yu tan ña tsitó ndo. Tun tsatyin tsitó ndo tsi yu, coto ndihí ndo tsi Jutu yu —catyí ra.

<sup>20</sup> Tuhun ihya cahán ra Jesús tsitsi tsa jacuahá ra tsitsi vehe ñuhu cahnu, nu nyii caja nu tyihí nyivi xuhun. Maa tyin yoñi tyihí tsi ra vehe caa, tyin ñaha ca tahan tsi quivi tsa taahán tsi cahun ra.

**“Nu cahun yuhu ña cua cuví cahun ndo”, catyí ra Cristo**

<sup>21</sup> Tacan tan quitsahá caahán nyico ra Jesús tsihin ra Israel naha ra tan catyí ra:

—Yuhu cua cahun yu, tan cua nanducu ndo tsi yu, maa tyin cua cúu ndo tan cua ndoo cuatyí ndo siqui ndo. Tyin nu cua cahun yuhu, nyooho ña cua cuví cahun ndo —catyí ra Jesús tsihin ra naha.

<sup>22</sup> Tacan tan catyí ra Israel naha ra:

—¿A cua cahñi maa ra tsi ra? tyin catyí ra tyin ña cua cuví cahun yo nu cuahán ra —catyí ra naha.

<sup>23</sup> Tacan tan catyí ra Jesús:

—Nyooho ra cuenda nu ñuhu ihya cuví ndo. Maa tyin yuhu nda ityi siqui quee yu. Nyooho cuenda ñuhu ñayivi ihya cuví ndo. Maa tyin yuhu ñavin cuenda nu ñuhu ñayivi ihya cuví yu. <sup>24</sup> Yacan cuenda catyí yu tsihin ndo tyin cua cúu ndo tan cua ndoo cuatyí ndo siqui ndo. Tyin tatun ña tsinú iñi ndo tsa yuhu cuví ra jatsiyó cuatyí ndo, cua ndoo cuatyí ndo siqui ndo quivi cúu ndo —catyí ra Jesús tsihin ra naha.

<sup>25</sup> Tacan tan quitsahá tsicá tuhun ra naha tsi ra, tan catyí ra naha:

—¿Yóo ra cuví yooho?

Nacahán ra Jesús tan catyí ra:

—Tsa yaha cahán yu tsihin ndo nda quivi jihna.

<sup>26</sup> Cuaha xaan ca tsa ndi cumañi cahan yu tsihin ndo, tan ndi cumañi cahan yu cuhva iyó ndo. Maa tyin tsa caahán yu tsihin nyivi iyó nu ñuhu ñayivi, cuví tsi tsa tsiñi yu tsa caahán ra tsa jaquitsi tsi yu. Tan maa ra caahán tsa nditsa —catyí ra Jesús.

<sup>27</sup> Maa tyin ra Israel naha ra ña cutuñi iñi ra naha tatun tuhun Nyoo Jutu yo cahán ra tsihin ra naha.

<sup>28</sup> Yacan cuenda catyí ra tsihin ra naha:

—Cua tyaa ndo tsi yuhu, ra cuví Rayii tsa quee nda gloria, nu cruu. Tacan tan cua coto ndo tyin yuhu cuví yu tsa caahán yu tyin cuví yu, tan cua coto ndo tyin tyiñu jahá yu ñavin tsa cuenda maa yu javahá yu can, maa tyin caahán yu tsa janahá Jutu yu tsi yu. <sup>29</sup> Tyin Jutu yu, ra tsa jaquitsi tsi yu, nyii ra tsihin yu. Tan ña na-

coó ra tsi yu tsa maa ñi maa yu. Tyin yuhu javahá yu maa ñi maa cuhva cuñi ra —catyí ra Jesús.

<sup>30</sup> Tsa cahán ra Jesús yacan, cuaha xaan ra naha quitsahá tsinú iñi tsi ra.

**Nyivi cuví sehe Nyoo tan nyivi javahá tsa caquiñi**

<sup>31</sup> Tacan tan catyí ra Jesús tsihin nyivi Israel, tsa quitsahá tsinú iñi tsi ra:

—Tatun nyooho tan jañihi ca ndo tyaa yahvi ndo cuhva jacuahá yu tsi ndo, cua tsa ndo cuví ndo nyivi tsa nditsa yihí cuenda yu. <sup>32</sup> Tan cua coto ndo tsa nditsa. Tan tsa nditsa can cua tava nuña tsi ndo —catyí ra.

<sup>33</sup> Tan nacahán ra naha tan catyí ra naha:

—Nyuhu nyivi tata ra Abraham cuví ndi. Ndi iin tsaha tan ñaha ca cuví ndi musu nyivi. ¿Nacaa tsa catyí yooho tyin quita nuña ndi? —catyí ra naha tsihin ra.

<sup>34</sup> Tan catyí ra Jesús:

—Tsa nditsa catyí yu tsihin ndo tyin tandihí nyivi javahá tsa caquiñi, musu cuenda tsa caquiñi cuví ñi.

<sup>35</sup> Iin musu ña ndoo cuivi ra vehe tsitoho ra. Maa tyin ra cuví sehe tsitoho vehe can, ndoo cuivi ra vehe jutu ra.

<sup>36</sup> Yacan cuenda tatun yuhu tsa cuví yu Sehe Nyoo tan jacacu yu tsi ndo, tsa nditsa cuivi tyin ña cua cundaca ñaha ca tsa ña vaha tsi ndo. <sup>37</sup> Tsa tsitó yu tyin tata ra Abraham cuví ndo. Maa tyin yihí ndo cuñi ndo cahñi ndo tsi yu, tyin ña naquihín vaha ndo tsa caahán yu.

<sup>38</sup> Yuhu caahán yu tsa janahá Jutu yu tsi yu. Tan nyooho javahá ndo tsa caahán ra cuví jutu ndo tsihin ndo —catyí ra tsihin ra naha.

<sup>39</sup> Tan nacahán ra naha tan catyí ra naha:

—Jutu ndi cuví tsi ra Abraham —catyí ra naha.

Maa tyin ra Jesús catyí ra tsihin ra naha:

—Tun tsatyin nditsa tsa tata ra Abraham cuví tsi ndo, cua javaha ndo tsa javahá ra. <sup>40</sup> Maa tyin nyooho, vasu caahán yu tsihin ndo tsa nditsa tsa janahá Nyoo tsi yu, nyooho cuñi ndo cahñi ndo tsi yu. ¿Ra Abraham ña javahá ra tacan! <sup>41</sup> Nyooho javahá ndo tumaa javahá jutu ndo —catyí ra tsihin ra naha.

Tacan tan nacahán ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

<sup>42</sup> Tacan tan catyí ra Jesús:

—Tun tsatyin nditsa tyin Nyoo cuví jutu ndo, cua cuñi ndo tsi yu. Tyin yuhu quee yu nu nyaá ra tan tsaá yu ihya. Ña vatsí yu cuenda maa yu, tyin maa Nyoo jaquitsi tsi yu. <sup>43</sup> ¿Nacuenda ña cutuñi iñi ndo tsa caahán yu tsihin ndo? Tsa cuenda tyin ña cuñi ndo tyaa soho ndo tsa caahán yu. <sup>44</sup> Cuihna cuví jutu ndo. Tan sehe nu tsi ndo. Tan cuñi ndo javaha ndo cuhva cuñi nu. Tan nu ña vaha can cuví nu tsahñi nyivi nda quivi jihna. Tan ña javahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi ñaha nu tsi nyivi tyin cuñi nu tsa coo ñi cuhva iyó nu tyin vatya xaan nu. Tan jutu nyivi vatya cuví nu. <sup>45</sup> Tan yuhu caahán yu tsa nditsa, maa tyin nyooho ña tsinú iñi ndo tsa caahán yu.

<sup>46</sup> ¿Ndáa nyooho tan cuví janaha ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nácaa tsa ña tsinú iñi ndo tsi yu? <sup>47</sup> Nyivi cuenda Nyoo

tyaá soho ñi tuhun caahán ra. Maa tyin nyooho ñavin nyivi cuenda Nyoo cuví ndo, yacan cuenda ña cuñí ndo tyaa soho ndo tsa caahán yu —catyí ra Jesús.

**Ra Cristo, tsa iyó maa ra nda ndi cumañi ca coo ra Abraham,**

<sup>48</sup> Tacan tan catyí ra Israel naha ra tsihin ra:

—¿A ña nditsa tyin yooho ra ñuu Samaria cuví un, tan yihí tatyí ña vaha tsi un? —catyí ra naha tsihin ra.

<sup>49</sup> Tan nacahān ra Jesús tan catyí ra:

—Nduve tatyí ña vaha yihí tsi yuhu. Tsi Jutu yu jacahnú yu. Tan nyooho caahán ndo ndavaha ñi tsi yu.

<sup>50</sup> Yuhu ña nducú yu tsa jacahnu nyivi tsi yu, maa tyin iyó iin ra nanducú tsa jacahnu ñi tsi yu. Tan maa ra cua jandaa cuatyí ndo tatun ña jacahnú ndo tsi yu. <sup>51</sup> Tsa nditsa catyí yu tyin nyivi tsa tyaá yahvi tsa caahán yu ña cua tsa tuhun tsihiñi añima ñi —catyí ra Jesús tsihin ra naha.

<sup>52</sup> Tacan tan nacahān ra Israel can naha ra tan catyí ra naha:

—Vityin tsitó vaha ndi tyin yihí tatyí ña vaha tsi un. Tyin ra Abraham tan tandiñi ca ra cuví ndusu yuhu Nyoo tsihiñi ra naha. Tan yooho catyí un tyin nyivi tyaá yahvi tsa caahán un ña cua cúu ñi. <sup>53</sup> ¿A cahnu ca ra cuví yooho tan ñavin ca ra Abraham jutu yo? Maa ra tsihiñi ra tan tacan tucu ra cuví ndusu yuhu Nyoo. ¿Yóo ra cuví yooho cuñí maa un? —catyí ra naha tsihin ra.

<sup>54</sup> Tan nacahān ra Jesús tan catyí ra:

—Tatun juven ñi maa yu jacahnú tsi yu, nduve yahvi nyaá yacan. Maa tyin ra jacahnú tsi yu, juven ra cuví Jutu yu. Tan juven ra cuví ra tsa caahán nyooho tuhun tyin Nyoo ndo cuví tsi ra. <sup>55</sup> Maa tyin ña nacotó ndo tsi ra. Tan yuhu, nacotó yu tsi ra. Tun tsatyin catyí yu tyin ña nacotó yu tsi ra, cuví yu iin ra vatya tumaa nyooho. Maa tyin yuhu nditsa tsa nacotó yu tsi ra, tan tyaá yahvi yu tsa caahán ra. <sup>56</sup> Ra Abraham tsi tsaahnu yo siñi xaan cuñi ra tyin cua nyehé ra quivi cua quitsi yuhu nu ñuhu ñayivi. Nyehé ra quitsi yu tan siñi xaan cuñi ra —catyí ra Jesús tsihin ra naha.

<sup>57</sup> Tacan tan catyí ra Israel can naha ra tsihin ra Jesús:

—Ndi ñaha ca quita uvi xico utsi cuiya un, ¡tan catyí un tyin nyehé un tsi ra Abraham!

<sup>58</sup> Tan nacahān ra Jesús tan catyí ra:

—Tsa nditsa catyí yu tsihin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tsihin ra naha.

<sup>59</sup> Tacan tan quihñi ra naha yuu tyin cua cañi ra naha tsi ra Jesús. Maa tyin iin yaha ñi quihvi xeehe ra tan yahā ra mahñu ra naha tan quitā ra tsitsi vehe ñuhu can cuahán ra.

**Nu janduvahā ra Jesús tsi iin ra cuaa nda cacu ra**

**9** Cuhva tsa yahā ra Jesús iin nu yahā ra, nyehé ra tsi iin ra cuaa nda cacu ra. <sup>2</sup> Tan quitsahā tsicá tuhun ra tsicá tsihin ra tsi ra:

—Maestro, ¿nacuvi tyin cuaa ra ihya cacu ra? ¿A tsa cuenda cuatyí jutu ra tan sihiñi ra, o tsa cuenda cuatyí maa ra? —catyí ra naha tsihin ra.

<sup>3</sup> Tan nacahān ra Jesús tan catyí ra:

—Ñavin tsa cuenda cuatyí maa ra, tan ndi ñavin tsa cuenda cuatyí jutu ra tan sihiñi ra. Cuaa maa ra tyin tacan tan cuví janaha Nyoo tunyee iñi ra tsi nyivi tsa cuenda ra can. <sup>4</sup> Tsa tsinu cahñi, cuñi tsi tsa javaha yu tyiñu ra tsa jaquitsi tsi yu. Tyin tsa yatyin cuii cua cuaa tan ña cua cuví ca jaha tyiñu yo. <sup>5</sup> Tsa ndi nyí yu nu ñuhu ñayivi ihya, ñuhu jandunditsín [cuenda nyivi iyó] nu ñuhu ñayivi ihya cuví yu.

<sup>6</sup> Tsa yahā tsa cahān ra Jesús tacan, tan tiví siñi ra nu ñuhu. Tan jatyiñi ra luxu nyahyu tsihin siñi ra tan tyaā ra tinuu ra cuaa can. <sup>7</sup> Tacan tan catyí ra tsihin ra cuaa can:

—Cuaahan cua nacatya nuu un nda tanque Siloé.

—Sivi can cuñi tsi catyí: “Jacuhñu Yu Tsi Un.”

Tacan tan ra cuaa can tsahān ra tsinacatya ra nuu ra. Tan cuhva tsa tsaā nyico ra, tsa nyehé ra. <sup>8</sup> Tacan tan nyivi iyó yatyin yuvehe ra, tan nyivi tsa nyehé tsi ra tsa ndi cuaá ra catyí ñi:

—¿A ñavin ra ihya cuví ra tuhvá tsinyaá tsicán xuhun? —catyí ñi.

<sup>9</sup> Tan yihí ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

<sup>10</sup> Tacan tan quitsahā tsicá tuhun ñi tsi ra:

—¿Tan nácaa tyin cuví nyehé un vityin? —catyí ñi.

<sup>11</sup> Tan catyí ra:

—Ra tsa nañi Jesús, ra ican jatyiñi nyahyu tan tyaā ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tsahān yu. Tan tsa yahā nacatya yu nuu yu tan nanyehé yu —catyí ra tsihin ñi.

<sup>12</sup> Tacan tan quitsahā tsicá tuhun ñi tsi ra:

—¿Tan numaa nyí ra can vityin?

Tan catyí ra tsihin ñi:

—Ña tsitó yu —catyí ra.

**Nu janahmā ra cuví fariseo naha ra tsi ra cuaa tsa nduvahā**

<sup>13</sup> Tacan tan tsindacā ñi tsi ra tsa nduvahā can nuu ra cuví fariseo naha ra. <sup>14</sup> Tyin quivi tsa jatyiñi ra Jesús nyahyu tan janduvahā ra tsi ra can, cuví tsi quivi quitatú nyivi. <sup>15</sup> Yacan cuenda ra cuví fariseo naha ra tsicā tuhun nyico ra naha tsi ra nácaa tyin nyehé ra. Tan catyí ra tsihin ra naha:

—Tyaā ra nyahyu tinuu yu, tan nacatya nuu yu tan vityin nditsin nyehé yu —catyí ra tsihin ra naha.

<sup>16</sup> Tacan tan catyí juhva ra fariseo naha ra:

—Ra tsa javahā yacan ñavin cuenda Nyoo cuví ra, tyin ña tyaá yahvi ra quivi quitatú yo —catyí ra naha.

Maa tyin catyí inga ra naha

—¿Nacaa tsa cuví javahā ra tsa iyo ihya tatun ra iyó cuatyí cuví ra? —catyí ra naha.

Tan siin siin tsa caahán ra naha. Tan natahvī sava ra naha. <sup>17</sup> Tan tsicā tuhun nyico ra naha tsi ra nduvahā can inga tsaha, tan catyí ra naha tsihin ra:

—¿Tan yooho, náa catyí un tuhun ra tsa janduvahā tinuu un? —catyí ra naha.

Tan nacahān ra tan catyí ra:

—Yuhu catyí yu tyin ra cuví ndusu yuhu Nyoo cuví ra —catyí ra.

<sup>18</sup> Maa tyin ra cuví ityi nuu tsihin nyivi Israel ña cuñí ra naha tsinu iñi ra naha tsa cuaā ra can tan nanyehe ra. Nda cuando canā ra naha tsi jutu ra tan tsi sihi ra.

<sup>19</sup> Tan tsicā tuhun ra naha tsi ñi, tan catyí ra naha:

—¿A ra ihya cuví sehe ndo tsa catyí ndo tyin cuaā ra cacū ra? ¿Nacaa tsa cuví nyehé ra vityin? —catyí ra naha.

<sup>20</sup> Nacahān jutu ra tan sihi ra tan catyí ñi:

—Tsitó ndi tyin ra ihya cuví sehe ndi. Tan cuaa ra quivi cacū ra. <sup>21</sup> Maa tyin ña tsitó ndi nácaa tsa cuví nyehé ra vityin. Tan ndi ña tsitó ndi yóo janduvahā tinuu ra. Ndaça tuhun maa ndo tsi ra. Tsa iyó tucu maa cuiya ra. Tan cuví nacatyí tuhun maa ra tsihin ndo —catyí ñi tsihin ra naha.

<sup>22</sup> Jutu ra tan sihi ra caahán ñi tacan tsa cuenda tyin yuuhvi ñi tsi ra cuví ityi nuu tsihin nyivi Israel naha ra, tyin tsa natuhun tahan ra naha tyin cua tava cuii ra naha tsi nyivi vehe ñuhu, tun cahan ñi tyin ra Jesús cuví ra Cristo, ra tsa jaquitsi Nyoo. <sup>23</sup> Yacan cuenda catyí ñi: “Ndaça tuhun ndo tsi maa ra. Ra tsa ñihi cuví ra.”

<sup>24</sup> Tacan tan canā nyico ra naha tsi ra tsa nduvahā can inga tsaha. Tan catyí ra naha tsihin ra:

—Nda nuu Nyoo cahan tsa nditsa tsihin ndi. Tyin nyuhu tsitó ndi tyin ra ican, ra iyó cuatyí cuví ra —catyí ra naha.

<sup>25</sup> Tacan tan nacahān ra tsa nduvahā can tan catyí ra:

—Yuhu ña tsitó yu tatun ra iyó cuatyí cuví ra, a ñavin. Intuhun ñi tsa tsitó yu tyin yuhu ra cuaa cuví yu, maa tyin vityin nditsin nyehé yu —catyí ra.

<sup>26</sup> Tan tsicā tuhun nyico ra naha tsi ra inga tsaha tan catyí ra naha:

—¿Náa icā ra tsihin un? ¿Nacaa icā ra tan nanyehe un? —catyí ra naha tsihin ra.

<sup>27</sup> Tan catyí ra:

—Tsa cahan yu tsihin ndo, tan ña tyaá yahvi ndo tsi yu. ¿Náa cuenda cuñí ndo tsa cahan yu inga tsaha? ¿A cuñí ndihi ndo cunyicun ndo tsi ra can?

<sup>28</sup> Tacan tan nduxaān ra naha tsi ra, tan catyí ra naha:

—Yooho tsa yihí un cuenda ra, maa tyin nyuhu cuenda ra Moisés ra tsa tsicoq tsa naha yihí ndi. <sup>29</sup> Nyuhu tsitó ndi tyin Nyoo cahan tsihin ra Moisés tahan tsa naha. Maa tyin ra can, ndi ña tsitó ndi numaa quee ra —catyí ra naha.

<sup>30</sup> Tacan tan nacahān ra tsa nduvahā can tan catyí ra:

—¿Naa tsa iyo cahnu cuví tsehe! Nyooho ña tsitó ndo numaa quee ra, tan jananyehe ra tsi yu. <sup>31</sup> Tsitó vaha yo tyin Nyoo ña tyaá soho ra nu caahán ra iyó cuatyí. Maa tyin ra jacahnú tsi ra tan icá ra cuhva cuñí ra, tyaá

soho Nyoo tsa caahán ra. <sup>32</sup> Ndi iin tsaha tan ñaha ca cuñi yo tatun iyó iin ra jananyehe tsi iin ra cuaā nda cacū ra. <sup>33</sup> Tun tsatyin ra ihya tan ñavin cuenda Nyoo vatsí ra, nduve tsa cuví javaha ra —catyí ra tsihin ra naha.

<sup>34</sup> Tacan tan catyí ra naha tsihin ra:

—Yooho ra iyó cuatyí cuví un nda cacū un. ¿Tan cuñí un jacuaha un tsi nyuhu? —catyí ra naha.

Tan tavā cuii ra naha tsi ra vehe ñuhu.

### Nyivi tsa nduve tuhun Nyoo iyó añima tumaa tsa cuaa ñi

<sup>35</sup> Tsitó ra Jesús tyin tavā ra naha tsi ra tsa janduvahā ra vehe ñuhu. Tan tsa ñihí tahan ra tsihin ra tan catyí ra tsihin ra:

—¿A tsinú iñi yooho tsa caahán Rayñi tsa quee nda gloria? —catyí ra tsihin ra.

<sup>36</sup> Tan nacahān ra tan catyí ra:

—Cati tuhun tsihin yu, taa, yóo ra cuví ra tyin tsinú iñi yu tsi ra —catyí ra tsihin ra.

<sup>37</sup> Tan catyí ra Jesús:

—Tsa nyehé un tsi ra. Tan juvin ra natuhún tsihin un —catyí ra tsihin ra.

<sup>38</sup> Tacan tan tsicuiñi tsiti ra tsaha ra Jesús tan catyí ra tsihin ra:

—Tsinú iñi yu tsi un, Jutu Mañi yu —catyí ra tsihin ra Jesús.

<sup>39</sup> Tan catyí ra Jesús:

—Yuhu vatsí yu tyin catyí tuhun yu tsa iyó añima nyivi iyó nu ñuhu ñayivi ihya. Tyin nyivi cuaa, ñi ña tsitó tuhun Nyoo cua nanyehe ñi tyin coo tuhun Nyoo añima ñi. Tan nyivi cuñí tyin nditsin nyehé ñi, catyí ñi tyin tsitó ñi tuhun Nyoo, coto ñi tyin cuaa ñi tyin ña tsinú iñi ñi tsi yu —catyí ra Jesús.

<sup>40</sup> Tacan tan juhva ra fariseo tsa nyecú tsihin ra Jesús tsiñi ra naha tsa caahán ra, tan catyí ra naha tsihin ra:

—¿A cuaa ndihi tucu nyuhu? —catyí ra naha.

<sup>41</sup> Tacan tan catyí ra Jesús tsihin ra naha:

—Tun tsatyin cuaa ndo cua coto ndo tyin tsiñi ñuhu tuhun Nyoo tsi ndo, tan ña cua coo cuatyí ndo. Maa tyin catyí ndo tyin nyehé ndo tan tsitó ndo, yacan cuenda ndoó cuatyí ndo siqui ndo —catyí ra tsihin ra naha.

**Mbee ticatyí jana Nyoo cuví nyivi yihí cuenda ra, tan tsitó ñi tsi ra tsa jaquitsi Nyoo tyin jahá cuenda ra tsi ñi**

**10** ‘Caahán nyico ra Jesús tan catyí ra:

—Tsa nditsa catyí yu tsihin ndo, tatun iin ra cua quihvi tsitsi cora mbee ticatyí, tan ñavin yuhu cora quihvi ra, ra ican cuví ñasuhu. <sup>2</sup> Maa tyin ra tsa quihvi ityi yuhu cora, ra jahá cuenda mbee can cuví ra. <sup>3</sup> Ra nyii yuhu cora can nuña ra tyin quihvi ra jahá cuenda mbee can. Tan mbee can nacotó ti naha ti ndusu ra. Intuhun intuhun ti tan iyó sivi ti jahá ra, caná ra tsi ti tan tavá ra tsi ti ityi tsata cora. <sup>4</sup> Tsa yahā tavā ra tsi ti, tan cuahán ra ityi nuu tan nyicún ti naha ti tsi ra, tyin nacotó ti ndusu ra. <sup>5</sup> Maa tyin tatun nyivi tsa ña nacotó



tí ndusu, tsinú tí nuu ñi tan ña cuahán tí cuanyicún tí tsi ñi.

<sup>6</sup>Tyehen cahān ra Jesús tsihin nyivi. Maa tyin maa ñi ña cutuñi iñi ñi náa tuhun caahán ra tsa caahán ra tacan.

### Ra Jesús cuví ra jahá cuenda vaha mbee ticatyí

<sup>7</sup>Tacan tan catyí ra Jesús tsihin nyivi inga tsaha:

—Tsa nditsa catyí yu tsihin ndo, yuhu cuví tumaa iin yuhu cora nu quihví nyivi yihí cuenda yu tan cuví ñi tumaa mbee ticatyí jana yu. <sup>8</sup>Tandihí ra tsa quitsi tsa ndi cumañi quitsi yu, ra suhu cuví ra naha. Maa tyin mbee jana yu ña tyaa yahvi tí naha tí tsa cahān ra naha.

<sup>9</sup>Yuhu cuví yuvehe gloria. Nyivi tsa cua quihví yuvehe can, cua cacu ñi tan ña cua cuhun ca ñi anyaya. Tan cuví ñi tumaa mbee tsa quihví tan quitá tsitsi cora can. Tan ñihí tí cuhu tsatsí tí.

<sup>10</sup>Iin ra ñasuhu, vatsí ra, vatsí suhu ra, vatsí cahñi ra, vatsí jativi ra. Maa tyin yuhu vatsí yu tyin coo vaha ndo ñayivi nyitó tsa ña cua naa maa. <sup>11</sup>Yuhu cuví ra vaha jahá cuenda mbee. Tyin ra jahá cuenda mbee tsahá ra ñayivi ra tsa cuenda mbee can. <sup>12</sup>Maa tyin ra cuví musu, tatun nyehé ra vatsí lobo tsa cuví quití xaan, nacóo ra mbee jana tsitoho ra. Tan tsinú ra. Tyin ñavin jana maa ra cuví tsi tí naha tí. Tacan tan cua tñin quití xaan can tsi mbee can. Tan jacunu tí tsi mbee can ityi can tan ityi ihya. <sup>13</sup>Musu can tsinú ra tyin jahá tyiñu ra tsa cuenda xuhun ñi. Tan ña jahá cuenda vaha ra tsi mbee can, tyin ñavin jana ra cuví tsi tí naha tí.

<sup>14</sup>Yuhu cuví ra jahá cuenda vaha mbee jana yu. Tan nacotó yu tsi tí naha tí. Tan nacotó tucu maa tí naha tí tsi yu, <sup>15</sup>tumaa tsa nacotó Jutu yu tsi yu, tan yuhu nacotó yu tsi ra. Yuhu tsahá yu ñayivi yu cuenda mbee jana yu. <sup>16</sup>Iyó tucu inga mbee jana yu tsa ña yihí tsitsi cora ihya. Cuñi tsi tsa cuhun yu cunaquihin yu tsi tí naha tí. Tan cua tyaa yahvi tí tsi yu. Tan iin ñi nu cua quihí tandihí tí. Tan cua coo intuhun ñi ra cua jaha cuenda tsi tí naha tí.

<sup>17</sup>Jutu yu cuñi ra tsi yu tyin tsahá yu ñayivi yu tsacatyí nyivi. Maa tyin yaha can, tan cua nacuhva nyico ra ñayivi yu. <sup>18</sup>Yoñi cuvi quihin nyaá ñayivi yu, tyin tsa iyó iñi maa yu tan tsahá yu can. Iyó ndatu tsi yu tsa cuhva yu ñayivi yu tan cúu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaa Jutu yu tsi yu —catyí ra Jesús.

<sup>19</sup>Tsa tsiñi nyico ra tsa cuví ityi nuu tsihin nyivi Israel naha ra tsa caahán ra Jesús tacan, natahví sava nyico ra naha inga tsaha. <sup>20</sup>Tan cuaha xaan ra naha catyí:

—¿Nacuenda tyaa yahvi ndo tsi ra can? Tan tatyí ña vaha yihí tsi ra, sana jiñi ra —catyí ra naha.

<sup>21</sup>Tan inga tucu ra naha catyí:

—Yoñi nyivi yihí tatyí ña vaha tan cuví cahan ñi tacan. ¿A cuví jananyehe tatyí ña vaha can tsi iin ra cuaa? —catyí ra naha.

### Nu ña cuñi ra cuví ityi nuu tsihin nyivi Israel tyaa yahvi ra naha tsi ra Jesús

<sup>22</sup>Yoo vitsin cuví tan nyivi iyó ñuu Jerusalén jacahnú ñi vico tsa cuenda nu natsinú cuiya nu nacuhva cuenda ñi vehe ñuhu cahnu. <sup>23</sup>Tan ra Jesús tsicá nuu ra vehe ñuhu can ityi nu nañi corredor ra Salomón. <sup>24</sup>Tan tsinu nduvi ra cuví ityi nuu tsihin nyivi Israel naha ra tsi ra Jesús. Tan quitsahā tsicá tuhun ra naha tsi ra:

—¿Ama cua cahan catsi un tsihin ndi tatun juven un cuví ra Cristo ra tsa jaquitsi Nyoo? Cahān catsi tsihin ndi vityin ihya —catyí ra naha.

<sup>25</sup>Tan catyí ra Jesús:

—Tsa yahā cahān yu tsihin ndo, tan ña tsinú iñi ndo tsa cahān yu. Tyiñu javahá yu nuu Jutu yu yacan cuví tsa ndaa tsa cuenda yu. <sup>26</sup>Maa tyin nyooho ña tsinú iñi ndo tsi yu tyin ñavin mbee jana yu cuví tsi ndo. Tumaa cuhva tsa cahān jihna yu tsihin ndo. <sup>27</sup>Mbee jana yu nacotó tí naha tí ndusu yu, tan yuhu nacotó yu tsi tí naha tí. Tan nyicún tí tsi yu. <sup>28</sup>Yuhu tsahá yu ñayivi nyito tsa ña cua naa maa coo tí. Tan ña cua cunaa tí. Tan ndi yoñi cuví quihin nyaa tsi tí naha tí tsitsi ndaha yu. <sup>29</sup>Maa Jutu yu tsahā tsi tí naha tí tsi yu. Tan cahnu ca cuví maa ra tan ñavin ca tandihí nyivi. Tan yoñi cuví quihin nyaa tsi tí tsitsi ndaha ra. <sup>30</sup>Yuhu tan Nyoo Jutu yu, iin ñi cuví ndi —catyí ra Jesús.

<sup>31</sup>Tacan tan ra cuví ityi nuu tsihin nyivi Israel can quihin nyico ra naha yuu tyin cañi ra naha tsi ra. <sup>32</sup>Tan catyí ra Jesús tsihin ra naha:

—Cuaha xaan tsa vaha javahā yu nuu ndo tsihin tunyee iñi Jutu yu. ¿Tan ndaa tsa ña taahán iñi ndo tyin cua cañi ndo tsi yu tsihin yuu? —catyí ra Jesús tsihin ra naha.

<sup>33</sup>Tan catyí ra cuví ityi nuu tsihin nyivi Israel can naha ra:

—Ñavin tsa cuenda tsa vaha javahā un cua cañi ndi tsi un tsihin yuu, cua cañi ndi tsi un tsa cuenda tyin tsi-coo cuatyí un nuu Nyoo tsihin tsa caahán un. Tyin iin rayiñi ñi cuví un, tan jahá un tumaa tsa Nyoo cuví un —catyí ra naha tsihin ra.

<sup>34</sup>Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyooho nyoo cuví ndo”, catyí Nyoo. <sup>35</sup>Tsitó yo tyin tsa caahán tuhun Nyoo, ña cua cuvi catyí yo tyin ña nditsa. Tan Nyoo jacunañi ra nyoo tsi nyivi naquihín tsa caahán ra. <sup>36</sup>Tatun maa Nyoo nacatsi tsi yuhu tan jaquitsi ra tsi yu nu ñuhu ñayivi ihya ¿nácaa tsa catyí nyooho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu? <sup>37</sup>Tatun ña javahá yu tsa javahá Jutu yu, ña tsjñu iñi ndo tsi yu. <sup>38</sup>Maa tyin tatun javahá yu, vasu ña cua tsinu iñi ndo tsi yu, maa tyin tsjñu iñi ndo tyiñu javahá yu. Tacan tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

<sup>39</sup>Inga nyico tsaha cuñi ra naha tyihí ra naha tsi ra vehe caa, maa tyin ra Jesús cuahán ñi ra.

<sup>40</sup>Tacan tan cuanuhu ra ityi nu caná ñicanyii inga tsiyo yutya cahnu Jordán nu jacoondutyā ra Juan tsa ji-

hna, tan ndoo ra ican. <sup>41</sup> Cuaha nyivi tsahan tsinyehe tsi ra, tan catyí ñi:

—Nditsa, vasu ndi intuhun tsa iyo ña javaha ra Juan, maa tyin tandihí tsa cahān ra cuenda ra ihya tan nditsa —catyí ñi.

<sup>42</sup> Tan cuaha xaan nyivi tsa iyó ityi can tsinu iñi tsa caahán ra Jesús.

### Nu tsihí ra Lázaro

**11** Ñuu Betania tsicoo iin ra cuuhvi tsa nañi Lázaro. Tan ñuu can iyó ña María tsihin ña Marta tahan ña. <sup>2</sup> Ña María, cuhva ra Lázaro, juvin ña cuví ñaha tsa tyoso ndutya tami tsaha Jutu Mañi yo, tan jana ityi ña tsaha ra tsihin ixi jiñi ña. <sup>3</sup> Tacan tan nduvi taahan ñi, ña María tan ña tahan ña, jacoto ñi tsi ra Jesús tan catyí ñi:

—Ra vaha iñi tsi un, cuuhví xaan ra.

<sup>4</sup> Tsa tsiñi ra Jesús yacan tan catyí ra:

—Cuehe can ña cua cahñi can tsi ra. Cuuhví ra tyin quivi nduvaha ra cua nyehe nyivi tyin cahnu xaan cuví Nyoo tan tacan tucu Sehe ra —catyí ra Jesús.

<sup>5</sup> Cuñi xaan ra Jesús tsi ña Marta tan ña tahan ña, tan ra Lázaro cuhva ñi. <sup>6</sup> Maa tyin quivi tsa tsiñi ra tyin cuuhví ra Lázaro, ndoo ra uvi quivi ca nu nyii ra. <sup>7</sup> Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

<sup>8</sup> Tacan tan ra tsicá tsihin ra catyí ra naha tsihin ra:

—Maestro, ñaha ca ndunaha tsa cuñi ra cuví ityi nuu tsihin nyivi Israel naha ra cahñi ra naha tsi un tsihin yuu. Tan vityin, cuñi nyico un cuhun un inga tsaha ¿Nacuenda?

<sup>9</sup> Tan catyí ra Jesús:

—¿A ñavin utsi uvi hora iyó tsa iin quivi? Tyin tatun tsinu cahñi tsicá nuu iin ra, ña cua nduva ra tyin nditsin nyehé ra ñuhu tsa jandunditsín nu ñuhu ñayivi ihya. <sup>10</sup> Maa tyin tatun tsacuaa tsicá nuu ra, cuví nduva ihñi ra tyin nduve ñuhu Nyoo jandunditsín nu cuahan ra.

<sup>11</sup> Tacan tan quitsahā catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cuhun yu jandoto yu tsi ra —catyí ra tsihin ra naha.

<sup>12</sup> Tacan tan catyí nyico ra tsicá tsihin ra:

—Taa, tatun quixí ra, cuñi tsi catyí can tyin cua nduvaha ra —catyí ra naha.

<sup>13</sup> Maa tyin ra Jesús cuñi ra catyi ra tyin ra Lázaro tsa tsihí ra. Tan ra tsicá tsihin ra, cuñi maa ra naha tyin nditsa tsa quixí ra. <sup>14</sup> Tacan tan cahān catsi ra Jesús tsihin ra naha:

—Ra Lázaro tsa tsihí ra. <sup>15</sup> Tan cusif iñi yu tyin yoñi yu nyii ndacan. Tyin tacan vaha ca tsa cuenda nyooho na tsinu iñi ndo tsa caahán yu. Cohon ndo cunyehe yo tsi ra —catyí ra Jesús tsihin ra naha.

<sup>16</sup> Tacan tan ra Tomás, tsa jacunañi ra naha “tinihi”, catyí ra tsihin inga ra tsicá tsihin ra Jesús:

—Cohon ndihí yo tyin cúu yo iin caa ñi tsihin ra —catyí ra.

### Ra Jesús cuví ra janandotó tsi yo tan tsahá ra ñayivi nyito coo yo

<sup>17</sup> Tsa tsaq ra Jesús Betania, ñihí tuhun ra tyin tsa cumi quivi nyii ra Lázaro tsitsi ñuhú. <sup>18</sup> Ñuu Betania can canyí tsi yatyin ñi nu canyí ñuu Jerusalén, tumaa iin cuhva tsa uvi kilómetro sasava. <sup>19</sup> Tan cuaha ra cuví ityi nuu tsihin nyivi Israel cuahan cua nyehe nu nyii ña Marta tan ña María cua jatyinyee ra naha tsi ñi tyin tsihí cuhva ñi. <sup>20</sup> Tan ñihí tuhun ña Marta tyin tsa cua tsa ra Jesús. Tan cuahán ña cua jatahan ña tsi ra. Maa tyin ña María ndoo ña yuvehe. <sup>21</sup> Tan catyí ña Marta tsihin ra Jesús:

—Jutu mañi yu, tun tsatyin ihya nyii maa un, ña cua cúu cuhva yu. <sup>22</sup> Maa tyin yuhu tsitó yu tyin Nyoo cua javaha ra tandihí tsa ndacan un tsi ra —catyí ña tsihin ra.

<sup>23</sup> Tan catyí ra Jesús tsihin ña:

—Cuhva un cua nandoto ra.

<sup>24</sup> Tan catyí ña Marta:

—Nditsa, tsitó yu tyin cua nandoto ra quivi nandoto ndiyi nu cua cundihí quivi —catyí ña.

<sup>25</sup> Tacan tan catyí ra Jesús tsihin ña:

—Yuhu cuví ra janandotó ndiyi. Tan tsahá yu tsa coo nyitó nyivi. Nyivi tsinú iñi tsa caahán yu, vasu tsa tsihí ñi maa tyin coo nyico ñi. <sup>26</sup> Tan tandihí ñi nyitó tan tsinú iñi ñi tsi yu, ña cua cúu ñi. ¿A tsinú iñi un tsa caahán yu ihya? —catyí ra tsihin ña.

<sup>27</sup> Tan catyí ña:

—Tsinú iñi yu, Jutu Mañi yu, tyin yooho cuví ra Cristo Sehe Nyoo, ra tsa nyaá tsa quitsi nu ñuhu ñayivi ihya —catyí ña.

### Nu tsacu ra Jesús nu ñaña ra Lázaro

<sup>28</sup> Tsa yaha tsa cahān ña Marta tacan, tan tsahan ña tsiquihñi ña tsi ña María tahan ña, tan xeehe ñi cahān ña tsihin ña:

—Tsa tsaq Ra Maestro ihya. Tan caná ra tsi un —catyí ña.

<sup>29</sup> Tsa tsiñi ña María tsa caahán ña, numi xaan ña nduvitā ña, tan cuahán ña nu nyii ra Jesús. <sup>30</sup> Tan ñaha ca quihvi ra Jesús tsitsi ñuu hora can, ndi nyii ra nu nañihí ña Marta tsi ra. <sup>31</sup> Tan nda yuvehe ña María, yucú ra cuví ityi nuu tsihin nyivi Israel jatyinyee ra naha tsi ñi. Tan nyehe ra naha tyin numi quitā ña. Tan cuñi maa ra naha tyin cuahán ña nu ñaña cua vacu ña. Tan cuahán ndihí ra naha tsata ña.

<sup>32</sup> Tan cuhva tsa tsaq ña María nu nyii ra Jesús tsicuiñi tsiti ña tsaha ra, tan catyí ña:

—Jutu Mañi yu, tun tsatyin nyii un ihya, ña tsihí ra cuhva yu —catyí ña.

<sup>33</sup> Tsa nyehe ra Jesús tyin tsacú ña María tan tsacú ra Israel tsa cuahan tsihin ña, nducuihya xaan cuñi ra.

<sup>34</sup> Tan tsicā tuhun ra tsi ñi:

—¿Nu maa tinyii ndo tsi ra? —catyí ra.

Tan catyí ñi:

—Jutu Mañi yu, cohon tan nyehe un —catyí ñi tsihin ra.

<sup>35</sup> Tan tsacy ra Jesús.

<sup>36</sup> Tacan tan catyí ra Israel can naha ra:

—Nyehe ndo tyin yahá xaan cuñi ra tsi ra —catyí ra naha.

<sup>37</sup> Maa tyin catyí juhva ra naha:

—Ra ihya jananyehé ra tsi ra cuaa. ¿Nacuvi tyin ña cuví ica ra iin cuhva tan ña cúu ra Lázaro ihya? —catyí ra naha.

### Nu janandoto ra Jesús tsi ra Lázaro

<sup>38</sup> Nducuihya xaan cuñi nyico ra Jesús inga tsaha tan natuhva ra nu ñaña can. Tyin tsitsi yavi yuu cuví can.

Tan ndasí iin yuu yuhu can. <sup>39</sup> Tan catyí ra Jesús:

—Jatsiyo ndo yuu can —catyí ra.

Tan ña Marta, cuhva ndiyi can, catyí ña:

—Maa tyin tsa caná xico iñi, Jutu Mañi yu, tyin tsa cumi quivi tsa nyíi ra ican —catyí ña.

<sup>40</sup> Maa tyin catyí ra Jesús tsihin ña:

—¿A ña caahán yu tsihin un tyin tatun tsinú iñi un, cua nyehe un tsa cahnu cuví Nyoo? —catyí ra tsihin ña.

<sup>41</sup> Tacan tan jatsiyo ra naha yuu can. Tan nanyehé ndaa ra Jesús ityi andivi, tan catyí ra:

—Tyatya, Jutu Mañi yu, tyahvi nyoo tsi un tyin tsiñi un tsa caahán yu. <sup>42</sup> Yuhu tsitó yu tyin maa ñi maa tsiñi un tsa caahán yu. Maa tyin tyehen caahán yu tsa cuenda tsa vaha tsi nyivi nyecú ihya, na tsinu iñi ñi tyin maa un jaquitsi tsi yu —catyí ra Jesús tsihin Nyoo.

<sup>43</sup> Tsa yahá tsa cahán ra tacan, caná tsaa ra, tan catyí ra:

—¿Lázaro, quita nu nyíi un juvin!

<sup>44</sup> Tan quita ra tsa tsihi can, cavá nuu iin jahma tsi ra, tan nuuhñi ndaha ra tan tsaha ra tsihin jahma. Tan nuuhñi nuu ra tsihin iin jahma tumaa javahá nyivi Israel tsihin ndiyi. Tan catyí ra Jesús tsihin nyivi nyecú ican:

—Ndatsi ndo tsi ra. Tan jaña ndo tsi ra na cuhun ra —catyí ra Jesús tsihin ñi.

### Nu nducú cahñi ra naha tsi ra Jesús

(Mt. 26.1-5; Mr. 14.1-2; Lc. 22.1-2)

<sup>45</sup> Tan cuaha xaan ra cuví ityi nuu tsihin nyivi Israel tsa tsahan tsihin ña María quitsahá tsinú iñi ra naha tsa nyehe ra naha tsa javahá ra Jesús. <sup>46</sup> Maa tyin juhva ra naha tsahan ra naha tsijacoto ra naha tsi ra fariseo naha ra tsa javahá ra Jesús. <sup>47</sup> Tacan tan ra fariseo can naha ra tan ra cuví ityi nuu tsihin ra jutu naha ra jatitahan ra naha tsi ra tuhvá ndu iin naha ra tan catyí ra naha:

—¿Nacua cua javaha yo? Tyin cuaha xaan tsa iyo javahá ra can. <sup>48</sup> Tatun cuhva yo tsa javaha ca ra tacan, tandihí nyivi tan cua tsinu iñi ñi tsi ra. Tan ra cumí tyiñu nda ñuu Roma cua quitsi ra naha tan cua caní ra naha vehe ñuhu yo tan ñuu yo —catyí ra naha.

<sup>49</sup> Maa tyin ra Caifás ra tsahnu tsa cuví ityi nuu tsihin ra jutu naha ra cuiya can, cahán ra tan catyí ra tsihin ra naha:

—Nyooho nduve maa náa tsitó ndo. <sup>50</sup> Ndi ña cutuñi iñi ndo tyin vaha ca tsa cúu intuhun ñi rayi tsa cuenda tandihí nyivi ñuu, tan ñavin ca tsa cúu tandihí yo —catyí ra Caifás.

<sup>51</sup> Ra Caifás can ñavin tsa cuñi maa ra tan caahán ra, tyin ra cuví ityi nuu tsihin tandihí jutu cuví ra cuiya can, yacan cuenda maa Nyoo jacahan tsi ra nu catyí ra tyin ra Jesús cua cúu ra tsa cuenda tandihí nyivi ñuu Israel.

<sup>52</sup> Tan ñavin tsa cuenda maa ñi maa nyivi can, maa tyin cua jandu iin ra tsi tandihí nyivi cuví sehe Nyoo tsa iyó tandihí ca ñuu. <sup>53</sup> Tacan tan nda quivi can tan ra cuví ityi nuu tsihin nyivi Israel can naha ra, nducú ra naha cuhva cahñi ra naha tsi ra Jesús.

<sup>54</sup> Yacan cuenda ña tsicá nuu nditsin ca ra Jesús nu iyó nyivi Israel. Quee ra Judea can. Tan cuahán ra iin ñuu tsa nañi Efraín tsa canyíi yatyin ñi nu tsiqui, nu cuví ñuhu ityi. Tan ndoó ra ican tsihin ra tsicá tsihin ra.

<sup>55</sup> Ña cuaha ca quivi tan tahan tsi vico cuenda nyivi Israel, vico tsa nañi pascua. Tan cuaha xaan nyivi quee ñi ñuu ñi tan cuahán ñi nda ñuu Jerusalén cua javaha ñi tsa tuhvá maa ñi javahá tsa janduvahá ñi tsi ñi nuu Nyoo tsa ndi cumañi ca tahan tsi quivi vico can. <sup>56</sup> Nanducú ñi tsi ra Jesús. Tan cuhva tsa nyecú ñi tsitsi vehe ñuhu cahnu can tan tsicá tuhun tahan ñi, tan catyí ñi:

—¿Nacaa cuñi nyooho? ¿A cua quitsi ra can vico ihya, o ña cua quitsi ra? —catyí ñi.

<sup>57</sup> Tan ra cuví fariseo tan ra cuví ityi nuu tsihin jutu, catyí ra naha tyin tatun ndaa nyivi tsitó nu nyíi ra Jesús, na çatyí tuhun ñi. Tyin cuquihin ra naha tsi ra tyin cunyi ra vehe caa.

### Nu tyosó ña María ndutya tami tsaha ra Jesús

(Mt. 26.6-13; Mr. 14.3-9)

**12** Cumañi iñu quivi ca tsa tahan tsi vico pascua, tan tsaq ra Jesús ñuu Betania nu iyó ra Lázaro, ra tsa janandoto ra. <sup>2</sup> Ican javahá ñi tsa cuxiñi ra Jesús. Ña Marta tyihí ña coho nu mesa. Tan tsinyaq ra Jesús nu mesa. Tan nyaá ndihí tucu ra Lázaro tsihin ra.

<sup>3</sup> Tacan tan quihin ña María tumaa sava litru ndutya tami tsa tsinu tsihin maa ñi maa yucu tsa nañi nardo, iin tsa yahvi xaan nyaá. Tan tyiso ña ndutya tami can tsaha ra Jesús. Yahá can tan jana ityi ña tsaha ra tsihin ixi jiñi ña. Nanñi cahnu maa tsitsi vehe can tsity xico ndutya tami can. <sup>4</sup> Tan ican nyíi tucu ra Judas Iscariote, sehe ra Simón. Cuví ra iin ra tsicá tsihin ra Jesús. Tan juvin ñi maa ra cuví ra tsa cua xico tsi ra Jesús tsi nu xaan iñi tsi ra nahnu. Tan quitsahá catyí ra Judas can tsihin ñi can:

<sup>5</sup> —¿Nacuenta ña xico ndo ndutya tami ihya tsi nyivi, tan cuhva ñi cuenda mil tsi ndo tsa cuenda can, (uñi cientu denario) tan jatyinyee ndo tsi nyivi ndaahvi? —catyí ra.

<sup>6</sup> Caahán ra Judas yacan tyin ra ñasuhu cuví ra, ñavin tsa cundaahví iñi ra nyehé ra tsi nyivi ndaahvi. Tyin maa ra yihí ndaha yitin nu yihí xuhun ra naha, tan tuhvá ra suhu tsa tyihí ra naha tsitsi yitin can. <sup>7</sup> Tacan tan catyí ra Jesús tsihin ra:

—Jaña tsi ña, tyin ñaha ihya javahā ña tyehen tsa cuenda tsa cua quihvi cuñu ñuhu yu tsitsi ñuhu. <sup>8</sup> Nyivi ndaahvi tacan ñi nyecú maa ñi tsihin ndo, maa tyin yuhu ña cua cunyaa ca yu tsihin ndo tacan —catyí ra Jesús tsihin ra Judas.

### Nu nducú cahñi ndihí ra Israel naha ra tsi ra Lázaro

<sup>9</sup> Cuaha xaan nyivi Israel ñihí tuhun ñi tyin ra Jesús nyíí ra Betania, tan tsahān ñi ican. Ñavin intuhun ñi ra Jesús cuñí ñi nyehe ñi tyin cuñí ndihí tucu ñi nyehe ñi tsi ra Lázaro, ra tsa janandotō ra Jesús. <sup>10</sup> Tacan tan ra cuví ityi nuu tsihin jutu natuhun tahan ra naha tyin cua cahñi ndihí ra naha tsi ra Lázaro. <sup>11</sup> Tyin tsa cuenda ra tan cuaha xaan nyivi Israel quitá tsiyo ñi tan quitsahā tsinú iñi ñi tsi ra Jesús.

### Nu quihvi ra Jesús ñuu Jerusalén

(Mt. 21.1-11; Mr. 11.1-11; Lc. 19.28-40)

<sup>12</sup> Cuaha xaan nyivi tsaā ñi ñuu Jerusalén tsa cuví vico pascua. Tan tsa inga quivi tsitō ñi tyin ra Jesús cua tsaā ra ñuu can. <sup>13</sup> Tacan tan tsahnyā ñi ndaha ndicaha tan cuahán ñi cua jatahan ñi tsi ra Jesús. Tan caná tsaā ñi, tan catyí ñi:

—¡Cahnu xaan cuví Nyoo! ¡Nasoco xaan Nyoo tsi ra vatsí ihya tsihin tunyee iñi Nyoo! ¡Nasoco xaan Nyoo tsi Rey cuenda yo nyivi Israel! —catyí ñi, caná tsaā ñi.

<sup>14</sup> Tan ñihí ra Jesús iin burru tan tsicosō ra tsi ti tu-maa catyí maa nu tutu Nyoo tyehen:

<sup>15</sup> Ña ñayuhvi ndo nyivi ñuu Sión

Nyehe ndo, vatsí Rey ndo.

Yosó ra iin burru —catyí tsi nu tutu Nyoo.

<sup>16</sup> Quivi can ra tsicá tsihin ra Jesús, ña cutuñí iñi ra naha tsa nyaá nu tutu Nyoo. Maa tyin tsa yahā cuanuhu ra Jesús nda gloria, nducuhun iñi ra naha tyin tandihí yacan nyaá can nu tutu Nyoo tyin tacan cua tahan ra. Tan tacan tsa cuii tahān ra.

<sup>17</sup> Nyivi tsa nyehe quivi tsa canā ra Jesús tsi ra Lázaro tsitsi ñaña, quivi janandotō ra tsi ra, nacatyí tuhun ñi tsa nyehe ñi. <sup>18</sup> Yacan cuenda cuaha xaan nyivi tsijatahān tsi ra Jesús, tyin tsitō ñi tsa iyo tsa javahā ra.

<sup>19</sup> Tacan tan ra cuví fariseo catyí ra naha natuhun tahan ra naha:

—Tsa nyehé maa ndo tyin nduve maa náa cuví javahá yo, tyin tandihí nyivi tan cuahán ñi cuanyicún ñi tsi ra —catyí ra naha.

### Nu nanducú juhva ra tsa quee Grecia tsi ra Jesús

<sup>20</sup> Yucú tucu juhva ra Grecia mahñu nyivi tsa tsahān tsijacahnū vico ñuu Jerusalén. <sup>21</sup> Tacan tan natuhvā ra Grecia can naha ra nu nyaá ra Felipe, ra quee ñuu Bet-saida tsa canyíí Galilea, tan cahān ndaahvi ra naha tsihin ra tan catyí ra naha:

—Taa, cuñí ndi cahan ndi tsihin ra Jesús —catyí ra naha.

<sup>22</sup> Tan tsahān ra Felipe tsicahān ra tsihin ra Andrés. Tan tsahān nduvi ra naha tsicatyí tuhun ra naha tsihin

ra Jesús tyin ra Grecia can cuñí ra naha cahan ra naha tsihin ra. <sup>23</sup> Tan nacahān ra Jesús, tan catyí ra:

—Vityin tsa tsaā hora tsa cunuhu nyico yu nda nu quee yu, tan cua jacahnu jutu yu tsi yu, tsa cuví yu Rayí tsa quee nda gloria. <sup>24</sup> Tsa nditsa catyí yu tsihin ndo tyin tatun iin tsiti tan ña cua quihvi tsi ñuhu tan ña tyahyu tsi, intuhun ñi tsiti cua cuví tsi. Maa tyin tatun tyahyu tsi, ndutsaa tsi inga tsaha tan cua coo cuaha ca tsiti tsi. <sup>25</sup> Nyivi tsa cuñí xaan ñayivi iyó ñi, cua cunaa ñi. Maa tyin nyivi ña cuñí ñayivi iyó ñi nu ñuhu ñayivi ihya, cua ñihi ñi ñayivi nyitó tsa ña cua naa maa coo ñi.

<sup>26</sup> Ndáa nyooho nyivi cuñí javaha tyiñu nuu yu, naha ndo quitsi nyicun ndo tsi yu. Tan nu cunyaa yu, cunyaa ndihí nyooho tsa jahá tyiñu tyiñu yu. Tyin nyivi jahá tyiñu tyiñu yu, cua jacahnu jutu yu tsi ñi.

### Nu caahán ra Jesús nácaa cua cúu ra

<sup>27</sup> Vityin tsicá xaan iñi yu. Tan ¿náa cua cahan yu? ¿A catyí yu tsihin Jutu yu na jatsiyo ra tundoho tsa nyaá cua nyehe yu? Ña cua cahan yu tacan tyin tsa cuenda yacan vatsí yu nu ñuhu ñayivi ihya. <sup>28</sup> Vaha ca cahan yu tsihin Jutu yu tan catyí yu: “Jutu Mañi yu, jacahnu sivi un” —catyí ra Jesús.

Tacan tan cahān iin ndusu ityi andivi tan catyí tsi tyehen:

—Tsa yahā jacahnū yu sivi yu, tan cua jacahnu nyico yu inga tsaha —catyí ndusu can.

<sup>29</sup> Tan nyivi nyecú ican, tsiñi ñi ndusu can, tan catyí ñi tyin savi cahān. Tan inga ñi catyí tyin iin ángel cahān tsihin ra.

<sup>30</sup> Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu cahān ndusu can, tyin tsa cuenda tsa vaha tsi maa ndo cuví can.

<sup>31</sup> Vityin cuví cuhva tsa cua tatsi tuñi Nyoo tsi nyivi iyó nu ñuhu ñayivi. Tan vityin cuví cuhva cua tava cuii Nyoo tsi nu ndacá ñaha nu ñuhu ñayivi ihya. <sup>32</sup> Tan cuhva tsa cua ticaa nyivi tsi yu nu cruu, yacan cuví cuhva cua ixta yu tandihí nyivi cuhun ñi tsihin yu —catyí ra Jesús.

<sup>33</sup> Caahán ra tacan tsa cuenda tsa cuñí ra cutuñi iñi ñi tyin tacan cua cúu ra. <sup>34</sup> Tan nacahān nyivi tan catyí ñi tsihin ra:

—Tuhvá ndi tsiñí cahví ra naha nu libru ley yo tyin ra cuví Cristo cua coo nyitó ra tan ña cua cúu maa ra.

¿Nacaa tsa catyí yooho tyin cua ticaa nyivi tsi Rayí quee nda gloria nu cruu? Tan ¿yóo ra cuví Rayí tsa quee nda gloria tsa caahán un tuhun? —catyí ñi, tsicá tuhun ñi tsi ra.

<sup>35</sup> Tacan tan catyí ra Jesús tsihin ñi:

—Ñuhu tsa jandunditsín nu nyecú ndo, juhva ña quivi iyó tsi. Caca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyivi tsicá nu naa ña tsitó ñi nu maa cuahán ñi. <sup>36</sup> Tsiñu iñi ndo tsi yuhu ra cuví ñuhu nditsin, tsitsi tsa ndi nyíí yu tsihin ndo. Tacan tan cuví ndo nyivi iyó nu nditsin.

Tsa yahā cahān ra Jesús tacan tan jatsiyo ñi ra tsi ra nuu ñi.

**Nu caahán tsi náa cuenda ña tsinú iñi ra cuví ityi nuu tsihin nyivi Israel naha ra tsi ra Jesús**

<sup>37</sup> Vasu ndi maa cuaha xaan tsa iyo javahá ra Jesús nuu nyivi maa tyin ña tsinú maa iñi ñi tsa caahán ra.

<sup>38</sup> Tyin taahán tsi tsa cuví tumaa tsa cahān ra Isaías ra cuví ndusu yuhu Nyoo, nu cahān ra tyehen:

Jutu Mañi yu, yoñi cuñí tsinu iñi tsa caahán ndi.

Yoñi cutuñí iñi tunyee iñi tsa iyó tsi un, Jutu Mañi yu, catyí ra Isaías tahān tsanaha.

<sup>39</sup> Tsa cuenda tsa nyaá nu tutu, yacan cuenda ña cuví tsinu iñi ñi tyin juvin ñi tyaa nyico tucu ra Isaías tyehen:

<sup>40</sup> Nyoo jacuaā ra tsi ñi. Tan jandundavā ra añima ñi, tan ña cua nyehe ñi tsihin tinuu ñi, tan ña cua cutuñí iñi ñi tsihin añima ñi, tan ndi ña cua nacuhva cuenda ñi tsi ñi tsi ra tan janduvaha ra tsi ñi.

<sup>41</sup> Ra Isaías cahān ra tyehen tyin nyehe ra tsa cahnu cuví Jutu Mañi yo Jesús, tan cahān ra tuhun ra.

<sup>42</sup> Cuaha xaan nyivi Israel tsinú iñi tsi ra Jesús. Tan nda cuanda juhva ra cuví ityi nuu naha ra. Maa tyin ña jandunditsin ra naha tsi ra naha nuu nyivi tyin yuuhví ra naha tsi ra cuví fariseo naha ra. Coto tava cuii ra can naha ra tsi ra naha vehe ñuhu. <sup>43</sup> Tyin cuñí ra naha nduvaha ra naha nuu nyivi tan ñavin nuu Nyoo.

**Tuhun cahān ra Jesús cua tatsi tuñi tsi nyivi**

<sup>44</sup> Ñihi caahán ra Jesús, tan catyí ra:

—Nyivi tsa tsinú iñi tsi yu, ñavin tsi maa ñi maa yu tsinú iñi ñi, tyin tsinú ndihi iñi ñi tsi ra tsa jaquitsí tsi yu. <sup>45</sup> Tan nyivi tsa nyehé tsi yu, nyehé ndihi ñi tsi ra tsa jaquitsí tsi yu. <sup>46</sup> Yuhu cuví tumaa ñuhū nditsin tan vatsí yu jandunditsín yu nu ñuhu ñayivi ihya, tyin nyivi tsinú iñi tsi yu ña cua ndoo ñi nu naa. <sup>47</sup> Maa tyin tatun yihí ndo tsiñí ndo tsa caahán yu, tan ña javahá ndo tsa caahán yu, ñavin yuhu tatsi tuñi tsi ndo. Tyin ña vatsí yu nu ñuhu ñayivi ihya tyin tatsi tuñi yu tsi nyivi. Vatsí yu tyin vatsí jacacú yu tsi ñi. <sup>48</sup> Nyivi tsa ña cuñí naquihin vaha tsa caahán yu tan ña cuñí ñi javaha ñi tumaa cuhva cuñí yu, iyó tsa cua tatsi tuñi tsi ñi. Tuhun tsa caahán yu, yacan cua tatsi tuñi tsi ñi nu cua cundihi quivi. <sup>49</sup> Tyin ñavin cuenda maa yu caahán yu. Jutu yu, ra tsa jaquitsí tsi yu, tsahā ra tyiñu tsi yu caahán ra náa cua cahan yu tan náa cua jacuaaha yu. <sup>50</sup> Tan tsitó yu tyin tyiñu tsa tsahā ra, tsahá tsi ñayivi nyitó tsa ña cua naa maa coo nyivi. Yacan cuenda, tandihi tsa caahán yu, caahán yu cuhva catyí maa Jutu yu tsa cahan yu.

**Nu nacatyá ra Jesús tsaha ra tsicá tsihin ra**

**13** Tsa ndi cumañi ca iin quivi tan tahan tsi vico pascua, tsa tsitó maa ra Jesús tyin tsa cua tsaa hora tsa cua quita ra nu ñuhu ñayivi ihya tan cunuhu ra nu nyaá Jutu ra. Tacan ñi maa cuñí xaan ra tsi nyivi cuenda ra tsa iyó nu ñuhu ñayivi ihya. Tan vityin cua janaha ra tsi ñi tyin cuñí xaan ra tsi ñi tyin cua cúu ra tsa cuenda ñi.

<sup>2</sup> Tan cuxiñi ra Jesús tsihin ra tsicá tsihin ra. Tan quihví nu ña vaha añima ra Judas Iscariote sehe ra Simón tan natyuhū nu tsi ra na xico ra tsi ra Jesús tan cuhva cuenda ra tsi ra Jesús tsi nu xaan iñi tsi ra. <sup>3</sup> Maa tyin ra Jesús tsitó ra tyin tsahā Jutu ra tandihi tyiñu tsi ra tyin quihí ndaha ra. Tan tsitó ra tyin nu nyaá Nyoo quee ra tan juvin ñi ndacan cua cunuhu nyico ra. Tan nyaá ra Jesús cuxiñí ra. <sup>4</sup> Tacan tan nduvitā ra tan tava ra jahma tsa nditsí ra ityi tsata, tan tsahñi ra iin toalla tsitsi ra. <sup>5</sup> Tacan tan tyihí ra ndutya tsitsi iin tsicoho tan quitsahā nacatyá ra tsaha ra tsicá tsihin ra. Tan jana ityi ra tsaha ra naha tsihin toalla can.

<sup>6</sup> Tan tsa cua nacatya ra tsaha ra Simón Pedro tan catyí ra Simón tsihin ra:

—Jutu Mañi yu, ¿a yoocho cua nacatya tsaha yu?

<sup>7</sup> Tacan tan catyí ra Jesús:

—Vityin ña cutuñí iñi un tsa javahá yu, maa tyin cutuñi iñi maa un nu cuahán ca tsi quivi.

<sup>8</sup> Maa tyin ra Pedro catyí ra tsihin ra:

—Ndi iin tsaha tan ña cua cuhva yu nacatya un tsaha yu.

Tan catyí ra Jesús tsihin ra:

—Tatun ña cua nacatya yu tsaha un, ñavin ca cuenda yu cua cuví un.

<sup>9</sup> Tacan tan catyí ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuanda ndaha yu tan jiñi yu —catyí ra.

<sup>10</sup> Maa tyin catyí ra Jesús tsihin ra:

—Nyivi tsa ndi tsityi, ña cuñí tsi tsa ndoo nanñi cahnu cuñu ñuhu ñi. Tsaha ña ñi cuñí tsi ndoo, tyin tsa ndoo maa nanñi ñi. Nyoocho tsa ndoo maa ndo, vasu ña tandihi ndo ndoo —catyí ra Jesús.

<sup>11</sup> Cahān ra tsa ña tandihi ra naha ndoo tyin tsitó ra yóo cua xico tsi ra tsi nu xaan iñi tsi ra nahnu.

<sup>12</sup> Tsa yahā nacatya ra Jesús tsaha ra tsicá tsihin ra, tan tsinditsí nyico ra jahma ra, tan tsinyaā nyico ra inga tsaha nu mesa tan catyí ra tsihin ra naha:

—¿A cutuñí iñi nyoocho tsa javahā yu tsihin ndo?

<sup>13</sup> Nyoocho caahán ndo tsihin yu, “Maestro tan Jutu Mañi yu”, tan nditsa tyin yacan cuví yu. <sup>14</sup> Yuhu tsa cuví yu Ra Jacuahá tan Jutu Mañi ndo, nacatya yu tsaha ndo, tan tacan cuñí tsi tsa nacatya tahan maa ndo tsaha ndo. <sup>15</sup> Yuhu tsahā yu iin cuhva tsi ndo tyin javaha ndo tumaa cuhva javahā maa yu. <sup>16</sup> Tsa nditsa catyí yu tsihin ndo tyin ndi iin musu tan ña cahnu ca cuví ra tan ñavin ca tsitoho ra. Tan ndi iin ra tsa cuahán tyiñu, tan ña cahnu ca cuví ra tan ñavin ca ra tsa tava tyiñu tsi ra.

<sup>17</sup> Tatun cutuñí iñi ndo yacan, tan javahá ndo can, sii xaan cua coo ndo.

<sup>18</sup> Ñavin tsa cuenda tandihi ndo caahán yu. Yuhu tsitó maa yu yóo nacatsí yu. Maa tyin cuñí tsi tsa cuvi tumaa caahán tuhun Nyoo tyehen: “Ra tsa tsatsí paan tsihin yu, juvin ra cua xico ñaha tsi yu tsi nu xaan iñi tsi yu”, catyí tsi nu tutu Nyoo. <sup>19</sup> Caahán yu tyehen tsihin ndo tsa ndi cumañi ca cuvi can tyin quivi cua cuvi yacan, cua tsinu iñi ndo tyin yuhu cuví ra tsa iyó nda ndi cumañi ca coo tandihi tsa iyó. <sup>20</sup> Tsa nditsa catyí yu tsi-

hin ndo tyin nyivi naquihin vaha tsi nyivi tsa jacuhún yu tsi ñi, maa yu naquihin vaha ñi cuví can. Tan nyivi tsa naquihín vaha tsi yuhu, naquihín vaha ndíhi ñi tsi ra tsa jaquitsí tsi yu —catyí ra Jesús.

**Nu jacotó ra Jesús tyin cua xico ra Judas tsi ra tsi nu xaan iñi tsi ra nahnu**

(Mt. 26.20-25; Mr. 14.17-21; Lc. 22.21-23)

<sup>21</sup> Tsa yahá tsa cahán ra Jesús yacan, tan quitsahá nducuiihyá xaan cuñi añima ra, tan catyí catsi ra:

—Tsa nditsa catyí yu tsihin ndo, tyin iin nyooho cua xico ndo tsi yu tsi nu xaan iñi tsi yu —catyí ra Jesús.

<sup>22</sup> Tacan tan ra tsicá tsihin ra, quitsahá nyehé nuu tahan ra naha, tan ña tsitó ra naha yóo tuhun caahán ra Jesús. <sup>23</sup> Iin ra tsicá tsihin ra Jesús nyanaá ra tsi ra nu nyaá ra cuxiñí ra. Tan ra ican cuví ra tsa cuñí xaan ra Jesús. <sup>24</sup> Tan ra Simón Pedro javahá ra seña tsi ra can, na ndaca tuhun ra yóo tuhun caahán ra Jesús. <sup>25</sup> Tacan tan ra ican tsinyaá naa ca ra tsi ra Jesús, tan tsicá tuhun ra tsi ra:

—Jutu Mañi yu, ¿yoó ra cuví ra tsa caahán un tuhun?

<sup>26</sup> Tan nacahán ra Jesús tan catyí ra:

—Cua jatyii yu luxu paan, tan ra tsa cua kuhva yu itsi, ra ican cuví ra —catyí ra.

Tacan tan quihín ra luxu paan tan jatyii ra, tan tsahá ra tsi ra Judas Iscariote, sehe ra Simón. <sup>27</sup> Tsa quihín ra Judas paan can tan quihví nu ña vaha añima ra. Tacan tan ra Jesús catyí ra tsihin ra:

—Tsa tsicá iñi un javaha un, j̄numi javaha can —catyí ra Jesús tsihin ra Judas.

<sup>28</sup> Maa tyin ndi intuhun ra tsa nyecú nu mesa can, ña cutuñí iñi ra naha nacuenta cahán ra tacan tsihin ra can. <sup>29</sup> Ra Judas cuví ra yihé ndaha yitín nu yihé xuhun, yacan cuenda yihé ra naha cuñi maa ra naha tyin cuñí ra Jesús tsa kujata ra tsa tsiñí ñuhu tsi ra naha tsa cuenda vico can, a kuhva ra juhva xuhun can tsi nyivi ndaahvi, cuñi maa ra naha. <sup>30</sup> Tsa yahá quihín ra Judas paan can, tacan tan quitá ra. Tan tsacuaa cuví can.

**Tyiñu tsa tsa tavá ra Jesús tsi yo: tsa cuñi tahan yo tsi yo**

<sup>31</sup> Tsa yahá tsa cuahán ra Judas, tan catyí ra Jesús:

—Vityin cua nyehe nyivi tsa cahnu cuví yuhu Rayii tsa quee nda gloria. Tan cua nyehe ñi tsa cahnu cuví Nyoo tsa cuenda yu. <sup>32</sup> Tatun Rayii tsa quee nda gloria jacahnú ra tsi Nyoo, tacan tucu Nyoo cua jacahnu ra tsi ra. Tsa tsaa quivi cua jacahnu ra tsi ra. <sup>33</sup> Sehe yu, ña naha ca cua cunyii yu tsihin ndo. Nyooho cua nanducu ndo tsi yu, maa tyin tumaa tsa cahán yu tsihin ra cuví ityi nuu tsihin yo nyivi Israel can naha ra, caahán yu tsihin ndo vityin, tyin ña cua cuvi kuhun ndo nu cua kuhun yu. <sup>34</sup> Tsahá yu iin tyiñu tsa tsi ndo: Cuyñi tahan ndo tsi ndo. Tumaa tsa cuñí maa yu tsi ndo, tacan cuñí tsi tsa cuñí tahan ndo tsi ndo. <sup>35</sup> Tatun cuñí tahan ndo tsi ndo, tandíhi nyivi tan cua coto ñi tyin nyivi nyicún tsi yu cuví ndo.

**Nu caahán ra Jesús tyin ra Pedro cua cahan ra tyin ña nacotó ra tsi ra**

(Mt. 26.31-35; Mr. 14.27-31; Lc. 22.31-34)

<sup>36</sup> Ra Simón Pedro tsicá tuhun ra tsi ra Jesús tan catyí ra:

—Jutu Mañi yu, ¿nu maa cua kuhun un? —catyí ra.

Tan nacahán ra Jesús tan catyí ra:

—Nu kuhun yuhu, ña cua cuvi cunyicún un tsi yu vityin. Maa tyin nu cuahán ca tsi quivi, tan cunyicun un tsi yu —catyí ra Jesús.

<sup>37</sup> Tacan tan catyí ra Pedro tsihin ra:

—Jutu Mañi yu, ¿nácaa tsa ña cua cuvi cunyicun yu tsi un vityin? Tan tsa iyó vaha iñi yu tsa kuhva yu ñayivi yu tsa cuenda un —catyí ra.

<sup>38</sup> Tan nacahán ra Jesús tan catyí ra:

—¿A nditsa tsa kuhva un ñayivi un tsa cuenda yu? Tsa nditsa catyí yu tsihin un, tyin tsa ndi cumañi ca vacu tsaa tsitooho, yooho cua cahan un uñi tsaha tyin ña nacotó un tsi yu —catyí ra Jesús tsihin ra Pedro.

**Ra Jesús cuví ityi kuhun yo nu nyaá Nyoo Jutu yo**

Tan catyí ra Jesús:

**14** —Ña caca xaan iñi ndo. Ts̄inu iñi ndo tsi Nyoo, tan ts̄inu ndíhi iñi ndo tsi yu. <sup>2</sup> Vehe Jutu yu cuaha xaan nu coo ndo iyó. Tun tsatyin ñavin tacan, tsa naha catyi tuhun yu tsihin ndo. Tan cua kuhun yu cua janduvaha yu iin nu coo ndo. <sup>3</sup> Tsa yahá tsa kuhun yu janduvaha yu nu coo ndo, tan cua quitsi nyico yu inga tsaha, quitsi naquihin yu tsi ndo tyin cuyucu ndo nu cua cunyaa yu. <sup>4</sup> Nyooho tsa tsitó maa ndo nu maa kuhun yu, tan tsa tsitó ndo ityi.

<sup>5</sup> Tan catyí ra Tomás tsihin ra:

—Jutu Mañi yu, ña tsitó ndi nu maa cua kuhun un. Tan ¿nácaa coto ndi ityi? —catyí ra.

<sup>6</sup> Tan catyí ra Jesús:

—Yuhu cuví ityi tsa cuahán gloria. Tan yuhu cuví tsa nditsa. Tan juvin ñi yuhu cuví ra tsahá ñayivi coo ndo. Tan tsa cuenda yuhu ñi, tan cuvi tsaa ndo nu nyaá Jutu yu. <sup>7</sup> Tan tsa nacotó ndo tsi yu, tan tsa cuenda yacan nacotó ndíhi ndo tsi Jutu yu. Nda vityin tan nu cuahán ca tsi ityi nuu, cua nacoto ndíhi ndo tsi ra, tyin tsa nyehé ndo tsi ra —catyí ra Jesús.

<sup>8</sup> Tacan tan catyí ra Felipe tsihin ra:

—Jutu Mañi yu, cūhva jihna nyehe ndi tsi Nyoo Jutu yo, tan tsihin yacan ñi tan ndoo ndi vaha.

<sup>9</sup> Tan nacahán ra Jesús, tan catyí ra:

—Yooho Felipe, tsa naha xaan nyii yu tsihin ndo, tan ¿nácaa tsa caahán un tsa ña nacotó un tsi yu? Nyivi tsa nyehé tsi yu, nyehé ndíhi ñi tsi Nyoo Jutu yu. Tan ¿nácaa tsa caahán un tsihin yu: “Cūhva jihna nyehe ndi tsi Nyoo Jutu yo?” <sup>10</sup> ¿A ña tsinú iñi un tyin iin ñi cuví yu tsihin Nyoo Jutu yu? Tan maa ra iin ñi cuví ra tsihin yu.

Tsa caahán yu tsihin ndo, ñavin yuhu caahán yacan. Jutu yu tsa iyó tsihin yu, maa ra javahá tyiñu ra tsihin yu.

<sup>11</sup> Ts̄inu iñi ndo tsi yu tyin iin ñi ra cuví yu tsihin Nyoo Jutu yu. Tan Nyoo Jutu yu iin ñi cuví ra tsihin yu. Tatun ña tsinú iñi ndo yacan, cuví tsinu iñi ndo tsi yu tsa

cuenda tyiñu Nyoo Jutu yu tsa javahá yu. <sup>12</sup> Tsa nditsa caahán yu tsihin ndo tyin nyivi tsinú iñi tsi yu, cua javaha ndihí ñi tsa javahá yu. Tan cahnu ca tsa cua javaha ñi, tyin yuhu cuhun yu nu nyaá Nyoo Jutu yu. <sup>13</sup> Tan tandihí tsa cua ndacan ndo tsi jutu yu tsihin sivi yu, cua ñihí ndo can tyin tacan tan jacahnu cuaha ca nyivi tsi Nyoo Jutu yu tsa cuenda yuhu tsa cuví yu Sehe ra. <sup>14</sup> Yuhu cua javaha yu náa ndihí tsa ndacan ndo tsa cuenda yu.

### Nu caahán ra Jesús tyin cuhva ra Tatyí Ii ra tsi yo

<sup>15</sup> Tatun cuñí ndo tsi yu, tyaá yahvi ndo tsa caahán yu. <sup>16</sup> Tan ndacan tahví maa yu tsi Nyoo Jutu yu na jaquitsi ra iin ra cua cuhva tunyee iñi tsi ndo. Tan ra ican cuví Tatyí Ii Nyoo, ra tsa caahán tsa nditsa. Tan iin nyita ñi maa cua cunyaa ra tsihin ndo. Maa tyin nyivi tsa taahán ca iñi tsa iyó nu ñuhu ñayivi ihya, ña cua cuvi naquihin ñi Tatyí Ii Nyoo tyin ña nyehe ñi tsi ra. Tan ndi ña tsitó ñi tsi ra. Maa tyin nyooho tsitó ndo tsi ra tyin nyaá ra tsihin ndo tan tacan ñi cua ndoo ra tsihin ndo. <sup>18</sup> Ña cua nacoo cuii yu tsi ndo. Cua quitsi nyico yu nu yucú ndo. <sup>19</sup> Juhva cuii ña quivi, tan nyivi cuenda nu ñuhu ñayivi ña cua nyehe ca ñi tsi yu. Maa tyin nyooho cua nyehe ndo tsi yu. Tyin yuhu nyito yu, yacan cuenda nyooho cua coo ndihí ndo. <sup>20</sup> Quivi can cua coto ndo tyin yuhu iin ñi cuví yu tsihin Jutu yu. Tan nyooho iin ñi cuví ndo tsihin yu. Tan yuhu iin ñi cuví yu tsihin ndo. <sup>21</sup> Nyivi tsa tyaá yahvi tsa caahán yu, tan javahá ñi cuhva caahán yu, ñi ican cuví ñi tsa cuñí tsi yu. Tan ñi tsa cuñí tsi yu, Jutu yu cua cuñi ra tsi ñi. Tan cuñí ndihí tucu maa yu tsi ñi tan cua janaha yu tsi ñi yóo ra cuví yu —catyí ra Jesús.

<sup>22</sup> Tan catyí ra Judas, ñavin ra Judas Iscariote, inga ra. —Jutu Mañi yu, znácaa tsa nyuhu ñi cua janaha un tsi un, tan ñavin tsi tandihí nyivi iyó nu ñuhu ñayivi?

<sup>23</sup> Nacahan ra Jesús tan catyí ra:

—Nyivi cuñí tsi yu, javahá ñi tsa caahán yu. Tan Jutu yu cuñi ra tsi ñi. Tan quitsi ndi nu yucú ñi tan coo ndi tsihin ñi. <sup>24</sup> Nyivi ña cuñí tsi yu, ña javahá ñi tsa caahán yu. Tan tuhun tsa caahán yu tsa tyaá soho ndo, ñavin tuhun maa yu cuví tsi, tyin tuhun caahán Jutu yu, ra tsa jaquitsi tsi yu, cuví tsi.

<sup>25</sup> Caahán yu tandihí tuhun ihya tsihin ndo tsitsi tsa ndi nyii yu tsihin ndo. <sup>26</sup> Maa tyin nu cuahán ca tsi ityi nuu cua jaquitsi Jutu yu Tatyí Ii ra tsihin sivi yu. Tan cua jatyinyee ra ican tsi ndo, tan cua cuhva ra tunyee iñi tsi ndo, tan cua janaha ra tandihí tsi ndo. Tan cua janducuhun iñi ra tsi ndo tsa tsa yahá cahán yu tsihin ndo.

<sup>27</sup> Jandoó yu iin tsa taxin coo añima ndo, tumaa tsa taxin cuñí añima maa yu. Yacan tsahá yu tsi ndo. Ñavin tumaa tsa taxin tsa ñihí ndo nu ñuhu ñayivi ihya. Ña çaca xaan iñi ndo tan ña nayuhvi ndo. <sup>28</sup> Tsiñi ndo tsa cahán yu nu catyí yu tyin cua cuhun yu tan cua quitsi nyico yu nu yucú ndo. Tatun cuñí ndo tsi yu, cua cusii iñi ndo tyin catyí yu tyin cuahan yu nu nyaá Jutu yu. Tyin cahnu ca cuví Jutu yu tan ñavin ca maa yu.

<sup>29</sup> Caahán yu tyehen tsihin ndo tsa ndi cumañi ca cuhun yu, tyin quivi cuhun yu, cua tsinu iñi ndo tsi yu.

<sup>30</sup> Ña cuaha ca cua cahan yu tsihin ndo. Tyin vatsí nu ndacá ñaha nu ñuhu ñayivi ihya. Maa tyin ña ndacá ñaha nu tsi yu. <sup>31</sup> Tyin tacan tan coto nyivi iyó nu ñuhu ñayivi, tyin yuhu cuñí yu tsi Nyoo Jutu yu, tan javahá yu tyiñu tavá ra tsi yu.

‘Ndúvita ndo, tan çohon ndo, na cua tsiyo yo ihya.

### Nu cahán ra Jesucristo tyin cuví ra tumaa yoho tsa cuví uvas

<sup>15</sup> Yuhu cuví yoho tsa cuví uvas tsa nditsa. [Tsa cuví uvas cuví tsi tumaa yoho nditsaahan ndivi maa tyin yucu vixi cuví tsi.] Tan Jutu yu cuví ra jahá cuenda yoho can. <sup>2</sup> Tsaahnyá ra soco tsa ña tsahá tsiti. Tan nacahnya ra nuu yoho yucu tsa tsahá tsiti, tan janduvahá ra can, tyin tacan tan cuhva cuaha ca tsi tsiti. <sup>3</sup> Tsa yahá janduvahá Jutu yu tsi nyooho tsihin tsa jacuahá yu tsi ndo. <sup>4</sup> Jañihi ca ndo ndu iin ndo tsihin yu, tumaa tsa iin ñi cuví yu tsihin ndo. Tumaa iin soco yoho can ña cuvi cuhva tsi tsiti tsa maa ñi maa tsi, tun ña nyanaá tsi tsata yoho cahnu can, tacan nyooho, ña cua cuvi javaha ndo tsa vaha tatun ña iin ñi cuvi ndo tsihin yu.

<sup>5</sup> Yuhu cuví yoho cahnu. Tan nyooho cuví soco yoho can. Nyivi tsa nyanaá tsi yu, tan nyanaá yu tsi ñi, cuaha tsa vaha javahá ñi. Tyin nduve náa cuví javaha ñi tatun ña nyanaá ñi tsi yu. <sup>6</sup> Nyivi tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tsahá tsiti. Na ityi can tan jatacá yo can, tsahan tsahmí yo.

<sup>7</sup> Tatun tacan ñi nyanaá maa ndo tsi yu, tan ña naa iñi ndo tsa jacuahá yu tsi ndo, tacan tan cuví ndacan ndo náa cuñí maa ndo tsi yu, tan yuhu cua cuhva yu tsa cua ndacan ndo. <sup>8</sup> Tatun cuaha tsa vaha javahá ndo, jacahnú xaan ndo tsi Jutu yu cuví can. Tan tsihin yacan janahá ndo tyin cuví ndo nyivi tsa nditsa nyicún tsi yu. <sup>9</sup> Yuhu cuñí yu tsi ndo, tumaa tsa cuñí Jutu yu tsi yu. Ña naa iñi ndo cuhva cuñí yu tsi ndo. <sup>10</sup> Tatun tyaá yahvi ndo tsa caahán yu, ña cua naa iñi ndo tyin cuñi yu tsi ndo. Tumaa tsa javahá maa yu, tyaá yahvi yu tsa caahán Jutu yu. Ña naa iñi yu tsa cuñi xaan ra tsi yu.

<sup>11</sup> Caahán yu tyehen tsihin ndo tyin na cusii iñi ndo tsihin yu. Tan cusii ca iñi ndo. <sup>12</sup> Tuhun tsa caahán yu tsihin ndo, yacan cuví tsehe: cuñi tahan ndo tsi ndo, tumaa tsa cuñí maa yu tsi ndo. <sup>13</sup> Tatun yaha xaan cuñi tahan yo tsi yo, cana maa iñi yo cuhva yo ñayivi iyó yo tsa cuenda inga yo. <sup>14</sup> Nyooho cuví ra vaha iñi tsi yu tatun javahá ndo tsa caahán yu tsihin ndo. <sup>15</sup> Ña caahán ca yu tyin musu yu cuví tsi ndo, tyin iin musu ña tsitó ra náa javahá tsitoho ra. Caahán yu tyin ra vaha iñi tsi yu cuví ndo, tyin tandihí tsa caahán Jutu yu tsihin yu tan jacotó yu itsi tsi ndo. <sup>16</sup> Ñavin nyooho nacatsi tsi yuhu tyin maa yu nacatsi tsi ndo. Tan tavá tyiñu yu tsi ndo tsa cuhun ndo tan jaha tyiñu ndo. Tan tyiñu jahá ndo cua quita vaha tsi, tumaa iin itu tsa vaha xaan cuvaha. Tan cuaha xaan niñi ca coo, tan ña cua tiví maa tsi. Tacan tan cua cuhva Jutu yu tandihí tsa ndacan ndo tsi ra tsihin sivi yu. <sup>17</sup> Tyehen caahán yu tsihin ndo: Cuñi tahan ndo tsi ndo.

**Nyivi taahán iñi tsa iyó nu ñuhu ñayivi, ndasi cuñí ñi nyehé ñi tsi ra Jesús tan tsi nyivi nyicún tsi ra**

<sup>18</sup> Tatun ndasi cuñí nyivi taahán iñi tsa iyó nu ñuhu ñayivi ihya nyehe ñi tsi ndo, coto ndo tyin jihna ca maa yu ndasi cuñí ñi nyehe ñi. <sup>19</sup> Tun tsatyin nyivi cuenda nu ñuhu ñayivi ihya cuví ndo, cua cuñí nyivi tsi ndo tumaa tsa cuñí tahan maa ñi tsi ñi. Maa tyin nyooho tsa nacatsj yu tsi ndo mahñu ñi. Yacan cuenda ndasi cuñí ñi nyehe ñi tsi ndo, tyin ñavin ca nyivi cuenda nu ñuhu ñayivi ihya cuví ndo. <sup>20</sup> Nducuhun iñi ndo tsa cahñ yu tsihin ndo, tyin ndi iin musu tan ña cahnu ca cuví ra tan ñavin ca tsitoho ra. Tatun tyaá yahvi nyivi tsa caahán yu tsihin ñi, tacan cua tyaa yahvi ndihí ñi tsa jacuahá ndo tsi ñi. Tan tatun ndasí icá ñi tsihin yu, ndasi cua ica ndihí ñi tsihin ndo. <sup>21</sup> Tandihí yacan cua ica ñi tsihin ndo tsa catyí yuhu, tyin ña nacotó ñi tsi ra tsa jaquitsj tsi yu.

<sup>22</sup> Tun tsatyin ña quitsj yu cahñ yu tsihin ñi, nduve cuatyí ñi. Maa tyin vityin nduve náa siqui cua tyaa ñi cuatyí ñi, tyin tsa yahá cahñ yu tsihin ñi. <sup>23</sup> Nyivi tsa ndasi cuñí nyehé tsi yu, ndasi cuñí ndihí ñi nyehé ñi tsi Jutu yu. <sup>24</sup> Nduve cuatyí ñi, tun tsatyin ña javahá yu tsa ña cuví javaha inga nyivi. Maa tyin tsa nyehe ñi tandihí yacan. Vasu ndi maa tsa nyehe ñi can maa tyin ndasi cuñí ñi nyehé ñi tsi yu, tan tsi Jutu yu. <sup>25</sup> Maa tyin tandihí yacan cuví, tyin cuñí tsi cundaa tumaa cuhva caahán nu tutu ley tsa jacuahá ñi tsa caahán tyehen: “Nduve vihi náa tsaha, tan ndasi cuñí ñi nyehe ñi tsi yu”, catyí tsi.

<sup>26</sup> Maa tyin cua quitsi Tatyí Ii, ra tsa caahán tsa nditsa. Ra ican cuví ra tsa cua cuhva tunyee iñi tsi ndo. Quivi cua tsaa yu nu nyaá Jutu yu tan cua jaquitsi ndi Tatyí Ii nu yucú ndo. Tan cua cahan ra tumañi iñi tsa cuenda yu. <sup>27</sup> Tan nyooho tucu cua cahan ndo tumañi iñi tsa cuenda yu, tyin yucú ndo tsihin yu nda quivi quitsahá jahá tyiñu yu.

**16** Caahán yu tyehen tsihin ndo tyin tacan tan ña jandihí ndo tsa tsinú iñi ndo tsi yu. <sup>2</sup> Cua tava cuii nyivi tsi ndo vehe ñuhu. Tan coo quivi cua cahñi ñi tsi ndo, tan cua cuñí ñi tyin tyiñu Nyoo javahá ñi. <sup>3</sup> Tacan cua ica ñi tyin ña nacoto ñi tsi Jutu yu tan ndi tsi maa yu. <sup>4</sup> Caahán yu tsehe tsihin ndo tyin quivi tsa cua cuví tumaa cuhva caahán yu tsihin ndo, cua nducuhun iñi ndo tyin tsa yahá cahñ yu tuhun ihya tsihin ndo.

Ña cahñ yu tyehen tsihin ndo nda jihna tyin ndi nyíi maa yu tsihin ndo.

### Tyiñu jahá Tatyí Ii Nyoo

<sup>5</sup> Maa tyin vityin cua cuhñ yu tyin cunyaa yu tsihin ra tsa jaquitsj tsi yu. Ndi intuhun ndo tan ña tsicá tuhun ndo tsi yu nu maa cua cuhñ yu. <sup>6</sup> Tyin tsa nducuihya cuñi ndo tsa caahán yu tyehen tsihin ndo. <sup>7</sup> Caahán yu tsa nditsa tsihin ndo tyin vaha ca tsa cuhñ yu cuenda tsa vaha tsi maa ndo. Tyin tatun ña cuhñ yu, ña cua quitsi Tatyí Ii tsa cua cuhva tunyee iñi

tsi ndo. Maa tyin tatun cuhñ yu, cua jaquitsi yu tsi ra. <sup>8</sup> Tan quivi quitsi ra, cua jacoto ra tsi nyivi iyó nu ñuhu ñayivi ihya tyin iyó cuatyí ñi. Tan cua janaha ra ityi vaha tsi ñi, cuhva coo vaha ñi. Tan cua jacoto ra tsi ñi tyin cua cutuñi ñi nuu Nyoo. <sup>9</sup> Cua jacoto ra tsi ñi tyin iyó cuatyí ñi tyin ña tsinú iñi ñi tsi yu. <sup>10</sup> Cua jacoto ra tsi ñi tyin iyó ityi vaha, cuhva coo vaha ñi tyin yuhu cua cuhñ yu nu nyaá Jutu yu tan ña cua nyehe ca ndo tsi yu. <sup>11</sup> Tan cua coto ñi tyin cua jandaa Nyoo cuatyí ñi tyin tsa yahá cundaa cuatyí nu cuví cuihna, nu ndacá ñaha nu ñuhu ñayivi ihya.

<sup>12</sup> Tan cuaha ca tsa nyaá cahan yu tsihin ndo, maa tyin ña cua cutuñi iñi ndo can vityin. <sup>13</sup> Quivi quitsi Tatyí Ii tsa caahán tsa nditsa, maa ra cua janaha tandihí tsa nditsa tsi ndo. Tyin ñavin cuenda maa ra cua cahan ra, tyin cua cahan ra tandihí tsa tsiñí ra. Tan cua jacoto ra náa cua cuví nu cuahán ca tsi ityi nuu. <sup>14</sup> Cua jacahnu ra tsi yu, tyin cua naquihin ra tuhun yu tan cua janaha ra can tsi ndo. <sup>15</sup> Tandihí tsa iyó tsi Jutu yu, tsii maa yu cuví ndihí can. Yacan cuenda caahán yu tyin Tatyí Ii cua naquihin ra tuhun yu, tan cua janaha ra tsi nyooho.

**Ra tsicá tsihin ra Jesús cuihyá xaan cuñí ra naha, maa tyin nu cuahán ca tsi quivi cua cusii iñi ra naha, catyí ra Jesús**

<sup>16</sup> Ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu, tyin yuhu cua cuhñ yu nu nyaá Jutu yu —catyí ra Jesús.

<sup>17</sup> Tacan tan juhva ra tsicá tsihin ra, tsicá tuhun tahan ra naha tan catyí ra naha:

—¿Náa cuñi tsi cahan yacan? Catyí ra tsihin yo tyin ña naha cuii ca tan ña cua nyehe ca yo tsi ra, tan yaha can tan cua nyehe nyico yo tsi ra inga tsaha tyin cua cuhñ ra nu nyaá Jutu ra. <sup>18</sup> ¿Náa cuñi tsi catyí tsa “ñá naha cuii ca” can? Ña cutuñi iñi yo náa tuhun caahán ra —catyí ra naha.

<sup>19</sup> Tan tuví iñi ra Jesús tyin cuñi ra naha ndaca tuhun ra naha tsi ra, tan catyí ra:

—Yuhu cahñ yu tsihin ndo tyin ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo? <sup>20</sup> Tsa nditsa caahán yu tsihin ndo tyin nyooho cua nducuihya iñi ndo tan cua vacu ndo, maa tyin nyivi cuenda nu ñuhu ñayivi cua cusii iñi ñi. Vasu cuiihya cuñi ndo vityin, tucuihya iñi can cua nanduvi tsi tsa sii. <sup>21</sup> Cuhva tsa cua cacu sehe iin ñaha, nyehe ña tundoho. Maa tyin tsa yaha cacu lee can, ndi ña ñuhu ca iñi ña tsa uhvi can tsa cuenda tsa sii cuñi ña tyin cacu iin lee sehe ña. <sup>22</sup> Tacan tucu nyooho vityin, cuiihya xaan cuñi ndo. Maa tyin cua nyehe nyico yu tsi ndo inga tsaha. Tacan tan cua cusii nyico iñi añima ndo. Tan yoñi cuví quihin nyaa tsa sii can tsi ndo.

<sup>23</sup> Quivi can nduve ca tsa cua ndaca tuhun ndo tsi yu. Tsa nditsa caahán yu tsihin ndo tyin Nyoo Jutu yu cua cuhva ra tandihí tsa ndacan ndo tsi ra tsihin sivi yu. <sup>24</sup> Nda vityin tan ñaha ca ndacan ndo tsa ndacan ndo tsihin sivi yu. Ndacan ndo tan cua ñihi ndo tan cusii xaan iñi ndo.



**Ra Jesucristo cuví jaha canaa ra tsa ña vaha iyó nu ñuhu ñayivi**

<sup>25</sup> Maa ñi maa tsihin tsa jandu inducú yu tuhun jacuahá yu tsi ndo. Maa tyin nu cuahán ca tsi, ñavin ca tsihin cuhva can cua jacuahá yu tsi ndo, maa tyin cua catyi tuhun catsi yu tuhun Jutu yu tsihin ndo. <sup>26</sup> Quivi can tsihin sivi yu cua ndacan ndo tsa ndacan ndo tsi ra. Tan ña tsiñí ñuhu ca tsa cahan ndaahvi yu tsihin Jutu yu tsa cuenda ndo. <sup>27</sup> Tyin maa Nyoo Jutu yu cuñí ra tsi ndo. Cuñí ra tsi ndo tyin nyooho cuñí ndo tsi yu, tan tsinú iñi ndo tyin nu nyaá Nyoo quee yu. <sup>28</sup> Nu nyaá Jutu yu quee yu tyin quitsi yu nu ñuhu ñayivi ihya. Maa tyin vityin cua nacoo yu ñuhu ñayivi ihya tyin cua cunuhu nyico yu nu nyaá ra —catyí ra Jesús.

<sup>29</sup> Tacan tan catyí ra tsicá tsihin ra:

—Vityin nditsa, caahán catsi un tsihin ndi. Ñavin ca tsihin cuhva caahán un tsihin ndi. <sup>30</sup> Vityin nyehé ndi tyin tsitó un tandihi cuii maa, tan ña tsiñí ñuhu ca tsa ndaca tuhun ndi tsi un tan coto un tsa tsicá iñi ndi. Yacan cuenda tsinú iñi ndi tyin nu nyaá Nyoo quee un —catyí ra naha tsihin ra Jesús.

<sup>31</sup> Tan catyí ra Jesús:

—Tan vityin za tsinú iñi ndo tsi yu? <sup>32</sup> Maa tyin caahán yu tsihin ndo tyin tsa vatsí hora. Tan vityin cuví hora tsa cua cuhun ndo siin siin ityi. Tan cua nacoo ndo tsi yu. Maa tyin ñavin intuhun ñi yu cua ndoo, tyin Jutu yu nyaá ra tsihin yu. <sup>33</sup> Caahán yu tandihi tsehe tsihin ndo na coo tsa taxin añima ndo tsa cuenda tsa iin ñi cuví ndo tsihin yu. Nu ñuhu ñayivi ihya cua nyehe ndo tundoho, maa tyin janyee ndo iñi ndo, tyin yuhu tsa jahá canaa yu tsa ña vaha tsa iyó nu ñuhu ñayivi ihya.

**Nu tsicán tahvi ra Jesús tsi Nyoo tsa cuenda ra tsicá tsihin ra**

**17** Tsa yahá cahan ra Jesús yacan, nanyehę ndaa ra ityi andivi tan catyí ra:

—Jutu Mañi yu, tsa tsaá hora vityin. Jācāhnu tsi yu tsa cuví yu sehe un, tyin tacan tan jacāhnu tucu maa yu tsi un. <sup>2</sup> Tyin tava tyiñu un tsi yu tsa quihí ndaha yu tandihi nyivi, tan cuhva yu ñayivi nyitó tsa ña cua naa maa tsi tandihi nyivi tsa tsahá un tsi yu. <sup>3</sup> Tātun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquitsi un, tacan tan cuví coo ñi ñayivi nyitó tsa ña cua naa maa.

<sup>4</sup> Tsa jacāhnu yu tsi un nu ñuhu ñayivi ihya tan tyiñu tsa tava tyiñu un tsi yu tsa ndihi tsi javahá yu. <sup>5</sup> Tan vityin, Jutu Mañi yu, cua quitsi nuhu nyico yu nu nyaá un, tan cuñí yu tyin nacuhva un tsa cāhnu cuví yu tsihin un tsi yu, tumaa tsa tsicoo maa tsi yu nda ndi cumañi ca tsinu ñuhu ñayivi.

<sup>6</sup> Tandihí ra tsa tsahá un tsi yu naha ra, ra tsa natava vaha un mahñu nyivi iyó nu ñuhu ñayivi ihya, jacotó yu tsi ra naha yóo ra cuví yooho. Tsii maa un cuví tsi ra naha tan tsahá un tsi ra naha tsi yu. Tan tyaá yahvi ra naha tsa caahán un. <sup>7</sup> Vityin tsitó ra naha tyin tandihí tsa tsahá un tsi yu, nu nyaá un quee tsi. <sup>8</sup> Tyin catyí

tuhun yu tsihin ra naha tsa cahan un tsihin yu, tan naquihin vaha ra naha itsi. Tan tsitó ra naha tyin nditsa tsa quee yu nu nyaá un, tan tsinú iñi ra naha tyin maa un jaquitsi tsi yu.

<sup>9</sup> Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandihí nyivi, maa tyin tsicán tahvi yu tsa cuenda ra tsa tsahá un tsi yu naha ra, tyin tsi maa un cuví ra naha. <sup>10</sup> Tandihí nyivi tsa cuví tsii un, tsahá tucu un tsi ñi tsi yu. Tan maa ñi janahá tsa cāhnu cuví yu.

<sup>11</sup> Yuhu ña cua ndoo ca yu nu ñuhu ñayivi ihya, maa tyin maa ra naha cua ndoo ra naha nu ñuhu ñayivi ihya. Tan yuhu cua cunyaa nyico yu tsihin un. Jāhā cuenda tsi ra tsa tsahá un tsi yu tsihin tunyee iñi tsa iyó tsi maa un, Jutu Mañi yu. Tan na iin ñi cuví ra naha, tumaa tsa iin ñi cuví maa yo. <sup>12</sup> Quivi tsinyij yu nu ñuhu ñayivi ihya tsihin ra naha, jahá cuenda yu tsi ra tsa tsahá un tsi yu naha ra tsihin tunyee iñi tsa iyó tsi un. Tan jahá cuenda yu tsi ra naha. Tan ndi intuhun ra naha tan ña tsinaá ra naha. Maa tyin ra tsa tsa nyaá maa tsa cunaa, ra ican ñi cuví ra cuanaá tan quitā cuhva tumaa tsa catyí nu tutu maa un.

<sup>13</sup> Vityin tsa cua quitsi yu nu nyaá un, maa tyin tsitsi tsa ndi nyii yu nu ñuhu ñayivi ihya, caahán yu tsehe, tyin na cusii iñi ra naha tumaa tsa sii cuñí maa yu.

<sup>14</sup> Yuhu cahan yu tsihin ra naha tsa caahán un, maa tyin nyivi cuenda nu ñuhu ñayivi ndasi cuñí ñi nyehe ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayivi cuví ra naha. Tumaa yuhu, ñavin ra cuenda nu ñuhu ñayivi cuví yu. <sup>15</sup> Ña tsicán yu tsi un tsa tava un tsi ra nyicún tsi yo naha ra nu ñuhu ñayivi ihya, maa tyin jahá cuenda tsi ra naha coto náa jaha nu ña vaha tsi ra naha. <sup>16</sup> Tumaa yuhu ñavin ra cuenda nu ñuhu ñayivi cuví yu, tacan tucu ra ihya naha ra, ñavin ra cuenda nu ñuhu ñayivi cuví ra naha. <sup>17</sup> Jācū ii tsi ra naha tsihin tsa nditsa, na javaha ra naha maa ñi maa cuhva cuñí maa un. Tyin tsa caahán un, yacan cuví tsa nditsa. <sup>18</sup> Tumaa tsa jaquitsi un tsi yuhu nu yucú nyivi iyó nu ñuhu ñayivi, tacan cua jacuhun ndihí tucu yuhu tsi ra tsa nyicún tsi yo, nacahan ra naha tuhun yo tsihin nyivi tsa ñaha ca coto tuhun yo. <sup>19</sup> Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

<sup>20</sup> Ñavin tsa cuenda ra ihya ñi naha ra tsicán tahvi yu tsi un. Tsicán tahvi ndihí tucu yu tsi un tsa cuenda nyivi tsa cua tsinu iñi tsi yu, tsa cuenda tsa cua cahan ra ihya naha ra ityi nuu ca. <sup>21</sup> Tsicán yu tsi un na iin ñi cuví ñi tsihin inga ñi. Tan na iin ñi cuví ñi tsihin yo, Jutu Mañi yu. Tumaa yooho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandihí nyivi iyó nu ñuhu ñayivi cua tsinu iñi ñi tyin maa un jaquitsi tsi yu. <sup>22</sup> Yuhu tsahá yu tsa cāhnu cuví un tsi ñi nyicún tsi yo. Juvín ñi maa tsa cāhnu cuví un tsa tsahá un tsi yu tyin tsihin yacan na iin ñi cuví ñi, tumaa yooho tsihin yuhu, iin ñi cuví yo. <sup>23</sup> Yuhu nyii yu tsihin ñi. Tan yooho nyaá un tsihin yu tyin tacan tan iin ña nyivi cua cuví ñi. Tan coto tandihí nyivi iyó nu ñuhu

ñayivi tyin maa un jaquitsi tsi yu, tan cuñi xaan un tsi ñi nyicún tsi yo, tumaa tsa cuñi maa un tsi yu.

<sup>24</sup> Jutu Mañi yu, maa un tsaḥa tsi ñi tsi yu. Tan cuñi yu tsa cunyaa ñi tsihin yu nu cua cunyaa yu, tan na nyehe ñi tsa cahnu cuví tsa tsaḥa un tsi yu, tyin cuñi un tsi yu nda ndi cumañi ca tsinu ñuhu ñayivi. <sup>25</sup> Jutu Mañi yu, ra vaha cuví un, tan nyivi cuenda nu ñuhu ñayivi ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihya tsitó ra naha tyin maa un jaquitsi tsi yu. <sup>26</sup> Tsa caḥan yu tsihin ra naha yoo ra cuví un, tan cua cahan nyico tucu yu inga tsaha, tyin tumaa cuhva cuñi un tsi yu, tacan cua cuñi tahan ra naha tsi ra naha. Tan yuhu cunyaa yu añima ra naha.

**Nu cua tyihi ra Israel naha ra tsi ra Jesús vehe caa**  
(Mt. 26.47-56; Mr. 14.43-50; Lc. 22.47-53)

**18** Tsa yaha tsa caḥan ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedrón. Tan ican iyó iin cora yutun tata. Tan ican quihvi ra Jesús tsihin ra tsicá tsihin ra. <sup>2</sup> Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsaahán tsihin ra tsicá tsihin ra. <sup>3</sup> Tan ican tsaḥa ra Judas tsihin andaru cuaha tan cuaha ra vitya cuenda vehe ñuhu tsa jacuhun ra cuví ityi nuu tsihin jutu naha ra tan ra cuví fariseo naha ra. Tsaḥa ra naha ican, nyisó ra naha mityi, tan nyisó ra naha lámpara tan ñuhü yiti. <sup>4</sup> Tan ra Jesús tsa tsitó maa ra tandihí tsa cua tahan ra. Quita ra tan tsicá tuhun ra tsi ra naha:

—¿Yoo nanducú ndo? —catyí ra.

<sup>5</sup> Tan catyí ra naha tsihin ra:

—Ra Jesús ra ñuu Nazaret.

Tan catyí ra Jesús:

—Yuhu cuví —catyí ra.

Tan ra Judas, ra tsa xico tsi ra Jesús tsi nu xaan iñi tsi ra nahnu, nyii ndihí ra tsihin ra naha. <sup>6</sup> Cuhva tsa caḥan ra Jesús: “Yuhu cuví”, tandihí ra naha nacaca tsata ra naha tan nduvá ra naha nu ñuhu. <sup>7</sup> Tacan tan tsicá tuhun nyico ra Jesús tsi ra naha inga tsaha, tan catyí ra:

—¿Yoo nanducú ndo?

Tan catyí ra naha:

—Ra Jesús ra ñuu Nazaret.

<sup>8</sup> Tan catyí ra Jesús:

—Tsa caḥan yu tsihin ndo tyin yuhu cuví. Tatun yuhu nanducú ndo, jaña ndo tsi ra tsicá tsihin yu naha ra na cunahun ra naha —catyí ra Jesús tsihin ra naha.

<sup>9</sup> Yacan caḥan ra Jesús tyin na cundaa tsa caḥan ra nda ityi tsata ca nu catyí ra: “Ra tsa tsaḥa Jutu yu tsi yu, ndi intuhun ra naha tan ña tsinaá ra naha.” <sup>10</sup> Tacan tan tava ra Simón Pedro mityi tsa ndahá ra tan tsaḥnyá ra soho cuaha iin ra tsa nañi Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra. <sup>11</sup> Maa tyin ra Jesús catyí ra tsihin ra Pedro:

—Natyihi mityi un tsitsi vena un. Tatun Nyoo Jutu yu tan cuñi ra tsa nyehe yu tundoho, taahán tsi tsa nyehe yu can —catyí ra Jesús tsihin ra.

**Nu tsindaca ra naha tsi ra Jesús nuu ra cuví ityi nuu tsihin jutu naha ra**

(Mt. 26.57-58; Mr. 14.53-54; Lc. 22.54)

<sup>12</sup> Tacan tan andaru can tsihin capitán ra naha, tan vitya cuenda vehe ñuhu naha ra, tñin ra naha tsi ra Jesús, tan tsañi ra naha tsi ra, <sup>13</sup> tacan tan tsindaca ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu. <sup>14</sup> Ra Caifás can cuví ra tsa caḥan tsihin ra cuví ityi nuu tsihin nyivi Israel naha ra tyin vaha ca tsa cúu intuhun ñi rayi tsa cuenda tandihí nyivi ñuu.

**Nu caahán ra Pedro tyin ña nacotó ra tsi ra Jesús**

(Mt. 26.69-70; Mr. 14.66-68; Lc. 22.55-57)

<sup>15</sup> Ra Simón Pedro tan inga ra tsa tsicá tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quihvi ra can tsihin ra Jesús nuquehe ra jutu can.

<sup>16</sup> Maa tyin ra Pedro ndoo ra ityi tsata vehe. Yacan cuenda quita ra tsa nacotó ra jutu can, tan caḥan ra tsihin ñaha tsa nyaá yuvehe can. Tan jayahá ra tsi ra Pedro ityi tsitsi nuquehe can. <sup>17</sup> Tacan tan ñaha tsa nyaá yuvehe can tsicá tuhun ña tsi ra Pedro, tan catyí ña:

—¿A ñavin yooho cuví iin ra tsicá tsihin ra can?

Tan catyí ra Pedro:

—Ñavin. Ñavin yu cuví —catyí ra tsihin ña.

<sup>18</sup> Tacan tan ra cuví musu tan ra vitya naha ra tsa yucú ican, jataḥan ra naha ñuhü tyin vitsin xaan. Tan nyecú nyityi ra naha tuñu ra naha ñuhü. Tan nyii ndihí tucu ra Pedro tuñu ra ñuhü tsihin ra naha ican.

**Nu janahma ra jutu tsaahnu tsi ra Jesús**

(Mt. 26.59-66; Mr. 14.55-64; Lc. 22.66-71)

<sup>19</sup> Tacan tan ra jutu tsaahnu can quitsaha tsicá tuhun ra tsi ra Jesús yoo ra cuví ra tsicá tsihin ra, tan náa jacuahá ra tsi nyivi. <sup>20</sup> Tan catyí ra Jesús tsihin ra:

—Yuhu nuu tandihí nyivi caḥan yu. Tan jacuahá yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu ihya nu tuhvá tandihí nyivi Israel ndu iin. Tan nduve nu caḥan xeehe yu. <sup>21</sup> ¿Nacuenda tsicá tuhun un tsi yuhu? Vaha ca ndaca tuhun un tsi nyivi tsa tsini tsa caḥan yu, tan maa ñi cua catyi tuhun náa caḥan yu tsihin ñi tyin maa ñi tsitó náa caḥan yu —catyí ra Jesús tsihin ra.

<sup>22</sup> Cuhva tsa caahán ra Jesús yacan, tan iin vitya vehe ñuhu tsa yucu ican, cañi ra iin tsiyo nuu ra Jesús tan catyí ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyí ra tsihin ra Jesús.

<sup>23</sup> Tan catyí ra Jesús:

—Tatun caḥan yu iin tsa ña vaha, caḥan tsihin yu nda tsa ña vaha caḥan yu. Maa tyin tatun caḥan yu tsa vaha, ¿nacuvi tyin cañi un tsi yu? —catyí ra Jesús tsihin ra can.

<sup>24</sup> Yahā can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu [cuiya can].

**Nu caahán nyico ra Pedro inga tsaha tyin ña nacotó ra tsi ra Jesús**

(Mt. 26.71-75; Mr. 14.66-72; Lc. 22.58-62)

<sup>25</sup> Tan nyaá nyityi ra Pedro tuñu ra ñuhu. Tan catyí ra naha tsihin ra:

—¿A ñavin yooho cuví iin ra tsicá tsihin ra can?  
—catyí ra naha tsihin ra.

Tan ra Pedro tyihj xeehe ra, tan catyí ra:

—Ñavin. Ñavin yu cuví —catyí ra.

<sup>26</sup> Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa cuví nyivi ra tsa tsahnyā ra Pedro soho, quitsahā tsicá tuhun ra tsi ra tan catyí ra:

—¿Atu ñavin un cuví tsa nyehe yu tsihin ra can tsitsi cora yutun tata can? —catyí ra tsihin ra Pedro.

<sup>27</sup> Tan tyihj xeehe nyico ra Pedro inga tsaha. Juvín ñi cuhva can tan navacū ñi iin tsitooho.

**Nu cutuñi ra Jesús nuu ra Pilato**

(Mt. 27.1-2, 11-14; Mr. 15.1-5; Lc. 23.1-5)

<sup>28</sup> Yahā can tan quitā ra naha tsihin ra Jesús yuvehe ra Caifás tan tsindacā ra naha tsi ra vehe tyiñu ra ndacá ñaha. Tsa cua cunditsin tan ra Israel ña quihvī ra naha tsitsi vehe tyiñu can tyin ñavin vehe nyivi Israel cuví can. Tyin ica tsa quihvī ñi Israel vehe ndavaha ñi tyin coto ña cua cuví cuxiñi ñi quivi vico pascua. <sup>29</sup> Yacan cuenda quitā ra Pilato tyin cahan ra tsihin ra naha, tan catyí ra:

—¿Náa cuatyí tyaá ndo siqui ra ihya? —catyí ra Pilato tsihin ra cuví ityi nuu tsihin nyivi Israel naha ra.

<sup>30</sup> Tan nacahān ra Israel naha ra tan catyí ra naha:

—Tun tsatyin ñavin iin ra iyó cuatyí cuví ra, ña cua cuhva cuenda ndi tsi ra tsi un —catyí ra naha tsihin ra Pilato.

<sup>31</sup> Tacan tan catyí ra Pilato tsihin ra naha:

—Quihin ndo tsi ra, tan t̄atsi tuñi ndo tsi ra tumaa catyí maa ley ndo.

Tan nacahān ra Israel can naha ra tan catyí ra naha:

—Maa tyin nyuhu nyivi Israel nduve ndatu iyó tsi ndi tsa cahñi ndi tsi nyivi —catyí ra naha.

<sup>32</sup> Tacan cundaā tsa cahān ra Jesús nácaa cua cúu ra.

<sup>33</sup> Yahā can tan quihvī nyico ra Pilato tsitsi vehe tyiñu can inga tsaha. Tan canā ra tsi ra Jesús tan tsicā tuhun ra tsi ra:

—¿A yooho cuví rey cuenda nyivi Israel? —catyí ra tsihin ra.

<sup>34</sup> Tan catyí ra Jesús:

—¿A tsa cuñí ñi maa un tsicá tuhun un tsehe tsi yu o iyó inga nyivi natyuhū tsi un cuhva cahān un tsihin yu? —catyí ra Jesús tsihin ra Pilato.

<sup>35</sup> Tan catyí ra Pilato:

—Ñavin ra ñuu Israel cuví yuhu. Juvín ñi maa ra ñuu maa un naha ra tan ra cuví ityi nuu tsihin jutu ñuu maa un cuví ra tsahā cuenda tsi un tsi yu. ¿Náa javahā un? —catyí ra tsihin ra Jesús.

<sup>36</sup> Tacan tan nacahān ra Jesús tan catyí ra:

—Nu ndacá ñaha yu ñavin cuenda nu ñuhu ñayivi ihya cuví tsi. Tun tsatyin ndacá ñaha yu nu ñuhu ñayivi ihya, ra nyicún tsi yu cañi tahan ra naha tyin tacan tan yoñi cua cuhva cuenda tsi yu ndaha ra Israel naha ra. Maa tyin nu ndacá ñaha yu, ñavin cuenda ihya cuví tsi —catyí ra Jesús tsihin ra Pilato.

<sup>37</sup> Tacan tan catyí ra Pilato tsihin ra:

—¿Tun tacan, rey cuví maa un? —catyí ra Pilato tsihin ra Jesús.

Tan nacahān ra Jesús tan catyí ra:

—Rey cuví yu tumaa tsa caahán maa un. Yacan cuenda cacū yu tan vatsí yu nu ñuhu ñayivi ihya, tyin cahan yu tsa nditsa. Tandihī nyivi tsa tyaá yahvi tsa nditsa, tyaá soho ñi tsa caahán yu —catyí ra Jesús.

<sup>38</sup> Tan catyí ra Pilato tsihin ra:

—¿Tan náa cuví tsa nditsa? —catyí ra.

Tsa yahā tsa tsicā tuhun ra Pilato yacan, quitā ra tsicahān nyico ra tsihin ra Israel naha ra inga tsaha tan catyí ra:

—Yuhu ña nañihi maa yu ndi intuhun cuatyí ra ihya.

**Nu cua cahñi ra naha tsi ra Jesús**

(Mt. 27.15-31; Mr. 15.6-20; Lc. 23.13-25)

<sup>39</sup> Maa tyin nyooho iyó ndo tuhun tsa tsicán ndo na tava yu tsi iin ra nyíi vehe caa tsa iyó vico pascua ihya. ¿A cuñí ndo tava yu tsi ra tsa cuví rey cuenda ndo tsa cuví ndo nyivi Israel? —catyí ra Pilato tsihin ra naha.

<sup>40</sup> Tacan tan quitsahā caná tsaa tandihī ra naha tan catyí ra naha:

—¡Ña tava un tsi ra can! ¡Tava tsi ra Barrabás! —catyí ra naha.

Tan ra Barrabás can cuví ra iin ñasuhu.

**19** Tacan tan quihin ra Pilato tsi ra Jesús tan tava tyiñu ra na cañi andaru tsi ra. <sup>2</sup> Tan andaru can javahā ra naha iin corona iñu tan tyihj ra naha jiñi ra Jesús. Tan jacunditsj ra naha iin jahma tunduuhva tsi ra, tahan tsa tuhvā ra cuví rey tsinditsí. <sup>3</sup> Tacan tan natuhvā ra naha nu nyaá ra tan caahán nyaa ra naha tsi ra, tan catyí ra naha:

—¡Nacumí tsi un yooho Rey cuenda nyivi Israel! —catyí ra naha, tan cañi ra naha nuu ra.

<sup>4</sup> Tacan tan quitā nyico ra Pilato inga tsaha tan catyí ra tsihin ra naha:

—Nyehe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihí yu —catyí ra Pilato tsihin ra naha.

<sup>5</sup> Tan quitā ra Jesús yihí corona iñu jiñi ra, tan nditsí ra jahma tunduuhva can. Tacan tan catyí ra Pilato tsihin ra naha:

—¡Ma ra nyaá ihya! —catyí ra tsihin ra naha.

<sup>6</sup> Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quitsahā caná tsaa ra naha tan catyí ra naha:

—¡Tyaa tsi ra nu cruu na cúu ra! —catyí ra naha.

Maa tyin catyí ra Pilato tsihin ra naha:

—Quihin ndo tsi ra tan cahñi maa ndo tsi ra nu cruu tyin yuhu ndi intuhun cuatyí ra tan ña nañihí yu.

<sup>7</sup> Maa tyin nacahan ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñí tsi tsa cúu ra tyin jahá ra tsa Sehe Nyoo cuví tsi ra —catyí ra naha.

<sup>8</sup> Tsa tsiñí ra Pilato yacan, tan nayuhví xaan ca ra.

<sup>9</sup> Tan quihví nyico ra inga tsaha tsitsi vehe tyiñu, tan tsicá tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

<sup>10</sup> Tacan tan catyí ra Pilato tsihin ra:

—¿Nacuenta ña caahan un tsa caahan yu? ¿A ña tsitó un tyin ra cumí tyiñu cuví yu tan iyó ndatu tsi yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

<sup>11</sup> Tan nacahan ra Jesús tan catyí ra:

—Tun tsatyin ña tsahá Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavin ca yooho —catyí ra Jesús tsihin ra Pilato.

<sup>12</sup> Tsa ndihí cahán ra Jesús yacan, tan quitsahá nducú ra Pilato cuhva jaña ra tsi ra, maa tyin ra Israel caná tsa ra naha tsata ra, tan catyí ra naha:

—¡Tatun jaña un tsi ra, ñavin amigo ra César, ra cuví rey cahnu, cuví tsi un! Tyin tandihí ra tsa caahan tyin rey cuví ra naha, ra xaan iñi tsi rey cahnu cuví ra naha —catyí ra naha.

<sup>13</sup> Tacan tan tsa tsiñí ra Pilato yacan, tavá tyiñu ra na quita ra Jesús ityi tsata vehe. Tan tsinyaa ra Pilato nu nañí Gabata nu tuhvá ra jandaá cuatyí nyivi. Tan tsihin yuhu hebreo cuñí tsi catyí: “Nu canyíi yuu”. <sup>14</sup> Tan cuví tsi iin quivi tsa ndi cumañi ca coo vico pascua, cuhva tsa cua tahan hora. Tacan tan catyí ra Pilato tsihin ra Israel can naha ra:

—¡Ihya nyaá rey ndo!

<sup>15</sup> Maa tyin caná tsa ra Israel naha ra tan catyí ra naha:

—¡Na cúu ra! ¡Na cúu ra! ¡Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yoñi ca rey iyó. Intuhun ñi maa ra César, ra cuví rey cahnu —catyí ra naha.

<sup>16</sup> Tacan tan tsahá cuenda ra Pilato tsi ra Jesús tsi ra naha na tyaa ra naha tsi ra nu cruu. Tan quihín andaru tsi ra, cuahan ra tsihin ra naha.

#### Nu tsihí ra Jesucristo nu cruu

(Mt. 27.32-44; Mr. 15.21-32; Lc. 23.26-43)

<sup>17</sup> Tan nyisó ra Jesús cruu ra, cuahan ra iin nu nañí: “Yiqui Jiñi Ndiyí”. Tan tsihin yuhu hebreo nañí tsi Gólgota. <sup>18</sup> Ndacan tyaa ra naha tsi ra nu cruu tsihin nduyu. Tan tyaa ra naha uvi taahan ca ra naha xiin ra. Ticaa ra naha iin ra nu cruu tsa nyaá tsiyo cuaha ra. Tan inga ra tyaa ra naha tsiyo satyin ra. Tan ticaa ra naha tsi ra Jesús mahñu. <sup>19</sup> Tan tavá tyiñu ra Pilato na

cunyaa letra jiñi cruu can. Tan catyí tsi tyehen: “Ra Jesús ra ñuu Nazaret, Rey cuenda nyivi ñuu Israel.”

<sup>20</sup> Tan cuaha nyivi Israel cahví ñi tsa caahan can, tyin yatyin ñi ñuu ñi cuví nu tsaquinyaa ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latín. <sup>21</sup> Yacan cuenda ra cuví ityi nuu tsihin jutu cahán ra naha tsihin ra Pilato:

—Ña tyaa un: “Rey cuenda nyivi ñuu Israel”, vaha ca tyaa un: “Ra ihya catyí ra tyin rey cuenda nyivi ñuu Israel cuví ra” —catyí ra naha.

<sup>22</sup> Maa tyin catyí ra Pilato:

—Tsa tsa yahá tyaa yu, nandoo maa tsi tacan —catyí ra tsihin ra naha.

<sup>23</sup> Tsa yahá tyaa ra andaru can naha ra tsi ra Jesús nu cruu, naquihín ra naha jahma ra. Tsa cumi taahan ra naha quihín luxu luxu jahma ra. Tan ndoo jahma ra tsa quicú cañi ñi tsa tsindasí ra. <sup>24</sup> Tan andaru can natuhún tahan ra naha:

—Ña cua cahnya yo itsi. Jasiquí suuhva jihna yo na nyehe yo yóo cua jaha canaa jahma can —catyí ra naha.

Tacan cuví tumaa caahan nu tutu Nyoo nu catyí tsi tyehen: “Tsatsá tahan ra naha luxu luxu jahma yu tan jasiquí suuhva ra naha tsihin tsi, nyehe ra naha yóo ra jaha canaa itsi.” Tan yacan cuví tsa javahá ra andaru can naha ra.

<sup>25</sup> Tan nyaá síhi ra Jesús yatyin ñi nu nyaá cruu ra. Tan nyaá tucu tahan ña, tan ña María ñasíhi ra Cleofas, tan ña María quee ñuu Magdala. <sup>26</sup> Tan nanyehé ra Jesús tsi síhi ra, nyaá ña yatyin ñi. Tan nanyehé tucu ra tsi ra tsa tsicá tsihin ra, ra tsa cuñí xaan ra. Tan catyí ra tsihin síhi ra:

—Miya, va ra sehe un nyaá tsihin un juvin —catyí ra.

<sup>27</sup> Tacan tan catyí ra tsihin ra tsa cuñí xaan ra:

—Tsa, va síhi un nyaá tsihin un juvin —catyí ra tsihin ra.

Nda quivi can tan quihín ra tsi ña, cuahan tsihin ra yuvehe ra. Tan jahá cuenda ra tsi ña.

#### Nu tsihí ra Jesús

(Mt. 27.45-56; Mr. 15.33-41; Lc. 23.44-49)

<sup>28</sup> Tsa yahá yacan, tsa nyehe ra Jesús tyin tsa ndihí tyiñu jahá ra. Tacan tan catyí ra:

—Na ityi iñi yu —catyí ra.

Tan tsihin yacan cundaá tsa nyaá nu tutu Nyoo nu caahan tsi nácaa cua cúu ra.

<sup>29</sup> Tan ican nyaá iin quiyi nu yihí vinu iya. Tacan tan jatyií ra naha tsa cuví yahma tumaa caa catyi tsihin vinu iya can. Tan tyaa ra naha yacan nu iin yutun hisopo. Tan jandaá ra naha tan tyanaa ra naha can yuhu ra. <sup>30</sup> Tsihí ra Jesús vinu can tan catyí ra:

—Tsa iyó vaha tandihí vityin —catyí ra.

Tacan tan nacañi nuu ra jiñi ra tan tsihí ra.

#### Nu tutsí ra andaru yoco xaan yiqui naha ra Jesús

<sup>31</sup> Tsa ndi cumañi intuhun ña quivi tan tahan tsi quivi vico cahnu pascua, tan ra cuví ityi nuu tsihin nyivi Israel ña cuñí ra naha tsa ndoo cuñu ñuhu ra tsa tsihí

can naha ra nu cruu quivi quitatú, tyn quivi quitatú, quivi ii cuví tsi tsa cuenda ra naha. Yacan cuenda tsi-  
cãñ ra naha tumañi iñi tsi ra Pilato na tava tyiñu ra na  
cahnu andaru sihin ra tsa ticaa nu cruu can naha ra,  
tyin tacan tan numi ñi cúu ra naha, tan jatsiyo ra naha  
cuñu ñuhu ra naha. <sup>32</sup> Tacan tan cuahán andaru nu  
nyecú cruu can. Tan tsahnũ ra naha sihin iin ra ticaá iin  
tsiyo xiin ra Jesús. Tan tsahnũ nyico ra naha sihin inga  
ra tsa ticaa inga tsiyo xiin ra. <sup>33</sup> Maa tyin cuhva tsa  
natuhvã ra naha nu ticaá ra Jesús, nyehe ra naha tyin  
tsa tsihi maa ra. Yacan cuenda ña tsahnũ ca ra naha  
sihin ra.

<sup>34</sup> Maa tyin iin andaru can tutsj ra yoco xaan yiquí na-  
ha ra Jesús. Tan quitã niñi tan ndutyã. <sup>35</sup> Ra tsa nacatyí  
tuhun yacan, ra tsa nyehe vaha cuví ra. Tan tsa nditsa  
caahán ra, tyin maa ra tsitó tyin tsa nditsa caahán ra,  
tacan tan tsinu ndihi tucu iñi nyooho. <sup>36</sup> Tacan cuví tyin  
tacan tan cundaa tsa catyí tuhun Nyoo nu catyí tsi:  
“Ndi intuhun yiquí ra tan ña tahnũ.” <sup>37</sup> Tan iyó inga nyi-  
co nu catyí tsi nu tutu Nyoo tyehen: “Cua nyehe nyivi  
tsi ra tsa tutsj ra naha yoco xaan.”

### Nu quihvĩ ñuhu ra Jesús

(Mt. 27.57-61; Mr. 15.42-47; Lc. 23.50-56)

<sup>38</sup> Tsa yahã yacan, ra José ra ñuu Arimatea tsicãñ  
ndatu ra tsi ra Pilato na cuhva ra tsa naquihin ra cuñu  
ñuhu ra Jesús. Tan ra José can cuví ra iin ra yihé cuenda  
ra Jesús vasu tsa xeehe ñi tsa cuenda tsa yuuhví ra tsi  
ra cuví ityi nu tsihin nyivi Israel. Tacan tan tsahã ra Pi-  
lato ndatu tsi ra, tan tsahãñ ra José tsinaquihin ra cuñu  
ñuhu ra Jesús. <sup>39</sup> Tsahãñ ndihi tucu ra Nicodemo, ra tsa  
tsahãñ tsicahãñ tsihin ra Jesús tsa tsa cuaa. Tsaã ra tsi-  
hin ndutyã tami. Tan iin ndutyã tami tsa nañí mirra  
nasacã nuu tsihin inga tsa nañí áloe. Tan quitã tsi tu-  
maa oco utsi kilu tsa tandihí tsi. <sup>40</sup> Tacan tan ra José tsi-  
hin ra Nicodemo quihĩñ ra naha cuñu ñuhu ra Jesús  
tan cavã nuu ra naha tsi ra tsihin jahma cuiñi tsa tyihĩ  
ra naha ndutyã tami can, tumaa iyó maa nyivi Israel  
tun cua cutsi ñi ndiyi tsitsi ñuhu. <sup>41</sup> Yatyin nu tsahñĩ ra  
naha tsi ra Jesús nu cruu iyó iin cora yutun tata. Tan  
tsitsi cora can nyaá iin ñaña tsaã nu ñaha ca cuyucu  
ndi intuhun ndiyi. <sup>42</sup> Ican ñi tinyij ra naha cuñu ñuhu ra  
Jesús tyin yatyin ñi nyaá ñaña can tan tsa cua tahan tsi  
quivi quitatú nyivi Israel.

### Nu nandotõ ra Jesús

(Mt. 28.1-10; Mr. 16.1-8; Lc. 24.1-12)

**20** Tsa naa ca tsa cuví tumbingu, ña María quee ñuu  
Magdala tsahãñ ña nu ñaña ra Jesús. Tan nyehe  
ña tyin nduve ca yuu ndasí yuhu ñaña can. <sup>2</sup> Tacan tan  
tsinú xaan ña cuahán ña nu nyií ra Simón Pedro tan in-  
ga ra tsicã tsihin ra Jesús, ra tsa cuñí xaan ra Jesús. Tan  
catyí ña tsihin ra naha:

—Quihĩñ nyivi cuñu ñuhu Jutu Mañi yo tsitsi ñaña,  
tan ña tsitó yo nu maa tsindacã ñi itsi —catyí ña María  
tsihin ra Pedro tan tsihin inga ra can.

<sup>3</sup> Tacan tan ra Pedro tan inga ra can cuahán ra naha  
nu ñaña. <sup>4</sup> Tan cuahán nduvi taahan ra naha iin caa ñi,

tsinú ra naha. Maa tyin ñihi ca tsinú inga ra can tan  
ñavin ca ra Pedro, jihna ca ra can tsaã nu ñaña. <sup>5</sup> Quit-  
sahã nyehe ihñi ra tsitsi ñaña, tan nyehe ra jahma  
cuiñi tsa cavã nuu cuñu ñuhu ra Jesús, canyí can. Maa  
tyin ña quihvĩ ra tsitsi ñaña. <sup>6</sup> Yahã can tan tsaã ndihí  
ra Simón Pedro tsata ra, tan ra ican quihvĩ ra tsitsi  
ñaña can. Juvín ñi nyehe ndihí ra can jahma can canyí  
tsi. <sup>7</sup> Tan juvín ñi nyehe ndihí ra tyin jahma tsa tsindasí  
jiñi ra Jesús, ña iin ñi nu canyí can tsihin inga jahma  
can, yihé tahnũ can tan cayucú siin can. <sup>8</sup> Tacan tan  
quihvĩ ndihí inga ra tsicã tsihin ra Jesús can, ra tsa tsaã  
tsa jihna nu ñaña can. Tan nyehe ra tsa cuví can, tan  
tsinũ iñi ra. <sup>9</sup> Tyin tsa jihna, ña cutuñí iñi ra naha tsa  
caahán nu tutu Nyoo, tyin ra Jesús cuñí tsi tsa nandoto  
ra tsa yaha cúu ra. <sup>10</sup> Tacan tan cuanuhu ra tsicã tsihin  
ra Jesús nda yuvehe ra naha.

### Nu quituvĩ ra Jesús nu ña María quee ñuu Magdala

(Mr. 16.9-11)

<sup>11</sup> Maa tyin tsa tsaã nyico ña María, ndoo ña nyaá ña  
tsacú xaan ña ityi tsata ñaña can. Tan tsitsi tsa tsacú  
ña, nyehe ihñi ña tsitsi ñaña can. <sup>12</sup> Tan nyehe ña uvi  
taahan ángel nditsí ra naha jahma cuitsin, nyecú ra na-  
ha nu tsicavã cuñu ñuhu ra Jesús. Iin ra nyaá ityi nu tsi-  
cavã jiñi ra, tan inga ra nyaá ityi nu tsicavã tsaha ra.

<sup>13</sup> Tan tsicã tuhun ra ángel can naha ra tsi ña tan catyí  
ra naha:

—¿Nacuvi tsacú xaan un?

Tan catyí ña:

—Tsacú maa yu tyin quihĩñ nyivi tsi Jutu Mañi yu, tan  
ña tsitó yu nu maa tinyí ñi tsi ra —catyí ña tsihin ángel  
can.

<sup>14</sup> Ndi caahán ca ña yacan, tan nanyico coo ña tan  
nyehe ña tsi ra Jesús ican. Maa tyin ña tsitó ña tatun ra  
Jesús cuví ra. <sup>15</sup> Tacan tan tsicã tuhun ra Jesús tsi ña:

—¿Nacuenda tsacú un? ¿Yóo nanducú un? —catyí ra  
tsihin ña.

Cuñí maa ña tyin ra jahá cuenda cora yutun tata can  
cuví ra. Tan catyí ña:

—Tatta, tatun yooho quihĩñ tsi ra Jesús, cãhan tsihin  
yu nu maa tsindacã un tsi ra, tyin cunaquihin yu tsi ra  
—catyí ña tsihin ra.

<sup>16</sup> Tacan tan catyí ra Jesús tsihin ña:

—¡María! —catyí ra tsihin ña.

Tan nanyehẽ ña tan cãhan ña tsihin ra tsihin yuhu  
hebreo, tan catyí ña:

—¡Raboni! —Tan cuñí tsi catyí can: “Maestro”.

<sup>17</sup> Tan catyí ra Jesús tsihin ña:

—Ña tñin un tsi yu, tyin ñaha ca cahun yu nu nyaá Ju-  
tu yu. Maa tyin cãaahan tan cãhan un tsihin tandihí  
yañi yu tyin cuahan yu nu nyaá Jutu yu, tan juvín ñi Ju-  
tu ndihí ndo cuví tsi ra. Cuahan yu nu nyaá Nyoo yu,  
tan juvín ñi Nyoo ndo cuví tsi ra —catyí ra Jesús tsihin  
ña.

<sup>18</sup> Tacan tan tsahãñ ña María ñuu Magdala can tsija-  
cotõ ña tsi ra tsicã tsihin ra Jesús tyin nyehe ña tsi ra  
tan cãhan ra yacan tsihin ña.

**Nu quituvj ra Jesús nuu ra tsicā tsihin ra**  
(Mt. 28.16-20; Mr. 16.14-18; Lc. 24.36-49)

<sup>19</sup> Juvín ñi maa quivi can nu quitsaha vitya, tsa cua cuaa tan ndu ijn ra tsicā tsihin ra Jesús. Tan ndasi vaha yuvehe nu yucú ra naha tsa cuenda tsa yuuhví ra naha tsi ra cuví ityi nuu tsihin nyivi Israel. Tan ra Jesús quituvj ra tan tsinyaa nyityi ra mahñu ra naha. Tan tsahā ra nacumi tsi ra naha, tan catyí ra:

—Na coo tsa taxin añima ndo —catyí ra.

<sup>20</sup> Tsa yahā tsa cahān ra yacan tan janahā ra ndaha ra tan xiin ra tsi ra naha. Tan ra ican naha ra siñ xaan cuñí ra naha tsa nyehe ra naha tsi Jutu Mañi yo. <sup>21</sup> Tan catyí nyico ra Jesús inga tsaha tsihin ra naha:

—Na coo tsa taxin añima ndo. Tumaa tsa tavā Jutu yu tyiñu tsi yu, tacan tavá nyico tucu yuhu tyiñu tsi nyooho —catyí ra tsihin ra naha.

<sup>22</sup> Tacan tan tivj ra tsi ra naha tan catyí ra tsihin ra naha:

—Naquihin ndo Tatyí Ii Nyoo. <sup>23</sup> Nyivi tsa jahá ndo tucahnu iñi, iyó tucahnu iñi tsi ñi. Tan nyivi tsa ña jahá ndo tucahnu iñi, nduve tucahnu iñi iyó tsi ñi —catyí ra Jesús tsihin ra naha.

**Nu nyehe ra Tomás tsi Jutu Mañi yo tsa yahā nandoto ra**

<sup>24</sup> Maa tyin ra Tomás, iin rq tsicā tsihin ra Jesús, ra tsa catyí ñi: “ra tñihí”, yofñi ra nyíí tsihin ra naha tsa tsahān ra Jesús. <sup>25</sup> Yahā can tan nacatyj tuhun ra tsicā tsihin ra Jesús tsihin ra:

—Nyehe ndi tsi Jutu Mañi yo —catyí ra naha tsihin ra. Maa tyin ra Tomás catyí ra:

—Tun ña nyehe yu ndaha ra nu caahví nu quihvi nduyu, tan ña cuaxin yu nundaha yu nu yihj nduyu can, tan ña cuaxin yu ndaha yu yiqui naha ra, ña cua tsinu iñi yu —catyí ra Tomás.

<sup>26</sup> Tsa yahā una quivi yucú nyico ra tsicā tsihin ra Jesús tsitsi iin vehe. Tan nyíí ra Tomás tsihin ra naha. Tacan tan vasu ndi maa ndasi vaha yuvehe, maa tyin ra Jesús quihvi ra tan tsinyaa nyityi ra mahñu ra naha. Tan tsahā ra nacumi tsi ra naha tan catyí ra:

—Na coo tsa taxin añima ndo.

<sup>27</sup> Tacan tan quitsahā catyí ra tsihin ra Tomás:

—Cuaxin nundaha un nu caahví ndaha yu ihya. Tan cuaxin ndaha un yiqui naha yu. Tan ña cuví un ra ndava iñi. Tsjinu iñi —catyí ra Jesús tsihin ra Tomás.

<sup>28</sup> Tacan tan nacahān ra Tomás tan catyí ra:

—¡Jutu Mañi yu! ¡Tan Nyoo yu! —catyí ra Tomás.

<sup>29</sup> Tan catyí ra Jesús tsihin ra:

—Yooho Tomás, vityin tsinú iñi un tyin nyehé un tsi yu. Siñ ca cuñí nyivi tsa nduve tsa nyehe tan tsinú iñi ñi —catyí ra Jesús tsihin ra Tomás.

**Nu jacoto ra Juan nacuenda tsinuj libru ihya**

<sup>30</sup> Cuaha ca tsa iyo javahā ra Jesús nuu ra tsicā tsihin ra, maa tyin ña tandihí tsi nyaá nu libru ihya. <sup>31</sup> Tsinyaa tsa nyaá tyin tacan tan tsinu iñi ndo tyin ra Jesús cuví

ra Cristo, ra cuví Sehe Nyoo, tan coo ndo ñayivi nyitó tsa ña cua naa maa.

**Nu quituvj ra Jesús nuu utsa taahan ra tsicā tsihin ra**

**21** Tsa yahā can tan quituvj ra Jesús nuu ra tsicā tsihin ra inga tsaha. Tyehen quituvj ra yatyin ñi yuhu miñi Tiberias: <sup>2</sup> Iin ñi nu yucú ra Simón Pedro tan ra Tomás tsa nañi: “ra tñihí”, tan ra Natanael, ra ñuu Caná nu cuví Galilea. Tan yucú ndihí sehe ra Zebedeo naha ra tan uvi taahan ca ra tsicā tsihin ra Jesús. <sup>3</sup> Tan catyí ra Simón Pedro tsihin ra naha:

—Cuahan yu cua tiin yu tyaca —catyí ra.

Tan catyí ra naha tsihin ra:

—Cuhun ndihí ndi tsihin un —catyí ra naha.

Cuahān ra naha tan quihvi ra naha tsitsi iin yutun ndoo, maa tyin tsacuaa can ndi intuhun maa tyaca ña ñihj ra naha. <sup>4</sup> Tsa cuñi cunditsin tan quituvj ra Jesús nu nyiti yuhu miñi can. Maa tyin ra tsicā tsihin ra, ña nacoto ra naha tsi ra. <sup>5</sup> Tacan tan catyí ra tsihin ra naha:

—Nyooho ra cuatyí, ¿a ñaha ca ñihí ndo tyaca?

Tan nacahān ra naha tan catyí ra naha:

—Ñaha ca ñihí ndi.

<sup>6</sup> Tacan tan nacahān ra Jesús tan catyí ra:

—Cuaxin ndo traya ndo tsiyo cuaha yutun ndoo juvin, tan cua ñihí ndo tyaca —catyí ra Jesús tsihin ra naha.

Tacan icā ra naha. Yaha can tan ndacua ña cuví ca tava ra naha traya can nu ndutya, tsa cuenda tsa cuaha tyaca yihj tsitsi can. <sup>7</sup> Tan ra tsa cuñi xaan ra Jesús catyí ra tsihin ra Pedro:

—¡Jutu Mañi yo cuví ra! —catyí ra tsihin ra Pedro.

Tsa tsiñj ra Simón Pedro tyin Jutu Mañi yo cuví ra, tsinditsj ra jahma ra, tyin tavā ra can tsa cua tiin ra tyaca, tan quihvi ra cuahān ra tsitsi ndutya can. <sup>8</sup> Tan inga ra tsa tsicā tsihin ra Jesús tsaā ra naha nda yuhu miñi can tsihin yutun ndoo, ixtá ra naha traya can tyin tsitu cuí can tsihin tyaca, tyin yatyin ñi yuhu miñi can yucu ra naha tumaa iin cientu metru ñi. <sup>9</sup> Tsa nuuj ra naha nu ñuhu, nyehe ra naha iin nu cayú tuun ñuhj. Tan canyí iin tyaca tsihin paan nuu tuun ñuhj can. <sup>10</sup> Tan catyí ra Jesús tsihin ra naha:

—Ndāca ndo taahan tyaca tsa ndi tiin ndo —catyí ra Jesús tsihin ra naha.

<sup>11</sup> Tan ndaā ra Simón Pedro nu yutun ndoo tan quitsahā ixtá caa ra traya tyin tsitu cuí can yihj tyaca nahnu. Cientu uvi xico utsi uñi tñi yihj tsitsi can. Tan vasu cuaha xaan tñi, maa tyin ña tanj traya can. <sup>12</sup> Tacan tan catyí ra Jesús tsihin ra naha:

—Ñaha ndo tyin curumusa ndo —catyí ra Jesús tsihin ra naha.

Tan ndi intuhun ra tsicā tsihin ra, ña canā iñi ra naha ndaca tuhun ra naha yoo ra cuví ra tyin tsitó ra naha tyin Jutu Mañi yo cuví ra. <sup>13</sup> Tacan tan natuhvā ra Jesús tan quihj ra paan can, tan tsahā ra tsi ra naha. Tan juvin ñi tacan icā ra tsihin tyaca.

<sup>14</sup> Yacan cuví nu tsinu uñi tsaha quituvj ra Jesús nuu ra tsicā tsihin ra tsa yahā nandoto ra.

### Nu caahán ra Jesús tsihin ra Simón Pedro

<sup>15</sup> Tsa yahá tsa curumusa ra Jesús, tan tsicá tuhun ra tsi ra Simón Pedro:

—Simón, sehe ra Jonás, ¿a cuñí ca un tsi yu tan ñavin ca ra ihya naha ra?

Nacahán ra Pedro tan catyí ra:

—Tacan Jutu Mañi yu, maa un tsitó tyin cuñí yu tsi un —catyí ra Pedro.

Tan catyí ra Jesús tsihin ra:

—Cuhva tsa catsi mbee nyihi jana yu —catyí ra Jesús tsihin ra Pedro.

<sup>16</sup> Tsicá tuhun nyico ra Jesús tsi ra inga tsaha:

—Simón, sehe ra Jonás, ¿a cuñí un tsi yu? —catyí ra Jesús tsihin ra.

Nacahán ra Pedro tan catyí ra:

—Jutu Mañi yu, maa un tsitó tyin cuñí yu tsi un —catyí ra Pedro tsihin ra.

Tan catyí ra tsihin ra:

—Jaha cuenda mbee jana yu —catyí ra Jesús tsihin ra.

<sup>17</sup> Tan tsinu uñi tsaha tsicá tuhun nyico ra tsi ra:

—Simón, sehe ra Jonás, ¿a cuñí un tsi yu? —catyí ra Jesús tsihin ra.

Cuhva tsa tsicá tuhun ra tsi ra tsa tsinu uñi tsaha tatun cuñí ra tsi ra, ra Pedro nducuiihya xaan cuñí ra, tan catyí ra tsihin ra:

—Jutu Mañi yu, maa un tsitó nácaa añima yu tan maa un tsitó tyin cuñí yu tsi un —catyí ra.

Tan catyí ra Jesús tsihin ra:

—Jaha cuenda mbee jana yu. <sup>18</sup> Tsa nditsa caahán yu tsihin un tyin tsa ndi tyuvaa un tsinditsi maa un jahma un tan cuahán maa un nu cuñí un cuhun un. Maa tyin tatun tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaca ra

tsi un nu ña cuñí un cuhun un —catyí ra Jesús tsihin ra Pedro.

<sup>19</sup> Tsa cahán ra Jesús yacan, cuñí ra cahan ra nácaa cua cúu ra Pedro tan cua jacahnu ra tsi Nyoo tacan. Yahá can tan catyí ra Jesús tsihin ra Pedro:

—¡Naha quitsi nyicun un tsi yu! —catyí ra tsihin ra.

### Nu caahán ra Juan tuhun maa ra

<sup>20</sup> Tacan tan natsicó coo ra Pedro tan nyehe ra tyin nyicún inga ra tsa tsicá tsihin ra Jesús tsi ra naha, ra tsa cuñí xaan ra Jesús. Juvín ra tsinyanaa tsi ra Jesús tsa cuxiñi ra quivi can. Tan tsicá tuhun ra tsi ra tan catyí ra: “Jutu Mañi yu, ¿yóo ra cua xico tsi un?” catyí ra, tsicá tuhun ra quivi tsa ndi cumañi ca cúu ra Jesús.

<sup>21</sup> Cuhva tsa nyehe ra Pedro tsi ra, tsicá tuhun ra tsi ra Jesús:

—Jutu Mañi yu, tan ra ihya, ¿náa cua tahan ra? —catyí ra tsihin ra.

<sup>22</sup> Nacahán ra Jesús tan catyí ra:

—Tatun cuñí maa yu tsa coo ra nda cuanda quitsi yu inga tsaha, ¿náa cuenda yooho? Cõhon yooho tsihin yu —catyí ra Jesús tsihin ra Pedro.

<sup>23</sup> Tacan tan iin yaha ñi tsiny tuhun ihya nu nyecú yañi yo tyin ra ican, ña cua cúu ra. Maa tyin ña catyí ra Jesús tsa ña cua cúu ra can. Tyin catyí ra: “Tatun cuñí yuhu tsa coo ra nda cuanda quitsi yu inga tsaha, ¿náa cuenda yooho?”

<sup>24</sup> Yuhu cuví ra can, ra tsa cahán ra Jesús tuhun. Tan nyehe yu tandihí cuíi maa tsa cuví tan tyaá yu nu libru ihya. Yuhu tsitó yu tyin tandihí tsa tyaá yu, tsa nditsa caahán tsi.

<sup>25</sup> Iyó cuaha ca tsa javahá ra Jesús. Tun tsatyin tsicunyaá tandihí can nu libru, tsicá iñi yu tyin ndi ña cua cutahan can nanih cahnu nu ñuhu ñayivi.

Tan na cuvi tsi tacan ñi.

# Los Hechos

## Nu catyí ra Jesús tyin cua quitsi Tatyí Ii Nyoo

**1** Yooho Teófilo, quivi tsa jacuhun yu tutu tsa jihna ñi can tsi un, tyaq yu tandihí tsa quitsahá javahá ra Jesús tan tandihí tsa jacuahá ra nda quivi jihna ñi, <sup>2</sup> tan nda quivi nandaq ra andivi. Tan tsa ndi cumañi ca nandaa ra andivi, nacatsj ra tsi ra apóstol cuenda ra. Tan tsihin tunyee iñi Tatyí Ii Nyoo tava tyiñu ra tsi ra naha tyin caca ra naha tyiñu ra. <sup>3</sup> Tan cuaha xaan tundohe nyehé ra Jesús tan tsihi ra. Tan tsa yahá tsa tsihi ra, nandoto ra tan quituvi ra nu yucú ra tsa tava tyiñu ra. Tan tsitsi tsa uvi xico quivi, cuaha xaan tsaha quituvi ra nu yucú ra naha, tyin na coto ra naha tyin nditsa tsa nyito ra. Tan cahān ra Jesús tsihin ra naha nácaa ndacá ñaha Nyoo tsi yo.

<sup>4</sup> Tsa ndi nyíí ra Jesús tsihin ra naha, tan catyí ra tsihin ra naha:

—Ña cua quita ndo Jerusalén ihya, nda cuanda naquihin ndo tsa catyí Jutu yu tyin cuhva ra tsi ndo, tumaa tsa cahān yu tsihin ndo quivi can. <sup>5</sup> Nditsa tyin tsihin ndutya jacoondutya ra Juan tsi nyivi. Maa tyin nyooho ña cuaha ca quivi tan coondutya ndo tsihin Tatyí Ii Nyoo —catyí ra Jesús tsihin ra naha.

## Nu nandaq ra Jesús andivi

<sup>6</sup> Tsa ndu iin ra tava tyiñu ra Jesús, tan tsicā tuhun ra naha tsi ra tan catyí ra naha:

—Jutu Mañi yu, ¿a vityin ñi cua jacacu un tsi ñuu Israel ihya tsa ña cua cundaca ñaha ca ra ñuu Roma tsi yo? —catyí ra naha.

<sup>7</sup> Tan nacahān ra Jesús tan catyí ra tsihin ra naha:

—Ña taahán tsi coto nyooho ndaa quivi cua cuvi tsa cua javaha Nyoo Jutu yo. Intuhun ñi maa ra cua cahan ama cua cuvi tsi. <sup>8</sup> Tyin quivi tsa cua quitsi Tatyí Ii Nyoo siqui ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihya tan tandihí ñuu tsa cayucú Judea tan Samaria, tan nda cuanda naniñ cahnu ñuhu ñayivi —catyí ra Jesús tsihin ra naha.

<sup>9</sup> Tan tsa yahá tsa cahān ra Jesús tuhun ihya, tan tsitsi tsa nyehé ra naha tsi ra, nandaq ra andivi, tan quihvi ra tsitsi vico. Tacan tan ña nyehé ca ra naha tsi ra.

<sup>10</sup> Tan cuhva tsa nyehé ndaa ra naha andivi, quituvi uvi taahan ángel Nyoo tsa nditsi jahma cuitsin yatyin ñi nu nyecú ra naha. <sup>11</sup> Tan catyí ángel can naha ra tsihin ra tava tyiñu ra Jesús:

—Nyooho ra Galilea, ¿nacuenda nyehé ndaa xaan ndo andivi? Ra Jesús tsa nyehé ndo nandaq ihya, juvin

ra cua quitsi inga tsaha, tan tyehen cua nyehé nyico ndo tsi ra —catyí ángel tsihin ra naha.

## Nu nacatsj ra tava tyiñu ra Jesús tsi ra Matías tyin jaha tyiñu ra tava tyiñu tsa javahá ra Judas

<sup>12</sup> Tacan tan quitā ra tava tyiñu ra Jesús nu tsiyucu ra naha yucu nu iyó yutun olivo. Tan cuanuhu ra naha ñuu Jerusalén. Tan yatyin ñi canyí ñuu can, tumaa sava hora ñi tan tsaa yo. Tyin sava hora ñi cuví caca nyivi quivi quitatú ñi, tyin tacan catyí maa ley tsa tyaq ra Moisés. <sup>13</sup> Tsa tsaq ra naha ñuu Jerusalén can, ndaa ra naha nu tsinu uvi pisu vehe nu iyó ra naha. Tan ra tsa yucú can, cuví ra ihya naha ra: ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñí tsa nasama ra ndacá ñaha, tan tsihin ra Judas yañi ra Jacobo. <sup>14</sup> Tan tandihí ra ican naha ra ndu iin ra naha tandihí quivi tan tsicān tahvi ra naha tsi Nyoo. Tan yucú ndihí tucu yañi ra Jesús tsihin ra naha, tan tsihin ña María sihi ra, tan cuaha ca maa ñiñaha.

<sup>15</sup> Tan tsa tandihí nyivi tsa ndu iin quivi can quitá maa cientu oco ñi. Tacan tan nduvitā ra Pedro. Tan catyí ra tsihin ñi:

<sup>16</sup> —Nyooho yañi, tsa nyaá tucu maa tsa tahān ra Jesús cuhva ihya tan vityin tsa cundaq tsa cahān ra David jahā Tatyí Ii Nyoo nu catyí ra tyin ra Judas cua cuhva cuenda ra tsi ra Jesús tsi ra xaan iñi tsi ra. <sup>17</sup> Tan ra Judas cuví ra iin ra tsa tsinyiñ tsihin yo. Tan iin caa ñi jahā tyiñu ra tsihin yo. <sup>18</sup> Maa tyin tsahān ra, tan jatā ra ñuhu tsihin xuhun tsa ñihí ra tsa xico ra tsi ra Jesús. Yahā can tan canacava ra tsihin jiñi ra, tan ndatā tsitsi ra tan quitā tandihí tsiti ra. <sup>19</sup> Tan quivi tsa tsito nyivi iyó Jerusalén ihya tsa tsihi ra, jacunañi ñi ñuhu can Acéldama. Tan tsa tsihin yuhu maa ñi cuñí tsi catyí Ñuhu cuenda tsa Tsatj Niñi Nyivi. <sup>20</sup> Tyin nu libru Salmo catyí tsi cuenda ra Judas tyehen:

Na ndoo maa vehe ra.

Tan ña coo nyivi tsitsi vehe can.

Tan catyí tucu tsi:

Inga ra cua jaha tyiñu tyiñu tsa javahá ra.

<sup>21</sup> Tan vityin yucú ra tsa cutahān tsihin yo quivi tsinyiñ Jutu Mañi yo Jesucristo tsihin yo; nda quivi jacoondutya ra Juan tsi ra, tan nda quivi nandaq ra cuahān ra andivi. Tan vityin ñiñi cuñí tsi tsi inga ra cuvi tsandaa tsihin yo tsa cuenda tsa nandoto ra Cristo —catyí ra Pedro.

<sup>23</sup> Tacan tan canā ra naha tsi uvi taahan ra naha. Canā ra naha tsi ra José tsa nañi Barsabás, tan juvin ñi



nañi tucu ra Justo; tan cana tucu ra naha tsi ra Matías. <sup>24</sup>Tan tsican tahvi ra naha tsi Nyoo tan catyí ra naha tyehen:

—Jutu Mañi yu, yooho tsitó un tsa tsicá iñi ndi tsihin añima ndi. Janaha tsi ndi tsitsi tsa uvi taahan ra ihya naha ra, ndáa ra tsa nacatsj maa un, <sup>25</sup>tyin cuiso ra ty-iñu tsa jacunaq ra Judas tsa cuenda cuatyí ra, tan cuahán ra nu taahán maa tsi cuhun ra —catyí ra naha, tsican tahvi ra naha tsi Nyoo.

<sup>26</sup>Tacan tan tava cuenda ra naha ndáa ra cua tahan tsi cuiso tyiñu can. Tan tahan tsi tsi ra Matías. Ra ican cuví ra tahan tsi cutahan tsihin tsa utsi iin ra tsa tava tyiñu ra Jesús.

### Nu nuu Tatyí Ii Nyoo

**2** Tsaq quivi vico Pentecostés, tan ndu ijin tandihí nyivi tsa tsinú iñi tsi ra Jesús. <sup>2</sup>Tan sana iñi ñi tan tsiñi ñi cucayu ityi andivi. Tumaa cucayu tsa vatsí tatyí xaan. Tan iyo xaan cuví tsitsi vehe nu yucú ñi. <sup>3</sup>Tacan tan quituvj tumaa iin ñuhu tan tsaq tsi siqui intuhun intuhun ñi. <sup>4</sup>Tan tandihí ñi tsitú ñi tsihin Tatyí Ii Nyoo. Tan quitsaha caahán ñi inga yuhu cuhva tsa jacahan maa Tatyí Ii Nyoo tsi ñi.

<sup>5</sup>Tan quivi can cuaha xaan ra ñuu Israel tsaq ra naha ñuu Jersualén. Ra vaha tsicá tsihin Nyoo cuví ra naha. Quee ra naha tandihí ñuu tsa cayucú nu ñuhu ñayivi.

<sup>6</sup>Tan tsa tsiñi ra can naha ra tsa iyo xaan cuví nu yucú nyivi cuenda ra Cristo, tan cuahán ra naha tan ndu ijin ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiñi ra yuhu ra naha tsa caahán ñi jahá Tatyí Ii Nyoo. <sup>7</sup>Iyo xaan cuñi ra naha tan quitsaha natuhún tahan ra naha tan catyí ra naha:

—¿A ñavin nyivi ñuhu Galilea cuví tandihí ñi tsa caahán ihya? <sup>8</sup>¿Nacuenda tyin tsiñi yo caahán ñi cuhva caahán intuhun intuhun yo? <sup>9</sup>Ihya yucú yo tsa cuví yo nyivi quee Partia, Media, Elam, Mesopotamia, Judea, Capadocia, Ponto, Asia, <sup>10</sup>Frigia, Panfilia, Egipto, tan nyivi quee ityi nuu ca Cirene ityi Africa. Tan yucú tucu yo tsa cuví yo nyivi ñuu Roma tan iyó yo ñuu ihya. Tan juhva yo cuví yo nyivi Israel nda quivi cacu yo. Tan inga yo cuví yo nyivi nanduvj cuenda nyivi Israel tan nyicún yo ley tsa tyaq ra Moisés. <sup>11</sup>Iyó tucu yo tsa cuví yo nyivi quee Creta tan Arabia. Maa tyin tandihí yo tan tsiñi yo tyin tsihin yuhu tsa caahán maa yo caahán ñi. Tan nacatyí tuhun ñi tsa cahnu tsa javahá Nyoo —catyí ra naha.

<sup>12</sup>Tandihí ra naha, iyo xaan cuñi ra naha, tan tsicá tuhun tahan ra naha tan catyí ra naha:

—¿Náa cuñi tsi catyí tandihí tsa cuví ihya? —catyí ra naha.

<sup>13</sup>Maa tyin inga ra jacuñi nyaa ra naha tsi ñi, tan catyí ra naha tyin tsiñi ñi.

### Nu caahán ra Pedro tsihin nyivi

<sup>14</sup>Tacan tan nduvitq ra Pedro tsihin tsa utsi iin ca ra tava tyiñu ra Jesús. Tan ñihi cahán ra tan catyí ra:

—Nyooho yañi, tsa cuví ndo ra ñuu Israel, tan tandihí nyooho tsa iyó ñuu Jerusalén ihya. Cuñi tsi tsa coto ndo tuhun ihya. Tan tyaq soho vaha ndo tsa cua cahan yu tsihin ndo. <sup>15</sup>Tyin cuñi maa ndo tyin tsiñi ndi. Maa tyin ñavin nyixi tsihi ndi, tyin ña tuhvá nyivi coho nyixi hora ihya, tyin ndi jatyaan. <sup>16</sup>Maa tyin tsa cuví ihya cuví tsa cahán ra Joel, ra cuví ndusu yuhu Nyoo tahan tsanaha. Tyin catyí ra:

<sup>17</sup>Nu cua ndihí quivi, catyí Nyoo, cua jaquitsi yu Tatyí Ii yu siqui tandihí nyivi. Tan cua cahan sehe ndo tsa cuenda yu.

Tan ra cuatyí tan ñi cuatyí cua janaha yu tsa iyo tsi ñi. Tan nyivi tsahnu cua nyehe ñi ñumaahna jaha yu.

<sup>18</sup>Cua jacuhun yu Tatyí Ii yu siqui ñi tsa jaha tyiñu tsa cuenda yu.

Tan cua cahan ñi tsa cuenda yu, catyí Nyoo.

<sup>19</sup>Tan catyí ra tyin cua janaha ra tsa iyo cua nyehe nyivi ityi andivi.

Tan ityi nu ñuhu ñayivi cua javaha ra tsa iyo, seña niñi, seña ñuhu, tan vico yuhma.

<sup>20</sup>Tan ñicanyii cua ndunaa tsi.

Tan yoo cua nducuaaha tsi tumaa cuaaha niñi.

Tandihí tuhun caahán ra ihya cua cuví tsi tsa ndi cumañi ca tahan tsi quivi quitsi Jutu Mañi yo.

Tan quivi cua quitsi ra, iyo xaan cua cuví.

<sup>21</sup>Tan tandihí nyivi tsa tsicán tahvi tsi ra cua cacu ñi, catyí ra Joel jahá Nyoo.

<sup>22</sup>Tsa yaha nacatyí tuhun ra Pedro yacan, tacan tan catyí ra tsihin ra naha:

—Nyooho ra Israel, tyaq soho ndo tsa cua cahan yu ihya. Ra Jesús, ra ñuu Nazaret, maa Nyoo nacatsj tsi ra, tan tsa janahá Nyoo tsi yo tyin nditsa tsa nacatsj ra tsi ra, tsahá ra tunyee iñi tsi ra tan cuaha xaan tsa iyo tan tsa nyityi tan seña javahá ra. Tan tsa tsitó maa ndo tandihí tsa caahán yu ihya. <sup>23</sup>Maa tyin quivi nacuhva cuenda ndo tsi ra, javahá ndo tumaa cuhva tyaq maa Nyoo cuhva nda quivi jihna ñi. Tyin tsahá cuenda ndo tsi ra tsi ra caquiñi. Tan ticaq ra naha tsi ra nu cruu. Tsahñi ra naha tsi ra jahá ndo. <sup>24</sup>Maa tyin Nyoo janandotq ra tsi ra. Jacacu ra tsi ra tyin ña cuvi cundaca ñaha tuhun tsihi tsi ra. <sup>25</sup>Tyin ra David cahán ra tuhun cahán ra Cristo tahan tsanaha, tan catyí ra:

Tacan ñi nyehé yu tsi Nyoo Jutu yu ityi nuu yu.

Maa ra nyaá ra ityi xiin cuaha yu tan nduve náa cuví jayuhvi tsi yu.

<sup>26</sup>Yacan cuenda si xaan cuñi yu. Tan jacahnú yu tsi Nyoo tsihin tsa si cuñi yu.

Tan cuñu ñuhu yu cua quitatu tsi tyin tsitó yu tyin cua nandoto yu inga tsaha.

<sup>27</sup>Tyin yooho, Nyoo Jutu yu, ña cua nacoo ihñi un añima yu nu yucú añima nyivi tsa tsihi,

tan ndi ña cua cuhva un tsa tyahyu cuñu ñuhu yu.

Tyin sehe ii maa un cuví tsi yu.

<sup>28</sup>Tan janahá un tsi yu ityi nu coo yu ñayivi ña cua naa maa.

Tan cua jacutu un tsi yu tsihin tusi iñi tyin maa un nyaá tsihin yu, catyí ra David cahán ra tsa cahán ra Cristo tahan tsanaha.

<sup>29</sup> Nyooho yañi, tsitó vaha yo tyin ra David tsi tsaah-nu yo tsihi ra tan quihvi ra tsitsi ñuhu. Tan ñaña ra ndi nyaá tsi ihya vityin. <sup>30</sup> Maa tyin ra David cuvi ra iin ndusu yuhu Nyoo. Tan tsitó ra tyin Nyoo catyi ra tyin juvin ñi tata maa ra cua cuvi ra Cristo. Tan ra Cristo, cuví ra cua cundaca ñaha tumaa tsa tsindaca ñaha ra David. <sup>31</sup> Tan ra David tumaa tsa tyin nyehé ra tsa cua cuvi nu cuahán ca tsi ityi nuu. Tan cahan ra tuhun tsa cahan ra Cristo. Tan catyi ra tyin ña cua ndoo aña ra nu yucú aña nyivi tsa tsihi. Tan ndi ña cua tyahu cuñu ñuhu ra, catyi ra. <sup>32</sup> Tan ra Jesús can janandoto Nyoo tsi ra. Tan tandihi maa ndi cuví ndi tsandaa tsa cuenda tsa nandoto ra. <sup>33</sup> Jutu Nyoo jacahnú ra tsi ra Jesús, tan tsihin ndaha cuaha ra cañihí ra tsi ra nda gloria. Tan ra Jesús naquihin cuenda ra Tatyí Ii tsa catyi Jutu yo Nyoo tahanan tsanaha tyin cuhva ra tsi yo. Tan yacan cuví tsa tsahá ra tsi ndi vityin. Juvin tsi cuví tsa nyehé ndo tan tsiñi ndo. <sup>34</sup> Tyin ñavin ra David nandaa ityi andivi. Maa tyin maa ra David cahan ra tuhun ra Jesús, tan catyi ra:

Jutu Mañi yo Nyoo catyi ra tsihin Jutu Mañi yu ra Cristo: “Cunya xiin cuaha yu

<sup>35</sup> tsitsi tsa cua caquin yu tsi ra xaan iñi tsi un tsaha un”, catyi ra David jahá Nyoo.

<sup>36</sup> Tacan cahan ra Pedro tsihin ra naha, tan catyi tucu ra:

—Nyooho tan tandihi ca nyivi Israel, coto vaha ndo tyin tuhun ra Jesús, yacan cuví tsa caahan yu tsihin ndo ihya. Ticaá ndo tsi ra nu cruu. Maa tyin cuví ra Jutu Mañi yo, tan cuví tucu ra Cristo ra ndacá ñaha tsi yo jahá Nyoo —catyi ra Pedro.

<sup>37</sup> Cuhva tsa tsiñi ra naha tsa cahan ra Pedro tuhun ihya, cuihya xaan cuñi ra naha cuvi. Tan tsicá tuhun ra naha tsi ra Pedro tan tsi tandihi ca ra tava tyiñu ra Jesús, tan catyi ra naha:

—Yañi, ¿nácaa javaha ndi vityin? —catyi ra naha tsihin ra tava tyiñu ra Jesús.

<sup>38</sup> Tacan tan catyi ra Pedro tsihin ra naha:

—Intuhun intuhun ndo ndu uvi iñi ndo cuatyí ndo tan nasama ndo cuhva iyó ndo. Tan ccondutya ndo tsihin sivi ra Jesucristo. Tan cua jaha ra tucahnu iñi cuatyí ndo. Tacan tan cua cuhva Nyoo Tatyí Ii ra tsi ndo.

<sup>39</sup> Tyin tahanan tsanaha catyi Nyoo tyin cuhva ra Tatyí Ii ra tsi yo, tan tsi sehe yo, tan tsi nyivi tsa cañi iyó. Tyin tandihi nyivi tsa cua nacana Jutu Nyoo cua cuhva ra Tatyí Ii ra tsi ñi —catyi ra Pedro.

<sup>40</sup> Tsihin tuhun ihya tan tsihin inga ca tuhun, ra Pedro tsahá cuenda ra tsi ra naha tan catyi ra tsihin ra naha:

—Nducu ndo cuhva na jacacu Nyoo tsi ndo, coto cunaan ndo tsihin nyivi caquiñi iyó nu ñuhu ñayivi ihya —catyi ra tsihin ra naha.

<sup>41</sup> Tacan tan tandihi ra tsa tyaa yahvi tuhun cahan ra Pedro tsicoondutya ra naha. Tan quitá tumaa uñi mil nyivi tsa tandihi ñi, tan ndu iñi ñi tsihin nyivi yihí cuenda ra Jesucristo. <sup>42</sup> Tan tandihi quivi ndu iñi tandihi ñi, tan ñi iñi ñi tyaá soho ñi tsa jacuahá tandihi ra tava tyiñu ra Jesucristo tsi ñi. Tan iin ñi cuví ñi tsihin tahanan ñi, tan tsicán tahvi ñi tan tsatsí ñi paan tan tsihi ñi vinu

tyin tacan tan ña cua naa iñi ñi tyin tsihi ra Cristo tsa cuenda cuatyí ñi.

### Cuhva iyó nyivi yihí cuenda Jutu Mañi yo Jesucristo quivi can

<sup>43</sup> Tan cuaha tsa iyo javahá tandihi ra tsa tava tyiñu ra Jesucristo jahá Nyoo. Tan tandihi ñi iyo cuñi ñi.

<sup>44</sup> Tandihi ñi yihí cuenda ra Cristo iin caa ñi iyó ñi tsihin tsa iyó tsi ñi. <sup>45</sup> Xicó ñi tsa iyó tsi ñi. Tan tsatsá ñi xuhun ñi tsi nyivi tahanan ñi cuhva tsa tsiñi ñuhu tsi intuhun intuhun ñi. <sup>46</sup> Tandihi quivi tan ndu iñi ñi nda vehe ñuhu cahnu. Tan nda yuvehe ñi iin caa ñi tsatsí ñi paan tan tsihi ñi vinu. Tan si cuñi ñi tsatsí ñi tyin iin ñi cuví ñi.

<sup>47</sup> Tan jacahnú ñi tsi Nyoo. Tan vaha caahan tandihi nyivi tuhun ñi. Tan iin tan iin quivi tan nducuahá ca nyivi quihvi cuenda Jutu Mañi yo Jesús tyin jacacú ra tsi ñi.

### Nu nduvahá iin ra coxo

**3** Iin quivi cuahán ra Pedro tsihin ra Juan vehe ñuhu cahnu. Cuví tsi cuhva caa uñi tsa tseñi, cuhva tsa tuhvá nyivi Israel cuahán cuandacán tahvi tsi Nyoo. <sup>2</sup> Tan iin ra ndaahvi, coxo ra nda quivi cacú ra, nyaá ra yuhu cora vehe ñuhu cahnu can tandihi maa quivi. Tyin tsindacá ñi tsi ra na ndacan ra xuhun tsi nyivi quihvi yuhu cora can, tan nañi tsi Yuhu Cora Sií Caá. <sup>3</sup> Tacan tan nyehé ra coxo can tsi ra Pedro tsihin ra Juan tsa cua quihvi ra naha yuhu cora can. Tan tsicán ra xuhun tsi ra naha. <sup>4</sup> Tan nyehé ra Pedro tan ra Juan tsi ra. Tan ra Pedro catyi ra tsihin ra:

—Nyehé tsi ndi —catyi ra.

<sup>5</sup> Tacan tan quitsahá nyehé ra coxo can tsi ra naha. Cuñi maa ra tyin iyó tsa cua cuhva ra naha tsi ra. <sup>6</sup> Maa tyin ra Pedro catyi ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin sivi ra Jesucristo ra ñuu Nazaret, nduvita tan çaça —catyi ra Pedro tsihin ra.

<sup>7</sup> Tacan tan tñiñ ra Pedro ndaha cuaha ra tan cañihí ra tsi ra. Tan juvin ñi cuhva can nacoó tunyee iñi nduvi taahan tsaha ra tan jucun tsaha ra. <sup>8</sup> Tacan tan ra coxo can ndavá ra, tan nduvita ra tsinyaá nyityi ra. Tan quitsahá tsicá ra. Tan quihvi ra tsihin ra naha tsitsi cora vehe ñuhu can, tsicá ra, tan ndavá ra, jacahnú ra tsi Nyoo. <sup>9</sup> Tandihi nyivi nyehé ñi tsi ra tyin tsicá ra tan jacahnú ra tsi Nyoo. <sup>10</sup> Tan iyo xaan cuñi ñi tan yuuhvi ñi tsa cuenda tsa nduvahá ra can. Tyin nacotó ñi tsi ra. Tyin juvin ra cuví ra tsa tuhvá tsinyaá Yuhu Cora Sií Caá can tsicán ra xuhun tsi nyivi.

### Nu caahan ra Pedro tuhun ra Cristo tsihin nyivi nu cuví corredor cuenda ra Salomón

<sup>11</sup> Ra coxo tsa nduvahá can, ña jañá maa ra tsi ra Pedro tan ra Juan. Tan tandihi nyivi iyo cuñi ñi, tan tsinú xaan ñi tsaa ñi nu cuví corredor cuenda ra Salomón tyin cua nyehé ñi tsi ra coxo can tyin tsa nduvahá ra.

<sup>12</sup> Tsa nyehe ra Pedro yacan, tan catyí ra tsihin nyivi can:

—Nyooho ra Israel, ¿nacuenda iyo xaan cuñí ndo? Tan ¿nacuenda nyehé xaan ndo tsi nyuhu? ¿A cuñí maa ndo tyin tsihin tunyee iñi maa ndi, a tsa cuenda tsa catsi iyó ndi nuu Nyoo, tan cuví janduvahá ndi tsi ra coxo ihya? <sup>13</sup> Ñavin maa nyuhu janduvahá tsi ra. Nyoo ra cuví Nyoo tsii tsaahnu yo, ra Abraham, ra Isaac tan ra Jacob, ra ican jacahnú tsi Sehe ra tan tsahá ra tunyee iñi tsi ra, ra tsa tsahá cuenda ndo tsi ra Pilato, ra cumí tyiñu. Tan ra Pilato cuñi ra jaña ra tsi ra. Maa tyin nyooho ña tsahá ndo. <sup>14</sup> Tahān tsi tsa ndacan ndo tsa jaña ra tsi ra vaha, tan ra ii can, maa tyin nyooho tsi-cān ndo tsa jaña ra tsi iin ra tsahñí ndiyi. <sup>15</sup> Tan nyooho tsahñi ndo tsi ra tsa tsahá ñayivi nyito coo yo tsihin Nyoo. Maa tyin Nyoo Jutu yo janandotō ra tsi ra. Tan ña ndoō ra nu yucú añima nyivi tsa tsihi. Tan nyuhu cuví ndi tsandaa tsa cuenda tsa nandotō ra. <sup>16</sup> Tan juvin ra Jesús cuví ra tsa tsahá tunyee iñi tsi ra coxo ihya tan nduvahá tsaha ra, tyin tsinú iñi ndi tyin iyó tunyee iñi tsi ra Jesús. Yacan cuenda nduvahá tsaha ra ihya, tan nacotō vaha ndo tsi ra. Tan tandihi nyooho nyehe ndo tyin nduvahá ra tsa cuenda tsa tsinú iñi ndi.

<sup>17</sup> Tsitó yu, —catyí ra Pedro— tyin quivi tsa tsahñi ndo tsi ra Jesús, ña tsitó ndo tyin ña vaha tsa javahá ndo. Tan tacan tucu ra cuví ityi nuu tsihin ndo, ña tsitó ra naha. <sup>18</sup> Maa tyin tacan jacuvi ndo tan cundaā tsa cahan ra cuví ndusu yuhu Nyoo tahān tsanaha, tyin catyí ra naha tyin ra Cristo cua nyehe ra tundoho. <sup>19</sup> Yacan cuenda ndu uvi iñi ndo cuatyí ndo, tan ñacuhva cuenda ndo añima ndo tsi Nyoo, na ndatsi cuatyí ndo. Tacan tan sii xaan cua cuñi añima ndo jaha tunyee iñi Jutu Mañi yo. <sup>20</sup> Tacan tan cua jaquitsi ra tsi ra Jesús ra cuví Cristo, na quitsi ra inga tsaha. Tyin nda quivi jihna ñi tyaa Nyoo cuhva tyin quitsi ra tsa cuenda yo.

<sup>21</sup> Taahán tsi tsa ndoō ra Jesucristo gloria tsa vityin nda cuenda quivi cua jandutsaa Nyoo tandihi maa tsa iyó. Tumaa cuhva catyi ra cuví ndusu yuhu Nyoo tahān tsanaha. <sup>22</sup> Tyin tacan catyi ra Moisés tsihin tsii tsaahnu yo: “Cua jaquitsi Jutu yo Nyoo tsi ra tsa cua cahan tuhun ra. Tan juvin ñi nyivi yo cua cuví ra. Tan cua cahan ra tuhun Nyoo tsihin ndo tumaa caahán yuhu. Tyaa yahvi ndo tandihi tsa cua cahan ra tsihin ndo.

<sup>23</sup> Tyin tandihi nyivi tsa ña cua tyaa soho tsa cua cahan ra, cua cunaa ñi, tyin ña cua cutahan ñi tsihin nyivi tsa nacatsi Nyoo”, catyi ra Moisés.

<sup>24</sup> Tan tacan tucu tandihi ra cuví ndusu yuhu Nyoo nda quivi tsicoō ra Samuel tan nda cuenda vityin, jacotō ra naha tsa cuví vityin. <sup>25</sup> Tandihi tsa catyi Nyoo tyin cuhva ra tsi yo, cahan ra cuví ndusu yuhu Nyoo tahān tsanaha. Tandihi can tsii maa ndo cuví can. Tan tyiñu tsa ndoō Nyoo tsihin ra Abraham tsii tsaahnu yo, juvin ñi tsa cuenda maa ndo cuví yacan. Tyin catyi Nyoo tsihin ra Abraham: “Tandihi nyivi tsa iyó nu ñuhu ñayivi cua nasoco yu tsi ñi tsa cuenda nyivi tata un.” <sup>26</sup> Tan yacan cuenda quivi janandotō Nyoo tsi Sehe ra, jihna ca nu yucú ndo jacuhun ra tsi ra, tyin nasoco ra tsi ndo,

tan intuhun intuhun ndo nacoo ndo tsa caquiñi iyó ndo —catyí ra Pedro tsihin ñi.

#### Nu tñin ra cuví ityi nuu vehe ñuhu cahnu naha ra tsi ra Pedro tan ra Juan

<sup>4</sup> Ndi caahán ca ra Pedro tan ra Juan tsihin nyivi, tan tsaā ra cuví jutu naha ra tsihin ra cuví ityi nuu tsihin ra jahá cuenda vehe ñuhu, tan tsihin ra cuví saduceo naha ra. <sup>2</sup> Nduxaān xaan ra naha tyin ra Pedro tan ra Juan jacuahá ra naha tsi nyivi tan catyí ra naha tyin nditsa tsa cua nandoto nyivi tsa tsa tsihi, tyin ra Jesús nandotō ra. <sup>3</sup> Tacan tan tñin ra naha tsi nduvi taa-han ra tavā tyiñu ra Jesús can naha ra. Tan tyihí ra naha tsi ra naha vehe caa. Tan ndoō ra naha nda cuenda inga quivi tyin tsa cueñi cuví cuhva can. <sup>4</sup> Maa tyin cuaha ñi tsa tsiñi tuhun caahán ra Pedro quitsahá tsinú iñi ñi. Tan ndu iñi ñi tsihin nyivi yihé cuenda ra Jesús. Tan tsa tandihi ñi quitá maa uhun mil cuví tsa maa ñi maa rayi naha ra.

<sup>5</sup> Tsa tuvi inga quivi, nda ñuu Jerusalén ndu iin tandihi ra cumí tyiñu cuenda nyivi Israel, tan tsihin ra tsahnu, tan tsihin ra cuví maestro cuenda ley tsa tyaa ra Moisés. <sup>6</sup> Tan nyii tucu ra Anás ra jutu tsaahnu cuví ityi nuu. Tan nyii tucu ra Caifás, tan ra Juan, tan ra Alejandro. Tan yucú ndihi tucu tandihi rayi tsa cuví nyivi ra jutu tsaahnu cuví ityi nuu. <sup>7</sup> Tacan tan tavā tyiñu ra naha na cuquihin ra naha tsi ra Pedro tan ra Juan. Tan tsindacā ra naha tsi ra naha nda mahñu nu yucú ra naha. Tan tsicā tuhun ra naha tsi ra naha, tan catyí ra naha:

—¿Yóo tsahá ndatu tsi ndo tsa janduvaha ndo tsi ra can? ¿Yóo tsahá tunyee iñi tsi ndo tsa javaha ndo tye-hen? —catyí ra naha tsihin ra Pedro tan ra Juan.

<sup>8</sup> Tan ra Pedro tsitú ra tsihin Tatyí Ii Nyoo. Tan naca-hān ra tsihin ra naha:

—Nyooho ra ndacá ñaha Israel ñuu yo ihya, tan nyooho ra tsahnu. <sup>9</sup> Vityin tsicá tuhun ndo tsi ndi tsa cuenda tsa vaha tsa cuví tsi ra coxo ihya, tyin cuñí ndo coto ndo nácaa nduvahá ra. <sup>10</sup> Yacan cuenda cua catyi tuhun ndi tsihin ndo na coto tandihi nyivi Israel. Tyin ra ihya nyaá ra nuu tandihi ndo, tyin nduvahá ra tsihin tunyee iñi tsi ra Jesucristo, ra ñuu Nazaret, ra tsa tsahá cuenda ndo na cúu ra nu cruu. Maa tyin Nyoo janandotō ra tsi ra. <sup>11</sup> Tan juvin ra Jesús cuví yuu tsa tsiñi ñuhu ca tsa ña cuñi ra javahá vehe cuatyíñu ra, tumaa cuhva catyi nuu tutu Nyoo. Tan nyooho cuví ra javahá vehe tan ña cuñi ndo yuu tsa tsiñi ñuhu ca can. <sup>12</sup> Yoñi inga ra cuví jacacú tsi yo. Tyin intuhun ñi maa ra tsahá Nyoo tyin jacacu ra tsi yo —catyí ra Pedro tsihin ra can naha ra.

<sup>13</sup> Tan ra cumí tyiñu can naha ra iyo xaan cuñi ra naha tsiñi ra naha tsa caahán ra Pedro tan ra Juan tyin nii xaan iñi ra naha caahán ra naha, tan ñavin ra cahvi escuela cuví ra naha. Tacan tan nacotō ra naha tsi ra naha tyin ra ican naha ra cuví ra tsa tsicā tsihin ra Jesús quivi can. <sup>14</sup> Tan ra tsa nduvahá can, nyaá nyityi ra tsihin ra naha. Yacan cuenda ña cuví cahan ra cumi tyiñu can naha ra tsa ndavaha ñi siqui ra Pedro tan ra Juan.

<sup>15</sup> Tacan tan catyí ra cumi tyiñu naha ra tsihin ra naha: —Quita nduñi taahan nyooho tsata vehe.

Tan quitā ra naha. Tan ndoo ra cumi tyiñu can naha ra natuhún tahan ra naha. <sup>16</sup> Tan catyí ra naha:

—¿Náa javaha yo tsihin ra ihya naha ra? Tyin tandihi maa nyivi Jerusalén tsitó ñi tsa iyo tsa javahā ra naha. Tan ña cua cuvi catyí yo tyin ña nditsa. <sup>17</sup> Maa tyin ña cuñí yo tsa cuaha ca nyivi coto tuhun ihya, yacan cuenda vaha ca tsa casi yo tsi ra naha, tan cahan yo tsihin ra naha na ña cahan ca ra naha tuhun ra Jesús tsihin nyivi —catyí ra cumi tyiñu naha ra.

<sup>18</sup> Tacan tan canā ra cumi tyiñu tsi ra Pedro tan ra Juan. Tan catyí ra naha tsihin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyivi. <sup>19</sup> Maa tyin ra Pedro tan ra Juan nacahan ra naha tan catyí ra naha:

—Tyihi tuñi ndo iñi ndo tan nyehe ndo taton vaha ca tsa tyaa yahvi ndi tsi maa ndo o vaha ca tsa tyaa yahvi ndi tsi Nyoo. <sup>20</sup> Tyin nyuhu ña cuví tsa jandihí ndi tsa nacatyí tuhun ndi tsa nyehe ndi tan tsa tsiñi ndi —catyí ra naha.

<sup>21</sup> Tacan tan tyasi nyico ra cumi tyiñu naha ra tsi ra Pedro tan ra Juan. Tan jañā ra naha tsi ra naha tyin ña ñihí ra naha nácaa tatsi tuñi ra naha tsi ra naha. Tyin tandihi nyivi tan jacahnú ñi tsi Nyoo tsa cuenda tsa cuví can. <sup>22</sup> Tyin rayi tsa nduvahā can, tsa yahā uvi xico cuiya ra, tan tacan cuiya tahan ra tundoho tan nduvahā ra jahā Nyoo.

#### Nu tsicān nyivi yihí cuenda ra Cristo tunyee iñi Nyoo

<sup>23</sup> Tan tsa quitā ra Pedro tan ra Juan, cuahán ra naha nu yucú nyivi yihí cuenda ra Jesús. Tan nacatyí tuhun ra naha tandihi tsa cahan ra tsahnu naha ra tan ra jutu tsa cuví ityi nuu naha ra tsihin ra naha. <sup>24</sup> Cuhva tsa tsiñi tandihi ñi, tan iin caa ñi quitsahā tsicán tahvi ñi tsi Nyoo. Tan catyí ñi:

—Jutu Mañi yu, yooho javahā un andivi tan ñuhu ñayivi. Javahā un ndutya ñuhu. Tan tandihi ca tsa iyó, maa un javahā. <sup>25</sup> Tan yooho tsihin Tatyí Ii un jacahan un tsi ra David tahan tsanaha. Tan catyí ra:

¿Nacuenda tsa nduxaán nyivi ña tsitó tsi Nyoo?

¿Nacuenda tsicá iñi ñi tuhun tsa nduve yahvi nyaá?

<sup>26</sup> Rey naha ra tan tsihin ra tsa ndacá ñaha nu ñuhu ñayivi ihya nduvitā ra naha

siqui un, Jutu Mañi yu, tan siqui ra Cristo, ra nyisó tyiñu maa un, catyí ra David.

<sup>27</sup> Jutu Mañi yu, nditsa tyin ra Herodes, tan ra Poncio Pilato ndu iin ra naha ñuu Jerusalén ihya tsihin ra ñuu Roma naha ra tan tsihin ra ñuu Israel naha ra tyin cahñi ra naha tsi ra Jesús Sehe ii un, tsa nacatsi vaha maa un. <sup>28</sup> Tan tacan javahā ra naha, tumaa cuhva tsa catyí maa un tahan tsanaha tyin cua cuvi. <sup>29</sup> Tan vityin, Jutu Mañi yu, nyehe tyin cuñí ra naha casi ra naha tsi ndi. Tan cuhva tsa ñi coo iñi ndi tyin tyiñu maa un javahā ndi, Jutu Mañi yu. Tan na ña nayuhvi ndi cahan ndi tuhun maa un. <sup>30</sup> Tan tsihin tunyee iñi maa un tan cua nduvaha nyivi cuuhvi, tan cua nyehe ndi seña tan

tsa iyo tsa cuenda tunyee iñi ra Jesús Sehe ii un —catyí ñi, tsicán tahvi ñi tsi Nyoo.

<sup>31</sup> Tan cuhva tsa ndihí tsicān tahvi ñi tsi Nyoo tan taan nu yucú ñi. Tan tandihi ñi tsity ñi tsihin Tatyí Ii Nyoo tan cahan ñi tuhun Nyoo tsihin tsa ña yuuhvi ñi.

#### Nduve tsa cumañi tsi nyivi yihí cuenda ra Cristo

<sup>32</sup> Tandihí ñi tsa tsinú iñi, iin ñi cuví ñi, tan iin ñi cuhva tsicá iñi ñi. Ndi intuhun ñi tan ña catyí ñi tyin tsa tsii maa ñi cuví tsa iyó tsi ñi, tyin tsii tandihi ñi cuví can.

<sup>33</sup> Tan tsihin tunyee iñi cahnu, caahán ra tavā tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandihi ra naha. <sup>34</sup> Tan ndi intuhun ñi tan nduve tsa cumañi tsi ñi tyin tandihi ñi tsa iyó vehe o ñuhu ñi, xicó ñi can. Tan cua ndaca ñi xuhun can <sup>35</sup> tsi ra tavā tyiñu ra Jesús. Tan maa ra naha natsatsá xuhun can tsi intuhun intuhun nyivi cuhva tsa tsiñi ñuhu tsi ñi. <sup>36</sup> Tacan javahā iin ra tsa nañi José. Ra ican cuví ra tata ra Leví. Tan cacū ra ñuhu Chipre tsa canyí mahñu ndutya ñuhu. Tan ra tavā tyiñu ra Jesús jacunañi ra naha tsi ra Bernabé. Tan sivi can cuñí tsi catyí: ra jandu iin iñi nyivi. <sup>37</sup> Tan ra Bernabé can xico ra ñuhu ra. Tan tsahā ra xuhun can tsi ra tavā tyiñu ra Jesús.

#### Cuatyí ra Ananías tsihin ña Safira

**5** Maa tyin iin ra tsa nañi Ananías tsihin ña Safira, ñasiñi ra, xico ñi iin ñuhu. <sup>2</sup> Tan tyihí xeehe ñi juhva xuhun. Tacan tan ra Ananías tsindacā ra xuhun tsa ndoo ña tsi ra tavā tyiñu ra Jesús. Tan catyí ra tyin tandihi xuhun tsa cuyahvi ñuhu cuví can. <sup>3</sup> Tacan tan catyí ra Pedro tsihin ra:

—Yooho Ananías, ¿nacuenda tsa tsahā un tsa quihvi nu ña vaha añima un? Tyin cuñí un jandavi ñaha un tsi Tatyí Ii Nyoo, tan catyí un tyin tandihi xuhun tsa cuyahvi ñuhu can cuví tsehe, tan ña nditsa un tyin ndoo juhva xuhun can tsi un. <sup>4</sup> Tsii un cuví ñuhu can, tan tsii un cuví xuhun tsa ñihí un cuenda ñuhu can. ¿Nacuenda tsa cuñí un jandavi ñaha un tsi Nyoo tan catyí un tyin tandihi xuhun can tsahā un? Maa tyin ñavin tsi nyuhu jandavi ñaha un, tyin tsi maa Nyoo jandavi ñaha un —catyí ra Pedro tsihin ra Ananías.

<sup>5</sup> Tsa tsiñi ra Ananías tuhun tsa cahan ra Pedro, nduvā ra tan tsihi ra. Tan tsa tsito nyivi tuhun ihya tan nayuhvi xaan ñi. <sup>6</sup> Tacan tan tsaā ra cuatyí naha ra tan cavā nuu ra naha jahma cuñu ñuhu ra Ananías. Tan tsahan ra naha tsindacā ra naha tsi ra nu ndaa cumi santu. <sup>7</sup> Yahā uñi hora tan tsaā ñasiñi ra Ananías tan quihvi ña nu yucú ra tavā tyiñu ra Jesús, tyin ña tsitó ña tsa cuví. <sup>8</sup> Tan quitsahā tsicá tuhun ra Pedro tsi ña tan catyí ra tsihin ña:

—¿A tyehen ñi cuví xuhun tsa cuyahvi ñuhu ndo? —catyí ra Pedro tsihin ña.

Tacan tan nacahan ña tan catyí ña tsihin ra:

—Tacan ñi cuví xuhun tsa cuyahvi tsi —catyí ña tsihin ra.

<sup>9</sup> Tacan tan catyí ra Pedro tsihin ña:

—¿Nacuenda tsa natuhun tahan ndo tan cuñi ndo jandavi ñaha ndo tsi Tatyí Ii Jutu Mañi yo Nyoo? Ican vatsí ra tsa tsahān tsindacā tsi yī un nu ndaa cumi santu. Tan vityin cua cundaca ndihī ra naha tsi un —catyí ra Pedro tsihin ña Safira.

<sup>10</sup> Tan juvin ñi cuhva can tan nduvā ña tsaha ra Pedro, tan cueta tsihī ña. Tan quihvī ra cuatyí can naha ra, tan nyehe ra naha tyin canyī ña tsihī ña. Tan cañihī ra naha tsi ña, tan tsindacā ra naha tsi ña nu ndaa cumi sandu. Tan tinyijī ra naha tsi ña xiin yī ña. <sup>11</sup> Tan tandihī nyivi yihí cuenda ra Cristo, tan tandihī nyivi tsa tsito tuhun can, nayuhvī xaan ñi.

### Cuaha xaan tsa iyo tan seña javahā ra tavā tyiñu ra Jesús

<sup>12</sup> Cuaha seña tan tsa iyo javahā ra tavā tyiñu ra Jesús nu yucú nyivi. Tan tandihī ñi yihí cuenda ra Cristo ndu iin ñi nu cuví corredor cuenda ra Salomón. <sup>13</sup> Tan nyivi tsa inga cuenda ña caná iñi ñi cutahan ñi tsihin ñi yihí cuenda ra Cristo. Maa tyin nyivi can vaha caahán ñi siquī ñi yihí cuenda ra Cristo. <sup>14</sup> Tan cuaha xaan nyivi quitsahā tsinú iñi tsi Jutu Mañi yo Jesús, tahan ñi rayī tan ñaha. <sup>15</sup> Tan nda cuanda tavá ñi tsi nyivi cuuhví ityí cahnu, tsaquín ñi tsi ñi nu tsito. Tyin tatun cua yaha ra Pedro tan yaha tixahñu ra siquī ñi cua nduvaha ñi. <sup>16</sup> Tacan tucu nyivi iyó yatyin ñi ñuu Jerusalén can, cuandacá ñi tsi nyivi cuuhví tan nyivi tsa yihí tatyí ña vaha. Tan nduvahā tandihī ñi.

### Nu nyehé ra Pedro tan ra Juan tundocho

<sup>17</sup> Tacan tan ra jutu tsaahnu tsa cuví ityí nuu, tan ra yihí cuenda ra cuví saduceo naha ra, ndasí cuñi ra naha nyehé ra naha tsi ra tavā tyiñu ra Jesús tsa cuenda tsa vaha tsa javahá ra naha tsihin tunyee iñi tsa tsahā Nyoo tsi ra naha. <sup>18</sup> Tacan tan tñin ra naha tsi ra naha. Tan tyihī ra naha tsi ra naha vehe caa. <sup>19</sup> Maa tyin tsa cuaa can quitsijī iin ángel tsa jaquitsijī Jutu Mañi yo, tan nuñā ra yuvehe caa can. Tan tavā ra tsi ra naha. Tan catyí ra tsihin ra naha:

<sup>20</sup> —Cyaahan ndo tan cūnyacu nyityi ndo vehe ñuhu cahnu. Tan ñacatyí tuhun ndo tsihin nyivi nácaa coo ñi ñayivi nyito tsa iyó ndo —catyí ángel can tsihin ra naha.

<sup>21</sup> Tsa tsiñijī ra naha tsa cahān ra ángel can, tan cuahán ra naha. Tan tsa tuví inga quiví can nañihī nyivi tsi ra naha vehe ñuhu cahnu. Tan quitsahā jacuahá ra naha tsi ñi.

Tan tsitsi tsa jacuahá ra naha tsi ñi, tan ndu iin ra jutu tsaahnu tsa cuví ityí nuu tan ra tsa yucú tsihin ra. Tan canā ra naha tsi ra cumi tyiñu cuenda nyivi Israel tyin coo ra naha junta. Tacan tan tavā tyiñu ra naha na cuquihin ra naha tsi ra tavā tyiñu ra Jesús nu yucú ra naha vehe caa can. <sup>22</sup> Maa tyin cuhva tsa tsaā ra vitya naha ra tsitsi vehe caa can, ña nañihī ra naha tsi ra naha. Tan cuanuhū ra naha cua nacatyí tuhun ra naha tsihin ra jutu tsaahnu tsa cuví ityí nuu. <sup>23</sup> Tan catyí ra naha tsihin ra:

—Ndasí yuvehe caa can tan tsaā ndi. Tan andaru, yucú ra naha yuvehe jahá cuenda ra naha. Maa tyin cuhva tsa nuñā ndi yuvehe can, yoñi maa nañihī ndi —catyí ra naha tsihin ra jutu tsaahnu tsa cuví ityí nuu.

<sup>24</sup> Tacan tan ra jutu tsaahnu tsa cuví ityí nuu can tsihin ra yihí ndaha tsi tandihī ra tsa jahá cuenda vehe ñuhu can tan tsihin ra jutu tsa cuví ityí nuu naha ra, tsiñijī ra naha tsa cahān ra vitya naha ra tsihin ra naha tan iyo xaan cuñi ra naha. Tan natuhun tahan ra naha nácaa javaha ra naha tan cundihī tuhun can. <sup>25</sup> Tacan tan tsaā iin ra tan catyí ra:

—Ra tsa tyihī ndo vehe caa can naha ra, yucú ra naha vehe ñuhu jacuahá ra naha tsi nyivi —catyí ra.

<sup>26</sup> Tacan tan ra yihí ndaha tsi ra jahá cuenda vehe ñuhu can, tsahān ra tsihin ra vitya naha ra, tan tsiquihīn ra naha tsi ra tavā tyiñu ra Jesús tsihin tsa vii ñi tan ña cañijī ra naha tsi ra naha, tyin yuuhví ra naha tsi nyivi coto cañi ñi yuu tsi ra naha. <sup>27</sup> Tsindacā ra naha tsi ra tavā tyiñu ra Jesús nuu ra cumi tyiñu vehe ñuhu cahnu. Tan ra jutu tsaahnu tsa cuví ityí nuu catyí ra tsihin ra tavā tyiñu ra Jesús:

<sup>28</sup> —Nyuhu tsa cahān vaha xaan ndi tsihin ndo tyin ña cahān ca ndo tuhun ra Jesús. Maa tyin nyoocho ña tyaā soho ndo tsa cahān ndi. Tan tsa ndihī maa tsitsi ñuu Jerusalén jacotó ndo tuhun ra. Tan cuñi ndo tyaā ndo cuatyí can siquī ndi tyin tsihī ra —catyí ra jutu tsaahnu tsa cuví ityí nuu tsihin ra naha.

<sup>29</sup> Tacan tan nacahān ra Pedro tan inga ra tavā tyiñu ra Jesús, tan catyí ra naha:

—Taahán tsi tyaā yahvi jihna ndi tsi Nyoo tan ñavin ca tsi nyoocho. <sup>30</sup> Nyoo cuenda tsii tsaahnu yo juvin ra janandotō tsi ra Jesús, ra tsa ticaā ndo nu cruu tan tsahñijī ndo. <sup>31</sup> Tan ra Jesús cuví ra tsa jacahnū xaan Nyoo, tan tyaā ra tsi ra xiin cuaha ra, tyin cua cundaca ñaha ra tandihī maa. Tan intuhun ñi maa ra cuví ra jacacú tsi yo. Tyin tacan tsahá ra cuhva tsi yo tsa cuví yo nyivi Israel na ndu uvi iñi yo cuatyí yo tan jaha ra tucahnū iñi cuatyí yo. <sup>32</sup> Tan nyuhu cuví ndi tsandaa tsa cuenda tandihī yacan. Tan tacan cuví tucu Tatyí Ii Nyoo tsa tsahā Nyoo cunyaa añima nyivi tyaá yahvi tsi ra —catyí ra Pedro tsihin ra naha.

<sup>33</sup> Tan tsa tsiñijī ra naha tsa cahān ra Pedro, nduxaān xaan ra naha. Tan cuñijī ra naha cahñi ra naha tsi ra naha. <sup>34</sup> Maa tyin tsihin ra cumi tyiñu can naha ra nyijī iin ra cuví fariseo tsa nañí Gamaliel. Tan cuví ra maestro cuenda ley Nyoo tsa tyaā ra Moisés. Tan nyivi tyaá yahvi xaan ñi tsi ra. Tan ra Gamaliel can, nduvitā nyityi ra. Tan caahán ra na quita ra tavā tyiñu ra Jesús tañi ñi. Tacan tan quitā ra naha. <sup>35</sup> Tan quitsahā caahán ra Gamaliel can tsihin tandihī ca ra cumi tyiñu naha ra, tan catyí ra:

—Yoo, ra tsa ndacá ñaha tsi nyivi Israel, jaha yo cuenda tsi yo tsihin tsa cua javaha yo tsi ra ican naha ra. <sup>36</sup> Nduyuhun iñi ndo tyin tsa iyó juhva quiví nduvitā iin ra tsa tsinañijī Teudas. Tan catyí ra tyin cuví ra iin ra vaha. Tan quitā maa tumaa cumi cientu rayī tsinyicūn tsi ra. Maa tyin yahā can tsahñijī nyivi tsi ra. Tan tandihī ra tsa tsinyicūn tsi ra cuanuhū ra naha ñuu ra naha.

Tan tsindihí tuhun can. <sup>37</sup>Yahá can tan nu cuahán ca tsi ityi nuu, quivi nacahví ra gobiernu tsi nyivi, tan nduvita ra Judas ra ityi Galilea. Tan cuaha xaan nyivi tsinyicun tucu tsi ra can. Maa tyin juvin ñi tsahñi nyivi tsi ra. Tan tandihí ñi tsa tsinyicun tsi ra cuanuhú ñi ñuu ñi.

<sup>38</sup>Yacan cuenda jaña yo tsi ra ihya naha ra. Tan ña cua tyihí yo tsi yo tsihin ra naha tyin tatun tuhun iin rayii ñi cuví tsa jacuahá ra naha, cua cundihí tuhun can. <sup>39</sup>Maa tyin tatun nditsa tyin tuhun Nyoo cuví tsa jacuahá ra naha, ña cua cuvi casi yo. Jaha yo cuenda tsi yo tyin ña vaha cañi tahan yo tsihin Nyoo —catyí ra Gamaliel tsihin ra naha.

<sup>40</sup>Tandihí ra naha ndoo ra naha vaha tsa ña cua cahñi ra naha tsi ra naha. Tacan tan caná ra naha tsi ra tava tyiñu ra Jesús. Tan catyí ra cumí tyiñu naha ra tsihin ra vitya naha ra na cañi ra naha tsi ra naha. Tan tyasí ra naha nu cahan ra naha tuhun ra Jesús. Tacan tan jaña ra naha tsi ra naha. <sup>41</sup>Tan quitá ra naha nuu ra cumí tyiñu. Tan sii xaan cuñi ra naha tyin tsahá Nyoo ndatu tyin nyehé ra naha tundoho tsa cuenda ra Jesús. <sup>42</sup>Tan ña jandihí ra naha tsa caahán ra naha. Tan tandihí quivi jacuahá ra naha tuhun ra Jesucristo vehe ñuhu tan vehe nyivi.

**Nu nacatsí nyivi yihí cuenda ra Jesús utsa taahan ra naha tyin jaha cuenda ra naha náa tsa tsiñi ñuhu tsi ñi**

**6** Tan nu cuahán ca tsi quivi cuaha xaan nyivi yihí cuenda ra Cristo cuví. Tacan tan nyivi tsa caahán yuhu griego quitsahá caahán ñi siqui nyivi tsa caahán yuhu hebreo tan catyí ñi tyin cuhva tsa tsatsá ra naha tsa catsi ñi tandihí quivi ña jahá vaha ra naha cuenda tsi ñi ndaahvi grecia tsa tsihí yí. <sup>2</sup>Tacan tan tandihí tsa utsi uvi taahan ra tava tyiñu ra Jesús jandu iin ra naha tsi tandihí nyivi yihí cuenda ra Cristo. Tan catyí ra naha tsihin nyivi can:

—Ña vaha tsa jandihí ndi tsa caahán ndi tuhun Nyoo tan tsa tsatsá ndi tsa catsi ndo. <sup>3</sup>Yacan cuenda, nyooho yañi, nanducu ndo utsa taahan ra nu yucú yo ihya, ra vaha iyó tsihin Nyoo, ra tsa iyó tsa tsiñituñi iñi, ra tsitú tsihin Tatyí Ii Nyoo. Tan cuhva yo tyiñu ihya tsi ra naha. <sup>4</sup>Tan nyuhu cua jañihi ndi ndacan tahvi ndi tsi Nyoo, tan cua jacuaha ca ndi tuhun Nyoo —catyí ra naha.

<sup>5</sup>Tandihí ñi tan ndoo ñi vaha. Tan nacatsí ñi tsi ra Esteban. Tyin tsinú xaan iñi ra tsi Nyoo. Tan tsitú ra tsihin Tatyí Ii Nyoo. Tan nacatsí tucu ñi tsi ra Felipe, tan ra Prócoro, tan ra Nicanor, tan ra Timón, tan ra Parmenas, tan ra Nicolás tsa cuví ra iin ra ñuu Antioquía, tan nanduví ra iin ra Israel. <sup>6</sup>Tacan tan tsindacá ñi tsi ra naha nu nyecú ra tava tyiñu ra Jesús. Tan tyiso ndaha ra naha jiñi intuhun intuhun ra naha tan tsican tahvi ra naha tsi Nyoo tsa cuenda ra can naha ra.

<sup>7</sup>Tan tsityá ca tuhun Nyoo. Tan nducuahá ca ñi yihí cuenda ra Cristo ñuu Jerusalén. Tan cuaha xaan ra cuví jutu cuenda nyivi Israel natsinú ndihí iñi ra naha tuhun ra Cristo.

### Nu tyihí ra naha tsi ra Esteban vehe caa

<sup>8</sup>Ra Esteban cuví ra iin ra tsa tsitú tsihin tunyee iñi Nyoo. Tan vaha xaan nyivi cuví ra tyin tsitú añima ra tsihin tsa vaha tsi Nyoo. Tan cuaha xaan tsa iyo tan seña javahá ra nu yucú nyivi. <sup>9</sup>Tacan tan juhva ra tsa tsicá vehe ñuhu ñuu Israel tsa nañi Vehe Ñuhu Cuenda Nyivi Ndoó Nuña cutahán ra naha tsihin juhva ra ñuu Cirene naha ra, tan cutahán ndihí juhva ra ñuu Alejandro naha ra, tan ra ityi Cilicia naha ra, tan ra ityi Asia naha ra. Tan quitsahá caahán yuhu tahan ra naha tsihin ra Esteban. <sup>10</sup>Maa tyin ña cuví jahá canaa ra naha tsi ra, tyin ra Esteban caahán ra tsihin tsa tsiñituñi jiñi ra tsa tsahá Tatyí Ii Nyoo tsi ra. <sup>11</sup>Tacan tan tyahví ra can naha ra tsi juhva ra na cahan ra naha cuendu siqui ra Esteban tan catyí ra naha tyin ra Esteban caahán ra ndavaha ñi siqui ra Moisés, tan siqui Nyoo. <sup>12</sup>Yacan cuenda tandihí nyivi can quitsahá cuvaá ñi tan tsihin ra tsahnu naha ra tan ra cuví maestro cuenda ley Nyoo. Tacan tan tñin ra naha tsi ra Esteban. Tan tsahán ra naha tsindacá ra naha tsi ra nu ndu iin ra cumí tyiñu cuenda vehe ñuhu nyivi Israel. <sup>13</sup>Tan nducú ra naha tsi ra cahan cuendu siqui ra Esteban. Tan maa ra naha catyí ra naha tyehen:

—Ra Esteban ihya, ña jandihí ra tsa caahán ra ndavaha ñi siqui vehe ñuhu yo tan siqui ley Nyoo tsa tyaa ra Moisés. <sup>14</sup>Tan tsiñi ndi tsa caahán ra tyin ra Jesús, ra Nazaret can, cua caní ra vehe ñuhu cahnu ihya. Tan cua nasama ra cuhva iyó yo tsa jacuahá ra Moisés tsi yo —catyí ra tsa caahán cuendu siqui ra Esteban.

<sup>15</sup>Tacan tan ra cumí tyiñu naha ra tan ra nyecú ican nyehé ra naha tsi ra Esteban tyin tumaa caá nuu iin ángel, tacan caá nuu ra.

**Nu caahán ra Esteban tuhun Nyoo tsihin nyivi nducú cahñi tsi ra**

**7** Tacan tan ra jutu tsaahnu tsa cuví ityi nuu tsicá tuhun ra tsi ra Esteban, tan catyí ra:

—¿A nditsa tsa caahán ra ihya naha ra siqui un?

<sup>2</sup>Tacan tan nacahán ra Esteban tan catyí ra:

—Nyooho yañi, tan nyooho ra tsahnu, tyaa soho ndo tuhun tsa cua cahan yu. Jutu yo Nyoo, ra cahnu ca, quituví ra nuu tsii tsaahnu yo, ra Abraham, quivi nyii ra ityi Mesopotamia tsa ndi cumañi ca cuhun ra coo ra nda ñuu Harán. <sup>3</sup>Tan catyí ra tsihin ra: “Ñacoo ñuu un, tan tsi tandihí nyivi un. Tan cuhun cun inga ñuu tsa cua janaha yu tsi un” catyí Nyoo tsihin ra Abraham.

<sup>4</sup>Tacan tan ra Abraham quitá ra nu iyó nyivi Caldea ityi Mesopotamia, tan cuahán ra nda ñuu Harán. Tan ndacan cuví nu tsihí jutu ra. Yaha can jaquitsí Nyoo tsi ra ñuhu nu iyó yo ihya vityin. <sup>5</sup>Maa tyin nduve ñuhu tsahá Nyoo tsi ra quivi can. Ndi luxu maa nu cuañi ra tan ña tsahá Nyoo. Maa tyin catyí ra tsihin ra Abraham tyin cua cuhva ra. Tan tsa cua cúu ra tan Nyoo cua cuhva ra ñuhu tsi sehe ra. Tacan cahán Nyoo tsihin ra Abraham, vasu tsa ñaha ca coo sehe ra quivi can. <sup>6</sup>Tan inga tucu tuhun cahán Nyoo tsihin ra tyin nyivi tata ra cua coo ñi

inga ñuu. Tan cua cuvi ñi musu nyivi ñuu can. Tan maa nyivi ñuu can cua quihî ndaha ñi tsi ñi. Tan cua nyehe ñi tundoho cumi cientu cuiya. <sup>7</sup> Maa tyin cahān tucu Nyoo tsihin ra tyehen: “Nyivi tata un cua nyehe ñi tundoho jaha nyivi ñuu can. Yacan cuenda yuhu cua tatsi tuñi yu tsi nyivi ñuu can. Tan tsa cua yaha yacan tan cua quita nyivi cuvi tata un ñuu can tan cua quitsi ñi ihya. Tan cua jacahnu ñi tsi yu” catyî Nyoo tsihin ra Abraham.

<sup>8</sup> Tacan natuhun Nyoo tsihin ra. Tan ndoo ra tuhun tsihin ra. Tan Nyoo tsahā ra iin cuhva tsa cua javaha ñi coto naa iñi ñi tsa cahān ra. Tsahā cuenda ra tyin tandihî ñi sehe yî ñi tsa cua coo tan cuñî tsi cunyaa tuñi ra itsi naha tsi. Tan tsa yahā una quivi tsa cacū ra Isaac, sehe ra Abraham, tacan javahā ra tsi ra. Tan juvin ñi tacan javahā ndihî tucu ra Isaac tsi ra Jacob, sehe ra. Tan ra Jacob tucu tsihin utsi uvi taahan sehe ra, tyaa ra tuñi can tsi intuhun intuhun sehe yî ra. Tan ra ican naha ra cuvî tsii tsaahnu yo.

<sup>9</sup> Tan tsa utsi iin taahan ca sehe ra Jacob ndasi cuñî ra naha nyehe ra naha tsi ra José yañi ra naha, tsa cuenda tyin cuñî ca jutu ra naha tsi ra can. Yacan cuenda xico ra naha tsi ra José na cuvi ra iin musu nda Egipto. Maa tyin ra José, ña nacoo Nyoo tsi ra. <sup>10</sup> Tan jacacū ra tsi ra nu nyehé ra tundoho. Tan tsahā ra tsa nyityi jîñi ra tsi ra José. Tan tsahā ra tsa vaha coo ra nuu ra Faraón, ra cuvî rey Egipto. Tan rey can tsahā ra tsa cuvî ra José ra cumî tyiñu ñuu tsa cayucú Egipto can. Tan tsindacā ñaha ndihî tucu ra vehe maa rey.

<sup>11</sup> Tacan tan tsicoo tama naniî cahnu ityi Egipto tan ityi Canaán. Tan nyehe xaan nyivi tundoho. Tan tandihî tsii tsaahnu yo ña ñihî ra naha tsa catsi ra naha. <sup>12</sup> Maa tyin quivi tsitō ra Jacob tyin iyó tsa catsi ra naha nda Egipto, tan jacuhun ra tsi sehe ra na cunducu ra naha tsa catsi ra naha. Tan tsahān ra naha iin tsaha. <sup>13</sup> Tan tsa tsinu uvi tsaha tsa tsahān ra naha, ra José jacotō ra tsi ra naha tyin yañi ra naha cuvî tsi ra. Tacan tan tsitō ra Faraón yóo tata cuvî ra José. <sup>14</sup> Tacan tan tavā tyiñu ra José na quitsi ra Jacob jutu ra, tsihin tandihî nyivi ra. Tan cuvî ñi uñi xico tsahun taahan nyivi. <sup>15</sup> Tan tacan cuvî tsa cuahān ra Jacob cua coo ra ñuhu Egipto can. Yahā can tan tsihî ra ndacan. Tan tsihî ndihî tucu tandihî sehe ra, ra cuvî tsii tsaahnu yo naha ra. <sup>16</sup> Tacan tan tsaā quivi tsa tsindacā ñi yiqui ra Jacob tan yiqui sehe ra nda Siquem. Tan ican quihvî yiqui tandihî ra naha tsitsi ñuhu nu jatā ra Abraham iin ñaña tsi sehe ra Hamor tahān tsanaha.

<sup>17</sup> Maa tyin tsa ndi cumañi ca quita nyivi Egipto, nyivi ra Abraham tsa iyó Egipto can cuaha xaan ñi cuvî. Tan tsa nyanaa yatyin quivi tsa cua cuhva Nyoo ñuhu tsi ñi tumaa tsa cahān catsi ra tsihin ra Abraham. <sup>18</sup> Tacan tan quitsahā ndacā ñaha iin rey tsa ña nacotō tsi ra José. <sup>19</sup> Rey can jandavî ñaha ra nyivi yo. Tan janyehe xaan ra tundoho tsi ñi, tan jañiñî ra tsi ñi na nacoo ñi tsi sehe ñi tsa ndi cacú tyin na cúu tsi. <sup>20</sup> Tan juvin ñi quivi can cacū ra Moisés. Tan tahān xaan iñi Nyoo tsi ra. Tan uñi yoo jacuahnu sihî ra tsi ra nda yuvehe ña. <sup>21</sup> Yaha can ña cuvî ca tyihi xeehe sihî ra tsi ra. Tan na-

coo ña tsi ra tsitsi iin tyica yuhu yutya. Tacan tan sehe sihî ra rey Egipto can nañihî ña tsi ra. Tan naquihî ña tsi ra. Tan jacuahnu ña tsi ra, tumaa tsa sehe maa ña cuvî tsi ra. <sup>22</sup> Yacan cutuhvā ra Moisés tandihî tsa tsitō ñi Egipto. Tan vaha xaan cahān ra tan vaha javahā ra jahā tunyee iñi tsa tsahā Nyoo tsi ra.

<sup>23</sup> Tan tsa quitā uvi xico cuiya ra Moisés cuñî ra cuhun ra cunyehe ra nu iyó nyivi Israel, nyivi ra. <sup>24</sup> Tacan tan iin quivi nyehe ra nu cañî iin ra Egipto can tsi iin ra Israel. Tacan tan tsahñî ra Moisés tsi ra Egipto can tyin cañî xaan ra tsi ra Israel, ra ñuu ra. <sup>25</sup> Cuñî maa ra Moisés can tyin nyivi Israel can cutuñî iñi ñi tyin Nyoo jaquitsî tsi ra tyin jacacu ra tsi ñi. Maa tyin ña tuvî iñi ñi tsa tacan cua cuvi. <sup>26</sup> Tacan tan tsa inga quivi can nyehe ra Moisés tsi uvi taahan ra Israel, cañî tahan ca ra naha. Tan ra Moisés, cuñî ra tsa ña cañî tahan ca ra naha, tan quitsahā catyî ra: “Ña vaha tsa cañî un tsi ra yañi un” catyî ra tsihin ra naha. <sup>27</sup> Tacan tan ra tsa cañî tsi inga ra can tindahñî ra tsi ra Moisés, tan catyî ra tsihin ra: “¿Yóo tavā tyiñu tsi un tyin cundaca ñaha un tan cuvi un juez tsa cuenda ndi?” <sup>28</sup> ¿A cuñî un cahñî un tsi yu tumaa tsa tsahñî un tsi ra Egipto icu?” catyî ra tsihin ra Moisés. <sup>29</sup> Cuhva tsa tsiñî ra Moisés tsa cahān ra can, tsinu ra. Tan cuahān ra nda ñuu Madián. Ndacan ñihî ra ñasiñî ra. Tan ndacan tsicoo uvi taahan sehe ra.

<sup>30</sup> Yahā uvi xico cuiya. Tacan tan iin quivi tsicá nuu ra Moisés nu tsiqui yatyin yucu tsa nañî Sinaí. Tan nyehe ra cayú iin yutun iñu. Tacan tan quituvî iin ángel tsitsi ñuhu tsa cayú can. <sup>31</sup> Iyo xaan cuñî ra Moisés tsa nyehe ra yacan. Tan natuhvā ra nu cayú iñu can tyin nyehe vaha ra, tan tsiñî ra ndusu Jutu Mañi yo. Tan catyî ndusu can tyehen: <sup>32</sup> “Yuhu cuvî Nyoo cuenda tsii tsaahnu un, Nyoo cuenda ra Abraham, tan ra Isaac, tan ra Jacob” catyî ndusu can tsihin ra. Tacan tan ra Moisés quitsahā nihî ra tsihin tsa yuuhví ra. Tan ña canā iñi ra nanyehe ra. <sup>33</sup> Tan quitsahā catyî tucu Jutu Mañi yo tsihin ra: “Tava nditsan tsaha un tyin ñuhu nu tsañî un, ñuhu ii cuvî tsi. <sup>34</sup> Yuhu nyehé yu tandihî tundoho tsa nyehé nyivi cuenda yu ñuhu Egipto can. Tan tsiñî yu ndusu ñi tsa tsacú tsa ñi. Yacan vatsí nuú yu tyin jacacu yu tsi ñi. Naha, tyin jacuhun yu tsi un nda Egipto” catyî Nyoo tsihin ra Moisés.

<sup>35</sup> Quivi can ña cuñî nyivi Israel tsi ra Moisés tsa cundaca ñaha ra tsi ñi, tan catyî ñi tsihin ra: “¿Yóo tavā tyiñu tsi un tyin cundaca ñaha un tan cuvi un juez tsa cuenda ndi?”, catyî ñi tsihin ra. Vasu ña cuñî ñi tsa cundaca ñaha ra tsi ñi, maa tyin Nyoo tavā tyiñu ra tsi ra tyin cuvi ra nuu tsihin ñi, tan jacacu ra tsi ñi. Tyin tacan catyî ángel tsa quituvî nuu ra nu iñu tsa cayú can.

<sup>36</sup> Tan ra Moisés can tavā tsi nyivi Israel ñuhu Egipto can tsihin tsa javahā ra tsa iyo tan seña ñuu can, tan nu yahā ñi nda nu Nduya Nuhu Cuaaha, tan nu tsicā nuu ñi nu tsiqui tsitsi tsa uvi xico cuiya.

<sup>37</sup> Tan juvin ñi maa ra Moisés can cuvî ra tsa cahān tsihin nyivi Israel tan catyî ra tyehen: “Nyoo cua jaquitsi ra tsi iin ra cuvî ndusu yuhu ra tumaa jaquitsî ra tsi maa yu. Tan cua cuvi ra iin ra Israel tumaa maa yo. Tan taahān tsi tyaa yahvi yo tsi ra” catyî ra Moisés. <sup>38</sup> Tan

maa ra Moisés can cuahán ra tsihin nyivi tsi tsaahnu yo nu tsicá nuu ñi nu tsiquí can. Tan ra ican cuví ra tsa cahán ángel tsihin nda yucu Sinaí. Tan ra ican naquihín cuenda ra tuhun Nyoo nácaa coo nyivi, tan tyaá ra tuhun can nu tutu tyin tacan tan coto yo.

<sup>39</sup> Maa tyin nyivi tsi tsaahnu yo ña tyaá yahvi ñi tsi ra. Tava tsiyo ñi tsi ra. Tan cuñi ñi cunuho ñi nda Egipto. <sup>40</sup> Yacan cuenda cuhva tsa nyii ra Moisés yucu Sinaí, tan cahán nyivi tsihin ra Aarón tan catyi ñi: “Javaha taa-han nyoo cuhun ityi nuu ndi. Tyin ña tsitó yo náa tahán ra Moisés, ra tsa tava tsi yo Egipto” catyi ñi. <sup>41</sup> Tacan tan javahá ñi iin indiquí xuhun cuaan. Tan tsahñi ñi quití tyin cuhva cuenda ñi tsi tsitoho can. Tan sii xaan cuñi ñi tsicoo ñi vico cuenda tsitoho tsa javahá ñi tsihin ndaha ñi. <sup>42</sup> Tacan tan Nyoo jatsiyo ra tsi ñi. Tan jaña ndaha ra tsi ñi tyin cua jacahnu ñi ñicanyii, tan yoo, tan tandihí tiñuu tsa iyó ityi andivi. Tyin tyehen tyaá ra cuví ndusu yuhu Nyoo nu libru tahán tsanaha:

Nyooho nyivi Israel, ¿A tsahñi ndo quití tyin cuhva cuenda ndo tsi maa yu tsitsi tsa uvi xico cuiya tsa tsicá nuu ndo nu tsiquí? Ñavin.

<sup>43</sup> Tyin jacahnú ndo tsi nyoo tsa nañi Moloc, tan jacahnú ndihí tucu ndo tsi nyoo tsa nañi Renfán tsa caá tumaa caá iin tiñuu tsa iyó andivi. Juvín ñi maa ndo javahá tsitoho can, tan jacahnú tucu ndo.

Yacan cuenda yuhu cua tava yu tsi ndo ñuu ndo, tan cua jacuhun yu tsi ndo iin nu cañi ca ityi nuu ñuu Babilonia, catyi Nyoo tsihin ñi.

<sup>44</sup> Nu tsicá nuu tsi tsaahnu yo nu tsiquí can, tsicumí ra naha iin vehe ñuhu tsa tsinú tsihin ñii quití. Tan tsitisi vehe can tsicumí ra naha tabla yuu tsa nyaá ley Nyoo nuu. Tan ra Moisés tava tyiñu ra na javaha ñi vehe ñuhu can ityi tsata, tumaa cuhva janahá maa Nyoo tsi ra. <sup>45</sup> Yaha can tan ra Josué cuví ra ityi nuu tsihin ñi. Tacan tan quihín ñi vehe ñuhu can tan vatsí ñi tsihin tsi nu iyó yo ihya vityin. Tyin Nyoo tava ra tsi nyivi tsicoo ñuhu ihya tan nacuhvá cuenda ra ñuhu ihya tsi ñi Israel, nyivi yo. Tan tsatyíñu ñi vehe ñuhu can nda cuanda quivi tsicoo ra rey David. <sup>46</sup> Tan ra rey David ñihí ra tumañi iñi nuu Nyoo. Tan cuñi ra javaha ra iin vehe vaha nu coo Nyoo. Juvín ñi Nyoo jacahnú ra Jacob tahán tsanaha. <sup>47</sup> Maa tyin ra Salomón javahá ra vehe Nyoo. <sup>48</sup> Vasu ña iyó Nyoo tsitsi vehe ñuhu tsa javahá nyivi. Tumaa cahán ra cuví ndusu yuhu Nyoo tahán tsanaha tyehen:

<sup>49</sup> Andivi cuví tyayu nu nyaá yu ndacá ñaha yu.

Tan ñuhu ñayivi, yacan cuví nu tsañi tsaha yu.

Tatun javaha nyooho iin vehe ¿a cuñi maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñi maa ndo?

<sup>50</sup> ¿A ña tsitó ndo tyin maa yu javahá andivi tan ñuhu ñayivi? catyi ra cuví ndusu yuhu Nyoo jahá Nyoo.

<sup>51</sup> Maa tyin nyooho —catyi ra Esteban— tacan ñi tuhva maa ndo jandavá ndo iñi ndo. Tan ña cuñi ndo naquihin ndo tuhun caahán Nyoo. Tacan ñi ña tyaá yahvi ndo tsi Tatyí Ii Nyoo. Inducu ñi caá ndo tsihin tsi

tsaahnu yo. <sup>52</sup> Tsi tsaahnu yo cuxaan ra naha tan tsahñi ra naha tsi tandihí ra cuví ndusu yuhu Nyoo tahán tsanaha. Tan ra ican naha ra catyi tyin cua quitsi iin ra vaha. Tan tsa quitsi ra vityin, nyooho xico ñaha ndo tsi ra tsi ra xaan iñi tsi ra, tan tsahñi ndo tsi ra. <sup>53</sup> Nyooho naquihin cuenda ndo ley Nyoo tsa tsahá ángel tsi ndo, maa tyin ña cuñi ndo tyaá yahvi ndo tsa caahán ley can —catyi ra Esteban.

### Nu tsihi ra Esteban

<sup>54</sup> Tsa tsiñi ra cumí tyiñu vehe ñuhu cahnu naha ra tuhun ihya, xaan xaan cuñi ra naha, ndacua jacahyu nuhu ra naha nyehé ra naha tsi ra Esteban. <sup>55</sup> Maa tyin ra Esteban tsitú ra tsihin Tatyí Ii Nyoo tan nanyehé ra ityi andivi. Tan nyehé ra tsa cahnu cuví Nyoo. Tan nyehé tucu ra tsi ra Jesús nyaá nyityi ra xiin cuaha Nyoo. <sup>56</sup> Tacan tan catyi ra Esteban:

—jñhna ndo! Nyehé yu andivi tan ticohó tsi. Tan nyehé yu tsi ra Jesús, Rayñi tsa quee nda gloria, nyaá nyityi ra xiin cuaha Nyoo —catyi ra Esteban.

<sup>57</sup> Maa tyin ra can naha ra tyasi ra naha soho ra naha, tsa ña cua tyaá soho ra naha tsa caahán ra Esteban. Tacan tan iin vaa ñi caná tsa ra naha. Tan tandihí ra naha cuahán ra naha siqui ra Esteban. <sup>58</sup> Tacan tan tava ra naha tsi ra yuhu ñuu. Tan tsahñi ra naha tsi ra tsihin yuu. Tan ra tsa javahá tsa ña vaha can naha ra, nacoo ra naha jahma tsa nyaá tsata ra naha tyin jaha cuenda iin ra tyuvaa tsa nañi Saulo. <sup>59</sup> Tan tsitsi tsa cañi ra naha yuu tsi ra Esteban, quitsahá tsicán tahvi ra Esteban tsi Nyoo, tyin tuví iñi ra tyin tsa cua cúu ra. Tan catyi ra tyehen:

—Jutu Mañi yu Jesús, naquihin añima yu —catyi ra.

<sup>60</sup> Yahá can, tan tsicuiñi tsiti ra, tan tsaá caná tsaá ra tan catyi ra:

—Jutu Mañi yu, ña tñin cuenda un cuatyí tsa javahá ra naha —catyi ra.

Tsa yahá cahán ra tacan, tan tsihi ra.

### Nu tsinyaa ndaha ra Saulo tsi nyivi yihí cuenda ra Cristo

**8** Tan ra Saulo ña tsinú iñi ra tsi ra Jesús, tan ndoo ra vaha tsa tsahñi ra naha tsi ra Esteban.

Tan juvín ñi quivi can quitsahá nducú xaan nyivi tsi ñi yihí cuenda ra Cristo ñuu Jerusalén tyin cahñi ñi tsi ñi. Tan tandihí ñi yihí cuenda ra Cristo tsinú ñi, cuahán ñi cua coo ñi tandihí ñuu tsa cayucú Samaria, tan tandihí ñuu tsa cayucú Judea. Maa tyin ra tava tyiñu ra Jesús ña quitá ra naha. Ndoq ra naha Jerusalén. <sup>2</sup> Tan juhva ra tsa nycún vaha tsi Nyoo ñuu Jerusalén can, tsahán ra naha tsicutsi ra naha cuñu ñuhu ra Esteban nda nu ndaa cumi santu. Tan tsacu xaan ra naha tsa cuenda tsa tsihi ra. <sup>3</sup> Tan ra Saulo can quitsahá nyaá ndaha ra tsi nyivi yihí cuenda ra Cristo. Tan tsahán ra tan iin tan iin vehe ñi. Tan ixtá caa ra tsi ñi, tan tsahá cuenda ra tsi ñi tyin cuhun ñi vehe caa, tahan ñi rayñi tan ñaha.



### Nu caahán ra Felipe tuhun ra Cristo nu cuví Samaria

<sup>4</sup> Tan tandihí ñi tsa quitã ñuu Jerusalén can, caahán ñi tuhun Nyoo nácaa jacacú ra Cristo tsi yo, tandihí ñi ityi nu cuahán ñi. <sup>5</sup> Iin ra tsa nañí Felipe tsaã ra iin ñuu canyí Samaria. Tan quitsahã caahán ra tuhun ra Cristo tsihin nyívi iyó ican. <sup>6</sup> Tan tandihí ñi ñi cuñí ñi tan tyaá soho ñi tsa caahán ra. Tyin nyehé ñi tsa iyo tsa javahá ra. <sup>7</sup> Tyin cuaha xaan nyívi tsa yihí tatyí ña vaha tan nduvahá ñi; tatyí ña vaha tsa yihí tsi ñi, quitã nahnu tan canã tsa nahnu cuahán nahnu. Tan cuaha xaan nyívi coxo tan nyívi tsa ña cuví canda tan ña cuví caca, nduvahá ñi. <sup>8</sup> Yacan cuenda nyívi ñuu can, sñ xaan cuñí ñi.

<sup>9</sup> Tan Samaria can iyó iin ra tasi nañí Simón. Tuhvá ra jandaví ñaha tsi nyívi. Catyí ra tyin cahnu xaan cuví ra.

<sup>10</sup> Tandihí maa nyívi, ñi cuca tan ñi ndaahvi, tyaá soho ñi tsa caahán ra. Tan catyí ñi:

—Nditsa nditsa, tyin tunyee iñi Nyoo iyó tsihin ra ihya —catyí ñi.

<sup>11</sup> Tyaá yahvi xaan ñi tsa caahán ra tyin tsa naha xaan jandaví ñaha ra tsi ñi tsihin tsa tasi. <sup>12</sup> Tacan tan quitsi ra Felipe. Tan jacotõ ra tsi ñi nácaa ndacá ñaha Nyoo, tan nácaa cuhva tsa cahnu cuví ra Jesucristo. Tacan tan quitsahã tsinú iñi ñi tsi ra Cristo, rayñ tan ñaha. Tan tsi-coondutyã ñi. <sup>13</sup> Nda cuenda ra Simón can, tan natsinu iñi ra tsi ra Cristo, tan tsicoondutyã ra. Tan quitsahã tsicá nuu ra tsihin ra Felipe. Tan iyo xaan cuñí ra nyehé ra tsa iyo tan seña tsa javahá ra Felipe.

<sup>14</sup> Tacan tan ra tava tyiñu ra Jesús tsa iyó ñuu Jerusalén can ñihí tuhun ra naha tyin tsinú iñi nyívi Samaria tuhun Nyoo. Tacan tan jacuhun ra naha tsi ra Pedro tan ra Juan nda Samaria. <sup>15</sup> Tan tsa tsaã ra naha, quitsahã tsicán tahvi ra naha tsi Nyoo tsa cuenda nyívi tsa yihí cuenda ra Cristo nda Samaria can tyin na naquihin ñi Tatyí Ii Nyoo. <sup>16</sup> Tyin ñi can, ñaha ca nuu Tatyí Ii Nyoo siqui ñi. Maa tsa tsicoondutyã ñi ñi tsihin sivi Jutu Mañi yo Jesús. <sup>17</sup> Tacan tan ra Pedro tan ra Juan tyisõ ndaha ra naha jiñi ñi, tan naquihin ñi Tatyí Ii Nyoo. <sup>18</sup> Tan ra Simón can nyehé ra nu tyisõ ndaha ra tava tyiñu ra Jesús jiñi ñi, tan naquihin ñi Tatyí Ii Nyoo. <sup>19</sup> Tan quitsahã caahán ra Simón tan catyí ra:

—¿Najava xuhun cuñí ndo tan cuhva ndo tunyee iñi tsi yu, cuví tyiso ndaha yu jiñi nyívi, tan naquihin ñi Tatyí Ii Nyoo? —catyí ra Simón tsihin ra naha.

<sup>20</sup> Tacan tan nacahã ra Pedro tan catyí ra:

—Jãha cuenda coto cunaa un tsihin xuhun cun.

¿Nacuenda tsicá iñi un tyin cuví jata yo ndatu tsa tsahã Nyoo tsi yo? Ña cuví. <sup>21</sup> Yooho, ña taahán tsi tyihi un tsi un tsihin tyiñu ihya. Tyin añima un ña vaha nuu Nyoo. <sup>22</sup> Ndu uvi iñi cuhva tsicá iñi un, tyin cahnu xaan tsa caquiñi tsicá iñi un. Tan ndacan tahvi tsi Nyoo na jaha ra tucahnu iñi tsi un tsa cuenda tsa tsicá iñi un tsitsi añima un. <sup>23</sup> Tyin nyehé yu tyin tsitsi añima un iyó cuaha tsa caquiñi tan nyiyo iñi un. Tan tsa caquiñi can ña tsahã coto un tsa vaha —catyí ra Pedro tsihin ra Simón.

<sup>24</sup> Tacan tan nacahã ra Simón tan catyí ra:

—Ndacan tahvi maa ndo tsi Jutu Mañi yo tsa cuenda yu, na ña quitsi tandihí tsa caahán un tsihin yu siqui yu —catyí ra Simón tsihin ra Pedro.

<sup>25</sup> Tsa yahã can tan ra tava tyiñu ra Jesús tsahã cuenda ra naha tandihí tsa nyehé ra naha tsa javahã ra Cristo nu tsicã ra nu ñuhu ñayivi. Tan cahã ra naha tuhun Nyoo. Tacan tan cuanuhũ ra naha nda ñuu Jerusalén. Tan tandihí ñuu tsa cayucú Samaria nu yahã ra naha jacotõ ra naha nácaa javahá yo tan cacu yo.

### Nu caahán ra Felipe tuhun Nyoo tsihin iin ra ñuu Etiopía

<sup>26</sup> Tsa yahã yacan tan cahã iin ángel Nyoo tsihin ra Felipe, tan catyí ra:

—Ndũvita tan cõhun cun ityi sur, ityi queé nda Jerusalén tan cuahán nda Gaza —catyí ángel can tsihin ra.

Yacan cuví ityi tsa yahá nu tsiqui. <sup>27</sup> Tacan tan ra Felipe nduvitã ra tan cuahán ra. Tan ityi cuahán ra ñihí tahan ra tsihin iin ra ñuu Etiopía. Tan cuví ra can eunuco [tyin ña cuví coo ñasihí ra]. Tan cuví ra iin ra cumí tyiñu cahnu ñuu Etiopía, tyin yihí ndaha ra xuhun ña Candace, ñaha tsa cuví reina ñuu Etiopía can. Tan tsahã ra Etiopía can tsijacahnũ ra tsi Nyoo nda ñuu Jerusalén. <sup>28</sup> Tan ityi cuanuhú ra nda ñuu ra nyaá ra siqui carreta ra. Tan cahví ra nu libru tsa tyaã ra Isaías, ra cuví ndusu yuhu Nyoo tahã tsanaha. <sup>29</sup> Tacan tan Tatyí Ii Nyoo cahã tsihin ra Felipe:

—Nãtuhva nu carreta can.

<sup>30</sup> Tan cuhva tsa natuhvã ra Felipe nu carreta can, tsiñi ra tyin cahví ra Etiopía can nu libru tsa tyaã ra Isaías. Tan tsicã tuhun ra Felipe tsi ra tan catyí ra:

—¿A cutuñí iñi un tsa caahán tsi? —catyí ra.

<sup>31</sup> Tacan tan nacahã ra Etiopía can tan catyí ra:

—¿Nacaa cutuñi iñi yu tan yoñi jacuahá tsi yu?

—catyí ra tsihin ra Felipe.

Tan tsicã ra tsi ra Felipe na ndaa ra tan cunyaa ra tsihin ra.

<sup>32</sup> Tan nu cuahán cahví ra, catyí tsi tyehen:

Tsahñi ra naha tsi ra tumaa tuhvã ra naha tsahñi mbee ticatyí.

Tyin tumaa ña tsacú mbee tatun cua xatya ra naha ixi ti, tan tumaa tsa ña tsacú ti tun cua cahñi ra naha tsi ti, tacan cuví ra can tyin nyehé ra tundoho tan nduve náa cahã ra.

<sup>33</sup> Janduluhũ ra tsi ra nuu ra naha tan yoñi cuñi javaha iin tsa vaha tsihin ra.

Tan tsa cuenda nyívi cuví tata ra, yoñi caahán tsa cuenda ñi.

Tyin ña tsicoõ sehe ra tan tsihi ra.

Tacan catyí tsi nu tutu tsa cahví ra can.

<sup>34</sup> Tacan tan ra Etiopía quitsahã tsicá tuhun ra tsi ra Felipe, tan catyí ra:

—Jãha tumañi iñi tsi yu, tan catyí tuhun un luxu tsihin yu, ¿yóo tuhun caahán ra ndusu yuhu Nyoo ihya? ¿A tuhun maa ra, o yóo tuhun caahán ra? —catyí ra tsihin ra Felipe.

<sup>35</sup> Tacan tan ra Felipe quitsahā caahán ra siquí tuhun tsa tsa yahā cahvī ra can, tan tsahā cuenda ra tsi ra tyin tuhun ra Jesús caahán ra ndusu yuhu Nyoo can. Tan tsahā cuenda ra tyin ra Jesús cuví ra jacacú tsi yo.

<sup>36</sup> Tacan tan tsa cua yaha ra naha nu yihí ndutya. Tan ra Etiopía can quitsahā caahán ra tsihin ra Felipe tan catyí ra:

—Ihya yihí ndutya. ¿A ña cuvi coondutya yu ihya? —catyí ra.

<sup>37</sup> Tacan tan nacahān ra Felipe tsihin ra Etiopía, tan catyí ra:

—Tatun tsinú iñi un tsihin tsa ñi añima un, cuví coondutya un —catyí ra tsihin ra.

Tacan tan nacahān ra can, tan catyí ra:

—Tsinú iñi yu tyin Sehe Nyoo cuví tsi ra Jesucristo —catyí ra.

<sup>38</sup> Tacan tan ra can caahán ra tsihin musu ra na jacuiñi ra carreta can. Tan nduvi taahan ra naha nuu ra naha. Tan quihvī ra naha tsitsi ndutya. Tacan tan jacuondutya ra Felipe tsi ra Etiopía. <sup>39</sup> Tan cuhva tsa quitā ra naha tsitsi ndutya can, tan Tatyí Ii Jutu Mañi yo naquihñi ra tsi ra Felipe. Tan ra Etiopía can ña nyehe ra numaa ityi cuahán ra Felipe. Maa tyin sii xaan cuñi ra, cuanuhú ra. <sup>40</sup> Tan ra Felipe tsaā ra ñuu Azoto. Tan cuahán ra tan iin tan iin ñuu, tan caahán ra tuhun ra Cristo tsihin nyivi nda cuanda tsa tsaā ra ñuu Cesarea.

#### Nu natsinu iñi ra Saulo tsi ra Cristo

(Hechos 22.6-16; 26.12-18)

**9** Tan tsicá ra Felipe caahán ra tuhun ra Cristo tsihin nyivi, tan ra Saulo ña jandihí maa ra tsa nducú cahñi ra tsi nyivi yihí cuenda Jutu Mañi yo. Tan tsahān ra nu nyaá ra jutu tsaahnu cuví ityi nuu, <sup>2</sup> tsindacān ra iin tutu tsi ra jutu, tyin nacuhva ra ndatu tsa cuhun ra vehe ñuhu ñuu Damasco, tan tñi ra tsi ñi nyicún tsi ra Cristo, tan quitsi ndaca ra tsi ñi vehe caa ñuu Jerusalén, tahan ñi rayiñ tan ñaha. Ñihī ra Saulo tutu can tan cuahán ra. <sup>3</sup> Tan tsa cua tsaā ra ñuu Damasco, sana iñi ra, tan quitsi ñuhū ityi andivi, jandunditsin tsi taniñi cahnu maa nu cuahán ra. <sup>4</sup> Tacan tan ra Saulo nduvā ra nu ñuhu. Tan tsifñi ra iin ndusu tsa catyí tye-hen:

—Saulo, Saulo, ¿nacuvi tyin nyaá ndaha un tsi yu? —catyí ndusu can tsihin ra.

<sup>5</sup> Tacan tan nacahān ra Saulo:

—¿Yóo cuví yooho, taa? —catyí ra, tsicá tuhun ra.

Tacan tan nacahān ndusu can tsihin ra, tan catyí tsi:

—Yuhu cuví ra Jesús, ra tsa nyaá ndaha un. Juviniñi tsi maa un jañicuehé un, tumaa jañicuehé indiqui tsi ti tsa tsañi ihñi ti nu tsa tutsi ra naha tsi ti —catyí ra Jesús tsihin ra.

<sup>6</sup> Tacan tan quitsahā nihí ra Saulo tsihin tsa yuuhví ra. Tan catyí ra:

—Jutu Mañi yu, ¿náa cuñi un tyin javaha yu? —catyí ra.

Tacan tan Jutu Mañi yo nacahān ra tsihin ra tan catyí ra:

—Nduvita tan cuhun un tsitsi ñuu Damasco. Tan ican cua cahan iin ra tsa cua cahan tsihin un náa taahán tsi javaha un —catyí ra Jesús tsihin ra Saulo.

<sup>7</sup> Tan ra tsa cuahán tsihin ra Saulo, nayuhví xaan ra naha. Tan ña ñihī ra naha náa tuhun cahan ra naha tyin tsiñi ra naha ndusu can maa tyin yoñi nyehe ra naha. <sup>8</sup> Tacan tan ra Saulo nduvitā ra. Tan tsa nuñā ra tinuu ra, ña cuví maa nanyehé ra tyin cuaā ra jahā Nyoo. Yacan cuenda, ra tsa cuahán tsihin ra tñiñ ra naha ndaha ra tan tsindacā ra naha tsi ra ñuu Damasco. <sup>9</sup> Ican tsinyiñi ra uñi quivi. Tan ña cuví maa nanyehé ra. Tan ña tsatsiñi ra, tan nduve maa náa tsiñi ra.

<sup>10</sup> Ñuu Damasco can iyó iin ra tsinú iñi tsi Nyoo, nañi ra Ananías. Tan nyehe ra iin tsa nyehe ra nu cahān Jutu Mañi yo tsihin ra tan catyí ra:

—¡Ananías! —catyí Jutu Mañi yo tsihin ra.

Tacan tan nacahān ra Ananías, tan catyí ra:

—Ihya nyaá yu, Jutu Mañi yu —catyí ra tsihin ra.

<sup>11</sup> Tacan tan Jutu Mañi yo catyí ra:

—Nduvita, tan cuhun cun ityi cahnu tsa nañi Ndoos ñi. Tan nanducu un vehe ra tsa nañi Judas. Tan ndaca tuhun un nu maa tahan iyó ra tsa nañi Saulo, ra ñuu Tarso. Tyin tsicán tahvi ra tsi yu. <sup>12</sup> Tan nyehe ra iin tsa nyehe ra, tan nyehe ra tsi yooho, Ananías, tyin tsaā un nu nyaá ra, tan tyiso ndaha un jiñi ra tyin tacan tan nanyehé ra inga tsaha —catyí Jutu Mañi yo tsihin ra Ananías.

<sup>13</sup> Tacan tan nacahān ra Ananías tan catyí ra:

—Jutu Mañi yu, cuaha xaan nyivi caahán ñi tsihin yu tyin nyivi yihí cuenda un ñuu Jerusalén cuaha xaan tsa ña vaha javahā ra Saulo can tsihin ñi. <sup>14</sup> Tan vityin vatsiñi ra ihya tyin tsahā ra jutu tsaahnu tsa cuví ityi nuu ndatu tsi ra tsa tyihī ra tsi nyivi tsicán tahvi tsi un vehe caa —catyí ra Ananías tsihin Jutu Mañi yo.

<sup>15</sup> Maa tyin Jutu Mañi yo catyí ra tsihin ra Ananías:

—Cuaahan tyin yuhu tsa nacatsiñi vaha yu tsi ra Saulo can, tyin cua cahan ra tuhun yu tsihin nyivi inga ñuu, tan tsihin rey nyivi can, tan juviniñi cahan ndihī ra tuhun yu tsihin nyivi Israel. <sup>16</sup> Yuhu cua jacuaha yu tsi ra nácaa tsa cuaha tundoho cua nyehe ra tsa cuenda yu —catyí Jutu Mañi yo tsihin ra Ananías.

<sup>17</sup> Tacan tan cuahán ra Ananías vehe nu nyiñi ra Saulo. Tsaā ra yuvehe can tan quihvī ra tsitsi vehe. Tan tyiso ndaha ra jiñi ra Saulo, tan catyí ra tsihin ra:

—Yañi Saulo, Jutu Mañi yo ra Jesús, ra tsa quituví nuu un ityi vatsiñi un, ra ican jaquitsiñi tsi yu tyin nanyehé un inga tsaha. Tan cua jacutu ra tsi un tsihin Tatyí Ii ra —catyí ra Ananías tsihin ra Saulo.

<sup>18</sup> Tan juviniñi cuhva can tan coyō tsa caá tumaa caa yaa tyaca tsa tyasiñi tinuu ra Saulo. Tacan tan cuví nanyehé ra. Yahā can tan tsicoondutya ra. <sup>19</sup> Yahā can tan nacatsiñi ra, tan ndunyeē cuñu ñuhu ra inga tsaha. Tan ndoo ra juhva quivi tsihin nyivi tsa yihí cuenda ra Cristo ñuu Damasco.

### Nu quitsahā caahán ra Saulo tuhun ra Cristo tsihin nyivi ñuu Damasco

<sup>20</sup> Tacan tan numi ñi quitsahā caahán ra Saulo tuhun ra Cristo tsihin nyivi tandihi vehe ñuhu nyivi Israel ñuu Damasco. Tan catyí ra tyin ra Jesús, Sehe Nyoo cuví tsi ra. <sup>21</sup> Tandihí maa nyivi tsa tsiñí tsa caahán ra, iyo xaan cuñí ñi. Tan natuhún tahan ñi tan catyí ñi:

—¿A ñavin ra ihya cuví ra tsa tsinyaā ndaha tsi nyivi tsiacán tahvi sivi ra Jesús ityi ñuu Jerusalén? ¿A ñavin juvin ra cuví ra tsa vatsí tñin tsi nyivi iyó ihya tyin cuhva cuenda ra tsi ñi tsi ra jutu tsa cuví ityi nuu naha ra? —catyí ñi.

<sup>22</sup> Maa tyin ra Saulo ñihi ca caahán ra tuhun ra Cristo tsihin tsa ñi iñi ra. Tan janahá ra tsi nyivi Israel tsa iyó ñuu Damasco tyin ra Jesús cuví ra Cristo, tan Sehe Nyoo cuví tsi ra. Tan ñi Israel ña ñihí ñi nácaa nacahan ñi tsihin ra.

### Nu tsinu xeehe ra Saulo nuu ra Israel naha ra

<sup>23</sup> Tsa yahā juhva quivi, tan ra Israel tsa ña tsinú iñi tsi ra Cristo natuhún tahan ra naha tyin cua cahñi ra naha tsi ra Saulo. <sup>24</sup> Ñiñu tan nduvi ndatú ra naha tsi ra yuvehe cahnu ñuu can. Maa tyin ra Saulo tsitō ra tuhun can. <sup>25</sup> Tacan tan nyivi tsa tsinú iñi tsi ra Cristo ñuu can tyihí ñi tsi ra tsitsi iin tyica cahnu. Tan tsacuaa januy ñi tsi ra ityi ventana iin vehe tsa nyaá yuhu cora ñuu can. Tacan tan tsinū ra cuahán ra.

### Nu nyii ra Saulo ñuu Jerusalén

<sup>26</sup> Quivi tsa tsaā ra Saulo ñuu Jerusalén, cuñí ra ndu iin ra tsihin nyivi tsa yihí cuenda ra Cristo. Maa tyin tandihí maa ñi tan yuuhví ñi nyehé ñi tsi ra. Tyin ña tsinú iñi ñi tsa yihí ra cuenda ra Jesús. <sup>27</sup> Maa tyin iin ra tsa nañí Bernabé, quihñ ra tsi ra. Tan tsaahā cuenda ra tsi ra tsi ra tavā tyiñu ra Jesús. Tan nacatyí tuhun ra tsihin ra naha nácaa nyehē ra Saulo tsi Jutu Mañi yo ra Cristo ityi ñuu Damasco; tan nacatyí tuhun ra nácaa cahñ Jutu Mañi yo tsihin ra. Tan nácaa cahñ ra tuhun ra Cristo tsihin tsa ña yuuhví ra nda ñuu Damasco.

<sup>28</sup> Tacan tan ndoq ra Saulo ñuu Jerusalén tsihin nyivi tsa yihí cuenda ra Cristo. <sup>29</sup> Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cahñi ra naha tsi ra.

<sup>30</sup> Maa tyin tsitō ra hermano can naha ra tyin tacan tsicá iñi ra can naha ra. Yacan cuenda tsindacā ra hermano naha ra tsi ra Saulo nda ñuu Cesarea. Tacan tan jacuhñ ra naha tsi ra nda Tarso, ñuu ra.

<sup>31</sup> Tacan tan nyivi yihí cuenda ra Cristo tsa iyó tandihí ñuu tsa cayucú Judea, tan Galilea, tan Samaria, sñ xaan cuñí ñi tyin ña cuxaán ca nyivi tsi ñi. Tan ndunyeē ca iñi ñi tsihin tunyee iñi tsi Nyoo tyin tyaá yahvi vaha ñi cuhva cahñ ra, tyin yuuhví ñi coto ña cua javaha ñi cuhva cuñí ra. Iyó ñi tsihin tsa jatyinyeé Tatyí Ii Nyoo tsi ñi. Tan nducuahá ca ñi tan iin tan iin quivi.

### Nu nduvahā ra Eneas

<sup>32</sup> Tacan cuví tan ra Pedro tuhvá ra cuahán cua nyehe nácaa yucú ra hermano naha ra tan iin tan iin ñuu. Tan tsahān tucu ra tsinyehē ra nu iyó nyivi yihí cuenda ra Jesucristo ñuu Lida. <sup>33</sup> Ican nañihí ra tsi iin ra cuuhví, nañi ra Eneas. Tan tsa una cuiya canyíí ra tan ña cuví maa nacandá ra tyin naxij cuñu ñuhu ra. <sup>34</sup> Tan ra Pedro catyí ra tsihin ra:

—Yooho Eneas, ra Jesucristo janduvahā ra tsi un. Ndūvita tan ñatuví yuvi un —catyí ra tsihin ra.

Tan juvin ñi cuhva can tan nduvitā ra Eneas. <sup>35</sup> Tan nyehe tandihí nyivi ñuu Lida can tyin tsa nduvahā ra. Tan nyehe tucu nyivi ñuu Sarón. Tacan tan ñi can, natsinū iñi ñi tsi Jutu Mañi yo. Tan nacoq ñi tuhun tsahnu tsa tsinū iñi ñi nda ndi cumañi ca coto ñi tuhun ra Cristo.

### Nu nandotō ña Dorcas

<sup>36</sup> Quivi can tsicoq iin ñaha tsinú iñi tsi ra Cristo ñuu Jope. Tan nañí ña Tabita, tan tsihin yuhu griego, nañí ña Dorcas. Tan tuhvá ña javahá tsa vaha tsihin nyivi, jatyinyeé ña tsi nyivi ndaahvi. <sup>37</sup> Tan quivi can ña Dorcas quihñ cuehe tsi ña tan tsihí ña. Tan tsa yahā jacutyí ñi tsi ña, tsicaquin ñi tsi ña tsitsi cuarto nu tsinu uvi pisu. <sup>38</sup> Yatyin ñi canyíí ñuu Jope tsihin ñuu Lida, nu nyii ra Pedro. Tan nyivi tsa yihí cuenda ra Cristo ñuu Jope can tsitō ñi tyin nyii ra Pedro ñuu Lida. Tacan tan jacuhñ ñi tsi uvi taahan ra na cucana ra naha tsi ra Pedro tyin na cuhun ra ñuu Jope tsa numi ñi. Tan tsaā ra naha nu nyii ra tan catyí ra naha tsihin ra:

—Janumi ñi tan cuhun un tsihin ndi nda ñuu Jope —catyí ra naha tsihin ra.

<sup>39</sup> Tacan tan ra Pedro nduvitā ra tan cuahán ra tsihin ra naha. Tan cuhva tsa tsaā ra naha, tsindacā ra naha tsi ra nda cuarto nu canyíí ndiyí can. Tan tandihí maa ñiñaha tsa tsihí yñ natuhvā ñi tsata ra, tan tsacú tsaā ñi. Tan janahá ñi jahma tsa quicu ña Dorcas tsa tsicoq ña. <sup>40</sup> Tacan tan ra Pedro tavā ra tsi tandihí nyivi cuarto can. Tan tsicuiñi tsiti ra tan quitsahā tsiacán tahvi ra tsi Nyoo. Tacan tan nanyehē ra tsi ñaha tsa tsihí can canyíí ña. Tan quitsahā catyí ra tsihin ña:

—Hermana Tabita, ndūvita —catyí ra tsihin ña.

Tacan tan nanyehē ña. Tan tsa nyehe ña tsi ra Pedro, tsinyaā ña. <sup>41</sup> Tacan tan ra Pedro tñin ra ndaha ña tan janduvitā ra tsi ña. Tacan tan canā ra tsi ra hermano naha ra, tan tsihin ñiñaha tsa tsihí yñ. Tan nacuhvā cuenda ra tsi ña tsi ñi tyin tsa nandotō ña. <sup>42</sup> Yahā can tan tandihí maa nyivi ñuu Jope tsitō ñi tyin nandotō ña can. Tan cuaha xaan ñi natsinū iñi tsi Jutu Mañi yo.

<sup>43</sup> Tan ra Pedro ndoq ra juhva quivi ñuu can, nyii ra yuvehe iin ra tsa janduvitā ñiñi quiti, nañí ra Simón.

### Ra Pedro tsihin ra Cornelio

**10** Ñuu Cesarea iyó iin ra tsa nañí Cornelio. Tan cuví ra ra yihí ndaha iin cientu andarū. Tan tsa tandihí andarū tsa yihí ndaha ra can nañí tsi Italiano.

<sup>2</sup> Tan ra Cornelio can yuuhví ra tsi Nyoo. Maa ra tan tsihin tandihí nyívi ra vaha xaan jacahnú ñi tsi Nyoo. Tan inga tucu tuhun, cuaha xaan xuhun tsahá ra tsi nyívi ndaahví ñuu Israel, tan tandihí quívi tsicán tahvi ra tsi Nyoo. <sup>3</sup> Tan iin quívi cuhva caa uñi tsa tseñi, nyehe ra iin tsa nyehe ra. Tan ican cuví nu catsi xaan nyehe ra iin ángel tsa jacuhun Nyoo nu nyíi ra, tan catyí tsi tsihin ra:

—¡Yooho Cornelio! —catyí ángel can tsihin ra.

<sup>4</sup> Tacan tan nanyehe ra Cornelio tsi ángel can. Tan nayuhví xaan ra. Tan quitsahá tsicá tuhun ra tan catyí ra:

—¿Náa tsa cuví ihya, taa? —catyí ra tsihin ángel can.

Tacan tan ángel can quitsahá caahán ra tsihin ra:

—Nyoo tsiñi ra tsa caahán un tan tsa tsicán un tsi ra. Tan taahán iñi ra tyin jatyinyeé xaan un tsi nyívi ndaahvi. <sup>5</sup> Tan vityin cuñi tsi tsa tava tyiñu un na cuquihin tyiñu tsi iin ra tsa nañi Simón Pedro nda ñuu Jope. <sup>6</sup> Ra ican cua cahan tsihin un náa taahán tsi javaha un. Iyó ra vehe ra tsa nañi tucu Simón, cuví ra ra janduvitá ñii quiti. Tan iyó vehe ra yuhu ndutya ñuhu —catyí ángel can tsihin ra Cornelio, tan cuahán ángel can.

<sup>7</sup> Tsa yahá cuahán ángel can, ra Cornelio caná ra tsi uvi taahan musu ra, tan tsihin iin andaru tsa jahá cuenda tsi ra. Tan yihí andaru can cuenda Nyoo.

<sup>8</sup> Tandihí maa tsa cahan ángel can tsihin ra Cornelio tan nacatyí tuhun ra tsihin nduñi taahan ra can naha ra. Tan jacuhun ra tsi ra naha ñuu Jope.

<sup>9</sup> Tuví inga quívi tan cuahán ra can naha ra. Tan tsa ndi cumañi ca tsa ra naha ñuu Jope, tan ra Pedro ndaa ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can. <sup>10</sup> Tan tsaq soco tsi ra tan tsisocó xaan ra. Maa tyin tsitsi tsa tsinú tsa catsi ra, quitsahá nyehé ra iin tsa janahá Nyoo tsi ra. <sup>11</sup> Tan nyehe ra tyin tichó andivi. Tan nyehe ra andivi tyin vatsí nuú iin jahma cahnu xaan ityi nu ñuhu. Tan tandihí tsa cumí tutun tsi nuuhñi nuuhñi ñi. <sup>12</sup> Tan tsitsi jahma can yihí tandihí maa nuu quiti tsa cumi taahan tsaha, tan tandihí nuu coo, tan saa. <sup>13</sup> Tacan tan tsiñi ra iin ndusu tsa caahán tsihin ra:

—Pedro, nduvita tan cahñi quiti ihya, tan catsi un —catyí ndusu can tsihin ra.

<sup>14</sup> Maa tyin ra Pedro nacahan ra tan catyí ra:

—Ña cua catsi yu, Jutu Mañi yu. Yuhu ña tuhvá yu catsi quiti tsa catyí ley tyin ña vaha catsi ndi —catyí ra Pedro.

<sup>15</sup> Tacan tan quitsahá caahán nyico ndusu can tsihin ra inga tsaha:

—Ña catyí un tyin ña catsi un tsa tsa janduvahá yu —catyí ndusu can tsihin ra.

<sup>16</sup> Uñi taahan tsaha nyehe ra yacan jahá Nyoo. Tacan tan jahma cahnu can nandaq nyico can ityi andivi.

<sup>17</sup> Tan tsitsi tsa tsicá iñi ra Pedro náa cuñi tsi catyí tsa nyehe ra can, tsaq musu tsa jacuhun ra Cornelio naha ra. Tan tsicá tuhun ra naha numaa tahan iyó vehe ra nañi Simón. <sup>18</sup> Tan tsa tsaq ra naha ityi yuvehe tsicá tuhun ra naha tatun ican iyó iin ra tsa nañi Simón Pedro. <sup>19</sup> Tan ra Pedro tsicá xaan iñi ra náa cuñi tsi catyí

tsa nyehe ra. Tacan tan Tatyí Ii Nyoo quitsahá caahán tsihin ra, tan catyí tsi:

—Nyehe Pedro, uñi taahan ra vatsí nanducú tsi un.

<sup>20</sup> Nduvita tan cuhun cun tsihin ra naha, tan ña caca iñi un tyin maa yu jaquitsi tsi ra ihya naha ra —catyí Tatyí Ii Nyoo tsihin ra Pedro.

<sup>21</sup> Tacan tan ra Pedro nuu ra nu yucú ra tsa jacuhun ra Cornelio, tan catyí ra tsihin ra naha:

—Yuhu cuví ra tsa nanducú ndo. ¿Náa tyiñu vatsí ndo?

<sup>22</sup> Tacan tan nacahan musu ra Cornelio tan catyí ra naha:

—Ra Cornelio, ra yihí ndaha tsi ndi, ra ican jaquitsi tsi ndi. Vaha xaan nyívi cuví ra. Tan tyaá yahvi xaan ra tsi Nyoo. Tan tandihí maa ra ñuu Israel tsa iyó ityi Judea ihya cuñi ra naha tsi ra tsa cuenda tsa vaha nyívi cuví ra. Tan iin ángel Nyoo cahan tsihin ra tyin na cana ra tsi un, tyin cuhun un yuvehe ra tyin tacan tan tyaa soho ra tuhun tsa cua cahan un tsihin ra —catyí musu ra Cornelio tsihin ra Pedro.

<sup>23</sup> Tacan tan tsahá ra Pedro quihvi ra naha tsitsi vehe. Tan ndoo ra naha tsihin ra tsacuaa can. Tan tsa tuvi inga quívi tan cuahán ra tsihin ra naha. Tan cuahán juhva ra hermano tsa iyó ñuu Jope can tsihin ra naha.

<sup>24</sup> Tsa inga quívi tsaq ra naha nda ñuu Cesarea nu ndatú ra Cornelio tsi ra naha tsihin tandihí nyívi ra, tan tsihin tandihí ra vaha iñi tsi ra. <sup>25</sup> Cuhva tsa tsaq ra Pedro yuvehe ra Cornelio, quita ra Cornelio tan caahán ra tsihin ra. Tan tsicuiñi tsiti ra nuu ra Pedro tan quitsahá jacahnú ra tsi ra. <sup>26</sup> Maa tyin ra Pedro cañihí ra tsi ra, tan catyí ra tsihin ra:

—Nduvita tyin tahan ñi cuví yooho cuví tucu yuhu; ñavin Nyoo cuví yu —catyí ra tsihin ra.

<sup>27</sup> Tan tsitsi tsa caahán ra Pedro tsihin ra, tan quihvi ra tsitsi vehe tan nanyehe ra tyin cuaha xaan nyívi ndu iin tsitsi vehe can. <sup>28</sup> Tacan tan catyí ra Pedro tsihin ñi:

—Nyooho tsitó ndo tyin ley nyuhu tsa cuví ndi nyívi Israel, catyí tsi tyin ña taahán tsi tsa ndu iin ndi tsihin nyívi tsa ñavin nyívi Israel cuví. Tan ndi tsitsi vehe ñi ña cuví quihvi ndi. Maa tyin Nyoo janahá ra tsi yu, tan catyí ra: “Yooho, ña catyí un tsihin nyívi tyin ndi in-tuhun ñi tan ña vaha ñi” catyí Nyoo tsihin yu. <sup>29</sup> Yacan cuenda quívi tsa caná ndo tsi yu, numi ñi vatsí yu. Tan vityin cuñi yu coto yu nacuenta caná ndo tsi yu —catyí ra Pedro.

<sup>30</sup> Tacan tan nacahan ra Cornelio, tan catyí ra:

—Tsa iyó cumi quívi vityin, tumaa cuhva ihya tsa nyaá yu yuvehe tan ña tsatsi yu tan tsicán tahvi yu tsi Nyoo tsa tseñi. Tan quituví iin rayñi nuu yu. Nditsi ra jahma xiñu. <sup>31</sup> Tan catyí ra tsihin yu: “Yooho Cornelio, Nyoo tsiñi ra tsa tsicán tahvi un tsi ra. Tan nducuhun iñi ra tsa javahá un tyin jatyinyeé xaan un tsi nyívi ndaahvi. <sup>32</sup> Tava tyiñu tsi musu un na cuhun ra naha nda ñuu Jope cuquihin ra naha tsi ra Simón Pedro na quitsi ra ihya. Nyí ra yuvehe ra tsa nañi Simón, iin ra tsa janduvitá ñii quiti. Tan vehe ra can nyaá tsi yatyin ñi yuhu ndutya ñuhu. Tan na quitsi ra Simón Pedro tan cahan ra tsihin un” catyí ángel can tsihin yu. <sup>33</sup> Tacan

tan numi ñi tavā tyiñu yu tyin na cuquihin tyiñu tsi un. Tan vaha tyin vatsí un. Tan vityin tandihí yo ndu iin yo nuu Nyoo. Tan cuñí ndi tyaá soho ndi tandihí tsa catyí Jutu Mañi yo tsihin un tyin cuhva cuenda un tsi ndi —catyí ra Cornelio tsihin ra Pedro.

### Nu caahán ra Pedro tuhun ra Cristo yuvehe ra Cornelio

<sup>34</sup> Tacan tan quitsahā caahán ra Pedro tan catyí ra: —Vityin cutuñí iñi yu tyin Nyoo cuñí ra tsi tandihí nyivi, tahañ ñi nyivi Israel, tan nyivi tsa ñavin nyivi Israel cuví. Ña tavá tsiyo ra tsi ndi intuhun maa yo. <sup>35</sup> Tyin naquihín ra tsi yo tatun tyaá yahvi yo tsi ra, tan javahá yo tsa vaha. <sup>36</sup> Nyoo cahān ra tsihin nyuhu tsa cuví ndi tata ra Israel, tan jacotō ra tyin cuví coo vaha yo tsihin ra tsa cuenda ra Jesucristo. Tan maa ra ndacá ñaha tsi tandihí maa yo. <sup>37</sup> Nyooho tsitó vaha ndo tandihí tsa cuví ñuu nyivi Israel ñuu yu, nácaa quitsahā tsi nu cuví Galilea tsa yahā tsa cahān ra Juan tuhun Nyoo tsihin nyivi, tan jacoondutyā ra tsi ñi. <sup>38</sup> Tsitó ndo nácaa tsahā Nyoo tunyee iñi Tatyí Ii ra tsi ra Jesús, ra ñuu Nazaret. Tan tsicā ra javahā ra tsa vaha, janduvahā ra tsi tandihí nyivi tsa nyehé tundoho jahá nu ña vaha. Tyehen javahā ra Jesús tyin Nyoo nyaá ra tsihin ra. <sup>39</sup> Nyuhu cuví ndi tsandaa tsa cuenda tandihí tsa javahā ra Jesús ñuu Jerusalén tsihin tandihí ca ñuu tsa cayucú Judea. Yahā can tan ticaā ra naha tsi ra nu cruu tan tsahñi ra naha tsi ra. <sup>40</sup> Maa tyin tsa tsinu uñi quivi janandotō Nyoo tsi ra. Tan quituví ra nuu ndi. <sup>41</sup> Ña quituví ra nuu tandihí nyivi. Maa tyin quituví ra nuu nyuhu tyin nacatsi ra tsi ndi nda tsanaha tyin cuví ndi tsandaa cuenda ra. Nyuhu tsatsi ndi tan tsihi ndi tsihin ra tsa yahā tsa nandotō ra. <sup>42</sup> Tan tavā tyiñu ra tsi ndi tyin cahan ndi tuhun ra tsihin nyivi. Tan cuví ndi tsandaa tyin Nyoo tavā tyiñu ra tsi ra Jesús tyin cuví ra juez tsi nyivi tsa nyito tan nyivi tsa tsihi. <sup>43</sup> Tan tacan tucu nda tsanaha, cahān tandihí ra cuví ndusu yuhu Nyoo tuhun ra Jesús. Tan catyí ra naha tyin tandihí nyivi tsa tsinú iñi tsi ra Jesús, cua jaha Nyoo tucahnu iñi cuatyí ñi tsa cuenda maa ra.

### Nu naquihín nyivi Tatyí Ii Nyoo tan ñavin nyivi Israel cuví ñi

<sup>44</sup> Ndi caahán ca ra Pedro tan nuu Tatyí Ii Nyoo siqui tandihí ñi tsa tyaá soho tsa caahán ra. <sup>45</sup> Tan ra Israel tsa yihí cuenda ra Jesús tsa tsaā tsihin ra Pedro iyo xaan cuñí ra naha tyin tsahā ndihí tucu Nyoo Tatyí Ii ra tsi nyivi tsa ñavin nyivi Israel cuví. <sup>46</sup> Tyin tsiñí ra naha caahán ñi inga yuhu tan jacahnú ñi tsi Nyoo. <sup>47</sup> Tacan tan quitsahā caahán ra Pedro tsihin ra tsa tsaā tsihin ra:

—Ña cuví casi yo nu coondutyā nyivi ihya. Tyin tsa naquihín ñi Tatyí Ii Nyoo tumaa tsa naquihín tucu maa yo —catyí ra tsihin ra naha.

<sup>48</sup> Tacan tan tavā tyiñu ra Pedro tsi ñi tsa ndi ñihí Tatyí Ii Nyoo na coondutyā ñi tsihin sivi ra Jesucristo. Tacan tan caahán ndaahvi ñi tsihin ra Pedro na ndoo ra taahan quivi tsihin ñi.

### Nu nacatyí tuhun ra Pedro tsihin ra yihí ndaha vehe ñuhu ñuu Jerusalén nácaa nducuahá tuhun ra Jesucristo inga ñuu

**11** Ra tavā tyiñu ra Jesús tan inga ra yihí cuenda ra Jesús tsa iyó Judea, ñihí tuhun ra naha tyin nda cuenda nyivi tsa ñavin nyivi Israel cuví tan naquihín ñi tuhun Nyoo. <sup>2</sup> Tacan tan tsaā nyico ra Pedro ñuu Jerusalén. Tan ra tsa catyí tyin tsiñí ñuhu tsa cunyaa tuñi Nyoo tsi tandihí rayi, xaan xaan cuñí ra naha nyehé ra naha tsi ra Pedro. <sup>3</sup> Tan catyí ra naha tsihin ra: —¿Nacuenda tsahañ un yuvehe nyivi tsa ñavin nyivi Israel cuví tan tsatsi un tsihin ñi? —catyí ra naha.

<sup>4</sup> Tacan tan ra Pedro nacatyí tuhun ra nda nu quitsahā tandihí tsa cuví tsi ra, tan catyí ra:

<sup>5</sup> —Yuhu nyí yu ñuu Jope. Tan tsa tsicán tahvi yu tsi Nyoo tan nyehé yu iin tsa janahā Nyoo tsi yu tyin iin jahma cahnu quee ityi andivi. Tan tandihí tsa cumi tutun tsi nuuhñi nuuhñi ñi tan vatsí nuú tsi ityi nu ñuhu nu nyí yu. <sup>6</sup> Tan nyehé vaha yu tsa yihí tsitsi jahma can. Tan nyehé yu quiti tsa cumi tsaha, quiti cuuhu, coo, tan saa. <sup>7</sup> Tan tsiñi yu iin ndusu tsa caahán tsihin yu: “Ndúvita Pedro. Cahñi quiti ihya tan catsi un” catyí ndusu can tsihin yu. <sup>8</sup> Tan nacahān yu tan catyí yu tyehen: “Jutu Mañi yu, ña catsi yu, tyin ña tuhvá yu catsi quiti tsa catyí ley tyin ña vaha catsi ndi.” <sup>9</sup> Tacan tan ndusu can nacahān tsi tsihin yu inga tsaha, tan catyí tsi: “Ña vaha tsa cahan un tyin ña catsi un tsa tsa yahā janduvahā yu” catyí ndusu can tsihin yu. <sup>10</sup> Uñi tsaha cuví yacan. Yahā can tan nandaā nyico tandihí quiti can tsihin jahma can ityi andivi. <sup>11</sup> Tan juvin ñi cuhva can tsaā uñi taahan ra naha yuvehe nu nyí yu, quee ra naha ñuu Cesarea tan nanducú ra naha tsi yu. <sup>12</sup> Tan Tatyí Ii Nyoo cahān tsihin yu na cuhun yu tsihin ra naha. Tan catyí ra tsihin yu tyin ña caca iñi yu tsa ñavin ra ñuu Israel cuví ra naha. Yacan cuahán yu. Tan cuahán ndihí iñu taahan ra yañi yo ihya naha ra tsihin yu. Tan tsa tsaā ndi nda ñuu Cesarea, quihvi ndi tsitsi vehe iin ra tsa nañí Cornelio. <sup>13</sup> Tan nacatyí tuhun ra can tsihin ndi nácaa nyehé ra tsi iin ángel tsitsi vehe ra. Nyaá nyityi ángel can tan catyí ra tsihin ra tyin na jacuhun ra musu ra ñuu Jope na cucana ra naha tsi yu. <sup>14</sup> Tyin yuhu cua cuhva cuenda yu tsi ra nácaa cuví cacu ra tsihin tandihí nyivi ra, catyí ángel can tsihin ra, catyí ra tsihin ndi. <sup>15</sup> Tan javahā ra can tumaa cuhva catyí ángel can tsihin ra. Tan tsa tsaā yu yuvehe ra quitsahā caahán yu tsihin nyivi tsa ndu iin yuvehe ra. Tan quitsi Tatyí Ii Nyoo siqui ñi tumaa tsa nuu tsi siqui yo tsa jihna ñi. <sup>16</sup> Tacan tan nducuhun iñi yu tsa catyí Jutu Mañi yo quivi can. Tan catyí ra tyehen: “Nditsa tyin ra Juan jacoondutyā ra tsi nyivi tsihin ndutyā. Maa tyin nyooho cua coondutyā ndo tsihin Tatyí Ii Nyoo”, catyí ra. <sup>17</sup> Nyoo tsahā ndihí tucu ra Tatyí Ii ra tsi ñi can tumaa tsa tsahā ra Tatyí Ii ra tsi yo quivi tsa natsinu iñi yo tsi Jutu Mañi yo Jesucristo. Tan tsa tacan zyóo ra cuví yuhu tan casi yu tsa javahá Nyoo? —catyí ra Pedro tsihin ra hermano can naha ra.

<sup>18</sup> Tacan tan tsa tsiñi ra ñuu Jerusalén tuhun can, ña cahān ca ra naha. Tan jacahnú ra naha tsi Nyoo, tan catyí ra naha:

—Tun tacan cuvī, cuñí tsi catyi tyin Nyoo tsahá ndihī tucu ra ndatu tsi nyivi tsa ñavin nyivi Israel cuvī tyin na ndu uvi iñi ñi cuatyí ñi, tan coo ñi ñayivi nyito tsa ña cua naa maa —catyí ra naha.

### Nyivi yihí cuenda ra Cristo ñuu Antioquía

<sup>19</sup> Quivi tsa tsahñi ra naha tsi ra Esteban, quitsahā nyaá ndaha ra naha tsi inga ca nyivi yihí cuenda ra Cristo. Tan yihí ñi tsiny ñi tan cuahán ñi ityi Fenicia. Tan yihí ñi cuahán ñi iin ñuhu tsa nañi Chipre tsa canyí mahñu ndutya ñuhu. Tan yihí ñi tsaq ñi ñuu Antioquía. Tan tandihī ñi caahán ñi tuhun ra Cristo tsihin nyivi, maa tyin iin ñi maa tsihin nyivi Israel. <sup>20</sup> Tan tsihin ñi tsa cuahán can, yihí nyivi ñuhu Chipre, tan yihí tucu juhva nyivi ñuu Cirene. Tan tsa tsaq ñi ñuu Antioquía, tan quitsahā caahán ñi can tuhun ra Cristo tsihin nyivi tsa ñavin nyivi Israel cuvī. Tan jacotō ñi tuhun vaha Jutu Mañi yo ra Jesús. <sup>21</sup> Tan tunyee iñi Jutu Mañi yo iyó tsihin ñi. Tan yacan cuenda cuaha nyivi nacoō ñi tuhun tsahnu. Tan quitsahā tsinú iñi ñi tsi Jutu Mañi yo.

<sup>22</sup> Tacan tan tsaq tuhun can nda ñuu Jerusalén. Tan nyivi yihí cuenda ra Cristo jacuhun ñi tsi ra Bernabé na cahun ra nda ñuu Antioquía. <sup>23</sup> Tan tsa tsaq ra Bernabé Antioquía can, nyehe ra nácaa nasocó Nyoo tsi ñi. Tan siñ xaan cuñi ra. Tan catyí ra tsihin ñi na cunyicun ñi tsi Jutu Mañi yo tsihin tsa ñi iñi ñi. <sup>24</sup> Tacan javahā ra Bernabé tyin cuvī ra iin ra vaha. Tsitú ra tsihin Tatyí Ii Nyoo, tan tsinú xaan iñi ra tsi Nyoo. Yacan cuenda cuaha xaan nyivi quihvī cuenda Jutu Mañi yo. <sup>25</sup> Tsa yahā can tan cuahán ra Bernabé cua nanducu ra tsi ra Saulo nda ñuu Tarso. Tan tsa nañihī ra tsi ra, tsindacā ra tsi ra nda ñuu Antioquía. <sup>26</sup> Tan tsiyucy ra naha tsihin nyivi yihí cuenda ra Cristo ñuu can iin cuiya tan cuaha xaan nyivi jacuahā ra naha tuhun Nyoo. Tan juvin ñi ñuu Antioquía can cuvī nu quitsahā catyí nyivi tyin nyivi Cristiano cuvī ñi, o ñi yihí cuenda ra Cristo.

<sup>27</sup> Tan quivi can tsaq taahan ra cuvī ndusu yuhu Nyoo. Quee ra naha ñuu Jerusalén tan tsaq ra naha ñuu Antioquía. <sup>28</sup> Tan iin ra can nañi ra Agabo tsicunyaq nyityi ra tyañu nyivi yihí cuenda ra Cristo tan cahān ra tsa tsahā Tatyí Ii Nyoo tsi ra. Tan catyí ra tyin cua quitsi iin tama ñi cahnu nu ñuhu ñayivi. Tan tacan cuvī quivi tsa cuvī ra Claudio rey cahnu. <sup>29</sup> Tacan tan nyivi yihí cuenda ra Cristo nda ñuu Antioquía natuhun tahan ñi tyin cua cuhva ñi nácaa iyó iñi intuhun intuhun ñi, tyin cua jatinyee ñi tsi nyivi yihí cuenda ra Cristo tsa iyó ñuu tsa cayucú Judea. <sup>30</sup> Tacan javahā ñi tan jacuhun ñi juhva xuhun tsi ra tsa cuvī ityi nuu tsihin nyivi yihí cuenda ra Cristo nda ñuu Jerusalén. Tan ra Bernabé tsihin ra Saulo tsindacā ra naha xuhun can.

### Nu tsihi ra Jacobo tan nu quihvī ra Pedro vehe caa

**12** Tan quivi can quitsahā nyaá ndaha ra cuvī rey Herodes tsi juhva nyivi yihí cuenda ra Cristo.

<sup>2</sup> Tan tava tyiñu ra tyin na cahñi ra naha tsi ra Jacobo, yañi ra Juan, tsihin mityi. <sup>3</sup> Tan nyehe ra Herodes tyin tahān xaan iñi nyivi Israel tsa javahā ra tacan, tan tava tyiñu ra tyin tñin ndihī ra naha tsi ra Pedro. Tan cuvī tsi quivi vico pascua nu tuhvá nyivi tsatsí paan tsa nduve yutsan iya yihí. <sup>4</sup> Tsa yahā tsa tñin ra naha tsi ra Pedro, tyihī ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñu hora tan nasamá ra naha, quihvī tucu inga cumi taahan andaru. Tan tyaq ra Herodes cuhva tyin cua cuhva cuenda ra tsi ra Pedro tsi nyivi tsa yaha vico Pascua. <sup>5</sup> Tan tacan nyií ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyií ra ican, nyivi yihí cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa ñi iñi ñi.

### Nu jacacū Nyoo tsi ra Pedro vehe caa

<sup>6</sup> Tan tyaq ra Herodes cuhva tyin inga quivi can cua tava ra tsi ra Pedro nuu nyivi. Tan juvin ñi tsacuaa can, tan ra Pedro quixí xaan ra tyañu uvi andaru can. Nuuhñi ra tsihin uvi cadena. Tan yucú uvi taahan ca andaru jahá cuenda nda yuvehe. <sup>7</sup> Tan sana iñi ra tan quituvī iin ángel tsa jacuhun Jutu Mañi yo. Tan ndunditsin tsitsi vehe caa can. Tan ángel can tñin ra xiin ra Pedro, jandotō ra tsi ra. Tan catyí ra tsihin ra:

—Janumi. Ndūvita —catyi ángel can tsihin ra.

Tacan tan ndatsi cadena tsa nuuhñi ndaha ra. <sup>8</sup> Tan ángel can catyí ra tsihin ra:

—Nacuhñi vaha tsitsi un tan tyihi nditsan un tsaha un —catyí ángel can tsihin ra.

Tacan javahā ra Pedro. Tan catyí ángel tsihin ra:

—Quihin jahma un cunditsi un tan quitsi nyicun un tsi yu —catyí ángel can tsihin ra.

<sup>9</sup> Tan ra Pedro cuahán ra cuanyicún ra tsi ángel can. Maa tyin ña tsitó ra tatun tsa nditsa o tsa ña nditsa cuvī can, tan cuñi maa ra tyin iyó iin tsa janahā Nyoo tsi ra. <sup>10</sup> Maa tyin cuahán ra tsata ángel can tan yahā ra naha iin nu jahá cuenda ra andaru. Tacan tan yahā tucu ra naha inga nu jahá cuenda ra naha. Yahā can tacan tan tsaq ra naha yuvehe caa cahnu nu quitá nyivi. Tan yuvehe can nuñā maa tsi. Tan quitā ra naha. Tan tsa yahā yahā ra naha iin ityi, tan nacoō ángel can tsi ra. <sup>11</sup> Tacan tan nacotō ra Pedro tyin nditsa, tan quitsahā tsicá iñi ra:

—Vityin tsitó yu tyin tsa nditsa cuvī tsi. Maa Jutu Mañi yu jaquitsi iin ángel tyin jacacū ra tsi yu ndaha ra Herodes tan ndaha ra ñuu Israel naha ra —cuñi ra Pedro.

<sup>12</sup> Tsicá iñi ra yacan ityi cuahán ra, tan tsaq ra yuvehe ña María sihi ra Juan Marcos. Tan cuaha xaan nyivi yucú ican tsicán tahvi ñi tsi Nyoo. <sup>13</sup> Tan tsa cañi ndaha ra Pedro yuvehe nuquehe, tan quitā iin ñaha tyuvaa tsa nañi Rode, tsinyehē ña yóo cañi ndaha yuvehe can. <sup>14</sup> Maa tyin cuhva tsa tsiñi ña ndusu ra Pedro, siñ xaan cuñi ña, tan naq iñi ña nuña ña yuvehe can, tyin tsinú ña cuahán ña cua cahān ña tsihin nyivi tsa yucú tsitsi vehe can. Tan catyí ña tyin ra Pedro nyaá ra yuvehe.

<sup>15</sup> Tacan tan quitsahā catyí ñi tsihin ña:

—Iñi yooho ña vaha cuñí —catyí ñi tsihin ña.

Tan catyí ña tyin nditsa tsa caahán ña. Maa tyin ñi can catyí ñi tyin ñavin ra Pedro cuví ra, iin ángel cuenda ra cuví, catyí ñi tsihin ña.

<sup>16</sup> Tan ra Pedro jañihí ca ra cañí ndaha ra yuvehe. Tan cuhva tsa nuñā ñi yuvehe tan nyehe ñi tsi ra, iyo xaan cuñi ñi tan nayuhví ñi. <sup>17</sup> Maa tyin javahā ra seña tsihin ndaha ra na cutaxin ñi. Tan nacatyí tuhun ra tsihin ñi nácaa tavā Jutu Mañi yo tsi ra vehe caa. Tan catyí ra tsihin ñi:

—Cahan ndo tuhun ihya tsihin ra Jacobo tan tsihin inga ra yañi yo naha ra —catyí ra Pedro.

Tan quitā ra tan cuahán ra.

<sup>18</sup> Cuhva tsa cunditsin, iyo xaan cuñí ra andaru tsa jahá cuenda tsitsi vehe caa can naha ra, tyin ña tsitó ra naha nácaa quitā ra Pedro. <sup>19</sup> Tacan tan tavā tyiñu ra Herodes na cunanducu ra naha tsi ra, tan ña nañihí ra naha tsi ra. Tacan tan tavā tyiñu ra tsi ra naha na cahñi ra naha tsi ra jahá cuenda vehe caa can naha ra. Yahā can tan quitā ra Herodes Judea can tan cuahán ra cua coo ra ñuu Cesarea.

### Nu tsihi ra Herodes

<sup>20</sup> Tan ra Herodes cuxaán xaan ra tsihin nyivi ñuu Tiro tan nyivi ñuu Sidón. Maa tyin cuñí ñi tsa coo vaha ñi tsihin ra tyin ñuu tsa ndacá ñaha ra, ican queé tsa tsat-sí ñi. Tacan tan ndu iin ñi tan cuahán ñi cua cutahan ñi tsihin iin ra tsa nañí Blasto. Ra ican cahnu tyiñu jahá ra, tyin jahá cuenda ra tsi ra Herodes. Tan tsicán ñi tsa na coo vaha ñi tsihin ra Herodes. <sup>21</sup> Tacan tan catyí ra Herodes tyin cuhun ñi nu nyaá ra iin quivi. Tan tsaā quivi can tan tsicunditsi ra jahma si caá ra tsa jahá tyiñu ra. Tan tsicunyaā ra nu tyayu ra. Tan cahān ra tsihin ñi. <sup>22</sup> Tacan tan quitsahā caná tsaā ñi, tan catyí ñi:

—Ra tsa caahán ihya ñavin rayi cuví ra, tyin Nyoo cuví ra —catyí ñi.

<sup>23</sup> Tan juven ñi cuhva can tan tiñ cuehe tsi ra Herodes jahā ángel Jutu Mañi yo tyin tsahā ra tsa catyí nyivi tyin Nyoo cuví ra. Tan quihví tindacu tsi ra, tan tsihi ra.

<sup>24</sup> Maa tyin tuhun Nyoo nducuahā ca tsi. Tan jañihí ca nyivi caahán ñi tuhun Nyoo tandihí ñi ityi. <sup>25</sup> Quivi tsa ndihí tyiñu jahá ra Bernabé tsihin ra Saulo nda ñuu Jerusalén, cuanuhū ra naha ñuu Antioquía. Tan cuahán ndihí tucu ra Juan Marcos tsihin ra naha.

### Nu quitsahā tsicá ra Saulo tan ra Bernabé tyiñu Nyoo

**13** Tsihin nyivi tsa yihí cuenda ra Cristo ñuu Antioquía yihí ra tsa cuví ndusu yuhu Nyoo. Tan yucú tucu ra tsa jacuahá tuhun Nyoo tsi nyivi. Tan ra ican naha ra cuví ra ihya naha ra: Ra Bernabé, ra Simón Tūn, ra Lucio ra ñuu Cirene, ra Manaén tsa tsahñu iin nducu ñi tsihin ra Herodes tsa cuví rey ityi Galilea, tan ra Saulo. <sup>2</sup> Tan iin quivi yucú tandihí ra naha tan jacahnú ra naha tsi Jutu Mañi yo. Tan iyó nyitya ra naha. Tacan tan cahān Tatyí Ii Nyoo tsihin ra naha:

—Tava siin ndo tsi ra Bernabé tsihin ra Saulo tsa cuenda tyiñu tsa caná yu tsi ra naha —catyí Tatyí Ii Nyoo can tsihin ra naha.

<sup>3</sup> Tacan tan tsa ndihí tsicoq nyitya ra naha, tan tyiso ndaha ra naha jiñi ra Bernabé tsihin ra Saulo, tan tsicān tahvi ra naha tsi Nyoo tsa cuenda ra naha. Tan cahān tsihin tahan ra naha, tsahan cuahán ra naha.

### Nu caahán ra tavā tyiñu ra Jesús tuhun Nyoo ñuhu Chipre

<sup>4</sup> Yahā can tan jacuhūn Tatyí Ii Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihví ra naha tsitsi iin yutun ndoo tan cuahán ra naha nda ñuhu Chipre tsa canyí mahñu ndutya ñuhu. <sup>5</sup> Tacan tan tsaā ra naha ñuu Salamina tsa canyí yuhu ndutya ñuhu. Tan quitsahā caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatinyee ra tsi ra naha.

<sup>6</sup> Tacan tan cuahán ra naha caahán ra naha tuhun Nyoo tan iin tan iin ñuu tsa cayucú Chipre can nda cuanda tsa tsaā ra naha ñuu tsa nañí Pafos. Tan ican nañihí ra naha tsi iin ra ñuu Israel tsa nañí Barjesús. Tan tsitó ra tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra. <sup>7</sup> Tan ra tasi can nyaá ra tsihin ra cumí tyiñu Sergio Paulo. Tan ra Sergio cuví ra iin ra catsi iñi. Tan canā ra tsi ra Bernabé tsihin ra Saulo, tyin cuñí ra tyaa soho ra tuhun Nyoo tsa caahán ra can naha ra. <sup>8</sup> Tan ra tasi can nañí tucu ra Elimas, tan tyasí xaan ra nu tsinu iñi ra cumí tyiñu can tsi ra Cristo. <sup>9</sup> Tacan tan ra Saulo tsa nañí tucu Pablo, tsitú ra tsihin Tatyí Ii Nyoo. Tan ñihi xaan nanyehē ra tsi ra Elimas can. <sup>10</sup> Tan catyí ra tsihin ra:

—Yooho ra jandaví ñaha, ra vatya. Sehe cuihna cuví tsi un. Tan cuñí un jativi un tandihí tsa vaha. Tan tacan ñi tyasí un ityi vaha Jutu Mañi yo. <sup>11</sup> Tan vityin Jutu Mañi yo cua tatsi tuñi ra tsi un, tyin cua cuaa un. Tan ña cua cuví nyehe un ñuhū ñicanyii juhva quivi —catyí ra Pablo tsihin ra Elimas.

Tacan tan juven ñi cuhva can cuaā ra. Tan ndoo ra nu naa. Tan nducū ra iin ra tiñ ndaha ra tyin ña nditsin nyehé ra. <sup>12</sup> Tsa nyehe ra cumí tyiñu can tsa cuví tsi ra Elimas, tan natsinū iñi ra tsi ra Jesucristo. Tyin iyo cuñí ra nyehé ra tsa javahá Jutu Mañi yo.

### Nu cuahán ra Pablo tan ra Bernabé nda ñuu Antioquía tsa canyí Pisidia

<sup>13</sup> Ra Pablo tan ra vaha iñi tsi ra quihví ra naha tsitsi iin yutun ndoo ñuu Pafos. Tan cuahán ra naha nda ñuu Perge tsa canyí Panfilia. Maa tyin ra Juan Marcos nacoq ihñi ra tsi ra naha tan cuanuhū ra nda ñuu Jerusalén. <sup>14</sup> Yahā can tan queē ra naha Perge can, tan cuahán ra naha ñuu Antioquía tsa canyí Pisidia. Ican quihví ra naha tsitsi vehe ñuhu nyivi Israel tan cuví tsi iin quivi quitatú ñi. Tan tsinyecū ra naha. <sup>15</sup> Tacan tan quitsahā cahví nyivi nu libru ley Nyoo tsa tyaā ra Moisés. Tan cahví tucu ñi libru tsa tyaā ra cuví ndusu yuhu Nyoo tahān tsanaha. Yahā can tan ra cuví ityi nu

vehe ñuhu naha ra catyí ra naha tsihin ra hermano tsa nyecú ican, tyin tatun cuñí ra naha cahan ra naha tsihin nyivi, cuví cahan ra naha. <sup>16</sup> Tacan tan nduvitá ra Pablo tan javahá ra iin seña tsihin ndaha ra tyin na cutaxin ñi. Tan catyí ra:

—Tyaá soho nyooho, ra ñuu Israel, tan nyooho nyivi tsa tyaá yahvi tsi Nyoo. <sup>17</sup> Nyoo cuenda yo, tsa cuví yo nyivi Israel, nacatsí vaha ra tsi tsii tsaahnu yo. Tan quivi tsa iyó ca ra naha Egipto, javahá ra iin ñuu cahnu tsi ra naha. Vasu ñavin nyivi ñuu can cuví ra naha, maa tyin janducuahá ra tsi ra naha. Yahá can tan tavá ra tsi ra naha ityi can tsihin tunyee iñi tsa iyó tsi ra. <sup>18</sup> Tan cunyeé iñi Nyoo tandihí cuhva tsicoo ra naha nu tsicá nuu ra naha nu tsiquí tsitsi tsa uvi xico cuiya. <sup>19</sup> Tan janaá ra utsa taahan ñuu nahnu tsa cayucú ñi cahnu Canaán, tyin tsahá ra ñuhu can tsi tsii tsaahnu yo. <sup>20</sup> Yahá can tan quitsahá ndacá ñaha juez tsi nyivi can jahá Nyoo. Tumaa cumi cientu sasava cuiya tsindacá ñaha juez tsi ñi, nda cuanda quivi tsindacá ñaha ra Samuel ra cuví ndusu yuhu Nyoo tsi ñi. <sup>21</sup> Tacan tan maa ñi tsicán ñi iin rey tsa cundaca ñaha tsi ñi. Tan Nyoo tsahá ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín. Tan uvi xico cuiya tsindacá ñaha ra tsi ñi. <sup>22</sup> Yahá can tan Nyoo tavá ra tsi ra Saúl tsa cuví ra rey. Tan tsahá ra tyiñu can tsi ra David. Tan catyí ra: “Nyhé yu tyin ra David, sehe ra Isaí, cuví ra iin rayí tsa taahán iñi yu cuhva iyó. Tan cua javaha ra tandihí tsa cuñí yu” catyí Nyoo tuhun ra David. <sup>23</sup> Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsí tsi ra tyin jacacu ra tsi yo tsa cuví yo nyivi Israel, tumaa catyí ra tsihin tsii tsaahnu yo tañan tsanaha. <sup>24</sup> Tan ndi cumañi ca quitsi ra Jesús, ra Juan, ra jacoondutyá tsi nyivi, cahan ra tsihin tandihí nyivi Israel. Tan catyí ra tsihin ñi tyin cuñí tsi tsa ndu uvi iñi ñi cuatyí ñi, tan coondutyá ñi. <sup>25</sup> Tan tsa cua ndihí tyiñu jahá ra Juan tan catyí ra: “¿A cuñí maa ndo tyin yuhu cuví ra cahnu xaan tsa ndatú ndo? Ñavin yuhu cuví ra cahnu can. Tyin tsa-ta tsa yaha yuhu tan vatsí inga ra. Tan ndi nditsan tsa nyaá tsaha ra, nduve yahvi nyaá yu tan tava yu itsi. Tyin cahnu xaan ra cuví ra”, catyí ra Juan.

<sup>26</sup> Tan caahán ca ra Pablo tan catyí ra:

—Yañi, nyooho nyivi tata ra Abraham tan tandihí inga ndo tsa tyaá yahvi tsi Nyoo. Tsa cuenda nyooho cuví tuhun ihya tyin jacuahá Nyoo tsi yo nácaa cacu yo. <sup>27</sup> Nyivi ñuu Jerusalén tan ra cuví ityi nuu tsihin ñi ña tsitó ñi tyin ra Jesús jacacú ra tsi yo. Tan ndi ña cutuñí iñi ñi tuhun tsa tyaá ra cuví ndusu yuhu Nyoo tañan tsanaha, vasu jacuahá xaan ñi tuhun can tandihí quivi tsa quitatu ñi, maa tyin ña cutuñí iñi ñi. Tan quivi tsahñí ñi tsi ra Jesús cuví tsi tumaa cuhva catyí ra cuví ndusu yuhu Nyoo. <sup>28</sup> Tyin vasu nduve cuatyí ra Jesús nañihí ñi, maa tyin tsicán ñi tsi ra Pilato na tyihi ra tyiñu tyin cahñi ra naha tsi ra Jesús. <sup>29</sup> Tan tsa yahá janyehé ñi tundoho tsi ra tumaa catyí maa tuhun ra nu libru, tan tsihí ra. Tacan tan januy ñi tsi ra nu cruu. Tan tsicutsí ñi tsi ra. <sup>30</sup> Maa tyin Nyoo janandotó ra tsi ra inga tsaha. <sup>31</sup> Tan tsitsi tsa cuaha quivi tan quituví ra nuu

ra tsa cuahán tsihin ra quivi quitá ra ityi Galilea, tan tsaá ra Jerusalén. Tan ra ican naha ra cuví ra tsa caahán tuhun ra tsihin nyivi vityin. <sup>32</sup> Tan yacan cuenda nyuhu caahán ndi tuhun vaha tsa catyí Nyoo tsihin tsii tsaahnu yo tyin cuhva ra tsi yo. <sup>33</sup> Tyin tsa cuenda tsa vaha tsi maa yo tsa cuví yo nyivi tata ñi, javahá maa Nyoo tsa catyí ra. Tyin janandotó ra tsi ra Jesús tumaa cuhva nyaá nu tsinu uvi salmo nu catyí ra tyehen: “Sehe yu cuví tsi un, tan yuhu tsahá yu ñayivi coo un vi-tyin” catyí Nyoo tsihin ra. <sup>34</sup> Nyoo tyaá ra cuhva tyin janandotó ra tsi ra, tyin tacan tan ña cua tyahyu cuñu ñuhu ra. Tyin catyí nu tutu Nyoo: “Tsi nyooho cua cuhva yu tsa vaha tsa cahan yu tsihin ra David tyin cua cuhva yu tsi ndo.” <sup>35</sup> Yacan cuenda catyí tucu nu inga salmo tyehen. “Ña cua cuhva un tsa tyahyu cuñu ñuhu Sehe ii un” catyí tsi. <sup>36</sup> Ra David jahá tyiñu ra tsa cuenda nyivi tsa tsicoo quivi tsicoo ra, tandihí tsa catyí Nyoo tsihin ra tyin javaha ra, javahá ra. Yahá can tan tsihí ra tan tsicutsí ñi tsi ra tumaa tsicutsí ñi tsi jutu ra. Tan tyahyu cuñu ñuhu ra. <sup>37</sup> Maa tyin ra tsa janandotó Nyoo, ña tyahyu cuñu ñuhu ra. <sup>38</sup> Yañi, cuñí tsi tsa coto ndo tyin tsa cuenda cuatyí yo tan quitsí ra Jesús tan tsihí ra tyin jahá ra tucahnu iñi cuatyí yo. <sup>39</sup> Tan tsa cuenda ra Jesús jahá Nyoo tucahnu iñi tsi tandihí ñi tsa tsinú iñi tsi ra, tyin ley Nyoo tsa tyaá ra Moisés ña cuví janduvaha tsi tsi yo nuu Nyoo. <sup>40</sup> Jaha ndo cuenda coto ndoo tsa tyaá ra cuví ndusu yuhu Nyoo siqui ndo. Tyin catyí ra naha tyehen:

<sup>41</sup> Nyehé nyooho, ra tsa tsacú nducu, taahán tsi tsa nayuhvi ndo tan taahán tsi cunaa ndo.

Tyin yuhu cuví Nyoo, tan javahá yu iin tsa cahnu quivi tsa iyó ndo vityin.

Maa tyin ña cua tsinu iñi ndo tandihí tsa javahá yuhu vasu nacatyí tuhun nyivi tsihin ndo, catyí Nyoo.

<sup>42</sup> Ndiñi cahan ra Pablo tan quitá ra tsata vehe ñuhu can tsihin ra vaha iñi tsi ra. Tacan tan nyivi tsa ñavin nyivi Israel cuví quitsahá catyí ñi tsihin ra, tyin na cahan nyico ra tuhun can tsihin ñi inga vitya quivi tsa quitatú ñi. <sup>43</sup> Cuhva tsa ndihí ndu iñi ñi, cuaha xaan nyivi Israel tan nyivi tsa yihí cuenda ñi Israel, tsinyicun ñi tsi ra Pablo tan tsi ra Bernabé. Tan catyí ra naha tsihin ñi tyin na cahun ca ñi ityi nuu tsihin Nyoo. Tan na naquihin vaha ñi tumañi iñi tsa tsahá Nyoo tsi ñi.

<sup>44</sup> Tsa inga vitya quivi quitatú ñi, ndu iñi nyico ñi. Tan tsa yatyin tandihí ña maa nyivi ñuu can ndu iñi tsihin ñi tan tyaá soho ñi tuhun Nyoo. <sup>45</sup> Maa tyin cuhva tsa nyehé ra Israel naha ra, cuxaán ra naha tyin nyehé ra naha tyin cuaha nyivi nyicun tsi ra hermano can naha ra. Tan quitsahá caahán ra naha tsi ra Pablo, tan cahan ra naha ndavaha ñi siqui ra. <sup>46</sup> Maa tyin ra Pablo tan tsihin ra Bernabé ña yuuhví maa ra naha tan quitsahá caahán ñihi ra naha tsihin ra Israel can naha ra. Tan catyí ra naha:

—Cuñí tsi tsa cahan jihna ndi tuhun Nyoo tsihin nyooho tsa cuví ndo nyivi Israel. Maa tyin ña cuñí ndo naquihin ndo tsa caahán ndi. Tan nyooho ña cuñí ndo tsa coo ñayivi nyito tsa ña cua naa maa tsi ndo. Yacan cuenda cua cahun ndi cucahan ndi tsihin nyivi tsa



ñavin nyivi Israel cuví. <sup>47</sup> Tyin tacan catyí Jutu Mañi yo tsihin ndi tan catyí ra tyehen:

Tyaq̄ yu tsi un tumaa iin ñuhu tsa jandunditsín nu iyó nyivi nani cahnú nu ñuhu ñayivi.

Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

<sup>48</sup> Tsa tsiñi ra tsa ñavin ra Israel cuví naha ra, si xaan cuñi ra naha. Tan quitsahq̄ catyí ra naha tyin tuhun Nyoo vaha xaan tsi. Tan natsiny iñi tandihi nyivi tsa nacatsi maa Nyoo, tyin coo ñi ñayivi nyito tsa ña cua naa maa. <sup>49</sup> Tacan tan nducuahq̄ ca tuhun Nyoo tandihi ityi ñuu can. <sup>50</sup> Maa tyin ra Israel cahān ra naha tsihin juhva ñaha cuca tsa nyicún ley Nyoo tsa tyaq̄ ra Moisés. Catyí ra naha tsihin ñi tyin ña vaha tuhun caahān ra Pablo. Tan caahān tucu ra naha tsihin ra cumí tyiñu ñuu can. Tan ican cuví nu quitsahq̄ nyaá ndaha nyivi tsi ra Pablo tan ra Bernabé, nda cuanda tsa tavā ñi tsi ra naha ñuu can. <sup>51</sup> Tacan tan naquisi ra naha nyaca tsaha ra naha tumaa iin seña tyin ndoq̄ cuatyí nyivi can siqui maa ñi. Tan cuahān ra naha ñuu Iconio. <sup>52</sup> Maa tyin ñi yihí cuenda ra Cristo ñuu Antioquía can si xaan cuñi ñi. Tan tsitú ñi tsihin Tatyí Ii Nyoo.

#### Nu nyíí ra Pablo tan ra Bernabé ñuu Iconio

**14** Ra Pablo tan ra Bernabé yucú ra naha ñuu Iconio. Tan quihvi ra naha tsitsi vehe ñuhu nyivi Israel. Tan vaha xaan cahān ra naha tuhun Nyoo tsihin nyivi can. Tan cuaha xaan ñi natsiny iñi ñi tsi ra Cristo, nyivi Israel tan nyivi tsa ñavin nyivi Israel cuví. <sup>2</sup> Maa tyin ra Israel tsa ña tsinú iñi tsi ra Cristo natyuhū ra naha tsi nyivi tsa ñavin nyivi Israel cuví tyin na caca ña vaha iñi ñi nyehe ñi tsi ra yihí cuenda ra Cristo. <sup>3</sup> Yacan cuenda ra Pablo tan ra Bernabé ndoq̄ ra naha ican cuaha quivi. Tan tsihin tsa ñi iñi ra naha caahān ra naha tuhun ra Cristo, tyin tsinú xaan iñi ra naha tsi Jutu Mañi yo. Tan Jutu Mañi yo jatyinyeē ra tsi ra naha tsa caahān ra naha tuhun ra, nácaa tsa cuñi ra tsi yo. Tan tsahq̄ Jutu Mañi yo tunyee iñi tsi ra naha tyin javaha ra naha seña tan tsa iyo na coto nyivi tyin nditsa tsa caahān ra naha. <sup>4</sup> Maa tyin nyivi ñuu ña iin tsicá iñi ñi, tyin juhva ñi yihí cuenda ra Israel naha ra, tan juhva ñi nyicún tsi ra tavā tyiñu ra Jesús. <sup>5</sup> Tacan tan ra Israel tan ra tsa ñavin ra Israel cuví, natuhun tahan ra naha tsihin ra cumí tyiñu, tyin cua cahan ra naha ndavaha ñi siqui ra tavā tyiñu ra Jesús, tan cua cañi ra naha yuu tsi ra naha. <sup>6</sup> Maa tyin ra Pablo tan ra Bernabé ñihí tuhun ra naha tyin tacan cua javaha ra can naha ra tsi ra naha, tan cuahān ra naha nda ñuu Listra, tan nda ñuu Derbe ityi Licaonia. Tan tsicā nuu ra naha ityi ñuu can. <sup>7</sup> Tan cahān nyico tucu ra naha tuhun Nyoo nácaa jacacú ra tsi yo.

#### Nu cañi nyivi yuu tsi ra Pablo nda ñuu Listra

<sup>8</sup> Nda Listra iyó iin rayi tsa coxo tyin nda quivi cacú ra tan ña cuví caca ra, tyin pehe nduvi taahan tsaha ra.

<sup>9</sup> Tan ra pehe tsaha can tyaá soho ra tsa caahān ra

Pablo. Tan ra Pablo, tuví iñi ra tyin tsinú iñi ra can tyin cuví nduvaha ra. <sup>10</sup> Tacan tan ra Pablo caahān ra tsihin tsa ñihi ndusu ra, tan catyí ra:

—Nduvita tan cunyaa nyityi un —catyí ra Pablo tsihin ra.

Tan ra ican, intuhun ñi ndavā ra, tan tsinyaq̄ nyityi ra. Tan quitsahq̄ tsicá ra. <sup>11</sup> Tsa nyehé nyivi tyin javahā ra Pablo tacan, quitsahq̄ caná tsa ñi tsihin yuhu Licaonia, tan catyí ñi:

—Ra tsa tsaq̄ nu yucú yo ihya, nyoo cuví ra naha, maa tyin tumaa caá rayi, caá ra naha —catyí ñi.

<sup>12</sup> Tan catyí ñi tyin ra Bernabé cuví ra nyoo tsa nañi Júpiter, tan ra Pablo cuví nyoo tsa nañi Mercurio, tyin ra ican cuví ra tsa caahān. <sup>13</sup> Tan iyó iin ra cuví jutu tsa jahá cuenda vehe ñuhu tsa nyaá yuhu ñuu ñi can nu jacahnú nyivi tsitoho Júpiter. Tan quitsi ndaca ra indiqui tan ita tyin maa ra tan nyivi cuñi ñi jacahnu ñi tsi ra Pablo tsihin ra Bernabé. Tan cua cahñi ñi indiqui can tyin cua cuhva cuenda ñi tsi ra naha, tyin cuñi ñi tyin nyoo cuví ra naha. <sup>14</sup> Maa tyin cuhva tsa tuví iñi ra naha tsa tsicá iñi ñi, quitsahq̄ tsaahnyá ra naha jahma ra naha. Tan javahā ra naha tacan tumaa iin seña tyin ña ndoó ra naha vaha. Tan quihvi ra naha tyañu nu tuví nyivi, tan canā tsa ra naha, <sup>15</sup> Tan catyí ra naha:

—Nyooho tata, ¿nácaa tsa javahá ndo tyehen?

Nyuhu juvin ñi rayi ñuu ñayivi ihya cuví ndi. Tumaa cuví nyooho cuví tucu nyuhu. Tan vatsi cahan ndi tsihin ndo tyin na jaña ndo tsa javahá ndo tyehen tyin ña tsiñi ñuhu yacan tsi ndo, tan na cunyicun ndo tsi Nyoo nyito. Juvín ra tsa javahā andivi tan ñuhu ñayivi. Tan javahā ra ndutya ñuhu tan tandihi maa tsa iyó tsitsi ndutya ñuhu can. <sup>16</sup> Tan tahān tsanaha nda cuanda vi-tyin, Nyoo jañā ndaha ra tsi nyivi na javaha maa ñi cuhva cuñi ñi, <sup>17</sup> vasu tandihi quivi jacuahá ra tsi ñi tyin ra vaha cuví ra tan javahá ra tsa vaha. Maa ra jacuún ra savi nu yucú yo. Tsahá ra tsa coo vaha tsa tatsi yo quivi taahān tsi. Tan tsahá ra tsa catsi yo. Tan tsahá ra tsa cusii cuñi yo —catyí ra naha tsihin nyivi can.

<sup>18</sup> Maa tyin vasu catyí ra naha tacan, yi xaan tan tyasq̄ ra naha tsa cahñi ñi indiqui can, tyin cuñi ñi jacahnu ñi tsi ra naha tsihin can.

<sup>19</sup> Tacan tan tsaq̄ juhva ra Israel, ra tsa ña tsinú iñi tsi ra Cristo, ra ñuu Antioquía, tan ra ñuu Iconio. Tan natyuhū ra naha tsi nyivi, na cañi ñi yuu tsi ra Pablo. Tan tacan javahā ñi, tan cuñi maa ñi tyin tsa tsihi ra. Tacan tan ixtā caa ñi tsi ra tan tsindacā ñi tsi ra nda yuhu ñuu. <sup>20</sup> Maa tyin ndu iin ra yihí cuenda ra Cristo nu canyíí ra Pablo. Tan nduvita nyico ra. Tan quihvi nyico ra inga tsaha tsitsi ñuu can. Tan tsa inga quivi can cuahān ra ñuu tsa nañi Derbe tan cuahān ra Bernabé tsihin ra.

<sup>21</sup> Tan cahān tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyivi nacuhvā ñi tsi ñi tsi Nyoo. Yahā can tan cuanuhū ra naha ityi quitsi ra naha. Tan yahā nyico ra naha ñuu Listra tan ñuu Iconio inga tsaha, tan tsaq̄ nyico ra naha nda ñuu Antioquía. <sup>22</sup> Tan tandihi ñuu can jandu iin ra naha iñi nyivi tsa yihí cuenda ra Cristo. Tan catyí ra na-

ha tsihin ñi na cuhun ñi ityi nuu ca tsihin tsa tsinú iñi ñi tsi Nyoo. Tan catyí tucu ra naha tsihin ñi tyin tatun cuñi yo tsa cundaca ñaha Nyoo tsi yo, cuñi tsi tsa nyehe yo tundoho. <sup>23</sup> Tan natyiso ra naha tsi ra cua cuvi ityi nuu tsihin nyivi tsa yihí cuenda ra Cristo tan iin tan iin vehe ñuhu. Tan tsicoo nyitya ra naha tan tsican tahvi ra naha tsi Nyoo tsa cuenda ra tsa cua cuvi ityi nuu tsihin nyivi vehe ñuhu can naha ra. Yahá can tan catyí ra Pablo naha ra tsihin ra cuví ityi nuu vehe ñuhu can naha ra:

—Tsinu iñi ndo tsi Jutu Mañi yo. Tyin maa ra cua jaha cuenda tsi ndo —catyí ra Pablo naha ra tsihin ra naha.

#### Nu cuanuhü nyico ra Pablo tan ra Bernabé ñuu Antioquía ityi Siria

<sup>24</sup> Yahá can tan yahá ra Pablo tsihin ra Bernabé ñuu tsa cayucú Pisidia, tan tsaá ra naha nda cuanda Panfilia. <sup>25</sup> Cahán ra naha tuhun Nyoo ñuu Perge. Yahá can tan tsaahán ra naha ñuu Atalia. <sup>26</sup> Ican quihvi ra naha tsitsi iin yutun ndoo tan cuanuhü ra naha nda ñuu Antioquía. Ican cuví ñuu nu natyiso ñi tsi ra naha tyin cua javaha ra naha tyiñu Nyoo, tan vityin tsa tsaá nuhu ra naha. <sup>27</sup> Tsa tsaá nyico ra naha ñuu Antioquía jandu iin ra naha tsi nyivi yihí cuenda ra Cristo. Tan nacatyí tuhun ra naha tsihin ñi tandihí tsa javahá Nyoo tsihin ra naha, tan nácaa nuñá Jutu Mañi yo ityi tyin tsinú tucu iñi ñi tsa ñavin nyivi Israel cuví. <sup>28</sup> Tan naha xaan ndoo ra Pablo tan ra Bernabé tsihin ñi yihí cuenda ra Cristo ñuu can.

#### Nu jandaa ra tavá tyiñu ra Jesús tyiñu nda ñuu Jerusalén

**15** Ndi nyí ca ra Pablo tan ra Bernabé ñuu Antioquía, tan tsaá taahan ra naha quee ra naha nda Judea. Tan quitsahá jacuahá ra naha tsi ra yihí cuenda ra Cristo. Tan catyí ra naha tyin cuñi tsi tsa cunyaa tuñi Nyoo tsi ra naha, tumaa cuhva catyí ra Moisés, tyin tacan tan cua cacu ra naha. <sup>2</sup> Tan ñihi xaan cahán yuhu tahan ra Pablo tan ra Bernabé tsihin ra can naha ra tsa cuenda yacan. Tacan tan natyiso ra hermano Antioquía can naha ra tsi ra Pablo tan ra Bernabé tsihin taahan ca ra naha tyin cuhun ra naha ñuu Jerusalén, cujandaa ra tyiñu can tsihin ra tavá tyiñu ra Jesús tan tsihin ra cuví ityi nuu tsihin nyivi vehe ñuhu ñuu Jerusalén can naha ra. Tacan tan cuahán ra naha. Tan ityi cuahán ra naha, yahá ra naha ityi Fenicia tan Samaria. Tan nacatyí tuhun ra naha tsihin nyivi yihí cuenda ra Cristo nácaa jañá nyivi tsa ñavin nyivi Israel cuví tuhun tsahnu tsa tsinú iñi ñi, tyin nacuhvá cuenda ñi tsi ñi tsi Nyoo. Tan tandihí ra hermano si xaan cuñi ra naha tsa tsito ra naha yacan.

<sup>4</sup> Quivi tsaá ra Pablo tan ra Bernabé ñuu Jerusalén, cuahán ra naha nu ndu iin nyivi yihí cuenda ra Cristo. Tan tandihí ñi tan ra cuví ityi nuu tsihin ñi, tan tsihin ra tavá tyiñu ra Jesús, tsahá ñi yaha ra naha tyin nacatyí tuhun ra naha tsa javahá Nyoo tsihin ra naha. <sup>5</sup> Maa

tyin juhva ra fariseo tsa tsinú iñi tsi ra Cristo, nduvitá ra naha tan catyí ra naha:

—Tandihí ra tsa ñavin ra Israel cuví tan tsinú iñi ra naha tsi ra Jesús, cuñi tsi tsa cunyaa tuñi Nyoo tsi ra naha. Tan cuñi tucu tsi tsa javaha ra naha cuhva catyí ley Nyoo tsa tyaá ra Moisés —catyí ra naha.

<sup>6</sup> Tacan tan ndu iin ra cuví ityi nuu tsihin ñi yihí cuenda ra Cristo tan ra tavá tyiñu ra Jesús tyin natuhun tahan ra naha tuhun can. <sup>7</sup> Tsa yahá tsa cahán yuhu xaan ra naha, tan nduvitá ra Pedro, tan catyí ra:

—Yañi, tsitó ndo tyin tsitsi tsa tandihí yo, nacatsi Nyoo tsi yuhu ra ndaahvi quivi can, tyin cahan yu tuhun ra tsa jacacú tsi yo tsihin nyivi tsa ñavin nyivi Israel cuví, tan na tsinu iñi ñi tsi Jutu Mañi yo. <sup>8</sup> Tan Nyoo, ra tsitó aña tandihí nyivi, janahá ra tsi yo tyin cuñi ra tsi ñi ican. Yacan cuenda tsahá ra Tatyí Ii ra tsi ñi, tumaa tsa naquihñin tucu maa yo Tatyí Ii ra tahán tsanaha. <sup>9</sup> Nyoo inducu ñi cuñi ra tsi nyivi. Yacan cuenda ña tyaá tsiyo ra tsi ñi ican tan ndi tsi yoo. Janduvahá ra tsi ñi tsa cuenda tsa tsinú iñi ñi tsi ra tumaa maa yo. <sup>10</sup> Vityin zacuenda ña tsinú iñi ndo tsa javahá Nyoo tsihin ñi can? Tyin ña vaha tsa tyisó yo ley Nyoo tsa tyaá ra Moisés siqui ñi. Tyin ndi maa tsi tsaahnu yo tan ndi maa yo tan ña cuví naquihin vaha yo ley can. <sup>11</sup> Ñavin tacan cacú yo. Yoo tsitó yo tyin cacú yo tsihin tumañi iñi tsa javahá Jutu Mañi yo ra Jesús tsihin yo. Tan tacan tucu ñi can —catyí ra Pedro tsihin tandihí ra can naha ra.

<sup>12</sup> Tacan tan taxin ñi cuví tandihí ra naha. Tan tyaá soho ra naha tsa caahán ra Bernabé tan ra Pablo. Tyin nacatyí tuhun ra naha seña tan tsa iyo tsa javahá Nyoo nu cahán ra naha tuhun ra nu yucú nyivi tsa ñavin nyivi Israel cuví. <sup>13</sup> Tsa ndihí cahán ra naha, quitsahá caahán ra Jacobo, tan catyí ra:

—Nyooho yañi, tyaá soho ndo tsa cua cahan yu tsihin ndo. <sup>14</sup> Tsa catyí tuhun ra Simón Pedro tsihin yo nácaa quitsahá tsahá Nyoo tumañi iñi tsi ñi tsa ñavin nyivi Israel cuví. Tyin nacatsi tucu ra tsi juhva ñi tyin cuví ñi nyivi cuenda ra. <sup>15</sup> Tan ndu iin tuhun ihya tsihin tuhun tsa cahán ra cuví ndusu yuhu Nyoo tahán tsanaha, tumaa cuhva nyaá maa nu tutu Nyoo nu catyí ra:

<sup>16</sup> Yahá tandihí tuhun ihya tan cua quitsi nyico yu nu yucú ndo.

Quivi tsa tsicoo ra David, vaha xaan jacahnu nyivi tsi yu.

Maa tyin yahá can jandihí nyivi tsa jacahnu ñi tsi yu.

Maa tyin cua quitsi nyico yu inga tsaha tan cua cañihi yu vehe ñuhu ra David.

Tyin cua jacahnu nyico nyivi tsi yu.

<sup>17</sup> Tyin tacan tan cuví nanducu tandihí inga ca nyivi tsi yu,

tandihí ñi tsa ñavin nyivi Israel cuví tan tsinú iñi tsi yu.

<sup>18</sup> Tacan catyí Jutu Mañi yo, tan jacuahá ra tuhun ihya tsi nyivi tsicoo tahán tsanaha tan tsihin nyivi tsa iyó vi-tyin.

<sup>19</sup> Yacan cuenda catyí yu tyin ña vaha tsa jatyañu yo tsi nyivi tsa ñavin nyivi Israel cuví, ñi tsa nacoo tuhun tsahnu ñi tan quihvi ñi cuenda ra Cristo. Ña vaha catyí

yo tyin cuñí tsi tsa tyaa yahvi ñi ley tsahnu yo. <sup>20</sup> Vaha ñi maa tsihin tsa jacuhun yo carta tsi ñi. Tan catyi yo tsihin ñi tyin ña cua catsi ñi cuñu tsa tsahā cuenda nyivi tsi tsitoho. Tan ña cuvi coo rayii tsihin ñaha tun ña tindaha ra. Tan ndi ñiñaha ña cuvi coo ñi tsihin rayii tun ña tindaha ñi. Rayii tsa iyó ñasihi ña cuvi coo ra tsihin inga ñaha, tacan tucu ñiñaha tsa iyó yii, ña cuvi coo ñi tsihin inga rayii. Tan catyi tucu yo tsihin ñi quihvi cuenda ra Cristo tan ñavin nyivi Israel cuvi ñi tyin ña cua catsi ñi cuñu quiti tsa tsihi tsa cavā ñi jucun tatun ña tsatī niñi ti. Tan ña cua catsi ñi niñi quiti. <sup>21</sup> Tyin nda tyembu tsahnu tan nda cuanda vityin iyó maa ra jacuahá ley Nyoo tsa tyaa ra Moisés vehe ñuhu nyivi Israel. Tan jacuahá ra naha tuhun can tan iin tan iin ñuu, tan tahan tahan una quivi, quivi tsa quitatú ñi —catyi ra Jacobo tsihin ra naha.

<sup>22</sup> Tacan tan ra tavā tyiñu ra Jesús tan ra cuvi ityi nuu tsihin ñi vehe ñuhu tsihin tandihi ñi yihí cuenda ra Cristo, nacatsi ñi tsi taahan ra naha. Tan yahā can tan jacuhun ñi tsi ra naha tyin cahun ra naha ñuu Antioquía tsihin ra Pablo tan ra Bernabé. Tan ra tsa natyiso ñi cuvi ra: Judas tsa nañi Barsabás, tan ra Silas. Ra ican cuvi iin ra tsa nyisó tyiñu vehe ñuhu nda ñuu Jerusalén. <sup>23</sup> Tan tsihin ra naha jacuhun ñi iin carta. Tan catyi carta can tyehen:

“Nyuhu ra tavā tyiñu ra Jesús, tan tsihin ra cuvi ityi nuu tsihin ñi vehe ñuhu tan tsihin ra yañi ndo cuenda ra Cristo, tandihi ndi tsahá ndi nacumi tsi nyooho tsa ñavin ra Israel cuvi ndo. Tyin yañi ndi cuvi tsi ndo vasu ñavin nyivi Israel cuvi ndo. Tandihí nyooho tsa iyó ndo ñuu Antioquía, tan nyooho nyivi Siria, tan tsihin nyooho nyivi Cilicia, jaquitsi ndi carta ihya tsi tandihí ñi ndo. <sup>24</sup> Tsitó ndi tyin quitā taahan ra ityi nu yucú ndi ihya. Tan vatsí ra naha nu yucú ndo. Maa tyin ña catyi nyuhu tyin quitsi ra naha jatyañu ra naha tsi ndo. Tan nasamá ra naha cuhva tsicá iñi ndo tyin catyi ra naha tyin cuñí tsi tsa cunyaa tuñi Nyoo tsi ndo, tan naquihin vaha ndo ley Nyoo tsa tyaa ra Moisés. Maa tyin ñavin nyuhu cahān tsihin ra naha tyin quitsi cahan ra naha yacan tsihin ndo. <sup>25</sup> Yacan cuenda ndu iin ndi tan ndoo ndi tuhun cuenda tyiñu can tan tsicá iñi ndi tyin vaha tsa jaquitsi ndi tsi ra hermano ihya naha ra tsihin ra Pablo tan ra Bernabé nu yucú ndo. <sup>26</sup> Nduvi taahan ra ihya nyehé xaan ra naha tundoho tsa cuenda Jutu Mañi yo. Tan vasu cuñí nyivi cahñi ñi tsi ra naha, maa tyin ña jandihí ra naha tsa jacotó ra naha tuhun Jutu Mañi yo ra Jesucristo. <sup>27</sup> Yacan cuenda jaquitsi ndi tsi ra Judas tan ra Silas. Tan maa ra naha cua cahan ra naha tsihin yuhu ra naha tsihin ndo, tyin cua cuhva cuenda ra naha tandihí tsa tyaa ndi nu tutu ihya. <sup>28</sup> Tyin ndi Tatyí Ii Nyoo tan ndi nyuhu ña cuñí ndi tyiso ndi tundoho siqui ndo. Maa tyin ñiñi ca cuñí tsi tsa naquihin vaha ndo tuhun ihya: <sup>29</sup> Ña cua catsi ndo cuñu tsa tsahā cuenda nyivi tsi tsitoho. Tan ña cua catsi ndo niñi quiti, ndi cuñu quiti tsa tsihi tsa cavā ñi jucun tan ña tsatī niñi ti. Ña caca nuu ndo tsihin ñaha. Tan nyooho ñiñaha ña caca nuu ndo tsihin rayii. Tatun na quihin vaha

ndo tuhun ihya, vaha xaan cua coo ndo. Tan Nyoo na ndoo ra tsihin ndo” catyi ra naha nu carta can.

<sup>30</sup> Tan cuahán ra tsa jacuhun ra naha, tan tsaā ra naha ñuu Antioquía. Tan jandu iin ra naha tsi tandihí nyivi yihí cuenda ra Cristo tan nacuhvā cuenda ra naha carta can. <sup>31</sup> Tsa cahvi ñi carta can, sii xaan cuñí ñi tyin vaha xaan caahán tsi. <sup>32</sup> Tan ra Judas tsihin ra Silas cuvi tucu ra naha ndusu yuhu Nyoo. Tan jandu iin ra naha iñi nyivi can tsihin tsa cahān ra naha. <sup>33</sup> Tan tsa yahā tsiyucū ra naha juhva quivi tan cuanuhū nyico ra naha nda nu yucú nyivi tsa jacuhun tsi ra naha. Tan tandihí nyivi yihí cuenda ra Cristo ñuu Antioquía can catyi ñi tyin na cahun vaha ra naha. <sup>34</sup> Maa tyin ra Silas catyi ra tyin cua ndoo ra. <sup>35</sup> Tan ra Pablo tsihin ra Bernabé ndoo tucu ra naha ñuu Antioquía can. Tan maa ra naha tsihin inga ca ra jañihí ca ra naha cahān ra naha tuhun Jutu Mañi yo tsihin nyivi can tan jacuahá ra naha tsi ñi.

#### Nu tsinu uvi tsaha cuahán ra Pablo tuhun Nyoo, tan nu quitā tsiyo ra nuu ra Bernabé

<sup>36</sup> Tan tsa yahā juhva quivi, tan cahān ra Pablo tsihin ra Bernabé:

—Cohon inga tsaha cunyehe yo nu yucú nyivi yihí cuenda Jutu Mañi yo ra Cristo tandihí ñuu nu cahān yo tuhun ra, tyin nyehe yo nácaa yucú ñi —catyi ra Pablo tsihin ra.

<sup>37</sup> Tan ra Bernabé cuñí ra tsa cahun nyico ra Juan Marcos tsihin ra naha. <sup>38</sup> Maa tyin ra Pablo ña taahán iñi ra tsa cahun ra Juan tsihin ra naha, tyin nacoq ihñi ra tsi ra naha nda Panfilia quivi tsa tsahān ra tsihin ra naha. Tan ña tsahān ca ra tsijahā tyiñu ra tsihin ra naha. <sup>39</sup> Tan cahān yuhu tahan ra naha, tan ndusiin ra naha. Ra Bernabé cuahán ra tsihin ra Juan Marcos. Tan quihvi ra naha tsitsi iin yutun ndoo tan cuahán ra naha ñuhu Chipre. <sup>40</sup> Tan ra Pablo nacatsi ra tsi ra Silas. Tan tsa yahā tsicān tahvi ra hermano naha ra tsi Nyoo tsa cuenda ra naha tyin na jatyinyee Nyoo tsi ra naha, tacan tan cuahán ra naha. <sup>41</sup> Tan yahā ra naha ñuu tsa cayucú Siria tan Cilicia, tan jandu iin ra naha iñi nyivi tsa yihí cuenda ra Cristo tan iin tan iin ñuu.

#### Nu cuahán ra Timoteo tsihin ra Pablo tan ra Silas

**16** Ra Pablo tsihin ra Silas tsaā ra naha ñuu Derbe, tan ñuu Listra. Tan ican nañihí ra naha tsi iin ra yihí cuenda ra Cristo. Nañi ra Timoteo. Tan sihi ra cuvi ña iin ñaha Israel. Tan yihí ndihí ña cuenda ra Cristo. Maa tyin jutu ra, ra Grecia cuvi ra. <sup>2</sup> Tan ra Timoteo vaha xaan tsicá ra tuhun Nyoo, catyi nyivi yihí cuenda ra Cristo ñuu Listra tan ñuu Iconio. <sup>3</sup> Tan ra Pablo cuñí ra tsa cahun ra Timoteo tsihin ra. Tan tyaa ra naha tuñi Nyoo tsi ra Timoteo jahā ra Pablo. Tyin coto ndasi cuñi nyivi Israel nyehe ñi tsi ra. Tyin tandihí ñi tsitó ñi tyin jutu ra cuvi ra ra Grecia. <sup>4</sup> Tacan tan cuahán ra naha tan iin tan iin ñuu. Tan caahán ra naha tsihin nyivi yihí cuenda ra Cristo tsahá cuenda ra naha tuhun tsa tsahā ra tavā tyiñu ra Jesús tan tsihin ra cuvi ityi nuu tsihin

nyivi vehe ñuhu Jerusalén tsi ra naha. <sup>5</sup> Tacan tan ndu iin iñi nyivi yihí cuenda ra Cristo tan ñihi ca tsinú iñi ñi tsi ra Cristo. Tan iin tan iin quivi tan cuahán nducuahá ca ñi.

#### Nu janahá Nyoo iin tsa janahá ra tsi ra Pablo cuenda iin ra Macedonia

<sup>6</sup> Ña tsaḥá Tatyí Ii Nyoo tsa cahan ra naha tuhun Nyoo ñuu tsa cayucú Asia. Yacan cuenda yahá sava ra naha ñuhu cuenda Frigia tan Galacia. <sup>7</sup> Tan tsaḥá ra naha Misia. Tan cuñí ra naha cuhun ra naha Bitinia, maa tyin Tatyí Ii ra Jesucristo ña tsaḥá cuhun ra naha. <sup>8</sup> Tacan tan nda sava ñi yahá ra naha ñuu tsa cayucú Misia tan cuahán ra naha ñuu Troas tsa canyíí yuhu ndutya ñuhu. <sup>9</sup> Tan yucú ra naha ñuu Troas can, tan iin tsacuaa nyehé ra Pablo iin tsa nyehé ra. Nyehé ra tsi iin rayí tsa iyó iin ñuu tsa canyíí Macedonia. Nyaá nyityi ra nuu ra tan caahán ndaahvi ra tsihin ra, tan catyí ra: “Ñaha ihya, tyin jatyinyee un tsi ndi” catyí ra. <sup>10</sup> Tan tsa nyehé ra Pablo can, yuhu ra Lucas tsihin ra Pablo tan inga ra janduvahá ndi tsi ndi tan cuahán ndi nda Macedonia can. Tyin tsitó vaha ndi tyin Nyoo caná ra tsi ndi, tyin cahan ndi tuhun ra nácaa jacacú ra tsi yo tsihin nyivi ityi can.

#### Nu nyíí ra Pablo tsihin ra Silas ñuu Filipos

<sup>11</sup> Quihví ndi iin yutun ndoo ñuu Troas. Tan cuahán ndoo ityi ñi ndi nda Samotracia, iin ñuhu luhlu tsa canyíí mahñu ndutya ñuhu. Tan tsa inga quivi tsaḥá ndi ñuu Neápolis. <sup>12</sup> Tan ican quee ndi tan cuahán ndi ñuu Filipos tsa cuví iin ñuu cuenda nyivi Roma. Tan cuví tsi iin ñuu cahnu ca tsa nuu tandíhi ñuu tsa cayucú Macedonia. Tan ican tsiyucú ndi taahan quivi. <sup>13</sup> Iin quivi tsa quitatú nyivi, tan quitá ndi ityi tsata ñuu, yatyin iin yutya nu tuhvá nyivi tsicán tahvi tsi Nyoo. Tsinyecu ndi, tacan tan cahán ndi tuhun Nyoo tsihin ñiñaha tsa ndu iin ican. <sup>14</sup> Iin ñaha nañí ña Lidia. Tan ñuu ña cuví Tiatira. Tan tuhvá ña xicó jahma vaha, tsa tunduuhva. Yacan cuví tyiñu jahá ña. Tan jacahnú ña tsi Nyoo tumaa jacahnú nyivi Israel. Tan tsiñí ña tsa caahán ra Pablo. Tan Nyoo nuñá ra añima ña na tyaa yahvi ña tsa caahán ra. <sup>15</sup> Tan tsicoondutyá ña tsihin nyivi ña. Tan yahá can tan cahán ndaahvi ña tsihin ndi, tan catyí ña: —Tatun nyehé ndo tyin nditsa tsa tsinú iñi yu tsi Jutu Mañi yo, cõhon ndo, ndõo ndo yuvehe yu —catyí ña tsihin ndi.

Tan jañiñi xaan ña tsi ndi na ndoo ndi yuvehe ña.

<sup>16</sup> Tan cuví iin tsaḥá tsa cuahán ndi nu tsicán tahvi ndi. Tan tsitsi tsa cuahán ndi, tahán ndi tsi iin ñaha tyuvaa tsa yihí tatyí ña vaha tsi. Yacan cuenda cuví nacoto ña náa ndíhi tsa cua cuví ityi nuu. Tan iyó ra cuví tsitoho ña. Tan cuaha xaan xuhun jahá canaa ña tsa cuenda ra naha, tyin cuví nacotó ña. <sup>17</sup> Tan ñaha tyuvaa can quitsahá nyicún ña tsi ndi, nyuhu tsihin ra Pablo. Tan caná tsaa ña tan catyí ña:

—Rayí ihya ra jahá tyiñu tyiñu Nyoo cahnu, cuví ra naha. Tan caahán ra naha tuhun nácaa cuví cacu yo —catyí ña.

<sup>18</sup> Cuaha quivi javahá ñaha tyuvaa can tacan. Tacan tan ra Pablo ña cunyeé ca iñi ra, tan nanyicõ coo ra tan catyí ra tsihin tatyí ña vaha tsa yihí tsi ña:

—Tsihin sivi ra Jesucristo, catyí yu tsihin un tyin quita un tsi ñaha tyuvaa ihya —catyí ra.

Tan nu tatyí ña vaha can quitá nu tsi ña juven ñi cuhva can.

<sup>19</sup> Maa tyin tsa nyehé ra cuví tsitoho ña tyin ña cua cuví ca jaha canaa ra naha xuhun tsihin ña, tñin ra naha tsi ra Pablo tsihin ra Silas tan tsindacá ra naha tsi ra naha nda vehe tyiñu. <sup>20</sup> Tan tsicán ra naha cuatyí tsaḥá ra naha nuu ra cumí tyiñu naha ra. Tan catyí ra naha:

—Ra Israel ihya cuaha xaan tsa caahán ra naha tsihin nyivi ñuu yo tan jatíví ra naha ñuu yo. <sup>21</sup> Tyin jacuahá ra naha iin cuhva tsa ña cuví coo yo, ndi ña cuví javahá yo tyin nyivi cuenda ñuu Roma cuví yo —catyí ra naha.

<sup>22</sup> Tacan tan nduxaḥan nyivi tsi ra Pablo tan ra Silas. Tan ra cumí tyiñu can tsahnyá ra naha jahma ra Pablo naha ra tan tavá tyiñu ra cumí tyiñu na cañi ra vitya tsi ra Pablo naha ra tsihin yutun. <sup>23</sup> Tsa yahá tsa cañi xaan ra naha tsi ra Pablo tan ra Silas, tan tsindacá ra vitya can tsi ra naha vehe caa. Tan tavá tyiñu ra vitya tsi ra jaha cuenda tsi ra naha na jaha vaha ra cuenda tsi ra naha. <sup>24</sup> Quihñin ra cua jaha cuenda can tyiñu tan tyihí ra tsi ra naha nda tsitsi cuii vehe caa. Tan tyihí vaha ra tsaḥá ra naha tyañu vitu. <sup>25</sup> Yahá can tan maa ñuu ra Pablo tan ra Silas quitsahá tsicán tahvi ra naha tsi Nyoo. Tan quitsahá tsitá xaan ra naha cantu Nyoo. Tan ra yucú vehe caa can naha ra tyaa soho ra naha. <sup>26</sup> Tan saná iñi ra naha tan quitsi tsa taán ñihi xaan. Tan naquisí tsi tsaḥá vehe caa can, tan juven ñi cuhva can tan nuñá tandíhi yuvehe, tan ndatsj cadena tsa yihí tsi tandíhi ra tsa yucú vehe caa can naha ra. <sup>27</sup> Tan tsa ndotoḥa ra tsa jahá cuenda vehe caa can, nyehé ra tyin ticohó tandíhi maa yuvehe can. Tacan tan tavá ra mityi ra tyin cua cahñi ra tsi ra. Tyin tsicá iñi maa ra tyin tandíhi ra tsa yucú vehe caa can quitá. <sup>28</sup> Maa tyin ra Pablo caná tsaa ra tsi ra, tan catyí ra:

—Ña cahñi un tsi un, tyin tandíhi ndi tan yucú ndi ihya —catyí ra tsihin ra.

<sup>29</sup> Tacan tan ra jahá cuenda vehe caa can tsicán ra ñuhu. Tan tsinyu ra quihví ra nu yucú ra naha. Tan niñí ra tsihin tsa yuuhví ra. Tan tsicuiñi tsiti ra nuu ra Pablo tan ra Silas. <sup>30</sup> Numi xaan tavá ra tsi ra naha nu yucú ra naha ican. Tan tsicá tuhun ra tsi ra naha tan catyí ra:

—Nyooḥo tata, ¿nácaa javaha yu tan cacu yu? —catyí ra tsihin ra naha.

<sup>31</sup> Tan ra Pablo tsihin ra Silas nacahán ra naha tan catyí ra naha:

—Tsiñu iñi tsi Jutu Mañi yo ra Jesucristo tan cacu un, maa un tan tsihin tandíhi nyivi un —catyí ra naha tsihin ra jahá cuenda vehe caa can.

<sup>32</sup> Tan cahán ra naha tuhun Jutu Mañi yo tsihin ra tan tsihin tandíhi nyivi tsa yucú yuvehe ra. <sup>33</sup> Tan juven ñi maa tsacuaa can ra jahá cuenda vehe caa can nacatyá

ra nu uhvi nu cañi ra vitya tsi ra naha. Yahā can tan juvin ñi tsacuaa can tsicoondutyā ra tsihin tandihī nyivi ra. <sup>34</sup> Tacan tan tsindacā ra tsi ra naha nda vehe ra. Tan tsahā ra tsa catsi ra naha. Tan maa ra tsihin nyivi ra sii xaan cuñi ñi tyin tsinú iñi ñi tsi Nyoo. Tacan tan cuanuhū ra Pablo tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

<sup>35</sup> Tsa tuvī inga quivi tan tavā tyiñu ra cumí tyiñu tsi ra vitya na cunyehe ra naha nu nyii ra jahá cuenda vehe caa can, tan catyí ra naha tyin na jaña ra tsi ra Pablo tsihin ra Silas. <sup>36</sup> Tacan tan ra jahá cuenda vehe caa can catyí ra tsihin ra Pablo:

—Tsaā tyiñu tsi yu jahā ra cumí tyiñu, tsa jaña yu tsi ndo. Yacan cuenda vityin tsa cuví quita ndo —catyí ra tsihin ra naha.

<sup>37</sup> Maa tyin ra Pablo catyí ra:

—Nyuhu tsa cuví ndi ra cuenda ñuu Roma cañi ra naha tsi ndi nu tuvi nyivi. Tan ndi ña tatsi tuñi ra naha tsi ndi tumaa cuhva taahán tsi. Tan tyihī ra naha tsi ndi vehe caa. Tan vityin cuñi ra naha tava xeehe ra naha tsi ndi. Maa tyin ña cuñi ndi. Na quitsi tava maa ra naha tsi ndi —catyí ra Pablo tsihin ra jahá cuenda vehe caa can.

<sup>38</sup> Tan ra vitya nacatyí tuhun ra tsihin ra cumí tyiñu naha ra. Tan ra ican naha ra nayuhvi xaan ra naha tsa tsitō ra naha tyin ra cuenda ñuu Roma cuví ra Pablo.

<sup>39</sup> Tan tsahān ra cumí tyiñu naha ra tsindacān ra naha tucahunu iñi nuu ra Pablo tan ra Silas. Tacan tan ra cumí tyiñu tavā ra naha tsi ra Pablo naha ra tan caahán ndaahvi ra naha tsihin ra Pablo naha ra na quita ra naha ñuu can. <sup>40</sup> Tan tsa quitā ra naha vehe caa can, tsahān ra naha vehe ña Lidia. Tan yahā can tan tsinyehe ra naha tsi ra hermano naha ra tan jandu iñ ra naha iñi ra naha tan cuahán ra naha.

### Nu quitsahā caahán yuhu tahan nyivi ñuu Tesalónica

**17** Nu cuahán ra Pablo tsihin ra Silas, yahā ra naha ñuu Anfípolis, tan ñuu Apolonia. Yahā can tan tsaā ra naha ñuu Tesalónica nu nyaá iin vehe ñuhu nyivi Israel. <sup>2</sup> Tan tsahān ra Pablo vehe ñuhu can, tumaa cuhva tuhvá maa ra tsaahán tan iin tan iin ñuu. Tan cahān ra tuhun Nyoo tsihin nyivi tsicá vehe ñuhu can uñi taahan quivi quitatú ñi. <sup>3</sup> Tan cahvi ra nu libru Nyoo tan tsahā cuenda ra tuhun ra Cristo tsi ñi nu catyí tsi tyin cua nyehe ra tundoho tan cua cúu ra. Yahā can tan cua nandoto ra. Tan catyí ra tsihin ñi:

—Ra Jesús tsa caahán yu tuhun tsihin ndo juvin ra cuví ra Cristo.

<sup>4</sup> Tan juhva nyivi Israel can tsinū iñi ñi tsa caahán ra. Tan ndu iñ ñi tsihin ra naha. Tan cuaha xaan nyivi Grecia tsa tuhvá jacahnú tsi Nyoo tan natsinū ndihī iñi ñi. Tan cuaha ñiñaha cuca tsa iyó ñuu can natsinū ndihī iñi ñi tsa caahán ra tuhun ra Cristo. <sup>5</sup> Maa tyin ra ñuu Israel tsa ña tsinú iñi, ndasi cuñi ra naha nyehé ra naha tyin cuaha xaan nyivi nyicún tsi ra Pablo. Tan jandu iñ ra naha tsi taahan ra caquiñi tsa tsicá nuu jutsan ñi maa. Tan quitsahā caahán yuhu tahan nyivi ñuu can jahā ra naha. Tan quihvi ra caquiñi can vehe ra Jasón,

tyin nanducú ra naha tsi ra Pablo tan ra Silas, tyin cuñi ra naha tsa quita ra Pablo naha ra. Tyin ra caquiñi can cuñi ra naha nacuhva cuenda ra naha tsi ra Pablo naha ra tsi nyivi. <sup>6</sup> Maa tyin tsa ña nañihī ra naha tsi ra Pablo tan ra Silas ican, quihñ ra naha tsi ra Jasón. Tan ixtā caa ra naha tsi ra. Tan quihñ ndihī ra naha tsi taahan ca ra hermano tan cuahán ra naha nuu ra cumí tyiñu ñuu can. Tan canā tsaā ra caquiñi can naha ra tan catyí ra naha:

—Ra ihya naha ra cuví ra tsicá nuu jasaná iñi tandihī nyivi naniñ cahnu ñuhu ñayivi. Tan vityin tsaā ndihī tucu ra naha ihya. <sup>7</sup> Tan ra Jasón can tsahā ra yuvehe ra na cuyucu ra naha. Tan tandihī maa ra naha tan ña tyaá yahvi ra naha tsi ra cuví rey cahnu nda ñuu Roma. Tyin catyí ra naha tyin iyó inga rey tsa nañi Jesús —catyí ra naha.

<sup>8</sup> Tsa tsiñi nyivi tan ra cumí tyiñu tsa caahán ra caquiñi can naha ra quitsahā caahán yuhu tahan ñi.

<sup>9</sup> Maa tyin ra Jasón tan inga ra naha tsahā ra naha xuhun tan jañā ra cumí tyiñu tsi ra naha.

### Nu cuahán ra Pablo tsihin ra Silas ñuu Berea

<sup>10</sup> Tan juvin ñi tsacuaa can jacuhñ ra hermano naha ra tsi ra Pablo tsihin ra Silas ñuu Berea. Tan tsa tsaā ra naha, tsahān ra naha vehe ñuhu nyivi Israel. <sup>11</sup> Tan nyivi Israel tsa iyó ñuu Berea can vaha ca nyivi cuví ñi tan ñavin ca nyivi ñuu Tesalónica tyin tsihin tsa ñi iñi ñi tan naquihñ ñi tuhun Nyoo. Tan tandihī quivi nanducú ñi nuu tutu Nyoo, nyehé ñi tatun nditsa tsa caahán ra Pablo. <sup>12</sup> Yacan cuenda cuaha xaan ñi natsinū iñi ñi tsi ra Cristo tsihin tucu nyivi Grecia tahan ñi ñiñaha cuca tan rayiñ naha ra. <sup>13</sup> Maa tyin tsa tsitō ra Israel tsa iyó ñuu Tesalónica tyin ra Pablo nyii ra Berea caahán ra tuhun Nyoo, tan cuahán ra naha tan natyuhū ra naha tsi nyivi Berea can. <sup>14</sup> Maa tyin ra hermano numi ñi jacuhñ ra naha tsi ra Pablo nda ityi yuhu ndutya ñuhu. Maa tyin ra Silas tsihin ra Timoteo ndoñ ra naha ñuu Berea. <sup>15</sup> Tan ra tsa cuahán tsihin ra Pablo tsindacā ra naha tsi ra nda ñuu Atenas. Tacan tan cuanuhū ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa cahān ra Pablo tsihin ra naha, tyin na janumi ra naha tan cuhun ra naha nu nyii ra.

### Nu nyii ra Pablo ñuu Atenas

<sup>16</sup> Tsitsi tsa ndatú ra Pablo tsi ra Silas tan ra Timoteo ñuu Atenas can, ndasi cuñi añima ra tsa nyehé ra tyin cuaha xaan tsitoho iyó ñuu can. <sup>17</sup> Yacan cuenda cahān ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandihī quivi caahán ra tsihin nyivi tsa cuahán nuyahvi. <sup>18</sup> Tan ñihñi tahan ra tsihin nyivi tsa cahvi tuhun tsa jacuahá nyivi tsa nañi epicúreo. Tan ñihñi tahan tucu ra tsihin nyivi tsa cahvi tuhun tsa jacuahá nyivi tsa nañi estoico. Tan cahān ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahan ra tsihin yo? —catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahán ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyivi tatun cua cúu ñi. <sup>19</sup> Tacan tan tsindaca ra naha tsi ra Pablo iin nu nañi Areópago, nu tuhvá ra cumí tyiñu naha ra ndu iín. Tan catyí ra naha tsihin ra:

—Cuñi ndi coto ndi tuhun tsa tsa jacuahá un. <sup>20</sup> Tyin jacotó un tuhun tsa ña tsitó ndi. Tan cuñi tucu ndi coto ndi náa cuñi tsi catyí tandihi tuhun ihya —catyí ra naha tsihin ra.

<sup>21</sup> Tyin tandihi nyivi Atenas tan nyivi inga ñuu tsa iyó ican taahán xaan iñi ñi tyaa soho ñi tan nacatyí tuhun ñi náa ndihi tuhun tsa.

<sup>22</sup> Tacan tan ra Pablo nduvitá nyityi ra tyañu nu yucú ra naha nu cuví Areópago, tan catyí ra:

—Nyooho ra ñuu Atenas, yuhu nyehé yu tyin cuaha xaan nyoo jacahnú ndo. <sup>23</sup> Tyin tsahan yu tsinyehé yu nu tuhvá ndo ndu iín. Tan nyehé yu iin altar nu nyaá letra tsa catyí tyehe: “Tsehe cuví cuenda Nyoo tsa ña nacotó yo” catyí letra can. Nyooho jacahnú ndo tsi Nyoo tsa ña nacotó ndo. Juvín Nyoo can cuví tsa caahán yu tuhun tsihin ndo. <sup>24</sup> Nyoo tsa javahá ñuhu ñayivi tan tandihi tsa iyó nu ñuhu ñayivi ihya, tsii maa ra cuví andivi tan ñuhu ñayivi. Tan ña iyó ra tsitsi vehe ñuhu tsa javahá nyivi. <sup>25</sup> Tan ña nyitá iñi ra tsa jatyinyeé nyivi tsi ra. Tyin maa ra tsahá ñayivi coo tandihi yo. Tan tsahá ra tatyí tsa ixtá tatyí yo. Tan maa ra tsahá tandihi tsa tsiñi ñuhu tsi yo. <sup>26</sup> Javahá Nyoo tsi intuhun rayi. Tan tsa yahá can tsicoo cuaha nyivi tata ra. Tan maa ra naha cuví tsi tsaahnu tandihi yo. Yacan cuenda intuhun ñi niñi nyisó tandihi yo. Tan tsahá Nyoo tsa coo yo nani cahnu ñuhu ñayivi. Tsa ndi cumañi ca coo yo tan catyí ra náa cuiya coo intuhun intuhun yo nu ñuhu ñayivi ihya. Tan catyí tucu ra maa nda cua coo intuhun intuhun yo. <sup>27</sup> Tacan javahá ra tyin na quitsaha nanducu yo tsi ra. Tumaa iin ra cuaa nanducú tsihin ndaha ra tsa nanducú ra, tacan cua nanducu yo tsi ra tan cua nañihi yo tsi ra tyaa ra cuhva. Vasu ndi maa ña cañi nyaá ra tsihin intuhun intuhun yo. <sup>28</sup> Tyin iyó yo tan candá yo jahá maa ra. Tumaa catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra. <sup>29</sup> Tatun tata Nyoo cuví tsi yo, ña taahán tsi caca iñi yo tyin Nyoo cuví ra iin tsitoho tsa tsiny tsihin xuhun cuaan, a xuhun cuitsin, a tsihin yuu vaha. Tan ndi ñavin Nyoo tsa tsiny tsihin tsa tsiñituñi iñi nyivi cuví ra. <sup>30</sup> Tahan tsanaha Nyoo ña cuxaḡn ra tsi nyivi tsa tsicá iñi tacan tyin ña tsitó ñi náa tsa javahá ñi. Maa tyin vityin catyí ra tsihin nyivi tandihi ñi ityi tyin na ndu uvi iñi ñi cuatyí ñi tan na nasama ñi cuhva iyó ñi. <sup>31</sup> Tyin tsa tyaa ra cuhva tyin cua coo iin quivi tsa cua tatsi tuñi ra tsi nyivi iyó nu ñuhu ñayivi. Tan tsa cua tsa quivi can, ra tsa nacatsi vaha maa ra cua tatsi tuñi tsi ñi jaha ra. Tan tsa javahá ra tsi yo tyin nditsa tsa ra ihya cua tatsi tuñi tsi nyivi, tyin janandotó ra tsi ra can nu tsihi ra —catyí ra Pablo.

<sup>32</sup> Tsa tsiñi nyivi tuhun tsa nandotó nyivi tsa tsihi, yihí ñi tsacú nducu ñi, tan yihí tucu nyivi catyí ñi:

—Quitsi un inga tsaha tan cahán un tuhun ihya tsihin ndi —catyí ñi.

<sup>33</sup> Tacan tan cuahán ra Pablo. <sup>34</sup> Maa tyin yihí ñi ndu iin ñi tsihin ra, tan natsiny iñi ñi tsi ra Cristo. Tan iin ra tsa natsiny iñi, nañi ra Dionisio, tan cuví ra iin ra cumí tyiñu tsa tuhvá ndu iin nda Areópago can. Tan iin ñaha tsa nañi Dámaris natsiny ndihi tucu iñi ña, tan tsihin inga ca ñi.

### Nu nyií ra Pablo ñuu Corinto

**18** Yahá can tan quitá ra Pablo ñuu Atenas tan cuahán ra ñuu Corinto. <sup>2</sup> Tan ican nañihi ra tsi iin ra Israel tsa nañi Aquila. Tan ñuu Ponto cacú ra. Tan maa ra tsihin ñasihí ra, ña Priscila, quitá ñi Italia nu tsicoo ñi, tyin ra Claudio, ra cuví rey cahnu ñuhu can, tavá ra tsi tandihi nyivi Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto. <sup>3</sup> Tan iin ñi tyiñu javahá ra tsihin ñi. Javahá ñi vehe jahma. Tan ndoo ra tsihin ñi tyin jahá tyiñu ra iin caa ñi tsihin ñi. <sup>4</sup> Tan quivi quitatú nyivi Israel tahan iin vitya, ra Pablo cuahán ra vehe ñuhu ñi. Tan natuhún tahan ra tsihin nyivi Israel tan tsihin nyivi tsa ñavin nyivi Israel cuví. Tyin nducú ra cuhva tsa tsinu iñi ñi tsi ra Jesucristo.

<sup>5</sup> Tan quivi tsaḡ ra Silas tan ra Timoteo tsa quee ra naha Macedonia, ra Pablo nacoḡ ra tyiñu jahá ra tan intuhun ña tyiñu tsa caahán ra tuhun Nyoo jahá ra. Tan caahán catsi ra tsihin nyivi Israel tyin ra Cristo, tsa ndatú xaan ñi, juvín ra cuví ra Jesús. <sup>6</sup> Maa tyin ñi ican xaan cuñi ñi. Tan quitsahá caahán ñi ndavaha ñi siqui Jutu Mañi yo. Tacan tan ra Pablo naquisi ra jahma ra tumaa iin seña tyin cua ndoo cuatyí ñi siqui ñi. Tan catyí ra tsihin ñi:

—Cuatyí maa ndo cuví tatun cuhun ndo anyaya. Ñavin ca cuatyí yuhu tyin tsa cahán yu tsihin ndo tan maa ndo ña tsiñu iñi. Vityin tan ityi nuu ca cua cuhun yu cahán yu tuhun ihya tsihin nyivi tsa ñavin nyivi Israel cuví —catyí ra tsihin ñi.

<sup>7</sup> Tan quitá ra vehe ñuhu can. Tan cuahán ra vehe ra tsa nañi Justo, iin ra tsa jacahnú tsi Nyoo. Tan yatyin ñi vehe ñuhu can nyaá vehe ra. <sup>8</sup> Tan iin ra tsa nañi Crispo, ra cuví ityi nu vehe ñuhu can, natsiny iñi ra tsi Jutu Mañi yo tan tacan tucu tandihi nyivi ra. Tan cuaha ca nyivi iyó ñuu Corinto can, tsa yahá tsa tsiñi ñi tsa caahán ra Pablo, natsiny iñi ñi tsi ra Jesús, tan tsicoon-dutyá ñi. <sup>9</sup> Tacan tan iin tsacuaa nyehé ra Pablo iin tsa javahá Nyoo tsi ra. Tan cahán Jutu Mañi yo tsihin ra, tan catyí ra:

—Ña nayuhvi un. Jañihi ca cahán un tuhun yu tan ña jandihí un tsa cahán un. <sup>10</sup> Tyin yuhu nyaá yu tsihin un, tan yoñi cuví javahá tsa caquiñi tsi un. Tyin cuaha xaan nyivi yu iyó ñuu ihya tan nyaá cua jacacu yu tsi ñi —catyí Jutu Mañi yo tsihin ra Pablo.

<sup>11</sup> Yacan cuenda ra Pablo ndoo ra iin cuiya sasava ñuu Corinto can, jacuahá ra tuhun Nyoo tsi nyivi.

<sup>12</sup> Maa tyin quivi tsa ndacá ñaha ra Galión tsi nyivi ñuu tsa cayucú Acaya, ndu iin ra Israel naha ra siqui ra

Pablo. Tan tsicān ra naha cuatyí tsaha ra nuu ra Galión.

<sup>13</sup> Tan catyí ra naha tsihin ra Galión can:

—Ra ihya natyuhú ra tsi nyivi na jacahnu ñi tsi Nyoo iin cuhva tsa ñavin cuhva catyí ley —catyí ra naha.

<sup>14</sup> Tacan tan cuhva tsa cua nacahan ra Pablo, tan nacahan ñi ra Galión, tan catyí ra tsihin ra Israel can naha ra:

—Nyooho ra Israel, cuví jandaa yu cuatyí ra tatun cuatyí cahnu o cuatyí ndiyí cuví. <sup>15</sup> Maa tyin maa ñi maa tuhun caahán cuví tuhun ihya. Tan yuhu ña cuñí yu jandaa yu tyiñu ihya, tan inga tucu tuhun tyin cuenda ley maa ndo cuví. Nyehe maa ndo. Jandaa maa ndo tyiñu tyin yuhu ña cuñí yu cuví yu juez tsa cuenda tuhun ihya —catyí ra Galión can tsihin ra naha.

<sup>16</sup> Tan tava ra tsi ra Israel naha ra nu cuví vehe tyiñu ra. <sup>17</sup> Tacan tan tandihí ra Grecia tñin ra naha tsi ra Sóstenes, ra cuví ityi nu vehe ñuhu nyivi Israel. Tan cañí ra naha tsi ra juven ñi maa nuu ra Galión, ra yihí ndaha tsi nyivi Acaya. Tan ra Galión can ña cahān maa ra.

#### Nu cuanuhú ra Pablo ñuu Antioquía tan cuahán ra tsa tsinu uñi tsaha cua cahan ra tuhun Nyoo

<sup>18</sup> Tan ra Pablo ndoo ra ñuu Corinto can cuaha quivi. Yahā can tan catyí ra tsihin ra hermano naha ra tyin tsa cua cahun ra. Tan cuahán ra Aquila tan ña Priscila tsihin ra. Tacan tan tsaā ñi ñuu Cencrea. Tan ra Pablo xatyā ndi ra jiñi ra tumaa iin seña tyin tsa yahā javahā ra tsa catyí ra tyin cua javaha ra nuu Nyoo. Tacan tan quihvi ñi tsitsi iin yutun ndoo tsa cuahán nda Siria.

<sup>19</sup> Tan tsa tsaā yutun ndoo can nda ñuu Éfeso, quitā ñi. Tan ra Aquila tsihin ña Priscila ndoo ñi ican. Tan ra Pablo cuahán ra vehe ñuhu nyivi Israel, tan cahān ra tsihin nyivi tsa ndu iin ican. <sup>20</sup> Tan cahān ndaahvi ñi tsihin ra tyin na ndoo ra taahan ca quivi tsihin ñi. Maa tyin ña cuñí ra. <sup>21</sup> Tan catyí ra tsihin ñi tyin tsa cuahán ra, tan catyí tucu ra tyehen:

—Cuñí tsi tsa cahun yu ñuu Jerusalén tyin jacahnu yu vico tsa vatsí tahan. Maa tyin tatun Nyoo cuñí, cua quitsi yu inga tsaha nu yucú ndo —catyí ra tsihin ñi.

Tacan tan cuahán ra, quihvi ra tsitsi iin yutun ndoo tsa cuahán nda Siria. <sup>22</sup> Quivi tsa tsaā nyico ra ñuu Cesarea cuenda Siria, tsahān ra ñuu Jerusalén tsicuhvā ra nacumi tsi nyivi yihí cuenda ra Cristo tsa iyó ican. Yahā can tan cuahán nyico ra ñuu Antioquía. <sup>23</sup> Tan tsa yahā tsinyij ra juhva quivi ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iin ra iñi tandihí nyivi yihí cuenda ra Cristo.

#### Nu caahán ra Apolos tuhun Nyoo ñuu Éfeso

<sup>24</sup> Quivi can tsaā iin ra Israel ñuu Éfeso. Nañi ra Apolos, tan ñuu ra cuví Alejandría. Tan vaha xaan caahán ra tuhun Nyoo. Tan tsitó xaan ra tuhun Nyoo tuhun tsahnu tsa nyaá nu libru. <sup>25</sup> Tan vaha xaan cutuhvā ra tuhun Jutu Mañi yo. Tan caahán ra tsihin tsa ñi iñi ra. Tan catsi xaan jacuahá ra tuhun ra Jesús. Vasu cuhva tsa jacoondutyā ra Juan ñi tsitó ra. <sup>26</sup> Tan quitsahā

caahán ra tsitsi vehe ñuhu tsihin tsa ñi iñi ra. Tan cuhva tsa tsiñi ra Aquila tan ña Priscila, tava siñ ñi tsi ra tan tsahā cuenda vaha ca ñi tuhun Nyoo tsi ra. <sup>27</sup> Tacan tan quitsahā cuñí ra Apolos cahun ra ityi Acaya. Tan ra hermano jatyinyee ra naha tsi ra. Tan jacuhun ra naha iin carta tsi nyivi yihí cuenda ra Cristo ityi can, tan catyí ra naha tsihin ñi tyin na vaha cahan ñi tsihin ra Apolos nu cua tsaā ra. Tacan tan cuahán ra. Tan cuhva tsa tsaā ra Acaya can, jatyinyee xaan ra tsi nyivi yihí cuenda ra Cristo, ñi tsa natsinū iñi tsa cuenda tumañi iñi tsa javahā Nyoo tsi ñi. <sup>28</sup> Tyin nu tuvi nyivi ñihi xaan cahān yuhu ra Apolos tsihin ra Israel naha ra tyin cuhva tsinú iñi nyivi Israel, ña nditsa. Tan jacuahā ra tsa catyí nu tutu Nyoo tyin ra Cristo, ra tsa ndatú xaan ñi, juven ra cuví ra Jesús.

#### Nu cuahán nyico ra Pablo ñuu Éfeso

**19** Tsitsi tsa nyií ra Apolos ñuu Corinto, ra Pablo yahā ra ityi yucu tan tsaā ra nda ñuu Éfeso. Tan ican nañihí ra tsi taahan ra yihí cuenda ra Cristo. <sup>2</sup> Tan tsicā tuhun ra tsi ra naha:

—¿A naquihin ndo Tatyí Ii Nyoo quivi tsa natsinū iñi ndo? —catyí ra Pablo tsihin ra naha.

Tan nacahan ra naha tan catyí ra naha:

—Ndi luxu ña tsitó ndi tsa iyó Tatyí Ii Nyoo.

<sup>3</sup> Tacan tan ra Pablo tsicā tuhun ra tsi ra naha:

—¿Nacaa tsicoondutyā ndo? —catyí ra.

Tan nacahan ra naha tan catyí ra naha:

—Cuhva tsa jacoondutyā ra Juan, tacan tsicoondutyā ndi —catyí ra naha.

<sup>4</sup> Tacan tan catyí ra Pablo tsihin ra naha:

—Ra Juan jacoondutyā ra tsi nyivi tsa ndu uvi iñi cuatyí. Maa tyin catyí tucu ra tsihin ñi tyin cuñí tsi tsa tsinu iñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

<sup>5</sup> Tsa tsiñi ra naha tsa cahān ra Pablo tuhun ihya, tacan tan tsicoondutyā ra naha inga tsaha tsihin sivi Jutu Mañi yo Jesús. <sup>6</sup> Tan tsa tyiso ndaha ra Pablo jiñi ra naha, tacan tan naquihin ra naha Tatyí Ii Nyoo. Tan quitsahā caahán ra naha inga yuhu. Tan tsahā cuenda ra naha tuhun tsa tsahā Tatyí Ii Nyoo tsi ra naha tsi nyivi. <sup>7</sup> Tan tsa tandihí ra naha quitā maa utsi uvi taahan ra naha.

<sup>8</sup> Tan tsitsi tsa uñi yoo tsicá ra Pablo vehe ñuhu nyivi Israel ñuu Éfeso, tan caahán ra tuhun ra Cristo tsihin tsa ñi iñi ra. Tan jacuahā ra tsi ñi na nacuhva ñi tsi ñi tsi Nyoo na cundaca ñaha ra tsi ñi. <sup>9</sup> Maa tyin yihí ñi jandava ñi añima ñi, tan ña cuñí ñi tsinu iñi ñi. Tan caahán ñi ndavaha ñi siqui tuhun ra Cristo nuu nyivi, tan catyí ñi tyin ña vaha ityi ra Jesús. Tacan tan ra Pablo catsiyó nyaha ra nu yucú ñi. Tan tsindaqā ra tsi ñi tsinú iñi tsi ra Cristo nda iin escuela ra tsa nañi Tiranno. Tan ican caahán ra tuhun ra Cristo tsihin nyivi tandihí quivi. <sup>10</sup> Tan tacan ñi tsicá ra tsitsi tsa uvi cuiya. Tan tandihí nyivi tsa iyó ñuu tsa cayucú Asia, tsiñi ñi tuhun Jutu Mañi yo ra Jesús, tahan ñi nyivi Israel tan nyivi tsa ñavin nyivi Israel cuví. <sup>11</sup> Tan nahnu tsa iyo javahā ra Pablo jahā Nyoo. <sup>12</sup> Tyin nda cuanda jahma

tsa tññ ra Pablo tan tsindacá ñi tsi nyivi tan quitá cuehe tsi ñi, tan quitá ndihí tucu tatyí ña vaha tsi ñi.

<sup>13</sup> Tan iyó juhva ra Israel tsa tsicá nuu tan iin tan iin ñuu tavá ra naha tatyí ña vaha tsi nyivi. Tan cuñí ra naha cuatyíñu ra naha sívi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sívi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.

<sup>14</sup> Tacan javahá tsa utsal taahan sehe iin ra Israel tsa nañí Esceva. Tan ra Esceva can cuví ra iin ra cuví ityi nuu tsihin ra jutu. <sup>15</sup> Tan tsa cahán ra can naha ra tsihin nu tatyí ña vaha, nacahán nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan ¿yóo ra cuví tucu nyooho? —catyí nu tatyí ña vaha can tsihin sehe ra Esceva naha ra.

<sup>16</sup> Tacan tan ra tsa yihí tatyí ña vaha can ndavá ra síqui ra can naha ra. Tan tsihin tsa cuaha tunyee iñi nu tatyí ña vaha can tan cuví cunyeé ra tññ tahan ra tsihin tandihí ra can naha ra. Tan tsahnyá cuatyí ra jahma ra naha. Tan jañicueehé ra tsi ra naha. Tan jacuhun tandiñ ra tsi ra naha jahá nu tatyí can. <sup>17</sup> Tacan tan tandihí nyivi Éfeso, tahan ñi nyivi Israel, tan nyivi tsa ñavin nyivi Israel cuví, tsitó ñi tuhun can. Tan yuuhví xaan ñi cuví. Tan jacahnú ñi sívi Jutu Mañi yo Jesús.

<sup>18</sup> Tan cuaha xaan nyivi tsa natsinu iñi tsi ra Jesús cuahán ñi cuanahmá ñi cuatyí ñi nuu ra tan nuu nyivi, tandihí maa tsa ña vaha tsa icá ñi tahan tsanaha. <sup>19</sup> Tan cuaha ñi tsa cahví tuhun tasi, tsindacá ñi libru ñi. Tan tsahmjí ñi libru can nuu tandihí nyivi. Tan tavá cuenda ñi nácaa yahvi libru can. Tan yahvi tsa tandihí libru can quitá tsi uvi xico utsi mil xuhun cuitsin. <sup>20</sup> Tan tacan ñi tan cuahán nducuahá ca nyivi tsa yihí cuenda Jutu Mañi yo. Tan tacan nyehé nyivi tyin cahnu xaan tunyee iñi iyó tsi ra.

<sup>21</sup> Tan tsa yahá tuhun ihya, ra Pablo tyaá ra cuhva tsa cuhun ra ñuu tsa cayucú Macedonia tan Acaya. Yahá can tan cua cunuhu ra nda ñuu Jerusalén, tyaá ra cuhva. Tan catyí ra tyin yahá can tan cuñi tsi tsa cuhun ra nda ñuu Roma. <sup>22</sup> Tacan tan jacuhun ra tsi uvi taahan ra jatyinyeé tsi ra nda Macedonia, ra Timoteo tan ra Erasto. Maa tyin tsitsi tsa cuahán ra can naha ra, ndoo maa ra Pablo juhva ca quivi Asia can.

### Nu quitsahá cuvaá nyivi Éfeso

<sup>23</sup> Tan juvin ñi quivi can quitsahá cuvaá nyivi ñuu Éfeso tsa cuenda tuhun Nyoo, <sup>24</sup> tyin iin ra tsa nañí Demetrio natyuhú ra tsi ñi. Tyin maa ra tuhvá ra jahá tyiñu tsihin xuhun cuitsin. Javahá ra tsa cuví vehe ñuhu nyihi tsitoho Diana tsihin xuhun cuitsin can. Tan cuaha xuhun jahá canaa ra tan tsihin ra jatyinyeé tsi ra. <sup>25</sup> Tan caná ra Demetrio can tsi ra tsa jahá tyiñu tsihin ra. Tan caná tucu ra tsi ra tsa jahá tyiñu iin ñi tyiñu can naha ra. Tan catyí ra tsihin ra naha:

—Nyooho tata, tsitó ndo tyin tsihin tyiñu ihya tan iyó vaha xaan yo. <sup>26</sup> Maa tyin nyooho nyehé ndo tan tsiñí ndo nácaa javahá nu Pablo can ñuu yo ihya, tan

tandihí ñuu tsa cayucú Asia ihya. Tyin catyí nu tyin tsitoho tsa javahá yo tan tsa javahá inga ca nyivi ñavin Nyoo cuví can. Tan cuaha xaan nyivi tsinú iñi tsa caahán nu. <sup>27</sup> Tan ña vaha tsa javahá nu tyin ña cua cuyahvi ca tsitoho tsa javahá yo. Tan inga tucu tuhun, ña cua jacahnu ca nyivi tsi nyoo Diana tan ña cua jacahnu ñi vehe ñuhu ña, tan ña vaha tacan, tyin ñaha can cahnu xaan cuví ña. Tan tandihí nyivi ñi cahnu Asia tsihin nyivi naniñ cahnu ñuhu ñayivi jacahnú ñi tsi ña. Tan nu cuahán ca tsi quivi ña cua jacahnu ca ñi tsi ña tatun tsinú iñi ñi tsa caahán nu Pablo —catyí ra Demetrio.

<sup>28</sup> Tan cuhva tsa tsiñi ra naha tsa cahán ra, xaan xaan cuñí ra naha. Tan quitsahá caná tsa ra naha tan catyí ra naha:

—Cahnu xaan cuví ña Diana tsa cuví ña nyoo cuenda yo tsa cuví yo nyivi Éfeso ihya —catyí ra naha.

<sup>29</sup> Tan cuvaá tandihí nyivi ñuu can. Tan tññ ñi tsi ra Gayo, tan tsihin ra Aristarco, uvi taahan ra tsa quee Macedonia tan tsicá ra naha tsihin ra Pablo. Tan tandihí ñi can ixtá caa ñi tsi ra naha nda cuenda nu tuhvá ñi ndu iñ. <sup>30</sup> Tan ra Pablo cuñí ra quihvi ra nu yucú ñi tyin cahan ra tsihin ñi. Maa tyin ra hermano ña tsahá ra naha tsa cuhun ra. <sup>31</sup> Tan tacan tucu taahan ra cumí tyiñu cuenda Asia. Ra vaha iñi tsi ra Pablo cuví ra naha, tan tavá tyiñu ra naha tsi ra tyin ña taahán tsi tyihi ra tsi ra ican. <sup>32</sup> Tan nu ndu iñ nyivi ican, juhva ñi caná tsa iin tuhun, tan inga ñi caná tsa inga tuhun, tyin cuvaá ñi. Tan cuaha xaan ñi ndi ña tsitó ñi nacuenda yucú ñi ican. <sup>33</sup> Tacan tan nyivi Israel tavá tyiñu ñi tsi iin ra tsa nañí Alejandro na yaha ra ityi nuu. Tan juhva ñi tsa yucú ican, tsahá cuenda ñi tsi ra nácaa cua cahan ra. Tacan tan javahá ra seña tsihin ndaha ra tyin na cutaxin ñi tyin cuñí ra cahan ra tyin nduve cuatyí nyivi Israel. <sup>34</sup> Maa tyin cuhva tsa tsitó nyivi tyin ra Israel cuví ra, tandihí maa ñi caná tsa ñi. Tan tsitsi tsa uvi hora caná tsa ñi, tan catyí ñi:

—Cahnu xaan cuví ña Diana, tsa cuví ña nyoo cuenda yo tsa cuví yo nyivi Éfeso —catyí ñi, caná tsa ñi.

<sup>35</sup> Tacan tan ra secretario ñuu can cuví jacutaxin ra nyivi, tan caahán ra tsihin ñi, tan catyí ra:

—Nyooho nyivi ñuu Éfeso ihya, tandihí nyivi tsitó ñi tyin nyaá tsi síqui yo tsa jahá cuenda yo vehe ñuhu ña Diana, tyin cahnu xaan cuví ña. Tan jahá cuenda yo tsitoho ña tsa quee andivi tan nacavá nu ñuhu ihya.

<sup>36</sup> Tan yoñi cuví catyí tyin ña nditsa. Taxin ñi ndo, tan ña ica ndo tatun ña tsitó ndo náa tsa cua javaha ndo.

<sup>37</sup> Tyin ra tsa tsindacá ndo ihya nduve náa tsa suhú ra naha vehe ñuhu yo. Tan ndi ña caahán ra naha ndava ha ñi síqui nyoo yo. <sup>38</sup> Tatun ra Demetrio tan ra tsa jahá tyiñu tsihin ra, tsicán ra naha cuatyí tsaha iin ra, na cuhun ra naha nu nyaá ra juez. Cuví ndacan ra naha cuatyí nuu ra can, tan maa ra cuví jandaa ra cuatyí can. <sup>39</sup> Tan tatun inga tuhun tsicán ndo, cuñí tsi tsa ndaca ndo can tsi ra cumí tyiñu, tumaa cuhva catyí ley.

<sup>40</sup> Tyin tatun coto ra ndacá ñaha tan cana ra tsi yo tsa cuenda tsa cuví ihya, tan ña cua ñihi yo tuhun cahan



yo tatun ndaca tuhun ra tsi yo nacuenda cuvaá yo —catyí ra cuví secretario can.

<sup>41</sup> Tan tsa yahá caḥan ra, tacan tan catyí ra tyin na cunuhu ñi nda yuvehe ñi.

### Nu yahá ra Pablo Macedonia tan cuahán nyico ra nda Grecia

**20** Tsa yahá tsa cuvaá nyivi ñuu Éfeso can, cana ra Pablo tsi tandihí nyivi tsa yihí cuenda ra Cristo, tyin cahan ra juhva tsihin ñi tan cuhva ra tunyee iñi tsi ñi, tyin tsa tsaá quivi tsa cua cuhun ra inga ñuu. Tan caḥan ra tsihin ñi. Tacan tan cuahán ra Macedonia. <sup>2</sup> Tan tsahān ra tandihí ityi can tan tsihin tuhun caahán ra jandu iín ra iñi tandihí nyivi yihí cuenda ra Cristo tsa iyó ityi can. Tacan tan tsaá ra ityi Grecia. <sup>3</sup> Tan ican ndoo ra uñi yoo. Tan tsa nyaá tsa cua quihin ra yutun ndoo tan cuhun ra Siria, tan tsitō ra tyin nducú nyivi Israel tsi ra tyin cua cañi ñi tsi ra. Yacan cuenda tyaá iñi ra tsa cua cuhun ra tsihin tsaha ra ityi nu ñuhu, tan cua yaha nyico ra inga tsaha ityi Macedonia. <sup>4</sup> Tan cuahán ra Sópater, ra ñuu Berea tsihin ra. Tan cuahán ndihí ra Aristarco tan ra Segundo. Tan uvi taahan ra ihya, Tesalónica cuví ñuu ra. Tan cuahán ndihí ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Trófimo. <sup>5</sup> Ra hermano ihya yahá ra naha ityi nuu tan ndatú ra naha tsi ndi nda ñuu Troas. <sup>6</sup> Tan nyuhu ndatú ndi nda tsa yahá vico pascua nu tuhvá nyivi Israel tsatsí paan tsa nduve yutsan iya yihí. Tacan tan quee ndi ñuu Filipos tsihin yutun ndoo. Tan nu tsinu uhun quivi tan titahān ndi tsihin ra tsa cuahán ityi nuu nda ñuu Troas naha ra. Tan ican ndoo ndi utsa quivi.

### Nu caahán ra Pablo tuhun Nyoo ñuu Troas

<sup>7</sup> Tan tsa cuví tumingu can ndu iin ndi tsihin nyivi yihí cuenda ra Cristo ñuu Troas can. Tan quivi can cua catsi ndi paan tan coho ndi vinu tyin nducuhun iñi ndi tyin tsihí ra Cristo tsa cuenda cuatyí yo. Tan ra Pablo caahán ra tsihin ñi, tan tahān ñuu, tyin tsa nyaá tsa cuhun ndi inga quivi can. <sup>8</sup> Yucú ndi iin cuarto nu tsinu uñi pisu. Tan nditsin xaan nu yucú ndi tsitsi vehe can tyin cuaha xaan ñuhū candili cayú. <sup>9</sup> Tan iin ra tyuvaa tsa nañí Eutico nyaá ra ventana tyaá soho ra, maa tyin ña cunyeē iñi ra ñumaahna, tyin ra Pablo, naha xaan caahán ra. Quixí ra Eutico, tan ña tsitō ra canacava ra. Quee ra nda nu tsinu uñi pisu tan canacava ra nda nu ñuhu. Tan cañihí ra hermano naha ra tsi ra, maa tyin tsa tsihí ra. <sup>10</sup> Tacan tan ra Pablo nuu ra tan tsaá ra nu canyí ra tyuvaa can. Tan tyihí jucun ndaha ra tsi ra tyuvaa can, tan catyí ra tsihin tandihí ra hermano naha ra: —Ña nāyuhvi ndo, tyin ra ihya nyito ra —catyí ra.

<sup>11</sup> Tacan tan ndaa nyico ra Pablo tan tsatsí ndi paan tan tsihí ndi vinu. Tan ra Pablo caahán ca maa ra tuhun Nyoo nda cuanda cunditsin. Tsahan cuahán ra. <sup>12</sup> Tan ra tyuvaa can nandotō ra tan cuanuhū ra nda yuvehe ra. Tan si xaan cuñí ñi cuví.

### Nu quitā ra Pablo ñuu Troas tan cuahán ra nda ñuu Mileto

<sup>13</sup> Nyuhu yahá ndi ityi nuu tan cuahán ndi tsihin yutun ndoo nda ñuu Asón. Tyin ican cua ñihí tahan ndi tsihin ra Pablo, tyin tacan jandaā maa ndi tyiñu tsihin ra, tyin maa ra cuñí ra cuhun ra ityi nu ñuhu tsihin tsa-ha ra. <sup>14</sup> Tan tsa ñihí tahan nyico ndi tsihin ra nda ñuu Asón, quihvi ra tsitsi yutun ndoo tsihin ndi tan cuahán ndi nda ñuu Mitilene. <sup>15</sup> Tsa quitā ndi ñuu can tacan tan yahá ndi ityi nuu iin ñuhu luhlu tsa nañí Quío, canyí tsi mahñu ndutya ñuhu. Tan tsa inga quivi can tsaá ndi inga ñuhu luhlu tsa nañí Samos. Yahá ndi ican tan tsaá ndi ñuu Trogilio nu quitatú ndi. Tan tsa inga quivi tsaá ndi nda ñuu Mileto. <sup>16</sup> Tacan cuví tyin ra Pablo ña cuñí ra tsa cunyii naha ra ityi Asia. Tan ña cuñí ra cuhun ra ñuu Éfeso tyin numi ñi cuñí ra tsa ra ñuu Jerusalén, tyin tatun cuhva tsi cuhva, ican nyii ra tan cua coo vico Pentecostés.

### Nu caahán ra Pablo tsihin ra ñuu Éfeso naha ra tyin cua cuhun ra tan ña cua quitsi ca ra

<sup>17</sup> Tan tsa yucú ndi ñuu Mileto, cana ra Pablo tsi ra cuví ityi nuu tsihin nyivi yihí cuenda Nyoo ñuu Éfeso.

<sup>18</sup> Tan tsa tsaá ra naha, tan caahán ra Pablo tsihin ra naha tan catyí ra:

—Maa ndo tsitó ndo nácaa cuhva tsicá yu nda quivi jihna ñi tsa tsaá nuu yu Asia ihya. <sup>19</sup> Tandihí quivi tsa tsinyii yu tsihin ndo tan tyiñu Jutu Mañi yo jahá yu tsihin tsa nducú yu cuhva tsa ña cañu xaan ñi cuví yu, vasu cuaha tundoho tan tucuiihya iñi nyehe yu. Tan cuaha tundoho quitsí siquí yu jahá nyivi Israel. <sup>20</sup> Maa tyin ña jandihí yu tsa caahán yu tuhun Nyoo tsihin ndo. Tyin yacan cuví tandihí tsa tsiñí ñuhu tsi ndo tan coo vaha ndo tsihin Nyoo. Tan jacuahá yu tuhun Nyoo tsi ndo nu ndu iín ndo tan nda yuvehe ndo. <sup>21</sup> Tan jacuahá yu tuhun ihya tsi nyivi Israel tan tsi nyivi tsa ñavin nyivi Israel cuví, na nasama ñi cuhva iyó ñi nuu Nyoo tan na tsinu iñi ñi tsi Jutu Mañi yo, ra Jesucristo. <sup>22</sup> Tan vityin cua cuhun yu nda ñuu Jerusalén tyin maa Tatyí Ii Nyoo catyí. Tan ña tsitó yu náa cua cuví tsi yu ndacan. <sup>23</sup> Maa tyin intuhun ñi tsa tsitó yu tyin tandihí ñi nu cuahán yu, Tatyí Ii Nyoo caahán tsihin yu tyin ndatú vehe caa tsi yu, tan cuaha tundoho cua nyehe yu. <sup>24</sup> Maa tyin ndi intuhun yacan tan ña tsicá iñi yu. Tan ndi ñayivi yu nduve yahvi nyaá can tsa cuenda yu, tyin tacan tan tsihin tsa si cuñí yu tan cuví jañihi ca yu jaha tyiñu yu tsa cuenda Jutu Mañi yo Jesús, tumaa tavā tyiñu ra tsi yu. Tan jañihi ca yu jacuaha yu tuhun vaha nácaa cuñí maa Nyoo tsi yo.

<sup>25</sup> Tan vityin tsitó vaha yu tyin tandihí nyoocho tsa caḥan yu tuhun Nyoo tsihin ndo, ña cua nyehe ca ndo tsi yu. <sup>26</sup> Yacan cuenda cuñí yu cahan yu tsihin ndo vityin tyin nduve ca cuatyí yuhu tsa cuenda ndi intuhun ndo. <sup>27</sup> Tyin ñiñi cuñí yu tan caḥan yu tandihí tuhun Nyoo tsihin ndo tan nduve náa tsa tyihí xeehe yu. <sup>28</sup> Yacan cuenda jaha cuenda ndo tsi ndo. Tan jaha cuenda

ndihí ndo tsi tandihí nyivi yihí cuenda Nyoo. Tyin maa Tatyí Ii Nyoo tava tyiñu tsi ndo na jaha cuenda ndo tsi nyivi tsicá vehe ñuhu Jutu Mañi yo. Maa ra jatá ra tsi ñi tsihin ñiñi ra. <sup>29</sup> Tan tsitó yu tyin quivi cahun yu, cua quitsi inga ra naha. Tan cua cuñi ra naha jativi ra naha tsi nyivi yihí cuenda Jutu Mañi yo. Tumaa lobo xaan tsa tsahñi tsi mbee, tacan cua quitsi ra can naha ra. <sup>30</sup> Tan juvin ñi nu yucú ndo, cua nduvita taahan ra. Tan cua jacuaha ra naha tsi ndo tuhun tsa ña nditsa tyin cunyi-cun ndo tsi ra naha. <sup>31</sup> Yacan cuenda jaha vaha ndo cuenda. Nducuhun iñi ndo tyin tsitsi tsa uñi cuiya ña jandihí yu tsa caahán yu tuhun Nyoo tsihin ndo. Tyin ñiñu tan nduvi caahán yu tsihin intuhun intuhun ndo, tan tsihin tsa cuihya cuñi yu, coto nacoó ihñi ndo tuhun Nyoo.

<sup>32</sup> Tan vityin nyoocho yañi, tyaá yu tsi ndo ndaha Nyoo. Naquihin vaha ndo tandihí tuhun caahán ra tsihin yo. Tyin jacotó ra tsi yo tyin cuñi xaan ra tsi yo. Tan tuhun ra jandunyeé xaan tsi iñi yo tan tsahá tsi tsa cuví yo nyivi vaha tsihin tandihí inga nyivi tsa nacuhva cuenda tsi ñi tsi ra. <sup>33</sup> Yuhu ña nyiyó iñi yu tsa iyó tsi ndi intuhun ndo. Ndi xuhun ndo, ndi jahma ndo. <sup>34</sup> Nyoocho tsitó vaha ndo tyin jahá tyiñu xaan yu tsihin ndaha yu tan ñihí yu tsa tsiñi ñuhu tsi yu tsihin ra tsicá tsihin yu naha ra. <sup>35</sup> Tacan ñi janahá yu tsi ndo tyin cuñi tsi tsa jaha tyiñu ndo tan jatyinyee ndo tsi nyivi iyó náa tsa tsiñi ñuhu tsi ñi. Tan nducuhun iñi ndo tsa caahán Jutu Mañi yo Jesús, nu catyí ra tyehen: “Sii ca cuñi nyivi tsa tsahá, tan ñavin ca nyivi tsa ñihí ndaahvi” catyí Jutu Mañi yo.

<sup>36</sup> Tsa yahá tsa cahán ra Pablo tuhun ihya, tsicuiñi tsiti ra. Tan tsicán tahvi ra tsihin tandihí ra naha. <sup>37</sup> Tan tandihí ra naha nducuihya xaan iñi ra naha tan tsacu xaan ra naha. Tan tsinumí nyaa ra naha tsi ra. <sup>38</sup> Tyin ra Pablo catyí ra tyin cua cahun ra inga ñuu tan ña cua cahun ca ra nu yucú ra naha. Tacan tan tsindacá ra naha tsi ra nda nu quihvi ra tsitsi yutun ndoo.

### Nu cuahán ra Pablo ñuu Jerusalén

**21** Tacan tan nacoó ndi tsi ra hermano naha ra tan quihvi ndi tsitsi yutun ndoo. Tan cuahán ndi ndoo ityi ñi nda Cos, iin ñuhu luhlu tsa canyí mahñu ndutya ñuhu. Tan tsa inga quivi tsaá ndi nda Rodas tsa cuví inga ñuhu luhlu ñi. Tacan tan cuahán ndi nda ñuu Pátara. <sup>2</sup> Tan ñuu Pátara, nyehe ndi inga yutun ndoo tsa cuahán nda Fenicia. Tan quihvi ndi tsitsi can, tacan tan cuahán ndi. <sup>3</sup> Tan ityi nu cuahán ndi, nyehe ndi nu canyí ñuhu Chipre ityi ndaha satyin yo. Tan yahá ñi ndi cuahán ndi ityi nu ca, nda ityi Siria. Tan tsaá ndi nda ñuu Tiro tyin ican cua tava ra naha ndaha tyiñu tsa yihí tsitsi yutun ndoo can. <sup>4</sup> Tan tsa nañihí ndi tsi nyivi yihí cuenda Nyoo ñuu can, ndoo ndi tsihin ñi utsa quivi. Tan catyí ñi tsihin ra Pablo tyin ña taahán tsi tsa cahun ra ñuu Jerusalén tyin tacan cahán Tatyí Ii Nyoo tsihin ñi. <sup>5</sup> Maa tyin tsa quitá utsa quivi can, quitá ndi ñuu can. Tan nu cua quita ndi tandihí ra hermano naha ra tsihin ñasñi ra naha tan tsihin sehe ra naha tsindacá ñi tsi ndi nda cuenda yuhu ñuu. Tan nu nyiti yuhu

ndutya ñuhu can tsicuiñi tsiti ndi, tan tsicán tahvi ndi tsi Nyoo. <sup>6</sup> Tacan tan tsinumí nyaa tahan ndi tsi ndi. Tsahan quihvi ndi tsitsi yutun ndoo. Tan ra hermano can naha ra cuanuhu ra naha yuvehe ra naha.

<sup>7</sup> Tan tsa quee ndi ñuu Tiro, cuahán ndi nda ñuu Tolemaida. Tan ican tsahá ndi nacumi tsi nyivi yihí cuenda ra Cristo. Tan ndoo ndi tsihin ñi iin quivi. <sup>8</sup> Tan tsa inga quivi quitá ndi cuahán ndi nda ñuu Cesarea. Tan ican tsahán ndi vehe ra Felipe, ra tsa jacotó xaan tsi nyivi nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tsa utsa taahan ra naha. Tan ndoo ndi yuvehe ra. <sup>9</sup> Ra Felipe, iyó cumi taahan ñi cuatyí sehe ra tsa ñaha ca tandaha. Tan ndusu yuhu Nyoo cuví ñi. <sup>10</sup> Tan tsa cuaha ñi quivi tsa yucú ndi ican, tan tsaá iin ndusu yuhu nyoo tsa quee nda Judea. Nañi ra Agabo. <sup>11</sup> Quitsi nyehe ra nu yucú ndi. Tan quihvi ra cinturón ra Pablo, tsahñi ra tsaha ra tan ndaha ra, tan catyí ra: —Tatyí Ii Nyoo catyí tsihin yu tyin tyehen cua cunuhñi tsitoho cinturón ihya nda ñuu Jerusalén. Tan cua cuhva cuenda nyivi Israel tsi ra tsi ra inga ñuu naha ra —catyí ra Agabo.

<sup>12</sup> Tsa tsiñi ndi tsa caahán ra, nyuhu tan ra ñuu Cesarea naha ra caahán ndaahvi ndi tsihin ra Pablo na ña cahun ra ñuu Jerusalén. <sup>13</sup> Maa tyin ra Pablo catyí ra: —¿Nacuenda tsacú ndo tan janducuihyá ndo iñi yu? Yuhu nduve cuenda yu. Ndi maa tsa cua cunuhñi yu, ndi maa cahñi ra naha tsi yu, maa tyin cahun yu tyiñu tsa cuenda Jutu Mañi yo Jesús —catyí ra tsihin ndi.

<sup>14</sup> Tan tsa nyehe ndi tyin ña cuví tsa jahá ndi tsi ra, jañá ndi. Tan catyí ndi:

—Na cuvi maa cuhva cuñi Jutu Mañi yo.

<sup>15</sup> Tsa yahá yacan na ica vahá ndi tsi ndi tan cuahán ndi nda ñuu Jerusalén. <sup>16</sup> Tan cuahán taahan ra ñuu Cesarea ra yihí cuenda ra Cristo, tsihin ndi. Tan cuahán tucu iin ra ñuhu Chipre. Nañi ra Mnasón. Cuaha xaan cuiya tsinú iñi ra tsi ra Cristo. Tan tsindacá ra tsi ndi yuvehe ra tsa iyó ñuu Jerusalén tyin cuyucu ndi.

### Nu cua nyehe ra Pablo nu nyí ra Jacobo

<sup>17</sup> Tsa tsaá ndi ñuu Jerusalén, nyivi yihí cuenda ra Cristo sii xaan cuñi ñi caahán ñi tsihin ndi. <sup>18</sup> Tan inga quivi can cuahán ndi tsihin ra Pablo cua nyehe ndi nu nyí ra Jacobo. Tan ican yucú tucu tandihí ra cuví ityi nuu tsihin nyivi vehe ñuhu. <sup>19</sup> Tsahá ra Pablo nacumi tsi ra naha. Yahá can tan nacatyí tuhun ra tandihí nácaa tsatyíñu Nyoo tsi ra nu cahán ra tuhun Nyoo tsihin nyivi tsa ñavin nyivi Israel cuví. <sup>20</sup> Tsa tsiñi ra naha tuhun ihya, jacahnú ra naha tsi Nyoo, tan catyí ra naha tsihin ra Pablo:

—Vaha yañi, nyehé un tyin cuaha xaan nyivi Israel tsinú iñi tsi ra Cristo. Tan tandihí ñi catyí ñi tyin taahán tsi tsa javaha yo cuhva catyí ley tsa tyaá ra Moisés.

<sup>21</sup> Tan ñihí tuhun ñi tyin yoocho jacuahá un tsi tandihí nyivi Israel tsa iyó inga ñuu tyin na ña cuita ca iñi ñi ley tsa jacuahá ra Moisés, tan catyí tucu un tsihin ñi tyin ña cuñi ca tsi tsa cunyaa tuñi Nyoo tsi sehe yí ñi, tan ndi ña cua javaha ca ñi tuhun tsahnu cuhva tsa iyó maa yo tahán tsanaha. <sup>22</sup> ¿Nacaa javaha yo vityin? Tyin

nyivi cua ñihi tuhun ñi tyin tsaḡ un ihya. <sup>23</sup> Vaha taxin ca tsa javaha un tsa cua cahan ndi tsihin un. Ihya iyó cumi taahan rayi tsa nyaá javaha tsa catyi ra tsihin Nyoo tyin cua javaha ra naha. <sup>24</sup> Cyaahan tsihin ra naha na nduvaha un nuu Nyoo tsihin ra naha. Tan tyahvi un tsa taahán tsi tyahvi ra naha. Tacan tan maa ra naha cua xatya ndi ra naha jiñi ra naha cuhva catyi ley. Tan tsa javaha un tacan, tan coto tandiñi nyivi tyin ña ndit-sa tsa caahán ñi siqui un, tyin cua nyehe ñi tyin ña nacoḡ un ley tsa tyaḡ ra Moisés. <sup>25</sup> Tan tsa cuenda nyivi tsa ñavin nyivi Israel cuví, tan tsinu iñi ñi tsi ra Cristo, tsa jacuhun ndi tutu tsi ñi, tan catyi ndi tsihin ñi tyin ña taahán tsi caca xaan iñi ñi tsa cuenda ley can. Catyi ndi tyin ña cua catsi ñi cuñu tsa jamañi nyivi tsi tsitoho. Ndi ña cua catsi ñi niñi quití, tan ndi cuñu quití tsa cavḡ ñi jucun tan ña tsatiñi niñi ti. Tan ndi intuhun ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayi —catyi ra tsahnu vehe ñuhu can naha ra tsihin ra Pablo.

### Nu quitsahḡ caahán yuhu tahan nyivi Israel siqui ra Pablo

<sup>26</sup> Tacan tan tsa tuvj inga quivi tan cuahán ra Pablo tsihin tandiñi tsa cumi taahan ra can naha ra. Tan janduvahḡ ra tsi ra nuu Nyoo iin caa ñi tsihin ra can naha ra. Tacan tan quihvi ra tsitsi vehe ñuhu cahnu tyin jacoto ra cuví jutu ama cundiñi tsa utsa quivi tsa nduvaha tsa cumi taahan ra can naha ra, tan cua jamañi ra tsa jamañi ra nuu Nyoo. <sup>27</sup> Tacan tan tsa cuñi ndiñi tsa utsa quivi can, tan taahan ra Israel tsa quee nda Asia nyehe ra naha tsi ra Pablo tsitsi vehe ñuhu. Tan cuvaḡ xaan tandiñi nyivi jahḡ ra naha, tan tñin ra naha tsi ra Pablo. <sup>28</sup> Tan caná tsaa ra naha tan catyi ra naha:

—Nyooho nyivi Israel, jatyinyee ndo tsi ndi. Juvín ra ihya cuví ra tsa tsicá nuu tandiñi ñi ityi. Tan jacuahá ra tsi tandiñi nyivi. Catyi ra tyin ña vaha cuhva iyó yo. Tan catyi ra tyin ña vaha ley tsa tyaḡ ra Moisés, tan ña vaha vehe ñuhu ihya. Tan inga tucu tuhun tyin tyihj ra tsi juhva ra Grecia naha ra tsitsi vehe ñuhu yo tan ihya nu ii cuví tsi tan vatsi jativí ra naha —catyi ra naha caná tsaa ra naha.

<sup>29</sup> Tacan catyi ra naha tyin nda nu quitsi tsi nyehe ra naha tsi ra Pablo tsitsi ñuu, tsicá nuu ra tsihin iin ra ñuu Éfeso tsa nañi Trófimo. Tan cuñi maa ra naha tyin ra Pablo tsindacḡ tsi ra tsitsi vehe ñuhu. <sup>30</sup> Tan tandiñi nyivi ñuu quitsahḡ cuvaá ñi. Tan tsinú xaan ñi tsaḡ ñi. Tacan tan tñin ñi tsi ra Pablo. Tan ixtḡ caa ñi tsi ra cua ndaca ñi ityi tsata vehe ñuhu, tan numi ñi nacasiñi yu-vehe ñuhu can. <sup>31</sup> Tsa cuñi cahñi ñi tsi ra, tan ñihj tuhun ra comandante cuenda andaru tyin tandiñi nyivi ñuu Jerusalén iyo xaan caahán yuhu tahan ñi. <sup>32</sup> Tacan tan ra comandante can jandu iin ra tsi ra capitán naha ra tan tsihin andaru naha ra. Tan tsinú ra naha cuahán ra naha nu yucú nyivi. Cuhva tsa nyehe ñi tsi ra comandante can tsihin andaru can naha ra, jañḡ ñi tsa cañi ñi tsi ra Pablo. <sup>33</sup> Tacan tan natuhvḡ ra comandante can nu nyií ra Pablo. Tan tavḡ tyiñu ra tsi andaru naha ra tyin na tñin ra naha tsi ra, tan na cuhñi ra naha

tsi ra tsihin uvi taahan cadena. Yahḡ can tan tsicḡ tuhun ra comandante can tsi ra yóo ra cuví ra, tan náa javahḡ ra. <sup>34</sup> Maa tyin nyivi siin siin tuhun caná tsaa ñi. Tan ra comandante can ña cutuñi maa iñi ra tsa cuenda tsatyin ñihi xaan cuvaá jahá ñi. Tan tavḡ tyiñu ra tsi andaru tyin cundaca ra naha tsi ra Pablo nda vehe nu yucú andaru. <sup>35</sup> Cuhva tsa tsaḡ ra naha nu cuayi vehe can, tan quitsahḡ nducañá nyivi tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra. <sup>36</sup> Tyin tandiñi ñi nyicún ñi tsi ra naha, tan caná tsaa ñi tan catyi ñi:

—¡Na cúu ra! —catyi ñi.

### Nu juvín ñi maa ra Pablo jacacú tsi ra nuu nyivi

<sup>37</sup> Cuhva tsa cua tyihj ra naha tsi ra Pablo tsitsi vehe can, tan quitsahḡ caahán ra tsihin ra comandante: —¿A cuhva un tsa cahan yu tsihin un? —catyi ra tsihin ra.

Tan ra comandante can catyi ra tsihin ra:

—¿A cuví caahán un yuhu griego? <sup>38</sup> Tun tacan caa, ñavin yoocho cuví ra ñuu Egipto tsa quitsi quivi can tan jacañi tahan ra tsi nyivi siqui ra ndacá ñaha tan tavḡ ra cumi mil ra tsahñi ndiyi tsindacḡ ra tsi ra naha ityi ñuhu ityi —catyi ra comandante can tsihin ra Pablo.

<sup>39</sup> Tacan tan ra Pablo catyi ra tsihin ra:

—Yuhu ra Israel cuví yu tan cacu yu ñuu Tarso tsa cuví iin ñuu cahnu ityi Cilicia. Maa tyin jaha tumañi iñi cyhva un ndatu cahan yu luxu tsihin nyivi —catyi ra Pablo tsihin ra comandante.

<sup>40</sup> Tacan tan tsa tsahḡ ra comandante can ndatu tsi ra, nduvita nyityi ra nu cuayi can tan javahḡ ra iin seña tyin na cutaxin ñi. Tan tsa cutaxin nyivi quitsahḡ caahán ra tsihin yuhu hebreo, tan catyi ra:

**22** —Nyooho tata, tan nyoocho yañi, tyaḡ soho ndo tsa cua cahan yu tsihin ndo tyin cuñi yu tsa coto ndo tyin yuhu nduve cuatyí yu iyó —catyi ra Pablo tsihin nyivi can.

<sup>2</sup> Tsa tsiñi ñi tsa caahán ra tsihin ñi tsihin yuhu hebreo, taxin cuiñi ña tsinyacu ñi. Tan ra Pablo catyi ra:

<sup>3</sup> —Yuhu ra Israel cuví yu tumaa maa ndo. Tan cacu yu ñuu Tarso tsa canyí Cilicia. Maa tyin Jerusalén ihya tsahnu yu. Tan ra Gamaliel jacuahḡ ra tsi yu nácaa tyaḡ yahvi yu ley tsii tsaahnu yo. Tan tacan ñi nducú yu cuhva javahá yu tyiñu nuu Nyoo tsihin tsa ñi iñi yu, tumaa tsa javahá ndo vityin ihya. <sup>4</sup> Yuhu, nu quitsi tsi tsinyacḡ ndaha yu tsi nyivi yihí cuenda ra Cristo. Tan tsindacḡ yu tsi ñi tsa cúu ñi. Tan cuaha ñi rayi tan ñaha tñin yu tsa cuhun ñi tsitsi vehe caa. <sup>5</sup> Ra jutu tsaahnu tsa cuví ityi nuu tsihin ra cuví mandoñi naha ra, cuví ra naha tsandaa tyin ra ican naha ra tsahḡ tutu tsi yu tyin cuví tñin yu tsi ra yañi yo, ra yihí cuenda ra Cristo ñuu Damasco. Tsahḡ yu ican tsinanducy yu tsi nyivi tsinú iñi tsi ra Cristo, tyin cua cunuhñi ñi tsihin cadena, tan cua quitsi ndaca yu tsi ñi nda ñuu Jerusalén ihya tyin tatsi tuñi ra tsahnu naha ra tsi ñi.

**Nu nacatyí tuhun ra Pablo nácaa natsinü iñi ra tsi ra Cristo**

(Hechos 9.1-19; 26.12-18)

<sup>6</sup>Maa tyin cuhva tsa cuahán yu ityi tsa cua tsa yu ñuu Damasco, maa ora cuví tsi. Tan sana iñi yu tan ndunditsin taniñ cahnu nu cuahán yu jahá iin ñuhu tsa quitsi ityi andivi. <sup>7</sup>Tacan tan nduvá yu nu ñuhu. Yahá can tan tsiñi yu iin ndusu tsa caahán tsihin yu tan catyí tsi: “Saulo, Saulo, ¿nacuenda nyaá ndaha un tsi yu?” catyí ndusu can tsihin yu. <sup>8</sup>Tacan tan tsicá tuhun yu tsi ra tan catyí yu: “¿Yóo yooho cuví un, taa?” Tan catyí ra tsihin yu: “Yuhu cuví ra Jesús, ra ñuu Nazaret, ra tsa nyaá ndaha un” catyí ra. <sup>9</sup>Tandihi ra tsa cuahán tsihin yu nyehé ra naha ñuhu can, tan nayuhvi xaan ra naha. Maa tyin ña tsiñi ra naha ndusu tsa cahán tsihin yu. <sup>10</sup>Tacan tan quitsahá caahán yu tsihin ra tan catyí yu: “Jutu Mañi yu, ¿náa taahán tsi javaha yu?” Tan catyí ra tsihin yu: “Nduvita tan cuhun un nda ñuu Damasco. Tan ican cua cahan iin ra tsihin un tandihi tsa taahán tsi javaha un” catyí Jutu Mañi yo tsihin yu. <sup>11</sup>Tan cuaá yu jahá ñuhu can, yacan cuenda ra tsa cuahán tsihin yu tñn ra naha ndaha yu tan cuahán ndi nda ñuu Damasco.

<sup>12</sup>Tan ican iyó iin ra tsa nañi Ananías. Tan jacahnú xaan ra tsi Nyoo cuhva catyí ley tsa tyaá ra Moisés. Tan tandihi nyivi Israel tsa iyó ñuu Damasco catyí ñi tyin vaha xaan iñi ra. <sup>13</sup>Tsahán ra can tsinyehé ra tsi yu. Tan cuhva tsa tsaá ra, catyí ra tsihin yu: “Yañi Saulo, nanyehé inga tsaha” catyí ra tsihin yu. Tan juvin ñi cuhva can tan nanyehé yu. Tan cuví nyehé yu tsi ra. <sup>14</sup>Tan catyí ra tsihin yu: “Nyoo cuenda jutu yo nacatsi ra tsi un nda tsanaha, tyin coto un cuhva cuñí ra, tan nyehé un tsi ra Jesucristo tyin ra vaha cuví ra, tan cuñi un ndusu ra. <sup>15</sup>Tyin yooho cua cahan un tuhun ra nuu tandihi nyivi. Cua nacatyí tuhun un tsa nyehé un tan tsa tsiñi un. <sup>16</sup>Tan vityin, ña cuatu ca un. Nduvita tan cõndutya un. Tan ndacan tahvi un tsi Jutu Mañi yo tyin na jaha ra tucahnu iñi cuatyí un” catyí ra Ananías tsihin yu —catyí ra Pablo tsihin ñi.

**Nu nacatyí tuhun ra Pablo nácaa tsahá Nyoo tyiñu tsi ra tyin cuhun ra inga ñuu cucahan ra tuhun ra Cristo**

<sup>17</sup>Yahá can tan vatsí nuhu yu ñuu Jerusalén ihya tan cuhva tsa tsaá yu, tsahán yu vehe ñuhu cahnu tsindacan tahvi yu tsi Jutu Mañi yo. Tan janahá ra iin tsa nyehé yu. <sup>18</sup>Nyehé yu tsi ra. Tan catyí ra tsihin yu: “Janumi. Quita ñi ñuu Jerusalén ihya tyin ña cua tsinu iñi nyivi tuhun yu tsa cahan un” catyí ra tsihin yu. <sup>19</sup>Tacan tan quitsahá caahán yu tsihin ra tan catyí yu: “Jutu Mañi yu, maa ñi tsitó ñi tyin yuhu tsahán yu tandihi vehe ñuhu. Tan tñn yu tsi ñi tsa tsinú iñi tsi un, tan tyihí yu tsi ñi vehe caa tan cañi yu tsi ñi. <sup>20</sup>Tan quivi tsa tsihi ra Esteban ra tsa cahán cuenda un, yuhu nyíi ndihi yu ican. Tan ndoo yu vaha tsa tsahñi ra naha tsi ra. Tan jahá cuenda yu jahma ra can naha ra” catyí yu tsihin Jutu Mañi yo. <sup>21</sup>Tacan tan catyí ra tsihin yu: “Cyaahan, tyin maa yu jacuhún tsi un. Cañi xaan cua cuhun un tyin

cua cuhun un nda nu iyó nyivi tsa ñavin nyivi Israel cuví” catyí Jutu Mañi yo tsihin yu.

**Nu nyaá ra Pablo ndaha ra comandante cuenda ñuu Roma**

<sup>22</sup>Tyaá soho ñi yacan ña tan quitsahá caná tsa ñi tan catyí ñi:

—¿Cahñi ndo tsi ra! Tyin ña taahán ca tsi tsa coo ra ñayivi —catyí ñi.

<sup>23</sup>Tan caná tsa ca ñi. Tan javicó ñi jahma ñi. Tan javitá ñi nyahyu nu tatyí tsa cuenda tsa xaan xaan cuñí ñi. <sup>24</sup>Yacan cuenda ra comandante can catyí ra tsihin ra andaru can naha ra tyin na cundaca ra naha tsi ra Pablo tsitsi vehe can. Tan catyí ra tyin na cañi ra naha tsi ra, tyin tacan tan cua cahan ra tsa nditsa nacuenda tsa caná tsa nyivi tsata ra. <sup>25</sup>Maa tyin tsa yahá tsahñi ra naha tsi ra tan cua cañi ra naha tsi ra, tacan tan ra Pablo cahán ra tsihin ra capitán tsa nyaá nyityi ican tan catyí ra:

—¿A iyó ndatu tsi nyooho tsa cañi ndo tsi yu? Tan yuhu ra cuenda ñuu Roma cuví yu tan inga tucu tuhun, ñaha ca jaqueé yuhu ra juez tsi yu, tan cuñí ndo cañi ndo tsi yu —catyí ra Pablo tsihin ra.

<sup>26</sup>Tsa tsiñi ra capitán tsa caahán ra Pablo, tsahán ra tsijacotó ra tsi ra cuví comandante. Tan catyí ra tsihin ra:

—Jaha cuenda tsi un tsihin tsa javahá un. Tyin ra can, ra ñuu Roma cuví ra —catyí ra tsihin ra.

<sup>27</sup>Tacan tan ra comandante can cuahán ra nu nyíi ra Pablo. Tan tsicá tuhun ra tsi ra tatan nditsa tyin ra ñuu Roma cuví ra. Tan ra Pablo catyí ra:

—Juvín.

<sup>28</sup>Tacan tan catyí ra comandante can tsihin ra:

—Yuhu cuaha xaan xuhun tyahvi yu tan cuví cuy yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu tsa cuenda jutu yu —catyí ra.

<sup>29</sup>Tacan tan andaru tsa cua cañi tsi ra jatsiyó nyaha ra naha tsi ra naha nu nyíi ra Pablo. Tan nda cuanda ra comandante tan nayuhvi ra tsa cuenda tsa tsahñi ra tsi ra tsihin cadena. Tyin tsa javahá ra tsa tacan tsihin iin ra ñuu Roma cuatyí cuví can.

**Nu tsahán ra Pablo nu ndu iin ra ñuu Israel naha ra**

<sup>30</sup>Tan tsa tuví inga quivi can tan ra comandante can cuñí ra coto ra náa cuatyí tyaá nyivi Israel tsi ra Pablo. Tan jañá ra tsi ra Pablo. Tan tavá tyiñu ra na ndu iin tandihi ra jutu tsa cuví ityi nuu naha ra, tan tsihin tandihi ra cumí tyiñu cuenda nyivi Israel. Tacan tan tavá tyiñu ra na quita ra Pablo vehe caa tan cuhun ra nu iyó junta can.

**23** Tan ra Pablo nyehé ra tsi tandihi ra tsa ndu iin can naha ra, tan catyí ra tsihin ra naha:

—Nyooho yañi, tandihi quivi nda cuanda vityin nducú yu cuhva javaha yu cuhva cuñí Nyoo. Yacan cuenda vaha cuñí yu —catyí ra Pablo.

<sup>2</sup> Tacan tan ra Ananías, ra jutu tsaahnu tsa yihí ndaha tsi inga ca ra naha, tavā tyiñu ra tsi ra nyecú yatyin ñi nu nyaá ra Pablo, na cañi ndaha ra naha yuhu ra. <sup>3</sup> Tan ra Pablo nacahan ra tan catyí ra:

—jihanna ca tsi maa un cua cañi Nyoo, tyin jahá xaan un tyin ra vaha cuví un nyaá un juvin! ¿A cutuñi yu nuu un tumaa cuhva catyí ley? ¿Nacuenda tsa tavā tyiñu un na cañi ra naha tsi yu? Tan ñavin tacan catyí ley —catyí ra Pablo.

<sup>4</sup> Tacan tan ra nyecú ican catyí ra naha tsihin ra:

—Ña vaha tsa caahán un tacan tsihin ra jutu tsaahnu tyin cahnu cuví ra nuu Nyoo —catyí ra naha tsihin ra Pablo.

<sup>5</sup> Tacan tan ra Pablo catyí ra:

—Yañi, ña tsitó yu tatun ra ihya cuví ra jutu tsaahnu. Tyin catyí tuhun Nyoo tyin ña cahan nyaá yo tsi ra yihí ndaha ñuu yo —catyí ra.

<sup>6</sup> Tacan tan tuví iñi ra Pablo tyin juhva ra cuenda junta can naha ra, yihí ra cuenda ityi ra cuví saduceo naha ra. Tan juhva ra naha yihí cuenda ra cuví fariseo naha ra. Tacan tan cahan ra tsihin tsa ñihi ndusu ra tan catyí ra:

—Nyooho yañi, yuhu ra fariseo cuví yu tumaa jutu yu. Tan tatsí tuñi ndo tsi yu tsatyin tsinú iñi yu tyin nyivi tsa tsihi nandoto ñi —catyí ra Pablo.

<sup>7</sup> Cuhva tsa cahan ra tuhun ihya, ra tsa cuví fariseo naha ra tan ra saduceo naha ra, quitsahā caahán yuhu tahan ra naha tan natahvī sava ra naha. <sup>8</sup> Tyin ra saduceo catyí ra naha tyin ña cua nandoto nyivi tsa tsihi. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsinú iñi ra naha tandihi tuhun ihya. <sup>9</sup> Tandihī ra naha quitsahā caná tsaa ra naha. Tan nduvitā juhva ra cuví maestro cuenda ley tsa tyaa ra Moisés tsa cutahán tsihin ra fariseo naha ra, tan catyí ra naha:

—Nyēhe ndo, nduve tsa ña vaha javahá ra ihya, tyin tatun ángel cahan tsihin ra, jaha yo cuenda tyin ña vaha cahan yo siqui Nyoo —catyí ra naha.

<sup>10</sup> Tsa tsiñi tandihī ra naha yacan, quitsahā nduvaá nyico ra naha. Nda cua nayuhvī ra comandante can co to cahnya cuatyí ra naha tsi ra Pablo. Yacan cuenda tavā tyiñu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru. <sup>11</sup> Tan tsacuaa can quituvī Jutu Mañi yo nuu ra Pablo tan catyí ra tsihin ra:

—Jāndu iin iñi un, Pablo. Tyin tumaa caahán un tuhun yu ñuu Jerusalén ihya, tacan cua cahan tucu un nda ñuu Roma —catyí Jutu Mañi yo tsihin ra Pablo.

### Nu ndoo ra Israel naha ra tyiñu tyin cua cahñi ra naha tsi ra Pablo

<sup>12</sup> Tsa inga quivi, juhva ra Israel natuhun tahan ra naha tan ndoo ra naha tyiñu. Tan catyí ra naha tyin ña cua catsi ra naha, tan ndi ña cua coho ra naha nda cuanda cahñi ra naha tsi ra Pablo. Tan ndáa ra tsa ña cua javaha tacan, na janaa Nyoo tsi ra naha, catyí ra naha. <sup>13</sup> Yaha uvi xico ra naha ndoo ra naha tyiñu ihya. <sup>14</sup> Tsañan ra naha nu yucú ra jutu tsa cuví ityi nuu naha

ra tan tsihin ra cuví mandoñi cuenda nyivi Israel naha ra. Tan catyí ra naha tsihin ra naha:

—Nyuhu natuhun tahan ndi tan cahan ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatun ña cua javaha ndi tumaa cuhva catyí ndi.

<sup>15</sup> Tan vityin nyooho jācoto ndo tsi ra comandante. Catyí ndo tsihin ra na quitsi ndaca ra tsi ra Pablo nuu ndo ityaan. Catyí ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsaa ra ihya, cua cahñi ndi tsi ra —catyí ra naha tsihin ra jutu naha ra.

<sup>16</sup> Maa tyin sehe cuhva ra Pablo tsiñi ra tsa natuhun tahan ra naha. Tan tsañan ra vehe andaru nu nyií ra Pablo tsicatyí tuhun ra tsihin ra. <sup>17</sup> Tacan tan ra Pablo canā ra tsi iin ra capitán. Tan catyí ra tsihin ra:

—Cundaca tsi ra luhlu ihya nuu ra comandante tyin iyó tsa cuñi ra cahan ra tsihin ra —catyí ra Pablo tsihin ra capitán.

<sup>18</sup> Tacan tan tsindaca ra capitán can tsi ra luhlu can nuu ra comandante. Tan catyí ra tsihin ra:

—Ra Pablo tsa nyií vehe caa canā ra tsi yu tan catyí ra tsihin yu tyin quitsi ndaca yu tsi ra luhlu ihya tyin cuñi ra cahan ra tsihin un.

<sup>19</sup> Tacan tan ra comandante tñin ra ndaha ra luhlu can tan tavā siin ra tsi ra tan catyí ra tsihin ra:

—¿Náa cuñi un cahan un tsihin yu?

<sup>20</sup> Tan ra luhlu can catyí ra tsihin ra:

—Ra Israel ndoo ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñi maa un tyin cua jandaa ra naha tyiñu tsa cuenda ra Pablo. <sup>21</sup> Maa tyin ña cua tsinu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahan ra naha tsihin Nyoo tyin tsitsi tsa ña cua cahñi ra naha tsi ra Pablo, ña cua catsi ra naha tan ña cua coho ra naha. Tan tatun ña cuvi cahñi ra naha tsi ra, vaha taxín ca na cúu tandihī maa ra naha, catyí ra naha. Tan vityin ndatú ra naha nácaa cua cahan un —catyí ra luhlu can.

<sup>22</sup> Tacan tan catyí ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyivi. Yaha can tan jacunuhū ra tsi ra luhlu can.

### Nu cacū ra Pablo ndaha ra Israel naha ra tan cuahán ra nuu ra ndacá ñaha tsa nañi Félix

<sup>23</sup> Tacan tan ra comandante canā ra tsi uvi taahán capitán, tan catyí ra tsihin ra naha:

—Jānduvaha ndo tsi ndo tyin cuhun ndo ñuu Cesarea cuhva caa iin tsa tsacuaa. Cua cuhun uvi cientu andaru tsihin tsaha ra naha, tan uñi xico utsi ra naha tsihin cuayu, tan uvi cientu ra naha cua cuiso lanza.

<sup>24</sup> Jānduvaha ndo cuayu coso ra Pablo. Tan jāha cuenda vaha ndo tsi ra ityi cuhun ndo na tsaa vaha ra nu nyaá ra Félix, ra ndacá ñaha —catyí ra comandante tsihin ra capitán can naha ra.

<sup>25</sup> Tacan tan javahā ra iin carta cundaha ra naha nacuhva ra naha tsi ra Félix. Tan tuhun tsa tyaa ra nu carta, cuví tuhun ihya:

“Yuhu ra Claudio Lisias jaquitsí yu carta ihya tsi un, tyin vaha xaan nyívi cuví un. Ihya vatsí nacumi tsi un.

<sup>27</sup> Ra Pablo ihya, tñin ra Israel naha ra tsi ra. Tan cuñí ra naha cahñi ra naha tsi ra. Maa tyin cuhva tsa tsito yu tyin ra ñuu Roma cuví ra, tsahān yu tsihin andaru tan jacacū yu tsi ra. <sup>28</sup> Tan cuñí yu coto yu náa cuatyí tyaá nyívi tsi ra, tsindacā yu tsi ra nu iyó junta tandihí ra cuví mandoñi nyívi Israel. <sup>29</sup> Tan nyehē yu tyin xaan xaan cuñí nyívi Israel nyehé ñi tsi ra tyin ña tyaá yahvi ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihí yo tsi ra vehe caa. <sup>30</sup> Maa tyin ñihí tuhun yu tyin ra Israel nducú cahñi ra naha tsi ra, yacan cuenda jaquitsí yu tsi ra nuu yooho. Tan catyí tucu yu tsihin ra tsa xicó ñaha tsi ra, na quitsi ndihí ra naha nu nyaá un na cahan ra naha cuatyí ra nuu maa un”, catyí ra Claudio tsihin ra Félix nu carta tsa javahā ra.

<sup>31</sup> Tacan tan quihñin ra naha tsi ra Pablo tumaa cuhva catyí ra Claudio tsihin ra naha, tan juvin ñi tsacuaa can tsindacā ra naha tsi ra nda ñuu Antípatris. <sup>32</sup> Tsa inga quívi, ra tsa cuahán tsihin tsaha, sava ityi ñi tsahān ra naha, tan tsaā nuhu ra nda vehe nu yucú ra naha. Tan ra tsa yosó cuayu can naha ra cuahán ra can naha ra tsihin ra Pablo nda ñuu Cesarea. Tan cuhva tsa tsaā ra naha, nacuhvá ra naha carta can tsi ra Félix, tan tsahā cuenda ndihí ra naha tsi ra Pablo tsi ra. <sup>34</sup> Tsa yahā tsa cahví ra Félix carta can, quitsahā tsicá tuhun ra tsi ra Pablo nu maa cuví ñuu ra. Tan tsa tsitō ra tyin ra Cilicia cuví ra. <sup>35</sup> Tan catyí ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyí un —catyí ra tsihin ra.

Tacan tan tavā tyiñu ra na jaha cuenda andaru naha ra tsi ra nda vehe tyiñu tsa javahā ra Herodes tahān tsanaha.

#### Nu cutuñí ra Pablo nuu ra Félix

**24** Yahā uhun quívi tan ra Ananías, ra jutu tsaahnu tsa yihí ndaha inga ca ra jutu, tsaā ra ñuu Cesarea can tsihin taahan ra cuví mandoñi naha ra, tan tsihin iin ra tsa nañi Tértulo. Ra tsa caahán ndaahvi tsaha nyívi cuví ra. Tsaā ra can naha ra nuu ra Félix tyin cua ndacan ra naha cuatyí tsaha ra Pablo. <sup>2</sup> Tacan tan tavā tyiñu ra Félix na quitsi ndaca andaru tsi ra Pablo. Tacan tan quitsahā tsicán ra Tértulo cuatyí tsaha ra. Tan catyí ra tsihin ra Félix:

—Tyahvi nyoo tsi un, tata. Tyin taxin ñi iyó ñuu ndi, tan vaha iyó ndi tyin yihí ndaha vaha un nyívi ñuu ndi. <sup>3</sup> Nacuhvá xaan ndi tyahvi nyoo tsi yooho tata Félix, tyin vaha xaan iñi un. <sup>4</sup> Tan ña cuñí yu jatyañu yu tsi un tsihin tsa cuaha tuhun cua cahan yu, yacan cuenda tsicán yu tumañi iñi tsi un na cuhva un ndatu cahan ndi luxu. <sup>5</sup> Tyin tsitó ndi tyin rayii ihya ñavin ra vaha cuví ra. Tandihí ñi ityi jacuvaá ra tsi nyívi Israel. Tan juvin ra cuví ityi nuu tsihin nyívi tsa nyicún tsi ra Jesús ra ñuu Nazaret. <sup>6</sup> Tan cuñí ra javaha ra tsa ndavaha ñi tsitsi vehe ñuhu cahnu. Tan yacan cuenda tñin ndi tsi ra, tyin tatsi tuñi ndi tsi ra tumaa cuhva catyí ley maa ndi. <sup>7</sup> Maa tyin ra Licias, ra cuví comandante ñihí xaan

tyasí ra tan quihñin nyaa ra tsi ra tsi ndi. <sup>8</sup> Tan catyí ra tyin tun cuñí ndi ndacan ndi cuatyí tsaha ra, cuñí tsi tsa cahan jihna ndi tsihin un. Yacan nyehē maa un vityin. Janahma un tsi ra tan coto un tyin nditsa tsa caahán ndi —catyí ra Tértulo.

<sup>9</sup> Tacan tan ra Israel tsa yucú ican, catyí ra naha tyin tandihí maa tsa caahán ra Tértulo tan nditsa. <sup>10</sup> Tacan tan ra Félix janahā ndaha ra nu nyaá ra Pablo tyin nacahan ra. Tan ra Pablo quitsahā caahán ra tan catyí ra:

—Siñ xaan cuñí yu tyin nuu maa un cua cutuñi yu vityin tyin tsitó yu tyin tsa cuaha xaan cuiya ndacá ñaha un tsi nyívi iyó ñuu ihya. <sup>11</sup> Tatun cua nducu tuhun un, cua coto un tyin tsa iyó ñi utsi uvi quívi tsa tsahān yu ñuu Jerusalén tsijacahnū yu tsi Nyoo. <sup>12</sup> Tan ña cahān yuhu tahan yu tsihin ndi intuhun nyívi. Tan ndi ña jacuvaā yu tsi ñi tsitsi vehe ñuhu cahnu. Nduve maa náa javahā yu tandihí ca vehe ñuhu, tan ndi inga ca ityi tsitsi ñuu. <sup>13</sup> Tan cuatyí tsa tyaá ra ihya naha ra siquí yu, ña nditsa. Tyin tandihí maa tsa caahán ra tan ñavin tsa nditsa cuví tsi. <sup>14</sup> Maa tyin tsa cua catyí yu tsihin un cuví tsehe: tyin yuhu jacahnú yu tsi Nyoo. Juvin ra tsa jacahnū tsi tsaahnu yu. Tan jacahnú yu tsi ra tumaa cuhva jacuahá ra Jesucristo. Tan ra ihya naha ra catyí ra naha tyin ña nditsa. Maa tyin yuhu tsitó yu tyin tsa nditsa cuví tsi. Tyin tandihí tsa nyaá nu libru ley tsa tyaā ra Moisés, tan tsinú iñi yu. Tan tandihí tsa tyaā ra cuví ndusu yuhu Nyoo tan tsinú iñi yu. <sup>15</sup> Tan tsinú iñi yu tumaa tsa tsinú iñi ra ihya naha ra tyin nyívi tsa tsihi cua nandoto ñi inga tsaha, tahan ñi nyívi vaha tan nyívi caquiñi. <sup>16</sup> Tan yacan tacan ñi nducú yu cuhva tsa javaha yu tsa vaha nuu Nyoo, tan nuu nyívi.

<sup>17</sup> Tan tsa yahā juhva cuiya tsa tsicā yu tandihí ñi ityi, tsahan tsaā nuhu yu nda Israel ñuu yu tyin nacuhva cuenda yu xuhun tsa tsahā nyívi tsi yu tsi nyívi ndaahvi tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo. <sup>18</sup> Yacan javahá yu tsitsi vehe ñuhu cahnu. Tan tsa yahā tsa janduvahā yu tsi yu tumaa catyí ley ndi, tan juhva ra Israel ra tsa queē ityi Asia, nyehē ra naha tsi yu ndacan. Maa tyin nduve nyívi cuaha yucú, tan nduve náa javahā ñi. <sup>19</sup> Tan ra tsa nyehē tsi yu ndacan naha ra, taahán tsi tsa quitsi maa ra naha cahan ra naha náa cuví tsa javahā yu o náa cuatyí tyaá ra naha siquí yu. <sup>20</sup> Tatun ña tacan, na catyí tuhun ra tsa nyecú ihya naha ra tatun náa iin cuatyí yu nañihí ra naha quívi janahmā ra cuví ityi nuu tsihin nyívi Israel naha ra tsi yu. <sup>21</sup> ¿A ñavin cuenda tsatyin cahān yu iin tuhun tsihin ra tsa yucú junta can? Tan catyí yu: “¿A tatsi tuñi ndo tsi yu tsa cuenda tyin tsinú iñi yu tsa nandoto nyívi tsa tsihi?” —catyí ra Pablo.

<sup>22</sup> Tan tsa tsiñi ra Félix tsa cahān ra tacan, tan catyí ra tsihin ra tsa nyecú can:

—Ña cua jandaa naha yu tyiñu ndo vityin. Ndaha ñi nda quitsi ra comandante Lisias tan cua jandaa yu tuhun ihya —catyí ra.

Cahān ra tacan tyin tsitó ra nácaa cuahán tuhun nyívi nyicún tsi ra Cristo.

<sup>23</sup> Tacan tan tavā tyiñu ra Félix tsi ra capitán na tinyii nyico ra tsi ra Pablo vehe caa. Maa tyin ña ñihí xaan

cua jaha cuenda ra tsi ra. Tan na cuhva ra ndatu na cuhun ra vaha iñi tsi ra nu nyíí ra, tan cahan ra naha tsihin ra.

<sup>24</sup> Tsa yahā juhva quiví tan tsaā nyico ra Félix inga tsaha tsihin ña Drusila ñasíhi ra. Tan ñaha Israel cuví ña. Tan tava tyiñu ra na quitsi ra Pablo tyin cuñí ñi tyaa soho ñi nácaa tuhun tsa tsinú iñi ra tsi ra Jesucristo.

<sup>25</sup> Tan ra Pablo quitsahā caahán ra tuhun nácaa taahán tsi javaha yo tsa vaha cuhva cuñí Nyoo, tan ña cuví javaha yo tsa ña vaha tsa cuñí cuñu ñuhu yo. Tan coo quiví cua tatsi tuñi Nyoo tsi tandihí nyivi. Tan ra Félix nayuhví xaan ra, tan catyí ra tsihin ra:

—Cuaahan vityin. Tan na nuña jihna yu, tan cana maa yu tsi un inga tsaha —catyí ra tsihin ra.

<sup>26</sup> Tan ra Félix cuñí maa ra tyin ra Pablo cua cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra. <sup>27</sup> Tan tsa yahā uvi cuiya, tacan tan nacosō tyiñu tsi ra Porcio Festo tyin cundaca ñaha ra. Tyin tsa quitā ra Félix. Tan ra Félix ña cuñí ra tsa cahan nyivi Israel tsi ra, yacan cuenda nacoō ra tsi ra Pablo vehe caa.

#### Nu jandaá ra Festo cuatyí ra Pablo

**25** Tan tsa quihví ra Festo tsa cua jaha tyiñu ra, tacan tan tsa tsinu uñi quiví quitā ra ñuu Cesarea can tan cuahán ra nda ñuu Jerusalén. <sup>2</sup> Tan tsa tsaā ra ñuu Jerusalén, tacan tan tsaā ra jutu tsa cuví ityi nuu, tan ra cumí tyiñu tsa yihí ndaha tsi nyivi Israel. Tan tsicān ra naha cuatyí tsaha ra Pablo. <sup>3</sup> Tan tsicān ra naha tumañi iñi cahnu tsi ra Festo. Tan catyí ra naha tyin na tava tyiñu ra Festo na quitsi nyico ra Pablo nda ñuu Jerusalén. Tyin ra ican naha ra cua tava tyiñu ra naha na cucahñi ra naha tsi ra Pablo ityi cua quitsi ra. <sup>4</sup> Maa tyin ra Festo nacahān ra, tan catyí ra:

—Ra Pablo nyíí ra vehe caa nda ñuu Cesarea. Tan yuhu tyaá yu cuhva tsa yatyi ñi cua cunuhu nyico yu. <sup>5</sup> Yacan cuenda, nyooho tsa cuví ndo ra cumí tyiñu ñuu ihya, cuví cuhun ndo tsihin yu, tan ndacan ndo cuatyí tsaha ra tatun iyó tsa ña vaha javahā ra —catyí ra Festo tsihin ra naha.

<sup>6</sup> Tacan tan ra Festo ndoō ra ñuu Jerusalén una quiví o utsi quiví ñi tan cuanuhū nyico ra nda ñuu Cesarea. Tan tsa inga quiví tsaā ra tsitsi vehe tyiñu ra tan tsinyaā ra tsa cua tatsi tuñi ra tsi ra iyó cuatyí naha ra. Tacan tan tava tyiñu ra na quitsi ra Pablo. <sup>7</sup> Cuhva tsa quihví ra Pablo, nu yucú ra naha natuhvā ra Israel tsa queē nda ñuu Jerusalén, tan quitsahā tyaá ra naha cuatyí cahnu siquí ra. Maa tyin nduve tsandaa tava ra naha. <sup>8</sup> Tacan tan cahān ra Pablo tan catyí ra:

—Yuhu ndi intuhun cuatyí ñaha ca javaha yu, ndi siquí ley nyivi Israel, ndi siquí vehe ñuhu cahnu ñuu Jerusalén, ndi siquí ra cuví rey cahnu tsa nyaá ñuu Roma —catyí ra.

<sup>9</sup> Maa tyin ra Festo cuñí ra coo vaha ra tsihin ra Israel naha ra, yacan cuenda tsicā tuhun ra tsi ra Pablo:

—¿A cuñí un cuhun un ñuu Jerusalén tyin jandaá yu tyiñu un ndacan? —catyí ra tsihin ra.

<sup>10</sup> Tan ra Pablo nacahān ra tan catyí ra:

—Tsa nyaá yu nu maa un. Tan maa un cuví ra cumí tyiñu cuenda rey cahnu tsa nyaá ñuu Roma. Ihya cuví nu taahán tsi tsa cutuñi yu tyin ra ñuu Roma cuví yu. Tan tsitó vaha un tyin nduve náa javahā yu tsi nyivi Israel. <sup>11</sup> Tun tsatyin javahā yu iin cuatyí cahnu tsa taahán tsi cúu yu, ña cua nducu yu cuhva cacu yu. Maa tyin ña nditsa maa tuhun tsa caahán ra ihya naha ra. Ndi nyooho tan ndi intuhun nyivi nduve ndatu tsi ndo tsa nacuhva cuenda ndo tsi yu tsi ra ihya naha ra. Tan yacan tsicán yu tsi un tyin na tatsi tuñi ra cuví rey cahnu tsi yu —catyí ra Pablo tsihin ra Festo.

<sup>12</sup> Tacan tan ra Festo, tsa yahā tsa natuhun tahan ra tsihin ra jatyinyeé tsi ra tsihin tyiñu, tan catyí ra tsihin ra Pablo:

—Tsicán un tsa cutuñi un nuu rey cahnu. Vaha. Cua cuhun un nuu maa ra —catyí ra tsihin ra.

#### Nu nacatyí tuhun ra Festo tuhun ra Pablo tsihin ra Agripa

<sup>13</sup> Tsa yahā juhva quiví, tan cuahán ra Agripa, ra cuví rey cuenda nyivi Israel nda ñuu Cesarea. Cuahán ra tsihin ña Berenice nu nyíí ra Festo tyin cua cuhva ñi nacumi tsi ra. <sup>14</sup> Tan ndoō ñi ican juhva quiví, tan ra Festo catyí tuhun ra tsihin ra cuví rey can tuhun ra Pablo. Tan catyí ra:

—Ra Félix nacoō ra tsi iin ra vehe caa ihya. <sup>15</sup> Tan tsa tsahān yu ñuu Jerusalén, ra jutu tsa cuví ityi nuu, tan ra cuví mandoñi nyivi Israel, tsicān ra naha cuatyí tsaha ra can nuu yu tyin na cuhva yu ndatu tsa cúu ra.

<sup>16</sup> Tan yuhu catyí yu tsihin tandihí ra naha tyin ña tuhvā ra cumí tyiñu cuenda ñuu Roma cahñi tsi ndi intuhun nyivi tatun ñaha ca natuhun tahan ñi tsihin ra tsa tsicán cuatyí tsaha ñi, tan nducu ñi cuhva jacacu ñi tsi ñi. <sup>17</sup> Yacan cuenda, tsa quitsi ra cuví ityi nuu tsihin nyivi Israel can naha ra ihya, ña ndatu yu. Tan juvin ñi inga quiví can tan tsahān yu vehe tyiñu. Tan tsa yahā tsicunyaā yu tan canā yu tsi ra can. <sup>18</sup> Maa tyin ra tyaá cuatyí siquí ra, nduve náa tuhun ñiñi cahān ra naha. Tsa cuñí maa yu tyin cahnu cuatyí cua tyaa ra naha siquí ra. <sup>19</sup> Maa tyin tuhun tsa cahān ra naha cuví tsa cuenda cuhva iyó maa ra naha cuhva tsinú iñi ra naha. Tan cahān ra naha tuhun ra tsa nañí Jesús. Tan catyí ra naha tyin tsa tsihí ra. Maa tyin ra Pablo catyí ra tyin nyito ra. <sup>20</sup> Tan tsa ña ñihí yu nácaa tatsi tuñi yu tsi ra tsa cuenda tuhun can, tsicā tuhun yu tsi ra tan catyí yu tsihin ra tatun cuñí ra cuhun ra cutuñi ra nda ñuu Jerusalén. <sup>21</sup> Maa tyin catyí ra tyin vaha ca tatun cutuñi ra nuu ra Augusto nda ñuu Roma. Yacan cuenda tava tyiñu yu na cunyi ra juhva ca quiví tsitsi vehe caa, nda cuanda cuví jacuhun yu tsi ra nuu ra Augusto —catyí ra Festo tsihin ra Agripa.

<sup>22</sup> Tacan tan ra Agripa catyí ra tsihin ra Festo:

—Cuñí tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

<sup>23</sup> Tsa inga quivi can tan tsaq̄ ra Agripa tsihin ña Berenice. Iyo xaan caá ñi quihvi ñi tsitsi vehe, tyin rey cuví ñi. Tan quihvi ndih̄i tucu ra comandante tan ra cumí tyiñu ñuu can naha ra. Tacan tan ra Festo tava tyiñu ra na cuquihin ra naha tsi ra Pablo. <sup>24</sup> Tacan tan quitsah̄a catyí ra Festo:

—Yooho Rey Agripa, tan nyooho tata, tsa yucú ndo ihya. Nyehe ndo tsi ra ihya. Tandih̄i ra Israel ñuu Jerusalén tan ñuu Cesarea caahán ra naha tyin iyó cuatyí ra. Tan ña jandih̄i ra naha tsa catyí ra naha tsihin yu tyin taahán tsi cúu ra. <sup>25</sup> Maa tyin tsa cuenda yuhu, nduve cuatyí ra tsa taahán tsi cúu ra. Tan juvin ñi maa ra tsicán tsa cutuñi ra nuu ra Augusto. Yacan cuenda cua jacuhun yu tsi ra ndacan. <sup>26</sup> Maa tyin nduve náa cuatyí ra nañih̄i yu, yacan cuenda ña ñih̄i yu tuhun tyaa yu nu carta tsa cua jacuhun yu tsi ra ndacá ñaha tsi yo. Yacan cuenda tava yu tsi ra nuu ndo, tan nuu yooho Rey Agripa, tyin tacan tan ndaca tuhun un tsi ra tan coto yu náa taahán tsi jacoto yu tsi ra rey cahnu. <sup>27</sup> Tyin ña vaha tsa jacuhún yu tsi ra tatun nduve náa tuhun caahán yu náa cuatyí javah̄a ra.

#### Nu quitsah̄a caahán ra Pablo nuu ra rey Agripa

**26** Tacan tan ra Agripa catyí ra tsihin ra Pablo: —Cuví cahan un vityin —catyí ra tsihin ra. Tan ra Pablo jandaq̄ ra ndaha ra tan catyí ra tyehen: <sup>2</sup>—Siñ xaan cuñí yu tyin cuví cahan yu nuu yooho, rey Agripa, tan cuví catyí yu tsihin un nácaa tandih̄i cuatyí tsa tyaa ra Israel naha ra siqui yu. <sup>3</sup> Tyin yooho tsitó un tandih̄i tuhun tsa iyó yo tsa cuví yo nyivi Israel. Tan tsitó un tuhun tuhvá yo caahán yuhu tahan. Yacan cuenda tsicán yu tsi un tyin tyaa soho vaha un tsa cua cahan yu.

#### Nu catyí tuhun ra Pablo tsihin ra Agripa nácaa ñayivi tsicoq̄ ra tsa ndi cumañi ca quihvi ra cuenda ra Cristo

<sup>4</sup> Tandih̄i nyivi Israel tsitó ñi nácaa tsicoq̄ yu nda ñuu yu quivi tsa ndi luhlu yu. Tan tsitó tucu ñi nácaa tsicoq̄ yu nda ñuu Jerusalén. <sup>5</sup> Cuaha xaan cuiya nacotó ñi tsi yu. Tatun cua cuhva cuenda ñi cua catyí ñi tyin fariseo cuví yu nda ndi luhlu yu. Tan ra fariseo cuví ra tsa vaha xaan tyaa yahvi ley tsahnu yo tan ñavin ca tandih̄i nyivi. <sup>6</sup> Tan vityin cuñí nyivi Israel tatsi tuñi ñi tsi yu tsa cuenda tyin tsinú iñi yu tsa cua janandoto Nyoo tsi nyivi tsa tsih̄i, tumaa catyí ra tsihin tsii tsaahnu yo naha ra tah̄an tsanaha. <sup>7</sup> Tandih̄i nyivi tsa cuví tata tsa ut-si uvi taahan sehe ra Israel ndatú tucu ñi nyehe ñi nu cua janandoto Nyoo tsi nyivi tsa tsih̄i. Tan yacan cuenda ña jandih̄i ñi tsa javahá ñi tyiñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihya, tyaa ra Israel naha ra cuatyí siqui yu vityin, yooho rey Agripa. <sup>8</sup> ¿A ña tsinú iñi nyooho tyin Nyoo cua janandoto ra tsi nyivi tsa tsa tsih̄i?

#### Nu tsah̄a cuenda ra Pablo tsi ra Agripa cuhva tsinyaa ndaha ra tsi nyivi yih̄i cuenda ra Cristo

<sup>9</sup> Tah̄an tsanaha juvin ñi maa yu tsicq̄ iñi yu tyin vaha tsa tatsi tuñi yu tsi nyivi tsinú iñi tsi ra Jesús, ra ñuu Nazaret. <sup>10</sup> Tan tacan javah̄a yu nda ñuu Jerusalén tsihin ndatu tsa tsah̄a ra jutu tsa cuví ityi nuu naha ra. Tan cuaha nyivi tsa tsinú iñi tsi ra Cristo tyih̄i yu vehe caa. Tan tatun tsah̄i ra naha tsi ñi, vaha xaan cuñí yu. <sup>11</sup> Tan cuaha xaan tundoho nyehe ñi jah̄a yu. Tan nducy yu cuhva jañiñi yu tsi ñi na jaña ñi tuhun tsa tsinú iñi ñi tsi ra Jesús. Tacan javah̄a yu tandih̄i maa vehe ñuhu nyivi Israel. Javah̄a yu tacan tsa cuenda tsa xaan cuñí yu nyehé yu tsi ñi. Tan tandih̄i inga ñuu tsah̄an yu tsinyaa ndaha yu tsi ñi.

#### Nu nacatyí tuhun nyico ra Pablo nácaa nanduv̄i ra, ra yih̄i cuenda ra Cristo

(Hechos 9.1-19; 22.6-16)

<sup>12</sup> Tan tsa cuenda yacan cuahán yu nda ñuu Damasco quivi can tyin tsah̄a ra jutu tsa cuví ityi nuu naha ra ndatu tsi yu. <sup>13</sup> Maa tyin ityi cuahán yu cuhva ora cuví tsi, yooho Rey. Tan quitsi ñuh̄u ityi siqui. Tan jandundit-sin tsi nu cuahán yu tsihin tandih̄i ra tsa cuahán tsihin yu. Maa tyin yaha ca nditsin tsi tan ñavin ca ñuh̄u ñi-canyii. <sup>14</sup> Tacan tan tandih̄i ndi nduv̄a ndi nu ñuhu. Tan tsiñi yu iin ndusu tsa caahán tsihin yu, tsihin yuhu yo, tan catyí tsi tsihin yu: “Saulo, Saulo, ¿nacuenta nyaá ndaha un tsi yu? Tumaa iin quiti tsañi nyaá ti tsata tsa xaan tsa jaquihín ityi ra tsi ti, tacan javahá un tyin juvin ñi tsi maa un jañicueehé un”, catyí ndusu can tsihin yu. <sup>15</sup> Tacan tan catyí yu: “¿Yóo yooho cuví un taa?” Tan Jutu Mañi yo catyí ra tsihin yu: “Yuhu cuví ra Jesús, juvin ra tsa nyaá ndaha un. <sup>16</sup> Nduvita nyityi. Tyin quituv̄i yu nuu un ihya tyin tacan tan cua jaha tyiñu un nuu yu, tan cua cuvi un tsandaa tsa cuenda tsa nyehé un ihya tan tsa cuenda tsa cua nyehe un ityi nuu ca. <sup>17</sup> Yacan cuenda vityin jacuhún yu tsi un nu iyó nyivi tsa ñavin nyivi Israel cuví tan juvin ñi maa yu cua jacacu yu tsi un ndaha ra Israel naha ra, tan ndaha nyivi tsa ñavin nyivi Israel cuví. <sup>18</sup> Tan yacan jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu iñi ñi tsi yu tan yuhu cua jaha yu tucahnu iñi cuatyí ñi. Tan cua naquihin ndih̄i tucu ñi tsa vaha tsa tsahá Nyoo tsi nyivi tsa nacuhvá cuenda tsi ñi tsi yu”, catyí Jutu Mañi yo tsihin yu. <sup>19</sup> Yacan cuenda yooho rey Agripa, javahá yu tsa catyí Jutu Mañi yo ra Jesucristo tsihin yu nu janah̄a ra tsi ra tsi yu. <sup>20</sup> Tacan tan tsa jihna ñi quitsah̄a caahán yu tuhun ra nda ñuu Damasco. Yah̄a can tan cah̄an yu tsihin nyivi ñuu Jerusalén tan tandih̄i ca ñuu tsa cayucú Judea. Tan caahán ndih̄i yu tsihin nyivi tsa ñavin nyivi Israel cuví. Tan catyí yu tsihin ñi tyin na ndu uvi iñi ñi cuatyí ñi, tan na tyaa yahvi ñi tsi Nyoo na javaha ñi tsa vaha tumaa javahá nyivi tsa tsinú iñi tsi ra Cristo. <sup>21</sup> Tan tsa cuenda tuhun ihya tñ̄n ra Israel naha ra tsi yu tsitsi vehe ñuhu cahnu. Tan cuñi ra naha cah̄i ra naha tsi



yu. <sup>22</sup> Maa tyin maa Nyoo jatyinyeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandíhi nyivi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuvi nu cuahán ca tsi, yacan caahán yu. <sup>23</sup> Tyin catyí ra naha tyin taahán tsi tsa cua nyehe ra Cristo tundoho. Tan tsa yahá tsa cúu ra, cua nandoto ra. Tan jihna ca ra can cua nandoto. Tan cua jandunditsin ra añima nyivi tyin cua jacoto ra nácaa cua cacu ñi, tahan ñi nyivi Israel tan nyivi tsa ñavin nyivi Israel cuví —catyí ra Pablo.

### Nu nducú ra Pablo cuhva tsa tsinu iñi ra rey Agripa tsi ra Cristo

<sup>24</sup> Cuhva tsa catyí ra Pablo tuhun ihya, ra Festo cana tsa ra, tan catyí ra:

—¡Iñi yoocho ña vaha cuñí, Pablo!, tsa cuenda tsa cuaha xaan cahví un tan ndusaná iñi un —catyí ra Festo tsihin ra.

<sup>25</sup> Maa tyin ra Pablo catyí ra tsihin ra:

—Ñavin iñi yu ña vaha cuñí, yoocho tata Festo. Tyin tsa caahán yu, maa ñi tsa nditsa tan tsa vaha cuví tsi. <sup>26</sup> Ihya nyaá ra rey Agripa. Tan tsitó vaha ra tuhun ihya. Yacan cuenda ña yí caahán yu tuhun yu tsihin ndo. Tyin tsitó yu tyin tsitó tucu maa ra tuhun ihya, tyin ñavin tuhun xeehe cuví tsi. <sup>27</sup> Yoocho rey Agripa, ¿a tsinú iñi un tuhun tsa tyaá ra cuví ndusu yuhu Nyoo tahān tsanaha? Yuhu tsitó yu tyin tsinú iñi un —catyí ra Pablo tsihin ra Agripa.

<sup>28</sup> Tacan tan ra Agripa catyí ra tsihin ra:

—¿A cuñí yoocho tsa natsinu iñi yu tsa caahán un tan quihvi yu cuenda ra Jesús? —catyí ra rey Agripa tsihin ra Pablo.

<sup>29</sup> Tacan tan ra Pablo catyí ra:

—Na cuhva Nyoo tsa tsinu iñi un, a vityin a ndi cu-cuee ca. Maa tyin ñavin yoocho ñi, tyin na tsinu ndíhi tucu iñi tandíhi nyivi tsa yucú tyaá soho tsa caahán yu ihya. Intuhun ñi tsa ña cuñí yu, tsa quíhi cadena ndaha ndo tumaa maa yu vityin —catyí ra Pablo.

<sup>30</sup> Tsa yahá tsa cahān ra Pablo tuhun ihya, nduvitā rey tan ra ndacá ñaha tan ña Berenice, tan tandíhi ra yucú ican naha ra. <sup>31</sup> Tan tsa yahá quitā ñi, tan quitsahā natuhún tahan ñi:

—Nduve cuatyí ra ihya tsa ñihi xaan. Ña taahán tsi cúu ra. Tan ndi ña taahán tsi cunyií ca ra vehe caa —catyí ñi.

<sup>32</sup> Tan ra Agripa catyí ra tsihin ra Festo:

—Cuví jaña yo tsi ra, tun tsatyin ña tsicān ra tsa cutuñi ra nuu ra cuví rey cahnu —catyí ra.

### Nu jacuhun ra Festo tsi ra Pablo nda ñuu Roma

**27** Quivi tsa tyaá ra Festo tan ra Agripa cuhva tyin jacuhun ra naha tsi ndi nda ñuu Roma tsa canyí Italia, nacuhvā cuenda ra naha tsi ra Pablo tan tsi juhva ra tsa iyó cuatyí naha ra tsi iin ra capitán tsa nañí Julio. Yihí ra batallón andaru, tsa nañí Cuenda Ra Augusto. <sup>2</sup> Tan cuahán ndíhi tucu ra Aristarco tsihin ndi.

Ra tsa quee ñuu Tesalónica tsa canyí ityi Macedonia cuví ra. Tacan tan quihvi ndi tsitsi iin yutun ndoo tsa quee ñuu Adramitio tyin tsa yatyin cuii cuhun nyico tsi ñuu tsa cayucú Asia yatyin ñi yuhu ndutya ñuhu. <sup>3</sup> Tsa inga quivi tsaā ndi puerto Sidón. Tan ra Julio vaha nyivi cuví ra tsihin ra Pablo. Tan tsahā ra tsa cuhun ra Pablo nu iyó ra vaha iñi tsi ra ñuu can tan jatyinyee ra naha tsi ra. <sup>4</sup> Yahá can tan quitā ndi ñuu Sidón tan jandaā ra naha jahma tsa nyisó yutun ndoo can tan tsihin tsa tandahñi tatyí jahma can tan cuahán ndi. Tan ñihi xaan yihí tatyí ityi nu cuahán ndi. Yacan cuenda yahá tsiyo ndi ityi xiin cuaha ñuhu Chipre, tyin ña ñihi xaan yihí tatyí ityi can. <sup>5</sup> Tacan tan yahá sava ndi nu ndutya ñuhu ityi nuu Cilicia tan Panfilia, tan tsaā ndi iin ñuu tsa nañí Mira tsa canyí Licia. Tan quitā ndi tsitsi yutun ndoo can.

<sup>6</sup> Tan ican nañihí ra capitán cuenda andaru inga yutun ndoo tsa quee nda ñuu Alejandría tan cua cuhun tsi nda Italia. Tan catyí ra capitán can na quihvi ndi tsitsi yutun ndoo can tyin tsa cua cuhun ndi nda nu cuahán ndi. <sup>7</sup> Cuaha quivi tsicā ndi tyin cuee ñi cuahán ndi. Tsihin tundoho tan tsaā ndi yatyin ñi ñuu Gnido. Tan tsa cuenda tsa ñihi xaan yihí tatyí tsa vatsí ityi tyisó ñicanyii, ña tsahā tsi tsa cuhun ca ndi ityi nuu, tan yahá ndi yatyin ñi ñuu Salmón tsa canyí ñuhu Creta. Tan navicō ndi ityi yuhu ñuhu Creta. <sup>8</sup> Nducū ndi cuhva tsa cuhun ndi yuhu ndutya ñuhu, maa tyin tsihin tundoho tan tsaā ndi nu nañí Buenos Puertos yatyin ñi ñuu Lasea.

<sup>9</sup> Tsa cuaha xaan quivi yahá tyin cuee xaan tsicá ndi tsa cuenda tatyí tan ica xaan nanduví tsa yaha ndi nu ndutya ñuhu. Tyin tsa yahá quivi vico nu iyó nyitya nyivi Israel. Tan tsa cua cuyatyin yoo vitsin. Yacan cuenda ra Pablo tsahā cuenda ra tsi ra jacacá yutun ndoo can naha ra, <sup>10</sup> tan catyí ra:

—Tandíhi nyoocho ra yucú ihya, tyaā soho ndo tuhun tsa cua cahan yu. Nyehé yu tyin ica xaan cuhva cuahán yo. Tan tuví iñi yu tyin cua cunaa yutun ndoo tsihin tandíhi tsa nyisó tsi, tan nda cuanda maa yo cuví cunaa yo. Vaha ca tatun ndoo yo ihya —catyí ra tsihin ra naha.

<sup>11</sup> Maa tyin ra capitán cuenda andaru can tyaā yahvi ca ra tsi ra jacacá yutun ndoo tan ra cuví tsitoho yutun ndoo tan ñavin ca tsi ra Pablo. <sup>12</sup> Ña cuví yaha ndi yoo vitsin ican tyin ñihi xaan tuhvá tatyí yihí, tan ica xaan cuenda yutun ndoo. Yacan cuenda catyí tandíhi ra naha:

—Vaha ca tsa quita yo ihya tan nducu yo cuhva cuhun yo nda ñuu Fenice tsa canyí juven ñi ñuhu Creta ihya. Yacan cuví iin nu vaha cunyaa yutun ndoo tyin ña ñihi xaan yihí tatyí tyin ñuu can canyí tsi tsiyo cana ñi-canyii —catyí ra naha.

### Nu ñihi xaan yihí tatyí nu ndutya ñuhu

<sup>13</sup> Tacan tan quitsahā yihí luxu tatyí tsa quitsí ityi sur. Tan cuñí maa ra naha tyin vaha xaan tyin ñavin tatyí ñihi cuví tsi. Tyin tacan tan cuví cuhun ndi tsihin yutun ndoo yatyin ñi yuhu ñuhu Creta can. <sup>14</sup> Ña cuaha ñi tsi-

ca ndi tan quitsahā yihí tatyí xaan tsa quitsi ityi norte. Tan tandahá tsi yutun ndoo inga ityi. <sup>15</sup> Tan ña cuví ca cahun ndi ityi nuu ca tsa cuenda tatyí can. Tan jañā ndaha ndi na cahun maa yutun ndoo tsihin tatyí ndáa ityi cuñí maa tsi. <sup>16</sup> Tan yahā ndi ityi tsata iin ñuhu luhlu tsa nañí Clauda tyin ña ñihi xaan yihí tatyí ityi can. Tan tsihin tundoho naquihñi ndi yutun ndoo luhlu tsa ixtá caa yutun ndoo, tan natyihñi ndi tsa luhlu can ityi tsitsi yutun ndoo cahnu coto nyee tsi tsitsi ndutya. <sup>17</sup> Tan tsa yahā natyihñi ra naha yutun ndoo luhlu can, tacan tan sutya ra naha xuu yutun ndoo cahnu tan tsahñi ra naha yutun ndoo can tsihin taahan yoho tyin coo tunyee iñi itsi. Tan yuuhví ra naha coto tahan ra naha nu yaxin ndutya tan vicun yutun ndoo can tsitsi nyiti vita iyó yuhu ndutya ñuhu nu nañí tsi Sirte. Yacan cuenda januu ra naha jahma yutun ndoo can tan tsahā ra naha tsa cahun tsi cuhva tandahá tatyí. <sup>18</sup> Tan tsa inga quivi juven ñi ñihi xaan yihí tatyí. Yacan cuenda quitsahā tyihí ra naha carga tsa yihí tsitsi yutun ndoo can nuu ndutya ñuhu. <sup>19</sup> Tan tsa tsinu uñi quivi quihñi ndi ndaha tyiñu yutun ndoo can tan tyihñi ndi nu ndutya ñuhu. <sup>20</sup> Tan cuaha quivi ña nyehe ndi ñicanyii tan ndi tiñuu. Tan ñihi xaan tandahá tatyí tsi ndi. Yacan cuenda ña tyaā ca ndi cuhva tsa cua cacu ndi.

<sup>21</sup> Cuaha quivi yahā tan ña tsatsí ndi. Tacan tan catyí ra Pablo tsihin tandihñi ra naha:

—Nyehe ndo, vaha ca tun tsatyin tyaā yahvi ndo tuhun tsa cahñan yu quivi can, tan ndoo yo ñuhu Creta. Tan vityin cuaha xaan tundoho nyehé yo tan cuaha xaan ndaha tyiñu jacunaá yo. <sup>22</sup> Tan cua cunaa ndihñi yutun ndoo ihya, maa tyin ña caca iñi ndo tyin ndi intuhun yo tan ña cua cúu yo. <sup>23</sup> Tyin Nyoo cuví ra yihí ndaha tsi yu, tan jahatyíñu yu tyiñu ra, juven ra janahā ra iin tsa janahā tsi yu cuñi. Tan quituvñi iin ángel nuu yu. <sup>24</sup> Tan catyí ángel can tsihin yu: “Ña nayuhvi un, Pablo. Tyin cuñí tsi tsa cahan un tuhun Nyoo nuu ra rey cahnu Augusto nda ñuu Roma. Tan tsa cuenda un cua jacacu Nyoo tandihñi ra yucú tsihin un tsitsi yutun ndoo”, catyí ángel can tsihin yu. <sup>25</sup> Yacan cuenda nyooho tsa yucú tsitsi yutun ndoo ihya jandu iin ndo iñi ndo. Tyin yuhu tsinú iñi yu tsi Nyoo. Tan tsitó vaha yu tyin cua cuvi tumaa cuhva catyí ángel can tsihin yu.

<sup>26</sup> Vasu cua nyee yutun ndoo ihya, maa tyin cua tsaā yo iin ñuhu luhlu —catyí ra Pablo tsihin tandihñi ndi.

<sup>27</sup> Tan tsa ndihñi tsahun quivi tsa tsicā ityi ndi. Iin tsacuaa yucú ndi nu ndutya ñuhu Adria. Tan tsata can tsata ihya tandahá tatyí yutun ndoo ndi nu ndutya ñuhu. Tan maa ñuu cuví cuhva can tan tuvñi iñi ra jacacá yutun ndoo can naha ra tyin cua tsaā ndi iin ñuhu. <sup>28</sup> Tacan tan tyihñi cuhva ra naha cuhva cunu yihí ndutya. Tan nyehe ra naha tyin oco tsahun iin taahan metru iyó. Cuahán ndi luxu ca ityi nuu ca. Tan tyihñi cuhva ra naha inga tsaha. Tan iyó oco utsa metru.

<sup>29</sup> Tan yuuhví ra naha coto nañi yutun ndoo can tsata yuu. Yacan cuenda januu ra naha cumi taahan caa vee tsa iyó cantsu nuu ityi tsata yutun ndoo tyin na ña cahun ca tsi ityi nuu. Tan tsa cuñí ra naha tsa cunditsin. <sup>30</sup> Tan ra jacacá yutun ndoo can naha ra tyaā ra

naha cuhva cunu xeehe ra naha. Tan yacan cuenda quitsahā januu ra naha yutun ndoo luhlu can nu ndutya ityi nuu yutun ndoo can. Tan jahá ñi maa ra naha tyin inga caa cua januu ra naha. <sup>31</sup> Maa tyin ra Pablo jacotō ra tsi ra capitán tan tsi andaru tan catyí ra:

—Tatun ña cua ndoo ra can naha ra tsitsi yutun ndoo, nyooho ña cua cuvi cacu ndo —catyí ra tsihin ra naha.

<sup>32</sup> Tacan tan andaru tsahnyā ra naha yoho yutun ndoo luhlu can. Tan jacanacavā ra naha can nu ndutya. <sup>33</sup> Tan tsa naa ca ra Pablo catyí ra tsihin tandihñi ra naha:

—Tsa iyó utsi cumi quivi tsa ña tsatsí ndo tan ña quixí ndo. <sup>34</sup> Catyí yu tsihin ndo, çatsi ndo vityin. Ñiñi xaan cuñí tsi tsa catsi yo tyin tacan tan ndunyee cuñu ñuhu yo. Tyin cua cacu yo tan ndi intuhun ixi jiñi yo tan ña cua cunaa.

<sup>35</sup> Tan tsa catyí ra Pablo tuhun ihya, quihñi ra iin paan tan nacuhvā ra tyahvi nyoo tsi Nyoo nuu tandihñi ra naha. Tacan tan tahvñi ra tan quitsahā tsatsí ra. <sup>36</sup> Tacan tan tandihñi ra naha ndu iin ca iñi ra naha tan tsatsi ndihñi ra naha. <sup>37</sup> Tan tsa tandihñi ndi tsa yucú ndi tsitsi yutun ndoo can, quitā uvi cientu uñi xico tsahun iin ndi. <sup>38</sup> Cuhva tsa ndihñi tsatsi ra naha cuhva cuñí ra naha tan jacuhñun ra naha yitñi tsa yihí trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsaā tsi yatyin ñi yuhu ndutya.

### Nu nyee yutun ndoo

<sup>39</sup> Yahā can tan cunditsin. Tan nyehe ra tsa jacacá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaā ra naha cuhva nyehe ra naha tatun cuví jacuhun ra naha yutun ndoo ican. <sup>40</sup> Tsahnyā ra naha yoho tsa nuuhñi caa vee can. Tan nacoō ra naha can tsitsi ndutya ñuhu. Tan jandutayā ra naha vitu tsa janavicó yutun ndoo. Tacan tan jandaā ra naha jahma tsa tuhvā ticaá ityi nuu tsi. Tan quitsahā quihñi tatyí jahma can, tan jacuhñun tsi yutun ndoo nda nu iyó nyiti can. <sup>41</sup> Tan tsaā tsi nu tatahán ndutya. Tan nyee jiñi tsi tsitsi nyiti. Tan ña cuví ca tava ra naha itsi. Tan ityi xuu tsi quitsahā tahvñi cuatyí can tsa cuenda tsa ñihi xaan cañi ndutya ñuhu can. <sup>42</sup> Tacan tan andaru cuñí ra naha cahñi ra naha tsi ra cuahán cua cutuñi naha ra tyin coto cunu ra naha. <sup>43</sup> Maa tyin capitán andaru cuñí ra jacacu ra tsi ra Pablo. Yacan cuenda ña tsahā ra tsa cahñi ra naha tsi ra can naha ra. Tan catyí ra tyin ndáa ra tsitó sutya, na cahun cuee ñi ra naha nu ndutya tan quita ra naha nda ñuhu ityi. <sup>44</sup> Tan tandihñi ca ra tsa ña cuví sutya, na cahun ra naha nu vitu tsa nyisó yutun ndoo, tan juhva ra naha na cahun ra naha tsihin vitu tsa tahvñi cuatyí jahā ndutya ñuhu. Tan tacan cacu tandihñi ndi tan quitā ndi ñuhu ityi.

### Nu nyíí ra Pablo ñuhu Malta

**28** Cuhva tsa tsa yahā cacū ndi tan catyí nyívi iyó ñuhu can tyin nu yucú ndi can nañí tsi Malta, o Melita. <sup>2</sup> Tan vaha xaan natuhún ñi tsihin ndi. Tan jatahan ñi ñuhu tyin cuún savi tan vitsin xaan. Tan catyí ñi tsihin tandihí ndi, na natuhva ndi yuhu ñuhu can tyin quita tsa vitsin tsi ndi. <sup>3</sup> Tacan tan ra Pablo naquihín ra juhva nducu ityi. Tan tsitsi tsa tyihí ra can nu ñuhu, quitā iin coo tsitsi nducu can, tsa cuenda tsa ihñi. Tan tsatsi yihí tì ndaha ra, tan ticaá tsico tì ndaha ra. <sup>4</sup> Cuhva tsa nyehē nyívi ñuhu can tyin ticaá coo can ndaha ra, quitsahā natuhún tahan ñi tan catyí ñi:

—Ra ihya nyívi tsahñi ra, tun cuví, tyin vasu cacū ra nu ndutya ñuhu, maa tyin Nyoo ña tsahā ca ra tsa coo ra tsa cuenda cuatyí ra —catyí ñi.

<sup>5</sup> Maa tyin ra Pablo naquisi ra tsi coo can, tan canacava tì nu ñuhu, tan nduve náa tahan ra. <sup>6</sup> Tandihí ñi ndatú ñi náa cuhva ndaa nu tyaā tì, a náa cuhva cua cúu ra. Maa tyin tsa yahā ndatū xaan ñi, tan nyehē ñi tyin nduve maa náa tahan ra. Tacan tan nasamā ñi cuhva tsicá iñi ñi, tan quitsahā catyí ñi:

—Ra ihya cuví iin nyoo —catyí ñi.

<sup>7</sup> Yatyin ñi can canyíí ñuhu ra yihí ndaha ñuhu can. Tan nañí ra Publio. Tan vaha xaan caahán ra tsihin ndi. Tan vaha xaan tyanuú ra tsi ndi, tsa uñi quívi tsa yucú ndi vehe ra. <sup>8</sup> Tan jutu ra ñihi xaan cuuhví ra tsihin cahñi tan tsa tsiyó ra. Tan tsahān ra Pablo tsinyehē ra nu canyíí ra. Tan tsicān tahvi ra tsa cuenda ra, tan tyiso ndaha ra jiñi ra. Tacan tan nduvahā ra. <sup>9</sup> Yahā can tan quitsahā tsaá cuaha nyívi cuuhví tsa iyó ñuu can. Tan nduvahā ndihí ñi. <sup>10</sup> Tan tandihí ñi vaha xaan tyanuú ñi tsi ndi. Tan quívi quihví ndi tsitsi iin yutun ndoo tsa cua cuhun ndi, tsahā ñi tandihí tsa cua cutyiñu ndi ityi cuhun ndi.

### Nu tsaā ra Pablo ñuu Roma

<sup>11</sup> Uñi yoo tsiyucú ndi ñuhu Malta can. Tacan tan quihví ndi tsitsi iin yutun ndoo tsa queē nda ñuu Alejandría tsa canyíí nu cuví Egipto. Tan ndoo tsi Malta nda yahā yoo vitsin. Tan jiñi yutun ndoo can nyecú tsa caá tumaa caá nyoo Cástor tan nyoo Pólux. <sup>12</sup> Tan tsaā ndi ñuu Siracusa. Tan ican ndoo ndi uñi quívi. <sup>13</sup> Tacan tan quitā ndi tan cuahán ndi ityi yuhu ndutya ñuhu nda cuanda tsaā ndi ñuu Regio. Tan tsa inga quívi can ñihi xaan yihí tatyí tsa quitsi ityi sur tan tsicā ndi uvi quívi tan tsaā ndi ñuu Puteoli. <sup>14</sup> Ican ñihí tahan ndi tsihin juhva ra hermano naha ra. Tan catyí ra naha tsihin ndi tyin ndoo ndi iin vitya tsihin ra naha. Yahā can tan cuahán ndi nda ñuu Roma. <sup>15</sup> Tan nyívi yihí cuenda ra Cristo ñuu Roma can ñihí tuhun ñi tyin cua tsaā ndi. Tan tsahān ñi tsijatahan ñi tsi ndi ityi. Juhva ñi ndatū tsi ndi Nuyahví Apio. Tan inga ñi ñihí tahan ñi tsihin ndi nda nu nañí Tres Tabernas. Tan tsa nyehē ra Pablo tsi ñi, nacuhvā ra tyahvi nyoo tsi Nyoo. Tan ndu iñ ca iñi ra. <sup>16</sup> Cuhva tsa tsaā ndi ñuu Roma can, ra capitán can nacuhvā cuenda ra tsi ra iyó cuatyí can naha ra tsi ra

yihí ndaha vehe caa. Tan tsahā ra can tsa coo siñ ra Pablo. Tan jahá cuenda intuhun ñi andaru tsi ra.

### Nu caahán ra Pablo tuhun Nyoo ñuu Roma

<sup>17</sup> Tsa yahā uñi quívi tsa tsaā ndi ican, tacan tan tava ra Pablo tyiñu na quitsi ra cuví ityi nuu tsihin nyívi Israel tsa iyó ñuu Roma can naha ra. Tan cuhva tsa ndu iñ ra naha, quitsahā catyí ra tsihin ra naha:

—Nyooho yañi, vasu nduve náa javahā yu tsi nyívi Israel tahan yo, tan ndi nduve náa javahā yu siqui tuhun tsahnu cuhva iyó yo, maa tyin tsahā cuenda ra Israel naha ra tsi yu tsi ra ñuu Roma naha ra. Tan tsinyiñ yu vehe caa ñuu Jerusalén ndaha ra ñuu Roma naha ra.

<sup>18</sup> Tan tsa jaqueē yuhu ra naha tsi yu, cuñi ra naha jaña ra naha tsi yu. Tyin ña taahán tsi cúu yu tyin nduve cuatyí javahā yu. <sup>19</sup> Maa tyin ra Israel tsa iyó nda ñuu Jerusalén naha ra nduxaān xaan ra naha tan yacan cuenda tsicān yu tsa cutuñi yu nuu ra cuví rey cahnu. Vasu nduve cuatyí cua tyaā maa yu siqui ra naha. <sup>20</sup> Yacan cuenda caná yu tsi nyooho tyin nacoto yu tsi ndo, tan catyí tuhun yu tsihin ndo tyin nuuhñi yu tsihin cadena vityin tsa cuenda tsa tsinú iñi yu tsi ra tsa ndatú xaan yo tsa cuví yo nyívi Israel —catyí ra Pablo.

<sup>21</sup> Tacan tan catyí ra Israel naha ra tsihin ra Pablo:

—Ña tsitó ndi tuhun yooho. Tan yoñi jacotō tsi ndi, ndi tsihin carta, tan ndi ra ñuu yo tsa queē nda Judea ña cahān ra naha tuhun yooho, tan nduve náa cahān ra naha siqui un. <sup>22</sup> Maa tyin cuñi ndi tyaā soho ndi tuhun tsicá iñi un. Tyin tsitó ndi tyin tandihí ñi ityi tan caahán nyívi siqui tuhun tsaā ihya —catyí ra Israel naha ra tsihin ra Pablo.

<sup>23</sup> Tacan tan natuhún tahan ra naha ndaa quívi cua cuhun ra naha inga tsaha. Tsa tsaā quívi can, tsaā cuaha nyívi nu iyó ra Pablo. Tan quitsahā caahán ra nda tsa tuvi tan nda cuanda tsacuaa nácaa ndacá ñaha Nyoo. Tan tsihin ley Nyoo tsa tyaā ra Moisés tan tuhun tsa tyaā ra cuví ndusu yuhu Nyoo tahan tsanaha, jacuahá ra tsi ñi tyin ra Jesús cuví ra tsa jacacú tsi yo. Tan tacan javahā ra Pablo tyin cuñi ra tsa tsinu iñi ñi tsi ra Jesús. <sup>24</sup> Yihí ñi tsinú iñi ñi tsa caahán ra. Tan inga ñi ña tsinú iñi ñi. <sup>25</sup> Tan ña iin tsicá iñi ñi, siñ siñ tuhun caahán ñi. Tan quitsahā tsinuhú ñi. Tan ra Pablo catyí ra tsihin ñi:

—Nditsa tsa cahān Tatyí Ii Nyoo tsihin ra Isaías ra cuví ndusu yuhu ra tahan tsanaha, tyin na cahan ra tsihin tsii tsaahnu yo. Tan catyí ra:

<sup>26</sup> Cyaahan tan cahan un tyehen tsihin nyívi ihya: Nyooho cua cuñi ndo tuhun Nyoo, maa tyin ña cua cutuñi iñi ndo.

Cua nyehe ndo tsihin tinuu ndo tsa cua javaha Nyoo, maa tyin ña cua nacoto ndo tsa nyehe ndo.

<sup>27</sup> Tyin añima ñi tsa ndundava xaan tsi.

Tsiñi ñi, maa tyin ña tyaá yahvi ñi.

Tan ndasí tinuu ñi, tyin tacan tan ña cua cuví nyehe ñi.

Tan ña cua cuñi ñi tsihin soho ñi.

Tan ña cua cutuñi iñi ñi tsihin añima ñi.

Yacan cuenda ña cuñí ñi quihvi ñi tsitsi ndaha yu na janduvaha yu tsi ñi.

Tacan catyi ra Isaías jahā Tatyí Ii Nyoo tahān tsanaha.

<sup>28</sup> Coto vaha nyooho tyin vityin tan ityi nuu ca cuhun yu cua jacoto yu tsi nyivi tsa ñavin nyivi Israel cuví tyin jacacú Nyoo tsi ñi. Tan maa ñi cua tyaa soho ñi —catyí ra Pablo tsihin ñi.

<sup>29</sup> Cuhva tsa catyi ra Pablo tyehen, ra Israel cuahán ra naha juvin ñi caahán yuhu tahan ra naha tsa cuenda tuhun tsa cahān ra Pablo tsihin ra naha.

<sup>30</sup> Uvi cuiya ndog ra Pablo vehe nu nyií ra cuenda yoo ñuu Roma can. Tan vaha caahán ra tsihin tandihí nyivi cuahán vehe ra. <sup>31</sup> Tan tsihin tsa ñi iñi ra tan caahán ra tuhun nácaa ndacá ñaha Nyoo tsi yo. Tan jacuahá ra tuhun Jutu Mañi yo ra Jesucristo. Tan yoñi tyasí nu caahán ra.

# Romanos

## Nu quitsahā tyaá ra Pablo carta

**1** Yuhu ra Pablo cuví yu iin ra jahá tyiñu tyiñu ra Jesucristo. Canā Nyoo tsi yu, tan nacatsj ra tsi yu tyin caca yu jacoto yu tuhun tsa jacacú ra tsi yo tsi nyivi. <sup>2</sup> Tan tuhun ihya cuví tsa cahan Nyoo tsihin ra cuví ndusu yuhu ra tahañ tsanaha tyin tyaá ra naha nu tutu ra. <sup>3</sup> Juvín tuhun ihya caahán tyin Jutu Mañi yo Jesucristo, Sehe Nyoo, quitsj ra nu ñuhu ñayivi tan nanduvj ra tumaa maa yo. Tan cuví ra tata ra rey David. <sup>4</sup> Tan Nyoo jacoto ra tsi yo tsihin Tatyí Ii ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsa iyó tsi ra. <sup>5</sup> Tan tsa cuenda ra Jesucristo tsa-hā Nyoo tumañi iñi tsi ndi tsa caca ndi tyiñu ra, tyin na tsinu iñi nyivi iyó nanñi cahnu nu ñuhu ñayivi tsi ra tan na tyaá yahvi ñi tsi ra. <sup>6</sup> Tan juhva ñi ican cuví tucu nyooho tyin tsa nacatsj ra Jesucristo tsi ndo tyin cuvi ndo nyivi cuenda ra.

<sup>7</sup> Jaquitsí yu carta ihya tsi tandihí nyooho tsa iyó ñuu Roma. Nyoo cuñí xaan ra tsi ndo tan canā ra tsi ndo tyin cuví ndo nyivi ra tan jacahnu ndo tsi ra. Naquihin ndo tsa vaha tan na coo tsa taxin añima ndo jahá Jutu yo Nyoo tan Jutu Mañi yo Jesucristo.

## Nu catyí ra Pablo tyin cuñí ra cuhun ra ñuu Roma

<sup>8</sup> Tsa jihna ñi, tsahá yu tyahvi nyoo tsi Nyoo tsihin sivi ra Jesucristo tsa cuenda tandihí nyooho tyin tandihí ñi ityi caahán nyivi tyin tsinú xaan iñi ndo tsi ra Jesucristo. <sup>9</sup> Jahá tyiñu yu tyiñu Nyoo tsihin tsa ñi iñi añima yu. Tan caahán yu tsihin nyivi nácaa jacacú Sehe ra tsi yo. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo. <sup>10</sup> Tan tsicán yu tsi ra na cuvi cuhva cuñí ra, tan quitsi yu nu yucú ndo, tyin tsanaha xaan cuñí yu quitsi yu. <sup>11</sup> Tyin cuñí yu jatyinyee yu tsi ndo, tan naquihin ndo tsa vaha tsa tsahá ra tsi yo tan cunyicun ñihi ca ndo tsi ra. <sup>12</sup> Tsa cuñí yu cahan yu tsihin ndo cuví tuhun ihya: tsa jandu iin tahan yo iñi yo tsihin tsa tsinú iñi yo tsi ra.

<sup>13</sup> Yañi, cuñi yu tsa coto ndo tyin cuaha xaan tsaha cuñi yu quitsi yu quitsi nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñi yu quitsi yu ñuu ndo tyin cuñi yu cahan ca yu tuhun Nyoo tsihin nyivi tyin tacan tan nducuaha ca ñi tsinu iñi tsi ra, tumaa javahā yu tsihin nyivi inga ca ñuu. <sup>14</sup> Tyin tsa ñiñi cuñi tsi cahan yu tuhun tsa jacacú ra Cristo tsi yo tsihin nyivi Grecia tan nyivi inga ñuu; tahan ñi nyivi tsa tsitó xaan tan nyivi soho. <sup>15</sup> Yacan

cuenda, cuñi yu cahan yu tuhun ra Cristo tsihin nyooho tsa iyó ndo Roma ihya.

## Tuhun Nyoo iyó xaan tunyee iñi itsi

<sup>16</sup> Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandihí nyivi tsa tsinú iñi tsi ra Cristo. Tsa jihna ñi maa ñi maa tsihin nyivi Israel cahan ndi tuhun ra Cristo, maa tyin vityin caahán ndihí tucu ndi tsihin nyivi tsa ñavin nyivi Israel cuví. <sup>17</sup> Tyin tuhun Nyoo ihya, janahá tsi tsi yo nácaa janduvahá Nyoo tsi yo. Tan juvín ñi tsahá cuenda tsa tsinú iñi yo tsi ra tan ñavin náa inga ca cuenda. Catyí nu tutu ra: “Nyivi tsa janduvahá Nyoo añima, iyó ñi ñayivi tsa tsihin tsa tsinú iñi ñi tsi ra.”

## Tandihí nyivi tan iyó cuatyí ñi

<sup>18</sup> Nyehe yu tyin Nyoo, ra nyaá gloria, tatsí tuñi ra tsi nyivi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyivi tsa nditsa. <sup>19</sup> Tsitó ñi tsa iyó Nyoo tyin juvín ñi maa ra janahá can tsi ñi. <sup>20</sup> Ña cuví catyí yo tyin nduve Nyoo iyó tyin vasu ndi maa ña nyehé yo tsi ra, maa tyin cuví coto yo tsa iyó ra tsihin tsa nyehé yo tandihí tsa javahā ra. Tsanaha javahā ra ñuhu ñayivi tan yacan janahá tsi yo tyin iyó Nyoo tan iyó tunyee iñi tsi ra. Nyivi tsa ña cuñí coto tsi Nyoo ña cua coo tucahnu iñi tsi ñi. <sup>21</sup> Vasu ndi maa tsitó ñi tsa iyó Nyoo tsihin tsa nyehé ñi tandihí tsa javahā ra, ña cuñí ñi jacahnu ñi tsi ra tumaa taahán maa tsi jacahnu yo tsi ra. Ña tsahá ñi tyahvi nyoo tsi Nyoo tyin maa ñi maa tsa iyó nu ñuhu ñayivi tyaá jiñi ñi. Tan tsa cuenda yacan ndusoho ñi. <sup>22</sup> Vasu ndi maa catyí ñi tyin tsitó xaan ñi, maa tyin ña nditsa tyin nduve náa tsitó ñi. <sup>23</sup> Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa caá tumaa caá nyivi tuhva tsihi, tan nda cuanda tsitoho tsa caá tumaa caá saa, tan coo, tan quití iyó cumi tsaha.

<sup>24</sup> Yacan cuenda nacoq Nyoo tsi ñi nu tsa caquiñi tsa javahá ñi. Tan javahá ndihí tucu ñi tsa caquiñi tsihin cuñu ñuhu iin ñi tan inga ñi tan cuví can ticanuu. <sup>25</sup> Ña cuñí ñi tsinú iñi ñi tuhun Nyoo tsa nditsa, maa tyin tsinú iñi ñi tsa ña nditsa. Tyaá yahvi ñi tsa javahā Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñi tsi jacahnu yo tacan ñi maa. Na cuví tsi tacan.

<sup>26</sup> Yacan cuenda jañā ndaha Nyoo tsi ñi na javaha ñi tsa tsahá ticanuu tsi ñi. Tyin nda cuanda ñiñaha tan tsicoó ñi tsihin ñi nduyii, tan ña vaha tacan. <sup>27</sup> Tan juvín

ñi tacan javahá tucu rayi, nacoó ra naha tsa iyó ra naha tsihin ñasihí ra naha, tan iyó ra naha tsihin ra ndusihí naha ra tan tsahá ra naha ticanuu tsi yañi ra naha. Tan tsa cuenda can tatsí tuñi Nyoo tsi ra naha tan tivé ra naha tsa cuenda tsa caquiñi tsa javahá ra naha.

<sup>28</sup> Tan tsa cuenda tsa ña cuñí ca ra can naha ra tan ñi ican naha ñi nacoto ñi tsi Nyoo, nacoó ra tsi ñi naha ñi na caca iñi ñi tsa cuñí maa ñi. <sup>29</sup> Tyin tandihí nuu tsa ña vaha javahá ñi. Ñiñaha tsicoó ñi tsihin rayi tan ña tindahá ñi. Rayi tsicoó ra naha tsihin ñaha tan ña tindahá ra naha. Maa ñi tsa caquiñi javahá ñi. Cuñi ñi coo cuaha ndaha tyiñu ñi. Javahá ñi tsa ndavaha ñi. Nyiyo iñi ñi tsa iyó tsi inga nyivi. Tsahñí ñi nyivi. Cañí tahan ñi tsihin nyivi ñi. Jandaví ñaha ñi. Quiñi iyó ñi tan caahán ñi cuendu. <sup>30</sup> Caahán ñi ndavaha ñi siqui inga nyivi. Ndasí cuñí ñi nyehe ñi tsi Nyoo. Caahán nyaa ñi tsi nyivi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahvi ñi tsi jutu ñi, tan ndi tsi síhi ñi. <sup>31</sup> Ña cuñí ñi cutuñi iñi ñi. Ña javahá ñi tsa catyí ñi tyin cua javaha ñi. Ña cuñí maa ñi tsi ndi intuhun nyivi. Ña tsitó ñi jahá ñi tucahnu iñi tan ña cundahví iñi ñi nyehe ñi tsi nyivi. <sup>32</sup> Tsitó vaha ñi tyin Nyoo ña cuñí ra tsa javahá ñi tacan. Tan tsitó tucu ñi tyin nyivi tsa javahá tsa caquiñi can, taahán tsi cúu ñi. Maa tyin ña jandihí ñi tsa javahá ñi can, tan tatun inga nyivi javahá tacan, sí xaan cuñí ñi.

#### Tatsí tuñi Nyoo tsi nyivi maa tyin tsihin tsa nditsa

**2** Nyooho tsa nyehé cuatyí tsa javahá inga nyivi, iyó cuatyí ndo tyin jacutuñí ndo tsi ñi tsa cuenda cuatyí javahá ñi. Yoñi jaha ndáa nyooho cuví ndo. Tyin tsa jacutuñí ndo tsi ñi, juvin ñi tsi maa ndo jacunaá ndo. Tyin nda maa ndo tan javahá ndihí ndo cuatyí tsa javahá ñi. <sup>2</sup> Tsitó yo tyin Nyoo tatsi tuñi ra tsi nyivi tsa javahá tacan, maa tyin tsihin tsa ndaa tan tsa nditsa cua tatsi tuñi ra. <sup>3</sup> Nyooho tsa jacutuñí tsi nyivi tan javahá ndo juvin ñi tsa javahá ñi, cua tatsi tuñi Nyoo tsi ndo. <sup>4</sup> ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñí ra tsa nasama ndo kuhva iyó ndo. <sup>5</sup> Maa tyin nyooho jandavá xaan ndo añima ndo. Tan ña cuñí ndo nasama ndo kuhva iyó ndo. Tan tsa javaha ndo tacan, Nyoo cuxaán ra tan ñihi ca cua tatsi tuñi ra tsi ndo tsa cuenda can quivi cua tatsi tuñi ra tsi nyivi tsihin tsa ndaa tan tsa nditsa. <sup>6</sup> Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa javahá yo. <sup>7</sup> Nyoo cua kuhva ra ñayivi tsa ña cua naa maa coo nyivi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñí ñi coo cuii ñi tsihin ra. Cua ñihi ñi tandihí yacan tyin nanducú ñi can. <sup>8</sup> Maa tyin cuaha ca tsa uhvi cua janyehe ra tsi nyivi tsa javahá tsa cuñí maa ñi, ñi tsa ña tyaá yahvi tuhun nditsa, tan javahá ñi tsa ña vaha. <sup>9</sup> Cuaha xaan tundoho tan tsa uhvi cua nyehe tandihí nyivi tsa javahá tsa ña vaha. Tsa jihna ñi cua tatsi tuñi ra tsi nyivi Israel, nyivi cuenda ra. Tan tsa tsinu uvi cua tatsi tuñi ndihí ra tsi nyivi tsa ñavin ñi Israel cuví. <sup>10</sup> Maa tyin

tandihí nyivi tsa javahá tsa vaha, cua kuhva Nyoo tsa cahnu cuví ra tsi ñi. Cua jacahnu ra tsi ñi tan cua kuhva ra tsa taxin coo añima ñi. Jihna ca nyivi Israel cua ñihi tandihí tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihi ndihí ñi tandihí can.

<sup>11</sup> Tyin Nyoo inducu ñi cuñí ra nyehé ra tsi iin yo tan tsi inga yo. Ña tavá tsiyo ra ndi intuhun yo. <sup>12</sup> Tyin nyivi tsa ñavin ñi Israel cuví, ñi tsa ña tsitó ley Nyoo tsa tyaá ra Moisés, tan javahá ñi tsa ña vaha, cua cunaa ñi, maa tyin ñavin tsa cuenda tsa ña tyaá yahvi ñi ley can. Tan nyivi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyí maa ley can.

<sup>13</sup> Tyin nyivi tsa javahá kuhva catyí ley Nyoo, ñi ican cuví nyivi vaha nuu ra. Maa tyin nyivi tsa tsitó ñi maa ley tan ña javahá ñi tsa catyí ley can, ña cua cacu ñi.

<sup>14</sup> Nyivi tsa ñavin ñi Israel cuví ña tsitó ñi ley, maa tyin tun tacan ñi javaha maa ñi tsa catyí ley, juvin ñi maa ñi cuví ley ñi. <sup>15</sup> Tyin tsihin kuhva iyó ñi, janahá ñi tyin iyó ley Nyoo tsitsi añima ñi. Tsa tsíni tuñi tsa iyó tsi ñi cuví tsandaa tsa cuenda ñi, tyin tuví iñi ñi tatun vaha o ña vaha javahá ñi. <sup>16</sup> Tacan cua cuví quivi cua jacutuñi ra Jesucristo cuatyí tandihí nyivi jaha Nyoo. Cua cutuñi tandihí maa nyivi tsa javahá xeehe kuhva tsicá iñi ñi. Tumaa catyí tuhun Nyoo tsa caahán yu tsihin ndo.

#### Nyivi Israel nyicún ñi ley Nyoo tsa tyaá ra Moisés

<sup>17</sup> Maa tyin nyooho nyivi Israel cuví ndo, catyí ndo. Tan nyitá iñi ndo ley Nyoo tsa tyaá ra Moisés. Tan nduyaá ñi maa ndo tyin catyí ndo tyin nyivi Nyoo cuví ndo. <sup>18</sup> Tan tsitó ndo kuhva cuñí Nyoo tan ley can janahá tsi tsi ndo tsa nacatsí ndo tsa vaha. <sup>19</sup> Tan cuñí tucu ndo tyin vaha jaquihín ityi ndo tsi nyivi cuaa, ñi tsa ña tsitó ley. Jandunditsín ndo nu yucú nyivi nu naa, cuñí maa ndo. <sup>20</sup> Tan cuñí tucu ndo tyin tsitó ndo tandihí ley Nyoo tan jaquihín ityi ndo tsi nyivi tsa ña tsitó, ñi tsa ñaha ca caca vaha tsihin Nyoo. <sup>21</sup> Tatun tsitó ndo jacuahá ndo tsi inga nyivi, ¿nacuenda ña jacuahá ndo tsi maa ndo? Catyí ndo tyin ña vaha suhu yo, ¿nacuenda tyin suhú ndo? <sup>22</sup> Juvin ñi catyí ndo tyin ña vaha coo inga ñaha tsi iin rayi, o inga rayi tsi iin ñaha, ¿nacuenda tyin maa ndo javahá ndo tacan? Ndasí cuñí ndo nyehe ndo tsitoho, ¿nacuenda tyin suhú ndo ndaha tyiñu tsa iyó tsitsi vehe ñuhu can? <sup>23</sup> Nduyaa ndo tsihin tsa tsitó ndo ley Nyoo, tan tsahá ndo ticanuu tsi ra tyin ña tyaá yahvi ndo ley ra. <sup>24</sup> Yacan cuenda catyí tuhun Nyoo tyehen: “Nyivi tsa ñavin nyivi Israel cuví, caahán ñi ndavaha ñi siqui Nyoo tsacatyí nyooho.”

<sup>25</sup> Nditsa tyin circunción tsa cuví tuñi Nyoo, tsa janahá tyin cuví yo nyivi ra, cuví jatyinyee tsi tsi ndo. Jatyinyee tsi tsi ndo tun tyaá yahvi ndo ley Nyoo tsa tyaá ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can. <sup>26</sup> Maa tyin rayi tsa nduve tuñi Nyoo nyisó, tan javahá ra kuhva catyí ley can, cua naquihin Nyoo tsi ra tumaa tsatyin nyisó ra tuñi can. <sup>27</sup> Ra tsa ña nyisó tuñi can, tan tyaá yahvi ra ley Nyoo, cua jacutuñi ra tsi nyooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo

tuñi Nyoo. <sup>28</sup> Vasu ndi maa cuví ndo nyívi Israel tan nyisó ndo tuñi ra, ña cuví cuví ndo nyívi Nyoo tun nduve ley ra iyó añima ndo. <sup>29</sup> Tyin nyívi iyó ley Nyoo añima, ñi ican cuví nyívi Nyoo. Tyin maa Tatyí Ii Nyoo tyaḡ tuñi ra añima ñi, tan ñavin cuñu ñuhu ñi. Tatyí Ii Nyoo javahḡ can, ñavin ley tsa tyaḡ ra Moisés. Nyívi ihya cua cuví nyívi vaha nuu Nyoo, tan ñavin nuu nyívi.

**3** ¿Nacaa jatyinyeé tsa cuví yo nyívi Israel tsi yo? ¿O nácaa jatyinyeé tuñi Nyoo tsi yo? <sup>2</sup> Cuaha cuhva jatyinyeé tsi tsi yo. Iin cuhva jatyinyeé tsi tsi yo tyin Nyoo tsahḡ ra ley maa ra tsi yo tsa cuví yo nyívi Israel.

<sup>3</sup> ¿Náa cua cuví? ¿A cua jandihí Nyoo tsa javaha ra tsa catyí ra tyin javaha ra tun juhva yoo tan ña tsinú iñi yo tsi ra? <sup>4</sup> ¡Na cua jandihí ra! Na cutuñi iñi yo tyin Nyoo ña vatya ra. Vasu ndi maa tandihí nyívi vatya ñi, ra ican javahá ra tandihí tsa caahán ra. Tyin catyí nu tutu ra tyehen:

Jutu Mañi yu, cua nyehe nyívi tyin ña vatya un.

Tan cua coto ñi tyin nditsa tsa caahán un.

<sup>5</sup> Tsa caquiñi tsa javahá tandihí yoo, tsa iyó nu ñuhu ñayivi ihya, janahá tyin Nyoo vaha ra. [Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuví yo tsihin Nyoo.] Tun tacan ¿a cua catyí yo tumaa catyí nyívi tyin ña vaha tsa tatsi tuñi Nyoo tsi yo tyin janahá yo tyin vaha ra? <sup>6</sup> Nyívi catyí ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandihí yo.

<sup>7</sup> Tatun javahá nyívi tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyí ñi tyin ña taahán tsi, maa tyin ña nditsa. <sup>8</sup> Tun tsatyin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyívi tyin Nyoo vaha ra. Yihé ñi catyí ñi tyin tacan jacuahá ndi. Tan ñi tsa caahán tyehen cua tatsi tuñi Nyoo tsi ñi tsacatyí tsa caahán ñi cuendu siqui ndi.

### Tandihí yo tan iyó cuatyí yo

<sup>9</sup> Tan nácaa ¿a vaha ca yoo tsa cuví yo nyívi Israel tan ñavin ca inga nyívi? Ña vaha ca yo. Tyin tsa yahḡ janahḡ yu tsi ndo tyin tandihí yo tan iyó cuatyí yo. An cuví yo nyívi Israel, o ña cuví yo nyívi Israel, maa tyin ndacá ñaha cuatyí tsi yo. <sup>10</sup> Tacan catyí nu tutu Nyoo, nu catyí tsi tyehen:

Ndi intuhun nyívi vaha nduve iyó.

<sup>11</sup> Nduve nyívi cuñí cutuñi iñi tuhun Nyoo.

Yoñi cuñí nanducu tsi ra.

<sup>12</sup> Tandihí ñi nacoḡ ñi tsi Nyoo, tan tandihí ñi tan cua-naḡ ñi.

Ndi intuhun ñi tan ña javahá ñi tsa vaha.

<sup>13</sup> Jucun ñi cuví tsi tumaa iin ñaña ndiyi tsa ticohó.

Tan tsihin yaa ñi caahán ñi cuendu.

Yihé venenu coo yuhu ñi tyin caahán ñi tsi tahan ñi.

<sup>14</sup> Maa ñi tsa ndvaha ñi caahán ñi.

<sup>15</sup> Yatyí xaan tsahñí ñi tsi tahan ñi.

<sup>16</sup> Janyehé ñi tundoho tan tucuihaya iñi tsi nyívi tsihin cuhva iyó ñi.

<sup>17</sup> Tan ña tsitó ñi nácaa coo taxin ñi tsihin Nyoo, tan ndi tsihin nyívi.

<sup>18</sup> Ndi ña tsicá iñi ñi tatun coo iin quívi cua tatsi tuñi Nyoo tsi ñi, catyí tuhun Nyoo nu tutu ra.

<sup>19</sup> Tsitó yo tyin tandihí tsa caahán ley Nyoo tsa tyaḡ ra Moisés, cuví tsi tsa cuenda nyívi tsa yihí ndaha ley can, tyin tacan tan ña cuví catyí ñi tyin nduve cuatyí ñi iyó. Maa tyin coto tandihí nyívi iyó nu ñuhu ñayivi tyin cua tatsi tuñi Nyoo tsi ñi tsa cuenda cuatyí ñi. <sup>20</sup> Ley can ña cuví janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyí yo.

### Tsa cuenda tsa tsinú iñi yo tsi Nyoo tan nduvaha yo nuu ra

<sup>21</sup> Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tsa cuenda ley tan nduvahá yo. Ley ihya tan ra cuví ndusu yuhu Nyoo janahá nácaa coo vaha yo tsihin Nyoo.

<sup>22</sup> Tyin tsa cuenda tsa tsinú iñi yo tsi ra Jesucristo tan naquihín Nyoo tsi yo tumaa tsatyin vaha yo. Tan ña nacatsí ra tsi yo an cuví yo nyívi Israel o ñavin.

<sup>23</sup> Tandihí yo tan iyó cuatyí yo, tan tsa cuenda yacan ña cuví quihvi yo nu ndacá ñaha Nyoo. <sup>24</sup> Maa tyin tsahá maa ra tsa vaha ra tsi yo, tan yacan jahá tsa naquihin cuenda ra tsi yo tumaa tsatyin vaha yo, tyin tsa yahḡ tyahvi ra Cristo Jesús tsa cuenda cuatyí yo. Tan yacan cuenda ña tsicán ca ra yahvi tsi yo. <sup>25</sup> Nyoo jaquitsi ra tsi ra Cristo tyin cúu ra nu cruu tan cati ra niñi ra tsa cuenda cuatyí yo. Tan vityin jaha Nyoo tucahnu iñi tsi yo tatun tsinú iñi yo tsi ra Cristo. Tacan cuví, tyin nyehe nyívi tyin Nyoo javahá ra tsa vaha. Tahḡn tsanaha, Nyoo ña tñin cuenda ra cuatyí nyívi tsa cuenda tyin cua quitsi ra Cristo tan janaa ra cuatyí ñi. <sup>26</sup> Tan tacan cuví tyin vityin nyehé nyívi tyin Nyoo tacan ñi maa vaha ra, tan naquihin ra tsi tandihí yo tsa tsinú iñi tsi ra Jesús tumaa tsatyin vaha yo.

<sup>27</sup> ¿A cuví nduyaa yo vityin? Ña cuví. ¿Nacuenda? Tsa cuenda tyin ña cuví catyí yo tyin javahá yo tandihí tsa catyí ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú iñi yo tsi ra.

<sup>28</sup> Tsa tsitó yo vityin tyin Nyoo naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra Cristo, tan ñavin tsa cuenda tsa javahá yo tsa catyí ley o ña javahá yo itsi.

<sup>29</sup> ¿A Nyoo cuenda nyívi Israel ñi cuví Nyoo? ¿A ñavin juvin ñi cuví tucu ra Nyoo nyívi tsa ñavin ñi Israel cuví? Juvin ñi cuví tucu ra Nyoo ñi can. <sup>30</sup> Tyin intuhun ñi maa ra iyó. Tan naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra, a iyó tuñi ra cuñu ñuhu yo tumaa tsa iyó tsi tsi nyívi Israel, o nduve.

<sup>31</sup> Tatun tacan, ¿a cuñí tsi catyí tyin nduve ca yahvi nyaá ley tsahnu can? ¡Ñavin tsa nduve yahvi nyaá tsi! Cahnu cuví tsi, tan vityin tsihin tunyee iñi maa ra Cristo janahá yo tyin nditsa tsa cahnu cuví tsi.

### Cuhva tsicoo ra Abraham janahá tsi tsi yo nácaa nduvahá yo nuu Nyoo

4 ¿Náa catyí yo tsa cuenda ra Abraham, tsii tsaahnu yo? ¿Nacuenda naquihín cuenda Nyoo tsi ra tumaa tsatyin vaha ra? <sup>2</sup> Tun tsatyin naquihín cuenda Nyoo tsi ra tsa cuenda tsa javahá ra tsa vaha, cuví nduyaa ra tsihin can, maa tyin ñavin nuu Nyoo. <sup>3</sup> ¿Náa catyí nu tutu Nyoo? Catyí tsi tyin ra Abraham tsinú iñi ra tsi Nyoo, tan tsa cuenda yacan, Nyoo naquihín ra tsi ra tumaa tsatyin vaha ra. <sup>4</sup> Vaha, vityin cua cuhva yu iin cuhva tsi ndo: Ra jahá tyiñu, quihín ra yahvi tsa cuenda tyiñu jahá ra tan ña tuhvá nyivi cuhva maa xuhun tsi ra tun ña jahá tyiñu ra. <sup>5</sup> Maa tyin iin ra tsa ña jahá tyiñu tan ñihi ra tsa ñihi ra, ñihi ndaahvi ra itsi cuví can. Tacan cuví nyivi iyó cuatyí tsa ña nducú cacu tsihin tsa javahá ñi cuhva catyí ley, tan tsinú iñi ñi tyin Nyoo naquihín cuenda ra tsi yo tumaa tsatyin vaha yo tun tsinú iñi yo tsi ra. <sup>6</sup> Ra David cahān ra siqui tsa siñi cuví tsi nyivi tsa naquihín cuenda Nyoo tumaa tsatyin vaha ñi tan ña tñn cuenda ra cuatyí tsa javahá ñi. <sup>7</sup> Tyehen catyí ra David:

Siñi xaan cuví tsi nyivi tsa jahā Nyoo tucahnu iñi tsi tan ña jahā ra cuenda cuatyí ñi.

<sup>8</sup> Siñi xaan cuví tsi ñi tsa ña tñn cuenda Nyoo cuatyí.

<sup>9</sup> ¿A cuñí maa ndo tyin tsa cuenda nyivi nyisó tuñi Nyoo ñi cuví tusiñi iñi ihya, o cuví tucu tsi tsa cuenda nyivi ña nyisó tuñi can? Tsa yahā catyí yo tyin Nyoo jahā ra tyin vaha ra Abraham tsa cuenda tsa tsinú iñi ra tsi ra. <sup>10</sup> ¿Ama javahā Nyoo yacan tsihin ra Abraham? ¿A tsa ndi cumañi ca cunyaa tuñi can tsi ra, o tsa tsa yahā? Ñavin tsa tsa yahā, tyin tsa ndi cumañi ca. <sup>11</sup> Yahā tsa naquihín Nyoo tsi ra Abraham tumaa tsatyin vaha ra, tacan tan tsinyaā tuñi can tsi ra tumaa iin seña tyin tsa yahā nduvahā ra nuu Nyoo tsa cuenda tsa tsinú iñi ra tsi ra. Tan tsa cuenda yacan cuví ra Abraham tumaa jutu tandihí yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo. <sup>12</sup> Nditsa tyin ra Abraham cuví tucu ra jutu nyivi Israel, tandihí ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinú iñi maa ra Abraham, tsii tsahnu yo, quivi tsa ñaha ca cunyaa tuñi can tsi ra.

### Tsihin tsa tsinú iñi yo ñihí yo tsa tsahá Nyoo tsi yo

<sup>13</sup> Nyoo catyí ra tsihin ra Abraham tan tsihin tata ra tyin cua cuhva ra tsa cua cundaca ñaha ñi ñuhu ñayivi tsihin ra. Maa tyin tsa cahān Nyoo can tsihin ra, ñavin tsa cuenda tyin javahá ra tsa catyí ley, maa tyin tsa cuenda tyin tsinú iñi ra tsi Nyoo, tan Nyoo naquihín ra tsi ra tumaa tsatyin vaha ra. <sup>14</sup> Tun tsatyin maa ñi maa nyivi tsa javahá cuhva catyí ley, cua ñihi tsa cua cuhva Nyoo, nduve náa catyí tsinú iñi yo tsi ra, tan nduve yahvi nyaá tsa catyí ra tyin cuhva ra tsa cua cuhva ra tsi yo tun tsinú iñi yo tsi ra. <sup>15</sup> Tyin ley can janahá tsi tyin taahán tsi tatsi tuñi Nyoo tsi yo tatun ña javahá yo

cuhva catyí tsi. Maa tyin tun tsatyin nduve ley iyó, ña cua coo cuatyí yo.

<sup>16</sup> Yacan cuenda ñihí yo tsa catyí Nyoo tyin cuhva ra tsi yo tsa cuenda tsa tsinú iñi yo tsi ra, tyin tacan tan cuví tsi tumañi iñi tsa tsahá ra tsi tandihí yoo tsa cuví tata ra Abraham. Ñavin maa ñi nyivi tsinú iñi tsi Nyoo tan tyaá yahvi ley tsa tyaā ra Moisés cua ñihi tsa cua cuhva Nyoo, tyin cua ñihi ndihí tucu nyivi tsa ña nyitá iñi ley, tatun tsinú iñi ñi tsi ra tumaa tsa tsinú iñi ra Abraham. Ra ihya cuví jutu tandihí nyivi tsa tsinú iñi tsi Nyoo. <sup>17</sup> Tyin catyí ra nu tutu ra tyehen: “Yooho cua cuví tumaa jutu nyivi cuaha tsa cua coo nu ñuhu ñayivi”, catyí ra tsihin ra Abraham. Tan tsa catyí ra tacan, cuñí tsi catyí tyin cuví yo tata ra Abraham nuu Nyoo. Tsinú iñi ra tsi Nyoo, tyin Nyoo janandotó ra ndiyi tan caahán ra tuhun tsa ñaha ca coo tumaa tsatyin tsa iyó tsi.

<sup>18</sup> Ra Abraham tsa tsahnu xaan ra quivi tsa catyí Nyoo tyin cua coo sehe ñasiñi ra, tan tsitó ra tyin ña cuví ca coo sehe ñi. Maa tyin tsinú iñi ra tan ñihí ra tsa cahān Nyoo tsihin ra. Tan cuví ra jutu nyivi cuaha, tumaa cahān maa Nyoo tsihin ra: “Tyehen cua nducuaha nyivi tata un”. <sup>19</sup> Vasu ndi maa tsa yatyin ña iin cientu cuiya ra Abraham, ña jandihí ra tsa tsinú iñi ra. Tahan ñi maa ra tan ña Sara ñasiñi ra, ña cuví ca coo sehe ñi, tyin tsa cuyatyin cuii cúu ñi tyin tsahnu xaan ñi. <sup>20</sup> Maa tyin ña ndu uví iñi ra tsa cua ñihi ra tsa catyí Nyoo tyin cuhva ra tsi ra. Tsinú iñi ra tsihin tsa ñi iñi añima ra. Tan ña jandihí ra tsa nyitá iñi ra tsi Nyoo. Tan jacahnú ra tsi Nyoo, <sup>21</sup> tsa cuenda tyin tsitó vaha ra tyin Nyoo iyó tunyee iñi tsi ra tsa javaha ra tsa catyí ra tsihin ra. <sup>22</sup> Yacan cuenda Nyoo naquihín ra tsi ra tsa cuenda tsa tsinú iñi ra tsi ra.

<sup>23</sup> Tuhun tsa nyaá nu tutu Nyoo tsa catyí tyin naquihín Nyoo tsi ra Abraham tsa cuenda tsa tsinú iñi ra tsi ra, ñavin tsa cuenda ra Abraham ñi cuví tsi, <sup>24</sup> tyin tsinyaā tucu tsi tsa cuenda yoo. Tyin naquihín Nyoo tsi yo tsa cuenda tsa tsinú iñi yo tsi ra, tyin juvin ra janandotó tsi ra Jesús, Jutu Mañi yo. <sup>25</sup> Ra Jesús quitsi ra quitsi cúu ra tsa cuenda cuatyí yo, tan nandotó ra tyin tacan tan cuví nduvaha yo nuu Nyoo.

### Tsa cua ñihi yo tsa cuenda tsa nacoo vaha yo tsihin Nyoo

5 Tsa yahā nduvahā yo nuu Nyoo tsa cuenda tsa tsinú iñi yo tsi ra. Tan vityin iyó vaha yo tsihin ra jahā Jutu Mañi yo Jesucristo. <sup>2</sup> Tyin tsa cuenda ra Cristo ñihí yo tsa vaha Nyoo tyin tsinú iñi yo tsi ra. Tan iin cuñí yo tyin tsa naquihín yo can. Tan siñi cuñí yo tyin cua cuhva ra tsa cahnu cuví yo tan javaha yo tsa cuñí maa ra tyin javaha yo. <sup>3</sup> Tan ñavin tsa cuenda yacan ñi taahán tsi cusíñi iñi yo, tyin taahán tucu tsi cusíñi iñi yo tun nyehé yo tundoho. Tyin tsitó yo tyin tun cunyee iñi yo nyehé yo tundoho, tacan cua cunyee iñi yo cuatu yo nda cuanda ñihi yo tsa cua cuhva Nyoo tsi yo. <sup>4</sup> Tatun cunyeé iñi yo yahá yo tandihí tundoho, siñi cuñí Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra. <sup>5</sup> Tatun tsitó yo tyin cua quita va-



ha yo nuu ra, ña taahán tsi nducahan nuu yo nyehé yo tsi ra, tyin Tatyí Ii ra tsa tsahá ra coo añima yo janahá tsi tsi yo tyin cuñí xaan ra tsi yo.

<sup>6</sup> Tsanaha yoo ña ñihí yo kuhva jacacú maa yo tsi yo. Tacan tan quiví tahán maa tsi quítsi ra Cristo, quítsi cúu ra tsa cuenda cuatyí yo. <sup>7</sup> Tsitó yo tyin ndi intuhun yo tan ña cana iñi yo cúu yo tsa cuenda inga nyívi, vasu ndi maa vaha ñi. Maa tyin tun vaha xaan iñi nyívi can vasiquí cahnya iñi iin yo cúu yo tsa cuenda ñi. <sup>8</sup> Maa tyin Nyoo jaquítsi ra tsi ra Cristo, tan yacan janahá tsi yo tyin cuñí xaan ra tsi yo. Quítsi ra quítsi cúu ra tsa cuenda yo vasu ndi maa iyó xaan cuatyí yo. <sup>9</sup> Tan tsa cuenda tsa tsihí ra Cristo, nacoq vaha yo tsihin Nyoo. Tan vityin tsitó vaha yo tyin cua cacu yo tan ña cua kuhun yo anyaya quiví cua tatsi tuñi Nyoo tsi nyívi ña tsinú iñi tsi ra. <sup>10</sup> Tahán tsanaha xaan iñi yo tsi Nyoo, maa tyin vityin iyó vaha yo tsihin ra tsa cuenda tsa tsihí ra Cristo, Sehe ra. Yacan cuenda tsa nyítá vaha iñi yo tyin cua jacacu ra tsi yo tsa cuenda tsa iyó yo ñayívi Sehe ra, tyin tsa iyó vaha yo tsihin ra. <sup>11</sup> Tan ñavin yacan ñi, taahán tucu tsi cusí iñi yo tsihin Nyoo tyin tsa cuenda Jutu Mañi yo Jesucristo tan nduvahá iyó yo tsihin ra.

#### Ra Adán tan ra Cristo

<sup>12</sup> Tsanaha intuhun ñi rayí tsicoq cuatyí, tan tsa cuenda intuhun ñi ra can tsaq cuatyí naní ñuhu ñayívi tan tsicoq tuhun tsiihí. Tan tuhun tsiihí can nacuña can tyin tandíhi nyívi tan tsicoq cuatyí ñi. <sup>13</sup> Tsanaha tsa ndi cumañi ca kuhva Nyoo ley ra tsi ra Moisés tan tsa iyó maa cuatyí nyívi, maa tyin ña tñn cuenda Nyoo cuatyí ñi tsa cuenda tyin nduve ley iyó. <sup>14</sup> Maa tyin nda cuanda quiví tsicoq ra Adán tan nda cuanda quiví tsicoq ra Moisés, tsindacá ñaha tuhun tsiihí tsi tandíhi nyívi tyin iyó cuatyí tandíhi ñi, vasu ndi maa ña javahá ñi tumaa javahá ra Adán tsa ña tyaq yahvi ra tsa cahán Nyoo tsihin ra. Ra Adán quítsi ra tsihin cuatyí, maa tyin ra Cristo quítsi ra jacacú ra tsi yo.

<sup>15</sup> Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihí cuaha nyívi. Tacan tucu vityin, Nyoo jacacú ra tsi yo tsa cuenda intuhun rayí, ra Jesucristo. Tan cahnu ca cuví tsa tsahá Nyoo tsi yo, tan tsa vaha tsi tandíhi nyívi cuví tsi. <sup>16</sup> Cuatyí ra Adán ña cuví jandu inducu yo can tsihin tsa jacacú Nyoo tsi yo. Tyin tsa cuenda intuhun ñi cuatyí can, Nyoo tatsí tuñi ra tsi tandíhi nyívi. Maa tyin vityin Nyoo ña cuñí ra yahvi tan jacacú ra tsi yo. Naquihín ra tsi yo tumaa tsatyin vaha yo, vasu ndi maa cuaha cuatyí yo tsicoq. <sup>17</sup> Nditsa tyin quítsahá ndacá ñaha tuhun tsiihí tsi tandíhi nyívi jahá cuatyí tsa javahá ra can, maa tyin vityin ña cuví ca quihí ndaha can tsi ñi tsa tsa nduvahá nuu Nyoo, ñi tsa iin nyita ñi naquihín tsa vaha ra. Ñi ican iyó ñi ñayívi tsa tan yihí ndaha ñi tsi ñi tan tsi nu ña vaha jahá intuhun rayí, ra Jesucristo.

<sup>18</sup> Nyoo tatsí tuñi ra tsi tandíhi nyívi iyó nu ñuhu ñayívi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra tan coo yo ñayívi nyito tsa

cuenda tsa vaha tsa javahá ra Jesucristo. <sup>19</sup> Cuñí tsi catyí tyehen: Tsa cuenda tsa ña tyaq yahvi iin rayí tsa cahán Nyoo, cuaha xaan nyívi tsicoq cuatyí. Ra ican cuví ra Adán. Tan vityin cuaha xaan nyívi cua nduvaha nuu Nyoo tsa cuenda tsa tyaq yahvi inga ra tsa cahán Nyoo. Tan ra ican cuví ra Cristo.

<sup>20</sup> Nyoo tsahá ra ley tsi ra Moisés tyin tacan tan coto nyívi tyin iyó cuatyí ñi. Tan vasu ndi maa nducuahá ca cuatyí tsa cuenda ley can, tsa vaha Nyoo nducuahá tucu tsi tyin cahnu ca tucahnu iñi iyó tsi ra tsihin yo.

<sup>21</sup> Tahán tsanaha, cuatyí yo quítsi ndaca tuhun tsiihí, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayívi nyito tsa ña cua naa maa coo yo tsa cuenda Jutu Mañi yo Jesucristo.

#### Ña cua javaha ca yo tsa caquiñi tyin cua javaha yo kuhva catyí ra Cristo

**6** ¿Náa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu iñi tsi ra tsihin yo? <sup>2</sup> Ña vaha. Tyin yoo tsa tsa ndu uví iñi cuatyí tumaa tsa tsihí cuatyí yo cuví can. Tan yacan cuenda, ña cuví ca javaha yo tsa caquiñi vityin. <sup>3</sup> ¿A ña tsitó ndo tyin tsa tsicoondutyá yo janahá tsi tyin ndu iin yo tsihin ra Cristo Jesús? Yacan cuñí tsi catyí tyin tsa yahá tsihí yo tsihin ra. <sup>4</sup> Tsa quihví yo tsitsi ndutya tsa tsicoó ndutya yo cuví tsi tumaa tsa tsihí yo tan quihví ñuhu yo tsihin ra Cristo tsa tsihí ra. Tan tumaa tsa nandotó ra Cristo jahá Nyoo tsihin tunyee iñi ra, tacan nandotó tucu yo tsa quitá yo tsitsi ndutya tsa tsicoondutyá yo. Tan vityin iyó yo ñayívi tsa tsihin ra.

<sup>5</sup> Tumaa tsa tsihí ra Cristo, tacan tsihí tucu cuatyí yo, tyin tacan tan ña javahá ca yo tsa caquiñi. Tan tumaa tsa tsihí yo tsihin ra, tacan cua nandoto tucu yo tumaa nandotó ra. <sup>6</sup> Tan tsitó yo tyin tandíhi kuhva tsicoq yo tahán tsanaha, tsa yaha tsihí can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyí yo tsi yo, tan ña javaha ca yo cuatyí. <sup>7</sup> Tyin nyívi tsa tsa yahá tsihí, ña cuví ca javaha ñi tsa caquiñi. <sup>8</sup> Tan yoo tsa tsa tsihí tsihin ra Cristo, nyítá iñi yo tyin cua coo yo tsihin ra. <sup>9</sup> Tsitó yo tyin ra Cristo nandotó ra tsa yahá tsihí ra, tan vityin ña cúu ca ra tyin nduve ca tunyee iñi iyó tsi tuhun tsiihí tsa cahñi can tsi ra. <sup>10</sup> Ra Cristo iin tsaha ñi tsihí ra, tan tsihí ra tsa cuenda cuatyí yo, tan ña cua cúu ca ra. Vityin iyó ra, tan iyó ra tsa cuenda maa Nyoo. <sup>11</sup> Tan tacan tucu nyoocho, ña javaha ca ndo tsa caquiñi. Ña naa iñi ndo tyin tsa yahá tsihí ndo tan tsa tsindíhi cuatyí ndo. Tan coo ndo kuhva cuñí Nyoo tsihin tsa iin ñi cuví ndo tsihin ra Cristo Jesús Jutu Mañi yo.

<sup>12</sup> Yacan cuenda ña kuhva ca ndo tsa jaha canaa cuñu ñuhu cuatyí ndo tsi ndo. Ña kuhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñí tsi. <sup>13</sup> Ña kuhva ndo ndatu tsi cuñu ñuhu ndo tsa javaha ndo tsa caquiñi. Nacuhva cuenda ndo tsi ndo tsi Nyoo, tyin tsa yahá tsihí yo tan nandotó yo. Kuhva cuenda ndo cuñu ñuhu ndo tsi Nyoo tyin tacan tan

javaha ndo tsa vaha. <sup>14</sup> Tyin nduve ca tunyee iñi iyó tsi cuñu ñuhu cuatyí yo tsa cundaca ñaha can tsi yo. Tyin ñavin ca ley tsa tyaá ra Moisés yihí ndaha tsi yo; tyin vityin tsa vaha tsa tsahá Nyoo tsi yo, yacan yihí ndaha tsi yo.

### Musu tsa javahá tsa vaha

<sup>15</sup> ¿Náa cua javaha yo vityin? ¿A cua javaha ca yo cuatyí tsa cuenda tsa iyó yo tsihin tsa vaha Nyoo tan tsa cuenda tyin ña ndacá ñaha ca ley tsi yo? Ñavin. <sup>16</sup> Nyoooho tsitó vaha ndo tyin iin musu, taahán tsi javaha ra tsa caahán tsitoho ra. Tan tacan cuví yo musu tsa tuhvá yo tyaá yahvi. Tun tyaá yahvi yo tsa caquiñi, musu tsa caquiñi can cuví yo, tan cua cunaa yo jahá tsa caquiñi can tyin tyaá yahvi yo tsi can. Maa tyin tun tyaá yahvi yo tsi Nyoo, cua cuví yo nyivi vaha nuu ra. <sup>17</sup> Tyahvi nyoo tsi Nyoo, tyin vasu ndi maa nu quitsj tsi cuví ndo musu tsa caquiñi maa tyin vityin tyaá yahvi ndo tuhun Nyoo tsa cutuhvā ndo tsihin tsa ñi iñi añima ndo. <sup>18</sup> Tsa yahā ndatsj cuatyí ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo. <sup>19</sup> (Caahán yu tsihin ndo cuhva tsa ña yñi ñi cutuñi iñi ndo tyin nyoooho ñaha ca cutuñi vaha iñi ndo tuhun Nyoo.) Tumaa tsa tsahā cuenda ndo cuñu ñuhu ndo tsi tsa caquiñi tahañ tsanaha tan javahā ndo tsa ña vaha; tacan tucu vityin cūhva cuenda ndo cuñu ñuhu ndo tsi Nyoo tyin tacan tan coo ndo ñayivi cuiti, tan javaha ndo maa ñi maa tsa vaha nuu ra.

<sup>20</sup> Quivi tsiquihj ndaha cuñu ñuhu cuatyí ndo tsi ndo, musu can cuví ndo, tan ña yihj ndaha tsa vaha Nyoo tsi ndo. <sup>21</sup> Maa tyin nduve náa ñihj ndo tsihin can, tan vityin cahán nuu ndo tsa cuenda tsa javahā ndo tsanaha, tyin maa ñi tuhun tsiihí tsahá can. <sup>22</sup> Maa tyin vityin ña ndacá ñaha ca cuatyí tsi ndo tyin tsa tsahā cuenda ndo tsi ndo tsi Nyoo. Tan vaha xaan tyin maa ñi tsa cuñí Nyoo javahá ndo. Tan nu cua ndihj tuhun cua coo cuii ndo tsihin Nyoo. <sup>23</sup> Nyivi tsa javahá tsa caquiñi, cua cúu ñi. Maa tyin Nyoo tsahá maa ra ñayivi tsa ña cua naa maa coo yo tsa cuenda tsa iin ñi cuví yo tsihin ra Cristo Jesús, Jutu Mañi yo.

### Ley tsahnu ña ndacá ñaha ca tsi tsi nyivi yihí cuenda ra Cristo

**7** Yañi, nyoooho tsa tsitó ley, tsitó ndo tyin tsitsi tsa ndi nyito nyivi yihí ndaha ley tsi ñi. <sup>2</sup> Tumaa iin ñaha tsa iyó yñi, catyí ley tyin coo ña tsihin yñi ña nda cuenda cúu ra. Maa tyin juvin ñi catyí tucu ley tun cúu yñi ña tan nandoo ndahvi ña, ña cua quihj ndaha ca ley can tsi ña. Tan cuví tindaha ña tsihin inga rayñi tan ña cua coo cuatyí ña. Maa tyin tsitsi tsa ndi iyó yñi ña, ña cuví coo ña tsihin inga rayñi, tyin tun cua javaha ña tacan, cua coo cuatyí ña nuu Nyoo.

<sup>4</sup> Tan tacan tucu nyoooho yañi. Tsanaha ley Nyoo tsa tyaá ra Moisés yihj ndaha tsi tsi ndo tumaa yihí ndaha iin rayñi tsi ñasihj ra. Maa tyin vityin tsa yahā tsihñi ndo tan ña ndacá ñaha ca ley can tsi ndo. Tyin vityin ndacá

ñaha inga rayñi tsi ndo tan juvin ra cuví ra Cristo, ra tsa nandoto jahā Nyoo. Tyehen cuví tsehe tyin tacan tan cuatyíñu Nyoo tsi yo. <sup>5</sup> Tahañ tsanaha tsicoq yo cuhva cuñí cuñu ñuhu yo tan ley tsahnu tsa tyaá ra Moisés catyí tsi tyin ña vaha javaha yo tsa caquiñi. Tan tsa caahán tsi tacan, yoo quitsahā cuñí ca yo javaha yo tsa caquiñi tsa cuñí cuñu ñuhu yo. Tan yacan tsahā tuhun tsihñi tsi yo. <sup>6</sup> Maa tyin vityin ña ndacá ñaha ca ley tsahnu can tsi yo, tyin tsa yahā tsihñi cuñu ñuhu cuatyí yo tsihin ra Cristo. Tan vityin tsa iyó yo ñayivi nyito tsa tsahá Tatyí Ii Nyoo tsi yo, na jaha tyiñu yo tyiñu Nyoo tan ña javaha ca yo tumaa javahā yo quivi yihj ndaha ley tsahnu tsi yo.

### Ley Nyoo janahá tyin iyó cuatyí yo

<sup>7</sup> ¿Náa cua catyí yo? ¿A catyí yo tyin ña vaha ley can? Ñavin tsa ña vaha tsi. Vaha tsi. Tyin tun tsa ña tsahā Nyoo ley can, ña cua coto yu náa cuví cuatyí. Tan ndi ña cua coto yu tyin ña vaha nyiyo iñi yu tsa tsii inga nyivi, tun tsatyin ña catyí ley can tyin ña vaha nyiyo iñi yo. <sup>8</sup> Tun tsatyin nduve ley can iyó, ña cua coto yu náa cuví cuatyí, tan ña cua cuñi yu javaha yu tsa ña vaha. Maa tyin quivi tsa tsitó yu ley Nyoo, quivi can quitsahā tsicá iñi yu javahá yu tsa ña vaha. Nu nduve ley iyó, ña tsitó nyivi náa cuví tsa ña vaha. <sup>9</sup> Quivi tsa ña tsitó yu náa cuñí tsi catyí ley Nyoo tsa tyaá ra Moisés, nyito yu. Maa tyin quivi cutuñi iñi yu tsa caahán ley can, cutuñi iñi yu tyin nuu Nyoo tsa tsihñi yu jahā cuatyí yu. <sup>10</sup> Catyí ley can tyin tatun tyaá yahvi nyivi itsi, cua coo cuii ñi ñayivi nyito. Maa tyin yuhu tsihñi yu nuu Nyoo jahā ley can tyin ña tyaá yahvi yu itsi. Tyin catyí tsi tyin nyivi tsa ña tyaá yahvi itsi, taahán tsi cunaa ñi nuu Nyoo. <sup>11</sup> Cuatyí yu tsatyíñu can ley can, tan jandavj ñaha can tsi yu, tyin catyí ley tyin tatun ña tyaá yahvi yo itsi, taahán tsi cunaa yo nuu Nyoo.

<sup>12</sup> Ley can ii xaan tsi tyin tuhun tsahā maa Nyoo cuví tsi, tan tandihj tsa catyí ra tyin javaha yo, vaha tsi, tan cuiti xaan tsi. <sup>13</sup> Tan ñavin ley vaha ihya jacunaq tsi yu. Tyin tsa ña vaha tsa javahā yu, yacan jacunaq tsi yu. Yacan cuenda cunaq yu nuu Nyoo tyin ley vaha can janahā tsi yu tyin cuatyí cuví tsa javahā yu tsa ña vaha. Tacan tucu vityin ley can janahá tsi tsi yo tyin yaha xaan ña vaha cuví cuatyí javahá yo.

### Nu tsahá cuenda ra Pablo tsi yo cuhva iyó yo tun ña tsahá yo cundaca ñaha ra Jesucristo tsi yo

<sup>14</sup> Tan tsitó yo tyin maa Tatyí Ii Nyoo tsahā ley can, yacan cuenda vaha tsi. Maa tyin yuhu iyó cuatyí yu tyin ra ñayivi cuví yu. Javahá yu tsa caquiñi tyin maa cuatyí can ndacá ñaha tsi yu. <sup>15</sup> Ña cutuñi iñi yu náa taahán yu, tyin tsa vaha tsa cuñí yu javaha yu, ña javahá yu can. Maa tyin javahá yu tsa ña vaha tsa ña cuñí yu javaha yu. <sup>16</sup> Tan tsa javahá yu tsa ña cuñí yu javaha yu, tsihin yacan nacotó yu tyin ley Nyoo vaha tsi. <sup>17</sup> Yacan cuñí tsi catyí tyin ñavin maa yu javahá tsa ña vaha, tyin cuatyí tsa iyó tsi yu, yacan javahá tsa ña vaha. <sup>18</sup> Yuhu tsitó yu tyin cuñu ñuhu yu nduve tsa vaha iyó. Vasu ndi

maa cuñi yu javaha yu tsa vaha, ña cuví javaha yu can. <sup>19</sup> Ña javahá yu tsa vaha tsa cuñi yu javaha yu, jañihí ca yu javaha yu tsa ña vaha tsa ña cuñi yu javaha yu. <sup>20</sup> Tan tatun javahá yu tsa ña cuñi yu javaha yu, ñavin ca maa yu javahá can, tyin cuatyí tsa yihí ndaha tsi yu, yacan javahá can.

<sup>21</sup> Nacotó yu tsa taahán yu: tun cuñi yu javaha yu tsa vaha, yatyí xaan ca javahá yu tsa ña vaha. <sup>22</sup> Tsitsi añima yu taahán xaan iñi yu ley Nyoo. <sup>23</sup> Maa tyin iyó inga ley tan yacan yihí ndaha cuñu ñuhu yu tsihin añima yu. Ña tsahá can tsa javahá yu tsa taahán iñi añima yu. Tan ñihi yihí ndaha can tsi yu tumaa yihí ndaha ra vitya tsi iin ra nyíi vehe caa. <sup>24</sup> ¡Ndahvi yuhu ra ndaahvi! ¿Yóo cua jacacu tsi yu ndaha tsa ña vahá tsa cuñi cuñu ñuhu yu tan ña cahun yu anyaya? <sup>25</sup> Tsahá yu tyahvi nyoo tsi Nyoo tsa cuenda ra Jesucristo tyin intuhun ñi maa ra cuví jacacu tsi yu. Vityin cutuñi iñi yu tyin cuñi tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandihí tsa ña vaha tsa cuñi cuñu ñuhu yu javaha yu, yacan cua quihí ndaha tsi yu.

#### Tatyí Ii Nyoo jatyinyeé tsi tsi yo tan cuví coo yo ñayivi tsaa

**8** Maa tyin vityin, Nyoo ña tatsi tuñi ca ra tsi nyívi tsa iin ñi cuví tsihin ra Cristo Jesús, ñi tsa ña iyó ca cuhva cuñi cuñu ñuhu ñi tyin iyó ñi cuhva cuñi Tatyí Ii ra. <sup>2</sup> Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí Ii Nyoo tsi yo. Tan juven tsi tsahá ñayivi tsaa coo yo tsa cuenda tsa iin ñi cuví yo tsihin ra Cristo Jesús. <sup>3</sup> Nyoo javahá ra tsa ña cuví javaha ley tsa tyaa ra Moisés. Ley tsa tyaa ra Moisés ña cunyeé tsi jandihí tsi cuhva iyó nyívi. Yacan cuenda Nyoo jaquitsi ra tsi Sehe ra. Cuví ra tumaa rayi ñuu ñayivi tan tyahvi ra tsa cuenda cuatyí yo tyin tacan tan cundihí tsa javahá yo cuhva cuñi cuñu ñuhu yo. <sup>4</sup> Javahá ra tyehen tyin tacan tan cuví javaha yo cuhva catyí ley tan ñavin cuhva cuñi cuñu ñuhu yo tyin vityin iyó yo cuhva cuñi Tatyí Ii Nyoo.

<sup>5</sup> Nyívi tsa iyó cuhva cuñi cuñu ñuhu, maa ñi cuhva cuñi cuñu ñuhu ñi tsicá iñi ñi, maa tyin nyívi tsa iyó cuhva cuñi Tatyí Ii Nyoo tsicá iñi ñi cuhva cuñi Tatyí Ii Nyoo. <sup>6</sup> Nyívi tsa tsicá iñi maa ñi maa tsa cuñi cuñu ñuhu ñi, cua cunaa ñi. Maa tyin yoo tsa tsicá iñi cuhva cuñi Tatyí Ii ra, cua coo yo ñayivi tsaa, tan cua coo tsa taxin añima yo. <sup>7</sup> Nyívi tsa tsicá iñi cuhva cuñi cuñu ñuhu ñi, ñi xaan iñi tsi Nyoo cuví ñi can, tyin ña cuñi ñi javahá ñi cuhva catyí ley ra tan ndi ña cuví javaha ñi can. <sup>8</sup> Yacan cuenda nyívi tsa nducú tsa cuñi cuñu ñuhu ñi, ña cuví javaha ñi cuhva taahán iñi Nyoo.

<sup>9</sup> Maa tyin nyoo ña iyó ca ndo cuhva cuñi cuñu ñuhu ndo, tyin iin ñi cuví ndo tsihin Tatyí Ii Nyoo, tun nditsa tsa iyó Tatyí Ii Nyoo añima ndo. Nyívi tsa nduve Tatyí Ii ra Cristo iyó añima, ñavin nyívi cuenda ra Cristo cuví ñi. <sup>10</sup> Maa tyin tun iyó ra Cristo añima ndo, nyitó añima ndo tyin janduvahá Nyoo tsi ndo nuu ra. Maa tyin cuñu ñuhu ndo tumaa tsa tsihi tsi jahá cuatyí. <sup>11</sup> Nyoo janandoto ra tsi ra Jesús tsa yahá tsihi ra. Tan tacan tucu nyoo ña, tatun iyó Tatyí Ii ra añima ndo, cua

janandoto ra cuñu ñuhu ndo tsihin Tatyí Ii ra tsa iyó añima ndo.

<sup>12</sup> Tan tacan yañi, nyaá javaha yo tsa javaha yo, maa tyin ñavin tsa javaha yo cuhva cuñi cuñu ñuhu yo.

<sup>13</sup> Tyin tatun maa ñi maa cuhva cuñi cuñu ñuhu ndo iyó ndo, cua cunaa ndo nuu Nyoo. Maa tyin tatun tsihin Tatyí Ii Nyoo tan cuahán jandihí ndo tsa javahá ndo tsa caquiñi tsa cuñi cuñu ñuhu ndo, cua coo nyito ndo.

<sup>14</sup> Tyin tandihí yoo tsa javahá cuhva jaquihín ityí Tatyí Ii Nyoo, sehe Nyoo cuví tsi yo. <sup>15</sup> Nyoo ña naquihín cuenda ndo Tatyí Ii Nyoo tsa cundaca ñaha tsi ndo tan cuví ndo tumaa musu. Tyin naquihín ndo Tatyí Ii Nyoo tsa tsahá tsa cuví ndo sehe Nyoo. Tan juven ñi Tatyí Ii Nyoo tsahá tsa cahan yo tyehen tsihin Nyoo: "Tyatya". Yacan cuenda ña taahán tsi nayuhvi ndo. <sup>16</sup> Tan Tatyí Ii ra tsa naquihín yo ndu iin tsi tsihin tsa nyito yo tan jacotó tsi naha tsi tsi yo tyin cuví yo sehe Nyoo. <sup>17</sup> Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin cuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehé ra Cristo tundoho, quívi cua tahan tsi, Nyoo cua jacahnu ra tsi yo iin caa ñi tsihin ra Cristo.

<sup>18</sup> Tsitó yu tyin tundoho tsa nyehé yo vityin, luhlu cui ñi cuví tsi tan ña cuví jandu inducu yo tsi tsihin tsa sii caá tsa cua nyehé yo quívi tahan tsi. <sup>19</sup> Nyoo cua jannaha ra tandihí sehe ra tsi tandihí tsa javahá ra tyin ndatu tsi tan cuñi tsi naha tsi nyehé tsi naha tsi tsi nyívi cuví sehe ra. <sup>20</sup> Tandihí tsa javahá ra, tsa iyó nu ñuhu ñayivi tan andiví, tsa tiví tsi. Vasu ña cuñi tsi tiví tsi, maa tyin Nyoo tsahá ra tsa tiví tsi tsa cuenda cuatyí tsa javahá nyívi. Maa tyin catyí ra tyin coo quívi cua ndutsaa nyico tsi. <sup>21</sup> Tandihí tsa javahá Nyoo tan cua ndutsaa tsi inga tsaha, cua quita nuña tsi tan ña cua tiví ca tsi, tyin cua nasama Nyoo cuhva caá tsi vityin. Tan sii xaan cua cuñi tsi iin caa ñi tsihin tandihí sehe Nyoo tyin ña cua tiví ca tsi. <sup>22</sup> Tsitó yo tyin tandihí tsa javahá Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña. <sup>23</sup> Tacan tucu yoó tsa naquihín cuenda Tatyí Ii tsa tsahá jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñi yo tsa tahan ñi tsi quívi tsa nasama Nyoo cuhva iyó cuñu ñuhu yo tan nyehé tandihí tsa javahá ra tyin cuví yo sehe ra. <sup>24</sup> Vasu ndi maa ñaha ca ñihi yo tandihí can maa tyin tsitó yo tyin cua ñihi yo can tyin tsinú iñi yo. Tyin juven ñi tsihin tsa tsinú iñi yo tan cacú yo. Tatun tsa nyehé yo tsa ndatú yo, nduve yahvi nyaá cuatu ca yo can tyin tsa iyó maa can tsi yo. <sup>25</sup> Maa tyin ndita iñi yo tsa cua ñihi yo tsa ña nyehé yo, cuñi tsi tsa cunyeé iñi yo cuatu yo can.

<sup>26</sup> Tan juven ñi tacan jatyinyeé Tatyí Ii Nyoo tsi yo tun nduve tunyeé iñi iyó tsi yo tan ña tsitó yo nácaa ndacan tahvi yo tsi Nyoo cuhva taahán maa tsi. Tatyí Ii tsa iyó añima yo tsicán tahvi tsi tsi Nyoo tsa cuenda yo tsihin tuhun tsa ña cutuñi iñi yo. <sup>27</sup> Tsitó maa Nyoo náa iyó añima yo, tan tsitó ra náa tsicán Tatyí Ii ra, tsa cuenda yoo tsa cuví yo nyívi ra tyin tsicán tsi cuhva cuñi maa ra ndacan yo tsi ra.

### Tsa cuenda ra Cristo tan cuví jaha canaa yo síqui tundoho

<sup>28</sup> Tsitó yo tyin tandihí tundoho tsa nyehé nyívi tsa cuñí tsi Nyoo jatinyeé can tsi ñi, tyin maa Nyoo cuví ra nacatsí tsi ñi, tumaa cuhva tyaá maa ra cuhva. <sup>29</sup> Tyin nda quívi jihna ñi, tan tsa tsitó Nyoo yóo nyívi cua cuncicun tsi ra. Tan tyaá ra cuhva tyin cuví ñi sehe ra tan coo ñi cuhva cuñí ra. Maa tyin ra Jesucristo cuví ra cua cuví ra tsitsa tsa nuu tandihí ca yañi ra. Tan yañi ra cuví ñi yihé tuhun Nyoo. <sup>30</sup> Tan ñi tsa tyaá Nyoo cuhva tyin cuví ñi sehe ra, cana ra tsi ñi. Tan ñi tsa cana ra, naquihín cuenda ra tsi ñi tumaa tsatyin vaha ñi. Tan ñi tsa naquihín cuenda ra tsahá ra tsa cahnu cuví ñi tsihin ra.

<sup>31</sup> Yacan cuenda, ¿náa cua catyi yo? Tatun Nyoo tan nyaá ra tumañi iñi tsihin yo, ¿yóo cuví jaha canaa tsi yo? Yoñi. <sup>32</sup> Nyoo ña catyi ra tsa ña cua cuhva cuenda ra Sehe ra, tyin tsahá cuenda ra tsi ra tyin cúu ra tsa cuenda tandihí yo. Tun tacan tsahá ra Sehe ra tsa cuenda yo, ¿a ña cua cuhva ra tandihí ca tsa tsiñi ñuhu tsi yo? Cuhva ra. <sup>33</sup> ¿Yóo cuví xico ñaha tsi yo tsa cuví yo nyívi nacatsí Nyoo? Yoñi. Tyin Nyoo tsa naquihín cuenda ra tsi yo tumaa tsatyin vaha yo. <sup>34</sup> ¿Yóo cuví catyi tyin cuhun yo anyaya? Yoñi. Tyin ra Cristo tsa tsihí ra tsa cuenda cuatyí yo, tan nandotó ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo. <sup>35</sup> Nduve náa cuví quihin nyaá tsa cuñí xaan ra Cristo tsi yo. ¿A cuví quihin nyaá tundoho itsi, a tsihi, a tsa caahán nyívi tsi yo tsa cuenda tuhun Nyoo, a tama, a tun nduve jahma yo, a tsa yuuhví, a tuhun tsihi? Ndi intuhun tsehe tan ña cuví quihin nyaá can tsa cuñí ra Cristo tsi yo. <sup>36</sup> Tumaa catyi nu tutu Nyoo tyehen:

Jutu Mañi yu, tandihí ñi quívi tan cuñí nyívi cahñi ñi tsi ndi tsa cuenda un.

Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyi tsi.

<sup>37</sup> Vasu ndi maa cuaha tundoho yahá yo, maa tyin tandihí ñi tsaha tsa nyehé yo tundoho tan jahá canaa yo, tyin ra tsa cuñí xaan tsi yo jatinyeé tsi yo. <sup>38</sup> Yacan cuenda tsitó vaha yo tyin nduve maa náa cuví quihin nyaá tsa cuñí xaan Nyoo tsi yo. Ndi tuhun tsihi, ndi ñayívi iyó yo, ndi ángel, ndi tatyí ña vaha, ndi tsa cuví vityin, ndi tsa cua cuví ityí nuu ca, ndi intuhun can tan ña cuví jandusiin can tsi yo tsihin Nyoo. <sup>39</sup> Ndi tsa iyó nu sucun, ndi tsa iyó nu cunu, ndi inga tsa javahá Nyoo, ña cuví jandusiin can tsi yo tsihin Nyoo, ra tsa cuñí xaan tsi yo tsa cuenda ra Cristo Jesús Jutu Mañi yo.

### Nyoo nacatsí ra tsi nyívi Israel

**9** Yuhu tsinú iñi yu tsi ra Cristo tan caahán yu tsa nditsa. Ña jandaví ñaha yu, tyin maa Tatyí Ii Nyoo jaquihín ityí tsa tsicá iñi yu. Yacan cuenda tsitó vaha yu tyin tsa nditsa caahán yu tun catyi yu <sup>2</sup> cuihya xaan cuñí yu tan uhví xaan cuñí añima yu <sup>3</sup> tsa cuenda nyívi ñuu yu, ñi Israel. Cuñí xaan yu tsi ñi. Tan nda cuanda cuhva yu tsa cunaa añima yu tan cuhun tsi nu uhví nu nduve ra Cristo tun tsatyin cuví cacu ñi tsihin can.

<sup>4</sup> Tata ra Israel cuví ñi. Tan Nyoo naquihín cuenda ra tsi ñi tumaa tsa sehe ra tsi ñi. Tan janahá ra tsa cahnu cuví ra tsi ñi, tyin tsinyaa ra tsihin ñi. Tan ndoq ra tuhun tsihin ñi, tan tsahá ra ley ra tsi ra Moisés na cuhva ra tsi ñi. Tan janahá ra tsi ñi nácaa cuñí ra tsa jacahnu ñi tsi ra. Tan catyi ra tsihin ñi nácaa cua javaha ra tsa vaha tsihin ñi nu cuahán ca tsi. <sup>5</sup> Tata tsii tsaahnu yo cuví tsi ñi, tan tacan tucu ra Cristo cuenda cuñu ñuhu ra. Ra ican cuví Nyoo. Tan juvin ra ndacá ñaha tandihí tsa iyó. ¡Na jacahnu yo tsi ra tacan ñi maal! ¡Tan na cuví tsi tacan ñi!

<sup>6</sup> ¿A catyi yu tyin ña javahá Nyoo tumaa cuhva catyi ra tsihin nyívi Israel tahán tsanaha? Ñavin. Cuñí tsi coto yo tyin ña tandihí nyívi Israel tan cuví ñi nyívi Israel tsa nditsa. <sup>7</sup> Tan tacan tucu ña tandihí tata ra Abraham tan cuví ñi tata ra tsa nditsa. Tyin tsa cahán Nyoo tsihin ra, cahán tsi tuhun intuhun ñi sehe ra. Tyin catyi Nyoo tsihin ra tyehen: “Tsa cuenda ra Isaac sehe un tan cua coo nyívi tata un.” <sup>8</sup> Tsehe janahá tsi yo tyin ñavin tsa cuenda tsa cuví ñi nyívi tata ra Israel tan cuví ñi nyívi Nyoo. Tyin nyívi tsa tsinú iñi tsa cahán Nyoo tyin cua javaha ra, ñi ican cuví sehe ra. Tumaa ra Abraham, tyin ra Abraham tsinú iñi ra tsa cahán Nyoo tsihin ra <sup>9</sup> Tan tyehen cahán Nyoo tsihin ra: “Tyembu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyi Nyoo tsihin ra.

<sup>10</sup> Tan ñavin yacan ñi. Tyin cahán ndihí tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuví tsii tsaahnu yo, ra Isaac. <sup>11</sup> Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyi Nyoo tsihin ña Rebeca tyin ra Esaú, sehe nuu ña, cua cuví ra musu ra tsa tsinu uvi. Javahá Nyoo tacan tyin nacatsí ra tsi nyívi tsa cuñí maa ra nacatsi ra, tan ñavin tsa cuenda tsa javahá ñi. <sup>13</sup> Tumaa catyi ra nu tutu ra tyehen: “Cuñi ca yu tsi ra Jacob, tan ñavin ca ra Esaú.”

<sup>14</sup> ¿Tun tacan náa cua catyi yo? ¿A catyi yo tyin ña vaha tsa javahá Nyoo? ¡Ña cuví! <sup>15</sup> Tyin catyi ra tsihin ra Moisés: “Cua cundaahvi iñi yu yóo nyívi cuñí maa yu cundaahvi iñi yu.” <sup>16</sup> Tacan javahá ra; cundaahví iñi ra tsi nyívi tsa cuñí maa ra cundaahví iñi ra. Tan ña cundaahví iñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuví ra cundaahvi iñi yóo cuñí maa ra. <sup>17</sup> Tumaa catyi nu tutu ra, nu caahán ra tyehen tsihin ra rey ñuhu Egipto: “Tsahá yu tsa cuví un rey tyin tacan tan coto un tyin iyó tunyee iñi tsi yu. Tan nacoto tucu tandihí nyívi yóo ra cuví yuhu”, catyi Nyoo. <sup>18</sup> Tan tsihin tsehe tsitó yo tyin Nyoo cundaahví iñi ra tsi nyívi cuñí maa ra. Tan jandundavá tucu ra añima nyívi cuñí maa ra jandundavá ra añima.

<sup>19</sup> Tan vasiqui yooho cua catyi un: “Yoñi cuví javaha tsa cuñí maa ñi javaha ñi tun ña tsaha Nyoo tyin javaha ñi can.” ¿Nacuenda tyin tyaá Nyoo cuatyí síqui ñi? <sup>20</sup> Maa tyin ña vaha tun tsicá iñi un tacan. Tyin yoñi cuví catyi tyin ña vaha tsa javahá Nyoo. ¿Yóo ra cuví yooho tan nacahan un nu caahán Nyoo? ¿A cuví catyi iin quisi tsihin ra javahá itsi: “Ña taahán iñi yu cuhva

javahá un tsi yu"? Ña cuví. <sup>21</sup> Tyin nyivi tsa javahá ndaha tyiñu, iyó ndatu tsi ñi tsa javaha ñi náa cuñí maa ñi tsihin ñuhu quisi can. Tan iin ñi ñuhu quisi can tsatyíñú ñi juvin ñi tsihin can javaha ñi quisi vaha tan quisi peehe.

<sup>22</sup> Ña cuví catyi yo tyin ña vaha Nyoo tsa cuenda tsa tsatyíñú ra tsi nyivi tsa cua cuhun anyaya tan cunyeé iñi ra nyehé ra tsi ñi, tyin tsihin ñi can janahá ra tunyee iñi tsa iyó tsi ra tan janahá ra tyin cua tatsi tuñi ra tsi nyivi caquiñi. <sup>23</sup> Javahá ra tacan tyin tacan tan coto yoo tsa cuví yo nyivi tsa cundaahvi iñi ra tyin nda tsanaha tan tsa nacatsi maa ra tsi yo tyin cuhva ra tsa cahnu cuví ra tsi yo. <sup>24</sup> Yacan cuenda nacatsi ra tsi yo. Tan yihí yo cuví yo nyivi Israel, tan nyivi tsa ñavin ñi Israel cuví. <sup>25</sup> Tumaa catyi Nyoo nu tutu tsa tyaá ra Oseas:

Nyivi tsa ñavin nyivi ñuu yu cuví cua catyi yu tyin nyivi yu cuví ñi.

Ñi tsa ña cuñi yu, cua cuñi yu tsi ñi, catyi Nyoo.

<sup>26</sup> Tan nu catyi Nyoo: "Nyooho ñavin nyivi yu cuví ndo." Juvin ñi ican cua catyi ra tsihin ñi: "Yuhu cuví Nyoo nyito, tan nyooho cuví sehe yu." <sup>27</sup> Maa tyin ra Isaías catyi ra tyehen tsa cuenda nyivi Israel: "Vasu ndi maa cuaha xaan nyivi tata ra Israel cua coo, tumaa tsa cuaha nyiti iyó yuhu ndutya ñuhu, juhva ñi ñi cua cacu. <sup>28</sup> Tan tsa yatyin cuii cua jandaa Jutu Mañi yo tandihí tsa cahān ra tan cua tatsi tuñi ra tsi tandihí nyivi iyó nu ñuhu ñayivi." <sup>29</sup> Tumaa catyi tucu ra Isaías tahān tsanaha:

Tun tsatyin Jutu Mañi yo, ra ndacá ñaha tandihí tsa iyó andivi, tan ña jacacu ra tsi juhva yo, tsa naā tandihí yo,

Tumaa naā nyivi ñuu Sodoma tan ñuu Gomorra tahān tsanaha.

### Nyivi Israel ña ñihí ñi cuhva nduvaha ñi nuu Nyoo,

<sup>30</sup> ¿Náa cua catyi yo? Nyivi tsa ñavin ñi Israel cuví, ña nducy ñi cuhva coo vaha ñi tsihin Nyoo, maa tyin Nyoo naquihin cuenda ra tsi ñi tumaa tsatyin vaha ñi tsa cuenda tsa tsinú iñi ñi tsi ra. <sup>31</sup> Tan nyivi Israel tsa nducú coo vaha tsihin Nyoo tsihin tsa javahá ñi cuhva catyi ley, ña cuví coo vaha ñi tsihin ra. <sup>32</sup> ¿Nacuenda? Tsa cuenda tyin cuñi ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú iñi ñi tsi ra. Yacan cuenda tumaa tsa catyihj tsaha ñi yuu tan nduvā ñi cuví can. <sup>33</sup> Yuu can caahān Nyoo tuhun nu tutu ra tan catyi ra:

Tsaquīn nyaa yu iin yuu nda ñuu Sión, tan janduvá tsi tsi nyivi.

Tan yuu can cuví ra Jesucristo.

Tan nyivi tsa tsinú iñi tsi ra tsa cuví yuu can, ña cua nduva ñi, catyi Nyoo nu tutu ra.

**10** Yañi, tsihin tsa ñi iñi añima yu tan tsicán tahvi yu tsa cuenda nyivi Israel tyin cuñi yu tsa cacu ñi. <sup>2</sup> Tsandaa cuví yu tyin cuñi ñi jacahnú ñi tsi Nyoo, maa tyin ña ñihí ñi cuhva javahá ñi can. <sup>3</sup> Tyin ña tsitó ñi tyin juvin ñi maa Nyoo cuví ra janduvahá tsi nyivi nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi

tsi ra na janduvaha maa ra tsi ñi. <sup>4</sup> Tyin ra Cristo tsa quitsi ra tan javahá ra tandihí tsa catyi ley, tyin tacan tan tandihí nyivi tsa cua tsinu iñi tsi ra, naquihin cuenda Nyoo tsi ñi tumaa tsatyin vaha ñi.

<sup>5</sup> Catyi ra Moisés tyin cuví nduvaha nyivi nuu Nyoo, tatun tyaá yahvi ñi tandihí tsa catyi ley, tyin tyaá ra tyehen: "Nyivi tsa tyaá yahvi tandihí tsa catyi ley, cua coo ñi ñayivi tsa ña cua naa maa." <sup>6</sup> Maa tyin tsa cuenda tsa nduvahá yo nuu Nyoo tsihin tsa tsinú iñi yo tsi ra Cristo, catyi tutu ra tyehen: "Ña catyi un: ¿Yóo cundaa andivi? tyin tun cahan un tacan cuñi tsi catyi tyin januu un tsi ra Cristo nda nu ñuhu ñayivi tan jacacu ra tsi yo."

Ña cahān un tacan tyin ra Cristo tsa yahā quitsi ra.

<sup>7</sup> Tan ndi ña catyi un: "Cuñi tsi tsa nuu iin ra nda nu yucú ndiyi tsitsi ñuhú tan janandoto ra tsi ra Cristo".

Ña cahan un tacan, tyin ra Cristo tsa yahā nandoto ra.

<sup>8</sup> Ña catyi un tacan tyin tyehen catyi nu tutu Nyoo:

"Tuhun Nyoo yatyin iyó tsi tsihin ndo, iyó tsi yuhu ndo tan tsitsi añima ndo." Tuhun ihya taahān tsi tsinu iñi ndo tyin juvin ñi tsi jacuahá tucu nyuhu. <sup>9</sup> Tatun catyi un tsihin yuhu un tyin ra Jesús cuví Jutu Mañi yo, tan tsinu iñi un tsihin añima un tyin Nyoo janandoto tsi ra tsa yahā tsihi ra, cua cacu un. <sup>10</sup> Tyin tsihin añima yo cuñi tsi tsinu iñi yo tsi ra Cristo tan cuví nduvaha yo nuu Nyoo, tan tsihin yuhu yo cuñi tsi catyi yo tyin tsinú iñi yo, tyin tacan tan cacu yo. <sup>11</sup> Tuhun Nyoo catyi tsi tyehen: "Ndi intuhun nyivi tsa tsinú iñi tsi ra tan ña cua tahan ñi ticanuu."

<sup>12</sup> Tyin Nyoo inducu ñi cuñi ra nyehé ra tsi nyivi Israel tan nyivi inga ñuu. Tyin intuhun ñi maa ra ndacá ñaha tsi tandihí yo. Tan nasocó ra tsi tandihí nyivi tsa tsicán tahvi tsi ra. <sup>13</sup> Tyin tyehen catyi tuhun Nyoo: "Tandihí nyivi tsa tsicán tahvi tsi Jutu Mañi yo cua cacu ñi."

<sup>14</sup> Maa tyin ¿nácaa cua ndacan tahvi ñi tsi ra tatun ñaha ca tsinu iñi ñi tsi ra? Tan ¿nácaa cua tsinu iñi ñi tsi ra tatun ñaha ca cuñi ñi tuhun ra? Tan ¿nácaa cua cuñi ñi tuhun ra tatun yoñi cahan tuhun ra tsihin ñi? <sup>15</sup> Tan ¿nácaa cuhun nyivi cahan ñi nácaa coo taxin nyivi, tatun yoñi jacuhun tsi ñi? Tumaa catyi nu tutu Nyoo: "Si xaan cuví nu tsa ñi caahān tuhun vaha." <sup>16</sup> Maa tyin ña tandihí nyivi tan tyaá yahvi ñi tuhun tsa jacacú Nyoo tsi yo. Tumaa catyi ra Isaías: "Jutu Mañi yu, yoñi cuñi tsinu iñi tuhun caahān ndi", catyi ra.

<sup>17</sup> Yacan cuenda cuñi tsi tsa tyaá soho jihna yo tuhun ra Cristo, tacan tan tsinu iñi yo tsi ra.

<sup>18</sup> Maa tyin tsicá tucu iñi yu: ¿A ña tsiñi nyivi Israel tuhun Nyoo? ¿Tsiñi ñi! Tumaa catyi nu tutu Nyoo:

Jutu Mañi yu, nyivi tsa jacotó tuhun un tsa jacotó ñi tuhun un nani cahnú nu ñuhu ñayivi,

tan ña nacoq ihñi ñi ndi intuhun ñuu luhlu, catyi tsi nu tutu Nyoo.

<sup>19</sup> Tan tsicá nyico tucu iñi yu: ¿A ña cutuñi iñi nyivi Israel tyin cua cacu nyivi tsa ñavin ñi Israel cuví? ¿Cutuñi iñi ñi! Tyin tsa jihna ñi ra Moisés tyaá ra tuhun cahān Nyoo tsihin ñi Israel nu tutu tyehen:

Nyooho, ndasi cua cuñi ndo tyin cua cuhva yu tsa vaha tsi nyivi tsa ñavin nyivi ñuu yu cuví.

Tan cua cúu ndo tsihí nyehé ndo tsi ñi, catyi Nyoo.

<sup>20</sup> Tan ra Isaías canā iñi ra cahān ra:

“Nyivi tsa ña nanducy tsi Nyoo, nañihj ñi tsi ra. Tan janahā ra tsi ra tsi ñi tsa ña tsicā tuhun tuhun ra.”  
<sup>21</sup> Tan tyaā tucu ra Isaías tuhun cahān Nyoo tsihin ñi Israel tyehen: “Tandihj ñi quivi canā yu tsi nyivi yu, na nacuhva cuenda ñi tsi ñi tsi yu, maa tyin ña tyaā yahvi ñi. Tan jandavā xaan ñi iñi ñi”, catyí Nyoo.

### Nyivi Israel tsa ñihí cuhva cacu

**11** ¿A ña cuñí ca Nyoo tsi nyivi Israel? Ñavin tsa ña cuñí ca ra tsi ñi, tyin juvin ñi ra Israel cuví tucu yuhu. Tyin tata ra Abraham tan tata ra Benjamín cuví yu. <sup>2</sup> Tahān tsanaha nacatsj Nyoo tsi ñi Israel tyin cuví ñi nyivi ra. Tan vityin ñavin tsa jatsiyó cuii ra tsi ñi. ¿A ña ñuhú iñi ndo tyin catyí nu tutu Nyoo tyin ra Elías, ra cuví ndusu yuhu Nyoo, catyí ra tyin ña vaha nyivi Israel tan tsicān tahvi ra tsi Nyoo tyehen? <sup>3</sup> “Jutu Mañi yu, nyivi Israel tsahñj ñi tsi ra cuví ndusu yuhu maa un nahā ra, tan tsanñj ñi nu jacahnú nyivi tsi un. Tan intuhun ña maa yu ndoq, tan cuñí ndihj ñi cahñi ñi tsi yu”, catyí ra. <sup>4</sup> Maa tyin nacahān Nyoo tan catyí ra tsihin ra Elías: “Ñavin maa ñi maa un ndoq. Tyin utsa mil ca nyivi naquihjñ vaha yu, ñi tsa ña jacahnú maa tsitoho Baal”, catyí Nyoo tsihin ra. <sup>5</sup> Tan juvin ñi tacan vityin, ndoq juhva nyivi jacahnú tsi Nyoo. Tan tsa cuenda tsa vaha Nyoo nacatsj ra tsi ñi tyin jaha ra tucahnu iñi tsi ñi. <sup>6</sup> Tan ña jahá ra tucahnu iñi tsi yo tsa cuenda tsa javahá yo tsa vaha. Tyin tun tsatyin jahá Nyoo tucahnu iñi tsi yo tsa cuenda tsa javahá yo tsa vaha, cuñí tsi catyí tyin ña jacacú ra tsi yo tsihin tsa vaha ra. <sup>7</sup> Tan ¿nácaa? Nyivi Israel nducy ñi cuhva nduvaha ñi nuu Nyoo, maa tyin ña ñihj ñi cuhva. Juhva ñi ñihj ñi cuhva. Tan ñi tsa ñihj cuhva can cuví ñi tsa nacatsj maa Nyoo. Tan ñi tsa ña ñihj cuhva cacu, ndundavā añima ñi. <sup>8</sup> Tumaa catyí nu tutu Nyoo tyehen: “Nyoo tsahā ra tsa ña cutuñi iñi ñi. Tan vasu ndi maa iyó tinuu ñi, ña tsahá ra tsa nyehé ñi. Iyó soho ñi, maa tyin ña cutuñi iñi ñi tsa tsiñi ñi. Tacan iyó ñi nda cuanda vityin.” <sup>9</sup> Tan juvin ñi catyí tucu ra David tyehen:

Javahá ñi vico tan cusñi iñi ñi, maa tyin yacan cua jativi tsi ñi.

Tan cua tatsi tuñi Nyoo tsi ñi tyin cuví can tumaa iin trampa tsa cuenda ñi.

<sup>10</sup> Tan cua cuaa ñi na ña nyehe ca ñi tsa nditsa.

Tan nacoso tsa vee siqui ñi, catyí ra David tuhun nyivi Israel tsa ña tsinú iñi tsi Nyoo.

### Nacaa nduvahá nyivi tsa ñavin ñi Israel cuví nuu Nyoo

<sup>11</sup> Tan vityin tsicá tuhun yu: ¿A tsa cuenda tsa ña tyaā yahvi nyivi Israel tsa cahān Nyoo, tan ndoó cuii ñi tsa ña cua cacu ñi? Ñavin tsa ndoó cuii ñi. Ndoq nuu ñi maa ñi, tyin jacacú jihna Nyoo tsi nyivi tsa ñavin ñi Israel cuví. Tyin tacan tan tsa cua nyehe ñi yacan, ndasi cuñi ñi tan natsinu ndihj iñi ñi tsi Nyoo. <sup>12</sup> Tatun cuaha nyivi tsa ñavin ñi Israel cuví tan natsinu iñi ñi tsi Nyoo tsa cuenda cuatyí tsa javahā ñi Israel, cuaha ca ñi cua natsinu iñi quivi tsa cua cuví nyico tandihj nyivi Israel nyivi Nyoo.

<sup>13</sup> Cuñí yu cahan yu juhva tsihin nyooho tsa ñavin ñi Israel cuví. Ra Jesús tavā tyiñu ra tsi yu tsa quitsi yu nu iyó ndo. Tan tsitó yu tyin cuñí tsi tsa javaha yu tyiñu ihya tyin cahnu xaan cuví tsi. Cahnu jahá yu itsi <sup>14</sup> tan caahān yu tuhun Nyoo tsihin ndo tyin na nyehe nyivi ñuu yu, ñi Israel, nácaa tsinú iñi ndo tsi Nyoo, tyin vasiqui tacan tan natsinu ndihj iñi ñi tan cacu ñi. <sup>15</sup> Tyin tun tsa cuenda tsa ña natijñ cuenda Nyoo tsi nyivi Israel tan nduvahā iyó nyivi inga ñuu tsihin Nyoo, quivi cua naquihñ cuenda ra tsi ñi cua cuví tsi tumaa tsa cua nandoto ñi, tyin cuaha ca ñi cua tsinu iñi tan ñavin ca tsa jihna ñi. <sup>16</sup> Iin cuhva tatun vaha quitá paan tsa javahā yo tsa jihna ñi tsihin yutsan paan, vaha tandihj ca yutsan can. Tan tatun iin yoho yutun tan vaha tun, vaha tandihj ca soco tun. Tacan tucu nyivi Israel nyaá yahvi ñi nuu Nyoo tyin tsii tsaahnu ñi yihj ra naha cuenda ra.

<sup>17</sup> Tan nyivi Israel cuví ñi tumaa soco yutun olivo. Tan nyooho cuví ndo tumaa soco yutun olivo cuuhu. Tumaa tuhvá nyivi tsaahnya iin soco yutun tan natyaa ñi inga soco yutun, tacan javahā Nyoo tyin jatsiyó ra tsi nyivi Israel tan tyaā ra tsi nyooho tsa cuví ndo nyivi inga ñuu. Tacan cuví tan tsaā ndo cuví ndo nyivi cuenda Nyoo tan naquihñ ndo tandihj tsa vaha tsa iyó tsi ra.

<sup>18</sup> Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá iñi ndo tacan nducuhun iñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

<sup>19</sup> Vasiqui cua catyí ndo: “Juvín, maa tyin Nyoo tsahnyā ra soco yutun can tan natyaa ra tsi nyuhu.” <sup>20</sup> Ndit-sa. Maa tyin jatsiyó nuu ñi ra tsi nyivi Israel tsa cuenda tsa ña tsinú iñi ñi tsi ra. Tan tyacy ra tsi nyooho tsa cuenda tsa tsinú iñi ndo tsi ra. Yacan jaha ndo cuenda tsa ña nduyaa ndo tsihin can. <sup>21</sup> Tyin tatun ña jahā Nyoo tucahnu iñi tsi ñi tsa cuví soco vaha can, ndi nyooho tan ña cua jaha ra tucahnu iñi tatun ña tsinú vaha iñi ndo tsi ra. <sup>22</sup> Nyehé ndo tyin vaha xaan iñi Nyoo, maa tyin xaan tucu ra tsihin nyivi tsa ña naquihñ cuenda tumañi iñi tsa tsahá ra tsi ñi. Vaha iñi ra tsihin nyooho yacan tyaā yahvi ndo tsa vaha tsa tsahá ra tsi yo. Tyin tatun ña tyaá yahvi ndo itsi, cua jatsiyó nyico ra tsi ndo tsaha yutun olivo ra. <sup>23</sup> Tyin tatun natsinu nyico iñi nyivi Israel inga tsaha, cua cunyaa nyico ñi tsaha yutun olivo nu coyó ñi. Tyin Nyoo iyó tunyee iñi tsi ra tsa natyaa tahan nyico ra tsi ñi inga tsaha. <sup>24</sup> Nyooho tsa ñavin Israel cuví, cuví ndo tumaa soco yutun olivo cuuhu, maa tyin Nyoo naquihñ ra tsi ndo tan tyaā tahan ra tsi ndo tsihin yutun olivo vaha tsa cumí ra. Tacan cua javaha ra quivi cua cuñi ra iin yaha ñi cua tyaā tahan nyico ra soco yutun vaha nu tsinyaa jihna maa tsi.

### Nyivi Israel cua cacu nda nu ndihj

<sup>25</sup> Yañi, cuñí yu tsa coto ndo iin tsa xeehe tsa javahá Nyoo, tyin tacan tan ña caca iñi ndo tyin tsitó xaan ndo. Cuaha xaan nyivi Israel ndundavā añima ñi, nda cuanda cacu tandihj nyivi inga ñuu tsa nyaā tyin cacu.

<sup>26</sup> Tsa yaha cua cacu ñi, tacan tan cua cacu tandihí nyívi Israel tyin catyí nu tutu Nyoo tyehen:

Ra tsa jacacú tsi nyívi, nda Sión cua quee ra.

Tan cua quihin nyaa ra cuatyí nyívi ra Jacob.

<sup>27</sup> Tuhun ihya cuví tsa cua ndoo yu tsihin ñi quívi cua quihin nyaa yu cuatyí ñi, catyí Nyoo nu tutu ra.

<sup>28</sup> Cuxaán xaan nyívi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu iñi nyooho. Tahān tsanaha nacatsí Nyoo tsi ra Abraham, tan ra Isaac, tan ra Jacob tyin tsinú iñi ra naha tsi ra. Tan cuñí ndihí ra tsi nyívi Israel tyin tata ra naha cuví tsi ñi. <sup>29</sup> Tyin tsa tsa tsahá Nyoo, ña quihin nyaa nyico ra can. Tyin yoo tsa cuví nyívi Nyoo, ña tuhvá ra cahan tyin ñavin nyívi ra cuví yo. <sup>30</sup> Tsanaha nyooho ña tyaá yahvi ndo tsi Nyoo. Maa tyin vityin tyaá yahvi ndo tsi ra tan cundaahví iñi ra nyehé ra tsi ndo tsa cuenda tsa ña tyaá yahvi nyívi Israel tsi ra.

<sup>31</sup> Nyívi Israel ña tyaá yahvi ñi tsi Nyoo vityin tumaa tsa ña tyaá yahvi nyooho tsi ra tahān tsanaha. Maa tyin cua cundaahvi iñi ra nyehé ra tsi ñi tumaa tsa cundaahví iñi ra nyehé ra tsi nyooho. <sup>32</sup> Yihí tsaha tandihí nyívi tan nacoó ñi tsa tyaá yahvi ñi tsi Nyoo. Tsahá ra ndatu tsi ñi tsa javahá ñi tacan, tyin tacan tan iin caa ñi cua cuví cundaahvi iñi ra tsi tandihí yo.

<sup>33</sup> ¡Cahnu xaan cuví tsa cuca tan tsa tsitó Nyoo tan tsa tsiñí tuñi tsa iyó tsi ra! Yoo ña cuví nacatyí tuhun yo cuhva tsicá iñi ra, tan ndi iin sava quívi ña cua cutuñi iñi yo tandihí cuhva javahá ra. <sup>34</sup> ¿Yóo cutuñi iñi cuhva tsicá iñi Jutu Mañi yo? ¿O yóo jacuahá tsi ra? Yoñi.

<sup>35</sup> Tyin yoñi cuví cuhva jihna iin tsa vaha tsi ra, tan tsa cuenda can tan cuita iñi ñi tyin cua naquihin ñi yahvi cuenda can. <sup>36</sup> Tyin tandihí maa tsa iyó, maa Nyoo javahá itsi, tan iyó tsi tsa cuenda ra. ¡Na jacahnu yo tsi Nyoo tacan ñi maa! Tan na cuví tsi tacan.

### Na javaha yo cuhva cuñí Nyoo tsihin ñayívi iyó yo

**12** Yacan cuenda yañi, tsitó ndo tyin cundaahví xaan iñi Nyoo nyehé ra tsi yo, tan tsa cuenda yacan caahán ndaahvi yu tsihin ndo. Cuhva cuenda ndo cuñu ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa javahá yo tacan janahá tsi tyin ndit-sa tsa jacahnú yo tsi ra. Yacan cuví tsa taahán iñi ra.

<sup>2</sup> Ña cōo ca ndo cuhva iyó nyívi ñuu ñayívi ihya. Cuhva ndo tsa nasama Nyoo cuhva tsicá iñi ndo, tan cuhva iyó ndo, tyin tacan tan coto ndo javaha ndo tsa taahán iñi maa ra: náa ndihí tsa vaha tan tsa cuiti.

<sup>3</sup> Nyoo, tsa cuenda tsa vaha iñi ra, tan tava tyiñu ra tsi yu tyin cuví yu iin ra caca tyiñu ra Jesucristo. Yacan cuenda catyí yu tsihin tandihí nyooho tyin ndi intuhun ndo tan ña caca iñi ndo tyin vaha xaan ndo. Maa tyin caca iñi ndo nácaa iyó ndo tan náa cuví tsa vaha tsa tsahá Nyoo tsi ndo iin caa ñi tsihin tsa tsinú iñi ndo tsi ra. <sup>4</sup> Tumaa soho yo tan tinuu yo iin ñi cuví tsi tsihin tandihí ca tahan tsi tsa iyó iin cuñu ñuhu. Tan tsa intuhun intuhun tsi siñ siñ tyiñu javahá tsi. <sup>5</sup> Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi

cuví tucu yo tsihin inga tahan yo tyin iin ñi cuñu ñuhu cuví yo.

<sup>6</sup> Siñ siñ ndatu tsahá Nyoo tsi tsa intuhun intuhun yo, tsahá ra tsi yo ndáa tsa cuñí maa ra cuhva ra tsi yo, tan na cuatyíñu yo itsi. Tatun tsahá ra tsa cuví yo ndusu yuhu ra, na tsinu iñi yo tyin tyiñu can tsahá ra tsi yo, tan na javaha yo itsi. <sup>7</sup> Tatun tsahá ra ndatu tsi iin yo tsa jatyinyee yo tsi nyívi, na javaha yo itsi tsihin tsa ñi iñi añima yo. Tatun tsi inga yo tsahá ra tsa jacuahá yo tsi nyívi, na jacuahá yo tsi ñi tsihin tsa ñi iñi yo. <sup>8</sup> Tatun tsahá ra tsi inga yo tsa cuví jandu iin yo iñi nyívi, na jandu iin yo iñi ñi tsihin tsa ñi iñi añima yo. Tatun inga yo ñihí tsa jatyinyee yo tsi nyívi tsihin xuhun, na jatyinyee yo tsi ñi, maa tyin ña cuita iñi yo tyin natyahví ñi tsi yo. Tatun inga yo ñihí tsa jaquihín ityi yo tsi nyívi yihí cuenda Nyoo tsihin yo, na jaha yo cuenda cuhva jaquihin ityi yo tsi ñi. Tatun inga yo ñihí tsa jatyinyee yo tsi nyívi tsa iyó tsa tsiñí ñuhu, na jatyinyee yo tsi ñi tsihin tsa siñ cuñí yo.

### Náa taahán tsi javaha nyívi yihí cuenda ra Cristo

<sup>9</sup> Cuñi tahan ndo tsi ndo tsihin tsa ñi iñi añima ndo. Ndasí cuñi ndo nyehé ndo tsa ña vaha. Tan cūanyicun ndo tsa vaha. <sup>10</sup> Cuñí tsi tsa cuñi tahan yo tsi yo tumaa tsa cuñí yo tsi nyívi yo. Tan tyaá yahvi tahan ndo tsi ndo tan jaha tahan ndo tsa ñayívi tsi ndo.

<sup>11</sup> Nducu ndo tunyee iñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa ñi iñi añima ndo.

<sup>12</sup> Cōo ndo ñayívi ihya tsihin tsa siñ, tyin tsitó ndo tyin cua coo ndo tsihin Nyoo nu cuahán ca tsi. Janyee ndo iñi ndo nyehé ndo tundoho. Tan ndācan tahvi ndo tsi Nyoo iin nyita ñi.

<sup>13</sup> Cuhva ndo tsa tsiñí ñuhu tsi nyívi yihí cuenda Nyoo tsihin ndo. Vaha tyānuu ndo tsi nyívi tsaá vehe ndo.

<sup>14</sup> Tatun caahán nyívi ndavaha ñi tsi ndo, vaha cāhan ndo tsihin ñi, tan ña cāhan ndasí ndo tsi ñi. Ndācan tahvi ndo tsi Nyoo tsa cuenda ñi, na nasoco ra tsi ñi.

<sup>15</sup> Siñ cuñi ndo tsihin nyívi siñ cuñí. Vācu ndo tsihin nyívi tsa tsacú jahá tucuiihya iñi.

<sup>16</sup> Ña cañi tahan ndo. Iin ñi cuví ndo tsihin tahan ndo. Ña cahnu jaha ndo tsi ndo; jāndundaahvi ndo tsi ndo tumaa iyó nyívi ndaahvi; ña jaha ndo tsa tsitó xaan ndo.

<sup>17</sup> Ña javaha ndo tsa ña vaha tsihin nyívi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihí nyívi. <sup>18</sup> Nducu ndo cuhva coo taxin ndo tsihin tandihí nyívi. <sup>19</sup> Yañi, cuñí yu tsi ndo. Tatun javahá nyívi tsa ña vaha tsihin ndo, ña tātsi tuñi ndo tsi ñi; natyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyí tsi tyehen: “Yuhu taahán tsi tatsi tuñi tsi nyívi tan tyahvi tsi ñi”, catyí Jutu Mañi yo. <sup>20</sup> Tan juvin ñi catyí tucu ra: “Tatun nyívi xaan iñi tsi ndo tan tsiñí ñi, cuhva ndo tsa catsi ñi, tan tatun na ityi iñi ñi, cuhva ndo ndutya coho ñi. Tyin tsa javaha ndo tacan, cuaaha tacan ña nuu ñi cua cuví, tyin cua nducahan nuu ñi.” <sup>21</sup> Ña cuhva ndo tsa cundaca ñaha tsa ña vaha tsi ndo, maa tyin

jāndu iin ndo iñi añima ndo. Jāvaha ndo tsa vaha tan çasí ndo nu vatsí tsa ña vaha tsihin can.

**13** Tandihí nyívi cuñí tsi tsa tyaa yahvi ñi tsi ra cumi tyiñu cuenda ra ndacá ñaha naha ra. Tyin tandihí maa ra cumí tyiñu tan Nyoo tsahá tyiñu can tsi ra naha. Ra cumí tyiñu tsa iyó, maa Nyoo tsahá tsi ra naha tsa cuví ra naha tyiñu. <sup>2</sup>Yacan cuenda, nyívi tsa ña tyaá yahvi tsi ra naha, cuñí tsi catyi tyin ña tyaá yahvi ñi tsa caahán Nyoo. Ñi tsa javahá tacan, tsicoo cuatyí ñi tsa cuenda can, tan cua cutuñi ñi. <sup>3</sup>Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyívi tsa javahá tsa vaha. Nyisó tyiñu ra naha tsa tatsi tuñi ra naha tsi nyívi tsa javahá tsa ña vaha. Tun ña cuñí un tsa jayuhvi ra cumi tyiñu naha ra tsi un, ço vaha, tyin tacan tan cua nyehe ra naha tyin vaha iyó un tan vaha nyívi cuví un. <sup>4</sup>Tyin ra cumí tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuvi nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyívi javahá tsa ña vaha, tyin tyiñu can tyaá Nyoo tsi ra naha. <sup>5</sup>Yacan cuenda ñiñi cuñí tsi tsa tyaa yahvi ndo tsi ra cumí tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo. <sup>6</sup>Tan inga tuhun tsa cuenda can tyahví ndo xuhun tsa tavá ra cumí tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.

<sup>7</sup>Cuhva ndo tsa taahán tsi tsi intuhun intuhun nyívi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyívi tsa taahán tsi tyaa yahvi ndo. Jaha ndo tsa ñayívi tsi nyívi tsa taahán tsi jaha ndo tsa ñayívi tsi. <sup>8</sup>Ña cunyaa cuenda ndo tsi ndi intuhun nyívi. Maa tyin cuñi tahan ndo tsi ndo, tyin tsa cuñí tahan yo tsi yo, javahá yo tandihí tsa catyí ley Nyoo tsa tyaá ra Moisés tyin javaha yo. <sup>9</sup>Catyí ley Nyoo tyehen: "Tun iyó ñasíhi ndo o yíi ndo ña ço inga ñaha o rayí tsi ndo. Ña çahñi ndo. Ña sūhu ndo. Ña çahan ndo cuendu siquí ndi intuhun nyívi. Ña nyiyo iñi ndo tsa tsii inga nyívi." Tandihí tsehe tan inga ca ley javahá ndo itsi tatun cuñí ndo tsi tahan ndo tumaa tsa cuñí ndo tsi maa ndo. <sup>10</sup>Tatun cuñí ndo tsi tahan ndo, ña javaha ndo tsa ña vaha tsihin ñi. Tsihin tsa cuñí tahan yo tsi yo, javahá yo tandihí tsa catyí ley Nyoo tsa tyaa ra Moisés.

<sup>11</sup>Tsihin tuhun ihya jaha ndo cuenda tsi ndo quívi iyó ndo vityin. Tyin tsa tahan tsi cuhva tsa taahán tsi ndo-to yo. Tyin vityin tsa yatyin cuii ca cua cunuhu añima yo nu nyaá Nyoo tan ñavin ca quívi tsa quíhví yo tuhun ra. <sup>12</sup>Tsa yahá tsa tsacuaa, tan tsa cua tuvi. Yacan cuenda cuñí tsi jandihí ndo tsa javahá ndo tsa javahá nyívi iyó nu naa. Tan jaha tyiñu ndo tsihin tsa vaha tsa tsahá Nyoo tsi ndo; javaha ndo cuhva javahá nyívi iyó nu nditsin. <sup>13</sup>Cuñí tsi cuñi coo yo tyin nu nditsin Nyoo iyó yo. Tan ña çoho ndo nyixi, ña javaha ndo vico tan coho ndo nyixi. Nyooho rayí, ña çaca nuu ndo tsihin ñaha. Tan nyooho ñaha ña çaca nuu ndo tsihin rayí.

Ña ço viciu tsi ndo. Tan ña ndasi cuñi ndo nyehe ndo tsi nyívi. Tan ña nyiyo iñi ndo tsa iyó tsi ñi. <sup>14</sup>Maa tyin ço ndo tsihin Jutu Mañi yo Jesucristo, tumaa tsinditsí yo jahma tacan na cunditsi yo tsi ra. Tan ña çaca iñi ndo javaha ndo cuhva cuñí cuñu ñuhu ndo.

#### Na ña cahan nyaa yo tsi nyívi

**14** Tatun iin nyívi yíhi cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña çahan ndo tsa luxu tuhun Nyoo tsa ña cutuñí vaha iñi yo tsihin ñi coto ndu uvi iñi ñi. <sup>2</sup>Cua cuhva yu iin cuhva tsi ndo: Tsa cuenda juhva nyívi cuví catsi maa ñi tandihí maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñí ñi. Ñi ihya cuví ñi tsa ña ñihi vaha nyaá tsihin Nyoo. <sup>3</sup>Maa tyin ñi tsa tsatsí tandihí can, taahán tsi naquihin cuenda ñi tsi ñi tsa tsatsí yucu ñi. Tan ñi tsa tsatsí yucu, na ña cahan nyaa ñi tsi inga ñi can. Tyin Nyoo naquihín cuenda ra tsi ñi can. <sup>4</sup>Tan çyóo nyívi cuví yoocho tan cahan nyaa un tsi musu inga ra? Tyin tun vaha o ña vaha javahá ñi, nyehe maa tsitoho ñi tsihin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

<sup>5</sup>Inga tucu cuhva: Yíhi nyívi jacahnú ñi iin quívi tan ñavin ca inga quívi. Tan tsa cuenda inga nyívi nduve quívi cahnu cuví tan quívi ña cahnu cuví. Inducu ñi quívi cuñí ñi, yacan cuenda intuhun intuhun maa yo tan cuñí tsi tyihi tuñi vaha iñi yo. <sup>6</sup>Ñi tsa naquihín vaha quívi, naquihín vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihín vaha can, juvin ñi jacahnú tucu ñi tsi Nyoo tyin ña naquihín vaha ñi can. Tan ñi tsa tsatsí tandihí can, juvin ñi tsatsí tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsahá ra tsa catsi ñi. Tan ñi tsa ña tsatsí tandihí, ña tsatsí ñi tsa cuenda tsa jacahnú ñi tsi Jutu Mañi yo tan juvin ñi nacuhvá tucu ñi can tyahvi nyoo tsi ra.

<sup>7</sup>Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsiihí yo.

<sup>8</sup>Tyin tatun iyó yo, iyó yo tsa jaha tyiñu yo tyiñu Nyoo.

Tan tatun tsiihí yo, tsiihí yo tsa cuenda Jutu Mañi yo tan naquihín ra añima yo. Yacan cuenda tsii maa Jutu Mañi yo cuví tsi yo vasu ndi maa nyito yo o tsiihí yo.

<sup>9</sup>Tyin ra Cristo tsihí ra tan nandotó ra tyin cundaca ñaha ra tsi nyívi nyito tan nyívi ña nyito.

<sup>10</sup>Maa tyin yoocho, ¿nacuenda nyehé nyaa un tsi ra yañi un? ¿O nacuenda ña naquihin cuenda un tsi ra?, tan tsitó vaha un tyin tandihí yo tan cua tahan tsi quívi cuhva cuenda yo tsi yo nuu ra Cristo tyin tatsi tuñi ra tsi yo. <sup>11</sup>Tumaa tsa catyí Nyoo nu tutu ra tyehen:

Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñí tsi cuñi tsiti tandihí nyívi nuu yu.

Tandihí ñi tan cua nacoto ñi tsi yu tsa cuví yu Nyoo.

Tan nuu tandihí nyívi cua jacahnu ñi tsi yu, catyí Nyoo.



<sup>12</sup> Yacan cuenda intuhun intuhun yo tan cua nacuhva cuenda yo tyiñu javahā yo tsi Nyoo.

### Ña janacava ndo tsi yañi ndo nu cuatyí

<sup>13</sup> Yacan cuenda, ña taahán tsi cahan nyaa ca ndo tsi nyivi. Maa tyin nducu ndo cuhva tsa ña janacava ndo tsi ñi nu cuatyí coto jandihí ñi tsa tsinú iñi ñi tsi ra Cristo. <sup>14</sup> Yuhu tsitó yu tyin cuví catsi yo tandihí tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsi ñi tandihí, tsa cuenda maa ñi ña cuví catsi ñi can.

<sup>15</sup> Maa tyin tatun tsa cuenda tsa tsatsí ndo tan ndasi cuñí yañi yo, ña nditsa tsa cuñí ndo tsi ra. Ña cūhva ndo tsa tiví yañi yo tsihin tsa tsatsí ndo tyin ra Cristo tsihí ra tsa cuenda ra. <sup>16</sup> Ña cuhva ndo tsa cahan nyivi ndavaha ñi siquí tsa tsahā Nyoo ndatu tyin catsi yo. <sup>17</sup> Tatun ndacá ñaha Nyoo tsi yo ña ñiñi xaan náa tsatsí yo o náa tsihí yo. Tsa ñiñi ca cuví tsa vaha iyó yo nuu ra, tan tsihin tsa siñ cuñí yo, tan taxin iyó añima yo jahá Tatyí Ii ra. <sup>18</sup> Nyivi jahá tyiñu tyiñu ra Cristo tacan, siñ cuñí Nyoo nyehé ra tsi ñi, tan tacan tucu nyivi siñ cuñí ñi nyehé ñi tsi ñi.

<sup>19</sup> Yacan cuenda cuñí tsi jañiñi yo tsi yo tan coo vaha yo tsihin nyivi. Tyin tacan tan cuví jatinyee tahan yo tsi yo na cuahnu ca yo tsihin tuhun Nyoo. <sup>20</sup> Ndi intuhun ndo tan ña jativi ndo tyiñu jahá Nyoo tsitsi añima inga nyivi tsihin tsa tsatsí ndo. Nditsa tyin tandihí tsa tsatsí yo tan vaha tsi. Maa tyin ña vaha tsa catsi yo iin tsa tsatsí yo tatun tsihin can janacava yo tsi nyivi nu cuatyí. <sup>21</sup> Yacan cuenda, vaha tsa ña catsi yo cuñu, ndi ña coho yo vinu tatun ndasi cuñí yañi yo nyehe ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tsa javahá yo. <sup>22</sup> Cuhva tsa tsinú iñi yo tsa cuenda tandihí yacan ña cahan yo tuhun can tsihin inga nyivi. Na coto intuhun ñi maa yo can tsihin Nyoo. Siñ xaan cuñí yo tatun ña uvi tsicá iñi yo javahá yo tsa tsahá Nyoo ndatu tyin javahá yo. <sup>23</sup> Maa tyin nyivi tsa tsatsí náa tsatsí, tan uvi tsicá iñi ñi, tsicoo cuatyí ñi tyin ña tsinú vaha iñi ñi tyin cuví catsi ñi can. Tan tandihí tsa javahá yo tsihin tsa ña tsiñu iñi yo tyin tsahá Nyoo ndatu javaha yo can, cuatyí cuví.

### Na javaha yo tsa taahán iñi nyivi yihí tuhun Nyoo tsihin yo, tan ñavin tsa taahán iñi ñi maa yo

**15** Yoo tsa vaha cuanyicún tsi Nyoo, cuñí tsi tsa jatinyee yo tsi nyivi tsa ñaha ca tsinú vaha iñi tsi ra. Jatinyee yo tsi ñi na tsinu ca iñi ñi. Tan na ña nducu yo maa ñi maa tsa taahán iñi maa yo. <sup>2</sup> Intuhun intuhun yo cuñí tsi tsa javaha yo cuhva taahán iñi inga nyivi tatun cuví tsi tsa vaha cuenda ñi, tyin tacan tan cuví cuahnu ca ñi tsihin tuhun Nyoo. <sup>3</sup> Tyin ndi ra Cristo tan ña javahā ra cuhva taahán iñi maa ra, maa tyin tahan ra tumaa catyí nu tutu Nyoo tyehen: “Tandihí tsa ndavaha ñi tsa cahan nyivi siquí Nyoo, siquí ra Cristo ndoo can”, catyí tsi. <sup>4</sup> Tyin tandihí tsa tsinyaa nu tutu Nyoo tahan tsanaha, tsinyaa tsi tsa

cuenda tsa cutuhva yo itsi. Tan juvin tsi jatinyee tsi yo tsa cunyeé iñi yo cuatu yo tsa cua cuhva Nyoo tsi yo. Tyin tun cahvi yo itsi jandu iin tsi iñi yo. <sup>5</sup> Tan juvin ñi maa ra tsahá tsa cunyeé iñi yo cuatu yo, tan tsahá ra tsa vaha cuñí añima yo. Na jatinyee ca ra tsi yo coo vaha yo tan iin ñi cuvi yo tumaa taahán iñi ra Cristo Jesús. <sup>6</sup> Tacan tan tandihí yo iin caa ñi jacahnu yo tsi Nyoo Jutu ra Jesucristo Jutu Mañi yo.

### Nyivi tsa ñavin ñi Israel cuví, cua coto ñi tuhun Nyoo

<sup>7</sup> Yacan cuenda naquihin cuenda tahan ndo tsi ndo, tumaa naquihin cuenda ra Cristo tsi yo, tyin tun javaha yo tacan, jacahnu yo tsi Nyoo. <sup>8</sup> Tan catyí yu tsihin ndo: ra Cristo quitsí ra quitsí jatinyee ra tsi nyuhu tsa cuví nyivi Israel, tyin tacan catyí Nyoo tsihin tsi tsaahnu ndi tyin cua javaha ra. Tan tacan janahā ra Cristo tyin tandihí tsa catyí Nyoo tyin cua javaha ra, javahá ra itsi. <sup>9</sup> Quitsí ra Cristo tyin tacan tan jacahnu tucu nyivi tsa ñavin ñi Israel cuví tsi Nyoo, tsa cuenda tsa cundaahví iñi ra nyehe ra tsi ñi, tumaa catyí nu tutu ra tyehen:

Yacan cuenda cua jacahnu yu tsi un tan cua nyehe tandihí nyivi tsa ñavin ñi Israel cuví.

Cua jacahnu yu tsi un tan cata yu yaa tsa cuenda un, catyí tsi.

<sup>10</sup> Tan inga tucu nu catyí tsi tyehen:

Nyooho tsa ñavin ñi Israel cuví, siñ cuñi ndo tsihin ñi Israel, nyivi Nyoo.

<sup>11</sup> Tan inga tucu nu catyí tsi tyehen:

Jacahnu ndo tsi Jutu Mañi yo, nyooho nyivi tsa ñavin ñi Israel cuví.

Çata tandihí ndo yaa tan jacahnu ndo tsi ra.

<sup>12</sup> Ra Isaías tyaā tucu ra nu tutu Nyoo tyehen:

Cua cacu iin ra tsa cuvi tata ra Isaí.

Cua quitsi ra cua cundaca ñaha ra tsi nyivi tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.

<sup>13</sup> Juvin ñi maa Nyoo tsahá tunyee iñi tsi yo tan tsitó yo tyin cua cuhva ra tsa cuhva ra tsi yo. Na jacutu ra tsi ndo tsihin tusiñ iñi ra. Tan na coo taxin añima ndo tsa cuenda tsa tsinú iñi ndo tsi ra, tyin tacan tan tsihin tunyee iñi Tatyí Ii ra tan cuita vaha iñi ndo tyin cua ñihi ndo tsa cua cuhva ra tsi ndo.

<sup>14</sup> Yañi, tsitó vaha yu tyin nyooho vaha iñi ndo tan cuntuñí vaha iñi ndo, tan tsitó vaha ndo cuhva cuhva cuenda tahan ndo tsi ndo. <sup>15</sup> Maa tyin nu carta ihya ñiñi xaan caahán yu siquí juhva tsa tyaā yu tyin tacan tan ña naa iñi ndo can. Tyehen javahá yu tsa cuenda tyin Nyoo tsahā ra tsa vaha ra tsi yu <sup>16</sup> tsa jaha tyiñu yu tyiñu ra Jesucristo nu iyó nyivi tsa ñavin ñi Israel cuví. Tan tyiñu tsa javahá yu cuví tsa caahán yu tuhun Nyoo nácaa jacacú ra tsi nyivi. Tyehen javahá yu tyin tacan tan cuví cuhva cuenda yu tsi ñi tsi Nyoo tan cuvi ñi iin ofrenda tsa taahán iñi ra, tyin tsa nduvahā ñi nuu ra jahā Tatyí Ii ra.

<sup>17</sup> Yuhu tsa tsinú iñi yu tsi ra Cristo Jesús, siñ cuñí yu jahá tyiñu yu tyiñu Nyoo tyin tsitó yu tyin tyiñu vaha javahá yu. <sup>18</sup> Yuhu ña caná iñi yu cahan yu tsa ña javahā ra Cristo tsihin yu. Maa tyin tsahá cuenda yu tsi ndo

tyin nyivi tsa ñavin ñi Israel cuví, tsinú iñi ñi tsi Nyoo tyin Nyoo tsatyíñu ra tsi yu tan vityin tyaá yahvi ñi tsi ra tsa cuenda tsa tsinú iñi ñi tuhun cahān yu tan nyehe ñi tsa javahā yu <sup>19</sup> tsihin tunyee iñi seña tan tsa iyo tsa javahā yu jahā Tatyí Ii Nyoo. Tsihin tandihí yacan cunye-eē cahān yu tuhun ra Cristo tan nácaa jacacú ra tsi yo tsihin nyivi. Quitsahā yu nda Jerusalén tan inga ca ñuu nda cuanda tsaā yu ñuu tsa cayucú Ilírico. <sup>20</sup> Tacan nducú yu kuhva caahán yu tsa jacacú ra Cristo tsi yo nu ñaha ca coto nyivi tuhun ra, tyin ña cuñí yu jaha tyiñu yu nu tsa yaha cahān inga ra tuhun ra Cristo. <sup>21</sup> Tuma ma catyí nu tutu Nyoo tyehen:

Nu nduve maa tuhun Nyoo iyó, cua tsa tuhun Nyoo tan cua cutuñi iñi nyivi iyó can itsi, catyí tsi.

### Nu tyaá ra Pablo kuhva tyin kuhun ra ñuu Roma

<sup>22</sup> Yacan cuenda ña cuví quitsi yu quitsi nyehe yu nu yucú ndo, vasu ndi maa cuaha xaan tsaha cuñi yu quitsi yu. <sup>23</sup> Maa tyin vityin tsa ndihí jahā tyiñu yu ityi ñuu ihya. Tan tsa cuaha xaan cuiya cuñi yu quitsi yu nu yucú ndo tan ndoo yu juhva quivi tsihin ndo. <sup>24</sup> Nyehe jihna yo tatun cuví yaha yu nu yucú ndo quivi cua kuhun yu España. Tsa yaha tsa cunyii yu juhva quivi tsihin ndo, nyehe yo tatun cuví jatyinyee ndo tsi yu tan tsaā yu nu kuhun yu. <sup>25</sup> Maa tyin vityin cuahán yu ñuu Jerusalén tan nyisó yu ofrenda tsa cuenda nyivi yihí cuenda ra Cristo tsa iyó ndacan. <sup>26</sup> Tyin nyivi tsicá vehe ñuhu tsa iyó ityi Macedonia tan ityi Acaya natuhun tahan ñi tan tava ñi juhva xuhun jacuhun ñi tsi nyivi ndaahvi tsa iyó Jerusalén, ñi yihí cuenda ra Cristo. <sup>27</sup> Tyehen cuñi ñi javahā ñi. Tan nditsa tyin taahán tsi javaha ñi tacan. Tyin nyivi Israel, ñi tsinú iñi tsi ra Cristo, tsahā ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatyinyee ñi tsi ñi Israel tsihin tsa iyó tsi ñi. <sup>28</sup> Yacan cuenda, tatun tsa yaha jandaa yu tyiñu ihya, tan tsa yaha nacuhva cuenda yu xuhun ihya tsi nyivi Jerusalén, tacan tan kuhun yu nda España tan cua yaha yu nu yucú ndo. <sup>29</sup> Tsitó vaha yu tyin quivi cua quitsi yu nu yucú ndo, cuaha tsa vaha cua kuhva Nyoo tsi yu tyin nacuhva cuenda yu tsi ndo. <sup>30</sup> Yañi, Tatyí Ii Nyoo tsahā tsa cuñi ndo tsi yu tan tsi ra Jesucristo, yacan cuenda caahán ndaahvi yu tsihin ndo ndācan tahvi ndo tsi Nyoo tsa cuenda yu tan tsa cuenda tyiñu jahā yu. <sup>31</sup> Ndācan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú iñi tsi ra Cristo. Tan ndācan tahvi ndo tsa cuenda nyivi yihí cuenda ra Cristo ñuu Jerusalén, na tiin cuenda vaha ñi ofrenda tsa ndahā yu. <sup>32</sup> Tan ndācan tahvi ndo na cuví kuhva cuñi Nyoo tan cuví quitsi yu quitsi nyehe yu nu yucú ndo tsihin tsa siñ cuñi yu tan cuví quitatu vaha yu. <sup>33</sup> Tan Nyoo, ra tsahā tsa taxin coo añima yo, na cunyaa ra tsihin tandihí ndo. Tan na cuví tsi tacan.

### Nu tsahā ra Pablo nacumi tsi nyivi vaha iñi tsi ra

**16** Jacotó yu tsi ndo tyin ña hermana Febe jatyinyee xaan ña tsi nyivi yihí cuenda Nyoo ñuu

Cencrea. <sup>2</sup> Naquihin vaha ndo tsi ña tumaa naquihín Jutu Mañi yo tsi yo, tumaa taahán tsi javaha ñi yihí cuenda Nyoo. Jatyinyee ndo tsi ña tsihin tandihí tsa tsiñi ñuhu tsi ña, tyin maa ña cuaha xaan nyivi jatyinyee ña, tan nda cuanda maa yu.

<sup>3</sup> Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahā tyiñu yu cuenda ra Cristo Jesús. <sup>4</sup> Tsahnyā iñi ñi ñayivi ñi quivi jacacu ñi tsi yu. Yacan cuenda tsahā yu tyahvi nyoo tsi ñi. Tan ñavin yuhu ñi, tyin tandihí tucu nyivi tsa ñavin ñi Israel cuví, ñi tsa yihí cuenda Nyoo, tsahā ñi tyahvi nyoo tsi ñi. <sup>5</sup> Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsí tucu nacumi tsi ra Epeneto, yañi yu. Juvín ra cuví ra tsa tsinú jihna iñi tsi ra Cristo ityi Acaya. <sup>6</sup> Cuhva ndo nacumi tsi ña María. Jahā tyiñu xaan ña nu yucú ndo. <sup>7</sup> Cuhva ndo nacumi tsi nyivi ñuu yu, ra Andrónico tan ra Junias, ra yañi yu tsa tsiyucú tsihin yu vehe caa. Cahnu tyiñu jahā tyiñu ra naha cuenda Jutu Mañi yo tsihin tandihí ca ra jahā tyiñu cuenda Nyoo. Tan jihna ca ra naha natsinú iñi tsi ra Cristo tan ñavin ca yuhu.

<sup>8</sup> Cuhva ndo nacumi tsi ra Amplias ra vaha iñi tsi yu cuenda Jutu Mañi yo. <sup>9</sup> Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu. <sup>10</sup> Cuhva ndo nacumi tsi ra Apeles. Nyehe yo tyin nditsa tsa tsinú iñi ra tsi ra Cristo. Tan tsahā tucu yu nacumi tsi nyivi ra Aristóbulo. <sup>11</sup> Cuhva ndo nacumi tsi ra Herodión ñuu yu tan tsi nyivi ra Narciso, ñi tsa tsinú iñi tsi Jutu Mañi yo. <sup>12</sup> Vatsí nacumi tsi ña Trifena tan tsi ña Trifosa, ñi tsa jahā tyiñu tyiñu Jutu Mañi yo. Tan ña hermana Pérsida, ñaha tsa jahā tyiñu xaan tyiñu Jutu Mañi yo. <sup>13</sup> Cuhva ndo nacumi tsi ra Rufo, iin ra cahnu cuví nuu Nyoo. Tsinú vaha iñi ra tsi Jutu Mañi yo. Tan vatsí tucu nacumi tsi sihi ra, ña tsa cuví tumaa sihi yu. <sup>14</sup> Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha. <sup>15</sup> Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin kuhva ra, tan tsi ra Olimpás tan tsi tandihí ñi yihí cuenda Nyoo tsa yucú tsihin ñi.

<sup>16</sup> Cuhva tahan ndo nacumi tsi ndo. Tandihí nyivi yihí cuenda ra Cristo tsa iyó ityi ihya jaquitsi ñi nacumi tsi ndo.

<sup>17</sup> Yañi, caahán ndaahvi yu tsihin ndo, jaha ndo cuenda tsi ndo tsihin ñi cuñi jasñn tsi ndo, tan nducú ñi kuhva tsa nduva ndo tsihin tuhun Nyoo, tyin ñavin tacan cutuhva ndo tuhun ra Cristo. Na cutahan ndo tsihin ñi can. <sup>18</sup> Tyin ñi can ñavin tyiñu Jutu Mañi yo Jesucristo jahā tyiñu ñi, maa ñi kuhva cuñi maa ñi javahā ñi. Tan jandahví ñaha ñi añima nyivi ndaahvi tsihin tsa vita caahán ñi. <sup>19</sup> Tandihí nyivi tsitó ñi tyin tyaá yahvi ndo tsi Nyoo. Yacan cuenda siñ xaan cuñi yu tsihin ndo, tan cuñi yu tsa yatyi javaha ndo tsa vaha. Maa tyin ña yatyi javaha ndo tsa ña vaha. <sup>20</sup> Nyoo ra iyó tandihí tsa taxin añima, na kuhva ra tsa jaha canaa ndo tsi nu ña vaha tsa yatyi, tan na kuhva ra tsa cuañi ndo siqui nu. Na nasoco Jutu Mañi yo Jesucristo tsi ndo.

<sup>21</sup> Ra Timoteo ra cutahán tsihin yu nu jahá tyiñu ndi tyiñu Nyoo, jaquitsí ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihí ra ñuu yu can jaquitsí ra naha nacumi tsi ndo.

<sup>22</sup> Yuhu ra Tercio javahá yu tutu ihya tsa cuenda ra Pablo, juvin ñi jaquitsí tucu yu nacumi tsi ndo tyin iin caa ñi yihí yo cuenda Jutu Mañi yo.

<sup>23</sup> Jaquitsí tucu ra Gayo nacumi tsi ndo. Vehe ra iyó yu. Juvín ñi ihya ndú iin tandihí ñi yihí cuenda Nyoo. Ra Erasto ra cuví tesoroero ñuu ihya, jaquitsí ra nacumi tsi ndo, tan yañi yo ra Cuarto tucu.

<sup>24</sup> Na ndoo Jutu Mañi yo Jesucristo tsihin tandihí ndo. Tan na cuví tsi tacan ñi.

#### **Nu ndihí caahán ra Pablo tan jacahnú ra tsi Nyoo**

<sup>25</sup> Tan vityin na jacahnu yo tsi Nyoo, tyin maa ra cuví ra cua cuhva tsa ndu iin iñi añima ndo, tyin tacan tan

ña jandihí ndo tsa tsinú iñi ndo tuhun ra tsa jacacú tsi yo. Tsehe cuví tuhun caahán yu tan tuhun tsa jacuahá yu tsa cuenda ra Jesucristo. Iin ñi cuví tsi tsihin tuhun tsa ñuhú xeehe tahán tsanaha nda ndi cumañi ca tsinu ñuhu ñayivi. <sup>26</sup> Maa tyin vityin jacuahá Nyoo tsi yo tsa cuenda tutu tsa nacoq ra cuví ndusu yuhu ra, ra tsaha cuenda tuhun ra tahán tsanaha. Catyí Nyoo, ra tsa ña cua cundihí maa, tyin vityin taahán tsi coto tandihí nyivi tyin tacan tan tsinu iñi ñi tsi ra tan tyaa yahvi ñi tsa caahán ra. <sup>27</sup> Intuhun ñi maa Nyoo iyó, tan iyó xaan tsa tsiñi tuñi tsi ra. Tan na ña jandihí yo tsa jacahnú yo tsi ra tsa cuenda ra Jesucristo.

Tan na cuví tsi tacan ñi.

# I Corintios

## Nu tyaá ra Pablo iin carta tsa cuenda nyivi yihí cuenda Nyoo ñuu Corinto

**1** Yuhu ra Pablo, cana Nyoo tsi yu tyin caca yu tyiñu ra Jesucristo. Yuhu tsihin ra Sóstenes, ra yañi yo, <sup>2</sup> jaquitsí ndi carta ihya tsi ndo tsa yucú ndo vehe ñuhu cuenda Nyoo ñuu Corinto. Nyivi Nyoo cuví ndo vityin, tyin tsa ndu iin ndo tsihin ra Cristo Jesús. Nyoo cana ra tsi ndo tyin nanduvi ndo nyivi vaha cuenda ra, tsihin tandihí nyivi tsa jacahnú tsi Jutu Mañi yo Jesucristo tandihí ñi ityi. Tyin cuví ra Nyoo cuenda ñi tan cuenda tucu maa yo. <sup>3</sup> Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo añi-ma ndo.

## Nacaa nasocó Nyoo tsi nyivi yihí cuenda ra

<sup>4</sup> Tandihí ñi quivi tsahá yu tyahvi nyoo tsi Nyoo tsa cuenda ndo, tyin ñihí ndo tsa vaha Nyoo tsa cuenda tsa ndu iin ndo tsihin ra Cristo Jesús. <sup>5</sup> Tan tsa iin ñi cuví ndo tsihin ra Cristo, Nyoo tsahá ra tunyee iñi tsi ndo tsa cahan ndo tuhun ra. Tan tsahá ndihí tucu ra tsa coto xaan ndo. <sup>6</sup> Tan tandihí tuhun ra Cristo tsa cahan ndi tsihin ndo tsa ndunditsin tsi tyin tsa nasama ndo cuhva iyó ndo. <sup>7</sup> Tan yacan cuenda nduve tsa cumañí tsi ndo tyin iyó tandihí tsa vaha Nyoo tsi ndo jahá ra tsitsi tsa ndatú ndo quivi quitsi Jutu Mañi yo Jesucristo. <sup>8</sup> Nyoo cua jaha cuenda ra tsi ndo nda cuanda naa ñuhu ñayivi tyin tacan tan yoñi cuví tyaa cuatyí tsi ndo quivi cua quitsi Jutu Mañi yo Jesucristo. <sup>9</sup> Nyoo tacan ñi maa javahá ra cuhva catyí ra. Tan maa ra cuví ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

## Nyivi yihí cuenda Jutu Mañi yo, ña vaha quita siin ñi

<sup>10</sup> Yañi, tsicán yu tsi ndo tsihin sivi Jutu Mañi yo Jesucristo, na iin ñi cuví ndo tan ña cusin ndo. Tan iin ñi cuhva caca iñi ndo, tan iin ñi tuhun quihí iñi ndo. <sup>11</sup> Caahán yu tacan tsihin ndo, yañi, tyin catyí nyivi ra Cloé tsihin yu tyin iyó tsihi nu yucú ndo. <sup>12</sup> Tyin nyoo siin siin cuhva caahán ndo. Yihí ndo catyí ndo: “Cuenda ra Pablo yihí yu”; inga ndo: “Cuenda ra Apolos”; inga tucu ndo: “Cuenda ra Pedro”; tan inga tucu ndo catyí ndo: “Cuenda ra Cristo yihí yu.” <sup>13</sup> ¿A cuñí ra Cristo tsa quita siin yo? ¿A maa yu tsihi nu cruu tsa cuenda ndo? ¿A tsicoondutyá ndo tsihin sivi yu? Ñavin. <sup>14</sup> Tyahví nyoo tsi Nyoo tyin ra Crispo tan ra Gayo ñi jacoondutyá yu tan ña jacoondutyá yu tsi ndi intuhun ca nyooho, <sup>15</sup> yacan ña cuví cahan ndo tyin tsicoondutyá

ndo tsihin sivi yu. <sup>16</sup> Aan, jacoondutyá tucu yu tsi nyivi ra Estéfanos, maa tyin ña nducuhún iñi yu tun jacoondutyá yu tsi inga ndo. <sup>17</sup> Tyin ra Cristo ña tava tyiñu ra tsi yu tsa jacoondutyá yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsiñi tuñi tsa iyó nu ñuhu ñayivi ihya caahán yu, tyin coto catyí nyivi tyin nduve yahvi nyaá tsa tsihi ra Cristo cuenda cuatyí yo.

## Vaha ca tsa tsiñi tuñi Nyoo tan ñavin ca tsa tsiñi tuñi nyivi iyó nu ñuhu ñayivi

<sup>18</sup> Nyivi tsa cua cuhun anyaya tsiñi ñi tuhun tsa tsihi ra Cristo nu cruu, tan ña tsinú iñi ñi tsi ra, yacan cuenda cuñí maa ñi tyin nduve yahvi nyaá tsa tsihi ra. Tan tsa cuenda yoo tsa cua cacu, tunyee iñi Nyoo cuví tsa tsihi ra. <sup>19</sup> Tyin tacan catyí maa tuhun Nyoo:

Cua janaa yu tsa nyityi jiñi ra tsitó xaan.

Tan ña cua cahan yu tsa caahán ra, catyí Nyoo.

<sup>20</sup> Nduve yahvi nyaá ra tsa tsitó xaan, tan ra maestro, tan ra caahán náa ndihí tuhun tsa iyó nu ñuhu ñayivi ihya. Tyin tsa tsiñi tuñi tsa iyó nu ñuhu ñayivi ihya, tuhun nduve yahvi nyaá nanduvi can jahá Nyoo. <sup>21</sup> Nyoo tsihin tsa tsiñi tuñi tsa iyó tsi ra tyaa ra cuhva tyin ña cuví nacoto nyivi tsi ra tsihin tsa tsiñi tuñi tsa iyó nu ñuhu ñayivi ihya. Maa tyin tyaa tucu ra cuhva tsa jacacu ra tsi nyivi tsa tsinú iñi tuhun ra vasu ndi maa inga ca nyivi cuñí ñi tyin nduve yahvi nyaá tsi.

<sup>22</sup> Nyivi Israel cuñí ñi nyehe ñi tsa iyo. Tan nyivi Grecia maa ñi maa tsa tsiñi tuñi tsa iyó nu ñuhu ñayivi ihya nanducú ñi. <sup>23</sup> Maa tyin nyuhu jacotó ndi tuhun ra Cristo, ra tsa tsihi nu cruu. Tan tsa tsiñi nyivi Israel tuhun ra ndasi xaan cuñí ñi. Tan ñi tsa ñavin ñi Israel cuví, cuñí ñi tyin nduve yahvi nyaá tsi. <sup>24</sup> Maa tyin tsa cuenda nyivi tsa nacatsi Nyoo, cuví ñi nyivi Israel, a nyivi Grecia, ñi ican cutuñí iñi tyin ra Cristo iyó tandihí tunyee iñi Nyoo tsi ra, tan tsahá ra tsa cutuñí iñi ñi tsa tsiñi tuñi Nyoo. <sup>25</sup> Vasu ndi maa inga nyivi cuñí tyin nduve yahvi nyaá tsa tsiñi tuñi Nyoo, maa tyin nyaá yahvi ca tsi tan ñavin ca tsa tsiñi tuñi tsa iyó nu ñuhu ñayivi ihya. Tan cuñí tucu ñi tyin ña ñihi tunyee iñi Nyoo. Maa tyin ñihi ca tsi tan ñavin ca tunyee iñi tsa iyó nu ñuhu ñayivi ihya. <sup>26</sup> Yañi, cuñí tsi tsa cutuñí iñi ndo tyin Nyoo nacatsi ra tsi ndo vasu ndi maa ña cuaha ndo cuví nyivi tsitó, tan nyivi cahnu cuví o nyivi ndacá ñaha nu ñuhu ñayivi ihya. <sup>27</sup> Nacatsí ra tsi nyivi tsa catyí nyivi tyin soho xaan ñi, tyin cuhva ra ticanuu tsi nyivi tsitó xaan. Tan nacatsí ra tsi nyivi nduve tunyee iñi iyó tsi tyin cuhva ra ticanuu tsi nyivi cuñí tyin iyó

xaan tunyee iñi tsi ñi. <sup>28</sup> Tan nacatsí ra tsi nyivi ndaahvi tsa cuñí nyivi tyin ña tsiñí ñuhu ñi, tan nyivi tsa ña cuñí nyivi nyehe ñi, tan janduluhlu ra tsi nyivi jahá tyin cahnu cuví ñi. <sup>29</sup> Javahá ra tacan tyin tacan tan yoñi cuví nduyaa nuu ra. <sup>30</sup> Tan juven ñi maa ra jandu ijin tsi yo tsihin ra Cristo Jesús. Tan tsahá ra Cristo tsa tsiñi tuñi tsi yo, tan tsa cuenda tsa jatá ra tsi yo tsihin niñi ra, quihín nyaa ra tsi yo ndaha nu ña vaha tan cacu yo tan nduvahá yo jahá ra tan jacu íí ra tsi yo. <sup>31</sup> Yacan cuenda na javaha yo kuhva catyí tuhun Nyoo nu catyí tsi tye-hen: “Ña cuví nduyaa yo tsihin tsa javahá maa yo, maa tyin tatun cua nduyaa yo, na nduyaa yo tsihin tsa javahá Nyoo tsihin yo.”

### Tuhun ra Cristo, ra tsihi nu cruu

**2** Maa tyin yañi, quivi tsa quitsi yu cahān yu tuhun Nyoo tsihin ndo, ña cahān yu tuhun tsa tsiñi tuñi tsa iyó nu ñuhu ñayivi ihya tumaa caahán ra tsitó xaan naha ra. <sup>2</sup> Tyin maa ñi maa tuhun ra Jesucristo, nácaa tsihi ra nu cruu tsa cuenda cuatyí yo tyaá iñi yu tan cahān yu tsihin ndo. <sup>3</sup> Tan tsa tsaá yu nu yucú ndo ñihi nihé yu jahá tsa yuuhví yu. <sup>4</sup> Tan tsa cahān yu tsihin ndo, ña cahān yu tsihin tuhun si caa tumaa caahán ra tsitó xaan naha ra. Maa tyin tsihin tunyee iñi Tatyí Ii Nyoo cahān yu tsihin ndo. <sup>5</sup> Tyin tacan tan tsinu iñi ndo tsi Nyoo tsa cuenda tunyee iñi maa ra, tan ñavin tsa cuenda tsa tsiñi tuñi tsa iyó nu ñuhu ñayivi ihya.

### Juvin ñi maa Tatyí Ii Nyoo tsahá tsa nacoto yo tsi Nyoo

<sup>6</sup> Maa tyin nditsa caahán ndi tuhun tsa tsiñi tuñi tsihin nyivi tsa ñihi nyaá tsihin tuhun Nyoo. Maa tyin ñavin tsa tsiñi tuñi tsa iyó nu ñuhu ñayivi ihya, tan ndi ñavin tsa tsiñi tuñi ra ndacá ñaha naha ra tsa cua cundihi ñi maa, tyin caahán ndi tsa tsiñi tuñi Nyoo <sup>7</sup> tsa tsicumí xeehe ra tsa ndi cumañi ca javaha ra ñuhu ñayivi ihya. Tyaá ra kuhva tsa jacacu ra tsi yo tan cun-ye-cu cuí yo tsihin ra nda gloria. <sup>8</sup> Tan ndi intuhun ra ndacá ñaha nu ñuhu ñayivi ihya tan ña cutuñi iñi ra naha can. Tun tsatyin cutuñi iñi ra naha can, ña cua tyaá ra naha tsi Jutu Mañi yo, ra ndacá ñaha gloria, nu cruu. <sup>9</sup> Maa tyin cuví tsi tumaa catyí maa tuhun Nyoo:

Yoñi nyehe tan yoñi tsiñi tan tsicá iñi tuhun vaha tsa javahá Nyoo tsa cuenda nyivi cuñí tsi ra, catyí tsi. <sup>10</sup> Maa tyin Nyoo tsahá ra Tatyí Ii ra tsi yo tan jacotó Tatyí Ii ra tuhun ihya tsi yo, tan juven ra jacotó tandihi ca tuhun xeehe tsa tsicá iñi Nyoo tsi yo.

<sup>11</sup> Intuhun intuhun yo tsitó yo nácaa tsicá iñi yo, maa tyin inga nyivi ña tsitó ñi tsa tsicá iñi yo. Tan tacan tucu intuhun ñi Tatyí Ii Nyoo tsitó ra tsa tsicá iñi maa Nyoo. <sup>12</sup> Yoo ñavin tsa tsiñi tuñi tsa iyó nu ñuhu ñayivi naquihín yo, tyin naquihín yo Tatyí Ii Nyoo, tan juven ra jacotó tandihi tsa ñihí yo jahá Nyoo. <sup>13</sup> Tan tsa caahán ndi tsihin ndo ihya, tuhun tsa jacuahá maa Tatyí Ii Nyoo tsi ndi cuví. Ñavin tsa cutuhva maa ndi tsihin tsa tsiñi tuñi jiñi ndi. Nacatyí tuhun ndi tsa jacuahá Tatyí Ii Nyoo tsi ndi tsi nyivi tsa yihé Tatyí Ii Nyoo.

<sup>14</sup> Maa tyin nyivi tsa nduve Tatyí Ii Nyoo iyó tsihin, ña naquihín vaha ñi tan ndi ña cutuñi iñi ñi tsa jacuahá Tatyí Ii Nyoo tsi ñi. Tan cuñí maa ñi tyin nduve yahvi nyaá tsi, tyin nduve Tatyí Ii Nyoo iyó tsihin ñi. <sup>15</sup> Maa tyin nyivi yihé Tatyí Ii Nyoo cuví cutuñi iñi ñi. Tan tsitó ñi tatun vaha a ña vaha náa iin tuhun. Maa tyin ña cuví catyí inga nyivi tatun vaha a ña vaha tsa iyó aña ñi. <sup>16</sup> Tyin tuhun Nyoo catyí tsi: “Yoñi tsitó tsa tsicá iñi Jutu Mañi yo Nyoo. Yoñi cuví jacuahá tsi ra”, catyí tuhun Nyoo. Maa tyin yoó tsitó yo tsa tsicá iñi ra tyin iyó tsa tsiñi tuñi ra Cristo tsi yo.

### Ña taahán tsi cunyicun yo tsi iin ra yihé tuhun Nyoo tsihin yo, na cunyicun yo tsi Nyoo

**3** Yañi, quivi tsa quitsi yu nu yucú ndo ña cuví cahān yu tsihin ndo tumaa caahán yu tsihin nyivi jaquihín ityi Tatyí Ii Nyoo. Cahān yu tsihin ndo tumaa caahán yu tsihin nyivi ña tsitó tsi Nyoo, tyin ndi lee xaan ndo tsihin ra Cristo. <sup>2</sup> Cahān yu tsihin ndo tsihin tuhun tsa ña yihé ñi cutuñi iñi ndo. Tumaa tsahá yo letsí coho lee tsa ñaha ca cuví catsi nyayu, tacan javahá yu tsihin ndo, tyin nyooho ñaha ca cuví cutuñi vaha iñi ndo. ¡Tan ndi vityin tan ña cutuñi iñi ndo! <sup>3</sup> Tyin ndi tsicá ca iñi ndo tsa cuñí cuñu ñuhu ndo. Nyiyó iñi ndo, tan iyó tsihi nu yucú ndo, tan ndusiñ ndo. Ndi tsicá iñi ndo tuhun tsicá iñi nyivi cuenda nu ñuhu ñayivi ihya, tan javahá ndo tumaa cuñí cuñu ñuhu ndo. <sup>4</sup> Tyin yihé ndo catyí ndo: “Cuenda ra Pablo yihé yu.” Tan inga ndo catyí ndo: “Cuenda ra Apolos yihé yu.” Yacan cuñí tsi catyí tyin javahá ndo tumaa javahá nyivi iyó ityi tsata.

<sup>5</sup> Tyin zyóo ra cuví yuhu, ra Pablo? Tan zyóo ra cuví ra Apolos? tyin cañi tahan ndo tsaha ndi. ¿A ñavin musu Nyoo ñi cuví ndi? Juvin. Tan cahān ndi tuhun Nyoo tsihin ndo tan natsiny iñi ndo tsi Jutu Mañi yo. Tyin tan iin tan iin ndi javahá ndi tyiñu tsa catyí maa Nyoo tyin javaha ndi. <sup>6</sup> Yuhu tatsi tuhun Nyoo aña ndo, tan ra Apolos tyosó. Maa tyin Nyoo jacuahnú ra tuhun ra aña ndo. <sup>7</sup> Tan yacan cuenda ndi ra tsa tatsí tan ndi ra tsa tyosó, nduve ra cuví ra. Maa tyin Nyoo cuví ra tandihi tyin maa ra jacuahnú tuhun ra aña ndo. <sup>8</sup> Ra tsa tatsí tan ra tsa tyosó, iin ñi ra cuví ra naha. Tan Nyoo cua tyahvi tsi intuhun intuhun ra naha kuhva tyiñu jahá ra naha. <sup>9</sup> Tan nyuhu, cuví ndi musu tan jahá tyiñu ndi tyiñu Nyoo. Tan nyooho cuví ndo tumaa ñuhu nu jahá tyiñu Nyoo.

Cuví tucu ndo tumaa iin vehe tsa javahá Nyoo. <sup>10</sup> Tsa-há Nyoo tsa vaha tsi yu tyin yuhu cuví yu tumaa iin ra cuví ityi nuu tsa samá vehe. Tyin tsaquin yu kuhva vehe can tan tyihí yu tsaha tsi tsitsi ñuhu. Tan inga ra tsa cua sama ityi siquí cuví ra jacuahá, tan cuñí tsi jahá ra cuenda nácaa jacuahá ra tuhun Nyoo. <sup>11</sup> Tan yoñi cuví caquin inga kuhva tyin tsa canyíí kuhva can. Tan yacan cuví ra Jesucristo. <sup>12</sup> Tan siquí kuhva can cuví sama ra jacuahá tsihin xuhun cuaan, tsihin xuhun cuitsin, tsihin yuu vaha. Tan cuví tucu javaha ra vehe tsihin yutun, tsihin vitsin, a tsihin tiyama. <sup>13</sup> Maa tyin quivi nacuhva cuenda ra jacuahá tsa cuví tumaa ra samá can tyiñu can tsi ra Cristo, cua yaha tyiñu can nu ñuhu.

Tan ñuhu can cua nducu cuhva tsi tyiñu javahā ra naha. <sup>14</sup> Tan vehe tsa ña cua cayu, cua ndoo tsi. Tan ra tsa javahā vehe can cua naquihin ra yahvi tsa taahán tsi tsi ra. <sup>15</sup> Maa tyin tun ndihí tyiñu javahā ra naha cayu, nduve náa cua ñihi ra naha. Vasu cua cacu maa ra naha tumaa cacu iin ra tsa cuñi cayu tan tsinū ra nu cayú ñuhu.

<sup>16</sup> ¿A ña tsitó ndo tyin vehe ñuhu Nyoo cuví ndo, tan iyó Tatyí Ii Nyoo tsitsi añima ndo? <sup>17</sup> Tatun iin nyivi jatívi vehe ñuhu ra, cua janaa ra tsi ñi, tyin vehe ñuhu ra, ii tsi. Tan vehe ñuhu can, cuví maa yo.

<sup>18</sup> Ndi intuhun ndo tan ña jandavi ñaha ndo tsi ndo. Tyin tatun cuñi ndo tyin tsitó xaan ndo tsihin tsa tsiñi tuñi tsa iyó nu ñuhu ñayivi ihya, cuñi tsi tsa jandusoho ndo tsi ndo tumaa ra tsa ña tsitó maa. Tacan tan Nyoo cua cuhva ca ra tsa tsiñi tuñi vaha tsi ndo. <sup>19</sup> Tyin tsa tsiñi tuñi tsa iyó nu ñuhu ñayivi ihya nduve yahvi nyaá can nu Nyoo. Tyin catyí tuhun Nyoo: “Janacavá ra tsi ra tsitó, juvin ñi maa nu tsa nyityi javahā ra.” <sup>20</sup> Tan catyí tucu tsi: “Jutu Mañi yo tsitó ra tyin tsa tsicá iñi ra tsitó, nduve yahvi nyaá can.” <sup>21</sup> Yacan cuenda ndi intuhun ndo tan ña taahán tsi cu iyo iñi ndo nyehe ndo tsi iin ra jacuahá tsi ndo tyin maa Nyoo tsahā tsi ra naha tsa jacuahá ra naha tuhun vaha tsi ndo tan tsahā ndihí ra tandihí tsa iyó tsi ndo. <sup>22</sup> Yuhu ra Pablo, ra Apolos, ra Pedro, maa Nyoo tsahā tsi ndi tsa cahan ndi tuhun ra tsihin ndo. Tan ñuhu ñayivi ihya, tan ñayivi iyó yo, tan tuhun tsihí, tan tsa cuví vityin, tan tsa cua cuví nu cuahán ca tsi, tandihí maa tuhun ihya tsahā Nyoo tsi ndo. <sup>23</sup> Tan inga tucu tuhun tyin cuví ndo tsa tsii ra Cristo, tan ra Cristo, tsii Nyoo cuví ra.

### Ña jacahnu yo tsi yo tan ndi tsi yañi yo

**4** Yacan cuenda ña taahán tsi nyehe ndo tsi ndi tumaa nyehé ndo tsi ra Cristo, tyin musu ñi ra cuví ndi. Tyin tavā tyiñu Nyoo tsi ndi tsa jacuahā ndi tuhun xeehe ra. <sup>2</sup> Tan ra tsa tavā tyiñu Nyoo cuñi tsi tsa tyaá yahvi ra tandihí tsa caahán ra tsihin ra. <sup>3</sup> Yacan ña ndihí iñi yu tsa caahán ndo tsi yu, o tatun cutuñi yu nuu ra cumí tyiñu. Tyin ndi maa yu tan ña caná iñi yu cahan yu tun vaha yu o ña vaha yu. <sup>4</sup> Vasu ndi maa tuví iñi yu tyin nduve cuatyí yu, maa tyin ña cuñi tsi catyí tyin nduve cuatyí yu nuu Nyoo. Tyin maa Jutu Mañi yo cua catyí tun iyó cuatyí yu o nduve. <sup>5</sup> Yacan cuenda, ña cahan ndo tsi yu. Cūatu ndo nda tahan maa tsi quitsi ra Cristo, tyin maa ra cua tava tsa yihí xeehe nu naa nu nditsin, tan cua jaquituvi ra tsa iyó añima intuhun intuhun yo. Tacan tan cua jacahnu Nyoo tsi intuhun intuhun yo cuhva tsa taahán tsi.

<sup>6</sup> Yañi, caahán yu tuhun ihya tsihin ndo tsa cuenda tsa vaha tsi maa ndo. Nyehe ndo cuhva iyó yu, tan cuhva iyó ra Apolos tyin ña cahnu jahá ndi tsi ndi. Tan tacan tucu maa ndo, nducu ndo cuhva javaha ndo tumaa catyí tuhun Nyoo, tan ña cuñi ndo tsi intuhun ñi nyivi. Inducu ñi cuñi ndo tsi tandihí nyivi. <sup>7</sup> Ndi intuhun ndo tan ña cahnu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Ya-

can cuenda ña taahán tsi tsa jacahnú ndo tsi ndo, tyin maa Nyoo tsahā can tsi ndo.

<sup>8</sup> Tan cuñi ndo tyin tsa tsitó maa ndo tandihí tuhun Nyoo, yacan nduve ca tsa cumañi tsi ndo. Tan cuñi tucu ndo tyin cuví ndo rey, tan ña tsiñi ñuhu ca nyuhu tsi ndo. Vaha xaan tun tsatyin nditsa tsa cuví ndo rey, tyin tacan tan rey cuví tucu nyuhu. <sup>9</sup> Nyuhu tsa cuví ndi ra tsicá tyiñu ra Cristo, tumaa tsa nacoq Nyoo tsi ndi nda tsata ca, tan cuví ndi tumaa nyivi tsa taahán tsi cúu. Tan cuaha xaan nyivi tan ángel nyehé tsa taahán ndi. <sup>10</sup> Nyivi tsicá iñi maa ñi tyin tsa cuenda ra Cristo tan ndusohq ndi. Tan nyooho iyo xaan cuñi ndo tsa caahán ñi tyin tsitó xaan ndo tuhun ra Cristo. Nyuhu nduve maa tunyee iñi iyó tsi ndi tan nyooho iyo xaan cuñi ndo tyin iyó tunyee iñi tsi ndo. Tun ndasí cuñi nyivi nyehé ñi tsi nyuhu, jaha xaan ca ñi tsa ñayivi tsi nyooho. <sup>11</sup> Nda cuanda vityin nyehé ndi tundoho; tsisocó ndi, tan na ityi iñi ndi, cumañi jahma ndi, nduve vehe ndi iyó, tan nyivi jacuu ñi tsa uhvi tsi ndi. <sup>12</sup> Tan tsitatú ndi tsa jahá tyiñu ndi tsihin ndaha ndi. Caahán nyivi tsi ndi, maa tyin nacahán ndi tsihin tsa vaha nu caahán ñi tsi ndi. Nyaá ndaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsiñi ñuhu ca jahá ñi nda cuanda vityin ihya.

<sup>14</sup> Tyaá yu tuhun ihya tsa cuenda ndo, maa tyin ñavin tsa cuñi yu cuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu. <sup>15</sup> Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juvin yu cahan tuhun ra Cristo Jesús tsihin ndo nda jihna ñi tan natsinū iñi ndo tsi ra. <sup>16</sup> Tan tsa cuenda tsehe tsicán yu tsi ndo tsa javaha ndo tumaa javahá maa yu.

<sup>17</sup> Yacan cuenda jaquitsí yu tsi ra Timoteo, sehe yu cuenda Jutu Mañi yo, nu yucú ndo. Nñ xaan iñi ra nyicún ra tsi Nyoo, tan cuñi xaan yu tsi ra. Maa ra cua janducuhun iñi tsi ndo cuhva iyó yu tsihin ra Cristo tan cuhva jacuahá yu tandihí ñi vehe ñuhu nu cuahán yu. <sup>18</sup> Yihí ndo cahnu jahá ndo tsi ndo tyin cuñi maa ndo tyin ña cua quitsi ca yu nu yucú ndo. <sup>19</sup> Maa tyin tun Jutu Mañi yo tan cuñi ra, yatyi cua quitsi nyehe yu nu yucú ndo. Tacan tan cua nyehe yu tatun nditsa tsa iyó tunyee iñi Nyoo tsi ra tsa cahnu xaan jahá tsi naha ra, o tatun caahán ñi maa ra naha. <sup>20</sup> Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahan ñi ra naha. Maa tyin cua tuví iñi yo tyin nditsa iyó tunyee iñi Nyoo tsi ra naha. <sup>21</sup> ¿Náa cuñi ndo javaha yu tsa quitsi yu? ¿A cuñi ndo tsa cuxaan yu tsi ndo, o cuñi ndo tsa cahan vii yu tsihin ndo?

### Nu tavā tyiñu ra Pablo tyin cutuñi iin ra tsicoq tsihin sihi quin

**5** Ñihí tuhun yu tyin iin ra nyíi tsihin ndo iyó ra tsihin sihi quin ra. Tan yacan cuví cuatyí cahnu xaan, tyin ndi nyivi iyó ityi tsata tan ña javahá ñi tacan tyin tsitó ñi tyin ña vaha. <sup>2</sup> Taahán tsi cuihyá cuñi ndo tsa

cuenda cuatyí can tan ña nduyaa ndo. Tava ndo tsi ra tsa javahá tacan nu yucú ndo. Tan ña cutahan ca ra tsihin ndo. <sup>3</sup> Vasu nduve yu nyíí tsihin ndo, maa tyin tumaa tsa nyíí ñi yu tsihin ndo tyin ñuhú iñi yu tsi ndo, tan tsihin sívi Jutu Mañi yo Jesucristo jandaa yu tyiñu ra tsa javahá cuatyí can. Yacan cuñí tsi tsa ndu iin ndo. Tan jaha ndo tuhun tyin nyíí yu tsihin ndo. Tan cunyaa tunyee iñi Jutu Mañi yo Jesús tsihin ndo. <sup>5</sup> Tacan tan cuhva ndo tsa javaha nu ña vaha tsa cuñi maa nu tsihin cuñu ñuhu ra tsa javahá tsa caquiñi ihya, tyin vasiqui tacan tan cua jandihí ra tsa javahá ra can. Tacan tan quívi quítsi Jutu Mañi yo Jesucristo cacu añima ra.

<sup>6</sup> Ña vaha tsa jacahnu xaan ndo tsi ndo tyin ña jahá ndo cuenda tsa javahá ra yucú vehe ñuhu ndo. ¿A ña tsitó ndo tyin vasu luxu ñi yutsan iya, jandaá tsi tandihí yutsan paan? Tan tacan ñi cuñí yo cuví tucu yacan. <sup>7</sup> Tava ndo yutsan iya tsahnu tsa jatívi tsi ndo. Tacan tan cuví ndo tumaa paan tsa tuhvá nyívi javahá vico pas-cua, tyin paan can nduve yutsan iya yihí tsihin tsi. Tsa nditsa tyin tacan taahán tsi cuví tucu nyooho tyin maa ra Cristo cuví mbee ticatyí luhlu tsa tsihí tsa cuenda cuatyí yo. <sup>8</sup> Yacan cuenda taahán tsi catsi coo yo tyin tsihí ra Cristo tsa cuenda yo. Tan jandoó yo tsa caquiñi tsa javahá yo ityi tsata tsa cuví tumaa yutsan iya tsahnu. Tan cahan yo maa ñi maa tsa nditsa tsihin tsa ñi iñi yo tyin cuví tsi tumaa paan tsa nduve yutsan iya yihí.

<sup>9</sup> Nu inga carta tsa jaquítsi yu tsi ndo, catyí yu tyin ña taahán tsi cunyanaa ndo tsi ra tsicá nuu tsihin ñaha.

<sup>10</sup> Tan tsa caahán yu tyehen tsihin ndo, ñavin tsa cunu ndo nu nyívi tsa iyó ityi tsata, ñi tsa iyó tsihin rayíi a ñaha, ñi tsa nyiyó iñi, ñi suhú, tan ñi jacahnú tsitoho, tyin tun cunu ndo nu iyó ñi ihya, cuñí tsi tsa quita ndihí ndo nu ñuhu ñayívi ihya. <sup>11</sup> Maa tyin tsa cuñí yu catyí yu tsihin ndo ña cunyaa naa ndo tsi nyívi tsa catyí: “Hermano cuví yu”, tan tsicá nuu ra tsihin ñaha, o ñaha tsicá nuu ña tsihin rayíi, o nyiyó iñi ñi, o jacahnú ñi tsitoho, o caahán ñi cuendu, o tsihí ñi nyixi, o suhú ñi. Ñi tsa javahá iin tsa ña vaha ihya, ndi ña cunyecu ndo catsi ndo tsihin ñi. <sup>12</sup> Tyin yoo ña taahán tsi tatsi tuñi yo tsi nyívi ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyooho cuñí tsi tatsi tuñi ndo tsi nyívi yihí cuenda Nyoo. Yacan cuenda tavá ndo tsi ra iyó cuatyí nu yucú ndo.

### Ña cua ndacan yo cuatyí tsaha iin yañi yo cuenda Nyoo nuu ra cumí tyiñu

<sup>6</sup> ¿Nacuenda tyin tsicán ndo cuatyí tsaha yañi ndo nuu ra cumí tyiñu tsa ña yihí cuenda Nyoo tsihin ndo, tan ña jacoto ndo tsi ra yihí cuenda Nyoo, tan nyehe maa ra naha ndáa ra iyó cuatyí? <sup>2</sup> ¿A ña tsitó ndo tyin juvin ñi maa yo cua jandaa cuatyí tandihí nyívi iyó nu ñuhu ñayívi ihya nu cuahán ca tsi? Tan tatun maa yo cua jandaa cuatyí can, ¿nacuvi tyin ña cuví jandaa ndo cuatyí nyihi ihya? <sup>3</sup> ¿A ña tsitó ndo tyin cua jandaa yo cuatyí nda cuanda ángel? Tun tacan, ¿a yíi jandaa yo cuatyí nyihi tsa iyó nu ñuhu ñayívi? ¿Ña yíi jandaa yo can! <sup>4</sup> Yacan cuenda tatun iyó tsihí nu yucú

ndo, ¿nacuenta tyin cuahán ndo nuu ra cumí tyiñu tsa ña yihí tuhun Nyoo? <sup>5</sup> Caahán yu tyehen tsihin ndo na nducahan nuu ndo. ¿A nduve cuii vasu intuhun ra jandaa cuatyí yañi ndo nu yucú ndo? <sup>6</sup> Tyin cuahán ndo cua ndacan ndo cuatyí tsaha yañi ndo cuenda Nyoo nuu iin ra cumí tyiñu tsa ña tsinú iñi tsi Nyoo.

<sup>7</sup> Ña vaha tsa iyó tsihí nu yucú ndo. Vaha taxin ca cunyee iñi ndo tatun javaha nyívi tsa ña vaha tsi ndo. Tan jaña ndo na suhu maa ñi tsa tsii ndo. <sup>8</sup> ¿Maa tyin nyooho javahá ndo tsa ña vaha tan suhú ndo nda cuanda tsa tsii yañi ndo!

<sup>9</sup> ¿A ña tsitó ndo tyin nyívi quiñi iyó ña cua quihví ñi nu ndacá ñaha Nyoo? Ña jandavi ñaha ndo tsi ndo. Ña cua quihví ra tsa tsicá nuu tsihin ñaha o ñaha tsa tsicá nuu tsihin rayíi, ndi ñi jacahnú tsitoho, ndi ra iyó ñasiñi tan iyó inga ñaha tsi ra, tacan tucu ñiñaha tsa iyó yíi tan iyó inga rayíi tsi ñi, ndi ra ndusiñí, ndi ñi nduyíi, ndi ñi suhú, ndi ñi nyiyó iñi, ndi ñi caahán cuendu, ndi ñi tuhva tsihí nyixi, tan ndi ñi tsit; o jandaví ñaha. Tandihí maa nyívi ihya ña cua ñihi ñi nu ndacá ñaha Nyoo cahun ñi. <sup>11</sup> Tyin tacan javahá juhva nyooho. Maa tyin tsa ndatsi cuatyí ndo tan ndu iñi ndo tan nduvahá ndo nuu Nyoo jahá Jutu Mañi yo Jesucristo tan Tatyí Ii Nyoo.

### Cuñu ñuhu yo cuví vehe ñuhu Nyoo

<sup>12</sup> Catyí tsi tyin nuña maa javaha yo tandihí náa cuñí maa yo. Tan nditsa tucu maa, maa tyin ña tandihí tan vaha. Cuví javaha yo náa cuñí maa yo, maa tyin cuñí tsi jaha yo cuenda tun vaha a ña vaha, tan ña cuhva yo tsa cundaca ñaha can tsi yo. <sup>13</sup> Catyí nyívi tyin Nyoo javahá ra tsa tsatsí yo tsa cuenda tsitsi yo. Tan javahá ra tsitsi yo tsa cuenda tsa tsatsí yo. Tan nditsa. Maa tyin Nyoo cua janaa ra nduvi tsehe quívi cua naa ñayívi. Tan tsa cuenda cuñu ñuhu yo ña nditsa tsa javahá ra itsi tyin coo yo tsihin ñaha a tsihin rayíi, tyin cuenda Jutu Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo. <sup>14</sup> Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

<sup>15</sup> ¿A ña tsitó ndo tyin tandihí yoo tsa yihí cuenda ra Cristo cuví yo intuhun ña cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuví quihin yu luxu cuñu ñuhu ra Cristo tan jatívi yu tsihin iin ñaha tsicá nuu? Ña taahán tsi javaha yu tacan. <sup>16</sup> ¿A ña tsitó ndo tyin tun iin rayíi tan iyó ra tsihin iin ñaha tsicá nuu intuhun ña cuñu ñuhu nanduví ra tsihin ña? Tyin nu tutu Nyoo catyí tsi tyehen: “Tsa nduvi ñi, iin ña nyívi cuví ñi.” <sup>17</sup> Maa tyin tatun iin nyívi tan nacuhva ñi aña ñi tsi Jutu Mañi yo, iin ñi cuví ñi tsihin ra tyin quihví Tatyí Ii ra aña ñi.

<sup>18</sup> Jandihí ndo tsa iyó ndo tsihin ñaha a tsihin rayíi tun ñavin ñasiñi ndo a ñavin yíi ndo cuví. Tyin tandihí inga nu cuatyí tsa javahá nyívi ña jatívi can cuñu ñuhu ñi. Maa tyin tsa tsicá nuu ñi tsihin ñaha a tsihin rayíi, jatívi can cuñu ñuhu ñi. <sup>19</sup> ¿A ña tsitó ndo tyin cuñu ñuhu yo cuví vehe ñuhu Tatyí Ii tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra

ndacá ñaha tsi yo. <sup>20</sup> Tyin Nyoo yahvi xaan jatā ra tsi yo. Yacan cuenda taahán tsi jacahnú yo tsi ra tsihin cuñu ñuhu yo, tan tacan tucu ñi tsihin tsa tsiñi tuñi iñi yo tyin nduvi taahan tuhun ihya tsii maa Nyoo cuví.

### Nu tsahá cuenda ra Pablo nácaa taahán tsi coo nyivi tindahá

**7** Tan vityin cua cahan yu tsa tsicā tuhun ndo tsi yu nu carta tsa jaquitsi ndo tsi yu. Nditsa tyin vaha tsa ña tindaha yo. <sup>2</sup> Maa tyin cuaha xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayi. Yacan cuenda cuñí tsi tsa coo ñasihi tsa intuhun intuhun ra naha, tacan tucu ñiñaha taahán tsi coo yi tsa intuhun intuhun ñi. <sup>3</sup> Na javaha rayi cuhva taahán tsi tsihin ñasihi ra. Tan tacan tucu maa ñaha, na javaha ña cuhva taahán tsi tsihin yi ña. <sup>4</sup> Ñiñaha ña cuvi cundaca ñaha ñi maa ña cuñu ñuhu ña, tyin tsii yi ña cuví cuñu ñuhu ña. Tacan tucu maa yi ña, ña cuvi cundaca ñaha ñi maa ra cuñu ñuhu ra tyin tsii ñasihi ra cuví cuñu ñuhu ra. <sup>5</sup> Ña vaha tun ña cuhva iin ndo tsi inga ndo. Tatun cuñí ndo coo ndo oración, vaha ca natuhun tahan jihna ndo tyin ña cua coo tsihin tahan ndo quivi tsa cua nanducu ndo tsi Nyoo. Yaha can tan coo tsihin tahan nyico ndo tyin coto nducu rayi inga ñaha o ñaha nducu ña inga rayi tan javaha ndo tsa ña vaha jaha nu ña vaha.

<sup>6</sup> Tsa caahán yu tyehen tsihin ndo ñavin tsa caahán yu tyin tindaha ndo. Ña jañiñi yu tsi ndo tsa tindaha ndo. Maa tyin cuví tindaha ndo tatun cuñí ndo. <sup>7</sup> Tsa cuenda yuhu, vaha ca coo ndo tumaa iyó maa yu. Maa tyin siin siin tunyee iñi tsahá Nyoo tsi tsa intuhun intuhun yo. Yihí yo tsahá ra tunyee iñi tsa ña coo ñasihi yo. Tan yihí yo tsahá ra tunyee iñi tsa coo ñasihi yo.

<sup>8</sup> Tsahá cuenda yu tuhun ihya tsi tandiñi nyooho tsa ñaha ca tindaha tan nyooho ñi tsihi yi tyin vaha ca cuvi tsi ndo tun ña tindaha ndo tumaa maa yu. <sup>9</sup> Maa tyin tatun ña cunyee iñi ndo coo tacan ñi ndo, vaha ca tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

<sup>10</sup> Maa tyin caahán yu tsehe tsihin nyooho ñiñaha tsa tsa tindaha: ña nacoo ndo yi ndo tyin tuhun caahán yu ihya, ñavin tsa cuñí maa yu cuví, tyin maa Jutu Mañi yo tsahá itsi tyin cuhva cuenda yu tsi ndo. <sup>11</sup> Maa tyin tatun iin ñaha tan nacoo ña yi ña, cuñí tsi tsa ndoo ña cunyaa ña tsa ña cua tindaha ca ña, o cunuhu nyico ña tsihin yi ña. Tan tacan tucu rayi, ña taahán tsi nacoo ra ñasihi ra.

<sup>12</sup> Tan cuñí yu cahan yu inga tuhun ihya tsihin inga ndo, maa tyin ñavin Nyoo tsahá itsi. Tatun iin ra hermano tan ña tsinú iñi ñasihi ra tsi Nyoo, maa tyin ndoo ña vaha tsa cunyaa ña tsihin ra, nduve ndatu tsa nacoo ra tsi ña. <sup>13</sup> Tan tatun iin ña hermana, tan ña tsinú iñi yi ña tsi Nyoo, ndoo ra vaha tsa cunyaa ra tsihin ña, nduve ndatu tsa nacoo ña tsi ra. <sup>14</sup> Tyin tsa yahā nasoco Nyoo tsi rayi tsa ña tsinú iñi can tsa cuenda tsa iin ñi cuví ra tsihin ñaha tsa tsinú iñi. Tan tsa yahā nasoco tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuví ña tsihin ra tsinú iñi. Yacan cuen-

da sehe ñi ña cuvi tsi naha tsi tumaa cuví sehe nyivi tsa ña tsinú iñi tsi Nyoo, tyin tsa nasoco ndiñi Nyoo itsi naha tsi. <sup>15</sup> Maa tyin tatun rayi an ñaha tsa ña tsinú iñi tsi Nyoo, tan cuñí ñi nacoo ñi tsi tahan ñi tsa tsinú iñi tsi Nyoo, na nacoo maa ñi. Tacan tan ra hermano a ña hermana ndoo nuña ñi. Tyin maa Nyoo cuñí tsa coo vaha yo tsihin tsa nduve tsihi. <sup>16</sup> Tyin ña tsitó iin ñaha tatun cacu yi ña. Tan ndi rayi ña tsitó ra tatun cacu ñasihi ra.

<sup>17</sup> Tan catyí yu tsihin ndo coo ndo tsihin ndatu tsa tsahā Jutu Mañi yo tsi ndo tan cuhva iyó ndo quivi canā ra tsi ndo. Tan tsehe cuví tsa jacuahá yu tandiñi vehe ñuhu tan iin tan iin ñuu. <sup>18</sup> Tatun tsa yaha tsinyaa tuñi Nyoo cuñu ñuhu ndo tan canā Nyoo tsi ndo ña ca-ca iñi ndo tsa cuenda yacan. Maa tyin tun ña tyaā ñi tuñi can tsi ndo, tan canā Nyoo tsi ndo, nduve cuenda; ña javaha ca ndo can. <sup>19</sup> Ña ñiñi xaan tsa coo tuñi can tsi yo, o tsa ña coo tsi. Tyin tsa ñiñi ca, cuví tsa tyaā yahvi yu tuhun caahán Nyoo. <sup>20</sup> Tan intuhun intuhun ndo taahán tsi jahā tyiñu ndo juvin ñi tyiñu tsa tuhvá ndo javahá quivi tsa canā Nyoo tsi ndo. <sup>21</sup> Tyin tatun musu cuví ndo quivi tsa canā Nyoo tsi ndo, ña ca-ca iñi ndo. Maa tyin tatun tsahá tsi cuhva tsa ndoo nuña ndo, nducu ndo cuhva. <sup>22</sup> Iin ra tsa cuví musu tan quihvi ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quihvi ra cuenda Jutu Mañi yo, vityin cuví ra musu tsa cuenda ra. <sup>23</sup> Nyoo yahvi xaan jatā ra tsi yo, yacan cuenda ña taahán tsi cuhva yo tsa cundaca ñaha ra ñuu ñayivi naha ra tsi yo. <sup>24</sup> Tan catyí yu tsihin ndo, yañi, jahā tyiñu ndo tyiñu tsa tuhvá ndo javahá quivi canā Nyoo tsi ndo.

<sup>25</sup> Tan tsa cuenda nyivi tsa ñaha ca tindaha, nduve tuhun tsahā Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsahā ra tucahnu iñi tsi yu tan maa ra yihí ndaha tsi yu. <sup>26</sup> Tsa cuenda yuhu, vaha ca ña tindaha ñi can, tyin vityin cuaha xaan tundoho ñayivi iyó. <sup>27</sup> Maa tyin tatun tsa iyó ñasihi ndo, ña nducu ndo cuhva tsa nacoo ndo tsi ñi. O tatun nduve ñasihi ndo iyó, vaha ca ña tindaha ndo. <sup>28</sup> Maa tyin tatun tindaha ndo, ñavin cuatyí cuví. Tan tacan tucu tun tindaha iin ñaha yoco juvin ñi ñavin cuatyí cuví. Maa tyin nyivi tsa tindaha cuaha xaan tundoho cua nyehe ñi ñayivi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñí yu tsa nyehé ndo tundoho.

<sup>29</sup> Yañi, cuñí yu cahan yu tuhun ihya tsihin ndo: Juhva cuii ña quivi iyó yo. Yacan vityin tan ityi nuu tandiñi ra tsa iyó ñasihi cuñí tsi tsa jaha tyiñu ra naha tyiñu Nyoo tumaa tsa nduve ñi ñasihi ra naha iyó. <sup>30</sup> Tan nyooho tsa iyó tucuihya iñi, ña tyaā yahvi ndo tucuihya iñi can. Tan nyooho tsa siñi cuñi, ña tyaā yahvi ndo tusi iñi can. Tan nyooho tsa jatā ndaha tyiñu taahán tsi coo ndo tumaa tsa nduve ndaha tyiñu ndo. <sup>31</sup> Tan nyooho tsa iyó vaha nu ñuhu ñayivi ihya, coo ndo tumaa tsa nduve ñi tsa iyó tsi ndo, tyin tsa cua ndiñi ñuhu ñayivi ihya.



<sup>32</sup> Cuñí yu tyin nyooho ña caca xaan iñi ndo tuhun tsa iyó nu ñuhu ñayivi ihya; iin ñi maa tuhun Nyoo caca iñi ndo. Iin ra yoco tsa ñaha ca tindaha tsicá iñi ra nácaa javaha ra cuhva cuñí maa Jutu Mañi yo. <sup>33</sup> Maa tyin tatun tsa tindaha ra, tsicá iñi ra nácaa coo vaha ra nu ñuhu ñayivi ihya cuhva taahán iñi ñasihi ra. <sup>34</sup> Tan tacan tucu ñiñaha, sñin sñin cuhva iyó ñi, tyin ñaha tsa ñaha ca tindaha, maa ñi tuhun Jutu Mañi yo tsicá iñi ña. Tan nducú ña cuhva jacahnu ña tsi Nyoo tsihin cuñu ñuhu ña, tan tsihin tsa ñi iñi añima ña. Maa tyin ñaha tsa iyó yñi, maa ñi cuhva coo vaha ña tsihin yñi ña nducú ña.

<sup>35</sup> Caahán yu tuhun ihya tsihin ndo tsa cuenda tsa vaha tsi maa ndo, ñavin tsa jañiñi yu tsi ndo. Maa tyin coo ndo iin ñayivi cuiñi tsihin tsa nduve tsa jatyañu tsi ndo. Tan javaha ndo iin ñi tyiñu Nyoo.

<sup>36</sup> Maa tyin ndáa nyooho tsicá iñi tyin vaha tsa tindaha sehe maa tyin tsa cua yaha cuiya tsi; vaha maa, na tindaha maa tsi tun cuñí tsi; ñavin cuatyí cuví can.

<sup>37</sup> Maa tyin ndáa nyooho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa.

<sup>38</sup> Ñi tsa cuñí tindaha sehe ñi, vaha javahá ñi. Tan ñi tsa ña cuñí tindaha sehe ñi, vaha ca javahá ñi.

<sup>39</sup> Maa tyin ley Nyoo catyí tsi na cundacá ñaha rayñi tsi ñasihi ra tsitsi tsa ndi iyó ra. Tatun tsa tsihi ra, tacan tan cuví ndoo nuña ña tan tindaha ña yóo tsihin cuñí maa ña. Maa tyin tun cua tindaha ña, na tindaha ña tsihin ra yihí tuhun Nyoo. <sup>40</sup> Maa tyin sñi xaan ca cua cuví tsi ña tun ña tindaha ña inga tsaha. Tsehe cuví tsa tsicá iñi maa yu. Tan cuñí yu tyin maa Tatyí Ii Nyoo, tsa-ha tuhun ihya tsi yu, tan tsahá cuenda yu tsi ndo.

#### Nu jacuahá ra Pablo tyin ña vaha janacava yo tsi nyivi nu cuatyí

**8** Tan vityin cua cahan yu tsihin ndo cuenda nyayu tsa jamañi nyivi nu tsitoho. Tandihí yo tan cuñí yo tyin tsitó yo tun vaha o ña vaha catsi yo nyayu can. Tan tsa cuenda tsa tsitó xaan yo, iyo xaan cuñí yo tan nduyaá yo tsihin can. Tan ndi nduve nu jatyinyee can tsi yo. Maa tyin tsa cuñí tahan yo tsi yo jacuahnú tsi tsi yo tsihin Nyoo. <sup>2</sup> Ra tsa cuñí tyin tsitó xaan ra, nduve náa tsitó ra. <sup>3</sup> Maa tyin Nyoo tsitó ra ndáa nyivi cuñí tsi ra tsihin tsa ñi iñi añima ñi.

<sup>4</sup> Tan vityin tsa cuenda tsa catsi yo nyayu tsa iyó vico tsitoho: tsa tsitó vaha yo tyin tsitoho nduve maa yahvi nyaá can, tyin intuhun ñi maa Nyoo iyó. <sup>5</sup> Vasu ndi maa juhva nyivi catyí ñi tyin iyó cuaha nyoo tsa ndacá ñaha nu ñuhu ñayivi ihya tan andivi, <sup>6</sup> maa tyin tsa cuenda yoo, intuhun ñi Nyoo Jutu yo iyó. Tan juvin ra javahá tandihí cuii maa tsa iyó. Tan yoo iyó yo tsa cuenda ra. Tan iyó tucu intuhun ñi Jutu Mañi yo Jesucristo. Tan maa ra javahá tandihí maa tsa iyó, nda cuenda tsi maa yo.

<sup>7</sup> Maa tyin yihí juhva ñi yihí cuenda Nyoo ña tsitó ñi tyin intuhun ñi Nyoo iyó. Tyin ndi tsicá iñi ñi tyin nyito tsitoho can. Tan cuñí ñi tyin nyayu, tsa jamañi nyivi tsi tsitoho can, ica tsi. Tan cuñí ñi tyin tun catsi ñi nyayu can cua coo cuatyí ñi nu Nyoo. <sup>8</sup> Maa tyin Nyoo nduve

cuenda ra tatun catsi yo, a ña catsi yo. Ñavin tsa tsatsí yo can tan ña vaha ca yo nuu ra, tan ñavin tsa cuenda tsa ña tsatsí yo tan vaha ca yo. <sup>9</sup> Maa tyin nyooho tsa tsitó tyin nduve cuatyí tsa catsi yo nyayu tsa jamañi nyivi nuu tsitoho, jaha ndo cuenda coto janacava ndo tsi ñi tsa ndi quihvi tuhun Nyoo nu cuatyí, tyin ñi ican tsicá iñi ñi tyin tun catsi ñi tsa jamañi nyivi nu tsitoho, cua coo cuatyí ñi nuu Nyoo. <sup>10</sup> Tyin tatun yooho tsa tsitó un tuhun ihya, tan cunyaa un catsi un tsa iyó vehe tsitoho, tan iin ra yañi yo tsa ndi quihvi cuenda Nyoo tan nyehe ra tyin tsatsí un tsa jamañi nyivi nu tsitoho, cua cuñí ndihí ra catsi ra. <sup>11</sup> Tan cua tiví añima ra tyin cuñí maa ra tyin tsicoo cuatyí ra. Tan ra ican tsihi ra Cristo tsa cuenda ra. Tan yooho tsa tsitó un, siqui un cua cuhnu cuatyí can. <sup>12</sup> Tyin tun janacava yo tsi yañi yo tsa ndi quihvi cuenda Nyoo, tsicoo cuatyí yo nuu ra Cristo. <sup>13</sup> Yacan cuenda tatun janacava yu tsi iin yañi yo nuu cuatyí tsihin tsa tsatsí yo nyayu, vaha ca tsa ña cua catsi ca yu nyayu ndi sava ca quivi, tyin ña cuñí yu tsa janacava yu tsi yañi yo nuu cuatyí.

#### Tsa taahán tsi javahá iin ra tava tyiñu ra Jesucristo

**9** Nditsa tsa cuví yu iin ra tava tyiñu ra Jesucristo. Tan yoñi nyivi ndacá ñaha tsi yu tyin nyehe yu tsi ra Jesús Jutu Mañi yo. Tan juvin ñi maa ndo cuví tsandaa tsa cuenda tyiñu javahá yu, tyin tsinú iñi ndo tuhun ra tsa jacoto yu tsi ndo. <sup>2</sup> Vasu yihí nyivi ña tsinú iñi ñi tyin ra Jesucristo tava tyiñu tsi yu, maa tyin nyooho taahán tsi tsinu iñi ndo, tyin juvin yu cahan tuhun ra tsihin ndo tan natsinu iñi ndo tsi ra. Yacan cuenda juvin ndo cuví tsandaa.

<sup>3</sup> Tyehen cuví tsa cua cahan yu tsihin nyivi tsa caahán nyaá tsi yu. <sup>4</sup> Iyó ndatu tsa quihín yu tandihí tsa tsahá ñi catsi yu tan tsa tsahá ñi coho yu. <sup>5</sup> Tan iyó tucu ndatu tsa tindaha yu tsihin iin ñaha yihí cuenda ra Cristo tumaa javahá yañi ra Jesús, tan ra Pedro, tan tandihí ca ra tava tyiñu ra Jesucristo. <sup>6</sup> ¿O tsicá iñi ndo tyin yuhu ñi tan ra Bernabé ñi taahán tsi jaha tyiñu ndi tsihin ndaha ndi tan jata ndi tsa tsiñi ñuhu tsi ndi? ¿A ña taahán tsi nacoo ndi tyiñu can tan cahan ndi maa ñi tuhun Nyoo? <sup>7</sup> Ra tsa cuví andaru iyó yahvi ra naha. Tan ra tsa tatsí yava nducuaa tsatsí ra tucuaa tsa queé nu nducuaa ra. Tan ra tsa jahá cuenda indiqui tsihi ra letsí ti. <sup>8</sup> Tan ña cuñi ndo tyin tuhun ihya tsa tsiñi tuñi jiñi maa yu cuví, tyin nu ley Nyoo tsa tyaá ra Moisés catyí tsi tyehen: <sup>9</sup> “Ra tsa tatsí trigu ña taahán tsi tyihi ra yoho yuhu indiqui tsa janduvahá trigu can, tyin taahán maa tsi catsi ti juhva trigu nu jahá tyiñu ti.” Nditsa tyin Nyoo ña cahan ra tyehen tsa cuenda indiqui ñi. <sup>10</sup> Maa tyin na cutuñi iñi yo tyin tumaa ra tahvi ñuhu tan ra tatsí, nyita iñi ra naha tyin cua naquihin ra naha tsa cua quee nuu tsa tatsí ra naha. <sup>11</sup> Tan tacan cuví tucu nyuhu, quitsí cahan ndi tuhun Nyoo tsihin ndo, tumaa tsa quitsí tatsí ndi tsiti tsitsi añima ndo cuvi can. Tan taahán tsi tsa jatyinyee ndo tsi ndi tsa cuenda tsa jacotó ndi tuhun Nyoo tsi ndo. <sup>12</sup> Tatun jatyinyee ndo tsi inga ra tsa ña quitsí tyihi tuhun Nyoo nu yucú

ndo, taahán tsi tsa cuaha ca jatyinyee ndo tsi nyuhu, tyin nyuhu tyihí tuhun Nyoo nu yucú ndo.

Maa tyin ña caahán ndi, tan cunyeé iñi ndi tandihí. Ña tsicán ndi tsa tsiñí ñuhu tsi ndi tsi ndo tyin coto jandihí ndo tsa tyaá yahvi ndo tuhun ra Cristo tsa jacuahá ndi. <sup>13</sup> Tsitó ndo tyin ra jahá tyiñu vehe ñuhu nyivi Israel, iyó ra naha tsihin tsa iyó vehe ñuhu can. Tyin taahán tsi tavá siin ra naha juhva cuñu quití tyin catsi ra naha. Tan tandihí ca cuñu can cua cahmi ra naha tumaa catyí maa Nyoo tsihin ra naha. <sup>14</sup> Tan juvin ñi tacan caahán Jutu Mañi yo, tyin taahán tsi jatyinyee ñi yihí cuenda Nyoo tsi ra caahán tuhun Nyoo tsihin ñi. <sup>15</sup> Maa tyin yuhu, ndi iin tsaha tan ñaha ca ndacan yu tsa taahán tsi tsi yu. Tan ndi ña tyaá yu tuhun ihya tyin cuñí yu tsa cuhva ndo tsa cuhva ndo tsi yu. Vaha taxin ca nacúu maa yu jaha soco tan ñavin ca tsa ndihí tsa siñ cuñí yu caahán yu tuhun ra Cristo tsihin ndo vasu ndi maa nduve náa jatyinyee ndo tsi yu.

<sup>16</sup> Ña cuví nduyaa yu tsihin tsa caahán yu tuhun Nyoo tyin maa ra Cristo tavá tyiñu tsi yu tsa cahan yu tuhun ra. Maa tyin ndahvi yu tun ña cahan yu tuhun Nyoo ihya. <sup>17</sup> Yacan cuenda tatun cahan yu tsihin tsa ñi iñi yu, cua ñihi yu yahvi yu. Vasu ña cuñí yu cahan yu, tsa ñiñi cuñí tsi cahan yu, tyin tyiñu tsahá maa Nyoo tsi yu cuví tsi. <sup>18</sup> Tan tsa siñ cuñí yu caahán yu tuhun ra Cristo yacan cuví yahvi yu. Tan ña tsicán yu tsa taahán tsi tsi yu tsa cuenda tsa caahán yu tuhun ra.

<sup>19</sup> Vasu ñavin musu cuví yu, maa tyin nanduví yu musu tandihí nyivi tyin tacan tan cuví jaha canaa yu cuaha ca nyivi cuenda ra Cristo. <sup>20</sup> Tatun nyí yu nu yucú ra Israel naha ra, nanduví yu tumaa maa ra naha tyin ra can naha ra iyó ra naha cuhva catyí ley Nyoo tsa tyaá ra Moisés. Tan tsa cuñí yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu. <sup>21</sup> Maa tyin tatun cuñí yu jaha canaa yu tsi nyivi tsa ña nyitá iñi ley ra Moisés, javahá yu tumaa javahá ñi, tyin tacan tan cuví jaha canaa yu tsi ñi. Tan tsa javahá yu cuhva javahá ñi, ña cuñí tsi catyí tyin ña tyaá yahvi yu ley Nyoo tyin tyaá yahvi yu ley ra Cristo. <sup>22</sup> Tatun nyí yu tsihin ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyin tacan tan cuví cahan yu tuhun Nyoo tsihin ra naha, tan ndunyeé ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyivi, tyin tacan tan tyaá soho ñi tuhun Nyoo tsa caahán yu tsihin ñi tan cacu ñi. <sup>23</sup> Javahá yu tacan tyin tacan tan cacu nyivi tan nasoco ndihí tucu maa Nyoo tsi yu.

<sup>24</sup> Tsitó ndo tyin tatun cua cunu suuhva nyivi, tandihí ñi tsinú, maa tyin intuhun ñi ñi jaha canaa. Tacan tucu maa yo, cuñí tsi tsa ñihi cunyicun yo tsi Nyoo tyin tacan tan cuví jaha canaa yo tsa vaha ca tsa tsahá ra tsi yo. <sup>25</sup> Tandihí nyivi tsa tsinú suuhva, nacoó ñi tandihí tsa jatyañú tsi ñi tyin cuñí ñi jahá canaa ñi. Tan nyivi can cua jaha canaa ñi intuhun corona ndaha yu-tun tsa iin yaha ñi na ityí. Maa tyin yoo nducú yo cuhva jaha canaa yo tsa ña cua tiví maa. <sup>26</sup> Tsa cuenda yuhu ña tsinú soho ñi yu, tan ndi ña cañí tahan soho ñi yu.

<sup>27</sup> Maa tyin ñihi ndacá ñaha yu tsi cuñu ñuhu yu. Tan jañiñi yu tyaá yahvi yu tsi Nyoo, coto juvin ñi maa yu tsa yaha jacuahá yu tsi inga nyivi, tan ndoo yu.

### Nu jacuahá ra Pablo tyin ña vaha jacahnú yo tsitoho

**10** Yañi, ña cuñí yu tsa naa iñi ndo tsa cuví tsi tsi tsaahnu yo tahān tsanaha. Nyoo jacuhun ra iin vico ityi nuu ñi. Tan yahá sava ñi nu ndutya ñuhu iin caa ñi tsihin ra Moisés, ra cuví ityi nuu tsihin ñi. Tan tsa tacan, tumaa tsa tsicoondutya ñi tsihin vico tan tsihin ndutya ñuhu tan ndu iin ñi tsihin ra Moisés. <sup>3</sup> Tan Nyoo tsahá ra iin ñi tsa tsatsí tandihí ñi. <sup>4</sup> Tan tsihí ñi ndutya tsa quitá tsata cava tsa cuahán tsihin ñi tan cava can cuví ra Cristo, tan tandihí ñi iin ñi ndutya can tsihí ñi. <sup>5</sup> Maa tyin vasu cuaha tsa iyo javahá Nyoo nyehé ñi, cuaha ñi ña tyaá yahvi ñi tuhun cahan ra tsihin ñi. Tan tsihí ñi nu tsiquí can.

<sup>6</sup> Tandihí tuhun ihya tsahá tsi iin cuhva tsi yo tyin tacan tan ña cuñi yo javaha yo tsa caquiñi tumaa tsa javahá ñi can. <sup>7</sup> Yacan cuenda ña jacahnu ndo tsitoho, tumaa javahá juhva ñi can, tyin catyí nu tutu Nyoo tye-hen: “Tsinyecú ñi, tsatsí ñi, tan tsihí ñi. Yahá can tan nduvitá ñi, tsahan quitsahá tsañí ñi [jacahnú ñi indiqui xuhun cuaan tsa javahá ñi].” <sup>8</sup> Ña coo ndo tsihin iin ñaha tun ñavin ñasñi ndo cuví. Tacan tucu ñiñaha ña taahán tsi coo ñi tsihin rayñi tumaa javahá nyivi can. Tan tsihí oco uñi mil ñi tsa iin quivi. <sup>9</sup> Jutu Mañi yo vita xaan iñi ra, maa tyin ña taahán tsi nducú cuhva yo tsi ra tumaa javahá juhva ñi can. Tan tsihí ñi tsa caan coo tsi ñi. <sup>10</sup> Tan ña cahan ndo ndavaha ñi siqui Nyoo, tumaa tsa cahan juhva ñi can. Tan jaquitsí ra ángel ra tsahñi tsi ñi.

<sup>11</sup> Tandihí yacan tahān tsii tsaahnu yo tsa tsicoo tahān tsanaha. Tan tsinyaá tsi nu libru Nyoo tyin tacan tan yoo tsa iyó yo nu cua ndihí ñuu ñayivi ihya vityin coto yo tyin ña taahán tsi javaha yo tandihí tsa javahá ñi can. <sup>12</sup> Tan nyooho tsa cuñí tyin vaha cuahán ndo tsihin Nyoo, jaha ndo cuenda coto nduva ndo [jaha nu ña vaha]. <sup>13</sup> Tundoho tsa nyehé ndo, cuñí maa ndo tyin intuhun ñi maa ndo nyehé can. Maa tyin inducu ñi nyehé tandihí ca nyivi. Cujita iñi ndo tsi Nyoo, tyin ña tuhvá ra cuhva tsa nyehé ndo tundoho tsa ña cuví cun-yeé iñi ndo. Tyin tun nyehé ndo tundoho, nducú ra cuhva tsa quita ndo tsitsi tundoho can tan cunyeé iñi ndo.

<sup>14</sup> Yacan cuenda yañi, ña jacahnu ndo tsitoho.

<sup>15</sup> Caahán yu tsihin ndo tumaa caahán yu tsihin ra tsa cutuñí iñi. Yacan cuenda jaha ndo cuenda tsa caahán yu tsihin ndo tan nyehé ndo tun nditsa a ña nditsa tsa caahán yu. <sup>16</sup> Quivi tsa nducuhún iñi yo tyin tsihí ra Cristo nu cruu, tsihí yo vinu tan tsatsí yo paan. Tan vinu can cuñí tsi catyí tyin iin ñi cuví yo tsihin ra Cristo tsa cuenda ñiñi ra. Tan paan can cuñí tsi catyí tyin iin ñi cuví yo tsihin ra tsa cuenda cuñu ñuhu ra. <sup>17</sup> Tyin vasu cuaha yo, maa tyin tandihí yo tan tsatsí yo intuhun ñi paan. Tan yacan cuenda cuví yo intuhun ñi cuñu ñuhu tsa cuenda ra.

<sup>18</sup> Tyíhi tuñi iñi ndo cuhva iyó nyívi Israel. Tsatsí ñi quítí tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra. <sup>19</sup> Ñavin caahán yu tyin iyó yahvi nyaá tsitoho tsa jacahnú nyívi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can. <sup>20</sup> Tsa caahán yu cuví: Tun jamañi nyívi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha. <sup>21</sup> Tyin ña cuví coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuví catsi yo nu mesa Nyoo tan juvin ñi cuhva can catsi yo nu mesa nu ña vaha. <sup>22</sup> Ña cuhva yo tsihi tsi Jutu Mañi yo tyin maa ra iyó ca tunyee iñi tsi ra tan ñavin ca maa yo.

### Tun cua javaha yo náa javaha yo, na javaha yo tsa cuenda tsa vaha tsi inga ca nyívi

<sup>23</sup> Nditsa tsa caahán nyívi: “Cuví javaha yo náa cuñi maa yo.” maa tyin ña tandíhi can tan jacuahnú can tsi yo tsihin Nyoo tan ndi ña cuví can tsa vaha tsi yo. <sup>24</sup> Ña cuví caca iñi yo tsa cuenda maa ñi maa yo, tyin cuñi tucu tsi tsa caca iñi yo tsa cuenda inga ca nyívi tan nducu yo tsa vaha tsi ñi.

<sup>25</sup> Cãtsi nyooho tandíhi cuñu tsa cuyahví nu nuyahví. Tan ña ndücu tuhun ndo náa cuñu cuví can tyin tacan tan ña cua jatyañu tsa tsicá iñi ndo tsi ndo. <sup>26</sup> Tyin ñuhu ñayívi tan tandíhi tsa iyó nuu tsi, tsii maa Nyoo cuví.

<sup>27</sup> Tan tatun iin nyívi tsa ña tsinú iñi tsi Nyoo, tan cana ñi tsi ndo tsa cucatsi ndo yuvehe ñi, tun cuñi ndo cuhun ndo, vaha maa cuhun ndo, cãtsi nyooho tandíhi tsa cua cuhva ñi catsi ndo. Tan ña ndücu tuhun ndo tun jamañi ñi cuñu can nuu tsitoho. <sup>28</sup> Maa tyin tatun ndáa nyívi caahán tyehen tsihin ndo: “Nyayu ihya, nyayu tsa jamañi nyívi nuu tsitoho cuví tsi”; ña cãtsi ndo tyin coto nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yíhí ndo cua catyi ndo: “¿Nacuenda cuñi tsi tsa jahá yu cuenda tsi yu tsa catyi tsa tsicá iñi inga ca nyívi? <sup>30</sup> ¿Tan nacuenda ña cuví catsi yu can?, tan maa ñi tsahá yu tyahvi nyoo tsi Nyoo tan tsatsí yu”, catyi ndo. <sup>31</sup> Vaha maa, tun tsatsí ndo, tan tsihí ndo, o javahá ndo inga ca tsa javahá ndo; javaha nyooho maa tyin cuhva taahán iñi Nyoo. <sup>32</sup> Tan ña javaha ndo tsa cuví janduva tsi inga ca nyívi, ndi ñi Israel, tan ndi ñi tsa ñavin ñi Israel cuví, tan ndi ñi yíhí cuenda Nyoo. <sup>33</sup> Tumaa yuhu, ña nducú yu tsa vaha tsi maa yu. Maa tyin nducú yu tsa vaha tsi inga nyívi tan nácaa cuví cacu añima ñi.

**11** Nyehe ndo tumaa javahá yu cuhva javahá ra Cristo, tacan taahán tucu tsi javaha nyooho cuhva javahá yuhu.

### Nacaa taahán tsi javaha ñiñaha nu iyó culto

<sup>2</sup> Yañi, sñi xaan cuñi yu tyin tacan ñi nducuhún iñi ndo tsi yu. Tan tyaá yahvi ndo tsa jacuahá yu tsi ndo. <sup>3</sup> Maa tyin cuñi yu tsa coto ndo tyin ra Cristo cuví jiñi tsihin

intuhun intuhun rayí tyin juvin ra cuví ityi nuu tsihin ra, tan rayí cuví jiñi tsihin ñasíhi ra, tumaa cuví Nyoo jiñi tsihin ra Cristo. <sup>4</sup> Tatun iin rayí tyasí ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra. <sup>5</sup> Maa tyin tun iin ñaha tan ña tyasí ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatyá ndí jiñi ña cuví can. Tan tsahá ña ticanuu tsi yí ña tyin juvin ra cuví jiñi tsihin ña. <sup>6</sup> Tatun iin ñaha tan ña tyasí ña jiñi ña, vaha taxin ca xatyá ña tandíhi ixi jiñi ña. Maa tyin tun cahán nuu ña tsa xatyá jiñi ña, nacasi ña jiñi ña. <sup>7</sup> Ña taahán tsi tsa casi rayí jiñi ra. Tyin cuhva caá Nyoo caá ra, tyin ndacá ñaha ra tsi ñasíhi ra, tumaa tsa ndacá ñaha maa Nyoo tsi ra. Maa tyin iin ñaha jacahnu ña tsi yí ña tsihin tsa tsahá ña tsa cundaca ñaha ra tsi ña. <sup>8</sup> Tyin quívi javahá Nyoo tsi rayí, ña javahá ra tsi ra tsihin yíqui naha ñaha. Tyin tsihin yíqui naha rayí javahá ra tsi ña. <sup>9</sup> Tan tsacatyí rayí, tan tsinú ñaha, tan ñavin tsacatyí ñaha tan tsinú rayí. <sup>10</sup> Yacan cuenda ñiñaha cuñi tsi tsa cundasi jiñi ñi. Tyin cuñi tsi catyi tyin ndacá ñaha yí ñi tsi ñi. Tan cuví tsi tsa vaha tsi ra ángel naha ra. <sup>11</sup> Maa tyin tyaá Nyoo cuhva tyin tsiñi ñuhu rayí tsi ñaha. Tan tsiñi ñuhu ñaha tsi rayí. <sup>12</sup> Nditsa tyin ñaha tsinú ña tsihin yíqui naha rayí jahá Nyoo. Maa tyin nda cuanda quívi can tan quitsahá tsahá Nyoo tsa coo sehe yí ña. Tan nda cuanda vityin juvin ñi maa Nyoo tsahá tsa coo nduvi taahan ñi, rayí tan ñaha.

<sup>13</sup> Tyíhi tuñi jihna iñi ndo tsa cuenda tuhun ihya. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñuhu? <sup>14</sup> Tsitó yo tyin ticanuu cuví tsi tsa cuenda rayí tatun nañi jiñi ra. <sup>15</sup> Maa tyin ñiñaha, vaha tsa nañi jiñi ñi tyin Nyoo tsahá ra tsa ndunañi tsi tan casi tsi jiñi ñi. <sup>16</sup> Maa tyin tatun yóo cuñi cañi tahan tsa catyi tuhun ihya, cuñi tsi coto ndo tyin ndi nyuhu tan ndi vehe ñuhu Nyoo, nduve inga ca tuhun iyó.

### Nu caahán ra Pablo tsihin nyívi Corinto tyin ña vaha cuhva tsatsí ñi Santa Cena

<sup>17</sup> Yañi, inga tuhun cua cahan yu tsihin ndo tyin ña sñi cuñi yu tsihin ndo; tyin tsa javahá ndo nu ndu iin ndo, ña tsahá tsi tsa vaha tsi ndo, tan jatívi tsi tsi ndo.

<sup>18</sup> Tyin catyi nyívi tsihin yu tyin cuhva tsa ndu iin ndo tsa cua coo ndo culto, tan natahví sava ndo. Tan tsicá tucu iñi yu tyin vasiquí nditsa tsa caahán ñi. <sup>19</sup> ¿Vasiquí cuñi maa ndo tyin tsihin tsa natahví sava ndo tan quituvi ndáa nyooho tsinú vaha iñi tsi Nyoo! <sup>20</sup> Maa tyin tatun tacan ñi iyó tsihi nu yucú ndo, ñavin Santa Cena cuví can. <sup>21</sup> Tyin cuhva tsa cua catsi ndo, tsatsí ñi ndo tsa ndahá ndo. Tan ña ndatú ndo nda cuanda ndu iin tandíhi nyívi. Tan yíhí ndo cuaha tsatsí ndo, tan nda cuanda tsiñi ndo tsihin vinu. Tan yíhí nyívi ña ñihí ñi tsa catsi ñi jahá ndo. <sup>22</sup> ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñi ndo nyehé ndo vehe ñuhu Nyoo cuví can. Tan tsahá ndo ticanuu tsi nyívi nduve tsa iyó tsi. ¿A taahán tsi catyi yu tsihin ndo tyin vaha cuhva javahá ndo, cuñi maa ndo? Ña taahán tsi, tyin ña vaha tsa javahá ndo.

### Ra Pablo tsahá cuenda ra tsi ñi, nácaa taahán tsi coo ñi Santa Cena

(Mt. 26.26-29; Mr. 14.22-25; Lc. 22.14-20)

<sup>23</sup> Tyin Jutu Mañi yo jacuahã tuhun ihya tsi yu. Tan juvin yacan tsa yahã jacuahã yu tsi ndo. Tyin tsacuaa tsa ndi cumañi ca nacuhva cuenda ra Judas tsi Jutu Mañi yo tsi nu xaan iñi tsi ra, quihñ ra iin paan. <sup>24</sup> Tan tsa yahã nacuhvã ra tyahvi nyoo tsi Nyoo tan tsahny ra paan can. Tan catyí ra: “Çatsi ndo paan ihya tyin cuví tsi tumaa cuñu ñuhu yu tyin tsa cuenda ndo tan cua cúu yu. Javaha ndo tyehen tan nducuhun iñi ndo tsi yu”, catyí ra Jesús. <sup>25</sup> Tan tsa yahã tsa cuxiñi ra naha tan quihñ ra Jesús vasu vinu tan catyí ra: “Tsihin vinu ihya ndoó Nyoo tyiñu tsihin ndo vityin, tyin vinu tsa yihí tsitsi vasu ihya, niñi yu cuví. Tahan ñi tsaha tsa cua coho ndo, çoho ndo tsa cuenda tsa nducuhun iñi ndo tsi yu”, catyí ra Jesús tsacuaa can. <sup>26</sup> Tan tahan ñi tsa ndu iin yo tan tsatsí yo paan tan tsihí yo vinu jacotó yo tsi nyivi tyin tsacatyí cuatyí yo tsihí Jutu Mañi yo. Tan tacan jacotó yo tsi nyivi nda cuenda quivi quitsi nyico ra.

### Ra Pablo tsahá cuenda ra tsi yo nácaa taahán tsi coo yo Santa Cena

<sup>27</sup> Tatun tsatsí yo paan tan tsihí yo vinu cuhva tsa ña taahán iñi Nyoo, tsicoó cuatyí yo. Tyin ña tyaá yahvi yo tsa tsihí ra Cristo nu cruu tan tsa tsatí niñi ra. <sup>28</sup> Yacan cuenda cuñí tsi jaha yo cuenda tatun vaha cuahán yo tsihin Nyoo tsa ndi cumañi ca catsi yo paan tan coho yo vinu. <sup>29</sup> Tyin Nyoo tatsí tuñi ra tsi yo tun tsatsí yo tan tsihí yo tan ña tsicá iñi yo tsa cuenda tsa tsihí ra Cristo. <sup>30</sup> Tan tsa cuenda yacan cuaha xaan ndo cuuhví ndo tan nduve tunyee iñi iyó tsi ndo, tan juhva nyivi tahan ndo tsa yahã tsihí ñi. <sup>31</sup> Maa tyin tatun jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo. <sup>32</sup> Maa tyin tatun tatsí tuñi Jutu Mañi yo tsi yo tacan, javahá ra tacan tyin tacan tan ña cunaa yo tsihin nyivi iyó cuenda nu ñuhu ñayivi ihya.

<sup>33</sup> Tan tacan nyooho yañi, tatun cua ndu iin ndo tsa cua catsi ndo Santa Cena, çatu tahan ndo tsi ndo tan çatsi ndo tan çoho ndo iin caa ñi. <sup>34</sup> Maa tyin tatun ndáa nyooho tsisocó ndo, çatsi jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quivi tsa quitsi nyehe yu nu yucú ndo tan jandaa yu inga ca tuhun.

### Ndatu tsa tsahá Tatyí Ii Nyoo tsi yo

**12** Yañi, cuñí yu tsa coto ndo náa ndihi ndatu tsahá Tatyí Ii Nyoo tsi tsa intuhun intuhun yo.

<sup>2</sup> Tsitó ndo tyin quivi tsa ñaha ca nacoto ndo tsi Nyoo, tsahã ndo tsa cundaca ñaha tsitoho tsa ña cuví cahan tsi ndo. <sup>3</sup> Yacan cuenda cuñí yu tsa coto ndo tyin ra tsa caahán tyin ña vaha ra Jesús, ñavin Tatyí Ii Nyoo jacahán tsi ra. Maa tyin ra tsa jacahán Tatyí Ii Nyoo catyí ra tyin ra Cristo cuví Jutu Mañi yo.

<sup>4</sup> Siin siin ndatu naquihín intuhun intuhun yo, maa tyin iin ñi Tatyí Ii Nyoo tsahá itsi yo. <sup>5</sup> Siin siin cuhva

jahá tyiñu yo maa tyin tyiñu intuhun ñi maa Jutu Mañi yo javahá yo. <sup>6</sup> Siin siin tyiñu javahá tsa intuhun intuhun yo. Maa tyin intuhun ñi maa Nyoo cuví ra jatyinyee tsi tandihi yo tan javahá yo can. <sup>7</sup> Tan tsahá ra tunyee iñi Tatyí Ii ra tsi intuhun intuhun yo tyin tacan tan jatyinyee yo tsi tandihi ca nyivi yihí cuenda ra. <sup>8</sup> Tsi juhva yo tsahá Tatyí Ii Nyoo tsa cahan yo tsihin tsa tsiñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo. <sup>9</sup> Tan tsi inga yo tsahá ra tsa tsinú xaan iñi yo tsi ra. Tan juvin ñi maa Tatyí Ii ra tsahá tunyee iñi tsi inga yo tsa janduvaha yo tsi nyivi cuuhví. <sup>10</sup> Tan tsi inga yo tsahá ra tunyee iñi tsa cuví javaha yo tsa iyo. Tan inga yo tsahá ra tsa cahan yo tuhun tsa tsahã ra tsi yo tyin jacoto yo tsi inga ca nyivi. Tan tsi inga yo tsahá ra tsa cuví nacoto yo tun Tatyí Ii Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyivi. <sup>11</sup> Tan tandihi yacan tsahá intuhun ñi maa Tatyí Ii Nyoo. Maa tyin siin siin tsa tsahá ra tsi tsa intuhun intuhun yo, nácaa cuñí maa ra.

### Tandihí yo tan cuví yo intuhun ñi cuñu ñuhu tsihin ra Cristo

<sup>12</sup> Tumaa cuñu ñuhu yo iyó jiñi tsi, iyó ndaha tsi, iyó tsaha tsi, maa tyin tandihi tsi tan cuví tsi intuhun ñi cuñu ñuhu. Tan tacan cuví tucu maa yo tsihin ra Jesucristo; vasu cuaha xaan yo, maa tyin intuhun ña cuñu ñuhu ra cuví yo. <sup>13</sup> Tan tacan tucu tandihi yo, a cuví yo nyivi Israel, a ñi Grecia, a ñi iyó tsitoho, a ñi nduve tsitoho, maa tyin tsa tsicoondutyã yo tan nanduví yo intuhun ña cuñu ñuhu ra Cristo tyin tsahã ra intuhun ñi maa Tatyí Ii ra coo tsihin tandihi yo.

<sup>14</sup> Tyin cuñu ñuhu yo ña cuvi cuvi tsi intuhun ñi maa tinuu tyin cuñí tsi tsa cunyecu tandihi ca tsa cutahan tsihin tsi tan cuvi tsi cuñu ñuhu ñi. <sup>15</sup> Tun tsatyin cuví cahan tsaha yo tan catyí tsi: “Yuhu nduve yahvi nyaá yu tyin ñavin ndaha cuví yu.” Ñavin tsa cua cahan tsi tacan tan ña cua cutahan ca tsi tsihin cuñu ñuhu can. <sup>16</sup> O tun tsatyin cuví cahan soho yo tan catyí tsi: “Yuhu nduve yahvi nyaá yu tyin ñavin tinuu cuví yu.” Ñavin tsa cua cahan tsi tacan tan ña cutahan ca tsi tsihin cuñu ñuhu can. <sup>17</sup> Tun tsatyin naniñ cuñu ñuhu yo cuví tsi tinuu tan nduve soho yo, ¿nácaa cua cuñi yo? O tun tsatyin naniñ cuñu ñuhu yo cuví tsi soho, ¿nácaa cua tahñi yo? <sup>18</sup> Maa tyin Nyoo tyaã ra tan iin tan iin can nu cuñí maa ra. <sup>19</sup> Tatun nduve tsa intuhun intuhun tsa cutahán tsihin cuñu ñuhu can, ñavin cuñu ñuhu cuví can. <sup>20</sup> Maa tyin tsa ndu iin soho, tinuu, jiñi, ndaha, tan tandihi ca maa, tacan tan cuví tsi intuhun cuñu ñuhu.

<sup>21</sup> Tinuu yo ña cuví catyí tsi tsihin ndaha yo: “Ña tsiñí ñuhu yooho tsi yu.” Tan ndi jiñi yo tan ña cuví catyí tsi tsihin tsaha yo: “Ña tsiñí ñuhu yooho tsi yu.” <sup>22</sup> Ña vaha tsa cahan tsi tacan tyin vasu iin tsa lihli tsa cuñí maa yo tyin ña tsiñí ñuhu tsi yo, yacan cuví tsa tsiñí ñuhu can. <sup>23</sup> Tan nu cuñí yo tyin ña siñ caá, tyasí yo. Tan nu ña taahán tsi nyehé nyivi, yacan tyasí vaha ca yo. <sup>24</sup> Tan

nu sï caá, ña tyasí yo. Tacan javahā Nyoo cuñu ñuhu yo, tyin tacan tan jacahnú ca yo nu cuñí maa yo tyin ña sï caa. <sup>25</sup> Tan tsa intuhun intuhun tsa iyó cuñu ñuhu yo, jahá cuenda tahan maa tsi itsi, yacan cuenda ña cuví cusiiñ tsi. <sup>26</sup> Tatun luxu cuñu ñuhu yo nyehé tundoho, nyehé ndihí tani ca cuñu ñuhu yo tundoho. Tan tatun sï cuñí luxu tsi, sï cuñí tani tsi.

<sup>27</sup> Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo. <sup>28</sup> Tan Nyoo natyisó ra tsi intuhun intuhun yo vehe ñuhu tyin tacan tan jatyyinee tahan yo tsi yo. Tsa jihna ñi natyisó ra tsi ra caca tyiñu ra. Tsa tsinu uvi, natyisó ra tsi ra cuví ndusu yuhu ra. Tan tsa tsinu uñi, natyisó ra tsi ra jacuaha. Yahā can, tan natyisó ra tsi ra tsa javaha tsa iyo, tan natyisó tucu ra tsi ra tsa janduvaha nyivi cuuhví, tan ra tsa jatyyinee tsi nyivi, tan ra jaha cuenda vehe ñuhu, tan ra caahán inga yuhu tsa ña tsitó ra. <sup>29</sup> Ña tandihí yo tan tsicá yo tyiñu ra Cristo. Ña tandihí yo tan cuví yo ndusu yuhu ra. Ña tandihí yo tan cuví yo ra jacuahá. Ña tandihí yo tan javahá yo tsa iyo. <sup>30</sup> Ña tandihí yo tan tsahá Nyoo tunyee iñi tsa janduvahá yo tsi nyivi cuuhví. Ña tandihí yo tan caahán yo inga yuhu tsa ña tsitó yo. Ña tandihí yo tan cuví nacotó yo tan nacytyí tuhun yo náa cuñí tsi catyí tsa caahán inga nyivi. <sup>31</sup> Nducu ndo cuhva naquihin ndo tsa vaha ca tsa tsahá Nyoo. Maa tyin cua janaha yu iin cuhva vaha ca tsi ndo.

#### Nu janahá ra Pablo nácaa taahán tsi cuñi yo tsi nyivi

**13** Tatun yuhu tan cuvi cahan yu cuaha ñi yuhu tsa caahán nyivi iyó nu ñuhu ñayivi ihya, tan cuví cahan tucu yu yuhu tsa caahán ángel, maa tyin tatun ña cuñí yu tsi Nyoo tan ndi tsi nyivi, cuví yu tumaa tyombo tsa nañí ñi maa o iin caa tsa tsacú ndaxin ñi maa. <sup>2</sup> Tatun cuví cuhva cuenda yu tuhun caahán Nyoo, tan cuví coto yu tandihí tuhun xeehe, tan tsitó yu tandihí tuhun, maa tyin tatun ña cuñí tucu yu tsi Nyoo tan ndi tsi nyivi, nduve náa catyí javaha yu tandihí yacan. Tatun tsinú xaan iñi yu tsi Nyoo nda cuanda cuví cahan yu tsihin yucu na cuhun tsi inga ityi, tan cua cuhun tsi, maa tyin tatun ña cuñi yu tsi Nyoo tan ndi tsi nyivi, nduve náa ra cuví yu. <sup>3</sup> O tatun cuhva yu tandihí tsa iyó tsi yu tsi nyivi ndaahvi, tan cuhva yu nda cuanda ñayivi yu tyin cucayu cuñu ñuhu yu, maa tyin tatun ña cuñi yu tsi Nyoo tan ndi tsi nyivi, nduve náa cua jatyyinee can tsi yu.

<sup>4</sup> Tatun nditsa tsa cuñí yo tsi Nyoo tan tsi nyivi, ña tyixin yo, vaha iñi yo; ña nyiyó iñi yo tsa tsahá ra tsi inga ñi, ña cahnu jahá yo tsi yo, tan ña yaa yo. <sup>5</sup> Tatun nditsa tsa cuñí yo tsi Nyoo tan tsi nyivi, ña siqui iñi yo, tan ña nducú yo maa ñi tsa vaha tsi maa yo, ña cuxaán yo, tan ña ndoó tisihi tsitsi añima yo. <sup>6</sup> Tatun nditsa tsa cuñí yo tsi Nyoo tan tsi nyivi, ña sï cuñí yo náa ndihí tsa ña vaha javahá ñi, maa tyin cusii iñi yo tsihin tsa vaha tan tsa nditsa. <sup>7</sup> Tatun nditsa tsa cuñí yo tsi Nyoo tan tsi nyivi, cunyeé iñi yo nyehé yo tundoho jahá ñi, tan tsinú iñi yo tyin cua javaha ñi tsa vaha tan ndatú yo tsa nasama ñi cuhva iyó ñi, tan ña cundihí iñi yo.

<sup>8</sup> Tsa cuñí yo tsi Nyoo tan tsi nyivi ña cua cundihí maa tsi, maa tyin coo quivi tsa ña cua cuhva cuenda ca yo tsa caahán Nyoo, tan ña cua cahan ca yo inga yuhu, tan tsa tsitó yo vityin ña tsiñi ñuhu ca can tsi yo. <sup>9</sup> Nyoo tsahá ra tsa coto yo luxu ñi vityin tan tsahá tucu ra luxu ñi tsa cuhva cuenda yo tsi nyivi, <sup>10</sup> maa tyin quivi quitsi nyico ra Cristo, cua cundihí tsa tsitó yo luxu ñi tyin cua coto yo tandihí maa.

<sup>11</sup> Quivi tsa luhlu yu caahán yu tumaa caahán ra nyihi tan tsicá iñi yu tumaa tsicá iñi ra nyihi, maa tyin quivi tsahnú yu naco yu tsa yu cuhva javahá ra nyihi. <sup>12</sup> Tan tacan tucu vityin tsitó yo tuhun Nyoo tumaa tsa nyehé yo nu inu tun tsa ndihí tsi yaa. Maa tyin quivi cua quitsi ra Cristo, cua coto yo tandihí maa. Luxu ñi tsitó yu vityin, maa tyin quivi quitsi nyico ra, tandihí cuii maa tan cua coto yu, tumaa nacotó maa ra tsi yu vityin. <sup>13</sup> Iyó uñi taahan tsa ña cua ndihí maa: tsa tsinú iñi yo tsi Nyoo, tsa tsitó yo tyin nditsa tsa cua ñihi yo tandihí tsa caahán Nyoo tyin cuhva ra tsi yo, tan tsa cuñí yo tsi Nyoo tan tsi nyivi. Tan tsitsi tsa nduñi taahan tsehe, tsa tsiñí ñuhu ca cuví tsa cuñí yo tsi Nyoo tan tsi nyivi.

#### Nu jacuahá ra Pablo nácaa cahan yo inga yuhu tsa ña tsitó yo

**14** Jañihi ca ndo cuñí ndo tsi Nyoo tan tsi nyivi. Tan nducu ndo cuhva naquihin ndo ndatu tsa tsahá Tatyí Ii Nyoo tsi yo. Nducu jihna ndo tsa cuhva cuenda ndo tuhun Nyoo tsi nyivi. <sup>2</sup> Tyin tun caahán yo inga yuhu tsa ña tsitó yo, tsihin Nyoo caahán yo, tan ñavin tsihin nyivi. Tyin ndi intuhun ñi tan ña cutuñí iñi ñi, tyin tuhun xeehe caahán yo jahá Tatyí Ii Nyoo. <sup>3</sup> Maa tyin tun tsahá cuenda yo tuhun Nyoo tsi nyivi, cutuñí iñi ñi tan ñihi ca tsahnú ñi tsihin tuhun Nyoo. Tan ndu iin ca iñi ñi jahá yo tan ndunyeé ca iñi ñi. <sup>4</sup> Tatun caahán yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun caahán Nyoo tsihin yo tsihin nyivi, tandihí ñi tsahnú.

<sup>5</sup> Yuhu cuñí yu tsa cahan tandihí ndo inga yuhu tsa ña tsitó ndo. Maa tyin vaha xaan ca tun cuvi cuhva cuenda ndo tsa caahán Nyoo, tyin jatyyineé ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatun iin ndo cuví nacoto ndo nácaa caahán inga ndo tsihin inga yuhu, nacytyí tuhun ndo tsihin ñi. Tacan tan cuví jatyyinee tsi tsi tandihí ñi. <sup>6</sup> Yacan cuenda yañi, tatun yuhu tan tsaa yu nu yucú ndo, tan cahan yu inga yuhu, ña cua jatyyinee tsi tsi ndo. Maa tyin tun cahan yu tsa janahā Nyoo tsi yu, o tsa jacotó ra tsi yu, o tsa tsahā ra tyin cuhva cuenda yu tsi ndo, o tsa jacuaha yu tsi ndo, cua jatyyinee tsi tsi tandihí ndo.

<sup>7</sup> Tatun tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo. <sup>8</sup> Tan tatun nu iyó cuatyí tan ña vaha tiví ra cutu, yoñi cua coto náa cuhva cua cañi tahan ra naha. <sup>9</sup> Tan tacan tucu yoo, tatun caahán yo inga yuhu tsa ña cutuñí iñi nyivi, ña cua coto ñi náa caahán yo. Tan cua catyí ñi tyin jiñi yo ña vaha cuñí, yacan caahán maa yo. <sup>10</sup> Cuaha xaan yuhu caahán nyivi nu ñuhu ñayivi ihya.

Tan intuhun intuhun nuu yuhu tan iyó iyó ñi tsa cuñí tsi catyí. <sup>11</sup> Maa tyin tun ña cutuñí iñi yu yuhu tsa caahán inga nyivi tsihin yu, ña cuvi natuhun yu tsihin ñi. Tan ndi maa ñi ña cuvi natuhun ñi tsihin yu. Cuví ñi tumaa nyivi inga ñuu tsa cuenda yu. <sup>12</sup> Yacan cuenda nyooho tsa cuñí xaan naquihin ndatu tsa tsahá Tatyí Ii Nyoo, ndücu ndo cuhva naquihin ndo tunyee iñi tsa cuvi jatyinyee vaha ca tsi nyivi yucú vehe ñuhu.

<sup>13</sup> Tacan tucu nyooho tsa caahán inga yuhu, ndacan ndo tsi Nyoo na cuhva ra ndatu tsa nacatyí tuhun ndo tsihin nyivi náa cuñí tsi catyí. <sup>14</sup> Tyin tatun tsicán tahvi yu tsi Nyoo tsihin iin yuhu tsa ña cutuñí iñi yu, añima yu tsicán tahvi tsi Nyoo, maa tyin tsa tsiñi tuñi jiñi yu ña cutuñí iñi tsi. <sup>15</sup> Yacan cuenda cuñí tsi tsa ndacan tahvi yu tsi Nyoo tsihin inga yuhu. Tan ndacan tahvi tucu yu tsi ra tsihin yuhu tsa cutuñí iñi yu. Tan cuñí tsi tsa cata yu yaa tsihin yuhu tsa ña cutuñí iñi yu. Tan cata ndihí tucu yu yaa tsihin yuhu tsa cutuñí iñi yu. <sup>16</sup> Tyin tatun jacahnú un tsi Nyoo tsihin maa ñi maa yuhu tsa tsahá Tatyí Ii Nyoo tsi un, ña cua cutuñí iñi nyivi tsa ña tsitó náa cuví yacan. Tan ña cua cuvi jacahnu ñi tsi Nyoo tsihin un. <sup>17</sup> Vasu ndi maa vaha tsa caahán un, cuhva tsa nacuhvá un tyahvi nyoo tsi Nyoo, maa tyin ña jatyinyee tsi tsi inga nyivi tyin ña cutuñí iñi ñi tsa caahán un. <sup>18</sup> Tan yuhu nacuhvá yu tyahvi nyoo tsi Nyoo tyin cuaha ca tsaha caahán yu inga yuhu tan ñavin ca tandihí nyooho. <sup>19</sup> Maa tyin vaha ca cuñí yu cahan yu vasu uhun taahan ñi tuhun tsitsi vehe ñuhu tan ñavin ca tsa cahan yu utsi mil tuhun tsihin inga yuhu, tyin vasu cuaha tuhun cua cahan yu tsihin ndo ña cua jatyinyee can tsi ndo tyin ña cutuñí iñi ndo.

<sup>20</sup> Tsahnu çaca iñi ndo, yañi. Tan ña lee xaan çaca iñi ndo. Maa tyin tatun javaha ndo náa javaha ndo, javaha ndo tumaa javahá lee tyin lee ña javahá tsi tsa caquiñi. <sup>21</sup> Catyí Nyoo nu libru ley ra tyehen: “Cua cahan yu tsihin nyivi ihya tsihin yuhu nyivi inga ñuu tan tsihin inga yuhu tsa ña tsitó ñi. Maa tyin vasu ndi maa tsa cua javaha yu tacan, ña cua tyaa yahvi maa ñi tsi yu”, catyí Jutu Mañi yo. <sup>22</sup> Yacan cuenda tsa caahán yo inga yuhu cuví tsi tumaa iin seña tsa cuenda nyivi tsa ña tsinú iñi tsi ra Cristo. Maa tyin tsa tsahá cuenda yo tsa caahán Nyoo, cuví tsi cuenda nyivi tsa tsinú iñi tsi ra. <sup>23</sup> Tyin tatun tandihí ndo caahán ndo inga yuhu nu ndu iin ndo, tan quihvi iin nyivi tsa ña yihé cuenda Nyoo, o ñi tsa ña cutuñí iñi tuhun Nyoo, cua catyí ñi tyin jiñi ndo ña vaha cuñí. <sup>24</sup> Maa tyin tatun tandihí ndo tsahá cuenda ndo tsa caahán Nyoo tan quihvi iin nyivi tsa ña yihé cuenda Nyoo, a ñi tsa ña cutuñí iñi tuhun Nyoo, cua coto ñi tyin iyó cuatyí ñi tsa cuenda tsa cutuñí iñi ñi tsa caahán ndo. <sup>25</sup> Tan tandihí tsa iyó tsitsi añima ñi cua nacoto ñi, tan cua cuiñi tsiti ñi jacahnu ñi tsi Nyoo. Tan cua catyí ñi tyin nditsa nditsa cuii tsa nyaá Nyoo tsihin ndo.

### Nacaa javahá yo culto iin cuhva vaha

<sup>26</sup> Yacan cuenda yañi, tatun cua ndu iin ndo, tan tsahá Nyoo tsa tsahá ra tsi tsa intuhun intuhun ndo, cuhva cuenda ndo itsi; a tsahá ra tsa cata ndo yaa, o tsa

jacuaha ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, o nacatyí tuhun ndo naa cuñí tsi catyí inga yuhu can. Maa tyin tandihí yacan taahán tsi cuvi tsi iin tsa tsahá tunyee iñi maa Nyoo tsi tandihí ndo tsa yihé ndo cuenda ra. <sup>27</sup> Tatun cua cahan ndo inga yuhu nu ndu iin ndo, cuñí tsi tsa cahan uvi ndo a uñi ñi ndo, maa tyin intuhun intuhun ñi ndo çahan; ña çahan tandihí ndo juvin ñi cuhva tsa caahán inga ndo. Tan inga tucu tuhun cuñí tsi tsa nacatyí tuhun inga ndo tsa caahán ndo. <sup>28</sup> Maa tyin tun yoñi cuví nacatyí tuhun tsa caahán ndo, vaha taxin ca, ña çahan ndo tsihin inga yuhu nu ndu iin ndo. Çahan ndo tsihin Nyoo tsihin inga yuhu tun cuñí ndo, maa tyin ndihí cuhva tsiñi ñi maa ndo. <sup>29</sup> Tacan tucu tatun tsahá cuenda yo tsa caahán Nyoo. Çahan uvi ndo, a uñi ñi ndo. Tan tandihí ca ndo jaha ndo cuenda tun vaha tsa caahán yañi ndo. <sup>30</sup> Maa tyin tatun jacoto Nyoo náa inga ca tuhun tsi inga nyivi tsa yucú tsiñi tuhun caahán ndo, tacan tan ra tsa nyaá caahán can, cuñí tsi jandihí ra tsa caahán ra tan cahan inga ñi. <sup>31</sup> Tan tacan tandihí nyooho tsa naquihín tuhun tsa tsahá Nyoo cuví nacatyí tuhun intuhun intuhun ndo, tyin tacan tan cuhva tandihí nyooho tsa ndu iin vehe ñuhu tan ndu iin ca iñi ndo. <sup>32</sup> Nyooho tsa tsahá cuenda tsa caahán Nyoo, cuví cuatu nuu ndo nda cuanda ndihí cahan inga nyivi, <sup>33</sup> tyin Nyoo ña cuñí ra tsa tavi tahan ña cahan ndo, tyin maa ra catsi iyó ra.

Quihin ndo cuhva iyó inga ca vehe ñuhu nu ndu iin nyivi yihé cuenda ra Cristo, <sup>34</sup> tyin ñiñaha taxin ñi nyecú ñi tsitsi vehe ñuhu tyin tyaá yahvi ñi tsi yí ñi tumaa catyí ley Nyoo. Tan tacan taahán tucu tsi javaha nyooho. <sup>35</sup> Tatun náa cuñí ñi coto ñi, na ndaca tuhun ñi tsi yí ñi nda yuvehe ñi, tyin ña vaha tsa cahan ñiñaha nu ndu iin ndo.

<sup>36</sup> Tatun sñin cuhva tsicá iñi ndo, cuñí tsi nducuhún iñi ndo tyin ñavin nu yucú ndo quitsahá tuhun Nyoo. Tan ñavin nyooho ñi naquihín tuhun Nyoo. <sup>37</sup> Tatun ndáa nyooho cuñí tyin ndusu yuhu Nyoo cuví ndo, o cuñí ndo tyin Tatyí Ii Nyoo jaquihín ityí tsi ndo, tun nditsa tsa cuví ndo yacan, cua nacoto ndo tyin tsa caahán yu tsihin ndo ihya, tsa tsahá maa Jutu Mañi yo tyin cuhva cuenda yu tsi ndo cuví. <sup>38</sup> Maa tyin tatun ña cuñí ndo naquihín ndo tuhun ihya, ndi nyuhu tan ña cua naquihín ndi tuhun caahán nyooho.

<sup>39</sup> Tan tacan, yañi, ndücu ndo cuhva cuenda ndo tuhun Nyoo tsi nyivi. Tan ña çasi ndo nu cahan nyivi inga yuhu. <sup>40</sup> Maa tyin javaha ndo tandihí tsihin tsa vii tan tsa catsi.

### Nacaa nandoto ra Cristo

**15** Vityin yañi, cuñí yu tsa nducuhun iñi ndo tuhun ra Cristo, tsa jacacú tsi yo, tsa cahan yu tsihin ndo quivi can. Tan naquihín ndo itsi tan ñi iñi añima ndo tsinú iñi ndo. <sup>2</sup> Tan juvin tsa cuenda tuhun ra Cristo cacú añima ndo tun ndi tsinú iñi ndo cuhva jacuahá yu tsi ndo. Maa tyin tun ña tsinú ca iñi ndo cuhva jacuahá yu tsi ndo, nduve yahvi nyaá tsa natsinu iñi ndo tsi ra Cristo.

<sup>3</sup> Tsa jihna ñi jacoto yu tuhun tsa jacuahā ra Cristo tsi yu tsi ndo. Tan catyí yu tyin tsihí ra tsacatyí cuatyí yo, tumaa catyí nu libru Nyoo tyin cua cuvi. <sup>4</sup> Tan quihví cuñu ñuhu ra tsitsi ñuhu. Maa tyin tsinu uñi quivi nandoto ra tumaa catyí nu libru Nyoo. <sup>5</sup> Tan tsa yahā tan quituví ra nuu ra Pedro tan quituví ndihí ra nuu tandihí ra tsicá tyiñu ra. <sup>6</sup> Yahā can tan quituví ra nuu yaha ca uhun cientu nyivi yihí cuenda ra. Tan juhva ñi can tsa tsihí ñi, maa tyin ndi iyó cuaha ca ñi nda cuanda vityin. <sup>7</sup> Yahā can tan quituví ra nuu ra Jacobo. Tacan tan quituví ndihí ra nuu tandihí ra tsicá tyiñu ra.

<sup>8</sup> Tan nu ndihí ña quituví ndihí ra nuu yuhu, tsa cuví yu tumaa iin lee tsa cacu yutya. <sup>9</sup> Tyin tsa nuu tandihí ca ra tsicá tyiñu ra Cristo nduve yahví nyaá yuhu. Tan ndi ña taahán tsi tsa cuví yu ra tsicá tyiñu ra tyin tsinyaá ndaha xaan yu tsi nyivi yihí cuenda ra. <sup>10</sup> Maa tyin Nyoo vaha iñi ra tsihin yu. Yacan cuenda tsahā ra ndatu tsa cuví yu ra tsicá tyiñu ra tan ña cuatu tsahā ra tyiñu tsi yu, tyin cuaha ca tyiñu javahá yu tsihin tsi tan ñavin ca tandihí ra naha. Maa tyin ñavin tsihin tunyee iñi maa yu javahá yu can tyin maa tunyee iñi Nyoo tsa iyó tsihin yu javahá can. <sup>11</sup> Maa tyin nduve cuenda tun yuhu, a inga ra caahán tsihin ndo, tyin tuhun caahán ndi tsihin ndo, yacan cuví tuhun tsa tsinú iñi ndo.

#### Nu jacuahá ra Pablo tyin nditsa tsa cua nandoto ndiyi

<sup>12</sup> Tsa caahán ndi tsihin ndo yacan cuví tsa nandoto ra Cristo tsa yahā tsihí ra tan ¿Nacuenda yihí ndo catyí ndo tyin ña nandoto ndiyi? <sup>13</sup> Tyin tatun ña cua nandoto ndiyi, ndi ra Cristo tan ña nandoto ra quivi can. <sup>14</sup> Tun tsatyin ña nandoto ra Cristo, nduve yahví nyaá tsa caahán ndi tsihin ndo. Tan ndi nduve yahví nyaá tsa tsinú iñi ndo tsi ra. <sup>15</sup> Tan tun tsatyin ña nditsa tsa janandoto Nyoo tsi ra Cristo, cuví ndi iin ra vatya tyin catyí ndi tyin janandoto Nyoo tsi ra. Tan tatun ña nditsa tsa nandoto ndiyi, ña nditsa tsa janandoto Nyoo tsi ra Cristo. <sup>16</sup> Tyin tun ña cua nandoto ndiyi, ndi ra Cristo tan ña nandoto ra. <sup>17</sup> Tan tatun ña nandoto ra Cristo, ndi iyó cuatyí ndo, tan nduve yahví nyaá tsinú iñi ndo tsa jahā ra tucahnu iñi cuatyí ndo. <sup>18</sup> Tan ndi nyivi tsa tsihí tsa yihí cuenda ra ña cacu ñi tun ña nditsa tsa nandoto ra. <sup>19</sup> O tun nu ñuhu ñayivi ihya ñi jatyinyeé ra tsi yo, tan ña cua quitsi ra inga tsaha, nduve yahví nyaá tsinú iñi yo tan cuví yo nyivi soho ca tsa nuu tandihí ca nyivi.

<sup>20</sup> Maa tyin tsitó vaha yo tyin nditsa tsa nandoto ra Cristo. Tan juvin ra cuví ra tsa nandoto jihna ca tsitsi tsa tandihí ca ndiyi tsa cua nandoto. <sup>21</sup> Tyin tsacatyí cuatyí ra Adán tan tsicoo tuhun tsihí. Tan yacan tsihí nyivi nda cuenda vityin. Maa tyin tsa cuenda tsa nandoto ra Cristo cua nandoto tandihí nyivi yihí cuenda ra. <sup>22</sup> Tyin tumaa tsa tandihí yo tsihí tyin cuví yo tata ra Adán, tacan tucu cua nandoto tandihí yo tan coo yo ñayivi nyito tyin cuví yo nyivi ra Cristo. <sup>23</sup> Maa tyin cua nandoto yo quivi taahán tsi tsi yo. Jihna ca ra Cristo nandoto. Tan quivi quitsi ra inga tsaha cua nandoto ñi yihí cuenda ra. <sup>24</sup> Yaha can tan cua naa ñuhu ñayivi ihya tan ña cua cundaca ñaha ca ra cumí tyiñu naha

ra, tan ndi nu tatyí ña vaha nahnu ña cua cundaca ñaha ca nahnu. Tyin ra Cristo cua quihin nyaa ra tunyee iñi tsa iyó tsi tandihí nahnu, tan cua nacuhva cuenda ra can tsi Nyoo Jutu ra. <sup>25</sup> Tyin ra Cristo cua cundaca ñaha ra nda cuanda quivi cuhva Nyoo tsa cuví jaha canaa ra tsi tandihí nu xaan iñi tsi ra nahnu. <sup>26</sup> Tan nu tsa cua janaa ra nu ndihí ña, nu ican cuví tuhun tsihí. <sup>27</sup> Tyin tsa tsahā Nyoo tsa quihí ndaha ra tandihí maa tsa iyó. Maa tyin nu catyí tyin tandihí nacuhva cuenda Nyoo tsi ra Cristo, ña cuñí tsi catyí tyin quihí ndaha ndihí ra tsi maa Nyoo tyin maa Nyoo cuví ra tsahā tsa quihí ndaha ra tandihí maa tsa iyó. <sup>28</sup> Maa tyin quivi jaha canaa ra Cristo tandihí can, tacan tan maa ra, tsa cuví ra Sehe Nyoo, cua nacuhva cuenda nyico ra tandihí tsa tsahā Nyoo tsi ra. Tyin tacan tan cundaca ñaha Nyoo tandihí maa tsa iyó.

<sup>29</sup> Tun tsatyin ña nandoto ndiyi, ¿nacuenda tyin juhva nyivi tsicoondutyá ñi tsa cuenda ndiyi? ¿Tan nacuenda javahá ñi tyehen tun ña tsinú iñi ñi tyin coo quivi cua nandoto ndiyi?

<sup>30</sup> Tan tacan tucu maa ndi, tun ña cua nandoto ndi, ¿nacuenda tyin ndoó ndi vaha tsa nyehé ndi tundoho ndihí quivi ñi? <sup>31</sup> Tandihí ñi quivi nducú nyivi tsi yu cahñi ñi, tan tsa nditsa cuví tsi, yañi, tumaa tsa nditsa tsa sñi cuñí yu tsihin ndo, tsa cuenda tsa tsinú iñi ndo tsi Jutu Mañi yo Jesucristo. <sup>32</sup> Nduve náa catyí tsa nyehé yu tundoho tsa cuñi cahñi nyivi tsi yu ñuu Éfeso tun ña cua nandoto yo. Tatun tacan, nditsa maa tsa caahán nyivi: “Catsi yo, coho yo tyin tyaan isa cua cúu yo”, catyí ñi tsa ña tsitó.

<sup>33</sup> Tan catyí tucu ñi tyin: “Tun cutahán yo tsihin nyivi caquiñi javahá ñi cuhva vaha iyó yo.” Tan tsehe cuví tsa nditsa. Yacan jaha ndo cuenda tsi ndo tan ña cuhva ndo tsa jandavi ñaha nyivi tsi ndo. <sup>34</sup> Jaha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsitó ndo tsi Nyoo. Caahán yu tyehen tsihin ndo na nducahan nuu ndo.

#### Nu jacuahá ra Pablo nácaa cua janandoto Nyoo tsi yo quivi quitsi nyico ra Cristo

<sup>35</sup> Maa tyin yihí ndo cua ndaca tuhun ndo: “¿Nacaa cua nandoto ndiyi? ¿Nacaa cuñu ñuhu ñi cua cuví?” <sup>36</sup> ¿Nacaa tsa soho xaan ndo? ¿A ña tsitó ndo tyin tatun tatsi yo iin tsiti, cuñí tsi tsa tyahyu jihna tsi? Tacan tan cana nuu tsi. <sup>37</sup> Tyin tsa tatsí yo nuñi, ñavin tsa cuví maa tsi itu tan tatsí yo. Tyin nuñi cuví tsi tatsí yo tan tacan ñi cuñí tucu yo tsihin náa inga ca tsiti. <sup>38</sup> Nyoo javahá ra nácaa cuñí maa ra tsihin tsa intuhun intuhun tsiti can, yacan cuenda tsa cana tsi cuví tsi tsa taahán maa tsi cuví tsi. Tan ña cuví nanduvi tsi inga ca tsiti. <sup>39</sup> Tan tacan tandihí cuñu ñuhu, ña inducu caá tsi, tyin cuñu ñuhu nyivi, sñin caá tsi, tan cuñu ñuhu quití nahnu, sñin caá tucu can, tan cuñu ñuhu saa, sñin caá tucu yacan, tan tyaca sñin caá tucu can. <sup>40</sup> Tan tacan tucu tsa iyó andivi, sñin caá tsi. Tan sñin caá tucu tsa iyó nu ñuhu ñayivi ihya. Sñi xaan caá tsa iyó nda andivi, tan sñin tyaqui tucu tsa iyó nu ñuhu ñayivi ihya. <sup>41</sup> Tsa nditsin

ñicanyii, tan tsa nditsin yoo ña inducu tsi. Tan ña inducu tsi tsihin tsa nditsin tiñuu. Tan tsa nditsin tiñuu ña inducu tsi tsihin inga nyico tiñuu. <sup>42</sup> Tan tacan tucu tuhun tsa cua nandoto ndiyi. Tuhvá yo tsicutsí cuñu ñuhu tan tyaahyú tsi. Maa tyin tsa cua nandoto yo ña cua cúu ca yo. <sup>43</sup> Cuñu ñuhu tsa iyó tsi yo vityin nduve tunyee iñi iyó tsi can, nacuhví can, tan tsiihí can. Maa tyin cua nandoto iin tsa sñi caá tan iyó ca tunyee iñi tan ña cua cúu ca can. <sup>44</sup> Tsa tsiihí yo tsicutsí yo cuñu ñuhu tsa naquihñin yo nu ñuhu ñayivi ihya. Maa tyin tsa cua nandoto yo cua cuhva Nyoo inga cuñu ñuhu tsi yo. Iyó cuñu ñuhu cuenda nu ñuhu ñayivi. Tan iyó tucu cuñu ñuhu cuenda gloria.

<sup>45</sup> Catyí tutu Nyoo tyin ra Adán ra tsa tsicoꝝ tsa jihna ñi, tsahá Nyoo ñayivi coo ra. Tan ra Cristo cuví ra tumaa ra Adán maa tyin ñavin cuñu ñuhu tsahá ra tsi yo tyin tsahá ra ñayivi nyito coo yo, tyin juven ra cuví Tatyí Ii. <sup>46</sup> Tsa jihna ñi taahán tsi coo yo tsihin cuñu ñuhu cuatyí yo, yaha can tan coo yo cuenda Tatyí Ii Nyoo.

<sup>47</sup> Rayii tsa tsinu tsa jihna ñi, tsihin nyaca ñuhu tsinu ra. Tan cuví ra cuenda ñuhu ñayivi. Maa tyin ra Cristo cuví ra tumaa rayii tsa tsinu uvi tan cuví ra cuenda gloria.

<sup>48</sup> Tandihí yo iyó cuñu ñuhu yo tumaa tsicoꝝ cuñu ñuhu ra Adán tsa tsinu tsihin nyaca ñuhu. Maa tyin tsa cua nandoto yo cuñu ñuhu yo cua nanduvi tsi tumaa cuñu ñuhu ra Cristo ra iyó nda andivi. <sup>49</sup> Tumaa ndacu yo tsi rayii, ra tsa tsinu tsihin nyaca ñuhu, tacan tucu cua ndacu yo tsi ra Cristo ra iyó nda gloria.

<sup>50</sup> Tan cuñí yu cahan yu tsihin ndo, yañi, tyin cuñu ñuhu yo ña cuví quihví tsi nu ndacá ñaha Nyoo, tyin iin tsa yatyi tiví ña cuví quihví can nu yihí tsa ña tuhvá tiví.

<sup>51</sup> Tan cuñí tucu yu tsa coto ndo iin tsa xeehe tsa yoñi maa tsitó. Ña tandihí yo cua cúu, maa tyin tandihí yo tan cua nasama cuhva caá yo. <sup>52</sup> Tan nu cua ndihí tiví ángel trompeta, cua nandoto ndiyi iin yaha cuui ñi tumaa tsa ndaahvá tinuu yo. Tyin cua tiví ra trompeta tan cua nandoto nyivi tsihi tsa ña cua cúu ca maa. Tan Nyoo cua nasama ra cuhva caá yo tun ndi iyó ca yo.

<sup>53</sup> Tyin cuñí tsi tsa nasama Nyoo cuñu ñuhu yo tsihin iin tsa ña cua naa maa. <sup>54</sup> Tan quivi cua nasama cuñu ñuhu yo tan cua ñihi yo iin tsa ña cua tiví maa, cua cundaa tsa caahán tuhun Nyoo nu catyí tsi tyehen:

“Nyoo jahá canaa ra tsi tuhun tsiihí.”

<sup>55</sup> Yooho, Tuhun Tsiihí, ¿náa tunyee iñi tsa tsicoꝝ tsi un tyin cahñi un tsi ndi?

¿Náa jahá canaa un, yooho Tuhun Tsiihí?

<sup>56</sup> Tyin cuatyí yo tsahá can tsa cahñi tuhun tsiihí tsi yo, tyin ley tsahnu tsahá tunyee iñi tsi can. <sup>57</sup> Maa tyin tyahví nyoo tsi Nyoo, yañi, tyin jaquitsi ra tsi Jutu Mañi yo Jesucristo tan tsahá ra tunyee iñi tsi yo tsa jaha canaa yo tsi nu tuhun tsiihí can.

<sup>58</sup> Yacan cuenda yañi, cunyaa naa vaha ndo tsi Nyoo tsihin tsa ñi iñi añima ndo. Tan jañihi ca ndo jaha tyiñu ndo tyiñu Jutu Mañi yo. Tyin tun jahá tyiñu yo tyiñu Jutu Mañi yo, ña jahá tyiñu cuatu yo.

### Nu tsahá cuenda ra Pablo tsi nyivi nácaa taahán tsi jatyinyee ñi tsi inga ñi yihí cuenda Nyoo

**16** Tan tuhun tsa jatyinyeeé ndo xuhun tsi nyivi ndaahvi, ñi yihí cuenda Nyoo, javaha ndo tumaa tsahá cuenda yu tsi nyivi tsicá vehe ñuhu ñuu tsa cayucú Galacia. <sup>2</sup> Jandu iin ndo xuhun tsa taahán tsi cuhva ndo tsi ñi tahan tahan una quivi nácaa tsahá maa Nyoo tsi ndo. Tan ña cuatu ndo nda tsaá yu. <sup>3</sup> Tan nacatsi ndo ndáa ra cuñí maa ndo tyin cundaca xuhun can. Tan tsa tsaá yu, cua javaha yu iin carta tyin cundaha ndihí ra naha tan jacuhun yu tsi ra naha tyin cundaca ra naha can tsi ñi tsicá vehe ñuhu Jerusalén. <sup>4</sup> Tan tatun tahan tucu tsi tsa cuhun yu, cuhun ra naha tsihin yu.

### Nu caahán ra Pablo ndáa ndihí nu cua cahan ra tuhun ra Cristo

<sup>5</sup> Tsa cua quitsi yu nu yucú ndo ñuu Corinto, cua yaha yu ityi Macedonia. <sup>6</sup> Tatun cuhva tsi cuhva cua ndoo yu tsihin ndo nda cuanda yaha yoo vitsin, tacan tan cuví jatyinyeeé ndo luxu tsi yu tan cuhun yu inga ñuu. <sup>7</sup> Ña iin yaha ñi cua yaha yu nu yucú ndo tyin cuñí yu ndoo yu juhva quivi tsihin ndo tatun Jutu Mañi yo tan cuñí ra. <sup>8</sup> Maa tyin cua cunyii yu ñuu Éfeso ihya nda cuanda yaha quivi vico Pentecostés tsa jacahnú nyivi Israel. Tacan tan cua quitsi yu nu yucú ndo. <sup>9</sup> Cua ndoo yu juhva quivi ihya tyin tsahá xaan tsi cuhva caahán yu tuhun Nyoo tsihin nyivi vasu ndi maa cuaha ñi ña taahán iñi ñi tuhun ra.

<sup>10</sup> Tatun tsaá ra Timoteo nu yucú ndo, na cunyii ra tsihin ndo. Tan vaha tyannuu ndo tsi ra tyin juven ñi tyiñu Jutu Mañi yo jahá tyiñu ra tumaa maa yu. <sup>11</sup> Tan vaha cuñi ndo nyehé ndo tsi ra. Tan jatyinyeeé ndo tsi ra na quitsi ra nu nyii yu tyin ndatú yu tsi ra tsihin inga ca ra yañi yo naha ra.

<sup>12</sup> Tan ra Apolos yañi yo, cahan ndaahvi xaan yu tsihin ra na quitsi ra nu yucú ndo tsihin inga ca ra yañi yo naha ra. Maa tyin ña cuñi ra quitsi ra. Catyí ra tyin quitsi maa ra nda cuhva tsi cuhva tsi ra.

### Nu tsahá ra Pablo nacumi tsi tandihí nyivi yihí cuenda Nyoo ñuu Corinto

<sup>13</sup> Jañihi ca ndo tsinú iñi ndo tsi Nyoo. Tan jandu iin ca ndo iñi ndo, tan na coo ca tunyee iñi Nyoo tsi ndo.

<sup>14</sup> Tandihí tsa javahá ndo, javaha ndo tsa cuenda tsa cuñí ndo tsi Nyoo tan tsi nyivi yihí cuenda ra.

<sup>15</sup> Yañi, tsitó ndo tyin jihna ca nyivi ra Estéfanos natsinu iñi tsi ra Cristo ityi Acaya nu yucú ndo. Tan vityin javahá ñi tyiñu nuu ra hermano. <sup>16</sup> Tan cuñí yu tsa jaha ndo tsa ñayivi tsi nyivi tsa iyó tumaa iyó nyivi ra Estéfanos, tan tsi tandihí ca ñi tsa jatyinyeeé tan jahá tyiñu cuenda Nyoo. <sup>17</sup> Tan sñi xaan cuñí yu tyin quitsi ra Estéfanos, ra Fortunato, tan ra Acaico. Tan jatyinyeeé ra naha tsi yu tyin nyoocho ña cuví quitsi ndo tyin cañi xaan ñuu ndo. <sup>18</sup> Maa tyin maa ra naha quitsi ra naha. Tan jandunyeé ca ra naha iñi yu tsihin tuhun Nyoo, tu-



maa tsa jandunyeé tucu ra naha iñi nyooho. Tan vaha cuñi ndo nyehé ndo tyiñu jahá ra naha tyin iin ñi tsi maa Nyoo nyicún ra naha.

<sup>19</sup> Tan vatsí nacumi tsi ndo jahá tandihí nyivi yihí cuenda Nyoo ñuu tsa cayucú Asia ihya. Tan vatsí tucu nacumi tsi ndo jahá ra Aquila tan ña Priscila, tan ñi yihí cuenda Nyoo tsa ndu iin yuvehe ñi. <sup>20</sup> Vatsí nacumi tsi ndo jahá tandihí ra yañi yo, tan cuhva ndo nacumi tsi tsa intuhun intuhun ndo nu yucú ndo juvin.

<sup>21</sup> Tan yuhu ra Pablo tsahá yu nacumi tsi ndo tan tyaa yu itsi tsihin ndaha yu.

<sup>22</sup> Tatun ndáa nyivi ña cuñí tsi Jutu Mañi yo Jesucristo, na cuhun ñi anyaya. Maa tyin yuhu catyí yu: ¡Jutu Mañi yu, ñaha!

<sup>23</sup> Tan na nasoco Jutu Mañi yo Jesucristo tsi tandihí ndo. <sup>24</sup> Tan catyí yu tsihin ndo tyin yuhu cuñí yu tsi tandihí ndo tsa cuenda ra Cristo Jesús.

Tan na cuví tsi tacan ñi.

## II Corintios

Nu tyaá ra Pablo iin carta cuenda nyivi yihí cuenda Nyoo ñuu Corinto

**1** Yuhu ra Pablo, cuví yu iin ra tava tyiñu ra Cristo Jesús tyin maa Nyoo nacatsí tsi yu. Yuhu tan ra Timoteo, yañi yo, jaquitsí ndi carta ihya tsi ndo tsa cuví ndo nyivi yihí cuenda Nyoo tsa iyó ñuu Corinto tsa canyii Acaya, tan tsi tandihí ca nyivi yihí cuenda Nyoo tsa iyó inga ñuu tsa cayucú nanii cahnu Acaya. <sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu nyehé xaan ra Pablo tundoho nu tsicá ra caahán ra tuhun ra Cristo

<sup>3</sup> Na jacahnu yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahví xaan iñi ra nyehé ra tsi yo. Tan jandusí ra iñi yo tandihí ñi tsaha. <sup>4</sup> Nyuhu nyehé xaan ndi tundoho maa tyin maa ra jandusí iñi ndi. Tyin tacan tan cuví jandusí ndi iñi nyivi nyehé tundoho tumaa jandusí maa ra iñi ndi. <sup>5</sup> Tyin nyehé ndi tundoho tsa cuenda ra Cristo, tan juvin ñi tsa cuenda ra jandusí Nyoo iñi ndi. <sup>6</sup> Yacan cuenda tatun nyehé ndi tundoho tsa cuenda tsa jacotó ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusí Nyoo iñi ndo, tan jacacu ra tsi ndo. Tatun jandunyeé Nyoo iñi ndi, javahá ra tacan tyin tacan tan ndunyeé tucu iñi nyooho tan jacacú ra tsi ndo tan cuví cunyeé iñi ndo nyehé ndo tahan tundoho nyehé ndi. <sup>7</sup> Tyin tsitó vaha ndi tyin jandusí ra iñi ndo tyin nyehé ndo tundoho tsa cuenda ra Cristo tumaa tsa nyehé tucu nyuhu tundoho.

<sup>8</sup> Yañi, cuñí ndi tsa coto ndo tyin cuaha xaan tundoho nyehé ndi tsa tsiyucú ndi ñuhu Asia. Ñihi xaan nducú cuhva nu ña vaha tsi ndi tan tsicá iñi ndi tyin ña cua cunyeé maa iñi ndi cuyucu ndi ican. Tan cuñí maa ndi tyin cua cúu ndi tsa ndi cumañi ca quita ndi ican. <sup>9</sup> Tsa nyehé ndi tyin tsa cuñí cúu ndi tan ña cuví jacacu ndi tsi ndi tsihin tunyee iñi maa ndi. Tacan tan cutuñí iñi ndi tyin cuñí tsi tsa cuita ca iñi ndi tsi Nyoo, ra janandotó ndiyi, tan ña cuita iñi ndi tsi maa ndi. <sup>10</sup> Nyoo jacacú tsi ndi quivi can, tan juvin ra jacacú tsi ndi nda cuenda vityin. Tan tsitó ndi tyin tacan ñi maa cua jacacu ra tsi ndi, <sup>11</sup> tun nyooho tan ña jandihí ndo tsa jatyinyeé ndo tsi ndi tsihin tsa tsicán tahvi ndo tsi ra tsa cuenda ndi. Tyin tatun cuaha nyivi tsicán tahvi tsa cuenda ndi, tsa cua ñihi tuhun ñi tyin tsahá xaan Nyoo

tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

Nu caahán ra Pablo nacuenda ña tsahán ra ñuu Corinto

<sup>12</sup> Iyó iin tuhun tsa tsahá tsa siñ xaan cuñí ndi tan tuhun ihya cuví tsa cuití iyó ndi, tan ndaa iyó ndi tsihin tandihí nyooho, tan tsihin tucu inga ca nyivi. Maa tyin ñavin tsihin tsa tsiñi tuñi maa ndi iyó ndi tacan, iyó ndi tacan tsa cuenda tyin maa Nyoo tsahá tsa vaha tsa iyó tsi ra tsi ndi. <sup>13</sup> Nu tutu tsa tsa yahá jaquitsí ndi tsi ndo, tyaá ndi maa ñi maa tuhun tsa cuví cahvi ndo tan cuví cutuñi iñi ndo. Vityin tsa tsa cutuñi iñi ndo juhva. Tan cuñí ndi tsa cutuñi vaha ca iñi ndo tandihí tuhun can tyin tacan tan siñ cua cuñi ndo tsihin ndi quivi quitsi Jutu Mañi yo Jesucristo. Tan siñ cua cuñi tucu nyuhu tsihin nyooho.

<sup>15</sup> Tsa cuenda tsa tsitó vaha yu tyin tacan cua cuví: tyaá yu cuhva tyin tsa cua cuhun yu Macedonia tan cua yaha jihna yu nu yucú ndo. Tan quitsi nyico yu nu yucú ndo tsa yaha cuhun yu Macedonia tyin tacan tan cuví cusí iñi ndo. Tan tsicá tucu iñi yu tyin yaha can tan cuví jatyinyee ca ndo tsi yu tan cuhun yu Judea. Tye-hen tyaá yu cuhva javaha yu, maa tyin ña cuví. <sup>17</sup> ¿A cuñí maa ndo tyin ña tyaá yu cuhva quitsi yu nu yucú ndo? Ñavin. Tyin yuhu ña javahá yu tumaa javahá nyivi tuhvá jandaví ñaha. Catyí ñi tyin vaha, maa tyin tsitsi añima ñi catyí ñi tyin ña vaha. Caahán ñi nduvi tuhun can tsa iin ñi cuhva. <sup>18</sup> Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandaví ñaha yu. <sup>19</sup> Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyivi can caahán; maa ñi maa tsa nditsa caahán ra. <sup>20</sup> Tan tsa cuenda ra ñihí yo tandihí tsa vaha tsa catyí Nyoo tyin cuhva ra tsi yo. Yacan cuenda tsa jacahnú yo tsi Nyoo, catyí yo tyehen: “Na cuví tsi tacan”. Tyin tsitó yo tyin tsahá ra tsa vaha tsi yo tsa cuenda ra Cristo. <sup>21</sup> Nyoo cuví ra tsahá tunyee iñi tsi nyuhu tsa cuenda ra Cristo, tan tsahá ndihí tucu ra tunyee iñi tsi nyooho. Nacatsí ra tsi yo, <sup>22</sup> tan tsahá ra Tatyí Ii ra coo añima yo, tan cuví tsi tumaa iin tuñi tsa tyaá ra tsi yo tan janahá tsi tsi yo tyin cua ñihi yo tsa cua cuhva ra tsi yo.

<sup>23</sup> Ñaha ca maa quitsi nyico yu nu yucú ndo, tyin ña cuñí yu janducuihya yu iñi ndo. Tsitó maa Nyoo tyin nditsa tsa caahán yu. Tan tatun ña nditsa yu, na nyehé maa Nyoo náa cuñí ra tsihin yu. <sup>24</sup> Caahán ndi tandihí tuhun ihya tsihin ndo tsa cuenda tsa cuñí ndi jatyinyee

tahan yo tsi yo tan coo ca tusii iñi Nyoo tsi ndo. Ña cuñi ndi quihí ndaha ndi tsi ndo tyin nyoocho tsa tsinú vaha maa iñi ndo tsi Nyoo.

**2** Yacan cuenda ña cuñi yu quitsi yu tyin tacan tan ña cuhva ca yu tucuihya iñi tsi ndo. <sup>2</sup> Tyin tatun yuhu tan janducuihyá yu iñi ndo, yoñi cua jandusii iñi tsi maa yu. Tyin nyoocho ña cuvi ca jandusii ndo iñi yu tun tsa yahá janducuihyá yu iñi ndo. <sup>3</sup> Yacan cuenda carta ñi jaquitsi yu tsi ndo. Ña cuñi yu quitsi yu tyin ña cuñi yu janducuihya ndo iñi yu tsihin cuhva iyó ndo. Tyin taahán tsi jandusii ndo iñi yu. Tyin tatun sii cuñi yu yu, tsitó yu tyin tandihí yo tan sii cuñi yo. <sup>4</sup> Quivi tsa tyaa yu carta can tsa cuenda ndo, tsicá xaan iñi yu. Cuihya xaan cuñi yu tan nda cuanda tsacu yu. Jaquitsi yu carta can tsi ndo maa tyin ñavin tsa cuenda tsa janducuihya yu iñi ndo. Jaquitsi yu can tsa cuenda tsa cuñi yu tsa coto ndo tyin cuñi xaan yu tsi ndo.

#### Nu tsahá cuenda ra Pablo tsi nyivi nácaa taahán tsi jaha ñi tucahnu iñi

<sup>5</sup> Ra tsa tsahá tucuihya iñi, ñavin yuhu ñi janducuihya ra iñi. Tyin janducuihya tucu ra luxu iñi nyoocho. Caahán yu tyehen tyin tacan tan ña cuñi ndo tyin ña cuvi coo tucahnu iñi tsi ra javahá tacan. <sup>6</sup> Tsa iyó vaha ñi. Ña cahan ca ndo tsi ra can. Ña tatsi tuñi ca ndo tsi ra. <sup>7</sup> Vityin taahán tsi jaha ndo tucahnu iñi tsi ra tan naquihin ndaahvi ndo tsi ra, tyin tacan tan ña cuihya xaan ca cuñi ra. <sup>8</sup> Yacan cuenda cuñi yu tsa cahan ndo tsihin ra tan janaha ndo tsi ra tyin ndi cuñi ndo tsi ra. <sup>9</sup> Jaquitsi yu carta can tsi ndo quivi can tyin cuñi yu coto yu tatun cua tyaa yahvi ndo tsa tsahá cuenda yu tsi ndo. <sup>10</sup> Tan vityin nyivi tsa jahá nyoocho tucahnu iñi, jahá tucu yuhu tucahnu iñi tsi ñi. Tatun iyó ñi tsa taahán tsi jaha yo tucahnu iñi, jahá yu tucahnu iñi tsi ñi tsa cuenda tsa vaha tsi maa ndo. Tacan javahá yu nuu ra Cristo. <sup>11</sup> Tyin tacan tan ña cuvi jaha canaa nu ña vaha tsi yo. Tyin tsitó vaha yo nácaa cuñi nu jandavi ñaha nu tsi yo.

#### Ra Pablo ña ndoo ra ñuu Troas tyin ña nañihí ra tsi ra Tito

<sup>12</sup> Quivi tsaá yu ñuu Troas tsa cua cahan yu tuhun tsa jacacú ra Cristo tsi yo, tsahá xaan tsi cuhva tsi yu tsa jahá tyiñu yu tyiñu Jutu Mañi yo. <sup>13</sup> Maa tyin tuñu xaan cuñi yu, tyin ña nañihí yu tsi ra Tito, yañi yo. Yacan cuenda vatsí yu ityi Macedonia ihya tan ña ndoo yu ndacan cahan yu tsihin nyivi.

#### Nu caahán ra Pablo tuhun ra Cristo tsihin tsa ñi iñi añima ra

<sup>14</sup> Maa tyin tyahvi nyoo tsi Nyoo tyin tacan ñi jahá canaa yo tsihin tunyee iñi ra Cristo Jesús tan tsahá ra tsa caahán ndi tuhun ra tsihin nyivi. Tan tuhun ra tsa caahán ndi, cuvi tsi tumaa iin xico tami tsa caná tandihí ñi ityi nu cuahán ndi. <sup>15</sup> Tyin nyuhu cuvi ndi tumaa xico tami ra Cristo tsa cuenda Nyoo. Tan tandihí ñi ityi cuahán ndi tan ñihí nyivi xico tami can, tahan ñi

nyivi tsa cua cacu tan ñi tsa ña cua cacu. <sup>16</sup> Maa tyin tsa cuenda nyivi tsa ña cua cacu, ndasi caná tsi, tan cuñi maa ñi tyin tuhun tsa jacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinú iñi ñi tsi ra Cristo. Maa tyin tsa cuenda nyivi tsa cua cacú, tami xaan tsi, tyin jacotó ndi nácaa cua coo ñi ñayivi tsa ña cua naa maa. Maa tyin ¿yóo cuvi jaha tyiñu tyiñu ihya? <sup>17</sup> Nyuhu ña javahá ndi tumaa javahá ra tsicá nuu cuaha naha ra. Ra ican naha ra cuñi ra naha xuhun. Maa tyin ña taahán tsi xico yo tuhun ra Cristo. Nyuhu caahán ndi tuhun ra tsihin tsa ñi iñi añima ndi tyin iin ñi cuvi ndi tsihin ra tan maa Nyoo tava tyiñu tsi ndi tsa cahan ndi tyin cuenda ra Cristo yihí ndi.

#### Tuhun tsa tsa ndoo ra Cristo tsihin yo

**3** Tsa caahán ndi tuhun ihya, ¿a cuñi maa ndo tyin caahán ndi tacan tsa cuñi ndi nduyaa ndi? Ñavin. ¿A cuñi tsi cuhva ndi iin carta tsa catyí tyin vaha nyivi cuvi ndi? ¿O cuñi tsi ndacan ndi carta tsi ndo tumaa javahá juhva nyivi? <sup>2</sup> Ña cuñi tsi. Tyin tsa tyaa Nyoo tsi ndo añima ndi, tan maa ndo cuvi carta tsa cuenda ndi. Yacan cuenda ña tsiñi ñuhu ca carta tsi ndi. Tyin tsihin tsa nyehé nyivi nácaa nasama Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo. <sup>3</sup> Tan catsi nyehé ñi tyin cuvi ndo carta tsa tyaa ra Cristo tsa cuenda ñi, tan nyuhu nacuhva cuenda ndi carta can tsi ñi. Tan ña tyaa ra Cristo itsi tsihin tyinta maa tyin tyaa ra itsi tsitsi añima ndo tsihin Tatyí Ii Nyoo nyito. Tan ñavin nu yuu tsinyaa tsi.

<sup>4</sup> Caahán ndi tyehen tyin tsitó vaha ndi tyin Nyoo cua cuhva ra tsa quita vaha tyiñu javahá ndi, tyin jatyinyee ra Cristo tsi ndi. <sup>5</sup> Ña cana iñi ndi caca iñi ndi tyin javahá ndi náa javahá ndi tsihin tunyee iñi maa ndi. Tyin tsitó ndi tyin tandihí tsa javahá ndi tan maa Nyoo javahá can. <sup>6</sup> Tan tsahá ra tunyee iñi tsi ndi tsa cahan ndi tuhun ra Cristo, tan tuhun ihya cuvi tuhun tsa tsa tsahá ñayivi tsa coo yo tyin iyó Tatyí Ii ra añima yo. Ley tsa tsahá Nyoo tsi ra Moisés ña tsahá tsi ñayivi tsa coo yo tyin janahá ñi tsi tsi yo tyin iyó cuatyí yo tan taahán tsi cúu yo.

<sup>7</sup> Ley tsahnu can tsinyaa nu yuu tsihin letra, tan cahnu xaan cuvi tsi. Yacan cuenda tsa tsaá ra Moisés tsihin tsi nu yucú nyivi Israel, nayuhvi xaan ñi nyehé ñi nuu ra tyin xiñu xaan nuu ra cuvi. Maa tyin tsindihí tsa xiñu can. Tatun tacan cuvi quivi quitsi ley tsa tsahá tuhun tsiihí, <sup>8</sup> yaha ca cahnu cuvi tuhun tsa ndoo Nyoo tsihin yo tsa tsahá Tatyí Ii ra tsi yo! <sup>9</sup> Tatun cahnu cuvi ley tsahnu tsa jacuhún tsi yo anyaya, yaha ca cahnu cuvi tuhun tsa tsa ndoo Nyoo tsihin yo tyin janduvahá tsi tsi yo nuu ra. <sup>10</sup> Nditza tyin cahnu cuvi ley tsahnu can. Maa tyin vityin tsitó yo tyin yaha ca cahnu cuvi tuhun ra Cristo tsa jacacú tsi yo nuu Nyoo. <sup>11</sup> Tyin tatun cahnu cuvi tsa tsicoó juhva ñi tyembu, yaha ca cahnu cuvi tsa ña cua cundihí maa.

<sup>12</sup> Tsitó vaha ndi tyin ña cua cundihí tsi. Yacan cuenda caahán ndi tsihin tsa ñi iñi añima ndi. Ña cahan nuu ndi tan ña yuuhví ndi caahán ndi. <sup>13</sup> Tan ña javahá ndi

tumaa javahá ra Moisés. Tyin ra Moisés tyasí ra nuu ra tsihin jahma, tyin tacan tan ña nyehe nyivi Israel nu cua naa tsa xiñu nuu ra. <sup>14</sup> Quivi can ña cutuñi iñi ñi. Nda cuanda vityin tan ña cutuñi iñi ñi. Tyin tatun cahví ñi ley tsahnu ña cutuñi iñi ñi itsi tyin ndasí tsa tsiñi tuñi jiñi ñi tumaa tsindasí nuu ra Moisés quivi can. Yoñi maa cuví jatsiyo yacan tyin intuhun ñi maa ra Cristo cuví jatsiyo can. <sup>15</sup> Nda cuanda vityin tan ña cutuñi iñi ñi ley tsa tyaá ra Moisés tun cahví ñi itsi. Tyin ndasí tsa tsiñi tuñi iñi ñi. <sup>16</sup> Maa tyin tatun nacuhva cuenda ñi tsi ñi tsi Jutu Mañi yo, maa ra cua nuña tsa tsiñi tuñi iñi ñi. <sup>17</sup> Tyin Jutu Mañi yo, Tatyí Ii cuví ra. Tan tatun iyó Tatyí Ii Jutu Mañi yo añima yo, tsitó yo tyin ña yihí ndaha ca ley tsahnu tsi yo. <sup>18</sup> Yacan cuenda tandihí yo tan ña ndasí ca nuu yo. Tan vityin cuví yo tumaa inu, tyin cuví nyehe nyivi tsa cahnú cuví Jutu Mañi yo jahá yo. Tan cuahán nduvahá ca yo jahá Tatyí Ii ra.

**4** Nyoo nyehe ndaahvi ra tsi ndi, tan tavá tyiñu ra tsi ndi tsa cahan ndi tuhun ra tsihin nyivi yacan cuenda ña ndu uvi iñi ndi. <sup>2</sup> Tandihí tsa javahá ndi, ña tuhvá ndi javahá xeehe itsi, tan ndi ña javaha ndi tsa tsahá ticanuu. Ña tsicá nuu ndi jandaví ñaha ndi tsi nyivi. Maa ñi maa tuhun Nyoo jacuahá ndi. Ña sacá nuu ndi tuhun Nyoo tsihin inga ca tuhun. Tan caahán ndaahvi ndi tsihin tandihí ñi nyivi, na jaha vaha ñi cuenda tyin tandihí tsa caahán ndi, tan nda maa nuu Nyoo javahá ndi, tan maa ñi maa tsa nditsa cuví tsi. <sup>3</sup> Nyuhu ña tyihí xeehe ndi tuhun Nyoo. Maa tyin yihí xeehe tsi tsa cuenda nyivi ndasí tsa tsiñi tuñi iñi, ñi tsa cua cunaa. <sup>4</sup> Nu ña vaha, nu ndacá ñaha tsi nyivi iyó nu ñuhu ñayivi ihya, juvin nu tyasí tsa tsiñi tuñi iñi ñi, tyin tacan tan ña tsinu iñi ñi tsi Nyoo, tan ña nyehe ñi tsa nditsin ra, tan ña cutuñi iñi ñi nácaa jacacú ra Cristo tsi yo, ra iin ñi cuví tsihin Nyoo. <sup>5</sup> Ñavin tuhun maa ndi caahán ndi. Tyin tuhun ra Jesucristo caahán ndi tsihin nyivi tyin juvin ra cuví Jutu Mañi yo. Tan nyuhu musu ñi ndo cuví ndi tyin cuñí ndi tsi ra. <sup>6</sup> Nyoo catyí tyin ndunditsin nu naa quivi tsinu ñuhu ñayivi. Tan juvin ñi ra jandunditsín tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnú cuví ra tsa nduxiñú nuu ra Cristo.

#### Iyó yo ñayivi tsa tsihin tsa tsinú iñi yo tsi Nyoo

<sup>7</sup> Tsa cuca Nyoo, tsa cuví tunyee iñi cahnú ra, yihí tsi tsitsi cuñu ñuhu yo tan nasamá tsi cuhva iyó yo tyin cuví yo tumaa quisí ñuhu tan naquihín yo itsi. Juvin tsi janahá tsi nyivi tyin maa Nyoo tsahá tunyee iñi ra tsi yo tan ñavin tunyee iñi maa yo cuví tsi. <sup>8</sup> Yacan cuenda vasu ndi maa nyehe xaan ndi tundoho tandihí ñi nu cuahán ndi, ña ndu uvi iñi ndi. Yihí tsaha ña tsitó ndi nácaa quita ndi nu tundoho nyehe ndi, maa tyin nyitá iñi ndi tyin cua quita vaha ndi. <sup>9</sup> Vasu ndi maa nyaá ndaha nyivi tsi ndi, maa tyin ña nacoo ihñi Nyoo tsi ndi, tacan ñi iyó maa ra tsihin ndi. Nduvá ihñi ndi jahá nyivi, maa tyin ña tsiihí ndi. <sup>10</sup> Tandihí ñi nu cuahán ndi tan nyicún tuhun tsiihí tsi ndi tsa cuenda tsa caahán ndi tuhun ra Jesús. Tyin tacan tan nyehe nyivi tyin iyó ndi ñayivi ra. <sup>11</sup> Tsitsi tsa ndi iyó ndi nu ñuhu ñayivi ihya

tandihí ñi quivi tan ndatú ndi tuhun tsiihí tyin tandihí ñi quivi tan nducú nyivi cahñi ñi tsi ndi tsa cuenda ra Cristo. Tan tsihin tsa taahán ndi janahá tyin iyó ñayivi ra añima ndi. <sup>12</sup> Yacan cuenda nyuhu tandihí ñi tsaha nyicún tuhun tsiihí tsi ndi tyin caahán ndi tuhun ra Cristo tsihin nyivi. Maa tyin nyooho, iyó ndo ñayivi ra Cristo tsa cuenda tuhun ra tsa caahán ndi tsihin ndo.

<sup>13</sup> Tsinú iñi ndi tsi Nyoo tumaa tsinu iñi ra David tsi ra. Tumaa catyí ra nu libru Salmos: "Tsinú iñi yu tsi Nyoo, yacan cuenda caahán yu tuhun ra". Tacan tucu nyuhu; tsinú iñi ndi tsi Nyoo, yacan cuenda caahán ndi tuhun ra. <sup>14</sup> Tyin tsitó ndi tyin Nyoo, ra janandoto tsi Jutu Mañi yo Jesucristo, cua janandoto ndihí ra tsi ndi. Tan cua ndu iin ndo tsihin ndi, tsahan cua cundaca ra tsi yo iin caa ñi nda gloria. <sup>15</sup> Tandihí tuhun ihya cuví tsa cuenda tsa vaha tsi nyooho tan tsa vaha tsi cuaha ca nyivi. Tyin tun cuaha ndo naquihin tsa vaha Nyoo, cuaha xaan ndo cua nacuhva tyahvi nyoo tsi ra, tan cua jacahnú ndo tsi ra.

<sup>16</sup> Yacan cuenda ña ndu uvi maa iñi ndi, vasu ndi maa cuahán ndutsahnú cuñu ñuhu ndi, tyin ñayivi tsa tsa iyó ndi ndutsaá tsi tan iin tan iin quivi. <sup>17</sup> Tundoho tsa nyehe ndi nu ñuhu ñayivi ihya, tsa yahá ñi maa cuví tsi. Tan tsahá tsi tsa coo cuii ndi tsihin Nyoo nda gloria. <sup>18</sup> Yacan cuenda ña tyaá iñi ndi tsa cuví nyehe yo. Tyin nyitá iñi ndi tsa ña cuví nyehe yo. Tyin tsa cuví nyehe yo juhva cuii ñi tyembu tsicoó can. Maa tyin tsa ña cuví nyehe yo, ña cua cundihí maa tsa iyó tsi.

**5** Tsitó yo tyin quivi cúu yo, cua tyahyu cuñu ñuhu yo. Tyin cuví tsi tumaa iin vehe tsa tañi ñi tsicoó. Maa tyin Nyoo cumí vaha ra inga cuñu ñuhu tsa ña cua cundihí maa tsa cuenda intuhun intuhun yo. Tan ican cua cuyucu añima yo. Iyó can nda gloria tan ñavin ra ñuhu ñayivi ihya javahá can. <sup>2</sup> Nditsa tyin tsitsi tsa ndi iyó yo tsitsi cuñu ñuhu yo, caahán yuhu yo tyin tsa cuñí yo cuhun yo coo yo tsitsi cuñu ñuhu vaha tsa cua cuhva Nyoo tsi yo. <sup>3</sup> Cuhun añima yo tsitsi tsa tsahá Nyoo. Tan cua cunditsi yo itsi tumaa nditsí yo jahma tyin tacan tan ña cua cutandihí añima yo. <sup>4</sup> Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñí yo. Maa tyin ña ndaahvi cuñí yo tsa cuenda tsa cuñí yo quita añima yo tsitsi cuñu ñuhu yo tan cutandihí tsi. Ndaahvi cuñí yo tsa cuenda tsa cuñí yo coo añima yo tsitsi tsa ña cua cundihí maa, tyin tacan tan coo cuii yo. Tan cua cundihí tsa tañi ñi tsicoó jaha tsa ña cua cundihí maa. <sup>5</sup> Tan Nyoo tyaá ra cuhva tyin tacan cua javaha ra tsihin yo. Tan tsahá jihna ñi ra Tatyí Ii ra tsi yo tyin tacan tan cuita iñi yo tyin cua cuhva ra tandihí ca tsa cua cuhva ra tsi yo.

<sup>6</sup> Yacan cuenda nyitá iñi ndi tsi Nyoo tsihin tsa ñi iñi añima ndi tsa nducuhún iñi ndi tyin tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria. <sup>7</sup> Vasu ndi maa ña cuví nyehe yo tsi ra, maa tyin iyó yo nu ñuhu ñayivi ihya tsihin tsa tsinú iñi yo tsi ra. <sup>8</sup> Nyitá iñi ndi tsi ra tan cuñí ndi quita ndi tsitsi cuñu ñuhu ihya tan cuhun ndi coo ndi tsihin Jutu Mañi yo. <sup>9</sup> Yacan cuenda tsitsi tsa ndi iyó ndi tsihin cuñu ñuhu ihya, jañihí ca ndi nducú ndi cuhva javahá ndi tsa

taahán iñi Jutu Mañi yo tan tacan ñi maa vasu nduve ca ndi tyin tsa cuahán ndi tsihin Jutu Mañi yo nda gloria. <sup>10</sup> Tyin tandihi yo tan cua cuhun yo nu nyaá ra Cristo nu cua jacutuñi ra tsi yo. Tan cua nacuhva cuenda intuhun intuhun yo nácaa tsa vaha a tsa ña vaha tsa javahá yo quivi tsicoo yo tsitsi cuñu ñuhu yo cuenda nu ñuhu ñayivi ihya.

### Nu tsahá cuenda ra Pablo nácaa cuví coo vaha yo tsihin Nyoo

<sup>11</sup> Tsitó ndi tyin Jutu Mañi yo cua tatsi tuñi ra tsi ndi tatun ña cua javaha ndi tsa caahán ra. Yacan cuenda nducú ndi cuhva cahan ndi tsihin nyivi na nacuhva cuenda ñi tsi ñi tsi Nyoo. Tan Nyoo tsitó vaha ra tyin tacan javahá ndi, tan cuñí ndi tsa coto tucu nyooho. <sup>12</sup> Caahán ndi tyehen, maa tyin ñavin tsa cuñí ndi nduyaa ndi tyin caahán ndi tsa cuenda tsa cuñí ndi tsa nducuhun iñi ndo tyin caahán ndi tsa nditsa, tan cusii ca iñi ndo tan ñihi ndo cuhva cahan ndo tsihin inga ca ra tsa nduyaá naha ra. Catyí ra naha tyin vaha iyó ra naha tsihin Nyoo, maa tyin tsitsi añima ra naha maa ñi tsa ña nditsa iyó. <sup>13</sup> Tatun caahán ndi tuhun Nyoo, catyí juhva nyivi tyin jiñi ndi sana. Nditsa, sana iñi ndi maa tyin tsa cuenda Nyoo, tyin tuhun maa ra caahán ndi. Tan tatun vaha cuñí ndi, tsa cuenda nyooho vaha cuñí ndi. <sup>14</sup> Tan tsitó ndi tyin intuhun ñi ra Cristo tsihi tsa cuenda tandihi nyivi ñuu ñayivi. Tacan tan tsihi tandihi yo. [Tsa tsihi yo cuñí tsi catyí tyin nacoó yo tsa javahá yo cuhva cuñí maa yo.] Tan tsa tyehen tsitó yo tsa tsihi ra Cristo tsa cuenda tsa cuñí xaan ra tsi yo, jañiñi tsi tsi yo tsa cahan yo tuhun ra tsihin nyivi. <sup>15</sup> Ra Cristo tsihi ra tsa cuenda tandihi yo tyin tacan tan coo yo cuhva cuñí maa ra tan ñavin cuhva cuñí maa yo tyin tsihi ra tan nandoto ra tsa cuenda tandihi yo. <sup>16</sup> Vityin tan ityi nuu, ña caca ca iñi yo nyehe yo cuhva iyó nyivi tumaa tsicá iñi nyivi ña tsitó tsi Nyoo. Tsicoo quivi tacan tsicá iñi yo nyehe yo tsi ra Cristo cuñi yo tyin ra ñuhu ñayivi ñi cuví ra. Maa tyin vityin ña tsicá ca iñi yo tacan. <sup>17</sup> Tyin quivi nacuhva cuenda yo tsi yo tsi ra Cristo, jandutsaa ra añima yo. Tan nanduvj yo nyivi tsa jahá ra. Tan tandihi tuhun tsa tsicá iñi yo nu quitsi ca tsi, ña tsicá ca iñi yo can vityin ihya tyin tsahá ra tsa tsiñi tuñi tsa tsi yo.

<sup>18</sup> Maa Nyoo javahá tandihi yacan tyin vityin iyó vaha yo tsihin ra jahá ra tsa cuenda ra Cristo Jesús. Tsahá cuenda ra tsi yo tyin cuñí tsi jacoto yo tsi nyivi nácaa javaha ñi tan cuví coo vaha ñi tsihin ra. <sup>19</sup> Tyin maa ra tsa yahá nduvahá iyó ra tsihin ñi tsa cuenda tsa tsihi ra Cristo tsa cuenda cuatyí ñi. Nyoo jahá ra tyin nduve ca cuatyí ñi nuu ra. Tan tavá tyiñu ra tsi yo tsa jacoto yo tuhun ihya tsi ñi. <sup>20</sup> Yacan cuenda cuví ndi ra tavá tyiñu ra Cristo. Tan caahán ndaahvi Nyoo tsihin ndo tsihin yuhu ndi. Yacan cuenda caahán ndahvi ndi tsihin ndo tsihin sivi ra Cristo, na nduvaha coo ndo tsihin Nyoo. <sup>21</sup> Ra Cristo ña javahá ra ndi intuhun cuatyí. Maa tyin Nyoo jaquitsi ra tsi ra nu ñuhu ñayivi ihya; quitsi cúu ra tsa cuenda tandihi cuatyí yo. Tyin tacan tan cuví jacacu

ra tsi yo, tan tsa cuenda ra Cristo, nduvahá yo jahá tsa vaha Nyoo.

**6** Yañi, iin caa ñi jahá tyiñu yo tyiñu Nyoo. Yacan cuenda caahán ndaahvi xaan ndi tsihin ndo tyin cuatyíñu ndo tandihi tsa vaha tsa tsahá ra tsi intuhun intuhun ndo. <sup>2</sup> Tyin catyí Nyoo nu tutu ra tyehen:

Quivi tahán tsi tsa jacacu yu tsi un, tsiñi yu tsa cahan un

tan jatyinyee yu tsi un, catyí Nyoo.

Jaha ndo cuenda tyin vityin cuví quivi taahán tsi. Tan vityin cuví quivi jacacú Nyoo tsi yo.

<sup>3</sup> Nducú xaan ndi cuhva tsa ña javaha ndi náa javaha ndi tyin tacan tan ña cahan nyaa nyivi tyiñu Nyoo tsa javahá ndi. <sup>4</sup> Tan cuñí ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé iñi ndi náa ndihi tsa taahán ndi, náa tundoho, tan náa tsihi. <sup>5</sup> Vasu ndi maa cañi nyivi tsi ndi, tyihí ñi tsi ndi vehe caa, tsacú nducu ñi tsi ndi, maa tyin cunyeé xaan iñi ndi. Tan ñihi xaan jahá tyiñu ndi nda cuenda tsicoó nyito ndi, tan tsisocó ndi. <sup>6</sup> Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin tsa tsitó ndi tsa nditsa tan tsihin tsa cunyeé xaan iñi ndi nyehé ndi tandihi maa nuu tundoho tan ña tsihi ndi tsihi. Vaha iñi ndi, tan cuñi xaan ndi tsi nyivi tyin iyó Tatyí Ii Nyoo añima ndi. <sup>7</sup> Caahán ndi maa ñi maa tuhun Nyoo tsa nditsa. Iyó tunyee iñi ra tsihin ndi. Tan tsatyíñu ndi tandihi tsa vaha tsa tsahá ra tsi ndi, tyin tacan tan cuví jaha canaa ndi tsi nu ña vaha. <sup>8</sup> Yihí quivi vaha cuñi nyivi nyehé ñi tsi ndi, tan iyó tucu quivi ndasi cuñi ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siqui ndi. Yihí tsaha catyí ñi tyin cuendu caahán ndi tan inga tucu tsaha catyí ñi tyin tsa nditsa caahán ndi. <sup>9</sup> Iyó tsaha jahá ñi tyin ña nacotó ñi tsi ndi, tan yihí tsaha jacahnú tucu ñi tsi ndi. Iyó quivi tsa yatyin ña cúu ndi, maa tyin ña tsihi ndi tan ndi iyó ca ndi. Iyó quivi tatsí tuñi nyivi tsi ndi, maa tyin ña tsahñi tucu ñi tsi ndi. <sup>10</sup> Vasu ndi maa cuihva cuñi ndi iyó tsaha, maa tyin ña tsindihí tsa si cuñi ndi. Iyó tsaha ndaahvi ndi, maa tyin cuaha nyivi janducucá ndi tsihin tuhun Nyoo. Vasu nduve náa iyó tsi ndi, maa tyin tandihi maa tsa iyó tan tsii maa ndi cuví.

<sup>11</sup> Nyooho nyivi ñuu Corinto; caahán catsi ndi tsihin ndo tsihin tsa ñi iñi añima ndi tyin nditsa tsa cuñi xaan ndi tsi ndo. <sup>12</sup> Nyuhu, ña ndasi cuñi ndi nyehe ndi tsi ndo. Maa ndo cuví ndo ndasi cuñi nyehe tsi ndi.

<sup>13</sup> Caahán ndaahvi yu tsihin ndo tumaa caahán ndaahvi iin ra tsihin sehe ra; nyña ndo añima ndo, tumaa tsa javahá maa yu tsihin ndo. Tan ña ndasi ca cuñi ndo nyehe ndo tsi ndi, tyin maa ndi ña ndasi cuñi ndi nyehé ndi tsi ndo.

### Vehe Nyoo nyito cuví yo tyin iyó ra añima yo

<sup>14</sup> Ña ndu iin ndo tsihin nyivi ña tsinú iñi tsi Nyoo tyin ña nacatsí tahan añima ndo tsihin añima ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsin tan ña cuví ndu iin tsi tsihin tsa naa. <sup>15</sup> Tyin ra Cristo ña ndu iin ra tsihin nu ña vaha. Tan tacan tucu

yoo tsa tsinú iñi tsi ra, ña cuví ndu iin yo tsihin nyivi ña tsinú iñi tsi ra. Tyin tun ndu iin yo tsihin ñi ña cua nacatsi tahan coo yo tsihin ñi. <sup>16</sup> Tyin ndi vehe Nyoo tan ña cuví nacatsi tahan tsi tsihin tsitoho. Yacan ndi ña jāvahnu ndo tsitoho tyin vehe Nyoo nyito cuví yo, tumaa catyí maa ra tuhun yo tahan tsanaha:

Cua coo yu añima ñi, tan cua cuhun yu tsihin ñi nu cuhun ñi.

Maa yu cua cuvi Nyoo ñi,  
tan maa ñi cua cuvi nyivi yu, catyí ra.

<sup>17</sup> Yacan cuenda catyí ra:

Quita ndo mahñu nyivi ña tsinú iñi tsi yu.

Ña cūtahan ndo tsihin ñi.

Ña javaha ndo tsa ña vaha.

Tacan tan naquihin yu tsi ndo.

<sup>18</sup> Tan cuvi yu jutu ndo.

Tan cuvi ndo sehe yu,  
catyí jutu Mañi yo, ra iyó tandihi tunyee iñi tsi.

**7** Yañi, yacan cuvi tsa tsahá Nyoo tsi yo, yacan cuenda cuñí tsi nducu yo cuhva nduvaha vaha ca yo. Tan ña javaha ca yo tsa caquiñi tan ña caca ca iñi yo tsa ña vaha. Cūiti coo yo tyin tyaá yahvi yo tsi Nyoo.

**Nu nacatyí tuhun ra Pablo nácaa nasamā cuhva iyó nyivi yihí cuenda Nyoo ñuu Corinto**

<sup>2</sup> Yañi, caahán ndaahvi yu tsihin ndo, vaha cuñi ndo nyehe ndo tsi ndi tyin nduve maa náa javahā ndi tsi ndi intuhun ndo. Tan ndi ña jativí ndi tsi ndi intuhun ndo. Tan ña jandaví ñaha ndi tsi ndi intuhun ndo. <sup>3</sup> Tsa caahán yu tyehen tsihin ndo ñavin tsa caahán yu tsi ndo cuví. Tyin tsa yaha catyí yu tsihin ndo nda nu quit-sí ca tsi, tyin nditsa tsa cuñí yu tsi ndo. Tyin iin caa ñi iyó yo tsihin Nyoo. Tatun iyó yo, iin ñi cuví yo tsihin ra; o tatun cúu yo, iin ñi cua cuvi tucu yo tsihin ra. <sup>4</sup> Tsitó vaha yu tyin cua javaha ndo tsa vaha, yacan cuenda sñi xaan cuñí yu nyehé yu tsi ndo. Vasu ndi maa nyehé xaan ndi tundoho, maa tyin ndu iin ca iñi añima ndi. Tan sñi xaan ca cuñí ndi.

<sup>5</sup> Nda quiví tsaā ndi Macedonia ihya, tan ñaha ca maa quitatú ndi. Tyin cuaha xaan tsihi tan tundoho nyehé ndi tandihi ñi ityi cuahán ndi. Cañi tahan nyivi tsihin ndi. Tan tsicá xaan iñi ndi tyin ña tsitó ndi tun cua quita vaha tyiñu jahá ndi. <sup>6</sup> Maa tyin Nyoo, tacan ñi maa jandu iin ra iñi yo tun cuiihya cuñi yo. Tan jandu iin xaan ra iñi ndi quiví tsaā ra Tito nu yucú ndi ihya. <sup>7</sup> Tan ñavin tsa cuenda tsa tsaā ñi ra, maa tyin sñi cuñí tucu ndi tsa cuenda tsa jandu iin xaan ndo iñi ra. Nacatyí tuhun ra tsihin ndi tyin cuñí xaan ndo nyehe ndo tsi ndi. Tan catyí tucu ra tyin tsacú xaan ndo tsa cuenda tsa cuiihya cuñí ndo. Tan ñuhú xaan iñi ndo tsi yu. Tsa tsitó yu yacan, sñi xaan ca cuñí yu cuví.

<sup>8</sup> Quiví can tsicā xaan iñi yu tyin tsahā yu tucuiihya iñi tsi ndo tsihin carta tsa jaquitsí yu tsi ndo. Tan ndu uví iñi yu tsa jaquitsí yu carta can tsi ndo. Maa tyin juhva ñi quiví nducuiihya iñi ndo. Tan vityin ña tsicá ca iñi yu tsa cuenda tucuiihya iñi tsa tsahā yu tsi ndo. <sup>9</sup> Tan vityin sñi xaan cuñí yu. Ñavin tsa cuenda tsa tsicoo ndo tucuiihya iñi, tsa cuenda tsa ndu uví iñi ndo cuatyí ndo

jahā tucuiihya iñi can. Tan cunyeē xaan iñi ndo nyehe ndo tucuiihya iñi cuhva taahán maa iñi Nyoo. Yacan cuenda vaha javahā ndi tsa tsahā ndi tucuiihya iñi tsi ndo. <sup>10</sup> Tyin tun cunyeē iñi yo nyehe yo tucuiihya iñi cuhva cuñí maa Nyoo, cua nasama cuhva iyó yo tacan tan cua cacu yo. Yacan cuenda na sñi cuñi yo tun nyehé yo tucuiihya iñi cuhva cuñí maa Nyoo. Tyin tucuiihya iñi tsa iyó tsi nyivi tsa ña tsitó tsi Nyoo maa ñi anyaya ñihí ñi tsihin can. <sup>11</sup> Nyooho cunyeē iñi ndo nyehe ndo tucuiihya iñi tumaa cuhva taahán iñi maa Nyoo. Tan vityin, nyehe ndo tyin cuaha xaan tsa vaha ñihí ndo tsa cuenda tucuiihya iñi can. Jandaā vaha ndo cuatyí ra can. Cuxaān ndo tsi ra. Tan nayuhví tucu ndo tsi Nyoo. Tsahā cuenda vaha ndo nácaa cuahán tyiñu can. Yaha can tan nda cuanda cuñi ndo nyehe ndo tsi yu. Tan tatsí tuñi ndo tsi ra can. Tan tsa cuenda tsa javahā ndo tumaa cuñí maa Nyoo, cuñí tsi catyí tyin nduve cuatyí ndo tsa cuenda yacan. <sup>12</sup> Yacan cuenda quiví jaquitsí yu carta can tsi ndo ña jaquitsí yu itsi tsa cuenda tsa tsicá xaan iñi yu cuenda ra tsa javahā cuatyí can. Tan ndi ñavin tsa cuenda ra tsa tahan ticanuu can. Maa tyin tsa cuenda maa ndo, tyin cuñi yu tsa coto ndo nácaa ñuhú iñi ndo tsi ndi nuu Nyoo tan nácaa cuñí ndo jatyinyeé ndo tsi ndi. <sup>13</sup> Yacan cuenda nduvahā cuñí añima ndi. Tan sñi xaan cuñí ndi tyin tsitó ndi tyin cuñí ndo tsi ndi.

Tsa nyehe ndi tyin sñi xaan cuñí ra Tito, ndusñi ca iñi ndi tyin tsahā xaan ndo tunyee iñi tsi ra. Tan vaha xaan naquihin cuenda ndo tsi ra. <sup>14</sup> Catyí yu tsihin ra Tito tsa ndi cumañi ca quitsi ra nu yucú ndo tyin cua tyaa soho vaha ndo tuhun tsa jaquitsí yu tsihin ra. Tan vityin sñi cuñí yu tyin cundaā tsa cahān yu tsihin ra. Tyin maa ñi maa tsa nditsa tuhvá yu caahán. Tan tacan tucu ndunditsā tsa cahān yu tsihin ra. <sup>15</sup> Cuñí xaan ra tsi ndo tsa nducuhún iñi ra tyin javahā ndo tandihi cuii maa tsa cahān ra tsihin ndo. Tan tsa tsaā ra nu yucú ndo, ndaahvi jahā ndo tsi ndo nuu ra. Tan vaha xaan cahān ndo tsihin ra. Tan vaha xaan tyaa yahvi ndo tsi ra. <sup>16</sup> Tan sñi xaan cuñí yu tyin tsitó yu tyin tacan ñi javahā ndo tsa vaha.

**Na jatyinyeé yo tsi nyivi yihí cuenda Nyoo tsihin tsa ñi iñi añima yo**

**8** Vityin yañi, cuñí ndi nacatyí tuhun ndi tsihin ndo nácaa jatyinyeé xaan Nyoo tsi nyivi yihí cuenda ra, ñi iyó ñuu tsa cayucú Macedonia ihya. <sup>2</sup> Vasu ndi maa cuaha xaan tundoho nyehé ñi, maa tyin sñi cuñí ñi tsihin Nyoo. Ndaahvi xaan ñi, maa tyin cuaha tsa iyó tsi ñi tsahá ñi, tumaa tsatyin cuca ñi. <sup>3</sup> Tan cuví yu tsandaa tyin nyehé yu tyin tsahā ñi cuaha tsa iyó tsi ñi tsihin tsa ñi iñi ñi tan nda cuanda yaha ca tsahá ñi. <sup>4</sup> Caahán ndaahvi xaan ñi tsihin ndi na cuhva ndi ndatu tsa jatyinyeē ndihi ñi tsi nyivi yihí cuenda Nyoo tsa iyó ñuu Jerusalén. <sup>5</sup> Cuaha ca javahā ñi tan ñavin ca tsa tsicā iñi maa ndi. Tyin tsa jihna ñi, nacuhvā cuenda ñi tsi ñi tsi Nyoo tsihin tsa ñi iñi añima ñi. Tacan tan nacuhvā cuenda tucu ñi tsi ñi tsi nyuhu tsa quihí ndaha ndi tsi ñi tumaa cuñí maa Nyoo. <sup>6</sup> Tsa nyehe yu tyin tacan

javahá nyivi Macedonia, tacan tan catyí yu tsihin ra Tito tyin na quitsi ra nu yucú ndo tan janumi ra tsi ndo jacatsi tahan ndo xuhun tsa quitsahá tavá ndo jahá ra. <sup>7</sup> Tyin nyooho vaha xaan javahá ndo tandihí tyiñu. Tsinú xaan iñi ndo tsi Nyoo. Vaha xaan caahán ndo tuhun ra. Vaha cutuñí iñi ndo. Tan tsihin tsa ñi iñi añi-ma ndo javahá ndo tyiñu ra. Tan cuñí xaan ndo tsi ndi. Tan juvin ñi tacan taahán tucu tsi jatyinyeé ndo tsi nyivi ndaahvi, tsa yihí cuenda Nyoo.

<sup>8</sup> Ña jañiñí yu tsi ndo tsa javaha ndo tsa caahán yu. Caahán yu tyehen tsihin ndo tsa cuenda tsa cuñí yu tsa nyehe ndo tsa vaha javahá nyivi yihí cuenda Nyoo Macedonia. Tyin tacan tan javaha ndihí ndo tsa vaha tumaa javahá maa ñi. Tan tsihin yacan cua janaha ndo tyin nditsa tsa vaha xaan iñi ndo. <sup>9</sup> Tyin tsa tsitó maa ndo nácaa tsa vaha iñi Jutu Mañi yo Jesucristo tsihin yo. Maa ra cuca xaan ra, maa tyin quitsí ra nu ñuhu ñayivi ihya tan jandundaahvi ra tsi ra tsa cuenda tsa cuñí ra tsi yo tyin tacan tan cuví janducura ra tsi yo.

<sup>10</sup> Yuhu cuñí yu tsa vaha tsa cuenda ndo, yacan cuenda cua cahan yu tsihin ndo tsa tsicá iñi yu tsa cuenda tuhun ihya. Nyooho cuví nyivi tsa quitsahá jandu iñi jihna xuhun cuyava. Ñavin nyivi tavá tyiñu tsi ndo javaha ndo tacan. Javahá ndo tacan tyin tacan tsicá iñi maa ndo. <sup>11</sup> Yacan vityin cuñí yu tsa jañihi ca ndo javaha ndo tumaa javahá maa ndo nda nu quitsahá nda cuanda nacatsi tahan xuhun can jaha ndo. Cuhva nyooho nácaa iyó maa tsi ndo. <sup>12</sup> Tyin tatun iin nyivi tan cuñí ñi cuhva ñi tandihí cuhva iyó tsi ñi tan cuhva ñi can tsihin tsa ñi iñi añima ñi, Nyoo cua naquihín cuenda ra tsa cua cuhva ñi tyin Nyoo ña jañiñí ra tsi yo cuhva yo tun nduve náa iyó tsi yo.

<sup>13</sup> Caahán yu tyehen tsihin ndo, maa tyin ñavin tsa cuenda tsa cuñí yu tsa jatyinyee ndo tsi nyivi tan ndoo ndaahvi ndo tan ñi ican coo tsa coo tsi ñi. <sup>14</sup> Tyin vityin tsa iyó luxu tsi ndo, taahán tsi jatyinyee ndo tsi nyivi ndaahvi tsihin can. Tyin tacan tan inducu ñi coo tandihí yo. Tan inga tsaha, maa ñi cua jatyinyee tucu tsi maa ndo tun cumañi tsa cumañi tsi ndo. Tyehen taahán tsi jatyinyeé tahan yo tsi yo tsihin tsa iyó tsi yo tyin tacan tan ña nyehe ndi intuhun yo tundoho. <sup>15</sup> Tumaa catyí nu tutu Nyoo tyehen: “Ra tsa cuaha xaan tsa iyó tsi, ña jativi ra itsi. Tan ra tsa iyó luxu ñi tsa iyó tsi, ña cumañí tsa cumañi tsi ra”, catyí tsi nu tutu Nyoo.

#### Nu tyáá ra Tito naha ra cuhva cuhun ra naha ñuu Corinto

<sup>16</sup> Tyahvi nyoo tsi Nyoo tyin tsahá ra tsa vaha iyó añi-ma ra Tito tan tsicá iñi ra tuhun ndo tumaa tsicá iñi maa yu tuhun ndo. <sup>17</sup> Tsa cahan yu tsihin ra tyin quitsi ra nu yucú ndo, ndoo ra tyiñu tsa quitsi ra, tyin tuñu cuñí tucu maa ra ñuhú iñi ra tsi ndo. Yacan cuenda vityin vatsí ra nu yucú ndo tsihin tsa iyó iñi maa ra.

<sup>18</sup> Jaquitsí ndi tsi iin ra yañi yo iin caa ñi tsihin ra Tito. Vaha xaan tsinú iñi ra tsi Nyoo, tan tacan caahán tucu tandihí nyivi yihí cuenda Nyoo. <sup>19</sup> Tan inga tucu tuhun tyin nacatsí vaha nyivi yihí cuenda Nyoo tsi ra yañi yo ihya tyin cuhun ndihí ra tsihin ndi cundaca ndi xuhun

tsi nyivi ndaahvi iyó ñuu Jerusalén. Cuñí xaan ndi jacahnú ndi tsi Jutu Mañi yo tsihin tsa javahá ndi tyiñu ihya. Tan tacan tucu cuñi xaan ndi jatyinyee ndi tsi tandihí nyivi yihí cuenda Nyoo. <sup>20</sup> Tsihin cuenda xaan javahá ndi tyiñu ihya, tyin tacan tan ña cahan nyivi tsi ndi tsa cuenda tsa tavá ndi xuhun cuenda nyivi ndaahvi. <sup>21</sup> Tacan ñi nducú xaan ndi cuhva javahá ndi tyiñu. Tatun cua javaha ndi náa iin tsa cua javaha ndi, javahá ndi can tsihin tsa catsi iyó ndi ityi nuu Jutu Mañi yo tan ñavin ityi nuu Jutu Mañi yo ñi tyin ityi nuu tucu nyivi.

<sup>22</sup> Tan juvin ñi jaquitsí tucu ndi inga ra yañi yo tsihin ra Tito naha ra tyin nyehé ndi tyin ñi xaan iñi ra. Tan cuaha ñi tsaha janahá ra tyin cuñí xaan ra tsi Jutu Mañi yo. Tan vityin tsa tsa tsitó ra tuhun ndo, siñ cuñí ra tyin tsitó ra tyin cua javaha ndo tsa vaha nuu Nyoo.

<sup>23</sup> Tatun yóo tsicá tuhun tuhun ra Tito, catyi ndo tsihin ñi tyin ra vaha iñi tsi yo cuví ra, tan jahá tyiñu ra tsihin yu, tan jatyinyeé ra tsi ndo tsihin tuhun Nyoo. Tatun tsicá tuhun tucu ñi tuhun inga uvi ca ra yañi yo ihya naha ra, catyi ndo tyehen tsihin ñi:

—Maa nyivi yihí cuenda Nyoo jaquitsí tsi ra naha. Tan vaha xaan jahá tyiñu ra naha tyiñu ra Cristo —catyi ndo.

<sup>24</sup> Yacan cuenda janaha ndo tsi ra ihya naha ra nu tsvi tyin nditsa tsa cuñí ndo tsi ra naha. Tyin tacan tan coto tandihí nyivi yihí cuenda Nyoo tyin nditsa tsa caahán yu tyin vaha javahá ndo.

#### Nu tsahá cuenda ra Pablo nácaa taahán tsi jatyinyee yo tsi nyivi ndaahvi yihí cuenda Nyoo

<sup>9</sup> Tan cuenda xuhun tsa jandu iin ndo tsa cuenda nyivi ndaahvi yihí cuenda Nyoo, ña ñiñi xaan cuñí tsi cahan yu tuhun can tsihin ndo. <sup>2</sup> Tyin tsitó yu tyin cuñí xaan ndo javaha ndo tsa vaha. Yacan cuenda siñ cuñí yu nacatyí tuhun yu tuhun ndo tsihin nyivi iyó Macedonia, tyin nyooho tsa iyó ñuu Corinto tsa canyí Acaya, nda cuyava tan quitsahá cuñí ndo jatyinyeé ndo tsi nyivi ndaahvi. Tan tsa cuenda yacan cuaha xaan nyivi yihí cuenda Nyoo Macedonia ndu iin ca iñi ñi tan cuñí ndihí tucu maa ñi jatyinyeé ñi tsi nyivi ndaahvi.

<sup>3</sup> Vasu ndi maa tsitó yu tyin vaha tsicá iñi ndo, maa tyin jaquitsí yu tsi ra yañi yo ihya naha ra nu yucú ndo, tyin jatyinyee ra naha tsi ndo tan janumi ndo jandu iin ndo xuhun, tumaa tsa caahán yu tuhun ndo tyin cuñí ndo javaha ndo tsa vaha. Tyin tacan tan ña cua catyi nyivi Macedonia tyin ña nditsa yu tsa caahán yu. <sup>4</sup> Tyin coto cusana quitsi iin ra Macedonia tsihin yu, tan nyehe ra tyin nduve xuhun jandu iin ndo. Tan tahan yu ticanuu tsa cuenda tsa nduve náa javahá ndo. Tan vihi ca maa ndo. Tyin tsa yahá catyi yu tyin cuñí xaan ndo jatyinyee ndo tsi nyivi ndaahvi. <sup>5</sup> Yacan cuenda tsicá iñi yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatyinyee ra naha tsi ndo tsa jandu iin ndo xuhun tsa tyihí ndo cuhva tyin cuhva ndo. Tyin tacan tan quivi quitsi yu tandihí tsi tan tsa iyó vaha tsi. Tyin tsa cacú iñi maa ndo tan javahá ndo cuhva can, tan ñavin nyuhu jañiñí tsi ndo.

<sup>6</sup> Nducuhun iñi ndo tuhun tsa catyí tyehen: Ra tsa tatsí luxu ñi, luxu ñi tsiti naquihín ra. Maa tyin ra tsa tatsí cuaha, cuaha tsiti naquihín ra. <sup>7</sup> Tan intuhun intuhun yo cuñí tsi cuhva yo cuhva iyó iñi maa yo. Ñavin uvi caca iñi yo tan cuhva yo o cuhva yo tsa cuenda tyin jañiñi nyivi tsi yo. Tyin Nyoo cuñí ra tsi nyivi tsahá tsihin tsa sñi cuñí ñi. <sup>8</sup> Nyoo cuví cuhva ra tandihí nuu tsa vaha tsi ndo, tyin tacan tan ña cumañi náa cumañi tsi ndo. Tan cuvi jatyinyee tucu maa ndo tsi inga ca nyivi. <sup>9</sup> Tumaa catyí tuhun Nyoo tyehen:

Iin ra vaha tsahá ra, tsihin tsa ñi iñi ra, tsa iyó tsi ra tsi nyivi ndaahvi.

Tan tumañi iñi tsa javahá ra, ña tsinaá tsi nuu Nyoo, catyí tsi.

<sup>10</sup> Nyoo, ra tsahá tsiti tatsí yo, tsahá tucu ra tandihí tsa tsatsí yo. Tan cua cuhva tucu ra cuaha ca tsiti tsa tatsi ndo tan vaha cua cuhva tsi jaha ra. Tan tsa tacan tsahá ndo cua jatyinyee ca ra tsi ndo javaha ndo tsa vaha tsihin nyivi. <sup>11</sup> Tan coo ca tandihí nuu tsa cuca tsi ndo, tyin tacan tan cuvi jatyinyee ca ndo tsi nyivi yihí cuenda Nyoo tsihin yo. Tan maa ñi, cua nacuhva ñi tyahvi nyoo tsi Nyoo tsa cuenda xuhun tsa jacuhun ndo tsi ñi. <sup>12</sup> Tyin tsa jatyinyee yo tsi nyivi yihí cuenda Nyoo tsihin tsa tsahá yo tsa tsiñi ñuhu tsi ñi, tsahá tucu yo tsa nacuhva ñi tyahvi nyoo tsi Nyoo. <sup>13</sup> Tan cua jacahnu ñi tsi Nyoo. Tyin tsihin tsa jatyinyee ndo tsi ñi, nyehé ñi tyin nditsa tsa tyaá yahvi ndo tuhun ra Cristo. Tan juvin ñi cua jacahnu ñi tsi Nyoo tsa cuenda tsa jatyinyee xaan ndo tsi maa ñi tan tsi tandihí ca nyivi.

<sup>14</sup> Cua ndacan tahvi ñi tsi Nyoo tsa cuenda ndo. Tan cua cuñi xaan ñi tsi ndo tsa cuenda tsa vaha tsa tsahá ndo tsi ñi jahá Nyoo. <sup>15</sup> Tyahvi nyoo tsi Nyoo tyin tsahá ra tsa vaha xaan tsi yo, tan nda cuanda ña ñihí yo cuhva nacatyí tuhun yo itsi.

**Ra Pablo iyó ndatu tsi ra tsa jaha cuenda ra tsi nyivi tsa jacotō ra tuhun Nyoo**

**10** Yuhu ra Pablo tsihin tsa vaha iñi ra Cristo caahán ndaahvi yu tsihin ndo, tyin yihí ndo catyí ndo tyin tun tsahá cuenda yu tsi ndo tsihin carta, ñihi xaan caahán yu tsihin ndo, maa tyin tun nyí yu tsihin ndo, ndaahvi xaan jahá yu tsi yu, catyí ndo. <sup>2</sup> Vaha. Maa tyin jaha ndo cuenda tan ña jañiñi ndo tsi yu tsa cuxaan yu tsi ndo quivi quitsi yu nu yucú ndo tyin tsitó yu tyin cuñí tsi tsa cuxaan ñihi yu tsi juhva ndo. Tyin yihí ndo catyí ndo tyin javahá yu tumaa javahá ra ña yihí cuenda ra Jesucristo. <sup>3</sup> Nditsa tyin ra ñuu ñayivi cuví ndi. Maa tyin ña cañi tahan ndi tumaa cañi tahan nyivi iyó nu ñuhu ñayivi ihya. <sup>4</sup> Tyin tsa xaan tsa tsaty-iñú ndi tsa cañi tahan ndi, ñavin tsa xaan tsa iyó nu ñuhu ñayivi ihya cuví tsi. Tyin maa tunyee iñi maa Nyoo cuví tsi, tyin cuví jaha canaa ndi siqui tandihí ca tunyee iñi tsihin tsi tan nda cuanda tunyee iñi tsa iyó tsi tatyí ña vaha. <sup>5</sup> Tan tacan cuví jaha canaa ndi tsi tandihí tsa caahán ndasi nyivi siqui tuhun Nyoo, tan tandihí tsa ña vaha tsa tyasí nu tyaa yahvi nyivi tuhun Nyoo. Tan tsahá ndi tsa cundaca ñaha ra Cristo tandihí cuhva tsicá iñi ndi tyin tacan tan tyaá yahvi ca ndi tsi

ra. <sup>6</sup> Quivi cutuhva tandihí nyooho tsa iyó Corinto tyaa yahvi vaha ndo tsi ra Cristo, tatun ndoo inga ndo tsa ña cuñi tyaa yahvi tsi ra, tyaá ndi cuhva tsa tatsi tuñi ndi tsi ndo.

<sup>7</sup> Nyooho jahá ndo cuenda cuhva iyó nyivi. Tan ña jahá ndo cuenda nácaa iyó añima ñi. Tatun tsitó vaha ndo tyin cuenda ra Cristo yihí ndo, taahán tsi coto ndihí tucu ndo tyin cuenda ra yihí tucu nyuhu. <sup>8</sup> Ña cahán nuu yu caahán yu tsa tsahá Nyoo ndatu tsi yu tsa quihí ndaha yu tsi ndo, vasu ndi maa yahá caahán yu juhva tyin tsitó yu tyin tsa vaha tsi maa ndo cuví, tan ña javahá yu can tsa cuenda tsa cuñi yu jativi yu tsi ndo. <sup>9</sup> Ña cuñi yu tsa catyí ndo tyin jayuhví yu tsi ndo tsihin tsa caahán yu nu carta tsa jaquitsí yu tsi ndo.

<sup>10</sup> Tyin yihí ndo catyí ndo tyin nu carta tsa jaquitsí yu tsi ndo ñihi xaan caahán yu tsihin ndo. Maa tyin tatun maa yu tsaá nu yucú ndo, nduve yahvi nyaá yu, catyí ndo. Tan catyí tucu ndo tyin nduve yahvi nyaá tuhun caahán yu. <sup>11</sup> Maa tyin nyooho tsa caahán tacan cuñi tsi coto ndo tyin tumaa caahán yu nu carta, tacan cua javaha tucu yu tsa tsaá yu nu yucú ndo.

<sup>12</sup> Nditsa ña caná iñi ndi jandu inducu ndi tsi ndi tsihin ra nduyaá naha ra. Tyin ra can naha ra juvin ñi maa ra naha catyí tyin vaha ra naha. Tan tsa caahán ra naha tacan, nduve yahvi nyaá caahán ra naha can tyin javahá ra naha cuhva javahá inga nyivi tan ñavin cuhva cuñi Nyoo. Tan cuñi ra naha tyin vaha tsa jandu inducú ra naha tsi ra naha tsihin inga nyivi. <sup>13</sup> Nyuhu ña cua nduyaa ndi tsihin tsa ña taahán tsi tsi ndi. Nyoo cuví ra janahá náa tyiñu taahán tsi javahá yo. Tan maa ra jaquitsí tsi ndi ñuu Corinto nu yucú ndo. <sup>14</sup> Tun tsatyin ña jihna ca maa ndi cahán tuhun Nyoo tsihin ndo, ña taahán tsi jahá cuenda ndi tsi ndo. Maa tyin taahán tsi jahá cuenda ndi tsi ndo tyin jihna ca maa ndi tsindaca tuhun ra Cristo nu yucú ndo. <sup>15</sup> Nyuhu ña nduyaá ndi tsihin tyiñu javahá inga ca ra naha. Ña catyí ndi tyin tyiñu maa ndi cuví tsi. Maa tyin nyitá iñi ndi tyin cua natsinu vaha ca iñi ndo tsi Nyoo. Tan tatun tsa tsinú vaha ca iñi ndo, tacan tan cua cuvi jacuaha cuaha ca ndi tuhun ra Cristo tsi ndo, maa tyin tandihí ñi tsaha tsa cua jacuaha ndi tsi ndo maa ñi tsa caahán Nyoo cua cahan ndi. <sup>16</sup> Tan tsicá iñi ndi cuhun ndi cucahan ndi tuhun ra Cristo nu ña tsitó nyivi tuhun ra. Tyin tacan tan ña cua catyi nyivi tyin nduyaá ndi tsihin tyiñu javahá inga ra naha.

<sup>17</sup> Nyooho tsa cuñi nduyaa, nduyaa ndo tsihin tsa javahá Jutu Mañi yo tan ñavin tsihin tsa javahá maa ndo. <sup>18</sup> Tyin ra tsa catyí tyin vaha ra, ña quitá vaha ra nuu Nyoo. Maa tyin ra tsa catyí Nyoo tyin vaha, ra ican cua quita vaha nuu Nyoo.

**Nu tsahá cuenda ra Pablo tsi nyivi ñuu Corinto na jaha cuenda ñi tsi ñi na ña jandaví ñaha ra vatya naha ra tsi ñi**

**11** Vaha xaan tun ña cundihí iñi ndo tyaa soho ndo tsa cua cahan yu tsa tsicá iñi maa yu tsihin ndo. Ña cundihí iñi ndo tsihin yu vasu ndi maa tuhun maa yu cuví tsi. <sup>2</sup> Yuhu cuiñú xaan yu tsi ndo. Tan maa Nyoo



tsahá tsa cuiñu yu tsi ndo, tyin juvin yu cahān tuhun ra Cristo tsihin ndo nda jihna. Tan cuñí yu tsa cuñi ndo tsi intuhun ñi maa ra tumaa cuñí iin ñaha yoco tsi ra tsa cua cuvi yñ ña. Tyin iin ñaha yoco cuñí ña tsi intuhun ñi maa ra tsa cua cuvi yñ ña. <sup>3</sup> Maa tyin tsicá xaan iñi yu tsa cuenda ndo, coto tahan ndo tumaa tahan ña Eva. Tyin ña Eva jandaví ñaha nu coo tsi ña tsihin maña nu. Tan yuhu ña cuñí yu tsa jandaví ñaha nyivi tsi ndo tan nasama ndo cuhva tsicá iñi ndo tuhun ra Cristo, tan jandihí ndo tsa jacahnú ndo tsi intuhun ñi maa ra. <sup>4</sup> Tyin nyooho yatyi xaan nasamá ndo cuhva tsinú iñi ndo tuhun ra Jesús tun siin cuhva caahán nyivi tuhun ra. Tyin ñavin tuhun ra Jesús tsa jacoto ndi tsi ndo cuví can. Tan taahán xaan iñi ndo caca iñi ndo tuhun tsa ña nacatsí tahan tsihin tuhun Tatyí Ii Nyoo tsa naquihin ndo nda jihna. Yatyi xaan natsinú iñi ndo tuhun caahán nyivi tan ñavin tuhun, tsa jacacú ra Cristo tsi yo, tsa cahān ndi tsihin ndo. <sup>5</sup> Ra tsa catyí, “Nyuhu cuví ndi ra vaha caahán tuhun ra Cristo”, tsicá iñi yu tyin ña cahnu ca cuví ra can naha ra tan ñavin ca maa yu. Tan nyooho nyicún ndo tsi ra naha. <sup>6</sup> Vasu ndi maa ña ñihí vaha yu cuhva caahán yu, maa tyin cutuñí vaha iñi yu tuhun Nyoo. Tan yacan cuví tsa jacuahá ndi tsi ndo tsihin tandihí cuhva javahá ndi.

<sup>7</sup> ¿O cuñí maa ndo tyin ña vaha javahá yu tsa ña quihij yu yahvi quivi cahān yu tuhun tsa jacacú Nyoo tsi yo tsihin ndo? Tacan javahá yu tyin tacan tan ña cahnu xaan jaha ndo tsi yu tan nducahnu maa ndo nuu Nyoo. <sup>8</sup> Nyivi tsa tsicá tuhun Nyoo vehe ñuhu inga ñuu jatyinyeé tsi yu tsihin xuhun. Tan xuhun tsa tsahá ñi tsi yu tsatyíñu yu can quivi quitsj yu quitsj cahān yu tuhun ra Cristo tsihin ndo. <sup>9</sup> Vasu ndi maa yihí tsaha cumañj tsa cumañj tsi yu tsa tsinyij yu tsihin ndo, maa tyin ña tsahá yu tundoho tsi ndi intuhun maa ndo. Tyin ra yañi yo tsa quee nda Macedonia, juvin ra naha tsahá tandihí tsa cumañj tsi yu. Tacan jahá cuenda yu tsi yu tyin ña cuñj yu cuhva yu tundoho tsi ndo. Tan tumaa tsa javahá yu nda vityin tacan ñi maa cua javaha yu. <sup>10</sup> Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyooho tan ndi tsi inga nyivi iyó nanñ Acaya. <sup>11</sup> ¿Nacuenda caahán yu tyehen cuñí maa ndo? ¿A tsa cuenda tsa ña cuñí yu tsi ndo? Ñavin. Tyin nda maa Nyoo tan tsitó ra tyin cuñí xaan yu tsi ndo.

<sup>12</sup> Ña cua jandihí yu javahá yu tsa tuhvá yu javahá. Tyin tacan tan ña coo ndatu cahan ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha. <sup>13</sup> Catyí ra naha tyin ra tsicá tyiñu ra Cristo cuví ra naha, maa tyin ña nditsa ra naha. Tyin jandaví ñaha ra naha tan jahá ra naha tyin ra tsicá tyiñu ra Cristo cuví ra naha. <sup>14</sup> Tan tsa javahá ra ican naha ra ñavin tsa iyo cuñí yo cuví can. Tyin nda maa nu ña vaha tan jahá nu tyin ángel Nyoo tsa xiñu xaan cuví nu. <sup>15</sup> Yacan cuenda ña iyo cuñí yo tun ra nyicún tsi nu tan jahá ra naha tyin javahá ra naha tsa vaha. Coo quivi cua tatsi tuñi Nyoo tsi ra naha tsa cuenda tsa ña vaha tsa javahá ra naha.

### Tundoho tsa nyehé ra Pablo nu tsicá ra caahán ra tuhun Nyoo

<sup>16</sup> Inga tsaha caahán yu tsihin ndo: Ndi intuhun ndo tan ña çaca iñi ndo tyin sana iñi yu tsa caahán yu tyehen. Maa tyin tun tacan tsicá iñi ndo, cuhva ndo cahan yu tsihin ndo tumaa caahán ra sana iñi. Tyin tacan tan cuví nduyaa ndihí tucu yuhu luxu. <sup>17</sup> Caahán yu tumaa caahán ra sana iñi tyin tacan tan cuví nduyaa yu. Ñavin maa Jutu Mañi yo catyí tsihin yu tsa javahá yu tyehen. <sup>18</sup> Cuaha xaan ra naha catyí ra naha tyin cahnu cuví ra naha tan nduyaá ra naha tsihin tsa iyó nu ñuhu ñayivi ihya. Yacan cuenda cua jacahnu ndihí tucu yuhu tsi yu. <sup>19</sup> Nyooho catyí ndo tyin tsitó xaan ndo. Tun nditsa ndo, ¿nacuenda tyin yatyi xaan tyaá soho ndo tsa caahán ra sana iñi can naha ra? <sup>20</sup> Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñí ra naha tsi ndo tsa cuví ndo musu ra naha. Suhú ra naha tsa tsii ndo. Ndacá ñaha ra naha tsi ndo. Ndasi cuñí ra naha nyehé ra naha tsi ndo. Tan nda cuenda cañi ndaha ra naha nuu ndo. <sup>21</sup> ¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña cahán nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahan yu tuhun maa yu tsihin ndo vasu ndi maa cahan ndo tyin sana iñi yu. <sup>22</sup> Catyí ra can naha ra tyin nyivi Hebreo cuví ra naha; tacan tucu yuhu, ra Hebreo cuví yu. Ra ican naha cuví ra naha nyivi Israel; juvin ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu. <sup>23</sup> Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyehen caahán yu tumaa caahán ra sana iñi, maa tyin nditsa tsa ñihí ca jahá tyiñu yu tan ñavin ca ra can naha ra. Tan cuaha ca tsaha cañj nyivi tsi yu tsihin yoho tan ñavin ca ra can naha ra. Cuaha ca tsaha tsinyij yu vehe caa. Tan cuaha tsaha cuñj cúu yu, maa tyin ña tsihi yu. <sup>24</sup> Uhun tsaha cañj ra Israel naha ra tsi yu tsihin yoho. Tan tsa iin tsaha cañj ra naha tsi yu, cañj ra naha oco tsahun cumi tsaha tsata yu. <sup>25</sup> Uñi tsaha cañj ra naha tsi yu tsihin yutun. Iin tsaha cañj ra naha tsi yu tsihin yuu. Tan uñi tsaha nyeé yutun ndoo tsa cuahán yu tsihin. Tan tsa uñi tsaha tsa nyeé yutun ndoo tsitsi ndutya, iin tsaha ndoo yu nu ndutya ñuhu iin quivi tan iin tsa cuaa. <sup>26</sup> Tandihí ñi tsaha tsa cuahán yu tyiñu ra Cristo tan yahá yu tundoho. Cuaha ñi tsaha cuñj tañj yu. Cuaha tsa tahan yu. Quita ñasuhu nuu yu ityi cuahán yu. Nda cuanda ra ñuu yu, ra Israel naha ra, tan jayuhvi ra naha tsi yu. Tan juvin ñi tacan javahá nyivi inga ñuu tsihin yu. Cuaha tsa tahan yu tsitsi ñuu, nu tsiquí, nu ndutya ñuhu. Cuaha tsa tahan yu jahá ra catyí tyin yañi yo cuví tsi ra naha tan ña nditsa ra naha. <sup>27</sup> Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihj yu ndutya coho yu. Cuaha tsaha tsicoo nyitya yu. Cuaha tsaha yahá yu tsa vitsin tan cumañj jahma tsi yu.

<sup>28</sup> Ñavin tuhun ihya ñi tyin cuaha inga ca tuhun. Tsicá tucu iñi yu tuhun tandihí nyívi yihí cuenda Nyoo, nyoooho tan nyívi inga ñuu tucu. <sup>29</sup> Tyin tun iin ndo tan vita cuñi ndo, tacan vita cuñi tucu yuhu. Tatun javahá iin ndo tsa ña vaha jahá nyívi, cahán nuu yu tan xaan cuñi yu. <sup>30</sup> Tatun cuñi tsi nduyaa yu tan coto ndo tyin nditsa tsa cuví yu musu Nyoo, cua nduyaa yu tsihin tuhun yu tsa janahá tyin ña cuví javahá yu náa javaha yu tsihin tunyee iñi maa yu. <sup>31</sup> Nyoo, Jutu ra Jesucristo Jutu Mañi yo, ra taahán tsi jacahnú yo tacan ñi maa, tsitó ra tyin tsa nditsa caahán yu tan ñavin jandaví ñaha yu. <sup>32</sup> Quívi tsinyij yu ñuu Damasco ra cumí tyiñu tsa jahá tyiñu tyiñu ra rey Aretas, tyacu ra andaru yuhu cora ñuu can, tyin jaha cuenda ra naha coto quita yu tan tñin ra naha tsi yu tan cundaca ra naha tsi yu vehe caa. <sup>33</sup> Maa tyin nyívi iyó vehe tsa cacú tsihin cora can januu ñi tsi yu ityi ventana tsihin iin tyica cahnu. Tacan jacacu Nyoo tsi yu ndaha ra cumí tyiñu ñuu can.

### Tsa nyehé ra Pablo nda nu tsinu uñi gloria jahá Nyoo

**12** Nduve náa ñihí yo tsihin tsa cahan yo tuhun maa yo, maa tyin cua nacatyí tuhun yu tsihin ndo tsa janahá Jutu Mañi yo tsi yu tan tsa nyehé yu jahá ra. <sup>2</sup> Nacotó yu iin ra yihí cuenda ra Cristo tsa tsahán andívi. Tsa iyó utsi cumi cuiya tsa quihín Nyoo tsi ra tsahán ra nda nu tsinu uñi andívi. Maa tyin ña tsitó yu tatun tsahán ra tsihin cuñu ñuhu ra o ñavin. Intuhun ñi maa Nyoo cuví ra tsitó. <sup>3</sup> Tsitó yu tyin tsindaca Nyoo tsi ra nda paraiso nu iyó nyívi tsihí tsa tsinu iñi tsi Nyoo. Maa tyin ña tsitó yu tatun tsahán ra tsihin cuñu ñuhu ra o ñavin. Intuhun ñi maa Nyoo cuví ra tsitó. Nu tsahán ra can tsiñi ra tuhun tsa ña cuví nacatyí tuhun yo, tan ndi ña ñihí ndatu nyívi tsa nacatyí tuhun ñi tuhun can. <sup>5</sup> Cuví nduyaa yu tsihin tsa janahá Nyoo tsi yu quívi can. Maa tyin ña nduyaa yu tsihin tsa javahá yu tyin nduyaa yu maa ñi maa tsihin tsa nduve tunyee iñi maa yu iyó tsi yu. <sup>6</sup> Tatun cua cahan yu tuhun maa yu, ñavin tsa soho cua cuví can. Tyin tun cua cahan yu can maa ñi maa tsa nditsa cua cahan yu. Maa tyin ña cuñi yu cahan yu can coto cahnu xaan jaha nyívi tsi yu. Vaha ca nanyehe maa ñi cuhva iyó yu tan cuhva jacuahá yu, tacan tan coto ñi tatun vaha yu o ña vaha yu.

<sup>7</sup> Nyoo ña cuñi ra tsa nduyaa yu tsihin tsa janahá ra tsi yu. Yacan cuenda tsahá ra tsa nyehé xaan yu tundoho jahá nu ña vaha. Tan uhvi xaan yu tumaa uhvi nu tyisó iñu cuñu ñuhu yo. Tyin tacan tan ña cuví nduyaa yu tsihin tsa janahá Nyoo tsi yu. <sup>8</sup> Tan tsicán yu uñi tsaha tsi Jutu Mañi yo na quihin nyaa ra tundoho can síqui yu. <sup>9</sup> Maa tyin catyí Jutu Mañi yo tyehen tsihin yu: “Yuhu cuñi xaan yu tsi un, tan yacan ñi cuví tsa tsiñi ñuhu tsi un. Tyin nyívi tsa nduve tunyee iñi maa ñi iyó tsihin ñi, nyaá tunyee iñi maa yu tsihin ñi”, catyí ra. Yacan cuenda sñi xaan cuñi yu tyin nyaá tunyee iñi ra Cristo tsihin yu tyin nduve tunyee iñi maa yu iyó tsihin yu. <sup>10</sup> Yacan cuenda sñi xaan cuñi yu tsa nduve tunyee iñi maa yu iyó tsi yu. Vasu ndi maa caahán nyívi tsi yu, tan nyaá ndaha ñi tsi yu, vasu ndi maa nduve tsa iyó

tsi yu, vasu ndi maa cuaha tsa cuví tsi yu, maa tyin sñi xaan cuñi yu tsa nyehé yu tundoho tsa cuenda ra Cristo. Tyin tsa nduve tunyee iñi maa yu iyó tsi yu, nyaá tunyee iñi Nyoo tsihin yu.

### Tsicá iñi ra Pablo tuhun nyívi yihí cuenda Nyoo ñuu Corinto

<sup>11</sup> Tsa caahán yu tuhun maa yu nanduví yu tumaa ra sana iñi. Maa tyin maa ndo cuñi tsa cahan yu tacan tyin ña jahá ca ndo tsa ñayívi tsi yu. Maa ndo taahán tsi vaha cahan tuhun yu, vasu ndi maa ña cahnu xaan cuví yu. Tatun yuhu tan ña cahnu cuví yu, vihi ca ra tsa catyí tyin tyiñu ra Cristo tsicá ra naha, tan ña nditsa ra naha. Cuñi maa ra naha tyin vaha xaan ca ra naha tan ñavin ca inga ra tsicá tyiñu Nyoo. <sup>12</sup> Yuhu cunyeé xaan iñi yu nyehé yu tandihí tundoho quívi tsinyij yu jahá tyiñu yu tyiñu Nyoo nu yucú ndo. Cuaha xaan tsa iyo javahá yu jahá Nyoo tyin tacan tan coto ndo tyin nditsa tsa cuví yu ra tavá tyiñu ra. <sup>13</sup> ¿A vaha ca tyaá nuu yu tsi inga nyívi tsa iyó inga ñuu tan ñavin ca nyoooho? Ñavin. Inducu ñi tyaá nuu yu tsi tandihí ndo. Intuhun ñi tsa ña javahá yu tsihin ndo tsa tsinyij yu tsihin ndo cuví tsa ña tsicán yu xuhun cuita catsi yu tsi ndo. Ña taahán tsi ndacan yu tucahnu iñi tsi ndo tyin tsitó ndo tyin vaha javahá yu.

<sup>14</sup> Vityin tsa iyó vaha tandihí tsa tsii yu, tsa quitsi yu nu yucú ndo tsa tsinu uñi tsaha. Ña cua cuhva yu tundoho tsi ndo tyin ña cua quitsi yu quitsi nducu yu tsa iyó tsi ndo tyin maa yu cua jatyinyee tsi ndo. Tyin iin ra iyó sehe, ñavin sehe ra tsahá tsa tsiñi ñuhu tsi ra. Tyin maa ra taahán tsi cuhva tsa tsiñi ñuhu tsi sehe ra. Tan tacan yuhu. <sup>15</sup> Sñi xaan cuñi yu cua janaa yu tsa iyó tsi yu tsa cuenda tsa vaha tsi ndo. Tan nda cuando cuhva yu ñayívi yu tsa cuenda ndo. Tan tsicá tucu iñi yu tyin tun jañihí ca yu cuñi yu tsi ndo, nyoooho ña cuñi vaha ndo tsi yu.

<sup>16</sup> Tandihí ndo tan tsitó ndo tyin ña tsahá yu tundoho tsi ndo. Tan vasu ndi maa tsitó ndo yacan, vatu ñi tyin catyí juhva ndo tyin jandaví ñaha yu tsi ndo tan ña jahá ndo cuenda. <sup>17</sup> ¿O cuñi maa ndo tyin cahan yu cuendu tsihin ra jaquitsi yu nu yucú ndo tan jandaví ñaha ra naha tsi ndo jahá yu? <sup>18</sup> ¿A jandaví ñaha ra Tito tan inga ra naha tsi ndo quívi quitsi ra naha nu yucú ndo jahá yu? Ña jandaví ñaha ra naha tsi ndo tyin nyuhu ña tuhvá ndi jandaví ñaha. ¿A ña tsitó ndo tyin ra Tito tan yuhu inducu ñi javahá ndi, tan iin ñi Tatyí Ii Nyoo iyó tsi nduvi ndi?.

<sup>19</sup> Vasiquí tsicá iñi maa ndo tyin tandihí tsa caahán ndi, tan caahán ndi can tsa cuñi ndi tsa vaha cahan ndo tuhun ndi, maa tyin ñavin tacan tsicá iñi ndi. Tyin tandihí tsa caahán ndi tan tsa vaha tsi maa ndo cuví can tyin tacan tan cunyicun vaha ca ndo tsi Nyoo. Nda nuu Nyoo tan tsihin tunyee iñi ra Cristo caahán ndi tyin nditsa tsa cuñi xaan ndi tsi ndo. <sup>20</sup> Tsicá iñi yu coto ña cua tahan iñi yu cuhva yucú ndo quívi tsaa yu. Tan ndi maa ndo tan ña cua tahan iñi ndo cuhva cua cahan yu tsihin ndo. Yuuhví yu coto coo tsihí, tan nyiyo iñi ndo tsa iyó tsi inga ndo, tan cuxaan tahan ndo tsi ndo,

tan nducu ndo maa ñi maa tsa vaha tsi maa ndo, tan cahan ndo cuendu, tan cahan nyaa tahan ndo tsi ndo, tan nduyaa ndo. Tan yuuhví tucu yu coto tsa yu nu yucú ndo tan ña cuiñi ña ndaa yucú ndo. <sup>21</sup> Tan yuuhví yu quitsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo. Tan tsicá tucu iñi yu tyin coto vacu yu jaha ndo. Tyin yihí ndo ña jandihí ndo tsa javahá ndo tsa ña vaha tsa quitsahá javahá ndo nu quitsi ca tsi tyin rayii ndi tsicá nuu ra tsihin ñaha tan ñaha ndi tsicá nuu ña tsihin rayii tan náa ndihí ca maa tsa ña vaha.

**Nu tsahá cuenda ra Pablo tsi nyivi Corinto, na jaha vaha ñi cuenda tsi ñi tatun vaha cuahán ñi tsihin Nyoo**

**13** Tsinu uñi tsaha cuví tsi tsa cua quitsi yu ihya. Nda tacan tan cuvi cundaa tyiñu ñi tsa javahá tsa ña vaha. Maa tyin cuiñi tsi uvi o uñi taahan ra cua cuvi tsandaa. <sup>2</sup> Tyin quivi quitsi yu nu yucú ndo, catyi yu tsihin nyivi javahá tsa ña vaha, tyin jandihí ñi tsa javaha ñi tsa ña vaha. Tan vityin catyi tucu yu inga tsa-ha tsihin ñi, tan tsihin tandihí ndo, tyin tun cua quitsi yu inga tsaha nu yucú ndo, tan ndi javahá ca ndo tsa ña vaha, ña cua cundaahvi iñi yu nyehe yu tsi ndo. <sup>3</sup> Tacan tan cua coto ndo tsa cuiñi xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví ra iin ra iyó tunyee iñi tsi tan iyó ra añima ndo. Tyin iyó xaan tunyee iñi ra tsi ndo. <sup>4</sup> Nditsa tyin tsihi ra nu cruu tumaa iin ra nduve tunyee iñi iyó tsi. Maa tyin nandoto ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iin ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuvi jatinyee ndi tsi nyooho.

<sup>5</sup> Nducu cuhva ndo tsi ndo tun iin iñi ndo tsinú iñi ndo tsi ra Cristo. ¿A ña tsitó ndo tyin iyó ra Cristo añi-

ma ndo tun nditsa tsa tsinú iñi ndo tsi ra? <sup>6</sup> Maa tyin cuiñi yu tsa coto ndo tyin nyuhu ña vatya ndi. <sup>7</sup> Tan tsicán tahvi xaan ndi tsi Nyoo tsa cuenda ndo, tyin tacan tan ña javaha ndo tsa ña vaha. Ña caahán ndi tyehen tyin cuiñi ndi catyi nyivi tyin vaha ndi. Caahán ndi tyehen tyin cuiñi ndi tsa javaha ndo maa ñi maa tsa vaha. Nduve cuenda ndi tun catyi nyivi tyin vaha ndi o ña vaha ndi. <sup>8</sup> Tyin nyaá tsi siqui ndi tsa javaha ndi tsa vaha. Ña cuví tyihi xeehe ndi tsa nditsa. Intuhun ñi tsa cuví javaha ndi, yacan cuví tsa jacuaha ndi tsa nditsa. <sup>9</sup> Yacan cuenda siñ cuiñi ndi tsa nduve tunyee iñi iyó tsi ndi, tan nyee cuiñi nyooho tsihin tunyee iñi Nyoo. Tan tacan ñi tsicán tahvi ndi tsi Nyoo tsa cuenda ndo na cunycun vaha ca ndo tsi ra nda cuenda ña cumañi ca tsa cumañi tsi ndo. <sup>10</sup> Jaquitsí yu carta ihya tsi ndo tsa ndi cumañi ca quitsi yu nu yucú ndo tyin janduvaha ndo tsi ndo. Tyin tacan tan ña cua cuiñi tsi cuxaan yu tsi ndo quivi tsa yu nu yucú ndo. Tyin nditsa tsa tsaha Nyoo ndatu tsi yu tsa quihí ndaha yu tsi ndo. Maa tyin ña tsaha ra ndatu can tsi yu tsa janducuiya ndihí ca yu iñi ndo. Ñihí yu ndatu can tsa cuenda tsa jatinyee yu tsi ndo.

<sup>11</sup> Yañi, nu ndihí caahán yu ihya, catyi yu tsihin ndo, nducu ndo cuhva ña cumañi tsa cumañi tsi ndo nuu Nyoo. Siñ cuiñi ndo. Jandu iin ndo iñi ndo. Coo mañi tahan ndo. Tan Nyoo, ra cuiñi xaan tsi ndo tan tsahá tsa taxin coo añima yo, na cunyata ra tsihin ndo. <sup>12</sup> Cuhva tahan ndo nacumi tsi ndo tsihin tsa siñ cuiñi ndo nyehé ndo tsi ndo. <sup>13</sup> Tan jaquitsí tandihí nyivi yihí cuenda Nyoo ñuu ihya nacumi tsi ndo.

<sup>14</sup> Naquihin ndo tsa vaha coo añima ndo jaha Jutu Mañi yo Jesucristo. Tan na coto ndo tyin Nyoo cuiñi xaan ra tsi ndo. Tan nacoto tucu ndo tyin iyó Tatyí Ii ra tsihin ndo.

Tan na cuvi tsi tacan ñi.

# Gálatas

## Nu tyaá ra Pablo iin carta tsa cuenda nyivi yihí cuenda Nyoo ñuu cayucú Galacia

**1** Yuhu ra Pablo cuví yu iin ra tsa tava tyiñu ra Jesucristo. Ñavin nyivi jaquitsj tsi yu tyin maa ra Jesucristo tan maa Nyoo Jutu yo jaquitsj tsi yu tan tsahā ra tyiñu ihya tsi yu. Tan juvin ra cuví ra tsa janandotō tsi ra Cristo tsa yahā tsiñi ra. <sup>2</sup> Yuhu tan tsihin tandihi ra yañi yo tsa yucú tsihin yu, tyaá ndi carta ihya tsa cuenda nyooho nyivi yihí cuenda Nyoo tandihi vehe ñuhu iyó ñuu cayucú Galacia. <sup>3</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo tsi yo coo añima ndo. <sup>4</sup> Maa ra Jesucristo nacuhvā cuenda ra tsi ra nu cruu tsacatyí cuatyí yo Tan javahā ra tacan tyin maa Nyoo Jutu yo tsa cahan tsihin ra. Tyin tacan tan jacacú ra tsi yo nu yucú yo tsihin nyivi caquiñi iyó nu ñuhu ñayivi ihya. <sup>5</sup> Yacan cuenda na jacahnu yo tsi maa Nyoo tacan ñi maa. Tan na cuví tsi tacan.

### Nduve ca inga cuhva cuví cacu yo

<sup>6</sup> Iyo xaan cuñí yu tyin nyooho numi xaan nacoō ndo tsi Nyoo. Juvin ra nacana tsi ndo tyin coo vaha ndo tsihin ra tsa cuenda tsa javahā ra Cristo tsa cuenda yo. Tan vityin siin tuhun tsinú iñi ndo. Cuñí maa ndo tyin cua jacacu yacan tsi ndo. <sup>7</sup> Maa tyin nduve ca inga cuhva cuví cacu yo. Vasu ndi maa yihí ra naha jatyañu ra naha tsi ndo. Tan cuñí ra naha jativi ra naha tuhun Nyoo tsa jacacú ra Cristo tsi yo. <sup>8</sup> Tun iyó yóo caahán tuhun ra Cristo tsihin ndo tan ña nacatsí tahan can tsihin tuhun tsa cahan ndi tsihin ndo, na cuhun ñi anyaya. Yoñi jaha, vasu maa ndi cuví, o iin ángel quee andivi cuví. <sup>9</sup> Tsa yahā cahan yu tuhun ihya tsihin ndo, maa tyin cuñí yu cahan nyico yu itsi tsihin ndo inga tsaha. Tatun yóo nyivi caahán tuhun Nyoo tsihin ndo tan siin cuhva caahán ñi, na jacahun Nyoo tsi ñi anyaya.

<sup>10</sup> Ña caahán yu tacan tsihin ndo tsa cuenda tsa cuñí yu tsa vaha cahan nyivi tuhun yu. Tyin yuhu nducú yu tsa coo vaha yu nuu Nyoo. Tyin tun cuñí yu cuví yu nyivi vaha nuu nyivi, ñavin ra jahá tyiñu tyiñu ra Cristo cuví yu.

### Nacaa quitsahā tsicá ra Pablo tyiñu Nyoo

<sup>11</sup> Cuñí yu tsa coto ndo yañi, tyin tuhun ra Cristo tsa caahán yu tsihin ndo, ñavin tuhun nyivi cuví tsi.

<sup>12</sup> Ñavin nyivi tsahā tuhun ihya tsi yu. Tyin juvin ñi maa ra Cristo jacotó itsi tsi yu.

<sup>13</sup> Nyooho tsiñi ndo nácaa javahā yu quivi can. Tan tsitó ndo tyin tsinyaa ndaha xaan yu tsi nyivi yihí cuenda Nyoo quivi tsa tsinyij yu cuenda ñi Israel ñuu yu. Tan nducy yu cuhva jandu uvi yu iñi ñi tsinú iñi tsi ra Cristo. <sup>14</sup> Tan tsicoō yu cuhva iyó ñi Israel, tan yuhu cuví ra cuahán ityi nuu ca tan ñavin ca juhva ra yihí tahan tsihin yu tsa iin ñi cuiya ndi. Tyin yuhu cuñi xaan ca yu javaha yu cuhva javahā tsii tsaahnu ndi. <sup>15</sup> Maa tyin tsa ndi cumañi ca cacu yu tan Nyoo tsa nacatsj maa ra tsi yu tyin cuñí xaan ra tsi yu. Tan nda tsa tsaā maa quivi tsa tyaā ra cuhva, tan nacana ra tsi yu. <sup>16</sup> Tacan tan janahā ra tsi Sehe ra tsi yu tan nacotō yu tsi ra, tyin tacan tan cuvi cahan yu tuhun ra nácaa jacacú ra tsi yo tsihin nyivi tsa ñavin nyivi Israel cuví. Tan quivi can ña nducy yu nyivi jacuaha tsi yu nácaa taahán tsi javaha yu. <sup>17</sup> Tan ndi ña tsahā yu ñuu Jerusalén nu yucú ra tsa tava tyiñu jihna ra Cristo tsa ñaha ca tava tyiñu ra tsi yu. Maa tyin numi ñi tsahā yu nda Arabia. Tacan tan cuanuhy nyico yu inga tsaha nda ñuu Damasco.

<sup>18</sup> Tsa yahā uñi cuiya tan tsahā yu nda Jerusalén, tan nacotō yu tsi ra Pedro. Tan ndoō yu tsihin ra tsahun quivi. <sup>19</sup> Maa tyin ña nyehe yu tsi inga ra tsa tava tyiñu ra Cristo. Intuhun ñi ra Jacobo yañi Jutu Mañi yo, nyehe yu. <sup>20</sup> Tan nda nuu Nyoo tan caahán yu tsihin ndo tyin tuhun tsa tyaá yu nu tutu ihya, tsa nditsa cuví tsi.

<sup>21</sup> Tsa yahā tsa tsahā yu ñuu Jerusalén tan tsahā yu nda Siria tan nda Cilicia. <sup>22</sup> Tan ra yañi yo tsa yucú vehe ñuhu ra Cristo tsa iyó ñuu tsa cayucú Judea, ña nacotó ra naha tsi yu. <sup>23</sup> Maa tyin ñihí tuhun ra naha tsa caahán nyivi tuhun yu, tyin catyí ñi: “Ra tsa tsinyaa ndaha tsi yo quivi can, vityin caahán ndihi ra tsihin nyivi na tsinu iñi ñi tsi ra Cristo. Tan quivi can cuñi ra jativi ra tuhun ra Cristo”, catyí ñi, ñihí tuhun ra naha. <sup>24</sup> Tan jacahnū ra naha tsi Nyoo tsa cuenda tsa javahā Nyoo tsihin yu.

### Ra cuví ityi nuu tsihin nyivi vehe ñuhu ñuu Jerusalén, ndoó ra naha vaha cuhva jahá tyiñu ra Pablo

**2** Tsa yahā utsi cumi cuiya, tan tsahā yu ñuu Jerusalén inga tsaha tsihin ra Bernabé. Tan tsahā ndihi tucu ra Tito tsihin ndi. <sup>2</sup> Tsahā yu ndacan tyin maa Nyoo janahā tsi yu tyin taahán tsi tsa cuhun yu. Tan ndacan quitā siin yu tsihin ra cuví ityi nuu tsihin nyivi vehe ñuhu naha ra. Tan tsahā cuenda yu tsi ra naha nácaa tuhvā yu caahán tuhun ra Cristo tsihin nyivi tsa ñavin ñi Israel cuví. Tyin tacan tan coto yu tun ndoo ra naha vaha tsihin cuhva jacuahá yu. Tyin tun ña ndoo ra naha vaha, cuatu xaan jahá tyiñu yu. <sup>3</sup> Maa

tyin ndoo ra naha vaha. Tan ña jañiñi ra naha tsa cun-  
yaa tuñi Nyoo tsi ra Tito, tan ñavin ra Israel cuví ra.

<sup>4</sup> Nditsa tyin juhva ra naha cuñi ra naha tsa cunyaa  
tuñi can tsi ra Tito. Tan ra ican naha ra quihvi xeehe ra  
naha nu yucú ndi, tan jahá ra naha tyin yihí ra naha  
cuenda ra Cristo, maa tyin ña nditsa tyin ra tsacú ndu-  
cu kuhva iyó nuña yo jahá ra Cristo cuví ra naha. Tan  
cuñi ra naha tyin taahán tsi tsa cundaca ñaha ley tsah-  
nu tsi yo. <sup>5</sup> Maa tyin ndi luxu tan ña tsahá ndi tsa cun-  
daca ñaha ra can naha ra tsi ndi. Tyin ña cuñi ndi tsa  
jaña ndo tuhun nditsa tsa jacacú ra Cristo tsi yo.

<sup>6</sup> Maa tyin ra cuví ityi nuu tsihin nyivi vehe ñuhu,  
nduve tuhun tsa tsahá ra naha tsi yu. Tan vasu cahnu  
tyiñu nyisó ra can naha ra, maa tyin tsa cuenda yuhu,  
yoñi jaha. Tyin ña cahnu cuví yo nuu Nyoo vasu ndi  
maa tsa cahnu tyiñu nyisó yo. <sup>7</sup> Ra cuví ityi nuu vehe  
ñuhu naha ra, nduve inga tuhun tsahá cuenda ra naha  
tsi yu tyin nacotó ra naha tyin maa Nyoo jaquitsi tsi yu  
tyin cahan yu tuhun ra Cristo tsihin nyivi tsa ñavin  
nyivi Israel cuví. Tumaa tsa jaquitsi ra tsi ra Pedro tyin  
cahan ra tsihin nyivi Israel. <sup>8</sup> Tyin juvin ñi maa Nyoo  
tava tyiñu tsi ra Pedro tyin cahan ra tuhun ra Cristo tsi-  
hin nyivi Israel. Tan tava tyiñu tucu ra tsi yuhu tyin ca-  
han yu tuhun ra tsihin nyivi tsa ñavin nyivi Israel cuví.

<sup>9</sup> Yacan cuenda ra cuví ityi nuu naha ra, ra Jacobo, ra  
Pedro tan ra Juan, nacotó ra naha tyin Nyoo tsahá ra  
tunyeé iñi tsi yu tsa cahan yu tuhun ra Cristo tsihin  
nyivi. Tan tsahá ra naha ndaha ra naha tñin ndi, tsihin  
ra Bernabé tyin ndoo ra naha vaha tsa cahan ndi  
tuhun ra Cristo tsihin nyivi tsa ñavin nyivi Israel cuví,  
tan maa ra naha cahan tucu ra naha tsihin nyivi Israel.  
<sup>10</sup> Tan cahan ra naha iin tuhun tsihin ndi, na nducuhun  
iñi ndi tsi nyivi ndaahvi tan na jatyinyee ndi tsi ñi. Tan  
yacan cuví tsa nducú xaan yu kuhva javahá yu tandihí  
ñi quivi.

#### Nu nduxaḡn ra Pablo tsi ra Pedro tyin ña vaha tsa javahá ra

<sup>11</sup> Maa tyin quivi tsahḡn ra Pedro ñuu Antioquía, nuu  
nuu ra tan cuxaḡn yu tsi ra tyin ña vaha tsa javahá ra.  
<sup>12</sup> Tyin tsa jihna ñi vaha javahá ra tyin tsatsi ra tsihin ñi  
tsa ñavin nyivi Israel cuví. Maa tyin tsa tsaḡ juhva ra Is-  
rael naha ra tsa jaquitsi ra Jacobo, tacan tan quitsahá  
jatsiyó ra tsi ra tan ña cuñi ca ra catsi ra tsihin ñi ican.  
Javahá ra tacan tyin yuuhvi ra coto cuxaan ra tsa tsaḡ  
can naha ra tsi ra tyin ndi nyitá iñi ra can naha ra tuñi  
Nyoo. <sup>13</sup> Tacan tan inga ra Israel tsa yihí cuenda ra  
Cristo, ndu iin ra naha tsihin ra Pedro. Tan javahá ndihí  
ra naha tsa ña vaha can. Tyin javahá ra naha tumaa  
javahá ra Pedro vasu tsitó ra naha tyin ña vaha can.  
Tan nda cuanda ra Bernabé tan ndu iin ra tsihin ra na-  
ha. <sup>14</sup> Tan nyehe yu tyin ña vaha javahá ra naha. Ñavin  
tumaa kuhva catyí tuhun ra Cristo. Yacan cuenda ca-  
ḡn yu tsihin ra Pedro nuu tandihí ra yucú ican: “Yooho  
cuví un iin ra Israel. Tan iyó un tumaa iyó nyivi tsa  
ñavin nyivi Israel cuví. ¿Nacaa tsa cuñi un jañiñi un tsi  
nyivi tsa ñavin nyivi Israel cuví na coo ñi kuhva iyó ñi

Israel? [Tan ndi maa un tan ña javahá un tacan]”, catyi  
yu tsihin ra.

<sup>15</sup> Maa yo nda ndi cacú yo tan cuví yo ra ñuu Israel ña  
javahá xaan yo cuatyí tumaa javahá ñi tsa ñavin nyivi  
Israel cuví. <sup>16</sup> Maa tyin tsitó yo tyin ña cuví janduvaha  
yo tsi yo nuu Nyoo tsihin tsa nducú yo kuhva tyaa  
yahvi yo ley tsahnu tsa tyaa ra Moisés. Tan nduvahá yo  
nuu Nyoo tsa cuenda tsa tsinú ñi iñi yo tsi ra Jesu-  
cristo. Yacan cuenda tsinú iñi yo tsi ra, tyin tacan tan  
coo vaha yo tsihin ra, tan ñavin tsa cuenda tsa nducú  
yo kuhva tyaa yahvi yo tsa catyí ley can. Tyin ndi in-  
tuhun yo tan ña nduvahá yo nuu Nyoo tsihin tsa  
nducú yo kuhva javaha yo kuhva catyí ley tsahnu can.

<sup>17</sup> Maa tyin vityin taton nducú yo kuhva nduvaha yo  
nuu Nyoo tsa cuenda ra Cristo, cuñi tsi catyi tyin naco-  
to yo tyin iyó tucu cuatyí yo tumaa iyó cuatyí ñi tsa  
ñavin nyivi Israel cuví. Tatan tacan, ¿a cuñi tsi catyi tyin  
iyó cuatyí yo jahá maa ra Cristo tyin nacoto yo tyin iyó  
cuatyí yo? Ñavin tacan. <sup>18</sup> Maa tyin tun cua cuita nyico  
iñi yo ley tsa tsa yahá nacoḡ yo, yacan nditsa cua coo  
cuatyí yo. <sup>19</sup> Tyin ley can janahá tsi tsi yu tyin taahán tsi  
cúu yu tsa catyi cuatyí yu, tan yacan cuenda ña nducu  
ca yu kuhva cacú yu tsihin ley can, tyin tacan tan cuví  
coo yu tsa cuenda Nyoo. <sup>20</sup> Yuhu, tumaa tsa iin caa ñi  
tsihí yu nuu cruu tsihin ra Cristo. Tan ñavin ca maa yu  
iyó, tyin ra Cristo iyó añima yu vityin. Tan kuhva iyó yu  
vityin, iyó yu tsihin tsa tsinú iñi yu tsi ra tsa cuví ra Se-  
he Nyoo. Tyin maa ra cuñi ra tsi yu, tan tsihi ra tsacatyí  
cuatyí yu. <sup>21</sup> Ña cuñi yuhu tyaa tsiyo yu tunyeé iñi tsa  
tsahá Nyoo tsi yo. Tyin tun tsatyin cuví cacú yo jaha ley  
tsahnu, nduve nacatyí tsihi ra Cristo.

#### Naquihín yo Tatyí Ii Nyoo tsa cuenda tsa tsinú iñi yo tsi ra Cristo

**3** ¡Náa tsa soho iyó nyooho, nyivi Galacia! ¿Yóo tsa  
jativí tsi ndo tan ña tyaa yahvi ca ndo tsa nditsa?  
Catsi xaan tsahá cuenda ndi tuhun ra Jesucristo tsi  
ndo. Tan cutuñi vaha iñi ndo nacuenta tsihi ra nu  
cruu. <sup>2</sup> Intuhun ñi tsa cuñi yu nducu tuhun yu tsi ndo.  
¿A naquihín ndo Tatyí Ii Nyoo tsa cuenda tsa javahá  
ndo tsa catyí ley ra Moisés, a tsa cuenda tsa tsiñi ndo  
tuhun ra Cristo tan tsinú iñi ndo tsi ra? <sup>3</sup> ¿Nacaa tsa so-  
ho xaan iyó ndo vityin? Tan quivi jihna ñi vaha xaan  
tyaa yahvi ndo tsi Nyoo tsihin tunyeé iñi Tatyí Ii ra. Tan  
vityin, ¿nácaa cuñi ndo coo ndo tsihin tunyeé iñi maa  
ndo? <sup>4</sup> ¿A tsa cuatu ñi nyehe ndo nácaa jatyinyee Tatyí  
Ii Nyoo tsi ndo nu nyehe ndo tundoho? Ñavin tsa cu-  
atu ñi cuví yacan, cuñi yuhu. <sup>5</sup> ¿Nacaa tsahá Nyoo Tatyí  
Ii ra tsi ndo, tan javahá ra tsa iyo nyehé ndo? Ñavin tsa  
cuenda tsa nducú ndo kuhva javaha ndo tsa catyí ley  
tan javahá ra yacan tsihin ndo; javahá ra yacan tyin  
tsiñi ndo tuhun ra Cristo tan tsinú iñi ndo tsa caahán  
ra.

<sup>6</sup> Ra Abraham, tsinu iñi ra tsa cahan Nyoo tsihin ra,  
yacan cuenda Nyoo naquihín tsi ra tumaa tsatyin vaha  
ra. <sup>7</sup> Yacan cuenda taahán tsi coto ndo tyin nyivi tsa  
nditsa cuví tata ra Abraham, juvin ñi cuví ñi tsa tsinú  
iñi tsi Nyoo. <sup>8</sup> Tan tsanaha ndoo tuhun Nyoo nu tutu.

Tan catyí tsi tyin nu cuahán ca tsi quivi, cua janduvaha Nyoo tsi nyivi tsa ñavin nyivi Israel cuví tsa cuenda tsa tsinú iñi ñi tsi ra. Yacan cuenda catyí Nyoo tsihin ra Abraham tsanaha: “Tandihí maa nyivi cua nasoco yu tsi ñi tsa cuenda un”, catyí Nyoo tsihin ra. <sup>9</sup> Yacan cuenda ñi tsa tsinú iñi tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsinú iñi tucu maa ra.

<sup>10</sup> Nyivi tsa nyitá iñi ley tsa tyaá ra Moisés, cua tatsi tuñi Nyoo tsi ñi. Tyin tuhun Nyoo catyí tsi. “Tandihí nyivi tsa ña tyaá yahvi tandihí ley tsa nyaá nu libru ley Nyoo, cua tatsi tuñi Nyoo tsi ñi.” <sup>11</sup> Tan nditsa tyin yoñi nduvahá jaha Nyoo tsa cuenda tsa nyitá iñi ñi ley can. Tyin tuhun Nyoo catyí tsi: “Ra tsa nduvahá nuu Nyoo tsa cuenda tsa tsinú iñi ra, juvin ra cua coo ñayivi tsa ña cua naa maa”, catyí tuhun Nyoo. <sup>12</sup> Tan ley ra Moisés ña catyí tsi tun taahán tsi tsinu iñi yo. Tyin catyí ley can: “Nyivi javahá tsa catyí ley ihya, coo ñi ñayivi nyito tsa cuenda can”, catyí tsi.

<sup>13</sup> Ley can catyí tyin taahán tsi cúu yo tsa cuenda cuatyí yo, tan ña ndacá ñaha ca tsi tsi yo tyin ra Cristo tsa tava nuña ra tsi yo. Tan maa ra naquihín tandihí cuatyí yo. Tyin catyí tuhun Nyoo: “Tandihí maa ra tsa ticaá nu yutun, tatsí tuñi Nyoo tsi ra.” <sup>14</sup> Tacan cuví tyin tsa cuenda ra Cristo Jesús tan nasocó Nyoo tsi nyivi tsa ñavin nyivi Israel cuví, tumaa catyí ra tsihin ra Abraham tyin cua nasoco ra tsi ra. Tan tsa cuenda tsa tsinú iñi yo tsi Nyoo, naquihín yo Tatyí Ii tsa catyí Nyoo tyin cuhva ra tsi yo.

#### Ley tsahnu janahá tsi tsi yo tyin iyó cuatyí yo, maa tyin ña jacacú tsi tsi yo

<sup>15</sup> Yañi, cua cahan yu iin cuhva tsihin ndo, cuhva iyó yo nu ñuhu ñayivi ihya. Tatun iin ra tan catyí ra tyin cua cuhva ra tsa cuhva ra tsi inga ra, tan tatun tsa yahá tyihí ra firma ra, yoñi ca cuví quihin nyaa can. Tan yoñi ca cuví natyiso juhva ca siqui can. <sup>16</sup> Tan Nyoo catyí ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyí tsi nu tutu Nyoo tun cuhva ra tsi tandihí ra cuví tata ra, tyin intuhun ñi ra cua cuhva ra. Tan juvin ra can cuví ra Cristo. <sup>17</sup> Tsa caahán yu, cuví tsehe: Nyoo natuhun tahan ra tsihin ra Abraham. Tan ndoḡ vaha ra tuhun tsihin ra. Tacan tan yahá cumi cientu oco utsi cuiya tan tsaá ley tsa tyaá ra Moisés. Maa tyin ña cuví caní ley can tuhun tsa ndoḡ Nyoo tsihin ra Abraham. Tan ña cuví casí tsi nu naquihín yo tsa catyí Nyoo tyin cuhva ra tsi yo. <sup>18</sup> Tun tsatyin tsa cuenda ley ra Moisés tan naquihín yo tsa taahán tsi tsi yo, cuatu xaan ndoḡ Nyoo tuhun tsihin yo. Maa tyin tsitó yo tyin ñihí ra Abraham tsa ñihí ra tyin tsahá Nyoo tsa catyí ra tyin cuhva ra tsi ra.

<sup>19</sup> Tatun tacan, ¿nacuenda vaha ley ra Moisés? Tsa jihna ñi Nyoo catyí ra tyin cuhva ra tsa vaha tsi ra Abraham. Yahá can tan tsahá ra ley can tsi ra Moisés tan janahá tsi tyin iyó cuatyí yo. Tan ángel Nyoo tsahá cuenda ley can tsi ra Moisés. Tan ra Moisés tsahá cuenda can tsi nyivi. Tan ndoḡ tsi nda cuanda quivi tsa quitsí ra Cristo, ra cuví tata ra Abraham. Juvin ra cuví ra tsa catyí Nyoo tyin cua cuhva tsa vaha tsi yo. <sup>20</sup> Tan ju-

vin ñi maa Nyoo cahan tsihin ra Abraham quivi can. Tan ña tsiñi ñuhu tsa nducu siin ra iin ra nacatyí tuhun tsihin ra Abraham.

<sup>21</sup> ¿A cuñi tsi catyí tyin ley tsa tyaá ra Moisés ña nacat-sí tahan tsi tsihin tsa catyí Nyoo tyin cuhva ra tsi yo? Ñavin. Tun tsatyin cuví coo yo ñayivi nyito jaha ley can, cuví nduvaha yo nuu Nyoo tsa cuenda tsi. Maa tyin ña cuví. <sup>22</sup> Tyin catyí nu tutu Nyoo tyin iyó cuatyí tandihí nyivi. Tyin tacan tan nyivi tsa tsinú iñi tsi ra Jesucristo cuví ñihí ñi ñayivi nyito tsa catyí Nyoo tyin cuhva ra tsi yo.

<sup>23</sup> Tsa ndi cumañi ca tsinú iñi yo tsi ra Cristo, ley can yihí ndaha tsi yo tumaa tsa tsinyij yo vehe caa. Tacan cuví nda cuanda janahá Nyoo tsi yo nácaa tan tsinu iñi yo tsi ra. <sup>24</sup> Tan ley can cuví tsi tumaa iin nyivi jahá cuenda tsa nyihi. Tyin jahá cuenda tsi tsi yo nda cuanda quivi quitsí ra Cristo. Tan cuví tsinu iñi yo tsi ra tan nduvahá yo nuu Nyoo. <sup>25</sup> Tan vityin tsa tsaá quivi tsa tsinú iñi yo tsi ra Cristo, yacan cuenda ña jahá cuenda ca ley can tsi yo.

<sup>26</sup> Tyin tandihí yo cuví yo sehe Nyoo tyin tsinú iñi yo tsi ra Cristo Jesús. <sup>27</sup> Tan tandihí yo tsicoondutyá yo tan ndu iin yo tsihin ra Cristo, tan nanduví yo tumaa maa ra. <sup>28</sup> Ña ñihí xaan ca tsa cuví yo nyivi Israel, a cuví yo nyivi Grecia; a cuví yo musu, a ñavin musu cuví yo; a cuví yo rayñi, a ñaha. Yoñi ca caahán tuhun yacan, tyin tsa iin ñi cuví yo tsihin ra Cristo, intuhun ña nyivi cuví yo tsihin ra. <sup>29</sup> Tan tatun cuenda ra Cristo yihí ndo, nditsa tsa tata ra Abraham cuví ndo. Tan ñihí ndo tsa catyí Nyoo tsihin ra Abraham tyin cuhva ra tsi ra.

**4** Cua cahan yu iin cuhva tsihin ndo. Tatun iin ra luhlu tan tsihi jutu ra, tan nacoḡ jutu ra tandihí tsa cuca ra tsi ra, ra luhlu can cua cutyíñu ra can nda cuahnu ra. Tan tsitsi tsa ndi cumañi ca cuahnu ra, cuví ra tumaa iin musu ñi. Vasu tsii maa ra cuví tandihí tsa cuca jutu ra. <sup>2</sup> Iyó ra jahá cuenda tsi ra nda cuanda tsaá cuiya ra tsa catyí jutu ra tyin cua naquihin ra ndaha tyihí tsa nacoḡ ra tsi ra. <sup>3</sup> Tan tacan cuví maa yo. Tsa ndi cumañi ca quitsí ra Cristo, cuví yo musu cuhva iyó nyivi iyó nu ñuhu ñayivi ihya. <sup>4</sup> Maa tyin quivi tahan tsi, Nyoo jaquitsí ra tsi Sehe ra. Tan jacacú iin ñaha tsi ra. Tan tsindacá ñaha ley tsahnu Nyoo tsi ra. <sup>5</sup> Jaquitsí Nyoo tsi ra tyin jacacú ra tsi yo tsa ña quihí ndaha ca ley tsi yo. Tyin tacan tan naquihín cuenda Nyoo tsi yo tumaa sehe ra.

<sup>6</sup> Tan tsa cuenda tsa nanduví yo sehe ra, Nyoo jaquitsí ra Tatyí Ii ra Cristo cunyaa añima yo. Tan tsa cuenda Tatyí Ii ra caná tsaá yo tsi Nyoo tan catyí yo: “Tyatyá”.

<sup>7</sup> Yacan cuenda sehe Nyoo cuví yo tan ña cuví ca yo tumaa iin musu. Tan tsa cuenda tsa cuví yo sehe Nyoo, tsahá ra tsa cuca ra tsi yo tsa cuenda ra Cristo.

#### Tsicá iñi ra Pablo tsa cuenda nyivi yihí cuenda Nyoo

<sup>8</sup> Tan quivi tsa ñaha ca nacoto ndo tsi Nyoo, cuví ndo musu tsitoho tsa ñavin Nyoo cuví. <sup>9</sup> Maa tyin vityin tsa nacotó ndo tsi Nyoo. Vaha ca catyí yu, maa Nyoo nacotó ra tsi ndo. ¿Nacaa tsa cuñi ndo quihin nyico ndo tuhun ndaahvi tsa nduve tuneey iñi iyó tsi, tan cuví ny-

ico ndo musu? <sup>10</sup> Nyooho ndi jacahnú ca ndo quivi vico, quivi nduyutyá yoo, tan vico tandihí ñi cuiya. <sup>11</sup> Yuhví xaan yu coto iin tsa cuatu ñi cuví tyiñu jahá yu tsihin ndo.

<sup>12</sup> Yañi, caahán ndaahvi yu tsihin ndo cõo ndo tumaa iyó maa yu. Tyin yuhu ña yihí ndaha ca ley tsahnu tsi yu. Tumaa tsa ña yihí ndaha ley tsahnu tsi maa ndo. Tan tsa tacan iyó yu, ña cuñí yu tsa caca iñi ndo tyin jatíví ndo tsi yu. <sup>13</sup> Tan tsa tsitó ndo tyin quivi quitsí jihna yu ñuu ndo iyó iin cuehe tsi yu, yacan cuenda ndoõ yu juhva quivi tsihin ndo, tan cahán yu tuhun ra Cristo tsihin ndo. <sup>14</sup> Tan vasu ndi maa tsa cuuhví yu tsihin cuehe can vaha naquihín cuenda ndo tsi yu tan ña tyaá tsiyo ndo tsi yu. Naquihín cuenda ndo tsi yu tumaa tun cuví yu iin ángel tan tumaa tun ra Cristo cuví yu. <sup>15</sup> Tan vityin ¿numaa cuahán tsa sñi xaan cuñí ndo tsihin yu quivi can? Tyin yuhu cuví yu tsandaa tyin quivi can, nda cuanda cuñí ndo tava ndo tinuu ndo tan cuhva ndo tsi yu, tun tsatyin cuví nduvaha yu tsihin yacan. <sup>16</sup> Tan vityin, ¿a nanduví yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

<sup>17</sup> Nyivi can, cuñí xaan ñi tsi ndo catyí ñi. Maa tyin ña nditsa ñi. Caahán ñi tacan tyin cuñí ñi tsa cunyicun ndo tsi ñi tan ña tsinu ca iñi ndo tuhun caahán yu. <sup>18</sup> Vaha tsa cuñí yo tsi nyivi, maa tyin cuñí yo tsi ñi tsihin tsa vaha, tan ña cuñí yo tsi ñi tañi ñi cuhva tsa tyin nyíi ñi yu tsihin ndo. <sup>19</sup> Nyooho ra cuatyí sehe yu, nyehé nyico yu tundoho tan tsa uhvi tsa catyí ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi nyaá ca cua nyehe yu tundoho nda cuanda cuahnu ndo tsihin tunyee iñi maa ra Cristo. <sup>20</sup> Vaha xaan tun tsatyin cuví cunyí yu tsihin ndo vityin ihya. Tyin tacan tan cuví nasama yu cuhva cahan yu tsihin ndo. Tyin vityin ña tsitó yu náa caca iñi yu tsa cuenda ndo.

#### Na coo yo tsa cuenda Nyoo tan ñavin tsa cuenda ley tsahnu

<sup>21</sup> ¿A ñaha ca cahvi ndo tsa caahán ley tsa tsahá Nyoo tsi ra Moisés? tyin cuñí ndo cundaca ñaha can tsi ndo, catyí tuhun ndo tsihin yu tun ñaha ca cahvi ndo can. <sup>22</sup> Catyí tsi tyin ra Abraham tsicoõ uvi taahan sehe ra. Tsicoõ iin sehe ra tsihin ña Agar tsa cuví musu ñasihi ra. Tan tsicoõ inga sehe ra tsihin ña Sara ñasihi vaha maa ra. <sup>23</sup> Cacu sehe ñaha tsa cuví musu can tumaa cacú tandihí ca maa lee. Maa tyin sehe ñasihi ra Abraham cacú ra tumaa catyí maa Nyoo tsihin ra tyin cua cuví. <sup>24</sup> Tan tuhun can iyó tsa cuñí tsi catyí tsi tsihin yo. Nduvi taahan ñi ñaha can cuví ñi tumaa nduvi taahan tuhun tsa ndoõ Nyoo tuhun tsihin yo. Intuhun tuhun can cuví cuenda yucu Sinaí. Tan nyivi yihí cuenda ley can cuví ñi tumaa ña Agar, tyin iin musu ñi cuví ña tsihin sehe ña. <sup>25</sup> Tumaa ña Agar, tan tumaa yucu Sinaí tsa canyí Arabia, tacan cuví ñuu Jerusalén nda quivi vityin. Tyin nyivi ñuu can yihí ndaha ley tsahnu tsi ñi. Tan cuví ñi tumaa musu ley can. <sup>26</sup> Maa tyin nda gloria iyó inga Jerusalén, tsa cuví ñuu yoo. Tan ñuu can iyó nuña

tsi. Yacan cuenda yoo iyó nuña yo tyin ñuu can cuví tumaa sihi yo. <sup>27</sup> Tan catyí tuhun Nyoo tyehen:

Cusiñi iñi yooho, ñaha tsa ña cuví coo sehe. Yooho tsa nduve sehe iyó.

Çana tsa tsihin tsa sñi cuñí un, tyin ña tsitõ un tsa uhvi cacú sehe un.

Cusiñi iñi tyin cua cuhva cuaha ca yu sehe un tan ñavin ca ñaha iyó yñi, catyí tuhun Nyoo.

<sup>28</sup> Yañi, yoo cuví yo tumaa ra Isaac, sehe ra Abraham tyin cacú ra cuhva catyí maa Nyoo tsihin jutu ra. <sup>29</sup> Ra sehe ñaha tsa cuví musu can, xaan iñi ra tsi ra Isaac sehe ñasihi ra Abraham. Tacan cuví tucu vityin ihya. Ra tsa cuñí tyin javaha yo tsa catyí ley, xaan iñi ra naha tsi yo tsa cuví yo nyivi cacú tsa tsihin Tatyí Ii Nyoo.

<sup>30</sup> Tan ¿náa catyí tuhun Nyoo? Catyí tsi: “Tava tsiyo tsi ñaha tsa cuví musu can tsihin sehe ña, tyin ña cuví naquihín sehe ña tsa taahán tsi tsi sehe ñaha tsa ñavin musu cuví”, catyí tuhun Nyoo. <sup>31</sup> Yacan cuenda, yañi, ña cuví yo tumaa cuví sehe ñaha tsa cuví musu can. Tyin cuví yo tumaa cuví sehe ñasihi ra Abraham, tyin ñavin musu cuví yo. [Tan Nyoo naquihín cuenda ra tsi yo tyin tsinú iñi yo tsi ra tan ñavin tsa cuenda tsa tyaá yahvi yo ley tsahnu.]

#### Na tyaá yahvi yo tuhun ra Cristo tan ña cuhva yo cundaca ñaha ley tsahnu tsi yo

**5** Ra Cristo tsa yahá jacacu ra tsi yo ndaha ley tsahnu can. Yacan cuenda jahá ndo cuenda tsi ndo, coto nanduvi ndo musu inga tsaha.

<sup>2</sup> Tyaá soho ndo, yuhu ra Pablo caahán tsihin ndo. Tatun cuhva ndo tsa cunyaa tuñi Nyoo tsi ndo tan cuñi ndo tyin cua jacacu yacan tsi ndo, ña cua cuví jatinyee ra Cristo tsi ndo. <sup>3</sup> Cuñí yu cahan yu tsihin ndo inga tsaha tuhun ihya: Tandihí ra tsa cuñí cacu tsihin tsa cunyaa tuñi Nyoo tsi ra naha, cuñí tsi javaha ra naha tandihí maa tsa catyí ley ra Moisés. <sup>4</sup> Tandihí nyooho tsa nducú nduvaha nuu Nyoo tsihin tsa javaha ndo cuhva catyí ley can, tsa quitá tsiyo ndo nuu ra Cristo. Tan jañá ndaha ndo tsa vaha tsa tsahá Nyoo tsi ndo. <sup>5</sup> Maa tyin yoo tsihin tsa jatinyee Tatyí Ii Nyoo tsi yo tan tsinú iñi yo tsi ra Cristo, tan nyitá iñi yo nduvahá yo nuu Nyoo. <sup>6</sup> Tyin tatun iin ñi cuví yo tsihin ra Cristo Jesús, yoñi jaha tun nyaá tuñi Nyoo tsi yo, o nduve. Tyin cahnu ca cuví tsa tsinú iñi yo tsi ra Cristo. Tan tsihin tsa tsinú iñi yo cuví coo yo, tan cuñí tahan ca yo tsi yo.

<sup>7</sup> Nyooho vaha xaan cuahán ndo quivi can. ¿Tan vityin yóo jandu uvi iñi ndo? Tan ña tyaá yahvi ca ndo tsa nditsa. <sup>8</sup> Tuhun tsa janahá ñi can, ñavin tuhun Nyoo, ra tsa caná tsi yo, cuví can. <sup>9</sup> Tyin tumaa ndaá yutsan paan jahá luxu ñi yutsan iya, tacan cuví iin nyivi caquiñi, cuaha ca nyivi cuví jatíví ñi. <sup>10</sup> Nyoo cua tatsi tuñi ra tsi nyivi jandu uvi iñi ndo. Nduve cuenda ra yóo ñi cuví ñi. Maa tyin yuhu tsitó vaha yu tyin Jutu Mañi yo cua jatinyee ra tsi ndo tan ña cua tyaá iñi ndo inga cuhva tsa ña janahá yu tsi ndo.

<sup>11</sup> Tan tsa cuenda yuhu, yañi, tun tsatyin catyí yu tyin ra tsinú iñi tsi ra Cristo cuñí tsi tsa cunyaa tuñi Nyoo tsi

ra, ra Israel can naha ra ña cua cunyaa ndaha ra naha tsi yu. Tan ña ndasi cua cuñi ra naha tsa caahán yu tuhun ra Cristo, ra tsa tsihi nu cruu tsacatyí cuatyí yo. <sup>12</sup> Maa tyin ra tsa cuñi jandu uvi iñi tsi ndo, vaha taxin ca na quita tsiyo ra naha nu yucu ndo, tyin tacan tan ña cua cuvi ca jandu uvi iñi ra naha tsi ndo.

<sup>13</sup> Nyooho, yañi, cana Nyoo tsi ndo tsa ña cundaca ñaha ca ley tsi ndo. Tan ñavin tsa cuenda tsa iyó nuña ndo tan cuví javaha ndo náa ndihi tsa cuñi cuñu ñuhu ndo. Maa tyin taahán tsi tsa jatyinyee tahan ndo tsi ndo tsa cuenda tsa cuñi tahan ndo tsi ndo. <sup>14</sup> Tyin iyó iin ley Nyoo, tan catyí tsi: “Cuñi tahan ndo tsi ndo tumaa cuñi ndo tsi maa ndo”, catyí tsi. Tan tatun nditsa tsa cuñi tahan yo tsi yo, tsa javahá ndihi yo tandihi ca tsa caahán ley tsahnu. <sup>15</sup> Jaha ndo cuenda tyin tatun caahán nyaa tahan ndo tsi ndo tan ndasi cuñi ndo nyehe tahan ndo tsi ndo, cua tiví nu yucú ndo.

### Cuhva cuñi cuñu ñuhu yo tan cuhva iyó yo tsihin Tatyí Ii Nyoo

<sup>16</sup> Tsa cuñi yu cahan yu tsihin ndo cuví tuhun ihya: Coo ndo tsihin tunyee iñi Tatyí Ii Nyoo. Tacan tan ña cua javaha ca ndo tsa ña vaha tsa cuñi cuñu ñuhu ndo.

<sup>17</sup> Tyin tsa javahá yo tsa ña vaha tsa cuñi cuñu ñuhu yo, ñavin cuhva cuñi Tatyí Ii Nyoo javahá yo. Tyin Tatyí Ii Nyoo cuñi tsi tsa javahá yo tsa vaha. Tan cuñu ñuhu yo ña cuñi tsi javahá tsi cuhva cuñi Tatyí Ii Nyoo. Tsa cuñi Tatyí Ii Nyoo cañi tahan can tsihin tsa cuñi cuñu ñuhu yo. Yacan cuenda yí javaha yo tsa cuñi yo javaha yo.

<sup>18</sup> Maa tyin tatun tsahá yo tsi yo tsa jaquihin ityí Tatyí Ii Nyoo tsi yo, ña cua cundaca ñaha ca ley tsahnu tsi yo.

<sup>19</sup> Ña yí nacoto yo tsi nyivi javahá cuhva cuñi cuñu ñuhu ñi. Yihí rayí, iyó ñasihi ra naha tan iyó inga ñaha tsi ra naha. Tan yihí ñiñaha iyó yí ñi tan iyó inga rayí tsi ñi. Tan yihí rayí quixí ra tsihin ñaha tan ña cuñi ra tindaha ra tsihin ña, tan juvin ñi tacan javaha juhva ñiñaha. <sup>20</sup> Yihí ñi jacahnú ñi tsitoho. Yihí ñi tasi ñi. Yihí ñi ndasi cuñi ñi nyehe ñi nyivi. Yihí ñi cañi tahan ñi. Yihí ñi cuiñu ñi. Tan yihí ñi iin yaha ñi cuxaan ñi. Yihí ñi tsicá iñi ñi maa ñi tsa vaha tsi maa ñi. Tan yihí ñi natahví sava ñi nu yucú ñi tyin cañi tahan ñi. Tan tacan tan quita síñ ñi. <sup>21</sup> Tan yihí ñi nyiyó iñi ñi tsa iyó tsi inga nyivi. Tan yihí ñi tsahñi tahan ñi. Tan yihí ñi tuhva ñi tsiñi. Tan yihí ñi cuaha xaan tsatsí ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahán yu tsihin ndo quivi can. Tyin tandihi ñi tsa javahá yacan, ña cua cuvi naquihin cuenda ñi nu ndacá ñaha Nyoo.

<sup>22</sup> Maa tyin tsa tsahá Tatyí Ii Nyoo tsi yo, cuví tsa cuñi yo tsi Nyoo tan tsi nyivi, tsa sí cuñi yo, tsa taxin cuñi añima yo, tsa nyee xaan iñi yo, tsa vaha iñi yo, tsa vaha nyivi cuví yo, tsa ña cundihi iñi yo javahá yo tsa vaha tsihin nyivi, tsa tsinú iñi yo tsi ra Cristo. <sup>23</sup> Tan inga tsa tsahá Tatyí Ii Nyoo tsi yo, yacan cuví tsa ndaahví jahá yo tsi yo, tsa ña javahá yo cuhva cuñi cuñu ñuhu yo. Tatun javahá yo tandihi tsa vaha ihya, ndi intuhun ley tan ña cua cuvi catyí tsi tyin iyó cuatyí yo. <sup>24</sup> Tan yoo tsa yihí cuenda ra Cristo Jesús, tsa yahá jandihí yo

tuhun tsa javahá yo tsa ña vaha tsa cuñi cuñu ñuhu yo. <sup>25</sup> Tan tumaa tsa iyó yo ñayivi nyito tsa cuenda Tatyí Ii Nyoo, tacan cuñi ndihi tucu tsi tsa tyaá yahvi yo tsa janahá ra tsi yo.

<sup>26</sup> Na ña cahnu jaha yo tsi yo. Tan ña jacañi tahan yo tsi nyivi. Tan na ña nyiyo iñi yo tsa tsii inga nyivi.

### Taahán tsi jatyinyee tahan yo tsi yo

<sup>6</sup> Yañi, tatun nyehé ndo javahá iin ra yañi yo cuatyí, nyooho tsa ñihi nyaá Tatyí Ii Nyoo tsihin, jatyinyee ndo tsi ra na nduvaha ra inga tsaha. Maa tyin cuñi tsi cahan vii ndo tsihin ra tsihin tsa vita iñi ndo. Tan cuñi tsi jahá xaan ndo cuenda tsi ndo coto nducu cuhva ndihi nu ña vaha tsi ndo. <sup>2</sup> Na jatyinyee tahan yo tsi yo náa tundoho taahán yo. Tyin tatun javahá yo tacan, cuñi tsi catyí tyin tyaá yahvi yo tsi ra Cristo.

<sup>3</sup> Tatun ndaa yo cuñi maa yo tyin cahnu nyivi cuví yo, tan nduve náa cuví yo, juvin ñi tsi maa yo jandavi ñaha yo. <sup>4</sup> Na jaha jihna yo cuenda tatun vaha tsa javahá yo. Tacan tan coto yo tatun vaha javahá yo tan cusí iñi yo. Tan ña taahán tsi nyehe yo náa javahá inga nyivi. <sup>5</sup> Tyin intuhun intuhun maa yo tan taahán tsi cunyee iñi yo cuiso yo tsa taahán tsi tsi yo.

<sup>6</sup> Tan cuñi tsi tsa jatyinyee ndo tsi ra jacuahá tuhun Nyoo tsi ndo. Cuhva ndo náa tsiñi ñuhu tsi ra.

<sup>7</sup> Tan ña jandavi ñaha ndo tsi juvin ñi maa ndo. Tyin Nyoo yoñi cuví vacu nducu tsi ra. Tyin tandihi tsa tatsí nyivi, yacan cua naquihin ñi. Tyin tatun javahá ñi tsa vaha, tsa vaha cua naquihin ñi. <sup>8</sup> Tacan tucu tatun iin nyivi tan javahá ñi tsa ña vaha tsa cuñi cuñu ñuhu ñi, juvin ñi maa tsa javahá ñi cua jativi tsi ñi. Maa tyin tatun javahá ñi cuhva cuñi Tatyí Ii Nyoo, Tatyí Ii Nyoo cua cuhva ñayivi nyito tsa ña cua naa maa coo ñi. <sup>9</sup> Yacan cuenda janyee ndo iñi ndo javaha ndo tsa vaha. Tyin tatun ña jandihí yo tsa javahá yo tacan, cua naquihin yo tsa vaha na tahan tsi quivi. <sup>10</sup> Yacan cuenda tandihi ñi tsaha tsa cuvi javaha yo tsa vaha, na javaha yo itsi tsihin tandihi ñi nyivi. Tan tsa jihna ñi taahán tsi javaha yo tsa vaha tsihin nyivi yihí cuenda Nyoo.

### Sí xaan cuñi ra Pablo tyin nyehé ra tundoho tsa cuenda ra Cristo

<sup>11</sup> Nyehe ndo tsa nahnu letra tyaá yu tsihin ndaha yu nu tutu ihya vityin. <sup>12</sup> Ra tsa jañiñi tsi ndo tsa cunyaa tuñi Nyoo tsi ndo, tacan javahá ra naha tyin cuñi ra naha na catyí nyivi tyin vaha xaan ra naha. Tan ña cuñi ra naha nyehe ra naha tundoho tsa cuenda ra Cristo, ra tsa tsihi nu cruu tsa cuenda yo. <sup>13</sup> Tyin ndi maa ra tsa nyisó tuñi Nyoo tan ña tyaá yahvi ra naha tandihi tsa caahán ley. Cuñi ra naha tsa cunyaa tuñi Nyoo tsi nyooho. Tyin tacan tan cuví jacahnu ra naha tsi maa ra naha tyin javahá ndo cuhva caahán ra naha. <sup>14</sup> Maa tyin yuhu ña cuñi yu cu iyo iñi yu tsi yu tsa cuenda náa ndihi tuhun. Maa tyin cu iyo iñi yu tyin tsihi Jutu Mañi yo Jesucristo nu cruu tsa cuenda yu. Tan maa ra ndacá ñaha tsi yu, tan ña cuñi ca yu tsa iyó ñuu ñayivi ihya tyin ña ndaca ñaha ca yacan tsi yo. <sup>15</sup> Tyin tatun nyicún



yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuví, tsa nanduví yo iin nyivi tsa tsa cuenda ra. <sup>16</sup> Tandihí nyooho tsa iyó tacan, naquihin ndo tsa taxin coo añima ndo. Tan na cundaahvi iñi Nyoo nyehe ra tsi tandihí ndo, tyin nditsa tsa cuví ndo nyivi cuenda ra.

<sup>17</sup> Vityin tan nu cuahán tsi ityi nuu, ndi intuhun ndo tan ña cua cuhva ca ndo tsihi tsi yu. Tyin tandihí paa tsa nyecú cuñu ñuhu yu, cuñí tsi catyi tsi tyin nditsa tsa cuví yu iin ra tsicá tyiñu Jutu Mañi yo Jesús.

<sup>18</sup> Yañi, na nasoco Jutu Mañi yo Jesucristo tsi tandihí ndo.

Tan na cuvi tsi tacan ñi.

# Efesios

## Nu quitsahā javahá ra Pablo carta

**1** Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyooho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsí yu carta ihya tsi ndo. <sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

### Tsa iin ñi cuví yo tsihin ra Cristo, Nyoo nasocó xaan ra tsi yo

<sup>3</sup> Na jacahnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tsihin tandihí nuu tsa vaha tsa iyó gloria tsa cuenda tsa iin ñi cuví yo tsihin ra Cristo. <sup>4</sup> Tsa ndi cumañi ca javaha ra ñuhu ñayivi tan nacatsí ra tsi yo tyin ndu iin yo tsihin ra Cristo. Tyin tacan tan cuití coo yo nuu ra tan ña coo ca cuatyí yo. <sup>5</sup> Tsa cuenda tsa cuñí ra tsi yo, tyaā ra cuhva tahañ tsanaha tyin nanduvi yo sehe ra tsa cuenda ra Jesucristo. Tacan javahā ra tyin tacan cacu iñi maa ra. <sup>6</sup> Yacan cuenda taahán tsi jacahnu xaan yo tsi ra, tyin tsahá ra tsa vaha tsa iyó tsi ra tsi yo nu jandu iin ra tsi yo tsihin Sehe ra, ra tsa cuñí xaan ra. <sup>7</sup> Nyoo cuñí xaan ra tsi yo. Tan yacan cuenda tyahví ra tsihin niñi Sehe ra tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo. <sup>8</sup> Tan tsa janahá ra tsi yo tyin cuñí xaan ra tsi yo, tsahá ra tsa nyityi ra tan tsa tsiñi tuñi ra coo tsi yo. <sup>9</sup> Tan tsahá ra tsa nacotó yo tuhun tsa tyihí ra cuhva tahañ tsanaha tyin javaha ra tsihin ra Cristo. Tan tandihí tuhun can tsicumí xeehe ra tan ña jacotó ra can tsi nyivi tahañ tsanaha. <sup>10</sup> Maa tyin tsa cua tahan tsi quivi cundaa tuhun tsa tyihí ra cuhva, cua jandu iin ra tandihí tsa iyó nu ñuhu ñayivi ihya tan andivi, tan cua nacuhva cuenda ra tandihí can tsi ra Cristo tyin quihí ndaha ra.

<sup>11</sup> Tan tsa cuenda tsa iin ñi cuví yo tsihin ra Cristo, ñihí ndihí yo tsa ñihí ra, tyin maa Nyoo cuñí tacan. Yacan cuenda nacatsí ra tsi yo, tyin tacan tyihí ra cuhva tyin javaha ra tyin maa ra javahá tandihí cuhva nyehé ra tyin vaha. <sup>12</sup> Javahā ra tyehen tyin nyuhu tsa natsinu jihna iñi tsi ra Cristo jacahnu ndi tsi Nyoo tsa cuenda tsa cahnu cuví ra. <sup>13</sup> Tan tacan tucu nyooho natsinu iñi ndo tsi ra Cristo, tan ndu iin ndo tsihin ra quivi tsa tsiñi ndo tuhun Nyoo tsa cuví tsa nditsa, tan nácaa jacacú ra tsi yo. Tan tsahā ra Tatyí Ii ra coo añima ndo, tumaa catyí ra tyin cua javaha ra tan yacan cuñí tsi catyí tyin cuví ndo nyivi yihí cuenda ra. <sup>14</sup> Nyoo jihna ca Tatyí Ii ra tsahā ra tsi yo tyin tacan tan cuita iñi yo tandihí ca tsa cua

cuhva ra tsi yo quivi jandu iin ra tandihí nyivi tsa cua cacu. Tyin tacan tan jacahnu yo tsi ra, tyin cahnu xaan cuví ra.

### Nu tsicán ra Pablo tsi Nyoo na cuhva ra tsa tsiñi tuñi tsi nyivi tsa tsinú iñi

<sup>15</sup> Yacan cuenda, tsa ñihí tuhun yu tyin tsinú vaha iñi ndo tsi Jutu Mañi yo ra Jesucristo, tandihí ñi tsaha tsa tsicán tahvi yu tsi ra tan tsahá yu tyahvi nyoo tsi ra tsa cuenda ndo tan tsa cuenda tyin cuñí tahan xaan ndo tsi ndo tsa yihí ndo tuhun Nyoo. <sup>17</sup> Tsicán yu tsi Nyoo Jutu ra Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi iñi ndo tsa janahá ra tsi yo tsihin Tatyí Ii ra, tacan tan nacoto vaha ca ndo tsi ra. <sup>18</sup> Tan tsicán yu tsi ra, na cuhva ra tsa cutuñi vaha iñi ndo, tyin tacan tan coto ndo nacuenta canā ra tsi ndo, tan náa cuví tsa cua cuhva ra tsi ndo ityi nuu ca tyin tsa cua cuhva ra tsi nyivi cuenda ra, sñi xaan caá can tan cuca xaan can. <sup>19</sup> Tan cahnu xaan cuví tunyee iñi tsa iyó tsi ra, tan ña cuví cutuñi iñi yo nácaa tsa cahnu cuví can. Tan yacan cuví tsa jahá tyiñu tsihin yoo tsa tsinú iñi tsi ra. Tan juvin ñi maa tsihin tunyee iñi cahnu can <sup>20</sup> janandotó Nyoo tsi ra Cristo. Tan tyaā ra tsi ra xiin cuaha ra nda gloria. <sup>21</sup> Tan yacan cuví nu jacahnu xaan ca Nyoo tsi ra Cristo tan ñavin ca tandihí ca ra ndacá ñaha nu ñuhu ñayivi ihya tan nda andivi. Tyin yoñi yóo ra cahnu ca cuví ñuu ñayivi ihya tan ndi ñayivi tsa cua coo, tyin intuhun ñi maa ra Cristo cuví ra cahnu ca cuví. <sup>22</sup> Tan tandihí cuii maa tsa iyó tsahā Nyoo tyin cundaca ñaha ra Cristo. Tan tsahā Nyoo tsa cuví ra jiñi tsihin nyivi tsa yihí cuenda ra. <sup>23</sup> Tyin yoo, tsa yihí yo cuenda ra, cuví yo cuñu ñuhu ra. Tan maa ra tsihin yo cuví tsi intuhun ña cuñu ñuhu. Tan juvin maa ra jan-duní ra tandihí tsa iyó.

### Jacacú Nyoo tsi yo tsa cuenda tsa cuñí ra tsi yo

**2** Nyoo tsahā ra ñayivi nyito coo ndo quivi ndu iin ndo tsihin ra Cristo. Maa tyin tsa ndi cumañi ca tsinu iñi ndo tsi ra Cristo ña nyito añima ndo tyin ndi iyó cuaha cuatyí ndo. <sup>2</sup> Tan quivi can ndi javahá ndo cuhva javahá nyivi ña tsitó tsi Nyoo. Ndi tyaá yahvi ndo tsi nu ña vaha tsa ndacá ñaha tsi nu tatyí ña vaha tsa natyuhú tsi nyivi tsa ña tyaá yahvi tsi Nyoo. <sup>3</sup> Tan juvin ñi tacan tsicoo tucu yo quivi can, tyin javahá yo tsa ña vaha tsa cuñí cuñu ñuhu yo tan cuhva tsicá iñi yo. Tan tsa cuenda tsa javahá yo tacan, taahán tsi tatsi tuñi Nyoo tsi yo iin caa ñi tsihin tandihí ca nyivi tsa javahá tsa ña vaha. <sup>4</sup> Maa tyin Nyoo cundaahví xaan iñi ra

nyehe ra tsi yo tsa cuenda tsa cuñi xaan ra tsi yo. <sup>5</sup> Tan vasu tsa tsihi añima yo jahā cuatyí yo, Nyoo janandoto ra añima yo tan tsahā ra ñayivi nyito coo yo nu jandu iin ra tsi yo tsihin ra Cristo. Tan cacu yo jahā tsa cuñi xaan Nyoo tsi yo. <sup>6</sup> Tan tsa janandoto ra tsi yo iin caa ñi tsihin ra Cristo Jesús tyaā ra tsi yo tsihin ra nda gloria. <sup>7</sup> Tan javahā Nyoo tyehen tyin tacan tan nu cuahán ca tsi ityi nuu cua coto tandihi ca tsa cua coo tyin vaha xaan iñi ra tsihin yo tan cahnu xaan tumañi iñi tsahā ra tsi yo tsa cuenda ra Cristo Jesús. <sup>8</sup> Tyin tsa cuenda tsa vaha tsa tsahā Nyoo tsi yo tan cacu yo. Tan ñihí yo tumañi iñi ihya jahā tsa tsinú iñi yo tsi ra Cristo. Tan ñavin tsihin tsa javahā yo tan ñihí yo can, tyin maa Nyoo tsahā can tsi yo. <sup>9</sup> Ñavin tsihin tsa javahā yo tsa vaha tan cuví cacu yo. Yacan cuenda ndi intuhun yo tan ña taahán tsi cu iyo iñi yo tyin cacu yo tsihin tsa javahā yo tsa vaha. <sup>10</sup> Nyoo janduvahā ra añima yo tsihin tsa ndu iin yo tsihin ra Cristo Jesús. Tacan javahā ra tyin tacan tan javaha yo tsa vaha, tyin nda tsanaha tan tyaā ra kuhva tyin coo yo tacan.

**Cuví yo nyivi Israel, a cuví yo nyivi inga ñuu, maa tyin tsa cuenda ra Cristo iin ñi nyivi cuví tandihi yo**

<sup>11</sup> Catyí ra Israel naha ra tyin ña vaha nyooho tsa ñavin nyivi Israel cuví, tyin ña tsinyaā tuñi Nyoo cuñu ñuhu ndo tumaa maa ra naha. Cuñi maa ra naha tyin vaha ra naha nuu Nyoo tan nyooho ña vaha ndo. <sup>12</sup> Tan nducuhun tucu iñi ndo tyin nu quitsi tsi tahañ tsanaha, nduve ra Cristo iyó añima ndo. Tan ndi ña iin ñi cuví ndo tsihin nyivi Israel. Tan ña tsitó ndo tuhun tsa ndoo Nyoo tsihin ra Abraham tan tsihin nyivi tata ra. Tyin iyó soho ñi maa ndo quivi can, tan nduve Nyoo nyaá tsihin ndo. Yacan cuenda nduve náa cua ñihi ndo. <sup>13</sup> Tyin ndi luxu tuhun Nyoo tan ña tsitó ndo tahañ tsanaha, maa tyin vityin ndu iin ndo tsihin ra Cristo Jesús tyin quitsi ra tsati ra ñiñi ra tsa cuenda ndo. <sup>14</sup> Tyin juvin ra Cristo tsahā tsa taxin coo yo tan jandu iin ra tsi nyooho tsa ñavin nyivi Israel cuví tsihin nyuhu tsa cuví nyivi Israel. Vityin iin ña nyivi cuví yo, tyin jandihí ra tsa xaan cuñi yo nyehé tahan yo tsi yo. <sup>15</sup> Tan tsa quitsi ra Cristo tsihi ra nu cruu, tsindihí tuhun tsahnu tsa iyó ndi tsa tyasí nu ndu iin ndi tsihin ndo, tan jandu iin ra tsi ndo tsihin ndi. Tan vityin iin ña nyivi cuví yo nuu ra, tan iyó yo tsihin tsa taxin. <sup>16</sup> Tan tsihin tsa tsihi ra nu cruu tsindihí tsa ña caahán tsihin tahan yo, tan nacoō vaha yo tsihin Nyoo jahā ra, iin ña nyivi cuví yo vityin. <sup>17</sup> Ra Cristo quitsi ra cahañ ra tyin cuví coo vaha yo tsihin Nyoo tan tsihin tahan yo: Cahañ ra tsihin ndi tsa cuví ndi nyivi Israel tsa tsa tsitó maa tuhun Nyoo tan tsihin nyooho tsa ña tsitó ndi luxu maa tuhun Nyoo tahañ tsanaha. <sup>18</sup> Tan tsa cuenda tsa quitsi ra Cristo tsihi ra nu cruu, nduyatyin nyecú yo tsihin Nyoo Jutu yo. Tyin iin ñi Tatyí Ii ra iyó añima yo: a cuví yo nyivi Israel, o ñavin nyivi Israel cuví yo. <sup>19</sup> Yacan cuenda nyooho ñavin ca nyivi inga ñuu cuví ndo, tyin iin ña nyivi cuví ndo tsihin nyivi yihí cuenda Nyoo. Tan cuví ndo nyivi maa ra. <sup>20</sup> Tan cuví ndo tumaa iin vehe. Tan nyecú ndo

nu samā ra tava tyiñu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuví ra Cristo Jesús. <sup>21</sup> Tan tsata yuu tsa cuví ra Cristo, siñ xaan cua quita vehe tsa ndi cuahán tsinú, tyin tandihi maa yo cuví nama vehe tsa ndi tsinú can. Tan tsa cua quita tsi, cua cuví tsi iin vehe ñuhu ii tan cua ndu iin tsi tsihin Jutu yo Nyoo. <sup>22</sup> Tan tacan tucu nyooho ndu iin ndo tsihin tandihi nyivi yihí cuenda ra Cristo jahā Tatyí Ii ra, tyin tacan tan cua cuví ndo vehe nu coo Nyoo.

**Nyoo tava tyiñu tsi ra Pablo tyin cahan ra tuhun ra Cristo tsihin nyivi tsa ñavin nyivi Israel cuví**

**3** Yacan cuenda yuhu ra Pablo nyíi yu vehe caa ihya tyin jacotó yu tuhun ra Cristo Jesús tsi nyooho tsa ñavin nyivi Israel cuví. <sup>2</sup> Taahán tsi coto ndo tyin cahnu xaan tunyee iñi tsahā ra tsi yu tsa cuenda tsa vaha tsi ndo, tyin jacotó yu tuhun ra tsi ndo. <sup>3</sup> Tan Nyoo janahā ra tuhun xeehe tsa tsicumí ra tsi yu, tan tyaá yu juhva tuhun can nu carta ihya tyin coto ndo. <sup>4</sup> Tan tsa cua cahvi ndo tuhun tsa tyaā yu ihya cua coto ndo nácaa tsahā Nyoo tyin cutuñi iñi yu tuhun ra Cristo tsa tsicumí xeehe ra. <sup>5</sup> Tyin nu quitsi tsi tahañ tsanaha, ña janahā Nyoo tuhun xeehe can tsi nyivi, tumaa tsa janahā Tatyí Ii ra tuhun can tsi ra tava tyiñu ra Jesucristo tan ra cuví ndusu yuhu Nyoo. <sup>6</sup> Tan tuhun xeehe can, cuñi tsi catyi tyehen: Nyivi tsa ñavin nyivi Israel cuví cua ñihi ndihi ñi tsa cua ñihi nyivi Israel tyin iin ña cuñu ñuhu cuví yo vityin tsa cuenda tsa jacacu ra Cristo tsi yo. Tan cua ñihi yo tsa catyi Nyoo tyin kuhva ra tsi yo tyin natsinú iñi yo tsi maa ra Cristo Jesús. <sup>7</sup> Nyoo tsahā ra tsa vaha tsi yu tan jatyinyeé ra tsi yu tyin tacan tan jacoto yu tuhun vaha ihya tsi nyivi. <sup>8</sup> Yuhu luhlu xaan ra cuví yu tan ñavin ca tandihi nyivi tsa yihí cuenda Nyoo. Maa tyin Nyoo tsahā ra tumañi iñi cahnu ihya tsi yu tyin cahan yu tuhun ra Cristo tsihin nyivi tsa ñavin ñi Israel cuví. Tyin na coto ñi tsa cuca tsa cua kuhva ra Cristo tsi ñi. <sup>9</sup> Tava tyiñu Nyoo tsi yu na jacoto yu tsi tandihi nyivi nácaa tyaā ra kuhva tsa cua javaha ra tsa ndi cumañi ca javaha ra tandihi tsa iyó, tyin tsanaha ña jacoto ra tuhun tsa tsicumí xeehe ra tsi nyivi. <sup>10</sup> Tacan cuví tan vityin tandihi ra ndacá ñaha nda andivi cua nyehe tsa vaha tsa javahā Nyoo tsihin yo tsa cuví yo nyivi yihí cuenda ra. Tan cua coto ra naha tyin iyó xaan tsa tsiñi tuñi tsi Nyoo. <sup>11</sup> Tandihí tuhun ihya nacatsí tahan tsi tsihin tsa tyaā Nyoo kuhva tyin javaha ra tsihin Jutu Mañi yo Jesucristo tsa cuenda tsa vaha tsi yo. <sup>12</sup> Tan tsa cuenda tsa tsinú iñi yo tsi ra Cristo, tsahā Nyoo ndatu tsi yo tsa cunyanaa ca yo tsi ra. Yacan cuenda ña yuuhví yo natuhvá yo nu nyaá ra. <sup>13</sup> Tan tsa cuenda tsa tsahā ra ndatu can tsi yo caahán ndaahvi yu tsihin ndo na ña ndu uvi iñi ndo tsa nyehé yu tundoho tsa cuenda ndo. Tyin tsa tyehen nyehé yu tundoho tsa cuenda ndo, tsa vaha tsi maa ndo cuví can.

### Tsicán tahvi ra Pablo tyin na nacoto vaha ca nyivi tsi ra Cristo

<sup>14</sup>Tan tsa cuenda tsa nducuhun iñi yu tumañi iñi tsa javahā Nyoo, Jutu ra Jesucristo Jutu Mañi yo tsihin yo, tsicuiñí tsiti yu nuu ra. <sup>15</sup>Tyin juvin ra cuví Jutu tandihí nyivi: ñi tsa cuahán andiví, tan ñi tsa yucú nu ñuhu ñayivi ihya. <sup>16</sup>Tan tsicán yu tsi ra na jandunyeexaan ra iñi ndo tsihin Tatyí Ii ra tsa iyó añima ndo. <sup>17</sup>Tan na coo ra Cristo añima ndo tsihin tsa tsinú iñi ndo tsi ra. Tacan tan cua cuñi xaan ndo tsi tandihí nyivi, tyin nyanaá vaha ndo tsi Nyoo. <sup>18</sup>Tacan tan cua cutuñi vaha iñi ndo tsihin tandihí ñi yihí cuenda ra nácaa tsa cahnu xaan tsa cuñí ra Cristo tsi yo. Tan ndi ña cua ñihi ndo cuhva nacatyí tuhun ndo tsihin nyivi nácaa tsa cuñí ra tsi ndo. <sup>19</sup>Tsicán yu tsi Nyoo na coto ndo nácaa tsa cahnu xaan tsa cuñí ra tsi ndo. Nyoo nyaá maa ra tsihin ndo.

<sup>20</sup>Tan vityin na jacahnu yo tsi Nyoo, ra tsa iyó xaan tunyee iñi tsi. Tan cuaha xaan ca tsa cuví javaha ra tan ñavin ca cuhva tsa tsicán yo tsi ra, a cuhva tsa tsicá iñi yo. Tyin juvin ñi tsihin tunyee iñi maa ra tsa tsahá ra tsi yo, javahá ra tandihí. <sup>21</sup>Yoo tsa cuví yo nyivi tsinú iñi tsi Nyoo, na jacahnu yo tsi ra tacan ñi maa, tsa cuenda tsa javahā ra Cristo Jesús. Tan na cuvi tsi tacan.

### Iin ñi cuví tandihí yo tsa yihí yo cuenda ra Cristo jahá Tatyí Ii Nyoo

**4** Yacan cuenda yuhu, tsa nyii yu vehe caa tsa cuenda Jutu Mañi yo, caahán ndaahvi yu tsihin ndo na catsi coo ndo tumaa cuhva taahán tsi coo nyivi tsa nacana Nyoo. Tyin nacana ra tsi ndo na cuvi ndo nyivi ra. <sup>2</sup>Yacan cuenda jandundaahvi ndo tsi ndo nuu nyivi, tan vita cuhun iñi ndo. Tan ña cutyxixi ndo tsihin ñi, tan ña cundihí iñi ndo nyehé ndo tsi ñi tyin tacan tan coto ñi tyin cuñí ndo tsi ñi. <sup>3</sup>Tyin tsa taxin tsa tsahá Nyoo coo añima yo jandu iin tsi tsi yo tan yacan cuenda nducu vaha ndo cuhva tan iin ñi cuvi ndo tsihin tsa jatyinyee Tatyí Ii Nyoo tsi ndo. <sup>4</sup>Tandihí yoo tsa tsinú iñi tsi ra Cristo Jesús cuví yo intuhun ña cuñu ñuhu tsa cuenda ra. Tan tandihí yo intuhun ñi Tatyí Ii Nyoo iyó tsihin yo, tan catyí Nyoo tsihin tandihí yo tyin nditsa tsa cua ñihi yo ñayivi nyito coo yo. <sup>5</sup>Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoon-dutya yo. <sup>6</sup>Iyó intuhun ñi Nyoo tan maa ra cuví ra Jutu tandihí yo. Tan ndacá ñaha ra tsi tandihí yo, tan iyó ra añima tandihí yo, tan tsatyíñu ra tsi tandihí yo, tan jahá tyiñu yo tyiñu ra.

<sup>7</sup>Tan tsahá ra Cristo ndatu tsi tsa intuhun intuhun yo cuhva cuñí maa ra. <sup>8</sup>Yacan cuenda catyí tsi nu tutu Nyoo tuhun ra Cristo tyehen:

Cunyeē ra jahā canaa ra tsi nu xaan iñi tsi ra, tan quihñ nyaa ra tsi nyivi tsa yihñ ndaha nu tan nandaā ra andiví tsihin ñi.

Tan tsahā ra ndatu tsi yo tsa jaha tyiñu yo tyiñu ra, catyí tsi.

<sup>9</sup>¿Tan náa cuñí tsi catyí tsa “nandaā ra”? Cuñí tsi catyí tyin nuu jihna ra nu ñuhu ñayivi. <sup>10</sup>Ra tsa nuu can, juvin ñi ra cuví ra tsa nandaā nda gloria. Tyin tacan tan jandunñi ra tandihí maa tan cunyaa ra tsihin yo tandihí ñi ityi. <sup>11</sup>Tan juvin ñi maa ra Cristo tsahā ndatu tsi yo. Tsi juhva yo tavā tyiñu ra tsi yo tsa caca yo tyiñu ra. Tan tsi inga yo tsahā ra tsa cuví yo ndusu yuhu ra. Tan tsi inga yo tsahā ra tyin jacoto yo tsi nyivi nácaa jacacú ra tsi yo. Tan tsi inga yo tsahā ra tsa jaha cuenda yo tsi ñi yihí cuenda ra, tan tsi inga yo tsahā ra tsa cuví jacuaha yo tuhun ra tsi ñi. <sup>12</sup>Tacan tsahā Nyoo ndatu can tsi yo tyin jatyinyee tahan yo tsi yo tan tsi inga ca nyivi tyin tacan tan cuahnu ca yo tsihin ra Cristo. <sup>13</sup>Nda cuanda ndu iin tandihí yo jaha tsa tsinú iñi yo tsi Sehe Nyoo. Tan nacoto vaha yo tsi ra. Tan cutsa vaha yo nda cuanda tsa yo cuvi yo tumaa cuví maa ra Cristo. <sup>14</sup>Tacan tan ña cua cuvi ca yo tumaa tsa nyihi. Tyin tsa nyihi yatyi xaan tsinú iñi tsi náa luxu tsa ñihí tuhun tsi. Tan na ña cuvi yoo tacan tyin coto jandavi ñaha nyivi tsi yo. <sup>15</sup>Maa tyin tyehen ca javaha yo: cua cuñi yo tsi nyivi tan cua cahan yo tsa nditsa tsihin ñi. Tan ndunyeexaan añima yo tsihin tandihí tsa vaha tsa iyó tsi Nyoo. Tan cuahnu yo tan cuvi yo tumaa maa ra Cristo, ra cuví ityi nuu tsihin yo. <sup>16</sup>Tan tsa cuenda ra Cristo tandihí yo tsa cuví yo cuñu ñuhu ra, iin ñi cuvi yo. Tumaa yihí tahan iin cuñu ñuhu, tan tsa iin tsa iin nu yihí tahan tsi vaha jahá tyiñu tsi. Tan tacan jatyinyeé tsi tsi naniñ cuñu ñuhu can, na coo vaha tsi tan cuahnu tsi. Tan tacan tucuyoo, tsahnú yo tsihin tsa cuñí tahan yo tsi yo tan jatyinyeé tahan yo tsi yo.

### Tsahá ra Cristo ñayivi nyito coo yo

<sup>17</sup>Tuhun ihya cuví tsa tsahá cuenda yu tsi ndo, catyí Jutu Mañi yo. Ña cōo ca ndo tumaa iyó nyivi ña nacotó tsi Nyoo. Tyin maa ñi maa tsa ña jatyinyeé tsi ñi tsicá iñi ñi. <sup>18</sup>Tan ña cutuñí iñi ñi, tyin ñavin ñayivi Nyoo iyó ñi. Tyin ña tsitó ñi, tsa cuenda tsa ndava añima ñi. <sup>19</sup>Ña cahán ca nuu ñi javahá ñi tsa ña vaha. Tan nacuhva cuenda ñi tsi ñi tsi tsa caquiñi. Maa ñi tsa ña vaha cuñí ñi javaha ñi. <sup>20</sup>Maa tyin tatun nditsa tsa tsiñi ndo tuhun ra Cristo, cua nducuhun iñi ndo tyin ñavin tacan taahán tsi coo ndo. Tyin tsiñi ndo tan cutuhva ndo tsa nditsa cuví tuhun maa ra Cristo. <sup>22</sup>Yacan cuenda ña cōo ca ndo cuhva tsicoo ndo quivi can, tan ña javaha ca ndo tsa caquiñi tsa cuñí cuñu ñuhu ndo, tyin tsana-ha, jandavi ñaha xaan can tsi ndo. <sup>23</sup>Nacuhva cuenda ndo tsi ndo tsi Nyoo na nasama ra cuhva tsicá iñi ndo. <sup>24</sup>Tan cōo ndo ñayivi nyito tyin vityin nyivi tsa cuvi ndo jahā Nyoo. Tan javaha ndo maa ñi tsa vaha na nyehe nyivi tyin iyó ndo ñayivi nyito tyin catsi tan cuiti iyó ndo.

<sup>25</sup>Yacan cuenda ña cahan ca ndo cuendu. Cahán ndo maa ñi tsa nditsa tsihin nyivi tyin iin ña cuñu ñuhu cuví tsa tandihí yo.

<sup>26</sup>Tatun cuxaan ndo, jaha ndo cuenda coto javaha ndo tsa ña vaha. Juhva ñi cuhva cuxaan ndo. Tan ña quihñ tsihiñ tsi ndo nduvi. <sup>27</sup>Tan ña cuhva ndo ndatu tsi nu ña vaha tsa nducu cuhva nu tsi ndo.

<sup>28</sup> Ra tsa tuhva suhu quivi can, na ña suhu ca ra vityin. Na jaha tyiñu ra tsihin ndaha ra. Tacan tan coo tsa tsii ru, tan cuvi jatyinyee ra tsi nyivi tsa iyó tsa tsiñi ñuhu tsi ñi.

<sup>29</sup> Ña çahan ndo tsa ndavaha ñi. Çahan ndo, maa ñi tsa vaha tsa cua jatyinyee tsi nyivi tsa tsiñi tsa caahán ndo. <sup>30</sup> Tan ña çuhva ndo tucuihya iñi tsi Tatyí Ii Nyoo tyin Tatyí Ii ra cuví tuñi tsa tyaá ra añima yo nda cuanda ndihí jacacu ra tsi yo quivi cua quitsi ra.

<sup>31</sup> Ña çuhun iñi ndo tisihi. Tan ña çuxaan ndo. Tan ña çuvi ndo nyivi tyixin. Tan ña çahan nyaa ndo tsi nyivi, tan ndi ña çahan ndo tsa ndavaha ñi. <sup>32</sup> Maa tyin çuvi ndo nyivi vaha, tan çundaahvi iñi ndo tsi nyivi. Tan jaha ndo tucahnu iñi tsi ñi, tumaa jaha Nyoo tucahnu iñi tsi maa ndo tsa cuenda ra Cristo.

### Nacaa taahán tsi coo nyivi yihí cuenda Nyoo

**5** Nducu ndo cuhva coo ndo tumaa iyó maa Nyoo, tyin sehe ra cuví tsi yo, tan cuñi xaan ra tsi yo. <sup>2</sup> Cuñi yo tsi nyivi tumaa tsa cuñi maa ra Cristo tsi yo tan quitsi ra tsihi ra nu cruu tsa cuenda yo. Tumaa jamañi ra cuví jutu mbee ticatyí luhlu nuu Nyoo, tacan jamañi ra Cristo tsi ra tsa cuenda yo. Tan sñi xaan cuñi Nyoo tsihin ra tsa cuenda tsa javahá ra tacan.

<sup>3</sup> Vityin tsa cuví yo nyivi yihí cuenda Nyoo, ña taahán tsi javahá ndo tsa caquiñi tsihin cuñu ñuhu ndo, tan ndi ña cuñi ndo coo cuaha ndaha tyiñi ndo. Tan ña taahán tsi caca iñi ndo ndi intuhun tuhun ihya. <sup>4</sup> Ña çahan ndo tuhun tsa tsahá ticanuu tsi yo. Tan ndi ña çahan ndo tsa nduve yahvi nyaá. Tyin ña taahán tsi çahan yo tacan. Vaha ca çuhva ndo tyahvi nyoo tsi Nyoo. <sup>5</sup> Tyin tsa tsitó ndo tyin tandihí nyivi tsa javahá tsa caquiñi, ña cua quihvi ñi nu ndacá ñaha ra Cristo tsihin Nyoo. Ra tsa iyó tsihin ñaha tan ñavin ñasihi ra cuví ña, a ñaha iyó tsihin rayi tan ñavin yii ña cuví ra, tan nyivi tsa cuñi xaan coo cuaha ndaha tyiñu, ña cua quihvi ñi nu ndacá ñaha Nyoo tyin tumaa tsa jacahnú ñi tsitoho cuví can, tyin maa ñi yacan tsicá iñi ñi tan ña jacahnú ñi tsi maa Nyoo. <sup>6</sup> Ña çuhva ndo tsa jandavi ñaha nyivi tsi ndo tsihin tuhun tsa nduve yahvi nyaá tsa caahán ñi tyin tsa cuenda tandihí tsa ña vaha can cua tatsi tuñi Nyoo tsi nyivi tsa ña tyaá yahvi tsi ra. <sup>7</sup> Yacan cuenda ña çutahan ndo tsihin ñi.

<sup>8</sup> Nyooho tsicoq ndo nu naa quivi can. Tan vityin ña taahán ca tsi coo ndo nu naa tyin Jutu Mañi yo tsa tava ra tsi ndo nu nditsin. Yacan cuenda taahán tsi javaha ndo tumaa cuñi maa Nyoo. <sup>9</sup> Tyin Nyoo jandunditsin ra añima yo tan janduvahá ra añima yo, yacan cuenda javaha ndo tsa vaha tan çahan ndo maa ñi maa tsa nditsa. <sup>10</sup> Jañiñi ndo cutuhva ndo cuhva taahán iñi Jutu Mañi yo. <sup>11</sup> Ña javaha ndo cuhva javahá nyivi iyó nu naa. Tyin nduve naa tsa vaha ñihí ñi tsihin can. Vaha ca jacoto ndo tsi ñi tyin ña vaha tsa javahá ñi. <sup>12</sup> Tyin çahán nuu yo çahan yo tsa javahá xeehe ñi. <sup>13</sup> Maa tyin quivi quita tsa yihí xeehe nu nditsin, tacan tan catsi xaan cua nyehe yo. Tyin tsa nditsin Nyoo cua tava tsi tandihí tsa yihí xeehe. <sup>14</sup> Yacan cuenda iyó nu catyí tsi:

Ndoto yooho tsa quixí un, nduyita mahñu nu yucú ndiyi.

Tan ra Cristo cua jandunditsin ra ñuhú nu cuahán un, catyí tsi.

<sup>15</sup> Yacan cuenda jaha ndo cuenda cuhva iyó ndo. Tan ña çoo ndo tumaa iyó ra soho. Çoo ndo tumaa iyó ra tsitó. <sup>16</sup> Tan nducu ndo cuhva çahan ndo tuhun Nyoo tsihin nyivi tandihí ñi cuhva tsa nuña ndo, çahan ndo tyin vityin maa ñi maa tsa caquiñi javahá ñi. <sup>17</sup> Yacan cuenda ña soho çoo ndo. Nducu ndo cuhva cutuñi iñi ndo cuhva cuñi maa Jutu Mañi yo. <sup>18</sup> Ña çoho ndo nyixi tan cuví ndo ra tsiñi tyin cuví jativi yacan tsi ndo. Maa tyin çuhva ndo tsi ndo cundaca ñaha Tatyí Ii Nyoo. <sup>19</sup> Çahan ndo tsihin tahan ndo maa ñi tsa vaha, tan jacahnu ndo tsi Nyoo. Çata ndo salmo cuenda ra; çata ndo yaa Nyoo; çata ndo tsa tsahá Tatyí Ii tsi ndo; jacahnu ndo tsi Jutu Mañi yo tsihin tandihí añima ndo.

<sup>20</sup> Tacan ñi nacuhva ndo tyahvi nyoo tsi Nyoo Jutu yo tsa cuenda tandihí maa, a sñi cuñi ndo, o nyehé ndo tundoho. Nacuhva ndo tyahvi nyoo tsi ra tsihin ndatu tsa tsahá Jutu Mañi yo Jesucristo tsi yo.

### Nacaa taahán tsi coo yo tsihin nyivi yo

<sup>21</sup> Tyaa yahvi tahan ndo tsi ndo, tyin tun javahá ndo tacan, tsihin yacan janahá ndo tyin tyaá yahvi ndo tsi Nyoo

<sup>22</sup> Nyooho tsa iyó yii, tyaa yahvi ndo tsa caahán yii ndo tumaa tsa tyaá yahvi ndo tsa caahán Jutu Mañi yo. <sup>23</sup> Tyin rayi cuví ityi nuu tsihin ñasihi ra, tumaa cuví ra Cristo ityi nuu tsihin nyivi yihí cuenda ra. Juvín ñi maa ra jacacú tsi yo tsa cuví yo cuñu ñuhu ra. <sup>24</sup> Yacan cuenda tumaa tsa cuví ra Cristo ityi nuu tsihin nyivi yihí cuenda ra, tacan taahán tsi tyaá yahvi ñaha tsi yii ña.

<sup>25</sup> Tan nyooho rayi, cuñi tsi tsa cuñi ndo tsi ñasihi ndo tumaa cuñi ra Cristo tsi yo tsa yihí yo cuenda ra, tan tsahá ra ñayivi ra tsa cuenda yo. <sup>26</sup> Tacan javahá ra tan jandundi ra añima yo tsihin tuhun caahán ra tsa cuví tumaa ndutya, tan nacatyá ra tsi yo quivi tsa natsinú iñi yo tsi ra. <sup>27</sup> Ndoq añima yo tumaa ndoó iin jahma, ña nyayu ca tsi, ña tiyi ca tsi. Tyin ra Cristo jandundi ra tsi yo tsa cuví yo nyivi yihí cuenda ra. Tyin tacan tan cuví nacuhva cuenda ra tsi yo tsi Nyoo, tyin vaha yo, tan nduve ca cuatyí yo. <sup>28</sup> Tacan taahán tsi cuñi rayi tsi ñasihi ra, tumaa tsa cuñi ra cuñu ñuhu maa ra. Tyin tatun cuñi ra tsi ñasihi ra, cuñi ra tsi maa ra. <sup>29</sup> Tyin ndi intuhun yo tan ña cuví tsa ña cuñi yo cuñu ñuhu yo, tyin jacatsí yo tan jacunditsí yo cuñu ñuhu yo. Tan ra Cristo juvín ñi tacan javahá ra tsihin nyivi yihí cuenda ra. <sup>30</sup> Tyin cuñu ñuhu ra cuví yo. Tan intuhun intuhun yo cuví yo juhva cuñu ñuhu ra tan yiqui ra. <sup>31</sup> Catyí tuhun Nyoo: "Rayi taahán tsi naco ra tsi jutu ra tan tsi sihi ra, tan ndu iin ra tsihin ñasihi ra. Tan intuhun ña cuñu ñuhu cua cuvi tsa nduvi ñi."

<sup>32</sup> Xeehe xaan tan çahnu xaan tuhun ihya, tan catyí yu tyin cuñi tsi catyí tyin ra Cristo ndu iin ra tsihin nyivi yihí cuenda ra tumaa ndu iin iin rayi tsihin ñasihi ra. <sup>33</sup> Tan inga tucu tuhun, cuñi tsi catyí tyin intuhun intuhun ndo taahán tsi tsa cuñi ndo ñasihi ndo, tumaa

cuñí ndo tsi maa ndo. Tan nyooho ñiñaha, tyaa yahvi ndo tsi yñi ndo.

**6** Nyooho tsa nyihi, tyaa soho ndo tsa caahán jutu ndo tan sihi ndo. Tyin tacan taahán tsi javaha ndo. <sup>2</sup> Tyin nu tutu Nyoo catyí tsi tyehen: “Jaha tsa ñayivi tsi jutu un tan sihi un”, tan tuhun ihya cuví tsa jihna ñi catyí Nyoo tyin javaha yo tan cua ñihi yo tsa cua cuhva ra tsi yo. Tyin tyaa ra cuhva tyin tun javaha yo tacan, si xaan cua coo yo tan cuaha xaan quivi cua coo yo nu ñuhu ñayivi ihya.

<sup>4</sup> Tan nyooho tsa iyó sehe, ña javaha ndo tsa ña vaha tsi sehe ndo tan cuxaan iñi tsi tsi ndo. Maa tyin jacua-aha ndo tuhun Nyoo itsi naha tsi, tan na cutuhva tsi tyaa yahvi tsi tsi ndo tan tsi Nyoo.

<sup>5</sup> Tan nyooho tsa cuví musu, tyaa yahvi ndo tsi ra yihí ndaha tsi ndo nu ñuhu ñayivi ihya. Jaha ndo tsa ñayivi tsi ra naha tsihin tsa ñi iñi añima ndo. Tan nducu ndo cuhva tyaa yahvi ndo tsi ra naha tumaa tyaa yahvi ndo tsi ra Cristo.

<sup>6</sup> Jaha tyiñu vaha ndo. Ñavin tsa nyehé ñi tsitoho ndo tan vaha jaha tyiñu ndo tan catyi tsitoho ndo tyin vaha xaan ndo. Jaha tyiñu vaha nyooho tumaa tsatyin tyiñu ra Cristo javahá ndo. Tacan tan cua javaha ndo cuhva cuñí Nyoo tsihin tsa ñi iñi añima ndo. <sup>7</sup> Jaha tyiñu ndo tsihin tsa si cuñí ndo tumaa tun jahá tyiñu ndo cuenda Jutu Mañi yo tan ñavin tsa cuenda nyivi. <sup>8</sup> Tyin tsitó ndo tyin Jutu Mañi yo cua tyahvi ra tsi intuhun intuhun ndo tun javahá ndo tsa vaha, vasu ndi maa musu cuví ndo o ñavin musu cuví ndo.

<sup>9</sup> Tan nyooho tsa iyó musu, javaha ndo tsa vaha tsihin musu ndo. Tan ña jayuhvi ndo tsi ñi. Tyin tsitó ndo tyin nuu Jutu Mañi yo iin ñi cuví ndo tsihin musu ndo, tyin ña sin caá iin nyivi tan inga ñi nuu ra.

#### Tunyee iñi tsa tsahá Nyoo tsi yo tsa yihí yo cuenda ra

<sup>10</sup> Tan vityin coo ndo tsihin tunyee iñi tsa tsahá Jutu Mañi yo tsi ndo tyin iin ñi cuví ndo tsihin ra. Tyin cahnu xaan tunyee iñi iyó tsi ra. <sup>11</sup> Jaha cuenda vaha ndo tsi ndo tsihin tunyee iñi tsa tsahá Nyoo tsi ndo tumaa jahá cuenda iin andaru tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu. <sup>12</sup> Yacan jaha vaha ndo cuenda tsi ndo tsihin tunyee iñi Nyoo tyin cañi tahan yo, maa tyin ñavin tsihin ra ñuu ñayivi, tyin cañi tahan yo tsihin nu ña vaha tsa ña cuví nyehe yo. Tan nu ican yihí ndaha tsi nyivi caquiñi. <sup>13</sup> Yacan cuenda jaha cuenda vaha ndo tsi ndo tsihin tandihí tsa

jatyinyee Nyoo tsi yo. Tyin tacan tan cunyee iñi ndo quivi nducu cuhva nu ña vaha tsi ndo. Tan ña cua ndu-va ndo jaha nu. <sup>14</sup> Ñihi cunyaa ndo tsihin tuhun Nyoo tumaa nyaá listu vaha iin andaru tun tsa yihí cinturón tsitsi ra. Tan caca vaha ndo ityi tsa nditsa cuví ityi Nyoo tyin yacan cuví tsa tyasí yiqui nyica ndo tumaa iin andaru iyó tsa tyasí yiqui nyica ra tan nduve náa taahán ra. <sup>15</sup> Tacan tucu nyooho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cuhun ra cuatyí. Tacan taahán tsi janduvaha ndo tsi ndo tsa cua cahan ndo tuhun Nyoo tsihin nyivi. <sup>16</sup> Tan cási vaha ndo tsi ndo tumaa tyasí ra andaru tsi ra tsihin iin caa tan ña nañi ndaha nduva tsa cayú tsi ra. Tacan taahán tsi cunyecu ñihi ndo tsihin tsa tsinú iñi ndo, tan ña cuhva ndo tsa jaha canaa nu ña vaha tsi ndo. <sup>17</sup> Ra andaru iyó iin caa ndasí jiñi ra tan jacacú can tsi ra, tacan cuví tsa jacacu Nyoo tsi yo. Cuatyíñu vaha ndo tuhun Nyoo tyin yacan cuví tumaa mityi tsahá Tatyí Ii Nyoo tsi ndo. <sup>18</sup> Tan ña jandihí ndo tsa tsicán tahvi ndo tsi Nyoo tan tsa caahán ndaahvi ndo tsihin ra tumaa jaquihín ityi maa Tatyí Ii ra tsi ndo. Yacan cuenda ña ndu uvi iñi ndo tan coo nyito vaha ndo, ndacan tahvi ndihí ndo tsi Nyoo tsa cuenda tandihí nyivi yihí cuenda ra. <sup>19</sup> Tan ndacan tahvi ndo tsi ra tsa cuenda yu, na ñihi ca yu tuhun cahan yu, tan na ña nayuhvi yu jacoto yu tuhun ra Cristo tsi nyivi. Tyin tsanaha yihí xeehe tuhun ihya tan vityin cua nacoto ñi itsi. <sup>20</sup> Tan tsa cuenda tsa jacotó yu tuhun ra Cristo, nyí yu vehe caa ihya vityin. Ndacan tahvi ndo tsa cuenda yu, na ña nayuhví yu, tan cahan yu cuhva taahán maa tsi cahan yu.

#### Nu jacuhún ra Pablo tsi ra Tíquico nu yucú nyivi yihí cuenda ra Cristo

<sup>21</sup> Tan ra Tíquico, ra yañi yo, cua nacatyí tuhun ra tandihí tuhun yu tsihin ndo. Ñi xaan iñi ra jahá tyiñu ra cuenda Jutu Mañi yo, tan cuñi xaan yo tsi ra.

<sup>22</sup> Jaquitsí yu tsi ra nu yucú ndo tyin jacoto ra tsi ndo nácaa iyó ndi ihya, tyin tacan tan ndu iin iñi ndo.

<sup>23</sup> Na cuhva Nyoo Jutu yo tan Jutu Mañi yo Jesucristo tsa taxin coo añima tandihí ra yañi yo naha ra tan na tsinu ca iñi ra naha tsi ra tan na cuñi ra naha tsi nyivi.

<sup>24</sup> Tan na nasoco xaan Nyoo tsi tandihí nyooho tsa cuñi tsi Jutu Mañi yo Jesucristo. Ña jandihí ndo tsa cuñi ndo tsi ra.

Tan na cuví tsi tacan ñi.

# Filipenses

**Nyií ra Pablo vehe caa, tan javahá ra iin carta tan jacuhun ra tsi nyivi yihí cuenda Nyoo ñuu Filipos**

**1** Yuhu ra Pablo tan ra Timoteo, cuví ndi musu ra Jesucristo. Tan javahá ndi carta ihya tsa cuenda tandihí ndo tsa yucú ndo ñuu Filipos tan cuví ndo nyivi cuenda Nyoo tan iin ñi cuví ndo tsihin ra Cristo. Tan yacan jaquitsí ndi carta ihya tsi tandihí ndo tsihin ra cuví ityi nuu tsihin nyivi vehe ñuhu naha ra, tan tsihin ra jahá tyiñu vehe ñuhu naha ra. <sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima.

**Nu tsicán tahvi ra Pablo tsa cuenda ñi yihí cuenda Nyoo ñuu Filipos**

<sup>3</sup> Tandihí ñi tsaha tsa nducuhún iñi yu tsi ndo, nacuhvá xaan yu tyahvi nyoo tsi Nyoo tsa cuenda ndo. <sup>4</sup> Tan tandihí tsa tsicán tahvi yu tsi Nyoo tan tsicán tahvi yu tsa cuenda tandihí ndo tsihin tsa sñi cuñí añima yu. <sup>5</sup> Tyin nda quivi jihna tsa tsiñi ndo tuhun ra Cristo tan nda vityin tan ña jandihí ndo tsa jatinyeé ndo tsi yu. Tyin iin caa ñi jacotó yo tuhun ra Jesucristo tsi nyivi. <sup>6</sup> Tsitó vaha yu tyin tumaa tsa quitsahá javahá Nyoo tsa vaha tsitsi añima ndo, tacan cua javaha ca ra nda cuanda quivi quitsi ra Jesucristo inga tsaha. <sup>7</sup> Taahán tsi tsa caca iñi yu tacan tsa cuenda ndo, tyin cuñí xaan yu tsi ndo. Tyin iin caa ñi nasocó Nyoo tsi yo. Vasu ndi maa tsa nyií yu vehe caa ihya, tan vasu ndi maa cahun yu nuu ra cumí tyiñu naha ra, maa tyin jacotó yo tuhun Nyoo tsi ra yucú vehe caa ihya naha ra, tan tsihin ra cumí tyiñu naha ra, na coto ra naha tyin nditsa tuhun ra Cristo. <sup>8</sup> Nyoo tsitó ra tyin cuñí xaan yu tsi tandihí nyooho tumaa tsa cuñí maa ra Jesucristo tsi ndo. <sup>9</sup> Tan tsicán tahvi xaan yu tsi Nyoo na cuñi ca ndo tsi ra tan na cundahvi ca iñi ndo tsi nyivi. Tan naco ca tsa nyityi Nyoo tsi ndo, tan cutuñi ca iñi ndo, <sup>10</sup> tyin tacan tan cuví ñihi ndo tsa vaha tsi Nyoo. Tan ña cua coo ca cuatyí ndo tan cuví coo vaha ndo tsihin tuhun Nyoo nda cuanda quivi quitsi ra Cristo. <sup>11</sup> Maa ra cua jatinyeé tsi ndo. Tan tacan ñi cua javaha ndo maa ñi maa tsa vaha, tan tsa ndaa. Tacan tan cua jacahnu nyivi tsi Nyoo tyin cahnu xaan ra cuví ra.

**Maa ñi maa tyiñu Nyoo javahá ra Pablo tyin iyó ra Cristo añima ra**

<sup>12</sup> Yañi, cuñí yu tsa coto ndo tyin tandihí tundoho taahán yu, jatinyeé xaan tsi tyin nducuaaha ca nyivi tsinú iñi tuhun Nyoo. <sup>13</sup> Tan tandihí andaru tsa iyó vehe

ra cuví rey tan tandihí nyivi iyó ihya tsitó ñi tyin nyií yu vehe caa tsa cuenda tsa nyicún yu tsi ra Cristo. <sup>14</sup> Tan cuaha xaan ra yañi yo cuenda Jutu Mañi yo naá tsa yu-uhví ra naha tsa nyehé ra naha tyin jatinyeé Nyoo tsi yu nu nyií yu vehe caa. Yacan cuenda jañihí ca ra naha caahán ra naha tuhun Nyoo tsihin nyivi.

<sup>15</sup> Tan nditsa tyin yihí ra naha, caahán ra naha tuhun ra Cristo tsa cuenda tyin cuñí ra cunyicun nyivi tsi maa ra naha. Tan yihí tucu ra naha caahán ra naha tuhun ra Cristo tsihin nyivi maa tyin tsihin tsa ñi iñi ra naha.

<sup>16</sup> Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsí tsi yu ihya. Tyin cahan yu tuhun ra tan jacotó yu tsi nyivi tyin nditsa tsa jacacú ra tsi yo. Tan tsa cuenda tsa cuñí ra naha tsi ra Cristo, yacan caahán ra naha tuhun ra. Maa tyin inga ra can naha ra ñavin tsa ñi iñi ra naha tan caahán ra naha tuhun ra Cristo, tyin cuñí ra naha na cunyicun cuaha nyivi tsi ra naha tan cuñí ra naha vacu nducu ra naha tsi yu nu nyií yu vehe caa ihya. <sup>18</sup> Tan ña ndihí iñi yuhu tatun juhva ra naha caahán ra naha tuhun ra Cristo tsihin tsa ña ñi iñi ra naha. Maa tyin yuhu sñi xaan cuñí yu tyin tuhun ra Cristo caahán tandihí ra naha, cuví ñi tsa ñi iñi ra naha caahán ra naha o ñavin.

Tan ndusi ca cuñí yu <sup>19</sup> tyin tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatinyeé xaan Tatyí Ii ra Cristo tsi yu. <sup>20</sup> Tsitó vaha yu tyin Nyoo cua jatinyeé ra tsi yu tan ña cua nducahan nuu yu, tan ña cua nayuhvi yu cahan yu tuhun ra Cristo tsihin tsa ñi iñi yu. Tan ña ndihí iñi yu, an coo ca yu ñayivi, o cúu yu, maa tyin cuñí yu cahan yu tuhun ra, tahan ñi cuhva tsa tuhvá yu caahán, na nyehe nyivi cuhva iyó yu tan coto ñi tyin ra Cristo cahnu xaan ra cuví ra. <sup>21</sup> Tyin tsa cuenda yuhu ñayivi tsa iyó yu vityin, ñayivi ra Cristo cuví. Maa tyin tatun cúu yu, cua ñihi yu tsa sñi caa tsa iyó gloria. <sup>22</sup> Tan tatun coo ca yu, vaha xaan. Tyin tacan tan cuví jañihi ca yu jahá tyiñu yu tyiñu Jutu Mañi yo. Tan cua cuví tsi tsa vaha tsa cuenda ra. Yacan cuenda ña tsitó yu nda ityi cahun yu, a cúu yu, a cahun yu cacahan ca yu tuhun Nyoo tsihin nyivi, ña tsitó yu. <sup>23</sup> Yñi xaan cuñí yu tan quihin yu ndáa ityi cahun yu tyin tsa cuñí yu cahun yu cunyaa yu tsihin ra Cristo. Tyin vaha ca yacan. <sup>24</sup> Maa tyin tsa cuenda nyooho, vaha ca tsa ña cúu naha yu tyin tacan tan cuví cunyaa yu tsihin ndo tan coto ca ndo tuhun Nyoo. <sup>25</sup> Yacan cuenda tsitó yu tyin cua ndoo yu juhva ca quivi ihya. Tyin cuñí tsi tsa jatinyeé ca yu tsi ndo tan cuví cahun ndo ityi nuu ca tan cusñi ca iñi ndo tsihin tsa tsinú iñi ndo tsi Nyoo. <sup>26</sup> Tacan tan cua nyehe ndo tsi yu inga tsaha, tan sñi

xaan ca cua cuñi ndo tsa cuenda yu tyin iin caa ñi iyó yo tsihin ra Cristo.

<sup>27</sup> Cuñi tsi tsa coo yo cuhva taahán tsi coo nyivi yihí cuenda ra Cristo. Vasu nyaá yu tsihin ndo, a cañi nyii yu, maa tyin cuñi yu coto yu tuhun ndo tyin nyooho vaha cuahán ndo tsihin Nyoo. Tan iin caa ñi jahá tyiñu tandihí ndo tyin tacan tan cua tsinu iñi nyivi tuhun ra Cristo. <sup>28</sup> Maa tyin nyivi xaas iñi tsi ndo, cuaha xaas tsa cua jacuu ñi tsi ndo maa tyin ña nayuhvi ndo. Tyin tsa tacan, catsi xaas janahá tsi tyin cunaa ñi can. Tan jaha tucu tsi tyin tsa cacu nyooho jahá Nyoo. <sup>29</sup> Tyin tsahá ra ndatu tsa tsinú iñi tandihí yo tsi ra Cristo, tan tacan tucu tsahá Nyoo ndatu tsa nyehé yo tundoho tsa cuenda maa ra Cristo. <sup>30</sup> Iin caa ñi nyehé yo tundoho tan jacotó yo tuhun ra Cristo. Tan tsa tsitó ndo nácaa nyehé yu tundoho, tan vityin tsitó tucu ndo tyin ña jandihí yu tsa caahán yu tuhun Nyoo.

### Cuca xaas ra Cristo, maa tyin quitsi cúu ra tumaa iin ra ndaahvi

**2** Nditsa tyin ra Cristo jandu iin xaas ra iñi yo tsa iin ñi cuví yo tsihin ra. Tan vaha cuñi yo tsa cuenda tsa cuñi ra tsi yo. Tan nditsa tucu tyin iyó Tatyí Ii Nyoo tsihin yo. Tan nditsa tucu tsa ndaahvi cuñi yo nyehé yo tsi nyivi tahan yo. Tatun nditsa tandihí yacan, <sup>2</sup> cuhva ndo tsa cusii ca iñi yu tsihin tsa vaha iyó ndo. Tan cuñi tahan ndo tsi ndo tumaa tsa cuñi ra Cristo tsi yo. Tan iin ñi cuhva caca iñi ndo. Tan iin ñi tsa vaha javaha ndo. <sup>3</sup> Ña javaha ndo maa ñi tsa jatinyee tsi maa ndo, javaha ndo tsa vaha tsi inga nyivi. Tan náa javaha ndo, ña cahnu jaha ndo tsi ndo. Ndaahvi jaha yo tsi yo. Tan intuhun intuhun yo na jaha yo tyin vaha ca inga nyivi tan ñavin ca maa yo. <sup>4</sup> Tan intuhun intuhun yo caca iñi yo tsa cuenda tsa vaha tsi inga nyivi, tan ñavin tsa cua jatinyee tsi maa ñi maa yo.

<sup>5</sup> Caca iñi yo tumaa tsicá iñi maa ra Cristo Jesús. <sup>6</sup> Tyin nu quitsi tsi tsanaha tsa ndi cumañi ca quitsi ra nu ñuhu ñayivi, cuví ra tahan ñi maa cuví Nyoo. Maa tyin ña tsicá iñi ra tsa naco ra yacan. <sup>7</sup> Tan tyaá tsiyo ra tandihí tunyee iñi ra tan tandihí tsa cuca ra. Tan quitsi ra nanduví ra iin nyivi ndaahvi nu ñuhu ñayivi ihya quivi tsa cacu ra. <sup>8</sup> Tan tsa nanduví ra iin rayii, tan ndaahvi jahá ra tsi ra tan tyaá yahvi vaha ra tsi Nyoo nda cuenda tsahá ra tsa cahñi nyivi tsi ra nu cruu. Tumaa iin ra caquiñi, tacan jahá ñi tsi ra, tan tahan ra ticanuu tyin tsahñi ñi tsi ra nu cruu. <sup>9</sup> Yacan cuenda Nyoo jacahnú xaas ra tsi ra. Tan tsahá Nyoo iin sivi tsi ra, iin sivi tsa cahnu xaas ca cuví tan ñavin ca tandihí sivi. <sup>10</sup> Tyin tatun tsiñi yo sivi ra Jesucristo, tandihí yo tan cua cuiñi tsiti yo. Tan tandihí tucu tsa iyó andivi, tan tsa iyó nu ñuhu ñayivi, tan tsitsi ñuhú, tandihí yacan cua jacahnú tsi ra. <sup>11</sup> Tyin tandihí tsa iyó, cua naco to tan cua cahan tyin ra Jesucristo cuví ra ndacá ñaha tsi tandihí maa tsa iyó. Tacan tan cua nyehé tsi tyin cahnu xaas ca cuví maa Nyoo Jutu yo.

### Nyivi yihí cuenda Nyoo cuví ñi tumaa iin ñuhu tsa jandunditsín nu ñuhu ñayivi ihya

<sup>12</sup> Yacan cuenda, yañi tsa cuñi xaas yu, tumaa tsa tyaá yahvi ndo tsi yu quivi tsa tsinyii yu tsihin ndo, tacan ñi taahán tsi tyaá yahvi ndo tsi yu vasu ndi maa tsa cañi nyii yu vityin. Nducu ndo cuhva na nyehé nyivi tyin nditsa tsa jacacú Nyoo tsi yo. Tan jaha vaha ndo cuenda cuhva coo ndo tsihin ra. <sup>13</sup> Tyin maa Nyoo tyihí tsa vaha añima ndo. Tan jatinyee ra tsi ndo tyin tacan tan cuví tyaá yahvi ca ndo tsa caahán ra tan javahá ndo cuhva cuñi ra.

<sup>14</sup> Tatun cua javaha ndo náa tsa cua javaha ndo, nducu jihna ndo cuhva tsa ña cahan yuhu tahan ndo. Tan ña cañi tahan ndo. <sup>15</sup> Tacan tan ña cua coo cuatyí ndo. Taahán tsi cuvi ndo nyivi cuiti iyó, taahán tsi cuvi ndo nyivi nduve cuatyí, tumaa tsa taahán tsi coo nyivi cuenda Nyoo tyañu nyivi caquiñi ihya. Cuñi tsi tsa cuví ndo tumaa iin ñuhu tsa jandunditsín nu naa nu ñuhu ñayivi ihya. <sup>16</sup> Cahan yo tuhun Nyoo tsihin nyivi tyin yacan tsahá ñayivi nyito tsa iyó yo. Javaha ndo tacan, tan quivi cua quitsi ra Cristo, yuhu ñi vaha cua cuñi yu tsa cuenda ndo, tyin ña jacotó cuatu yu tuhun Nyoo tsi ndo. <sup>17</sup> Tan vasu cahñi nyivi tsi yu tsa catyí tuhun Nyoo, maa tyin cua cuvi tsi iin tsa cua jamañi yu tsi Nyoo tan tsihin tsa tsinú iñi ndo tsi ra. Tan iin caa ñi cusii iñi yo tsihin ra. <sup>18</sup> Tan yacan cuenda taahán tsi tsa cusii iñi ndo tsihin yu.

### Nu jacuhun ra Pablo tsi ra Timoteo tan ra Epafrodito ñuu Filipos

<sup>19</sup> Tatun Jutu Mañi yo tan cuñi ra, cua jaquitsi yu tsi ra Timoteo naquitsi nyehé ra nu yucú ndo. Tan quivi tsa ra inga tsaha nu nyii yu sii xaas cua cuñi yu. Tyin cua nacatyí tuhun ra tsihin yu nácaa yucú ndo. <sup>20</sup> Tyin intuhun ñi ra tsicá iñi tumaa tsa tsicá iñi yu tsa cuenda ndo. Tan yoñi inga ra tsa tsicá iñi tacan. <sup>21</sup> Tyin tandihí ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñi ra Cristo Jesús. <sup>22</sup> Maa tyin tsitó ndo tyin ra Timoteo, vaha cuahán ra tsihin Nyoo, tan tsa cuenda yuhu, cuví ra tumaa sehe yu. Tan jatinyee xaas ra tsi yu tsa caahán ndi tuhun ra Cristo tsihin nyivi. <sup>23</sup> Tan nyaá tsa cua jaquitsi yu tsi ra nu yucú ndo. Maa tyin nda coto jihna yu nácaa cua cahan ra cumi tyiñu, tatun ña naha ca cunyii yu ihya. <sup>24</sup> Tyin tsitó vaha yu tyin Jutu Mañi yo numi ñi cua cuhva ra tsa quitsi nyehé yu nu yucú ndo.

<sup>25</sup> Tan ra Epafrodito, yañi yo tsa jaquitsi ndo tsa jatinyee tsi yu tsihin tyiñu tsa javahá yu, iin caa ñi cuví ndi andarú ra Cristo tsihin ra. Tan vityin cua jaquitsi nuhu yu tsi ra inga tsaha nu yucú ndo. <sup>26</sup> Cuñi xaas ra quitsi nuhu ra nu yucú ndo, tyin tsicá xaas iñi ra tsa tsitó ndo tyin nacuhvi ra. <sup>27</sup> Nditsa ñihi xaas nacuhvi ra tan tsa cua cúu maa ra cuví. Maa tyin Nyoo cundahvi iñi tsi ra, tan tsii tucu yuhu tyin na ña nducuihya xaas ca iñi yu. <sup>28</sup> Yacan cuenda, yuhu cuñi xaas yu tsa quitsi nuhu ra nu yucú ndo. Tyin tacan tan sii xaas cua cuñi



ndo tsa cua nyehe ndo tsi ra inga tsaha. Tan yuhu ña cua coo ca yu tucuihya iñi, tyin cua nyehe ndo tyin ra Epafrodito iyó vaha ra. <sup>29</sup> Yacan cuenda, naquihin ndo tsi ra tsihin tsa sñ cuñi ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayivi tsi ra yañi yo naha ra tsa iyó tumaa cuhva iyó ra. <sup>30</sup> Tyin tsa yatyin maa cúu ra tsa cuenda tsa javahá ra tyiñu ra Cristo. Tyin vasu ndi maa cuuhví xaan ra, maa tyin ña cuñi ra jandihi ra tsa jatinyeé ra tsi yu. Tyin maa ndo ña cuví quitsi ndo tan jatinyeé ndo tsi yu tyin cañi xaan yucú ndo.

### Nu janahá ra Pablo nácaa nduvaha yo nuu Nyoo

**3** Tan vityin yañi, cusñi iñi ndo tsihin Jutu Mañi yo. Tsa cuenda yuhu nduve tsihi cuví tsi tsa cua tyaa yu inga tsaha tuhun ihya tsi ndo. Tyin tsa vaha tsi maa ndo cuví tsi. <sup>2</sup> Jaha ndo cuenda tsi ndo tsihin ra icá tumaa icá ina, ra caquiñi naha ra. Javahá ra naha tsa ña vaha. Tyin catyí ra naha tyin cuñi tsi cunyaa tuñi Nyoo tsi yo, tacan tan cacu yo. <sup>3</sup> Maa tyin yoo nyisó yo tuñi tsa nditsa tyin maa Nyoo tyaa tuñi ra tsitsi añima yo quivi nacuhva cuenda yo tsi yo tsi ra. Tan jacahnú yo tsi ra tsihin Tatyí Ii ra tsa iyó añima yo. Tan cusñi iñi yo tyin cuenda maa ra Cristo Jesús yihí yo. Tan ña nyitá iñi yo tyin cacu yo tsihin náa cunyaa cuñu ñuhu yo. <sup>4</sup> Tun tsatyin nditsa tsa cuví cacu yo tsihin tsa javahá yo yacan, jihna ca yuhu tsa yahá cacu tan ñavin ca tandihi ra tsa javahá yacan vityin. <sup>5</sup> Tyin una quivi yu tan tsinya tuñi Nyoo tsi yu. Tyin tata ra Israel cuví yu. Tan tata ra Benjamín sehe ra Israel cuví ndihi yu. Juvín ñi tata nyivi caahán yuhu hebreo cuví yu. Yacan cuenda nditsa tyin hebreo cuví yu. Tan inga tucu tuhun, tyaa yahvi xaan yu ley tsahnu quivi can, tyin ra fariseo cuví yu. <sup>6</sup> Tan tsa cuenda tsa cuñi yu tyaa yahvi yu ley, tan tsinya ndaha xaan yu tsi ñi yihí cuenda ra Cristo. Tan tyaa yahvi yu tandihi maa ley tsahnu, tyin nducú xaan yu cuhva tyaa yahvi yu tsa caahán ley can. <sup>7</sup> Maa tyin tandihi tsa cuñi maa yu tyin cahnu xaan cuví quivi can, vityin nduve ca yahvi nyaá yacan tsa cuenda yu. Tyin vityin maa ra Cristo cuví ra tsa nyitá iñi yu. <sup>8</sup> Tan inga tucu tuhun, tandihi tsa javahá yu, tsitó maa yu tyin nduve ca yahvi nyaá yacan tyin tsa nacotó yu tsi ra Cristo Jesús, Jutu Mañi yu. Tyin yacan cuví tsa cuca xaan ca. Tan tsa cuenda ra Cristo tandihi tsa javahá yu quivi quitsi tsi ityi tsata, cuví tsi iin tsa cuatu ña vityin. Yacan cuenda tyaa tsiyo yu tandihi can. Tyin cuñi yu coto vaha ca yu tsi ra Cristo. <sup>9</sup> Tan cuñi yu ndu iin ca yu tsihin ra. Tsinú iñi yu tyin jacacú ra tsi yu, yacan cuenda nduvahá iyó yu nuu Nyoo. Ñavin tsa cuenda tsa tyaá yahvi yu ley Nyoo tan vaha iyó yu, maa tyin tsa cuenda tyin tsinú iñi yu tsa caahán ra, tyin jacacú ra tsi yo tan vaha iyó yu nuu ra. Tan tsa cuenda tsa tsinú iñi yo, ra Cristo naquihín cuenda ra tsi yo. <sup>10</sup> Tsa coto vaha ca yu tsi ra Cristo, yacan cuví tsa cuñi yu. Tyin Nyoo janandotó ra tsi ra Cristo tsihin tunyee iñi ra. Tan cuñi yu tyin coo ca tunyee iñi can tsi yu. Tan cuñi yu cunyeé iñi yu tundo ho tsa taahán tsi nyehé yu tsa cuenda ra. Tan cuñi yu nacuhva cuenda yu tsi yu tumaa maa ra Cristo nacuh-

va cuenda ra tsi ra tan tsihi ra. <sup>11</sup> Tyin nducú xaan yu cuhva nandoto yu tsa yaha cúu yu.

### Nacaa cunyicun ñihi ca yo tsi Nyoo

<sup>12</sup> Ña catyí yu tyin nduve ca tsa cumañi tsi yu, tan vaha xaan yu. Maa tyin cuahán yu ityi nuu ca. Tyin cuñi yu naquihin yu tsa cahán ra Cristo tyin cuhva ra tsi yu. Tyin jihna ca maa ra cahán tsihin yu. <sup>13</sup> Yañi, ña catyí yu tsihin ndo tyin tsa ñihi yu tandihi tsa vaha can. Maa tyin iyó intuhun ñi tsa javahá yu; nacoó yu ityi tsata tandihi tsa javahá yu, tan jañiñi yu cuhun yu ityi nuu ca. <sup>14</sup> Tyin tacan tan tsaá yu nu nyaá tsa taahán tsi tsi yu. Tyin caná Nyoo tsi yo nda gloria. Tyin naquihin yo tsa catyí ra tsihin yo tyin cuhva ra tsi yo tsa cuenda tsa iin caa ñi iyó yo tsihin ra Cristo Jesús.

<sup>15</sup> Tacan taahán tsi caca iñi tandihi nyivi tsa ñihi nyaá tsihin Nyoo. Maa tyin tatun ñavin tacan tsicá iñi ndaa nyoo ho, Nyoo cua cuhva ra tsa cutuñi iñi ndo. <sup>16</sup> Maa tyin iyó iin tsa cuñi tsi tsa tyaa yahvi vaha yo, tuhun tsa tsa yahá jacotó Nyoo tsi yo.

<sup>17</sup> Yañi, javaha ndo cuhva iyó yu tan cuhva caahán yu. Tan nyehe vaha ndo cuhva iyó nyivi iyó cuhva janahá ndi tsi tandihi nyivi. <sup>18</sup> Tyin cuaha xaan tsaha caahán yu tsihin ndo, tan vityin cua cahan yu inga tsaha tsihin tsa cuihya cuñi yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuví ra naha tyin tumaa tsa ña cahnu cuví tsa tsihi ra Cristo nu cruu jahá ra naha. <sup>19</sup> Maa tyin quivi quitsi ra Cristo inga tsaha, ra ican naha ra cua cuhun anyaya. Tyin javahá ra naha cuhva cuñi cuñu ñuhu ra naha. Tan cahnu jahá ra naha tsi ra naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayivi ihya. <sup>20</sup> Maa tyin yoo nda gloria cuví nu iyó ñuu yo. Tan ndatú yo quivi quitsi nyico Jutu Mañi yo Jesucristo, ra jacacú tsi yo. <sup>21</sup> Tan cua quihin ra cuñu ñuhu ndaahvi yo, tan cua jananduvi ra tsi yo tumaa cuñu ñuhu maa ra. Tan cua javaha ra tacan tsihin tunyee iñi tsa iyó tsi ra. Tan juvín ñi tsihin tunyee iñi can ndacá ñaha ra tandihi tsa iyó.

### Tacan ñi maa na cusñi iñi yo tsihin Jutu Mañi yo

**4** Yañi, cuñi yu tsi ndo. Tan cuñi xaan yu nyehe yu tsi ndo. Sñ xaan cuñi yu tsihin ndo. Tan tsitó yu tyin ña cahán cuatu yu tuhun Nyoo tsihin ndo. Tyin ñi xaan iñi ndo nyicún ndo tsi ra. Tan jañihi ca ndo cunyicun ndo tsi ra.

<sup>2</sup> Tan vityin tsicán yu tsi ña Evodia, tan ña Síntique, na ña cahan yuhu tahan ñi, tan coo vaha ñi cuhva cuñi Jutu Mañi yo. <sup>3</sup> Tan yoo ho, yañi, tsa iin caa ñi jahá tyiñu tsihin yu, cuñi yu tyin jatinyeé un tsi ñi cuhva yo ihya. Tyin juvín ñi jatinyeé xaan tsi yu nu cahán yu tuhun Nyoo, maa tyin ñavin intuhun ñi yu jatinyeé ñi, tyin jatinyeé ndihi ñi tsi ra Clemente tan tsi tandihi ca ra tsa cutahán tsihin ndi. Tan sivi tandihi ñi tsa nyaá nuu tutu Nyoo nda gloria.

<sup>4</sup> Cusñi iñi ndo tsihin Jutu Mañi yo tandihi ñi quivi. Tan caahán yu tsihin ndo inga tsaha, cusñi iñi ndo tsihin ra.

<sup>5</sup> Coo vaha ndo tyin tacan tan nyehe tandihí nyivi tyin nditsa tyin nyivi vaha cuví ndo. Tan nducuhun iñi ndo tyin tsa yatyin cua quitsi Jutu Mañi yo.

<sup>6</sup> Tan ña caca iñi ndo náa taahán ndo. Iin nyita ñi ndacan tahvi ndo tsi Nyoo náa ndihí tundoho tsa iyó ndo. Tan ndacan ndo tsi ra nacuhva ra tandihí tsa tsiñí ñuhu tsi ndo. Tacan tan ña nacao ndo tsa tsahá ndo tyahvi nyoo tsi ra. <sup>7</sup> Tan Nyoo cua cuhva ra tsa taxin coo añima ndo. Tan cahnu xaan tsa vaha cuví yacan. Tan yoñi cuví cutuñi iñi nácaa tsa cahnu tsi. Tan tsa taxin iyó tsi Nyoo cua jaha cuenda añima ndo tan tsihin tsa tsiñi tuñi jiñi ndo, tyin iin caa ñi iyó ndo tsihin ra Cristo Jesús.

#### Na caca iñi yo maa ñi maa tsa vaha

<sup>8</sup> Nu cua ndihí tuhun, yañi, caca iñi ndo maa ñi tsa nditsa, maa ñi tsa ndaa, tsa cuiti iyó, tan tsa ndoo iyó. Ña caca iñi ndo tsa caquiñi. Caca iñi ndo tsa si caa, maa ñi tsa vaha, tan maa ñi cuhva cuvi jacahnu ndo tsi Nyoo.

<sup>9</sup> Javaha ndo tsa jacuahá yu tsi ndo. Tuhun tsa cahán yu tsiñi ndo, tan tsa javahá yu nyehe ndo, yacan taahán tsi javaha ndo. Tan Nyoo ra tsahá tsa taxin coo añima yo, cua cunyaa ra tsihin ndo.

#### Nu jatyinyeé nyivi ñuu Filipos tsi ra Pablo tsihin tsa iyó tsi ñi

<sup>10</sup> Si xaan cuñi yu. Tan jacahnú yu tsi Jutu Mañi yo tsa cuenda tsa jatyinyeé xaan ndo tsi yu inga tsaha. Tan tsitó yu tyin ndihí ñi tsaha tan cuñi ndo jatyinyeé ndo tsi yu. Maa tyin tsicoo juhva quivi ña tsahá tsi cuhva tsa jatyinyeé ndo tsi yu. <sup>11</sup> Ñavin tyin iyó tsa tsiñí ñuhu tsi yu tan caahán yu tsihin ndo, tyin yuhu tsa cutuhva maa yu tsa cusí iñi yu tsihin náa tsa iyó tsi yu. <sup>12</sup> Tyin yuhu tsa tsitó maa yu nácaa coo ndaahvi yu tan nácaa

coo cuca yu. Tyin tsa cañ maa yu tun iyó tsa catsi yu a nduve, tyin tun ndoo ca tsa catsi yu, quivi tsa iyó, o nduve tsa catsi yu, ndoo maa yu vaha. <sup>13</sup> Tandihí tan cuví jaha yu tsihin tunyee iñi tsa tsahá ra Cristo tsi yu. <sup>14</sup> Tan nyooho yañi, vaha xaan tsa javahá ndo tyin jatyinyeé ndo tsi yu quivi tsa tsicoo yu tundoho.

<sup>15</sup> Tsa tsitó nyooho nyivi Filipos nácaa cuví quivi quit-sahá caahán yu tuhun Nyoo tsihin ndo. Tacan tan quee yu Macedonia nu iyó ndo tan cuahán yu cua jacoto yu tuhun Nyoo inga ñuu. Tan nyooho cuvi nyivi tsa jatyinyeé tsi yu tsihin xuhun, tyin vaha xaan cuñi ndo tsa cahán yu tuhun Nyoo tsihin ndo. <sup>16</sup> Tan tsitsi tsa nyíi yu ñuu Tesalónica, ñavin intuhun ñi tsaha jatyinyeé ndo tsi yu. <sup>17</sup> Ñavin tsa tsicá iñi yu tsa jatyinyeé ndo tsi yu, tyin tsa cuñi yu tsa jatyinyeé ndo tsihin tyiñu Nyoo, tacan tan cuaha ca cua nasoco Nyoo tsi ndo. <sup>18</sup> Tan vityin, nduve tsa cumañi tsi yu. Nda cua ndoo ca tsa jaquitsi ndo tsi yu tsihin ra Epafrodito. Tan tsa tsahá ndo can cuví tsi tumaa xico tami, xico vaha tsa tsaa nuu Nyoo. Yacan cuví tsa taahán iñi ra. <sup>19</sup> Tan Nyoo cua cuhva ra tandihí tsa tsiñi ñuhu tsi ndo. Tan tandihí tsa cuca tsa iyó tsi ra Cristo nda gloria tandihí yacan tan cua cuhva ra tsi ndo. <sup>20</sup> Na jacahnu yo tsi Nyoo Jutu yo tacan ñi maa. Tan na cuvi tsi tacan ñi.

#### Nu jacuhún ra Pablo nacumi tsi nyivi ñuu Filipos

<sup>21</sup> Tsahá yu nacumi tsi tandihí ndo tsa yihí ndo cuenda ra Cristo ñuu Filipino. Tan jaquitsi tucu ra yañi yo tsa yucú tsihin yu ihya nacumi tsi ndo. <sup>22</sup> Tan nyivi cuenda Nyoo tsa yucú vehe ra ndacá ñaha ñuu Roma ihya, tan tandihí ca nyivi yihí cuenda Nyoo ñuu ihya jaquitsi ñi nacumi tsi ndo.

<sup>23</sup> Na nasoco maa Jutu Mañi yo Jesucristo tsi tandihí ndo.

Tan na cuvi tsi tacan ñi.

# Colosenses

## Nu quitsahá javahá ra Pablo carta

**1** Yuhu ra Pablo cuví yu iin ra tavá tyiñu ra Jesu-cristo, tyin tacan cuñí maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihya tsi nyooho nyivi ñuu Colosas tsa iin iñi yihé cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesu-cristo coo añima ndo.

## Nu tsicán tahvi ra Pablo tsa cuenda nyivi yihé cuenda ra Cristo

**3** Tandihí ñi tsaha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo. **4** Tyin ñihí tuhun ndi tyin tsinú xaan iñi ndo tsi ra Cristo Jesús, tan cuñí xaan ndo tsi tandihí nyivi tsa yihé cuenda Nyoo. **5** Tacan javahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiñi ndo tuhun Nyoo tsa nditsa tyin jacacú ra Cristo tsi ndo tan quitsahá nyitá iñi ndo tsi Nyoo. **6** Tan juven ñi maa tuhun ra Cristo tsa cahan ra Epafra tsihin ndo, yacan nacutyá tandihí ñi ityi, tumaa tsa tsityá tucu tsi nu iyó ndo ihya. Tan cuaha nyivi nacuhvá cuenda ñi tsi ñi tsi Nyoo, tumaa nacuhvá cuenda maa ndo tsi ndo. Tyin quivi tsa tsiñi ndo tuhun ra Cristo tsitō ndo tyin nditsa tsa cuñí Nyoo tsi ndo. **7** Yacan janahá ra Epafra tsi ndo, tyin iin ñi tyiñu Nyoo jahá tyiñu ndi tsihin ra. Tan juven ra cuví musu vaha ra Cristo tsa cuenda ndo. **8** Tan juven ra catyí tuhun tsihin ndi tyin cuñí xaan ndo tsi nyivi tahan ndo, tyin maa Tatyí Ii Nyoo tsahá tsa vaha can coo añima ndo.

**9** Yacan cuenda nda quivi tsa ñihí tuhun ndi tyin tacan javahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiñi tuñi tsa iyó tsi ra tsi ndo, tan na cutuñi iñi ndo jahá Tatyí Ii ra tan coto vaha ndo náa ndihí tsa cuñí ra tyin javahá ndo. **10** Tacan tan cuví coo ndo tumaa taahán maa tsi coo nyivi yihé cuenda Jutu Mañi yo. Tan javaha ndo tumaa cuñí maa ra, tan javaha ndo tandihí nuu tsa vaha tan nacoto vaha ca ndo tsi ra.

**11** Tan tsicán tucu ndi tsi ra na jatynyeé ca ra tsi ndo tsihin tunyee iñi cahnu tsa iyó tsi ra tan ña cundihí iñi ndo tsa yaha ndo tandihí tundoho, tan na cusii iñi ndo.

**12** Tan na cuhva ndo tyahvi nyoo tsi Nyoo Jutu yo, tyin maa ra tsa janduvahá ra tsi yo tyin tacan tan cuví ñihí yo tsa cua ñihí nyivi tsicá nu nditsin, tan cuñí tsi catyí nyivi tsa cuiñi iyó nuu ra. **13** Tyin Nyoo tavá ra tsi yo nu naa tan nacuhvá cuenda ra tsi yo tsi Sehe ra tsa cuñí

xaan ra tyin cundaca ñaha ra tsi yo. **14** Tan jatá ra tsi yo tsihin ñihí Sehe ra tan jahá ra tucahnu iñi tsi yo.

## Tsa cuenda tsa tsihi ra Cristo nu cruu tsacatyí cuatyí yo tan nduvahá iyó yo tsihin Nyoo

**15** Nyoo ña nyehé yo tsi ra. Maa tyin nanduví ra nyivi tan cuví nacoto yo tsi ra. Tan juven ra cuví ra Cristo Sehe Nyoo. Nda ndi cumañi ca tsinú ñuhu ñayivi tan tsa iyó maa ra Cristo. **16** Tan maa ra javahá tandihí tsa iyó andiví tan nu ñuhu ñayivi jahá Nyoo. Javahá ra tsa cuví nyehe yo tan tsa ña cuví nyehe yo. Javahá ra tandihí tatyí vaha tan tatyí ña vaha tsa ndacá ñaha andiví tan nu ñuhu ñayivi ihya. Tan tandihí yacan javahá ra tyin cuatyíñu ra cuhva cuñí ra. **17** Tan tsa iyó maa ra tsa ndi cumañi ca coo tandihí maa tsa iyó. Tan tandihí tsi jahá tyiñu vaha tsi jahá ra. **18** Tan yoo tsa yihé cuenda ra Cristo cuví yo cuñu ñuhu ra, tan maa ra cuví jiiñi tsihin yo, tan tsahá ra tsa coo nyito yo. Tan juven ra cuví tsa nandotō tsa jihna ca, tyin tacan tan quihí ndaha ra tandihí tsa iyó. **19** Tyin Nyoo cuñi ra tsa cuví ra Cristo tumaa cuví maa ra. **20** Tan tsahá ra tsi ra Cristo tsa cúu ra nu cruu tyin tacan tan cuví coo vaha tandihí tsa iyó tsihin ra, tahan ñi tsa iyó nu ñuhu ñayivi tan andiví.

**21** Tahán tsanaha javahá ndo tsa ña vaha tan xaan cuñi ndo nyehé ndo tsi Nyoo. Maa tyin Nyoo jaquitsí ra tsi ra Cristo, Sehe ra tan tsahá cuenda ra cuñu ñuhu ra tan tsihi ra nu cruu. Tan janacoō vaha ra tsi ndo tsihin Nyoo, tan cua nacuhva cuenda ra tsi ndo tsi ra tsihin tsa nduve ca cuatyí ndo tan cuiñi vaha cua coo ndo nuu ra. **23** Yacan cuenda jañihi ca ndo tsinú iñi ndo. Tan cuiñi iñi ndo tyin cua tsa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiñi ndo tyin cua jacacu ra tsi ndo. Tuhun ihya cuví tsa caahán ra naha tanñi cahnu ñuhu ñayivi. Tan yuhu ra Pablo jatynyeé yu caahán yu tuhun ihya tsihin nyivi.

## Nu catyí ra Pablo tyin nyaá siqui ra tsa janahá ra tuhun ra Cristo tsi tandihí nyivi tsicá vehe ñuhu

**24** Vityin sii cuñí yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyivi yihé cuenda ra Cristo tyin maa ra cuaha xaan tundoho nyehé ra tsa cuenda yo tsa cuví yo cuñu ñuhu ra. Tacan tan cua jaquita ndihí yu tundoho tsa nyehé ra. **25** Yuhu cuví iin ra caahán tuhun ra Cristo tyin tacan jatynyeé yu tsi tandihí nyivi yihé cuenda ra. Tyin maa ra Nyoo catyí tsa cahan yu tandihí tuhun ra tsa cuenda tsa vaha tsi ndo. **26** Jacuahá yu tuhun tsa tsicumí xeehe Nyoo tahán

tsanaha, tsa ndi cumañi ca javahã ra ñuhu ñayivi. Tan vityin tsahá ra tsa nacoto nyivi yihí cuenda ra itsi.

<sup>27</sup> Tan nyooho tsa ñavin nyivi Israel cuví cuñí ndihí ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añaima nyooho ñi yihí cuenda ra. Tan tsa cuenda maa ra cua ñihi ndo gloria nu cua coo ndo tsihin Nyoo.

<sup>28</sup> Tuhun maa ra Cristo caahán ndi. Tan tsahá cuenda ndi tuhun ihya tsi tandihí nyivi. Tan jacuahá ndi tsi tandihí ñi na cutuñi iñi ñi, tan cutsa vaha ñi tyin iin ñi cuví ñi tsihin ra Cristo. <sup>29</sup> Tan tsa cuenda tsa cuñí yu tsa cuahnu vaha ñi ñihi xaan jahá tyiñu yu tsihin tunyee iñi ra Cristo tsa tsahá ra tsi yu.

**2** Tan cuñí yu tsa coto ndo tyin tsicá iñi yu tsa cuenda ndo. Tan tsicán tahvi xaan yu tsi Nyoo tsa cuenda tandihí ndo tan tsa cuenda nyivi ñuu Laodicea, tan tsa cuenda tandihí nyivi tsa ñaha ca nyehe tsi yu. <sup>2</sup> Tsicán yu tsi ra na jandu iin ra iñi añaima ndo, tan jandu iin ra tsi ndo tsihin tsa cuñí tahan ndo tsi ndo. Tan na cuhva ra tsa cutuñi vaha iñi ndo nacuenda jaquitsi ra tsi ra Cristo, tyin tacan tan cua nacoto vaha ca ndo tsi ra. Tyin juven tuhun ra Cristo cuví tsa tsicumí xeehe Nyoo tahã tsanaha, tan vityin jacotó ra itsi tsi yo.

<sup>3</sup> Tyin tsi intuhun ñi maa ra Cristo iyó tsa tsiñi tuñi tan tsahá ra itsi tsi yo na cutuñi iñi yo tsi Nyoo. <sup>4</sup> Caahán yu tyehen tsihin ndo tyin tacan tan ña jandavi ñaha nyivi tsi ndo tsihin tuhun tsa sñ natuhún ñi. <sup>5</sup> Vasu nduve yu nyí tsihin ndo, maa tyin ñuhú xaan iñi yu tsi ndo. Tan sñ xaan cuñí yu tsa nducuhún iñi yu cuhva iyó nu yucú ndo tyin vaha xaan icá ndo. Tan tsinú vaha xaan iñi ndo tsi ra Cristo.

<sup>6</sup> Yacan cuenda tumaa natsiny iñi ndo tsi ra Cristo quivi nañihí ndo tsi ra, tacan cuñí tsi coo ndo tsihin ra.

<sup>7</sup> Tan cunyaa naa vaha ndo tsi ra, na cuhva ra tunyee iñi ra tsi ndo. Tan ndu iin ca iñi ndo jahá tsa tsinú iñi ndo tsi ra, tumaa cutuhvá ndo. Tan iin nyita ñi nacuhvá ndo tyahvi nyoo tsi Nyoo.

### Ñayivi nyito tsa tsahá ra Cristo tsi yo

<sup>8</sup> Jaha ndo cuenda tsi ndo coto jandavi ñaha nyivi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyivi tsitó ñi tan tsiñú iñi ñi cuhva tsicá iñi nyivi.

<sup>9</sup> Yacan ña tsjnu iñi ndo tsa caahán ñi tyin ra Cristo juven ra cuví Nyoo tan cuví tucu ra nyivi. <sup>10</sup> Tan tsitu ndo tsihin Nyoo tyin iin ñi cuví ndo tsihin ra Cristo. Tan maa ra ndacá ñaha tandihí tsa ndacá ñaha nu ñuhu ñayivi tan tandihí tatyí tsa ña nyehé yo. <sup>11</sup> Tan tsa iin ñi cuví ndo tsihin ra Cristo, nda quivi natsiny iñi ndo tsi ra, tan nanduví ndo nyivi ra. Maa tyin ña nanduví ndo nyivi ra tsa cuenda tsa tsinyaa tuñi ra cuñu ñuhu ndo, tyin jacacú ra tsi ndo ndaha tsa caquiñi tsa javahá ndo jahá cuñu ñuhu ndo. Tsehe cuví tuñi tsa tyaã ra Cristo tsi ndo: <sup>12</sup> Quivi tsicoondutyã ndo tsitsi ndutyã, tumaa tsa tsihi ndo tsihin ra Cristo tan quihvú ndo tsitsi ñuhu cuví can. Tacan tan nandotó tucu ndo tsihin ra tyin tsinú iñi ndo tyin Nyoo janandotó tsi ra tsihin tunyee iñi ra. <sup>13</sup> Tahã tsanaha cuví ndo tumaa nyivi tsihi jahã

cuatyí ndo, tyin nduve Nyoo nyaá añaima ndo tan ña tsinyaa tuñi Nyoo cuñu ñuhu ndo. Maa tyin vityin Nyoo jahã ra tucahnu iñi tandihí cuatyí ndo. Tan tsahã ra tsa coo ndo ñayivi nyito tsihin ra Cristo. <sup>14</sup> Tyin ley tsahnu jaquitiví tsi cuatyí yo. Tan catyí tsi tyin taahán tsi cuhun yo anyaya tyin ña tyaá yahvi yo itsi. Maa tyin ra Cristo tsihi ra nu cruu jahã Nyoo tan tsindihí tsa cuhun yo anyaya. <sup>15</sup> Tan tsa tsihi ra nu cruu jahã canaa ra tsi nu ña vaha tan tandihí ca tatyí ña vaha tsa ndacá ñaha. Tacan tan tsindacã ra tsi nu nuu tandihí nyivi tan nuu ángel tyin na nyehe ñi tyin cahnu ca cuví maa ra, yacan cuenda jahã canaa ra.

### Na nanducú yo tsa vaha tsa tsahá Nyoo

<sup>16</sup> Yacan cuenda ña taahán tsi tyaa nyivi cuatyí tsi ndo tsa cuenda tsa tsatsí ndo a tsa cuenda tsa tsihi ndo, o tsa cuenda tsa ña naquihín vaha ndo iin quivi vico tsa jacahnú nyivi Israel; cuví ñi quivi tsa nduyutyá yoo, o quivi quitatú ñi. <sup>17</sup> Tandihí tsehe ña jacacú can tsi yo tyin cuví can tumaa tixahñu tsa cua quitsi ra Cristo. Tan vityin tsa yaha quitsi ra, tan juven ra jacacú tsi yo. <sup>18</sup> Ña cuhva ndo tsa casi nyivi nu naquihin ndo tsa tsahá Nyoo tsi ndo. Tyin ndaahvi jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaá ñi tsihin can. <sup>19</sup> Ñi ican ñavin ra Cristo nyicún ñi. Maa tyin yoo tsa nyicún tsi ra cuví yo cuñu ñuhu ra, tan maa ra cuví jiñi tsihin yo. Tan jandu iin ra tsi tandihí yo. Tan jacuahnú ra tsi yo tsihin tunyee iñi ra tumaa cuhva cuñí maa Nyoo.

<sup>20</sup> Tumaa tsa tsihi cuñu ñuhu cuatyí ndo tsihin ra Cristo cuví can. Tan ña ndacá ñaha ca tuhun ñuhu ñayivi ihya tsi ndo. ¿Nacuenda tyin iyó ca ndo tumaa iyó nyivi tsa ña nacotó tsi Nyoo? Tan tyaá yahvi ndo tsa caahán ñi tsa javahá tuhun tsahnu. <sup>21</sup> Tyin catyí ñi tsihin ndo tyehen: “Ña tñin un tsehe tsihin ndaha un, ña catsi un tsehe, coto ña cacu un”, catyí ñi tsihin ndo. <sup>22</sup> Maa tyin ña taahán tsi casi ñi nu javahá ndo yacan tyin tsa jacuahá ñi, maa ñi tsa tsicá iñi nyivi cuví can. Tyin tsa tsatsí yo tsa iin yaha ñi cuví can, tan ña cuví jatívi can tsi ndo nuu Nyoo. <sup>23</sup> Ñi tsa javahá tandihí can tsicá iñi ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundoho cuñu ñuhu ñi. Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá iñi ñi.

**3** Tsahã Nyoo ñayivi nyito coo yo tyin nandotó ra Cristo, tan vityin nyaá ra xiin cuaha Nyoo nda gloria. Yacan cuenda nanducu ndo tsa vaha tsa tsahá ra tsi yo. <sup>2</sup> Cãca iñi ndo yacan, tan ña cãca xaan iñi ndo tuhun tsa iyó nu ñuhu ñayivi ihya. <sup>3</sup> Tyin vityin ña javahá ca ndo tsa javahã ndo tahã tsanaha, tyin tsa tsihi ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo. <sup>4</sup> Tan quivi cua quitsi nyico ra Cristo, ra tsa tsahã ñayivi nyito tsa iyó yo, tacan tan cua nyehe nyivi tyin maa ra cahnu ca cuví ra. Tan cua nyehe tucu ñi tsi nyooho iin caa ñi tsihin ra.

**Nacaa tsicoꝝ yo nu quitsi tsi ityi tsata tan nácaa cuñí tsi coo yo tsihin Nyoo vityin**

<sup>5</sup> Yacan cuenda jãndihí ndo tandihí tsa ña vaha tan tsa caquiñi tsa cuñí cuñu ñuhu ndo. Tan ña cusu ndo tsihin iin ñaha tun ñaha ca tindaha ndo, tahan ñi rayí tan ñaha. Tan ña cuñi ndo coo cuaha ndaha tyiñu ndo tyin tun tsicá iñi ndo yacan, tsitoho jacahnú ndo tan tyaá tsiyo ndo tsi Nyoo cuví can. Tyin tacan javahá nyivi tsa ña yihí tuhun Nyoo, maa tyin nyooho ña taahán tsi javaha ndo tacan. <sup>6</sup> Tsa cuenda tandihí tsa caquiñi ihya cuxaán xaan Nyoo tsi nyivi tsa ña tyaá yahvi tsa caahán ra. Tan cua tatsi tuñi ra tsi ñi. <sup>7</sup> Tan juvin ñi tacan javahá tucu maa yo quivi tsa ña nacotó yo tsi Nyoo. <sup>8</sup> Maa tyin vityin ña javaha ca ndo tandihí tsa ña vaha can: ña cuxaan ca ndo. Ña xaan cuñi ndo nyehé ndo tsi nyivi tahan ndo, tan ña jacuñi nyaa ndo tsi ñi, tan ña çahan ndo cuendu siqui ñi. Tan ña çahan ca ndo tsa ndavaha ñi. <sup>9</sup> Ña çahan tahan ca ndo cuendu siqui iin ndo tan inga ndo. Tyin tsa nacoꝝ ndo tandihí tsa ña vaha tsa javahá ndo tahã tsanaha. <sup>10</sup> Tyin vityin tsa nanduví yo nyivi tsa tan iyó yo ñayivi nyito. Tan ndutsaá ca yo tumaa caá Nyoo, ra javahá tsi yo, nda cuenda coto vaha ca yo tsi ra. <sup>11</sup> Ña ñiñi tsa cuví yo nyivi Israel, o nyivi Grecia, o nyivi inga ñuu. Tan ña ñiñi tatun tyaá ñi tuñi Nyoo tsi yo, o ña tyaá ñi; a cuví yo iin nyivi catsi iñi, o cuví yo iin ñi soho; a iyó tsitoho yo, o yoñi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandihí yo tsihin ra Cristo, tyin maa ra cuví tandihí tan iyó ra tsihin tandihí yo.

<sup>12</sup> Nyoo cuñí ra tsi yo tan nacatsi vaha ra tsi yo tyin cuví yo nyivi ra. Yacan cuenda cõo ndo ñayivi nyito tumaa taahán tsi coo nyivi yihí cuenda ra; cundaahvi iñi ndo nyehé ndo tsi nyivi tahan ndo; cuví ndo nyivi vaha tan ndaahvi jaha ndo tsi ndo nuu Nyoo; ndumasu ndo; cunyehe iñi ndo nyehé ndo tandihí tsihi tan tundoho tsihin tsa si cuñí ndo. <sup>13</sup> Ña cundihí iñi ndo tsihin nyivi tahan ndo. Jaha ndo tucahnu iñi tsi ñi tatun náa javahá ñi tsi ndo. Tumaa ra Cristo jahá ra tucahnu iñi tsi maa ndo, tacan cuñí tsi javahá tucu maa ndo tsihin nyivi. <sup>14</sup> Tyin tsa cuñí tahan yo tsi yo, yacan cuví tsa ñiñi ca cuñí tsi. Tyin yacan cuví tsa jandu iin tsi yo. <sup>15</sup> Tan cõhva ndo tsa cundaca ñaha tsa taxin Nyoo añima ndo, tan na jaquihin ityi tsi tsi ndo. Tyin tsa cuenda yacan, canã Nyoo tsi ndo tan jandu iin ra tsi ndo tsihin ra Cristo. Tan cõhva ndo tyahvi nyoo tsi Nyoo.

<sup>16</sup> Tan na cutu añima ndo tsihin tuhun ra Cristo, tan jacuaha tahan ndo tuhun ra tsi ndo. Tan jãndu iin tahan ndo iñi ndo tsihin tandihí tsa tsiñi tuñi tsa tsahã Nyoo tsi ndo. Çata ndo yaa tan salmo. Tan çata ndo yaa tsa tsahá Tatyí Ii Nyoo tsi ndo tsihin tsa ñi iñi añima ndo. Tan tacan ñi nacuhva ndo tyahvi nyoo tsi Nyoo. <sup>17</sup> Tatun náa tyiñu cua javaha ndo, o náa cua cahan ndo, javaha ndo can tsihin sivi Jutu Mañi yo Jesús. Tan juvin ñi cõhva can nacuhva ndo tyahvi nyoo tsi Nyoo tsa cuenda maa ra Cristo.

**Nu tsahá cuenda ra Pablo nácaa nducú yo cõhva coo vaha yo tsihin nyivi**

<sup>18</sup> Nyooho tsa iyó yí cõhva ndo tsa cundaca ñaha yí ndo tsi ndo. Tacan taahán tsi coo ndo, tyin yihí ndo cuenda Jutu Mañi yo. <sup>19</sup> Tan nyooho rayí, cuñi ndo tsi ñasíhi ndo. Tan ña cundihí iñi ndo nyehé ndo tsi ñi. <sup>20</sup> Nyooho tsa nyihi tyã yahvi ndo tsi jutu ndo tan tsi sihi ndo, tyin si xaan cuñí Jutu Mañi yo tun javahá ndo tacan. <sup>21</sup> Nyooho tsa cuví ndo jutu tan sihi, ña yaha xaan jacuxaan ndo tsi sehe ndo, tyin coto nducuihya xaan iñi tsi. <sup>22</sup> Tan nyooho tsa cuví musu, tyã yahvi ndo tsi ra yihí ndaha tsi ndo. Ñavin tsa nyehé ñi ra tsi ndo tan tyã yahvi ndo tsi ra naha, tan catyi ra naha tyin vaha xaan ndo. Tyã yahvi nyooho tsi ra naha tsihin tsa ñi iñi añima ndo vasu ña nyehé ra naha, tyin Nyoo nyehé ra. <sup>23</sup> Tandihí ñi tyiñu javahá ndo, javaha ndo can tsihin tsa si cuñí ndo tumaa tsa jahá tyiñu ndo cuenda Jutu Mañi yo tan ñavin cuenda nyivi. <sup>24</sup> Tyin tsitó ndo tyin maa Jutu Mañi yo ra Cristo cua cõhva ra tsa taahán tsi tsi ndo tyin maa ra cuví ra yihí ndaha tsi ndo tsa nditsa. <sup>25</sup> Tan tatun javahá ndo tsa ña vaha, Nyoo cua tatsi tuñi ra tsi ndo tsa cuenda tsa ña vaha tsa javahá ndo, tyin ña sìn caá iin yo tan inga yo nuu Nyoo, tyin tandihí yo tan inducu ñi caá yo.

**4** Nyooho tsa iyó musu, cuñí tsi cuví ndo nyivi vaha tsihin musu ndo. Nducuhun iñi ndo tyin iyó ra yihí ndaha tucu tsi maa ndo nda gloria. Tan maa ra nyehé ra tsi ndo.

<sup>2</sup> Ndãcan tahvi ndo tsihin tsa ñi iñi ndo. Cõo nyito ndo tan nacuhva ndo tyahvi nyoo tsi Nyoo tsa cuenda tandihí maa. <sup>3</sup> Ndãcan tahvi ndo tsa cuenda ndi, tyin na nuña Jutu Mañi yo añima nyivi tan tyã soho ñi tuhun xeehe ra Cristo tsa caahán ndi tsihin ñi. Tsacatyí tuhun ihya nyí yu vehe caa. <sup>4</sup> Ndãcan tahvi ndo tsa cuenda yu na cuvi jacuaha yu tsi nyivi cõhva cuvi cuntuñi vaha iñi ñi tuhun ra Cristo, tumaa taahán maa tsi javahá yu.

<sup>5</sup> Cuiti cõo ndo tsihin nyivi tsa ña yihí tuhun Nyoo, tyin tacan tan cuvi cahan ndo tuhun Nyoo tsihin ñi.

<sup>6</sup> Tan maa ñi tuhun vaha çahan ndo tsihin ñi. Tan taahán tsi coto ndo nácaa cua nacahan ndo tatun nducu tuhun ñi náa nducu tuhun ñi tsi ndo.

**Nu tsahá ra Pablo nacumi tsi nyivi yihí cuenda Nyoo ñuu Colosas**

<sup>7</sup> Ra Tíquico, ra yañi yo, ra jahá tyiñu tyiñu Jutu Mañi yo tsihin yu, cua nacatyí tuhun ra tsihin ndo nácaa iyó yu. <sup>8</sup> Yacan cuenda jaquitsí yu tsi ra nu yucú ndo na jandu iin ra iñi ndo tan catyi tuhun ra tsihin ndo nácaa yucú ndi. <sup>9</sup> Tan vatsí ndihí ra Onésimo, ra ñuu ndo, tsihin ra. Vaha xaan tsinú iñi ra tsi ra Cristo, tan cuñí xaan yo tsi ra. Cua catyi tuhun maa ra naha tsihin ndo tandihí tsa cuví nu nyí yu ihya.

<sup>10</sup> Ra Aristarco, ra nyí tsihin yu vehe caa ihya, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacotõ yu tsi ndo tyin

tun tsaa ra Marcos nu yucú ndo, vaha çahan ndo tsihin ra. <sup>11</sup> Vatsí tucu nacumi tsi ndo jahá ra Jesús, ra tsa nañí tucu Justo. Tan tsitsi tsa tandihí ra Israel tsa yihí cuenda Nyoo, uñi taahan ñi ra ihya naha ra jahá tyiñu tyiñu Nyoo tsihin yu. Tan jandu iín xaan ra naha iñi yu. <sup>12</sup> Vatsí tucu nacumi tsi ndo jahá ra Epafras, ra ñuu ndo. Musu ra Cristo cuví ra. Ña jandihí ra tsa tsicán tahvi ra tsi Nyoo tsa cuenda ndo na caca vaha ndo tsihin Nyoo. Tan coto vaha ca ndo nácaa taahán tsi javaha ndo tandihí cuhva cuñí ra. <sup>13</sup> Yuhu cuví tsandaa tyin ra Epafras tsicán tahvi xaan ra tsa cuenda ndo, tan tsa cuenda nyivi tsa yucú ñuu Laodicea tan ñuu Hierápolis. <sup>14</sup> Vatsí tucu nacumi tsi ndo jahá ra Lucas, ra tsa cuví doctor tsa cuñí xaan yo, tan ra Demas tucu.

<sup>15</sup> Cuhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan cuhva ndihí ndo nacumi tsi ña Ninfas tan tsi tandihí nyivi yihí cuenda Nyoo tsa ndu iín yuvehe ña. <sup>16</sup> Tatun ndihí cahvi ndo carta ihya, tan jacuhun ndo itsi tsi nyivi yihí cuenda Nyoo nda ñuu Laodicea na cahvi ndihí ñi itsi. Tan na cuhva ñi carta tsa jacuhun yu tsi ñi, cahvi ndo. <sup>17</sup> Çahan ndo tsihin ra Arquipo tan çatyí ndo: “Javaha vaha tyiñu tsa tsaha Jutu Mañi yo tsi un tyin javaha un.”

<sup>18</sup> Yuhu ra Pablo tyaá yu nacumi ihya tsi ndo. Na ña naa iñi ndo tyin nyíí yu vehe caa tsa cuenda ra Cristo. Tan na nasoco Nyoo tsi ndo.

Tan na cuvi tsi tacan ñi.

# I Tesalonicenses

## Nu tyaq ra Pablo tan ra cutahán tsihin ra iin carta cuenda nyivi yihí tuhun Nyoo

**1** Yuhu ra Pablo ra Silvano tan ra Timoteo, jaquitsí ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo añima ndo.

## Vaha xaan tsinú iñi nyivi Tesalónica tsi Nyoo

**2** Tandihí ñi quivi tsahá ndi tyahvi nyoo tsi Nyoo tsa cuenda tandihí ndo. Tan iin nyita ñi tsicán tahvi ndi tsi ra tsa cuenda ndo. **3** Tan nducuhún iñi ndi tuhun ndo nuu Nyoo Jutu yo tyin ñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñí ndo tsi ra. Tan tsihin tsa ñi iñi ndo ndatú ndo tsa ñihi ndo tsa cua cuhva Jutu Mañi yo Jesucristo tsi ndo. **4** Tyin tsitó ndi tyin Nyoo cuñí xaan ra tsi ndo, nyooho yañi, tan maa ra nacatsí vaha tsi ndo. **5** Tyin quivi cahán ndi tuhun Nyoo, nácaa jacacú ra tsi yo, tsihin ndo, cahán ndi tuhun tsihin tunyee iñi Tatyí Ii Nyoo, tan tsitó vaha ndi tyin tuhun nditsa cuví tsi. Tan ñavin tuhun caahán ñi cuví tsi. Tan nyehe ndo nácaa tsicoq ndi quivi tsiyucú ndi tsihin ndo. Tsicoq ndi tacan tsa cuenda tsa vaha tsi maa ndo.

**6** Tan quitsahá iyó ndo cuhva iyó ndi, tan cuhva iyó Jutu Mañi yo. Tyin naquihín cuenda ndo tuhun Nyoo, vasu cuaha tundoho nyehe ndo tsa cuenda tsi. Maa tyin sñi xaan cuñí ndo tyin maa Tatyí Ii tsahá can tsi ndo. **7** Tan tsa tacan iyó ndo, jatyinyeé xaan ndo tsi tandihí nyivi yihí cuenda Nyoo taniñi cahnu Macedonia tan taniñi cahnu Acaya ihya, tyin nyehe ñi cuhva iyó ndo tsihin Nyoo. **8** Ñavin Macedonia tan Acaya ñi, maa tyin tandihí ñi ityi nu tsiñi nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuanda ña ñiñi ca cuñí tsi cahan ndi tuhun Nyoo tsihin ñi. **9** Tyin juven ñi maa ñi nacatyí tuhun tsihin ndi nácaa tsa vaha xaan naquihín cuenda ndo tsi ndi. Nacatyí tuhun ndihí tucu ñi tsihin ndi nácaa jandihí ndo tsa jacahnú ndo tsitoho tan quitsahá jahá tyiñu ndo tyiñu Nyoo nyito. **10** Tan nacatyí tuhun tucu ñi nácaa ndatú ndo quivi quitsi ra Jesús Sehe Nyoo inga tsaha tsa cua quee ra andivi. Ra ican cuví ra tsa janandotó Nyoo. Tan maa ra cuví ra jacacú tsi yo tsa ña tatsi tuñi ca Nyoo tsi yo quivi cua tatsi tuñi ra tsi nyivi.

## Tyiñu jahá ra Pablo ñuu Tesalónica

**2** Nyooho yañi, tsitó ndo tyin ñavin tsa cuatu quitsi ndi cahán ndi tuhun Nyoo ñuu ndo. **2** Tyin tsitó ndo nácaa nyehe ndi tundoho jahá nyivi ñuu Filipino tsa ndi cumañi ca tsaq ndi ñuu ndo. Tan vasu nyehe xaan ndi tundoho ñuu can, maa tyin quivi tsaq ndi ñuu ndo cahán ndi tuhun Nyoo tsihin ndo tsihin tsa ña yuuhví ndi. Tan vasu xaan xaan cuñi nyivi ñuu ndo, maa tyin jatyinyeé xaan Nyoo tsi ndi tan ñi iñi ndi jacoto ndi tsi ndo cuhva jacacú ra tsi yo. **3** Tyin tuhun tsa tsahá cuenda ndi tsi ndo maa ñi maa tsa nditsa cuví tsi. Tan nduve tsa caquiñi tsicá iñi ndi. Tan ndi ñavin tsa cuñí ndi jandavi ñaha ndi tsi ndo. **4** Nduve tsa ña vaha cahán ndi, tyin Nyoo nyehe ra tsi ndi, tan maa ra tavá tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahán ndi tumaa tavá tyiñu maa ra tsi ndi. Tyin ña cuñí ndi tsa vaha cahan nyivi tuhun ndi, maa tyin cuñí ndi tsa vaha cahan Nyoo tuhun ndi, tyin maa ra nyehe ra cuhva iyó yo. **5** Tan tsitó ndo tyin ndi iin tsaha tan ña cahán ndi tsihin tuhun tsa tyaquí xaan tsa cuñí ndi jandavi ñaha ndi tsi ndo. Tan ndi ñavin tsa cuñí ndi jaha canaa ndi xuhun tan cahán ndi tuhun Nyoo tsihin ndo. Maa Nyoo cuví tsandaa tyin nditsa tsa caahán ndi ihya. **6** Tan ndi iin tsaha ña nducú ndi cuhva jacahnu nyivi tsi ndi, ndi nyooho, ndi inga ñi. Nditsa, iyó ndatu tsi ndi tsa jacahnu ndo tsi ndi tyin maa ra Cristo tavá tyiñu tsi ndi, maa tyin ña cuñí ndi tsa javaha ndo tacan tsihin ndi. **7** Tan vita cahán ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñí ndi jatyinyeé ndi tsi ndo. **8** Cuñí xaan ndi tsi ndo, tan yacan cuenda ñavin tuhun Nyoo ñi cuñí ndi cuhva ndi tsi ndo, tyin cuñí ndi cuhva tucu ndi nda cuanda ñayivi iyó ndi tsa cuenda tsa cuñí ndi tsi ndo. **9** Nyooho yañi, nducuhún iñi ndo nácaa jahá tyiñu ndi tan tsatsí ndi quivi tsiyucú ndi tsihin ndo. Jahá tyiñu ndi tsinu cahñi tan tsacuaa tyin ña cuñí ndi jatyañu ndi tsi ndo tsitsi tsa caahán ndi tuhun Nyoo tsihin ndo.

**10** Tan nyooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javahá ndi quivi tsiyucú ndi tsihin ndo tsa cuví ndo nyivi tsinú iñi tsi ra Cristo. Maa tyin maa ñi maa cuhva cuñí Nyoo javahá ndi, tan yacan cuenda ña cuví cahan ndo tsi ndi. **11** Tan tsitó tucu ndo nácaa jandu iñi ndi iñi intuhun intuhun ndo tsihin tuhun tsa tsahá cuenda ndi tsi ndo. Tsahá ndi tunyee iñi tsi ndo tumaa iin rayñi tsa iyó sehe tsahá ra tunyee iñi tsi sehe ra. **12** Tan catyí ndi tsihin ndo, catsi coo ndo tumaa taahán tsi coo nyivi yihí cuenda Nyoo

oo. Tyin maa Nyoo canā tsi ndo tyin coo ndo nu ndacá ñaha ra, tan nyehe ndo tsa cahnu cuví ra.

<sup>13</sup> Yacan cuenda iin nyita ñi tsahá ndi tyahvi nyoo tsi Nyoo, tyin quiví tsiñi ndo tuhun ra tsa cahān ndi tsihin ndo, naquihin cuenda ndo tuhun can tyin nacotō ndo tyin tuhun Nyoo cuví tsi tan ñavin tuhun ra ñayiví cuví tsi. Tan nditsa tsa tuhun Nyoo cuví tsi, tyin quitsahā tsinú iñi ndo tsi Nyoo tan nasamā cuhva iyó ndo. <sup>14</sup> Yahā can tan nyehe tucu maa ndo tundoho jahā nyiví ñuu ndo. Tumaa tsa nyehe nyiví yihí cuenda ra Cristo Jesús ñuu tsa cayucú Judea. Tacan nyehe ñi can tundoho jahā nyiví Israel. <sup>15</sup> Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusu yuhu Nyoo tahān tsanaha. Ñi Israel can tsinyaa ndaha ñi tsi ndi. Ñavin cuhva cuñi Nyoo iyó ñi. Tan xaan iñi ñi tsi tandihí maa nyiví. <sup>16</sup> Tatun cuñi ndi cahan ndi tuhun Nyoo tsihin nyiví tsa ñavin ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasí ñi nu caahán ndi, nducuaha ca cuatyí ñi. Tan vityin nu ndihí tuhun tatsí tuñi xaan Nyoo tsi ñi.

### Nu cahān ra Pablo tyin cuñi ra cunyehe ra nu yucú nyiví Tesalónica inga tsaha

<sup>17</sup> Nyooho yañi, tsa yahā tsa quitā ndi ñuu ndo juhva quiví, vasu ndi maa ña nyehé ndi tsi ndo, maa tyin ñuhú xaan iñi ndi tsi ndo. Tan tsihin tsa ñi iñi ndi cuñi ndi cunyehe ndi nu yucú ndo inga tsaha. <sup>18</sup> Tan nducy ndi cuhva quitsi ndi, maa tyin ña cuví. Yuhu ra Pablo, cuaha xaan tsaha nducy yu cuhva quitsi ndi, maa tyin tandihí ñi tsaha tsa cuñi ndi quitsi ndi, ña tsahā nu ña vaha. <sup>19</sup> Maa tyin ¿náa ndatú ndi? Tan ¿yóo cuenda cusii iñi ndi, tan vaha cuñi ndi? ¿A ñavin tsa cuenda maa ndo cua cusii xaan iñi ndi nuu Jutu Mañi yo Jesucristo quiví quitsi ra inga tsaha? <sup>20</sup> Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahā tyiñu ndi. Tan sii xaan cuñi ndi tsa cuenda yacan.

**3** Tan ña cunyeē ca iñi ndi tsa cuñi ndi coto ndi nácaa cuahán tsinú iñi ndo tsi Nyoo. Tan tyaā ndi cuhva tsa ndoō intuhun ñi maa yu ñuu Atenas. <sup>2</sup> Tan jaquitsi yu tsi ra Timoteo yañi yo, na quitsi nyehe ra nu yucú ndo. Ra ican cuví musu Nyoo tyin inducu ñi jahá tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsi ndi tsi ra nu yucú ndo na jandu iin ca ra iñi ndo tan cuhva ca ra tunyee iñi tsi ndo na tsinú ca iñi ndo tsi Nyoo. <sup>3</sup> Tyin tacan tan ndi intuhun ndo tan ña ndu uvi iñi ndo tsihin tsa nyehé ndo tundoho. Tyin nyooho tsitó ndo tyin nyaá tsa nyehe yo tundoho. <sup>4</sup> Tyin nda ndi yucú ca maa ndi tsihin ndo, tan cahān ndi tsihin ndo tyin nyaá cua nyehe yo tundoho. Tan tsitó vaha maa ndo tyin tacan cuví. <sup>5</sup> Ña cunyeē ca iñi yu tsa cuñi yu coto yu nácaa yucú ndo. Yacan cuenda jaquitsi yu tsi ra Timoteo na nyehe ra tun vaha tsinú iñi ndo tsi Nyoo. Tyin yuuhví yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuví, tsa cuatu ñi jahā tyiñu ndi nu yucú ndo.

<sup>6</sup> Maa tyin vityin tsa tsaā nuhu ra Timoteo tsa quitsi ra nu yucú ndo. Tan nacatyí tuhun ra tsihin ndi tyin ñi xaan iñi ndo tsinú iñi ndo tsi Nyoo. Tan cuñi tahan xaan ndo tsi ndo. Tan catyí ra tyin ñuhú xaan iñi ndo tsi ndi tan cuñi xaan ndo nyehe ndo tsi ndi; tumaa tsa cuñi tucu maa ndi nyehe ndi tsi ndo. <sup>7</sup> Yacan cuenda, nyooho yañi, vasu ndi maa cuaha tsa taahán ndi tan cuaha tundoho nyehé ndi, maa tyin vaha xaan cuñi ndi tsa tsitō ndi tyin nyooho vaha tsinú iñi ndo tsi Nyoo tan ña nacoó ndo tsi ra. <sup>8</sup> Tyin tumaa tsa ndutsaa ñayiví iyó ndi cuñi ndi tsa tsitō ndi tyin nyooho vaha tsinú iñi ndo tsi Nyoo. <sup>9</sup> Ndi ña ñihí ca ndi cuhva cuhva ndi tyahvi nyoo tsi Nyoo tsa cuenda ndo. Tyin sii xaan cuñi ndi nuu Nyoo tsa cuenda tyin vaha cuahán ndo tsihin ra. <sup>10</sup> Tsiacán tahvi xaan ndi tsi Nyoo tsinu cahñi tan tsacuaa, tyin cuñi xaan ndi quitsi nyehe ndi tsi ndo. Tacan tan cuví jandu iin vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin cuhva tsinú iñi ndo tsi ra.

<sup>11</sup> Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyinyee tan cuví quitsi ndi nu yucú ndo. <sup>12</sup> Tan na jatyinyee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihí ca nyiví tumaa tsa cuñi maa ndi tsi ndo. <sup>13</sup> Tyin tacan tan cuñi coo ndo tsihin ra tyin tsa yahā janduvahā ra añima ndo. Tan ña cua coo ca cuatyí ndo nuu Nyoo Jutu yo quiví quitsi Jutu Mañi yo Jesucristo tsihin tandihí nyiví yihí cuenda ra.

### Nacaa taahán iñi Nyoo coo yo

**4** Vityin nyooho yañi, tsihin sivi ra Jesús caahán ndaahví xaan ndi tsihin ndo tan tsicán ndi tsi ndo tsa ña jandihí ndo tsa iyó ndo tumaa tsa janahā ndi tsi ndo. Jañihi ca ndo nducu ndo cuhva coo vaha ndo nuu Nyoo tumaa taahán iñi maa ra.

<sup>2</sup> Tyin nyooho tsa tsitó maa ndo nácaa tavā tyiñu ndi tsi ndo tumaa tavā tyiñu maa Jutu Mañi yo Jesús tsi ndi. <sup>3</sup> Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo cuhva nduvaha añima yo nuu ra. Tan nyooho, rayii, ña coo ndo tsihin ñaha tun ñavin ñasihi ndo cuví ña, tan ñiñaha na ña coo ñi tsihin rayii tun ñavin yii ñi cuví ra. <sup>4</sup> Tan nyooho yañi, intuhun intuhun ndo cuñi tsi coto ndo nácaa coo vaha ndo tsihin ñasihi ndo. Iin ñi maa ña cuñi ndo tan jahā ndo tsa ñayiví tsi ña tan ña nducu ndo inga ñaha. <sup>5</sup> Ña caca caquiñi iñi ndo nyehe ndo tsi ñasihi ndo, ña javaha ndo tumaa javahá nyiví ña yihí tuhun Nyoo. <sup>6</sup> Ndi intuhun ndo tan ña jandavi ñaha ndo tsi inga ca rayii tan coo ndo tsihin ñasihi ra naha. Tyin tun javaha ndo tacan, ñihi xaan cua tatsi tuñi Jutu Mañi yo tsi ndo, tumaa tsa cahān ndi tsihin ndo. <sup>7</sup> Tyin Nyoo canā ra tsi yo tsa coo yo cuhva cuñi maa ra, tan ña javaha yo tsa caquiñi. <sup>8</sup> Yacan cuenda nyiví ña cuñi tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí Ii ra tsi yo. <sup>9</sup> Maa tyin tuhun tsa cuñi tahan yo tsi yo ña tsiñi ñuhu tsa tyaa yu itsi nu carta



ihya. Tyin tsa janahā maa Nyoo tsi yo nácaa taahán tsi cuñi tahan yo tsi yo. <sup>10</sup> Tan nyooho tsa tsitó maa ndo tuhun can tyin cuñi ndo tsi tandihí nyivi yihí tuhun Nyoo tsa iyó Macedonia nu iyó ndo. Maa tyin caahán ndaahvi yu tsihin ndo, yañi, tyin na jañihi ca ndo cuñi tahan ndo tsi ndo tsa intuhun intuhun quivi. <sup>11</sup> Ndūcu ndo cuhva coo taxin ndo. Tan ña tyihi ndo tsi ndo nu ña taahán tsi quihvi ndo. Jaha tyiñu ndo iin ñi tyiñu maa ndo. Tan jaha tyiñu ndo tsihin ndaha ndo tumaa cahān ndi tsihin ndo quivi can. <sup>12</sup> Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

#### Nacaa cua cuvi quivi quitsi Jutu Mañi yo Jesús inga tsa-ha

<sup>13</sup> Nyooho yañi, cuñi ndi tsa coto ndo nácaa taahán nyivi tsa tsa tsihi, tyin tacan tan ña nducuihya iñi ndo tumaa cuihya cuñi nyivi ña cua nandoto tsa ña cua coo tsihin Nyoo. <sup>14</sup> Tumaa tsa tsinú iñi yo tyin tsihi ra Jesús tan nandoto ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

<sup>15</sup> Yacan cuenda catyí ndi tsihin ndo tumaa jacuahā Jutu Mañi yo tsi ndi, tyin yoo tsa nyito nda quivi quitsi ra, ña jihna ca yo cua cuhun tan nacoo yo tsi nyivi tsa tsihi. <sup>16</sup> Tyin juvin ñi maa Jutu Mañi yo cua nuu, tan cua cana tsa ra tyin maa ra ndacá ñaha. Tan cua cana tsa ra cuví ityí nuu tsihin ángel. Tan cua navacu trompeta Nyoo. Tacan tan nyivi tsa tsinú iñi tsi ra Cristo tan tsihi ñi, jihna ca ñi cua nandoto. <sup>17</sup> Yahā can tan yoo tsa ndi nyito cua ndaa yo iin caa ñi tsihin ñi nu vico, nu cua ñihi tahan yo tsihin Jutu Mañi yo. Tacan tan cua coo cuvi yo tsihin ra. <sup>18</sup> Yacan cuenda jandu iin tahan ndo iñi ndo tsihin tuhun ihya.

**5** Nyooho yañi, ña ñiñi cuñi tsi jacoto yu tsi ndo ama cua cuvi tandihí tsa tsa yahā cahān yu tuhun tsihin ndo. <sup>2</sup> Tyin tsa tsitó maa ndo tyin ña cua coto yo náa cuhva, náa quivi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihví ñasuhu yuvehe yo tsa tsacuaa tacan cua cuvi. <sup>3</sup> Tyin quivi tsa catyí nyivi tyin taxin ñi caa, tan nduve maa tsa yuuhví ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe, sana iñi ña tan quitsahá cuuhví tsitsi ña. Tan tacan cua tahan nyivi quivi quitsi Jutu Mañi yo, tyin ña cua cuvi ca cunu xeehe ñi. <sup>4</sup> Maa tyin nyooho yañi, quivi quitsi Jutu Mañi yo ña cua tahan ndo tumaa taahán nyivi, tun sana iñi ñi tan quihví ñasuhu yuvehe ñi tyin nyooho ñavin ca nu naa iyó ndo. <sup>5</sup> Tyin tandihí yo tsitó yo nácaa taahán tsi coo yo tyin jandunditsín Nyoo añima yo, tan ña iyó ca yo nu naa tumaa iyó nyivi ña nacotó tsi Nyoo. <sup>6</sup> Yacan cuenda catsi cōo ndo cōonyito ndo tan ña cusu ndo tumaa iyó nyivi ña nacotó tsi Nyoo, tyin ñi ican ña tyaá yahvi ñi tsa cua quitsi Jutu Mañi yo inga tsaha. <sup>7</sup> Tyin nyivi quixí, quixí ñi tsacuaa, tan nyivi tuhva tsihí nyixi, tsiñí ñi tsacuaa. <sup>8</sup> Maa tyin yoo tsa cuví yo nyivi iyó tsinu cahñi, na catsi cōo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiquí nyica ra, tacan taahán tsi jaha yo cuenda tsi yo

tsihin tsa tsinú iñi yo tsi Nyoo, tan tsihin tsa cuñi yo tsi tandihí nyivi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahán tsi cuita iñi yo tyin cua cacu yo. <sup>9</sup> Tyin Nyoo ña nacatsi ra tsi yo tsa tatsi tuñi ra tsi yo, nacatsi ra tsi yo tyin jacacu Jutu Mañi yo Jesucristo tsi yo jahā ra. <sup>10</sup> Tyin ra Jesucristo tsihi ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihi yo, a nyito yo, maa tyin tandihí yo cua coo yo iin caa ñi tsihin ra. <sup>11</sup> Yacan cuenda jandu iin ndo iñi nyivi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

#### Nu tsahā cuenda ra Pablo tsi nyivi yihí cuenda Nyoo

<sup>12</sup> Nyooho yañi, caahán ndaahvi xaan ndi tsihin ndo, jaha ndo tsa ñayivi tsi ra jahá tyiñu, ra cuví ityí nuu nu yucú ndo. Tan tsahá cuenda ra naha cuhva coo ndo tyin tyiñu Jutu Mañi yo javahá ra naha. <sup>13</sup> Cuñi tsi tsa jaha xaan ndo tsa ñayivi tsi ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

<sup>14</sup> Tavá tucu ndi tyiñu tsi ndo yañi, jacahan ndo tsi nyivi ña cuñi jaha tyiñu. Tan jandu iin ndo iñi nyivi tsa ndu uvi xaan iñi. Tan jatyinyee ndo tsi nyivi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihí iñi ndo tsihin nyivi.

<sup>15</sup> Jaha ndo cuenda coto javaha ndo tsa ndavaha ñi tsihin nyivi javahá tsa ña vaha tsihin ndo. Ndūcu ndo cuhva javaha ndo tsa vaha tsihin nyivi yihí tuhun Nyoo tsihin ndo tan tsihin tandihí ca nyivi.

<sup>16</sup> Cusñi iñi ndo tandihí ñi quivi. <sup>17</sup> Tan ña jandihí ndo tsa tsicán tahvi ndo tsi Nyoo. <sup>18</sup> Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñi maa Nyoo javaha yo tsa cuví yo nyivi tsinú iñi tsi ra Cristo Jesús.

<sup>19</sup> Ña ndahva ndo ñuhū Tatyí Ii Nyoo tsa iyó añima ndo. <sup>20</sup> Ña vacu nducu ndo tsa caahán ra cuví ndusu yuhu Nyoo. <sup>21</sup> Nyehé jihna ndo tun tandihí tsa caahán ra tan vaha tsi tumaa tsa taahán tsi nyehé ndo tandihí inga ca tuhun. Tan ñaquihin ndo tsa vaha. <sup>22</sup> Ña tyihi ndo tsi ndo nu iyó tsa ña vaha.

<sup>23</sup> Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsiñi tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuatyí ndo quivi quitsi Jutu Mañi yo Jesucristo inga tsaha.

<sup>24</sup> Ra tsa canā tsi yo, cuví cuita iñi yo tsi ra, tyin maa ra cua javaha tandihí maa tsa caahán yu ihya.

#### Nu ndihí cahān ra Pablo tan tsahā ra nacumi tsi nyivi

<sup>25</sup> Yañi, ndācan tahvi ndo tsa cuenda ndi.

<sup>26</sup> Tan cuhva ndo nacumi tsi tandihí nyivi yihí cuenda Nyoo.

<sup>27</sup> Tavá tyiñu yu tsi ndo tsihin sivi Jutu Mañi yo na cahvi ndo carta ihya nuu tandihí nyivi tsa yihí cuenda Nyoo.

<sup>28</sup> Tan maa Jutu Mañi yo Jesucristo nasoco tsi ndo.

Tan na cuvi tsi tacan ñi.

## II Tesalonicenses

Nu tyaá ra Pablo, tan ra cutahán tsihin ra, tsa tsinu uvi carta tsa cuenda nyivi yihé tuhun Nyoo ñuu Tesalónica

**1** Yuhu ra Pablo, ra Silvano tan ra Timoteo jaquitsí ndi carta ihya tsi ndo tsa cuví ndo nyivi yihé cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan Jutu Mañi yo Jesucristo. <sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añaima ndo.

**Nu cahān ra Pablo nácaa cua tatsi tuñi Nyoo tsi nyivi iyó cuatyí quivi quitsi ra Cristo**

<sup>3</sup> Nyooho yañi, cuñi tsi tsa nacuhva ndi tyahvi nyoo tsi Nyoo tsa cuenda ndo tandihí ñi quivi, tyin tacan taahán maa tsi javahá ndi tyin ñihi xaan cuahán tsinú iñi ndo tsi Nyoo tsa iin iin quivi, tan cuñi xaan ndo tsi nyivi yihé tuhun Nyoo tsihin ndo. <sup>4</sup> Yacan cuenda sih xaan cuñi ndi caahán ndi tuhun ndo tsihin nyivi yihé cuenda Nyoo inga ca vehe ñuhu. Tyin nyooho cunye xaan iñi ndo nyicún ndo tsi Nyoo tan vaha xaan tsinú iñi ndo tsi ra vasu ndi maa nyehé xaan ndo tundoho jahá nyivi. <sup>5</sup> Tandihí yacan janahá tyin Nyoo cuiti xaan jacutuñi ra tyin cua catyi ra tyin taahán maa tsi cahun nyooho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

<sup>6</sup> Tan tsa cuenda maa Nyoo, taahán tsi janyehe ra tundoho tsi nyivi tsa janyehé xaan tundoho tsi ndo. <sup>7</sup> Tan nyooho tsa nyehé xaan tundoho jahá nyivi, cua cuhva ra quitatu ndo iin caa ñi tsihin ndi quivi cua quitsi nyico Jutu Mañi yo Jesucristo tsa quee ra andivi tsihin ñuhu tan tsihin ángel tsa iyó tunyee iñi maa ra. <sup>8</sup> Tyin tatsi tuñi ra tsi nyivi tsa ña nacotó tsi Nyoo, ñi tsa ña tyaá yahvi tuhun tsa jacacú ra tsi yo. <sup>9</sup> Ñi ican cua janyehe Nyoo tundoho tan ña cua cundihí maa tsa nyehe ñi tundoho, ña cua nyehe ñi tsi Jutu Mañi yo Jesucristo tan ña cua nyehe ñi tsa cahnu cuví ra tsihin tunyee iñi tsa iyó tsi ra <sup>10</sup> quivi cua quitsi ra. Tyin quivi can nyivi yihé cuenda ra, ñi tsinú iñi tsi ra, cua jacahnu ñi tsi ra. Tan iyo xaan cua cuñi ñi nyehe ñi tsi ra. Tan tyañu nyivi can, cua cuyucu tucu nyooho tyin tsinú iñi ndo tuhun tsa cahān ndi tsihin ndo.

<sup>11</sup> Yacan cuenda tsicán tahvi ndi tsi Nyoo tsa cuenda ndo tandihí ñi quivi, na jatyinyee ra tsi ndo. Tacan tan catyi ra tyin taahán tsi tsi ndo tsa cuví ndo nyivi cana maa ra. Tan tsicán tahvi tucu ndi tsi ra na jatyinyee ra tsi ndo tan cuví javaha ndo tsa vaha tsa cuñi ndo javaha ndo. Tan na quita vaha tandihí tyiñu ra tsa javahá ndo tsihin tunyee iñi tsahá ra tsi ndo tyin tsinú iñi ndo

tsi ra. <sup>12</sup> Tacan tan cua jacahnu nyivi sivi Jutu Mañi yo Jesucristo, tyin nyehé ñi cuhva iyó ndo. Tan cua jacahnu tucu maa ra tsi ndo nuu nyivi tsa cuenda tumañi iñi tsa tsahá ra tsi yo jahá Nyoo.

**Ra tsa nduve ley Nyoo iyó añaima**

**2** Nyooho yañi, vityin cuñi yu cahan yu tsihin ndo tsa cuenda quivi quitsi nyico Jutu Mañi yo Jesucristo tan ndu iin yo tsihin ra. Caahán ndaahvi xaan ndi tsihin ndo, <sup>2</sup> ña numi xaan sama ndo cuhva tsicá iñi ndo. Tan ña nayuhvi ndo tatun quita tuhun jaha tatyí ña vaha tyin tsa tahān tsi quivi quitsi Jutu Mañi yo; vasu ndi maa nyivi caahán can, a jaquitsí ñi carta tsi ndo tan catyi ñi tyin yuhu jaquitsi carta can tsi ndo. Ña tsinu iñi ndo tandihí yacan. <sup>3</sup> Ndi iin tsaha tan ña cuhva ndo jandavi ñaha nyivi tsi ndo. Tyin tsa ndi cumañi ca tahan tsi quivi quitsi Jutu Mañi yo, cuaha xaan nyivi, xaan cua cuñi ñi nyehe ñi tuhun Nyoo, tan cua quituvi rayi tsa nduve ley Nyoo iyó añaima, ra tsa nyaá maa cahun anyaya. <sup>4</sup> Ra ican cuví ra xaan iñi tsi Nyoo. Cua cañi tahan ra tsihin tandihí tsa nyisó sivi Nyoo; tan cua cañi tahan ra tsihin tandihí tsa jacahnú tsi Nyoo. Tan nda cuanda tsitsi vehe ñuhu cahnu Nyoo tan cua cunyaa ra tan cua cundaca ñaha ra, cua jaha ra tyin Nyoo cuví ra.

<sup>5</sup> ¿A ña nducuhún iñi ndo tyin nda ndi nyí ca yu tsihin ndo tan cahān yu tuhun ihya tsihin ndo? <sup>6</sup> Maa tyin nyooho tsitó ndo náa tsa tyasí tan ñaha ca quituvi ra. Nda tahan maa tsi quituvi ra tan cua quituvi ra. <sup>7</sup> Vityin tsa iyó tatyí tsa ña tsahá tyaá yahvi nyivi tsi Nyoo, maa tyin ndi nyí xeehe nu, tyin iyó iin ra tsa ña tsahá quituvi nu. Maa tyin quivi cua quita ra tan cundihí tsa tyasí ra, tacan tan cua quituvi nu. <sup>8</sup> Tacan tan cua quituvi ra tsa nduve ley Nyoo iyó añaima, maa tyin Jutu Mañi yo Jesús cua cahñi ra tsi ra tsihin tuhun quitá yuhu ra tan cua janaa ra tsi ra tsihin tsa xiñu tsa cahnu cuví ra quivi quitsi ra inga tsaha. <sup>9</sup> Ra ña vaha can, nu ña vaha cua jaquitsi tsi ra. Tan cua cuhva nu tandihí tsa nyityi nu, coo tsi ra, tan tsihin seña tan tsa iyo cua javaha ra cua jandavi ñaha ra tsi nyivi. <sup>10</sup> Cua cuatyíñu ra tandihí nuu tsa ña vaha tan tsihin yacan cua jandavi ñaha ra tsi nyivi tsa ña cua cacu. Tyin ñi can ña cuñi ñi naquihin cuenda ñi tuhun Nyoo tsa nditsa tan cacu ñi. <sup>11</sup> Tan yacan cuenda cua cuhva Nyoo ndatu tsa jandavi ñaha tatyí ña vaha can tsi ñi. Tan cua tsinu iñi ñi tsa ña nditsa. <sup>12</sup> Tacan tan cua tatsi tuñi ra tsi tandihí ñi tyin ña cuñi ñi tsinu iñi ñi tuhun nditsa. Tyin taahán ca iñi ñi javahá ñi tsa ña vaha.

### Nu cahān ra Pablo tuhun nyivi tsa nacatsj Nyoo tyin cacu ñi

<sup>13</sup> Maa tyin tandihī quivi cuñi tsi cuhva ndi tyahvi nyoo tsi Nyoo tsa cuenda nyooho yañi. Tyin cuñi xaan Jutu Mañi yo tsi ndo. Tan nacatsj ra tsi ndo nda jihna, [nda ndi cumañi ca tsinu ñuhu ñayivi], tyin tsihin tsa janduvahá Tatyí Ii ra añima ndo tan tsihin tsa tsinú iñi ndo tuhun nditsa cuvi cacu ndo. <sup>14</sup> Yacan cuenda cana Nyoo tsi ndo quivi tsa cahān ndi tuhun ra tsihin ndo tyin tacan tan ñihi ndo tsa cahnu cuví Jutu Mañi yo Jesucristo coo tsi ndo.

<sup>15</sup> Yacan cuenda nyooho yañi, jandu iin ndo iñi ndo. Tan ña naa iñi ndo tandihī tsa tsahā cuenda ndi tsi ndo tan jacuahā ndi tsi ndo nda ndi yucú ca maa ndi tsihin ndo. Tan ña nga iñi ndo tandihī tuhun tsa tyaa ndi nu carta tsa jaquitsj ndi tsi ndo. <sup>16</sup> Jutu Mañi yo Jesucristo tan Nyoo Jutu yo, juvin ra cuñi tsi yo; tan tsahá ra tunyee iñi tsi yo tandihī tyembu, tan tsahá ra naha tsa cuita iñi yo coo yo tsihin ra. Tandihī yacan tsahá ra tsi yo quivi tsahā ra tsa vaha tsa iyó tsi ra tsi yo. <sup>17</sup> Na cuhva ra tsa sñi cuñi añima ndo. Tan jandu iin ra iñi ndo, tacan tan cua cahan ndo tan javaha ndo tandihī tsa vaha.

### Nu tsicán ra Pablo na ndacan tahvi nyivi tsi Nyoo tsa cuenda ra naha

**3** Tan inga tuhun, nyooho yañi, ndacan tahvi ndo tsa cuenda ndi tyin tacan tan numi ñi cua tsaa tuhun Jutu Mañi yo tandihī ñi ityi. Tan na tyaa yahvi nyivi tuhun ra tan naquihin cuenda ñi itsi tumaa tsa naquihin cuenda maa ndo itsi. <sup>2</sup> Ndacan tahvi tucu ndo na jacacu Nyoo tsi ndi ndaha nyivi ña vaha. Tyin ña tandihī ñi tan tsinú iñi ñi tsi Jutu Mañi yo. <sup>3</sup> Maa tyin Jutu Mañi yo javahá ra tsa catyí ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tñin nu ña vaha tsi ndo. <sup>4</sup> Tan nditá xaan iñi ndi tsi Jutu Mañi yo tyin tsitó ndi tyin jatyinyeé ra tsi ndo tan javahá ndo tsa catyí ndi tyin javaha ndo. Tan tsitó tucu ndi tyin ña cua jandihī ndo tsa javaha ndo tacan. <sup>5</sup> Tan na jatyinyee ca Jutu Mañi yo tsi ndo tan cuñi ca ndo tsi nyivi tumaa tsa cuñi maa

Nyoo tsi yo tsihin ñi, tan cunyeé ca iñi ndo nyehé ndo tundoho, tumaa tsa cunyeé iñi maa ra Cristo nyehé ra tundoho.

### Taahán tsi tsa jaha tyiñu yo

<sup>6</sup> Tan vityin nyooho yañi caahán ndi tsihin ndo tsihin sivi Jutu Mañi yo Jesucristo, ña cunyaa naa ndo tsi ra yañi yo tsa ña cuñi jaha tyiñu, tan ña cuñi ra coo ra tumaa jacuahā ndi tsi ndo. <sup>7</sup> Tyin tsitó maa ndo nácaa taahán tsi coo ndo tumaa tsicoo maa ndi tsa tsiyucu ndi tsihin ndo. Tyin nyuhu ña tsicā nuu utsan ndi tyin jahā tyiñu ndi. <sup>8</sup> Tan tandihī tsa tsatsj ndi, maa ñi maa tyahvi ndi tsi ndo. Tyin jahā tyiñu ndi tsinu cahñi tan tsacuaa tyin ña cuñi ndi tsa coso tundoho can siqui ndi intuhun ndo. <sup>9</sup> Vasu ndi maa iyó ndatu tsi ndi tsa ndacan ndi tsa jatyinyee ndo tsi ndi, maa tyin nyuhu jahā tyiñu ndi tyin cuñi ndi janaha ndi nácaa taahán tsi coo ndo. <sup>10</sup> Tyin quivi tsiyucu ndi tsihin ndo, cahān ndi tsihin ndo tyin nyivi ña cuñi jaha tyiñu, na ña catsi ñi. <sup>11</sup> Caahán ndi yacan tyin ñihí tuhun ndi tyin yihí ndo tsicá nuu ñi maa ndo tan tyihí ndo tsi ndo nu ña taahán tsi quihvi ndo tan ña jahá tyiñu ndo. <sup>12</sup> Nyooho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jahā tyiñu ndo, tan coo tsa catsi ndo.

<sup>13</sup> Nyooho yañi, ña cundihī iñi ndo javaha ndo tsa vaha. <sup>14</sup> Tatun iyó iin ra ña cuñi tyaa yahvi tuhun caahán ndi nu carta ihya, jahā ndo cuenda ndaa ra cuví ra, tan ña cunyanaa ndo tsi ra na nducahan nuu ra. <sup>15</sup> Maa tyin ña cuxaan iñi ndo tsi ra. Cuhva cuenda ndo tsi ra tyin yañi yo tsi ra.

### Nu ndihī cahān ra Pablo

<sup>16</sup> Jutu Mañi yo ra iyó tsa vaha tsi, juvin ñi maa ra cuhva tsa vaha coo añima ndo tandihī ñi quivi tan tandihī ñi tsaha vasu ndi maa nyehé ndo tundoho. Tan Nyoo ndoo tsihin tandihī ndo. <sup>17</sup> Yuhu ra Pablo tyaá yu nacumi tsi ndo nu tutu ihya tsihin ndaha yu, tan tsihin letra yu. Tyehen tyihí yu firma yu tandihī carta yu. Tan tyehen tyaá yu. <sup>18</sup> Tan na nasoco Jutu Mañi yo Jesucristo tsi tandihī ndo.

Tan na cuvi tsi tacan ñi.

# I Timoteo

## Nu tyaá ra Pablo iin carta tsa cuenda ra Timoteo

**1** Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá iñi yo. <sup>2</sup> Tyaá yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsiny iñi un tuhun ra Cristo tsa jacotó yu tsi un. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na nyehe ndaahvi ra tsi un.

## Nu tsahá cuenda ra Pablo tyin jaha cuenda yo tsi yo tan ña cunyicun yo tsa ña nditsa

<sup>3</sup> Quivi quitá yu ñuu Éfeso tan vatsi yu Macedonia nu nyí yu ihya, tava tyiñu yu tsi un tsa ndoo un ñuu Éfeso tyin cahan un tsihin nyivi jacuahá inga ca tuhun. Catyi yu tsihin un tyin catyi un tsihin ñi na ña jacuahá ñi tsa ña nditsa. Tan vityin juvin ñi tacan caahán nyico yu tsihin un. <sup>4</sup> Cahan tsihin ñi na ña tyaá iñi ñi cuendu, na ña tyaá iñi ñi tuhun nyivi tsicoq tahanan tsanaha. Tyin tun, maa ñi yacan tyaá iñi ñi maa cua cahan yuhu tahan ñi ñi. Tan ña cua jatynyeé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tsihin tsa tsinu iñi yo tan cuvi quita vaha tsi.

<sup>5</sup> Tatun javahá yo tsa tava tyiñu Nyoo tsi yo tyin javaha yo, cua cuñi tahan yo tsi yo, tsihin tsa nñi iñi añima yo tsa janduvahá Nyoo. Cua cuñi yo tsi ñi tsihin tsa vaha caca iñi yo tan tsihin tsa nditsa tsinú iñi yo tsi Nyoo. <sup>6</sup> Maa tyin yihí nyivi nacoq ihñi ñi yacan, tan tsinaq ñi jahá tsa caahán yuhu tahan ñi. <sup>7</sup> Cuñi ñi cuvi ñi maestro cuenda ley tsahnu, maa tyin ndi maa ñi tan ña cutuñi iñi ñi tuhun caahán ñi tan nñi xaan iñi ñi jacuahá ñi tuhun can.

<sup>8</sup> Tsitó yo tyin ley can, vaha tsi, maa tyin cuñi tsi cuatyíñu vaha yo itsi tumaa taahán maa tsi. <sup>9</sup> Cuñi tsi co-to yo tyin ndi intuhun ley tan ña iyó tsi tsa cuenda nyivi vaha. Tyin ley can iyó tsi tsa cuenda nyivi javahá tsa ña vaha, ñi ña tyaá soho tsa caahán Nyoo, nyivi iyó cuatyí, nyivi caquiñi, nyivi ña tyaá yahvi tsi Nyoo. Iyó tucu tsi tsa cuenda nyivi tsahñi tsi jutu ñi, tsi sihi ñi, tan tsa cuenda tandiñi nyivi tsahñi nyivi. <sup>10</sup> Iyó ley can tsa cuenda nyivi iyó tsihin rayi a ñaha tan ñavin yii ña a ñasihi ra cuví. Iyó tsi tsa cuenda ra ndusihi, tan tsa cuenda nyivi tyihí xeehe nyivi tan xicó ñi, tan iyó tsi tsa cuenda nyivi vatya, tan iyó tsi tsa cuenda nyivi tsa catyí: “Naha Nyoo”, tan ña nditsa tsa caahán ñi. Tan juvin ñi iyó tucu ley can tsa cuenda nyivi caahán ndava-

ha ñi siqui tuhun Nyoo tsa cutuhva yo. <sup>11</sup> Tuhun Nyoo ihya, iin ñi cuví tsi tsihin tuhun cahnu xaan tsa jacacú ra Jesús tsi yo. Nyoo tava tyiñu ra tsi yu tsa jacuahá yu tuhun ihya tsi nyivi. Tan intuhun ñi maa ra taahán tsi jacahnú yo.

## Tsahá ra Pablo tyahvi nyoo tsi Nyoo tyin nyehé ndaahvi ra tsi ra

<sup>12</sup> Tsahá xaan yu tyahvi nyoo tsi Jutu Mañi yo Jesucristo tyin tsahá ra tunyee iñi tsi yu, tan nyehe ra tsi yu tan tsitó ra tyin tsinú vaha iñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra.

<sup>13</sup> Tacan javahá ra tsihin yu, vasu ndi maa nu quitsi tsi quivi, yuhu cahan nyaa xaan yu tsi ra. Tan tsinyaq ndaha yu tsi nyivi yihí cuenda ra, tan tsacu nducu yu tsi ra. Maa tyin Nyoo cundaahvi xaan iñi ra nyehe ra tsi yu, tyin quivi can ñaha ca tsinu iñi yu tsi ra, tan ña tsitó yu náa javahá yu. <sup>14</sup> Tacan tsahá Jutu Mañi yo Jesucristo tsa vaha ra tsi yu. Tan tsinú xaan iñi yu tsi ra jahá ra. Tan cuñi xaan yo tsi nyivi tyin iin ñi cuví yo tsihin ra Cristo Jesús.

<sup>15</sup> Tan tuhun cua cahan yu ihya tsa nditsa vaha cuví tsi. Taahán tsi tsinu iñi yo itsi tan catyí tsi tyehen: Ra Cristo Jesús quitsi ra nu ñuhu ñayivi ihya tyin jacacú ra tsi nyivi iyó cuatyí. Tan yuhu cuví iin ra caquiñi ca tan ñavin ca tandiñi nyivi. <sup>16</sup> Yacan cuenda, tava Nyoo tsi yu nu caquiñi tan cundahvi iñi ra tsi yu tyin tacan tan janaha ra Jesucristo tsi nyivi tyin cuñi xaan ra tsi ñi tan cunyeé iñi ra ndatú ra nda cuenda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayivi nyito tsa ña cua naa maa. <sup>17</sup> Yacan cuenda na jacahnu yo tsi ra yihí ndaha tsi yo tandiñi ñi quivi, ra nduve tuhun tsiihí iyó tsi, ra ña cuví nyehe yo, ra tsa intuhun ñi maa cuví Nyoo tan tsitó ra tandiñi. Na cuvi tsi tacan.

<sup>18</sup> Yooho Timoteo sehe yu, tava tyiñu yu tsi un, cañi tahan vaha tsihin nu tatyí ña vaha. Cuatyíñu tsa tsinú iñu un tsi Nyoo tan tsihin tsa tsitó un tyin vaha cuahán un tsihin Nyoo; tumaa tsahá cuenda ra yañi yo naha ra tsi un quivi cahan ra naha tuhun un jahá Nyoo. <sup>19</sup> Ña jandiñi un tsa tsinú iñi un tsi Nyoo tan ña jandiñi un tsa javahá un tumaa catyí maa Nyoo tyin javaha un, nacoto vaha tsitsi añima un tyin vaha cuahán un tsihin Nyoo. Tyin juhva ra naha nacoq ra naha tandiñi yacan, yacan cuenda ña tsinú ca iñi ra naha tumaa taahán maa tsi. <sup>20</sup> Tacan javahá ra Himeneo tan ra Alejandro. Yacan cuenda tsahá cuenda yu tsi ra naha tsi nu ña va-

ha, tyin tacan tan coto ra naha tyin ña vaha cahan yo ndavaha ñi siqui tuhun Nyoo.

### Nu jacuahā ra Pablo nácaa taahán tsi ndacan tahvi yo tsi Nyoo

**2** Tsahá cuenda yu tsi tandihí nyivi yihí cuenda Nyoo tyin ñiñi xaan cuñí tsi ndacan tahvi yo tsi Nyoo tsa cuenda tandihí nyivi. Tan nacuhva yo tyahvi nyoo tsi Nyoo tsa cuenda ñi. <sup>2</sup> Na ndacan tahvi yo cuenda ra ndacá ñaha naha ra tan cuenda tandihí ra cumí tyiñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayivi vaha nuu Nyoo tan nuu nyivi. Tacan tan cua jaha ñi tsa ñayivi tsi yo. <sup>3</sup> Tyin tacan taahán iñi Nyoo, ra tsa jacacú tsi yo. <sup>4</sup> Tyin cuñí ra tsa cacu tandihí nyivi. Tan cuñí ra tsa coto ñi tuhun nditsa. <sup>5</sup> Tyin intuhun ñi maa Nyoo iyó. Tan iyó intuhun ñi ra cuví cahan ndaahvi tsa cuenda yo nuu Nyoo. Ra ican cuví ra Cristo Jesús. Tan cuví ra iin nyivi tumaa maa yo. <sup>6</sup> Juvín ra Jesucristo tsihí tsa cuenda tandihí nyivi. Tyahví ra tsa cuenda cuatyí tandihí yo tyin tacan tan cuví cacu yo. Tan cundaq can quivi tyaq maa Nyoo cuhva. <sup>7</sup> Tsa cuenda yacan, tava tyiñu Nyoo tsi yu, tyin cahan yu tuhun ra, tan caca yu tyiñu ra, tan jacuahā yu tsi nyivi tsa ñavin nyivi Israel cuví nácaa tsinu iñi ñi tsa nditsa. Tan nyooho tsitó ndo tyin tsa nditsa caahán yu tyin ña tuhvá yu jandavi ñaha tyin cuenda ra Cristo yihí yu.

<sup>8</sup> Yacan cuenda cuñí yu tsa ndacan tahvi rayi naha ra tsi Nyoo tandihí ñi ityi. Tan coo vaha ra naha nuu ra. Tan cañihi ra naha ndaha ra tan jacahnu ra naha tsi Nyoo tsihin tsa vaha caca iñi ra naha. Tan tsihin tsa ña ñuhú tsihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo. <sup>9</sup> Tacan tucu ñiñaha. Catsi vaha cunditsi ñi jahma ñi, tumaa taahán maa tsi cunditsi nyivi yihí cuenda Nyoo. Na ña cunditsi ñi jahma iyo xaan caa. Ña iyo xaan janduvaha ñi jiñi ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan. <sup>10</sup> Maa tyin na janduvaha ñi tsi ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyivi nacuhva cuenda tsi ñi tsi Nyoo. <sup>11</sup> Tan cunyecú taxin ñi tyaá soho ñi tuhun Nyoo. Tan jaha ñi tsa ñayivi tsi ra tsahá cuenda tuhun Nyoo tsi ñi. <sup>12</sup> Tyin ña tsahá yu jacuahā ñiñaha nuu nyivi cuaha. Ndi ña tsahá yu tsa cundaca ñaha ñi tsi rayi. Taxin ñi na cunyecú ñi. <sup>13</sup> Tyin jihna ca ra Adán javahā Nyoo, yahā can tan javahā ra tsi ña Eva. <sup>14</sup> Tan ñavin tsi maa ra Adán jandavi ñaha nu ña vaha, tyin tsi ña Eva ñasihi ra jandavi ñaha nu tan tsicoq cuatyí ña. <sup>15</sup> Maa tyin ñiñaha nduve tsa cua tahan ñi tsa cua cacu sehe ñi, tatun jacuahnu vaha ñi tsi sehe ñi, tan tsinú vaha iñi ñi tsi Nyoo tan cuñí ñi tsi ra tan tsi nyivi, tan catsi coo ñi nuu Nyoo tan nuu nyivi.

### Nacaa taahán tsi coo ra cuví ityi nuu tsihin nyivi vehe ñuhu

**3** Tuhun ihya tuhun nditsa cuví tsi: Tatun iin ndo cuñí ndo cuví ndo ityi nuu tsihin nyivi vehe ñuhu, vaha xaan tyiñu cuñí ndo javaha ndo. <sup>2</sup> Maa tyin ñiñi cuñí tsi tyin ra cuví ityi nuu tsihin nyivi vehe ñuhu cuñí tsi cuví ra iin ra catsi iyó tyin tacan tan ña cuví tyaá nyivi cuatyí tsata ra. Tan cuñí tsi tsa coo intuhun ñi ñasihi ra. Tan cuñí tsi tsa cuví ra iin ra tsitó vaha cuhva coo, iin ra vaha nuu nyivi. Tan cuñí tsi vaha cahan ra tsihin nyivi tsaá yuvehe ra, tan cuví ra iin ra tsitó vaha jacuahā tsi nyivi. <sup>3</sup> Iin ra cuví ityi nuu tsihin nyivi vehe ñuhu ña taahán tsi coho ra nyixi, tan ña taahán tsi cuví ra iin ra nanducú tsihi. Tan ña taahán tsi cuví ra iin ra nducú xuhun tsihin tsa ña taahán tsi. Cuñí tsi tsa cuví ra iin ra vaha iñi, iin ra ña tuhvá cañi tahan. Tan cuví ra iin ra ña nyiyo iñi xuhun. <sup>4</sup> Cuñí tsi tsa cuví ra iin ra yihí ndaha vaha tsi ñasihi ra tan tsi sehe ra, iin ra ndacá ñaha tsi sehe ra tan tyaá yahvi vaha sehe ra tsi ra, tan jahá ñi tsa ñayivi tsi ra. <sup>5</sup> Tyin tatun ña tsitó ra cundaca ñaha ra nyivi vehe ra, zñácaa cua quihí ndaha ra nyivi tsicá vehe ñuhu Nyoo? <sup>6</sup> Tan iin ra ndi tsaá xaan tsihin tuhun Nyoo ña taahán tsi cuví ra ityi nuu tsihin nyivi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsi tuñi Nyoo tsi nu ña vaha tsa cuenda tsa cahnu xaan jahā nu tsi nu. <sup>7</sup> Tan cuñí tucu tsi tsa cuví ra iin nyivi vaha nuu nyivi tsa ña yihí tuhun Nyoo, tyin tacan tan ña ñihi ñi náa cuatyí tyaá ñi tsata ra tan ña cuví jaha canaa nu ña vaha tsi ra.

### Nacaa taahán tsi coo ra jahá tyiñu vehe ñuhu

<sup>8</sup> Tan tacan tucu ra jahá tyiñu vehe ñuhu naha ra. Na catsi coo ra naha. Na ña cumañi ra naha tsihin tuhun caahán ra naha, tan ña cuví ra naha ra tuhvá tsihi nyixi. Tan ndi ña nyiyo iñi ra naha jaha canaa ra naha xuhun tsihin tsa ña taahán tsi. <sup>9</sup> Cuñí tsi tsa cutuñí vaha iñi ra naha nácaa taahán tsi tsinu iñi yo tsi Nyoo tan coto vaha ra naha tyin vaha cuahán ra naha tsihin Nyoo. <sup>10</sup> Tan cuñí tucu tsi tsa nyehe jihna yo tatun vaha cuahán ra naha tsihin Nyoo, tacan tan cuví jaha tyiñi ra naha vehe ñuhu. <sup>11</sup> Tan tacan tucu ñiñaha, cuñí tsi cuví ñi nyivi vaha nuu nyivi. Ña cahan ñi cuendu. Catsi coo ñi. Tan tyaá nuu vaha ñi tandihí tyiñu. <sup>12</sup> Ra jahá tyiñu vehe ñuhu na coo intuhun ñi ñasihi ra. Tan cuñí tsi tsa coto vaha ra cundaca ñaha ra tsi sehe ra tan nyivi vehe ra. <sup>13</sup> Tyin ra jahá tyiñu vehe ñuhu, tan vaha tyanuú ra tyiñu tsa nyisó ra, cuahán ca ra ityi nuu tsihin Nyoo. Tan tsihin tsa ñi iñi ra caahán ra tuhun Nyoo tyin tsinú vaha iñi ra tsi ra Cristo Jesús.

### Nu caahán ra Pablo siqui tuhun xeehe cuhva tsinú iñi yo

<sup>14</sup> Vasiqui numi ñi cua quitsi nyehe yu nu nyií un. Maa tyin tun ña cuví quitsi yu tsa numi ñi, yoñi jaha, vaha tyin tsa tyaá yu tuhun ihya tyin coto un nácaa taahán tsi coo yo tsa cuví yo nyivi cuenda Nyoo. Tyin maa yo

cuví vehe ñuhu Nyoo nyito. Tan cuñí tsi tsa jañihi ca yo janaha yo tuhun Nyoo tsi nyivi. Tan naquihin vaha yo tyin tuhun nditsa cuví tsi. <sup>16</sup> Tsa nditsa tyin yaha xaan cahnu cuví tuhun xeehe tsa jaquituví Nyoo, tyin coo yo tumaa iyó maa ra:

Nyoo nanduví ra rayi tan tsicoo ra, tsicoo cuñu ñuhu ra tumaa tsa iyó cuñu ñuhu maa yo.

Tan catyí Tatyí Ii Nyoo tyin ra nduve cuatyí cuví ra.

Tan nyehé ra cuví ángel naha ra tsi ra.

Taniñ cahnu nu ñuhu ñayivi caahán nyivi tuhun ra.

Tan tsinú iñi nyivi tsi ra taniñ cahnu nu ñuhu ñayivi.

Tan cuanuhu ra nda gloria.

**Nu catyí ra Pablo tyin nu cuahán ca tsi quivi yihí nyivi ña cua tsinu ca iñi ñi tsi ra Cristo**

**4** Maa tyin caahán catsi Tatyí Ii tan catyí ra tyin nu cua ndihi tyembu yihí nyivi ña cua tsinu ca iñi ñi tsi ra Cristo, tyin cua tyaa soho ñi tuhun caahán tatyí ña vaha tsa jandaví ñaha. Tan cua cunyicun ñi ndusu yuhu nu ña vaha. <sup>2</sup> Cua tyaa soho ñi tuhun caahán nyivi jandaví ñaha. Tan ñi can ña tuví iñi ñi náa javahá ñi tyin tsa ndundavá xaan añima ñi. Tumaa tsa cayu añima ñi jahá iin caa ihñi tan ndundavá tsi. <sup>3</sup> Cua casi ñi nu tindaha nyivi. Tan cua catyí ñi tyin ña vaha catsi yo juhva nuu nyayu. Vasu tsitó yo tyin tandihí nuu tsa tsatsí yo, Nyoo javahá itsi. Tan tandihí yoo tsa tsinú iñi tsi ra tan tsitó yo tsa nditsa, tsatsí yo can tan tsahá yo tyahvi nyoo tsi ra. <sup>4</sup> Tyin tandihí tsa javahá Nyoo tan vaha tsi. Tan ña taahán tsi catyí yo tyin ña vaha tsi. Tan cuví catsi yo tandihí tsi tun tsahá yo tyahvi nyoo tsi Nyoo tsa cuenda tsi. <sup>5</sup> Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahvi nyoo tsi ra.

**Nacaa iyó ra vaha jahá tyiñu tyiñu ra Jesucristo**

<sup>6</sup> Tatun jacuahá un tandihí tsa caahán yu ihya tsi tandihí nyivi yihí tuhun Nyoo tsihin yo, cua cuvi un iin musu vaha ra Cristo Jesús. Tan tuhun tsa tsinú iñi yo, tsihin tandihí tuhun ra Cristo tsa nyicún yo, cua jatyinyee tsi tsi un tan cuahnu ca un tsihin tuhun Nyoo. <sup>7</sup> Maa tyin ña tyaa yahvi un tsa cuví xembulu, tuhun sana, tan tuhun tsahnu cuhva iyó nyivi. Vaha ca jañiñi un tsi un tan javaha un maa ñi maa cuhva cuñí maa Nyoo. <sup>8</sup> Tsa jañiñi yo coo tunyee iñi cuñu ñuhu yo, juhva ñi jatyinyee tsi tsi yo. Maa tyin tsa jañiñi yo javahá yo tandihí cuhva cuñí Nyoo, jatyinyee tsi tsi yo iin cahnu ñi, tyin jatyinyee tsi tsi yo nu ñuhu ñayivi ihya. Tan jatyinyee tucu tsi tsi yo tsa coo vaha yo nu cua tsaa yo nda gloria. <sup>9</sup> Tan nditsa, tyin tsa nditsa cuví tsi tan tandihí yo taahán tsi tsa tsinú iñi yo itsi. <sup>10</sup> Tan juvin ñi tsa cuenda yacan jahá tyiñu yo tan nyehé yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuví ra jacacú tsi tandihí nyivi, tan jihna ca yoo tsa tsinú iñi yo tsi ra jacacú ra.

<sup>11</sup> Tuhun ihya jacuahá un tsi nyivi yihí cuenda Nyoo, tan jañiñi un tsi ñi na cutuhva ñi itsi. <sup>12</sup> Catsi jahá un tsi un coto ña cua jahá nyivi tsa ñayivi tsi un tsa cuenda

tsa ndi tyuvaa xaan un. Jacuahá tsi ñi tsihin cuhva iyó un, tan tsihin cuhva caahán un. Jacuahá tsi ñi tsihin tsa cuñí un tsi Nyoo tan tsi nyivi, tsihin cuhva tsicá iñi un, tsihin cuhva tsinú iñi un, tan tsihin cuhva javahá un maa ñi maa tsa vaha. <sup>13</sup> Tan tsitsi tsa ndi cumañi ca tsaa yu nu nyií un, cahvi tuhun Nyoo tsihin ñi yihí tuhun Nyoo. Cuhva cuenda ñihi tsi ñi, tan jacuahá tsi ñi nácaa cunyicun vaha ñi tsi Nyoo. <sup>14</sup> Jahá cuenda vaha tunyee iñi tsa tsahá Nyoo tsi un quivi tyisó ndaha ra nyisó tyiñu vehe ñuhu naha ra jiñi un tan cahán ra naha tsa tsahá cuenda Nyoo tsi ra naha. <sup>15</sup> Tyaa vaha iñi tuhun can tan javaha cuhva catyí tsi. Tacan tan cua nyehé tandihí nyivi nácaa cuahán un ityi nuu ca tsihin Nyoo. <sup>16</sup> Jahá cuenda tsi un tsihin cuhva iyó un. Tan jahá cuenda cuhva jacuahá un tsi nyivi. Tan ña nacoo ihñi un tsa vaha. Tatun javahá un tacan, cua cacu un, tan cua cacu tucu nyivi tyaá soho tuhun jacuahá un.

**Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo**

**5** Ña cuxaan un tsi iin ra tsahnu, maa tyin cuhva cuenda tsi ra tan jahá tsa ñayivi tsi ra tyin tumaa cuví jutu un cuví tsi ra. Tan ra cuatyí naha ra, cuhva cuenda tsi ra naha tumaa tsa yañi un cuví tsi ra naha. <sup>2</sup> Tan ñi tsahnu cuhva cuenda tsi ñi tumaa tsa sihi un cuví tsi ñi. Tan ñi cuatyí, cuhva cuenda tsi ñi tumaa tsa cuhva un cuví tsi ñi. Javaha tandihí tsa caahán yu ihya tsihin tsa vaha tsicá iñi un.

<sup>3</sup> Jatyinyee tsi ñiñaha ndaahvi tsa tsihi yí tatun nduve nyivi ñi cuví jatyinyee tsi ñi. <sup>4</sup> Maa tyin tatun iyó iin ñaha tsihi yí tan iyó sehe ña, a sehe yañi ña, cuñí tsi cutuhva jihna maa ñi can jatyinyee ñi tsi ña. Na nducuhun iñi ñi nácaa jahá cuenda sihi ñi tsi ñi tsa ndi nyihi ñi. Tan tacan taahán tsi tsa jahá cuenda tucu ñi tsi ña vityin. Tun tacan javaha ñi, vaha xaan, tyin tacan taahán iñi maa Nyoo. <sup>5</sup> Tan ñaha tsa tsihi yí tan ndoq ndaahvi intuhun ña maa ña, iin ña Nyoo tyaá iñi ña tan tsicán tahvi ña tsi ra tsinu cahñi tan tsacuaa. <sup>6</sup> Maa tyin ñaha tsihi yí tsa cusí iñi tsihin tsa iyó nu ñuhu ñayivi ihya, vasu nyito ña maa tyin tsihi ña cuenda Nyoo. <sup>7</sup> Jacoto tucu tuhun ihya tsi ñi cuhva yo tyin tacan tan ña ñihi nyivi cuhva cahan ñi ndavaha ñi tsi ñi. <sup>8</sup> Maa tyin tatun yihí yo iyó nyivi yo tan ña tsicá iñi yo jatyinyee yo tsi ñi, ña vaha tacan. Tyin tatun ña jatyinyee yo tsi nyivi vehe yo, tumaa tsa ña tsinú iñi yo tsi Nyoo cuví can. Tan cahnu ca cuatyí yo iyó tan ñavin ca nyivi tsa ña tsinú iñi tsi Nyoo.

<sup>9</sup> Nu tutu tsa nyaá sivi ñi tsihi yí, na cunyaa sivi ñi tsahnu tsa iyó ndaahvi, tatun tsa yahá uñi xico cuiya ñi, tan intuhun ñi yí ñi tsicoo. <sup>10</sup> Tan tatun tsitó vaha nyivi tsi ñi tsa cuenda tsa vaha tsa javahá ñi; tan jacuahnu vaha ñi sehe ñi, tan tsahá ñi tsa catsi nyivi tsaá yuvehe ñi, tan jahá tyiñu ñi tyiñu nyivi yihí cuenda Nyoo tsihin tsa ñi iñi añima ñi, tan jatyinyee ñi tsi nyivi nyehé tundoho. Tun tacan javahá ñi tandihí tsa vaha, cuví cunyaa sivi ñi.

<sup>11</sup> Maa tyin ña tyaa ndo sivi ñiñaha tsa ñaha ca quita uñi xico cuiya, coto coo quivi tan cuñi ñi coo nyico yí ñi

tan cuñí ñi tindaha ñi inga tsaha tan jandihí ñi tsa jahá tyiñu ñi tyiñu ra Cristo. <sup>12</sup> Tan coo cuatyí ñi tyin ña javahá ñi cuhva cahān ñi tsa cua javaha ñi. <sup>13</sup> Tan inga tucu tyiñu tatun tsicá nuu jutsan ñi maa ñi tan iin tan iin vehe nyivi quihvi ñi. Tan ñavin yacan ñi maa tyin tsicá nuu tucu ñi caahán ñi cuendu. Tan tyihí ñi tsi ñi nu ña taahán tsi quihvi ñi, tan caahán ñi tsa ña taahán tsi cahan ñi. <sup>14</sup> Vaha taxin ca na tindaha ñi inga tsaha. Na coo sehe ñi. Na jaha cuenda vaha ñi vehe ñi. Tan ña cuhva ñi cahan nyaa nyivi xaan iñi tsi yo tsi yo.

<sup>15</sup> Caahán yu tandihí tuhun ihya tsihin un tyin yihí ñi tsa nacoq ñi tsi Nyoo tan nyicún ñi tsi nu ña vaha.

<sup>16</sup> Tatun ñi yihí cuenda Nyoo tan iyó iin nyivi ñi tsa tsihí yí, cuñí tsi tsa jatyinyee maa ñi tsi ñi can, tan ña tyiso ñi itsi siqui vehe ñuhu. Tyin tacan tan cuví jatyinyee vehe ñuhu tsi inga ñi tsihí yí tsa nduve ca maa nyivi iyó.

<sup>17</sup> Ra tsahnu ra nyisó tyiñu vehe ñuhu, cuñí tsi tsa jaha xaan nyivi vehe ñuhu tsa ñayivi tsi ra, tan tsa jihna ñi na jaha ñi tsa ñayivi tsi ra caahán tuhun Nyoo tan jacuahá ra naha tsi ñi. <sup>18</sup> Tyin tuhun Nyoo catyí tsi tyehen: “Ña tyihí un yoho yuhu indiquí nu jahá tyiñu tí, tacan tan cuví catsi tí luxu.” Tan catyí tucu tuhun Nyoo tyehen: “Iyó ndatu tsa ñihí ra jahá tyiñu yahvi ra.”

<sup>19</sup> Tatun tyaá nyivi cuatyí tsi iin ra tsahnu tan ña quita uvi a uñi taahan tsandaa, ña tyaa yahvi un tsa caahán ñi. <sup>20</sup> Maa tyin nyivi tsa jañihí ca javahá tsa ña vaha, cuñí tsi tsa cahan ndo tsihin ñi nuu tandihí nyivi yucú vehe ñuhu. Tacan tan nayuhvi tandihí ca ñi tan ña javaha ñi tsa ña vaha. <sup>21</sup> Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsi ra. Tan caahán yu tsihin un tyaa yahvi tsa caahán yu ihya, inducu ñi cuñí un nyehe un tsi tandihí nyivi. <sup>22</sup> Ña numi xaan cuhva un tyiñu tsi iin ra cuví ra ityí nuu tsihin nyivi vehe ñuhu. Coto cuhun cuatyí javaha ra siqui un. Jaha cuenda vaha tsi un tsihin tandihí tsa javahá un tan ña cuhva un ndatu tsi nu ña vaha tsa nducu cuhva nu tsi un.

<sup>23</sup> Tan tsa cuenda tsa uhvi tsitsi un, ña coho ca un maa ñi maa ndutya, coho luxu vinu na nduvaha tsitsi un.

<sup>24</sup> Yihí nyivi quituví cuatyí ñi tsa ndi cumañi cutuñi ñi. Tan yihí ñi quituvi cuatyí ñi tsa yaha cutuñi ñi. <sup>25</sup> Tan tacan tucu tatun javahá yo tsa vaha, ña cuxeehe tsi. Vasu ña quituví tsi tsa numi ñi, maa tyin ña cuví ndoo xeehe tsi.

**6** Nyivi yihí cuenda Nyoo tsa cuví musu, cuñí tsi tyaa yahvi vaha ñi tsi tsitoho ñi. Tyin tacan tan ña ñihí nyivi cuhva cahan ñi ndavaha ñi siqui Nyoo, tan siqui tuhun ra tsa jacuahá yo. <sup>2</sup> Tan tatun iin musu tan yihí tsitoho ra cuenda Nyoo, taahán tsi tsa jaha ra tsa ñayivi tsi ra ican tyin yañi ra cuenda Nyoo cuví tsi ra. Cuñí tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñí ra tsi ra ican. Jacuahá yacan tsi nyivi yihí cuenda Nyoo tan cuhva cuenda tsi ñi na javaha ñi cuhva catyí tsi.

### Cuhva iyó yo tsihin Nyoo tan na cusí iñi yo tsihin tsa tsahā ra tsi yo

<sup>3</sup> Tatun iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo, <sup>4</sup> cuví ra iin ra nduyaá ñi maa, iin ra ña tsitó. Tan tsa caahán yuhu ra siqui iin tsa ñavin ñi tsa cahan yo tuhun, cuví can tumaa cuehe tsi ra. Tan tsa cuenda yacan cacú tsihi tan nyiyo iñi nyivi tsa iyó tsi inga ñi, tan tsa caahán nyaa tahan ñi tsi ñi, tacan tan ndasi cuñí nyivi nyehe tahan ñi tsi ñi. <sup>5</sup> Tan maa ñi cañi tahan nyivi jahá can tyin quiñi tsicá iñi ñi, tyin ña tsitó ñi tsa vaha. Cuñí maa ñi tyin cua jaha canaa ñi xuhun tsihin tuhun Nyoo. Ña cutahan un tsihin ñi can. <sup>6</sup> Ndit-sa tyin tsa javahá yo cuhva catyí Nyoo tan si cuñí yo tsihin tsa tsahā ra tsi yo, cuví tsi tumaa iin tsa cuca iyó tsi yo. <sup>7</sup> Tyin nduve náa tsaq tsihin yo quivi cacú yo nu ñuhu ñayivi ihya. Tan nduve náa cuhun tsihin yo quivi cúu yo. <sup>8</sup> Maa tyin tatun iyó tsa catsi yo tan iyó jahma cunditsí yo, na cusí iñi yo, tan na ndoo yo vaha tsihin yacan. <sup>9</sup> Maa tyin nyivi cuñí nducuca, nducú cuhva nu ña vaha tsi ñi. Tan nacavā ñi tsitsi xayí nu. Jandusohó nu tsi ñi tsihin tsa cuñí ñi coo cuaha tsa coo tsi ñi. Tan jatívi can tsi ñi. Tan nu ndihí tuhun cua tiví ndihí ñi tan cua cuhun ñi anyaya. <sup>10</sup> Tyin tsa cuñí xaan yo xuhun, yacan cuví yoho tandihí ca nuu tsa ña vaha. Tan yihí nyivi tsa cuenda tsa cuñí xaan ñi xuhun, tan jandihí ñi tsa tsinú iñi ñi tuhun Nyoo. Tan janyehé ñi tundoho tsi juvin ñi maa ñi tsihin yacan.

### Nacaa cañí tahan yo tsihin nu ña vaha tsihin tsa tsinú iñi yo tsi Nyoo

<sup>11</sup> Maa tyin yooho cuví un iin rayí cuenda Nyoo. Quita tsiyo nuu tandihí tsa caquiñi. Coq cuiti vaha nuu Nyoo. Cūanyicun tsi Nyoo tsihin tsa ñi iñi un. Cūñi tsi nyivi. Cūnyee iñi tsihin tsa vita iñi un nyehe un tandihí tsa cua tahan un. Tan ña cahnu jaha un tsi un. <sup>12</sup> Cañi tahan vaha tsihin nu ña vaha tsihin tsa tsinú iñi un tsi Nyoo. Ña jaña ndaha un ñayivi nyito tsa ña cua naa maa tsa tsahā Nyoo tsi yo. Tyin tsa cuenda can, canā Nyoo tsi un, tan tacan catyí un quivi cahān catsi un nuu tandihí ra cuví tsandaa naha ra, catyí un tyin tsinú iñi un tsi Nyoo. <sup>13</sup> Tan vityin nuu Nyoo, ra tsa tsahā ñayivi coo tandihí tsa iyó, tan nuu ra Cristo Jesús ra tsa tsahā cuenda vaha tuhun nditsa nuu ra Poncio Pilato, caahán yu tsihin un, <sup>14</sup> javaha tandihí tsa catyí yu tsihin un tyin javaha un tyin tacan tan ña cuví cahan nyaa nyivi tsi un nda tahan tsi quivi quitsi Jutu Mañi yo Jesucristo. <sup>15</sup> Nda tsaa maa quivi, tan cua jaquitsi Nyoo tsi ra Cristo inga tsaha. Ra ican cuví ra jacahnú yo, tan in-tuhun ñi maa ra cuví Nyoo, ra iyó xaan tunyee iñi. Rey cahnu cuví ra nuu tandihí ca ra cuví rey. Tan ra ndacá ñaha cahnu cuví ra nuu tandihí ca ra ndacá ñaha. <sup>16</sup> In-tuhun ñi maa ra cuví ra tsa nduve tuhun tsihi iyó tsi. Tan iyó ra nu nditsin nu ña cuví cutuhva nyivi. Tan ndi in-tuhun nyivi ñaha ca nyehe tsi ra. Tan ndi ña cuví nye-



he ñi tsi ra. Na jacahnu yo tsi maa ra. Tan na cundaca ñaha ra tsi yo tandihí tyembu. Tan na ña cundihí maa tsa ndacá ñaha ra tsi yo. Na cuvi tsi tacan. <sup>17</sup> Tan cahan tsihin nyivi tsa iyó tsa cuca ñuu ñayivi ihya, na ña cahn nu xaan jaha ñi tsi ñi. Tan ña cuita iñi ñi tsa cuca tsa iyó tsi ñi. Tyin tsa cuca can cua ndihí can. Na cuita iñi ñi tsi Nyoo nyito, tyin maa ra cuví ra tsahá tandihí tsi yo. Tan cuví cusii iñi yo tsihin tsi. <sup>18</sup> Cahan tsihin ñi cuca na javaha ñi tsa vaha tan nducuca ñi nuu Nyoo tsihin tsa javahá ñi tsa vaha. Tan na kuhva ñi tsa iyó tsi ñi tsihin tsa ñi iñi ñi tan ñavin tsihin tsa cuiihya cuñí ñi. <sup>19</sup> Tacan tan coo tsa cuca tsa ña cuanaa maa tsi ñi, tan jatyinyee tsi tsi ñi nu cuahán quivi ityi nuu. Tan coo ñi ñayivi nyito tsa ña cua naa maa.

#### Nu ndihí tsahá cuenda ra Pablo tsi ra Timoteo

<sup>20</sup> Yooho Timoteo, jaha cuenda vaha tyiñu tsa tsahá Nyoo tsi un. Ña tyaa soho un tuhun nu ñuhu ñayivi ihya, tuhun nduve yahvi nyaá. Ña tyaa yahvi un tuhun tsa catyí nyivi tyin tsitó xaan ñi tan ña nditsa. <sup>21</sup> Tyin tsa cuenda yacan, yihí nyivi tsa nacoo ihñi ñi tuhun Nyoo. Tan ña tsinú vaha ca iñi ñi tsi ra vityin.

Coo tsihin tsa vaha tsa iyó tsi Nyoo tsa tsahá ra tsi un.

Tan na cuvi tsi tacan ñi.

## II Timoteo

### Nu tyaq̄ ra Pablo inga carta tsa cuenda ra Timoteo

**1** Yuhu ra Pablo cuví yu iin ra tavā tyiñu ra Jesu-cristo, tyin tacan cuñí maa Nyoo. Tyin cuñí ra tsa jacoto yu tsi nyívi tyin tsahá ra ñayívi nyito coo tandihí ñi tsa iin ñi cuví tsihin ra Cristo Jesús. <sup>2</sup>Jaquitsí yu carta ihya tsi yooho Timoteo. Tan cuñí xaan yu tsi un tyin tumaa cuví sehe yu cuví tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesu-cristo coo añima un. Tan na cundaahvi iñi ra tsi un.

### Nu caahán ra Pablo tsihin ra Timoteo na catyi tuhun ra tsihin nyívi tyin cuenda ra Cristo yihí ra

<sup>3</sup>Tandihí ñi quívi nducuhún iñi yu tsi un tan tsicán tahvi yu tsi Nyoo tsinu cahñi tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsii tsaahnu yu tyiñu Nyoo tsanaha. Tan vaha cuñí añima yu tyin vaha iyó yu nuu ra. <sup>4</sup>Nducuhún xaan iñi yu nácaa tsacu un quívi quita yu nu nyíi un. Tan vityin cuñí xaan yu nyehe yu tsi un inga tsaha tan cusñi iñi yu. <sup>5</sup>Tan nducuhún xaan iñi yu tyin tsinú ñi vaha iñi un tsi Nyoo. Tumaa tsa tsinú iñi ña Loida tsitan un tan ña Eunice sihi un. Ñi ican vaha xaan tsinú iñi ñi tsi Nyoo, tan tsitó yu tyin tacan tsinú iñi maa un tsi Nyoo vityin.

<sup>6</sup>Yacan cuenda tsahá cuenda yu tsi un jandu iin ca iñi un tan cūatyíñu ndatu tsa tsahá Nyoo tsi un tsa cahan un tuhun ra. Yacan cuví ndatu tsa tsahá ra tsi un quívi tyiso ndaha yu jiñi un. <sup>7</sup>Nyoo ña tsahá ra tatyí ña vaha tsa jayuhvi tsi yo. Tsahá ra Tatyí Ii ra tsi yo tyin coo tunyee iñi cahnu tsi yo, tan cuñí tahan yo tsi yo. Tan tsahá ra tunyee iñi tsi yo tyin tacan tan cundaca ñaha vaha yo tsi yo. <sup>8</sup>Yacan cuenda ña nducahan nuu un cahan un tuhun Jutu Mañi yo. Tan ndi ña nducahan nuu un tsa nyíi yu vehe caa tsa cuenda ra. Cūatyíñu tunyee iñi tsa tsahá Nyoo tsi un tan ndoo un vaha tsa nyehe un tundoho tsa vatsí siqui yo tsa cuenda tuhun Nyoo.

<sup>9</sup>Tyin juvin ra jacacu tsi yo. Tan canā ra tsi yo tyin coo yo ñayívi ii. Ñavin tsa cuenda tsa vaha tsa javahá yo tan canā ra tsi yo. Canā ra tsi yo tyin tacan tyaq̄ maa ra cuhva javaha ra nda ndi cumañi ca tsinú ñuhu ñayívi. Tyin nda quívi can tyaq̄ ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús. <sup>10</sup>Tan vityin tsitó yo tsa vaha can tyin tsa quitsí ra Jesucristo jacacu ra tsi yo. Tan quihñi nyaa ra tandihí tunyee iñi tuhun tsiihí. Cahñi ra tuhun vaha, tan tavā nditsin ra tuhun tsa coo yo ñayívi nyito tsa ña cua naa maa.

<sup>11</sup>Nyoo tavā tyiñu ra tsi yu tsa cahan yu tuhun can tsihin nyívi. Tavā tyiñu ra tsi yu tsa caca yu tyiñu ra, tan jacuaha yu tuhun can tsi nyívi tsa ñavin nyívi Israel cuví. <sup>12</sup>Yacan cuenda nyehé yu tandihí tundoho. Maa tyin ña nducahán nuu yu tsa tacan nyehé yu tundoho, tyin tsitó yu yóo tsinú iñi yu. Tyin nacuhvā cuenda yu tsi yu tsi ra, tan tsitó vaha yu tyin cuví jaha cuenda ra tsi yu nda cuenda quívi quitsi ra inga tsaha.

<sup>13</sup>Cūanyicun tuhun vaha tsa tsahá cuenda yu tsi un. Tan coo tsihin tsa tsinú vaha iñi un tsi Nyoo. Cūñi tsi ra, tan tsi nyívi. Tyin tacan taahán tsi coo yoo tsa iyó iin caa ñi tsihin ra Cristo Jesús. <sup>14</sup>Tan na jatinyee maa Tatyí Ii tsa iyó añima yo tsi un tan jaha cuenda vaha un tsa vaha tsa tsahá Nyoo tsi un.

<sup>15</sup>Tsa tsitó un tyin nacoq̄ ihñi ra Figelo tan ra Hermogenes tsi yu tan tandihí ca maa ra iyó ityi Asia. <sup>16</sup>Maa tyin ra Onesíforo na cundaahvi iñi Jutu Mañi yo tsi ra tan tsi nyívi ra tyin cuaha xaan tsaha quitsí ra jatinyee ra tsi yu. Tan ña cahán nuu ra tsa tyehen nyíi yu vehe caa. <sup>17</sup>Tan quívi tsinyij ra ñuu Roma ihya, ña jandihí maa ra tsa nanducú ra tsi yu nda cuenda tsa nañihí ra tsi yu. <sup>18</sup>Maa Jutu Mañi yo na cundaahvi iñi ra nyehe ra tsi ra quívi cua jacutuñi ra tsi yo. Tsitó maa un nácaa jatinyee xaan ra Onesíforo tsi yo quívi tsiyucu yo ñuu Éfeso.

### Iin andaru vaha ra Jesucristo

**2** Tan yooho sehe yu, janyee iñi tsihin tunyee iñi Nyoo tsa tsahá ra Cristo Jesús tsi un tsa cuenda tsa iin ñi cuví yo tsihin ra. <sup>2</sup>Tuhun tsa tsihí un cahñi yu nuu nyívi cuaha, jacuaha yacan tsi nyívi tsa ñi iñi tsinú iñi tsi Nyoo, ñi tsa cuví jacuaha tsi inga nyívi.

<sup>3</sup>Tan cūnyee iñi nyehe tundoho tumaa iin andaru vaha ra Jesucristo. <sup>4</sup>Ndi intuhun ra cuví andaru tan ña cuví jatyañu xaan ra tsi ra tsihin inga ca tyiñu. Tyin cuñí tsi tsa javaha ra maa ñi maa tsa caahán ra cuví ityi nuu tsihin ra. <sup>5</sup>Tan tacan tucu ra jasiqué tsihin balón, ña cuvi jaha canaa ra tatun ña cūnyee iñi ra jasiquí ra tumaa taahán maa tsi. <sup>6</sup>Iin ra jahá tyiñu tsitsi cuhu, taahán tsi tsa jaha tyiñu jihna ra, tacan tan cuvi catsi jihna ca maa ra tsa quitá nu jahá tyiñu ra. <sup>7</sup>Tyihi tuñi vaha iñi tsa caahán yu tsihin un ihya, tan maa Jutu Mañi yo cua cuhva tsa cutuñi iñi un tandihí tsi.

<sup>8</sup>Nducuhun iñi tsi ra Jesucristo, ra tsa nandoto tsa yahá nyehe ra tundoho tan tsihi ra. Cuví ra tata ra rey David. Tan tuhun ra cuví tuhun tsa jacacu Nyoo tsi yo tsa tsahá cuenda ra tsi yu tyin cahan yu tsihin nyívi.

<sup>9</sup>Tan tsa cuenda tuhun can cūnyee iñi yu nyehé yu

tandihí tundoho nda cuanda nuuhñí yu tsihin cadena vityin tumaa tsatyin cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhñí tsi. <sup>10</sup> Yacan cuenda cunyeé iñi yu nyehé yu tandihí tundoho tsa cuenda tsa vaha tsi tandihí ca nyivi tsa nacatsi maa Nyoo, tyin tacan tan cua cacu ñi iin caa ñi tsihin yo tsa cuenda ra Cristo tan cua ñihi yo nu si caá tsa ña cua ndihí maa coo yo. <sup>11</sup> Tuhun ihya tuhun nditsa cuví tsi tan cua cundaa tsi:

Tatun tsihi yo cuenda cuñu ñuhu yo, coo nyito tucu yo tsihin ra.

<sup>12</sup> Tatun nyehé yo tundoho tsa cuenda ra, cua cundaca ñaha ndihí yo tsihin ra.

Tatun catyí yo tyin ñavin cuenda ra yihí yo, cua catyí tucu maa ra tyin ñavin nyivi yihí cuenda ra cuví yo.

<sup>13</sup> Tatun jandihí yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

### Tatun jahá tyiñu vaha yo, cua quita vaha yo

<sup>14</sup> Janducuhun iñi tuhun ihya tsi ra jacuahá tuhun Nyoo, tan catyí tsihin ra naha nuu Jutu Mañi yo, na jandihí ra naha tsa caahán yuhu tahan xaan ra naha tsihin tsa nduve yahvi nyaá. Tyin tsa caahán yuhu tahan ra naha tacan, nduve maa ndáa tsiñí ñuhu can. Tyin tsihin yacan jativi ra naha tsi nyivi tyaá soho tsa caahán ra naha. <sup>15</sup> Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatun tsatyíñu vaha un tuhun nditsa cuhva taahán maa tsi, ña cua nducahan nuu un. <sup>16</sup> Ña tyaa soho un tsa ña vaha tan tsa ñavin ñi tsa cahan yo tuhun tsa caahán nyivi. Tyin cuví can tumaa cuehe xaan tsi ñi. Tan yaha ca cuhva cua tivi ñi jahá can. Yacan cuví tsa tahan ra Himeneo tan ra Fileto. <sup>18</sup> Tyin quitá tsiyo ra naha ityi vaha tan catyí ra naha tyin tsa yahá nandoto yo tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyivi tsa tsinu iñi tsi Nyoo. <sup>19</sup> Vasu yihí juhva ñi tacan quitá tsiyo ñi, maa tyin Nyoo tsaquin ra tsa nditsa, tan yacan cuví tsa ña cua nasama maa. Tan nyaá iin seña tsa catyí: "Jutu Mañi yo nacotó ra tsi nyivi yihí cuenda ra tsa nditsa." Tan catyí tucu tsi: "Tandihí ñi nyisó sivi ra Cristo na quita ñi nu iyó tsa ña vaha."

<sup>20</sup> Tsitsi iin vehe cahnu, ñavin maa ñi maa ndaha tyiñu tsinu tsihin xuhun cuaan tan xuhun cuitsin iyó tsatyíñu nyivi. Tyin tsatyíñu tucu ñi tsa tsinu tsihin vitu tan tsihin ñuhu quisi. Yihí can tsatyíñu ñi can cuenda tyiñu nahnu, tan yihí can ndáa tahan ñi maa tsi tsatyíñu ñi can. <sup>21</sup> Tacan tucu maa yo tatun jahá vaha yo cuenda tsi yo, cuví yo iin nyivi tsa tsatyíñu Nyoo. Tan cuví yo tumaa iin vasu xuhun cuaan tsa ndoq vaha, tacan tan cuví cuatyíñu ra tsi yo tsa cuenda tandihí tyiñu vaha.

<sup>22</sup> Ña caca iñi un tumaa tsicá iñi ra cuatyí iyó nu ñuhu ñayivi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yoocho coo iin ñayivi cuiti. Tsinu vaha iñi tsi Nyoo. Cuñi tsi Nyoo tan tsi nyivi. Coo vaha tsihin tandihí nyivi yihí cuenda Nyoo, tandihí

ñi tsa tsicán tahvi tsi Jutu Mañi yo, ñi iyó aña vaha.

<sup>23</sup> Tan ña tyaa soho un tsa nduve yahvi nyaá tsa caahán yuhu tahan nyivi. Tyin tsitó un tyin tsihin yacan nducuaaha ca tsihi. <sup>24</sup> Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyivi cuví ra tsihin tandihí nyivi. Tan cuñí tsi tsa ñihi vaha ra cuhva jacuaaha ra tuhun Nyoo tsi nyivi. Tan cuñí tucu tsi tsa cunyeé iñi ra tsihi tsahá nyivi. <sup>25</sup> Tan tsihin tsa vita iñi ra cuñí tsi janaha vaha ra cuhva coo nyivi ndava iñi. Tan cuatu ra tatun ndu uvi iñi ñi tan coto ñi tsa nditsa. <sup>26</sup> Tacan tan cua cutuñi iñi ñi tan quita ñi tsitsi xayí nu ña vaha tyin tsa vityin javahá maa nu cuhva cuñí nu tsihin ñi.

### Nacaa cua coo nyivi nu cua ndihí quivi

**3** Tan cuñí tucu tsi coo un tyin nu cua ndihí tyembu cua coo quivi tsa yñ xaan cua coo yo. <sup>2</sup> Tyin cua coo nyivi nyiyo iñi, maa ñi tsa tsii maa ñi cua cuñí ñi coo. Tan cua cuñi xaan ñi xuhun. Tan yaa xaan cua jahá ñi tsi ñi, cahnu cua jahá ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sihi ñi. Ña cua nacuhva ñi tyahvi nyoo tsi Nyoo, tan ndi tsi nyivi ñi. Ña cua tyaa yahvi ñi tsi Nyoo. <sup>3</sup> Ña cua cuñi ñi tsi nyivi ñi. Ña cua cuhva maa ñi coo taxin nyivi. Cua cahan ñi cuendu. Ña cua cuví cundaca ñaha ñi cuñu ñuhu ñi. Xaan xaan ñi cua cuví. Tan ña cua cuñi ñi nyehe ñi tsa vaha. <sup>4</sup> Cua xico ñi tsi nyivi ñi. Tan cua cana iñi ñi javaha ñi náa ndihí tsa cuñí maa ñi. Tan cahnu cua jahá ñi tsi ñi. Tan maa ñi maa tsa cuñí maa ñi cua nanducu ñi, tan ña cua nanducu ñi tsi Nyoo. <sup>5</sup> Cua cunycun ñi tsi Nyoo tumaa tsa tsinu iñi ñi cua jahá ñi tsi ñi, maa tyin ña nditsa. Tyin tyasí ñi nu janahá Nyoo tunyee iñi ra tyin ña tsinu iñi ñi tsi ra.

Ña cutahan un tsihin nyivi javahá tacan. <sup>6</sup> Tyin tyañu ñi ican iyó ra tsa quihví tsitsi vehe, tan jandaví ñaha ra tsi ñiñaha tsa nduve maa tsa tsiñi tuñi jiñi ñi. Tan cuaha cuatyí ñi can iyó, tan cuaha tsa ña vaha cuñí ñi. <sup>7</sup> Cuahán ñi cua tyaa soho ñi tuhun tsa, maa tyin ña cuví maa cutuñi iñi ñi tsa cuví tsa nditsa. <sup>8</sup> Tan nyivi cua coo, cua cuví ñi tumaa ra Janes tan ra Jambres, ra tasi tsa tsicoq tsanaha naha ra. Tyin cuñi ra naha jahá cana ra naha tsi ra Moisés. Tan tacan tucu nyivi cua coo nu cuahán ca tsi ityi nuu. Cua cahan ñi ndavaha ñi siqui tuhun Nyoo. Quiñi xaan cua caca iñi ñi. Tan ña cua quita vaha ñi tsihin cuhva tsinu iñi ñi. <sup>9</sup> Maa tyin tsa cua janaha ñi, ña cua cuví nducuaaha can tyin ña xeehe caa tyin iin tsa nduve yahvi nyaá cua cuví can, tumaa tsa javahá tucu ra Janes tan ra Jambres.

### Nu ndihí tavá tyiñu ra Pablo tsi ra Timoteo

<sup>10</sup> Maa tyin yoocho tsitó vaha un tyin yuhu ñavin tacan iyó yu. Tan nyicún un tuhun tsa jacuahá yu, tan cuhva iyó yu. Tan tsitó un nacuenta iyó yu tacan, tan nácaa tsinu iñi yu tsi Nyoo. Tan tsitó tucu un nácaa cunyeé iñi yu tsa cuxaán nyivi tsi yu, tan nácaa cuñí yu tsi ñi.

<sup>11</sup> Tan tsitó un nácaa cunyeé iñi yu nyehé yu tundoho tsa tsinyaq ndaha nyivi tsi yu. Tsitó un tsa tahan yu,

tandihí tundoho tsa nyehe yu tsacatyí tuhun Nyoo nda ñuu Antioquía, tan ñuu Iconio, tan ñuu Listra. Maa tyin Jutu Mañi yo jacacü ra tsi yu tsitsi tandihí tundoho can. <sup>12</sup>Tsa nditsa tyin tandihí yoo tsa cuñí coo cuhva cuñí ra Cristo Jesús cua janyehe nyivi tundoho tsi yo. <sup>13</sup>Maa tyin nyivi caquiñi tan nyivi jandaví ñaha, quiñi xaan ca cua coo ñi. Tyin cua jandaví ñaha ñi tsi nyivi tan cua jandaví ñaha tucu maa nyivi tsi ñi.

<sup>14</sup>Maa tyin yooho jañiñi tsi un tan coo un tsihin tsa cutuhvā un. Tyin tsitó un yóo jacuahā tsi un tan tsitó un tyin tsa nditsa cuví tsa cutuhvā un. <sup>15</sup>Nda ndi luhlu un tan tsitó un tuhun nyaá nu tutu Nyoo. Tan yacan cuví tsa tsahá tsa cutuñi iñi un tan cacu un tsa cuenda tsa tsinú iñi un tsi ra Cristo Jesús. <sup>16</sup>Tandihí tuhun tsa nyaá nuu tutu Nyoo, maa Nyoo tsahā tsi. Tan jatyinyeé xaan tsi tsi yo tsa nacoto yo nácaa taahán tsi tsinú iñi yo. Janahá tsi tsi yo tyin iyó cuatyí yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo. <sup>17</sup>Tacan jatyinyeé tuhun Nyoo tsi yo tyin tacan tan ña cumañi tsa cumañi tsi yo tan cuvi yo iin ra cuiti yihí cuenda Nyoo tan javaha yo tandihí tsa vaha.

**4** Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua jandaa cuatyí nyivi nyito tan nyivi tsihi quivi cua quitsi ra cundaca ñaha ra tsihin tunyee iñi tsa iyó tsi ra. <sup>2</sup>Çahan tuhun Nyoo tsihin nyivi. Tan ña jandihí un tsa jañiñi un javaha un tacan. Çahan tuhun Nyoo tsihin ñi tatun tsahá tsi cuhva tan vasu ña tsahá tsi cuhva. Cuhva cuenda tsi ñi, çahan tsihin ñi tatun ña vaha javahá ñi, tyin tacan tan cunyicun vaha ñi tsi ra Cristo. Tan cunyee iñi cuatu nda nasama ñi cuhva iyó ñi. Tan jacuahā tsi ñi nácaa taahán tsi coo ñi. <sup>3</sup>Tyin coo quivi ña cua cunyee ca iñi nyivi tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán iñi maa ñi tyaa soho ñi. <sup>4</sup>Tan cua tyaa tsiyo ñi tsa nditsa. Tan cua tyaa soho ñi tsa ña nditsa. <sup>5</sup>Maa tyin yooho jaha cuenda tsi un tsihin tsa vaha tsicá iñi un. Cunyee iñi nyehe tundoho. Çahan tuhun Nyoo tsihin nyivi. Vaha javaha un tyiñu tsa tsahā Nyoo tsi un.

<sup>6</sup>Yuhu tsa yatyin cua nacuhva cuenda yu ñayivi iyó yu tsa cuenda tuhun Nyoo, tyin tsa cuyatyin cúu yu. <sup>7</sup>Tsa yahā cañi tahan yu tumaa taahán maa tsi, tan tsa ndihí javahā yu tyiñu tsa tsahā Nyoo tsi yu tumaa iin ra tsinú suuhva, tun tsa tsaā ra nu taahán tsi cucuiñi ra. Tan tacan ñi maa tsinú iñi yu tsi Nyoo. <sup>8</sup>Tan vityin nu cuahán ca quivi, ndatú vaha yu tsa taahán tsi tsi yu tsa cua cuhva Jutu Mañi yo tsi yu tsa cuenda tsa vaha tsi-coo yu nuu ra. Tan ñavin maa ñi maa yu cua cuhva ra itsi, cua cuhva tucu ra itsi tsi tandihí ca nyivi tsa ndatú

tsi ra quivi cua quitsi ra. Tyin intuhun ñi maa ra cuví ra tatsí tuñi vaha.

### Inga tyiñu tavā ra Pablo tsi ra Timoteo

<sup>9</sup>Janumi tan quitsi ñi un, quitsi nyehe un nu nyíi yu. <sup>10</sup>Tyin ra Demas nacoo ihñi ra tsi yu tyin cuñí ca ra tsa iyó ñuu ñayivi ihya. Tan cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Damacia. <sup>11</sup>Intuhun ña ra Lucas nyíi tsihin yu. Nanducu tsi ra Marcos tan quihin tsi ra quitsi tsihin un quivi quitsi un. Tyin cuví jatyinyee ra tsi yu tsihin tyiñu Nyoo. <sup>12</sup>Jacuhun yu tsi ra Tíquico ñuu éfeso. <sup>13</sup>Quivi quitsi un yaha un naquihin un jahma vixin yu tsa nacoo yu ñuu Troas vehe ra Carpo. Tan naquihin un tandihí libru yu, cundaha un quitsi tsihin un. Tsa ñiñi ca cuñí tsi cundaha un, yacan cuví tandihí tutu yu.

<sup>14</sup>Ra Alejandro, ra cañi caa, cuaha xaan tsa ña vaha javahā ra tsi yu. Maa Jutu Mañi yo cua natyahvi tsi ra tsa cuenda tandihí tsa javahā ra. <sup>15</sup>Jaha cuenda vaha tsi un coto náa javaha ra tsi un. Tyin xaan xaan cuñí ra cuenda tuhun Nyoo tsa caahán yo.

<sup>16</sup>Tsa jihna ñi jacacü yu tsi yu nuu ra cumí tyiñu naha ra, yoñi maa jatyinyee tsi yu. Tandihí ra naha nacoo ihñi ra naha tsi yu. Na jaha Nyoo tucahnu iñi tsi ra naha tsa cuenda yacan. <sup>17</sup>Vasu ndi maa tandihí ra naha nacoo ihñi tsi yu, maa tyin Jutu Mañi yo jatyinyee xaan ra tsi yu. Tan tsahā ra tunyee iñi tsi yu tan cuví çahan catsi yu tuhun ra nuu nyivi. Tan tsiñi tandihí nyivi tsa ñavin ñi Israel cuví tsa çahan yu. Tan jacacü Nyoo tsi yu tan ña tsatsi ndicaha can tsi yu. <sup>18</sup>Tan maa Nyoo cua jacacu tsi yu ndaha tandihí tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndacá ñaha ra nda gloria. Tan taahán tsi jacahnu yo tsi ra tandihí ñi tyembu. Tan na cuvi tsi tacan.

### Nu ndihí çahan ra Pablo tan tsahā ra nacumi tsi nyivi

<sup>19</sup>Cuhva nacumi tsi ña Prisca tan tsi ra Aquila tan tsi nyivi ra Onesíforo. <sup>20</sup>Tan jacotó ndihí yu tsi un tyin ndoo ra Erasto ñuu Corinto. Tan ndoo ra Trófimo ñuu Mileto tyin cuuhví ra. <sup>21</sup>Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyí ra Eubulo tan ra Pudente tsihin ra Lino tsihin ña Claudia tan tandihí ca nyivi yihí cuenda Nyoo tsihin yo.

<sup>22</sup>Na quihí ndaha Jutu Mañi yo Jesucristo tsi un. Tan Nyoo nasoco tsi tandihí ndo.

Tan na cuvi tsi tacan ñi.

# Tito

## Nu tyaꝯ ra Pablo carta tsa cuenda ra Tito

**1** Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tavaꝯ tyiñu ra tsi yu tsa jatyinyee yu tsi nyivi nacatsj Nyoo, na tsinu iñi ñi tsi ra, tan nacoto ñi tsa nditsa, tan coto ñi nácaa taahán tsi coo yo cuhva cuñí Nyoo. <sup>2</sup> Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyj Nyoo tyin cuhva ra ñayivi nyito coo yo. Tan ña jandaví ñaha ra. <sup>3</sup> Tan vityin tsa tahaꝯ tsi quivi tsa tyaꝯ Nyoo cuhva tyin coto yo tuhun ra. Maa ra cuví ra jacacú tsi yo, tan tavaꝯ ra tyiñu tsi yu tsa cahan yu tuhun ra tsihin nyivi. <sup>4</sup> Jaquitsí yu carta ihya tsi un, Tito, tyin nditsa tyin cuví un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo añima un. Tan na cundaahvi iñi ra nyehe ra tsi un.

## Tyiñu tsahꝯ ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta

<sup>5</sup> Nacoꝯ yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuví ityi nuu tsihin nyivi vehe ñuhu intuhun intuhun ñuu, tumaa tsa catyj maa yu tsihin un. <sup>6</sup> Tyin ra tsahnu cuví ityi nuu tsihin nyivi vehe ñuhu, cuñí tsi cuví ra iin ra iyó intuhun ñi ñasihí, tan tsinú iñi tandihí sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña tuhvá nyivi tyaꝯ cuatyí siqui sehe ra. Tun tacan iyó ra, cuví cuví ra ityi nuu tsihin nyivi vehe ñuhu. <sup>7</sup> Tyin ra cuví ityi nuu tsihin ñi yihí cuenda Nyoo, maa Nyoo tsahꝯ tyiñu can tsi ra. Yacan cuenda ñiñi cuñí tsi tsa cuví ra iin ra cuiti iyó nuu Nyoo. Iin ra cahanu jahá tsi ña cuví cuví ra ityi nuu tsihin nyivi vehe ñuhu, ndi iin ra ndihí iñi, ndi iin ra tuhvá tsihí, ndi iin ra nducú tsihí, ndi iin ra jaha canaa xuhun tsihin iin cuhva ña vaha. <sup>8</sup> Maa tyin cuñí tsi cuví ra iin ra siñ cuñí tatun tsa nyivi yuvehe ra. Tan taahán tsi cuhva ra nu ndoo ñi cusu ñi. Cuñí tsi cuví ra iin ra javahá tsa vaha, iin ra tsicá iñi tsa vaha, iin ra tsa nacuhvꝯ cuenda vaha tsi ra tsi Nyoo, iin ra tsitó cundaca ñaha tsi maa ra. <sup>9</sup> Cuñí tsi cunycun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tsihin tuhun vaha ihya, tan ñihi ra cuhva jacuaha ra tsi nyivi caahán tyin ña nditsa tuhun caahán yo. <sup>10</sup> Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandaví ñaha. Tan vihi ca ra nyicún cos-

tumbre tsaahnu nyivi Israel, yaha ca cuhva caahán ra can naha ra. <sup>11</sup> Cuñí tsi tsa casi yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñí ra naha xuhun.

<sup>12</sup> Tan juvin ñi maa iin ra Creta, iin ra tsitó xaan, cahan ra tuhun nyivi ñuu maa ra catyj ra tyehen: “Nyivi Creta, vatya xaan ñi. Cuví ñi tumaa cuví quití. Cuaha xaan tsatsí ñi tan jutsan xaan ñi”, catyj ra. <sup>13</sup> Tan nditsa tsa cahan ra. Yacan cuenda cuñí tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo. <sup>14</sup> Tan ña tyaꝯ soho ca ñi cuendu tsa caahán nyivi Israel. Tan ndi ña tyaꝯ soho ca ñi tsa caahán nyivi tsa ña cuñí coto tsa nditsa.

<sup>15</sup> Tsa cuenda nyivi tsa vaha tsicá iñi ñi, tandihí maa náa tsa iyó tan vaha tsi cuñí ñi. Maa tyin tsa cuenda nyivi tsa ña tsinú iñi tan ña vaha tsicá iñi, nduve maa iin tsa vaha cuñí ñi, tyin nda cuenda cuhva tsicá iñi ñi tan tsa tsiñi tuñi iñi ñi tan ña vaha. <sup>16</sup> Catyj ñi tyin tsitó ñi tsi Nyoo, maa tyin tsihin tsa ña vaha javahá ñi, nyehe yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuví javaha ñi tsa vaha.

## Tuhun vaha tsa tsahꝯ Nyoo tyin jacuaha yo

**2** Maa tyin yooho, jacuaha tsa vaha tsa nacatsj tahan tsihin tsa jacuahá Nyoo tsi yo. <sup>2</sup> Jacuaha tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha ca-ca iñi ra naha. Vaha cuhun ra naha tsihin tsa tsinú iñi ra. Cuñí tsi tsa cuñi ra naha tsi Nyoo tan tsi nyivi. Tan cunyeé iñi ra naha tandihí náa tundoho nyehé ra naha. <sup>3</sup> Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyivi tsihin cuhva iyó ñi. <sup>4</sup> Tyin tacan, jacuahá vaha ñi tsi ñiñaha cuatyí tsa ndi tindahꝯ, na cuñi ñi tsi yñ ñi tan tsi sehe ñi. <sup>5</sup> Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuví ñi nyivi vaha. Na cuhva ñi tsa cundaca ñaha yñ ñi tsi ñi, tyin tacan tan ña cuví cahan nyivi ndavaha ñi siqui tuhun Nyoo tsa cuenda cuhva iyó ñi.

<sup>6</sup> Tacan tucu ra cuatyí naha ra. Cuhva cuenda tsi ra naha na catsi coo ra naha. <sup>7</sup> Tan maa un cuñí tsi tsa janaha un maa ñi maa tsa vaha tsi ra naha tsihin cuhva iyó un. Jacuaha tsi ra naha tsihin tsa vii tan tsihin tsa vaha. <sup>8</sup> Maa ñi tuhun vaha cahan un tyin tacan tan yoñi cuví tyaꝯ cuatyí siqui un. Tan ra xaan iñi tsi ndo

naha ra ña cua ñihi ra naha cuhva cahan ra naha ndavaha ñi siqui ndo tan cua nducahan nuu ra naha.

<sup>9</sup> Cuhva cuenda tsi ra yañi yo, ra cuví musu naha ra, na tyaa yahvi ra naha tsi tsitoho ra naha. Na javaha ra naha tandihí tsa caahán tsitoho ra naha. Tan na ña nacahan ra naha nu caahán tsitoho ra naha. <sup>10</sup> Tan na ña suhu ra naha tsa tsii tsitoho ra naha. Na jaha vaha ra naha cuenda tandihí ndaha tyiñu tsitoho ra naha, tyin tacan tan nyehe nyivi tyin vaha xaan tuhun Nyoo, ra jacacú tsi yo.

<sup>11</sup> Tyin Nyoo janahá ra tsa vaha tsa iyó tsi ra tsi nyivi tan cuñí ra jacacu ra tsi tandihí ñi. <sup>12</sup> Tsihin yacan jacuahá Nyoo tsi yo tyin taahán tsi nacoó yo tsa caquiñi tsa javahá nyivi tsa ña tsitó tsi ra, tan nacoó tucu yo tsa cuñí ñi can. Tan cuiñi coo yo nu ñuhu ñayivi ihya, na cundaca ñaha vaha yo tsi yo tumaa cuñí maa Nyoo. <sup>13</sup> Tan janahá tucu ra tsi yo nácaa cuatu yo tsa vaha tsa cua ñihi yo quivi quitsi ra Jesucristo inga tsa-ha. Tyin sii xaan cua cuñí yo nyehe yo tsa sii caá quivi quitsi ra cuví Nyoo yo, ra cahnú cuví, ra jacacú tsi yo. <sup>14</sup> Tsa-ha ra ñayivi ra tsa cuenda yo tyin tacan tan jacacu ra tsi yo ndaha tandihí tsa caquiñi. Tan nacatyá ra tsi yo na cuví yo nyivi vaha, tan cuví yo tsii maa ra, tan javaha yo maa ñi maa tsa vaha. <sup>15</sup> Yacan cuñí tsi jacuahá un tsi nyivi. Jandu iin iñi ñi. Tan çahan tsihin ñi tsihin sivi Nyoo. Tan ña javaha un tsa ña vaha tyin tacan tan ña ñihi nyivi nácaa cahan nyaa ñi tsi un.

### Cuhva taahán tsi javaha nyivi yihí cuenda Nyoo

**3** Janducuhun iñi tsi nyivi yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyí ra cumí tyiñu tyin javaha ñi tsihin tsa ñi iñi ñi. <sup>2</sup> Tan ña cahan ñi ndavaha ñi siqui nyivi. Ña cañi tahan ñi tsihin nyivi. Na cuví ñi nyivi vaha. Na masu jaha ñi aña ñi tsihin tandihí nyivi.

<sup>3</sup> Tyin nda cuenda maa yo tan ña vaha javahá yo nu quitsi tsi. Soho xaan tsicoo yo. Ndava xaan iñi yo. Ña tsicá yo ityi vaha tyin jandaví ñaha xaan nu ña vaha tsi yo. Tan tsindacá ñaha tandihí tsa ña vaha tsa cuñí cuñu ñuhu yo tsi yo. Tan javahá yo tandihí cuhva cuñí maa yo. Tan cuñí yo coo tandihí tsa iyó tsi inga nyivi tsi yo. Ndasí tsicá iñi yo nyehe yo tsi nyivi yo. Tan tacan tucu maa nyivi ndasí cuñí ñi nyehe ñi tsi yo. <sup>4</sup> Maa tyin Nyoo vaha xaan iñi ra tan jacacú ra tsi yo. Tsihin yacan janahá ra tsi yo tyin cuñí ra tsi tandihí nyivi. <sup>5</sup> Ñavin tsa cuenda tsa vaha javahá yo tan jacacú ra tsi yo, tyin ja-

cacú ra tsi yo tsa cuenda tsa cundaahví iñi ra nyehe ra tsi yo. Tan tsihin niñi ra Jesús nacatyá ra cuatyí yo, tan nacacú tsaá yo jahá Tatyí Ii ra, tan tsahá ra ñayivi nyito coo yo. <sup>6</sup> Tan tsa cuenda ra Jesucristo, ra jacacú tsi yo, tsahá xaan Nyoo tsa coo Tatyí Ii ra aña yo. <sup>7</sup> Tsihin tsa vaha maa ra tan janduvahá ra tsi yo nuu ra. tyin tacan tan naquihin cuenda yo ñayivi nyito tsa ña cua naa maa tsa ndatú yo. <sup>8</sup> Tandihí tuhun ihya tuhun ndit-sa cuví tsi. Tan cuñí yu tsa jañiñi xaan un cuhva cuenda un tuhun ihya tsi nyivi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatyinyee tsi tsi tandihí nyivi tatun tyaá yahvi ñi itsi. <sup>9</sup> Maa tyin ña tyaa soho un nu caahán yuhu tahan nyivi siqui tsa nduve yahvi nyaá. Ña tyaa soho un tsa caahán ñi tyin ñi ican cuñí ñi coto ñi nácaa vatsí tata nyivi. Ña tyiñi un tsi un tsihin nyivi cañi tahan tsa cuenda ley tsa tyaa ra Moisés tsanaha. Tyin nduve naa jatyinyee yacan. Tan nduve tsa tsiñi tuñi tsahá can.

<sup>10</sup> Tatun iyó nyivi cuñí natahvi sava tsi nyivi tsicá vehe ñuhu, çana tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña tyaá yahvi ñi tsa caahán un, çasí nu caca ñi vehe ñuhu. <sup>11</sup> Tyin tsihin tsa javahá ñi tacan, tsa tsitó un tyin ña vaha aña ñi tyin tsicoo cuatyí ñi. Tan juvin ñi maa ñi jacunaa tsi ñi tsa tacan javahá ñi.

### Tyiñu tavá ra Pablo tsi ra Tito

<sup>12</sup> Cua jaquitsi yu tsi ra Artemas, a ra Tíquico nu nyií un. Tan quivi tsaá ra, nducu cuhva tan cūhun un nda ñuu Nicópolis tyin ndacan cua ñihi tahan yo. Tyin tyaá yu cuhva tsa ndoo yu ndacan yoo vitsin. <sup>13</sup> Nducu cuhva jatyinyee un tsi ra Zenas ra tuhvá caahán ndaahvi tsaha nyivi, tan tsi ra Apolos. Tan cūhva tsa tsiñi ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha. <sup>14</sup> Na cutuhva nyivi yihí cuenda Nyoo javaha ñi tsa vaha tan jatyinyee ñi tsi inga nyivi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

### Nu ndihí cahan ra Pablo

<sup>15</sup> Tandihí ra yucú tsihin yu, tsahá ra naha nacumi tsi un. Tan cuhva nacumi tsi tandihí nyivi cuñí tsi yo tsa cuenda tsa iin ñi cuví yo cuenda Nyoo. Tan Nyoo nasoco tsi tandihí ndo.

Tan na cuví tsi tacan ñi.

# Filemón

## Nu quitsahā tyaá ra Pablo carta cuenda ra Filemón

**1** Yuhu ra Pablo, nyíi yu vehe caa tsa cuenda tsa caahán yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyí tucu ra Timoteo tyin jaquitsí ndihí ra nacumi tsi un. Cuñí xaan ndi tsi un tsa cuenda tsa iin ñi tyiñu ra Cristo jahá tyiñu yo.

## Nu quitsahā tyaá ra Pablo carta cuenda ra Filemón

<sup>2</sup> Tan tyaá yu carta ihya tsa cuenda ña Apia tan ra Arquipo tyin jatyinyeé xaan ñi tsi yo tsihin tyiñu jahá yo, tan tyaá tucu yu itsi tsa cuenda tandihí nyivi ndu iin yu vehe un. <sup>3</sup> Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo añima ndo.

## Ra Filemón tsinú xaan iñi ra tsi ra Jesús tan cuñí xaan ra tsi nyivi

<sup>4</sup> Tandihí ñi tsaha tsa tsicán tahvi yu tsi Nyoo tan nducuhún iñi yu tsi un, <sup>5</sup> tyin ñihí tuhun yu tyin tsinú xaan iñi un tsi ra Jesús tan cuñí xaan un tsi tandihí nyivi yihí cuenda ra. <sup>6</sup> Tan tsicán yu tsi Nyoo tsa cuenda tandihí nyivi tsa natsiny iñi tsi ra Jesús jahā un tsihin tsa tsinú iñi un, tyin na cutuñi iñi ñi tandihí tsa vaha tsa iyó tsi yo tsa cuenda ra Jesucristo. <sup>7</sup> Tan sñ xaan cuñí yu tan iin xaan cuñí yu tsa cuenda tsa cuñí xaan un tsi nyivi tsa yihí cuenda ra Cristo tan jandu iin xaan un iñi ñi.

## Nu tsicán ra Pablo tumañi iñi tsi ra Filemón tsa cuenda ra Onésimo

<sup>8</sup> Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu. <sup>9</sup> Maa tyin yuhu cuñí xaan yu tsi un, yacan cuenda ña cua tava tyiñu yu tsi un tyin cuñí yu ndacan yu iin tumañi iñi tsi un. Tan tsa tsitó maa un tyin yuhu tsa tsahnu xaan yu tan nyíi yu vehe caa ihya tsa cuenda ra Cristo. <sup>10</sup> Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahan yu tuhun ra Cristo tsihin ra nu nyíi yu vehe caa ihya.

<sup>11</sup> Tahān tsanaha cuví ra musu un tan ña jahā tyiñu vaha ra. Maa tyin vityin vaha xaan cua jatyinyee ra tsi

yo, tahan ñi tsi yooho tan yuhu. <sup>12</sup> Yacan jaquitsí nyico yu tsi ra yuvehe un tan cuñí yu tsa naquihin cuenda un tsi ra tumaa tsa maa yu cuví ra. <sup>13</sup> Tsicá tucu iñi yu tsa ndoo ra nu nyíi yu vehe caa ihya tan jatyinyee ra tsi yu cahan yu tuhun Nyoo tsitsi tsa nduve un. <sup>14</sup> Maa tyin ña cuñí yu jandoo yu tsi ra tyin ña tsitó yu nácaa cua cahan un. Tan ña cuñí yu jañiñi yu tsi un tun ña cuhva un tsa cunyii ra. Vaha ca jaquitsi nyico maa un tsi ra tun cacu iñi un tsa cuhva un tsi ra tsa jaha tyiñu ra tsihin yu. <sup>15</sup> Vasiqú maa Nyoo cuñí tsa cunu ra nuu un juhva quivi tan vityin cua tsa nyico ra yuvehe un tan coo cuí ra tsihin un. <sup>16</sup> Tan vityin naquihin cuenda tsi ra tumaa yañi un tsa cuenda ra Cristo; tan ñavin tumaa musu. Yuhu cuñí xaan yu tsi ra, yacan yooho taahán tsi tsa cuñi ca un tsi ra tan ñavin ca yuhu, tyin vityin ñavin musu ñi un cua cuví tsi ra tyin cuví tucu ra yañi un tsa cuenda ra Cristo.

<sup>17</sup> Tun nditsa un tsa cuñí un tsi yu tsa cuenda tsa yihí yu cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatun tsa yu yuvehe un. <sup>18</sup> Tatun javahā ra iin tsa ña vaha tsi un o nyaá cuenda ra tsi un, tyahvi maa yu can. <sup>19</sup> Yuhu ra Pablo tyaá yu letra ihya tsihin ndaha yu tyin cua tyahvi maa yu tsi un, tan ña cua cahan yu tsihin un tyin nyaá tucu cuenda maa un nda cuenda ñayivi iyó un tsi yu. <sup>20</sup> Yañi, javaha tumañi iñi ihya tsi yu, tumaa ra yihí cuenda ra Cristo; na cusñi iñi yu tan na ndu iin iñi añima yu tsihin tsa cua javaha un.

<sup>21</sup> Jaquitsí yu carta ihya tsi un tyin tsitó yu tyin cua tyaa yahvi un tsa caahán yu tan cua javaha un tsa tsicán yu, tan cuaha ca tsa cua javaha un. <sup>22</sup> Tan cuñí tucu yu tyin janduvaha un nu cusu yu yuvehe un tyin nyitá iñi yu tyin Nyoo cua cuhva ra tsa quitsi nyehe yu tsi ndo, tyin tsicán tahvi ndo tsi ra.

## Nu ndihí tyaā ra Pablo carta tsa cuenda ra Filemón tan tsahá ra nacumi tsi ra tan jacuhún tucu inga ra naha nacumi tsi ra

<sup>23</sup> Ra Epafra tsa nyíi ndihí vehe caa ihya tyin caahán ra tuhun ra Cristo Jesús jaquitsí ra nacumi tsi un. <sup>24</sup> Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihya naha ra jatyinyeé xaan tsi yu tsihin tyiñu. <sup>25</sup> Na nasoco xaan Jutu Mañi yo Jesucristo tsi ndo.

Tan na cuví tsi tacan ñi.

# Hebreos

## Caahán Nyoo tsihin yo tsihin yuhu Sehe ra

**1** Tahān tsanaha cuaha xaan tsaha, tan cuaha xaan cuhva caḥan Nyoo tsihin tsii tsaahnu yo. Tsa jihna ñi tsatyíñu ra tsi ra cuví ndusu yuhu ra. Juvín ra can naha ra tsahā cuenda tsi nyivi tuhun caahán Nyoo. <sup>2</sup> Tan vityín, nu cua ndihi tyembu ihya tsatyíñú ra tsi Sehe ra tsa caahán ra tsihin yo. Iin ñi cuví ra tsihin Sehe ra tan javahā ra tandihí tsa iyó. Tan nacuhvā cuenda ra tandihí can tsi Sehe ra. <sup>3</sup> Tan maa Sehe ra janahá ra tsa sī caá ra, tyín juvín ra Sehe ra cuví tixahñu ra tyín juvín ñi cuhva caá maa ra caá ra Sehe ra. Tan tsihin tunyee iñi tuhun caahán ra, yihí ndaha ra tandihí tsa iyó. Tsa yahā tsa nacatyā ra cuatyí yo, tan tsinyaā ra xiin cuaha Nyoo nda gloria.

## Cahnu ca cuví Sehe Nyoo tan ñavin ca ángel

<sup>4</sup> Sehe Nyoo cahnu xaan ca cuví ra tan ñavin ca ángel. Tan cahnu ca tyiñu ñihí ra jahá tyiñu ra tan ñavin ca ángel. <sup>5</sup> Tyín Nyoo ña catyí ra ndi iin tsaha tsihin ndi intuhun ángel tyehen:

Yooho cuví Sehe yu.

Tan tsahá yu ñayivi coo un vityín.

Tan ndi ña caḥan ra tuhun ndi intuhun ángel tyehen:

Yuhu cua cuví Jutu ra.

Tan maa ra cua cuví Sehe yu.

<sup>6</sup> Maa tyín quivi jaquitsí Nyoo tsi Sehe mañi ra nu ñuhu ñayivi, catyí ra:

Tyín tandihí ángel ra taahán tsi jacahnu ra naha tsi Sehe ra.

<sup>7</sup> Tan caḥan tucu ra tuhun ángel tan catyí ra:

Ángel yu cuví ra naha tumaa iin tatyí jahá yu, jahá tyiñu ra naha tyiñu yu, tan cuví tucu ra naha tumaa ñuhu, catyí Nyoo.

<sup>8</sup> Maa tyín tuhun Sehe ra catyí ra tyehen:

Nyoo cuví un, tan ña cua cundihí maa tsa ndacá ñaha un. Tan tsa ndacá ñaha un ndaa tsi tan nditsa tsi.

<sup>9</sup> Tyín cuñí un tsa vaha tan ndasi cuñí un nyehé un tsa ña vaha.

Yacan cuenda yuhu, tsa cuví yu Nyoo un, tsahá yu cuaha ca tsa sī cuñí un, tan ñavin ca tsi ra cutahán tsihin un naha ra.

<sup>10</sup> Tan catyí tucu Nyoo tsihin Sehe ra tyehen:

Yooho cuví Jutu Mañi tandihí nyivi. Quivi jihna ñi juvín un javahā ñuhu ñayivi, tan tsihin ndaha un javahā un andivi.

<sup>11</sup> Ñuhu ñayivi tan andivi tan tandihí maa tsa iyó cua cundihí tsi, maa tyín yooho, ña cua cundihí un, tyín tacan ñi iyó maa un.

Tandihí maa can cua ndutsahnu can tumaa ndutsahnú jahma.

<sup>12</sup> Tan cua quihí tahnu can tumaa tyihí tahnu yo iin jahma.

Tan cua nasama can tumaa nasamá nyivi jahma ñi.

Maa tyín yooho iin ñi maa ra cuví un tan ña cua nasama un.

Tan ña cua cundihí maa ñayivi un tyín tacan ñi iyó maa un, catyí Nyoo tsihin Sehe ra.

<sup>13</sup> Nyoo ndi iin tsaha ña caḥan ra tsihin ndi intuhun ángel tumaa caḥan ra tsihin Sehe ra tyehen:

Cunya xiin cuaha yu ihya

tsitsi tsa nacuhva cuenda yu tsi nu xaan iñi tsi un nahnu tsi un.

<sup>14</sup> Tandihí ángel, tatyí cuví ra naha. Tavā tyiñu Nyoo tsi ra naha tsa caca ra naha tyiñu ra tan jatyinyee ra naha tsi nyivi tsa cua cacu.

## Cahnu xaan cuví tsa jacacú Nyoo tsi yo

**2** Yacan cuenda cuñí tsi tyaa yahvi xaan ca yo tuhun nditsa tsa tsíñi yo, coto nacoo ihñi yo itsi.

<sup>2</sup> Tahān tsanaha tsahā cuenda ángel ley Nyoo tsi ra Moisés. Tan janahā Nyoo tyín nditsa tan taahán tsi tyaa yahvi nyivi itsi. Tan nyivi tsa tsicoo cuatyí tan ña tyaa yahvi ley can, tatsí tuñi ra tsi ñi tumaa catyí maa ley can. <sup>3</sup> Tun tacan tahān ñi can quivi can zñácaa cua javaha yoo vityín, tan cuví cacu yo tatun ña tyaa yahvi yo tsa jacacú Nyoo tsi yo?, tan cahnu xaan ca cuví tuhun ihya. Juvín ñi maa Jutu Mañi yo Jesucristo cuví ra tsa caḥan jihna tyín cuví cacu yo. Yahā can tan caḥan nyivi tsa tsíñi tsa caḥan ra. Nyehe ñi tyín nditsa tan nacatyí tuhun ñi itsi tsihin yo. <sup>4</sup> Tan sīn tyín Nyoo janahā catsi ra tsi yo tyín nditsa tsa jacacú ra tsi yo. Janahá ra can tsi yo tsihin tsa javahā ra cuaha tsa iyo. Tan tsahā tucu ra Tatyí Ii ra tsi yo tyín jatyinyee tsi tsi yo tsa javaha yo tyiñu tsa cuñí ra javaha yo. Tan tsihin tandihí yacan janahá ra tsi yo tyín nditsa tsa jacacú ra tsi yo.

## Ra Jesucristo quitsí ra cuví ra rayiñ nu ñuhu ñayivi ihya

<sup>5</sup> Nyoo ña tsahā ra tsa cundaca ñaha ángel ñuhu ñayivi tsaa tsa cua coo tsa caahán yo tuhun vityín.

<sup>6</sup> Tyín iyó iin nu tyaa iin ra nu tutu Nyoo tyehen:

Nyoo Jutu yu zyóo ra cuví rayiñ nu ñuhu ñayivi ihya tyín ñuhú iñi un tsi ra?

¿Tan yóo ra cuví ra tyín cutuñu iñi un tsa cuenda ra?



<sup>7</sup> Tyin ndaahvi ca jahā un tsi ra juhva tyembu, tan ñavin ca ra ángel naha ra.

Maa tyin jacahnū un tsi ra. Tan jahā un tsa ñayivi tsi ra.

Tan tsaḥā un tsa quihī ndaha ra tandihī tsa javahā un.

<sup>8</sup> Tandihī can tyaā cuenda un ndaha ra.

Tan nduve maa náa ña tsaḥā cuenda Nyoo quihī ndaha ra. Tan ñaha ca nyehé yo tyaā yahvi tandihī yacan tsi ra. <sup>9</sup> Maa tyin nyehé yo tsi ra Jesús tyin nduluhlū ra jahā Nyoo juhva tyembu tan ñavin ca ra ángel naha ra. Tan janduluhlū Nyoo tsi ra tsa cuenda tsa cuñí xaan ra tsi yo. Tan tsaḥā ra tsi ra Jesús quitsjī ra quitsjī cúu ra tsa cuenda tandihī yo. Tan vityin jahā xaan Nyoo tsa cahnū tsi ra tan jacahnū xaan ra tsi ra tsa cuenda tundoho tsa nyehé ra quivi can.

<sup>10</sup> Tandihī maa tsa iyó, tsa cuenda maa Nyoo cuví tsi. Maa ra javahā itsi. Tan cuñí ra cuhva ra tandihī tsa sñi caá tsa iyó andivi tsi tandihī sehe ra. Yacan cuenda janyehé ra tundoho tsi ra Jesucristo, ra tsa jacacú tsi yo, tan tsihin yacan janduvahā ra tsi ra. <sup>11</sup> Ra Cristo tsa jacacú tsi yo, Sehe Nyoo tsi ra. Tan juvin ñi sehe Nyoo nanduvjī yoo tsa tsinú iñi tsi ra. Yacan cuenda ña cahán nuu ra Cristo tsa caahán ra tyin yañi ra tan cuhva ra cuví tsi yo, tyin iin ñi Jutu yo tsihin ra. <sup>12</sup> Tyin catyí ra Cristo nu tutu Nyoo tyehen:

Cua cahan yu tuhun un tsihin yañi yu.

Tan cua jacahnū yu tsi un tsihin yaa nu ndu iin yo.

<sup>13</sup> Catyí tucu ra tyehen:

Yuhu nyitá iñi yu tsi Nyoo.

Tan catyí tucu ra:

Ihya nyaá yu tsihin sehe Nyoo, tsa tsaḥā ra tsi yu, catyí ra.

<sup>14</sup> Yoo tsa cuví yo nyivi ñuhu ñayivi, iyó cuñu ñuhu yo tan niñi yo. Tacan cuvjī ra Cristo, tyin tun tsa ña tsicoo cuñu ñuhu ra tan niñi ra, ña cua cuvi cúu ra tan janaa ra tsi nu ña vaha, nu tsa tsaḥñí tsi nyivi. <sup>15</sup> Tacan javahā ra tan jacacú ra tsi nyivi tsa tsicoo yuuhví jahā tuhun tsiihí. Cuvjī ñi tumaa musu nu ña vaha tyin tandihī ñi quivi tsicoo yuuhví ñi. <sup>16</sup> Tan tsa nditsa vaha tyin ña quitsjī ra quitsjī jatyinyee ra tsi ángel. Tyin quitsjī ra quitsjī jatyinyee ra tsi nyivi tata ra Abraham. <sup>17</sup> Yacan cuenda ñiñi cuñjī tsi tsa cuví ra tumaa yoo tsa cuví yo yañi ra tan cuhva ra tyin tacan tan cuvi ra iin ra cundaahvi iñi tsi yo, tan cuvi ra jutu tsaahnu cuví ityi nuu tsa cuenda yo nuu Nyoo tyin jandaá ra tandihī maa tan quihjī nyaa ra cuatyí yo tsihin tundoho tsa nyehé ra. <sup>18</sup> Tan tsa cuenda tsa nyehé ra tundoho quivi nducy cuhva nu ña vaha tsi ra, tsitó ra nácaa cuñí yo tun nyehé yo tundoho. Yacan vityin nyaá ra tsa jatyinyee ra tsi yo tun nyehé yo tundoho tsa nducú cuhva nu ña vaha tsi yo.

### Cahnu ca cuví ra Jesús tan ñavin ca ra Moisés

**3** Nyooho, yañi, tsa jandu ií Nyoo, tan tsa nacatsjī ra tyin coo ndo tsihin ra nda gloria, nyehé vaha ndo cuhva iyó ra Cristo Jesús, juvin ra jaquitsjī Nyoo tyin ca ca ra tyiñu ra tan cuví ra jutu tsaahnu cuví ityi nuu tsa cuenda yoo tsa tsinú iñi tuhun ra. <sup>2</sup> Ra Cristo javahā ra

tandihī tsa cahān Nyoo tyin javaha ra, tumaa javahā tucu ra Moisés tyiñu tsa tsaḥā Nyoo tsi ra tsa jaha cuenda ra vehe Nyoo tsa cuví nyivi Israel. <sup>3</sup> Ra Jesucristo cahnū ca ra cuví ra, tan ñavin ca ra Moisés, tyin cuví ra tumaa iin ra javahá vehe. Tyin ra tsa javahá vehe cahnū ca ra cuví ra tan ñavin ca maa vehe tsa javahá ra. <sup>4</sup> Tyin maa ñi iyó ra javahá intuhun intuhun vehe, maa tyin Nyoo cuví ra tsa javahā tandihī maa tsa iyó. <sup>5</sup> Ra Moisés tyaā yahvi ra tsi Nyoo tan javahā ra tyiñu tsa tsaḥā Nyoo tsi ra tyin jahā cuenda vaha ra vehe Nyoo tsa cuví nyivi Israel, tan juvin ñi jacoto tucu ra tsi nyivi tsa cua javaha Nyoo nu cuahán ca tsi. <sup>6</sup> Maa tyin ra Cristo, Sehe Nyoo, tyaā yahvi tucu maa ra tsi Nyoo tan juvin ra cuví ra ndacá ñaha vehe Nyoo vityin. Vehe can cuví yoo tun iin ñi cuñí yo nyicún yo tsi Nyoo tan nyitá vaha iñi yo tsi ra nda cuenda nu ndihī, tan tacan ñi sñi cuñí yo ndatú yo tsa cua ñiñi yo.

### Nyivi tsinú iñi tsi Nyoo, quitatú ñi tsihin ra

<sup>7</sup> Yacan cuenda cuñí tsi jaha cuenda vaha yo tsi yo tumaa catyí Tatyí Ii Nyoo tyehen:

Tatun tsiñí ndo tsa caahán Nyoo tsihin ndo vityin,

<sup>8</sup> ña jandava ndo añima ndo, tumaa javahā nyivi tsa ña tyaā yahvi tsi Nyoo

quivi nducy cuhva ñi tsi ra nu tsicā ñi nuu tsiqui.

<sup>9</sup> Tyehen catyí Nyoo:

Tsii tsaahnu ndo nducy cuhva ñi tsi yu, vasu ndi maa nyehé ñi tsa javahā yu tsitsi tsa uvi xico cuiya.

<sup>10</sup> Yacan cuenda cuxaḡn yu tsihin nyivi can, tan catyí yu tyehen: “Ña iin maa cuñí nyivi ihya tan ña cuñí ñi cunycun ñi ityi janahá yu tsi ñi.”

<sup>11</sup> Yacan cuenda cuxaḡn yu tsihin ñi, tan cahān catsi yu tsihin ñi,

tyin ña cua quitatu ñi tsihin yu, catyí Nyoo.

<sup>12</sup> Yacan cuenda yañi, jahā ndo cuenda tsi ndo tan ña caca uvi iñi ndo tsitsi añima ndo coto jandihī ndo tsa tsinú iñi ndo tsi Nyoo nyito tan coto nacoo ndo tsi ra.

<sup>13</sup> Maa tyin jandu iin tahan ndo iñi ndo tandihī ñi quivi, tsitsi tsa tsaḥá tsi cuhva tsi ndo vityin. Tyin tacan tan ña cua ndundava añima ndo, tan ndi intuhun ndo tan ña cua jandavi ñaha tsa caquiñi tsi ndo. <sup>14</sup> Tyin tun ña jandihī yo tsa nyitá iñi yo tsi Nyoo nda cuenda naa ñuhu ñayivi tumaa javahá yo nda quivi quitsahā yo, cua ñiñi yo tsa vaha iin caa ñi tsihin ra Cristo tyin cunyeé iñi yo ndatú yo tsi ra.

<sup>15</sup> Yacan tacan cuñí tsi jaha yo cuenda tsi yo tumaa catyí tutu Nyoo:

Tatun tsiñí ndo tsa caahán Nyoo tsihin ndo vityin Ña jandava ndo añima ndo, tumaa javahā nyivi tsa ña tyaā yahvi tsi Nyoo —catyí tutu Nyoo.

<sup>16</sup> ¿Yóo nyivi cuví ñi tsiñjī tsa cahān Nyoo tan ña tyaā soho ñi? Nyivi ihya cuví nyivi Israel tsa tavā ra Moisés Egipto tahān tsanaha. Juvin ñi can ña tyaā soho. <sup>17</sup> Tan ¿yóo nyivi cuxaḡn Nyoo tsitsi tsa uvi xico cuiya? Juvin ñi maa ñi tyin tsicoo cuatyí ñi. Tan tsihī ñi nu tsiqui, juvin ñi maa nu tsicā ñi. <sup>18</sup> ¿Tan yóo tsihin cahān catsi Nyoo tyehen?:

—Ña cua quitatu ndo tsihin yu.

Juvin ñi tsihin ñi tsa ña tyaḡ soho can. <sup>19</sup> Ihya nyehé yo tyin ña cuvī ñihī ñi quitatu ñi tsihin Nyoo tyin ña tsinū iñi ñi tsi ra.

**4** Yacan cuenda, tsitsi tsa ndi iyó ndatu tsa quitatu yo tsihin Nyoo, jaha ndo cuenda tsi ndo tyin tacan tan ndi intuhun ndo tan ña cua ndoo ihñi ndo. <sup>2</sup> Vityin yoo tsiñi tucu yo tuhun Nyoo tsa jacacú ra tsi yo, tumaa tsa tsiñi tucu maa nyivi Israel can. Tsiñi ñi itsi, maa tyin nduve nacatyí tsa tsiñi ñi itsi tyin ña tsinū iñi ñi itsi. <sup>3</sup> Yoo tsa tsinú iñi tsi Nyoo, quitatú yo tsihin ra. [Maa tyin ña quitatu nyivi tsa ña tsinú iñi tsi ra] tyin catyí ra:

Yuhu cuxaḡan yu tsihin ñi tan caḡan catsi yu tsihin ñi tyin ña cua quitatu ñi tsihin yu, catyí ra.

Vasu ndi maa [tacan caḡan Nyoo tsihin ñi ican], maa tyin [tsa iyó tuhun tsa cuvī quitatu yo tsihin Nyoo nda quivi] ndihī jahḡ tyiñu ra javahḡ ra ñuhu ñayivi. <sup>4</sup> Tyin yihí nu tutu Nyoo caahán tsi tyehen tuhun tsa tsinu utsa quivi nu ndihī vitya:

Tsa ndihī jahḡ tyiñu Nyoo, quitatú ra tsa tsinu utsa quivi.

<sup>5</sup> Tan catyí tucu tsi tyehen:

Ña cua quitatu ñi tsihin yu, catyí Nyoo.

<sup>6</sup> Nyivi tsa tsiñi jihna tuhun tsa jacacú Nyoo tsi yo ña cuvī quitatú ñi tsihin ra, tsa cuenda tsa ña tyaḡ yahvi ñi tsa caḡan ra tsihin ñi. Maa tyin vityin ndi iyó ndatu tsa quitatu inga nyivi tsihin ra. <sup>7</sup> Tsa yahḡ tsa ña tyaḡ yahvi nyivi Israel tsa caḡan Nyoo, tan tyaḡ ra inga quivi cuvī quitatu yo tsihin ra, tan quivi can cuvī tyembu vityin. Tacan caahán Nyoo nu tutu ra nu tyaḡ ra David tyehen:

Vityin tatun nyoooho tan tsiñi ndo tsa caahán yu,

Ña jandava xaan ndo añima ndo, catyí Nyoo.

<sup>8</sup> Tun tsatyin tsahḡ ra Josué nu quitatu nyivi Israel, ña cua caḡan Nyoo tsa cuenda inga quivi. <sup>9</sup> Yacan cuenda cuvī quitatu nyivi yihí cuenda ra tsihin ra. <sup>10</sup> Tyin nyivi quitatú tsihin Nyoo, ña tsicá iñi ñi tsa cuenda tyiñu jahá ñi tyin quitatú añima ñi tumaa quitatú Nyoo quivi ndihī jahḡ tyiñu ra. <sup>11</sup> Cuñi tsi jañiñi yo nducu yo cuhva quitatu yo tsihin Nyoo, tyin tacan tan ndi intuhun yo tan ña javaha yo tumaa javahḡ nyivi tsicoḡ tsanaha tsa ña cuñi tsinu iñi tsi ra.

<sup>12</sup> Tyin tuhun Nyoo, nyito tsi, tan iyó tunyee iñi itsi. Tan xaan ca tsi tan ñavin ca mityi tsa xaan nduvi tsiyo yuhu. Tan jasiñ tsi tsa tsiñi tuñi jiñi yo tan tsa nyito yo, tan nu yihí tahan yiqui yo tan susun yihí tsitsi yiqui yo. Tan janahá tsi tun vaha o ña vaha tuhun xeehe tsa iyó añima yo tan tsa tsicá iñi yo. <sup>13</sup> Nduve maa tsa javahḡ Nyoo tan cuvī cunu xeehe can nuu ra, tyin tandihī maa tan nyehé ra. Tan juvin tsi ra cua cuhva cuenda yo tsa javahá yo.

**Ra Jesús cuvī jutu tsaahnu cuvī ityi nuu tsa caahán ndaahvi tsihin Nyoo tsa cuenda yo**

<sup>14</sup> Ra Jesús Sehe Nyoo, juvin ra cuvī jutu tsaahnu cuvī ityi nuu tsa cuenda yo, tyin quihvi ra nu nyaá Nyoo nda gloria tan caahán ndaahvi ra tsaha yo. Yacan cuenda na ña jandihī yo tsa tsinú iñi yo tsi ra. <sup>15</sup> Tyin ra tsa cuvī

jutu tsa cuenda yo cuvī naquihin ndaahvi ra tsi yo tatun cuihya cuñi yo, tyin tsitó ra nácaa cuñi yo tun nyehe yo tundoho tyin maa ra nyehe tucu maa ra tandihī nuu tundoho quivi nducu cuhva nu ña vaha tsi ra, maa tyin ña tsicoḡ cuatyí ra. <sup>16</sup> Yacan cuenda cuñi tsi nducu yo tsi Nyoo tan ndacan yo tsi ra tsihin tsa ña yuuhvi yo na cundaahvi iñi ra nyehe ra tsi yo tan cuhva ra tunyee iñi tsa iyó tsi ra tsi yo, tan jatyinyee ra tsi yo quivi nyehé yo tundoho.

**5** Tandihī ñi jutu tsaahnu tsa cuvī ityi nuu tsa nacatsi Nyoo tsitsi tsa tandihī nyivi Israel, nacatsi ra tsi ra naha tyin caḡan ndaahvi ra naha tsaha ñi, tan cuhva cuenda ra naha tsa jamañi ñi tsi Nyoo, tan cahñi ra quiti tsa cuenda cuatyí ñi. <sup>2</sup> Tan vatsi tsaha juvin ñi ndaahvi cuñi ra cuvī jutu quivi nducu cuhva nu ña vaha tsi ra, yacan cuenda cuvī cundaahvi iñi ra nyehé ra tsi nyivi ña cutuñi vaha iñi tuhun Nyoo tan nyivi ña nyicún vaha tsi Nyoo. <sup>3</sup> Tan yacan cuenda tsahñi ra quiti tan jamañi ra can nuu Nyoo tsa cuenda cuatyí maa ra tan tsa cuenda cuatyí nyivi.

<sup>4</sup> Ndi intuhun maa nyivi tan ña cuvī cuvī ñi jutu tun ñavin maa Nyoo nacatsi tsi ñi. Tyin maa Nyoo cuvī ra nacatsi tsi ra cua cuvī jutu, tan tsahá ra ndatu tsi ra tsa cuvī ra jutu, tumaa javahḡ ra tsihin ra Aarón taḡan tsanaha. <sup>5</sup> Tan tacan tucu ra Cristo, ñavin maa ra tyaḡ tyiñu can tsi ra, tyin maa Nyoo tsahḡ tsa cuvī ra jutu tsaahnu tsa cuvī ityi nuu, tumaa catyí ra:

Yoooho cuvī Sehe yu.

Yuhu tsahá yu ñayivi coo un vityin, catyí Nyoo tsihin ra Cristo.

<sup>6</sup> Tumaa catyí tucu ra tsihin ra nu inga nu caahán tsi tyehen:

Ña cua cundihī maa tsa cuvī yoooho jutu, tumaa cuvī ra Melquisedec.

<sup>7</sup> Quivi tsicoḡ ra Cristo nu ñuhu ñayivi ihya, tsicḡan tahvi ra tsi Nyoo, tsacu xaan ra caḡan ra tsihin Nyoo tyin juvin ra cua jacacu tsi ra ndaha tuhun tsihi tsihin tunyee iñi tsa iyó tsi ra. Tsiñi Nyoo tuhun caahán ra tsa cuenda tyin javahḡ ra tandihī tsa catyí Nyoo tyin javaha ra.

<sup>8</sup> Yacan cuenda vasu ndi maa Sehe Nyoo tsi ra Cristo, cutuhva ra tyaá yahvi ra tsi Nyoo tsihin tsa nyehe ra tundoho. <sup>9</sup> Tsa yahḡ tsa javahḡ ra tandihī cuhva cuñi Nyoo tyin javaha ra, tacan tan tsahḡ Nyoo tsi ra tsa jacacú ra tsi tandihī nyivi tsa tyaá yahvi tsa caahán ra tyin tacan tan coo cui ñi tsihin Nyoo. <sup>10</sup> Tyin maa Nyoo tavḡ tyiñu tsi ra tsa cuvī ra jutu tsaahnu cuvī ityi nuu, tumaa cuvī ra Melquisedec.

**Na ña jandihī yo tsa tsinú iñi yo tsi Nyoo**

<sup>11</sup> Cuvī caḡan cuaha yo siqui tuhun ihya, maa tyin yii xaan nacatyí tuhun yu nácaa cuahán tsi, tyin nyoooho ña cuñi ndo cutuñi iñi ndo. <sup>12</sup> Tsa naha xaan yihí ndo cuenda ra Cristo, yacan tsa taahán tsi jacuaha ndo tsi inga nyivi. Maa tyin nyoooho cuvī ndo tumaa cuvī lee tsa tyaxín tsa ñaha ca cuvī catsi tyin cuñi tsi tsa tyaá soho nyico ndo tuhun tsa tsiñi ndo tsa jihna ñi. <sup>13</sup> Tyin nyivi cuñi tyaá soho tuhun tsa ña yii cuvī ñi tumaa lee tsa tyaxín tyin ñaha ca cutuñi vaha iñi ñi nácaa coo va-

ha ñi tsihin Nyoo. <sup>14</sup> Maa tyin nyivi tsa cutuñi vaha iñi tan tsahnú ñi tsihin tuhun Nyoo, juvin ñi cuví tumaa iin nyivi tsa tsatsí nyayu tyin nacotó ñi ndáa tsa vaha tan ndáa tsa ña vaha.

**6** Yacan cuenda ña ndoo yo vaha maa ñi maa tsihin tuhun ra Cristo tsa cutuhva yo tsa jihna ñi; na cahun yo ityi nuu ca tyin tacan tan cuahnu ca yo tsihin tuhun Nyoo. Na ña ndoo yo vaha tsihin tsa tsa yaha cutuhva yo: tsa ña nducu yo cuhva nduvaha yo nuu Nyoo tsihin tsa javahá yo, tan tsa jacacú Nyoo tsi yo tsihin tsa tsinú iñi yo tsi ra. <sup>2</sup> Tan na ña ndoo yo vaha tsihin tuhun tsa cutuhva yo cuenda tsa tsicoondutyá yo, tan tsa tyisó ndaha yo síqui nyivi tsinú iñi tsi Nyoo na nasoco ra tsi ñi, tan tsa cuenda tsa cua nandoto tandihí nyivi tsa yaha cúu ñi, tan tsa cuenda tucu tsa cua cutuñi tandihí nyivi nuu Nyoo tan yihí ñi cua cahun cuii ñi anyaya. Na ña ndoo yo vaha tsihin yacan ñi. <sup>3</sup> Nacuhun ca yo ityi nuu tatun Nyoo tsaha ra ndatu.

<sup>4</sup> Tyin nyivi tsa tsa yaha naquihin cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyí Ii Nyoo añima ñi. <sup>5</sup> Tan tsitó ñi tyin vaha tuhun Nyoo. Tan tsa nyehé ñi juhva nácaa cua cuví tsa cua coo yo nu ñuhu ñayivi tsa, tyin ñihí ñi tunyee iñi tsa iyó tsi Nyoo. <sup>6</sup> Tatun tsa naquihin cuenda ñi tandihí yacan, yaha can tan jandihí ñi tsa tsinú iñi ñi tsi Nyoo, ña cua cuví ca ndu uvi iñi ñi inga tsaha. Tyin tumaa tsa tyaá ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyivi. <sup>7</sup> Añima nyivi cuví tsi tumaa ñuhu nu jahá tyiñu nyivi, tyin tandihí ñi tsaha tsa cuún savi, nacohó ñuhu can ndutyá savi can. Tatun vaha ñuhu can, vaha tsicoó tsa tatsí nyivi, tan nasocó Nyoo ñuhu can. <sup>8</sup> Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmi ra itisi. Tacan cua tahan nyivi tsa jandihí tsa tsinú iñi tsi Nyoo.

<sup>9</sup> Yañi, vasu ndi maa caahán ndi tacan, maa tyin tsitó vaha ndi tyin nyoocho nasocó Nyoo tsi ndo tyin jacacú ra Cristo tsi ndo. <sup>10</sup> Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuñi xaan ndo tsi nyivi yihí cuenda ra, tan nyehé tucu ra tyin tsa yaha xaan jatynyee ndo tsi ñi, tan ndi jatynyee ca ndo tsi ñi vityin. <sup>11</sup> Cuñi ndi tsa jañihi ca ndo ndu iin iñi ndo nda cuanda quitsi Jutu Mañi yo, tyin tacan tan ñihi ndo tandihí tsa ndatú ndo. <sup>12</sup> Ña cuñi ndi tsa jutsan xaan jahá ndo tsi ndo, maa tyin cuñi ndi tsa coo ndo tumaa iyó nyivi tsa tsinú vaha iñi tsi Nyoo tan javaha ndo tumaa javahá ñi. Tyin ñi ican cunyeé xaan iñi ñi ndatú ñi, tan ñihí ñi tsa catyi Nyoo tyin cuhva ra tsi yo.

<sup>13</sup> Tyin quivi tyihí Nyoo cuhva tyin cuhva ra tsa cua cuhva ra tsi ra Abraham, tsatyíñu ra juvin ñi sivi maa ra, tyin ña cuví cuatyíñu ra náa inga ca sivi tyin nduve nyivi cahnu ca cuví tan ñavin ca maa ra. <sup>14</sup> Tan catyi ra tsihin ra Abraham tyehen: “Tsa nditsa tyin cua nasoco xaan yu tsi un tan cuaha xaan tata un cua cuví jaha yu”, catyi ra tsihin ra. <sup>15</sup> Ra Abraham ñihí ra tsa catyi Nyoo tsihin ra tyin cuhva ra tsi ra tsa cuenda tsa tsinú iñi ra tan cunyeé iñi ra ndatu ra can. <sup>16</sup> Iin nyivi tun tyi-

hí ñi cuhva tsa cuhva ñi tsa cua cuhva ñi tsi yo, tsatyíñu ñi sivi iin nyivi cahnu ca cuví tan ñavin ca maa ñi. Tsihin yacan ndoó ñi tuhun tsihin yo. <sup>17</sup> Nyoo tsatyíñu ra juvin ñi sivi maa ra quivi catyi ra tyin cuhva ra tsa cuhva ra tsi nyivi ra. Javahá ra tacan tyin cuñi ra tsa coto ñi tyin cua jandaa ra tsa cahán ra tsihin ñi tan ña cua nasamá tuhun cahán ra. <sup>18</sup> Tan iyó uvi taahan tsa ña cuví nasama. Iin tsi cuví tsa cuhva Nyoo tsa catyi ra tyin cuhva ra tsi yo, tan inga tsi cuví tsa tsatyíñu ra juvin ñi sivi maa ra. Nyoo ña vatya ra. Yacan cuenda tandihí yoo tsa nyanaá tsi ra, ñi cuñi yo nyitá iñi yo tsi ra, tan ndatú yo tsa ñihi yo tsa catyi ra tyin cuhva ra tsi yo. <sup>19</sup> Tumaa iin yutun ndoo tsa tsicá nuu ndutyá ñuhu nuuhí tsi tsihin iin caa vee coto cahun tsi tsihin tatyí, tacan nyitá iñi yo tsa jacacú ra Cristo tsi yo. Tan tsa nyitá iñi yo tsi ra, cuví tsi tumaa tsa nuuhí yo tsihin Nyoo ra nyaá Nu Ii Xaan inga tsiyo nu natahvi sava jahá jahma. <sup>20</sup> Ican quihvi ra Jesús tyin tacan tan nuñá ra ityi cahun yo nu nyaá Nyoo. Tan ña cua cundihí maa tsa cuví ra Jesús jutu tsahnu cuví ityi nuu, tumaa cuví ra Melquisedec.

#### Ra Jesús cuví ra jutu tumaa cuví ra Melquisedec

**7** Ra Melquisedec tsa caahán yu tuhun ihya, juvin ra cuví rey ñuu Salem, tan cuví tucu ra jutu cuenda Nyoo, ra cahnu ca cuví tan ñavin ca tandihí tsa iyó. Quivi tsa vatsi nuhu ra Abraham naha ra tsa yaha tsahán ra naha tsicani tahan ra naha tsihin ra cuví rey naha ra, tan jahá canaa ra naha, ra Melquisedec jatahan ra tsi ra naha tan nasoco ra tsi ra Abraham. <sup>2</sup> Tan cuaha tsa ñihí ra Abraham nu tsahán ra tsicani tahan ra. Tsitsi tsa utsi utsi nuu tsa ñihí ra, tsahá ra intuhun intuhun can tsi ra Melquisedec. Melquisedec cuñi tsi catyi: “Rey tsa javahá tsa vaha.” Tan juvin ñi cuví tucu ra rey ñuu Salem, tan Salem cuñi tsi catyi “tsa taxin”. Yacan cuenda cuví ra: “Rey tsahá tsa taxin.” <sup>3</sup> Ra Melquisedec nduve jutu ra tan sihi ra. Ña caahán tsi tun iyó nyivi ra, tan ndi ña caahán tsi ama cacú ra, tan ama tsihi ra. Yacan cuenda cuví jandu inducu yo tsi ra tsihin Sehe Nyoo, tyin ña tsindihí maa tsa cuví ra jutu.

<sup>4</sup> Nyehé yo ihya vityin tyin cahnu xaan cuví ra Melquisedec, tyin tsahá ra Abraham juhva tsa ñihí ra nu tsicani tahan ra tsi ra. <sup>5</sup> Tun tsatyin tata ra Abraham cuví ra Melquisedec, tan cuví ra jutu, ña iyo cua cuñi yo tsa tsahá ra Abraham juhva tsa ñihí ra tsi ra, tyin tsa yaha cuaha cuiya tan tsahá Nyoo ley tsi nyivi tata ra Abraham. Tan catyi ley can tyin taahán tsi cuhva juhva tsa ñihí ñi tsi ra jutu tsa cuví tata ra Leví naha ra, vasu ndi maa iin ñi nyivi cuví ñi tsihin ra naha tyin juvin ñi tata ra Abraham cuví ra naha. <sup>6</sup> Ra Melquisedec, vasu ndi maa ñavin tata ra Leví, tan tata ra Abraham cuví ra, maa tyin naquihin cuenda ra juhva tsa ñihí ra Abraham. Tan nasoco ra Melquisedec tsi ra Abraham, ra tsa catyi Nyoo tsihin tyin cua cuhva ra tsa cuhva ra. <sup>7</sup> Tan tsitó catsi yo tyin cahnu ca cuví ra tsa nasocó, tan ñavin ca ra tsa nasoco ra. <sup>8</sup> Nyehé yo tyin cahnu ca cuví ra Melquisedec tan ñavin ca tandihí ra tsa quihín cuenda intuhun intuhun tsitsi tsa utsi utsi tsa ñihí nyivi, tyin

rayiñ ñuhu ñayivi ihya ñi cuví ra naha, tan tuhvá ra naha tsihi. Maa tyin caahán tsi nu tutu Nyoo tan catyí tsi tyin ra Melquisedec nyito ra. <sup>9</sup> Ra Leví tsihin sehe ra, tata ra Abraham cuví ra naha. Juvín ra naha cuví jutu tsa naquihín tsa intuhun intuhun tsitsi tsa utsi utsi tsa ñihí nyivi. Cuví catyi yo tyin tandihí ra can naha ra tyahví ndihí ra naha tsi ra Melquisedec quivi tyahví ra Abraham tsi ra. <sup>10</sup> Cuví catyi yo tyin tyahví ndihí tata ra Leví tsi ra Melquisedec quivi ñihí tahan ra tsihin ra Abraham tyin tata ra Abraham tsi ra naha vasu ndi maa ñaha ca coo ra naha quivi can.

<sup>11</sup> Ra jutu tata ra Leví tsa cuví tucu tata ra Aarón, juvin ra naha jacuahá ley tsahnu Nyoo tsi yo. Vaha vityin; tun tsatyin cuví janduvahá ra jutu can naha ra tsi nyivi nyicún ley can, ña ñiñi cuñí tsi quitsi inga jutu, ñavin jutu tumaa ra Aarón maa tyin jutu tumaa ra Melquisedec. <sup>12</sup> Tyin tun nasamá Nyoo tsi ra cuví jutu, nasamá tucu ra ley ra. <sup>13</sup> Jutu Mañi yo tsa caahán tutu Nyoo tuhun, tata inga ra sehe ra Israel cuví ra. Tan ndi intuhun tata ra can tan ña cuví ra naha jutu. <sup>14</sup> Tsitó vaha yo tyin Jutu Mañi yo tata ra Judá tsi ra, tan ra Moisés ña cahān ra tuhun tata ra Judá quivi cahān ra tuhun ra cuví jutu naha ra.

<sup>15</sup> Nditsa tsa nasamā Nyoo tsi ra jutu tyin jaquitsi ra iin jutu tumaa ra Melquisedec. <sup>16</sup> Ra jutu ihya ña quitsi ra tumaa catyí ley tsahnu, tyin ley can catyí tsi tyin maa ñi tata ra Leví taahán tsi cuví jutu, tan ra can ñavin tata ra Leví cuví ra. Maa tyin iyó tunyee iñi tsi ra tsa coo cuii ra, yacan cuenda juvin ra jaquitsi Nyoo. <sup>17</sup> Tyin tyehen caahán Nyoo tuhun ra:

Yooho ña cua ndihí maa tsa cuví un jutu, tyin cuví un jutu tumaa ra Melquisedec.

<sup>18</sup> Yacan cuenda nacoq Nyoo ley tsahnu can tyin ña cuví jatyinyeé tsi tsi nyivi, tan ña cuví cacu nyivi jahá tsi.

<sup>19</sup> Ley can ña cuví janduvahā tsi tsi nyivi nu Nyoo. Yacan cuenda tsahā ra inga tsa vaha ca tsi yo. Tan tsa vaha ihya jatyinyeé tsi tsi yo tsa cuví natuhún yo tsihin Nyoo. Yacan cuenda nyitá iñi yo tuhun can, tan tuhun can cuví ra Cristo.

<sup>20</sup> Nyoo cahān catsi ra tyin tacan cua cuvi, tan tacan cuví. <sup>21</sup> Tandihí ca maa ra jutu tsa iyó vityin naha ra nduve náa cahān Nyoo tuhun ra naha. Maa tyin quivi tsahā Nyoo tsi ra Cristo tsa cuví ra jutu, cahān catsi ra tsihin ra tumaa caahán nu tutu ra tyehen:

Cahān catsi Jutu Mañi yo, tan ña nasama ra tsa cahān ra nu catyi ra tyehen:

“Yooho ña cua ndihí maa tsa cuví un jutu, tyin cuví un jutu tumaa ra Melquisedec”, catyi Nyoo.

<sup>22</sup> Tsa cuenda tsa javahā ra Cristo, tan tsitó yo tyin vaha ca tyiñu ndoq Nyoo tsihin yo tan ñavin ca tsa jihna ñi can. <sup>23</sup> Jutu tsa cuví tata ra Leví cuaha xaan ra naha tsa cuenda tyin tun tsihi iin ra, nacosó inga ra. <sup>24</sup> Maa tyin ra Jesús nduve tuhun tsihi iyó tsi ra, yacan cuenda ña tsindihí tsa cuví ra jutu. <sup>25</sup> Tan tsa cuenda yacan cuví jacacu ra tsi nyivi tsa nanducú tsi Nyoo. Tan tsahá ra tsa coo cuii ñi tsihin Nyoo tyin tacan ñi iyó maa ra tan tsicán tahvi ra tsi Nyoo tsa cuenda ñi.

<sup>26</sup> Ra Jesús cuví jutu tsaahnu cuví ityi nuu tsa tsiñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan quitā tsiyo ra nu iyó nyivi iyó cuatyí tan nandaq ra ityi siqui andivi. <sup>27</sup> Ra Jesús ñavin tumaa inga ra jutu tsaahnu can naha ra cuví ra, tyin ra ican naha ra cuñí tsi cahñi ra naha quitā tan jamañi ra naha nuu Nyoo tandihí ñi quivi. Jihna ca jamañi ra naha quitā tsa cuenda cuatyí maa ra naha, yaha tan jamañi ra naha tsa cuenda cuatyí tandihí nyivi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandihí yo. <sup>28</sup> Ley Nyoo tsa naquihín cuenda ra Moisés, tsahá tsi ndatu tsa cuví ra naha jutu tsaahnu vasu ndi maa iyó cuatyí ra naha. Maa tyin tsa yaha quitsi ley can, cahān catsi Nyoo tan ndoq ra iin tuhun tsaa tsihin yo. Tan tsahā ra tsi Sehe ra tsa cuví ra jutu tsaahnu cuví ityi nuu ca. juvin ra cuví ra vaha tan ña cua cundihí maa tsa vaha ra.

### Quivi tsihi ra Jesús tsa cuenda yo tan ndoq Nyoo tuhun tsaa tsihin yo

**8** Yacan tuhun ihya cuví tsa ñiñi ca caahán yu: Ra jutu tsaahnu tsa iyó tsi yo ndi intuhun cuatyí ra nduve iyó, tan juvin ra tsinyaa nu tyayu tsa nyaá xiin cuaha Nyoo nda gloria. <sup>2</sup> Tan ra jutu ihya jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javahā tan ñavin vehe ñuhu tsa javahā nyivi. Tyin vehe ñuhu tsa javahá nyivi cuví tsi tixahñu tsa vaha tsa iyó nda gloria. <sup>3</sup> Tandihí ra jutu naha ra, cuñí tsi cahñi ra naha quitā tan jamañi ra naha nu Nyoo tyin jaha Nyoo tucahnu iñi tsi ra naha tan tsi nyivi. Yacan cuenda cuñi tsi jamañi ra Jesucristo tsa jamañi ra nuu Nyoo. <sup>4</sup> Tun tsatyin nyii ra nu ñuhu ñayivi ihya, ndi ña cuví cuvi ra jutu. Tyin nu ñuhu ñayivi ihya, iyó ra jutu tsa jamañi nuu Nyoo tsa catyí ley tsa tyaq ra Moisés tyin jamañi ra naha. <sup>5</sup> Ra jutu tsa iyó nu ñuhu ñayivi ihya naha ra, jahá tyiñu ra naha tsitsi vehe ñuhu tsa cuví tixahñu tsa iyó nda gloria. Tan tsitó yo tyin tixahñu ñi cuví tsi, tyin tahān tsanaha quivi tsa cua javaha ra Moisés vehe ñuhu jahma, catyi Nyoo tsihin ra tyehen: “Jaha cuenda vaha, tan javaha tandihí tumaa janahā yu tsi un quivi tsahān un yucu Sinaí”, catyi Nyoo tsihin ra. <sup>6</sup> Maa tyin ra Cristo ra cuví jutu tsaahnu cuví ityi nuu tsa cuenda yo, vaha ca tyiñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoó Nyoo tuhun vaha xaan ca tsihin yo, tan vaha ca tsa tsahá ra tsi yo.

<sup>7</sup> Tun tsatyin cuví cacu yo jahá tuhun tsa ndoq jihna Nyoo tsihin yo, ña cuñí tsi tsa ndoo ra inga tuhun tsaa tsihin yo. <sup>8</sup> Maa tyin Nyoo nyehē ra tyin ña vaha javahá nyivi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyí ra tyehen:

Cua tsaa quivi  
cua ndoo yu tuhun tsaa tsihin nyivi Israel tan nyivi Judá.

<sup>9</sup> Maa tyin ñavin tumaa tuhun tsa ndoq yu tsihin tsi tsaahnu ñi,  
quivi tññ yu ndaha ñi tan tava yu tsi ñi ñuhu Egipto.  
Ña javahā ñi tuhun ndoq yu tsihin ñi,

yacan nacoq ihñi yu tsi ñi, catyí Nyoo Jutu yo.  
<sup>10</sup> Tuhun tsaa tsa cua ndoo yu tsihin nyivi Israel nu cuahán ca tsi ityi nuu, cuví tsehe, catyí Nyoo Jutu yo:

Cua tyihi yu ley yu tsitsi tsa tsiñi tuñi jiñi ñi,  
 tan cua tyaa tucu yu itsi añima ñi.

Tacan tan cua cuví yu Nyoo ñi,  
 tan maa ñi cua cuví nyivi yu.

<sup>11</sup> Tacan tan ña ñiñi ca tsa jacuahá ñi tsi inga ñi, na nacoto ñi tsi yuhu tsa cuví yu Nyoo ñi.

Tyin tandihí ñi tan cua nacoto ñi tsi yu,  
 ñi nyihi tan nda cuanda ñi tsahnu.

<sup>12</sup> Cua jaha yu tucahnu iñi tsi ñi vasu ndi maa cuaha tsa caquiñi javahá ñi.

Tan ña cua nducuhun ca maa iñi yu cuatyí ñi, catyí Nyoo Jutu yo.

<sup>13</sup> Quivi tsa cahán Nyoo tyin cua ndoo ra tuhun tsaa tsihin yo, tsa jandutsahnú ra tuhun tsa jihna ñi can. Tan tuhun tsa ndutsahnú tsa cua cundihi tsi.

### Nu janahá tsi nácaa iyó vehe ñuhu tsa iyó nu ñuhu ñayivi tan vehe ñuhu nu cuví nda gloria

**9** Quivi ndoo Nyoo tuhun tsa jihna ñi tsihin nyivi, tsahá ra cuhva nácaa jacahnu ñi tsi ra, tsitsi vehe ñuhu tsa tsicoq nu ñuhu ñayivi ihya tahán tsanaha.

<sup>2</sup> Tyehen tsicoq vehe ñuhu can: Tsitsi vehe tsa jihna ñi nyaq candileru, tan nyaq mesa nu yucú paan ii. Tan yacan tsinañi Vehe Ii. <sup>3</sup> Tan vehe tsa tsinu uvi tsinañi Vehe Ii Xaan. <sup>4</sup> Tsitsi vehe can tsinyaq altar xuhun cuaan nu tsahmí ra jutu cutu. Tan tsinyij tucu tsatun cuenda tsa ndoo Nyoo tuhun tsihin yo, tsa ndasí tsihin xuhun cuaan. Tsitsi tsatun can tsinyij yatsin xuhun cuaan nu yihí maná. Tan tsinyij yutun tsa tsindahá ra Aarón tsa quitá ita nuu. Tan tsiyucú tucu yuu nu nyaá tsa utsi ley Nyoo. <sup>5</sup> Tan siqui tsatun can tsinyaq tsa caá tumaa caá ángel, tan cuñí tsi catyí tyin nyaá Nyoo ican. Ndotsin ángel can tyasí nu tuhvá Nyoo jahá tucahnu iñi tsi nyivi. Tsa vityin ña cuví nacatyí tuhun ca ndi siqui tuhun ihya.

<sup>6</sup> Tacan tsicoq vehe ñuhu can. Tandihí ñi quivi quihví ra jutu naha ra tsitsi Vehe Ii, tan jacahnú ra naha tsi Nyoo. <sup>7</sup> Maa tyin Vehe nu Ii Xaan, intuhun ñi maa ra jutu tsaahnu cuví ityi nuu cuví quihví ican, tan iin tsaha ñi taahán tsi quihví ra tsa iin cuiya. Tsa cua quihví ra, cuñí tsi cundaha ra ñiñi quití tyin jamañi ra itsi tsi Nyoo tsa cuenda cuatyí maa ra tan cuenda cuatyí nyivi, ñi tsa javahá soho ñi maa cuatyí. <sup>8</sup> Tan tsa tacan tsicoq yacan Tatyí Ii Nyoo janahá ra tsi yo tyin tsitsi tsa ndi jacahnú ra jutu naha ra tsi Nyoo tsitsi Vehe Ii cuñí tsi catyí tyin ñaha ca nuña ityi quihví ndáa nyivi tahan ñi maa tsi tsitsi Vehe nu Ii Xaan. <sup>9</sup> Tandihí yacan cuví can tumaa tixahñu tuhun tsaa tsa ndoo Nyoo tsihin yo vityin. Tahán tsanaha jamañi nyivi tsa jamañi ñi nu Nyoo maa tyin ña jatinyee can tsi nyivi tsa jacahnú tsi Nyoo tsihin can, tsa caca vaha iñi ñi. <sup>10</sup> Tyin tandihí tsa javahá nyivi can caahán tsi maa ñi tsa cuenda tsa tsahá Nyoo ndatu catsi ñi, tan coho ñi, tan nácaa nduvala cuñu ñuhu ñi nuu ra. Tsahá ra tsa javahá ñi tacan

tsa numi ñi, nda tahan maa tsi quivi cuhva ra tsa vaha ca.

<sup>11</sup> Vityin tsa yahá quitsí ra Cristo tsa cuví jutu tsaahnu cuví ityi nuu tsa cuenda tuhun vaha ca tsa ndoo Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa javahá nyivi. Yacan cuñí tsi catyí tyin ñavin vehe ñuhu iyó nu ñuhu ñayivi ihya cuví nu quihví ra. <sup>12</sup> Ra Cristo quihví ra tsitsi Vehe Ii Xaan. Maa tyin ña quihví ra tsihin tsa jamañi ra ñiñi mbee lee, o ñiñi indiquí lee. Quihví ra tsihin ñiñi maa ra, tan iin tsaha ñi quihví ra tan ña cuñí ca tsi tsa cuenda quihví ñi ra tyin jamañi ra ñiñi maa ra. Tsihin yacan jacacú cuii ra tsi yo. <sup>13</sup> Ra jutu naha ra tuhvá ra naha quití ñiñi toro, ñiñi mbee, tan nyaq nu cayú indiquí lee tsi nyivi. Tsihin yacan nduvahá ñi nuu Nyoo, maa tyin maa ñi cuñu ñuhu ñi nduvaha, tan ña nduvahá añima ñi. <sup>14</sup> Tun tacan jatinyee ñiñi quití can tsi nyivi, cuñí tsi catyí tyin ñiñi ra Cristo cahnu ca tunyee iñi iyó itsi! Tyin nduve cuatyí ra tsicoq tan jamañi ra juven ñi tsi maa ra nuu Nyoo jahá Tatyí Ii tsa ña cua cúu maa. Tan ñiñi ra quihín nyaq tsa ña vaha tsa iyó añima yo tyin tacan tan ña cuita ca iñi yo ley tsa tsahá tuhun tsihi tsi yo, tan cuví jaha tyiñu yo tyiñu Nyoo nyito.

<sup>15</sup> Yacan cuenda ra Jesucristo cuví ra caahán ndaahvi tsaha yo tsa cuenda tuhun tsaa tsa ndoo Nyoo tsihin yo. Tan tsa cuenda tsa tsihi ra, jahá Nyoo tucahnu iñi tsi yo tsa cuenda cuatyí tsa javahá yo quivi yihí ndaha tuhun jihna ñi can tsi yo. Tyin tacan tan yoo, tsa cana Nyoo cuví naquihin cuenda yo ñayivi tsa ña cua naa maa coo yo, tsa catyí ra tyin cuhva ra tsi yo. <sup>16</sup> Tun iin nyivi tsihi tan nacoq ñi iin tutu nu tsahá cuenda ñi yoo nyivi cua naquihin tsa iyó tsi ñi, nyivi tsa cua naquihin ndaha tyiñu can cuví naquihin ñi can, maa tyin cuñí tsi janaha ñi iin tutu cuví tsandaa tyin nditsa tsa tsa tsihi ra tsa javahá tutu can. <sup>17</sup> Maa tyin tun ndi nyito ra jatsii ndaha tyiñu can, ña cuví naha naquihin ñi ndaha tyiñu ra. <sup>18</sup> Yacan cuenda quivi ndoo Nyoo tuhun tsahnu can tsihin nyivi Israel, tsahñi ra jutu naha ra quití tan tsatí ñiñi tsi naha ti. <sup>19</sup> Tsa ndihí tsahá cuenda ra Moisés ley Nyoo tsi tandihí nyivi, tan quihín ra jahma cuaaha tsa tsinu tsihin ixi mbee ticatyí tan iin soco yutun luhlu tsa nañí hisopo, jatyiñi ra can tsitsi nu yihí ñiñi indiquí lee tan ñiñi mbee luhlu tsa sacá nuu tsihin ndutya. Tacan tan quití ra ñiñi can nu libru nu nyaá ley Nyoo tan quití ndihí tucu ra can tsi nyivi. <sup>20</sup> Tacan tan catyí ra tsihin ñi tyehen: “Ñiñi ihya cuví tsandaa tsa cuenda tsa ndoo Nyoo tuhun tsihin yo”, catyí ra. <sup>21</sup> Tan juven ñi quití tucu ra Moisés ñiñi can vehe ñuhu jahma can tan tandihí ndaha tyiñu tsa tsatyíñu ra jutu naha ra tsa jacahnú ra naha tsi Nyoo. <sup>22</sup> Tacan javahá ra naha tyin catyí ley Nyoo tyin tsa yatyin tandihí tsa iyó tan cuñí tsi nduvaha can nuu Nyoo tsihin ñiñi. Juven ñi catyí tucu tsi tyin tun ña catí ñiñi ña cua jaha Nyoo tucahnu iñi tsi nyivi.

### Niñi ra Cristo nacatyá cuatyí yo

<sup>23</sup> Javahá ra jutu naha ra tacan tyin cuñí tsi tsa nduvala tandihí ndaha tyiñu tsa cuví tixahñu tsa iyó nda gloria tsihin ñiñi quití. Maa tyin tandihí tsa iyó nda gloria,

cuñí tsi nduvaha can tsihin niñi vaha ca, ñavin tsihin niñi quití ñi. <sup>24</sup> Ra Cristo ña quihví ra tsitsi vehe ñuhu tsa javahá nyivi tsa cuví tixahñu vehe ñuhu tsa nditsa. Tyin quihví ra tsitsi vehe ñuhu tsa nditsa tsa cuví gloria. Tan vityin nyaá ra caahán ndaahvi ra tsihin Nyoo tsa cuenda yo. <sup>25</sup> Ra jutu tsaahnu cuví ityi nuu cuenda nyivi Israel quihví ra naha tsitsi Vehe Ii Xaan iin tsaha ñi tsa iin iin cuiya tyin jamañi ra naha niñi tsa ñavin niñi maa ra naha cuví. Maa tyin ra Cristo, ña cuñí tsi tsa jamañi ra tsi ra tañi tañi ñi nuu Nyoo. <sup>26</sup> Tun tsatyin tacan, cuñí tsi tsa cuenda quitsi ñi ra nyehe ra tundoho tan cúu ra nda tsa tsinu ñuhu ñayivi tan nda cuenda vityin. Maa tyin vityin tsa tsa cuyatyin cundihi ñuhu ñayivi ihya, iin tsaha ñi quitsi ra Cristo, tan jamañi ra tsi ra tyin tacan tan cuví quihin nyaá ra cuatyí yo. <sup>27</sup> Tumaá cua tahan yo: iin tsaha ñi cua cúu yo. Yaha can tan cua cutuñi yo. <sup>28</sup> Tacan iin tsaha ñi tsihi ra Cristo, tan quihin nyaá ra cuatyí cuaha xaan nyivi. Yaha can tan cua quitsi ra tsinu uvi tsaha, ñavin ca tsa quitsi jamañi ra tsi ra tsa cuenda cuatyí, tyin cua quitsi ra quitsi jacacu ra tsi nyivi ndatú tsi ra.

**10** Ley Nyoo tsa tyaá ra Moisés cuví tsi tumaa iin tixahñu tsa vaha ca tsa cua quitsi. Tsa catyí ley can, ña cuví janduvaha tsi tsi nyivi nanducú tsi Nyoo tyin maa ñi maa niñi quití jamañi ra jutu tsaahnu cuví ityi nuu naha ra tan iin tan iin cuiya. Tan ña cuví cacu yo tsihin yacan. <sup>2</sup> Tun tsatyin cuví janduvaha ley can tsi nyivi, cua cundihi tsa jamañi ra jutu naha ra niñi quití tandihi ñi cuiya. Tyin tun tsa nduvahá nyivi tsa tsahá quití can iin tsaha tsa cuenda tandihi maa, ña cua caca ca iñi ñi tun iyó cuatyí ñi tan ña cuñí ca tsi tsa jamañi ra jutu niñi quití tsa cuenda ñi inga tsaha. <sup>3</sup> Maa tyin tsa jamañi ra jutu naha ra niñi quití tan iin tan iin cuiya, janducuhún iñi tsi tsi nyivi tyin iyó cuatyí ñi. <sup>4</sup> Tyin niñi indiqui tan niñi mbee lee, ña cuví nacatya can cuatyí nyivi.

<sup>5</sup> Yacan cuenda catyí tutu Nyoo tyin ra Cristo cahán ra tyehen tsihin Nyoo:

Ña cuñí un tsa jamañi nyivi quití nuu un, yacan cuenda tsahá un tsa coo cuñu ñuhu yu.

<sup>6</sup> Tyin ña taahán iñi un tsa cahmi ñi quití tan jamañi ñi nuu cun tan quihin nyaá un cuatyí ñi.

<sup>7</sup> Tacan tan catyí yu: “Nyoo Jutu yu, va yu ihya, vatsí yu vatsí javahá yu cuhva cuñí maa un tumaa nyaá tuhun yu nu libru ley maa un”, catyí ra Jesucristo.

<sup>8</sup> Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyivi quití nuu ra. Ndi tsa cahmi ñi quití tan quihin nyaá ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñí tsi jamañi nyivi quití nuu ra, catyí ra. <sup>9</sup> Yahá can tan catyí tucu ra: “Nyoo Jutu yu, va yu ihya, vatsí yu vatsí javaha yu cuhva cuñí maa un.” Tuhun ihya cuñí tsi catyí tyin quitsi ra jatsiyó cuii ra tsa jamañi nyivi tan jamañi ra tsa vaha ca. <sup>10</sup> Tsa cuenda tsa javahá ra Jesucristo cuhva cuñí jutu ra tan janduvahá jutu ra tsi yo. Tsa javahá ra cuví tsa jamañi ra juvin ñi tsi maa ra. Javahá ra tacan iin tsaha ñi tsa cuenda cuatyí nyivi.

<sup>11</sup> Tandihí ñi quivi tan jamañi ra jutu cuenda nyivi Israel naha ra quití nuu Nyoo, tan cuaha xaan tsaha jamañi ra naha iin ñi maa nuu quití maa tyin ña cuví quihin nyaá can cuatyí nyivi. <sup>12</sup> Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí yo. Tacan tan tsinyaá ra nu tyayu nyaá xiin cuaha Nyoo. <sup>13</sup> Tan ndatú ra nda cuenda caquin Nyoo tsi nu xaan iñi tsi ra nahnu tsaha ra tyin cuañi ra siqui nahnu. <sup>14</sup> Tyin tsihin tsa jamañi ra tsi ra iin tsaha ñi tan janduvahá ra tsi nyivi yihí cuenda ra yoso cuahán quivi. <sup>15</sup> Tatyí Ii Nyoo juvin ñi janahá tucu ra yacan tsi yo. Tsa jihna ñi catyí ra tsihin yo tyehen:

<sup>16</sup> Tuhun tsaá tsa cua ndoo yu tsihin nyivi quivi can, tyehen cua cuví tsi, catyí Jutu Mañi yo:

Cua tyihi yu ley yu tsitsi añima ñi, tan cua tyaa yu itsi tsitsi tsa tsiñi tuñi iñi ñi, catyí ra.

<sup>17</sup> Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquiñi javahá ñi, catyí Jutu Mañi yo.

<sup>18</sup> Yacan cuñí tsi catyí tyin tsa yahá jahá Nyoo tucahnu iñi tsi yo. Yacan cuenda ña cuñí ca tsi cahñi yo quití, tan jamañi yo nuu Nyoo tsa cuenda cuatyí yo.

#### Cuñí tsi nanducu yo tsi Nyoo

<sup>19</sup> Yacan cuenda yañi, vityin cuví quihvi yo tsitsi Vehe Ii Xaan nu nyaá Nyoo, tsa cuenda niñi ra Jesucristo tsa tsatí. Tsihin niñi can nacatya ra cuatyí yo. <sup>20</sup> Tan nuñá ra ityi tsaá, tan iin ityi cuhun yo nu coo nyito yo. Tyin cuhva tsa tsihi ra tan ndatá jahma tsa tyasí tsa ña cuví quihvi yo nu nyaá Nyoo. Tsa ndatá jahma can, cuví tsa tsihi ra Cristo, tyin tacan tan cuví cuhun yo nu nyaá Nyoo. <sup>21</sup> Ra Jesús cuví jutu tsaahnu cuví ityi nuu tsa ndacá ñaha tsi nyivi yihí cuenda Nyoo. <sup>22</sup> Yacan cuenda cuñí tsi nanducu yo tsi Nyoo tsihin tsa nditsa tan tsihin tsa niñi iñi añima yo tsinu iñi yo tsi ra. Tyin maa ra janduvahá añima yo, yacan cuenda tsitó yo tyin nduve ca cuenda yo nyaá tsi ra tsa cuenda cuatyí yo, tan tumaa tsa nacatya ra cuñu ñuhu yo tsihin ndutya cuii, tan nduvahá yo nuu Nyoo. <sup>23</sup> Na ndu iin ca iñi yo tsinu iñi yo tsi Nyoo tan na ña ndu uvi iñi yo, tyin Nyoo cua cuhva ra tsa catyí ra tyin cuhva ra tsi yo. <sup>24</sup> Tan cuñí tsi nanducu yo cuhva jatyinyee tahan yo tsi yo, na cuñi tahan ca yo tsi yo tan javaha yo tsa vaha. <sup>25</sup> Ña taahán tsi jandihi ndo tsa tsicá ndo tuhun Nyoo tumaa javahá inga nyivi tsa ña tsicá vaha. Tyin cuñí tsi jandu iin tahan yo iñi yo. Vityin tsa tsa nyehé yo tyin tsa cuyatyin quitsi nyico Jutu Mañi yo tan cua jacutuñi ra tandihi nyivi, cuñí tsi tsa jatyinyee tahan ca yo tsi yo.

<sup>26</sup> Tyin tun tsa tsitó yo tsa nditsa tan javaha ca maa yo tsa ña vaha, nduve ca nácaa javaha yo tan cuví jaha Nyoo tucahnu iñi tsi yo. <sup>27</sup> Cua tatsi tuñi Nyoo tsi yo. Tan cua tyihi ra tsi yo nu yucú nyivi xaan iñi tsi ra. Tan ican cua cayu yo iin caa ñi tsihin ñi. <sup>28</sup> Tatun iin nyivi tsa nyitá iñi ley Nyoo tsa tyaá ra Moisés tan ña tyaá yahvi ñi tsa catyí ley can, tan tatun iyó uvi o uñi ra cuví tsandaa tsa cuenda tsa javahá ñi, cua cúu ñi tsa cuenda cuatyí ñi, tan yoñi maa cua cundaahvi iñi tsi ñi. <sup>29</sup> Tan yaha ca cua tatsi tuñi Nyoo tsi nyivi caahán ndavaha ñi

siqui Tatyí Ii ra tsa tsahá tsa vaha ra tsi yo, tan jandihí ñi tsa tsinú iñi ñi tsi Sehe ra tan jahá ñi tyin nduve yahvi nyaá ñiñi Sehe ra tsa janduvahá añima ñi. Tan tsihin ñiñi can ndoo Nyoo tuhun tsihin yo. <sup>30</sup> Tsitó yo tyin catyí Jutu Mañi yo tyehen: “Maa yu taahán tsi tatsi tuñi tsi nyivi; tan juvin yu cua cahan náa taahán tsi tahan ñi.” Juvin ñi catyí tucu ra tyin maa ra taahán tsi jacutuñi tsi nyivi ra. <sup>31</sup> Cahnu xaan tundoho cua nyehe nyivi yosó ica tsi Nyoo nyito tsa cuenda cuatyí ñi!

<sup>32</sup> Maa tyin nyooho nducuhun iñi ndo nácaa cunyeé xaan iñi ndo nyehé ndo tundoho tsa yahá naquihín cuenda ndo tsa nditsin Nyoo tsitsi añima ndo. <sup>33</sup> Yihí nyooho cahán nyivi tsi ndo, tan janyehé ñi tundoho tsi ndo nu tuvi nyivi. Tan yihí ndo cundaahví iñi ndo nyehé ndo tsi nyivi vaha iñi tsi ndo tsa tahán juvin ñi tacan. <sup>34</sup> Tan cundaahví iñi ndo nyehé ndo tsi nyivi tsiyucú vehe caa. Cunyeé iñi ndo nyehé ndo tundoho tsihin tsa sñi cuñí ndo quivi quihín nyaá nyivi ndaha ty-iñu ndo, tyin tsitó ndo tyin gloria iyó tsa vaha ca tsa cuenda ndo, tan yacan ña cua cundihí maa can. <sup>35</sup> Yacan cuenda ña jandihí ndo tsa nyitá iñi ndo tsi ra Cristo, tyin nu cuahán ca tsi tan cua ñihi ndo tsa vaha ca tyin tsinú iñi ndo tsi ra. <sup>36</sup> Cuñí tsi coo tsa taxin añima ndo tsitsi tsa cunyeé iñi ndo tyin tacan tan cuví javaha ndo cuhva cuñí Nyoo, tan naquihín ndo tsa catyí ra tyin cuhva ra tsi yo. <sup>37</sup> Tyin nu tutu Nyoo catyí tsi tyehen:

Ña naha ca

tan quitsi ra tsa nyaá quitsi, tan ña cua cucuee ca ra.

<sup>38</sup> Tan catyí Jutu Mañi yo tyehen: “Nyivi naquihín cuenda yu tumaa tsatyin vaha ñi, tsihin tsa tsinú iñi ñi tsi yu tan cua coo nyito ñi.

Maa tyin tatun jandihí ñi tsa tsinú iñi ñi, ña sñi cua cuñi yu tsihin ñi”, catyí Nyoo.

<sup>39</sup> Maa tyin yoo ña javahá yo tumaa javahá nyivi jandihí tsa tsinú iñi tsi Nyoo, tyin yoo tacan ñi maa tsinú iñi yo tsi ra tan tsa cuenda tsa tsinú iñi yo cua cacu añima yo.

### Cuhva cuñí tsi tsa tsinu iñi yo tsi Nyoo

**11** Tsa tsinú iñi yo tsi Nyoo cuví tsa tsitó vaha yo tyin cua ñihi yo tsa ndatú yo; tan tsitó vaha yo tyin cua ñihi yo iin tsa nditsa tsa ñaha ca nyehe yo, tyin tsinú iñi yo tsi Nyoo. <sup>2</sup> Juhva nyivi yo tsa tsicoo tahán tsanaha quitá vaha ñi nuu Nyoo tyin tsinu iñi ñi tsi ra.

<sup>3</sup> Tsa cuenda tsa tsinú iñi yo tsi Nyoo, tan tsitó yo tyin javahá ra ñuhu ñayivi tsihin tuhun caahán ra. Tan tsitó yo tyin tahán tsanaha tsinu tandihí tsa nyehé yo vityin tsihin tsa ña nyehé yo.

<sup>4</sup> Tsa cuenda tsa tsinu iñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Caín, yañi ra. Tsa cuenda yacan naquihín cuenda Nyoo tsi ra tumaa tsatyin vaha ra, tan naquihín cuenda tucu ra tsa jamañi ra. Vasu ndi maa ña nyito ca ra Abel, maa tyin tsiñi yo nácaa tsinu iñi ra.

<sup>5</sup> Tsa cuenda tsa tsinu xaan iñi ra Enoc tsi Nyoo, tan naquihín Nyoo tsi ra tyin tacan tan ña nyehe ra tuhun tsihi. Tan ña nañihí ca nyivi tsi ra, tyin cuanuhu ra tsihin Nyoo. Catyí tsi nu tutu Nyoo tyin tsa ndi cumañi ca

naquihín Nyoo tsi ra, maa ñi maa cuhva taahán iñi Nyoo javahá ra. <sup>6</sup> Maa tyin ña cuvi javaha yo tsa taahán iñi Nyoo tatun ña tsinú iñi yo tsi ra. Tyin tatun cuñí yo nanducu yo tsi ra, cuñí tsi tsinu jihna iñi yo tyin iyó ra, tan tsahá ra tsa vaha tsi nyivi nanducú tsi ra.

<sup>7</sup> Tahán tsanaha jacotó Nyoo tsi ra Noé náa cua cuvi ityi nuu. Vasu ndi maa ñaha ca coo can nyehé ra Noé, tsinu iñi ra tan javahá ra yutun ndoo tan ican cacu ra tsihin nyivi vehe ra. Nyivi tsa ña tyaá yahvi tsa cahán Nyoo, tatsi tuñi ra tsi ñi. Maa tyin jacacu ra tsi ra Noé tan nduvahá ra nuu ra tsa cuenda tsa tsinu iñi ra tsi ra.

<sup>8</sup> Ra Abraham tsinu iñi ra tan tyaá yahvi ra tsi Nyoo quivi caná Nyoo tsi ra. Quitá ra nu ñuhu ra tan cuahán ra nu ñuhu tsa cua cuhva cuíi Nyoo tsi ra. Vasu ndi maa ña tsitó ra nu maa cuahán ra, maa tyin quitá ra nu ñuhu ra tan cuahán ra. <sup>9</sup> Tsa cuenda tsa tsinu iñi ra Abraham tsi Nyoo, tsicoo ra nu ñuhu tsa ñaha ca nacuhva cuenda Nyoo tsi ra. Tsicoo ra tsitsi vehe jahma ñi. Juvin ñi tacan tsicoo tucu ra Isaac, sehe ra, tan ra Jacob, sehe ra Isaac. Tyin juvin ñi catyí tucu Nyoo tsihin nduvi taahan ra can naha ra tyin cua cuhva ra ñuhu can tsi ra naha. <sup>10</sup> Ra Abraham ndatú ra coo ra iin ñuu tsa ña cua naa maa; iin ñuu tsa vaha ca tsa cua cuhva Nyoo tsi ra. Tan ñuu tsa ndatú ra maa Nyoo tsaquín cuhva tsaha tsi tan samá itsi.

<sup>11</sup> Tan juvin ñi tsa cuenda tsa tsinu iñi ña Sara tsa cahán Nyoo tsihin ña, tsicoo iin sehe ña. Vasu ndi maa tsa tsahnu xaan ña, cuví tsicoo sehe ña tyin maa Nyoo tsahá tunyee iñi ra tsi ña. Tacan cuví tyin tsinu iñi ña tyin cua cundaa tsa cahán Nyoo tsihin ña. <sup>12</sup> Yacan cuenda vasu ndi maa tsa cuñí cúu cuíi ña ra Abraham, maa tyin tsicoo sehe ñasñi ra. Yahá can tan tsicoo cuaha nyivi tata ra. Tan yoñi maa cuví nacahvi tsi ñi tyin cuaha xaan ñi, tumaa cuaha tiñuu iyó andivi tan tumaa cuaha nyiti iyó yuhu ndutya ñuhu.

<sup>13</sup> Tandihí nyivi can tan nyivi tata ñi tsiñi ñi tsa ndi cumañi ca naquihín cuenda ñi tsa catyí Nyoo tsihin ñi tyin cuhva ra tsi ñi. Vasu ndi maa ña ñihí ñi can, tsinu iñi ñi tyin cua cuhva Nyoo can. Yacan cuenda sñi cuñí ñi tyin tsitó ñi tyin coo quivi cua nyehe ñi can. Tan sñi tucu cuñí ñi caahán ñi tyin yahá ñi maa ñi nu ñuhu ñayivi ihya. <sup>14</sup> Tan tsa caahán ñi tacan, cuñí tsi catyí tyin ndi tsicá ñi nanducú ñi iin nu vaha ca coo ñi. <sup>15</sup> Tun tsatyin ñuhú iñi ñi ñuu ñi nu quitá ñi, cuví cunuhu nyico ñi iin yaha ñi. <sup>16</sup> Maa tyin ña tsinuhu ñi ñuu ñi tyin cuñí ñi coo ñi ñuu vaha ca, tuhun ihya cuñí tsi catyí tyin cuñí ñi coo ñi nda andivi. Tan tsa tacan nducú ñi coo ñi nda gloria, ña cahán nuu Nyoo tsa cuví ra Nyoo ñi tyin tsa janduvahá ra iin ñuu nu coo ñi.

<sup>17</sup> Tsa cuenda tsa tsinu iñi ra Abraham tsi Nyoo, tyaá yahvi ra tsa cahán Nyoo tsihin ra tan jamañi ra tsi ra Isaac, sehe mañi ra, quivi nducú cuhva Nyoo tsi ra tun nditsa tsa tsinú iñi ra tsi ra. Javahá ra tacan vasu ndi maa catyí Nyoo tyehen tsihin ra: <sup>18</sup> “Tsa cuenda ra Isaac tan cua coo nyivi tata un.” <sup>19</sup> Vasu ndi maa cahán ra tacan tsihin ra Abraham, ra Abraham ña nayuhví ra tsa cuhva cuenda ra sehe ra tsi Nyoo, tyin tsitó ra tyin iyó tunyee iñi tsi Nyoo tsa janandoto ra ndiyi. Quivi can

tsa nyaá ra Abraham tsa cahñi ra tsi ra Isaac, sehe ra. Maa tyin Nyoo nacuhva cuenda nyico ra tsi ra Isaac tsi ra. Tan cuví can tumaa tsa janandotō Nyoo tsi ra.

<sup>20</sup> Juvín ñi tsa cuenda tsa tsinū tucu iñi ra Isaac tsi Nyoo, tan catyí ra tyin ra Jacob tan ra Esaú, sehe ra, cua ñihi ra naha tsa vaha nu cuahán ca tsi. <sup>21</sup> Tsa cuenda tsa tsinū iñi ra Jacob tsi Nyoo, tan catyí ra tyin nduvi taahan sehe ra José cua ñihi ra naha tsa vaha jaha Nyoo. Tan nyaá naa ñi ra yutun tsa tsindahá ra tan jacahnū ra tsi Nyoo tyin tsa tsahnū xaan ra. <sup>22</sup> Juvín ñi tsa cuenda tsa tsinū iñi ra José tsi Nyoo, catyí ra tsa tsa cuñí cúu ra tyin cua quita nyivi ra, ñi Israel, ñuhu Egipto. Tan tsahá cuenda tucu ra tsi nyivi tyin quivi quita ñi na quihin ñi yiquí ra cuhun tsihin ñi.

<sup>23</sup> Tsa cuenda tsa tsinū iñi jutu ra Moisés tan sihi ra tsi Nyoo, tyihí xeehe ñi tsi ra uñi yoo tyin nyehe ñi tyin sii xaan caá ra. Ña nayuhví ñi tsa cahán ra rey tyin cuñí tsi cúu tandihí sehe yí nyivi [tsa cuenda tyin tsitó ñi tyin cua jacacu Nyoo tsi ra]. <sup>24</sup> Tsinū tucu iñi ra Moisés tsi Nyoo. Yacan cuenda quivi tsahnū ra, ña cuñí ca ra cuví ra sehe ñaha cuví sehe ra rey ñuhu Egipto. <sup>25</sup> Tan nacoō ra ñuhu Egipto can tyin ña cuñí ra cusii iñi ra tsihin tsa javaha ra tsa caquiñi. Tan nacatsí ra tsa cua nyehe ra tundoho tsihin nyivi Nyoo tan ñavin ca tsa cusii iñi ra tsihin tsa tsindihí ñi maa. <sup>26</sup> Tsa cuenda ra Moisés, vaha ca tsa cuca ra Cristo tan ñavin ca tandihí tsa cuca tsa iyó Egipto. Yacan cuenda sii cuñí ra nyehe ra ticanuu tsa cuenda ra Cristo tyin tsitó ra tyin cua ñihi ra tsa cua cuhva Nyoo tsi ra. <sup>27</sup> Juvín ñi tsa cuenda tsa tsinū iñi ra Moisés tsi Nyoo, ña nayuhví ra quitā ra ñuhu Egipto, vasu ndi maa cuxaan ra rey tsi ra. Tan cunyeē xaan iñi ra tyin tumaa tsatyin nyehe ra tsi Nyoo tsa ña nyehé yo.

<sup>28</sup> Juvín ñi tsa cuenda tsa tsinū iñi ra tavā tyiñu ra na jacahnū tandihí nyivi Israel vico tan cahñi ñi iin mbee ticatyí luhlu. Tan tavā tyiñu tucu ra na cahyi ñi ñiñi mbee can quisiyu yuvehe ñi, tyin tacan tan tsa cua yaha ángel Nyoo cahñi ra sehe nuu nyivi Egipto, ña cahñi ra ndi intuhun sehe nuu maa ñi. <sup>29</sup> Tsa cuenda tsa tsinū iñi ñi Israel tsi Nyoo tan yaha sava ñi nu Ndutya Ñuhu Cuaaha tumaa nu ñuhu ityi. Ra Egipto naha ra cuñí ndihí tucu ra naha yaha ra naha, maa tyin ña cuví yaha ra naha tyin nacasi Nyoo ndutya ñuhu can siqui ra naha tan tsihi ra naha jahā ndutya can.

<sup>30</sup> Juvín ñi tsa cuenda tsa tsinū iñi ñi tsicoō nduvi ñi utsa tsaha tsata ñuu Jericó, tan tandihí cuii maa nu sama tsaha ñuu can taní. <sup>31</sup> Juvín ñi tsa cuenda tsa tsinū iñi ña Rahab, ñaha sii iñi tsicā nuu tsa tsicoō Jericó, tan ña tsihi ña quivi tsihi tandihí nyivi ñuu ña. Ña tsihi ña tyin jatinyeē ña tsi ra Israel ra tsa tsahan naha ra tsinyehe ñuu ña. Tandihí ca ñi tsihi ñi tsa cuenda tsa ña tyaā yahvi ñi tsi Nyoo.

<sup>32</sup> ¿Náa ca cua cahan yu vityin? Tyin ña cuyatyí yu cahan yu tuhun tandihí ra naha, tumaa ra Gedeón, ra Barac, ra Sansón, ra Jefté, ra David, tan ra Samuel, tan ra cuví ndusu yuhu Nyoo naha ra tahanan tsanaha. <sup>33</sup> Tsa cuenda tsa tsinū iñi ra naha tsi Nyoo, tan yihí ra naha jahā canaa ra naha tsi inga ñuu nahnu. Tan yihí ra na-

ha vaha xaan tsindacā ñaha ra naha nyivi cuenda Nyoo. Yihí ra naha ñihí ra naha tsa catyí Nyoo tyin cuhva ra tsi ra naha. Yihí ra naha jatinyeē Nyoo tsi ra naha quivi nducū cahñi ndicaha tsi ra naha. <sup>34</sup> Yihí ra naha ña cayu ra naha jahā ñuhu tsitsi ono nu tyihí nyivi tsi ra naha. Yihí ra naha cacū ra naha tan ña tsahñí nyivi tsi ra naha tsihin mityi. Yihí ra naha tsahā Nyoo tunyee iñi tsi ra naha quivi nduve tunyee iñi tsicoō tsi ra naha, tan cuví cañí tahanan ra naha tsihin nyivi xaan iñi tsi ra naha tan jahā canaa ra naha tsi ñi. <sup>35</sup> Tsicoō juhva ñiñaha, tsa nandotō nyivi.

Juhva nyivi tsinuhñí ñi tan ndoho ñi jahā nyivi, maa tyin vasu ndi maa tacan tahanan ñi, cunyeē xaan iñi ñi tan ña cuñí ñi ndoō nuña ñi. Nyivi can catyí ñi tyin tun nacoō ñi tsi Nyoo ña cua nyehe ca ñi tundoho, maa tyin ñi ican ña cuñí ñi tyin tsitó ñi tyin vasu ndi maa cúu ñi, cua nandoto ñi inga tsaha tan cua coo ñi iin ñayivi vaha ca. <sup>36</sup> Inga ñi nyehe ñi tundoho jahā nyivi tyin caahán nyaa nyivi can tsi ñi tan cañí ñi tsi ñi. Inga tucu ñi tsinuhñí ñi tsihin cadena tan tsiyucū ñi vehe caa. <sup>37</sup> Yihí ñi tsahñí nyivi tsi ñi tsihin yuu. Yihí ñi tsahnā sava nyivi tsi ñi tsihin cierra. Yihí ñi nducū cuhva nyivi tsi ñi. Yihí ñi tsahñí nyivi tsi ñi tsihin mityi. Yihí ñi tsinditsí ñi ñi mbee ticatyí tan ñi mbee; nduve jahma vaha ñi tsicoō tan ndi nduve vehe ñi. Ndaahvi xaan tsicoō ñi, tan tsicoō xaan ñi tucuihya iñi, tan nyehe ñi tundoho jahā nyivi tsa ña tsitó tsi Nyoo. <sup>38</sup> Tan nyivi ndaahvi can vaha ca ñi nuu Nyoo tan ñavin ca inga ca nyivi. Tsicā nuu ndaahvi ñi nu tsiqui tan nu iyó yucu. Tsicoō ñi tsitsi cava tan tsitsi ñuhu. <sup>39</sup> Tandihí maa nyivi ndaahvi can vasu ndi maa vaha cahan Nyoo tuhun ñi tsa cuenda tsa tsinū iñi ñi tsi ra, maa tyin ña ñihí ñi tsa catyí ra tyin cuhva ra. <sup>40</sup> Tyin cuñí ra tsa ñihi ndihí ñi tsa vaha ca tsa tyaā ra cuhva tyin cuhva ra tsi yoo tyin tacan tan nduvaha ñi nuu ra iin caa ñi tsihin yo.

### Na cuita iñi yo tsi intuhun ñi maa ra Jesús

**12** Tandihí nyivi can quitā vaha ñi nuu Nyoo tyin tsinū iñi ñi tsi ra. Tan vityin jandu iin ñi iñi yo tsihin can, tan ndatú ñi nyehe ñi tatun quita vaha yo. Yacan cuenda cuñí tsi nacoō yo tandihí tsa jatyañú tsi yo, tan tandihí cuatyí tsa tuhvá jandavi ñaha tsi yo. Tan na cunyeē iñi yo cuhun yo ityi nuu ca tsihin Nyoo tsihin tsa taxin iyó añima yo. <sup>2</sup> Na nyehe yo tsi intuhun ñi maa ra Jesús tyin juvín ra jatinyeē tsi yo tsa tsinú iñi yo tsi ra, tan tsahá tucu ra tandihí cuhva taahán tsi tsinu iñi yo. Ra Jesús cunyeē xaan iñi ra nyehe ra tundoho tan ña tyaā yahvi ra ticanuu tsa cua tahanan ra tsa cúu ra nu cruu tumaa tsiihi iin nyivi iyó cuatyí. Yacan cuenda, vityin nyaá ra xiin cuaaha Nyoo nda gloria. Tyin tsa ndi cumañi ca cúu ra, tan tsa tsitó maa ra tyin sii xaan cua cuñi ra tsa yaha cúu ra.

<sup>3</sup> Jaha ndo cuenda cuhva tsicoō ra Jesús, tyin ra Jesús nyehe xaan ra tundoho jahā nyivi iyó cuatyí, maa tyin cunyeē iñi ra. Tacan tucu nyooho, ña cundihí iñi ndo tan ña ndu uvi iñi ndo tsa nyicún ndo tsi ra. <sup>4</sup> Tyin nyooho ñaha ca nyehe ndo tundoho tumaa nyehe ra Cristo tundoho tsa cañí tahanan ra tsihin tsa caquiñí tan



tsihj ra. Tyin ñaha ca cúu ndo jaha tsa cañí tahan ndo tsihin tsa caquiñi. <sup>5</sup> ¿A tsa naq iñi ndo nácaa jaquihín ityi Nyoo tsi yo tsa cuví yo sehe ra? Catyí ra nu tutu ra tyehen:

Sehe luhlu yu, ña cuxaan un tatun tsahá cuenda yu tsi un nácaa taahán tsi javaha un.

Tan ña nducuihaya iñi un tatun cuxaán yu tsi un.

<sup>6</sup> Tyin yuhu jaquihín ityi yu tsi nyivi cuñí yu, tan tatsí tuñi yu tsi nyivi cuví sehe yu, catyí Nyoo.

<sup>7</sup> Janyee ndo iñi ndo tan nducu ndo cuhva cutuhva ndo tun jaquihín ityi Nyoo tsi ndo. Tyin Nyoo, jaquihín ityi ra tsi sehe vaha ra tumaa javaha tandihí nyivi iyó sehe, jaquihín ityi ñi tsi sehe ñi. <sup>8</sup> Tyin tatun ña jaquihín ityi Nyoo tsi yo, ñavin sehe vaha ra cuví yo. Maa tyin tatun jaquihín ityi ra tsi yo, juven sehe vaha ra cuví yo. <sup>9</sup> Tan inga tucu tuhun, tsa ndi nyihi yo, jutu yo nu ñuhu ñayivi ihya jaquihín ityi ra naha tsi yo, tan jahá yo tsa ñayivi tsi ra naha. Tan vihi ca cuñí tsi tyaa yahvi yo tsi Jutu yo Nyoo, tyin tacan tan cuvi coo cuii yo. <sup>10</sup> Jutu yo tsa iyó nu ñuhu ñayivi ihya, jaquihín ityi ra naha tsi yo tsa cuenda juhva ñi quivi, tan javahá ra naha can cuhva cuñí maa ra naha tyin vaha tsa cuenda yo. Maa tyin Nyoo jaquihín ityi vaha ca ra tsi yo, tan tsahá ra tsa ndu ii yo tumaa ii maa ra. <sup>11</sup> Nditsa tyin tsa ndi cuxaán Nyoo tsi yo nyehé yo tundoho. Maa tyin tun cutuhva yo javaha yo tsa vaha tsihin tsa nyehe yo tundoho can, cua quita vaha yo.

#### Ica xaan tun ña tyaá yahvi yo tsa caahán Nyoo tsihin yo

<sup>12</sup> Yacan cuenda ña ndu uvi iñi ndo tsa javaha ndo tsa cuñí Nyoo javaha ndo, tan ña nducuihaya iñi ndo.

<sup>13</sup> Nducu ndo cuhva coo vaha ndo tsihin Nyoo, tan cuhva caca vaha ndo tsihin ra. Tyin tacan tan cuhva ra tunyee iñi tsi ndo tan nduvaha ndo nuu ra tan ña cuihaya ca cua cuñi ndo.

<sup>14</sup> Jañiñi ndo tsi ndo tan coo vaha ndo tsihin tandihí nyivi. Nacoo ndo tandihí tsa ña vaha. Tyin nyivi tsa ña nacoo tsa ña vaha ña cuvi nyehe ñi tsi Nyoo Jutu yo.

<sup>15</sup> Jaha cuenda vaha ndo tsi ndo tyin tacan tan ña ndoo ihñi ndi intuhun ndo tyin tandihí ndo tan cua ñihi ndo tunyee iñi tsa tsahá Nyoo, tan ña cua ndoo tsa xaan tsitsi añima ndo tan ña cua tiví ndo nuu Nyoo, tyin jahá cuenda vaha ndo tsi ndo. <sup>16</sup> Nyooho rayii ndi intuhun ndo tan ña caca nuu ndo tsihin ñaha. Tacan tucu nyooho ñaha, ña caca nuu ndo tsihin rayii. Tan ña caca iñi ndo tyin nduve yahvi nyaá tuhun Nyoo, tumaa tsicá iñi ra Esaú, tyin ra Esaú xico ra tsa cuví ra ra tsitsa tsacatyí tsa catsi ra. <sup>17</sup> Tsitó ndo tyin tsa yaha yacan tan cuñi ra Esaú tsa nasoco jutu ra tsi ra, maa tyin ña cuví. Tsacu xaan ra, maa tyin ña ñihí ca ra cuhva nasamá ra tsa tsa yaha javahá ra.

<sup>18</sup> Nyooho ña taahán tsi javaha ndo tacan tyin tsaq ndo nuu Nyoo, maa tyin ñavin tumaa tsaq nyivi Israel nuu Nyoo quivi tsahán ñi yucu Sinaí tsa cuví nyehe yo. Nyehé ñi cayu ñuhu, tan ñihi xaan yihí tatyí xaan, tan naa xaan cuví. <sup>19</sup> Tan tsiñi ñi ndusu trompeta tan cahán Nyoo tsihin ñi. Tan cahán ndaahvi ñi tsihin ra na ña ca-

han ca ra tsihin ñi, tyin yuuhví xaan ñi <sup>20</sup> tsa cuenda tyin ña cunyeé iñi ñi tsa tsahá cuenda ra tsi ñi Tyin catyí ra tyehen: “Nyivi natuhva tan cuañi tsaha yucu ihya cahñi ndo tsi ñi tsihin yuu o tsihin lanza, tahan ñi nyivi tan quití”, catyí Nyoo tsihin ñi. <sup>21</sup> Nayuhví xaan ñi tsa nyehe ñi yacan, nda cuenda ra Moisés tan catyí ra: “Ñihi xaan nihí yu jahá tsa yuuhví yu”, catyí ra.

<sup>22</sup> Maa tyin nyooho ña nyehe ndo tsa yuuhví can tyin tsaq ndo yucu nañí Sión tsa cuví ñuu Nyoo nyito.

Tuhun ihya cuñi tsi catyí ñuu Jerusalén tsa canyíí nda gloria, nu iyó cuenda mil ángel. <sup>23</sup> Ndu iin ndo ican tsihin tandihí sehe Nyoo tsa iyó sivi nu libru nda gloria tan jacahnu ndo tsi ra. Natuhvá ndo nuu Nyoo, ra cuví juee [tsa jandaa cuatyí] tandihí nyivi, tan natuhvá ndo nuu tandihí añima nyivi vaha tsa janduvahá Nyoo.

<sup>24</sup> Natuhvá tucu ndo nuu ra Jesús, ra caahán ndaahvi tsihin Nyoo tsa cuenda yo vityin tsa ndoo Nyoo tuhun tsaah tsihin yo. Tan niñi ra Jesús tsa tsatí tsahá tsa vaha ca tsi yo tan ñavin ca niñi ra Abel. [Tyin niñi ra Abel tsi-can tsi cuatyí tsaha ra yañi ra. Maa tyin niñi ra Jesús, jahá tucahnu iñi cuatyí yo.]

<sup>25</sup> Yacan cuenda cuñí tsi jaha yo cuenda tsi yo tan tyaa yahvi yo tsi ra caahán tsihin yo. Tyin tacan tan ña tahan yo tumaa tahán juhva nyivi Israel tsa ña tyaa yahvi tsa cahán Nyoo quivi cahán ra yucu Sinaí nu ñuhu ñayivi ihya. Tan vihi ca yoo, tun ña tyaa yahvi yo tsi ra nyaá nda gloria tsa caahán tsihin yo vityin, ña cua cuví maa cacu yo. <sup>26</sup> Tahán tsanaha jacandá Nyoo ñuhu ñayivi tsihin ndusu ra. Tan catyí ra tyehen vityin: “Cua jacanda yu iin tsaha ca ñuhu ñayivi, maa tyin ñavin ñuhu ñayivi ñi, tyin cua jacanda ndihí yu nda cuenda andivi.” <sup>27</sup> Tsa caahán ra tyin cua jacanda ra inga tsaha, cuví cutuñi iñi yo tyin cua catsiyo tandihí tsa javahá ra tsa cuví nacanda. Tan cua ndoo tsa ña cuví nacanda. <sup>28</sup> Nu ndacá ñaha Nyoo nu tsahá ra cunyecu yo tsihin ra, ña cuví nacanda can. Na cuhva yo tyahvi nyoo tsi ra tsa cuenda yacan tan na jacahnu yo tsi ra tsihin tsa niñi añima yo, tan tyaa yahvi yo tsi ra, tyin yacan cuví tsa taahán iñi ra. <sup>29</sup> Tyin Nyoo yo cuví ra tumaa ñuhu tsa tsahmí, tan cua janaa ra tandihí maa tsa ña vaha.

#### Na coo yo cuhva taahán iñi Nyoo

**13** Ña jandihí ndo tsa cuñí ndo tsi tandihí nyivi yihí cuenda Nyoo tyin cuví ñi tumaa nyivi ndo. <sup>2</sup> Ña ña iñi ndo tyaa nuu vaha ndo tsi nyivi tsaá vehe ndo, tyin tun javaha yo tacan nda cuenda cua cuhva yo nu coo ángel Nyoo, vasu ndi maa ña tsitó yo tun ángel cuví ra naha tumaa javahá juhva nyivi.

<sup>3</sup> Ña ña iñi ndo tsi nyivi yucú vehe caa tumaa tsatyin yucú ndihí ndo tsihin ñi. Nducuhun iñi ndo tsi nyivi nyehé tundoho jahá nyivi. Cundaahvi iñi ndo tsi ñi tan jatyinyee ndo tsi ñi. Tyin tsitó ndo nácaa cuñí yo tun nyehe yo tundoho.

<sup>4</sup> Nyooho nyivi tsa tsa tindahá, jaha tahan ndo tsa ñayivi tsi iin ndo tan tsi inga ndo. Tan coo vaha ndo tyin Nyoo cua tatsi tuñi ra tsi rayii tsicá nuu tsihin naha tan rayii iyó ñasihí tun coo ra tsihin inga ñaha. Tan ju-

vin ñi cua tatsi tuñi tucu ra tsi ñaha tsicá nuu tsihin rayiñ tan ñaha tsa iyó yñ tun coo ña tsihin inga rayiñ.

<sup>5</sup> Ña çaca iñi ndo nácaa javaha ndo tan cuvi coo cuaha ca xuhun tsi ndo. Ndo ndo vaha tsihin tsa iyó tsi ndo, tyin catyí Nyoo tyehen: "Tandihí ñi tsaha nyaá yu tsihin un, tan ña cua nacoo ihñi maa yu tsi un", catyí ra. <sup>6</sup> Tsa cuenda yacan cuví caahán yo tyehen tsihin tsa niñ iñi añima yo:

Jutu Mañi yu juvin un jatyinyeé tsi yu,

Yacan cuenda ña yuuhví yu tun javahá nyivi náa javahá ñi tsi yu.

<sup>7</sup> Nducuhun iñi ndo tsi ra cuví ityi nuu vehe ñuhu, ra tsa caahán tuhun Nyoo tsihin ndo. Nyehé ndo tyin vaha iyó ra naha nuu Nyoo, tan çanyicun ndo cuhva vaha tsinú iñi ra naha tsi Nyoo.

<sup>8</sup> Ra Jesucristo ña nasamá ra. Juvín ra iyó nda tsanaha, tan juvin ra iyó vityin. Tan juvin ra cua coo yoso cuahán quivi. <sup>9</sup> Ña cuhva ndo jandavi ñaha nyivi tsi ndo tsihin tsa siin siin tsa jacuahá ñi. Vaha ca jandu iin ndo iñi ndo tsihin tsa vaha tsa tsahá Nyoo coo añima yo, tyin vaha ca yacan tan ñavin ca tsa jacuahá ñi ican. Tyin ñi ican jacuahá ñi maa ñi maa tsa cuenda náa tsatsí yo. Tan ña jatyinyeé can ndi tsi maa ñi.

<sup>10</sup> Tsañi ñiñi ra Cristo nu cruu tsa cuenda yo. Tan ra jutu tsa nyitá iñi ley tsahnu naha ra ña cuví jatyinyee ra Cristo tsi ra naha. <sup>11</sup> Ra jutu tsaahnu cuví ityi nuu cuenda nyivi Israel tsindacá ra naha niñi quiti tsitsi Vehe Ii Xaan tsa cuenda cuatyí nyivi, maa tyin cuñu ti tuhvá can cayú ityi tsata ñuu. <sup>12</sup> Tacan tucu ra Jesús, tavá tyiñu Nyoo tsi ra tsa nyehe ra tundoho tan cúu ra ityi tsata ñuu Jerusalén, tyin tacan tan janduvaha ra tsi yo tsihin niñi ra. <sup>13</sup> Na cunyicun yo tsi ra Cristo tan ña nducahan nuu yo vasu ndi maa vacu nducu nyivi tsi yo.

<sup>14</sup> Tyin tsa cuenda yoo nduve ñuu tsa ña cua cundihi maa nu ñuhu ñayivi ihya. Yacan cuenda nanducú yo iin ñuu tsa cua quitsi, tsa yaha naa ñuhu ñayivi ihya. <sup>15</sup> Yacan cuenda vityin tsa iyó ra Cristo añima yo, taahán tsi jañiñi yo tsi yo tan jacahnu yo tsi Nyoo tsihin tsa cata yo yaa ra, tan tsihin tsa caahán yo. <sup>16</sup> Ña naa iñi ndo javaha ndo tsa vaha. Tan jatyinyee tahan ndo tsi ndo

tsihin tsa iyó tsi ndo, tyin yacan cuví tsa taahán iñi Nyoo.

<sup>17</sup> Tyaa yahvi ndo tsi ra jaquihín ityi tsi ndo naha ra; cuhva ndo tsi ndo cundaca ñaha ra naha tyin juvin ra naha jahá cuenda añima ndo. Tan coo quivi cua cuhva cuenda ra naha tyiñu jahá ra naha tsi Nyoo. Nducu ndo cuhva javaha ndo tsa vaha, tyin tacan tan siñ cua cuñi ra naha cuhva cuenda ra naha tsi ndo tsi Nyoo. Maa tyin tun ña javahá ndo tsa vaha, cua cuhva cuenda ra naha tsi ndo tsi Nyoo tsihin tucuihya iñi, tan ña cua quita vaha ndo nuu ra.

<sup>18</sup> Ndacan tahvi ndo tsi Nyoo tsa cuenda ndi tyin tsitó ndi tyin vaha cuahán ndi tsihin ra, tyin maa ñi maa tsa vaha cuñí ndi javaha ndi. <sup>19</sup> Tan tsicán yu tsa ndacan tahvi tucu ndo tsa cuenda yu na cuhva Nyoo quitsi yu inga tsaha tsa numi ñi nu yucú ndo tan cunyii yu tsihin ndo.

### Nu ndihí cahán ra tan tsahá ra nacumi tsi ñi

<sup>20</sup> Jutu Mañi yo Jesucristo tsa janandotó Nyoo, ra tsahá tsa taxin coo añima yo, juvin ra jahá cuenda tsi yo tsa cuví yo tumaa mbee jana ra. Tsihin niñi ra Cristo tsa tsati, ndo Nyoo tuhun tsa tsa ña cua cundihi maa tsihin yo. <sup>21</sup> Tandihí tsa cuñí Nyoo javahá ra tsihin tandihí yo, maa ra Jesucristo javahá can jahá ra. Tan na javaha ra tsihin yo tsa cuñí ra javaha ra. ¡Na jacahnu yo tsi ra Cristo yoso cuahán quivi! ¡Na cuvi tsi tacan ñi!

<sup>22</sup> Yañi, caahán ndaahvi yu tsihin ndo; janyee ndo iñi ndo tan javaha ndo tsa tsahá cuenda yu tsi ndo tsihin tsa taxin iyó añima ndo, tyin ña cuaha xaan tuhun tyaa yu tsa cuenda ndo. <sup>23</sup> Cuñí yu tsa coto ndo tyin ra Timoteo, yañi yo, tsa quitá ra vehe caa. Tatun yatyi tsa ra, cua quitsi ra tsihin yu na quitsi yu quitsi nyehe yu nu yucú ndo.

<sup>24</sup> Cuhva ndo nacumi tsi tandihí ra jaquihín ityi tsi ndo, tan tsi tandihí nyivi yihí cuenda ra Cristo. Nyivi Italia nu nyí yu, tsahá ñi nacumi tsi ndo.

<sup>25</sup> Tan na nasoco Nyoo tsi tandihí ndo. Na cuvi tsi tacan ñi.

# Santiago

## Nu tsahá ra Santiago nacumi tsi nyivi

**1** Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesucristo. Jaquitsí yu nacumi tsi tandihí nyooho tsa cuví ndo tata tsa utsi uvi ra sehe ra Israel tan iyó ndo ñuu nyivi tsa ñavin tata ra Israel cuví.

## Tsa tsiñi tuñi tsa tsahá Nyoo tsi yo

<sup>2</sup> Yañi, cusii iñi ndo tun cuaha tundoho nyehé ndo. <sup>3</sup> Tyin tsitó ndo tyin tsihin tsa nyehé ndo tundoho tan cua cuahnu ca ndo tsihin tsa tsinú iñi ndo. Tan cua cunyeé iñi ndo nyehé ndo náa ndihí ca tundoho vatsí siqui ndo. <sup>4</sup> Jaña ndo na quitsi maa tundoho can siqui ndo, tyin tun tsa cunyeé iñi ndo yahá ndo tundoho can, cua cuví ndo nyivi tsitsa tsihin tuhun Nyoo, tan nduve ca náa cua cumañi tsi ndo tan cua cunyeé ndo yaha ndo tandihí maa tundoho tsa cua quitsi siqui ndo.

<sup>5</sup> Ndáa nyooho cumañi tsa tsiñi tuñi tsi, ndacan ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihí nyivi tan ña tuhvá ra tyicuhvá itsi, tan ndi ña cuxaán ra tsi ñi tun tsicán ñi náa tsicán ñi tsi ra. <sup>6</sup> Maa tyin cuñí tsi ndacan yo itsi tsihin tsa tsinú vaha iñi yo. Tan ña caca iñi yo tyin ña cua cuhva ra itsi tsi yo. Tyin tun caca iñi yo tyin ña cua ñihí yo tsa tsicán yo, cuví yo tumaa ndutya ñuhu tsa tandahá tatyí ityi ihya tan ityi can. <sup>7</sup> Ra tsa javahá tacan, ña taahán tsi caca iñi ra tyin cua cuhva Nyoo tsa tsicán ra. <sup>8</sup> Tyin uvi xaan tsicá iñi ra. Ña tyaá iñi ra tsa tsicán ra, tyin ña iin cuñí ra. Vityin cuñí ra tsa cuñí ra, tan inga tsa cuñi tucu ra tyaan. <sup>9</sup> Tatun iyó iin ra yañi yo, ndaahvi ra, na cusii iñi ra tyin cahnu cuví ra jahá Nyoo. <sup>10</sup> Tatun iin ra yañi yo, tan cuca ra, tun cua ndundaahvi ra nu ñuhu ñayivi ihya, taahán tsi cusii iñi ra tsihin Nyoo tyin tsitó ra tyin cuví ra tumaa cuví ita tsa iyó tsitsi cuhu, tyin ita can iin yaha ñi cucoyó can. <sup>11</sup> Tyin ihñi xaan cuví tsitsi cuhu jahá ñicanyii. Tacan tan na ityí ita can. Tan canacavá can tan ndihí tsa sii caá can. Tan tacan cuví ra cuca, tyin cua quitsi tuhun tsiihí tsi ra tan cua cundihí tsa cuca ra.

## Nacaa cunyeé iñi yo nyehé yo tundoho

<sup>12</sup> Sii xaan cuví tsi ra tsa cua cunyeé iñi nyehé tundoho tyin tsa yaha nyehé ra tundoho cua ñihí ra ñayivi nyito tsa catyí Nyoo tyin cuhva ra tsi ñi tsa cuñí tsi ra. <sup>13</sup> Tatun ndáa nyooho tsicá iñi ndo tsa javaha ndo tsa ña vaha, ña cuñi ndo tyin Nyoo tsahá tsa caca iñi ndo

tacan. Tyin Nyoo ña tsicá iñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha.

<sup>14</sup> Maa tyin nyooho tsa javahá tsa ña vaha, javahá ndo can tyin cuñí ndo javaha ndo can. Tan yacan cuenda tsicoó cuatyí ndo. <sup>15</sup> Tatun cua cuhva yo tsa caca iñi yo tuhun ña vaha, coo quivi cua javaha yo cuhva tsicá iñi yo tan cua coo cuatyí yo. Tan tatun maa ñi yacan cua javaha yo, cua tatsi tuñi Nyoo tsi yo tsa cuenda can tan cua cúu yo.

<sup>16</sup> Yañi, cuñí xaan yu tsi ndo. Ña jandavi ñaha ndo tsi ndo. <sup>17</sup> Tandihí tsa vaha tan tsa vii tsa ñihí yo, queé tsi ityi siqui tyin maa Nyoo Jutu yo tsahá itsi. Tan maa ra javahá ñuhu tsa iyó andivi: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama. <sup>18</sup> Tan tsahá ra ñayivi tsa tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihí ca tsa javahá ra, tyin tacan cuñí maa ra.

## Ityi nditsa tsa taahán tsi cuhun yo

<sup>19</sup> Yacan cuenda yañi, intuhun intuhun yo tan taahán tsi cuhun iñi yo tsa tyaá soho yo, maa tyin ña yatyi xaan nacahan yo tan ndi ña yatyi xaan cuxaan yo.

<sup>20</sup> Tyin nyivi tsa cuxaán, ña javahá ñi tsa taahán iñi Nyoo. <sup>21</sup> Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayivi ihya. Ndaahvi jaha ndo tsi ndo tan tñin cuenda vaha ndo tuhun Nyoo tsa tatsi ra añima ndo. Tyin tuhun Nyoo can iyó tunyee iñi itsi tsa jacacú tsi tsi yo. <sup>22</sup> Javaha ndo cuhva caahán tuhun Nyoo, tan ña tyaá soho ñi maa ndo itsi, tyin tatun tyaá soho ñi maa ndo itsi juven ñi tsi maa ndo jandavi ñaha ndo. <sup>23</sup> Tyin nyivi tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyivi nyehé nuu ñi nu inu. <sup>24</sup> Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi. <sup>25</sup> Maa tyin nyivi tsa iin nyita ñi tyaá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sii cua cuvi tsi ñi ican tan cua quita vaha tandihí tsa javahá ñi. <sup>26</sup> Tan nyivi tsa catyí tyin tuhun Nyoo yihé ñi, maa tyin yatyi xaan yuhu ñi cahan ñi tsa caquiñi, nduve nacatyí tsicá ñi tuhun Nyoo tyin juven ñi tsi maa ñi jandavi ñaha ñi. <sup>27</sup> Tyin tsa cuenda Nyoo, nyivi tsa nditsa tsinú iñi tsi ra juven ñi cuví ñi tsa javahá tyehen: Jatyinyeé ñi tsi nyivi ndaahvi tsa tsihí yí, tan jahá cuenda ñi tsi tsa nyihi tsa nduve ca sihi tan jutu, tan jahá cuenda ndihí tucu ñi tsi maa ñi tsa ña javaha ñi tsa ña vaha.

Na inducu ñi cuñi yo tsi nyivi tyin ña sñin caá intuhun ñi tan inga ñi

2 Yañi, nyooho tsinú iñi ndo tsi Jutu Mañi yo Jesu-cristo, ra tsa cahnu xaan cuví, yacan cuenda ña taahán tsi cahnu jaha ndo tsi iin nyivi tan ñavin ca inga ñi. <sup>2</sup> Tatun cua quihvi iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsí ra jahma xiñu, ¿nácaa cua cahan ndo tsihin ra? ¿A ña cua catyi ndo, “Cunyyaa nu tyayu vaha ihya”? Tan juvin ñi cuhva can tan quihvi tucu iin ra ndaahvi nditsí ra jahma tyaahnyá, tan catyi ndo tsihin ra, “cunyyaa nyityi juvin o cunyyaa nu ñuhu ihya”. <sup>4</sup> Ña vaha tsa javahá ndo tacan, tyin ña inducu jahá ndo tsa ñayivi tsi ra naha, tan tsicá iñi ndo tsa ña vaha.

<sup>5</sup> Yañi tsa cuñi xaan yu, tyaa soho ndo tuhun ihya: Nyoo nacatsi ra tsi nyivi ndaahvi nu ñuhu ñayivi ihya, tyin nducua ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin yacan cuví tsa catyi ra tyin cuhva ra tsi nyivi tsa cuñi tsi ra. <sup>6</sup> Maa tyin nyooho tsahá ndo ticanuu tsi nyivi ndaahvi. ¿A ña tsitó ndo tyin juvin nyivi cuca tsahñi ndaahvi tsi ndo, tan tsindacá ñi tsi ndo nuu ra cumí tyiñu? <sup>7</sup> Tan ¿a ña tsitó ndo tyin nyivi can caahán ñi ndavaha ñi sivi ii ra Cristo, ra yihí ndaha tsi ndo?

<sup>8</sup> Ley Nyoo tsa ñiñi ca catyi tsi: “Cunñi ndo tsi nyivi tumaa tsa cuñi ndo tsi maa ndo.” Tatun javahá ndo tsa catyi ley can, vaha javahá ndo. <sup>9</sup> Maa tyin tun intuhun ñi nyivi cuñi ndo, tan ña cuñi ndo tsi inga ñi, tsicoó cuatyí ndo tyin catyi ley Nyoo tyin iyó cuatyí nyivi javahá tacan. <sup>10</sup> Tyin tatun iin nyivi tsa tyaá yahvi tandihí ley, tan ña tyaá yahvi ñi intuhun tsi, cuví tsi tumaa tsa ña tyaá yahvi ñi tandihí ley. <sup>11</sup> Tyin Nyoo catyi ra tyin ña coo inga ñaha tsi rayi, tun iyó ñasihi ra. Tacan tucu ñiñaha, tsa iyó yhi, ña cuví coo inga rayi tsi ñi. Tan juvin ñi catyi tucu ra tyin ña cahñi yo nyivi. Yacan cuenda tatun iin ra nduve inga ñaha tsi ra, maa tyin tsahñi ra iin nyivi, juvin ñi ña tyaá yahvi ra tsa catyi ley. <sup>12</sup> Maa tyin ley ra Cristo tsa jacacú tsi yo cua catyi tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo. <sup>13</sup> Tyin nyivi tsa ña cundaahvi iñi tsi tahan ñi, Nyoo cua tatsi tuñi ra tsi ñi, tan ña cua cundaahvi iñi ra tsi ñi. Maa tyin ñi tsa cundaahvi iñi tsi inga ñi, cua quita vaha ñi quivi cutuñi ñi.

¿Ndáa tsa jacacú tsi yo, tsa tsinú iñi yo tsi ra Cristo o tsa javahá yo tsa vaha?

<sup>14</sup> Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinu iñi yo tsi Nyoo ñi tsi yo? <sup>15</sup> Na jaha yo tuhun: Iin tsaha iin ra yañi yo nduve jahma ra tan nduve tsa catsi ra tan tsahán ra yuvehe un, <sup>16</sup> Maa tyin yoocho ña tsahá un jahma ra tan ndi tsa catsi ra tan catyi un tsihin ra: “Cuaahan tan Nyoo cuhun tsihin un. Na coo ca jahma un tan tsa catsi un”, catyi un. Nduve nacatyí cahan un tacan tyin ña tsahá un tsa tsiñi ñuhu tsi ra. <sup>17</sup> Tan tacan ñi cuñi tucu yo tsihin tsa tsinú iñi yo, tun catyi yo tyin tsinú iñi yo tsi

Nyoo tan ña jatinyee yo tsi nyivi, nduve yahvi nyaá catyi yo tyin tsinú iñi yo.

<sup>18</sup> Yihí ndo cua catyi ndo: “Yoocho tsinú iñi un tsi Nyoo tan yuhu javahá yo tsa vaha. Tan catyi un tyin tsihin tsa tsinú iñi ñi yo tan cuví cacu yo.” Maa tyin yuhu catyi yo tyin juvin ñi cahnu cuví tucu tsa javahá yo tsa vaha. Tyin yoocho ña cuví janaha un tsa tsinú iñi un tsi Nyoo tsi yo tun ña javaha un tsa vaha. Maa tyin yuhu cuví janahá yo tsa tsinú iñi yo tsi Nyoo tsi un tsihin tsa javahá yo tsa vaha. <sup>19</sup> Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda nihí nahnu tsihin tsa yuuhví nahnu tyin ña cua cacu nahnu. <sup>20</sup> Ña soho xaan caca iñi un. Cutuñi iñi tyin tun tsinú iñi yo tan ña javahá yo tsa vaha, nduve yahvi nyaá tsa tsinú iñi yo. <sup>21</sup> Ra Abraham, tsii tsaahnu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyi maa Nyoo tsihin ra. <sup>22</sup> Ihya nyehé yo tyin tsa cuenda tsa tsinú iñi ra Abraham tsi Nyoo javahá ra tsa catyi ra tsihin ra tyin javaha ra. Tan tsa javahá ra yacan, quituvi vaha tsa tsinú iñi ra tsi Nyoo. <sup>23</sup> Tacan tan cundaá tsa catyi nu tutu Nyoo tyehe: “Ra Abraham tsinú iñi ra tsi Nyoo, yacan cuenda cuví ra ra vaha nuu Nyoo.” Tan iyó tucu inga nu catyi tsi: “Ra Abraham, cuví ra ra vaha iñi tsi Nyoo.”

<sup>24</sup> Tan ihya cuví nu cutuñi iñi yo tyin vaha yo nuu Nyoo tatun tsinú iñi yo tsi ra tan javahá yo tsa vaha tan ñavin tsihin tsa tsinú iñi ñi yo tsi ra. <sup>25</sup> Tan tacan tucu ña Rahab tsa tsicá nuu tsihin rayi. Yahá tsa javahá ña cuatyí, javahá ña tsa vaha quivi tsahá ña nu tsiyucu xeehe ra tsa jacuhun ra Josué. Tan jatinyee ña tsi ra naha tsa cuhun ra naha inga ityi. Tan tsa cuenda yacan, catyi Nyoo tyin vaha ña. <sup>26</sup> Tan tacan tucu cuví cuñu ñuhu nyivi. Tatun nduve ca tsa nyitó ñi iyó tsitsi cuñu ñuhu can, nduve ca yahvi nyaá can. Tan tacan cuví tucu yoó, tatun ña javahá yo tsa vaha, nduve yahvi nyaá tsa tsinú iñi yo.

### Nacaa jaha cuenda yo cuhva caahán yo

3 Nyoocho yañi, ña yatyi xaan cuñi ndo cuvi ndo ra cahan tuhun Nyoo. Tyin tsitó ndo tyin nyuhu tsa caahán ndi tuhun Nyoo, tatun ña vaha cahan ndi, ñihi ca cua tatsi tuñi Nyoo tsi ndi tan ñavin ca nyivi tsa ña caahán tuhun Nyoo. <sup>2</sup> Tyin tandihí maa yo tan tsicoó cuatyí yo, maa tyin ra tsa ña javahá cuatyí tsihin tsa caahán ra, juvin ra cuví ra vaha tyin cuví ndaca ñaha ra nanhi cahnu cuñu ñuhu ra. <sup>3</sup> Tumaa ra tsa tyihí yoho yuhu cuayu cuví ndaca ñaha ra tsi ti, vasu ndi maa cahnu ti. <sup>4</sup> Tan tacan tucu iin yutun ndoo tsa tsicá nu ndutya ñuhu, vasu cahnu tsi maa tyin tsihin vitu luhlu tsa nyaá ityi xuu tsi, cuví jacuhun ra jacacá itsi ndáa ityi cuñi maa ra, vasu ñihi xaan yihí tatyí. <sup>5</sup> Tan tacan tucu yaa yo, luhlu xaan tsi. Maa tyin cuaha tsa caquiñi cuvi cahan yo tsihin tsi. Tumaa nu natiiñ iin ñuhu luhlu iin cuhu cahnu tan cayu tandihí maa yutun. <sup>6</sup> Tacan tucu yaa yo cuví tsi tumaa iin ñuhu luhlu. Tan cuví tucu tsi tumaa iin tsa quiñi cahnu tsa jativi tsi nanhi cahnu

cuñu ñuhu yo tan tandihí cuhva iyó yo ñayivi ihya, tyn juvin ñi maa nu ña vaha natyuhú itsi. <sup>7</sup> Nyivi cuví jan-dumásu ñi tandihí maa nuu quití tsa iyó: saa, coo, tan quití tsa iyó tsitsi ndutya ñuhu. <sup>8</sup> Maa tyn yoñi cuví jan-dumásu yaa yo tyn cuví tsi iin tsa ña vaha tan ña tsahá tsi cundaca ñaha yo itsi. Tumaa iin coo tyihí tí venenu tí tsi nyivi, tan tsiihí ñi. Tacan cuví yaa yo. <sup>9</sup> Tyn juvin ñi tsihin yaa yo jacahnú yo tsi Nyoo Jutu yo. Tan juvin ñi tsihin can caahán tucu yo ndavaha ñi siquí nyivi tsa javahá Nyoo tumaa caá maa ra. <sup>10</sup> Juvín ñi tsihin yuhu yo jacahnú yo tsi Nyoo. Tan juvin ñi tsihin can caahán yo tsa caquiñi. Maa tyn yañi, ña taahán tsi tsa javahá ndo tacan. <sup>11</sup> Tyn, ¿a cuví quita ndutya cuii tan ndutya uva tsitsi iin ñi ndohyo? Ña cuví. <sup>12</sup> Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

### Tsa tsiñi tuñi tsa vaha ca

<sup>13</sup> Tatun yihí ndo tsitó ndo tan iyó tsa tsiñi tuñi tsi ndo, jánaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyn javahá ndo can tsihin tsa tsiñi tuñi Nyoo tsa iyó tsi ndo. <sup>14</sup> Maa tyn tatun nyiyo iñi ndo tsitsi añima ndo tan cuñí xaan ndo nduvaha ndo nu nyivi, ña cahnu jaha ndo tsi ndo tan catyi ndo tyn iyó tsa tsiñi tuñi tsi ndo. Tyn tun cahnu jahá ndo tsi ndo, tyihí xeehe ndo tsa nditsa, cuví can. <sup>15</sup> Tyn tun tacan tsicá iñi ndo, ñavin tsa tsiñi tuñi Nyoo cuví can, tyn cuhva tsicá iñi nyivi ña tsitó tsi Nyoo tan cuhva tsica iñi nu ña vaha cuví can. <sup>16</sup> Tyn tatun nyiyó iñi ndo tan cuñí ndo nduvaha ndo nu nyivi, ticaña xaan tsicá iñi ndo. Tan iyó tucu tandihí inga nuu tsa ña vaha nu yucú ndo. <sup>17</sup> Maa tyn tatun iyó tsa tsiñi tuñi Nyoo tsi ndo, cuii iyó ndo, catsi iyó ndo. Tan nducú ndo cuhva coo vaha ndo tsihin nyivi tsihin tsa vita iñi ndo, tan vaha nyivi cuví ndo. Tan catsi vaha tsicá iñi ndo, tan cundaahví iñi ndo tsi nyivi, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa ñi iñi ndo. <sup>18</sup> Tatun iyó vaha yo tsihin nyivi, tan iyó taxin yo tsihin ñi, cua coo yo ñayivi cuii.

### Ña taahán tsi javaha yo cuhva cuñí cuñu ñuhu yo

**4** ¿Nacuenda iyó tsihi nu yucú ndo? ¿Nacuenda iyó cuatyí? Tsa cuenda tyn tsitsi añima ndo tsicá iñi ndo maa ñi maa tsa ña vaha. <sup>2</sup> Iyó tsaha nda cuando tsahñí ndo nyivi tyn cuñí ndo tsa cuñí ndo tan ña ñihí ndo can. Tatun nyehé ndo náa cuví can nyehé ndo, nyiyó iñi ndo can tan tsa ña ñihí ndo can quitsaha cañi tahan ndo. Ña ñihí ndo tsa cuñí ndo tyn ña tsicán ndo can tsi Nyoo. <sup>3</sup> Tatun tsicán ndo tsa tsicán ndo tsi ra tan ña ñihí ndo can, ña tsahá ra can tsi ndo tyn tsitó ra tyn cua jativi ndo can tsihin tsa taahán iñi ndo. <sup>4</sup> ¿Nacuenda javahá ndo cuhva cuñí nyivi, nyooho tsa ña tsinú vaha iñi tsi Nyoo? ¿A ña tsitó ndo tyn tun javahá yo cuhva cuñí nyivi, ñi xaan iñi tsi Nyoo cuví yo? <sup>5</sup> Tan yacan iyó cuenda catyi nu tutu Nyoo tyn Tatyí Ii tsa tsahá ra coo añima yo, cuñí xaan tsi tsi yo tan

cuiñu xaan tsi tsi yo tyn cuñí tsi tsa jacahnu yo tsi intuhun ñi maa ra. <sup>6</sup> Tan jatyinyeé xaan Nyoo tsi yo tsa nacuhvá yo tsi yo tsi ra. Tyn catyi ra tyn jatyinyeé ca ra tsi nyivi ndaahvi tsa tsitó tyn tsiñi ñuhu ra tsi ñi. Tan ña cuñí ra nyehe ra tsi ra tsa cahnu jahá tsi. <sup>7</sup> Yacan ñacuhva vaha ndo tsi ndo tsi Nyoo. Ña tyaá yahvi ndo nu caahán nu ña vaha tyn tun ña jahá ndo cuenda nu caahán nu, tacan tan cua cunu nu nyehe nu tsi ndo. <sup>8</sup> Nducu ndo cuhva cunyanaa vaha ca ndo tsi Nyoo tyn tacan tan natuhva ra tsi ndo. Nyooho, nyivi iyó cuatyí, jandundii ndo tsi ndo. Tan nyooho tsa tsicá iñi tyn cuví javaha ndo tsa iyó nu ñuhu ñayivi ihya tan juvin ñi cuhva can tan jacahnu tucu ndo tsi Nyoo, jandu iin ndo iñi ndo tan cuhva ndo añima ndo jacutu Nyoo tsa vaha, tyn tacan tan ndundii ndo nuu ra. <sup>9</sup> Cuiihya cuñi ndo. Vácu ndo. Na nacoto ndo tyn ña vaha cuhva iyó ndo. Tsa nuu tsa vacu naaha ndo tsihin tsa sñ cuñí ndo, vacu ndo tsihin tsa cuiihya cuñi ndo. Tan tsa sñ cuñí ndo na nanduvi tsi tucuihya iñi. <sup>10</sup> Ndaahvi jaha ndo tsi ndo nuu Jutu Mañi yo, tyn tacan tan janducahnu ra tsi ndo.

### Ña cahan nyaa ndo tsi nyivi

<sup>11</sup> Yañi, ña cahan ndo ndavaha ñi siquí iin yañi yo. Tyn nyivi caahán ndavaha ñi siquí nyivi, o caahán nyaa ñi nyivi, siquí ley Nyoo caahán ñi ndavaha ñi tan caahán nyaa ñi cuví can. Tyn tun caahán nyaa yo ley Nyoo, juez jahá yo tsi yo tsa nuu tsa tyaá yahvi yo tsa caahán ley can. <sup>12</sup> Tyn intuhun ñi ra tsahá ley can. Tan juvin ñi ra cuví juez. Tan juvin ra cuví ra jacacú tsi yo, o jacunaá tsi yo. Tan ¿yooho yóo ra cuví un tyn cahan nyaa un tsi inga nyivi, tan tatsi tuñi un tsi ñi tan jaha un tsi un tumaa juez?

### Ña tsitó yo náa cua cuvi tsi yo tyaan, yacan cuenda ña taahán tsi cahnu jaha yo tsi yo

<sup>13</sup> Yihí ndo catyi ndo: “Vityin o tyaan cuhun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyi ndo. Maa tyn tyaá soho ndo tsa cua cahan yu ihya: <sup>14</sup> Ñayivi tsa iyó yo cuví tsi tumaa vico nuhu tsa tuhvá yihí tan iin yaha ñi naa ihñi nyico. Ndi ña tsitó ndo tsa cua cuvi tyaan tan catyi ndo tyn cuhun ndo. <sup>15</sup> Vaha ca cahan ndo tyehen: “Coo yo juhva ca quivi tan javaha yo tsehe o yacan, tun Jutu Mañi yo tan cuñí ra.” <sup>16</sup> Maa tyn nyooho ña caahán ndo tacan, tan cahnu xaan jahá ndo tsi ndo. Tan Nyoo ña taahán iñi ra nyehe ra tsi nyivi javahá tacan. <sup>17</sup> Tyn yoo tsa tsitó javaha tsa vaha tan ña javahá yo can, tsicoó cuatyí yo.

### Nu tsahá cuenda ra Santiago náa cua tahan nyivi cuca

**5** ¡Tyaá soho ndo tuhun caahán yu ihya, nyooho nyivi cuca! Vácu ndo tsihin tsa cuiihya cuñí ndo, cãna tsaa ndo tsa cuenda tundoho tsa cua nyehe ndo. <sup>2</sup> Tyn tsa cuca tsa jacayá ndo, tsa ndihí can tyaahyú. Tan jahma vaha ndo, tsa ndihí maa can tsatsi tiquixin. <sup>3</sup> Xuhun cuaan tan xuhun cuitsin ndo tsa ndihí can

cuxí. Tan cuxi can tsahá cuenda can tyin ña vaha javahá ndo tsihin xuhun ndo. Tan juvin can cuvi tumaa ñuhu tsa cua cahmi tsi ndo. ¿Nacuenda jacayá ndo tsa cuca nu cua ndihí quivi ihya? <sup>4</sup> Tan ña tyahví ndo yahvi tsa taahán tsi tsi nyívi ndaahvi tsa jahá tyiñu tyiñu ndo. Tan vityin tsicán ñi cuatyí tsaha ndo nuu Jutu Mañi yo, ra ndacá ñaha tandihí ángel tsa cuví andaru cuenda ra. Tan maa Jutu Mañi yo tsiñí ra tuhun caahán ñi ndaahvi can. <sup>5</sup> Iyó vaha xaan ndo nu ñuhu ñayívi ihya tyin cuca ndo. Tan javahá ndo cuhva cuñí maa ndo. Tumaa tuhvá nyívi janduxaahán quini tyin cuu tí, tacan javahá ndo tsihin ndo. Tan vityin tsa tsaá quivi tsa cua cuu ndo. <sup>6</sup> Tyin tyaa ndo cuatyí tsaha nyívi vaha tan tsahñí ndo tsi ñi. Tan ndi ña cahán ñi cuatyí síqui ndo.

#### Na cunyeé iñi yo cuatu yo tsi ra Cristo

<sup>7</sup> Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi cuhu ndatú ra nda cuun savi tsa jihna tan nda ndihí cuun nyico tsi, tan naquihin ra tsa tatsí ra. <sup>8</sup> Tan tacan taahán tsi cunyeé iñi yo cuatu yo tsi Jutu Mañi yo. Jandu iin ndo iñi ndo tyin tsa yatyin cuii quitsi ra.

<sup>9</sup> Yañi, ña tyaa ndo cuatyí tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñí quitsi ra. <sup>10</sup> Yañi, quihin cuenda ndo cuhva tsicoo ra cuví ndusu yuhu Nyoo tahán tsanaha. Tyin ra ican naha ra cunyeé xaan iñi ra naha nyehé ra naha tundoho quivi tsahá cuenda ra naha tuhun Jutu Mañi yo. <sup>11</sup> Tsitó yo tyin sñi xaan cuñí ra tsa cunyeé iñi nyehé tandihí nuu tundoho, tumaa tsa cunyeé xaan iñi ra Job nyehé ra tundoho. Tan nu ndihí ña, cuaha xaan tsa vaha tsahá Jutu Mañi yo tsi ra, tyin Jutu Mañi yo iyó xaan tucah-

nu iñi tsi ra. Tan cundaahví iñi ra nyehé ra tsi yo. <sup>12</sup> Maa tyin yañi, ña cahan ndo: “Naha Nyoo maa”. Tan ña cahan ndo: “Tsitó vaha maa ra nyaá gloria”, tan ndi ña cahan ndo: “Tsitó vaha maa ra javahá ñuhu ñayívi”, tan ndi ña cahan ndo inga ca tuhun tahan can. Tatun ndit-sa tuhun caahán ndo, “nditsa” çatyí ndo. Maa tyin tatun tsitó ndo tyin ña nditsa, çatyí ndo tyin “ña ndit-sa”, coto tatsi tuñi Nyoo tsi ndo.

<sup>13</sup> Tun ndáa nyoocho nyehé tundoho, ndacan tahvi ndo tsi Nyoo. Tan nyoocho tsa sñi cuñí, çata ndo yaa Nyoo. <sup>14</sup> Tan nyoocho tsa cuuhví, çana ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihi ra naha acetye tsi ndo tsihin sívi ra Cristo. <sup>15</sup> Tan tatun tsinú iñi ra naha tsi Nyoo cuhva tsa tsicán tahvi ra naha, nyívi cuuhví can cua nduvaha ñi. Tan Jutu Mañi yo cua janduvita ra tsi ñi. Tan tatun tsicoo ñi cuatyí, Nyoo cua jaha ra tucahnu iñi tsi ñi. <sup>16</sup> Yacan cuenda nahma ndo cuatyí ndo tsi iin ndo tan tsi inga ndo. Tan ndacan tahvi ndo tsi Nyoo tsa cuenda inga ca nyívi na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo. <sup>17</sup> Tumaa ra Elías ra cuví ndusu yuhu Nyoo tahán tsanaha. Cuví ra iin rayñi tumaa maa yo. Tan tsicán tahvi ra tsi Nyoo tyin na ña cuun savi. Tan ña cuun savi uñi cuiya sasava.

<sup>18</sup> Yahá can tan tsicán tahvi nyico ra tsi Nyoo inga tsaha tyin na cuun savi. Tan cuun tsi inga tsaha. Tan tsahnu tsiti tsa tatsí nyívi.

<sup>19</sup> Yañi, tatun iin nyívi tahan ndo nacoo ñi tuhun ndit-sa Jutu Mañi yo, tan cuanuhu ñi ñayívi inga tsaha, tan jatynyeé ndo tsi ñi tsa nanducu nyico ñi ityi Nyoo, <sup>20</sup> çoto ndo tyin tsa javahá ndo tacan tsihin ñi, jacacu ndo añima ñi tan ña cua cuhun ñi anyaya. Tan jahá Nyoo tucahnu iñi cuatyí ñi jahá ndo.

# I San Pedro

## Nu quitsahā tyaá ra Pedro carta tsa cuenda nyivi yihí cuenda Nyoo

**1** Yuhu ra Pedro tavā tyiñu ra Jesucristo tsi yu na caca yu tyiñu ra. Tyaá yu carta ihya tsa cuenda nyooho tsa iyó ñuu tsa cayucú Ponto, tan Galacia, tan Capadocia, tan Asia tan Bitinia tsa ñavin ñuu ndo cuví. <sup>2</sup>Tyin nda tsanaha tan nacatsí vaha maa Nyoo Jutu yo tsi nyooho tyin cuví ndo nyivi ra. Tan tsa cuenda tsa nacatsí ra tsi ndo, jatynyeē Tatyí Ii ra tsi ndo tan nacuhvā ndo tsi ndo tsi ra, tan tyaá yahvi ndo tsi ra Jesucristo vityin, tan ndundí ndo tsihin niñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

### Cuīta iñi ndo tyin cua ñihi yo ñayivi tsa coo yo

<sup>3</sup>Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñí ra nyehé ra tsi yo. Tan tsahá ra tsa nacacu tsa coo yo inga tsaha tyin janandotō ra tsi ra Jesucristo. Yacan cuenda cuīta iñi yo tyin cua ñihi yo ñayivi tsa coo tsa ña cua naa maa. <sup>4</sup>Tan tsa cuenda tsa nacacu tsa coo yo, Nyoo cua cuhva ra tandihi tsa cumí vaha ra nda gloria tsi yo. Tan ña cua naa maa tsi, tan ndi ña cua tiví tsi, tan ndi ña cua ndahva tsi tumaa ndaahvá ita. <sup>5</sup>Tan tsa cuenda tsa tsinú iñi yo tsi Nyoo, jahá cuenda ra tsi yo tsihin tunyee iñi ra nda cuanda ndihi cacu yo. Tan cua janaha ra tsi yo náa cuñí tsi catyí tsa cacú yo nu cua ndihi tyembu tyin tsa ndatú vaha can tsi yo.

<sup>6</sup>Yacan cuenda sñi cuñí ndo, vasu ndi maa nyehé ndo tandihi nuu tundoho juhva quivi vityin. <sup>7</sup>Tyin tandihi maa tundoho can tan taahán tsi nyehe yo can tyin tacan tan coto vaha yo tun nditsa tyin tsinú iñi yo tsi Nyoo. [Tyin tsa tsinú iñi yo cuví tsi tumaa xuhun cuaan.] Tan tumaa tsahmí yo xuhun cuaan tun cuñí yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan tsindihí ñi maa can. Maa tyin tun ña jandihí yo tsa tsinú iñi yo tsi Nyoo, cua quituvi yo nuu ra tan cua jacahnu nyivi tsi maa ra tan tsi maa yo quivi quitsi Jutu Mañi yo Jesucristo inga tsaha.

<sup>8</sup>Nyooho cuñí ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan sñi xaan sñi xaan cuñí ndo nda cuanda ña cuví ñihi ndo cuhva catyí ndo najava cuhva tsa sñi cuñí ndo, <sup>9</sup>tyin nu ndihi cua cacu ndo tan yacan cuví tsa cua ñihi ndo jahá tsa tsinú iñi ndo tsi Nyoo.

<sup>10</sup>Ra ndusu yuhu Nyoo tsa tsicoq tahān tsanaha nducy tuhun ra naha nácaa cua cacu yo. Tan nducy ra naha cuhva coto ra naha náa cuví tsi. Tyaq ra naha nu tutu cuenda tsa vaha tsa cua cuhva Nyoo tsi yo. <sup>11</sup>Tan Tatyí Ii ra Cristo tsa iyó tsihin ra naha jacotō tsi tsi ra naha náa ndihi tundoho cua nyehe ra Cristo, tan nácaa cua jacahnu Nyoo tsi ra. Tan nducy xaan ra naha cuhva coto ra naha yóo ra cua cuví ra Cristo tsa cua tahan tacan, tan ama cua cuví tuhun tsa catyí Tatyí Ii tsihin ra naha. <sup>12</sup>Maa tyin jacotō Nyoo tsi ra naha tyin tyiñu tsa javahá ra naha, ñavin tsa vaha tsi maa ra naha cuví can, tyin tsa vaha tsi maa yo cuví can. Tan tandihi tsa cahān ra naha juvin tsi cuví tuhun tsa jacacú ra Jesucristo tsi yo tsa tsa yaha tsiñi ndo. Tan ra tsa cahān tuhun ihya naha ra, maa Tatyí Ii Nyoo jacahān tsi ra naha. Tan ra ángel naha ra cuñí xaan ra naha coto ra naha tuhun ihya.

### Nyoo caná ra tsi yo tyin coo yo ñayivi cuiti

<sup>13</sup>Yacan cuenda jaha vaha ndo cuenda tsi ndo tsihin tsa javaha ndo. Cuiti coo ndo. Cuīta iñi ndo tyin quivi quitsi ra Jesucristo inga tsaha cuaha tsa vaha cua cuhva Nyoo tsi yo tsa cuenda tsa vaha iñi ra. <sup>14</sup>Coo ndo tumaa iyó tsa nyihi tsa tyaá yahvi tsi jutu. Ña coo ndo tumaa tsicoq ndo quivi tsa ndi cumañi ca nacoto ndo tsi Nyoo tyin tsanaha tsindacā ñaha tsa ña vaha tsa cuñí cuñu ñuhu ndo tsi ndo. <sup>15</sup>Maa tyin vityin coo ndo ñayivi cuiti tyin maa Nyoo, ra tsa canā tsi ndo, cuiti iyó ra. <sup>16</sup>Tyin tacan catyí ra nu tutu ra: “Cuiti coo ndo tyin maa yu cuiti iyó yu”, catyí Nyoo.

<sup>17</sup>Tatun tuhvá ndo tsicán tahvi tsi Nyoo tan catyí ndo tsihin ra “Jutu Mañi yu”, jaha cuenda ndo tsi ndo tan jaha ndo tsa ñayivi tsi ra tsitsi tsa iyó ndo nu ñuhu ñayivi ihya. Tyin Nyoo jahá ra cuenda cuhva iyó tsa intuhun intuhun yo, an cuví yo nyivi cuca, an nyivi ndaahvi. <sup>18</sup>Nyoo nasamā ra cuhva tsa ña vaha tsicoq ndo, cuhva tsa janahā tsii tsaahnu ndo tsi ndo. Tan tsitó vaha ndo tyin ñavin tsihin xuhun cuaan o xuhun cuitsin tsa tsindihí ñi maa tyahvi ra tan cacu yo, <sup>19</sup>tyin tyahvi ra tsihin niñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyí luhlu tsa ña pehe [tsa tuhvá nyivi Israel jamañi nuu Nyoo], tan tsihi ra vasu ndi maa nduve cuatyí ra. <sup>20</sup>Tsa ndi cumañi ca tsinu ñuhu ñayivi tsinyaq cuhva tyin tyehen cua tahan ra Cristo. Maa tyin ña cuví tsi tsa numi ñi. Nda cuanda vityin nu cua ndihi quivi, cuví tandihi can tsa cuenda tsa vaha tsi maa yo. <sup>21</sup>Tsa cuenda ra Cristo tan tsinú iñi ndo tsi Nyoo tyin juvin ra janandotō tsi ra

Cristo tsa yahā tsihī ra tan jacahnu ra tsi ra. Tan yacan cuenda tsinú iñi ndo tsi Nyoo tan nyitá iñi ndo tyin cua naquihin ra tsi ndo.

<sup>22</sup> Tsihin tunyee iñi Tatyí Iin Nyoo tyaá yahvi ndo tuhun nditsa. Tan tsa ndundūi ndo jahā Nyoo tsa cuenda tsa tyaá yahvi ndo tuhun nditsa can. Tyin tacan tan cuví cuñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa nīi iñi ndo, tan tsihin tandihī tunyee iñi tsa iyó tsi ndo. <sup>23</sup> Tyin tsa nacacu tsa ndo, maa tyin ñavin tumaa cacú nyivi nu ñuhu ñayivi ihya, tyin jutu ndo cacú ra naha jahā sihi ra naha tan tsihī ra naha. Tan nyooho vityin nacacu tsa ndo tsihin Nyoo tsa ña cua cundihī maa, tyin tacan ñi cua coo maa tsi. <sup>24</sup> Tyin catyí tuhun Nyoo tyehen:

Tandihī nyivi tsa iyó nu ñuhu ñayivi ihya cuví ñi tumaa cuhu.

Tan tsa cahnu tsa javahá ñi cuví tsi tumaa ita.

Tyin cuhu can na ityí can, tan cucoyó ita can. [Tacan cuví nyivi, tyin iin yaha ñi tsihī ñi.]

<sup>25</sup> Maa tyin tuhun Jutu Mañi yo tacan ñi iyó maa tsi. Tan tuhun ihya cuví tuhun vaha tsa jacacú Nyoo tsi yo tsa caahán ndi tsihin ndo.

**2** Yacan cuenda ñacoo ndo tandihī nuu tsa caquiñi. Ña jandavi ñaha ndo tsi nyivi, ña jahā ndo tyin vaha ndo tan ña nditsa, ña nyiyo iñi ndo nyehe ndo tsa iyó tsi inga nyivi, ña cahan ca ndo cuendu. <sup>2</sup> Javaha ndo tumaa javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyooho tuhun Nyoo tyin juvin tsi cua jacuahnu tsi ndo tan nacoto vaha ca ndo tsi Nyoo nda cuanda ndihī cacu ndo, <sup>3</sup> tun nditsa tyin tsitó ndo tyin Jutu Mañi yo, vaha xaan ra cuví ra.

### Ra Cristo cuví yuu nyito

<sup>4</sup> Cunyaa naa ndo tsi Jutu Mañi yo. Tyin juvin ra cuví yuu nyito tsa ña cuñi nyivi cuatyíñu ñi. Maa tyin Nyoo nacatsi ra tsi Jutu Mañi yo tyin juvin ra cuví yuu sií caá tsa yahvi nyaá tsa cuenda ra. <sup>5</sup> Tatun nyaa naa vaha yo tsi ra Cristo, cua cuví yo tumaa iin vehe tyin maa Nyoo cuví ra tumaa ra javahá vehe. Cuhva ndo tsa jandu iin Nyoo tsi ndo tsihin ra Cristo tyin tun tsa nyaa naa vaha ndo tsi ra, cua cuvi ndo tumaa ra jutu tsa javahá maa ñi tyiñu Nyoo. Cua jacahnu ndo tsi ra tan sií xaan cua cuñi ra. <sup>6</sup> Tyin catyí tucu nu tutu ra tyehen:

Yuhu nacatsi yu iin yuu tsa tsiñi ñuhu ca tan sií ca caá, tan tsaquín yu yuu can nu cua javaha yu vehe yu nda Sión.

Tan nyivi tsa tsinú iñi tsi ra tsa cuví yuu can, ña cua tahan ñi ticanuu. Tacan catyí Nyoo tuhun ra Cristo nu tutu ra.

<sup>7</sup> Maa tyin tsa cuenda yoo tsa tsinú iñi tsi ra Cristo, ra cuví yuu can, tsiñi ñuhu xaan ra tsi yo. Tan tsa cuenda nyivi tsa ña tsinú iñi tsi ra, cuví ra tumaa iin yuu tsa caahán Nyoo tuhun nu tutu ra tan catyí tsi tyehen:

Yuu tsa ña cuñi ra javahá vehe cuatyíñu ra, yacan cuví yuu tsa tsiñi ñuhu ca, catyí tsi.

<sup>8</sup> Tan catyí tucu tsi:

Ra ican cuví yuu tsa cuaha xaan nyivi cua nañi tsaha tan nduva ñi.

Cuví ra iin cava tsa janduvá tsi ñi, catyí tsi nu tutu Nyoo.

Nduva nyivi can tyin tsiñi ñi tuhun Nyoo, tan ña tyaá yahvi ñi itsi tyin tacan nyaá tyin cua javaha ñi.

### Nyivi yihí cuenda Nyoo

<sup>9</sup> Maa tyin nyooho cuví ndo nyivi nacatsi maa Nyoo. Tan cuví ndo tumaa jutu tyin javahá ndo tyiñu nuu ra tyin juvin ra ndacá ñaha tsi yo. Tan cuví ndo nyivi ii ityi nuu ra tan cuví ndo nyivi maa ra, tacan tan cahan ndo tuhun vaha tsa javahá ra. Tyin juvin ra tavā tsi yo nu naa tan tyihī ra tsi yo nu nditsin tan nu sií caá. <sup>10</sup> Tsa ndi cumañi ca cuvi ndo nyivi Nyoo, nduve yahvi nyaá ndo. Maa tyin vityin nyivi Nyoo cuví ndo. Quivi can yoñi cundaahvi iñi tsi ndo, maa tyin vityin Nyoo cundaahvi iñi ra tsi ndo.

### Nu catyí ra Pedro tyin coo yo, tan javaha yo tyiñu nuu Nyoo

<sup>11</sup> Yañi, cuñi xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayivi cuví ndo, tyin nda gloria cuví nuu ndo. Yacan cuenda ña javaha ndo cuhva cuñi cuñu ñuhu ndo. Tyin cañi tahan cuñu ñuhu ndo tsihin añima ndo. <sup>12</sup> Jahā cuenda ndo tsi ndo nu iyó ndo tyañu nyivi tsa ña tsitó tsi Nyoo. Tyin vasu caahán ñi ndavaha ñi siqui ndo, tan catyí ñi tyin ña vaha ndo, maa tyin quivi quitsi nyehe Nyoo tyiñu javahá yo cua nyehe ñi tyin vaha tsa javahá ndo tan cua jacahnu ñi tsi Nyoo.

<sup>13</sup> Tyaa yahvi ndo tsi ra cumí tyiñu nu iyó ndo tsa cuenda tsa cuñi ndo tsi Nyoo. Tyaa yahvi ndo tsi ra cumí tyiñu, a cuví ra rey cahnu ca, <sup>14</sup> a iin ra jaquitsi ra rey tyin tatsi tuñi ra tsi ra iyó cuatyí naha ra tan naquihin ndaahvi ra tsi yoo tsa javahá tsa vaha. <sup>15</sup> Tyin Nyoo cuñi ra tsa javaha yo maa ñi maa tsa vaha tyin tacan tan ña ñihi ca nyivi soho tan nyivi ña tsitó naa cahan ñi siqui yo.

<sup>16</sup> Coo ndo tumaa iyó nyivi tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tyiñu nuu Nyoo tyin cuví ndo musu ra. <sup>17</sup> Jahā ndo tsa ñayivi tsi tandihī ñi nyivi. Cuñi ndo tsi ñi yihí cuenda Nyoo. Jahā ndo tsa ñayivi tsi ra ndacá ñaha, tyin Nyoo nyehé ra tandihī tsa javahá yo.

### Uvi taahan cuhva nyehé yo tundoho

<sup>18</sup> Nyooho tsa cuví musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra naha, vasu xaan ra naha a vasu vaha iñi ra naha. <sup>19</sup> Tyin tatun cunyeé iñi yo nyehé yo tundoho tsa janyehé nyivi tsi yo tsa cuenda tsa javahá yo tsa vaha nu Nyoo, cua tsa can nuu ra. <sup>20</sup> Maa tyin tatun tatsi tuñi nyivi tsi ndo tsa cuenda tsa javahá ndo tsa ña vaha tan cunyeé iñi ndo nyehe ndo tundoho, nduve náa catyi. Maa tyin tatun ña cundihī iñi ndo tan cunyeé iñi ndo nyehé ndo tundoho tsa cuenda tsa javahá ndo tsa vaha, yacan cuví



tsa vaha nuu Nyoo. <sup>21</sup> Tumaa tsa nyehe maa ra Cristo tundoho tsa cuenda yo, tacan taahán tsi cunyeetse iñi yo nyehe yo tundoho tyin tsa cuenda yacan cana Nyoo tsi yo. <sup>22</sup> Ra Cristo ndi intuhun cuatyí ña javaha ra. Tan ndi iin tsaha tan ña jandavi ñaha ra tsi nyivi. <sup>23</sup> Quivi jacuñi nyaa ñi tsi ra, ña jacuñi nyaa ra tsi ñi. Quivi tsa janyehe ñi tundoho tsi ra ña jayuhvi ra tsi ñi. Tyin intuhun ñi maa Nyoo cuví ra tuhvá jacutuñi tsi nyivi tsihin tsa ndaa tan tsihin tsa nditsa. Yacan cuenda natyaa ra tsi ra ndaha Nyoo. <sup>24</sup> Tyin cuhva tsa ticaá ra Cristo nu cruu can, tsicoso tandihí cuíi maa cuatyí yo tsata ra. Tacan cuví tyin tacan tan ña javaha ca yo cuatyí, tan coo yo ñayivi cuíti. Tyin tsihin tsa ñicueehé ra, tan nduvaha yo. <sup>25</sup> Tyin quivi can tsicá nuu yo cuví yo tumaa mbee tsa ndoo ihñi, tsa nduve tsitoho. Maa tyin vityin nacuhva cuenda yo tsi yo tsi ra Cristo, tan jahá cuenda ra añima yo. Cuví ra ityi nuu tsihin yo.

### Nacaa taahán tsi coo nyivi tindaha

**3** Tacan tucu nyooho, ñiñaha tsa iyó yí. Tyaa yahvi ndo tsi yí ndo tyin tatun ña tsinú iñi ra tsi ra Cristo, cua tsinu ndihí iñi ra tsi ra Cristo tsihin cuhva javahá ñi ndo tyin nyehe ra tyin vaha tsahá ndo tsa quihí ndaha ra tsi ndo. Tan ña cuñí tsi cuaha xaan cahan ndo tsihin ra, <sup>2</sup> tyin nyehé ra tyin catsi iyó ndo tan jahá ndo tsa ñayivi tsi ra. <sup>3</sup> Ña caca xaan iñi ndo janduvaha ndo tsi ndo ityi tsata ñi, tyin ña ñiñi xaan cuñí tsi tsa iyo xaan janduvaha ndo jiñi ndo, tan cuatyíñu ndo tsa cuví xuhun cuaan tan cunditsi ndo jahma xiñu xaan. Ña nducu ndo tandihí yacan. <sup>4</sup> Maa tyin jandutyaqui ndo tsi ndo tsihin tsa quitá añima ndo tyin tun cuíti iyó yo tan vita iñi yo, tan taxin iyó yo, yacan cuví tsa sñi ca caá nuu Nyoo. Tan ña cua tiví maa can. <sup>5</sup> Tyin tsihin tsehe ndutyaqui ñiñaha tsa nacoto tsi Nyoo, ñi tsa tsicoo tahan tsanaha. Nyitá iñi ñi tsi Nyoo tan tyaa yahvi ñi tsi yí ñi. <sup>6</sup> Tumaa ña Sara, tyaa yahvi ña tsi ra Abraham yí ña. Tan catyí ña: “Tata”, tsihin ra. Tatun nyooho tan javahá ndo tsa vaha tan ndi luxu maa tan ña nayuhvi ndo, cua cuví ndo tumaa maa ña. <sup>7</sup> Tan tacan tucu nyooho, ra iyó ñasihi naha ra, cuntuñi iñi ndo cuhva coo ndo tsihin ñasihi ndo. Jaha ndo tsa ñayivi tsi ñi tsa cuenda tsa vita ca cuñu ñuhu ñi tan ñavin ca cuñu ñuhu nyooho tan tsa cuenda tyin iin caa ñi tsahá ra tumañi iñi tsi ndo, tan yacan cuví ñayivi iyó ndo. Javaha ndo tyehen tyin tacan tan tñin cuenda Nyoo tuhun caahán ndo tsihin ra.

### Nu tsahá cuenda ra Pedro nácaa taahán tsi coo yo

<sup>8</sup> Nu ndihí tuhun, iin ñi cuhva caca iñi tandihí ndo. Cundaahvi tahan iñi ndo tsi ndo. Cuyñi tahan ndo tsi ndo tumaa tsa cuñí ndo tsi yañi ndo tsa cacu tsihin ndo. Vita cahan ndo tsihin tahan ndo, tan ña cahnu jaha ndo tsi ndo; cuví ndo nyivi vaha. <sup>9</sup> Ña javaha ndo tsa ña vaha tsihin nyivi tsa javahá tsa ña vaha tsihin ndo. Ña cahan ndo tsi ñi tatun caahán ñi tsi ndo, tyin Nyoo cana ra tsi ndo tyin javaha ndo tsa vaha tsihin ñi

tyin tacan tan cua nasoco ra tsi ndo. <sup>10</sup> Tyin tuhun Nyoo catyí tsi tyehen:

Nyivi tsa cuñí coo ñayivi tsihin tsa sñi, cuñí tsi jaha ñi cuenda yaa ñi, tan ña cahan ñi tsa ndavaha ñi, tan ndi ña cahan ñi cuendu.

<sup>11</sup> Jandihí ndo tsa javahá ndo tsa ña vaha, tan javaha ndo tsa vaha.

Nducu ndo cuhva coo taxin ndo, tan coo ndo tacan.

<sup>12</sup> Tyin Jutu Mañi yo jahá cuenda ra tsi nyivi vaha.

Tatun caahán ñi tsihin ra, tyaá soho ra tsa caahán ñi. Maa tyin nyivi javahá tsa ña vaha, ña cuñí ra nyehé ra tsi ñi.

<sup>13</sup> Ndi intuhun maa nyivi tan ña cuví javaha ñi tsa ña vaha tsihin ndo tatun nyooho tan maa ñi tsa vaha nanducú ndo. <sup>14</sup> Cuyñi iñi ndo vasu ndi maa nyehé ndo tundoho tsa cuenda tsa javahá ndo tsa vaha. Tan ña nayuhvi ndo tun jayuhvi nyivi tsi ndo. <sup>15</sup> Jachanu ndo tsi ra Cristo tsitsi añima ndo. Cuhva ndo tsa cundaca ñaha ra tsi ndo. Caca iñi ndo tuhun Nyoo tyin tatun ndaca tuhun nyivi tsi ndo nacuenta tsinú iñi ndo tsi ra, cuví cuhva cuenda ndo tsi ñi. Tan javaha ndo can tsihin tsa ña cahnu jahá ndo tsi ndo tan jaha ndo tsa ñayivi tsi ñi. <sup>16</sup> Catsi coo ndo tyin tun catsi iyó ndo ña cua nducahan nuu ndo nuu Nyoo. Tan tatun caahán nyivi ndavaha ñi siqui ndo tsa cuenda tyin vaha cuahán ndo tsihin ra Cristo, juvin ñi maa ñi tan cua nducahan nuu ñi tsa cuenda tsa cahan ñi siqui ndo. <sup>17</sup> Vaha ca nyehé yo tundoho tsa cuenda tsa javahá yo tsa vaha tatun Nyoo cuñí, tan ñavin ca tsa nyehe yo tundoho cuenda tsa ña vaha. <sup>18</sup> Tyin ra Cristo nyehe ra tundoho tan tsihi ra iin tsaha ñi tsa cuenda cuatyin tandihí yo. Ra vaha cuví ra maa tyin nyehe ra tundoho tan tsihi ra tsa cuenda yo tsa cuví yo nyivi caquiñi, tyin tacan tan cuví tsa yo nu nyaá Nyoo. Tsihi cuñu ñuhu ra, maa tyin nandoto nyico ra tsihin Tatyí Ii ra. <sup>19</sup> Tacan tan tsihin Tatyí Ii ra tsahan ra tsicahan ra tsihin añima nyivi tsa yucú anyaya. <sup>20</sup> Tan ñi ican cuví ñi tsa ña tyaa yahvi tsi Nyoo quivi tsicoo ra Noé tahan tsanaha, tyin ñi tsinú yutun ndoo tacan tsa ndatu Nyoo tsa ndu uvi iñi ñi cuatyí ñi. Maa tyin ña cuaha ñi cacu quivi cuyn savi cahnu tsa tsahñi ndutya ñuhu tsi ñi. Una taahan ñi ñi cacu tsitsi yutun ndoo tyin nandaq yutun ndoo can nu ndutya ñuhu. <sup>21</sup> Tan tacan tucu maa yo tumaa tsa cacu ñi ican, tacan cacu yo quivi tsicoondutya yo. Maa tyin ñavin nyahyu yo nacatya ndutya can tsa tsicoondutya yo. Yacan cuñí tsi catyí tsa tsicán tahvi yo tsi Nyoo na nacatya ra añima yo tan cacu yo jahá tsa nandoto ra Jesucristo. <sup>22</sup> Tan nandaq ra nda gloria, tan nyaá ra xiin cuaha Nyoo vityin. Ndacá ñaha ra tsi ángel tan tandihí tatyí ña vaha tsa ndacá ñaha tsi nyivi.

### Jaha tyiñu ndo nuu nyivi yihí tuhun Nyoo tsihin ndo nácaa tsahá maa Nyoo tsi ndo.

**4** Yacan cuenda janyeetse ndo iñi ndo nyehe ndo tundoho tumaa nyehe ra Cristo tundoho tsihin cuñu ñuhu ra. Tyin nyivi tsa nyehé tundoho tsihin cuñu ñuhu ñi, ña javahá ca ñi tsa caquiñi tsa cuñí cuñu ñuhu

ñi. <sup>2</sup>Tyin tacan tan tandihí quivi coo ñi cua javaha ñi cuhva cuñí Nyoo, tan ñavin cuhva cuñí cuñu ñuhu ñi. <sup>3</sup>Vityin tsindihí tsa javahá ndo tsa caquiñi tsa taahán iñi nyivi tsa ña tsitó tsi Nyoo. Tsicoo ndo cuhva cuñí ndo, cuaha tsa caquiñi javahá ndo, tan javahá ndo tsa caquiñi tsa cuñí cuñu ñuhu ndo. Javahá ndo vico tan tsiñi ndo. Tan jacahnu ndo tsitoho tsa ña taahán tsi jacahnú ndo. <sup>4</sup>Tan vityin tsa ña cutahán ca ndo tsihin ñi tan ña javahá ca ndo tsa caquiñi tsa javahá ñi, iyo cuñí ñi. Tan caahán ñi ndavaha ñi siqui ndo. <sup>5</sup>Maa tyin tandihí tsa caahán ñi tan tsa javahá ñi cua nacuhva cuenda ñi can tsi ra cua jacutuñi tsi nyivi nyitó tan nyivi tsihi. <sup>6</sup>Yacan cuenda jacoto ra Cristo tuhun vaha tsi ndiyi. Tyin tacan tan cuvi coo añima ñi tumaa iyó Nyoo, vasu ndi maa tsihi ñi nu ñuhu ñayivi ihya tumaa tsiihi tandihí ca nyivi.

<sup>7</sup>Tsa yatyin cuii cundihí tandihí maa tsa iyó nu ñuhu ñayivi ihya. Yacan cuenda catsi coo ndo tan ña jandihí ndo tsa ndacan tahvi ndo tsi Nyoo. <sup>8</sup>Tsa jihna ñi taahán tsi tsa cuñi tahan ndo tsi ndo, tyin tatun cuñi tahan yo tsi yo, cuaha tsaha cua jaha yo tucahnu iñi tsi ñi. <sup>9</sup>Tatun tsaá iin nyivi vehe ndo, vaha tyanu ndo tsi ñi tan ña caca iñi ndo tyin jatyañu ñi tsi ndo. <sup>10</sup>Tan cuñi tsi tsa jaha tyiñu intuhun intuhun ndo nuu nyivi tahan ndo nácaa tsahá maa Nyoo tsi ndo. Tyin siin siin tsa tsahá Nyoo tsi tsa intuhun intuhun yo. Tan taahán tsi cuatyíñu yo can tsihin tahan yo. <sup>11</sup>Tatun tsahá Nyoo tuhun cahan un tsihin nyivi, cahan, maa tyin maa ñi tuhun tsa tsahá ra tsi un. Tatun tsahá ra tyin javaha un tyiñu nuu nyivi, javaha tsihin tunyee iñi tsa tsahá maa ra. Tandihí tsa catyí Nyoo tyin javaha ndo, javaha ndo can, tyin tacan tan jacahnu nyivi tsi Nyoo tsa cuenda ra Jesucristo. Tyin intuhun ñi maa Nyoo taahán tsi jacahnu yo. Tan na cundaca ñaha ra tsihin tunyee iñi ra tacan ñi maa. Tan na cuvi tsi tacan.

#### Sii cuñí ndo tun nyehé ndo tundoho tsa cuenda ra Cristo

<sup>12</sup>Yañi tsa cuñi xaan yu, ña iyo xaan cuñi ndo tatun vatsí tundoho ñihi siqui ndo. Na cuñi ndo tyin ña taahán tsi nyehe ndo tundoho. <sup>13</sup>Cu sii iñi ndo tyin cuvi nyehe ndo tundoho tumaa nyehé ra Cristo tundoho. Tyin tacan tan quivi quitsi nyico ra Cristo inga tsaha, sii cua cuñi ndo nyehe ndo tsa cahnu cuví ra. <sup>14</sup>Tatun caahán nyivi ndavaha ñi siqui ndo tyin nyicún ndo tsi ra Cristo, sii cuñi ndo, tyin nyaá Tatyí Ii Nyoo tsihin ndo. Maa ñi caahán ñi ndavaha ñi siqui ra Cristo, maa tyin nyoocho jacahnú ndo tsi ra. <sup>15</sup>Tatun nyehé ndo tundoho tsa cuenda yacan, vaha, tan ñavin ca tsa nyehé ndo tundoho tsa cuenda tsa tsahñi ndo, o tsa suhu ndo, o javahá ndo tsa ña vaha, o tsa tyihí ndo tsi ndo nu ña taahán tsi. <sup>16</sup>Maa tyin tun nyehé ndo tundoho tsa cuenda tsa yihí ndo cuenda ra Cristo, ña nducahan nuu ndo. Jacahnu ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

<sup>17</sup>Tyin tsa tsaá quivi tsa quitsahá jacutuñi Nyoo tsi tandihí nyivi. Tan jihna ca yoo tsa yihí cuenda ra cua cutuñi. Tatun tyehen tatsí tuñi Nyoo luxu ñi tsi yoo,

znácaa cua tatsi tuñi ra tsi nyivi tsa ña tyaá yahvi tuhun caahán ra? <sup>18</sup>Tatun yhi cacú añima nyivi vaha, znácaa cua cacu añima ñi quiñi iyó, ñi ña vaha? <sup>19</sup>Yacan cuenda tatun nyehé ndo tundoho cuhva cuñí Nyoo, cuñí tsi tsa jañihi ca ndo javaha ndo tsa vaha. Tan tyaa cuenda ndo añima ndo ndaha ra tyin maa ra javahá tsi yo, tan cua javaha ra tumaa caahán ra.

#### Nu tsahá cuenda ra Pedro tsi yo nácaa coo yo

**5** Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuví tucu maa yu. Tan cuví yu tsandaa tyin nyehé yu tandihí tundoho tsa tahañ ra Cristo. Tan cua cutahan yu tsihin tandihí ca ra naha quivi quitsi ra Cristo inga tsaha tsihin tsa cahnu cuví ra. <sup>2</sup>Jaha cuenda ndo tsi nyivi yihí tuhun Nyoo tsa yihí ndaha ndo, tumaa jahá cuenda vaha iin ra mbee jana ra. Javaha ndo can tsihin tsa ñi iñi añima ndo tan ñavin tsihin tsa ñiñi, maa tyin cuhva cuñí Nyoo. Ña javaha ndo can tsa cuenda tsa cuñí ndo xuhun. Tandihí tyiñu javahá ndo, javaha ndo can tsihin tsa cacu iñi ndo. <sup>3</sup>Tyin tun vaha iyó ndo nyehé ñi, tacan cua coo ndihí ñi tyin nyehe ñi tyin ña ndacá ñaha ñihi ndo tsi ñi. <sup>4</sup>Tacan tan quivi cua quitsi ra cuví ityi nuu tsihin nyoocho tsa jahá cuenda mbee jana Nyoo, cua cuhva ra tsa sii caá tsa ña cua tiví maa tsi ndo.

<sup>5</sup>Tacan tucu nyoocho, ra cuatyí tan ñi cuatyí, tyaa yahvi ndo tsi ra tsahnu naha ra. Tan tandihí ndo ndaahvi jaha ndo tsi ndo tan tyaa yahvi tahan ndo tsi ndo. Tyin catyí nu tutu Nyoo tyehen:

Nyoo ña cuñí ra nyehe ra tsi nyivi tsa yaa xaan,  
Maa tyin jatyinyeé ra tsi ñi tsa ña yaa.

<sup>6</sup>Yacan cuenda ndaahvi jaha ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee iñi tsa iyó tsi ra, tyin tacan tan cuvi jacahnu ra tsi ndo quivi cua tahan tsi. <sup>7</sup>Tyaa cuenda ndo tandihí tsa tsicá xaan iñi ndo ndaha Nyoo tyin maa ra jahá cuenda tsi ndo.

<sup>8</sup>Catsi cuhun iñi ndo tan jaha vaha ndo cuenda ndáa tsa vaha tan ndáa tsa ña vaha, tyin nu ña vaha, nu xaan iñi tsi yo, tsicá nuu nu nanducú nu yóo jaha canaa nu tumaa tsicá nuu ndicaha xaan nanducú ti tsa catsi ti. <sup>9</sup>Ñihi cunyecu ndo tsihin tsa tsinú iñi ndo tsi Nyoo tyin tacan tan cuvi jaha ndo tsi nu ña vaha. Tyin juvin ñi tundoho tsa nyehé nyoocho tan nyehé tucu tandihí ca nyivi yihí cuenda ra Cristo tanñi cahnu nu ñuhu ñayivi. <sup>10</sup>Maa tyin Nyoo jatyinyeé ra tsi yo, tan tsa yaha nyehe ndo tundoho juhva quivi, Nyoo cua jacutsa ca ra tsi ndo, ñihi cunyecu ndo tsihin tsa tsinú iñi ndo, tan cua cuhva ca ra tunyee iñi tsa iyó tsi ra tsi ndo. Tan juvin Nyoo cuví ra tsahá tandihí tsa vaha tsi yo, tan maa ra caná tsi yo tyin ndu iin yo tsihin ra Cristo tyin coo yo nu sii caá tsihin ra tacan ñi maa. <sup>11</sup>Na jacahnu yo tsi ra tan na cundaca ñaha maa ra tacan ñi maa. Tan na cuvi tsi tacan.

**Nu tsahá ra Pedro nacumi tsi nyivi nu ndihi ña**

<sup>12</sup>Jaquitsí yu carta ihya tsi ndo tsihin ra Silvano, yañi yo. Tyin tsitó yu tyin ñi xaan iñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihí ndo janahá tsi tyin nditsa tsa cuñi xaan Nyoo tsi yo. Yacan cuenda ña nācoo ndo itsi.

<sup>13</sup>Nyivi yihí cuenda Nyoo ñuu Babilonia tsa nacatsi Nyoo tumaa nacatsi ra tsi nyooho, jaquitsí ñi nacumi

tsi ndo. Tan ra Marcos, sehe yu tsa cuenda Jutu Mañi yo, jaquitsí ndihi ra nacumi tsi ndo.

<sup>14</sup>Cuñi tahan ndo tsi ndo tan cūhva tahan ndo nacumi tsi ndo.

Na coo ca tsa taxin añima tandihi nyooho tsa iin ñi cuví tsihin ra Jesucristo.

Tan na cuvi tsi tacan ñi.

## II San Pedro

### Nu tyaá ra Pedro inga carta tsa cuenda nyivi yihé cuenda Nyoo

**1** Yuhu ra Simón Pedro cuví yu musu ra Jesucristo, tan cuví yu iin ra tava tyiñu ra tyin caca yu tyiñu ra. Tyaá yu carta ihya tsa cuenda nyooho tsa natsinu vaha iñi tsi Nyoo tumaa tsa tsinú iñi nyuhu. Inducu ñi tsinú iñi yo tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvín ra cuví ra jacacú tsi yo. <sup>2</sup> Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxin ca tsi. Yacan ñihí ndo tsa cuenda tsa nacotó ndo tsi ra tan tsi Jutu Mañi yo Jesús.

### Nacaa taahán tsi coo nyivi yihé cuenda Nyoo

<sup>3</sup> Nyoo, tsihin tunyee iñi tsa iyó tsi ra, tsahá ra tandihí tsa tsiñí ñuhu tsi yo tyin tacan tan coo yo ñayivi tsa iyó ra tan cuví yo tumaa maa ra. Tandihí tsehe ñihí yo tsa cuenda tsa tsahá ra tsa nacotó yo tsi ra tsa caná tsi yo. Tyin caná ra can tsi yo tsihin tsa cahnu cuví ra tan tsihin tsa iyo tsa javahá ra. <sup>4</sup> Tan tsihin tandihí tsa vaha can, tsahá tucu ra tsa catyi ra tyin cuhva ra tsi yo. Maa tyin cahnu xaan tan yahvi xaan can. Maa tyin tsahá ra can tsi yo tyin tacan tan cuví coo yo tumaa maa ra tyin tsa nacotó yo tandihí tsa caquiñi tsa javahá yo, tan ña cua tiví yo tumaa tivé nyivi nyicún tsa ña vaha tsa iyó nu ñuhu ñayivi ihya. <sup>5</sup> Yacan cuenda cuñí tsi tsinú ca iñi yo tsi Nyoo tan ñavin yacan ñi tyin cuñí tucu tsi nducu yo cuhva coo cuiti yo. Tan cuñí tucu tsi nducu yo cuhva cutuñi vaha iñi yo cuhva cuñí Nyoo tsihin yo. <sup>6</sup> Yaha can tan nducu yo cuhva cundaca ñaha yo cuñu ñuhu yo tan cuhva tsicá iñi yo. Yaha can tan nducu yo cuhva tsa ña yatyi xaan cundihí iñi yo. Yaha can tan nducu yo cuhva coo yo ñayivi iyó Nyoo. <sup>7</sup> Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyivi tumaa tsa cuñí maa Nyoo tsi tandihí yo.

<sup>8</sup> Tatun tacan iyó ndo tan tacan nducú ndo cuhva tsa coo tandihí tsehe tsi ndo, cua cutyiñu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihí yacan. <sup>9</sup> Maa tyin nyivi tsa nduve yacan iyó tsi, cuví ñi tumaa iin ra cuaa. Ña cutuñí iñi ñi tsa taahán tsi coto ñi. Tan tsa naq iñi ñi tyin ndatsi Nyoo cuatyí ñi tahán tsanaha. <sup>10</sup> Nyoo caná tsi ndo tan nacatsi ra tsi ndo. Yacan cuenda yañi, tun javahá ndo tandihí tsa caahán yu tuhun ihya, ña cua nduva ihñi ndo. <sup>11</sup> Tacan tan ña yii cua quihvi ndo nu

ndacá ñaha ra Jesucristo, ra cuví Jutu Mañi yo tan ra jacacú tsi yo. Tan cua coo cuii ndo tsihin ra.

<sup>12</sup> Yacan cuenda ña jandihé yu tsa janducuhún iñi yu tuhun ihya tsi ndo, vasu tsa tsitó maa ndo itsi, tan vasu ñi cuñí ndo javahá ndo tuhun nditsa tsa cutuhva ndo. <sup>13</sup> Tan cuñí yu tyin vaha tsa janducuhún iñi yu tuhun ihya tsi ndo tsitsi tsa ndi iyó ca yu. <sup>14</sup> Tyin tsa jacotó Jutu Mañi yo Jesucristo tsi yu tyin ña naha ca tan cua nacoo yu ñuhu ñayivi ihya. <sup>15</sup> Tan cua jañiñi yu tsi yu tsa janducuhún iñi yu tuhun ihya tsi ndo tyin tacan tan quivi cúu yu ña naa iñi ndo itsi.

### Nu nacatyí tuhun ra Pedro nácaa nyehé ra naha tsa cahnu cuví ra Cristo

<sup>16</sup> Ñavin tsa nandacu iñi ñi maa ndi tan cahán ndi tsihin ndo quivi jacotó ndi tuhun Jutu Mañi yo Jesucristo tsi ndo. Tsa nditsa cuví tsi tyin tsihin tinuu ndi nyehé ndi tsa cahnu cuví ra. Tan jacotó ndi tsi ndo tyin iyó xaan tunyee iñi tsi ra tan cua quitsi ra inga tsaha.

<sup>17</sup> Tyin nyehé ndi nu jacahnú Nyoo Jutu yo tsi ra tan nyehé ndi nu janduxiñu ra cuhva caá ra. Tan sii xaan cuví nu cahán Nyoo tan catyi ra: “Ra ihya cuví Sehe yu, tan cuñí xaan yu tsi ra. Tan sii xaan cuñí yu tsihin ra”, catyi Nyoo tuhun ra Jesús quivi can. <sup>18</sup> Juvín nyuhu tsiñi ndusu Nyoo tsa quitsi ityi andivi quivi tsiyucu ndi yucu ii tsihin Jutu Mañi yo.

<sup>19</sup> Tuhun ihya janahá tyin nditsa tsa tyaá ra cuví ndusu yuhu Nyoo nu tutu tahán tsanaha. Tatun tyaá yahvi vaha ndo tuhun can, vaha javahá ndo. Tyin tuhun can cuví tsi tumaa iin ñuhu tsa jandunditsín tsa naa ca. Maa tyin ra Jesucristo cuví ra tumaa tiñuu cahnu tsa caná tsa cua tuvi tyin jandunditsín ra tsitsi añima yo. <sup>20</sup> Maa tyin cuñí tsi coto ndo tyin ña cuví nacatyí tuhun tsa intuhun ñi maa yo tsa cuñí tsi catyi tsa tyaá ra ndusu yuhu Nyoo. <sup>21</sup> Tyin ra cuví ndusu yuhu Nyoo tahán tsanaha ña cahán ra naha cuhva cuñí maa ra naha. Maa tyin cahán ra naha cuhva cuñí Nyoo tyin maa Tatyí Ii Nyoo jaquihin ityi tsi ra naha.

### Ra jacuahá tsa ña nditsa

(Judas 4-13)

**2** Maa tyin tsicoq tucu ra cahán cuendu naha ra nu tsicoq nyivi Israel tahán tsanaha. Catyi ra naha tyin cuví ra naha ndusu yuhu Nyoo tan ña nditsa. Tan tacan cua coo tucu ra vatya naha ra nu yucú ndo. Xeehe xaan cua jacuaha ra naha tsa ña nditsa tsa cuví jativi tsi ndo. Tan cua catyi ra naha tyin ña nditsa tuhun Jutu Mañi yo tan juvín ra jatá tsi ra naha. Yacan

cuenda numi ñi cua cunaa ra can naha ra. <sup>2</sup>Tan cuaha xaan nyivi cua cunicun tsi ra naha tsihin tsa caquiñi tsa javaha ra naha. Tan cuaha xaan ñi cua cahan ndavaha ñi siqui tuhun tsa nditsa vaha ra Cristo. <sup>3</sup>Tan tsa cuenda tsa cuñi ra naha xuhun, cua nducu ra naha cuhva jandavi ñaha ra naha tsi ndo tsihin tsa jacuaha ra naha maa ñi tsa ña nditsa. Maa tyin ndatú Jutu Mañi yo tatsi tuñi ra tsi ra naha tyin tsanaha iyó maa tuhun tsa cua cunaa ra naha.

<sup>4</sup>Tyin ndi ña jahā Nyoo tucahnu iñi tsi ángel tsa tsi-coo cuatyí tahān tsanaha. Jacuhun ra tsi nahnu anyaya. Tsahñi ra tsi nahnu tsihin cadena, tan nacoo ra tsi nahnu nu naa nda cuanda tahan tsi jacutuñi ra tsi nahnu. <sup>5</sup>Tan ndi ña jahā ra tucahnu iñi tsi nyivi ña vaha tsa tsicoo tsanaha. Jacuun ra savi xaan tsahñi tsi ñi. Maa tyin jacacu ra tsi intuhun ñi ra Noé tsihin utsa taahan nyivi ra. Ra ican cahān ra tsihin nyivi na nducu ñi cuhva coo vaha ñi tsihin Nyoo. <sup>6</sup>Tacan javahā tucu ra tsihin ñuu Sodoma tan ñuu Gomorra, janaa ra itsi. Tsahmī ra ñuu can tan nanduvī tsi nyaa, tyin coto nyivi caquiñi tsa iyó vityin tan nyivi tsa cua coo náa cua tahan ñi. <sup>7</sup>Maa tyin jacacu ra tsi ra Lot tyin vaha iyó ra nuu ra. Cuihya cuñi ra Lot nyehé ra cuhva iyó nyivi caquiñi can. <sup>8</sup>Tandihī quivi tsa tsicoo ra Lot ñuu can, cuihya cuñi añima ra tsa cuenda tsa tsiñi ra tan nyehé ra tsa caquiñi javahā ñi can. Tyin maa ra, ra vaha cuvī ra, tan ñi ican maa ñi tsa ña vaha javahā ñi. <sup>9</sup>Tacan jacacu Nyoo tsi yo tatun vaha iyó yo nuu ra. Maa tyin naquihín vaha ra tsi nyivi caquiñi nda cuanda tahan tsi quivi cutuñi ñi.

<sup>10</sup>Yaha ca cua tatsi tuñi Nyoo tsi nyivi tsa javahā tsa ña vaha tsa cuñi cuñu ñuhu ñi, ñi tsa ña cuñi cundaca ñaha Jutu Mañi yo tsi ñi. Tan ra vatya tsa yaa xaan naha ra, javahā ra naha cuhva cuñi maa ra naha. Tan ña yuuhví ra naha caahán ra naha ndavaha ñi siqui ra iyó ca tunyee iñi tsi tumaa Nyoo a ángel, a tatyí ña vaha. <sup>11</sup>Tan ángel, vasu ndi maa iyó ca tunyee iñi tsi ra naha tan ñavin ca nyivi, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

<sup>12</sup>Maa tyin ra vatya can naha ra cuvī ra naha tumaa quitī tsa ña cutuñi iñi tan javahā tī naha tī tsa cuñi maa tī naha tī. Tyin quitī, ¿náa cuenda iyó tī? Iyó tī tyin tñn yo tsi tī, tan cahñi yo tsi tī. Tacan ra can naha ra: Caahán ra naha ndavaha ñi siqui tsa ña cutuñi iñi ra naha, tan cua cúu ra naha tumaa tsihi quitī can naha tī. <sup>13</sup>Cua nyehe ra naha tundoho tsa cuenda tsa janyehé ra naha tundoho tsi inga nyivi. Si xaan cuñi ra naha tsihin tsa caquiñi javahā ra naha nu tuvi. Tsahá ra naha ticanuu nu yucú ndo nu iyó vico tatun cutahán ra naha tsihin ndo. Nyaá xaan ra naha tusii iñi. Maa tyin juvin ñi tsi maa ra naha jandaví ñaha ra naha.

<sup>14</sup>Tandihī ñaha tsa nyehé ra naha, cuñi ra naha coo ra naha tsihin ñi. ña quitatú ra naha tsa javahā ra naha tsa caquiñi. Jandaví ñaha ra naha tsi nyivi tsa ña ñihī nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha. <sup>15</sup>Nacoo ra can naha ra ityi vaha tan

naquihín ra naha ityi tsa cuahán nu cua cunaa ra naha tyin javahá ra naha tumaa javahā ra Balaam, sehe ra Beor. Tyin ra Balaam cuñi ra jaha canaa ra xuhun tsihin tsa ña vaha tsa javaha ra. <sup>16</sup>Tacan tan nacahān burru jana ra tsihin ra, tumaa caahán nyivi, tan tsa nacahān tī ña tsahā tī cuhun ra javaha ra tsa ña vaha tsicá iñi ra.

<sup>17</sup>Tan tacan tucu maa ra can naha ra. Cuvī ra naha tumaa iin soco ityi nu nduve ndutya yihí. Tan cuvī tucu ra naha tumaa vico tsa tindahá tatyí ñihī. Maa tyin tsa nyaá tsa cua cuhun ra naha nu naa xaan tan ican cuvī nu cua ndoo cuui ra naha. <sup>18</sup>Yaa xaan caahán ra naha. Maa tyin tandihī tsa caahán ra naha nduve yahvi nyaá can. Tan tsihin tandihī tsa ña vaha tsa javahá ra tan tsihin tsa ña vaha tsa cuñi cuñu ñuhu ra naha jandaví ñaha ra naha tsi nyivi tsa tsa yahā quitā mahñu nyivi tsa javahá tsa caquiñi. <sup>19</sup>Catyí ra naha tsihin ñi tyin cua coo nuña ñi. Maa tyin juvin ñi maa ra naha tsahá tsa cundaca ñaha tsa caquiñi tsi ra naha. Tyin tatun tsahá yo tsa cundaca ñaha tsa cundaca ñaha tsi yo, musu can cuvī yo. <sup>20</sup>Tyin nyivi tsa nacoto tsi Jutu Mañi yo Jesucristo, ra jacacú tsi yo, tsa yahā nacoo ñi tsa caquiñi tsa iyó nu ñuhu ñayivi ihya maa tyin tatun javaha nyico ñi tsa caquiñi, cahnu ca cuatyí ñi cua coo nu Nyoo.

<sup>21</sup>Vaha ca tun tsatyin ña nacoto ñi ityi vaha, tan ñavin ca tsa nacoo ihñi ñi tsa tsahā Nyoo tsi ñi tsa tsa yahā nacoto ñi tsi ra. <sup>22</sup>Maa tyin cundaa tsa tuhvá nyivi caahán: “Ina tsatsí nyico tī tsa ndutsan tī. Tan quini tucu, tun tsa yaha tsityí tī, quihví nyico tī nu xahan nyahyu.” Tacan cuvī ñi can tyin javahá nyico ñi tsa javahā ñi nda jihna.

### Quivi cua quitsi nyico Jutu Mañi yo

**3** Yañi, cuñi xaan yu tsi ndo. Carta ihya cuvī carta tsinu uvi tsa jaquitsí yu tsi ndo. Tan nu nduvi taahan carta ihya tsahá cuenda yu tsi ndo na caca vaha iñi ndo tan ña naa iñi ndo tsa cutuhvā ndo.

<sup>2</sup>Nducuhun iñi ndo tsa cahān ra cuvī ndusu yuhu Nyoo tahān tsanaha. Tan nducuhun tucu iñi ndo tsa jacuhā ndi tsi ndo. Tyin cuvī ndi ra tavā tyiñu Jutu Mañi yo Jesucristo, ra jacacú tsi yo.

<sup>3</sup>Coto jihna ndo tyin nu cua ndihī quivi cua quitsi nyivi cua vacu nducu tuhun Jutu Mañi yo. Tan cua coo ñi cuhva ña vaha cuñi cuñu ñuhu ñi. <sup>4</sup>Tan cua catyí ñi: “¿Náa ra Jesucristo tsa catyí tyin cua quitsi ra inga tsaha? ¿Numaa nyii ra? Tyin nda quivi tsa tsihi tsi tsaahnu yo tan nda cuanda tsa tsinu ñuhu ñayivi tan nda vityin caá ñi maa tahan ñi caá”, cua catyí ñi. <sup>5</sup>Tyin maa ñi ña cuñi ñi coto ñi tyin nda tyembu tsahnu cahān Nyoo tan javahā ra andiví tan ñuhu ñayivi. Quitā ñuhu ñayivi tsitsi ndutya, tan tsihin ndutya tsinu tsi. <sup>6</sup>Tsa yahā javahā Nyoo ñuhu ñayivi juvin ñi maa tsihin ndutya naa ñuhu ñayivi quivi cuun savi xaan. <sup>7</sup>Maa tyin andiví tan ñuhu ñayivi tsa iyó vityin ndatú tsi tsa cayu tsi tumaa catyí maa Nyoo. Cua cayu andiví tan ñuhu ñayivi tsihin ñuhu quivi cua cutuñi nyivi tan cua naa nyivi caquiñi.

<sup>8</sup> Maa tyin nyooho yañi yu tsa cuñí xaan yu, ña ña iñi ndo tyin tsa cuenda Jutu Mañi yo tsa iin quivi cuví tsi tumaa mil cuiya, tan tsa mil cuiya cuví tsi tumaa tsa iin quivi tsa cuenda ra. <sup>9</sup> Vasiqúi yihí ndo tsicá iñi ndo tyin maa Jutu Mañi yo ña cuñí naha quitsi. ñaha ca quitsi ra tyin ndatú jihna ra nda ndu uví iñi tandihí nyivi tan nasama ñi cuhva iyó ñi tyin ña cuñí ra tsa cu-naa ndi intuhun yo.

<sup>10</sup> Maa tyin quivi cua quitsi Jutu Mañi yo, yoñi maa cua coto tyin cua quitsi ra quivi tsa ña ndatú yo tsi ra. Cua quitsi ra tumaa iin ñasuhu. Tan ñihi cunahma tan cua naa andivi. Tan cua janaa ñuhú tandihí tsa iyó ityi síqui. Tan ñuhu ñayivi cua cayu tsi tsihin ñuhú tsihin tandihí tsa iyó nuu tsi.

<sup>11</sup> Tacan cua naa tandihí tsa iyó. Yacan cuenda cuñí tsi cuiti coo yo tumaa iyó maa Nyoo. <sup>12</sup> Cuatu ndo quivi quitsi Nyoo. Ndúcu ndo cuhva quitsi ñi ra tyin quivi tsa cua quitsi ra cua naa andivi jaha ñuhú. Tan tandihí tsa iyó cua naa tsi tsihin tsa ihñi ñuhú can. <sup>13</sup> Maa tyin yoo ndatú yo andivi tsa tan ñuhu ñayivi tsa tsa catyí Nyoo tyin cuhva ra tsi yo. Tan maa ñi maa tsa vaha tsi Nyoo cua coo ican.

<sup>14</sup> Yacan cuenda yañi, tsitsi tsa ndatú yo tsi Jutu Mañi yo, ndúcu ndo cuhva coo vaha ndo tsihin Nyoo, tyin tacan tan quivi quitsi ra, sñi cua cuñi yo tan cua coo taxin añima yo tyin nduve ca cuatyí yo iyó. <sup>15</sup> Coto ndo tyin Jutu Mañi yo ña cundihí iñi ra ndatú ra tsi yo tyin cuñí ra tsa cacu cuaha nyivi. Juvín ñi tyehen caahán tucu ra Pablo yañi yo nu carta tsa jaquitsí ra tsi ndo. Tyaa ra tsi tsihin tsa tsiñi tuñi tsa tsahá Nyoo tsi ra.

<sup>16</sup> Tandihí ñi nu carta ra tan caahán ra tuhun ihya. Vasu yihí tsa yñi xaan cutuñi iñi yo. Tan nyivi tsa ña cutuñi iñi, ñi tsa ña ñihi nyaá tsihin Nyoo, sñin cuhva cutuñi iñi ñi itsi. Juvín ñi tacan javahá ñi tsihin tuhun Nyoo tsa tyaa inga ca ra naha. Tan tsa tacan javahá ñi, juvín ñi tsi maa ñi jacunaá ñi.

<sup>17</sup> Yacan cuenda yañi, vityin tsa tsitó ndo tuhun ihya tsa ndi cumañi ca cuví tsi, jaha ndo cuenda tsi ndo tan cuñí yu tsa coto ndihí ndo cuhva jandaví ñaha ra caquiñi can naha ra, tyin tacan tan ña nacoo ndo cuhva vaha tsa cuahán ndo. <sup>18</sup> Maa tyin cuñí tucu tsi naco-to vaha ca ndo tsi Jutu Mañi yo ra Jesucristo, ra jacacú tsi yo. Tan cūahnu ca ndo tsihin tsa vaha ra tsa tsahá ra tsi yo. Na jacahnu yo tsi ra vityin tan tacan ñi maa. Tan na cuví tsi tacan ñi.

# I San Juan

## Cua coo yo ñayivi nyito

**1** Ihya tyaá ndi tuhun ra tsa iyó nda ndi cumañi coo tandihí tsa iyó. Tsiñi ndi tsa cahan ra quivi tsica ndi tsihin ra. Nyehe ndi tsi ra tsihin tinuu ndi tan cutuñi iñi ndi yóo ra cuví ra. Tan tñin ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsaha ra ñayivi nyito iyó yo. <sup>2</sup> Tan quivi tsaq ra nyehe ndi ñayivi nyito can tan cuví ndi tsandaa tsa cuenda can. Tan jacotó ndi tsi ndo náa cuví ñayivi tsa ña cua naa tyin iyó tsi tsihin Jutu yo Nyoo, tan tsaq tsi nu iyó yo. <sup>3</sup> Nacatyí tuhun ndi tsihin ndo tsa nyehe ndi tan tsa tsiñi ndi. Tyin tacan tan cuvi ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra. <sup>4</sup> Tan tyaá ndi tuhun ihya tsa cuenda ndo tyin tacan tan coto ndo tandihí tsa tsahá Nyoo tsi ndo tan si xaan cua cuvi tsi ndo.

## Nyoo, ñuhú cuví ra

<sup>5</sup> Vityin nacatyí tuhun ndi tsihin ndo tsa cahan ra Cristo tsihin ndi. Catyi ra tsihin ndi tyin Nyoo ñuhú cuví ra. Tan nduve tsa naa tsi ra, [nduve tsa ña vaha tsicá iñi ra cuví can]. <sup>6</sup> Tun catyí yo tyin iin ñi cuví yo tsihin ra, tan ndi iyó ca maa yo nu naa, jandaví ñaha yo tan ña javahá yo tsa nditsa. <sup>7</sup> Maa tyin tatun iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyivi yihí tuhun Nyoo tsihin yo, tan nacatyá ra Jesucristo Sehe Nyoo tandihí cuatyí yo tsihin niñi ra.

<sup>8</sup> Tatun catyí yo tyin nduve cuatyí yo, juven ñi maa yo jandaví ñaha yo, tan nduve tsa nditsa iyó añima yo.

<sup>9</sup> Maa tyin tatun naahmá yo cuatyí yo nuu Nyoo, cuví cuita iñi yo tsi ra tyin cua jaha ra tucahnu iñi tsi yo tsa cuenda cuatyí yo tan cua nacatya ra tandihí cuatyí yo tyin maa ra vaha ra tan javahá ra cuhva catyí ra tyin ña vatya ra. <sup>10</sup> [Nyoo catyí ra tyin iyó cuatyí yo], tan tatun catyí yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó añima yo.

## Ra Cristo cuví ra caahán ndaahvi tsaha yo

**2** Sehe nyihi yu, caahán yu tandihí tuhun ihya tsihin ndo, tyin tacan tan ña javahá ca ndo tsa ña vaha. Maa tyin tatun iin ndo tan javaha ndo tsa ña vaha, ña nayuhví ndo tsa ña cuví ca nduvaha ndo nuu Nyoo, tyin iyó iin ra caahán ndaahvi tsaha yo nuu Nyoo. Tan ra ican cuví ra Jesucristo, ra cuiti iyó. <sup>2</sup> Juvín ra jahá tucahnu iñi tsi yo tyin tsihi ra nu cruu tsa cuenda cuatyí

yo. Tan ñavin tsa cuenda maa ñi maa yo tsihi ra, tyin tsihi ra tsa cuenda tandihí cuí nyivi iyó nu ñuhu ñayivi.

<sup>3</sup> Tatun tyaá yahvi yo tsa caahán Nyoo, nacotó yo tsi ra. <sup>4</sup> Maa tyin tatun iin ra tsa catyí tyehen: “Yuhu tsitó yu tsi Nyoo”, tan ña tyaá yahvi ra tsa caahán Nyoo, cuví ra iin ra vatya. Tan nduve tsa nditsa iyó añima ra.

<sup>5</sup> Nyivi javahá tsa caahán Nyoo, ñi ican cuví ñi cuñí tsi ra tsihin tsa ni iñi añima ñi. Tan tsihin yacan tsitó yo tyin iin ñi cuví ñi tsihin ra. <sup>6</sup> Nyivi catyí tyin iin caa ñi iyó ñi tsihin Nyoo, taahán tsi coo ñi tumaa tsicoq maa ra Jesucristo quivi quitsi ra nu ñuhu ñayivi ihya.

## Taahán tsi tsa cuñí tahan yo tsi yo

<sup>7</sup> Yañi, ñavin tuhun tsa jacotó yu tsi ndo, tyin cuví tsi tuhun tsahnu tsa tsa tsitó maa ndo nda quitsi ca tsi.

Tan juven tsi cuví tsa tsa yahá tsiñi ndo. <sup>8</sup> Maa tyin ña tsindihí tsa tsa tsi tyin tyaá yahvi yo itsi tan tsa tyaá yahvi yo itsi, cuñí tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñi ca jandunditsin ñuhú tsa nditsa.

<sup>9</sup> Nyooho tsa catyí tyin iyó ndo nu nditsin, tan ndasi cuñí ndo nyehe ndo tsi nyivi yihí tuhun Nyoo tsihin ndo, ndi iyó ndo nu naa. <sup>10</sup> Maa tyin nyivi tsa cuñí tsi nyivi yihí tuhun Nyoo tsihin ñi, iyó ñi nu nditsin. Tan nduve maa cuatyí cuvi janduva tsi ñi. <sup>11</sup> Maa tyin nyivi ndasi cuñí nyehe tsi nyivi yihí tuhun Nyoo tsihin ñi, iyó ñi nu naa. Tan ña tsitó ñi numaa cuahán ñi tyin ña nditsin nyehé ñi tyin tumaa tsa cuaq ñi jahá tsa naa can.

<sup>12</sup> Jaquitsí yu tandihí tuhun ihya tsi nyooho tsa ndi nacuhvá cuenda tsi ndo tsi Nyoo. Tyin tsa yahá jahá Nyoo tucahnu iñi cuatyí ndo tsa cuenda tsa tsihi ra Jesucristo cuenda yo. <sup>13</sup> Nyooho tsa tsa tsahnu tsihin tuhun Nyoo, tyaá yu carta ihya tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayivi. Tan tyaá tucu yu itsi tsa cuenda nyooho ra tsa ndi cuahan cutuñí vaha iñi tuhun ra Cristo tyin jahá canaa ndo tan ndi jahá canaa ca ndo tsi nu ña vaha.

Tan tyaá tucu yu itsi tsa cuenda nyooho, tsa ndi nacuhvá cuenda tsi ndo tsi Nyoo, tyin nacotó ndo tsi Nyoo Jutu yo. <sup>14</sup> Jaquitsí yu carta ihya tsi nyooho tsa tsa tsahnu tsihin tuhun Nyoo, tyin nacotó ndo tsi ra tsa iyó maa tan tsinu ñuhu ñayivi. Tan jaquitsí yu carta ihya tsi nyooho tsa ndi cuahan cutuñi vaha iñi tuhun ra Cristo, tyin iyó xaan tunyee iñi tsi ndo jahá tuhun Nyoo tsa iyó añima ndo. Tan jahá canaa ndo tsi nu ña vaha.

<sup>15</sup> Ña cuñi ndo tsa caquiñi tsa iyó nu ñuhu ñayivi ihya. Tyin nyivi cuñí tandihí yacan, ña cuñí ñi tsi Nyoo Jutu

yo. <sup>16</sup> Tyin tandihí tsa ña vaha tsa iyó nu ñuhu ñayivi ihya, tsa cuñí cuñu ñuhu yo, tsa nyehé yo tan cuñi yo coo tsi yo, tan tsa cuñi yo nduyaa yo tsihin tsa iyó tsi yo, tandihí yacan tsahá ñuhu ñayivi ihya tsi yo, tan ñavin Nyoo Jutu yo tsahá can. <sup>17</sup> Ñuhu ñayivi ihya cua cundihí can, tan cua cundihí ndihí tucu tandihí tsa caquiñi tsa cuñí nyivi javaha ñi. Maa tyin nyivi tsa javahá cuhva cuñí Nyoo, cua coo cuii ñi tsihin ra.

### Nu tsa ndasi cuñi nyehe tsi ra Cristo

<sup>18</sup> Nyooho, tsa cuví ndo tumaa sehe yu, coto ndo tyin tsa cua ndihí quivi. Tan nyooho tsiñi ndo tyin vatsí nyivi tsa ña cuñí nyehe tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tsihin yacan nacotó yo tyin tsa tahañ tsi cundihí quivi. <sup>19</sup> Nyivi can ña yihé ca ñi tuhun Nyoo tsihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa tyin tacan cuví tyin tacan tan coto yo tyin ñavin nyivi yihé tuhun Nyoo tsihin yo cuví ñi.

<sup>20</sup> Maa tyin nyooho tsa tsitó ndo tsa caahán Nyoo tyin tsahá ra Cristo Tatyí Ii Nyoo iyó añima ndo tan jacotó tsi tandihí tsi ndo. <sup>21</sup> Jaquitsí yu carta ihya tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo tyin ña cuví quita tuhun vatya tsihin tuhun nditsa.

<sup>22</sup> ¿Yóo cuví nyivi vatya? Nyivi vatya cuví ñi catyí tyin ra Jesús ñavin ra Cristo cuví ra. Tan juvin ñi ican cuví ñi ndasi cuñi nyehé tsi ra Cristo. Tyin ña tsinú iñi ñi tsi Jutu yo Nyoo, tan tsi ra Jesucristo Sehe ra. <sup>23</sup> Tan tandihí nyivi tsa ña tsinú iñi tsi Sehe Nyoo, nduve Nyoo Jutu yo iyó tsihin ñi. Maa tyin nyivi tsa caahán tsihin tsa ñi iñi añima ñi tsihin nyivi tyin ra Jesucristo cuví Sehe Nyoo, iyó Nyoo Jutu yo tsihin ñi.

<sup>24</sup> Yacan cuenda naquihin vaha ndo tsitsi añima ndo tandihí tsa tsiñi ndo nda quivi jihna ñi. Tyin tun naquihin vaha ndo itsi tsitsi añima ndo, cua coo ndo iin caa ñi tsihin Nyoo Jutu yo tan tsihin Sehe ra. <sup>25</sup> Tan ñayivi nyito can cuví tsa catyí ra Jesucristo tyin cuhva ra tsi yo.

<sup>26</sup> Tyaá yu tuhun ihya tyin cahvi ndo itsi tsa cuenda tyin tsa iyó cuaha nyivi cuñi jandaví ñaha tsi ndo.

<sup>27</sup> Maa tyin ra Jesucristo tsahá ra Tatyí Ii Nyoo iyó añima ndo, yacan cuenda ña tsiñi ñuhu ca tsa jacuaha nyivi tsi ndo. Tyin juvin ñi maa Tatyí Ii Nyoo jacuaha tandihí maa tyiñu tsi ndo. Tan tsa nditsa cuví tsi, ñavin cuendu cuví tsi. Yacan cuenda jañihi ndo cunyanaa vaha ndo tsi ra Cristo tumaa janahá maa Tatyí Ii Nyoo tsi ndo.

<sup>28</sup> Tan vityin nyooho, tsa cuví tumaa sehe yu, cunyanaa vaha ca ndo tsi ra Cristo tyin tacan tan quivi quitsi ra, iin cuñi yo tsihin ra. Tan iin cuñi tucu maa ra tsihin yo. Tan inga tucu tuhun ña cua tahan yo ticanuu nuu ra quivi tsaa ra. <sup>29</sup> Vityin tsa tsa tsitó ndo tyin vaha ra Cristo, cuñí tsi coto ndihí ndo tyin tandihí nyivi javahá tsa vaha, sehe Nyoo tsi ñi.

### Nyivi cuví sehe Nyoo

<sup>3</sup> Nyehe ndo, Nyoo Jutu yo cuñí xaan ra tsi yo, tyin jacunañí ra sehe Nyoo tsi yo. Tan cuví yo sehe ra. Tan tsa cuenda yacan, nyivi taahán iñi tsa iyó nu ñuhu ñayivi ihya ña cutuñi iñi ñi cuhva tsicá iñi yo tyin ña nacoto ñi tsi maa ra. <sup>2</sup> Nyooho yañi, tsa cuví yo sehe ra vityin, maa tyin ñaha ca coto yo náa cua cuví yo. Maa tyin tsitó yo tyin quivi quitsi ra Jesucristo, cua cuví yo tumaa cuví maa ra, tyin cua nyehe vaha yo tsi ra tan cua nyehe tucu yo nácaa caá ra. <sup>3</sup> Tandihí yoo tsa ndatú tsa cua cuví tacan, nducú yo cuhva janduvaha yo tsi yo, tan cuví yo tumaa maa Jutu Mañi yo Jesucristo, tyin maa ra cuiti iyó ra.

<sup>4</sup> Tandihí nyivi tsa tsicoó cuatyí, ñi ican cuví ñi tsa ña tyaá yahvi ley Nyoo. Tyin tun javahá yo tsa ña vaha, cuñí tsi catyí tyin ña tyaá yahvi yo ley Nyoo. <sup>5</sup> Nyooho tsa tsitó tyin ra Cristo quitsi ra nu ñuhu ñayivi ihya tyin quinyaa ra cuatyí yo, tan tsitó tucu ndo tyin maa ra nduve cuatyí ra. <sup>6</sup> Tandihí yoo tsa iyó iin caa ñi tsihin ra, ña jañihí ca yo javahá ca yo tsa ña vaha. Maa tyin nyivi javahá tsa ña vaha, ñaha ca nyehe ñi tsi ra, tan ñaha ca coto ñi tsi ra. <sup>7</sup> Nyooho, tsa cuví tumaa sehe yu, coto jandaví ñaha nyivi tsi ndo. Tyin nyivi javahá tsa vaha, cuví ñi nyivi vaha, tumaa vaha maa ra Cristo. <sup>8</sup> Tyin nyivi javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quivi jihna ñi. Yacan cuenda quitsi ra Jesucristo, Sehe Nyoo, tyin janaa ra tandihí tsa javahá nu.

<sup>9</sup> Tandihí yoo tsa tsa yahá nacacy tsaa jahá Nyoo, ña taahán ca iñi yo javahá yo tsa ña vaha, tyin iyó yo ñayivi tsahá Nyoo tsi yo. Yacan cuenda ña javahá ca yo tsa ña vaha, tyin tsa yahá nacacy tsaa yo tan vityin cuví yo sehe Nyoo. <sup>10</sup> Cuví nacotó yo ndáa nyivi cuví sehe Nyoo, tan ndáa nyivi cuví sehe nu ña vaha, tyin tandihí nyivi tsa ña javahá tsa vaha tan ña cuñí tsi nyivi yihé cuenda Nyoo, ñavin sehe Nyoo tsi ñi.

### Na cuñi tahan yo tsi yo

<sup>11</sup> Tyin tsa tsiñi ndo nda quivi jihna ñi cuví: Tsa cuñi tahan yo tsi yo. <sup>12</sup> Ña taahán tsi javaha yo tumaa javahá ra Caín, tyin ra Caín cuví ra iin ra cuenda nu ña vaha. Tan tsahñi ra tsi yañi ra. ¿Náa cuenda tsahñi ra tsi yañi ra? Tsa cuenda tyin ra yañi ra javahá ra tsa vaha, tan maa ra javahá ra tsa ña vaha.

<sup>13</sup> Nyooho yañi, ña iyo cuñi ndo tun ndasi cuñi nyivi ña yihé tuhun Nyoo nyehé ñi tsi ndo. <sup>14</sup> Yoo tsa cuñí tsi nyivi yihé tuhun Nyoo tsitó yo tyin iyó yo ñayivi nyito, tyin juvin tsi janahá tsi yo tyin ña cuví ca yo nyivi tsihi. Maa tyin nyivi ña cuñí tsi nyivi yihé tuhun Nyoo, cuví ñi tumaa nyivi tsihi. <sup>15</sup> Nyivi ndasi cuñí nyehé tsi nyivi, cuví ñi tumaa nyivi tsahñí nyivi. Tan tsitó ndo tyin ndi in-tuhun ñi tsahñí nyivi, tan ña cua cuhva Nyoo ñayivi nyito coo ñi. <sup>16</sup> Tsitó yo náa cuví tsa cuñí tahan yo tsi yo tyin tsa yahá janahá ra Jesucristo tsi yo nácaa taahán tsi cuñi tahan yo tsi yo. Tyin maa ra nda cuenda tsahá ra ñayivi ra tsa cuenda yo tsa catyí tsa cuñí ra tsi yo.



Tacan taahán tsi javaha tucu maa yo. Cuñí tsi cuhva yo nda cuanda ñayivi iyó yo tsa cuenda nyivi yihí tuhun Nyoo. <sup>17</sup> Tatun yihí yo tan iyó luxu tsa iyó tsi yo, tan nyehé yo tyin cumañí tsa cumañí tsi inga nyivi, tan jahá yo tumaa tsa ña nyehé ñi yo, ¿a cuñí yo tsi Nyoo tsa tacan javahá yo? Ña cuñí yo tsi ra. <sup>18</sup> Nyooho tsa cuví ndo tumaa sehe yu, na ña cuñí yo tsi nyivi tsihin tuhun caahán ñi yo, na cuñí tahan yo tsi yo tsihin tsa quitá tsitsi añima yo tan javahá yo tumañi iñi tsihin tsa nii iñi yo.

#### Nacaa javaha yo tan coo vaha yo tsihin Nyoo

<sup>19</sup> Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo. <sup>20</sup> Tatun tuví iñi tsitsi añima yo tyin iyó cuatyí yo, na ña cuita iñi yo yacan. Na cuita iñi yo tsi Nyoo tyin juvin ra tsitó tandihí tsa iyó añima yo tan cahnu ca cuví ra tan ñavin ca añima yo. <sup>21</sup> Yañi, tatun tuví iñi yo tyin nduve cuatyí yo, na ña nayuhvi yo nyehé yo tsi Nyoo. <sup>22</sup> Tan tandihí tsa cua ndacan yo tsi ra, cua cuhva ra can tsi yo, tyin tyaá yahvi yo tsa caahán ra, tan javahá yo cuhva taahán iñi ra. <sup>23</sup> Tyin tyiñu tsa tsahá ra tsi yo yacan cuví tsa tsínu iñi yo tyin ra Jesucristo cuví Sehe ra, tan tsa cuñí tahan yo tsi yo, tumaa tava tyiñu ra tsi yo. <sup>24</sup> Nyivi tyaá yahvi tyiñu tsahá ra tsi ñi, iyó ñi tsihin ra, tan iyó tucu maa ra tsitsi añima ñi. Tan tsitó yo tyin iyó ra tsihin yo tsa cuenda Tatyí Ii ra tsa tsahá ra tsi yo.

#### Tatyí Ii Nyoo tan tatyí nu ña vaha

**4** Nyooho yañi tsa cuñí xaan yu, ña tsínu iñi ndo tsa caahán nyivi catyí tyin tuhun Nyoo caahán ñi. Nyehé jihna ndo tatun nacatsí tahan tsa caahán ñi tsihin tuhun Nyoo. Tyin vityin cuaha xaan nyivi jandaví ñaha iyó. Catyí ñi tyin Nyoo caahán tsa caahán ñi tan ña nditsa ñi. <sup>2</sup> Cuví nacoto ndo tsi nyivi tun juvin Tatyí Ii Nyoo jacahán tsi ñi o ñavin. Ñi tsa iyó Tatyí Ii Nyoo tsihin, catyí ñi tyin quee ra Jesucristo nda gloria tan quitsí ra nu ñuhu ñayivi ihya, tan cuví ra iin rayi tumaa maa yo. <sup>3</sup> Maa tyin tandihí nyivi tsa catyí tyin ñavin tacan cuví, ñavin Nyoo jacahán tsi ñi. Tatyí ña vaha, tsa ndasi cuñí nyehé tsi ra Cristo, jacahán tsi ñi. Tsa tsitó ndo tyin nyaá tsa cua quitsí nu jandaví ñaha can. Tan vityin tsa iyó nu nu ñuhu ñayivi ihya tan jandaví ñaha nu tsi nyivi.

<sup>4</sup> Nyooho tsa cuví ndo tumaa sehe yu, nyivi cuenda Nyoo cuví ndo. Tan tsa yahá jahá canaa ndo tsi nu caahán tsa ña nditsa. Tyin Nyoo iyó ra añima ndo tan cahnu ca cuví ra tan ñavin ca nu ña vaha, tsa iyó añima nyivi tsa taahán iñi tsa iyó nu ñuhu ñayivi ihya. <sup>5</sup> Ñi ican, cuenda nu ñuhu ñayivi ihya cuví ñi. Yacan cuenda caahán ñi cuenda tsa iyó nu ñuhu ñayivi ihya. Tan inga nyivi cuenda nu ñuhu ñayivi ihya tyaá soho ñi tsa caahán ñi ican. <sup>6</sup> Maa tyin yoo cuví yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñí ñi tyaa soho ñi tsa caahán yo. Tsihin yacan cuví nacoto yo ndáa

nyivi iyó Tatyí Ii Nyoo tsihin, tan caahán ñi tsa nditsa tan ndáa nyivi yihí tatyí ña vaha tan jandaví ñaha ñi.

#### Nyoo cuñí xaan ra tsi tandihí nyivi

<sup>7</sup> Nyooho yañi, na cuñí tahan yo tsi yo, tyin Nyoo janahá ra tsi yo nácaa taahán tsi cuñí tahan yo tsi yo. Tyin tandihí yoo tsa cuñí tsi nyivi, sehe Nyoo cuví tsi yo, tan nacotó yo tsi Nyoo. <sup>8</sup> Nyivi ña cuñí tsi inga nyivi, ña nacotó ñi tsi Nyoo, tyin Nyoo cuñí xaan ra tsi yo tan tsi tandihí nyivi. <sup>9</sup> Nyoo janahá ra tsi yo tsa cuñí ra tsi yo tsihin tsa tsahá ra Sehe mañi ra quitsí nu ñuhu ñayivi ihya, tyin cuhva ra ñayivi nyito coo yo. <sup>10</sup> Nyehé ndo, nácaa tsa cuñí Nyoo tsi yo. Ñavin jihna ca maa yo cuñí tsi ra, tyin jihna ca maa ra cuñí tsi yo. Tan jaquitsí ra Sehe ra tyin tacan tan cúu ra tsa cuenda yo tan quinyaa ra cuatyí yo.

<sup>11</sup> Nyooho yañi, tatun tacan cuñí Nyoo tsi yo, juvin ñi tacan taahán tsi tsa cuñí tucu maa yo tsi nyivi tumaa tsa cuñí maa Nyoo tsi yo. <sup>12</sup> Ndi intuhun maa nyivi, tan ñaha ca maa nyehé ñi tsi Nyoo, maa tyin tatun cuñí tahan yo tsi yo, iyó Nyoo añima yo. Tan ñi vaha iñi yo cuñí yo tsi ra tan tsi nyivi. <sup>13</sup> Tan tsitó yo tyin iyó vaha yo tsihin ra tan maa ra iyó ra añima yo, tyin tsahá ra Tatyí Ii ra iyó añima yo. <sup>14</sup> Nyuhu nyehé vaha ndi tan cuví ndi tsandaa tyin jaquitsí Nyoo Jutu yo tsi Sehe ra tyin jacacu ra tsi yo tsa cuví yo nyivi iyó nu ñuhu ñayivi ihya. <sup>15</sup> Tandihí nyivi tsa tsinú iñi tan caahán tyin ra Jesús cuví Sehe Nyoo, iyó Nyoo añima ñi. Tan iyó ñi iin caa ñi tsihin ra.

<sup>16</sup> Yoo tsitó yo tan tsinú iñi yo tyin Nyoo cuñí ra tsi yo, tan cuñí ra tsi tandihí nyivi. Tan tandihí yoo tsa cuñí tahan yo tsi yo, iyó yo iin caa ñi tsihin Nyoo; tan Nyoo iyó ra tsitsi añima yo. <sup>17</sup> Tyin tatun cuñí yo tsi Nyoo tsihin tsa ñi iñi añima yo, ña cua nayuhvi yo nyehé yo tsi ra na tahan tsi quivi cutuñi tandihí nyivi nuu ra. Tyin tumaa iyó ra Jesucristo, tacan iyó yo nu ñuhu ñayivi ihya. <sup>18</sup> Nyoo cuñí ra tsi yo, tan tatun cuñí yo tsi ra, nduve tsa nayuhvi yo. Tatun ñi iñi yo cuñí yo tsi Nyoo ña nuña ca nu quihvi tuhun yuuhví can añima yo, tyin Nyoo jatsiyó ra tandihí maa yacan. Tyin tatun yuuhví yo, yihí can tyin tuví iñi yo tyin iyó cuatyí yo. Tan yuuhví yo tsa cua tatsi tuñi Nyoo tsi yo. Tyin tatun yuuhví cuñí yo, yuuhví yo tyin ñaha ca cuñí yo tsi Nyoo tumaa taahán maa tsi cuñí yo tsi ra.

<sup>19</sup> Yoo cuñí yo tsi Nyoo tyin jihna ca maa ra cuñí tsi yo. <sup>20</sup> Tatun iin nyivi tan catyí ñi: “Yuhu cuñí yu tsi Nyoo”, tan ndasi cuñí ñi nyehé ñi tsi nyivi tahan ñi, nyivi vatya cuví ñi. Tyin tatun ndasi cuñí yo nyehé yo tsi nyivi tahan yo tsa tuhvá yo nyehé, ¿nácaa cua cuñí yo tsi Nyoo tsa ña cuví nyehé yo? Ña cua cuví. <sup>21</sup> Tava tyiñu Nyoo tsi yo tyin tun cuñí yo tsi ra, tacan cuñí tsi tsa cuñí tahan yo tsi yo.

#### Tatun ñi iñi yo tsinú iñi yo tsi Nyoo cuví jaha canaa yo tsi tsa ña vaha

**5** Tandihí nyivi tsa tsinú iñi tyin ra Jesús cuví ra Cristo ra quee nda gloria jahá Nyoo, juvin ñi cuví

sehe Nyoo. Tyin tatun cuñi yo tsi iin ra iyó sehe, cuñi ndihi yo tsi sehe ra. <sup>2</sup> Tatun cuñi yo tsi Nyoo tan javahá yo tsa caahán ra, cua cuñi ndihi yo tsi nyivi cuví sehe ra. <sup>3</sup> Tyin tsa cuñi yo tsi Nyoo yacan cuví tsa tyaá yahvi yo tsa tsahá cuenda ra tsi yo. Tan tandihi tsa tsahá cuenda ra tsi yo, ña yí javaha yo can. <sup>4</sup> Tyin tandihi yoo tsa cuví sehe Nyoo, jahá canaa yo tsi tsa ña vaha tsa iyó nu ñuhu ñayivi ñayivi ihya. Cuví jaha canaa yo can tyin tsinú iñi yo tsi Nyoo. <sup>5</sup> Maa ñi maa nyivi tsa tsinú iñi tyin ra Jesús cuví Sehe Nyoo, ñi ican cuví ñi cuví jahá canaa tsa ña vaha tsa iyó nu ñuhu ñayivi ihya.

#### Tatyí Ii Nyoo cuví tsandaa cuenda ra Jesús Sehe Nyoo

<sup>6</sup> Ra Jesucristo quítsi ra nu ñuhu ñayivi ihya. Tan tsa tsicoondutyá ra tsihin ndutyá tan tsa tsatj níñi ra janahá tyin Sehe Nyoo cuví tsi ra. Ñavin tsa tsicoondutyá ñi ra. tyin nda cuenda tsa tsatj níñi ra. Tan juven ñi maa Tatyí Ii Nyoo cuví tsandaa tyin tacan cuví. Tan Tatyí Ii Nyoo ña jandaví ñaha tsi. <sup>7</sup> Nda andivi iyó uñi taahan tsa cuví tsandaa: maa Nyoo Jutu yo tan ra Cristo ra cuví Tuhun tsa Caahán Nyoo, tan Tatyí Ii Nyoo. Tsa nduñi taahan ra naha, iin ñi cuví ra naha. <sup>8</sup> Tan nu ñuhu ñayivi ihya iyó tucu uñi tsandaa: Tatyí Ii Nyoo tsa iyó añima yo caahán tyin ra Jesús cuví Sehe Nyoo. Tsa tsinu uvi cuví nu tsicoondutyá ra Jesús, nu catyí Nyoo tyin juven ra Jesús cuví Sehe ra. Tan tsa tsinu uñi cuví nu tsatj níñi ra Jesús. Tan tsa nduñi taahan yacan nacatsí tahan caahán can. <sup>9</sup> Yoo naquihín yo tsa caahán ra cuví tsandaa nu ñuhu ñayivi ihya. Tan Nyoo cahnu ca cuví ra tan ñavin ca ra ñuu ñayivi ihya. Yacan cuenda taahán tsi naquihin yo tsa caahán ra, tan juven ñi maa ra catyí tyin Sehe ra cuví tsi ra Jesús. <sup>10</sup> Nyivi tsa tsinú iñi tyin Sehe Nyoo cuví tsi ra Jesús, tsitó ñi tsitsi añima ñi tyin nditsa. Nyivi tsa ña tsinú iñi tsi ra, jahá ñi tyin vatya Nyoo, tyin ña cuñi ñi tsinu iñi ñi tsa caahán Nyoo tsandaa cuenda Sehe ra. <sup>11</sup> Tan tyehen caahán Nyoo tsihin yo: Catyí ra tyin tsahá ra ñayivi nyito coo

yo tan ñihi yo itsi tatun tsinú iñi yo tyin ra Jesucristo cuví Sehe ra. <sup>12</sup> Nyivi iyó Sehe Nyoo añima, iyó ñi ñayivi nyito. Tan nyivi nduve Sehe Nyoo iyó añima, ña iyó ñi ñayivi nyito.

#### Nu ndihí cahán ra Juan tan nu tsahá ra tyiñu tsi nyivi

<sup>13</sup> Tyaá yu tuhun ihya tsa cuenda nyoocho tsa tsinú iñi tsi ra Jesús Sehe Nyoo, tyin tacan tan coto ndo tyin tsa iyó ndo ñayivi nyito tsa ña cua naa maa.

<sup>14</sup> Ndita iñi yo tsi Nyoo tyin tatun tsicán yo tsa tsicán yo tsi ra tan cuhva cuñi maa ra tsicán yo, tsitó yo tyin maa ra tsiñi ra tsa caahán yo. <sup>15</sup> Tan tsa tsitó yo tyin tsiñi ra tsa tsicán yo, tsitó tucu yo tyin tsa ñihí yo tsa tsicán yo tsi ra.

<sup>16</sup> Tatun iin nyivi tan nyehe yo tyin javahá ñi cuatyí tsa ña taahán tsi cúu ñi, taahán tsi cahán ndaahvi yo tsihin Nyoo tsa cuenda ñi na jaha ra tucahnu iñi tsi ñi tsa cuenda cuatyí can. Maa tyin tatun javahá ñi cuatyí tsa taahán tsi cúu ñi, ña ndacan tahvi yo tsa cuenda ñi.

<sup>17</sup> Tandihí tsa caquiñi tsa javahá nyivi, cuatyí cuví can. Tan iyó tucu cuatyí tsa ña jaha Nyoo tucahnu iñi.

<sup>18</sup> Tsitó yo tyin nyivi tsa nacacy tsaa jahá Nyoo, ña jañihí ca ñi javaha ñi cuatyí. Tyin jahá cuenda Sehe Nyoo tsi ñi tan ña tsahá ra tsa tñin nu ña vaha tsi ñi.

<sup>19</sup> Yoo tsa tsitó yo tyin cuenda Nyoo yihí yo. Tan tandihí nyivi tsa taahán iñi tsa iyó nu ñuhu ñayivi ihya, nu ña vaha ndacá ñaha tsi ñi.

<sup>20</sup> Tan tsitó tucu yo tyin quítsi Sehe Nyoo, tan tsahá ra tsa cutuñi iñi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo Sehe Nyoo. Tan iyó yo iin caa ñi tsihin ra. Tan juven maa ra cuví Nyoo tsa nditsa. Tan iyó ra ñayivi nyito tsa ña cua naa maa. <sup>21</sup> Nyoocho tsa cuví tumaa sehe yu, jahá cuenda ndo tsi ndo tsihin tsitoho tsa jacahnú nyivi, tyin ñavin Nyoo cuví can.

Tan na cuví tsi tacan ñi.

## II San Juan

### Nu caahán ra Juan tyin cuñí xaan ra tsi nyivi yihí cuenda Nyoo

**1** Yuhu ra tsahnu cuenda vehe ñuhu, jaquitsí yu carta ihya tsi yooho, cuhva yu, tan tsi sehe un tyin cuví un ñaha tsa nacatsí maa Nyoo. Cuñí xaan yu tsi ndo tsihin tsa ñi ñi añima yu. Tan cuñí ndihí tucu tandihí nyivi tsa tsitó tsa nditsa tsi ndo, yacan ñavin yuhu ñi cuñí tsi ndo. <sup>2</sup> Cuñí ndi tsi ndo tsa cuenda tsa nditsa tsa iyó tsitsi añima yo. Tan tacan ñi maa cua coo tsa nditsa can tsihin yo. <sup>3</sup> Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi ñi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñí xaan ra tsi yo.

<sup>4</sup> Sii xaan cuñí yu tyin tsitó yu tyin juhva sehe un vaha xaan nyicún ñi tsa nditsa, tumaa tavá tyiñu maa Nyoo Jutu yo tsi yo. <sup>5</sup> Hermana, caahán ndaahvi yu tsihin un vityin, na cuñí tahan yo tsi yo. Tyiñu ihya cuñí yu cahan yu tsihin un, yacan cuenda jaquitsí yu carta ihya tsi un. Ñavin tuhun tsa ndi tsahá Nyoo tsi yo cuví tsi. Tyin tsa iyó maa tsi nda nu quitsahá. <sup>6</sup> Tsa cuñí yo tsi Nyoo, yacan cuví tsa javahá yo tandihí tsa tavá tyiñu ra tsi yo. Tan yacan cuví tsa cahan Nyoo tyin javaha yo. Tan juvin tsi cuví tsa tsiñí ndo nda quivi jihna ñi: Coo ndo tsihin tsa cuñí ndo tsi Nyoo tan tsi nyivi.

### Nu tsahá cuenda ra Juan nácaa jaha cuenda yo tsi yo tsihin nyivi jandavi ñaha

<sup>7</sup> Caahán yu tyehen tsihin un tyin cuaha xaan nyivi jandavi ñaha iyó nanii cahnú nu ñuhu ñayivi. Catyí ñi

tyin ña nditsa tsa quitsí ra Jesucristo cacú ra tsihin cuñu ñuhu tan cuví ra ra ñayivi. Nyivi tsa caahán tacan, ñi jandavi ñaha cuví ñi. Tan ñi ndasi cuñi nyehé tsi ra Cristo cuví ñi. <sup>8</sup> Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñihi ca ndo tandihí tsa cua cuhva Nyoo tsi ndo.

<sup>9</sup> Tandihí nyivi tsa ña naquihín vaha tuhun tsa jacuahá ra Cristo tsi yo, tan jacuahá ñi inga ca tuhun, nduve Nyoo iyó tsihin ñi. Maa tyin nyivi naquihín vaha tuhun jacuahá ra Cristo tan tyaá yahvi ñi itsi, iyó Jutu yo Nyoo tan ra Jesucristo Sehe ra tsihin ñi. <sup>10</sup> Tatun tsaá nyivi yuvehe ndo, tan cuñí ñi jacuahá ñi tsi ndo tsa ña jacuahá ra Jesucristo, ña cuhva ndo cunyecu ñi yuvehe ndo tan ndi ña cuhva ndo nacumi tsi ñi. <sup>11</sup> Tyin tun cuhva yo nacumi tsi ñi, cuñí tsi catyi tyin javahá ndihí yo tsa ña vaha tsa javahá ñi.

### Nu ndihí cahan ra Juan

<sup>12</sup> Iyó cuaha ca tuhun cuñí yu cahan yu tsihin ndo. Maa tyin ña cuñí yu cahan yu can tsihin carta. Tyin tyaá yu cuhva tsa quitsí yu nu yucú ndo. Tyin tacan tan natuhun vaha ca maa yo, tan cusii ca ñi yo.

<sup>13</sup> Ihya vatsí nacumi tsi un jahá sehe ña tahan un tsa nacatsí ndihí maa Nyoo. Tan na cuví tsi tacan ñi.

## III San Juan

### Nu caahán ra Juan tyin vaha cuahán ra Gayo tsihin Nyoo

<sup>1</sup> Yooho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihya tsi un, tyin cuví un iin ra vaha iñi tsi yu tan tsa tsitó maa un tyin cuñi xaan yu tsi un tyin iin caa ñi nyicún yo tsa nditsa.

<sup>2</sup> Yañi, tsicán tahvi xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tsihin Nyoo, na nasoco ra tsi un tacan tan coo vaha un tan ña cuhvi un. <sup>3</sup> Yuhu sii xaan cuñi yu quivi quitsi juhva ra yañi yo naha ra nu nyí yu. Tan nacatyí tuhun ra naha tsihin yu tyin nditsa tsa iyó un cuhva jacuahá ra Cristo, tan nyicún un tsa nditsa. <sup>4</sup> Nduve inga ca tsa sii cuñi yu tumaa tsa sii cuñi yu tsa tsitó yu tyin sehe yu cuenda Nyoo nyicún ñi tsa nditsa.

<sup>5</sup> Yañi, cuñi xaan yu tsi un. Vaha xaan javahá un, tyin jatyinyeé un tsi ra yañi yo naha ra. Tsa vaha ca javahá un cuví tsa jatyinyeé un tsi ra yañi yo tsa quee inga ñuu. naha ra. <sup>6</sup> Tandihí ra naha, tan nacatyí tuhun ra naha nuu tandihí nyivi tsicá vehe ñuhu tyin cuñi xaan un tsi ra naha. Jaha tumañi iñi, jatyinyee ca tsi ra yañi yo naha ra, cuhva tsa tsiñi ñuhu tsi ra naha tumaa taahán iñi maa Nyoo. Tyin tacan tan jañihi ca ra naha cuhun ra naha cahan ra naha tuhun Nyoo. <sup>7</sup> Tyin tyiñu ra Jesucristo tsicá ra naha. Tan ña cuñi ra naha tsa jatyinyee nyivi tsa ña tsitó tsi Nyoo tsi ra naha. <sup>8</sup> Yacan cuenda maa yo taahán tsi jatyinyee tsi ra naha tsihin tsa tsiñi ñuhu tsi ra naha. Tan tacan tan cutahan yo tsihin ra naha nu caahán ra naha tuhun nditsa.

### Nu caahán ra Juan tyin ña vaha javahá ra Diótfefes

<sup>9</sup> Yuhu jacuhun yu iin carta tsi nyivi tsicá vehe ñuhu, maa tyin ra Diótfefes ña cuñi ra tyaa soho ra tsa

caahán yu tyin cuñi xaan maa ra cuvi ra ityi nuu tsihin nyivi. <sup>10</sup> Yacan cuenda tatun quitsi yu nu yucú ndo cua jandaa yu tyiñu tsihin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña naquihín vaha ra tsi ra hermano tatun tsaá ra naha. Tan tatun cuñi nyivi tsicá vehe ñuhu naquihín vaha ñi tsi ra hermano can naha ra, tyasí ra Diótfefes tsi ñi, tan tavá ra tsi ñi vehe ñuhu.

<sup>11</sup> Yooho yañi yu tsa cuñi xaan yu ña javaha un tsa ña vaha tumaa javahá ra can, maa tyin javaha tsa vaha. Tyin ra javahá tsa vaha, cuenda Nyoo cuví ra, tan ra javahá tsa ña vaha, ña tsitó ra tsi Nyoo.

### Nu caahán ra Juan tyin vaha xaan tsinú iñi ra Demetrio tsi Nyoo

<sup>12</sup> Tandihí nyivi tan vaha caahán ñi tuhun ra Demetrio. Tan vaha xaan tyaá yahvi ra tuhun Nyoo, tan juvin ñi maa tuhun Nyoo janahá tyin ra vaha cuví ra. Tan juvin ñi cuví tucu nyuhu tsandaa tsa cuenda ra, tan tsitó ndo tyin tsa nditsa caahán ndi.

### Nu ndihí cahan ra Juan

<sup>13</sup> Cuaha xaan tuhun cuñi yu jacoto yu tsi un, maa tyin ña cuñi yu jacoto yu can tsi un tsihin carta. <sup>14</sup> Tyin tyihí yu cuhva tsa quitsi yu nu iyó un tsa numi ñi, tyin tacan tan natuhun vaha ca maa yo. <sup>15</sup> Na coo tsa taxin añima un. Ra vaha iñi tsi yo tsa iyó ityi ihya jaquitsí xaan ra naha nacumi tsi un. Tan cuñi yu jaha un tumañi iñi cuhva un nacumi tsi tsa intuhun intuhun ra vaha iñi tsi yo.

# San Judas

## Nu tyaá ra Judas carta tsa cuenda nyivi cana Nyoo

**1** Yuhu ra Judas cuví yu musu ra Jesucristo. Tan cuví yu yañi ra Jacobo. Tyaá yu carta ihya tsa cuenda nyoooho tsa cana Nyoo Jutu yo. Cuñí xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo. <sup>2</sup> Na nyehe ndaahvi Nyoo tsi ndo. Tan na cutuñi ca iñi ndo nácaa tsa cuñí ra tsi yo. Tan na naquihin ca ndo tsa taxin tsahá ra tsi yo coo añima ndo.

## Nu caahán ra Judas tuhun nyivi tsa jacuahá tsa ña ndit-sa

(2 Pedro 2.1-17)

<sup>3</sup> Tyihí yu kuhva tyaa yu iin carta tsa cuenda ndo yañi, tyin cuñí yu cahan yu tsihin ndo nácaa jacacú Nyoo tsi yo. Maa tyin vityin tyaá yu nu carta ihya tan jañiñi yu tsi ndo na ña kuhva ndo tsa sama kuhva tsinú iñi ndo tsa vaha tsa tsahá Nyoo tsi yo tsa cuví yo nyivi yihí cuenda ra. Tyin iin tsaha ñi janahá ra nácaa tsinu iñi yo tsi ra tan ña cua nasama ra itsi. <sup>4</sup> Yacan cuenda jaha cuenda vaha ndo tsi ndo tyin quihví xeehe juhva ra jandaví ñaha naha ra. Catyí ra naha tyin tsa yahá jahá Nyoo tucahnu iñi tsi yo, tan yacan cuenda cuví ñi javaha maa yo tsa cuñí yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyí Nyoo tahán tsanaha tyin ra tsa javahá tacan, cua cunaa ra naha.

<sup>5</sup> Vasu ndi maa tsa tsitó ndo tsa javahá Nyoo tahán tsanaha, maa tyin cuñí yu janducuhun iñi yu tsi ndo tyin Jutu Mañi yo tavá ra tsi nyivi Israel ñuhu Egipto, jacacú ra tsi ñi ndaha nyivi Egipto can. Maa tyin tsa yahá can janaa ra tsi tandíhi maa ñi tsa ña tsinu iñi tsi ra. <sup>6</sup> Tan juvin ñi tacan javahá tucu Nyoo tsihin ángel tsa ña tyaá yahvi tsi ra. Tsahá ra tyiñu tsi nahnu, maa tyin nacoó nahnu can. Tan yacan cuenda tsahñi ra tsi nahnu tsihin cadena nu naa tan jahá cuenda ra tsi nahnu nda tahan tsi quivi cutuñi nyivi. <sup>7</sup> Tacan tucu nyivi ñuu Sodoma tan ñuu Gomorra, tan nyivi ñuu nyihi tsa tsicoó ñicanduvi ñuu can. Janaa Nyoo tsi ñi tsa cuenda tsa caquiñi tsa javahá ñi. Tyin rayí can naha ra tsicoó ra naha tsihin ñaha. Tan ñiñaha tsicoó ñi tsihin iin rayí tan inga ra. Tan cuaha ca tsa caquiñi javahá ñi tyin rayí tsicoó ra naha tsihin ra ndusihi. Tan tsa cuenda yacan, nyehe ñi tundoho nu cayú ñi quivi tsahmí Nyoo ñuu ñi. Tan yacan janahá tsi yo tyin nyivi javahá tsa caquiñi, cua cayú ñi tsihin ñuhu tsa ña cua ndahva maa.

<sup>8</sup> Vasu ndi maa tacan cuví, vityin ndi iyó ra jandaví ñaha naha ra. Cuñí ra naha tyin vaha javahá ra naha.

Maa tyin jatíví ra naha cuñu ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi siqui ra iyó ca tunyee iñi tsi tan ñavin ca maa ra naha. <sup>9</sup> Tan ndi ángel Miguel tsa cahnu cuví nuu Nyoo, ña cana iñi ra javahá ra tacan. Tyin quivi cañi tahan ra tsihin nu ña vaha tsa cuenda cuñu ñuhu ra Moisés, ña cana iñi ra cahán ra ndavaha ñi siqui nu. Intuhun ñi tsa catyí ra tsihin nu: “Na tatsi tuñi Jutu Mañi yo tsi un” catyí ángel Miguel can tsihin nu ña vaha. <sup>10</sup> Maa tyin ra tsa jatyañú tsi ndo can naha ra, caahán ra naha ndavaha ñi tyin ña tsitó ra naha. Tan javahá ra naha tumaa javahá quiti, tyin quiti ña cutuñi iñi ti. Ica ñi maa ti naha ti tsa cuñi cuñu ñuhu ti naha ti. Tan tacan tucu ra can naha ra. Tsihin tsa caquiñi tsa javahá ra naha jatíví ra naha juvin ñi tsi maa ra naha.

<sup>11</sup> ¡Ndahvi ra ndaahvi can naha ra! tyin javahá ra naha tumaa javahá ra Caín. Tan tsa cuenda tsa cuñí ra naha jaha canaa ra naha xuhun, nacoó ra naha ityi Nyoo tumaa javahá ra Balaam. Tan cua cunaa ra naha tumaa cunaa ra Coré, tyin tsihi ra can tsa cuenda tsa ña tyaá yahvi ra tsa cahán ra cuví ityi nuu tsihin ra. <sup>12</sup> Ra tsa jatyañú tsi ndo naha ra tsahá ra naha ticanuu tsi ndo nu ndu iin ndo. Tyin tsatsí ra naha tan tsihi ra naha tsihin tsa sií cuñí ra naha, tan ña cahán nuu ra naha tsa ña jahá ra naha tsa ñayivi tsi Nyoo. Cuví ra naha tumaa ra tsa ña jahá cuenda vaha mbee, tyin juvin ñi tsi maa ra naha jahá cuenda ra naha. Cuví ra naha tumaa vico tsa yihí ityi siqui tun tsa cua cuun savi tan cuahán tsi tsihin tatyí tan ña cuun savi. Cuví ra naha tumaa yutun tsa ña tsahá tsiti. Tyin yutun tsa ña tsahá tsiti cuví tun tumaa yutun tsa tsa tsihi vasu ndi nyitó tun. Tan tumaa tsa uvi tsaha cua cúu tun tyin cua tyahnya cuii yoho tun. <sup>13</sup> Tan juvin ñi cuví tucu ra can naha ra tumaa ndutya ñuhu xaan tsa nacoó tiñuu nu nyiti tyin tsahá ra naha ticanuu. Tan cuví tucu ra naha tumaa tiñuu tsa iyó andivi tsa tsinaa. Tsa nyaá maa tsa cua ndoo cuii ra naha nu naa. Tacan ñi maa tsa cua tahan ra naha.

<sup>14</sup> Tuhun ra can naha ra cahán ra Enoc tahán tsanaha. Ra Enoc tsa tsinu utsa tsa cuví tata ra Adán. Cahán ra tuhun tsa tsahá maa Nyoo tsi ra, tan catyí ra: “Nyehe yu nu vatsí Jutu Mañi yo tan cuenda mil ángel ra vatsí tsihin ra <sup>15</sup> tyin vatsí ra vatsí tatsí tuñi ra tsi nyivi caquiñi tsa cuenda tandíhi tsa ña vaha tsa javahá ñi, tan nyivi caahán ndavaha ñi siqui ra”, catyí ra Enoc tahán tsanaha. <sup>16</sup> Ra tsa jatyañú tsi ndo naha ra, ña ndoó ra naha vaha tsihin tsa tsahá Nyoo tsi ra naha. Caahán ra naha tan catyí ra naha: “Yí xaan, cahnu xaan tundoho nyehé yo.” Javahá ra naha tsa cuñi cuñu

ñuhu ra naha. Yaa xaan caahán ra naha. Tan tsa caahán ra naha tsa vaha tsihin nyivi, javahá ra naha can tyin cuñí ra naha tsa cahan nyivi tyin vaha xaan iñi ra naha.

#### Nu tsahá cuenda ra Judas tsi nyivi yihé cuenda Nyoo

<sup>17</sup> Yañi, ña tyaa yahvi ndo tsi ra can naha ra. Maa tyin nducuhun iñi ndo tuhun tsa cahan ra tsa tavā tyiñu Jutu Mañi yo Jesucristo, <sup>18</sup> tyin catyí ra naha tyehen: “Nu cua ndihí quivi cua coo ra vacu nducu tuhun Nyoo. Cua coo ra naha tsihin tsa ña vaha tsa tsicá iñi ra naha.” <sup>19</sup> Ra tsa cahan ra naha tuhun cuví ra cuñí jasiñ tsi yo. Tyin tyaá yahvi ra naha cuhva cuñí cuñu ñuhu ra naha tan nduve Tatyí Ii Nyoo iyó tsihin ra naha.

<sup>20</sup> Maa tyin nyooho yañi, jandu iin ndo iñi ndo tsihin tsa tsinú iñi ndo tsi ra Cristo. Ndācan tahvi ndo tsi ra tsihin tunyee iñi Tatyí Ii maa ra. <sup>21</sup> Ndūcu ndo cuhva cunyanaa vaha ca ndo tsi Nyoo, tyin tacan tan coto ndo tyin cuñí xaan ra tsi yo. Tan cūatu ndo quivi cuhun yo coo cuíi yo tsihin ra. Tyin yacan cuví tsa cua cuhva

Jutu Mañi yo Jesucristo tsi yo tsa cuenda tsa cundaahví iñi ra tsi yo.

<sup>22</sup> Cahan yuhu ndo tsihin nyivi tsa ña tsinú iñi, na tsinu iñi ñi. <sup>23</sup> Ndūcu ndo cuhva cacu ñi tsa cua cayu. Cūndaahvi tucu iñi ndo nyehe ndo tsi inga ñi tsa javahá tsa caquiñi. Maa tyin jaha ndo cuenda tsi ndo tsa ña cua javaha ndo tsa caquiñi tsa javahá ñi, tyin nda cuenda jahma nditsí ñi tan ña vaha can.

#### Nu ndihí cahan ra Judas tan jacahnu ra tsi Nyoo

<sup>24</sup> Intuhun ñi Nyoo iyó, tan iyó xaan tsa tsifiñi tuñi tsi ra. Ra ican cuví ra tsa jacacú tsi yo. Tan iyó xaan tunyee iñi tsi ra tsa jahá cuenda ra tsi yo tsa ña coo ca cuatyí yo quivi cua cuhun yo tsihin ra nu cahnu cuví nu nyaá ra. Tan siñ xaan cua cuñi yo.

Na coto yo tsa cahnu xaan cuví ra. Na jacahnu yo tsi intuhun ñi maa ra tyin cahnu xaan cuví ra. Tan iyó xaan tunyee iñi tsi ra. Na cundaca ñaha intuhun ñi maa ra tandihí. Tyin nda nu quitsí tsi, tan vityin, juven ra ndacá ñaha tan tacan ñi maa cua cundaca ñaha ra.

Tan na cuvi tsi tacan ñi.

# El Apocalipsis

## Tsa nyehe ra Juan

**1** Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuy- atyin cuii javaha ra tsa cua javaha ra. Tan jaquitsi ra Jesucristo iin ángel ra tan tsaha cuenda ra tandihí tsa cua cuvi tsi yuhu, ra Juan, ra cuví musu ra. <sup>2</sup> Tan caahán yu tandihí tsa nyehe yu. Tan cuví yu tsandaa tsa cuenda tuhun Nyoo tsa jacoto ra Jesucristo tsi yu.

<sup>3</sup> Sii xaan cuví tsi nyivi tsa cua cahvi tuhun Nyoo tsa nyaá nu tutu ihya tan cuñí ñi tuhun caahán tsi tan tyaa yahvi ñi itsi, tyin tandihí tuhun tsa nyaá nu tutu ihya, tsa yatin cuii cundaa tsi.

## Nu jacuhun ra Juan tutu tsi nyivi tsa utsa taahan vehe ñuhu

<sup>4</sup> Yuhu ra Juan jaquitsí yu tutu ihya tsi nyoocho, nyivi tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí ii tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juvin ra cuví Nyoo nda tsanaha, tan vityin, tan juvin ra cua quitsi. <sup>5</sup> Tan naquihin tucu ndo tsa vaha jahá ra Jesucristo. Tyin ra ican cuví ra tsandaa tan tsa nditsa. Juvin ra cuví ra tsa nandoto tsa jihna ñi. Tan ndacá ñaha ra tsi ra cuví rey tsa iyó nu ñuhu ñayivi ihya naha ra. Tan cuñí xaan ra tsi yo, tan nacatyá ra tsi yo tsihin ñiñi ra. <sup>6</sup> Tan tsaha ra tsa cuví yo rey tan cuví yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundihí maa tsa ndacá ñaha ra! Tan nacuvi tsi tacan.

<sup>7</sup> ¡Nyehe jihna ndo! ¡Tsa vatsí ra Cristo nu vico andivi! Tandihí nyivi cua nyehe ñi tsi ra nda cuando nyivi tsa jañicueehé tsi ra tan cua nyehe ñi tsi ra. Tan tandihí ñi cua vacu xaan ñi tyin cua nayuhvi ñi nyehe ñi tsi ra inga tsaha tyin juvin ñi maa ra cuví. Nditsa, tacan cua cuvi, tan na cuvi tsi tacan ñi.

<sup>8</sup> Catyí Jutu Mañi yo:

—Yuhu cuví ra jihna ñi, tan yuhu cuví ra cua coo nu cua ndihí quivi, tumaa letra A tan Z —catyí Jutu Mañi yo, ra iyó tandihí tunyee iñi tsi. Tacan ñi iyó maa ra: Juvin ra cuví Nyoo nda tsanaha, tan vityin, tan juvin ra cua quitsi.

## Nu nyehe ra Juan tsa iyo caá ra Cristo

<sup>9</sup> Yuhu ra Juan cuví yu yañi ndo. Tan iin caa ñi nyehé yu tundoho tsihin ndo, tan ndacá ñaha Nyoo tsi yo, tan iin caa ñi cunyee xaan iñi yo náa cuví tsi yo tyin jatyinyeé ra Jesucristo tsi yo. Nyíi yu vehe caa ñuhu

Patmos tsa canyí mahñu ndutya ñuhu. Nyíi yu vehe caa tsa cuenda tsa caahán yu tuhun Nyoo tsa jacuaha ra Jesucristo. <sup>10</sup> Tan iin tumingu quivi jacahnú yo tsi Jutu Mañi yo, tuví iñi yu tsa nyaá Tatyí Ii Nyoo tsihin yu. Tan tsiñi yu iin ndusu ñihi xaan ityi tsata yu, tumaa ndusu trompeta. <sup>11</sup> Tan catyí tsi tsihin yu tyehen:

—Yoocho, Juan. Yuhu cuví ra jihna ñi, tan yuhu cua coo nu cua ndihí quivi. Tyaa nu iin tutu tandihí tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe ñuhu ñuu Pérgamo, vehe ñuhu ñuu Tiatira, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyí ndusu can tsihin yu.

<sup>12</sup> Tacan tan nyico coo yu tyin cuñí yu nyehe yu yóo caahán tsihin yu. Tan nyehe yu utsa taahan candileru xuhun cuaan. <sup>13</sup> Tan mahñu tsa utsa taahan candileru can, nyehe yu nyaá iin ra tsa caá tumaa caá rayi ñuhu ñayivi ihya. Nditsí ra jahma cañi nda nu tsaha ra. Tan yihí iin cinturón xuhun cuaan yiqui nyica ra. <sup>14</sup> Tan ixi jiñi ra cuitsin tsi, tumaa cuitsin ixi mbee, tan tumaa cuitsin catyí. Tan tinuu ra caá tsi tumaa caá nu cayú ñuhu. <sup>15</sup> Tan xiñú xaan tsaha ra tumaa xiñú iin caa tsa nañi bronce tsa tuhvá yo nacuhvá tsa yaha quita can tsitsi ono nu cayú ñuhu. Tan ñihi xaan ndusu ra tumaa ndusu ndutya cuaha. <sup>16</sup> Tan ndaha cuaha ra nyecú utsa taahan tiñuu andivi. Tan tuhun quitá yuhu ra caá tsi tumaa caá mityi tsa xaan nduvi tsiyo yuhu. Tan nuu ra caá tsi tumaa caá tun ñihi xaan nyehé ñicanyii.

<sup>17</sup> Cuhva tsa nyehe yu tsi ra, nduva yu tsaha ra tumaa tsa tsihi yu. Maa tyin tyiso ra ndaha cuaha ra siqui yu, tan catyí ra tsihin yu:

—Ña nayuhvi un. Yuhu cuví ra jihna ñi, tan yuhu cua coo nu cua ndihí quivi. <sup>18</sup> Yuhu nyito yu vasu tsihi yu, maa tyin vityin ña cua cundihí maa tsa iyó yu. Tan iyó ndatu tsi yu tsa catyí yu ama taahán tsi cúu nyivi, tan tatun cuhun ñi anyaya o ña cuhun ñi. <sup>19</sup> Tyaa nu libru tandihí tsa nyehe un, tan tsa iyó vityin, tan tsa cua coo nu cuahán ca tsi. <sup>20</sup> Tuhun ihya cuví tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñí tsi catyí tsa utsa vehe ñuhu.

Nu quitsahā tsahá cuenda ra Cristo tsi nyivi tsicá tsa utsa vehe ñuhu: Tsa tsahā cuenda ra tsi nyivi tsicá vehe ñuhu ñuu Éfeso

2 'Jācuhun tutu tsi ra caahán tuhun yu tsihin nyivi tsicá vehe ñuhu ñuu Éfeso. Tan cātyi tsihin ra tyehen: "Tyehen catyí ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan: <sup>2</sup> Yuhu tsitó yu tandihí tsa javahá ndo. Tan nyehé yu tyin ñihi xaan jahá tyiñu ndo tan cunyeé xaan iñi ndo. Tan tsitó yu tyin ña cuñí ndo nyehé ndo tsi nyivi caquiñi. Tan tsitó yu tyin tuhvá ndo nducu cuhva tsi ra tsa catyí tyin ra tsicá tyiñu Nyoo cuví ra naha, tan tsitō ndo tyin ña nditsa ra naha. <sup>3</sup> Cunyeé xaan iñi ndo. Tan nyehé xaan ndo tundoho tan jahá tyiñu xaan ndo tsa cuenda yu tsihin tsa ña ndu uvi iñi ndo. <sup>4</sup> Maa tyin iyó iin tsa ña vaha javahá ndo, tyin ña cuñí ca ndo tsi yu vi tyin tumaa tsa cuñí ndo tsi yu quivi jihna ñi. <sup>5</sup> Yacan cuenda nducuhun iñi ndo numaa nda nduvā ndo. Tan nāsama ndo cuhva iyó ndo, tan javaha nyico ndo tumaa javahā ndo quivi naquihīn cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatun ndu uvi iñi ndo cuatyí ndo, ña cua quitsi yu quinyaa yu itsi. <sup>6</sup> Cuaha tsa ña vaha javahá ndo, maa tyin iyó tucu tsa vaha javahá ndo, tyin ña cuñí ndo nyehe ndo tsa caquiñi tsa javahá nyivi yihí cuenda ra Nicolás. Tacan tucu yuhu ña taahán iñi yu nyehé yu yacan. <sup>7</sup> Nyooho tsa iyó soho, tyāa soho ndo tsa caahán Tatyí Ii Nyoo tsihin nyivi tsicá vehe ñuhu. Catyí ra tyehen: Tatun cuvi jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito añima ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó."

Tsa tsahā cuenda ra Jesucristo tsi nyivi tsicá vehe ñuhu ñuu Esmirna

<sup>8</sup> 'Jācuhun ndihí tutu tsi ra caahán tuhun yu tsihin nyivi tsicá vehe ñuhu ñuu Esmirna, tan cātyi tsihin ra tyehen: "Tyehen catyí ra cuví tsa jihna ñi, ra cua coo nu cua ndihí quivi, ra tsa tsihí tan nandotō: <sup>9</sup> Yuhu nyehé yu tandihí tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyivi Israel ndavaha ñi siquí ndo. Tan ndi ñavin ñi Israel cuví ñi tsitsi añima ñi tyin cuenda nu ña vaha, nu nañi Satanás, cuví ñi. <sup>10</sup> Maa tyin ña nāyuhvi ndo tsa nyehé ndo tundoho. Tyin nu ña vaha cua tyihí nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quivi cua nyehe ndo tundoho. Maa tyin cūanyicun vaha ndo tsi Nyoo nda cuanda cúu ndo. Tan yuhu cua cuhva yu ñayivi coo ndo tsihin Nyoo. <sup>11</sup> Nyooho tsa iyó soho, tyāa soho ndo tsa caahán Tatyí Ii Nyoo tsihin nyivi tsicá vehe ñuhu. Catyí ra tyehen: Tatun cuvi jaha canaa ndo tsi nu ña va-

ha, ña cua cuhun ndo anyaya, quivi cúu nyivi tsa tsinu uvi tsaha."

Tsa tsahā cuenda ra Jesucristo tsi nyivi tsicá vehe ñuhu ñuu Pérgamo

<sup>12</sup> 'Jācuhun tucu tutu tsi ra caahán tuhun yu tsihin nyivi tsicá vehe ñuhu ñuu Pérgamo. Tan cātyi tsihin ra tyehen: "Tyehen catyí ra tsa ndahá mityi tsa xaan nduvi tsiyo yuhu: <sup>13</sup> Yuhu nyehé yu tandihí tsa javahá ndo. Tan tsitó yu tyin vaha javahá ndo tyin ña jandihí ndo tsa tsinú iñi ndo tsi yu. Tan tacan ñi tsinú maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyivi tsi ra Antipas, ra tsa cuvi tsandaa cuenda yu. <sup>14</sup> Maa tyin quituví juhva tsa javahá ndo nuu yu: Tyin ñuu Pérgamo nu yucú ndo ihya, yihí ra tsa ña cuñí jandihí cuhva tsa javahā ra Balaam, ra tsicoo tsanaha. Tyin ra Balaam natyuhū ra tsi ra Balac, na jacatsi ra cuñu quiti tsa jamañi nyivi nu tsi-toho tsi nyivi Israel. Tan natyuhū ra tsi ra na catyí ra tsihin ñi tyin ñavin cuatyí cuví tun iin ñaha tan iyó ña tsihin iin rayñi vasu ña tindahā ñi, tan tacan tucu ñi rayñi. <sup>15</sup> Tan juven ñi iyó tucu juhva nyivi tsa ña cuñí naco tsa jacuahá ra yihí cuenda ra Nicolás. Tan yuhu ndasi cuñí yu nyehe yu tsa jacuahá ra can naha ra. <sup>16</sup> Yacan cuenda janumi ndo nāsama ndo cuhva iyó ndo. Tyin tatun ña nasama ndo cuhva iyó ndo, cua quitsi yu nu yucú ndo tsa numi ñi tan cua cañi tahan yu tsihin nyivi tsa javahá tacan tsihin mityi [tsa cuví tuhun] quitá yuhu yu. <sup>17</sup> Nyooho tsa iyó soho, tyāa soho ndo tsa caahán Tatyí Ii Nyoo tsihin nyivi tsicá vehe ñuhu: Tatun cuvi jaha canaa ndo tsi nu ña vaha, cua cuhva yu tsa catsi ndo paan tsa cuví maná tsa nyíi xeehe. Tan cua cuhva yu iin yuu cuitsin tsi ndo. Tan nu yuu can nyaá iin sivi tsa tsa yoñi tsitó; intuhun ñi nyivi tsa cua naquihin yuu can cua coto sivi can."

Tsa tsahā cuenda ra Jesucristo tsi nyivi tsicá vehe ñuhu ñuu Tiatira

<sup>18</sup> 'Jācuhun tucu tutu tsi ra caahán tuhun yu tsihin nyivi tsicá vehe ñuhu ñuu Tiatira. Tan cātyi tsihin ra tyehen: "Tyehen catyí Sehe Nyoo, ra tsa caá tinuu tumaa caá nu cayú ñuhū. Tan tsaha ra caá tumaa caá caa bronce tsa xiñu xaan. <sup>19</sup> Yuhu nyehé yu tandihí tsa javahá ndo. Tan tsitó yu tsa cuñí xaan ndo tsi nyivi. Tan tsitó yu tyin tsinú xaan iñi ndo tsi yu, tan jatyinyeé ndo tsi nyivi, tan cunyeé xaan iñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quitsi tsi. <sup>20</sup> Maa tyin iyó juhva tsa cuñí yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá tumaa javahā] ña Jezabel [tsa tsicoo tahañ tsanaha]. Ña ican jacuaha tsi ndo, catyí ña tyin Nyoo tsahá tuhun caahán ña, maa tyin jandaví ñaha ña tsi nyivi tsa jahá tyiñu tyiñu yu tsihin tuhun jacuahá ña. Tyin catyí ña tyin ñavin cuatyí cuví tsa coo iin rayñi tsihin ñaha o iin ñaha tsihin rayñi tun ña tindahā ñi. Tan jacuahá ña tyin cuví catsi ñi nyayu tsa jamañi nyivi tsi sitoho. <sup>21</sup> Yuhu tsa ndatū xaan yu tsa nasama ña cuh-



va iyó ña, maa tyin ña cuñí ña javaha ña can. Ña cuñí ña jandihí ña tsa tsicá nuu ña tsihin rayii. <sup>22</sup> Tan vityin cua quihin cuehe tsi ña tan ña cua cuvi nduvita ña. Tan nyivi javahá tsa caquiñi tsihin ña, cua cuhva yu tundo-ho nyehe ñi tatun ña ndu uvi iñi ñi tsa javahá ñi. <sup>23</sup> Tan cua cahñi yu sehe ña. Tacan tan cua coto tandihí nyivi tsicá vehe ñuhu, tyin yuhu tsitó yu tandihí tsa tsicá iñi ñi, tan tandihí tsa iyó añima ñi. Tan tsa intuhun intuhun nyooho cua cuhva yu tsa taahán tsi tsi ndo tsa cuenda tsa javahá ndo. <sup>24</sup> Maa tyin tandihí ca nyooho tsa iyó ñuu Tiatira, nyooho tsa ña naquihin cuenda cuhva jacuahá ña, ndi ña javahá ndo tsa catyí nyivi tyin cuví tuhun xeehe cuenda nu ña vaha, ña tyaá yu inga tsa yí síqui ndo. <sup>25</sup> Maa tyin jañihi ndo javaha ndo tsa vaha nda cuanda quitsi nyico yu. <sup>26</sup> Tan nyooho tsa jaha canaa tsi nu ña vaha, tan javahá ndo cuhva cuñí yu nda cuanda nu ndihí tuhun, cua cuhva yu ndatu tsi ndo tsa cundaca ñaha ndo tsi nyivi iyó nu ñuhu ñayivi ihya. <sup>27</sup> Tumaa tsahá Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatun tsa cuví caa cua tatsi tuñi ndo tsi nyivi. Tan cua tahvi cuatyí ndo tsi ñi tumaa tsa tahví cuatyí yo quisi. <sup>28</sup> Tan cua cuhva yu tiñuu cahnu tsa caná tsa naa ca coo tsihin ndo. <sup>29</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

**Tsa tsahá cuenda ra Jesucristo tsi nyivi tsicá vehe ñuhu ñuu Sardis**

**3** Jācuhun tucu tutu tsi ra caahán tuhun yu tsihin nyivi tsicá vehe ñuhu ñuu Sardis. Tan catyí tsihin ra tyehen: “Tyehen catyí ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihí tsa javahá ndo. Tan vasu catyí nyivi tyin nyito ndo, maa tyin tsa cuenda yuhu, tsa tsihi ndo. <sup>2</sup> Jaha cuenda vaha ndo tsa vaha tsa iyó luxu ca tsi ndo. Tyin coto ndihí ndihí tuhun yu nu yucú ndo. Nyehé yu tyin nuu Nyoo ña vaha maa tsa javahá ndo. <sup>3</sup> Ndūcuhun iñi ndo tsa vaha tsa cutuhvā ndo. Cūanyicun ndo can, tan ñasama ndo cuhva iyó ndo. Tyin tun ña naquihin vaha ndo tsa vaha, sana iñi ndo tan cua quitsi yu nu yucú ndo, tumaa iin ñasuhu. <sup>4</sup> Maa tyin iyó juhva nyooho, nyivi Sardis, tsa ña janyahyū jahma; ña javahá ndo tsa caquiñi cuví can. Tan juvin nyooho cua cunditsi jahma cuitsin tsihin yu, tan cua caca ndo tsihin yu, tyin tacan taahán tsi tsi ndo. <sup>5</sup> Tan nyooho tsa cua cuvi jaha canaa tsi nu ña vaha, cua cunditsi ndo jahma cuitsin tsihin yu. Tan ña cua janaa yu sivi ndo nu libru nu nyecú sivi tandihí nyivi cua coo nyito tsihin Nyoo. Tan cua catyí yu tsihin Jutu yu, tan ángel ra tyin nacotó yu tsi ndo. <sup>6</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

**Tsa tsahá cuenda ra Jesucristo tsi nyivi tsicá vehe ñuhu ñuu Filadelfia**

<sup>7</sup>Jācuhun tucu tutu tsi ra caahán tuhun yu tsihin nyivi tsicá vehe ñuhu ñuu Filadelfia. Tan catyí tsihin ra tyehen: “Tyehen catyí ra ii, ra nditsa, ra yihí ndaha nda-

ha tucu ra rey David, ra tsa nuñá yuvehe tan ndi intuhun nyivi tan ña cuvi nacasi. Tan tatun nacasi ra, ndi intuhun ñi tan ña cuvi nuña ñi. Tyehen catyí ra: <sup>8</sup>Yuhu nyehé yu tandihí tsa javahá ndo. Tan nuña yu iin yuvehe tsa cuenda ndo tan yoñi cuví nacasi itsi, [tyin tsahá yu tsa cahan ndo tuhun Nyoo tsihin nyivi, tan yoñi cuví casi tsi ndo]. Tan iyó luxu tunyee iñi tsi ndo, tan tyaá yahvi ndo tsa caahán yu, tan ña catyí ndo tyin ña nacotó ndo tsi yu. <sup>9</sup> Tan nyivi yihí cuenda nu ña vaha, ñi vatya, ñi catyí tyin nyivi Israel cuví ñi, maa tyin ñavin nyivi Israel cuví ñi tsitsi añima ñi; cua jacuiñi tsiti yu tsi ñi nuu ndo, tyin tacan tan coto ñi tyin yuhu cuñí yu tsi ndo. <sup>10</sup> Tyin cunyeé xaan iñi ndo tumaa catyí yu tsihin ndo tyin cunyeé iñi ndo. Tan yacan cuenda cua jaha cuenda yu tsi ndo tan nduve náa cua tahan ndo quivi cua jaquitsi yu tundo-ho cahnu síqui tandihí nyivi, tyin cua nducu cuhva yu tsi tandihí ñi iyó nu ñuhu ñayivi. <sup>11</sup> Yatyí cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyivi tsa vaha tsa cua ñihi ndo. <sup>12</sup> Nyooho tsa cua cuvi jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu sivi Nyoo yu tsi ndo, tan sivi ñuu Nyoo yu, ñuu Jerusalén tsaa tsa cua quee nda andivi, tan juvin ñi cua tyaa tucu yu sivi tsaa yu tsi ndo. <sup>13</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

**Tsa tsahá cuenda ra Jesucristo tsi nyivi tsicá vehe ñuhu ñuu Laodicea**

<sup>14</sup>Jācuhun tucu tutu tsi ra caahán tuhun yu tsihin nyivi tsicá vehe ñuhu ñuu Laodicea. Tan catyí tsihin ra tyehen: “Tyehen catyí ra tsa nditsa, ra jandaá tsa caahán ra tyin javaha ra, tan tsihin ra javahá Nyoo tandihí maa tsa iyó: <sup>15</sup>Yuhu nyehé yu tandihí tsa javahá ndo. Tan cuví ndo tumaa ndutya tsa ña vitsin tan ndi ña ihñi, tyin ndi ña tsinú vaha iñi ndo tsi yu, tan ndi ña jandihí tucu ndo tsa tsinú iñi ndo tsi yu. Vaha ca tsa tsinu vaha iñi ndo tuhun caahán yu, o jandihí cuii ndo tsa tsinú iñi ndo tsi yu. <sup>16</sup> Maa tyin tsa cuenda tsa cuví ndo tumaa ndutya vixin ñi ndi ña vitsin tan ndi ña ihñi ndo, cua ndutsan yu tsi ndo. <sup>17</sup> Tyin nyooho catyí ndo tyehen: ‘Yuhu cuca xaan yu, vaha xaan iyó yu. Nduve náa cumañi tsi yu,’ catyí ndo. ¿A ña jahá ndo cuenda tyin cuiihya cuñí ndo nyehé ndo tundo-ho tsitsi añima ndo, ndaahvi ndo, cuaa ndo, tan tandihí ndo tsitsi añima ndo? <sup>18</sup> Yacan cuenda tsahá cuenda yu tsi ndo tyin tsi maa yu jāta ndo xuhun cuaan tsa cayū tan naq tsa nyahyu tsi, tyin tacan tan nducuca ndo. Tan jāta ndo jahma cuitsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandihí ndo. Tan jāta ndo numeri quihví tinuu ndo tyin tacan tan cuví nyehe ndo. <sup>19</sup> Yuhu tsahá cuenda yu tan tatsí tuñi yu tsi tandihí nyivi tsa cuñí xaan yu. Yacan cuenda catyí yu tsihin ndo: Jāndu iin ndo iñi ndo tsihin tsa ñi iñi añima ndo tan jāvaha ndo tsa vaha. <sup>20</sup> ¡Nyehe jihna! Yuhu nyaá yu yuvehe tan cañí ndaha yu. Nyivi tsa cua cuñí

ndusu yu, tan nuña ñi yuvehe, cua quihvi yu tan cuxiñi yu tsihin ñi. Tan maa ñi cuxiñi ñi tsihin yu. <sup>21</sup> Cua cuhva yu tsa cunyeu ndo tsihin yu nu ndacá ñaha yu tatun cuví jaha canaa ndo tsi nu ña vaha. Tumaa tsa jahá canaa yu tsi nu, tan vityin nyaá yu tsihin Jutu yu nu ndacá ñaha ra. <sup>22</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu” —catyí ra Jesucristo.

### Tsa cuví nda gloria

**4** Tsa yahá can, tan nyehe yu ticoho iin yuvehe nda andivi. Tan tsiñi yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Ndāa nyehe tan janaha yu tsi un tsa cua cuvi nu cuahán ca tsi —catyí ndusu can tsihin yu.

<sup>2</sup> Tan juvin ñi cuhva can tan tuví iñi yu tsa nyaá Tatyí Ii Nyoo tsihin yu. Tan nyehe yu nyaá iin tyayu nda gloria. Tan nu tyayu can nyaá iin ra nyaá. <sup>3</sup> Tan nuu ra tsa nyaá nu tyayu can, xiñu tsi tumaa xiñu yuu vaha tsa nañi jaspe tan tumaa xiñu yuu cornalina. Tan taniñ cahnu yuhu tyayu can tsinú nduvi coo cuiya, tan xiñu ti tumaa xiñu yuu vaha tsa nañi esmeralda. <sup>4</sup> Tan nyehe yu nyecú oco cumi ca tyayu nu nyecú oco cumi ra tsahnu naha ra, tsiny nduvi tyayu can nu nyaá tyayu tsa nyaá mahñu can. Nditsi ra naha jahma cuitsin. Tan yihí corona xuhun cuaan jiñi intuhun intuhun ra naha. <sup>5</sup> Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhū ityi nuu tyayu can, tan tsa utsa ñuhū can cuví tsa utsa tatyí ii Nyoo. <sup>6</sup> Tan ityi nuu tyayu can iyó tucu iin tsa caá tumaa caá ndutya ñuhu, tan xiñu xaan can tumaa xiñu yutyi.

Ñi canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can. <sup>7</sup> Iin tsa nyito can caá can tumaa caá ndicaha. Tan tsa tsinu uvi tumaa caá indiqui lee. Tan tsa tsinu uñi, tumaa caá nuu rayiñ caá nuu can. Tan tsa tsinu cumi tumaa caá tasu tsa cuahán ndavá. <sup>8</sup> Tan iyó iñu nditsin tsa intuhun intuhun tsa nyito can. Tan taniñ cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandihí tsi tsa caahán tsi tyehen nduvi tan ñiñu:

Ra ii cuví un; ra ii cuví un; ra ii cuví un.

Jutu Mañi yu, Nyoo, iyó tandihí tunyee iñi tsi un.

Tacan ñi iyó maa un, juvin un cuví Nyoo nda tsanaha tan vityin, tan juvin un cua quitsi.

<sup>9</sup> Tan jacahnú tsa cumi tsa nyito can tsi Nyoo, tan nacuhvá tsi naha tsi tyahvi nyoo tsi ra nyaá nu tyayu can, ra tsa iyó tandihí tyembu. Tan tahan ñi tsaha tsa javahá tsi naha tsi tacan, <sup>10</sup> tsa oco cumi ra tsahnu can naha ra tsicuiñí tsiti ra naha tan jacahnú ra naha tsi ra iyó tandihí tyembu. Tan tsaquín ra naha corona ra naha nu nyaá tyayu can. Tan catyí ra naha:

<sup>11</sup> Jutu Mañi ndi, Nyoo ndi cuví un.

Yooho taahán tsi jacahnú ndi.

Tan taahán tsi tsi un tsa cundaca ñaha un.

Tyin maa un javahá tandihí tsa iyó.

Tan tsa cuenda tsa iyó iñi maa un, tan tsicoq tandihí tsa iyó, catyí ra naha.

### Nu nyehe ra Juan iin tutu tan Mbee Ticatyi Luhlu tsa cuví ra Jesucristo

**5** Tacan tan nyehe yu tyin ra tsa nyaá nu tyayu can ndahá ra iin tutu tsihin ndaha cuaha ra. Tan yihí tuvi tutu can tan nyaá letra ityi nuu tan ityi tsata can. Ndasí tsi tsihin utsa sellu. <sup>2</sup> Tan nyehe yu iin ángel tsa nyee xaan. Tan caná tsa ra tan catyí ra:

—¿Yóo taahán tsi nacani tutu ihya tan jocon sellu ihya? —catyí ra.

<sup>3</sup> Maa tyin ndi intuhun tsa iyó andivi tan nu ñuhu ñayivi, tan tsitsi ñuhu, tan cuví nacani tutu can. Nduve maa náa cuví nyehe nuu tsi. <sup>4</sup> Tan tsacú xaan yu, tsa tsito yu tyin yoñi maa cuví nacani tutu can tan cuví cahvi, tan cuví nyehe nuu tsi. <sup>5</sup> Tacan tan catyí iin ra tsahnu tsa nyaá can tsihin yu:

—Ña vacu ca un. Tyin ra cuví Ndicaha [o cuñí tsi catyi, ra ndacá ñaha], ra cuví tata ra Judá, tan tata ra rey David, ra ican jahá canaa tan juvin ra cua nacani tutu can tan jocon tsa utsa sellu tsa ndasí tutu can —catyí ra.

<sup>6</sup> Tacan tan mahñu tyayu can tan mahñu tsa cumi tsa nyito can, tan mahñu ra tsahnu can naha ra, nyehe yu nyaá nyityi iin Mbee Ticatyi Luhlu. Tan caá ti tumaa caá iin mbee tsa tsahñi nyivi tan jamañi ñi. Tacan caá ti. Tan iyó utsa ndiqui ti tan nyecú utsa tinuu ti. Tan tinuu can cuví tsa utsa tatyí ii tsa jacuhun Nyoo taniñ cahnu nu ñuhu ñayivi. <sup>7</sup> Tan ra Mbee Ticatyi Luhlu can tsahñu ra nu nyaá ra nyaá nu tyayu can tan quihñ ra tutu tsa ndahá ra can nu ndaha cuaha ra. <sup>8</sup> Cuhva tsa quihñ ra tutu can, tandihí tsa cumi tsa nyito can tan tandihí tsa oco cumi ra tsahnu can tsicuiñí tsiti ra naha nuu ra. Tan tsa intuhun intuhun ra tsahnu can naha ra ndahá ra naha arpa tsa iyó cuerda tumaa iyó cuerda nuu guitarras. Tan tsityu cutu tsitsi copa xuhun cuaan ndahá ra naha. Tan cutu can cuví tandihí tsa tsicán tahvi nyivi yihí cuenda Nyoo. <sup>9</sup> Tan tsitá ra naha iin yaa tsa, tan catyí ra naha:

Yooho cuví ra taahán tsi quihin tutu ihya tan jocon un tsa utsa sellu tsa ndasí itsi.

Tyin tsahñi nyivi tsi un. Tan tsihin niñi un jatá un tsi ndi tyin coo vaha ndi tsihin Nyoo.

Tan cuví ndi nyivi ñuu nyihi tan ñuu nahnu tsa iyó taniñ cahnu nu ñuhu ñayivi, nyivi caahán siñ siñ yuhu, tan nyivi siñ siñ tata.

<sup>10</sup> Tsahá un tsa cuví ndi rey tan jutu tsa cuenda Nyoo Jutu yo.

Tan cua cundaca ñaha ndi tsi nyivi iyó nu ñuhu ñayivi, catyí ra naha, tsitá ra naha.

<sup>11</sup> Yahá can tan tsiñi yu ndusu tan nyehe yu nyecú cuenda millón ángel taniñ canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can. <sup>12</sup> Tan ñihi caahán ángel can naha ra, tan catyí ra naha:

Ra Mbee Ticatyi Luhlu tsa tsahñi nyivi,

juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsiñi tuñi tan tandihí tunyee iñi.

Na jacahnu yo tsi ra tan na jacahnu tandihí nyívi tan tandihí tsa iyó tsi ra, tyin cahnu xaan cuví ra, catyí ángel can naha ra.

<sup>13</sup> Tan tsiñi tucu yu tsa caahán tandihí tsa javahá Nyoo; tandihí tsa iyó andivi, tan nu ñuhu ñayivi, tan tsitsi ñuhu, tan tsitsi ndutya ñuhu; tan catyí tsi naha tsi:

—Cahnu xaan cuví ra tsa nyaá nu tyayu.

—Cahnu xaan cuví ra Mbee Ticatyi Luhlu.

Tan tunyee iñi tsa iyó tsi ra naha ña cua cundihí maa tsa iyó tsi.

Tan taahán tsi tsa jacahnu yo tan tyaa yahvi yo tsi ra naha tacan ñi maa —catyí tandihí tsa javahá Nyoo.

<sup>14</sup> Tan catyí tsa cumi tsa nyito can:

—¡Na cuví tsi tacan! —catyí tsi naha tsi.

Tan tsicuiñi tsiti tsa oco cumi ra tsahnu can naha ra tan jacahnú ra naha tsi ra tsa ña cua cundihí maa.

### Nu jocõn ra Jesucristo tsa utsa sellu tsa ndasí tutu can

**6** Tacan tan nyehe yu nu jocõn ra Mbee Ticatyi Luhlu can sellu tsa jihna ñi tsitsi tsa utsa sellu can.

Tan tsiñi yu ndusu iin tsa nyito can tan ndusu tsi cuví tumaa nu caahán savi, tan catyí tsi:

—¡Ñaha, tan nyehe un! —catyí tsi tsihin yu.

<sup>2</sup> Tacan tan nanyehe yu tan nyehe yu iin cuayu cuitsin, tan ra yosó tsi tí ndahá ra iin nduva. Tan ñihí ra iin corona yihí jiñi ra, yacan jahá canaa ra, tan ndi nyaá ca cua jaha canaa ca ra.

<sup>3</sup> Tan tsa jocõn ra Mbee Ticatyi Luhlu can tsa tsinu uvi sellu can, tsiñi yu tsa caahán inga tsa nyito can tan catyí tsi:

—¡Ñaha, tan nyehe un! —catyí tsi tsihin yu.

<sup>4</sup> Tan quitá iin cuayu cuaaha. Tan ra tsa yosó tsi tí ñihí ra ndatu tsa quinyaa ra tsa taxin iyó nu ñuhu ñayivi, tyin tacan tan cahñi tahan nyívi tsi ñi. Tan ñihí ndihí ra iin mityi cahnu cundahá ra.

<sup>5</sup> Tan tsa jocõn ra Mbee Ticatyi Luhlu can tsa tsinu uñi sellu can, tsiñi yu tsa caahán inga tsa nyito can tan catyí tsi:

—¡Ñaha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi tí, ndahá ra iin ticatya. <sup>6</sup> Tan tsiñi yu caahán iin ndusu mahñu tsa cumi tsa nyito can, tan catyí tsi:

—Tumaa tyahví nyívi tsi iin musu tsa iin quívi, tacan yahvi tsa intuhun ñi kilu nuñi. Tacan tucu ñi tsa uñi kilu cebada. Tan ña jatívi ndo acetye tan vinu —catyí ndusu can.

<sup>7</sup> Tan tsa jocõn ra Mbee Ticatyi Luhlu can tsa tsinu cumi sellu can, tsiñi yu tsa caahán intuhun ca tsa nyito can, tan catyí tsi:

—¡Ñaha, tan nyehe un! —catyí tsi tsihin yu.

<sup>8</sup> Tan nanyehe yu, tan nyehe yu iin cuayu cuaan. Tan ra yosó tsi tí nañi ra Tuhun Tsiihí. Tan tsata ra can vatsí inga ra tsa nañi Nu Yucú Añima Ndiyí. Tan ñihí ra naha tunyee iñi tsa cahñi ra naha tsa cuaaha nyívi iyó nu

ñuhu ñayivi. Tyin tsitsi tsa sava nyívi iyó nu ñuhu ñayivi, cua cahñi ra naha sava ñi. Tan cua cahñi ra naha tsi ñi tsihin tsa jacoo ra naha cuatyí, tan tsihin tama, tan tsihin cuehe, tan tsihin quitá xaan iyó nu ñuhu ñayivi.

<sup>9</sup> Tan tsa jocõn ra Mbee Ticatyi Luhlu can tsa tsinu uhun sellu can, nyehe yu xuu altar. Tan ican yucú añima nyívi tsa tsihí tsa cuenda tsa jacoto ñi tuhun Nyoo.

<sup>10</sup> Tan caná tsa ñi tan catyí ñi tyehen:

—Jutu Mañi ndi, ra ii cuví un, tan jandaá un tandihí tsa caahán un tyin javaha un. ¿Ama cua tatsi tuñi un tsi nyívi tsa tsahñi tsi ndi tsa cuenda un? —catyí ñi.

<sup>11</sup> Tacan tan ñihí intuhun intuhun ñi jahma cuitsin tsa cunditsi ñi. Tan catyí ra tsihin ñi na quitatu ñi tan cuatu ñi juhva ca quívi, nda cuanda cahñi nyívi tsi tandihí ca ñi tsa jahá tyiñu tyiñu ra Cristo, ñi tsa taahán tsi cúu tumaa tsihí tucu maa ñi.

<sup>12</sup> Tan tsa jocõn ra Mbee Ticatyi Luhlu can tsa tsinu iñu sellu can, nyehe yu tyin ñihí xaan taán. Tan ndutu-un ñicanyii tumaa tuun jahma nyívi iyó tucuihya iñi. Tan yoo nducuaaha tsi tumaa cuaaha niñi. <sup>13</sup> Tan tiñuu cucoyo tsi nu ñuhu ñayivi tumaa cucoyó tsiti yutya yutun tatun ñihí yahá tatyí.

<sup>14</sup> Tan andivi tsiquihí tuví tsi tumaa tyihí tuví yo iin ndaha tutu. Tan tandihí yucu tan ñuhu nyihí tsa cayucú mahñu ndutya ñuhu nasama nu cayucú tsi. <sup>15</sup> Tan tandihí rey tsa iyó nu ñuhu ñayivi tsihin ra nahnu naha ra, tan ra cuca naha ra, tan ra cuví ityi nuu tsihin andaru naha ra, tan ra iyó xaan tunyee iñi tsi naha ra, tan tandihí nyívi tsa cuví musu, tan ñi tsa ñavin musu cuví, quihví xeehe ñi tsitsi yavi yuu tan tyañu cava tsa iyó yucu nahnu. <sup>16</sup> Tan catyí ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tyayu can tsi ndi tan coto tatsi tuñi ra Mbee Ticatyi Luhlu can tsi ndi.

<sup>17</sup> Tyin tsa tsaá quívi cahnu tsa cua tatsi tuñi ra tsi ndi, tan yoñi cunyee iñi can —catyí ñi.

### Nu ñihí nyívi Israel tuñi cunyaá nutyaan ñi

**7** Tsa yahá can tan nyehe yu nyecú cumi ángel tsa ndihí tsa cumi tutun ñuhu ñayivi ityi nu tuhvá tatyí queé tyin tacan tan ña yaha tatyí nu ñuhu ñayivi tan nu ndutya ñuhu tan nu yutun. <sup>2</sup> Tan nyehe tucu yu queé inga ángel, ityi nu caná ñicanyii, tan ndahá ra tuñi Nyoo nyito. Tan caná tsa ra tsi tsa cumi ángel tsa ñihí ndatu tsa jatívi nu ñuhu ñayivi tan nu ndutya ñuhu. Tan catyí ra tsihin ra naha:

<sup>3</sup> —Ña jatívi naha ndo nu ñuhu ñayivi, ndi nu ndutya ñuhu, tan ndi nu yutun tsa ndi cumañi ca janaha ndi yóo nyívi cuví musu Nyoo, tyin cua tyaa ndi tuñi nutyaan intuhun intuhun ñi —catyí ángel can.

<sup>4</sup> Tan catyí ra tsiñi yu tyin cientu uvi xico cumi mil cuví nyívi Israel tsa tsinyaá tuñi can. <sup>5</sup> Utsi uvi mil nyívi tata ra Judá tsinyaá tuñi, tan utsi uvi mil nyívi tata ra Rubén, tan utsi uvi mil nyívi tata ra Gad, <sup>6</sup> tan utsi uvi mil nyívi tata ra Aser, tan utsi uvi mil nyívi tata ra Neftalí, tan utsi uvi mil nyívi tata ra Manasés, <sup>7</sup> tan utsi uvi mil nyívi tata ra Simeón, tan utsi uvi mil nyívi tata ra

Leví, tan utsi uvi mil nyivi tata ra Isacar, <sup>8</sup> tan utsi uvi mil nyivi tata ra Zabulón, tan utsi uvi mil nyivi tata ra José, tan utsi uvi mil nyivi tata ra Benjamín. Tandihí ñi can tan tsinyaq̄ tuñi Nyoo tsi ñi.

### Nu nyehe ra Juan tsi nyivi nditsí jahma cuitsin

<sup>9</sup> Tsa yahā can tan nyehe yu yucú cuaha nyivi. Tan yofii maa cuví nacahví tsi ñi, tyin cuaha xaan ñi. Yucú nyivi quee tandihí ñuu nyihi tan ñuu nahnu tsa iyó taniñ cahnu nu ñuhu ñayivi. Tan yucú nyivi caahán siñ siñ yuhu. Tan yucú nyivi siñ siñ tata. Tan nyecú ñi nuu ra nyaá nu tyayu, tan nuu ra Mbee Ticatyí Luhlu. Nditsí ñi jahma cuitsin. Tan ndahá ñi ndaha ndicaha. <sup>10</sup> Tan tandihí ñi caná tsa ñi tan catyí ñi:

Nyoo Jutu yo, ra nyaá nu tyayu, tan ra Mbee Ticatyí Luhlu,

juvin ra naha jacacū tsi yo —catyí ñi caná tsa ñi.

<sup>11</sup> Tan tandihí ángel naha ra nyecú ra naha tanñ can-duvi nu nyaá tyayu, nu nyecú ra tsahnu naha ra, nu nyecú tsa cumi tsa nyito. Tan tsicuiñ tsi ra naha tan tsaqujn ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo. <sup>12</sup> Tan catyí ra naha:

Tyehen taahán tsi jacahnu ndi tsi un, Jutu Mañi ndi tyin iyó xaan tsa tsiñi tuñi tsi un:

Nacuhvá xaan ndi tyahvi nyoo tsi un.

Tan jacahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuvi tsi tacan tandihí tyembu, catyí ra naha.

<sup>13</sup> Tacan tan tsicā tuhun iin ra tsahnu can tsi yu tan catyí ra:

—¿Yóo nyivi cuví ñi nditsí jahma cuitsin ihya? ¿Tan ndáa ityi quee ñi? —catyí ra.

<sup>14</sup> Tan catyí yu tsihin ra:

—Maa un tsitó, tata.

Tan catyí ra tsihin yu:

—Nyivi ihya cuví ñi nyehe tundoho cahnu. Maa tyin nacatyā ñi jahma ñi tsihin niñi ra Mbee Ticatyí Luhlu tan nducuitsin tsi. <sup>15</sup> Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan ñiñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tsihin tsa nyaá ra tsihin ñi.

<sup>16</sup> Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñi ñi tsihin tsa ihñi. <sup>17</sup> Tyin ra Mbee Ticatyí Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihí ndutya nuu ñi —catyí ra tsihin yu.

### Nu joçon ra Jesucristo tsa tsinu utsa sellu tan nu quita iin ángel tsihin iin cuu xuhun cuaan

**8** Tan tsa joçon ra Mbee Ticatyí Luhlu tsa tsinu utsa sellu tsa ndasí tutu can, ndutaxin nda andiví tumaa sava hora.

<sup>2</sup> Yahā can tan nyehe yu nyecú utsa ángel ityi nuu Nyoo. Tan intuhun intuhun ra naha quihjn cuenda ra

naha iin trompeta. <sup>3</sup> Yahā can tan tsaq̄ inga ángel tsa ndahá iin cuu xuhun cuaan. Tan tsinyaq̄ nyityi ra ityi nuu altar can. Tan quihjn cuenda ra cuaha xaan cutu, tyin cuhva cuenda ra itsi iin caa ñi tsihin tsa tsicán tahvi nyivi tsi Nyoo nuu altar xuhun cuaan tsa nyaá ityi nuu tyayu Nyoo. <sup>4</sup> Tan quitá yuhma cutu tan yuhma tsa tsicán tahvi nyivi tsi Nyoo ndaha ra, tan cuahán yuhma can nu nyaá Nyoo. <sup>5</sup> Tacan tan ángel can quihjn ra cuu can tan jacutū ra can tsihin tuun ñuhu tsa quitā nu altar can. Tan tyoso ra can nu ñuhu ñayivi. Tan quitsaha caahán savi, tan iyo cuví. Tan ñihi tatsa, tan quitsaha taán.

### Nu tiví ángel naha ra trompeta

<sup>6</sup> Tacan tan tsa utsa ángel tsa ndahá trompeta can, ndatú ra naha tsa tiví ra naha can.

<sup>7</sup> Tsa tiví iin ángel can trompeta tsa ndahá ra, quitsaha cuún savi tan cucoyó yuu savi, ñihi cayú ñuhu tan sacá nuu niñi tsihin can. Tan tsa yatyin cayú sava ñuhu ñayivi, tan tsa yatyin tucu sava cuhva nyaá cuhu tsitsa tan tandihí cuhva nyaá cuhu cuii.

<sup>8</sup> Tan tsa tiví tsa tsinu uvi ángel can trompeta tsa ndahá ra, nyehe yu cayú tumaa iin yucu cahnu. Tan nacavā can mahñu ndutya ñuhu. Tan tsa yatyin sava ndutya ñuhu can nanduví tsi niñi. <sup>9</sup> Tan tsa tandihí quití iyó tsitsi ndutya ñuhu can tsihñ tsa yatyin sava ti naha ti. Tan tahvñ cuatyí tucu tsa yatyin sava yutun ndoo cuaha tsa iyó tsitsi ndutya ñuhu can.

<sup>10</sup> Tan tsa tiví tsa tsinu uñi ángel can trompeta tsa ndahá ra, nacavā iin tiñuu cahnu. Cayú tsi tumaa cayú yiti. Tan nacavā tsi siqui tsa yatyin ña sava yutya nahnu tan tsa yatyin ña sava nu ndohyo. <sup>11</sup> Tan sivi tiñuu cahnu can cuví Ajenjo. Tan tsa yatyin ña sava ndutya tsa iyó, ndu uvā tsi tumaa tsa uva xaan ajenjo can. Tan cuaha xaan nyivi tsihñ tyin tsihñ ñi ndutya tsa ndu uvā can.

<sup>12</sup> Tan tsa tiví tsa tsinu cumi ángel can trompeta tsa ndahá ra, ndu naq̄ tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu ndunaq̄ tsi naha tsi. Tan tsa cuenda tsa ndunaq̄ juhva ñicanyii, ndunaq̄ nu ñuhu ñayivi cumi hora tsa iin iin nduvi. Tan tsa cuenda tsa tiví juhva yoo tan tiñuu, ña ndunditsin maa nu ñuhu ñayivi cumi hora tsa iin iin tsacuaa.

<sup>13</sup> Yahā can tan nyehe yu iin ángel ndavá ra mahñu andiví tan tsiñi yu tsa caahán ra. Tsihin tsa ñihi ndusu ra catyí ra:

—jNdahvi nyivi iyó nu ñuhu ñayivi tsa cua tiví tsa uñi ca ra ángel naha ra trompeta tsa ndaha ra naha! —catyí ángel can.

**9** Tacan tan tsa tiví tsa tsinu uhun ángel can trompeta tsa ndahá ra, nyehe yu quee iin tiñuu ityi andiví. Tan nacavā can nu ñuhu ñayivi. Tan quihjn cuenda can ndaha tucu tsa cuenda yavi cunu tsa nduve maa nuu tsindihí. <sup>2</sup> Tacan tan nuñā can yuhu yavi can. Tan quitā cuaha yuhma tumaa quitá yuhma tsitsi iin ono cahnu. Tan tyasñ yuhma can nuu ñicanyii tan nasacā nuu can tsihin tatyí. Tan ndunaq̄ nu ñuhu

ñayivi. <sup>3</sup> Tan tsitsi yuhma can quitā tica xama. Tan ndava tì naha tì nu ñuhu ñayivi. Tan ñihì tì naha tì ndatu tsa tyaa tì naha tì tsi nyivi tumaa tyaá tujuhma tsa iyó nu ñuhu ñayivi. <sup>4</sup> Quihìn tì naha tì tuhun tyin na ña jativì tì naha tì cuhu tsa iyó nu ñuhu ñayivi, ndi cuhu cuii, tan ndi yutun. Maa tyin na tyaa tì naha tì tsi nyivi tsa nduve tuñi Nyoo nyaá nutyaan. <sup>5</sup> Ña ñihì ndatu tì naha tì tsa cahñi tì naha tì tsi nyivi, tyin tyaa ñi maa tì naha tì tsi ñi. Tan quihì xico tì tsi ñi uhun yoo. Tan xico uhvi can uhvi tsi tumaa uhvi nyivi tsa tyaá tujuhma. <sup>6</sup> Quivi can nyivi cua nanducu ñi tuhun tsihi. Maa tyin ña cua nañihi ñi can. Tan vasu ndi maa cuñi ñi cùu ñi, tuhun tsihi cua cunu tsi nuu ñi tyin ña cua cùu ñi.

<sup>7</sup> Tica xama can caá tì tumaa caá cuayu tsa tsicá cuatyì. Tan jiñi tì naha tì yihì tsa caá tumaa caá corona xuhun cuaan. Tan nuu tì naha tì caá tumaa caá nuu nyivi. <sup>8</sup> Tan ixi jiñi tì naha tì caá tumaa caá ixi jiñi ñaha. Tan nuhu tì naha tì caá can tumaa caá nuhu ndicaha. <sup>9</sup> Tan soo tì naha tì caá tumaa caá caa. Tan ñihi xaan cundatsán nditsin tì naha tì, tumaa cundatsán carreta cuayu cuaha tsa tsinú nu iyó cuatyì. <sup>10</sup> Tan juhma tì naha tì caá tumaa caá juhma tujuhma, tyin yihì iñu can. Tan tsihin can cua tyaa tì naha tì tsi nyivi tsitsi tsa uhun yoo. <sup>11</sup> Tan iyó iin nu cuvì ityi nuu tsihin tica xama can naha tì. Tan nu ican cuvì tatyì tsa ndacá ñaha yavi cahanu tan cunu tsa nduve maa nu tsindihì. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñi tsi catyì: Nu Janaá.

<sup>12</sup> Tsa yahā iin tundoho, tan cumañi uvi taahan ca.

<sup>13</sup> Tan tsa tivì tsa tsinu iñu ángel can trompeta tsa ndahá ra, tsiñi yu iin ndusu tsa quitā tsitsi tsa cumi ndiqui tsa nyecú tutun altar xuhun cuaan tsa nyaá ityi nuu Nyoo. <sup>14</sup> Tan ndusu can caahán tsi tsihin tsa tsinu iñu ángel tsa ndahá trompeta can, tan catyì tsi:

—Ndatsi tsi tsa cumi ángel tsa nuuhñi yatyin yuhu yutya cahnu Eufrates —catyì ndusu can.

<sup>15</sup> Tacan tan ndatsi ra tsi tsa cumi ángel can, tyin tsa ndatu xaan ra naha ora can, quivi can, yoo can, cuiya can, tyin cahñi ra naha tsi tsa yatyin sava nyivi iyó nu ñuhu ñayivi. <sup>16</sup> Tan tsiñi yu tyin uvi cientu millón andaru tsa yosó cuayu.

<sup>17</sup> Tacan nyehe yu cuayu jahā Nyoo. Tan ra yosó cuayu can naha ra nyaá caa cuaaha, azu tan cuaan yiqui nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu tì naha tì quitā ñuhu tan yuhma tan azufre. <sup>18</sup> Tan tsa yatyin sava nyivi iyó nu ñuhu ñayivi tsihi tsihin tsa uñi tsa quitā yuhu cuayu can naha tì: ñuhu tan yuhma tan azufre. <sup>19</sup> Tyin iyó tunyee iñi tsi tì naha tì tsitsi yuhu tì naha tì tan nu juhma tì naha tì. Tyin juhma tì naha tì caá tumaa caá coo tan nuu juhma tì naha tì caá tumaa caá jiñi coo. Tan tsihin yacan jañicueehé tì naha tì tsi nyivi.

<sup>20</sup> Maa tyin tandihì ca nyivi tsa ndog, ñi tsa ña tsihi tsihin tundoho can, ña jandihì ñi tsa javahá ñi tsa ña vaha. Ndi tsa jacahnú ñi tatyì ña vaha tan ndi tsi tsitoho tsa tsinu tsihin xuhun cuaan, xuhun cuitsin, bronce, yuu, tan yutun: tsitoho tsa ña cuvì nyehe, ndi ña tsiñi,

ndi ña cuvì caca. <sup>21</sup> Ndi ña jandihì ñi tsa tsahñi ñi nyivi, tan javahá ñi tsa tasi. Tan ñiñaha ña jandihì ñi tsa tsicá nuu ñi tsihin rayi, tan rayi ña jandihì ra naha tsa tsicá nuu ra naha tsihin ñaha vasu ndi maa ña tindahā ñi. Tan ña jandihì ñi tsa suhú ñi.

### Ángel tsa ndahá libru luhlu

**10** Tacan tan nyehe yu inga ángel tsa iyó xaan tunyee iñi. Quee ra ityi andivi tan vatsi nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú. <sup>2</sup> Tan ndahá ra iin libru luhlu nuñá nuu tsi. Tan tsañi tsa cuaha ra nu ndutya ñuhu tan tsaha satyin ra nu ñuhu ñayivi. <sup>3</sup> Tacan tan canā tsa ra, tumaa taná ndicaha tsa cuxaán tì. Tan cuhva tsa canā tsa ra, tsiñi yu utsa ndusu tumaa cuvì nu caahán savi, tan intuhun intuhun tsi caahán tsihin ndusu maa tsi. <sup>4</sup> Tsa yahā tsa tsiñi yu tsa utsa ndusu can, tan cua tyaa yu can nu tutu. Maa tyin tsiñi yu caahán iin ndusu nda andivi, tan catyì tsi tsihin yu:

—Naquihin xeehe tuhun tsa cahān tsa utsa ndusu can. Tan ña tyaa un can nu tutu —catyì ndusu can.

<sup>5</sup> Tacan tan ángel tsa nyehe yu tsa tsañi nu ndutya ñuhu tan nu ñuhu ñayivi, jandahā ra ndaha cuaha ra ityi andivi. <sup>6</sup> Tan ángel can catyì ra:

—Na nyehe maa Nyoo ra ña cua cundihì maa, ra tsa javahā andivi tan ñuhu ñayivi tan ndutya ñuhu tan tandihì tsa iyó nuu tsi tyin nduve ca tsa cucuee. <sup>7</sup> Tyin cuhva tsa cua quitsaha tivì tsa tsinu utsa ángel can trompeta tsa ndahá ra, cuhva can cua cundaa tuhun xeehe tsa catyì Nyoo tyin javaha ra, tumaa cahān ra tsihin ra jahā tyiñu tyiñu ra, ra cuvì ndusu yuhu ra —catyì ángel can.

<sup>8</sup> Tan ndusu tsa quitā andivi, tsa cahān jihna tsihin yu, juvin tsi caahán tsihin yu tyehen:

—Cuaahan cuaquihin libru luhlu tsa nandicā tsa ndahá ra ángel tsa tsañi nu ndutya ñuhu tan nu ñuhu ñayivi —catyì tsi.

<sup>9</sup> Tacan tan tsahān yu nu nyaá ángel can tan tsican yu libru luhlu can tsi ra, tan catyì ra tsihin yu:

—Juhun, çatsi itsi. Vixi xaan tsi cua cuvì tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyì ra tsihin yu.

<sup>10</sup> Tacan tan quihìn yu libru luhlu tsa ndahá ra, tsatsi yu. Tsa ndi nyii tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa coco yu itsi, ndu uvā tsi tsitsi yu. <sup>11</sup> Tacan tan catyì ra naha tsihin yu:

—Cuñi tsi tsa cahan nyico un inga tsaha tuhun tsa caahán Nyoo siqui nyivi tsa iyó ñuu nyihi tan ñuu nahnu, tan nyivi caahán siin siin yuhu, tan siqui ra cuvì rey naha ra —catyì ra tsihin yu.

### Nduvi ra tsa cuvì tsandaa naha ra

**11** Tacan tan tsahā ra naha iin ndoo tsi yu. Caá tsi tumaa caá yutun tsa tuhvā yo tyihì cuhva tsihin. Tan catyì ra naha tsihin yu:

—Nduvita tan tyjhi cuhva un vehe ñuhu Nyoo tan altar ra, tan cahvi najava taahan nyivi jacahnú tsi ra tsitsi vehe can. <sup>2</sup> Maa tyin ña tyjhi cuhva un nuquehe vehe ñuhu can, tyin tsa cuenda nyivi inga ñuu cuví can. Cua vaca tsaha ñi nu ñuu ii tsitsi tsa uñi cuiya sasava. <sup>3</sup> Tan yuhu cua jacuhun yu uvi ra tsa cua cuvi tsandaa tan cahan tuhun yu tsitsi tsa mil uvi cientu uñi xico quivi. Tan cunditsi ra naha jahma tucuihya iñi.

<sup>4</sup> Tan tsa nduvi tsandaa can cuví uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayivi. <sup>5</sup> Tan nyivi tsa cua cuñi jañicueehe tsi ra cuví tsandaa can naha ra, cua naa cuii nuu ñi. Tyin cua quita ñuhú yuhu ra naha, tan tsihin can cua cahmi ra naha tsi tandihí nyivi xaan iñi tsi ra naha. <sup>6</sup> Tan iyó ndatu tsi ra naha tsa casí ra naha nu cuun savi tandihí quivi tsa cua cuhva cuenda ra naha tuhun caahán Nyoo tsihin ra naha tsi nyivi. Tan iyó tucu ndatu tsi ra naha tsa jananduvi ra naha niñi ndutya. Tan iyó tucu ndatu tsi ra naha tsa janyehe ra naha tundoho tsi nyivi iyó nu ñuhu ñayivi tsihin tandihí nuu cuehe. Tan cuví javaha ra naha yacan najava tsaha cuñi maa ra naha. <sup>7</sup> Maa tyin tsa cua ndihí cuhva cuenda ra naha tuhun Nyoo tsi nyivi, cua quita quiti xaan yavi cunu can, tan cua cañi tahan ti tsihin tsa nduvi taahan ra cuvi tsandaa can. Tan cua jaha canaa ti tsi ra naha. Tan cua cahñi ti tsi ra naha. <sup>8</sup> Tan cua cava cuñu ñuhu ra naha tsitsi calle ñuu nu tsahñi nyivi tsi Jutu Mañi yo tan tyag ñi tsi ra nuu cruu. Tan cua cuvi ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyivi ñuu can]. <sup>9</sup> Tan tsitsi tsa uñi quivi sasava, cua nyehe tandihí nyivi cuñu ñuhu ra naha; nyivi iyó tandihí ñuu nyihi, nyivi tandihí ñi tata, tan ñi caahán siin siin yuhu, tan ñi iyó ñuu nahnu, cua nyehe ñi cuñu ñuhu ra naha. Tan ña cua cuhva ñi tsa quihí xeehe cuñu ñuhu ra naha tsitsi ñuhu. <sup>10</sup> Tan si xaan cua cuñi ñi tsa cuenda tsa cua cúu ra can naha ra. Tan nda cuanda cua jacuhun ñi regalo tsi tahan ñi tsa cuenda tsa si cuñi ñi tsa cua cúu nduvi taahan rayi cahan tuhun Nyoo tsihin ñi. Tyin cuñi maa ñi tyin tsahá xaan ra naha tundoho tsi ñi. <sup>11</sup> Maa tyin tsa cua yaha tsa uñi quivi sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihí nyivi tsa cua nyehe tyin cua nandoto ra naha, cua nayuhvi xaan ñi. <sup>12</sup> Tan tsa yahá tsa tsihí ra naha tan nyehe yu nandoto ra naha, tan catyí iin ndusu ityi andivi tsihin ra naha:

—Ñaha ndo nyehe

Tacan tan nandaq ra naha ityi andivi tsitsi vico. Tan nyehe nyivi xaan iñi tsi ra naha nu nandaq ra naha. <sup>13</sup> Tan ñihi xaan taq cuhva can. Tan tsitsi ñuu can taní cuaha xaan vehe. Tsitsi tsa utsi utsi vehe, taní intuhun intuhun tsi. Tan tsihí utsa mil nyivi jahá tsa taq can. Tan nyivi tsa ña tsihí, jacahnú ñi tsi Nyoo, ra nyaá andivi, tsa cuenda tsa yuuhví ñi.

<sup>14</sup> Yacan cuví tundoho tsa tsinu uvi tsa nyehe nyivi, maa tyin tsa vatsí tsa tsinu uñi.

**Nu tiví tsa tsinu utsa ángel trompeta tsa ndahá ra**

<sup>15</sup> Tan tsa tiví tsa tsinu utsa ángel can trompeta tsa ndahá ra, tsiñi yu ndusu ñihi xaan ityi andivi, tan catyí tsi:

Tandihí nu ndacá ñaha rey nu ñuhu ñayivi, tsa yahá nanduví tsi tsa tsi Nyoo Jutu yo tan ra Cristo.

Tan ña cua ndihí maa tsa ndacá ñaha ra naha, catyí ndusu can.

<sup>16</sup> Tacan tan tsa oco cumi ra tsahnu tsa nyecú nu nyaá Nyoo, tsicuiñi tsi ra naha tan tsaquin ra naha nuu ra naha nda nu ñuhu. Tan jacahnú ra naha tsi Nyoo. <sup>17</sup> Tan catyí ra naha:

Jutu Mañi ndi Nyoo ndi. Ra iyó tandihí tunyee iñi tsi.

Tacan ñi iyó maa un. Juvín un cuví Nyoo nda tsanaha tan vityin, tan juvín un cua quiti.

Tsahá xaan ndi tyahvi nyoo tsi un,

Tyin tsa naquihín cuenda un tunyee iñi un.

Tan tsa quitsahá ndacá ñaha un.

<sup>18</sup> Tan vasu ndi maa cuxaán nyivi iyó tandihí ñuu nahnu.

Maa tyin tsa tsaq quivi tatsi tuñi un tsi ñi.

Tan tsa tsaq quivi tsa jacutuñi un tsi ndiyi.

Tan cuhva un tsa vaha tsa taahán tsi tsi nyivi jahá tyiñu tyiñu un, ñi tsahá cuenda tuhun caahán un, ñi tsa nacuhvá cuenda añima ñi tsi un, tan jacahnú ñi sivi un.

Vasu ndi maa cahnu cuví ñi o ndaahvi ñi.

Tan tsa tsaq cuhva tsa janaa un tsi nyivi jativí tsi nyivi iyó nu ñuhu ñayivi, catyí ra naha.

<sup>19</sup> Tacan tan nuñá yuvehe ñuhu Nyoo tsa iyó gloria, tan tsitsi vehe ñuhu can quituví tsatun cuenda tsa ndoq ra tyiñu tsihin yo. Tan quihví tatsa. Tan ñihí cuvaá tan caahán savi. Tan taq. Tan ñihi xaan cucoyo yuu savi.

**Nu nducú coo xaan tsa iyó ndaha tsi ñaha**

**12** Tacan tan quituví tsa iyo cahnu ityi andivi. Quita iin ñaha tan nditsí ña ñicanyii tumaa nditsí yo jahma. Tan tsañi ña nu yoo. Tan yihí iin corona tsa utsi uvi tiñuu jiñi ña. <sup>2</sup> Tan ñaha ihya ñuhú sehe ña. Tan tsacú xaan ña tsihin tsa cuuhví tsitsi ña, tyin nyehé xaan ña tundoho. <sup>3</sup> Tacan tan quita inga tsa iyo ityi andivi. Tan nyehe yu iin coo xaan tsa iyó ndaha. Cuaha ti tan cahnu ti. Tan iyó utsa jiñi ti, tan utsi ndiquí ti. Tan yihí corona intuhun intuhun jiñi ti. <sup>4</sup> Tan tsihin juhma ti jacoyo ti tsa yatyin sava tiñuu tsa iyó andivi nu ñuhu ñayivi. Tan coo can tsicuiñi ti nuu ñaha tsa cua cacu sehe, tyin cuñi ti catsi ti sehe ña náa cuhva cacu ñi maa tsi. <sup>5</sup> Tan ñaha can jacacu ña iin rayi. Tan juvín ra cua cundaca ñaha tandihí nyivi iyó nu ñuhu ñayivi. Ñihi xaan cua cundaca ñaha ra tumaa tsa tsihin iin tatun tsa cuví caa. Tan tsa yahá cacu ra, naquihín Nyoo tsi ra cuahán ra nu nyaá ra nu tyayu ra. <sup>6</sup> Tan cuahán ñaha can tsinú xeehe ña ñuhu ityi, nu janduvahá Nyoo coo ña, tyin ican cua cuhva ra tsa catsi ña tsitsi tsa mil uvi cientu uñi xico quivi.

<sup>7</sup>Yahā can tan tsicoo cuatyí nda andiví, cañi tahan ángel Miguel tan tandihí ángel tsa cutahán tsihin ra tsihin coo xaan can. Tan coo can tsihin tandihí tatyí ña vaha tsa cutahán tsihin tí, cañi tahan tí tsihin ángel Miguel. <sup>8</sup>Maa tyin ña cuví jahā canaa tí tsa cañi tahan tí. Tan ña ñihí ca tí nu ndoo tí nda andiví tsihin tatyí ña vaha tsa cutahán tsihin tí. <sup>9</sup>Tacan tan tavā Nyoo tsi nu coo xaan can, nu Coo Tsaahnu, tan juvin ñi nu cuví nu ña vaha tan Satanás, juvin nu jandaví ñaha tsi tandihí nyiví iyó nu ñuhu ñayiví. Maa nu tan tatyí ña vaha tsa cutahán tsihin nu cucoyo nahnu nda nu ñuhu ñayiví.

<sup>10</sup>Tacan tan tsiñi yu iin ndusu ñihí xaan ityi andiví, tan catyí tsi:

—Vityin tsa tsaā quiví tsa jacacú Nyoo tsi nyiví. Tsa jahā canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyin tsa tavā ra naha tsi nu tsa tyāā xaan cuatyí siqui ñi nuu ra naha nduvi tan ñiñu.

<sup>11</sup>Tan jaha canaa ñi tsi nu tsihin ñiñi ra cuví Mbee Ticatyi Luhlu, tan tsihin tuhun Nyoo tsa cahāñ ñi tsihin nyiví. Ña nayuhví ñi cúu ñi tan tsahā cuenda ñi ñayiví ñi. <sup>12</sup>Yacan cuenda cūsiñi iñi nyooho tsa iyó andiví. Maa tyin ñandahví nyiví tsa iyó nu ñuhu ñayiví tan nu ndutyā ñuhu! Tyin nu ña vaha nacavā nu nu ñuhu ñayiví nu yucú ñi. Tan xaan xaan cuñi nu tyin tsitó nu tyin ña cuaha ca quiví tan cundihí tsa jandaví ñaha nu tsi ñi.

<sup>13</sup>Tan tsa nyehē nu coo xaan tsa iyó ndaha can tyin nacavā nu nu ñuhu ñayiví, quitsahā nyaá ndaha nu tsi ñaha tsa tsicoo sehe yñi can. <sup>14</sup>Maa tyin tsicoo uvi nditsin nahnu ñaha can tan caá can tumaa caá nditsin tasu. Tsicoo can tyin tacan tan cuví ndava ña tan cuhun ña cunu xeehe ña nu tsiquí nu ña cuví ñihí coo can tsi ña. Ican cuví nu cua ñihí ña tsa catsi ña tsitsi tsa uñi cuiya sasava. <sup>15</sup>Tan nu coo can tavā nu ndutyā tsihin yuhu nu, tyin coo yutya cahnu, tan tañi ñaha can tsitsi yutya can. <sup>16</sup>Maa tyin ñuhu ñayiví jatyinyeē tsi tsi ña, tyin ndatā tsi tan nanyee yutya tsa javahā nu coo tsihin ndutyā tsa quitā yuhu nu. <sup>17</sup>Tan tsa ña cuví jaha canaa nu tsi ña, quitsahā cañi tahan nu tsihin nyiví cuví tata ña, ñi tsa tyaá yahvi tuhun caahán Nyoo, tan nyicún ñi tsihin tsa ñiñi añima ñi tsa nditsa tsa caahán ra Jesucristo.

### Nu nyehé ra Juan uvi quitā caquiñi

**13** Tan tsinyaa nyityi yu nu nyiti yuhu ndutyā ñuhu, nyehē yu quitā iin quitā caquiñi nu ndutyā ñuhu can. Tan iyó utsa jiñi tí, tan utsi ndiquí tí. Tan iin tan iin ndiquí tí yihí iin corona. Tan intuhun intuhun jiñi tí nyaá iin sivi tsa caahán ndavaha ñi tsi Nyoo. <sup>2</sup>Quitā caquiñi can caá tí tumaa caá cuiñi. Tsaha tí caá tumaa caá tsaha oso. Tan yuhu tí caá tumaa caá yuhu ndicaha. Tan nu coo xaan tsa iyó ndaha can tsahā nu ndatu tsi quitā caquiñi can tsa cunyaa tí nu tyayu nu. Tan tsahā nu ndatu tsi tí tsa cundaca ñaha tí. <sup>3</sup>Tan nyaá iin nu caahví tsa cua cahñi tsi tí jiñi tí, maa tyin ndahā nu caahví can. Tan tsa nyehē nyiví iyó nu ñuhu ñayiví ihya can, iyo xaan cuñi ñi. Tan quitsahā nyicún ñi tsi tí. <sup>4</sup>Tan jacahnú ñi tsi nu coo xaan can, tyin tsahā nu ndatu tsi quitā can. Tan jacahnú tucu ñi tsi quitā can, tan catyí ñi:

—¿Yoñi maa cuví tumaa cuví quitā ihya? ¿Tan yoñi cuví cañi tahan tsihin tí? —catyí ñi.

<sup>5</sup>Tan ñihí tucu quitā can ndatu tsa cahan ndasi tí tan cahan tí ndavaha ñi siqui Nyoo. Tan cua cundaca ñaha tí uvi xico uvi yoo. <sup>6</sup>Tacan javahā tí: Cahāñ tí tsi Nyoo. Cahāñ tí ndavaha ñi nu iyó ra, tan sivi ra, tan tsa iyó andiví. <sup>7</sup>Tan tsicoo tucu ndatu tsi tí tsa cañi tahan tí tsihin nyiví yihí cuenda Nyoo nda cuenda cuví jaha canaa tí tsi ñi. Tan ñihí ndatu tucu tí tsa quihí ndaha tí tsi nyiví ndihí ñi tata, nyiví caahán siñ siñ yuhu, nyiví iyó tandihí ñi ñuu nyihí, tan ñuu nahnu. <sup>8</sup>Tan nyiví tsa ña cua coo ñayiví tsa tsihin ra cuví Mbee Ticatyi Luhlu, ra tsa tsiñi, ña cua coo ñi ñayiví tsa can tsa cuenda tyin ña tsinyaa sivi ñi nu libru ra tsa ndi cumañi ca tsinu ñuhu ñayiví. Tandihí maa ñi can cua jacahnú ñi tsi quitā caquiñi can.

<sup>9</sup>Tatun yihí ndo iyó soho ndo, tyāā soho ndo tuhun ihya: <sup>10</sup>Nyiví tyihí tsi inga nyiví vehe caa, cua cuhun tucu maa ñi vehe caa. Tan nyiví tsa tsahñi tsihin tsa xaan, juvin ñi maa tsihin can cua cúu ñi. Yacan cuenda nyooho tsa yihí cuenda Nyoo cuñi tsi cunyeē iñi ndo tan tsinu iñi ndo tsi ra.

<sup>11</sup>Yahā can tan nyehē yu quitā inga quitā caquiñi tsitsi ñuhu. Tan iyó uvi ndiquí tí, caá can tumaa caá ndiquí mbee ticatyí luhlu. Maa tyin caahán tí tumaa caahán coo xaan tsa iyó ndaha can. <sup>12</sup>Tan ndacá ñaha tí tumaa ndacá ñaha inga quitā caquiñi can. Tan nyehé inga quitā can tsa ndacá ñaha tí. Tan natyuhú tí tsi ñuhu ñayiví tan nyiví iyó nu tsi na jacahnú ñi tsi inga quitā caquiñi tsa cuñi cúu jahā tsa caahvi tsa tsinyaa tsi tí.

<sup>13</sup>Tan cuaha xaan tsa iyo javahā tí nda cuenda quitā ñuhu andiví tan janacavā tí can nu ñuhu ñayiví tyin nyehē nyiví. <sup>14</sup>Tan jandaví ñaha tí tsi nyiví iyó nu ñuhu ñayiví tsihin tsa iyo tsa cuví javaha tí nuu quitā caquiñi tsa jihna ñi. Tavā tyiñu tí na javaha ñi iin tsitoho quitā caquiñi tsa tyahnyā caahvi tsihin mityi, tan ña tsiñi tí. <sup>15</sup>Tan quitā caquiñi tsa tsinu uvi can tsicoo ndatu tsi tí tsa cuhva tí tsa coo nyito tsitoho quitā caquiñi tsa jihna can tyin tacan tan cuví cahan tsi tan cahñi tsi tandihí nyiví tsa ña cua jacahnú itsi. <sup>16</sup>Tan siñ tyin catyí tsi tyin cunyaa tuñi tsi tandihí nyiví; nyiví nyihí, nyiví tsahnu, nyiví cuca, nyiví ndaahvi, nyiví iyó nuña, tan nyiví iyó tsitoho. Tan cua cunyaa tuñi can ndaha cuaha ñi a nutyaan ñi. <sup>17</sup>Tan yoñi maa cuví jata tan xico tatun nduve tuñi can nyaá tsi ñi, o tatun nduve sivi tí, o número sivi tí nyaá tsi ñi. <sup>18</sup>Tuhun ihya cuñi xaan tsi tsa tsiñi tuñi. Nyiví cutuñi iñi, na jaha cuenda ñi número quitā caquiñi can. Tyin número rayñi cuví can. Tan número can cuví iñu cientu uñi xico iñu.

### Nu tsitá cientu uvi xico cumi mil nyiví iin yaa tan jacahnú ñi tsi Nyoo

**14** Yahā can tan nyehē yu tsi ra cuví Mbee Ticatyi Luhlu, nyaá nyityi ra jiñi yucu Sión. Tan yucú cientu uvi xico cumi mil rayñi tsihin ra. Ra ihya naha ra cuví ra tsa nyaá sivi ra tan sivi Jutu ra nutyaan. <sup>2</sup>Tacan tan tsiñi yu cucayú ityi andiví, tumaa cucayú yutya nahnu, tan tumaa caahán savi tsa ñihí xaan, o tumaa

cuví nu javacú ra naha guitarra cuaha. <sup>3</sup> Tan tsitá ra naha iin yaa tsaa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandihí ra tsahnu naha ra. Tan yoñi maa cuví cutuhva yaa can, maa ñi maa tsa cientu uvi xico cumi mil rayí tsa cacú nu ñuhu ñayivi cuví tsitá can. <sup>4</sup> Ra ihya naha ra cuví ra tsa ña tsi-cá nuu tsihin ñaha, tyin ii ra naha. Tan nyicún ra naha tsi ra cuví Mbee Ticatyi Luhlu tandihí ñi ityi cuahán ra. Cacú ra naha tan juvin ra naha jamañí tsi ra naha nuu Nyoo tan nuu ra cuví Mbee Ticatyi Luhlu tsa jihna ñi. <sup>5</sup> Yoñi cuví catyi tyin vatya ra naha, tyin tsa cuenda Nyoo nduve ca cuatyí ra naha iyó tan yucú ra naha nu nyaá ra nu tyayu ra.

### Tuhun tsa jacoto uñi ángel

<sup>6</sup> Tacan tan nyehe yu ndavá inga ángel ityi andivi. Tan nyisó ra tuhun Nyoo tsa ña cua cundihí maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyivi iyó nu ñuhu ñayivi; nyivi iyó tandihí ñi ñuu nahnu, tan ñuu nyihi, nyivi tandihí ñi tata, tan nyivi caahán siin siin yuhu. <sup>7</sup> Tan ñihi xaan cahán ra tan catyí ra:

—Nayuhvi ndo tsi Nyoo, tan jacahnu ndo tsi ra. Tyin tsa tahán tsi cuhva tsa cua cutuñi nyivi. Jacahnu ndo tsi ra javahá andivi tan ñuhu ñayivi, tan ndutya ñuhu tan ndohyo —catyí ángel can.

<sup>8</sup> Tan catyí inga ángel tsa vatsí nyicún tsi ra:

—Tsa nduvá ñuu Babilonia tsa cuví ñuu cahnu, tsa taní tsi. Tyin nyivi iyó ñuu can jacuahá ñi tsa caquiñi tsa javahá ñi tsi inga nyivi iyó nu ñuhu ñayivi. Tumaa tsa tsiñi ñi tsihin vinu ña vaha, jahá ñi Babilonia cuví can —catyí ángel can.

<sup>9</sup> Tacan tan vatsí tsa tsinu uñi ángel, tan ñihi cahán ra tan catyí ra:

—Tatun ndáa nyivi jacahnu tsi quití caquiñi can tan tsitoho tí, o cuhva ñi tsa cunyaa tuñi tí nutyaan ñi o ndaha ñi, <sup>10</sup> cua nyehe xaan ñi tundoho tyin cua tyihi Nyoo tsi ñi nu ñuhu, tan nu azufre. Tumaa tsa cua jacocho ra vinu xaan tsi ñi nuu ángel tan nuu ra cuví Mbee Ticatyi Luhlu cuvi can. <sup>11</sup> Tan ña cua cundihí maa tsa quita yuhma nu nyehé ñi tundoho, tan ña cua quitatu maa ñi nduvi tan ñiñu. Ñi ihya cuví ñi tsa jacahnú tsi quití caquiñi can tan tsi tsitoho tí, tan tsahá ñi tsi ñi cunyaa tuñi sivi tí. <sup>12</sup> Yacan cuenda nyivi yihé cuenda Nyoo, tan tyaá yahvi ñi tuhun caahán ra, tan tsinú ñi ñi tsi ra Jesús, cuñí tsi tsa cunyeé iñi ñi —catyí ángel tsa tsinu uñi can.

<sup>13</sup> Tacan tan tsiñi yu iin ndusu tsa quee nda andivi, tan catyí tsi tsihin yu:

—Tyaa tuhun ihya: “Vityin tan ityi nuu, sií xaan cua cuví tsi nyivi cua cúu tun tsinú iñi ñi tsi Jutu Mañi yo.”

Tan catyí Tatyí Ii Nyoo:

Nditsa, sií xaan cua cuví tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

### Nu cua tatsi tuñi Nyoo tsi nyivi

<sup>14</sup> Tacan tan nyehe yu iin vico cuitsin. Tan nu vico can nyaá iin ra caá tumaa caá ra ñuu ñayivi. Yihé corona xuhun cuan jiñi ra. Tan ndahá ra iin mityi yacua tan xaan. <sup>15</sup> Tan quitá inga ángel tsitsi vehe ñuhu tan ñihi xaan caná tsaa ra tsi ra nyaá nu vico can. Tan catyí ra: —Vityin jahá tyiñu tsihin mityi un, jataca cosecha un tsa iyó nu ñuhu ñayivi. Tyin tsa tsaá cuhva, tan tsa iyó nu ñuhu ñayivi tsa tsityí tsi —catyí ra.

<sup>16</sup> Tacan tan ra tsa nyaá nu vico can jayahá ra mityi ra nu ñuhu ñayivi, tan naquihín ra tsa iyó nuu tsi.

<sup>17</sup> Tacan tan quitá inga ángel tsitsi vehe ñuhu tsa iyó andivi. Tan juvin ñi ndahá tucu ra iin mityi yacua tsa xaan. <sup>18</sup> Tan quitá inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan caná tsaa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juvin, tan cahnya cuenda ndoco yucu vixi tsa nañi uvas tsa iyó nu ñuhu ñayivi, tyin tsa tsityí tsi —catyí ra.

<sup>19</sup> Tan jayahá ángel can mityi ra nu ñuhu ñayivi tan tsahnya ra uvas can. Tan tyihí ra itsi iin nu tyihí ra tyin cua cuhñi ra itsi tan quita ndutya tsi. Tan yacan cuñí tsi catyí tsa cua tatsi tuñi Nyoo tsi nyivi. <sup>20</sup> Tan nacuhñi ra uvas can ityi tsata ñuu, tan cuñí tsi catyí tyin cuaha xaan nyivi tsihí, tan nu cuví can, cuaha xaan cuaha xaan ñiñi ñi tsatí. Tan tsaá tsi nda nu sucun nu yihé frenu yuhu cuayu, tan tsinú tsi tumaa uñi cientu kilómetro.

### Nu quitá ndihí utsa taahan ña tundoho tsa cua nyehe nyivi

**15** Nyehe yu inga tsa iyo cahnu andivi tan nayuhvi xaan yu, nyehe yu utsa ángel tsa vatsí ndacá utsa taahan ña tundoho. Tsihin tundoho ihya cua cundihí tsa xaan cuñí Nyoo nyehé ra tsi nyivi tsa ña tyaá yahvi tuhun caahán ra.

<sup>2</sup> Tan nyehe tucu yu iin tsa caá tumaa caá ndutya ñuhu tsa tsinú tsihin yutyí. Tan tumaa tsa nasaca ñuhu tsihin tsi. Tan nyivi tsa cunyeé jahá canaa tsi quití caquiñi can tan tsi tsitoho tí, tan ña tsinyaá número sivi tí tsi ñi, tandihí ñi tan yucú ñi yuhu tsa nyehe yu can. Tan ndahá ñi tsa caá tumaa guitarra tsa tsahá Nyoo tsi ñi. <sup>3</sup> Tan tsitá ñi yaa ra Moisés, ra jahá tyiñu tyiñu Nyoo, tan yaa ra cuví Mbee Ticatyi Luhlu. Tan catyí yaa can tyehen:

Cahnu tan iyo xaan caá tandihí maa tsa javahá un, Nyoo, Jutu ndi, iyó tandihí tunyee iñi tsi un.

Ndoo xaan tan nditsa xaan ityi un, Yoocho Rey cuenda tandihí nyivi iyó nu ñuhu ñayivi.

<sup>4</sup> ¿Yóo ña cua nayuhvi tsi un, yoocho Jutu Mañi ndi? ¿Yóo ña cua jacahnu tsi un?

Tan intuhun ñi maa un cuví ra ii.

Tan cua quitsi nyivi quee tandihí maa ñuu, tan cua jacahnu ñi tsi un,

tyin nyehe ñi tsa vaha tsa javahá un, catyí yaa tsitá ñi.



<sup>5</sup> Tacan tan nyehe yu nuña yuvehe ñuhu tsa nyaá nda andivi nu yucú vaha nduvi tabla tsa nyaá ley Nyoo nuu. <sup>6</sup> Tan quitá utsa ángel tsa vatsí ndacá tsa utsa tundoho can tsitsi vehe ñuhu can. Nditsí ra naha jahma vaha, cuitsin tan xiñu. Tan yihí cinturón xuhun cuaan yiquí nyica tsa intuhun intuhun ra naha. <sup>7</sup> Tacan tan iin tsa nyito can, tsahá can intuhun intuhun coho xuhun cuaan tsi tsa intuhun intuhun tsa utsa ángel can. Tan tsity maa can tsihin tsa xaan Nyoo tsa cua tatsi tuñi ra tsi nyivi. Ra ican ña cua cundihi maa tsa iyó ra. <sup>8</sup> Tan tsity maa tsitsi vehe ñuhu can tsihin yuhma tsa cuenda tsa cahnu xaan cuví Nyoo tan tsa cuenda tunyee iñi tsa iyó tsi ra. Tan yoñi maa cuví quihvi tsitsi vehe ñuhu can tsitsi tsa ndi cumañi ndihi tsa utsa tundoho tsa vatsí ndacá tsa utsa ángel can.

### Coho tsa yihí tundoho tsa cua jaquitsi tsa utsa ángel

**16** Tacan tan tsiñi yu iin ndusu ñihi xaan tsa quitá tsitsi vehe ñuhu nu nyaá Nyoo. Tan catyí tsi tye-hen tsihin tsa utsa ángel can:

—Cucacoyo ndo tsa yihí tsitsi coho ndahá ndo juvin siqui nyivi iyó nu ñuhu ñayivi, tyin Nyoo cua tatsi tuñi ra tsi ñi —catyí ndusu can.

<sup>2</sup> Tacan tan tsahán iin ángel can tsicoyo ra tsa yihí tsitsi coho ra siqui nyivi tsa nyaá tuñi quitá caquiñi can tan jacahnú ñi tsitoho ti. Tan quitá nu caahvi xaan tan uhvi xaan tsi ñi.

<sup>3</sup> Tacan tan coyo tsa tsinu uvi ángel can tsa yihí tsitsi coho ra nu ndutya ñuhu. Tan ndutya ñuhu can nanduví tsi niñi tumaa niñi ndiyi, tan tandihí tsa nyito tsa iyó tsitsi ndutya ñuhu can tsihi tsi.

<sup>4</sup> Tacan tan coyo tsa tsinu uñi ángel can tsa yihí tsitsi coho ra nu yutya nahnu tan nu ndohyo tan nanduví tsi niñi. <sup>5</sup> Tacan tan tsiñi yu tsa caahán ángel cuenda ndutya tan catyí ra:

—Jutu Mañi yu, yooho vaha xaan un tyin tatsí tuñi un tsi nyivi tyehe. Jutu Mañi yu, Nyoo ii cuví un tyin nda nu quitsahá tandihí tan nda cuenda vityin tacan ñi iyó maa un. <sup>6</sup> Tatsí tuñi un tsi ñi tyin maa ñi tsatí ñi niñi nyivi yihí cuenda un tan niñi ra cuví ndusu yuhu un. Tan vityin yooho tumaa tsa jacohó un niñi tsi ñi tyin tacan taahán maa tsi tsi ñi —catyí ángel can.

<sup>7</sup> Tan tsiñi tucu yu nacahan inga ndusu ityi nu nyaá altar Nyoo tan catyí tsi tyehe:

—Nditsa, Nyoo, Jutu Mañi yu, ra iyó tandihí tunyee iñi tsi, vityin tsa tatsí tuñi un tsi nyivi tsihin tsa nditsa tan tsihin tsandaa —catyí ndusu can.

<sup>8</sup> Tan coyo tsa tsinu cumi ángel can tsa yihí tsitsi coho ra nu ñicanyii. Tacan tan tsicoo ndatu tsi ñicanyii can tsa cahmi tsi tsi nyivi tsihin ñuhu tsi. <sup>9</sup> Tan tandihí nyivi ndasi xaan cayú ñi jahá ñicanyii can. Maa tyin vasu ndi maa tacan tahanan ñi, ña nasamá ñi cuhva tsicoo ñi, tan ndi ña jacahnú ñi tsi Nyoo. Tan cahán ñi ndavaha ñi siqui Nyoo, ra tsa jaquitsí tundoho can siqui ñi.

<sup>10</sup> Tan coyo tsa tsinu uhun ángel can tsa yihí tsitsi coho ra siqui tyayu quitá caquiñi can. Tan ndunaá nu ndacá ñaha ti. Tan nyivi cuenda ti, nda cuanda tsatsí yihí ñi yaa ñi tsa cuenda tsa nyehé xaan ñi tsa uhvi.

<sup>11</sup> Maa tyin vasu ndi maa tacan cuví, ña jandihí ñi tsa javahá ñi tsa ña vaha. Tan cahán ñi ndavaha ñi siqui Nyoo, ra nyaá andivi, tsa cuenda tsa uhvi nu caahvi ñi.

<sup>12</sup> Tan coyo tsa tsinu iñu ángel can tsa yihí tsitsi coho ra nu yutya Eufrates cahnu. Tan ndoco ndutya can tyin tacan tan nuña ityi nu cua yaha ra rey tsa quee ityi nu caná ñicanyii naha ra. <sup>13</sup> Tacan tan nyehe yu quitá tatyí ña vaha tsa caá tumaa caá sahva yuhu tsa intuhun intuhun quitá. Iin can quitá yuhu quitá caquiñi, inga can quitá yuhu coo xaan tsa iyó ndaha inga can quitá yuhu tsa cuví ndusu yuhu vatya. <sup>14</sup> Tatyí ña vaha can cuví tatyí nu ña vaha, tan nahnu tsa nyityi javahá nahnu. Quitá nahnu, jandu iin nahnu tandihí rey tsa iyó nu ñuhu ñayivi, tyin cañi tahan ra naha quivi tsa quivi janaha Nyoo tyin iyó tandihí tunyee iñi tsi ra. <sup>15</sup> Tan catyí ra Cristo:

—Nyehe ndo tyin tsa vatsí yu tumaa vatsí iin ñasuhu tyin iin ñasuhu sana iñi ndo tan quihvi ra tsitsi vehe ndo tacan yuhu. Siñ xaan cua cuví tsi nyivi ndatú quivi quitsi yu tan tsa iyó vaha jahma ñi tyin quivi cua tsa yu ña cua nducahan nu ñi tyin ña tandiñi ñi —catyí ra Cristo.

<sup>16</sup> Tan cua ndu iin ra cuví rey naha ra nu nañi Armagedón tsihin yuhu hebreo.

<sup>17</sup> Tan coyo tsa tsinu utsa ángel can tsa yihí tsitsi coho ra nu tatyí, tacan tan quitá iin ndusu nu nyaá tyayu Nyoo tsitsi vehe ñuhu tsa nyaá nda andivi. Caná tsa tsi tan catyí tsi:

—Tsa iyó vaha vityin.

<sup>18</sup> Tacan tan vaa ña maa cuví tan caahán savi tan cañi tatsa. Tan ñihi xaan tañ nu ñuhu ñayivi. Tan ña tuhvá maa taán tacan tsa ndi quitsahá iyó nyivi nu ñuhu ñayivi. <sup>19</sup> Tan uñi nu ndatá ñuu cahnu Babilonia can, jahá tsa tañ. Tan tandihí ca ñuu tsa cayucu nu ñuhu ñayivi taní tsi. Nyoo ña naá maa iñi ra tsa javahá nyivi Babilonia. Yacan cuenda janyehé xaan ra tundoho tsi ñi. <sup>20</sup> Tandihí maa ñuhu tsa iyó tsitsi ndutya ñuhu tan tandihí yucu, tandihí maa tsi tsinaá. <sup>21</sup> Tan cucoyo cuaha yuu savi nahnu xaan tsa quee andivi siqui nyivi. Vee xaan tsi. Tumaa vee uvi xico kilu, tacan vee tsa intuhun intuhun yuu savi can. Tan nyivi cahán ñi ndavaha ñi siqui Nyoo tsa cuenda tundoho yuu savi can, tyin cuví tsi iin tundoho cahnu xaan tsa cuenda ñi.

### Nu cua tatsi tuñi Nyoo tsi ñuu ña vaha

**17** Tacan tan quitá iin ángel tsitsi tsa utsa ra tsa ndahá coho can naha ra, natuhvá ra nu nyaá yu, tan catyí ra tsihin yu:

—Ñaha tyin janaha yu tsi un nácaa cua cutuñi ñaha ña vaha tsa tsicá nuu tsihin rayi, ña tsa nyaá nu ndutya cuaha. <sup>2</sup> Tyin ra cuví rey nu ñuhu ñayivi tsicoo ra naha tsihin ña, tan tsa cuenda ña tiví tandihí nyivi iyó nu ñuhu ñayivi —catyí ra tsihin yu.

<sup>3</sup> Tacan tan nyehe yu iin tsa janahá Tatyí Ii Nyoo tsi yu, tan tsindacá ángel can tsi yu nu tsiquí nu nduve maa nyivi iyó, tan juvin ñi ican nyehe yu iin ñaha yosó iin quitá cuaha caquiñi. Nyecú sivi tsa caahán ndavaha ñi tsi Nyoo tsi ti. Iyó utsa jiñi ti tan utsi ndiquí ti. <sup>4</sup> Tan

ñaha can nditsí ña jahma tijinda tan cuaaha. Tan cuaaha xahun xuhan iñi tsi ña, tan yuu vaha, tan perla. Tan ndahá ña iin taza xuhun cuaan tsitú tsihin tsa ña vaha tan tsa caquiñi tsa javahá ña. <sup>5</sup> Tan nyaá iin sivi tsa cuví iin tuhun xeehe tsa ña cutuñi iñi nyivi nutyaan ña. Tan catyí can tyeheh: “Ñaha ihya cuví ñuu Babilonia cahnu, sihi tandihi ñiñaha tsa tsicá nuu tsihin rayi tan sihi tandihi tsa ña vaha tsa iyó nu ñuhu ñayivi.” <sup>6</sup> Tacan tan nyehe yu tyin tsiñi ñaha can jahá tsa tsihi ña niñi nyivi yihí cuenda Nyoo, ñi tsa tsihi tsa cuenda tsa cahán ñi tuhun ra Jesús. Tsa nyehe yu tsi ña, iyo xaan cuñi yu. <sup>7</sup> Tacan tan catyí ángel can tsihin yu:

—¿Nacuenda iyo xaan cuñi un? Cua jacoto yu tsi un náa cuñi tsi catyí tuhun xeehe ñaha ihya tan quití caquiñi tsa yosó ña, quití tsa iyó utsa jiñi tan utsi ndiqui. <sup>8</sup> Quití caquiñi tsa nyehe un can, juven tí cuví quití tsa tsicoo tan vityin nduve ca tí iyó. Maa tyin cua quita tí tsitsi yavi cunu tsa nduve nu tsindihí. Ican nyí tí tsa ndi cumañi ca cuhun tí nu cua cundihí cuíi tí. Nyivi iyó nu ñuhu ñayivi, ñi tsa nduve sivi nyaá nu libru Nyoo nda quivi tsinu ñuhu ñayivi, iyo xaan cua cuñi ñi nyehe ñi tsi quití can. Libru can catyí yoo nyivi cua coo cuíi.

<sup>9</sup> Tuhun ihya cuñi tsi tsa cutuñi iñi yo itsi: Tsa utsa jiñi quití can cuñi tsi catyí tsa utsa yucu tsa nyaá ñaha can nuu. <sup>10</sup> Tan juven ñi cuñi tucu tsi catyí can utsa rey. Uhun ra naha tsa yahá tsindaca ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quivi quitsi ra, ña naha cua cundaca ñaha ra. <sup>11</sup> Tan quití caquiñi tsa tsicoo tan vityin nduve ca tí iyó, juven tí cuví iin rey tsitsi tsa utsa taahan rey can, tan cua cuví tucu tí rey tsa tsinu una. Tsa yaha cundaca ñaha nyico tí, tacan tan cua cuhun tí nu cua cundihí cuíi tí.

<sup>12</sup> Tan tsa utsi ndiqui tsa nyehe un can, cuñi tsi catyí utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha ra naha iin ora, iin caa ñi tsihin quití caquiñi can. <sup>13</sup> Tsa utsi rey can inducu ñi cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quití caquiñi can. Tan tandihi ndatu tsa iyó tsi ra naha cua nacuhva ra naha tsi tí. <sup>14</sup> Tan cua cañi tahan ra naha tsihin ra Mbee Ticatyí Luhlu. Maa tyin ra Mbee can, cua jaha canaa ra tsi ra naha. Tyin juven ra yihí ndaha tsi tandihi ra ndacá ñaha. Tan yihí ndaha tucu ra tsi tandihi ra cuví rey naha ra. Tan nyivi yihí cuenda ra, maa Nyoo caná tsi ñi tan nacatsi ra tsi ñi. Tan ñi xaan cuñi ñi nyicún ñi tsi ra.

<sup>15</sup> Tan catyí tucu ángel can tsihin yu:

—Ndutya cuaaha tsa nyehe un can, nu nyaá ñaha tsicá nuu can, yacan cuví nyivi iyó tandihi ñuu nyihi tan ñuu nahnu, ñi caahán siin siin yuhu. <sup>16</sup> Rey tsa cuví tsa utsi ndiqui quití caquiñi tsa nyehe un can, ndasi cua cuñi ra naha nyehe ra naha tsi ñaha tsicá nuu can. Cua nacoo ihñi ra naha tsi ña. Tan cua jatandii ra naha tsi ña; tan cua catsi ra naha cuñu ñuhu ña. Tan cua cahmi ra naha tsi ña. <sup>17</sup> Tyin Nyoo tsahá ra tsa caca iñi rey can naha ra tyin javaha ra naha cuhva cuñi maa Nyoo. Tyin iin ñi cuhva cua caca iñi ra naha, tan cua cuhva ra naha

ndatu tsi quití caquiñi can tsa cundaca ñaha tí tumaa rey nda cuanda cundaa tuhun caahán maa Nyoo.

<sup>18</sup> Naha tsa nyehe un can, juven ña cuví ñuu cahnu tsa ndacá ñaha tsi tandihi ra cuví rey nu ñuhu ñayivi.

### Nu naá ñuu Babilonia

**18** Tsa yahá yacan tan nyehe yu quee inga ángel ityi andivi tan iyó xaan tunyee iñi tsi ra. Tan ndunditsin ñuhu ñayivi jahá tsa nditsin ra. <sup>2</sup> Tan caná tsa ra tsihin tsa ñihi ndusu ra, tan catyí ra:

—Tsa tsindihí nuu ñuu Babilonia cahnu. Nanduví tsi nu iyó tatyí ña vaha, vehe tandihi nuu tatyí ña vaha, tan taca saa ña vaha tsa ña taahán iñi nyivi. <sup>3</sup> Tyin tandihi nyivi tiví ñi tsa cuenda cuatyí javahá ñuu Babilonia can. Ra cuví rey nu ñuhu ñayivi naha ra tumaa tsa tsicoo ra naha tsihin ñaha tsa cuví ñuu Babilonia can. Javahá ra naha cuatyí tsihin ña. Tan nyivi ñuhu ñayivi nducuca ñi tsihin tsa cuaaha xaan tsa yahvi tsa jatá nyivi ñuu can.

<sup>4</sup> Tacan tan tsiñi yu ndusu Nyoo ityi andivi, tan catyí tsi:

—Quita ndo ñuu ihya, nyooho tsa cuví nyivi yu, ña cutahan ndo tsihin nyivi ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundoho tumaa nyehé maa ñi. <sup>5</sup> Tyin tsa canyí tucuti cuatyí nyivi iyó ñuu can, nda cuanda tsaá can nu nyaá yu. Tan ñuhú iñi yu tsa ña vaha javahá ñi. <sup>6</sup> Cuhva ndo juven ñi maa tsa tsahá ñi tsi inga nyivi tsi ñi; cuhva ndo uvi ca tsaha siqui tsa javahá ñi. Tacan janyehe ndo tundoho tsi ñi. Cuhva ndo tundoho nyehe ñi tsa ñihi uvi ca tsaha tan ñavin ca tsa tsahá maa ñi tsi inga nyivi. <sup>7</sup> Yacan cuenda cuhva ndo tsa iyo xaan tahan ñi tsihin tundoho nyehe ñi jaha ndo. Tahan ñi cuhva tsa jacahny xaan ñi tsi ñi tan cusí xaan iñi ñi juven cuhva can janyehe ndo tundoho tsi ñi. Tyin tsicá iñi tsitsi añima ñi: “Ihya nyecú yo tumaa iin reina. Ñavin ñaha ndaahvi cuví yo, tan ndi ña cua nyehe yo tundoho”, cuñi ñi, tsicá iñi ñi. <sup>8</sup> Yacan cuenda iin quivi ñi cua quitsi tundoho siqui ñuu can, cua quitsi tuhun tsihi, tucuihaya iñi, tama, tan cua cayu tsi tsihin ñuhu. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyivi ñuu can —catyí Nyoo.

<sup>9</sup> Ra cuví rey nu ñuhu ñayivi ihya tumaa tsa tsicoo ra naha tsihin ñaha tsa cuví ñuu can, cua vacu xaan ra naha, tan cuihaya cua cuñi ra naha na nyehe ra naha yuhma tsa cayu ñuu can. <sup>10</sup> Tan tsa cuenda tsa yuuhví ra naha tundoho can, nda sava ñi cua cunyecu ra naha. Tan cua catyí ra naha:

—¡Ndahvi yooho, ñuu cahnu Babilonia, ñuu tsa tsicoo cuaaha tunyee iñi tsi! Tyin iin yaha ñi tsaá tundoho nyehé un —cua catyí ra naha.

<sup>11</sup> Tan ra tsa xicó ndaha tyiñu naha ra, juven ñi cua vacu xaan ra naha tan cuihaya cua cuñi ra naha tsa cuenda ñuu can. Tyin yofi ca cua jata tsa xico ra naha. <sup>12</sup> Tyin xicó ra naha xuhun cuaan, xuhun cuitsin, yuu sii caá, perla, jahma linu, jahma seda, tan jahma tijinda cuaaha. Tan xicó tucu ra naha tandihi nuu vitu tami tan náa ndihí tsa tsinu tsihin yiqui nuu landa, tan vitu

sii caá, tan caa tsa cuví bronce, tan caa tsa cuví hierro, tan yuu tsa cuví mármol. <sup>13</sup> Tan xicó tucu ra naha canela, náa ndihí ca yucu tsa quihví tsihin tsa tsatsí yo, tan tsa tami tumaa cutu, tumaa mirra, tan tumaa ndutya tami. Tan xicó tucu ra naha vinu, acetye, yutyi paan vaha, tan trigu. Tan juvin ñi xicó tucu ra naha quití cuenda carga, tan mbee, cuayu, carreta, tan nda cuenda nyivi tsa cuví musu tan xicó ra naha. <sup>14</sup> Tan catyi ra naha tsihin nyivi ñuu can tyehen:

—Nduve ca tsa sii caá tsa tsicoo tsi un, tsa taahán xaan iñi un. Tan tsa tsindihí tandihí tsa cuca un. Tan ña cua ñihi ca maa un tandihí yacan —catyí ra naha.

<sup>15</sup> Ra tsa xicó tandihí can, nducuca ra naha tsa cuenda tsa jatá nyivi ñuu Babilonia can tsa xicó ra naha. Nda sava cua cunyeu ra naha tsa cuenda tsa yuuhví ra naha tsa cua nyehe nyivi can tundoho. Tan cua vacu xaan ra naha tan cuihya cua cuñi ra naha. <sup>16</sup> Tan cua catyi ra naha:

—¡Ndahvi ñuu cahnu can! Cuví tsi tumaa iin ñaha tsa nditsí jahma linu, jahma tijinda cuaaha. Tan cucutú ña tsihin xuhun cuaan, tan yuu sii caá tan perla. <sup>17</sup> ¡Tan iin yaha ñi ndihí tsa cuca xaan can! —cua catyi ra xicó can naha ra.

Tan tandihí ra cuví capitán tsa jacacá yutun ndoo nu ndutya, tsihin nyivi yucú tsitsi can tan tandihí ra jahá tyiñu nu ndutya ñuhu naha ra, nda sava cua ndoo ñi.

<sup>18</sup> Tan tsa cua nyehe ñi yuhma tsa cayú ñuu can, cua cana tsa ñi, tan cua catyi ñi:

—¿Náa inga ñuu tsicoo tumaa ñuu cahnu ihya? Nduve —cua catyi ñi.

<sup>19</sup> Tan cua coso ñi nyaca jiñi ñi, tan cua vacu xaan ñi. Tan cuihya cua cuñi ñi, cua cana tsa ñi, tan cua catyi ñi:

—¡Ndahvi ñuu cahnu can! Tyin tsihin tsa cuca tsi tan nducuca tandihí yoo tsa tsicá nuu nu ndutya ñuhu tsihin yutun ndoo. ¡Tan vityin iin yaha ñi naa tsi! —cua catyi ñi.

<sup>20</sup> Maa tyin nyooho cusii iñi ndo nyehe ndo tsa taahán ñuu can, nyooho tsa iyó andivi, tan nyooho ra tsicá tyiñu ra Cristo tan nyooho ra cuví ndusu yuhu Nyoo, tan tandihí ca nyooho tsa yihí cuenda Nyoo. Cusii iñi ndo tyin tsa cuenda tsa javahá ñi tsa ña vaha tsihin ndo tan tatsí tuñi Nyoo tsi ñi.

<sup>21</sup> Tacan tan iin ángel tsa iyó xaan tunyee iñi tsi, cañihí ra iin yuu tsa caá tumaa caá iin yoso cahnu xaan, tan jacuhun ra can tsitsi ndutya ñuhu, tan catyí ra:

—Tyehen cua cundihí nuu ñuu Babilonia cahnu. Tan ndi iin tsaha ca tan ña cua nyehe ca ndo itsi. <sup>22</sup> Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tiví tiyoo, tan ndi caa. Tan ndi ña cua coo ca ra jahá tyiñu náa ndihí ca tyiñu. Tan ndi ña cua cucayu ca molino. <sup>23</sup> Tan ndi ñuhú tyuma, tan ña cua cayu ca tsitsi ñuu can. Ndi ña cua cuñi ca yo ndusu nyivi nu iyó vico tindaha. Tacan cua cuvi vasu ndi maa ra xico tsa tsicoo ñuu can naha ra, cahnu xaan tunyee iñi tsicoo tsi ra naha, tan jandaví ñaha xaan nyivi iyó ñuu can tsi tandihí nyivi iyó nu ñuhu ñayivi tsihin tuhun tasi.

<sup>24</sup> Tyin cuaha xaan niñi ra cuví ndusu yuhu Nyoo canyí tsitsi ñuu can tyin tsahñi ñi tsi ra naha. Tan canyí tucu niñi inga ca nyivi yihí cuenda Nyoo, tan niñi tandihí nyivi tsa tsahñi nyivi naní cahnu nu ñuhu ñayivi.

**19** Tsa yahá yacan, tan tsiñi yu ndusu nyivi cuaha ityi andivi. Tan catyí ñi:

¡Cahnu xaan cuví Nyoo! Jutu Mañi yo, Nyoo cuví ra ra jacacú tsi yo. Tan tsi maa ra taahán tsi jacahnu yo, tyin iyó xaan tunyee iñi tsi ra.

<sup>2</sup> Tyin tsihin tsa vaha tan tsandaa tan tsa nditsa jacutuñi ra.

Tatsí tuñi ra tsi ñaha tsicá nuu tsa cuví ñuu Babilonia tsa jatívi xaan tsi nyivi iyó nu ñuhu ñayivi tsihin tsa caquiñi tsa javahá ña tsihin ñi.

Tan tatsí tuñi ra tsi ña tsa cuenda tsa tsahñi ña tsi nyivi jahá tyiñu tyiñu ra.

<sup>3</sup> Tan catyí ñi inga tsaha:

—¡Cahnu xaan cuví Nyoo! Yuhma tsa cayú ña, ña cua cundihí maa tsa ndaa tsi ityi siqui —catyí ñi.

<sup>4</sup> Tan tsa oco cumi ra tsahnu tan tsa cumi tsa nyito tsa nyecú nu nyaá tyayu Nyoo, tsicuiñi tsiti ra naha nda nu ñuhu. Tan jacahnu ra naha tsi Nyoo nu nyaá ra nu tyayu ra. Tan catyí ra naha:

—¡Cahnu xaan cuví Nyoo! ¡Na cuvi tsi tacan! —catyí ra naha.

<sup>5</sup> Tan nu nyaá tyayu Nyoo, nacahán iin ndusu, tan catyí tsi:

Jacahnu ndo tsi Nyoo Jutu yo tandihí nyooho tsa jahá tyiñu tyiñu ra, tan tyaá yahvi ndo tsi ra, nyooho nyivi nyihi tan nyivi tsahnu.

**Nu iyó vico tindaha ra Mbee Ticatyí Luhlu tan nyivi tsinú iñi tsi ra**

<sup>6</sup> Tan tsiñi tucu yu ndusu tumaa cuví nu cuaha xaan nyivi yucú, o tumaa ndusu nu cuaha xaan yutya o tsa ñihi xaan caahán savi. Tan catyí tsi:

¡Cahnu xaan cuví Nyoo Jutu yo, ra iyó tandihí tunyee iñi tsi! Tyin tsa quitsahá ndacá ñaha ra.

<sup>7</sup> Na cusii iñi yo tan na cutu yo tsihin tsa sii. Na jacahnu yo tsi ra,

Tyin tsa tsaá cuhva tsa coo yo vico tindaha ra Mbee Ticatyí Luhlu.

Tan yoo cua cuvi yo tumaa ñasihi ra, tan ndatú yo quivi tindaha yo tsihin ra.

<sup>8</sup> Tyin tsa ñihí ndatu yo tsa cunditsi yo jahma cuitsin tsa ña nyahyu ca tsa cuví jahma linu.

Tyin jahma linu can cuñi tsi catyi tsa vaha tsa javahá nyivi yihí cuenda ra.

<sup>9</sup> Tacan tan quitsahá catyí ángel can tsihin yu:

—Tyaa tyehen nu tutu: “¡Sii xaan cuvi tsi nyivi tsa cua cahun nu tindaha ra Mbee Ticatyí Luhlu!”

Tan catyí tucu ra tyehen:

—Tuhun ihya cuví tuhun nditsa Nyoo —catyí ra tsihin yu.

<sup>10</sup> Tacan tan tsicuiñi tsiti yu nuu ángel Nyoo can tsa cua jacahnu yo tsi ra. Maa tyin catyí ra tsihin yu:

—Ña jacahnu un tsi yuhu, tyin yuhu musu Nyoo ñi cuví tucu yu tumaa yooho, tan tumaa tandihí ra yañi un tsa tsinú iñi tuhun nditsa tsa cahān ra Jesucristo. Tsi Nyoo taahán tsi jacahnu yo —catyí ra tsihin yu.

Tyin tsa cahān ra Jesús, yacan cuví tsa jandu iin iñi tsi ra cuví ndusu yuhu ra, ra tsahá cuenda tuhun caahán Nyoo tsihin yo.

### Nu nyehe ra Juan tsi ra tsa yosó cuayu cuitsin

<sup>11</sup> Tacan tan nyehe yu tichó andiví. Tacan tan quituvi iin cuayu cuitsin. Tan ra yosó tsi ti nañí ra Ra Nditsa Tsa Nñi Iñi Jahá Tyiñu Tyiñu Nyoo. Tyin tsihin tsa ndaa jacutuñí ra tsi nyivi, tan ndaa javahá ra tsa cañí tahan ra.

<sup>12</sup> Tan tumaa caá nu cayú ñuhu, tacan caá tinuu ra. Tan cuaha xaan corona yihé jiñi ra. Tan intuhun ñi maa ra tsitó iin sivi tsa nyaá tsi ra. <sup>13</sup> Tan nditsí ra jahma cahyí tsihin niñi. Tan nañí ra Tuhun Nyoo. <sup>14</sup> Tan nyicún andarú andiví tsi ra, nditsí ra naha jahma vaha tsa cuví linu, cuitsin tsi tan ña nyahyu tsi. Tan yosó ra naha cuayu cuitsin. <sup>15</sup> Tan quitá iin mityi xaan yuhu ra, yacan cuví Tuhun Nyoo; tsihin yacan cua jañicueehe ra tsi nyivi iyó nu ñuhu ñayivi. Tan ñihi cua cundaca ñaha ra tsi ñi tsihin tatun tsa cuví caa. Cua tatsi tuñi ra tsi ñi tumaa javahá ra tavá ndutya yucu vixi tsa cuví uva tsihin tsaha ra. Tan cua jacoho ra vinu tsa tsinú tsihin uva tsi ñi, tsehe cuñí tsi catyi tyin cuxaán Nyoo tsihin ñi tan cua tatsi tuñi ra tsi ñi tyin tsahá xaan ñi tsihi tsi Nyoo, ra iyó tandihí tunyee iñi tsi. <sup>16</sup> Nu jahma ra tan nu sihin ra can nyaá letra tsa catyí tyehen: “Ra ihya cuví ityi nuu tsihin tandihí rey. Tan juvin ñi ra cuví ityi nuu tsihin tandihí ra ndacá ñaha naha ra.”

<sup>17</sup> Tacan tan nyehe yu nyaá nyityi inga ángel nu ñi-canyii. Tan ñihi xaan canā tsa ra tsi tandihí saa tsa ndavá ityi andiví, tan catyí ra tsihin ti naha ti:

—Nūu ndo tan ndū iin ndo tan cuxiñi ndo tsa tsahā Nyoo catsi ndo. <sup>18</sup> Cua catsi ndo cuñu ra cuví rey naha ra tan ra cuví ityi nuu tsihin andarú naha ra tsihin tucu ra xaan naha ra. Tan catsi ndo cuñu cuayu tan cuñu ra tsicoso tsi ti naha ra. Catsi ndo cuñu tandihí ra naha, ra iyó tsitoho tan ra nduve tsitoho, tahan ñi nyivi nyihi tan nyivi tsahnu —catyí ra tsihin saa can naha ti.

<sup>19</sup> Tacan tan nyehe yu quití caquiñi can tsihin ra cuví rey tsa iyó nu ñuhu ñayivi tsihin andarú cuenda ra naha. Ndu iin ra naha tsa cua cañi tahan ra naha tsihin ra yosó cuayu cuitsin can tan andarú cuenda ra. <sup>20</sup> Tñin ra yosó cuayu cuitsin can tsi quití caquiñi can iin caa ñi tsihin ra cuví ndusu yuhu vatya can, tyin nuu quití caquiñi can javahā ra vatya can tsa nyityi, tan tsihin yacan jandaví ñaha ra tsi nyivi tsa tsahā cunyaa tuñi quití caquiñi can, tan tsi ñi jacahnú tsitoho ti. Tan jacuhun nyito ra tsi nduvi taahan ra naha nu ñuhu tsa cayú tsihin azufre. <sup>21</sup> Tan tandihí ca ñi tsihi ñi tsihin mityi xaan tsa quitá yuhu ra yosó cuayu cuitsin can. Tan tandihí maa saa, tsatsj xaan ti naha ti cuñu ñi.

### Nu nyehe ra Juan tsa cuenda tsa mil cuiya

<sup>20</sup> Tsa yahā can tan nyehe yu quee iin ángel ityi andiví, ndahá ra ndaha tucu yuvehe yavi cunu tsa nduve maa nu tsindihí. Tan ndahá tucu ra iin cade-na cahnu. <sup>2</sup> Tñin ángel can tsi nu coo xaan tsa iyó ndaha, tsa cuví Coo Tsaahnu can, tan cuví tucu nu ña vaha, tan nañí nu Satanás. Tsahñi ra tsi nu tsihin cadena iin mil cuiya. <sup>3</sup> Tan jacuhun ra tsi nu tsitsi yavi cunu xaan can. Nacasj ra yuhu yavi can, tan tyaā ra iin sellu yuhu can tyin tacan tan ña jandaví ñaha ca nu tsi nyivi iyó nu ñuhu ñayivi, nda yaha mil cuiya. Tsa yaha mil cuiya can, cua ndatsi nyico nu juhva ca quivi.

<sup>4</sup> Yahā can tan nyehe yu nycú cuaha tyayu. Tan nuu can nycú nyivi tsa ñihí ndatu tyin tatsi tuñi ñi tsi nyivi. Tan nyehe tucu yu añima nyivi tsahnyā nyivi jiñi tsa cuenda tsa cahān ñi tuhun Nyoo tsa tsahā cuenda ra Jesús tsi ñi. Nyivi ihya ña jacahnū ñi tsi quití caquiñi can, ndi tsi tsitoho ti, tan ndi ña tsahā ñi cunyaa tuñi ti nutyaan ñi, tan ndaha ñi. Nyehe yu nandoto ñi can tan tsindacā ñaha ñi tsihin ra Cristo tsitsi tsa mil cuiya can. <sup>5</sup> Ñi ihya cuví ñi tsa nandoto tsa jihna ñi. Maa tyin inga ndiyi ña nandoto ñi tyin cua nandoto ñi nda yaha mil cuiya can. <sup>6</sup> iSiñ xaan cuví tsi ñi tsa nandoto jihna tyin nacatsj Nyoo tsi ñi! Tan ña cua cahun ñi anyaya nu tatsi tuñi Nyoo añima ña vaha tsa cua cúu nyivi tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuví ñi tumaa jutu tan cua cundaca ñaha ñi tsihin ra Cristo mil cuiya.

<sup>7</sup> Tsa yaha mil cuiya can, cua ndatsi Satanás nu nyí nu nuuhñi nu. <sup>8</sup> Cua quita nu, jandaví ñaha nu tsi nyivi Gog tan Magog, ñi xaan iñi tsi Nyoo tsa iyó naniñ cahnu nu ñuhu ñayivi. Cua jandu iin nu tsi andarú ñi can tyin cahun ra naha cuatyí. Cuaha xaan ra naha, tumaa cuaha nyiti yuhu ndutya ñuhu. <sup>9</sup> Tacan tan nyehe yu quee ra naha naniñ cahnu nu ñuhu ñayivi. Tan tyañi nduvi ra naha nu iyó nyivi yihé cuenda Nyoo ñuu Jerusalén tsa cuñí xaan Nyoo. Maa tyin Nyoo januu ra ñuhu tsa quee andiví tan tsahmí tsi tsi tandihí ra naha. <sup>10</sup> Tan nu ña vaha tsa jandaví ñaha tsi ñi, jacuhun Nyoo tsi nu anyaya nu cayú ñuhu tsihin azufre, nu jacuhun ra tsi quití caquiñi can tan ndusu yuhu vatya can. Ican cua nyehe nahnu tundoho tacan ñi maa, nduvi tan ñiñu.

### Nu cutuñí nyivi ityi nu nyaá tyayu cuitsin nu nyaá Nyoo

<sup>11</sup> Tacan tan nyehe yu iin tyayu cuitsin cahnu. Tan nyehe yu tsi ra nyaá nuu can. Tan nyehé ra nu naā ñuhu ñayivi tan andiví. Tan ña ñihí tsi numaa cava tsi. <sup>12</sup> Tan nyehe yu tandihí añima nyivi tsihi, tahan ñi nyivi tsahnu tan nyivi nyihi, nycú nyityi ñi ityi nuu Nyoo. Tacan tan nuñā libru tsa nyaá tandihí tsa javahā ñi quivi tsicoso ñi. Tan nuña tucu inga libru nu nycú sivi nyivi tsa cua coo nyito tsihin Nyoo. Ndiyí can cua cutuñi ñi tsa cuenda náa ndihí ca tsa javahā ñi tsa nyaá nu libru can. <sup>13</sup> Tan ndutya ñuhu nacuhvā cuenda tsa añima nyivi tsa tsihi tsa cumí tsi. Tan nu yucú añima

nyivi tsihi tan Tuhun Tsiihi, nacuhva cuenda nahnu aña-ma nyivi tsa yihí ndaha nahnu. Tan tandihi ñi cua tahan ñi nácaa javahā maa ñi. <sup>14</sup> Tacan tan Tuhun Tsiihi can tan nu yucú aña-ma nyivi tsihi can cua jacuhun ndihi Nyoo nduvi taahan can anyaya cahnu nu cayú ñuhu. Tan tsehe cuví tuhun tsiihi tsa tsinu uvi. <sup>15</sup> Juvín ñi ican jacuhun ra tsi nyivi tsa nduve sivi nyaá nu libru nu nyecú sivi nyivi cua coo nyito tsihin Nyoo tacan ñi maa.

#### Nu nyehé ra Juan andivi tsa tan ñuhu ñayivi tsa

**21** Yahā can tan nyehe yu iin andivi tsa tan iin ñuhu ñayivi tsa, tyin andivi tan ñuhu ñayivi tsa tsicoq jihna naq tsi. Tan tacan tucu ndutya ñuhu naq tsi. <sup>2</sup> Yuhu ra Juan nyehe yu ñuu ii tsa cuví Jerusalén tsa tsa quee nda nu nyaá Nyoo andivi, nyehe yu nuu tsi. Tan sii xaan caá cucutu tsi tumaa cucutu iin ñaha cua tindaha. <sup>3</sup> Tan tsiñi yu iin ndusu ñihi tsa quitā nda andivi, tan catyí tsi:

—¡Nyehe jihna! Iyó Nyoo mahñu nyivi. Cua coo ra tsihin ñi. Maa ñi cua cuví ñi nyivi ra. Tan cua cunyata ra tsihin ñi, tan cua cuví ra Nyoo cuenda ñi. <sup>4</sup> Juvín ñi maa ra cua nacuhva ndutya nuu ñi. Ña cua coo ca tuhun tsihi tan ndi tucuihya iñi. Ña cua vacu ca nyivi tyin ña cua nyehe ca ñi tundoho. Tan ña cua nyehe ca ñi tsa uhvi. Tyin tandihi tsa tsicoq, tsa tsindihi tsi —catyí ndusu can.

<sup>5</sup> Tacan tan ra nyaá nu tyayu cahnu can, catyí ra:

—Nyehe jihna. Jandutsaq yu tandihi maa tsa tsicoq.

Tan catyí tucu ra:

—Tyā tuhun caahán yu ihya, tyin tuhun nditsa cuví tsi. Cujita iñi tuhun ihya tyin cua cundaa tsi —catyí ra tsihin yu.

<sup>6</sup> Tsa yahā cahān ra yacan tan catyí tucu ra:

—Tsa iyó vaha tandihi vityin. Yuhu cuví ra jihna ñi, tan yuhu cuví ra cua coo nu cua ndihi quivi: tumaa letra A cuví tsi letra jihna ñi tan tumaa letra Z cuví tsi letra nu ndihi ña. Nyivi tsa na ityi iñi cua cuhva yu ndutya coho ñi; tuhun ihya cuñi tsi catyi: Ñi cuñi tyaa soho tuhun yu, cua cuhva yu ñayivi tsa ña cua naa maa coo ñi, tan nduve yahvi tsi cua coo. <sup>7</sup> Nyivi jahā canaa tsi nu ña vaha, cua ñihi ñi tandihi tsa caahán yu tuhun ihya, tan cua ndoo ñi tsihin can. Tan yuhu cua cuví yu Nyoo ñi tan maa ñi cua cuví ñi sehe yu. <sup>8</sup> Maa tyin nyivi yuuhvi xaan, ñi ña tsinú iñi, ñi quiñi iyó, ñi tsahñi, ñiñaha tsicá nuu tsihin rayii, tan rayii tsicá nuu tsihin ñaha, ñi tasi, ñi jacahnú tsitoho, ñi vatya; tandihi maa nyivi ihya taahán tsi cuhun ñi anyaya cahnu nu cayú ñuhu tsihin azufre, nu cuví tsa tsinu uvi tuhun tsihi, nu tatsí tuñi Nyoo aña-ma ña vaha.

#### Nu nyehé ra Juan nácaa cua cuví ñuu Jerusalén tsa

<sup>9</sup> Tacan tan tsitsi tsa utsa ángel tsa ndahá coho tsitú tsihin tundoho, quitā iin ra tan natuhva ra nu nyaá yu tan catyí ra:

—Cohon tsihin yu tan janaha yu nyivi yihí cuenda ra Cristo tsi un, ñi tsa cuví tumaa ñasihi ra Mbee Ticatyi Luhlu —catyí ra tsihin yu.

<sup>10</sup> Tan janahā Tatyí Ii Nyoo tsi yu tyin tsindacā ángel can tsi yu iin yucu sucun tan cahnu. Tan janahā ra ñuu ii, ñuu Jerusalén cahnu can tsi yu. Juvín ñi cuhva tsa vatsí nuu tsi tsa quee tsi andivi nu nyaá Nyoo. <sup>11</sup> Xiñu xaan ñuu can tsihin tsa sii caá Nyoo. Xiñu xaan tumaa iin yuu vaha tan sii caá, tumaa yuu jaspe, tumaa nyehé yo tsa nyaá inga tsiyo tsihin yutyi, tacan caá tsi. <sup>12</sup> Niñ canduvi ñuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú sivi tsa utsi uvi sehe ra Israel ra cuví tsii tsaahnu yo naha ra. <sup>13</sup> Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tyisó ñicanyii. <sup>14</sup> Utsi uvi yuu yihí nu cacu tsaahnu tsi. Tan nuu yuu can nyecú sivi tsa utsi uvi ra tsa tavā tyiñu ra Mbee Ticatyi Luhlu.

<sup>15</sup> Tan ángel tsa cahān tsihin yu, ndahá ra iin metru tsa tsinu tsihin xuhun cuan, tsihin yacan tyihí cuhva ra ñuu can, tan yuhu cora can tan naniñ canduvi cora ñuu can. <sup>16</sup> Iyó cumi taahan tutun ñuu can. Tan inducu ñi tsa quiihin tan tsa cañi tsi. Tan tyihí cuhva ángel can ñuu can tsihin metru xuhun cuan can. Tan quitā uvi mil uvi cientu kilómetro. Iin ñi cuhva tsa cañi tan tsa sucun tan tsa quiihin. <sup>17</sup> Tacan tan tyihí cuhva ra cora ñuu can. Tan quitā uñi xico cumi metru tsa quiihin, tyihí cuhva ra tumaa tyihí cuhva nyivi.

<sup>18</sup> Tsihin yuu jaspe samā cora ñuu can. Tan maa ñi maa xuhun cuan cuví ñuu can. Tan caá tsi tumaa caá yutyi tun ndoo vaha tsi. <sup>19</sup> Tan tsaha cora can samā tsi tsihin tandihi ñi nuu yuu sii caá: yuu tsa jihna ñi cuví jaspe; tsa tsinu uvi cuví zafiro; tsa tsinu uñi cuví ágata; tsa tsinu cumi cuví esmeralda; <sup>20</sup> tan tsa tsinu uhun cuví ónice; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu iin cuví topacio; tsa tsinu utsi cuví crisoprasa; tsa tsinu utsi iin cuví jacinto; tan yuu nu ndihi ña cuví amatista. <sup>21</sup> Tsa utsi uvi yuhu cora can tsinú tsi tsihin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnu ñuu can, maa ñi maa xuhun cuan cuví tsi, tumaa iin yutyi. Tyin iin yutyi cuví nyehe yo tsa nyaá inga tsiyo tsi tsihin tsi, tacan caá tsi.

<sup>22</sup> Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandihi tunyee iñi tsi, tan ra Mbee Ticatyi Luhlu cuví vehe ñuhu ñuu can.

<sup>23</sup> Ña tsiñi ñuhu tsa jandunditsín ñicanyii ñuu can tan ndi tsa jandunditsín yoo. Tyin juvín ñi maa tsa nditsin Nyoo tan tsa nditsin ra Mbee Ticatyi Luhlu jandunditsín tsitsi ñuu can. <sup>24</sup> Tandihí nyivi tsa cacu aña-ma, cua caca nuu ñi nu nditsin can. Tan ra cuví rey nu ñuhu ñayivi naha ra cua cundaca ra naha tsa cuca ra naha tan tandihi tsa cahnu cuví ra naha ñuu can. <sup>25</sup> Ña cua cundasi yuhu cora tsa tsinu cahñi, tan ña cua coo tsacuaa ñuu can. <sup>26</sup> Tan tandihi tsa cuca, tan tsa cahnu, tsa iyó nu ñuhu ñayivi cua tsa tsi ñuu can. <sup>27</sup> Maa tyin ña cua cuví quihvi tsa caquiñi, ndi intuhun nyivi javahā

tša caquiñi, tan ndi ñi vatya. Intuhun ñi maa nyivi iyó sivi nu libru ra Mbee Ticyati Luhlu cua cuvi quihvi, tan cua coo nyito tshin ra tacan ñi maa.

**22** Tacan tan janahá ángel can iin yutya cuii xaan tsi yu. Nduya tša tsahá tša coo nyito yo cuví. Cuii xaan tsi tumaa cuii iin yutya vaha. Tan quitá ndutya can nuu nyaá tyayu Nyoo tan nu nyaá ra Mbee Ticyati Luhlu. <sup>2</sup> Mahñu tsitsi ityi cahnu ñuu can tan nduvi tsiyo xiin yutya can, nyecú yutun tša tsahá tša coo nyito yo. Tshá tun naha tun tsiti tan iin tan iin yoo. Tan tša iin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyivi iyó nu ñuhu ñayivi. <sup>3</sup> Nduve maa tša ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tshin ra Mbee Ticyati Luhlu. Tan cua jacahnu nyivi yihí cuenda ra tsi ra. <sup>4</sup> Tan cua nyehe tshin nuu ñi tsi ra. Tan cua cunyaa sivi ra nutyaan ñi. <sup>5</sup> Ña cua coo ca tsacuaa ican. Tan nyivi tša cua coo ican ña tsiñi ñuhu ñuhú candili tsi ñi, ndi ñuhú ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tshin ra tacan ñi maa.

#### Nu janahá tsi tyin tša cuyatyin quitsi ra Cristo

<sup>6</sup> Tacan tan catyí ángel can tshin yu:  
—Tuhun ihya cuví tuhun nditsa, tan cuví cuita iñi un itsi tyin cua cundaa tsi. Maa Nyoo Jutu yo ra cahán tshin ra cuví ndusu yuhu ra tahán tsanaha, juvin ra jacuhun ángel ra, tyin janaha ra tsi nyivi jahá tyiñu tyiñu ra náa cua cuvi tša numi ñi —catyí ra.

Tan catyí Jutu Mañi yo:

<sup>7</sup> —¡Tša cuyatyin quitsi yu! —catyí ra.

¡Sii xaan cuví tsi nyivi tša javahá cuhva caahán tuhun Nyoo tša nyaá nu libru ihya!

<sup>8</sup> Yuhu ra Juan, tsiñi yu tan nyehe yu tandihí tuhun ihya. Tša yahá nyehe yu tan tsiñi yu itsi, tsicuiñi tsiti yu tsaha ángel tša janahá itsi tsi yu, tyin jacahnu yu tsi ra.

<sup>9</sup> Maa tyin catyí ra tshin yu:

—Ña jacahnu un tsi yuhu, tyin yuhu, musu Nyoo ñi cuví yu, tumaa yooho tan tandihí ca ra yañi un tša cuví ndusu yuhu Nyoo, tan tumaa tandihí ca nyivi tyaá yahvi tuhun nyaá nu libru ihya. Intuhun ñi Nyoo taahán tsi jacahnu yo —catyí ra tshin yu.

<sup>10</sup> Tan catyí tucu ra tshin yu:

—Ña tyihí xeehe un tuhun Nyoo tša nyaá nu libru ihya, tyin tša yatyin cuii cundaa tsi. <sup>11</sup> Maa tyin jaña ndaha tsi nyivi caquiñi, na javaha maa ñi cuhva cuñi maa ñi. Tan nyivi iyó cuatyí, na coo ca cuatyí ñi. Maa tyin nyivi javahá tša vaha, na jañihi ca ñi javaha ñi tša vaha. Tan nyivi tša jandu íí Nyoo, na cunyicun vaha ca ñi tsi ra —catyí ra tshin yu.

<sup>12</sup> Tan Jutu Mañi yo catyí ra:

—Nyehe ndo. Tša cuyatyin quitsi yu. Tan tyahvi yu tsi intuhun intuhun nyivi tša cuenda tša javahá ñi, a javahá ñi tša vaha o tša ña vaha. <sup>13</sup> Yuhu cuví ra jihna ñi, tan yuhu cuví ra cua coo nu cua ndihí quivi, tša iyó maa yu nda nu quitsahá tandihí tan tacan ñi maa cua coo yu nu cua ndihí tumaa letra A cuví tsi letra jihna ñi tan letra Z cuví tsi letra nu ndihí ña —catyí Jutu Mañi yo.

<sup>14</sup> Sii xaan cuví tsi nyivi tša nacatyá jahma, [ñi janduvahá añima], tyin cua ñihi ñi ndatu catsi ñi tsiti yutun tša tsahá tša coo nyito añima yo. Tan cuví quihvi ñi yuhu cora ñuu can. <sup>15</sup> Maa tyin nyivi javahá tša caquiñi, tumaa ñi tasi, rayii tša tsicá nuu tshin ñaha tan ñiñaha tša tsicá nuu tshin rayii, tan ñi tsahñí, tan ñi jacahnú tsitoho, tan tandihí ñi vatya, tan ñi jandaví ñaha; tandihí maa ñi can, ña cua quihvi ñi tsitsi ñuu can.

<sup>16</sup> Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihí tuhun ihya tsi nyivi tsicá vehe ñuhu. Yuhu cuví nyivi tsahnu ra rey David. Tan cuví tucu yu tata ra. Tan cuví tucu yu tiñuu cahnu tša xiñu xaan, tša caná tša naa ca —catyí ra.

<sup>17</sup> Tatyí Ii Nyoo tan nyivi yihí cuenda ra, ñi tša cuví tumaa ñasiñi ra Mbee Ticyati Luhlu, catyí ñi tyehen:

—Ñaha ñi, Jutu Mañi yu —catyí ñi.

Tan nyivi tša tsiñi tuhun ihya, na catyí ndihí ñi:

—Ñaha.

Tan nyivi na ityi iñi tan tandihí nyivi cuñi quitsi, na quitsi ñi tan coho ñi ndutya tša tsahá tša coo nyito añima yo, tan nduve náa cua tyahvi ñi.

<sup>18</sup> Tan tandihí nyooho tša tsiñi tuhun Nyoo tša nyaá nu libru ihya, cuñi yu catyí yu tsehe tshin ndo: Nyivi tša cua janducuaaha ca tuhun ihya, Nyoo cua janducuaaha ca ra tundoho tša nyaá nu libru ihya siqui ñi. <sup>19</sup> Tan nyivi tša cua quinyaa juhva tuhun Nyoo tša nyaá nu libru ihya, Nyoo cua quinyaa ra tša taahán tsi tsi ñi tša nyaá nu libru tša caahán yóo nyivi cua coo nyito, tan ña cua cuhva ca ra coo ñi ñuu ii. Tan ña cua ñihi ñi tša vaha tša caahán libru ihya tuhun. <sup>20</sup> Tan Jutu Mañi yo, ra tša tsahá cuenda tuhun ihya catyí ra tyehen:

—Tša nditsa tyin tša cuyatyin quitsi yu —catyí ra.

Tan yuhu catyí yu:

—Na cuvi tsi tacan. Ñaha ñi, Jutu Mañi yu, Jesús —catyí yu.

<sup>21</sup> Na naquihin tandihí ndo tša vaha tša tsahá Jutu Mañi yo Jesucristo tsi yo.

Tan na cuvi tsi tacan ñi.